


# Alyawarr Bible



Portions of the Holy Bible in the Alyawarr language of  
Australia

## Alyawarr Bible

### Portions of the Holy Bible in the Alyawarr language of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-11

---

PDF generated using Haiola and XeLaTeX on 11 Nov 2022 from source files dated 27 May 2022

284d4e02-292d-5bd8-a8a6-8360a307b937

## Contents

Genesis . . . . .	1
Exodus . . . . .	36
1 Samuel . . . . .	70
2 Samuel . . . . .	91
Matthew . . . . .	100
Mark . . . . .	148
Luke . . . . .	180
John . . . . .	243
Acts . . . . .	281
Romans . . . . .	321
Galatians . . . . .	340
Colossians . . . . .	347
1 Thessalonians . . . . .	352
2 Thessalonians . . . . .	357
1 Timothy . . . . .	361
2 Timothy . . . . .	369
Titus . . . . .	375
James . . . . .	377

## Genesis Arrpmernenty-they

*Akngeyel alker-then ahern-then ingkerrenh arrpmernek*

<sup>1</sup> Awank-akerr, Akngeyel alker-then ahern-then arrpmernek. <sup>2</sup> Kwaty alayelant ahern ingkerrenh artenh. Ingwemerntarl ingkerrenh-angkwarr ayntenh. Akngeyel awer ilkwa tyarlewek. Akngey-kenh Itnweng rtneh.

<sup>3</sup> Akngey angkek, "Arrtyernerl-aynta!" Rap arrtyernenhey-alhek-anem. <sup>4</sup> Akngeyel arek mwerr arrtyernenhey-alhek. Akngeyel ingwethen arltethen amentant-atherr arrpmernek. <sup>5</sup> Akngeyel itnewek "Arlta." Kel ra akethirrenhek. Ingwer Akngeyel itnewek "Ingwa." Arlta arrwinkel anyent ikwerel, atwerrpirrenhek. Ingwemernt-anem irrek. Ingwel-anem. Ikwer-they angkep arrpemarl ra akethirrenhey-alhek.

<sup>6</sup> Akngey angkek, alker ampep-warl arrkngert rkernetyek, kwaty alay amentant-atherrileyek. Kel alakenh-anyem. <sup>7</sup> Kwaty ingwer irrwerl, kwaty ingwer kwaty kweneng. <sup>8</sup> Akngeyel arrkngert renh itnewek "Alker." Ikwer-they angkep arrpemarl ra akethirrenhey-alhek. Ingwirrek arrpemarl. Arlta 2 ikwerel, kel ingwepenh-anem irrenhek.

<sup>9</sup> Akngey angkek ahern-then kwaty alay-then amentant atherrileyek, ahern artwerretyirrey-kety. Kel ahern aremirrek. <sup>10</sup> Akngeyel itnewek ahern-then kwaty alay-then. Akngeyel arek rarl mwerr-angkwarr arrpmernek.

<sup>11</sup> Akngey angkek atherrk-then arwerl amern-akert-then atherrk ntang-akert-rnem-then rkernetyek. Kel alakenh-anyem. <sup>12</sup> Arwerl ingwerek-ingwer-then ntang ingwerek-ingwer-then Akngeyel arrpmernek. Akngeyel arek ingkerrenh-angkwarr, rarl mwerr-angkwarr arrpmernek. <sup>13</sup> Ingwirrek arrpemarl. Arlta 3 ikwerel, kel ingwepenh-anem irrenhek.

<sup>14</sup> Akngey angkek "Ingkenyel arrtyerneteyek artel, ingwel arrtyerneteyek alkentel." Arltethen ingwethen amentant-atherr ra anthek. Ratherr aherrety-then alyangkw-then ament-atherr arrpemarl ra anthek, rernem iterl-arayntetyek ilenger rernem akarrireyek. <sup>15-16</sup> Akngeyel arrernek atherrap-antey, ikngwer arrernek ra artewentyel arrtyerney-angker artel. Akngeyel antyarr akngerr arrernek. <sup>17-18</sup> Alkent ra arrernek alyeparl arrtyerneteyek ingwel. Alkent-then ingkeny-then ra arrernek, ingwethen arltethen akngaketyek. Akngeyel arek ingkerrenh-angkwarr, rarl mwerr-angkwarr arrpmernek. <sup>19</sup> Ingwirrek arrpemarl. Arlta 4 ikwerel, kel ingwepenh-anem irrenhek.

<sup>20</sup> Akngey angkek kwaty alayek, atnwenth ingwerek-ingwer ikwerel anayntetyek. Rap angkek thip ingwerek-ingwer alkerel alhayntetyek. <sup>21</sup> Akngeyel arrpmernekk kwaty-areny ingwerek-ingwer kwaty alay kwenel anayntetyek, akely-rnem-then, ilkwer nem-then. Akngeyel arrpmernek thip ingwerek-ingwer alkerel alhayntetyek. Akngeyel arek ingkerrenh, rarl ingkerrenh mwerr-angkwarr arrpmernek. <sup>22</sup> Akngeyel renh-rnem ilek, "Akngerram-akngerrirreyek, arlperryirremel kwaty alay-angkwarr ingwer-rneman alker-angkwarr ingwer-rneman." <sup>23</sup> Ingwirrek arrpemarl. Kel ingwepenh-anem irrenhek, arlta 5 ikwerel.

<sup>24</sup> Akngey angkek, "Ahern ikwer-penh atnwenth ingwerek-ingwer akngerrirreyek, ateralth-rnem-then, mwerr-rnem-then, ahernel alheyel-rnem-then." Kel alakenh-anyem. <sup>25</sup> Akngeyel atnwenth ingwerek-ingwer arrpmernek, atnwenth ateralth ingwerek-ingwer, atnwenth mwerr ingwerek-ingwer, ahernel alheyel ingwerek-ingwer. Akngeyel arek ingkerrenh, rarl ingkerrenh mwerr-angkwarr arrpmernek. <sup>26</sup> Akngey angkek, "Ahern-areny arrpmerneteyek rernem anetyek anwantherr-apeny, rernem Atyetyart anetyek kwaty-areny ingkerrenhek, thip ingkerrenhek, atnwenth ingkerrenhek, atnwenth mwerr-rnemek-then, atnwenth ateralth-rnemek, ahernel alheyel-rnem-then."

<sup>27</sup> Akngeyel arrpmernek artwethen arelh-then, ratherr rapeny anetyek. <sup>28</sup> Akngeyel ahern-areny ilek akngerrirreyek, ahern ingkerrenh-angkwarr, apmer arrpanenel. "Arrantherr atyetyart anetyek, ahern ingkerrenhek, irrpeng ingkerrenhek, thip ingkerrenhek, atnwenth ingkerrenhek."

<sup>29</sup> Ikwer-penh Akngeyel renh-rnem ilek, "Atha arrenhantherr anthem, amern-rnem-then arwerl ntang-akert-rnem-then, arrantherr arlkwetyek. <sup>30</sup> Atnwenth ahern-areny-rnem-then, thip alker-areny-rnem-then, ahernel alheyel-rnem-then. Ahern-areny ingkerrenhek, atha amern-rnem-then atherrk-rnem-then anthem." <sup>31</sup> Akngeyel ingkerrenh arek, rarl mwerr-angkwarr arrpmernek.

**2***Arlta 7-el Akngey ltyerrekk*

<sup>1</sup> Alker-then ahern-then ingkerrenh anenh.

<sup>2</sup> Arlta 7 ikwerel-antey Akngeyel warrk ikwerenh ywerrelhilek. Ltyerrekk-anem. Ra ipmelhek-anem. <sup>3</sup> Akngeyel arlta 7 anyentan akngakek ltyerreyy-angker, impenan arlta ikwerel ra ltyerrekh.

<sup>4</sup> Alakenh-anyem Akngeyel alker-then ahern-then ingkerrenh arrpmernek.

*Eden apmer arrwekelely*

<sup>5</sup> Lyerteneny, alker-then, ahern-then Akngey INGKART ra arrpmernek-penh arwerl-weny, atherrk-weny. Kwaty ra thweney-angenh-antey ahern-warl, ingwer aney-angenh-kety amern lyapelheleyek. <sup>6</sup> Kwaty apeyt lherrparnpenn ahern-they. Ahern-anem ra apelyilek.

<sup>7</sup> Akngey INGKARTel ahern-anem inek, artwa anyent-anem mpwarek ahern-penh. Ra ahern-areny renh itethilek-anem, pewilemel. Awer-anem antek. Ahern-areny ra itethirrek-anem, weyangkemel. Iteth-anem irrek ra.

<sup>8</sup> Akngey INGKARTel akngerrakw-ampenyek arwerl ilek-ilek-anem rnkernek, apmer itnan Eden. Artwa renh-anem ra arrernek apmer ikwer-itwek. <sup>9</sup> Arwerl ilek-ilek rnkernek ra, arwerl lyapelemel, amern-akert-rnem-then. Arwerl atherr apmer ampepitwek lyapek.

<sup>10</sup> Arwerl ingweran mwerr itethiley-angkerarl, arwerl ingweran akalty-anthey-angker. Amern ntwa arlkwenty arwerl ikwer-penh nga apmwek-then mwerrek-then akaltyirrem, atherr-angkwarr-antey. Apmer Eden-they kwaty atnyerr ankalhenn, arwerl-rnem atherrkenyil-aynteyek. Lher anyent-they ra irrpety-anem irrek, irlkwenty-anem. ...

<sup>15</sup> Akngey INGKARTel artwanem amern-angketyarr ikwer-itwek arrernek, ra arntarnt-aynteyek. <sup>16</sup> Akngey INGKARTel renh ilek, "Arwerl ingwer-rnem-itwek ntwa arlkwaynteyek. <sup>17</sup> Arwerl ingwer apmwek-then mwerrek-then akaltyirreyel, menty arlkwey-angenh. Ntwa arwerl yanh-penh arlkwentyan, nga arlta ikwerel-antey ilwem."

<sup>18</sup> Akngey INGKART angkek, "Ahern-areny anyent anerl-anekek, atha ilkwatherr ikwer mpwarey."

<sup>19</sup> Akngey INGKARTel ahern-anem inek arrpemarl, ra atnwenth ilek-ilek, thip ilek-ilek-anem mpwarek ahern-penh. Ra artwewarl akngetyek, ra itna renh-rnem itnewetyek. <sup>20</sup> Ahern-areny ranem itneweynek atnwenth ateralth-rnem-then, mwerr-rnem-then, thip-rnem-then, ingkerrenh-antey. Alakenh-anyem ahern-arenyel itnewek-penh itnakert ingker-anem rernem anek. Ahern-areny ament-areny ilkwatherr-weny anenh, atnwenth rernem ament anenh arrpemarl, ingwer-lkwer. <sup>21-22</sup> Akngey INGKARTel ahern-areny renh ankwaynteyek athenek. Artwa ra apelp-anem ayntek. Artwa ikwer-penh ngkerraly anyent ra inek. Renh ampwerkileynek, ra arelh-anem ikwer mpwarek ilkwatherr, ngkerraly anyent-penh. Akngey INGKARTel arelh renh atnwenshek artwa ikwer-warl. <sup>23</sup> Ra arek-penh arelh renh, ra angkek, "Nhenn atyeng-apenyarl, nhenn arlka atyeng-penh, ngkewn atyeng-penh arnwarnekarl. Atha renh itnewem 'arelh', ra atyeng-penh artwepenh arnwarnekarl wenh!"

<sup>24</sup> Aleyarl alakenh aynteyel ra. Artwa anyentel aynikw-then amikw-then iwerl-alhem. Ra arelh ikwer-itwek itengirrem, anyent-apeny-antey ratherr aynteyel. Alakenh-anyem Akngey INGKARTel arrernek.

<sup>25</sup> Arrwekelely ratherr arnkeweweny anenh, nyerrirrey-angenh-antey.

**3***Artwethen arelh-then apmwelheley*

<sup>1</sup> Rtnwem anyent anenh Akngey INGKARTelarl arnwarnek, irrtywerremel apmwangkwarr iley-angker. Apmwarlap ran atnwenth ingkerrenh-angkwarr. Arlta anyentel ra alhek arelh-warl. Ra ayernek, "Mpwelehanth apek ilek Akngeyel, arwerl anyent-penh mpwelanth amern arlkwey-angenhlar wenh, mentyarl aretyek?"

<sup>2</sup> Arelh ra angkek, "Akngeyel ilek, 'Arwerl ingwer-rnem-penhant arlkwetyek. <sup>3</sup> Arwerl anyent-penh nthakenh mpwelanth amern akey-angenh amern-angketyarr ampepitwek. Mpwelanth arwerl ikwer-penh arlkwenty, mpwelanth ilwemarl.' "

<sup>4</sup> Rtnwem ra irrtywerremel ilek, "Mpwelanth nthakenh ilwey-angenh arwerl ikwer-penh amern arlkwenty. <sup>5</sup> Akngey akalty, arlta ikwerel mpwelanth amern arlkwenty, Akngey rapeny mpwelanth amern, akalty-anem, apmwangkwarr-then mwerr-angkwarr-then."

<sup>6</sup> Arelh ra amern renh arek. Amern ra mwerr-angker innga. Ra ilkelhenh, amern arlkwenty-penh Akngey rapeny akalty-anem anetyek. Amern renh akek, arlkwemel-anem. Arelh ra artwanem anthek, ratherr atherrel-antey arlkwek amern renh. <sup>7</sup> Ratherr iterl-arek ratherrarl Akngayek awelhey-angenh. Angath-antey ratherr apmwelhekan. Ratherr iterl-arelhek-anem, ratherr arnkeweny-anem aneh. Arwer tywerk aylpepenh ratherr arnkwa atanthenh pweytilemel, aylpemel-anem. Artelhenh-anem ratherr.

<sup>8</sup> Ikwer-penhan alherrp ratherr awek, amern-angketyarr ikwer-itwek Akngayarl alhenh. Ratherr aterirremel arwerlel ar lengkewelhek Akngay ikwerety. <sup>9</sup> Akngay INGKART artwa ikwer arlek, "Nthenh-angkwarz nga?"

<sup>10</sup> Artwel renh ilek, "Ayeng arnkeweny ar lengkewelhek ngkwengety, nyerr-anem irrek."

<sup>11</sup> Akngay INGKART angkek, "Nthakenh mpwelanth iterl-arelhek, mpwelanth arnkeweny anenhan? Ntwa amern-angketyarr ampep-itwek arwerl anyent-penh arlkwek apek?"

<sup>12</sup> Artwa ra angkek, "Arelhel amern akek, rap ayenh-anem anthek, athanem arlkwetyek, arelh yanhel ntwarl ayenh anthekarl."

<sup>13</sup> Akngay INGKARTel arelh renh ayernek, "Arwerl ilek-penh ntwa arlkwek?" Arelh ra angkek, "Rtnwemel ayenh irrtywerl-ampernek wenh! Ikwer-penh atharl arlkwek."

<sup>14</sup> Akngay INGKARTel rtwem renh ilek, Ntwa arelh renh irrtywerl-ampernek-penh, nga atnertel artnerrer-apem ahern-penh arlkwerl-aperl-anem. Atha ngenh anyent apmwearillem intem-antey.

<sup>15</sup> "Arelh nhayman ngkwengety arkarirrem. Arelh-kenh-rnem-then ngkwenh-rnem-then ilkelhey-angenh intem anayntem. Arelh-kenhel-rnem ngenh akapwert atwayntem, ngkwenh-rnemel ingkan tnhwayntem."

<sup>16</sup> Akngay INGKARTel arelh renh ilek, "Nga ampakert rlterrk anayntem. Nga artwa ngkwenh hek aleth ilkelh-ayntem. Artwa Atyetyart-anem ngkwenh anayntem."

<sup>17</sup> Akngay INGKARTel artwa renh ilek, Nga arelh ilenhek awelhek, ntwa amern-anem arlkwek. Atha weth ngenh artwerilek arwerl ilen-h-penh amern ntwa arlkwek. Nga atyeng awelhey-angenh. Ahern yanh apmwanem, amern rnkernayntek. Nga warrkirretyek artewentyl amern intwelheleyt, nga ilwetyek-atwety. <sup>18</sup> Atherrk apmwethernt intwayntem. Ntwa amern-angketyarr ikwer-penh amern arlkwey-angenh.

<sup>19</sup> "Ntwa artewentyl warrkirretyek amern ngkwenh. Nga ahernirreyen iltwenty-penh. Ahern-penh atha ngenh arnwarnek. Nga angkep ahern arrpemarl irreyen. Ngan ahern arwarl."

<sup>20</sup> Adam-el arelh ikweren h itnewek Eve.

<sup>21</sup> Akngay INGKARTel arnkwanem ikwer-atherr mpwarek, atnwenth yepn-penh.

<sup>22</sup> Akngay INGKARTel ilek, "Ratherr iterl-areyel apmwangkwarz-then mwerr-angkwarz-then, atharl iterl-areyel-apeny. Amern-angketyarr yanh-they ratherr alpetekant-anem. Ratherr arwerl yanh itethiley-angker-penh ratherr arlkwey-angenh anetyek. Ratherr arlkwenty-penh, ratherr intem-antey iteth anekerr." <sup>23</sup> Akngay INGKARTel renh-atherr aketh-warl-anem irrentek, apmer ingwer-warl-anem ratherr alpek.

<sup>24</sup> Aympelh-akert-rnem akngerrakw-ampenyek arrnkngert rkernek arwerl ikwerety. Nayp arlpenty Akngayel rkernek, ikwer-atherr-itwek. Nayp arlpentyel ampep-they arrtyernenh. Aympelh-akert rernem akwerrelant arrnkngert rtnek, ratherr angkep alpekerr, arwerl ikwer-itwek arlkwek, amern-angketyarr ampep-itwek, ratherr intem iteth anekerr.

## 4

### Cain ather, Abel ather

<sup>1</sup> Adam-then Eve-then ratherr awey akely atnyenek. Avey akely ikweren h itnan Cain. Eve angkek, "Atha renh itnewey Cain, INGKARTelarl awey akely ayenh anthek." Itna Cain angka ikweren h-angkwarz aynteyel, "INGKARTel ampa anthek INGKART-they renh inek." <sup>2</sup> Ikwer-penhan, Eve ra awey ingwer-anemar l atnyenek. Amelikw renh itnewek Abel. Ratherr ilkwerrek-anem. Abel yep-yep arntarnt-arenh-arenh, Cain ran amern atherkarl ingwerek-ingwer lyapellhelenh. <sup>3</sup> Ingwer-ingeran Cain ra amern INGKART-anemar l tyenkerr anthek. <sup>4</sup> Abel ra yep-yep akwerrik atwemel, INGKART ra tyenkerr anthek arrpemarl. Yep-yep akwerrik lyertenyankarl atnyenek. Abel-el aker atwek, ra INGKART renh tyenkerr anthetyek. Aker ikwer-penh ra tyelk mwerr-rnemant rlwanemel INGKART renh tyenkerr anthetyek, mpwerrkenty anter-akngerr.

INGKART Abel ikwerant inkwrelhel, renharl ra tyenkerr antheket. <sup>5</sup> Cain-ekan ra inkwrelheyangarl. Cain ra artwerrety-anem anen, ahelirremel.

<sup>6</sup> INGKARTel Cain renh ilek, "Ilekek ngarl aneyel artwerretyan? <sup>7</sup> Ntwarl ayen tyenkerr arraty-angkwarr anthek-penh, ngarl irrkngerney-anem anetyek. Ngarl mwerr-angkwarr anem, ngap irrkngerneyarl aneman. Ngarl mwerr-angkwarr anem, ngap irrkngerneyarl aneman." INGKARTel renh ilek, "Ngap apmwelhelekerr, nga mwantyel iterretyek."

<sup>8</sup> Cain-el ayteyikw ikweren, irryelherl-alhek, "Mpa, ayla awangk alhey arrkent, peleyn ilkwewarl." Irryelherl-alhek ratherr arrkent alhetyek-arrpantey irrywerremel, renh ra atnwnehek akwerr-warl, ra atwey-alhetyek renh. Cain-el renh atwek, ipmek-antey.

<sup>9</sup> INGKARTel Cain renh ayernek, "Abel-alew? Ayteyengkw ngkwenh-alew?" Cain-el renh irrywerremel tyernek, "Inpa, ayeng arlar."

<sup>10</sup> INGKARTel renh ilek, "Ntwa atwek ayteyengkw ngkwenh. Arrnga thelhelek ikwer-they ahern-warl. Atha ngenh apmer nhethay irrentem, ntwarl ayteyengkw atwek, rarl arrnga thelhelek apmer nhel. <sup>11</sup> Ahern nhakan amernan nthaken nta intwelheleyang-anemarl. Arrngarl ayteyikw thelhelek-kety." <sup>12</sup> INGKARTel renh ilek, "Nhennakan amern atherrk intwelheley-angenh. Apmer nhelan nga aney-angenh-anemarl arrangkw. Nga alhaytant-anem."

<sup>13-14</sup> Cain-el renh ilek, "Ntwa atyeng angka awerr arrernek. Apmer nhethayarl apmer ingwerel-anem ayeng anayntem. Apmer-wenyengarl ayen ingwerentyel atwetyek ahewer, mentyan."

<sup>15</sup> INGKARTel renh ilek, "Ingwerel ngenh attwenty, atha renh arntety anthem. Ingwerel ngenh atwekerr, atha ngkweng-warl impaty arrernem." <sup>16</sup> Apmer Nod-warl ra alpek, Eden-they akngerrakw. Cain aney-alpek intem-antey INGKART ikwerety, angkepirreyang arrangkw, ikweren-h-nem-warl. Ingwer-kenh apmer-itwek aney-alpek.

...

## 6

<sup>5</sup> ... Akngeyel arek, apmwangkwarr ahern-areny ingkerrenh anen. Rernem apmwangkwarrant iterrenh. <sup>6-7</sup> Ra iterrek renh-rnem ingkerrenh ywerrelhilemel atwetyek, atnwenth-rnem-then, thip-rnem-then, ahernel alheyel-rnem-then. Artwa apmwangkwarral aneyel-rnem-then ingkerrenh ywerrelhiletyek. "Atha renh-rnem mpwarey-angenh, atyeng awelhey-angenh-rneman. Ra iterrenh, apmwel renh-rnem mpwarekerr." <sup>8</sup> Akngey inkwrelhel artwa Noah ikwer, rarl ikwer inkwrelhemel awelhek rarl renh ilek.

<sup>9-10</sup> Noah ra anyentant mwerran Akngey ikwer awelhek. Alerikw irrpety ikweren-h-nem itnan ikwer-rnem-kenh Shem, Ham, Japheth.

<sup>11-12</sup> Akngeyel ingkerrenh iterl-arek, rernemarl apmwangkwarr anen. <sup>13</sup> Akngeyel Noah renh ilek, "Ahern nhel artwa ingkerrenh ahelant atwerreyel, mwerr aney-angenh. Atha ahern-areny ingkerrenh irralkeyenah ahern nhek. <sup>14</sup> Arwerl mwerr-angker arterna, ntwa rtnwa arnwarnetyek warl-akert. Warl arnwarnetyek amentewament rwem-akert. Ankerl aperna kwen-then akwerr-ampeny-then. <sup>15</sup> Arlpenty innga mpwara 130 metres-ek-atwety. Arlpaw innga mpwara, 25 metres-ek-atwety. Irrwerl innga mpwara, 15 metres-ek-atwety. <sup>16</sup> Arwerl ilperr-ilperr-rnemarl irrwerlengan arrerna! Anker-anem aperneyna kwaty aylpekerran. Altywerarl ntwa arrernetyek arriwan ampepekan. Iwerr ingwer-ampenyek arrerna aylpenhey-alhayntetyek. Rwem irrpety irrwerl-akert mpwara!

<sup>17</sup> Atharl kwaty ilkwa tyarlewem-kety, ahern-areny ingkerrenh irralketyek. <sup>18</sup> Atha ngenh innga iyleyl, nga, anew ngwenh, alerengkw ngkwenh-rnem, ampengkw-rnem-then arrantherr rtnwa ilenhel arrantherr iteth anetyek, kwaty-kety. Ingkerrenh aker-rnem tywena, atnwenth-rnem-then, thip-rnem-then, ahernel alheyel-rnem-then. <sup>19-20</sup> Atnwenth amarl-rnem-then irrey-rnem-then anewart-anewart akngakeyna, rtnwewarl tywenemel. <sup>21</sup> Amern akngerr-antey arrerna ikwer-rnem ngkwenh-then. Ayeng ilkelheyel rernem iteth intem-antey anetyek."

<sup>22</sup> Noah Akngeyek awelhek, rarl renh ilanthek.

## 7

<sup>1-18</sup> INGKARTel Noah renh ilek, "Rtnwewarl aylpa, ngkwenh-rnem-akert. Atha ngenh iterl-areyelarl, mwerrarl ngan atyeng awelheyel." Kel arlta ikwerel-antey Noah-rnem rtnwewarl aylpenhek, Shem, Ham, Japheth. Ingkerrenh-antey rernem aylpenhek rtnwa ikwer-warl, anewikw-rnem-anem alerikw-rnem-anem. Noah

ikwerenh-rnem-akert aylpenhek rtnwa kwen-warl. Aker ahern-areny ingwerek-ingwer rernem akwernek rtnwewarl, atnwenth ateralath-rnem-then ingkerrenh, thip-rnem-then akwernek rtnwa ilkwa ikwer-warl. Anewart-anewart irrwey-rnem-then amarl-rnem-then ingwerek-ingwer atherrarl-atherrarl akwernek rtnwa kwen-warl, Akngeyelarl renh-rnem ilanthe. Ingkerrenharl ahern-areny renh-rnem tywenek. INGKARTel rtnwa arriw ikwer-rnemep akentek. Kwaty apeynt ikwer-they irrwerl-anem irrwerl-anem lherpparnpek kwen-they. Akngeyel alker renh altywerilek. Kwaty thelelek alker-they, arlta 40-ek-atwety, ingwa 40-ek-atwety. Kwaty rntwek arlta arrpanenhel. Kwatyan kwen innaganem. Kwaty atnyerrel rtnwa ilkwa irrwerlilek, irrwerl-anem irrwerl-anem. Apwert ingkerrenh kwatayel kwenek. Kwatayel rtnwa irrwerlilek ikwer-rnemep. Ahern-areny ingkerrenh kwatayel ilwerl-athene. Apmer arrpanenhel anehn-rnem, atnyerrel ingkerrenh ilwerl-athene. Akngeyel ingkerrenh apmer arrpanenhek irrarlkek ingkerrenh k watayel atnyerrel. Irrpetyap rtnwa ilkwelar anek-rnem rerneman iteth anehn. Noah rant ikweren-h-rnem-akert iteth anek. Kwaty rtnenh aleth arlta 150-ek-atwety, arlta arrpanenhel. ... **8**

<sup>1</sup> Akngey ra iterl-antey-areyel, iylpelerleweyang New-rnem-then atnwenth-rnem-then. Akngeyel awer tyarlewek. Kwatayarl akelyirreynek ahern ingkerrenh artwerretyiletyek. Kel alakenh-anyem Akngeyel awer thwenek. <sup>2</sup> Akngeyel arrkngert arrernek, kwaty ahern-they thelhelenhe. Akngeyel kwaty apeynt ywerrelhilek. Akngeyel kwaty alker-areny ywerrelhilek arrpemarl. <sup>3</sup> Arlta 150-penh kwaty akelyan-anem ahernel rtnen. Alkent 5-ek-atwety kwaty ra akely-anem irreynen. <sup>4</sup> Kwatayarl atnyer ywerrekel, rtnwa ilkwa ra Ararat apwertel-anem arrernelhey-alpek. <sup>5</sup> Alkent 10-penh apwert ingkerrenhan akethel-anem arem-anemirrek. Alkent 10-ek-atwetyarl rtnek-penh kwaty akelyirrek.

<sup>6-7</sup> Alkent anyent-penh Noah-el iwerr tyet altywerilek, ra aretyek. Noah-el thip anyent irrpwerl angerl thwenek. Noah arntarnt-arelhenh thip ikwer ra apey-alpentyek. Ahern artwerretyirreyek-atwety thip alkerel-antey alhenh. Alkerel-antey ra amperelenh, kwaty-antey ra arenh. <sup>8</sup> Kwaty ywerreynentyek Noah ra thwenek thip pwelker-anem, kwaty ywerreynentyek ra aretyek. Thip anyent ra arrernelhetyekan ikwer arrangkwarl. <sup>9</sup> Kwatayantarl ayntek. Ra apey-alpek arrpemarl, rtnwa ilkwa ikwer-warl. Noah-el thip anyent renh anterrkwey-ayntek, kwen arrpemarl akwernemel rtnwa ilkwa ikwer-warl.

<sup>10</sup> Arlta 7-penh, Noah-el pwelker anyent renh arrpemarl thwenek. <sup>11</sup> Thip ra apey-alpek atwerrp, alperr anyent-akert-anem. Noah ra arek kwatayarl ywerr-anemirrek. <sup>12</sup> Arlta 7-penh pwelker renh thwenek arrpemarl, ra arlta ikwerl apey-alpeyang ywerrey-alhek. <sup>13</sup> Noah-el iwerr altywerilek-anem, rtnwa ilkwa renh ahern artwerretyirrenty aretyek. Ra arek ahernan atwerrety-anem. Noah-el arek kwatayarl kel-anem ywerreyneyel. <sup>14</sup> Alkent atherr-penh ahernan ingkerrenh-angkwarz artwerrety-anem.

<sup>15-16</sup> Akngeyel Noah renh ilek, "Ngan ngkwenh-rnem-akert tyerr-anemelha, rtnwa ilkwa ilenh-theyan. <sup>17</sup> Atnwenth ilenh-rnem-then thip-rnem-then ahern alheyel-rnem-then ingkerrenh tyarlewa rernem akngerr arrpemarl irretyek ahern nhel."

<sup>18</sup> Noah rernem-tangkwel atwarrek rtnwa ilkwa ikwer-they. <sup>19</sup> Atnwenth ingwerek-ingwer ingkerrenh atwarrek rtnwa ilkwa ikwer-they, amentew-ament.

<sup>20</sup> Noah-el apwert ilperr-ilperr arrernek, aker amperneteyek. Noah-el tyenkerr INGKART renh anthek, kwenirremel angkek. <sup>21</sup> Akngeyel aker intenek mwerr-angker ikwakert. Rernemarl apmwel-areth anyeylek, ampa akely-penh, atha ahern apmwel-angenh-anem. Akngeyel renh ilek, "Atha ahern-areny-rnem nthakenh atwety-angenh weth atha atwetk-apeny, menty-anem. Anyent-inger-antey athan irrarlkek. Akely-penh apmwangkwarz alkenhirreyelan, awaretyel.

<sup>22</sup> Atha ahern-areny ingkerrenh atwety-angenh-anem. Ahern nhenh intem-antey aynteyen. Rernem amern lyapelheleyte, amern akwetyetyek. Ahern nhenh ywerrey-angenh artel, ingwel, aherretiel, alyangkwell ywerrey-angenh. Ahern nhenh aherretiel ywerrey-angenh, ahern nhenh ingwel ywerrey-angenh. Ahern nhenh intem anyeyen ahern nhenh ywerreyek-atwety."

## 9

*Akngayel Noah renh ileyel, rarl atnyerr ilkwel atwety-angenh ywerrelhilemel aleth-antey*

<sup>1</sup> Akngeyel Noah renh ilek, alerikw ikwerenh-rnem-akert, "Ampa akngerr atnyena ahern nhel, thip-rnem-then, ahernel alheyel-rnem-then, aker irrpeng-then. Ahern nhel akngerrirreyek ampa akngerr anetyek. <sup>2</sup> Atnwenth ingkerr arrekantherrety

ater irrayntem aneyenh, ahern nhel. Nga ingkerrenhek Atyetyart aneyenh. Atha ngenh arrer nem Atyetyart nga anetyek, ahern-areny ingkerrenhek.<sup>3</sup> Aker ntwa alhewer arlkwetyek, ingwerek-ingwer. Atha ngenh atnwenth ingkerrenh anthem, ntwa arlkwayntetyek. Kel, atha ngenh anthek amern ntwa arlkwayntetyek.

<sup>4</sup> Aker menty, arrkn gewenyirremel ayntey. Iteth-antey, ra arrkngakert-anteyarl atnwenth ran. Nthakenh arrngeynp arlkwey-angenh. Arrknga thela ahern-warl, artwerretyilemel, aker arlkwey-alenty. <sup>5</sup> Atnwenthel artwa anyent ipmek atwenty, artwa ingwerl ipmek arrpemarl atnwenth renh atwetyek. Artwa anyentel artwa ingwer ipmek atwenty, ipmek arrpemarl atwetyek.

<sup>6</sup> Artwa ingwerel atwem, angkep renh atwenhey arrpem. Atha ahern-areny ingkerrenh arrpmernek, atyeng-apeny ingkerrenh anetyek. <sup>7</sup> Ntwa akngerr-anem ahern nhel ngkwenh-rnem atnyena! Artwa akngerr ntwa anetyek, ahern nhel artwa akngerrirretyek."

<sup>8</sup> Akgneyel Noah ikwerenh-rnem-akert ilek,<sup>9-11</sup> "Atha arrenhantherr ilem, Nhepenh-anyeman kwaty arrekantherr-warl atha tyarlewayang-anem, menty. Kel anyentinger atha kwaty ilkwan tyarlewek, ingkerrenh atwetyek, ingkerrenh ahern nhek irrarlketyek." <sup>12-13</sup> Mpwelarr ilkwa alkerek atha arrekantherr arrernem. Mpwelarr arrantherr alker-itwek aremel, arrantherr iterl-aretyek wetharl atha arrenhantherr ilek-angkwarr. <sup>14</sup> Kwaty kwenpayel mpwelarr aremirrenty atha iterl-aremel atharl weth arrekantherr ilek-angkwarr. <sup>15</sup> Nthakenh atha atnyerr ilkwel atwepy-angenh ywerrelhilemel aleth-antey. Yanh-angkwarr atha ilek, nthakenh atwepy-angenh.<sup>16</sup> Atharl weth mpwelarr alker-itwel aremirrenty, atha iterl-aremarl atharl weth arrenhantherr ilerlep-angkwarr.

<sup>17</sup> Mpwelarr lwewarrernelheyel alkerel apmelerrarl atharl weth ilerl-alpek-angkwarr, arrantherr iterl-aretyek. Ilenh atyetyart impen anwantherr iterl-aretyek." ...

## 11

### *Akgneyel angka ingwerek-ingwer ilpertileyl*

<sup>1</sup> Awank-akerr, ahern-areny-rnem angka anyentelant angkerrenh. <sup>2</sup> Ikwer-theyan ingwer-rnem apmer Babylon akngerrakw-ampeny-warl alpek. Rernem ingkerrenh alperlewek akngerrakw, peleyn ilkewarl, apmer Shinar-arrangarr-warl. Apmer-anem rernem arrernek. <sup>3-4</sup> Rernem angkerrenh, "Tern ilkwa mpwaretyek, warl arpanen, warl arlpenty-then anwantherr mpwarey alker-warl-athet, alkerek-atwety. Apwert-weny anwantherr mpwarey bricks-elant, ankerelant anyentelhilem anterkwetyek bricks renh. Ingkerrenhel anwenhantherr iterl-aretyek apmer anyentek. Anwantherr apmer arrpanen-h-warl nthakenh arlpimperrey-angenh. Anwantherr arlperryirreyang anetyek, apmer anyent ikwerel."

<sup>5</sup> Akgneyel tawen renh aretyek apetyek rernemarl arnwarnen. <sup>6</sup> Ra ilek, "Nher nem warrkirreyel rernemarl angka anyentel angkerreyel. Rernem arlkwententyelan, ilek-ilek mpwarerl-anekek. Rernem trakelheyel rernemarl warl ilkwa artek-penh." <sup>7</sup> Atha renh-rnem angka amentew-ament-anem iley, rernem awerrey-angenh-antey ingkerr anayntetyek."

<sup>8-9</sup> Angka anyentarl angkerrenh-penh Akgneyel renh-rnem angka ilpertelhilek ingkerrenh. Angka ingwerek-ingwer-anem rernem angkerrenh. Rernem menty-anem ipmek, warrkirreyang-anem. Rernem arlperryirremel alpek apmer arrpanen-h-warl, aney-alpek. ...

### *Abraham-kenh aynikw*

<sup>27</sup> Nhenh angka Terah-penh-anem. Terah Abram Nahor-rnem aynikw-rnem anen. Haran-kenh-rnemek aynikw anek. Haran ra Lot-kenh aynikw anen. <sup>28</sup> Haran Ur tawen-itwek atnyenek Chaldeea-areny-rnem-kenh apmer-itwek. Ra apmer ikwerel-antey ilwek, aynikw ikwerenh Terah iteth anen hel-antey. <sup>29-30</sup> Abram-el Sarai anew inek ikwer, Nahor-el Milcah anew ikwer inek. Milcah aytay ikwerenh Iscah anen, Haran-kenh alerikw. Sarai ampek arrangkw anen. <sup>31</sup> Terah anperl-alhek Ur tawen-they, Canaan ikwer-warl anperl-alhetyek. Ra Abram alerikw ikwerenh akngek, Sarai, amikw ikwerenh, arrengikw ikwerenh, Lot ra akgnek arrpemarl. Rernem Haran tawen-el-anem aney-alpek. <sup>32</sup> Terah ra ampwirremel aherrety 205 anen. Ikwer-penhan Haran tawen ikwerel-antey ilwek.

## 12

### *Akgneyel Abram renh ileyel, apmer ingwer-warl alhetyek*

<sup>1</sup> Akngey angkek Abram-warl, "Apmer nhanyem iwerl-alha ngkwenh-rnem-akert, apmer atharl ngkweng iylparrernem-warl alpemel. <sup>2</sup> Atha ngenh arntarnt-arayntem apmer ilenhek, akngerr-anem atha ngenh anthem, akngerram-akngerr irretyek. Ingkerrenhel ngenh iterl-arayntem. Ngkwenh-rnem-angkwarr angka atyenh arlpimpirreyen, apmer arrpanenh-angkwarr, ingkerrenhel ayenb iterl-arayntetyek-awaty. <sup>3</sup> Ingwer-rnem mwerr anayntem ngkweng-itwel, ayeng mwerr arrpemarl ikwer-rnem anayntem. Alakenh-anyem ahern-areny ingkerrenh ngkweng inkwerelhetyek. Ingwer-rnem ngkweng awelhey-angenh, rernemarl apmwangkwarr apenteyen, atha renh-rnem arntety anthemarl."

<sup>4-5</sup> Abram aherrety 75 anenb, artwa ampwanem, Akngeyelarl ilek apmer ingwer-warlnem ra alpetyek. Abram Akngeyek awelhek. Anew ikweren Sarai ampikw ikweren Lot, ampwal ilek-ilek ingkerrenh warrkenh-rnem-then, rernemarl apmer Canaan ikwer-warln alpek.

<sup>6</sup> Abram ra arwerl ilkewewarl, arwerl arnenty ikwer-warl alhek, ikweren-hrnem-akert. Abram arwerl arnenty apmer Moreh ikwer-warl alhek, apmer Shechem-itwek. Canaan-areny-rnem arrwekel-antey apmer ikwer-itwek anenb. <sup>7</sup> Akngey Abram ikwer aremirrek. Renh ilek, "Atha ngenh apmer nhenh anthetyek, ngkwenh-rnem-akert intem-antey." Abram ra apwert ilperr-ilperr-anem arrernek Akngey aker tyenkerr anthetyek inkwerelhemel.

<sup>8</sup> Abram ra Bethel apmer akngerrakw-ampeny-warl alhek, rap ampepel ayntenek apmer Ai-arrangarr. Kalikw-anem artek. Ra apwert ilperr-ilperr ingwer-anem arrernek, Akngey ikwer kwenirremel inkwerelhek. <sup>9</sup> Ikwer-penhan ra antekerr-anem alhek, apmer arlpaw-ampeny-warl.

### *Abram alheylel Egypt-warl amern inetyek*

<sup>10</sup> Apmer arrpanenh Canaan-ampenyel, amern lyapey-angenh-anem ra arenh, aherrety innganem. <sup>11-13</sup> Abram-then Sarai-then Egypt-warl rernem alpek, amern-angkeytaryarr-warl atherrkeny-ampeny-warl. Abram iterremel angkek anew ikweren-warl, "Egypt-warl alhenty nga angkwerey atyenb-arrpantey ilelha ingwer-rnemek. Egypt-arenyel inngerr mwerr-angker ngenh arey-ayntenty, ayenharl rernem atwekerr, ngkweng-they angwarekerr."

<sup>14-15</sup> Rernem Egypt ikwer-warl alhek. Egypt-arenyel renh arek ra mwerr-angker innga. Atyetyart ilkwel-rnem Pharoah-an ilek Sarai renh. Artwel-rnem Sarai renh akngek Pharoah-kenh apmer-warl. <sup>16</sup> Pharaoh rarl iterrek Sarai ikwer Abram-kenh angkerikwek-athen, ra Abram renh ingkerrenh anthe, yep-yep-rnem-then, pwelek-rnem-then, tangkey-rnem-then, warkenh-rnem-then, kamwerl-rnem-then ingkerrenh anthe.

<sup>17</sup> Atyetyart ilkwa rarl Sarai renh apmwangkwarr ikngwney-ayntek-they, INGKARTel Pharaoh-kenh-rnem arntety ilkwanem anthe. <sup>18-19</sup> Pharaoh-el ingwer ilanthe, Abram renh ikngwetyek, ratherr angkerretyek. Pharaoh ra angkek Abram ikwer-warl, "Ntwa atyeng iley-angenh arraty anew ngkwenh. Kel ineyna apmer nhenh-they alpemel. Apalel anew ngkwenh atha ikngwok." <sup>20</sup> Pharaoh-el ikweren-hrnem thwene, Abram renh artengewetyek, ratherr ampwal-rnem ikwer-atherrenh ingkerrenh akngeynetyek, apmer ingwer-warl alpemel.

## 13

### *Abraham Lot ratherr amentant-atherr alheylel*

<sup>1</sup> Abram Sarai atherr alhek apmer arlpaw Canaan-ampeny-warl, Lot ra ikwer-atherr-angkwarr alhek arrpemarl. <sup>2</sup> Abram ampwal akngerr-akert alhek, pwelek-rnem-then, yep-yep-rnem-then, nanikwet-rnem-then, thilp-then, gold-then.

<sup>3</sup> Abram ra apmer arrpanenhel aneynenh, apmer arlpaw antekerr-ampeny-itwek. Ayerrer-anem ra alpek, Bethel tawen-warl. Kalikw-anem rap ampepek artey-alhek, apmer ikweren. Aytety-alhek tawen Ai-they ampepel, Bethel tawen-they angath. <sup>4</sup> Apey-alpek antekerr-they, ra aynteynek apwert ilperr-ilperr-akert ikwer-itwel, irrkatyel arrpemarl. Ra kalikw akely-anem artek. Ra kwenirremel Akngeyek-anem angkek inkwerelhemel.

<sup>5</sup> Lot-el akngerr arrpemarl atnyenek, yep-yep-rnem-then, nanikwet-rnem-then, pwelek-rnem-then, warkenh ikweren-hrnem-then. <sup>6-7</sup> Apmeran akely inngarl ayntenh atnwenth-rnem-then ingwerek-rnem-then. Atherrkarl atnwenth ingkerrenhel arlkwenh. Abram-kenh warkenh-rnem-then Lot-kenh warkenh-rnem-then atnwenth arntarnt-arey-angker-rnem rernem apmer-they ahel-anem ilterrenh.

<sup>8</sup> Abram angkek Lot-ek, "Aylakan mwerrant-atherrarl anetyek. Aylekakenh-rneman mwerrant-arey arrpemarl anetyek, ilterrey-angenh. Aylak arrer nthakenh ilterrey-angenh. Artwa aylekakenh ilterrey-angenh anetyek. <sup>9</sup> Ahern arlpawel nhan! Aylak amentant atherr alhey. Ngarl altwerl alhem-kety, ayengan akngerrakwarl alhey. Ngarl akngerrakw alhem, ayeng altwerlal alhey."

<sup>10</sup> Ikwer-they, Lot alhek arrwekel-antey. Kwaty akngerr ra arey-alhek Jordan Ilpay-itwek. Aleth-antey ra Ilpay atherrkeny aytteynenh ikwer-angkwarr apmer Zoar-ek-atwety. <sup>11</sup> Jordan Ilpay ingkerrenh ikwer-tangkwel rlwanek akngerrakw-ampenyel. Rarl akngerrakw alhek, Abram amentant atherr ratherr irrek, arlperrtyirremel. <sup>12-13</sup> Abram anek apmer Canaan-ampenyel. Lot alhek tawen Sodom arrerenty, wak-rnem artey-alhek, artwa apmwer nem arrerenty-itwek, rernem INGKARTek irrpelthirrenh. <sup>14</sup> INGKARTel Abram renh ilek, "Apmer ingkerrenh-angkwarr ara! <sup>15</sup> Atha ngenh anthey, nga intem-antey anayntetyek, apmer arpanen iienhek, ngkwenh-rnem-akert. <sup>16</sup> Atha ngkwenh-rnem akngerram-akngerrileyenh, arrantherr akngerr-anem ahern nhel anetyek. Ngkwenh-rnem akngerrirreyenh ahern akely akngerr aytteyel-apeny. <sup>17</sup> Nga angkepelarreng apmer nhel alhayta, atharl ngenh anthetyek."

<sup>18</sup> Wak kalikw akely-rnem lhelherl-alhek akngeynemel apmer arwerl arnenty-akert ikwer-itwek aney-alhek apmer Mamre-arrangarr, Hebron-itwek. Apmer ikwer-itwek apwert ilperr-ilperr tyenkerrek-arelh ra arrernek, Akngey ikwer inkwerelhemel kwenir-rek.

## 14

### *Abram-el Lot renh arntarnt-areyel*

<sup>8</sup> ... Atyetyart tawen ikwer-areny-rnem, Sodom-areny, Gomorrah-areny, Admah-areny, Zeboim-areny, Bela-areny. Rernem atwerrenh Atyetyart ingwer-areny-rnem-then. Atyetyart Chedorlaomer, Elam-areny atyetyart, Tidal, Goim-areny atyetyart. Amraphel, Shinar-areny atyetyart. Arioch, Ellasar-areny atyetyart. Atyetyart 5-pel-ek aherrety 12 anek, ikwer-rnemek. <sup>9</sup> Ikwer-penhan rernem ikwer-warl apetyek, rernem atwerretyek. <sup>10</sup> Atyetyart ingkerrenh akarrirrek peleyn ikwer-itwek, itnan Sidim. Sodom-areny-rnem Gomorrah-areny-rnem-then rernem anyentirek, artwa ingwer-rnem atwerretyek. Ingwer-rnem rernem Sodom-areny-rnem-then Gomorrah-areny-rnem-then antengilek. Sodom-areny-rnem-then Gomorrah-areny-rnem-then rernem aytnek irrkewarl, anker-angketyarr-warl. Ingwer-rnem anterrekk apwert-ampeny-warl. <sup>11</sup> Sodom-then Gomorrah-then-they amern ingkerrenh rernem rakek, ampwal ilek-ilek. <sup>12</sup> Abram-kenh ampikw-then-antey, Lot anterrkwek, akngeynemel.

<sup>13</sup> Abram artwa Hebrew anenh arwerl arnenty ikwer-itwek. Arwerl arnenty ran Mamre Amor-areny-kenh. Artwa Mamre Amor-areny. Aytteyikw ikwer-atherrenh anek, itnan ratherr Eschol, Aner. Ratherr mwerr innga anek Abram-ek. <sup>14</sup> Artwa anyentel Abram renh angkan ilek, rernemarlalerikw ikwerenhh anterrkwek, ampwal ikwerenhh-rnem-akert. Abram-el artwa ikwerenhh-rnem anyentilek. Kel rernem alwernek apmer Dan ikwer-warl, <sup>15</sup> Abram-el renh-rnem ingkerrenh atwek-penh, ingwer-rnem anterrekk apmer Hobah-warl Damascus ikwer-angkwarr aterel. <sup>16</sup> Abram-el renh-rnem alwernek, apmer Hobah-ek-atwety. Ra alerikw Lot renh ineynek, arelh-rnem-then ampwal ikwerenhh-rnem-then.

<sup>17</sup> Abram rarl king ingwer-rnem-then atwek-penhan, ra apey-alpek. Atyetyart Sodom-areny apetyek Abram-warl peleyn Shaveh ikwer-itwek, ratherr angkerretyek. Shaveh ikwerenhh itna ingweran arterterr King-kenh.

<sup>18</sup> Atyetyart Salem-areny itnan Melchizedek. Ra wayn-then amern-then Abram-warl akngetyek. Melchizedek INGKART anenh, Akngey ilkwa ikwer. <sup>19</sup> Melchizedek angkek, "Akngey atha ayernem, ngenh riterrkiletyek, rarl alker-then ahern-then arrpmernek. <sup>20</sup> Nga Akngey ikwer inkwerelhey-areny, ntwarl artwa ingkerrenh atwek, riterrk ikwerenhh-akertel. Ntwa artwa ingkerrenh antengilek."

### *Abram-el Melchizedek ampwal ilek-ilek ingkerrenh ikwerenhh antheyel*

<sup>21</sup> Atyetyart Sodom-arenyel Abram renh ilek, "Atyen-h-rnem, Sodom-areny-rnem ingkerrenh ipma, apmwal-rnem ntwa akngemel."

<sup>22</sup> Abram-el Atyetyart Sodom-areny renh ilek, "INGKART Akngeyel anyentelarl ahern-then alker-then arrpmernek. <sup>23</sup> Atha renh arratty innga ilek, atharl ampwal-rnem nthak-enh ine-y-angenh, ntwa ayenh ingkern ayttarpp-ilekerr, nga atyeng angkekerr, 'Atharl Abram renh ampwal ingkerrenh anthek.' Akngeyelant ayenh ampwal ingkerrenh anthek. <sup>24</sup> Amern arlengant anwantherr arlkwey artwa atyenh-rnemelan arlkwekant. Aner Eschol-atherr ampwal akely-rnem inem arrpemarl."

**15**

*Akngeyel Abram renh alheleyel*

<sup>1</sup> Abram-el altyerr arek, INGKARTelarl renh ilek, “Nga aterirreyang anetyek, atha ngenh arntarnt-areyel, ilek-ilek akngerr atha ngenh anthetyek.” <sup>2</sup> Abram angkek, “INGKARTay, ntwa ayenh ilek-ilek akngerr anthek. <sup>3</sup> Ntwa ayenh ampan anthey-angenharl. Ayeng iltwentyel, warrkenh atyenhel ilek-ilek ingkerrenh inem.”

<sup>4</sup> INGKARTel ilek, “Ntwa alerengkw ngkwenh atnyeneyen. Warrkenh ngkwenheln nthakenh ingkerrenh iney-angenh. Alerengkw ngkwenheln ingkerrenh atnyeneyen, nga iltwenty-kety.” <sup>5</sup> Akngeyel renh atnwenhekl aketh-warl. Ra renh ilek, “Alker-warl itnywena! Antyarr-rnem ntwa areyel? Ntwa count-em-anem renh-rnem ila! Ngkwenh-rnem antyarr ilenh-rnem-apeny akngerrirreyen.”

<sup>6</sup> Abram Akngayek inkwrelhemel awelhek. Akngeyel renh artwa arraty innga arek, rarl Akngayek awelhenh.

<sup>7</sup> Akngeyel ilek, “Ayeng Akngay ra, atharl ngenh apmer Ur-they, Chaldea-rnem-kenh apmer-they atnwenhey-alhek, apmer nhenh ngenh anthetyek, ngkwenh-rnem-akert.”

<sup>8</sup> Abram angkek, “Akngayay, nthakenh atha iterl-areman apmer yanh atha atnyenetyek?”

<sup>9</sup> Akngay ra ilek, “Pwelek amarl akely atyeng-warl akngetary! Nanikwet anyent yep- yep irrwey anyent rwelyarr anyent, pwelker anyent.”

<sup>10</sup> Abram Akngay ikwer awelhek. Aker-rnem akngek, Akngay renh anthetyek, tyenkerr-anem. Abram-el aker renh-rnem rlweth-rlweth akek, amentew-ament ar- rernek ahern-warl, pwelker-then rwelyarr-then rlweth-akey-angenh-antey. <sup>11</sup> Irtry- rnem-then inkwel-rnem-then akarirrek aker-warl. Thip ingwerek-ingwer-then. Rernem aker-warl apetyek. Abram-el renh-rnem irrentek.

<sup>12</sup> Ingkeny aylpenhetyek irrek. Kel ankwanem irrek. Abram artewenteyel aterirrek- anem. Ingwel artek. <sup>13-14</sup> INGKARTel ilek, “Ngkwenh-rnem ingwer-rnemek warrk antherl-aneyen, arlkarewerl-aneyen. Ngkwenh-rnem nhak-itwek ingwer-rnemel warrk antherl-aneyen, rernem aleth innga warrkirk-ayntetyek aherrety 400-ek-atwety. Apmer ingwer-areny-rnemel renh-rnem ilpertileyen. Ngkwenh-rnem apmer ingw- erel arlengeny-apenyaneyen. Atha apmer ingwer-areny-rnem ingkerrenh arntety antheyen. Atharl apmer renh atwem-kety, rernem apmer-they alpeyenh ampwal akngerr-akert. <sup>15</sup> Nga ampwirremel ilweyen, ngkwenh-rnemel ngenh ikwer-itwel- antey akwernayn, nga artwa ampwanem mwerraneyen. <sup>16</sup> Rernem aherrety 400-penh apey-alpeyenh, Amor-areny-rnemel apmer nhenh atnyeney-kety.”

<sup>17</sup> Ikwer-penhan ingkeny aylpenhek, ingwemernt-anem irrenhek. Rwalep-then rwa lherrm-then, ampep-itwek aker ampep-angkwarr aremirrenhey-alhek. <sup>18-20</sup> Arlta ikwerel-antey Akngayel Abram renh alhelek, “Atha ngkwenh-rnem ingkerrenh apmer nhenh antheyen. Egypt lher-they Euphrates lher ilkwa ikwerek-atwety, ingkerrenh- kenh apmerek-artwey. Atha ngkwenh-rnem apmer ingkerrenh-antey ilenh antheyen.”

...

**16**

*Angka Hagar Ishmael atherr-akert*

<sup>1-3</sup> Sarai, Abram, ratherr anewart ampeweny anen. Arelh warrkenh anyent ikweren, itnan Hagar. Sarai angkek Abram-warl, Akngayel ayenh menty ilek ampekety. “Warrkenh atyenh ntwa ikngwa, ntwa ampa atnyenetyek.” Alakenhaym Abram ra arelh warrkenh-anem ikngwek. Abram apmer Canaan-itwek aherrety 10 anen. Abram awelhek, anew ikwerenhelarl renh ilek. Sarai ra warrkenh Egypt-areny ikweren Abram renh antek. <sup>4</sup> Abram-anem Hagar-itwek ayntek, ampanem ikweren anen. Ikwer-they Hagar tnakelhenh, ikwer Sarai irrpelthirremel. <sup>5</sup> Sarai angkek Abram-warl, “Ntwa atyeng apmwel-areth mpwarek. Atha ngenh warrkenh yanh anthek anew ngkweng ra atyengety arkarirrekarl. INGKARTel iterl-areyel ntwarl atyeng apmwel- areth mpwarek.” <sup>6</sup> Abram angkek, “Warrkenh yanh ngkwenharl. Ntwarrp kel atnyenetyek. Ayengan arlarl.” Sarai-el Hagar renh ayntarr-ilek. Irrwernek. Hagar anterrek-anem ikwerety.

<sup>7-8</sup> Akngay-kenh angel-el Hagar renh arey-alhek apmer arlpaw-itwek kwaty ngenty- itwek, apmer Shur-ampeny-itwek. Angel-el renh ayernek, “Hagar Sarai-kenh warrkenh, nthenh-they nga alpeyel, nthenh-warlay?” Hagar angkek, “Ayeng Sarai ikwerety aterel alpeyel.” <sup>9</sup> Angel-el renh ilek, “Sarai-warl alpa, ikwer awelhetyek. <sup>10</sup> Atha ngenh ngkwenh-rnem akngerr innga antheyen, ingwerel-rnem nthakenh count-emiley- angenh.”

<sup>11</sup> “Ntwa awey akely atnyeneyen, ntwa renh itnewa Ishmael. <sup>12</sup> Ra artwa ateralth aneyen, tangkey saddle-ek akwerrp-apeny. Ra artwa aneyen, tangkey ateralth-warl arrernem-apeny. Ra awelhey-angenh ingkerrenhek aneyen, ingkerrenh ikwer awelhey-angenh arrpemarl. Ra nthakenh ikwer-rnem-itwek aney-angenh, nthakenh ingwerenty-itwek ra aney-angenh.”

<sup>13</sup> Hagar-el INGKART renh ilek, “Nga atyeng aremirrek.” Ra iterrek, “Atha INGKART arek-penh, ayeng iteth-antey aneyel, ilwey-angenh.” <sup>14</sup> Alakenh rernem kwaty ngenty renh itneweyel Beer Laha Roi, kwaty ngenty ampep apmer Kadesh-they apmer Bered-angkwarr aynetyel. <sup>15-16</sup> Abram-el atherr Hagar-el-atherr awey akely atnyenek, awey ikwerenit itna itnewemel Ishmael. Abram ra aherrety 86 ampwa innga anenh, renharl ratherr atnyenek-penh.

## 17

### *Akngayel Abram renh ilantheyel, awey ikweren artwiletyek*

<sup>1</sup> Abram ra aherrety 99-anem. Akngayel ikwer aremirrek angkemel, “Ayeng Akngay Atyetyart ra. Nga aleth anaynta, aratty innga. <sup>2</sup> Abraham-ay, atyeng nga awelhetyek. Atha ngenh alhelek-angkwarr, atha alhelem arrpemarl, atha ngkwenh-rnem akngerr innga ileyen.”

<sup>3</sup> Abram ahern-warl inngerr kwenirremel atnertel ilperr-ayntek. <sup>4</sup> Akngay angkek ikwer-warl, “Atha ngenh alhelem, nga Atyetyart anetyek, ingkerrenh ngkwenh-rnem ngkweng-they akngerrirreyen, apmer arrpanenh-areny-rnemek. <sup>5</sup> Rernem ngenh itneweyen Abram-weny, Abraham-ant-anem. Alakenh-anyem nga Atyetyart aneyen, apmer arrpanenh-areny-rnemek. <sup>6</sup> Atha ngenh akngerr innga antheyen, ngkwenh ingkerrenh. Rernem apmer arrpanenh-areny aneyen Atyetyart ilkwer nem-then. <sup>7-8</sup> Atha ngenh arntarnt-arem, atha ngenh alhelek-angkwarr. Atha arrenhantherr apmer Canaan-anem antheyen, arrantherr apmerek-artwey-wenyarl aneyel, atha arrenhantherr apmer Canaan anthem arrekantherr.” <sup>9</sup> Akngay angkek Abraham-warl, “Nga atyeng-angkwarr anayntetyek ngkwenh-rnem-then. <sup>10-11</sup> Arrantherr awey arrekanther-renh artwa mpwaretyek, yanh alhelenty aneyen, atharl arrenhantherr ilek-angkwarr. <sup>12</sup> Arta 8 ikwerel-antey arrantherr awey renh-rnem artwa mpwaretyek, alehang-rnem-then ingkerrenh, rernemarl warl ngkwenhel aneyel-rnem-then. <sup>13</sup> Apmer ngkwenh-itwek atnyenek-rnem-then ntwa ingkerrenh artwa mpwaretyek, warrkenh ngkwenh-rnem-then ingkerrenh. <sup>14</sup> Rernem alakenh-anyem mpwarey-angenh, rernem atyeng irrpelthirrenty, atha renh-rnem ilek-kety. Angka atyenhek awelhey-angenh anenty, atha renh-rnem atwem.”

<sup>15</sup> Akngayel Abraham renh ilek, “Ntwa anew ngkwenh Sarai itnewey-angenh, ntwa renh Sarah-ant-anem itnewem. <sup>16</sup> Atha renh arntarnt-areyel, atha ngkwenh aler anthem ikwer-angkwarr. Akngerr ikwer-they akngerrirreyen arrpemarl, apmer arrpanenh-areny Atyetyart-rnem-then.”

<sup>17</sup> Abraham ra ilperr ayntek arrpemarl. Ra irrpelthirremel atherrek, “Nthakenhan artwa aherrety 100-kenh ampa atnyenetyek? Sarah-el nthakenh ampa atnyeney-angenh aherrety 90-el?” <sup>18</sup> Abraham-el Akngay renh ayernek, “Ishmael-el-arleng atyenharl?”

<sup>19</sup> Akngayel renh ilek, “Arrangkw wenh! Anew ngkwenhel Sarah-el awey atnyenem, ntwa renh itneweyen Isaac. Atha renh ingkerrenh alhelem. Atha ngenh awek ngarl perayirenh Ishmael ikwer. Atha renh arntarnt-areyenh, akngerr ikwer-they ireyenh, apmer arrpanenh-areny-rnem. <sup>20</sup> Ra Atyetyart ireyenh 12 prince ikwer-rnem. Atha renh Atyetyart ilkwa anetyek arrerneyen, apmer arrpanenhек. <sup>21</sup> Atha aratty mpwareyenh, atha alhelek-angkwarr Isaac ikwer-angkwarr, renharl Sarah-el atnyeneyen, irrkaty-angkwarr aherrety ingwerel.” <sup>22</sup> Ikwer-penh Akngay alpek-anem.

<sup>23</sup> Abraham-el Ishmael, alerikw ikweren, warrkenh ikweren-hrnem-then, apmer ikweren-itwek atnyenekarl-rnem-then. Ra renh-rnem artwilek, Akngayelarl ilek-angkwarr. <sup>24</sup> Abraham aherrety 99 anenh, artwa ampwanem. <sup>25</sup> Ishmael aherrety 13 anenh, amerrk-antey, rernemarl renh-rnem ingkerrenh-anem artwilek. <sup>26</sup> Abraham-atherr Ishmael-atherr arla anyent ikwerel-antey artwirrek. <sup>27</sup> Abraham-kenh artwernem arla ikwerel-antey artwirrek arrpemarl.

## 18

### *Abraham-el artwa irrpety arntarnt-areyel*

<sup>1</sup> Akngay aremirrek Abraham ikwer apmer Mamre-itwek, arwerl arnenty ikwer-itwek. Arta ampep ikwerel Abram kalikw ikweren, arriwel anenh. <sup>2</sup> Ra arek artwa irrpety rtney-alhenty aketh-itwek.

<sup>3</sup> Ra ikwer-rnem-warl anterrekk, renh-rnem rlwatetyek. Ra ahern-warl-athek kwenirrek, angkemel, "Anper alhey-angenh, lytwenty-itwek ltyerrenherr-arey! <sup>4</sup> Kwaty atha arrekantherr iney-akenh ingka ahern-penh lhewelhetyek, arrantherr lywel ltyerretiyek.

<sup>5</sup> Amern-then atha arrekantherr iney-akenh alethel arrantherr alpetyek."

"Ya, kel mwerr," rernem angkek.

<sup>6</sup> Abraham wak-warl aylpenhek, Sarah-arl anenh-warl, renh ilek, "Amern arlety irrpety inay, amern rtamp ampernetiyek." <sup>7</sup> Ra aker mwerr innga rlwanek, anter-akngerr akely. Abraham-kenh warrenkel pwelek irrwey akely atwerliwek aker artwa irrpety ikwer-rnemek. <sup>8</sup> Abraham-el aker-then milk-then anthek, artwa irrpety renh-rnem. Abraham lywel anenh, rernem amern arlkwenh-kety.

<sup>9</sup> Rernem ayernek, "Anew ngkwenh Sarah-alew?" Abraham ra angkek, "Kalikw kwenel." <sup>10-11</sup> Artwa alethang angkek, "Aherrety anyent-penh ayeng apey-alpeyeh Sarah ampa akely atnyeneyeh. Sarah-el-tangkwel ampa atnyeneyeh arrwekel-antey ayeng apey-alpey-alenty." <sup>12</sup> Sarah-el angka awek-penh, irrpelthirremel. Sarah atherrek, "Nthakenh atha ampa atnyenem ampwelam-athen, aylanth atherr-antey ampwa, nthakenh ampa atnyenem."

<sup>13</sup> INGKARTel Abraham ilek, "Nthakenhek Sarah angkek atherremel-anem, atyeng irrpelthirreyel? Ayengan INGKARTarl, ampa innga atha anthey-angker! <sup>14</sup> Aherrety anyent-penh ayeng apey-alpeyeh aherrety ingwer ikwerel-antey. Sarah-el ampa atnyeneyeh arrwekel-antey ayeng apey-alpey-alenty."

<sup>15</sup> Sarah ra aterirrek, irrywerremel ilelhek, "Ayeng atherrey-angenh arrangkw." Artwa alethang ra ilek, "Inngarlap nga atherrek."

*Abraham-el Akngey renh ayerneyel, ra apmer Sodom atwey-angenh menty aretyek*

<sup>16</sup> Artwa alethang irrpety rernem apmer Sodom-warl alpek. Abraham ikwer-rnem-angkwarr antelherl-alhek, artengewemel iwerr iylparrernetyek ikwer-rnemek.

<sup>17</sup> INGKART iterrenh, "Abraham atha iley-angenh apmer Sodom-arl atha atwem.

<sup>18</sup> Ikwerenh-rnem akngerrirreyeh apmer arrpanenh-warl arlperryirreyeh. <sup>19</sup> Atha Abraham renh arntarnt-arek, ra ikwerenh-rnem akalty-antheyek atyeng-angkwarr, rernem arraty anetyek. Ikwer-penh atha renh-rnem arntarnt-arem, atharl renh-rnem ilek-angkwarr."

<sup>20</sup> INGKARTel Abraham renh ilek, "Atha awek tern atherrarl artwa apmwangkwarr aneyel. Atha angka ilkwa awek." <sup>21</sup> Ayeng alhem, atha renh-rnem aretyek, nthek-angkwarr rernem aneyel, innga apek, arrangkw apek."

<sup>22</sup> Artwa alethang ratherr anperl-alhek, apmer Sodom ikwer-warl-anem, Abraham INGKART-itwelarl anenh. <sup>23</sup> Abraham-el INGKART renh ayernek, "Artwa apmwernem ntwa atwenty, artwa mwerr-rnem ntwa atwem arrpemarl? Arlernem-alew?" <sup>24</sup> Tern yanh alerl atnyenenty artwa mwerr-rnem 50-akert? <sup>25</sup> Ntwa mwanty arntarnt-aretyek. Ngan INGKART arraty innga, arlernem-then arntarnt-aretyek, tyatyemiley-angenh renh-rnem."

<sup>26</sup> INGKART angkek, "Atha apek artwa mwerr-rnem 50 aretyel, atha apmer Sodom renh ywerrelhilemel atwey-angenh."

<sup>27</sup> Abraham angkek, "Ayengan ahern-arenyarl. Nthakenharl artwa 45 mwerr-rnem aretyan? Ntwa tern ilkwa ywerrelhilemel atwetyek?" <sup>28</sup> INGKART angkek, "Atha apek artwa mwerr-rnem 45 aretyel, atha apmer Sodom renh ywerrelhilemel atwey-angenh."

<sup>29</sup> "Artwa mwerr-rnem 40-alew?" Abraham-el renh ayernek. "Kel menty atwey-angenh." INGKART angkek, "Atha tern ilkwa ywerrelhilemel atwey-angenh."

<sup>30</sup> Abraham angkek, "Nga atyeng ahelirrey-angenh, INGKARTay. Nthakenharl artwa 30 mwerr-rnem aretyan? Ntwa tern ilkwa ywerrelhilemel atwetyek?"

INGKART angkek, "Atha apek artwa mwerr-rnem 30 aretyel, atha apmer Sodom renh ywerrelhilemel atwey-angenh."

<sup>31</sup> Abraham angkek, "Ayengan arrangkw. Artwa 20 mwerr-rnem-alew?" INGKART angkek, "Atha apmer renh ywerrelhilemel atwey-angenh."

<sup>32</sup> Abraham angkek, "Nga atyeng ahelirrey-angenh INGKARTay, artwa mwerr-rnem 10-alew?"

"Kel, menty atwey-angenh," INGKART angkek. "Atha tern ilkwa ywerrelhilemel atwey-angenh."

<sup>33</sup> Abraham angkek-arl-penh INGKART alpek-anem. Kel Abraham apmer-warl alpek.

<sup>1</sup> Atwerrp-anem angel atherr apetyek apmer Sodom-warl, tern ilkwewarl. Artwa Lot keyt ilkwa iwerr-angkwarz anen. Lot-el angel renh-atherr arek, ra akapwert ahern-warl-athetk kwenirrek. <sup>2</sup> Ra angkek, "Mpwelanth apmer atyen-h-warl apetyenherr-atherr, ingkernem-then mpwelanth lhewelhetyek. Ingwa anyent-inger mpwelanth ayntetyek, ingwepenh mpwelanth alethek alpey-akenh." Ratherr renh ilek, "Mwerr aylanth akethel ayntem, tawen ampepel?" <sup>3</sup> Lot-el renh-atherr irrtyelh-ilenh innantey apmer ikweren-h-warl alpetyek, ratherr innantey alpek ikwer-angkwarz, apmer ikweren-h-warl. Lot-el ampernek ikwer-atherr.

<sup>4</sup> Rernem ankwayntetyek irrek-anem. Artwa ingkerrenh Sodom-areny-rnem ikwer-nem-warl, artwa atningk apetyek. <sup>5</sup> Rernem ayernek, "Artwa alehang weth-atherr-alew? Warl ngkwenharl aneyel atherr-alew? Akngetya renh-atherr arntarnt-areyel, ratherr atyeng-itwel ilkwatherr aneyel."

<sup>6</sup> Lot alhek arriw-warl-athetk. <sup>7</sup> Ra menty angkek. <sup>8</sup> "Kwey aleyak nhenh-atherr akngwynnenherr-areyay, artwa atherr mentyarl. Atha renh-atherr arntarnt-areyel, ratherr atyeng-itwel ilkwatherr aneyel."

<sup>9</sup> Artwa apmwer nem arlek, "Iwerr-kety alha! Arrngert angkey-angen! Artwa yanh alehangarl, nthakenh ra anwekantherr angkey-angen alakenh. Anwantherr ngenh atwekk!" Rernem akarirrenhey-alhek arriw renh ngkwelityleyek, warl Lot-kenh.

<sup>10-11</sup> Artwa angel ratherr Lot renh ayteng inek, warl renh martemel artwernem akethelarl rtnehn-rnem ingkerrenh aparrngilek, rernem iwerr renh arey-angen hilek.

<sup>12-13</sup> Ratherr Lot ikwer angkek, "Ngkwenh-rnem apek apmer nhel aneyel? Alerengkw-rnem-then. Ingkerrenh apmer nhenh-they akngeyna, aylanth apmer nhenh atwem-kety. Aylanth apmer nhenh atwem, rernem apmwangkwarz alheyel-kety."

<sup>14</sup> Lot-el malyikw ikweren-h-warl ilek, rernem apmer-they alpetyek ingkerr-antey. Ratherr ikwer irrpelthirrenh, menty renh awenh.

<sup>15</sup> Ingwepenh angel-el atherr Lot renh ilek ra apmer ikwer-they alpetyek, "Anew ngkwenh alerengkw ngkwenh-atherr anamerl apmer nhenh-they atnweneyna alpemel. Arrangkwelan nga alpey-angenhan, ingkerrenharl arrenhantherr atwem."

<sup>16</sup> Lot arlan anyentel-antey rtnehn. Akngey ilkelhenn renh atnyeneyek. Angel-el Lot renh anew ikweren halerikw ikweren-h-warl-then apmer ikwer-they atnwenehek.

<sup>17</sup> Angel-el renh-rnem ilek, "Apmer renh artepang arey-angen alpetyek."

<sup>18-19</sup> Lot-el ilek, "Awethem ntwa ilekan. Apwert-warl anwenhantherr ilanthey-angen, apwert arleng-ketyarl, anwantherr atwelhekkerr. <sup>20</sup> Tyarlewa anwenhantherr apmer akely ikwer-warl alpetyek." <sup>21</sup> Angel-el ilek, "Ya, kel mwerr, atha apmer renh atwem-angen. <sup>22</sup> Anamerl alhenherr-arey arrenhantherr atwekkerr-awaty." Lot-el tawen akely renh itnwek Zoar, angka ikweren-h-angkwarz aynteyel apmer akely.

<sup>23</sup> Ingkeny tyerrelhetyek irrek-anem. Lot apmer Zoar ikwer-warl aney-alhek-anem. INGKART-kenh lherrm ikweren hel tawen renh-atherr atwek. <sup>24-25</sup> INGKARTel lherrmel-anem apmer renh atwek. Apmer atherr-antey ra atwek, arwerl-rnem-then atherrk-rnem-then. Altherrp-itwekan atwek arrpemarl lherrmel. Akngeyel arrpemarl tern ilkwitwel atwek arrpemarl. Tern ilkwernem ingkerrenh atwek. <sup>26</sup> Lot-kenh anewel artepang arek, ra apwert thalt-anem irrek.

<sup>27</sup> Ingwepenh ikwerel-antey angkep-antey arrpemarl Abraham alpek irrikaty ikwer-warl, rarl arrwekelarl angkek Akngey-warl. <sup>28</sup> Ra kwen-warl-athetk lherrm-rnem kwert-then tyerrelhey-ayntenty apmer ikwer-atherr-they.

<sup>29</sup> Akngey ra iterl-arek, Abraham ra alhelek Lot-anem arntarnt-aremel. ...

## 21

### *Isaac ampa akely atnyeneyel*

<sup>1</sup> INGKARTel Sarah renh arntarnt-arek, rarl Sarah renh ilek-angkwarz. <sup>2</sup> Abraham ampwanem irrek. Sarah-el awey akely atnyenek. <sup>3</sup> Abraham-el renh itnwek Isaac. <sup>4</sup> Arlta 8 ikwerel-antey renh artwilek, INGKARTelarl renh ilek-angkwarz. <sup>5</sup> Abraham aherrety 100 anen.

<sup>6</sup> Sarah angkek, "Akngeyel ayenh irrkngerney antheek. Ingkerrenhel awem, atharl awey akely atnyeneyel, rernem inkwerelhem arrpemarl." <sup>7</sup> Rap angkek, "Ingwer-rnemel Abraham ilek, 'Sarah-el awey aylpaty anthem,' ra ikwer-rnem irrpelthirrenh. Lyert, ra ampwan aneyel, awey ikweren h-aynteyel."

### *Abraham-el Hagar-then Ishmael-then irrenteyel*

<sup>8</sup> Isaac kel ilkwerrek. Ra kel amernant arlkwenh, aylpaty menty ipmek. Abraham-el tyenkerr ilkwa ikwer atnyenek. <sup>9-10</sup> Sarah-el awey Ishmael renh arek. Sarah-el alharlkwemel Abraham-ek angkek, "Ntwa warrkenh yanh Egypt-areny irrenta!"

Ampikw ikwerenh-then. Ayeng ilkelhey-angenh ampa Hagar ikwerenh-kety ngkweng-they ampwal-rnem inayntetyek. Ampa atyehelant ampwal ngkwenh-rnem atnyenerl-ayntetyek, arntarnt-arayntetyek ngarl ilwem-kety.”

<sup>11</sup> Abraham ahelirrek, Sarah-elarl renh irrentetyek-anem arrkernelhek. <sup>12</sup> Akngeyel Abraham renh ilek, “Menty arelh yanh-then ampa akely-then menty alpetyeck tyarlewa, Sarah-elarl renh ilek-angkwarr. Isaac impen ngkwenhan. Ikwer-they akngerram-akngerrirreyen arrpemarl. <sup>13</sup> Arelh warrkenh-kenh ampikw yanh menty-anem. Yanhan alerengkw ngkwenh arrpemarl. Ikwer-they akngerram-akngerrirreyen arrpemarl.”

<sup>14</sup> Abraham-el Hagar renh arrantz kwaty-akert antheck amern-then, anpethel akngeynetyek. Hagar-then Ishmael-then irrentek-anem. Ratherr alpek, apmer Beersheba-angkwarr, arlpaw-angkwarr.

<sup>15</sup> Kwaty kel ywerrek-anem. Hagar-el awey renh iwerl-alhek, lytwenty-itwek. <sup>16</sup> Ra arleng-warl alhek, arrernelhemel, awey renh arekerr, ra ilwekarl-kety.

<sup>17</sup> Akngeyel awey renh awek, rarl artnek. Akngey-kenh angel-el irrwerl-they arlek, “Hagar, ilekek nga artneyel? Aterirrey-angenh. Akngeyel awek, awey rarl artnek. <sup>18</sup> Avey ngkwenh inerl-alha, renh arternpiletyek. Atha ngkwenh-rnem akngerram-akngerrileyen.”

<sup>19</sup> Akngey kwaty Hagar ikwer anayntelhilek. Ra kwaty ngenty arek. Hagar-el kwaty inpek arrantz-warl, awey renh antheck, antywetyek.

<sup>20</sup> Akngeyel awey renh arntarnt-arek. Ra ilkwerrek-anem. Ra apmer arlpawel anen. Ra akaltyirrek pewenarrek. <sup>21</sup> Ra arlpawel anen, rernem apmer renh itnewek Paran. Ingwer-ingeran amikw ikwerenhel anew inek ikwer, aleyak Egypt-areny. ...

## 22

### *Akngayel Abraham renh ilantheyel, Isaac renh ipmek atwetyek*

<sup>1</sup> Abraham renh Akngeyel arrkernek, nthekwern irrem ran wenh. Arratz renh arrkernek Akngeyel, ikwer-angkwarr anetyek apek. Akngayan ikwer arlek, “Abraham!”

“Ilekay!” ran angkek.

<sup>2</sup> “Isaac, alerengkw ngkwenhant aknga apmer yanh-warl, Moriah-warl. Atyeng aknga Apwert renhan atha ngkweng tnernemarl. Aknga renh tyenkerr-anem atyeng. Atwey-alha renh, tyenkerr-anem. Ikwerek-anem tyenkerr-anem atyeng atwa! Yanhan alerengkw ngkwenhan.”

<sup>3</sup> Ingwepenh-antey rap akemirrek. Ingwepenh-antey Abraham ra artwa ingwer-atherran-anem ikngwerl-alhek alerikw-anem ikwerenh. Rwanem ngkwelty ngkwelty-ilek ra, tangkey-anem ingwepenh-antey saddle-emiley-aynteck. Saddle arertney-aynteck tangkey-warl artep-warl. Rwanem ra inen. Tywenerl-alhek ra. Apmer ikwer-warlap ra alhek Abraham irrkaty ikwer-warl renharl Akngeyel ilek-warl. <sup>4</sup> Irrpty-inger-penh rap arek arleng innganem, alker innganem, arleng-antey-anem. <sup>5</sup> “Mpwelherl-aynten-atherr. Akngeyek inkwerelhemel alhem-kety! Avey nhenh atyehn atha aleyak akngem-kety. Anerl-aynten-atherr! Mpwelh-ayntenherr-atherr tangkey nhitwek. Akngeyek inkwerelhemel alhem-kety.”

<sup>6</sup> Abraham rap awey ikwer-warl rwer nem tywenekan pwerlep-warl, artep-warl-anem, awey ra akngayn-aynteyew-anem. Abraham-el akngaynenh rwalep-them inkwartey-then. Ilperlarlap ran. Anperl-alhek-anem ratherr. <sup>7-8</sup> Avey rap apatey-alhek, “Aker nthenharl ngkwenh tyenkerrew? Yep-yepew?” Abraham renh-anem ayernen. Avey apatenh-anem. Abraham-anem ikwer angkenh, “Akngayelarl tyenkerr anthem.”

<sup>9</sup> Akngayelarl Abraham renh ilek-angkwarr, akngayel ratherr anperl-alhek-anem. Apwert ilperr-ilperr renhan ra arratzilekan. Rwer nem ampwerretty-inenh arratzilemel. Avey renhan tyweney-alhek rlterr-atherr itep-atherr renhap athenew-anem. Avey renhan arertnek ra, rlterr-atherr itep-atherr. <sup>10</sup> Inkwartey-anem irrwerlilek ra atanthyek-anem awey renh. <sup>11</sup> INGKART-kenh angel angkek ikwer, “Abraham, Abraham!”

“Ilekay!” Abraham-an angkek.

<sup>12</sup> “Ipmai! ipmai! Abraham ipmai!” Angel-an angkek. “Abraham ipmai! Atwey-angenh! Yanh atha ngenh iterl-areyel-anem. Alerengkw ngkwenh ayen hantek ntwa. Ngkwenh. Anyent-antey. Impen-antey. Iterl-areyel-anem. Athap ngenh anthem ampa arnkengeny-anem. Akngerr-anem.”

<sup>13</sup> Abraham-elar arerl-arrernek, “Ay, yep-yepparlap wenh!” Akapwert yanhey yep-yepp mwernelehenh ra. Arwerl-rnemel mwernek artekerrel-anem. Akapwertan renh.

Mwernek-anem. Rewelyey-anem renh. Artekerr arwerl-rnemel-anem renh yep-yep mwernekan. Rap ywarn-anem tyerrelhenhan, Abraham-el renh-anem arerl-arrenerkan. Rap yep-yep renh, Abraham-el tyenkerr-anem renh anthekan, ikwer-warlanem arrernekan. Apwert ilperr-ilperr ikwer-warlanem ra arrernekan. Tyenkerr-anem renh anthekan.<sup>14</sup> Abraham-el apmer renh itnewek INGKARTel Wantem. Lyert aley renh itneweyel INGKARTel Wantem apwert ikwerenhel. Itnan renh anthek, apmer Tyarlaptiyarlap ran. Itnan renh anthek Akngeyeley. Apwert ilperr-ilperr renhan.

<sup>15</sup> Angel ikwer angkek arrpemarl,<sup>16</sup> “Ngarl impenirrey-angenh atyeng angwenhirrek, impenirrey-angenh alerengkw ngkwenhek.”<sup>17</sup> Ngenh anthem ampa arnkengeny-anem, akngerr-anem. Ampa akngerr-anem atha ngenh anthem. Athap ngenh anthem ampa arnkengeny-anem. Akngerr-anem. Ampa akngerr-anem atha ngenh anthem. Apmer arrpanenh-anem ampa ngkwenhel tern ilkwerneh akngeman amentew-ament. Tern ilkwerneh-anem. Apmer arrpanenh-anem. Tern arrpanenh ngkwenh ingkerrenh akngerrirreyen, ahern akely-rnem akngerr aynteyel-apeny. Ampa ngkwenhel-rnemey.<sup>18</sup> Athap ngenh arntartt-arem irrwerl-theyan, ngarl atyeng awelhek. Athap ngenh arntartt-areman Abraham-ay.”

<sup>19</sup> Abraham ra warrkenh ikweren-atherr-warl alpek alerikw ikweren-akert. Abraham rap alpek apmer Beersheba-warl-anem. Aleth-antey aney-alpek-anem ra. ...

## 23

### *Sarah ilwelyel*

<sup>1-2</sup> Sarah aherrety 127 anenh, apmer Kiriath Arba ilwemel-antey ikwer-itwek-antey. Apmer itna ingweran Hebron, Canaan-itwek.

<sup>3</sup> Abraham rarl amperrngirrek ikwer. Ikwer-penh Abraham Hitt-kenh-rnem-warl alhek, ra renh-rnem ayerney-alhek,<sup>4</sup> “Ayengan alethang. Nthenhek atha anew atyenh arrewaly akwerneh? Apmer mwerr ngay ntwa akely atyenh anthem?”

<sup>5-6</sup> Rernem angkek, “Ngarl Atyetyart ilkwan intey nthenhek ngarl arlkwententyelan? Kel, ntwa intey yanhek anew ngkwenh arrewaly akwerna.”<sup>7-9</sup> Abraham angkek, “Ephron ayernerr-arey intey renh parrik impalh-itwek tharlemiletyek. Atha man ilkwan anthem, arrantherr ayenh ingkerrel aytaretyek, atharl anthem.”<sup>10</sup> Ephron apmerek-artwey, artwa Hitt-kenh apmer tern ilkwa arriw-itwek-antey anenh. Abraham-el apmer ikwer ayernek.<sup>11</sup> Ephron angkek, “Kel, intey atha anthey, ingwerel-rneman ngenh aytaremel ntwarl atyeng-they intey ineman.”

<sup>12-13</sup> Abraham angkek, “Man ilkwa innga atha ngenh anthem, arraty-angkwarr.”

<sup>14-15</sup> Ephron ra ilek, “Menty! Thilp 400 ntwa payemeley-areny inteykey! Arwa ngkwenh aunga, man-weny. Atha ngenh menty anthek, man-weny-anem.”

<sup>16-18</sup> Abraham-el artwa Hitt-kenh 400 thilp anthek, artwa akngerrel aytarek-angkwarr. Alakenh Abraham-el apmer Ephron-kenh payemelek ikwerant-anem, ikweren-rnem-akert, intey-akert, arrewaly renh akwerneytyek. Apmer ranap arwerl-angketyarr.

<sup>19-20</sup> Abraham-el anew ikweren-antey ikwer-itwek akwernek, rarl payemelek-itwek, Hitt-kenh-rnem-itwek.

## 24

### *Isaac Rebekah atherr*

<sup>1</sup> Abraham artwamp-anem irrek, ampwal akngerr atnyenek. Akngeyel renh arntartt-arek.<sup>2</sup> Ikwer-penhan, Abraham-el warrkenh ikweren-antey innga ilek, rarl ampwal ikweren-rnem arntartt-aryanteteyek.<sup>3</sup> “Anew apmer Canaan-areny iney-angenh alerey atyenh.”<sup>4</sup> Kel apmer ayengarl ilkwerrek-ampeny-arenyant anew ikwer inetyek, atyenh-rnemarl aneyel-itwek.”

<sup>5</sup> Warrkenh ikwerenhel renh ayernek, “Nthakenharl arelh ra apetyetyek ilkelhey-angenhel. Ilek-apenyarl Isaac atha thwenenty, renh ikngwetyek.”

<sup>6</sup> “Kel, menty ipmay iterrey-angenh,” Abraham-el tyernek.<sup>7</sup> “INGKART alker-arenyel ayenh atnwenhey-alpek apmer nhenh-warl, apmer alhelenty nhenh-warl ayenh ra anthek, atyenh-rnem-akert. Nga apmer ikwer-warl alhentyan, INGKARTel angel ikweren-antey atnwenheyek arelh ikwer-warl.”<sup>8</sup> Ra arkarirrenty menty ra aney, alerey atyenh Isaac akngeyney-angenh, ikwer-warl.”<sup>9</sup> Warrkenh ra Abraham ikwer ilelhek, “Ayeng ngkwenh awelheyel, ntwarl ayenh ilek-angkwarr-antey.”

<sup>10</sup> Ikwer-penhan warrkenh ra ampwal ilek-ilek akngerr-anem Abraham-kenh kamwerl 10-warl tywenek. Ikwer-they ra anperl-alhek apmer Syria-ampeny-warl, artwa Nahor anenh-warl. Nahor Abraham-kenh aytteyikw.<sup>11</sup> Ra kamwerl-rnem kwaty-itwek apmer

tern akwerr-ampenyek apmer ltyerreyek arrerney-alhek. Atwerrp-anem arelh-rnem tern ilkwareny-rnem kwaty-warl apetyek.

<sup>12</sup> Warrkenh ra kwenirremel irrwerl-warl-athet angkek, "Akngeyay, ngan Abraham Atyetyartarl aneyel. Ntwa ayenh arrayt ila, anew atha Isaac-ek anetyek, ntwarl Abraham renh alhelek-angkwarr-antey. <sup>13</sup> Arelh yanh-rnem kwaty-warl rlengk apetyem, <sup>14</sup> atha renh-rnem ayernem anyentel kwaty anthetyek apek, rarl ayenh kwaty antheman atthap renh iterl-aremarl, Isaac-kenh anewikw, ntwarl Atyetyart ayenh alhelek-angkwarr."

<sup>15-16</sup> Aleyak anyent mwerr-angker innga apetyek kwaty inpeteyek, ampwal kwatyetek-arelh anpethel akngeteyek, itnan ra Rebekah. Rebekah ra Bethuel-kenh alerikw. Bethuel ra Nahor-kenh ra Nahor-kenh alerikw, Milcah-kenh ampikw. Rebekah anper ikwer-angkwarr alhek, kwaty-anem ra inpenh kwatyek-arelh-warl. Ra apmer-warl alpeteyek-anem irrek.

<sup>17</sup> Abraham-kenh warrkenhel renh ayerney-ayntek, "Kwaty atyeng anta!"

<sup>18</sup> Aleyak ra angkek, "Kel, antywa!" Ra anpeth-they renh atwarrelhilek, anterrkwemel artwa renh-anem kwaty antywetyek anthek.

<sup>19-20</sup> "Atha kamwerl-rnem-then kwaty antywetyek anthem," aleyak ra angkenh. Aleyak ra kwaty thelhek. Ra angkepelarreng kwaty inperlenty-aknghen kamwerl-rnemek. Kel kamwerl-rnem kwaty akngerr antywek-penh. <sup>21-22</sup> Abraham-kenh warrkenhel arelh renhant-anem arenh, ra renh aretyek, ra apek innga nhenhan. Artwa warrkenh ra atnyenek ampwal alhek-arelh anyent ampwal akwek-arelh anyent, apwert gold-penh. Ra Rebekah renh anthek. <sup>23</sup> Warrkenh ra ayernek, "Angwenh aynengkw ngkwenhan? Warl arlpimp ngkwenhan aytteyel, anwantherr ayteteyek?"

<sup>24</sup> Aleyak ra ilek, "Artwamp atyehan Bethuel-arl, Nahor-kenh alerikw, Milcah-kenh ampikw. <sup>25</sup> Kel warl arrekantherr arlpimparl. Amern atherrk akngerr kamwerl-rnemek."

<sup>26</sup> Warrkenh ra kwenirrek, Akngey-warl-athet angkemel. <sup>27</sup> "Kel, Abraham-kenh Atyetyart, ayeng ngkweng inkwerelhem, ntwarl ayenh Abraham-kenh-rnem-warl atnwenhek, ntwarl alhelek-angkwarr."

<sup>28</sup> Rebekah anterreynek apmer-warl ikwerenh-rnem anenh-warl, ra renh-rnem ilek.

<sup>29-30</sup> Rebekah-kenh awayikw, itnan Laban. Ra renh awek, rarl renh ingkerrenh-angkwarr ilek. Ra ampwal alhek-arelh-rnem-then, ampwal akwek-arelh-rnem-then kel arek. Laban anterrek Abraham-kenh warrkenh-warl, kamwerl-rnem-itwel rtnenh-warl, kwaty ngenty impalh-warl. <sup>31</sup> INGKARTel ngenh mwerr-antey akngeteyek apmer nhenh-warl. Akethel anwekantherretye rtney-angenh. Apmer atha ngkweng mpwarek, nga ingwel ayteteyek, kamwerl-rnem-then, ngkwenhan-rnem-then.

<sup>32</sup> Abraham-kenh warrkenh alhek, Laban-angkwarr. Laban-kenh warrkenh-rnemel ampwal-rnem atwarrelhilek kamwerl-rnem-they. Kel ra atherrk-rnem kamwerl renh-rnem anthek. Kwaty-anem ikwer-rnem akngeteyek warl kwen-warl Abraham-kenh warrkenh-rnemel ingka lhewelhetyek. <sup>33</sup> Ikwer-penhan rernem amern-anem artwa renh-rnem anthek, rernem arlkwetyek. Warrkenhel ilek, "Amern arlkwey-alentyelan, angketangkwel atha ngenh ileman ilekekarl ayeng apetyek apmer nhenh-warl. Kel ilant ilekek nga apetyek," Laban angkek.

<sup>34</sup> Warrkenh ra ilelhek, "Ayengan Abraham-kenh warrkenharl. <sup>35</sup> INGKARTel Abraham renh aleth arntarnt-arenh, akngerr renh anthek, yep-yep-rnem-then, pwelek-rnem-then, nanikwet-rnem-then, kamwerl-rnem-then, tangkey-rnem-then, thilp-rnem-then, gold-rnem akngerr, warrkenh-rnem-then. <sup>36</sup> Atyetyart atyenh-kenh anewikwelan ampa atnyenek ampwelant-anem. Ra awey atnyenek, Abraham-el renh anthek ampwal ilek-ilek akngerr innga. <sup>37</sup> Atha Atyetyart atyenh ilek, ayengarl ikwer awelhetyek, rarl ayenh ilek-angkwarr. Ra ayenh ilek, 'Menty arelh Canaan-areny ikngwey-angenh alerey atyenhek. <sup>38</sup> Atyenh-rnem-ampeny-theyant anew ikwer inetyek.'

<sup>39</sup> Atha Atyetyart renh ayernek, 'Nthakenharl arelh atyeng-angkwarr apetyey-angenh?'

<sup>40</sup> Atyetyart atyeng angkek, 'Ayeng aleth Akngeyek inkwerelhemel awelhetyel. Akngeyelarl angel thwenem, ra ngenh atnwenhetyek arelh ikwer-warl anew ikngwetyek alerey atyenhek. <sup>41</sup> Rernem arelh renh ngkweng-angkwarr tyarlewey-angenh nga menty-anem ana.'

<sup>42-43</sup> Ayeng kwaty ngenty ikwer-warl apetyek Akngey-warl-anem ayeng angkek, 'Ngan Atyetyart ilkwa Abraham-kenh. Atyeng iylparrerna, Abraham-kenh alerikwek anew atha ikngwetyek. Arelh ra rlengk apetyem kwaty-warl, atha renh ayernem, ra ayenh kwaty ngenty itwek inpemel anthetyek, atha antywetyek. <sup>44</sup> Rarl ayenh kwaty antywetyek anthenty, kamwerl-rnem-then, atthap renh inngarl iterl-areman, ntwarl atyeng iylparrernek.'

<sup>45</sup> Atha Akngeyel ayernnenhel-antey, arelh ra apetyek, kwaty inpetye, ngenty ikwertwek, kwaytek-arelh anpeth-itwek akngetyen. Ra kwaytek-arelh kwaty akngerr innga inpek, atha renh kwaty antywetyek ayernek, kwaytek-arelh-they.

<sup>46</sup> Ra kwaytek-arelh anpeth-they ayenh anthek, atha antywet. Ra kwaty inpek kamwerl-rnemek-anem, anthwengileyek.

<sup>47-48</sup> Atha renh aynikwek ayernek, ra aynikw ikwerenit newek Bethuel, Nahor-kenh alerikw, Milcah-kenh ampiwk. Anamerl-antey atha arrernek ampwal alhek-arelh-then ampwal akwek-arelh-then ikwer-warl. Ikwer-penhan ayeng kwenirremel Akngey-warl angkek, inkwerelhemel, rarl arraty innga atyeng arelh renh iylparrernek, Abraham-kenh alerikwek anew ikngwetyek, Abraham-kenh-rnem-itwek. <sup>49</sup> Ila atyeng Atyetyart atyehnek, ntwarl renh arraty innga anthem. Atha apek aleyak renh akngeynetyek. Arrangkwelan aleyak ingwerek-anemarl ayeng nthwetyek alhem, anew ikngwetyek Abraham-kenh alerikwek."

<sup>50</sup> Laban, Bethuel atherrel renh ilek, "Nhan Akngey-kenh-angkwarrarl, yanh-angkwarr anwantherr apenteman. <sup>51</sup> Kel-anem Rebekah akngeyna-anem, atyetyart ngkwenh-kenh alerikwek anew, INGKARTelarl ngenh ilek-angkwarr."

<sup>52</sup> Abraham-kenh warrkenh Akngey kwenirremel angkek inkwerelhemel ikwer, rarl renh arraty iylparrernekek. <sup>53</sup> Ra arnkwerinem-then thilp-rnem-then ampwal akwek-arelh-rnem-then gold-penh ingkerrenh anthek Rebekah renh. Ra ampwal mwerr-angker ingwer-rneman amikw-then awayikw-then anthek. <sup>54</sup> Abraham-kenh warrkenh-rnem anyent-inger-antey ayntek, ikwer-itwek. Ingwepen, Abraham-kenh warrkenhel renh-rnem ilek, "Kel, ayeng alpem-anem Atyetyart atyehn-warl."

<sup>55</sup> Rebekah-kenh-rnem arrkngert angkek, "Aleray kwey Rebekah nhenh alerl aney anwekantherr-itwek-anem wik anyentel. Ikwer-penhan-anem ra alpeman."

<sup>56</sup> Warrkenh angkek, "Arleng-alenty atyeng mpwarey-angnenh ayeng anetyek, INGKARTel arraty innga iylparrernek-angkwarr. Ayeng kel alpem Atyetyart ikwer-warl."

<sup>57</sup> Rernem angkek, "Ilek-apenyarl Rebekah anwantherr ayernentyan nthakenh rarl angkem?" <sup>58</sup> Rernem renh ayernek, "Kel mwerrang artwa nhenh-angkwarr nga alpem?". Kel Rebekah mwerr angkek artwa ikwer-angkwarr alpetyek.

<sup>59-60</sup> Rebekah renh-then arelh warrkenh-then Abraham-kenh warrkenh ikwer-angkwarr renh-atherr thwenek, alpetyek Abraham-kenh alerikw ikwer-warl. Ikwer-penhan rernem inkwerelhemel Akngey-warl angkek, "Anwantherr ngkweng Akngey-warl angkem, ngkweng-they akngerram-akngerrirretyek anyany-rnem-then, aper-rnem-then. Akngeyel renh-rnem arntarnt-arayntem artwa ahelengkw-rnem-kety."

<sup>61</sup> Kel Rebekah ingwer-rnem-then alpetyek-anem irrek. Rernem kamwerl-warl nganek, Abraham-kenh warrkenh-rnem-angkwarr alpек.

<sup>62</sup> Isaac ra Caanan-they antekerr-ampeny anen. Apmer ra Beer Lahai Roi-they apetyek, apmer Canaan-they antekerr-ampenyel anen. <sup>63</sup> Atwerrp ra alhenh, artwernem-anem ra arnarek kamwerl-akert apey-alperl-anenty. Ra ikwer-rnem-warl-athek alhenh. <sup>64</sup> Rebekah-el renh arnarek. Ra kamwerl-they atwarrek. <sup>65</sup> Warrkenh renh ayernek, "Artwa angwenh apetyeyel?" Warrkenh angkek, "Atyetyart atyehn yanhan apetyeyel, Isaac-an." Rebekah arnkwa artelhek inngerr-angkwarran, artwel arey-ayntekerr.

<sup>66</sup> Warrkenh ra ilek Isaac renh ilek-ilek-angkwarr ayntek. <sup>67</sup> Isaac ra Rebekah renh atnwenhek kalikw kwen-warl. Ratherr itengirrek-anem. Ra ikwer inkwerelhek, amikw ikwerenharl ilwekarl-kety.

## 25

### *Abraham ilweyel*

<sup>1-2</sup> Abraham ra anew ingwer-anem ikngwek itnan Keturah. Ampernem atnyenek 6-pel.

... <sup>5</sup> Abraham iteth-antey anenhel, ra ampwal ingkerrenh anthek, Hagar-atherr, Keturah-atherr. <sup>6</sup> Ra alerikw ikwerenr-nem thwenek, akngerrakw-antey, arleng innga, alerikw ikwerenr Isaac-kety. Abraham ilwey-alentyel ra ampwal ingkerrenh Isaac anthek.

<sup>7</sup> Abraham aherrety 175 ampwa innganem anen. <sup>8</sup> Kel ra ilwek-anem. <sup>9-10</sup> Alerikw ikwerenhel atherr renh intey-itwek akwernek, Hebron-angkwarr akngerrakw, rarl Hitt-kenh-rnem-itwek payemelek intey renh. Isaac-el atherr Ishmael-el atherr Abraham renh anew ikwerenr-itwek-antey akwernek. <sup>11</sup> Abraham ilwek-penhan Akngeyel Isaac renh arntarnt-arenh. Isaac ra alpek apmer Beer Lahai Roi-warl. ...

### *Jacob-then Esau-then*

<sup>19</sup> Nhenh angka Abraham-kenh alerikw-them Isaac-penh Isaac alerikw aneh Abraham-kenhan. <sup>20</sup> Isaac aherrety 40 aneh ra itengirrek Rebekah-itwek, Bethuel-kenh alerikw-itwek. Bethuel ra apmer Aram-areny aneh. Laban Rebekah-kenh awayikw apmer Aram-areny aneh arrpemarl.

<sup>21</sup> Rebekah ra ampek arrangkw aneh. Isaac-el INGKART ayernek renh-atherr ampa anthetyek. INGKARTel Isaac renh awek, rarl ayernek ampek, renh-atherr ra anthetyek.

<sup>22</sup> Rebekah ra atyeweheng-atherr-akert awelhek, ratherrarl atwerrek. Ran Akgey ayernek, "Ilekek atyeweheng-atherr atwerreyel?" Rebekah ywarn iterrek nthakenharl ratherr atwerrenh.

<sup>23</sup> INGKARTel renh ilek, "Aler ngkwenh amentant-atherr ratherr atyetyart aneyen, ingwer apmer ingwer-ampenyekan, ingwer apmer ingwer-ampenyek. Awayikwan atyeyikwek awelh-ayntem, atyeyikw ralap atyetyartan anayntem. Amentant atherr ikwerek-atherri anaynteman." <sup>24</sup> Rebekah ra ampa akely renh-atherr-anem atnyenek.

<sup>25</sup> "Arrwekelely alta rnter-rnterarl anek, atha renh itnewem Esau." <sup>26</sup> Ra awayikw ikwerenhet antererrk-they anterrkwek. Rernem renh itnan Jacob renh itnerek.

<sup>27-28</sup> Awayeheng-atherr ratherr ilkwerrek-anem. Esau ran awangk-awarrarl aneh, Jacob ra arteny-areny aneh. Isaac Esau-ek arlkwenten, rarl akerel renh wantenhek. Amikw ikwer-atherrenh Jacob anyentekant arlkwenten. Isaac aherrety 60 aneh.

<sup>29</sup> Arla anyentel, Jacob ra ltya ampernenh, Esau ra angayakw irrek. <sup>30</sup> Esau ra atyeyikw ikwerenhet ltyek ayernek, "Ltya ayen anthay, ayeng angayakwirrek, atnert ayeng akelhek, angayakw innga irrek."

<sup>31</sup> Jacob angkek, "Ngenh ampwal ingkerrenh antheyen, nga arrwekelelyarl. Ntwa ayen ampwal ingkerrenh antha, atha ngenh aker ltyarl anthey-akenh."

<sup>32</sup> Esau angkek, "Ayeng ilwetyekan arrer-anem. Kel menty ampwal-rnem atnyeney-angenh ilwetyekan arrer-anem."

<sup>33</sup> Jacob angkek, "Ampwal ayen anthay, akngayelarl ngenh alhelek." Esau mwerr angkek ikwer, ra ampwal-rnem menty anthetyek.

<sup>34</sup> Jacob-el amern-then aker ltyethen Esau renh anthek. Esau ra aker arlkwek-penh ra anperl-alhek apmer-warl alpek, ampwal-rnem menty iwerl-alhek.

## 26

### *Akngayel Isaac renh alheleyel, renh arntarnt-aretyek*

<sup>1</sup> Awank-akerr, Abraham rarl iteth aneh-angkwar, apmer Canaan amern-weny irrek. Irrkaty-angkwarz arrpemarl apmer ra amern-weny irrek arrwekel. Isaac tawen Gerar-warl alhek, Abimelech-warl, Philistia-areny Atyetyart ikwer-warl, INGKARTelar Abraham renh ilek-angkwarz. <sup>2</sup> INGKART aremirrek Isaac ikwer-warl. Angkek ikwer-warl, "Egypt-warl alhey-angenh-antej nhenhel-antej anaynta! Atha ngenh atrwenhey, apmer renh atha ngkwegng ilyparrernetyek. <sup>3</sup> Atha ngenh aleth arntarnt-arayntetyek apmer ilenhek, alethang inngey ngarl. Atha apmer ngenh anthem, ngkwenh-rnem-them, atharl Abraham renh alhelek-angkwarz. <sup>4-5</sup> Atha ngenh apmer anthem, ngkwenh-rnem akngerrirretyek apmer ilenhel. Akngerr innga rernem aneyen, antyarr-rnem akngerr innga aneyel-areny. Ngkwenh-rnem ingkerrenh mwarrant-arey anetyek, apmer arrpanenhek, Abraham-arl atyeng awelhek-angkwarz." <sup>6</sup> Isaac apmer Gerar-itwek kel aney-alpek. ...

## 27

### *Jacob irrywerremel ilelheyel aynikwek*

<sup>1</sup> Isaac artwa ampwanemarl irrek, ra annga aparrng-anem irrek. Ra alerikw ikwerenhet arlkek Esau.

<sup>2</sup> Isaac angkek, "Ayeng artwamp-anem. Arrer-anem ayeng ilwetyekan." <sup>3</sup> Isaac-el renh ilanthe, "Ntwa aker atyeng atwerl-alpa. Pewenarr ngkwenh aknga! <sup>4</sup> Peleyn-warl alha! Aker amperna peleyn ilenhek, mwerr-angker inetyek, mwerr-angker atha arlkweyek. Ayeng mwerr-angkwarz ngkwegng angketyek ayeng ilwey-alenty, INGKARTel ngenh arntarnt-aretyek."

<sup>5</sup> Rebekah awelhenn, Isaac rarl angkenh. Esau anpenhek awangk, akerek aretyek. <sup>6-7</sup> Rebekah Jacob-ek angkek, "Atha awek Isaac-arl Esau ilanthe aker ikwer atwerl-alpetyek ltyakert-anem ampernemel. Artwamp ilwey-alentyel arlkwetyek, awayengkw ngkwenhek mwerr-anem ra angketyek, INGKARTel renh arntarnt-aretyek." <sup>8</sup> Amikw angkek, "Awelha atyeng!" <sup>9</sup> Nanikwet akely atherr atwerl-alpa akngayel-alpemel. Atha ampernetyek aynengkw ngkwenhek. <sup>10</sup> Ntwa ikwer-warl akngayel, ra arlkwetyek ra mwerr-angkwarz angkey-alhenty, ra ngkwegng inkwerelhemel."

<sup>11-12</sup> Jacob angkek, "Awayaty atyenh altangketyarr. Ayengan arrangkw, alteweny. Artwampel ayenh iterl-arekerr, atha irrtiyerremel ilerl-anenty. Apmwangkwarr atha ilerl-anentyek, ra akengenty atyeng angkekerr."

<sup>13</sup> Amikw ikweren angkek, "Mwerr, atyengarl ra iterrem. Akngeyel ayenh aytarr-iletyek. Kel nga alha aker atwetyekantarl."

<sup>14</sup> Jacob-el aker renh atwerl-alpek. Amikwelar renh ampernek, aynikw-kenh impen.

<sup>15</sup> Esau-kenh arnkwa amikwel Jacob renh anthek, ra aylpetyk. <sup>16</sup> Nanikwet-penh yenp ra mpwarek, Jacob ikwer-warl arrernek, itep-atherr-warl, itewarl, Esau-apeny. Aynikw-warl aker akngetyek. <sup>17</sup> Amikwel Jacob amern-then aker lytethen ra anthek.

<sup>18</sup> Jacob aynikw-warl alhek. Aynikw-warl ra angkek, "Kel, ayeng apey-alpek."

"Nthenh-apeny ngan?" Aynikwel ayernek.

<sup>19</sup> Jacob irrtiyerremel ikwer ilelhek, "Ayeng arrwekelelenyan ngkwenh Esau. Atha aker atwerl-alpek, ntwarl ayenh ilanthek-angkwarr. Aker nhanyeman arlkwa ntwa mwerr-angkwarr angka atyeng iletyek, Akngeyel ayenh arntarnt-aretyek."

<sup>20</sup> "Alyarnpel-anem ntwa akeran atwerliwek! Ilek-kety?" Isaac-el renh ayernek. Jacob-el irrtiyerremel ilek, "Akngey INGKARTel ayenh aker anthek."

<sup>21</sup> Isaac angkek, "Arrer-apeny irray, atha ngenh arnep-arnetyek, Esau-ek apek atha ngenh arnep-arnetyek."

<sup>22</sup> Jacob arrer-apeny irrek ikwer-warl. Isaac-el renh arnep-arnek. Artwamp angkek, "Jacob-apenyarl nga angkeyelan, Esau-apenyarl nga arlkwan." <sup>23</sup> Angka mwerr innga ra angkek Esau-ek-arrpantey. <sup>24</sup> "Nga alerey atyenh Esau innga?" Isaac-el ayernek.

"Ya, ayengan alerengkw ngkwenharl, Esau-arl," Jacob-el irrtiyerremel ilek.

<sup>25</sup> "Aker-rnem atyeng akngetya, angka mwerr atha ngkweng iletyek. Jacob-el renh anthek aker-then wayn-then. Isaac-el arlkwek, antywek." <sup>26</sup> Isaac angkek alerikw ikwerenhek, "Apetya! Ayenh arrwantyetyek. Kel, atha ngkweng iletyek, atharl ngenh kel ilek-angkwarr."

<sup>27</sup> Isaac-el arnkwa Esau-kenh intenhek, Esau-arrpantey iterl-arek, angkek, "Ar-lka ikwakertarl nhan, ahern atherrkeny kwaty-penh mwerr-angker inteyel-apeny, amern lyapellekarl INGKARTel." <sup>28</sup> Akngeyel ngkweng-warl kwaty thwenetyek, ngenh arntarnt-arem, amern-angketyarr, ntang ingwerek-ingwer-then, amern-rnem-then lyapelleteley. <sup>29</sup> Nga Atyetyart ilkwa anetyek apmer arpanenhek, aytayengkw-rnemek, atyetyart ilkwa nga anetyek. Ingwerarl ngkweng akengenty angkenty, ayeng akengenty arrpemarl ikwer angkem. Ingwerarl ngkweng mwerr angkenty, Akngey mwerr arrpemarl ikwer angkem." Isaac mwerr angkek Jacob ikwer.

<sup>30</sup> Esau awangk-angkwarr-penh aremirrek ikwer-warl aker-akert. <sup>31</sup> Aker mwerr-angker ampernek aynikwek aker renh anthemel, "Aker nhenh arlkwa atharl ngkweng akngetyek."

<sup>32</sup> "Angwenharl ngan?" Isaac angkek.

"Ayengan Esau-arl, alerengkw ngkwenh arrwekelelenyan," Esau ikwer ilelhek.

<sup>33</sup> Ikwer-penhan Isaac artewentyl arrewemel iterrek. "Angwenhelarl aker arrwekel-antey akngetyek? Atharl arlkwek, mwerr ayeng angkek, atharl arrwekel alhelekanemarl renh, kel-antey. Kel, yanhey-antey atha ilek." Artwampel ilek.

<sup>34</sup> Esau artewentyl arlkemel artnek, aynikwarl awek-penh, "Kel ayenhan ntwa alhela arrpemarl!" Esau-el ilek.

<sup>35</sup> Isaac angkek, "Aytayengkw ngkwenhel ayenh irrtiyerl-ampernek."

<sup>36</sup> Esau angkek, "Atherr-inger ra irrtiyerl-ampernek, itna ikweren-apeny."

<sup>37</sup> Artwampel ilek, "Jacob-an Atyetyartarl arrekingkerr-angkwarr, ingkerrenh-angkwarr. Arringkerr ingkerrenh ikwer awelhetyek. Atha renh ingkerrenh anthek, amern-rnem-then. Ilek-anem atha ngenh anthem, ingkerrenh-antey atha anthek-kety."

<sup>38</sup> Esau-el aynikw renh ayernek arrpemarl, "Ayenh-anem ilay, Akngeyel ayenh arntarnt-aretyek! Ampwal-rnem anthetky apék!" Ra artewentyl artnenh.

<sup>39</sup> Aynikw ikwerenhel renh ilek, "Apmer arlpawel nga aneyenh. Kwaty aypmerr ayttey-anghenh arrangkw, aherretý inngel.

<sup>40</sup> Ngethen atwerrerl-ayntem Jacob-kenh-rnem-then aleth-antey. Aytayengkw ngkwenh ngkweng Atyetyart aneyenh. Ingwer-ingeran, mpwel amentant-atherr irreyenh. Mpwel arlengant-atherr anetyek, ra ngkweng aytetyart-weny aneyenh."

#### *Jacob-el Laban-warl aterel anterreyel*

<sup>41</sup> Esau arlkariirrenh Jacob-kety, rarl renh irrtiyerl-ampernek-kety. Ra ament iterrenh, "Akngey atyenh ilwentyl, atha Jacob renh ipmek atwem."

<sup>42-43</sup> Rebekah-el asek ingwer-rnemel ikwer ilek, Esau Jacob ikwer mpwelhenh renh atwetyek, Jacob renh ilek, "Nga awayaty atyenh-warl alpa, Laban-warl, rarl apmer

Haran-itwek aneyel. <sup>44</sup> Arleng ikwererety aney-alpa. <sup>45</sup> Esau ra iyelpelirrenty atha ingwererenty ilanthem ngenh ikngwerl-alpetyek. Mpwel aleth anayntetyek, mwarrant-atherr ipmek atwerrey-angenh anetyek.” <sup>46</sup> Rebekah-el Isaac renh ilek, “Arelh Hitt-kenh-rnem, Esau-kenh anew-rnem, ayeng ikwer-rnem-kety arkarirreyel. Jacob-el arelh Hitt-kenh ikngwenty-they, ayeng kel ilwemarl. Ayeng ilkelhey-angenh ayeng iteth anetyek, rernem ayenh arlkarewerl-anekerr.”

## 28

<sup>1</sup> Isaac Jacob-ek arlek, renh rlterrkiletyek. Ra mwerr angkek ikwer, renh rlterrkiletyek. Ra Jacob renh ilek, “Arelh Canaan-areny-rnem itengirrey-angenh. Kel menty-anem renh-rnem ipma! <sup>2</sup> Artartey ngkwenh-kenh apmer-warl alha, Bethuel-warl, apmer Syria-ampeny, apmer Paddam Aran. Apmarlengkw ngkwenh-itwek anew ntwa ikngwetyek, apmarlengkw ngkwenh-kenh alerikw. <sup>3</sup> Ayeng Akngey-warl angkey, ra ngenh rlterrkiletyek, ampa ngkwenh-rnem akngerrirretyek. <sup>4</sup> Nga apmer ikwer-itwek anayntetyek, Akngeyel Abraham renh anthek-itwek, anwantherr aneyelan alethang-rnemarl. Akngeyel Abraham renh alhelek, apmer renh anthetyek, Ngan arwa alethangarl aney-alhek.” ..

### *Jacob ra altyerr areyel*

<sup>10</sup> ... Jacob anperl-alhek apmer Beersheba-they apmer Haran-warl. <sup>11</sup> Atwerrp-anem, ingkeny aylperl-alhekan. Apwert rtemal arrernek. Rap ankwanem ayntek. <sup>12</sup> Rap altyerr arek. Angel-rnem ladder ikwerel angkepelarreng alhenh. <sup>13</sup> Alkerel irrwerl Akngey ra rtnenh. Ra angkek, “Ayeng INGKART ra, Akngey arrengengkw ngkwenh-kenh, Abraham-kenh, INGKART Akngey ngkwenh-kenh, Isaac-kenh. Apmer nhenhan ngan aynteyelan, atha ngkwenh-rnemek antheyen. <sup>14</sup> Rernem arlperrtyirreyen, amentew-ament irremel. <sup>15</sup> Atha ngenh apmer nhewarl akngey-alpem. Ayeng ngkweng ilkwatherr alhem. Atha ngenh arntarnt-aretyek intem-antey, nthakenh ngenh ipmey-angenh. Atha ngenh anthem, atharl ngenh alhelek-angkwarr.”

<sup>16</sup> Jacob akemirrenhey-alpek, “INGKART wenh apmer nhel aneyel! Atha iterl-arey-angenhari! Iwerr altywer alker-warl-atek!” <sup>17</sup> Ra aterirrek, “Apmer nhenh aknganenty! Nhenh apekan Akngey-kenh apmerelarl ayeng aynteyel!”

<sup>18</sup> Ra apwert rtemal renh arrernek Akngeyek, anterel apernemel. <sup>19</sup> Ra apmer renh itnewek Bethel, Luz-tangkwel arrwekel-antey itna ra aynten. Ra angkek, “Akngey nhelantey aneyel!”

<sup>20</sup> Ra Akngey ilek, “Ntwa ayenh arntarnt-arem, amern-then arnkwethen anthem, <sup>21</sup> ntwa ayenh iteth-antey akngey-alpenty, ayeng ngkweng awelhem. Nga INGKART atyen aneyen. <sup>22</sup> Apmer nhan apmer ngkwenhan. Atha ngenh tyenkerr anthem.”

## 29

### *Jacob alheyel apmarley-kenh apmer-warl alhek*

<sup>1</sup> Jacob aleth-antey alpenh akngerrakw-antey. <sup>2</sup> Ra ngenty-anem arey-alhek. Ngenty ra apwert-rnemel artekarl. Yep-yep akngerr rtenherrenh, kwaty ngenty-itwel, apwertel artek-itwel. <sup>3</sup> Yep-yep arntarnt-arey-angker-rnemel apwert renh arnangilek, yep-yep-rnem kwaty anthwengiley-alkenh. Kwaty yep-yep-rnemarl ayntwek-penh, rernem angkep arrpemarl marteynenh apwert ikwerel-antey.

<sup>4</sup> Jacob-el renh-rnem ayernek, “Nthenh-areny arranther?”

“Anantherr apmer Haran-arenyarl,” rernem illehek.

<sup>5</sup> Jacob-el renh-rnem ayernek, Arrantherr iterl-areyel Laban apek, Nahor-kenh arrengikw? Kel, anwantherr renh iterl-areyel, rernem renh ilek.

<sup>6</sup> Rap renh-rnem ayernek, Ilek-apenyarlap ran? Kel, ra mwerr, rernem renh ilek. Alerikw ikweren Rachel apetyeyel apmer nhenh-warl yep-yep-rnem-akert.

<sup>7</sup> Jacob angkek, “Itwern irrwerlel-antey, rwenp inngarl, yep-yep arlwelenhey-alpenh-arey. Kwaty renh-rnem anthwengileyek, peleyn-warl-anem akngeynemel, atherrk-anem rernem arlkwetyek.”

<sup>8</sup> “Alerl-antey mpwelheyel ingkerrenhek, ingkerrenh-angkwarrant apwert renh ahartelheleyek, kwaty-kety.”

<sup>9</sup> Jacob ikwer-rnem-itwek angkenh-antey, altyelikw ikweren apetyek, aynikw-kenh yep-yep-rnem-akert. Rachel yep-yep arntarnt-arey-angker anenh. <sup>10</sup> Renh arek, Jacob-elarl apwert renh arnangilek, yep-yep-rnemarl kwaty antywey-alkenh. Apmarlikw-kenh yep-yep-rnem anthwengilek. <sup>11</sup> Jacob artnek, Rachel renh arrwantyek, ikwer inkwerelhemel. <sup>12</sup> Jacob Rachel ikwer illehek, “Ayangan Laban-kenh ampikwarl,

Rebekah-kenharl.” Rachel ra anterrek, aynikw ikwerenhenh iletyek. Ra aynikw ikwerenhenh iley-alpek.

<sup>13</sup> Laban ra angka awekarl-penh, ra anterrek Jacob ikwer-warl, renh atnyenemel arrwantyek, apmer ikwerenhenh-warl-anem atnwenheynek. Jacob Laban ikwer-warl ilelhek. <sup>14</sup> Laban angkek, “Nga ampaty atyehn inngarl.” Jacob alkent anyentel Laban ikwer-itwel anek.

#### *Jacob warrkirreyel Laban-ek*

<sup>15</sup> Laban Jacob ikwer angkek, “Ngan ampaty atyehnan. Arwa nga warrkirrek, ilekatha ngenh antheman, ngenh kwarteweyek Nthakenh nga iterreyelan?” <sup>16</sup> Laban-kenh alerikw-atherr anek, Leah-atherr. Aytteiykw ikwerenhenh Rachel. <sup>17</sup> Leah aleyak alpwely, alkwemp-apeny, Rachel aleyak twentyeun innga. <sup>18</sup> Jacob ilkelhenh Rachel-ekant. Laban ikwer-warl angkek, “Aherrety 7-pelek-atwety ayeng warrkirrem ngkwing Rachel-itwek-anem ayeng itengirrey-alenty.”

<sup>19</sup> Laban-el renh ilek, “Mwerrarl nga itengirrentyan ingwer-rnem-kety. Mwerr-ayteng atha ngenh anthetyek. Mwerr atyeng-itwel ana warrkirremel.” <sup>20</sup> Jacob aherrety 7-pelek-atwety warrkirrek Laban-ek, Rachel renh anthey-akenh. Ra ikwer-itwel itengirrey-angenh-antey. Kel, aherrety 7-penh, Jacob ra inkwerelhek Rachel-ek. Jacob angkek Laban ikwer-warl,

<sup>21</sup> “Kel-anem anew atyeng Rachel anthanem, ayeng ikwer-itwek ayntetyek. Aherrety 7-pel ayeng warrkirrenh. Atha warrk atyehn kel ywerrelhilek.”

<sup>22</sup> Ingwa ikwerel-antey rernem amern kwenty-anem arlkwek inkwerelhemel. Artwa ingkerrenh akarirrek ikwer-rnem-warl. Laban akngerrek yangkelhek, amern tyenkerr arlkwetyek, Jacob Rachel-itwel itengirrek-angkwarr, amern rernem akngerr arlkwetyek inkwerelhemel ikwer-atherr. <sup>23</sup> Ingwel, Laban-el Leah-anem Jacob renh anthek, anew ikwer anetyek. Jacob ra ikwer-itwek ayntek, Rachel-itwel-arrpantey, apal-antey. <sup>24</sup> Laban-el arelh Zilpah renh ilanthek Leah-ek warrkirreyek.

<sup>25</sup> Ingwepenh-anem Jacob-el arek, Leah-anem ikwer-itwek ayntenh. Ra iterrek Rachel-ek-athen. Jacob-el Laban renh ayernek, “Ilekek ntwa ayenh irrtywerremel ilek, Rachel anthentyek-arrpantey! Ilekek ntwa irrtywerl-ampernek? Ntwa ayenh Leah anthek, ayengan warrkirrek Rachel-ekant.”

<sup>26</sup> Laban-el Jacob renh ilek, “Apmer anwekantherrenh-itwekan arrwekeleny-tangkwel itengirrem. Kwey arrwekeleny antheman, ingkerneny nthakenh anthey-angenh. Alakenh-anyem anwekantherrenh-angkwarran aynteyel, arrwekelenyant antheyel, ingkernenyang arrangkwarl. Wik anyentek-atwety mpwelanth Leah-atherr anetyek. Ikwer-penhan nga Rachel-itwek itengirrey-akenh, nga aherrety 7 ingwerek-atwety atyeng warrkirreyek, atharl Rachel anthek-penh, iteng-anem.” <sup>27-30</sup> Wik anyentepenh, kwenty arlkwek-penh Laban-el alerikw ikwerenhenh Rachel anthek Jacob-itwek itengirreyek. Laban-el arelh Bilhah renh ilanthek, Rachel-ek warrkirreyek. Jacob Rachel-itwek inneganem ayntek. Ra Rachel ikwerant inkwerelhek, Leah-angkwarran. Aherrety 7 ingwerek-atwety warrkirrek.

#### *Jacob-kenh alerikw-rnem*

<sup>31</sup> INGKARTel arek, Jacob-arl Leah-kety arlkarirrenh, ra ikwer ampermangirrek. <sup>32</sup> Alakenh Leah-el ampa atnyenek. Rachel ampek arrangkw aleth anek. Leah-kenh awey akely ayntenh. Ra renh Reuben itnewek, alakenh angka ikwerenhenh aynteyel, “INGKARTel ayenh irrkngerney anthek. Anew atyehn apek atyeng inkwerelhem.” Ra iterrek Jacob-an ikwer ilkelherl-anentyek-athen.

<sup>33</sup> Leah ra ampa ingweran atnyenek, awey akely arrpemarl. Leah angkek, “Akngeyel arek anew atyehn, rarl atyeng inkwerelhey-angenh. Alakenh-they ra ayenh awey nhanyem anthek. Rernem renh itnewek Simeon.”

<sup>34</sup> Ikwer-they ra ampa ingweran atnyenek, awey akely arrpemarl. Avey irrpety-anem ikwerenhenh. Ra angkek, “Ikwer-they anew atyehn inkwerelhem-anem atyeng. Avey irrpety-anem atyehn.” Ranem renh itnewek Levi.

<sup>35</sup> Ampa ingweran atnyenek, awey akely arrpemarl. Ra angkek, “R lengk-anem atha INGKART renh tnakem.” Ranem renh itnewek Judah. Ikwer-they Leah ra ampa ingwerek arrangkw-anem anek.

## 30

<sup>1</sup> Rachel ahelirrenh Leah-ek, ampa rantarl atnyenek-they. Rap Jacob renh alharlk-wemel ilek, “Ayeng ilweyehn ampwenny-antey.”

<sup>2</sup> Jacob rarl awek-penh, ra antwerr-anem anenh ilelhemel, “Ayengan arlarl Akngey-wenyarl. Nhenhan Akngey-kenh-angkwarr.”

<sup>3</sup> Rachel-el anew renh ilek, "Warrkenh atyenh Bilhah ikngwerl-alpa, ngkweng-itwek ayntetyek, ampa ntwa atnyenetyek ikwer-angkwarr."

<sup>4</sup> Rachel-el arelh warrkenh Bilhah ilanthek, Jacob-itwel itengirretyek. Kel ratherr itengirrek, Jacob arelh warrkenh ikwer-itwel ayntek. <sup>5</sup> Bilhah ra ampa akely atnyenek, awey akely. <sup>6</sup> Rachel renh itnewek Dan alakenh angkemel, "Akngayel ayenh arntarnt-arek, Akngay atyeng awelhek atharl renh ayernek, kel ayenh awey akely anthek."

<sup>7</sup> Rachel-kenh warrkenh Bilhah, ra ampa ingwer atnyenek, Jacob-kenh. <sup>8</sup> Rachel angkek, "Ayengarl arrkernalhenh, kel angkwerey atyenh atha antengilek." Rap awey akely renh itnewek Naphtali.

<sup>9</sup> Leah iterrek kel ampa anyent ilenh ra atnyenek, ingweran ra atnyeney-angen, arrangkw-anem. Ra arelh warrkenh ikweren Zilpah ilanthek, Jacob-itwel itengirretyek. <sup>10</sup> Ratherr awey akely atnyenek. <sup>11</sup> Leah angkek, "Nhenh mwerr-angkwarr alakenh." Ranem awey akely renh Gad itnewek, alakenh aynteyel angka ikwerenhel, "Nhenh mwerr-angkwarr alakenh."

<sup>12</sup> Zilpah ra awey ingweran atnyenek. <sup>13</sup> Leah angkek, "Irrkngerney-anem ayeng aneyel. Arelh ingwer-nrem atyeng angkerreyel, ayengarl irrkngerney-anem aneyelek." Leah-el renh itnewek Asher.

<sup>14</sup> Kel rernem ntang weyt akwetyemel warrkirrek, awey Reuben-el amern mandrake-angketyarr arek, amern irrwarlp-apeny. Kel ra amern mandrake akek, amikw ikweren-hwarl akngay-alpek. Rachel-el Leah renh ayernek, "Avey ngwenhel amern mandrake irrpety ayenh anthey."

<sup>15</sup> Leah-el renh ilek, "Kel amern mandrake-anemarl ntwa raketyek arrkernalheyel." Rachel-el Leah renh ilek, "Ntwa amern mandrake ayenh anthem, nga Jacob-itwel iteng ayntey-kety."

<sup>16</sup> Atwerrp, Jacob kel apey-alpek, amern weyt-angketyarr-they. Leah ikwer anekirrek, angkemel, "Nga lyert atyeng-itwel ayntetyek. Avey atyehel Rachel amern mandrake renh kwartewemel anthek-apeny." Kel, Jacob Leah-itwek ayntek.

<sup>17</sup> Akngay Leah-ek inkwerelhemel awelhek, rarl renh ayernek, ampa renh anthetyek. Leah-ampa akely atnyenek, awey anyent. Jacob-kenh awey 5-pel anek, Leah ikwer-angkwarr. <sup>18</sup> Leah angkek, "Akngay atyeng inkwerelhek, atharl warrkenh atyenh ilanthek, Jacob ikwer ratherr iteng anetyek." Ranem renh itnewek Issachar.

<sup>19</sup> Leah-el ampa ingwer atnyenek, awey akely. Jacob-kenh awey 6-pel-anem anek, amikw anyent-kenh 6 Leah-ek. <sup>20</sup> Leah angkek, "Akngayel ayenh ampa akngerr anthemel kuartewek. Anew atyeh aytyeng inkwerelhem, aylernekanthenharl awey 6-pel aneyel." Ranem renh Zebulun itnewek.

<sup>21</sup> Ikwer-penh Leah-el kwey akely-anemarl atnyenek, renh Dinah itnewek.

<sup>22</sup> Akngay Rachel-ek amperrngirrek, irrepernek, rarl renh ayernek, ampa renh anthetyek. <sup>23</sup> Rachel ra ampa ingweran atnyenek, awey akely. Ra angkek, "Akngay atyeng amperrngirrek irrepernek, ampa ayenh anthetyek. Ingwerel-anem nthakenh ayenh kwanthey-angen, ayengan ampewenyarl." <sup>24</sup> Ranem renh itnewek Joseph alakenh angkemel, "Atha Akngay renh ayerney, awey akely ingwer-anemarl ayenh anthetyek."

#### *Jacob apmer Haran-itwek anen*

<sup>25</sup> Joseph, Rachel-kenh awey akely ayntek. Jacob Laban-warl angkek, "Ayenh ntwa tyarlewetyek, <sup>26</sup> ayeng apmer atyeh-warl-anem alpetyek. Anew atyeh-atherr-then ampernem-then anwernantherr ingkerrenh alpetyek. Ayeng ngkweng warrkirrek."

<sup>27</sup> Laban-el renh ilek, "Nga atyeng arlkwententy, atyengel-arlgeng anarl! Artwa tyakel ayenh ilek, Akngayelar ayenh arntarnt-arek, ngkweng-angkwarr. <sup>28</sup> Ilek atha ngenh kuartewem, nga inkwerelhetyek?"

<sup>29</sup> Jacob-el renh ilek, "Ayeng ngkweng mwerr-angkwarr warrkirrenh. Aker ngkwengh akngerr innganem irek. <sup>30</sup> Lyertenanyang ayeng apmer nhewarl apetyek yep-yep irrpetyaparl ngkwenh ntwa atnyenek. Anamerl yep-yep ngkwenh akngerrirrek. Akngayel ngenh arntarnt-arenh, atyeng-angkwarr. Ayeng ipmelheyek warrk nhethay, atyeh-rnem-anemarl atha arntarnt-aretyek."

<sup>31</sup> Laban-el renh ayernek, "Ilek atha ngenh anthem, nga nel atyeng-itwel anetyek? Ilek-angkwarr ngkweng mwerran?" Jacob-el renh ilek, "Kel menty, man-weny. Ngkwelty ntwa ayenh antheyang. Yep-yepel-then nanikwetel-thenant ntwa ayenh kuartew. <sup>32</sup> Atwenth irrpwerlant ayenh antha lthweyakw, arlkeny-arlkeny. Irripwerl-rnem-then lthweyakw-lthweyakw-rnem-thenant ayenh antha! Kel ayeng inkwerelhem ilenh-rnemant ntwa ayenh anthetyek. <sup>33</sup> Ntwa alhengk-aretyek irrpwerl-then lthweyakw-lthweyakwantarl ntwa ayenh anthek, atha ngkweng anyelkel yep-yep-rnem inentyek,

ntwa alhengk-aretyek, yep-yep ngkwenh-rnem, atharl yep-yep ngkwenh-rnem irrryertel-inekerr.”

<sup>34</sup> Laban ikwer angkek, “Mwerrarl ilenh-angkwarran.” <sup>35</sup> Arlt ayyent ikwerel-antey Laban-el atnwenth lthweyakw-lthweyakw-rnem-then irrpwerl-rnem-then ikwer-an amentilek, ikweren-h-rnem ament arrpemarl akngakek. Alerikw ikweren-h-rnem ra arrernek, yep-yep ikweren-h-rnem rernem arntarnt-aretyek. <sup>36</sup> Laban-el Jacob renh ilek, “Arlta irrpetyel alpa yep-yep ilenh-rnem-akert, nanikwet-rnem-then.”

<sup>37</sup> Jacob-el arwerl akek walyenp, arwerl akngerr. Arwerl-penh rltimp alerrkw, lthweyakw-lthweyakw illemel. <sup>38</sup> Arwerl renh-rnem rnkernek kwaty trough impaltheik, yep-yepe-rnem kwaty-warl apetyentyel arwerl renh-rnem aretyek. <sup>39</sup> Akwerrk lthweyakw-lthweyakw-rnem-then akngerr-anem anek. <sup>40</sup> Laban-kenh-rnem lthweyakw-lthweyakw-rnem akngerr arrpemarl. Laban-kenh lthweyakw-lthweyakw-rnem pweytilek ikweren-h-rnem-warl. Akwerrk lthweyakw-lthweyakw-rnem akngerr-anem irrek. Jacob-el muster-emileynek anetyek akngakeynek lthweyakw-lthweyakw-rnemant, ikweren-h-rnem-warl pweytiletyek. <sup>41</sup> Yep-yep rlterrk-rnem-kety arwerl-rneman alperr-akertan rnkernehan arrpemarl ra. Alakenh-anyem Jacob-el arlwerrekk ikweren-h-rnem rlterrk ingkerr. Laban-kenh-rnem rlterrk-weny-antey. <sup>42</sup> Yep-yep-rnem nanikwet-rnem-then mwerr ingkerrenh arntety-weny akngerrirrek ikweren. <sup>43</sup> Jacob man akngerr-akert-anem, yep-yep akngerr-akert, nanikwet akngerr-akert, kamwerl arrpemarl ikweren-h tangkey akngerr arrpemarl ikweren, artwa warrenh-rnem akngerr arrpemarl ikweren.

## 31

### *Jacob anterreyel ikweren-h-rnem-akert*

<sup>1</sup> Jacob-el awek Laban-kenh alerikw-rnem ikwer angkerrenharl, Jacob ra man akngerr-akert, yep-yep-rnem-then nanikwet-rnem-then, ampwal-rnem-then. Akngay anwekingkerrenhel renh antheke, rarl akngay anwekingkerrenh-they akngerr inek.

<sup>2</sup> Jacob-el Laban renh arek, Laban rarl ikwer arlkwenteyang-anemarl.

<sup>3</sup> INGKARTel Jacob renh ilek, “Akngay-kenh arreng-kenh apmer-warl nga alpetyek. Ayengan ngkwegw-angkwarr alhetyek arrpemarl ilkwatherr.”

<sup>4</sup> Jacob yangkelhek Rachel-ek-ather Leah-ek-ather ratherr ikwer-warl apetyetyek, renh rlwatyetyek yep-yep-akert. <sup>5</sup> Jacob-el renh-atherre ilek, “Akngay mpwel-kenh atyengety arlkarireyel-anem. Akngayel ayen arntarnt-arek, akngay atyenharl ikwer inkwelhekk. <sup>6</sup> Ayengarl warrkirrek mwantyel Akngay mpwel-kenhekk. <sup>7</sup> Akngay mpwel-kenhel ayen man arraty anthey-angen. Akngayelant ayen arntarnt-areyel. <sup>8</sup> Akngay mpwel-kenhel yep-yep irrpwerl-rnemant, lthweyakw-lthweyakw-rnemant alhelek. Kel rernem-anem akngerrirrek. <sup>9</sup> Ilenh-angkwarr Akngayel atnwenth renh-rnem kel raket, ayen-anem antheke.

<sup>10</sup> Kel atha altyerr arek, atnwenth-rnem ingkerrenh. Yep-yep-then nanikwet-rnem-then akngerr innang anek, lthweyakw-lthweyakw ingkerrenh. <sup>11</sup> Akngay-kenh angel atyeng arlkek, ‘Jacob-ay.’ ‘Nhantey ayeng aneyelaw.’ Ayeng ikwer ilelhek. <sup>12</sup> Angel-el ayen ilek, ‘Ntwa areyel lthweyakw-lthweyakw ilenh-rnem? Aray! Atharl arek Laban renh, rarl ngenh irrrywerremel ilek. Atha atnwenth-rnem lthweyakw-lthweyakw renh-rnem mpwarek. <sup>13</sup> Aray, ayeng Akngay apmer Bethel-aren. Wetharl ntwa apwert anterel apernek, ayen arraty ilek. Arraty ntwa ayen alhelek. Apmer nhenn ntwa iwerlelpetyek, apmer ngkwenh-warl-anem nga alpetyek.’”

<sup>14</sup> Angkwerenheng ratherr Jacob renh ilek, “Akngay-they anwantherr arnkwa akngerr ineyang ikwer-they. <sup>15</sup> Ingwer-apenylar anwantherr ikwer arrareyel. Man anwen-hantherr anthey-angen, anwantherrarl itengirrek. Ratherr tyel-angkenh aynikw ikwer-atherrenhekk. <sup>16</sup> Arnkwerenem ampwal ilenh-rneman aylekenharl ampernem-kenh-then, anwernekantherrenh. Akngay ikwer nga awelhetyekant. Alakenh-anyem akngay aylekenh-they Akngayel raket, ngenh-anem antheke, anwantherr-anem renh-rnem atyenyetek.”

<sup>17</sup> Jacob-el anew-rnem-then ampernem-then kamwerl-warl tywenek. <sup>18</sup> Rernem alpek aynikw ikwerenh apmer-warl, apmer Canaan-warl. Atnwenth-rnem ingkerrenh ampwal-rnem-then rarl inek malyikw-they, ra akngeynetek.

<sup>19</sup> Laban-el yep-yep ikweren-h-rnem alta althek-angkwarr, Rachel-el ampwal ikweren-h-rnem anyelkel inerl-alhekk. Akngay-arrpanney-rnem, akey-rnem. <sup>20</sup> Jacob Laban ikwerety anyelk-antey alpek. <sup>21</sup> Jacob ra Lher Euphrates artarnpenhekk, apwert-angketyarr-warl, apmer itnan Gilead, ampwal ingkerrenh-akert.

*Laban-el Jacob renh alwerneyel*

<sup>22</sup> Arlta irrpety-penh, Laban ra Jacob ikwer ywarek. Ingwerentyel Laban renh ilek.  
<sup>23</sup> Laban-el Jacob renh alwernek, artwa ikwerenh-rnem-akertel, arlta 7-el, apmer Gilead-ek-atwety. <sup>24</sup> Ingwel Laban-el altyerr arek, INGKARTelarl renh ilek, "Alhewer angkey-angnenh-antey Jacob ikwer."

<sup>25</sup> Jacob-el kalikw-rnem artek, apmer Gilead ikwerel, apwert-angketyarrel. Laban-el-rnem apmer arrernekk, apmer Gilead-itwel arpemarl, apwert ingwer-ampenyekarl.  
<sup>26</sup> Laban Jacob ikwer-warl alhek. Rap renh ilek, "Ntwa ayen irrrtywerremel ilerlepk anterrey-alhemel, ampa atyenh atherr-akert. Artwa ingwer-rnem irrrtyert-awarrarl aneyel-apenyarl ngan!" <sup>27</sup> Nga irrrtyertelarl anterrey, atyeng ilerlelpay-angnenh. Atha ngenh inkwerelhemel menty intwaremer, nga atyeng ilelhentyan. <sup>28</sup> Atha artartey atyenh-rnem arrwantyey-angnenh-antey, ntwa anterrelhilek. Arraty-angkwarr-wenyarl alakenhan. <sup>29</sup> Atharl ngenh atwetyek-anek. Akngey ngkwenh-kenn INGKARTel ayenh artwerilek, ngkweng apmwangkwarr angkey-angnenh, ayenh arternpiletyek. <sup>30</sup> Kel, atha ngenh iterl-arekarl, ngarl alpetyek alharnteck akngey ngkwenh-kenn apmer-warl. Ntwa ingkart-arrpantey akely-rnem anyelkel inerlepk."

<sup>31</sup> Jacob-el Laban renh ilek, "Ayeng ngkwengety anyelkel alpek aterel, ntwa alerengkw ngkwenh-athererr anterrkwekk. <sup>32</sup> Anyentel apek ingkart-arrpantey renh anyelkel inenty, ntwa renh ipmek atwetyek. Ngkwenh-rneman akalty arpemarl anetyek, ntwarl renh atwemek. Arnkwa ingwer-rnemarl aynteyel, ntwa kel akngeynetyekan. Jacob apal angkek, iterl-areyang Rachel renh rarl ingkart-arrpantey anyelkel inerl-alhek."

<sup>33</sup> Laban ra kalikw arrpanenh-warl aylpekk, ingkart-arrpantey-rnem aretyek, kalikw renh-rnem arrangkw ywarek, Jacob-kenn, Leah-kenn, arelh warrkenh-athererr-kenn. Rachel-kenn kalikw-warl-anem aylpekk. <sup>34</sup> Rachel-el arlengkewek kamwerl saddle-warl, kweneng-apert, Rachel ranem irrwerleng anenham kamwerl saddle ikwerel. Laban nthwek ipantey.

<sup>35</sup> Rachel-el Laban renh ilek, "Akngey, atyeng nga ahelirrey-angnenh, ayeng intem nhel anayntem. Akapwert ayeng arntety, ayeng nthakenh akemirrey-angnenh." Alakenh-anyem ingkart-arrpantey ikwer-rnem Laban ra ywarek.

<sup>36</sup> Jacob ra ahelarl irrek, Laban renh iltek, "Ilekekarl ntwa ayenhan itwenetilek, atha ampwal-rnem irrrtyert-inenty-arrpantey? Atha anyelkel ingkart-arrpantey renh-rnem akngey-alpenty-arrpanteyan. Ayeng arlarl, atha renh-rnem akngey-alpeyangarl. Ilek ntwa ayenharl alwerneyel?" <sup>37</sup> Ntwa apek arek, atharl ampwal-rnem anyelkel akngey-alpek? Ntwarl renh arey-alhenty, ntwap renh arrerna akethok, akngerrel aretyek. Anwantherri ikwer angkerretyek, arratyilemel.

<sup>38</sup> Iterl-aray, ayengarl ngkweng warrkirrek aherrety 20-ek-atwety. Yep-yep akwerrik-rnem arek ilwey-angenharl mwerr. Ingkerrenh mwerr itethewek. Yep-yep irrwey atha anyelkel ngkwenh iney-angnenh, inemel atwety-angnenh. <sup>39</sup> Arengk art-nwerel yep-yep ngkwenh rlterrp-rlterremel tnhwek, atha yep-yep atyehn impen-anem angkep arrerneyem. <sup>40</sup> Itwernek rwenp inngarl, ingwel ayenhir irrentelarl atwek ankwayntey-angnenh ilek. Aherrety 20-ek-atwety ayeng iylpareth ngkweng warrkirrek, aylpenirrey-angnenh. <sup>41</sup> Ayeng ngkweng warrkirrenh aherrety 14-ek-atwety, alerengkw ngkwenh-athererr atha payemelemel. Aherrety 6-ek-atwety ayeng ngkweng warrkirrenh, atnwenth-rnem ingkerrenh payemelemel, ntwa ayenham anthetyek. Ntwa ayenham man mwerr payemeley-angnenh, ntwa ayenham akelyarl anthenh. Akngeyel-anem ayenham arntarn-arenh, Akngey renharl arrengey atyehn Abraham-el apenteck, akngey atyehn Isaac-el apenteck. Arrengey atyehn-kenn Akngey Abraham-kenn, akngey atyehn-kenn Isaac-kenn Akngey ra ayenham arntarn-arenh. <sup>42</sup> Ntwa ayenham thwenem apmer ngkwenthay, ayeng arrangkw alpetyek, Akngeyel ayenham arntarn-arem ilenh-angkwarran, ntwa ayenham arrangkw thwenek. Akngeyel ayenham arek, ra atyeng amperrrngirrek, ayengarl ngkweng mwerr-angkwarr warrkirrek. Ingwel, Akngeyel angka awerr ngenh antheek."

<sup>43</sup> Laban-el Jacob renh ilek, "Alerey atyehn-athererr ntwa atnyeneyel, artartey-rnem-them. Atnwenth atyehn-rnem ntwa atnyeneyel. Ampwal atyehn-rnem-them ingkerrenh ntwa atnyeneyel, atharl ngenh antheek. Alerey atyehn-athererr-them artartey-rnem-them nthakenh atha ngkwengety anterrkwey-angnenh. <sup>44</sup> Aylanth angkerretyek, mwerrant-athererr aylanth anetyek. Apwert ilperr-ilperr-rnem aylanth arrernetyek, ingkerrenhel aylenhanth iterl-aretyek, aylanth mwerrant-athererr anetyek."

<sup>45</sup> Jacob-el apwert ilkwa rnkernek. <sup>46</sup> Jacob-el ikwerenh-rnem ilek, "Apwert ingwer-anemarl mpwer rnkerney. Apwert ingwer-rnem-anemarl akarriley." Apwert ilperr-ilperral ampernemel ratherr amern arlkwek. ...

<sup>55</sup> Ingwepenh, Laban-el artarteyikw-rnem arrwantyek, kwey ikwerenh-athererr-them. Alpek-anem ra apmer-warl.

## 32

<sup>1</sup> Jacob angkep alpenh. Angel-rnemel renh rlwatek. Jacob-el renh-rnem arek-penh angkek, <sup>2</sup> "Nhenh Akngey-kenh apmerarl." Ra itnewek apmer renh itnan Mahanaim.

<sup>3</sup> Esau apmer Seir-el anen, apmer Edom ikwerel. Jacob-el angkakert atherr thwenek Esau-warl, apmer Seir-warl. <sup>4</sup> "Alakenh ayeng ngkweng awelhem. Laban-itwek ayeng anen. <sup>5</sup> Aleyan atyen tangkey-rnem-then pwelek-rnem-then yep-yep-rnem-then warrkenh artwernem-then, arelh-rnem-then. Artwa nhenh-atherr atha ngkweng-warl thweneyel, nga atyeng inkwelheteyek."

<sup>6</sup> Angkakert ratherr apey-alpek, ratherr iley-alpek, "Esau nhewarl apetyeyel atningk ingwer-rnem-then."

<sup>7</sup> Jacob ater-anem irrek. Aterirremel-anem akngakek, atnwenth-rnem ingkerrenh artwernem-then. <sup>8</sup> "Esau-el anyent-ampeny attwentyan ingwer-ampeny-they ikwerety anterremarl."

<sup>9</sup> Ikwer-they Jacob Akngey-warl angkek, "Akngey ngenharl arrengey atyenhel apen-tenh, akngey atyenhel apentenh. INGKARTay, ntwa ayen thwenek apmer-warl, atyenh-rnem aneyel-warl. Ntwa ayen alhelek, ayen arntarnt-aretyek, atyenh-rnem akngerriletyek. <sup>10</sup> INGKARTay, nga atyeng inkwelhelk, ntwa ayen ipmey-ayengen, aleth-antey arntarnt-arek. Ayeng irrertety atyenhan-akert Jordan Ilpay-angkwarr artarnpenhek. Atyenh-rnem akngerr innaganem aleyant, atnwenth-rnem-then. <sup>11</sup> Atha ngenh ayernem, ayen awayaty atyenh-kety Esau-kety arntarnt-ara. Ayeng ikwerety aterirreyel, ra anwenhantherr ingkerrenh-antey atwekkerr. Amenheng-rnem ingkerrenh-antey. <sup>12</sup> Ntwa ayen alhelek, 'Atha ngenh arntarnt-aretyek. Atha atyenh-rnem akngerram-akngerrileyeh. Rernem akngerr innaga aneyen. Rernem akngerram-akngerrirreyeh antyarr-rnem akngerr alkerel aynteyel-ampeny. Ingwer-rnemel ywarn-antey count-emileyen antyarr-rnem-ampeny.' ...

### *Akngey-then Jacob-then intewerrenh*

<sup>22</sup> Ingwa ikwerel-antey Jacob ra akemirrek. Anew ikwerenh atherr-akert arelh warrkenh ikwerenh-atherr-akert alerikw ikwerenh 11-pel-akert. <sup>23</sup> Rernem Jabbok Ilpay-angkwarr artarnpenhek, atnwenth-rnem-then ikwerenh ra artarnpelhelek. <sup>24</sup> Kel, ament-areny ra anek. Artwa anyent ikwer-warl apetyek. Ratherr atwerrenh ingwepenhek-atwety. Ratherr intewerrenh. <sup>25</sup> Artwa ra ikwerant-penh arrkernelhek, Jacob antengiletyek. Ra aneny atwek, aneny ngkwern aknganhelhilek. Iytikilemel-anem apmwelek. Ratherr aleth-antey intewerrenh. <sup>26</sup> Artwa rap angkek Jacob ikwer-warl, "Ipmanem ayen, ingwepen-anem irreyel-kety."

Jacob angkek, "Nthakenh alpey-ayengen, mwerr-angkwarr atyeng angka, Akngeyel ayen arntarnt-aretyek!"

<sup>27</sup> Artwa ra ayernek, "Ilek itna ngan?"

Jacob ra ilheltek, "Ayengan Jacob-arl."

<sup>28</sup> Artwa ra ilek, "Itnan ngkwenn Jacob-weny-anemarl, ngarl Akngeyek arrkernelhenh artwernem-then. Ingkerrenhel ngenh itnew-ayntem Israel-ant-anem." Angka ikwer-nem-kenhel-anem Israel aynteyel, "Ratherr Akngey-then intewerrenh, antengiletyek-arrpantey."

<sup>29</sup> Jacob-el renh ilek, "Nganem itna itnewelha atyeng!"

Artwa ra tyernek, "Nthakenh ntwa ayen iterl-arey-ayengenharl, ra mwerr-angkwarr mpwarek."

<sup>30</sup> Jacob-el apmer renh Peniel itnewek, angka ikwerenhel. Alakenh-anyem aynteyel, "Atharl Akngey renh arek, ra ayen ipmek atwety-ayengen." Alakenh-anyem aleyan aynteyel itnan

<sup>31</sup> Ingkeny kel tyerrelhek-anem. Ra iyternemel-anem alhenh, aneny ngkwern renh tyerrek-kety. <sup>32</sup> Alakenhaym-kety Israel-kenh-rnemel apmelerr aker aneny-penh nthakenh arlkwey-ayengen atnwenth-penh.

## 33

### *Jacob-atherr Esau-atherr mwerrant-atherr anek*

<sup>1-2</sup> Jacob-el Esau renh arnarek, irlkenty akngerr-akert, artwa 400, ikwer-warlarl apetyen. ... <sup>3</sup> Jacob ra ingkerrenh-itwek arrwekel-ampenyel. Ra kwenirrek akngerr-inger arrwekel, rarl kakey ikwerenh-warl alhenh. Jacob-warl. ... <sup>4</sup> Esau Jacob ikwer-warl anterrek, renh anterrkwemel renh arrwantyemel. Ratherr atherr-antey artnek.

...

## 35

*Benjamin awey akely atnyeneyel, Rachel ilweyel*

<sup>16</sup> ... Jacob ikweren-h-rnem-akertel Bethel ikwer-they alpek. Rernem apmer Eprath-they arleng-antey alpenh. Rachel ra arntety awelhenh. <sup>17</sup> Arelh warrkenh rarl Rachel renh arntartn-arenh. Arelh ra Rachel renh ilek, "Ntwa awey atnyeneyel." <sup>18</sup> Rachel ra ilwetyek-anem irrek, ra awey renh itnewek Ben-Oni. Rachel kel ilwek. Aynelikw ikweren-h renh itnewek Benjamin. ...

*Isaac ilwek-anem*

<sup>27</sup> Jacob ra alpek aynikw ikweren-h apmer-warl, apmer itnan Hebron, itna ingweran Mamre, Kerath Arba-they arrer. <sup>28</sup> Aherrety 180 ra anenh. Isaac ra ilwek. <sup>29</sup> Alerikw ikweren-hel atherr Esau-el, Jacob-el atherr renh apmer-itwek akwernek, rarl ilwek. ...

## 37

<sup>1-2</sup> Jacob ra apmer Canaan-itwek anenh, aynikw ikweren-har Isaac anenh-itwek. Angka nhenh Jacob-kenh-rnem-akert.

*Joseph-el altyerr areyel atherr-ing*

Joseph aherrety 17-anem anenh. Yep-yep-rnem-then nanikwet-rnem-then arntartn-arenh, atherrk-warl ra akengen, apmer Shechem-itwek. Kakey ikweren-hel rnem. Aynikwel Joseph thwenek awayengkw-rnem-warl, "Alha yep-yep-rnem arntartn-arayntetyek." Joseph awayikwel-rnem-then yep-yep-rnem arntartn-arek. Amikw ingwer atherr-kenh Bilhah-kenh-rnem, Zilpah-kenh-rnem. Jacob-kenh anew atherr-kenh. Joseph-el aynikw ikweren-h angka apmwa ikwer-rnem ilen. <sup>3</sup> Jacob Joseph-ekant inkwerelhek alerikw ingwer-rnem-theyan, rarl ingkerneny ikweren-h. Arnkwa arlkeny ingwerek-ingwer-akert aylpey-angker ra antek. <sup>4</sup> Joseph-kenh awayikw-rnem ikwer ahelirrek, ikwerantarl aynikw inkwerelhenn-kety, arnkwa mwerr-angker antek-kety. Rernem ikwer-itwek angka mwerr angkerrey-angenh-anem.

<sup>5</sup> Ingwer-ingerel Joseph-el altyerr-anem arek. Ra awayikw-rnem ilek, rarl altyerr arek. Rernem ikwer ahelirrek. <sup>6-7</sup> Joseph angkek, "Atyeng arringkerr awelhenn-herry. Anwingkerr atherrk weyt-rnem arlwarey-arlwarey akwetyemel arertneyen-h, ataperrelemel arraty rnker nemel. Atherrk ntang weyt-akert ataperr arlwa atyen-h arraty rtnek. Ataperr arrekingkerrenhan ikwer kwenirrekarl, atyetyartekarl kwenirrem-apeny."

<sup>8</sup> Awayikw-rnem ingkerren-h-antey ikwer angkek, "Nganang ngay Atyetyart anwek-ingkerren-haneyel?" Rernem ikwer ahel-anem irrek, rarl angka renh ilekek, ntang weyt-penh.

<sup>9</sup> Joseph-el altyerr ingwer-anem arek. Ra awayikw-rnem angka ilek, rarl altyerr arek, "Ingkerny-then alkent-then antyarr 11-pel, rernem atyeng kwenirrek Atyetyartek-apeny." Joseph-el ikwer-rnem anayntiley-angenh-antey.

<sup>10</sup> Ra aynikw ilek, rarl altyerr renh arek. Aynikw ikwer ahelirrek. "Ilek lap ran alakenh aynteyel? Ayeng amengkw awayengkw-rnem-then ngkweng kwenirrelyek Atyetyart-apeny?" <sup>11</sup> Awayikw-rnem ikwer ahelirrek. Aynikw ikweren-h aleth-antey itterenh, ywarn-antey, rarl angka renh ilekek.

*Joseph-kenh awayikw-rnem ikwerety arkarirreyel*

<sup>12-13</sup> Awayikw-rnem alhek, yep-yep-rnem-then nanikwet-rnem-then arntartn-aretyek, apmer Shechem-itwek. Aynikwel Joseph thwenek, "Awayengkw-rnem-warl alha." Joseph-el renh ilek, "Kel, mwerr."

<sup>14</sup> Aynikwel renh ilek, "Awayengkw-rnem arerl-alpa, iley-alpemel atyeng-warl, mwerr yep-yep-rnem rernem arntartn-areyel." Ra renh thwenek Hebron arterterr-they apwert irrkerrel-atherr ayntek, ahern arterterr ampepel aynteyneyel. Joseph apmer Shechem-warl alhenn amern weyt-angketyarr-angkwarz. <sup>15</sup> Artwa anyentel renh ayernek, "Ilek nganha nthwerl-alpeyel?"

<sup>16</sup> Joseph-el ilek, "Ayeng nthwerl-apeyel awayat ayen-h-rnemek. Ntwa apek arek renh-rnem? Nteweh-angkwarz rernem alhekan yep-yep-rnem-akert?"

Artwel ilek, "Rernem anper-antey alhek. <sup>17</sup> Apmer nhenh arrangkw-anem. Atha renh-rnem awek, rernem arl angkerrenh apmer Dothan ikwer-warl alhetyek." Joseph-el awayikw ikweren-h-rnem arek apmer Dothan ikwer-itwek. <sup>18</sup> Awayikwel-rnem renh arnarek, rernem ikwer angkerrek, renh atwetyek.

<sup>19</sup> "Yanh ra apetyeyel altyerr arey-angker, tnakelherl-aney-angker. Atyetyart illeherl-aney-angker! Mpa, anwingkerr ywerrelhemel atwey!" <sup>20</sup> Anwingkerr renh irrkwewarl

iwey, ingwer-rnem-warl ilerl-anemel atnwenth ahelengkwel renh arlkwenty-arrpantey. Ran ilwentyl, rap atyetyart aney-angenh-anemarl!"

<sup>21</sup> Reuben ra awek rernemarl ikwer angkerrenh atwetyek. Ra arrkernelhek renrnem iletyek menty ra anetyek, atwepy-angenh. <sup>22</sup> Ra angkek, "Apmer arlpaw-warl renh akngey, irrka ilkewararl renh iwetyek." Ra ikwer iterrenh aynikw-warl akngeynetyek-antye irrkewararl itwenty-penh, renh ayerrpiletyek.

<sup>23</sup> Joseph awayikw-warl apetyek. Rernem arnkwa arlkeny-angketyarr lhelhek, <sup>24</sup> Irrka ilkewararl renh iwek. <sup>25</sup> Joseph-kenh awayikw-rnemel amern-anem arlkwenh. Rernem arek Ishmael-areny-rnem apetyenty apmer Gilead-they. Kamwerl-rnemel ampwal ilek-ilek akngetyen Egypt-warl.

<sup>26</sup> Judah-el ilek, "Ilekek anwingkerr aytey anwekingkerrenh atwerl-ayntem?

<sup>27</sup> Anwingkerr tharlemiley weker-rnem-warl kamwerl-angketyarr yanh-rnem-warl, weker-rnem-warl."

<sup>28</sup> Joseph-kenh awayikw-rnemel renh tharlemiletyek weker-rnem-warl. Irrkethay tyerrek. Weker-rnemel renh payemelek, ngkwelty 20-pel-ek. Rernem Joseph renh akngek apmer Egypt-warl.

<sup>29</sup> Reuben irrkewararl apetyek, ra arrangkw-anem arey-alhek. Arnkwanem ikwerenh ilterrek, arralty-anek. <sup>30</sup> Ra awayikw ingwer-rnemek angkek, "Avey ra ywerrek irrkethay. Nthakenh-anem ayeng irreman?"

<sup>31</sup> Joseph-kenh awayikw-rnemel nanikwet atwek, arrkngewarl-anem pwerlpewek, arnkwa arlkeny-angketyarr renhan. <sup>32</sup> Arnkwa arlkeny-angketyarr renh rernem aynikw-warl akngeynek, arrkngeng. "Arnkwa nhenh aray! Alerengkw akely ngkwenh-kenh apek!"

<sup>33</sup> Artwamp Jacob ra alhengk-arek, "Alerey atyenh-kenh yahan! Arnkwa arlkeny-angketyarr atharl alhengk-areyel, atnwenth ahelengkwel renh arlkwek apek!"

<sup>34</sup> Apmer-itwek amperrrngirrek arleng-alenty, ra arnkwa ikwerenh ilterrek. Ra arnkwa apmwel-anem aylpek, amperrrngirremel. <sup>35</sup> Rernem ywarn-antey arternpiletyek ikwer arrkernelhenh. Artwamp ilhelhek, "Ayeng aleth ikwer artnayntem ilwetyek-atwety." Aleth-antey artnenh. <sup>36</sup> Weker-rnemel Joseph renh tharlemilek, artwa Potiphar-warl. Potiphar Atyetyart anek artwa ahelengkw Egypt-areny-rnemek. ...

## 39

### *Joseph ra aneyel Potiphar-kenh warle*

<sup>2</sup> Joseph ra anen Potiphar-kenh warle. <sup>3</sup> Potiphar ra iterl-arek INGKARTelarl Joseph renh arntarnt-arenh, INGKARTel renh ilek-ilek anthek ampwal-rnem. <sup>4-5</sup> Potiphar-el renh arrernek ampwal ingkerrenh arntarnt-arayntetyek warl ingkerrenh, ranem Atyetyart-apeny anen, Potiphar renh arrernek-angkwarr. Joseph rarl Potiphar-itwek warrkirrenh mwerr-angkwarr Potiphar renh INGKARTel arntarnt-arek arrpemarl. Ra ilek-ilek warrkirrenh Potiphar ikwer. <sup>6</sup> Joseph-el ilek-ilek ingkerrenh arntarnt-arenh. Potiphar atnaratirrek, amernekant iterrenh. <sup>7</sup> Joseph ingerr mwerr anen. Potiphar-kenh anew Joseph ikwer iterrenh, Joseph-ek iytenyirrek, ywarn-antey. Arelh ra renh ayernek, ikwer-itwek ayntetyek.

<sup>8-9</sup> Joseph menty angkek, "Kel, menty! Ayeng ilkelhey-angenh. Anew ngkwenh mwerr atyeng aneyel. Rarl ayen arrernek, warl atha arntarnt-arayntetyek, warrkenh-rnemthen, ampwal-rnem-then. Nthakenh atha INGKART-angkwarr apmwel-areth mpwarey-angenh." <sup>10</sup> Arelh ra aleth-antey ayernenh renh, ikwer-itwek ayntetyek. Joseph ra arelh ikwer awelhey-angenh, arlkariренh.

<sup>11-12</sup> Arlta anyentel, Joseph ra alhek, warl Potiphar-kenh-warl warrkirretyek. Potiphar-kenh anewikwel arnkwetthey-anem renh anterrkwemel ilek, "Nga atyeng-itwek ayntetyek." Joseph ra warl-they anterrek. Arelh ra renh arnkwa aleth-antey anterrkwemel. Warrkenh ingwer-rneman warl kwen aney-angenh arrangkw, arelh rantarl anen.

<sup>13</sup> Arehel renh arek, rarl anterrenh, arnkwa ikwerenh iwerl-alhemel. <sup>14</sup> Arelh ra warrkenh-rnemek arkelhilek, "Artwa Hebrew yanh arenherr-arey, rarl anenhantherr kwantheyel. Ra apmwel-areth mpwaretyek atyeng arrkernelhek, ayeng ikwerety arlkekarl. <sup>15</sup> Rarl ayen awek, ayengarl arlek, ra aketh-warl anterrek, arnkwa ikwerenh iwerl-alhemel kwen-itwek-antey."

<sup>16</sup> Potiphar-kenh anewel arnkwa renh atnyenreh, Potiphar ra avey-alpetyek-atwety.

<sup>17</sup> Arehel irrywerremel ilek, "Artwa Hebrew warrkenh yahan arrkernelhek, ayen mpweny inetyek. <sup>18</sup> Ayeng ingwer-rnemek arlek. Artwa ra aketh-warl-anem anterrek, arnkwa ikwerenh iwerl-alhemel."

<sup>19</sup> Potiphar ahelirrek-anem, <sup>20</sup> Joseph renh tyayl-warl akwernek, Pharaoh-kenh artwa ingwer-rneman tyayl-itwek anenh-warl. Joseph ra tyayl kwenel anenh, INGKARTel renh aleth-antey arntarnt-arenh.

<sup>21</sup> INGKARTel Joseph renh arntarnt-arenh tyayl-itwek aleth-antey. Atyetyart tyayl-arenyel Joseph renh arntarnt-arenh arrpemarl. <sup>22</sup> Atyetyart tyayl-areny Joseph ikwer Atyetyart-anem ra arrernek tyayl-areny ingwer-rnemek anayntetyek. <sup>23</sup> INGKARTel Joseph renh arntarnt-arenharl, atyetyart tyayl-arenyel Joseph ikwer atnaratyirrek.

## 40

### *Joseph tyayl-itwek aneyel*

<sup>1</sup> Pharaoh-kenh warrkenh atherr, anyent wayn anthey-angker, warrkenh ingwer amern amperney-angker. <sup>2</sup> Ratherr apmwelhelek. Pharaoh ikwer-atherr ahelirrek. <sup>3</sup> Atyetyartel artwa ikweren-hrnem ilanthek warrkenh renh-atherr tyayl-warl akwertyek. Renh-atherr atherr-antey tyayl anyent-warl akwernek, Joseph-arl anenh-itwek. Rernem arleng-alenty aleth innga anenh. <sup>4</sup> Atyetyart tyayl-arenyel Joseph renh ilanthek, ra artwa renh-atherr arntarnt-arayntetyek tyayl kwen. <sup>5</sup> Ingwa anyentel artwa ratherr atherrel-antey altyerr arek. Akngey ingwerant atherr ratherr arek.

<sup>6</sup> Ingwepenh Joseph ra alhek, artwa renh-atherr aretyek. <sup>7</sup> Ra renh-atherr arey-alhek, ratherrarl iterrenh artewentyel. Joseph-el renh-atherr ayernek, "Ilek mpwelanth artewentyel iterreyel."

<sup>8</sup> Ratherr angkek, "Akngay aylanth arek, ingwer-rnemel apek aylekanth anayntileyang angka renh."

Joseph-el ilek, "Akngay rant angka arratyan iterl-areyel. Akngay arek-penh atyeng ilenherr-atherr atha apek iterl-aretyek."

<sup>9-10</sup> Warrkenh wayn anthey-angker ra Joseph renh ilek, "Aylpa irrpety atha arek grapes-itwek, amern-angketyarr irrpety-antey. <sup>11</sup> Pharaoh-kenh irrkwa atha atnyenetyek grapes-rnem ilytel anterrkwenhemel grapes-penh akarr irrkwa ikwer-warl thelhemel. Pharaoh renh-anem anthek, ra antywetyek."

<sup>12</sup> Joseph-el ikwer anayntilek, "Atha ngkweng ingkerrenharl iley, ilekarl ra aynteyel, aylpa irrpety yanhan, arlta irrpety-apenyarl. <sup>13</sup> Arlta irrpety-penhan Atyetyartel ngenh aketh-warl tyarlewetyen. Ntwa warrkenh ikweren arrpemarl anem, wayn arrpemarl anayntetyek, ntwa awank-akerr anthenh-angkwarr-apeny."

<sup>14</sup> Joseph-el renh ilek, "Nga tyerrelhentyelan tyayl-they, Pharaoh renh ila, ra ayenh tyayl-they tyarlewetyek. <sup>15</sup> Artwa ingwer-rnemelan ayenhan anyelkel inenh Hebrew-kenh apmer-ampeny-they. Ayeng nharl tyaylel aneyel, atha apmwel-areth mpwarey-angenharl. Ayengan arlarl."

<sup>16</sup> Warrkenh amern amperney-angker ra altyerr ikweren-hnem ilek Joseph-warl, rarl ingwel arek, Joseph-arl arraty-angkwarr anayntilek. Ra Joseph renh ayernek, ilekekarl ra altyerr arekek. Atha altyerr arek arrpemarl. <sup>17</sup> Amern-akert amernek-arelh irrpety akngeynenh akapwert irrwerlel. Thip-rnemel amern renh-rnem arlkweynenh amernek-arelh irrpety ikwer-itwek.

<sup>18</sup> Joseph-el renh ilek, "Alakenh-anyemarl angka yanhan aynteyel, amernek-arelh irrpety yanhan arlta irrpety-apeny aynteyel. <sup>19</sup> Arlta irrpety-penhan Atyetyartel ngenh ita rlweth-akem, inkwarley arreylpel. Ipma aylpar-arrerneyen arwerl arlpenty irrwerl-warl. Thip-rnemel tyekl ngenh arlkwayntetyek."

<sup>20</sup> Arlta irrpety-penhan Pharaoh-el amern tyenkerr arlkwenh warrkenh ikweren-hrnem-akertel. Ra warrkenh ikwer-atherr yangkelhek, ratherr kwenty renh atyehiletyek, rernem amern tyenkerr arlkwetyek ingkerrenhel-anem. <sup>21</sup> Warrkenh wayn anthey-angker arrernek arrpemarl, ra warrkirteyek arrpemarl, ra warrk renh antheynek arrpemarl. <sup>22</sup> Artwa amern amperney-angkeran ra ingwer-rnem ilanthenh renh ipmek atwetyek, ipma aylpar-arrerneyen arwerl arlpenty irrwerl-warl, Joseph-arl ilek-angkwarr. <sup>23</sup> Ingkerrenh-angkwarr ayntek Joseph-arl ilek-angkwarr-antey. Warrkenh wayn anthey-angker ra iyelpirrek. Atyetyart renh iley-angenh-antey, Joseph renh tyayl-they tyarlewetyek.

## 41

### *Pharaoh-el altyerr areyel*

<sup>1</sup> Aherrety atherrel Joseph ra tyaylel anenh. Pharaoh ra altyerr arek. Akngey ra arekan, Nile ilpay impalhel ra rtneh. <sup>2</sup> Pwelek-rnem anter-akngerr 7-pel tyerrelhey-ayntek kwaty-they. <sup>3</sup> Kel aremel pwelek 7-pel ngkwernant-anem kwaty ikwer-they-antey

arrpemarl tyerrelhey-ayntek. <sup>4</sup> Pwelek ngkwernant-rnemel pwelek anter-akngerr-rnem akwernek-anem. Pharaoh ra akemirrey-ayntek-anem, rarl altyerr arek-penhan.

<sup>5</sup> Ankwa arrpemarl aynteynek, altyerr ingwer-anemarl arek. Ra ntang ilkwernem arek. <sup>6</sup> Ingwer-rneman arleny aynterrk-rnem. <sup>7</sup> Arleny-anterrk-rnemel ntang ingwer-rnem kwernek. Pharaoh akemirrey-ayntek arrpemarl altyerr renh arek-penhan.

<sup>8</sup> Ingwepenh Pharaoh ra artewentyel iterrek. Artwa ingwerek-ingwer-anem yangkel-hek, ra renh-rnem ayernetyek, rarl altyerr arek-pen. Ngangker-akert-rnemek ra yangkelhek. Ywarn-antey ra renh-rnem ayernek. Rernem ikwer arraty anaytileyek-arrpantey, ywarn-antey rarl altyerr arek.

<sup>9</sup> Artwa warrkenh wayn anthey-angker ra. Ra angkek, "Ayeng iterl-arelhek-anem, atharl apmwel-areth mpwarek. <sup>10</sup> Pharaoh aylernek ahelirrek, tyayl-warl akwernek. Aylernanth arey-alhek Hebrew anyent, tyayl kwen-itwek. <sup>11-12</sup> Aylernanth atherrel-antey altyerr arekan. Hebrew rant arraty innga ilek, aylernantharl altyerr arekan. <sup>13</sup> Ayeng warrk-warl alpek, amern amperney-angkeran atwekarl, Hebrew rarl ilek-angkwarz-antey. Arraty inngarl ra ilenhan, Hebrew ran."

<sup>14</sup> Pharaoh ra Joseph ikwer yangkelhek, renh ra ayernetyek, rarl altyerr arek-pen. Artwernemel Joseph renh tyayl-they tyerrek. Ra althelhek, arnkwa mwerrrel-anem aylpemel, Pharaoh ikwer-warl-anem alhek.

<sup>15</sup> Pharaoh ra ilelhek, "Atharl altyerr arekan, ingwer-rnemel atyeng anaytiley-angen. Ngenhant atha awek, mwerr inngan, anaytiley-angkeran."

<sup>16</sup> Joseph ikwer-warl ilelhek, "Athan iterl-arey-angenhari, Akngeyelant anaytilem."

<sup>17</sup> Atyetyart ra ilelhek, "Ayeng ilpay-itwel rtnenh, atharl altyerr arek, <sup>18</sup> pwelek anter-akngerr 7-pel kwaty-they tyerrelhey-ayntenty. <sup>19</sup> Ikwer-penhan atha arek, pwelek ngkwernant-rnem kwaty ikwer-they-antey tyerrelhey-ayntenty arrpemarl. <sup>20</sup> Pwelek ampwel-rnem pwelek anter-akngerr-rnem kwernek. <sup>21</sup> Rernem arlkwey-panhan, rernem ngkwernant irrkaty-antey anen. Ayeng akemirrenhey-alpek, anamerl-antey."

<sup>22</sup> "Atharl altyerr arek ntang 7-pel mwerr-angker ilkwernem. <sup>23</sup> Ikwer-penhan atha arek ntang arleny aynterrk-rnem-anem.

<sup>24-25</sup> Ntang arlenyel-rnem ntang mwerr-angker ilkwernem kwernek. Atha altyerr renh ilek ngangker-akert-rnem-warl, rernem atyeng arraty iletyek-arrpantey, rernem iterl-arey-angenh arrangkwarl."

Joseph-el ikwer anaytilek, "Altyerr yanh arek, ntwa arekan, irrkant-atherr aynteyel. Akngeyel ngkweng lwewarrerneyel, rarl alakenh-anyem mpwareyenh. <sup>26</sup> Aherrety 7-pelant ntwa arlkweman, pwelek anter-akngerr arlkwem-apeny, alakenhaym ra aynteyelan. Alakenh-anyem ntwa ntang arleny 7-pel arlkwey-angenh, ntwa aherrety 7-pel arlengelan arlkwey-angenh arrpemarl. Aherrety 7-pelant ntwa arlkweman, ntang mwerr-angker ntwa arlkwem-apeny. Alakenh-anyem ra aynteyelan. <sup>27</sup> Pwelek 7-pel ampwernem, aherrety 7-pel apmwernem-apeny arrpemarl, pwelek 7-pel anter-akngerr-rnem aherrety 7-pel mwerr-rnem-apeny, aherrety atherrk-angketyarr, atherrkeny. Nthakenh arlkwey-angenh arlenyelan. Alakenh-anyem ntwa pwelek ampwerneman arlkwey-angenh, ntwa aherrety 7-pel arlenyelan arlkwey-angenh arrpemarl. 7-pel aherretyel aherrety ilkwa aynteyen amern lyapey-angenh.

<sup>28</sup> Akngeyel lwewarrernek altyerr-angkwarz rarl alakenh-anyem mpwareyenh.

<sup>29</sup> Aherrety mwerr-angker 7-pel aynteyen apmer Egypt-el, amern-angketyarr.

<sup>30</sup> Aherrety apmwernem 7-pel aynteyen Egypt ikwer-itwek-antey. Amernek ywarn iterreyel, amern arrangkw. <sup>31</sup> Aherrety apmwel rernem angayakw irreyenh, amern-wenyl. Rernem aherrety mwerr-rnem ingkerrenh iyelpirreyenh. <sup>32</sup> Akngeyel lwewarrernek, ntwa alakenh-anyem iterl-aretyek, rarl alakenh mpwareyenh.

<sup>33</sup> Artwa mwerr innga arrerney-areny Egypt-itwek Atyetyart ingkerrenhek anaytileyek. <sup>34</sup> Artwa ingwer arrernem, rernem amern-rnem arntarnt-arayntetyek. Rernem ntang akngerr innga inetyek aherrety 7-pel apmwernem-kety, amern-angketyarr rernem arntarnt-aretyek, amern akngerr arlkwemel. <sup>35</sup> Arlwarey-arlwarey akwerne warl ilkewarl, rernem ikwer-penh arlkwayntetyek aherrety apmwernem 7-pelek-atwety, amern ingkerrenh ywerremel. Ingkerrenh-antey iteth anetyek-awaty amern ntang akngerr arlkwemel. <sup>36</sup> Rernem amern renh arrernek aherrety 7-pel ikwerel, amern-wenyl irrentyek, amernek apatentyek."

<sup>37</sup> Pharaoh ingwer-rnemek inkwerelhekan, ntang-rnem arrerneyek amern-wenyl irrentyek. <sup>38</sup> Pharaoh angkek, "Warrkenh mwerr-angker anwantherr arrernem Joseph-arl, ran Akngey-kenh itnweng-akert."

<sup>39</sup> Pharaoh-el Joseph renh ilek, "Akngelyel ngenh akaltyilek, ntwa alakenh-anyem mpwaretyek, ntwa ingkerrenh-angkwarr iterl-areyel ngan mwerr innga ingwer-rnem-theyan." <sup>40</sup> Atha ngenh Atyetyart arrernem apmer ntwa arntarnt-arayntetyek. Ingkerrenh ngkweng awelhetyek. Ayengant Atyetyart ngkweng anayntem."

*Pharaoh-el Joseph renh arrernek, atyetyart Egypt-areny-rnemek*

<sup>41</sup> "Atha ngenh Atyetyart arrernem Egypt-itwek, Egypt-areny-rnem ingkerrenhek." <sup>42</sup> Egypt-areny Pharaoh ra ampwal ilytek-arelh gold-penh mpwarekarl ilyethay lhelhek, Joseph ilyewarl arrernek. Arnkwa mwerr-rnem-then anthek ra aylpetyek. Tyeyn itek-arelh gold-penh mpwarekarl Joseph-warl tyeyn arrernek. <sup>43</sup> Joseph renh pakey mwerr-angker anthek, ra alhayntetyek ikwerel. Ingkerrenh ikwer arlek, "Iwerr arnangelhenh-arey Joseph ikwer." Alakenh-anyem Joseph ra Atyetyart anen Egypt-areny ingkerrenhek.

<sup>44</sup> Pharaoh-el Joseph renh ilek, "Ayeng anyent Atyetyartan ingkerrenh ngkweng awelh-ayntetyek, ayengan atyetyart arrwekel, ngarl Atyetyart atyeng-theyan." <sup>45</sup> Ra Joseph renh itnewek Zaphenath Paneah. Joseph ra anew inek, Potiphera-kenh alerikw, itnan ikweren Asenath.

<sup>46</sup> Joseph ra aherrety 30 anek, Pharaoh-el Atyetyart arrernek Egypt-areny ingkerrenh ra arntarnt-aretyek. Ra ingkerrenh-angkwarr arntarnt-arerl-apen, warkitwek. <sup>47</sup> Aherrety 7 ingweran anek, mwerr-angkerarl. Amern akngerr renem arlkwenharl. <sup>48</sup> Ntang ingkerrenhel ra inek-penhan ra renh-rnem warl ilkewararl arlwarey-arlwarey arrernek, tawen ilkewernem-itwek, ntang renh-rnem ra arrernek ingkerrenh arlkwayntetyek. <sup>49</sup> Joseph-el ntang arlwarey-arlwarey akngerr arrernek, nthakenh ingwer-rnemek count-emiley-anghen.

*Joseph-kenh alerikw ather*

<sup>50</sup> Arrwekel-antey amern ingkerrenh ywerrey-alenty, Joseph-then anew ikweren-then ratherr awey atherr ikwer-atherrenh anek. <sup>51</sup> Arrwekelely itnewek Manasseh, alakenh angkemel, "Akngelyel ayenh arntarnt-arek, ayeng iterrey-angenh arrangkw-anem, ayeng apmerek alhanttey-angenh anem." <sup>52</sup> Aveying ingweran itnewek Ephraim-arl alakenh angkemel, "Akngelyel ayenh ampa akngerr anthek, apmer ikwer-itwek rlerrik innga atyeng aynten-h-itwek."

*Amern-weny rernem anen*

<sup>53</sup> Aherrety 7-pel mwerr-rneman ywerrenhek-anem. <sup>54</sup> Aherrety 7-pel ingwer apmwerenem ayntek, amern-weny-rnemar, Joseph-el ilek-angkwarr-antey. Apmer ingkerrenh-itwek, amern lyapey-angenh ayntek. Apmer aparnpel. Amern akngerr-antey Egypt-itwek aynteh. Egypt-itwek rernem angayakw-anem irrek, amern-wenyel. <sup>55</sup> Rernem Atyetyart Pharaoh renh ayernenh amernek. Ra angkek, "Joseph ayerneyek alhenherr-arey, ra arrenhantherr amern anthetyek. Arrantherr ikwer awelheyek alhenherr-arey, rarl arrenhantherr ileman." <sup>56</sup> Ra amern-weny-anem irreynenh, ra apmwa innganem ayntek, amern-wenyel. Joseph-el warl ilkwa altywerilek, amern-anem Egypt-areny-rnem tharlemilek, rernemar angayakw irrek. <sup>57</sup> Apmer arrpanenh-they Egypt anyent ikwer-warl akarirrek, amern-angketyarr-warl. Aherrety apmwa apmer arrpanenh-itwek-anem ayntek, amern-weny arrangkw, amern lyapey-angenh.

## 42

*Joseph-kenh awayikw-rnem apmer Egypt-warl alheylek amernek*

<sup>1</sup> Jacob-el awek ntang weyt-angketyarr apmer Egypt-itwek, angkemel, "Ilek arringkerr apatamel aneyel?" <sup>2</sup> Atha awek Egypt-an ntang weyt-angketyarr. Arringkerr ingkerrenh alhenherr-arey Egypt ikwer-warl ntang weyt inerl-alpetyek, angayakwirrekkerr."

<sup>3</sup> Joseph-kenh awayikw 10-pel alhek apmer Egypt-warl. <sup>4</sup> Jacob-el alerikw akelyan thweney-angenh. Anterrkwek apmer-itwek-antey. Ra aterirrek atwekerr apek renh. <sup>5</sup> Jacob-kenh-rnem anyentirrenhek angayakw ingwer-rnem-angkwarr, Egypt-warl rernem alhek.

<sup>6</sup> Joseph ra Atyetyart anen apmer-rnem arntarnt-arayntetyek, ntang weyt-rnem alrperryilemel anthayntetyek. Awayikw ikwerenh-rnem apetyek ikwer-warl, kwenirrey-alhemel ikwer-itwek.

<sup>7-8</sup> Rernem Joseph renh alhengk-arey-angenh, rant renh-rnem alhengk-arek, ra ingwer-arrpantey anen. Ra renh-rnem iltek, "Nthenn-they arringkerr apetyek?"

"Anwingkerr apmer Canaan-they apetyek, ntang weyt inerl-alpetyek, amern-wenykety," rernem renh ilek.

<sup>9</sup> Joseph ra iylpangkek, rarl altyerr awank arek, "Arringkerr arlwarrernerl-ayntetyek, ahelengkw-rnem apek."

<sup>10</sup> Rernem angkek, "Arrangkw anwingkerran arwarl apetyek, amern ntang weyt-angketyarr-warl, amern-weny-kety. <sup>11</sup> Anwingkerr ingkerrenh artwamp anyent-kenh-antey. Anwingkerr arraty ileyel, irrtwyerremel iley-angenh. Anwingkerr iylpareth ingarl, irrtwyerremel iley-angenh."

<sup>12</sup> Joseph-el renh-rnem ilek, "Arringkerr apmer renh arlwarrernerl-alpetyek, arringkerr irlkenty-akert apey-alpey-alenty, apmer nhenh-itwek atwetyek-anem."

<sup>13</sup> Rernem Joseph renh ilek, "12-an anwingkerr anekan, artwamp anyent-kenh-antey. Akelyan artwamp anwekingkerrenh-itwek anerl-anem Canaan-itwek. Anyent ingweran ilwekarl."

<sup>14</sup> Joseph-el renh-rnem itwengetilekan, "Arringkerr artwa ahelengkw-rnem apekan. <sup>15</sup> Alerl atha arrenhingkerr iterl-arey-tangkwel, artwa ahelengkw-rneman. Atyetyart Pharaoh iteth aneyel-apeny, arringkerr apmer nhel anetyek, aytey arrekingkerrenh ra apetyeyek-awayt. <sup>16</sup> Anyent apmer-warl alpey ayteyikw inerl-alpetyek atyeng-warl akngetyemel. Awayikw ingwer-rnemarl tyayl-itwek anenherr-arey." <sup>17</sup> Ra renh-rnem tyayl-ek ingkerrenh akngetyemel, rernem arlta irrpety tyaylel anek.

<sup>18</sup> Joseph-el renh-rnem ilek, "Ayeng Akngeyekant iterreyel. Alerl-apeny atha arrenhingkerr ipmem. Anyent ingweran tyayl-itwek anayntem." <sup>19-20</sup> Arringkerr ilelhek, arringkerr artwa mwerr akwel. Arringkerr atyeng mwerr-angkwarr awelhenty, atha arrenhingkerr ipmek atwney-angenh. Arringkerr aytey arrekingkerrenh ikngwerl-alpa atyeng-warl akngetyemel, atha renh aretyek. Atha renh arenty, athap arrenhingkerr iterl-arem, arratyarl ileyel atyeng."

<sup>21</sup> Ikwer-penhan rernem angkerrenh, "Akngayel anwenhingkerr atwem, anwingker-rarl Joseph renh awank irrkewarl iwek-pen."

<sup>22</sup> Reuben angkek, "Atha arrenhingkerr ilek, awey atwney-angenhek. Arringkerr atyeng awelhey-angenharl, Akngayel anwenhingkerr atwemant-anem." <sup>23</sup> Rernem iterl-arenh Joseph-el-arl angka ikwer-rnem-kenh awey-angenh-arrpantey. Joseph angkenh angka Egypt-areny-kenhel, artwa ingwerelarl angka anayntilek ikwer-rnem. Rernem ikwer iterrenh iylda arwengkek-arrpantey, angka ikwer-rnem-kenh awey-angenh.

<sup>24</sup> Joseph intwemelirrek, artnemel-anem. Ikwer-penhan ra angkek arrpemarl ikwer-rnem-warl. Ikwer-penhan ra warrkenh ikwerenh ilanthek, ra Simeon rwepel arertnetyek.

<sup>25</sup> Ikwer-penhan Joseph-el warrkenh ikwerenh thwenek, ayteyikw ikwerenh-warl ahetyek, yakweth-warl man angkep irrtiyert akngetyek ikweren, angkep antheynetyek ikwer, rarl amern payemelek. Ra ntang-rnem yakweth arpanenh arrerneynek, ntang-rnem-then man-rnem-then. <sup>26</sup> Rernem ntang tangkey-warl tywenek, alpek-anem rernem.

<sup>27</sup> Ingwel rernem ayntey-alpek ampepel. Artwa anyentel yakweth altywerilek, man-akert tangkey wantetyek, rap man amern-akert kwen. <sup>28</sup> Ra ilek, "Angwenhel man angkep antheynek, yakweth-itwek aynteyel?" Rernem ater-anem irrek, "Nthakenh Akngayel anwenhingkerr angwenhileyel?"

<sup>29</sup> Apmer Canaan-warl rernem alpek, rernem aynikw ikwer-rnem-kenh angka ilek-ilek iley-alpek ikwer-warl. <sup>30</sup> "Egypt-areny Atyetyartel anwenhingkerr artwa ahelengkw-arrpantey arey-ayntek, apmer arlwarrernerl-anenty-arrpantey. <sup>31</sup> Anwingkerr renh ilek, 'Anwingkerr artwa mwerr-rneman ahelengkw-wenyarl. <sup>32</sup> 12-an anwingkerr anekan, artwamp anyent-kenh-antey. Akelyan artwamp anwekingkerrenh-itwek anerl-anem Canaan-itwek. Anyent ingweran ilwekarl.'

<sup>33</sup> Atyetyartel anwenhingkerr itwengetilekan, 'Alerl atha arrenhingkerr iterl-arey-tangkwel, artwa ahelengkw-rneman. Atyetyart Pharaoh iteth aneyel-apeny, arringkerr apmer nhel anetyek, aytey arrekingkerrenh ra apetyeyek-awayt. <sup>34</sup> Arringkerr aytey arrekingkerrenh-akert apey-alpetyek, atha arrenhingkerr iterl-aretyek, arringkerr arwamp mwerr-rnem, ahelengkw-weny.'

<sup>35</sup> Rernem yakweth-rnem altywerilek. Rernem arek man ingkerrenh ayntenty. Rernem aterirrek, aynikw aterirrek arrpemarl. <sup>36</sup> Jacob-el alerikw-rnem ilek, "Arringkerr awey atyehn atyeng-they rakek. Joseph-an arrangkw, Simeon arrangkw arrpemarl. Arringkerr ilkelheyel Benjamin raketyek arrpemarl, alakenh irrwernek?"

<sup>37</sup> Reuben-el aynikw ikwerenh ilek, "Ayeng Benjamin-weny arrangkw apey-alpenty, ntwa aler atyehn-atherr ipmek atwem. Atha renh arntarnt-aretyek, akngay-alpem innga."

<sup>38</sup> Jacob angkek, “Benjamin, alerey akely atyenhan atha nthakenh Egypt-warl thweney-angenh, alerey atyenhan arrwekel ilwek-ketyarl. Alerey anyent-anem atyenhan impenantey, nthakenh tyarlewey-angenh ra alhetyek. Ayeng ikwer amperrngirrerl-anekerr, arringkerr renh akngentyan.”

## 43

*Rernem alheyel apmer Egypt-warl, amern inetyek*

<sup>1-2</sup> Aherrety atherrk lyapey-angenh, aherrety innaganem ayntek, kwaty rntwey-angenh arrangkw-anem. Ntang-rnem arrangkw-anem irreyneh, Jacob-kenh apmer-itwekan. Ntang-rnem ywerrek-anem. Amern-weny arrangkw-anem anenh. Jacob-el renh-rnem angkep-antey ilanthek ntang akngerr-rnem inerl-alpetyek. Arringkerr alhenherr-arey ankgerr-anem inerl-alpetyek.

<sup>3-5</sup> Judah angkek, “Atyetyartel ilek aytay anwekingkerrenh anwingkerr akngey-nentyelant, anwenhingkerr amern ntang akngerr anthem. Benjamin anwingkerr akngentyelant mwerr. Anwingkerr ikwer-weny alhentyan arrangkw wenh!”

<sup>6</sup> Jacob-el renh-rnem ilek, “Arringkerrarl Atyetyart renh ilek, arringkerr irrwernek-anem aytay arrekingkerr. Arringkerr ikwer-warl iley-angenh menty aynteyek-anek”

<sup>7</sup> Rernem renh ilek, “Angka akngerr inngei anwenhingkerr ra ayernekan wenh! Nga iteth-antey anentyek, alerengkw ngkwenh ingwer apek anentyek. Anwingkerr ikwer arraty-antey ilelhek. Anwingkerr iterl-arey-angenh-antey rarl anwenhingkerr ilanthetyek aytay anwekingkerrenh akngey-alhetyek ikwer-warl.”

<sup>8</sup> Judah aynikw ikwerenhek angkek, “Menty anwenhingkerr tyarlewa! Amern-wenykety angayakw irrekerr. Atha renh arntarnt-aremel akngey-alpem apmer-warl. Menty renh tyarlewa anwingkerr alhetyek. <sup>9</sup> Ingwerel-rnem renh atwentyan, ayen anyentant-anem ntwa ileman, athan renh atwenhehk-penh. Ra ilwentyel, ntwa ayehant-anem iley-antem. <sup>10</sup> Arta rlwethirreyneyel-kety, anwenhingkerr tyarlewa. Anwingkerr anngangelheyel-kety. Alakenh-apenyl apmer ikwerel-anem aney-areny.”

<sup>11</sup> Jacob-el renh-rnem ilek, “Atyetyart ikwer ampwal ilek-ilek akngenherr-arey apmer, nhenn-areny, ngkwarl arwengalker amern-rnem-then ampwal ilek-ilek-rnem-then. <sup>12</sup> Man-then akngenherr-arey, apalearl ingwerentyel yakweth-warl arrernek, antheynenherr-arey, ra anwenhingkerr ayntarrp-ilekerr anyelkel-inenty-arppantey. <sup>13</sup> Benjamin ikngwerl-alhenherr-arey, arringkerr alhemelant-anem. <sup>14</sup> Arringkerr Akngey rlterrk ilkwakert ayernetyek, ra arrenhingkerr arntarnt-aretyek, atyetyartel aytay arrekingkerrenh tyarlewetyek.”

<sup>15</sup> Awayenhang-rnem Egypt-warl anperl-alhek, ampwal ilek-ilek-akert, renh-rnem-akert aytayikw-anem ikwerenhrnem-kenh-then. <sup>16</sup> Joseph-el renh-rnem arnarek Benjamin-akert. Warrkenh ikwerenhrnem ilanthek, “Artwa yanh-rnem apmer aytayh-warl atwenha, aker-anem ikwer-rnem atwemel, anwantherr ingkerrenh aker arlkwetyek.”

<sup>17</sup> Warrkenhel artwernem Joseph-kenh warl-warl atwenhehk. <sup>18</sup> Rernem iterrek, “Man yakweth-itwel aytenthel-antey anwingkerr irrwernek Atyetyart ra apek anwenhingkerr anterkwemel tyayl-warl akwerenem apek, tangkey-anem raken apek.”

<sup>19</sup> Rernem Joseph-kenh apmer-warl alhek artwa warrkenh-warl ilelhey-alhek. <sup>20-21</sup> “Anwingkerr ingwer-inger-antey apmer nhewarl apetyek, man irrkaty renh-antey anwingkerr yakweth-itwek arek, nhenn-anem anwingkerr akngey-alpek Atyetyart renh anthetyek. <sup>22</sup> Man akngerr-akert anwingkerr apetyek ntang payemeleyek. Anwingkerr man ingwer yanh-iterl-arey-angenh-antey, yakweth-itwek aynterl-apen.”

<sup>23</sup> Warrkenh angkek, “Kel mwerr. Akngey arrekantherrenh ra apek arrernek man atyenhan nhenn-anteyar.” Warrkenhel Simeon ikwer-rnem-warl atwenhney-alhek.

<sup>24</sup> Warrkenhel renh-rnem Joseph-kenh warl-warl atwenhehk, kwaty renh-rnem anthemel kwatyal-anem ingkernem lhewelhetyek. Warrkenhel tangkey atherrel wantek, kwatyal-anem anthwengilek. <sup>25</sup> Ampwal rernem Joseph ikwer tywenek, renh anthetyek.

<sup>26</sup> Rernem apmer ikwerenhrnem warl alhek. Ampwal-rnem-anem rernem Joseph renh antek, kwenirremel. <sup>27</sup> Joseph-el renh-rnem ayernek, “Mwerrang arringkerr? Artwa ampwalew arrekingkerrenh? Iteth-antey ra aneyel?”

<sup>28</sup> “Kel, ra mwerr-antey aneyel.” Rernem Joseph ikwer tyernek kwenirremel.

<sup>29</sup> Joseph-el aytayikw ikwerenhrnem akely arek, rap renh-rnem ayernek, “Nhenhang aytay arrekingkerrenh ran? Artwa nhenhang aytay arrekingkerr ran, arringkerr renh atyenhan warl ilenhan.” <sup>30</sup> Ra kwen-warl aylpenhek Benjamin-ek amperrngirremel-anem artney-alpek.

<sup>31</sup> Inngerr lhewelhek-penh, ra ikwer-rnem-warl angkep alpek. Ra warrkenh ikwerenhrnem ilanthek, “Amern-rnem akngetyenhrnem warl artwa yanh-rnem-warl.”

<sup>32</sup> Joseph taypel anyentel anen, ament-areny. Awayikw-rnem taypel ingwerelarl anek. Egypt-areny-rnem taypel ingwer-itwek arrpemarl anen. Rernem arlkarirren Hebrew-rnem-itwek amern arlkwekkerr. <sup>33</sup> Joseph-kenh warrkenh-rnemel awayikw-rneman ilek, rernem akert-arraty arrernalheteyek ingkerneky-they arrwekelenyek-atwety. Awayenhang rernem ywarn iterrek ilekek ra rnkerneynek arraty-angkwarr, ra iterl-arentyel apek. <sup>34</sup> Warrkenh-rnemel amern akngerr renh-rnem anthe. Benjamin renh amern akngerr innga anthe ingwer-rnem-angkwarr, ngkwarl-anem rernem antywemel tyenkerr-anem amern akngerr arlkwemel.

## 44

### *Joseph-el awayikw-rneman arrkerneyel*

<sup>1</sup> Joseph-el warrkenh-rnem ilek, "Yakweth-rnem-warl amern arriwek-atwety arrernerr-arey. <sup>2</sup> Man-anem yakweth ingwer-warl arenherr-arey irrkwa thilp-penh antywey-angker yanhan aytteikw ikweren-hrnem-kenh yakweth-warl arrerna."

<sup>3</sup> Ingwepenh artwernem tangkey-akert alhek. <sup>4-5</sup> Artwernem arrerenty-antey alpenh, Joseph-el warrkenh ikweren ilanthe, "Anterrkwetyek alha. Anterrkwentyelan renh-rnem ayernem, 'Angwenhel irrkwa thilp-penh antywey-angker atyen anyelkel inek irrywerremel? Nhenh ikweren impen inngarl antywey-angker, akaltyiley-angker ikweren, ngangker-apeny. Arringkerr apmwel-areth mpwarek, ampwal atyen anyelkel inerl-alhemel.'

Warrkenhel inngantey renh-rnem arey-alhek angath-antey alperl-anenty. <sup>6</sup> Ra renh-rnem ayernek Joseph-elarl renh ilek-angkwarr. <sup>7</sup> Awayenhang-rnem illelek, "Arrangkwarl anwingkerr, ampwal anyelk iney-angenh yanhan. <sup>8</sup> Anwingkerr man angkep antheynek Canaan-itwek. <sup>9</sup> Arentyelan irrkwa thilp-penh antywey-angker yakweth ingwerenty-kenh-itwek ntwa renh atwemarl. Ingwer-rneman anwingkerr warrkenh-anem ngkweng irrem-anem."

<sup>10</sup> Warrkenhel ilek, "Anyent ingweran atha aletharl anterrkwem, warrk ilkwa anthaynteyek. Ingwer-rnem atha tyarleweman."

<sup>11</sup> Awayenhang-rnem yakweth ikweren-hrnem-kenh ahern-warl arrernek, altywer-ilemel. <sup>12-13</sup> Joseph-kenh warrkenhel yakweth-rnem areynek, arrwekeleny-they ingkerpenhek-atwety. Benjamin-kenh yakweth-itwek ra irrkwa thilp-penh antywey-angker ra renh arek, yakweth Benjamin-kenh-itwek. Awayikw-rnem ikwer amperringirrek. Ampwal-rnem ingkerrenh tangkey-rnem-warl tywenek angkep-antey tawen ikwer-warlanem.

<sup>14</sup> Awayenhang-rnem Joseph-kenh apmer-warl alhek. Rernem Joseph-itwek kwenirrey-alhek. <sup>15</sup> Ra renh-rnem ayernek, "Ilekek arringkerr anyelkel inetyek arrkerneleyel, athan iterl-areyelar!"

<sup>16</sup> Judah angkek, "Ilek-angkwarr angketyek iterl-arey-angen. Akngelyel lwewarnek, anwingkerr apekarl apmwangkwarr mpwarek. Anwingkerr warrkenh ngkwenan anayntem irrkwa thilp-penh antywey-angker anyelkel inek warrkenh inngan ngkweng anayntem."

<sup>17</sup> Joseph-el renh-rnem ilek, "Athan nthakenh arrenhingkerr anterrkwety-angenh. Anyent renh atha anterrkweman irrkwa thilp-penh ra anyelkel-inekant."

<sup>18</sup> Judah alhek Joseph-warl, angkey-alhek, "Ngan Atyetyart ilkwa Pharaoh-apeny. Anwekingkerr ahelirrey-angenh-antey. <sup>19</sup> Ntwa anwenhingkerr ayernek artwamp anwekingkerrenh iteth-antey anentyek ayttey anwekingkerrenh apek anentyek. Anwingkerr ngenh ilek, aynaynwekingkerrenh artwa ampwanemanarl. <sup>20</sup> Artwa ampwantey ra anen Benjamin ra atnyenek-angkwarr. Benjamin-kenh awayikw ilwek-anem. Artwa akely ra anyent impen-antey, ingwerarl ilwek-kety. Aynikw ikwer anyentekant arlkwenteyel."

<sup>21</sup> Ntwa anwenhingkerr ilanthe, 'Artwa akely akngetyay nhenh-warl, atha renh aretyek.' <sup>22</sup> Anwingkerr ngenh ilek, 'Aynaynwekingkerrenh ilwemarl, Benjamin atwentyelan.' <sup>23</sup> Ntwa anwenhingkerr ilek, 'Ayttey arrekingkerrenh arrangkwelan, nthakenh arringkerr atyeng-warl apetyey-angenh.' <sup>24</sup> Anwingkerr apmer-warl alpek artwamp anwekingkerrenh iley-alpek.

<sup>25</sup> Artwampel anwenhingkerr ilanthe, 'Ntang akngerr-antey inerl-alpeteyek, apmer Egypt-itwek.' <sup>26</sup> Anwingkerr nthakenh Egypt-warl angkep alpey-angenh ayttey anwekingkerr-wenyant. Atyetyartel anwenhingkerr irrenteyelantarl ayttey anwekingkerr anwingkerr akngetyey-angenh-they.'

<sup>27</sup> Anewikw anyentel awey-atherr atnyenek rarl ikwer-atherrant ilkelhenh. <sup>28</sup> Anyent ywerrek aleth-antey arey-angenh apey-alpey-angenh. <sup>29</sup> Akngely anwekingkerrenh

iterreyel atnwenth ahelengkwel artwa akely arlkwentyek-athen. Artwampel anwenhingkerr ilek, 'Arringkerr artwa akely atyeng-they akngenty, ayeng ilwemarl-anem.'

<sup>30</sup> Alakenhaym-kety artwamp anwekingkerr-warl anwingkerr artwa akely akngeynem. <sup>31</sup> Artwamp anwekingkerrenh ilweman artwa akely anwekingkerr-angkwarr apey-alpey-angenh-kety. <sup>32</sup> Atha artwamp renh ilek atha artwa akely renh apmer-warl iwerl-alhey-angenh. Atha artwamp renh ilek, 'Atha artwa akely akngey-alpem. Arrangkelan ntwa ayenhan iterl-ara!'

<sup>33</sup> Ayeng nhel anem ngkwegng warkirr-ayntetyek. Artwa akely yanhan alpeman artwamp ikwer ywarn iterrel-anekerr Ayeng nthakhenh alpey-angenh artwa akely iwerl-alhemel apmer nhenh-itwek. <sup>34</sup> Ayeng ilkelhey-angenh akngey atyehn atha aretyek amperrngirrenty artwa akely ikwer."

## 45

### *Joseph-el awayikw-rneman arrkerneyel*

<sup>1</sup> Joseph ra artnenh-anem. Warrkenh ikwerenhr-nem ra ilek, "Aketh-warl tyerrelhenherr-arey!" Awayenheng rernemant-anem aneyelpek. Ra ikwer-rnem-warl ilelhek-anem, "Ayeng Joseph-arl." <sup>2</sup> Joseph artewentyel-anem artnek. Egypt-arenyel renh awek. Rernem ikwer angkerrenh-anem.

<sup>3</sup> Joseph-el atyeyikw ikwerenhr-nem ayernek, "Artwamp ra iteth-antey aneyel?" Rernem renh tyerney-angenh akatemel anek aterirremel.

<sup>4</sup> Joseph angkek, "Arrer-apeny apetyenherr-arey!" Rernem ikwer-warl arrer-anem alhek. Joseph ilelhek ikwer-rnem, "Ayeng atyey arrekingkerrenh. Awank-akerr arringkerr ayenhan tharlemilek Egypt-areny-rnem-warl. <sup>5</sup> Atyeng iterrey-angenh ayengarl arleng-alenty ywerrekek. Akngeyel ayenhan arrwekel ilanthek, ingwer-rnem itethilerl-apaynetyek. <sup>6</sup> Aherrety atherrel kwaty rntwey-angenh. Aherrety 5-pelek artwerrety arrpemarl, kwaty rntwey-angenh arrangkw arrpemarl. Nthakhenh ingwerentyl amern rnerney-angenh arrangkw, akwetyey-angenh arrangkw. <sup>7</sup> Akngeyel ayenhan arrwekel thwenek, arrenhantherr atha arntarnt-aretyek, amern-wenyl arrantherr ingkerrenh ilwekerr.

<sup>8</sup> Arringkerr ayenhan ikngwey-angenh apmer nhenh-warl. Akngeyelarl ayenhan thwenek, apmer Egypt-warl. Ra ayenhan Atyetyart arrernek, Pharaoh-kenhek-rnem, ayeng Atetyart anetyek apmer Egypt-itwel. <sup>9</sup> Arringkerr anamerl alpenherr-arey akngey-warl iley-alpetyek, Akngeyel ayenhan arrernek, Egypt-areny ingkerrenhek, atyetyart anetyek. Anamerl-antey akngey akngeynetyek. Akngey atyehn arringkerr iley-alpetyek. <sup>10</sup> Apmer Goshen-itwek arrer-antey atyeng-itwek anetyek! Alerengkw-rnem-then, arreng ngkwenh-rnem-then artartey ngkwenh-rnem-then aypmenh ngkwenh-rnem-then atnwenth ngkwenh-rnem-then ampwal-rnem-then ingkerrenh-antey. <sup>11</sup> Atha arrenhantherr arntarnt-arem apmer Goshen-itwek aherrety 5-pelek-attwety. Canaan-itwek arringkerr anentyan atnwenth-rnem-akert arrantherr ilwemarl amern-wenyl.

<sup>12</sup> Benjamin-akerr arringkerr iterl-areyel, wetharl ayeng arrekingkerr ilelhek, ayeng Joseph inngarl. <sup>13</sup> Akngey atyehn arringkerr iley-alpenherr-arey, ra ayenhan iterl-aretyek arrpemarl, ayeng Atyetyart ilkwa Egypt-itwek aneyel. Arringkerr anamerl atyeng-warl akngetyenherr-arey."

<sup>14</sup> Joseph-then Benjamin-then ratherr artnemel atnyenerrek. <sup>15</sup> Joseph-el awayikw-rnem arrwanteyeynek, anyentarl-anyentarl, ikwerenhr-nem-itwek artnek-anem. Ikwerenhan rernem angkanem angkerrenh.

<sup>16</sup> Pharaoh-el awek Joseph-kenh awayikw-rnem apetyek. Ra ikwer-rnem inkwerelhek, atyetyart ingwer-rnem inkwerelhek arrpemarl. <sup>17</sup> Pharaoh-el Joseph renh ilek, "Awayengkw-rnem ila, rernem ampwal-rnem tangkey-rnem-warl tywenetyek, rernem apmer Canaan-warl alpetyek. <sup>18</sup> Ila renh-rnem, rernem aynaynwekingkerr-then ikngwerl-alpetyek apmer nhenh-warl, ikwerenhr-nem ingkerrenh. Apmer mwerr atha renh-rnem anthetyek Egypt-itwek, amern-angketyarr-itwek.

<sup>19</sup> Egypt-areny pakey-rnem akngeyenhr-arey ampernem-then anew arrekingkerrenh-rnem-then inerl-alpetyek. Artwamp ikwerenhr-nem-kenh-then akngetyetyek apmer ikwer-warl. <sup>20</sup> Ampwal ingwer-rneman mentyarl iwerlelpey ampwal ilek-ilek Egypt-arenyel anthem-kety."

<sup>21</sup> Jacob-kenh alerikw-rnem awelhek Atyetyart ikwer. Joseph-el pakey-rnem renh-rnem anthek, amern-rnem-then, rernem apmer Canaan ikwer-warl akngeynetyek, atyetyartarl ilanthek-angkwarr. <sup>22</sup> Joseph-el awayikw-rnem arnkwa mwerr-rnem amentew-ament anthek. Benjamin arnkwa 5-pel anthek thilp man akngerr-then. <sup>23</sup> 10 tangkey ra thwenek ampwal Egypt-areny ilek-ilek-akert, aynikw ikwerenhek. Tangkey

10-pel ingwer-rneman amern ilek-ilek-akert, alethek-arelh. <sup>24</sup> Joseph-el renh-rnem ilek, "Ampep-itwek ahel ilterrey-angenh! Mwarrant-arey arringkerr alpenherr-arey Canaan-warl."

<sup>25</sup> Rernem ayerrer Egypt-they alpek, aynikw ikweren-h-rnem-kenh-warl, apmer Canaan-warl. <sup>26</sup> Rernem ikwer iley-alpek, "Joseph iteth-antey, anwingkerr arerl-alpek Egypt-itwek, atyeyart renh arrernek apmer ikwer-itwek ra anayntetyek." Artwamp ra iyelpelant renh-rnem awek, irrtwyerremel ilerl-anenty-arrpantey. <sup>27</sup> Rernem artwamp renh ilek ingkerrenh-angkwarr Joseph-elarl renh-rnem ilek-angkwarr-antey. Artwamp ra iterl-anem-arek, rarl pakey arekel. <sup>28</sup> Rernem renh ilek, "Arringkerr atyeng arraty ileyel wenh, rarl iteth aneyel. Kel atha renh aretyek, ayeng ilwey-alentyel."

## 46

### *Jacob alheyel Egypt-warl ikweren-h-rnem-akert*

<sup>1</sup> Jacob Canaan-they anperl-alhek atnwenth-rnem-akert ampwal-rnem-akert-then. Tawen Beersheba ikwer-itwek, ra tyenkerr anthek Akngeyek, renharl Isaac-el Akngeyek anthek-apeny.

<sup>2</sup> Ingwa ikwerel-antey ra altyerr-anem arek, INGKARTarl ikwer-warl arlek, "Jacob-ay, Jacob-ay."

"Ilekekay?" Jacob angkek.

<sup>3</sup> Akngey angkek, "Ayeng Akngey irrikaty-antey akngey ngkwenharl atyeng awelhekarl. Aterirrey-angenh alha Egypt-warl. Alerengkw-rnem atha akngerrileyenh, alerengkw-rnem akngerr aneyenh, apmer ilenhel. <sup>4</sup> Ayeng ngkweng-angkwarr alheyel arrpemarl Egypt-warl. Ngkwenh-rnem atha akngey-alpeyenh apmer nhenh-warl. Alerengkw ngkwenh Joseph ngkweng-itwek aneyenh ilwetyek-atwety." <sup>5-7</sup> Jacob ikweren-h-rnem-akert Beersheba-they anperl-alhek. Rernem artwamp renh tywenek pakey-warl, Pharaoh-elarl pakey ikwer thwenek. Pakey ingwer-rnem-warlant anewikw-rnem alerikw-rnem rernem tywenek. Ingkerrenh-antey rernem alpek Egypt-warl, alerikw ikweren-h-rnem-then arrengay ikweren-h-rnem-then artarteyikw ikweren-h-rnem-then. Atnwenth-rnem rernem akngeynek, ampwal-rnem-then. ...

<sup>26</sup> Akngerr innaganem, 66-pel-anem ikweren-h-rnem rernem anperl-alhek, apmer Egypt-warl. Anew ikweren-h-rnem-kenh akngerr arrpemarl. <sup>27</sup> Jacob-kenh arrengeyikw atherr Egypt-ekarl atnyenek-atherr, ratherr Egypt-itwel anenh. Artwamp ikweren-h-rnem 70-pel ikweren-h-rnem anekan ra artwamp-anemarl.

<sup>28</sup> Jacob-el Judah arrwekel thwenek Joseph ayernetyek, ra Goshen-itwel rlwatetyek. <sup>29</sup> Joseph pakey-warl nganey-alhek artwamp ikweren-h rlwatetyek. Ratherr rlwatirrek. Joseph-el artwamp renh atnyenek, rarl ikwer amperrngirrekel.

<sup>30</sup> Jacob-el Joseph renh ilek, inkwerelhemel-anem, "Kel ayeng ilwetyek arrer-anem. Atharl ngenh kel iteth-antey arek-penh ayeng alhewer-anemarl ilwetyek. Arwa alhewer ayeng ilwetyek atharl ngenh arek-penh, iteth-antey." ...

## 49

### *Jacob ilweyel*

<sup>1</sup> Jacob-el alerikw-rnem akarrilek, anyent-warl ilemel, "Anyentirrenherr-arey ingker-renh, atha arrekantherr ileyek nthakenharl irreyenh, arrantherr iterl-aretyek-awaty."

... <sup>10</sup> Jacob-el Judah renh ilek, "Ingkerrenh ngkweng awelh-ayntem nga atyetyart ikweren-h-nem anayntem." ...

<sup>29-30</sup> ... Jacob-el alerikw ingwer-rnem ilek, "Arrer-anem ayeng ilwetyekan. Irrkaty ikwer-warl arringkerr ayenh akwernetyek, Abraham rarl payemelek Hitt-kenh-rnem-itwek, akngey atyen-h-itwek-antey. Intey ra akngerrakw-ampeny, apmer Canaan-itwek. <sup>31</sup> Abraham anew ikweren-h-then-antey intey ikwer arrpemarl akwernek, Isaac-then anew ikweren-h Rebekah-then ikwer-antey arrpemarl akwernek. Leah kel-antey atha akwernek arrpemarl. <sup>32</sup> Apmer renhan Hitt-kenh-rnem-itwek payemelekarl intey-akert arrewaly-rnem akwern-ayntetyek."

<sup>33</sup> Alerikw ikwerenharl ra ilanthek-penh, ra panty-itwek aynterl-arrernek. Ikwer-theyan, ra ilwek-anem, panty ikwerel-antey.

## 50

### *Jacob-kenh alerikw-rnemel renh awenng-warl akwerneyel*

<sup>1</sup> Joseph ra artnek-anem aynikw-anem atnyenek, arrwantyek. <sup>2</sup> Egypt-areny akalty ingkerrenh anek, arrewaly anterel apernetyek. Rernem aralta 40-ek-atwety alakenh-anyem mpwarek. <sup>3</sup> Rernem atnalhelerrenh aralta 70-ek-atwety artwamp ikweran. Joseph-el artwa ilanthek arrewaly renh anterel apernetyek rag-el ataperrelemel.

<sup>4</sup> Rernemarl amperrngirrek-penh, Joseph Egypt-areny Atyetyart-rnem-warl angkek, "Arrantherr apek atyeng inkwerelhentyan, arrantherr Pharaoh renh ayernenherr-arey. <sup>5</sup> Akngey atyehn ilweyew-athath, atha renh alhelek, intey apmer Canaan-itwek renh akwernetyek."

<sup>6</sup> Pharaoh-el renh ilek, "Akngay ngkwenh akwerna, ntwarl renh ilek-angkwarr-antey akwernetyek." ...

<sup>12</sup> ... Jacob-kenh alerikw-rnemel irrkaty-angkwarr mpwarek, rarl renh-rnem ilek-angkwarr-antey. <sup>13</sup> Apmer irrkaty Machpelah intey ikwer-itwek-antey Abraham-el Ephron, Hitt-kenh payemelek-itwek, renh akwernek. <sup>14</sup> Rernemarl atnalhelirrek-penh awayenheng rernem Egypt-warl-anem alpek.

#### *Joseph-el awayikw ikwerenh-rnem illeyel*

<sup>15</sup> Aynikw ikwerenh-rnem-kenh ilwek-penhan rernem angkerrenh, "Joseph anwekingkerr ahelirekerr wenh, ra anwenhingkerr atwekerr." <sup>16</sup> Rernem thwenek artwa angkakert Joseph ikwer-warl. Ra iley-alhek, "Aynaynwekingkerr ilwey-alentyel, wetharl anwekingkerr ilerlelpek, <sup>17</sup> 'Arringkerr Joseph ayernetyek, mwarrant-arey arringkerr anetyek, arringkerrarl apmwel-areth ikwer anen.' " Ra angka awek-penh, Joseph artnek-anem.

<sup>18</sup> Awayikw ikwerenh-rnem ikwer-warl apetyek, angkey-alhemel, "Anwingkerr ngk-wenh warrkenh-anemarl."

<sup>19</sup> Joseph-el renh-rnem ilek, "Aterirrey-angenh. Ayengan Akngay-wenyarl. <sup>20</sup> Arringkerr atyeng ilkelhey-angenh irrek Egypt-areny-rnem ayenh anthemel. Akngayel ayenh arntarnt-arekarl. Atyeng-angkwarran Akngayel ikwerenh-rnem arntarnt-arek, itethilek. <sup>21</sup> Alakenh-anyem-kety arringkerr aterirrey-angenh anetyek. Atharl arrenhingkerr arntarnt-arem, aler arrekingkeren-hrnem-then. Ikwer-penhan rernem mwarrant-arey-anem anen."

#### *Joseph ilweyel*

<sup>22</sup> Joseph apmer Egypt ikwer-itwek anen, awayikw-rnem-akert. Joseph aherrety 110 anen, artwa ampanem. <sup>23</sup> Ra Ephraim-kenh arreng-rnem arek, Manasseh-kenh alerikw Makir.

<sup>24</sup> Joseph ra awayikw ikwerenh-rnem illehok, "Arrer-anem ayeng ilwetyek-anem. Akngayel anwenhingkerr arntarnt-arem, apmer rarl Abraham ingkerrenh alhelek ikwer-warl, Abraham-ek, Isaac-ek, Jacob-ek." <sup>25</sup> Rap renh-rnem ilek, "Arringkerr arraty ayenh ileytek. Ayeng ilwenty, arrewaly ayenh aknga Akngayel arrenhingkerr atnwenheyneyel apmer Canaan ikwer-warl, ikwer-itwek akwernetyek." Kel rernem renh arraty ilek.

<sup>26</sup> Joseph aherrety 110 irrekel-anem, ra ilwek. Rernem arrewaly anterel-anem apernek, rag-el ataperrelemel, coffin-warl arrernemel.

## Exodus

*Israel-kenh-rnem akngerrirreyel Egypt-itwek*

<sup>1-5</sup> Awank-akerr artwamp anyent anenh, itnan ikweren Jacob, itnan ingweran ikweren Israel. Jacob-kenh alerikw anyent itnan Joseph, kel Egypt-itwek anenh arrwekel. Artwamp ra alerikw ikweren-rnem atnwenhek, anewikw ikwer-rnem-kenh-then, arrengay-rnem-then artartey-rnem-then ingkerrenh-antey Egypt-warl-anem, 70-pel. Alerikw ikweren-rnem, Reuben, Simeon, Levi, Judah, Issachar, Zebulun, Benjamin, Dan, Naphtali, Gad, Asher.

<sup>6</sup> Ingwer-inger Joseph-then awayikw ikweren-rnem-then ilwenherrek apmer Egypt-itwek. <sup>7</sup> Israel-kenhel-rnem alerikw akngerr atnyenek. Israel-kenh-rnem akngerram-akngerrirrek Egypt-ampeny-itwel.

*Egypt-areny-rnem      Israel-kenh-rnem-kety      arlkarirreyel,      rernem      renh-rnem  
irrwampenh-antheyel*

<sup>8</sup> Atyetyart ingwer Egypt-areny ingkern-they arrernek, rernem renh Pharaoh itnewek. Ra akwerrp anenh, angka Joseph-kenh iterl-arey-angenh, Joseph ra arrwelarl anenh. <sup>9</sup> Ingwer-ingeran Pharaoh ikweren-rnemek apatemel angkek, "Nhak arenherr-arey, Israel-kenh-rnem! Akngerr innganem irrek! Nthakenh anwantherr irrem? <sup>10</sup> Ahelengkw apmer ingwer-areny-rnem apetyenty, anwenhantherr atwekkerr. Israel-kenhel-rnem apek yanh-rnem alpemilekerr, ingkerrenhel-antey anwenhantherr atwekkerr! Israel-kenh-rnem apmer ingwer-warl anterrerrekerr, warrk-kety ipmelhekerr!"

<sup>11</sup> Pharaoh-el atyetyart ampep-rnem rnkernek, rernem Israel-kenh-rnem irrwampenh-anthek, rernemaw artewentyel warrkirretyek. Atyetyart ampep-rnem ahelengkw inngarl, whip-el renh-rnem atwenh. Tawen ilkwa atherr Israel-kenhel-rnem artek, itnan ikwer-atherrenh Pithom Rameses-then. Egypt-arenyel-rnem akarrilek amern akngerr ingkerrenh-antey, amern akwernek warl ilkwerenem-warl. <sup>12</sup> Atyetyart ampep-rnem rernem Israel-kenh-rnem atwenh intem-antey, Israel-kenhel-rnem ampa atnyenek akngerrall. Rernem arlpimpirek apmer ingwer-rnem-warl. Egypt-areny-rnem aterirek Israel-kenh-rnem akngerrirrekarl-kety. <sup>13</sup> Egypt-areny-rnemel irrwampenh-anthek Israel-kenh-rnem, rernem artewentyel warrkirretyek alhengkerirrek-atwety. <sup>14</sup> Egypt-arenyel-rnem irrwampenh-anthek renh-rnem, rernem warl-rnem artetyek, apwert bricks mpwaremel. Rernem ahern angernek arrpemarl, amern weyt rkernetyek lyapelhityek. Egypt-areny-rnem amperrngirrey-angenharl ikwer-rnem.

<sup>15</sup> Theth atherr anenh Egypt-itwel, Israel-kenh-atherr. Itnan ikwer-atherrenh Shiphrah-then Puah-then. Ratherr arelh Israel-kenh-rnem arntarnt-arenh, ampa atnyenetyek ilenh. Ingwer-inger Pharaoh-el ilanthek Shiphrah Puah-then renh-atherr, <sup>16</sup> "Mpwelanth arelh Israel-kenh-itwel arntarnt-aremel anerl-ayntenherr-atherr. Avey apek atnyenentyan, atwemelarl ipmek-antey! Kwey apek atnyenenty, atwety-angenharl mentyarl." <sup>17</sup> Theth atherrel Akngeyekant awelhenh, Pharaoh-ek awelhey-angenharl. Avey-rneman ratherr atwety-angenharl, menty anetyekarl. <sup>18</sup> Pharaoh-el warrkenh anyent thwenek, theth renh-atherr ikngwerl-alpetyek. Ra angkek ikwer-atherr-anem, "Kel atha ilek, avey yanh-rnem atwetyek! Mpwelanthan atyeng awelhey-angenharl! Mpwelanth avey-rnem iteth atnyeneneh wenh!"

<sup>19</sup> Theth atherrel tyernek, "Arelh Israel-kenh-rnem rlterrkarl, arelh Egypt-areny-rnem rlterrkarl-wenyarl. Arelh Israel-kenhel-rnem ampa atnyeney-angker arntety-weny, aylanth nthakenh avey-rnem atwety-angenh. Amey-rnemel kel-antey renh-rnem akngeng." <sup>20-21</sup> Theth atherr inngarl Akngeyek awelhenh. Akngeyel renh-atherr arntarnt-arenh, ampa akngerr antek ikwer-atherr. Akngeyel ampa Israel-kenh-rnem akngerram-akngerrilek.

<sup>22</sup> Ingwer-inger Pharaoh-el Egypt-areny-rnem ilanthek, "Arelh Israel-kenh-rnemel avey atnyenenty, kwaty lher Nile-warl iwemarl. Kwey-rnem mentyarl, avey-rnemant iwemarl, rernem ilwetyek kwaty kwenel!"

## 2

*Moses irrkngarl ayttek Egypt-itwek*

<sup>1</sup> Artwa anyent Israel-kenh anenh, ranap Levi-kenharl. Artwa ra kwey aleyak anewartirrek. Arelh ra Levi-kenh arrpemarl. <sup>2</sup> Ingwer-inger arelh ampakert-anem irrek, rap avey akely atnyenek-anem. Arelh ra arek, avey mwerr-angker inngarl.

Ra warlek irryertel akwernek, Egypt-areny-rnemel aremel atwekerr.<sup>3</sup> Alkent irrpety-penh amikwan ywarn iterrenh alakenh, "Nthakenh atha awey akely warlek intem-antey irryert akwerney-angenh!" Rap rtnwa akely renh arnwarnek, ankerel apernek alyelkilemel, kwatyarl nthakenh aylpey-angenh. Ra awey akely inemel, rtnwek athenek, kwaty lher Nile-warl akngek, antywer arlpenty apenng-warl kwaty-warl. Rtnwa ampa akelyenp renh arrernek kwaty-warl, apenng-angketyarr-warl.<sup>4</sup> Angkwerelikw renh apentek aytiek, amikwel kwaty-warl arrerneyek. Angkwerelikw arek, kwatyek ra rnkernek, iterrek-anem, "Mwerr apek awey yanhey?" Ra arleng-they rtnwa ampa akelyenp arntarnt-arenh.

<sup>5</sup> Ikwer-penh Pharaoh-kenh alerikw aleyak ilkwa ra alhek kwaty lher-warl, pwerpir-retyek. Kwaty lher impalheli ra alhenh apenng-angketyarrel, arelh warrkenh akngerrel renh apenten. Ra alhenh, rap rtnwa renh arek kwaty-itwek apenng-angketyarr-itwek. Arelh warrkenh anyent ra ilek, "Nhak alhay inetyek!"<sup>6</sup> Kel ra inerl-alpek kwey aleyak ikwer-warl. Kel ra altywerilek, awey akely-anem ra arek. Avey akely artnek-anem. Kwey aleyak ra amperngirrekarl ikwer. Ra alhengk-arek, rap warrkenh anyent ilek-anem, "Ay! Ampa akely nhan Israel-kenharl!"

<sup>7</sup> Angkwerikwan apetyek ayernemel, "Ay! Mwerrang ayeng alhem apek, arelh Israel-kenh ikngwetyek, ampa akely nhenh aylpatyel anthwengileyek?"

<sup>8</sup> Kwey aleyak angkek, "Ya! Kel mwerraw! Kel anamerl alhay ikngwetyek!" Angkwerikw alhek, amikw ikweren hikngwetyek. Kel-anem ra ikngwerl-alpek amikw ikweren hikngwetyek. <sup>9</sup> Kwey aleyak amikw awey-kenhek ilek, "Ampa nhenh aknga, aylpatyel anthwengileyek. Ampa arntarnt-arerl-aynta, atha ngenh man anthey-kenh." Kel amikw ikweren hikngwetyek. Ra itnewek-anem renh Moses, alakenh anayntileyel, "Atharl weth inek kwaty-itwek."

<sup>10</sup> Ikwer-penh ampa ra alkenhirrek, arlkwenty-iperr-anem. Amikw ikweren hikngwetyek. Ra itnewek-anem renh Moses, alakenh anayntileyel, "Atharl weth inek kwaty-itwek."

#### *Moses Egypt-they apmer Midian-warl irryert-anterreyel*

<sup>11</sup> Moses ilkwerek, artwanem ra. Ingwer-inger ra alhek Israel-kenh warrkenh-rnem-warl, ikweren-hikngwetyek. Ra arek, rernemarl artewentyel warrkirrek. Egypt-areny anyent ra arek, rarl whip-artwa Israel-kenh atwek arnterr.<sup>12</sup> Moses ra artepang arelh, ingwerentel arekerr. Arrangkw. Ra iterrek, "Anyentaw ayeng, atha atwetyek!" Ahelengkw renh-anem atwek Moses-el, ipmek-antey ra atwek, arrewaly renh irrkewarl akwerneyek. Rap alpek-anem apmer-warl.

<sup>13</sup> Ingwepenh Moses alhek angkep irrikaty-warl Israel-kenh warrkenh-rnem-warl. Artwa Israel-kenh-atherr ra arek, ilterrenh. Artwa anyentel ra atwek artwa anyent ingwer. Moses-el renh iltek, "Ay! Ilekekarl ntwa artwa yanhan atwek? Apmer anyent-areny-atherran innganem atterreyell!"

<sup>14-15</sup> Artwa ra tyernek, "Nganang atyetyartari? Angwenhel-anem ngenh arrernek, nga atyetyart anwekantherr anetyek, anwenhantherr ilayntetyek? Ayen-anem ntwa atwetyek, wetharl ntwa atwek-apeny apmwerrkel?"

Atwekarl-kety Moses aterirrek. Ra iterrek, "Ilekay? Nthakenhay? Akngerrel ayenl iterl-areyelarl, atharl atwek wenh!"

Moses-arl aterel anterrek apmer arleng-warl, apmer Midian-warl. Pharaoh-el awek-penh ra iltyemwerney-rnem ilanthek, Moses atwetyek. Iltyemwerney rernem alhek, ywarn-antey ikwer nthwenh.

Midian-ampeny-itwek Moses aney-alhek kwaty ngentyel.<sup>16</sup> Apmer Midian ikwerel anhen artwa anyent, itnan Jethro. INGKART-areny atyetyartarlap ran, alerikw 7-pel aleyak-rnem-akert. Kwey aleyak-rnem yep-yep-rnemek arrwekel alhenh, kwaty ngenty-warl anthwengileyek.<sup>17</sup> Artwa ingwer-rnem apetyek, arrngelekarl ikwer-rnem-kety, kwey aleyak-rnemel kwaty inpekkerr terap-warl yep-yep-rnemek. Kwey aleyak-rnem nthakenh kwaty-warl arrererrey-angenh. Moses-el arek, artwa rernemarl kwey aleyak-rnem aywepekk. Moses ranem artwa renh-rnem aywepekk. Moses-el-anem kwaty thelek terap-warl yep-yep-rnemek.<sup>18</sup> Kwey aleyak-rnem alperlewuk akngey ikwer-rnem-kenh-warl Jethro-warl. Ra ayernek-anem, "Ay! Ilekekarl arringkerr iparrpaw apey-alpek? Ingkeny akenhel-anteyaw! Ayengan iterrek, kwaty arringkerr thelerl-anentyek-athen alerl. Arringkerr iparrpaw apey-alpek!"

<sup>19</sup> Kwey aleyak-rnem renh tyernek, "Artwa ingwer-rnem arrngert angkekarl, kwaty yep-yep anwantherr anthwengilekerr. Artwa Egypt-arenyel aywepekk renh-rnem, kwaty yep-yep anthwengileyek."

<sup>20</sup> Jethro-el ayernek, "Nthenharl artwa ran? Ilekarl arringkerr iwerl-alhekan artwa renhan? Kel artwa renh ikngwetyek alhenherr-arey. Ra apetyetyek, amern arlkwetyek." Kel rernem ikngwerl-alpek Moses renh.

<sup>21</sup> Moses apetyek, Midian-ampeny-itwek ikwer-rnem-itwek ra anenh-anem alethantey. Jethro-el aler kwey aleyak anyentarl ikwer anthek. Moses-an aleyakarl ikwer arlwenthirrek-anem, itnan ikweren Zipporah.

<sup>22</sup> Ingwer-inger Zipporah-el atnyenek awey akely. Moses-el renh itnewek Gershom, alaken anayntileyl, "Ayengan apmer ingwer-arenyarl, alethangarl. Alakenharl awey renh itnewek Gershom."

<sup>23</sup> Ingwer-ingeran Pharaoh weth Egypt-areny ilwek-anem. Egypt-arenyel-rnem irrwampenh-anthenh-antey Israel-kenh-rnem, iparrp warrkirretyek. Intem-antey atwemel warrkemilemel. Israel-kenh-rnem arlek, "Akngeyay! Anwenhantherr arntarnt-araw Egypt-areny-rnem-kety!" <sup>24</sup> Akngeyel renh-rnem awek, ranem iterrek renh-rnem arntarnt-aryntetyek iylpelirrey-angenh, rarl arrwekeleny-rnem arrwekel alhelek-angkwarr, Abraham-then Isaac-then Jacob-then, ingkern-penh-rnem arntarnt-aryntetyek. <sup>25</sup> Akngeyel Israel-kenh-rnem arek-penh, rap ikwer-rnem amperrngirrek.

### 3

*Akngeyel Moses ileyl, "Israel-kenh-rnem Egypt-they atnwenheyneytetyek"*

<sup>1</sup> Moses-el arntarnt-arenh yep-yep-rnem Jethro-kenh, malyej ikweren-h-kenh. Jethro ranap apmer Midian-areny atyetyart Akngey-kenh tyatyaml anenh. Ingwer-ingeran Moses yerlirek-anem, yep-yepel-rnem renh apentyetyek nanikwet-rnem-then arlpaw intwar-ampeny-warl altwerl. Ra alhek apwert ilkwewarl. Apwert ilkwa Akngey-kenh itnan Sinai. <sup>2</sup> Akngey-kenh itna INGKARTarl. Ingwer-inger ra thwenek antyerl Moses-warl. Antyerl INGKART-kenh ikwer aremirrek arwerl apwen-itwel. Arwerl apwen ampek-anem rwa lherrm. Moses-el rwa renh arek, ampekarl lherrm. Alperr ampey-angnenharlap ran, rwa lherrm arwarl! <sup>3</sup> Moses iterrek, "Ay! Ilekarl nhan? Alperran atherrik-anteyarl ampey-angnenharl! Arrer-warl alhey, atha aretyek."

<sup>4</sup> Arwerl apwen ampeyel-they INGKARTel arek, Moses-arl apetyek. Ra arlek, "Moses-ay!"

Moses-el tyernek, "Nhanter ayengaw!"

<sup>5</sup> Akngey angkek, "Arleng-ampeny rtnay! Pwetan iylwarl. Ahern nhnenhan aknganentyar! <sup>6</sup> Ayengan Akngey rey-antey arrpemarl, arrwekeleny ngkwenh-rnemek Abraham-ek-artwey-then, Isaac-ek-artwey-then, Jacob-ek-artwey-then. Rernem ayen apentyeyel." Moses Akngey-kety aterirrek. Ranap inngerrarl artelhek, Akngeyel renh arekerr.

<sup>7</sup> INGKART angkek Moses-ek, "Atha areyel-anem, Egypt-areny-rnemel Israel-kenh-rnem atyeh-rnem irrwampenh-anthenty atwemel. Atha aweyel, rernem atyengarl arlekkeyel, arka kwarnehlhentyan. Ayeng ampeyngirretyel-anem. <sup>8</sup> Ikwer-penh ayeng apetyek, Israel-kenh-rnem atnwenheyneytetyek Egypt-they. Ayeng apetyek atnwenheyneytetyek apmer mwerr-angker-warl, amern-angketyarr-warl, apmer atherrikeny-warl. Aleyan ingwer-rnem areyel-antey apmer ikwer-itwel, Canaan-areny-rnem, Hitt-kenh-rnem-akerr, Amor-areny-rnem-akerr, Perizz-areny-rnem-akerr, Hiv-areny-rnem-akerr, Jebus-areny-rnem-akerr. <sup>9</sup> Ya, atha aweyel, Israel-kenh-rnem arlekkeyarl. Atha iterlareyel, Egypt-areny-rnemelarl renh-rnem irrwampenh-anthemel atwennh. <sup>10</sup> Alakenh atha ngenh thwenem Pharaoh-warl, ntwa renh alakenh iletyek, 'Atha atnwenheyneytetyek Israel-kenh-rnem Egypt-they apmer ingwer-warl.' Kel iparrp alhay!"

<sup>11</sup> Moses apatemel ilelhek Akngeyek, "Ayengan arrangkwarl, mwerr-wenyarl. Artwa apmwamwaim ayengan, atyetyart-weny. Atyetyart Pharaoh atyetyart awelhey-angnenharl. Nthakenh atha Israel-kenh-rnem Egypt-they atnwenheyney-angenh!"

<sup>12</sup> Akngeyel Moses ilek, "Ayeng alhey ngkweng-angkwarr Pharaoh-warl ilkwatherr. Ntwa atyeh-rnem Egypt-they atnwenhenty, renh-rnem ntwa atnwenhey-alketyek apwert nhnenh-warl. Arranther ayen awetyek apwertek, atyeng aker tyenkerr arrtyetyek, atyeng arraty inkwerelhetyek. Ntwa ayen iterl-aryntetyek innga, atharln genh ileyel-angkwarr."

<sup>13</sup> Moses-el Akngey ayernek-anem, "Ayeng ikwer-rnem-warl alhenty, alakenh ayeng angkety, 'Akngey rey-anteyarl ayen angkakert thwenek arrekantherr-warl, Akngey weth arrwekeleny-rnemel awank-akerr apentenh.' Rernem irrpelthirremel ayernekerr, 'Angwenhel ngenh thwenek? Ilek-apenyarl ran wenh, itnan ilekarl ra?' Nthakenh atha iley-alhem?"

<sup>14</sup> Akngey itnewelhek-anem, "Itnan ayeng Yaway, alakenh anayntileyl, 'AYENGARLAP ALETHARL ANEYEL'. Ntwa Israel-kenh-rnem ila, 'Yanhey-antey, rarl ayen thwenek.'"

<sup>15</sup> Akngey Moses-ek angkek arrpemarl, “Ntwa Israel-kenh-rnemek angka atyenh ila.” Ikwer-penh Moses Israel-kenh-rnem-warl iley-alhek, “Akngayarl rey-antey arrpemarl, arrwekeleny-rnemel arrwel renh apentek, Abraham-then Isaac-then Jacob-then. Rey-antey ayenh thwenek arrekantherr-warl. INGKARTarl itnan ikweren hwenh intem-antey. Nhepenh-anyem arrantherr renh INGKARTarl itnewem, aler arrekantherrenh-rnem-then arrengay-rnem-then artartey-rnem-then.”

<sup>16-18</sup> Akngey Moses-warl angkek arrpemarl, “Artwamp weth-rnem Israel-kenh-rnem ntwa ikngwerl-alpa, angka atyenh illem. Rernem arternp ngkweng awelhetyek.” Kel Moses-el artwamp-rnem ikngwerl-alpek illem, “Akngay rey-antey arrpemarl, arrwekeleny-rnemel arrwel renh apentek, Abraham-then Isaac-then Jacob-then. Itnan ikweren INGKARTarl. Rey-antey atyeng iylparrernelhek, angkemel, ‘Atha arek, Egypt-areny-rnemel arrenhantherr irrwampenh-anthenh atwerl-anemel. Atha alakenh alhelek, atha Egypt-they arrenhantherrenh atnwenehey-alpetyek atwelyarl-kety. Atha atnwenehey-alpetyek apmer mwerr-warl amern-angketyarr-warl. Aley-anem artwa ingwer-rnem nhak anyeyel, Canaan-areny-rnem, Hitt-kenh-rnem-akerr, Amor-areny-rnem-akerr, Perizz-areny-rnem-akerr, Hiv-areny-rnem-akerr, Jebus-areny-rnem-akerr. Arrekantherr atha anthetyek apmer renh.’”

Arranther Pharaoh-warl alhenherr-arey. Ilenherr-arey ikwer alakenh, ‘Anwanther Israel-kenh-rnem Akngey anwekantherrenh apenteyel-rnem. Itnan ikweren INGKARTarl. Ra iylparrernelhek anwekantherr-warl. Anwanther arlpaw-warl alhetyek irrpety-ingerek-awety, aker tyenkerr arrtyemel anthetyek INGKARTek. Akngey anwekanther-renhek, ikwer inkwerelhemel. Mwerrang anwanther alhem werh?’ Alakenh ntwa artwampel-rnem-then ilenherr-arey Pharaoh-ek.<sup>19</sup> Pharaoh weth, ra ngkweng awelhey-angenharl arrangkwarl. Atha renh arawerrng rlterrk atwenty-pendant, ra ngkweng awelhetyek, arrenhantherr tyarlewetyek.<sup>20</sup> Atha Egypt-areny-rnem arawerrng ilkwick-ertel atwelyen akngerr-inger. Rernem atyengety aterirreyen. Ikwer-penant Pharaoh-el arrenhantherr tyarleweyen.<sup>21</sup> Yew, Egypt-areny-rnem aterirreyen ngkwengety Israel-kenh-rnem-kety-then. Arranther alperlewentu Egypt-they, Egypt-areny-rnemel ilek-ilek akngerr anthem arrekantherr.<sup>22</sup> Arranther alperlewentu, arelh Israel-kenh-rnem anrem ayernetyek arelh Egypt-areny-rnem arnkwerenemek, nikelethek, ilytek-arelh, ampwal ingkerrenhek gold-penh thilp-penh. Arelh-rnem Egypt-areny-rnemel anthetyek ilek-ilek. Arranther antheyen arrpemarl ampernem arrekantherrenhek. Alakenh Israel-kenh-rnem ilek-ilek akngerr ineyen Egypt-areny-rnem-they.’’ Alakenh angkek Akngey Moses-ek.

## 4

### *INGKARTel Moses rlterrkileyl*

<sup>1</sup> Moses angkek Akngayek, “Israel-kenh-rnem irrpeltherrekerr, atyeng awelhey-angenharl. Rernem atyeng angkekerr alakenh, ‘INGKART ngkweng aremirrey-angen-antey!’”

<sup>2</sup> INGKART-el ayernek Moses, “Ilekarl yanhan ntwa antwerrkeyel ilytelan?”

Moses-el tyernek, “Irretetyarl wenh nhenhan.”

<sup>3</sup> INGKART angkek, “Iwa yanh ahern-warl.” Kel ra iwek. Ra rtnwem irrekarl. Moses aterel anterrek rtnwem ikwerety. <sup>4</sup> INGKART angkek, “Kanty-they inay!” Kel Moses-el inek kanty-they, ranap irrettety-anem irrek arrpemarl. <sup>5</sup> INGKART angkek, “Israel-kenh-rnem-warl alhentyel, irrettety yanhap iwa ahern-warl, ikwer-rnem iylparrernemel wetharl ntwa iwek-apaney. Rtnwem irrenty, kanty-they ina arrpemarl, irrettetyarl irreyen weth-apaneyarl. Rernem arentyel, rernem ayenh iterl-arem-anem. Ntwa ila ikwer-rnem, ‘Akngay rey-antey arrwekeleny-rnemel apentek, Abraham-el-then Isaac-el-then Jacob-el-then, itnan ikweren INGKART, ra aremirrek atyeng.’”

<sup>6</sup> INGKART angkek Moses-ek arrpemarl, “Iltya aylpa arnkwa kwen-ampeny-warl.” Kel Moses iltya aylpa kwen-ampeny-warl. Kel iltya tyerrelhek, iltya tywen-angketyarr-anem arelh. <sup>7</sup> Akngay angkek ikwer, “Iltya angkep aylpa arrpemarl arnkewararl.” Kel ra tyerrelhek arrpemarl, iltya ra arelh, tywen-weny-anemarl.

<sup>8</sup> INGKART angkek ikwer, “Ntwa apek Israel-kenh-rnemek iylparrernetyek irrettety renh iwemel, rtnwem irrenty aretyek, rernem irrpeltherreyelarl-kety. Ntwa iltya tyerrem, ikwer-rnem lwewarrenetyek tywen-angketyarr-anem, alakenh-angkwarr rernem ayenh iterl-aretyek ayengarl rlterrk inngan, Rernem angkeyel, ‘Arraty inngip Moses angkeyel’<sup>9</sup> Rernem apek iterl-arey-angen-antey arrangkw-antey, kwaty inpa kwaty lher Nile-itwek, ahern-warl thelemel, rernem aretyek. Arrnganem ra irrem.”

<sup>10</sup> Moses-arl INGKARTek awelhey-angenh nyerrerrenharl. Moses angkek-anem, "INGKARTay! Ayeng aleny apekap anen ampamp; akelyank, arternp-antey ayeng angkem. Nga aremirrek atyeng-warl, ayeng aleny apekap-antey arrangkw-antey, ntwa ayenh mwerreley-areny!"

<sup>11</sup> INGKART angkek ikwer, "Ayengan INGKARTarl, ilek-ilek mpwarey-angker. Atha engenh rlterrk angketyek mpwarey-angker ilek-ilek-angkwarr. Ayengan rlterrkarl, atha artwa arwengk mpwarey-angker, avey-angenheleyek. Atha artwa akater mpwarey-angker. Atha artwa arey-angenheley-angker aparrng mpwarey-angker. Artwa apek aparrng anenty, atha renh aretyek mpwarey-angker. <sup>12</sup> Nga ilelhey-angenh atyeng, aleny apmwa, nga angkey-angenh-arrpantey. Israel-kenh-rnem-warl alha! Ayeng alhem ngkweng-angkwarr, athap ngenh rlterrkilem. Atharl ileman, nga angketyek."

<sup>13</sup> Moses ranap awelhey-angenh-antey Akngeyek. Ra angkek, "INGKARTay, mentyaw! Ayenh ilanthey-angenh! Ingwer apek ilanthay wenh!"

<sup>14</sup> INGKART ahelerrek Moses-ek, ra angkek-anem, "Yaw! Awayengkw ngkwenh Aaron-alew? Ranap Levi-kenh arrpemarl. Atha renh ilanthem ngkweng-angkwarr alhetyek. Angka rlterrk-akertarlap ran. Aaron-el ngenh arentyel, rap irrkngerneyarl irreman. <sup>15-16</sup> Atha mpwelenh alpemelel-ayntey, akalty-anthetyek mwerr-angkwarr. Atha ngenh atyetyart arrernek Aaron-ek. Atha ngenh ilem-tangkwel, ntwap Aaron ileyek. Aaron katy angketyek Israel-kenh-rnem ingkerrek, ayeng arlkwenteyel-angkwarr. <sup>17</sup> Irretety-akert alpa Egypt-warl. Ingwer-inger atha ilenty, arawerrng rlterrk kel ntwa mpwaretyek irrertetyel, rernem ngenh iterl-aretyek, nga arawerrng rlterrk atyenh-akert."

### *Moses Egypt-warl alpeyel*

<sup>18-19</sup> Moses Midian-itwek irrpty-inger arwa ra anenh. INGKART ikwer angkek, "Alpay Egypt-warl. Artwa weth-rnem, ngenharl atwetyek-anek-rnem, rernem kel ilwenherrek ingkerr."

Moses alpek malyeyikw-warl Jethro-warl. Ra angkek, "Malyeyay! Mwerrang ayeng alpemay apmer Egypt-warl? Atyenh-rnem atha aretyek wenh, mwerrang rernem aneyel."

Jethro-el renh tyernek, "Mwerraw! Kel alpay! Akngeyel arrenhantherr arntarntarem."

<sup>20</sup> Kel Moses-el tywenek anewikw alerikw-atherr tangkey-warl. Ran ingketyel alpek, tangkeyel anewikw ikwerenhhampamp;-atherr akngeyek. Moses Akngey-kenh irrertety-akert alhenh, arawerrng rlterrk-akert.

<sup>21</sup> INGKART angkek Moses-warl, "Nga Egypt-warl alhenty, ngap atyeng awelha ikwertwel, ayengarl ngkweng angkem. Irretetyel ilek-ilek mpwara arawerrng rlterrk, Pharaoh-el ayenh iterl-aretyek, ayengarl rlterrk innang. Atha renh arwengkileyen, ngkweng awelhey-angenh-anem ra irretetyek, awerrarl. Israel-kenh-rnem nthakenh ra tyarlewey-angenh, Egypt-they. <sup>22</sup> Ra arrngert angkenty, renh ila, 'Alakenh INGKART ngkweng angkenty, "Pharaoh, nga alerengkw ilkwek artewentyel ilkelheyel. Israel-kenh-rnemek ayeng artewentyel ilkelheyel irrkaty-angkwarr, rernem aleraty-rnem. <sup>23</sup> Tyarlewa renh-rnem Egypt-they, rerneman aker tyenkerr atyeng ampernemel anthetyek, atyeng inkwerelhetyek. Ntwa Israel-kenh-rnem antwerrkent, alerengkw arrwekeleny ngkweng atha atwem ipmek-antey." ' Alakenh ila Pharaoh-ek." ...

<sup>27</sup> Ikwer-penp Moses alpek Egypt-warl anewikw ikwerenhh-akert alerikw-atherr-akert. Moses ampepel-antey alpenh, INGKART angkek Aaron-ek awayikw ikwerenhek, "Arlpaw-warl-anem alha, Moses rlwatetyek." Ra alhek arlpaw-warl, Moses rlwatetyek. Ampepel-anem ra alhek, rap Moses renh arek-anem apwert Akngey-kenh-itwek, apwert itnan Sinai. Ra apetyek, Moses renh antwerrkemel arrwantyek. <sup>28</sup> Moses-el Aaron ilek, "INGKARTarl angkek atyeng arrwekelar." Aaron-ek irrertety renh lwewarrerneke. Moses angkek Aaron-ek, "INGKARTel ilek, irrertety renh lwewarrernekyek Israel-kenh-rnemek, rernem aylenh iterl-aretyek, INGKARTelarl aylenh thweneh arawerrng rlterrk-akert."

<sup>29</sup> Ingwer-inger Moses-atherr Aaron-atherr alpek Egypt-warl. Kel ikwer-they ratherr artwamp-rnem akarrilek, Israel-kenh-rnem. <sup>30</sup> Aaron-ek ilek Israel-kenh-rnem, INGKARTarl Moses-ek angkek arrwekel. Moses-el irrertety renh iwek. Rernem arek, angkek-anem, "Ay! Rtnwem-anemarlap irrertety nhan!" Ra kanty-they inek arrpemarl ikwer-rnem, rap irrertety arrpemarl irrenhey-alpek, rernem aremel. Ra iltya arnkwearl

akwernek, kel tyerrelhemel iltya tywen-angketyarr. Angkep arrpemarl iltya renh akwernek arnkewewarl, kel ra tyerrelhemel arrpemarl, mwerr-anemarl irrek.<sup>31</sup> Israel-kenhrnemel arekel, rernem iterl-arek, INGKARTelarl Moses thwenek, arawerrng rlterrk-akertel. Rernem angkerrenh, “INGKART iterrek anwekantherr. Ranap anwenhantherr ipmey-angenharl, anwenhantherr arntarnt-areyel-antey. INGKARTel anwenhantherr arek, Egypt-arenyel-rnem irrwampenh-anthenh atwemel.” Rernem kwenirrek-anem INGKARTek, inkwerelhek-anem ikwer.

## 5

*Moses-then Aaron-then ratherr Pharaoh-warl alheyel, ikwer angketyek*

<sup>1</sup> Ikwer-penh Moses-then Aaron-then Pharaoh-warl alhek, ratherrap angkek, “Anwerenanther Israel-kenhel-rnem apentem INGKART renh, Akngey anwekantherrenh. INGKARTel ngenh ilem alakenh, ‘Arrngert angkey-angenh Israel-kenh-rnemek. Tyarlewetyek renh-rnem, rernem alhetyek apmer arlpaw ikwer-warl. Kwenty rernem arlkwetyek, aker tyenkerr atyeng anthemel!’”

<sup>2</sup> Pharaoh arrngert angkek, “Ay! Angwenharlap ran? Athan INGKART iterl-arey-angenharl! Ayengan ikwer awelhey-angenharl! Athan Israel-kenh-rnem tyarlewey-angenharl, arlpaw-warl alhetyek, arrangkwarl!”

<sup>3</sup> Aaron-atherr Moses-atherr ratherr angkek ikwer, “Akngay weth anwernantherr apentem, ra anwernanthantherr ilek, arlpaw-warl alhetyek arlta irrpety-ingerek-atwety. Arlpaw ikwerel aker tyenkerr arrtyemel anthetyek Akngay anwerenkantherrenh, itnan INGKARTarl. Ntwa apek anwerenkantherr arrngert angkenty, INGKARTel anwenhantherr arntety antekkerr, anwenhantherr ipmek atwekkerr!”

<sup>4-5</sup> Pharaoh angkek-anem Moses ikwer-atherr, “Ilek-kety mpwel Israel-kenh-rneman warrk-kety akngem wenh? Warrkan impenarl! Rernem akngerrarl! Warrk-kety mpwel arrngert angkeyel! Iley-alpenherr-atherr ikwer-rnem-warl, ‘Arrantherr warrkirkirntetyek!’”

<sup>6</sup> Israel-kenhel-rnem bricks akngerr mpwarenh itwern arpanenhel, warl-rnem arteyek. Egypt-arenyel-rnem arrwekel Israel-kenh ingwer-rnem rlwanek, atyetyart akely-rnem anayntetyek Israel-kenh warrkenh-rnemek. Ingwer-inger Pharaoh atyetyart-rnemek angkek, Egypt-areny-rnemek, Israel-kenh-rnemek. <sup>7-8</sup> “Israel-kenh-rnem rernem alhengkerirrek warrk ilkwekety. Rernem arkarirrek, bricks akngerr mpwarekerr menty. Warrk-kety-anem rernem arkarerreyel, warrk-kety ipmelhetyek-anem. Alakenh rernem ayenh ayerneyel, ‘Anwerantherr arlpaw-warl alhetyek, aker tyenkerr arrtyemel anthetyek Akngay anwekantherrenhek.’ Israel-kenh-rnemek ayeng awelhey-angenharl. Arrantherr anthenh Israel-kenh-rnem atherrk arleny, bricks mpwaretyek. Nhepenh-anyem arrantherr atherrk arleny anthey-angenh-anem, menty-anem. Ilenherr-arey Israel-kenh-rnem, ‘Atherrk arlenyek ament nthweynetyek, bricks mpwaretyek. Wetharl akngerr mpwarenh-apeny, alakenh mpwaretyek!’ Bricks irrpetyap apek rernem mpwarenty alhengkerrel, renh-rnem iltenherr-arey alhengkerrentyan.

<sup>9</sup> Irwampenh-anthenherr-arey arnterr warrkirretyek! Alakenh iletyek, ‘Ipmelhey-angenh warrkirretyek!’ Rernem apek arnterr intem warrkirrenty, rernem awey-angenh angka Moses-kenh, Moses ra irrywerrentyarl.” Alakenh Pharaoh angkek atyetyart ampep ikwerenh-rnemek-then atyetyart akely-rnemek-then.

<sup>10</sup> Ikwer-penh rernem Israel-kenh-rnem-warl alhek, renh-rnem ilek, “Pharaoh-el anwernenhantherr ilanthek, atherrk arleny arrenhantherr anthey-angenh, bricks mpwaretyek. <sup>11</sup> Ra ilanthek arrpemarl, arrantherr atherrk arleny nthwemel akwetyetyek. Alhengkererrey-angenh warrkirretyek. Wetharl akngerr mpwarenh-apeny, alakenh mpwaretyek!” <sup>12</sup> Ikwer-penh Israel-kenh-rnem alhek apmer arpanenhel-warl, atherrk arleny akwetyetyek, bricks mpwaretyek. <sup>13</sup> Egypt-arenyel-rnem renh-rnem irrwampenh-anthek, arnterr warrkirretyek. Rernem ilek, “Iparr warrkirrenherr-areyay! Warrkirretyek wetharl arrantherr awank warrkirrek-apeny, bricks akngerr mpwaremel.” Ikwer-penh Israel-kenhel-rnem bricks akngerr mpwarey-angenh, arrangkw. Atherrk arleny akwetyarl akwetyetyek, bricks irrpetyapant mpwarek. <sup>14</sup> Ahelengkw-rnemek atyetyart Israel-kenh-rnem ilek, “Rernem lyert apmwerrkel-then alhengkerrekan, akely mpwarek!” Rernem atyetyart Israel-kenh-rnem irrwampenh-anthek atwemel. Rernem ayernek-anem, “Ilek arrantherr warrk-kety ipmelhek-anem? Irripetyap-anem arwa rernem mpwarek, akngerr-weny-anem?”

<sup>15</sup> Atyetyart Israel-kenhel-rnem Pharaoh renh ayerney-alhek, “Irrepern anwernantherr! Ilekekarl nga ahelerrekan anwerenkantherr? Anwerantherr warrkenh-rnemarl ngkwenh. Ilekekarl atyetyart Egypt-areny-rnemek anwernenhantherr atweyelan?

<sup>16</sup> Ntwa ilek atyetyart ngkwenh-rnem, atherrk arleny anwernenhantherr anthey-angenh, bricks mpwaretyek. Anwernenhantherr bricks irrpetyap mpwarek, akngerr-weny, atherrkek arrangkwarl. Rernem ahelerrek, anwernenhantherr atwek. Ahelerrey-angenh anwernekantherr! Atyetyart ampep ngkwenh-rnemek ahelerra!"

<sup>17</sup> Pharaoh angkek, "Arrantherran alhengkerr-rnemarl wenh! Arlkarerreyel warrkety! Alakenh arrantherr ayenh arlkareweyel intem-antey, arlpaw-warl alhetyek, aker tyenkerr arrtyemel anthetyek INGKARTek. <sup>18</sup> Kel iparry alpenherr-arey warrkwar! Atherrk anthey-angenh-kety anemarl atha! Mpwarenherr-arey bricks akngerr arrantherr arrwekel mpwarek-apeny!"

<sup>19</sup> Atyetyart Israel-kenh-rnemel awek Pharaoh angkekarl, rernemap angkerrek, "Nthakenh irreyay! Irrpetyapant mpwarenty anwantherr, atyetyart Egypt-arenyel-rnem anwenhantherr atwem!" <sup>20</sup> Ikwer-penh rernem warl Pharaoh-kenh-they tyerrelhek, Moses-atherr Aaron-atherr arey-alhek. Moses-atherr Aaron-atherr ikwer-rnem mpwel-hen. <sup>21</sup> Rernem renh-atherr iltek. "INGKARTel mpwelenh atwey-areny! Pharaoh-then atyetyart ampep-rnem-then ahelerrek anwernekantherr, mpwelarl arlpaw-warl alhetyek ayernek-kety! Mpwel ayernek Pharaoh, anwenhantherr arlpaw-warl tyarlewyek. Alakenh rernem anwernenhantherr ipmek atwetyek!"

<sup>22</sup> Moses ranem ament-anem alhek INGKART-warl angketyek. Ra ayernek, "INGKARTay! Ilekek ntwa atwelyelan anwernenhantherr irrwampenh-anthemel nhek Egypt-itwek? Anwernenhantherr ngkwenharl! Ilekek ntwa pwarrk ilkwa anthek atyenh-rnemek? Ilekek ntwa ayenh thwenek Egypt-warl? Arrangkwel. <sup>23</sup> Ntwa ayenh ilanthek, ayeng Pharaoh-warl alhetyek. Kel ayeng alhek, angka ngkwenh ilek. Alakenh ra ahelerrek ngkwenh-rnemek, renh-rnem atwek irrwampenh-anthemel. Ilekekan ntwa anwernenhantherr arntart-arey-angenh."

## 6

<sup>1</sup> INGKART angkek Moses-ek, "Ntwa ayenh areyenh, atharl Pharaoh arrkngert antwerrkeyenh, ra Israel-kenh-rnem nthakenh atwey-angenh. Pharaoh renh atha atweyenh rawerrng rlterrk. Ikwer-penh ra Israel-kenh-rnem irrenteyenh-anem, rernem alhetyek apmer arlpaw-warl."

<sup>2</sup> Akngey angkek Moses-ek, "Ayengan INGKARTarl. <sup>3</sup> Arrwel ayeng aremirrek Abraham-ek, Isaac-ek-then, Jacob-ek-then. Rernem iterl-arenhant itnan ayenh El Shaddai, Akngey rlterrk innga. Rernem itna ayenh INGKART iterl-arey-angenharl. <sup>4</sup> Atha renh-rnem alhelek, ingwer-inger apmer Canaan renh-rnem anthetyek. Rernem anenh apmer Canaan-el, apmeran ingwer-rnem-kenharlap, rerneman apmerek-artwey-wenyarl, alethangarl. <sup>5</sup> Israel-kenh-rnem artnenh, Egypt-areny-rnemel renh-rnem atwekarl. Rernem iterreyek-athen, atha artnekarl awey-angenh. Israel-kenh-rnem artnekarl atha awek. Ayeng atyenh-rnemek iylpelerrey-angenh, atharl arrwekeleny-rnem alhelek, apmer renh anthetyek ikwer-rnem."

<sup>6-9</sup> Akngey Moses-ek angkek, "Alha, Israel-kenh-rnem iletyek angka atyenh." Kel Moses alhek Israel-kenh-rnem-warl, ilek-anem, "Alakenh Akngeyel arrekantherr ileyel. Ran INGKARTarl. Ra Egypt-areny-rnem arrngert antwerrketyek, rernemarl nthakenh arrenhantherr irrwampenh-anthekerr atwekkerr. Arrantherr warrkirrey-angenh anem menty Egypt-areny-rnemek. Ra atnwenhetyek arrenhantherr Egypt-areny-rnem-kety rawerrng rlterrk. Egypt-areny-rnem ra irrwampenh-anthem atwemel. Arrantherr ikwerenh-rnem aneyenh-anem, ra Akngey arrekantherrenh, aneyenh. Arrantherr renh iterl-areyenh-anem, ra Akngey arrekantherrenh, itnan INGKART. Akngey irrikatyel tyarlewk arrenhantherrenh Egypt-areny-rnem-kety atwemarl-kety. Ra arrenhantherr atnwenhem apmer weth-warl, arrwekel wetharl ra arrwekeleny-rnem alhelek apmer renh anthetyek, Abraham-then Isaac-then Jacob-then. Apmer renh ra anthem arrekanther. Apmerek-artwey-rnem arrantherr aneman. Ran INGKARTarl." Moses-el alakenh Israel-kenh-rnemek ilek. Moses ikwer rernem awelhey-angenharl irrpeltherrenharl, rernemarl aterirrek ahelengkw Egypt-areny-rnem-kety.

<sup>10-11</sup> INGKART angkek Moses-ek, "Pharaoh iletyek alhay, Israel-kenh-rnem tyarlewyek Egypt-they, arrkngert angkey-angenh!"

<sup>12</sup> Moses angkek INGKART-warl, "Israel-kenh-rneman atyeng awelhey-angenharl! Pharaoh atyeng awelhey-angenh arrpemarl! Ayeng aleny apekaparl, nthakenh ayeng mwerr angkey-angenh. Pharaoh atyeng awelhey-angenh."

<sup>13</sup> INGKARTel akalty-anthek Moses-atherr Aaron-atherr Israel-kenh-rnem-then, nthakenh mwerr-angkwarr Pharaoh-ek angketyek. Ra ilek renh-atherr, ratherr Israel-kenh-rnem Egypt-they atnwenheynetyek.

*Nhenh-rnem arrwekeleny-rnem Aaron-kenh anen*

<sup>14</sup> Israel-kenh-rnem akngerr anew-anen. Nhenh-rnem itner nem alakenh: Jacob itna ingweran Israel, alerikw ilkwa ikweren h itnan Reuben. Reuben-kenh alerikw awey-rnem 4-pel, itnan Hanoch-then, Pallu-then, Hezron-then Carmi-then. Awey rernem alkenhirrek. Alerikw akngerr arrengey akngerr-then apetyek ikwer-rnem-they. Nhenh-rnem Reuben-kenh-rnem.

<sup>15</sup> Alerikw ingwer Israel-kenh itnan Simeon. Simeon-kenh alerikw awey-rnem 6-pel, itnan Jemuel, Jamin, Ohad, Jakin, Zohar, Shaul. Shaul-kenh amikw Canaan-areny. Awey rernem alkenhirrek. Alerikw akngerr arrengey akngerr-then apetyek ikwer-rnem-they. Nhenh-rnem Simeon-kenh-rnem.

<sup>16</sup> Alerikw ingwer Israel-kenh itnan Levi. Levi anek aherrety 137-ek-atwety. Levi-kenh alerikw awey-rnem irrpety, itnan Gershon, Kohath, Merari.

<sup>17</sup> Gershon-kenh alerikw awey atherr, itnan Libni-then Shimei-then.

<sup>18</sup> Kohath anek aherrety 133-ek-atwety. Kohath-kenh alerikw awey-rnem 4-pel, itnan Amram, Izhar, Hebron, Uzziel.

<sup>19</sup> Merari-kenh alerikw awey atherr Mahli-then Mushi-then.

Alerikw akngerr arrengey akngerr-then apetyek ikwer-rnem-they. Nhenh-rnem Levi-kenh-rnem. Rernem ilelhek Levi-kenh-rnem.

<sup>20</sup> Artwa weth Amram anewarterrek awen hikwek, itnan Jochebed. Jochebed-el awey atherr atnyenek, Aaron-atherr Moses-atherr. Amram anen h aherrety 137-ek-atwety.

<sup>21</sup> Artwa weth Izhar, alerikw awey-rnem ikweren h irrpety anen, itnan Korah, Nepheg, Zicri.

<sup>22</sup> Artwa weth Uzziel, alerikw awey-rnem ikweren h irrpety anen, itnan Mishael, Elzaphan, Sithri.

<sup>23</sup> Artwa weth Aaron anewarterrek Elisheba-ek. Elisheba alerikw kwey Amminadab-kenh anek, angkwerikw Nahshon-kenh. Elisheba-el ampa 4-pel atnyenek, Nadab, Abihu, Eleazar, Ithamar.

<sup>24</sup> Artwa weth Korah, alerikw awey-rnem irrpety ikweren h anen, itnan Assir, Elkanah, Abiasaph. Awey rernem alkenhirrek. Alerikw akngerr arrengey akngerr-then apetyek ikwer-rnem-they. Nhenh-rnem Korah-kenh-rnem.

<sup>25</sup> Aaron-kenh alerikw Eleazar anewarterrek arelhek. Arelh-kenh aynikw itnan Putiel. Ratherr awey akely atnyenek itnan Phinehas.

Nhenh-rnem arrwekeleny-rnem Levi-kenh-rnem-kenharl.

<sup>26-27</sup> Awayen heng-atherr Aaron-then Moses-then irrkatty-atherr, INGKARTelarl arwekel ilek, “Israel-kenh-rnem atnwenhenherr-atherr Egypt-they arlpaw-warl.” Innga ratherr Pharaoh ilek, Israel-kenh-rnem tyarlewetyek, rernem Egypt-they alpetyek.

*Aaron ra rlterrk angkey-angker*

<sup>28-29</sup> Arrwekel-antey INGKART ra angkek Moses-warl Egypt-itwek alakenh, “Ayengan INGKARTan. Pharaoh renh ila ingkeren h atha ngenh arrwekel ilek-angkwarr.”

<sup>30</sup> Moses angkek INGKARTek, “Ayengan aleny apekaparl, nthakenh ayeng mwerr angkey-angnenh. Pharaoh atyeng awelhey-angnenh.”

## 7

<sup>1</sup> Ikwer-penh INGKART angkek Moses-ek, “Aray! Atha ngenh atyetyart arrernek Pharaoh-ek. Atha ngenh ilem-tangkwel, ntwap Aaron iletyek. Atha awayengkw ngk-wenh Aaron arrernek arrpemarl, angkey-angker katy ngkweng angkayntetyek. Aaron katy angketyek, ayeng Akngeyarl arlkwenteyel-angkwarr. Ra Pharaoh iletyek, alakenh ra awelh-ayntetyek. <sup>2</sup> Awayengkw ngkwenh ila, ra Pharaoh renh iletyek, atharl ngenh ilek-angkwarr. Alakenh-anyem Aaron ra Pharaoh-ek iletyek, ‘Arrngert angkey-angnenh Israel-kenh-rnemek. Tyarlewa, Egypt-they rernem alperlewetyek.’” <sup>3</sup> INGKART angkek Moses-ek, “Atha Pharaoh arwengkiletyek, ra awelhey-angnenh anayntetyek. Ingwer-inger ayeng Egypt-areny-rnemek aremirreyen h arawerrng rlterrk-akert. <sup>4</sup> Pharaoh ra awerrantey anayntetyek. Ra mpwelek awelhey-angnenh aneyen h. Ingwer-inger atha Egypt-areny-rnem atwetyek. Ikwer-penh atha Israel-kenh-rnem atnwenheynem Egypt-they arawerrng rlterrk-akertel. <sup>5</sup> Egypt-areny-rnemel ayen h iterl-areyen h, ayeng INGKART inngarl.” Alakenh angkek INGKART Moses-ek. <sup>6</sup> INGKARTel Moses-ek-atherr Aaron-ek-atherr alakenh ilek, ratherr angka irrkatty-antey INGKART-kenh iley-alhek Pharaoh-warl. <sup>7</sup> Moses-atherr artwamp atherr-anem ratherr irrek-anem. Moses-an aherrety 80-pel-anem irrek alyepelarl, Aaron-an aherrety 83-pel-anem ra irrek.

*Irretety Aaron-kenh rtnwem-anem irreyel*

<sup>8-9</sup> Ikwer-penh INGKART angkek Moses-ek-atherr Aaron-ek-atherr, "Mpwel alhenty Pharaoh-warl, ra mpwelenh alakenh iley-ayntenty, 'Mwerr-angker mpwaretyek arawerrng rlterrk-akertel, atha renh iterl-aretyek, INGKARTel inngelarl mpwelenh thwenek!' Moses, Pharaoh-el ngenh ra iley-ayntenty alakenh, ntwa ila Aaron alakenh, 'Irretety renh iwetyek Pharaoh arrwekel-ampeny-itwek. Irretety ra rtnwem-anem irreyek."

<sup>10</sup> Moses-atherr Aaron-atherr kel ratherr alhek Pharaoh-warl-anem. Rap ilek-anem renh-atherr, "Mwerr-angker mpwaretyek arawerrng rlterrk, atha aretyek." Aaron ra irrertety renh iwek Pharaoh-warl arrwekel-ampeny-itwek, ra warrkenh ikwerenhel-rnem-then aretyek. Irretety rap rtnwem-anem irrek.

<sup>11</sup> Pharaoh ra warrkenh anyent ikwerenh thwenek, artwa akalty-rnem-then ngangker-akert-rnem-then ikngwerl-alpetyek. Rernem rtnwem mpwarek arrpemarl ikwer-rnem-kenn-angkwarr. <sup>12</sup> Rernem irrertety renh iwek ahern-warl-anem arrpemarl, irrertety rernem rtnwem-anem irrek ingkerrenh-antey. Rtnwem Aaron-kenhel rtnwem ingwer-rnem kwernek ingkerrenh-antey. <sup>13</sup> Pharaoh ran awerr-antey anenh. Nthakenh Moses-ek-atherr Aaron-ek-atherr ra awelhey-angenh. Alakenh INGKART arrwekel-antey angkek Moses-ek, Pharaoh rarl awerr-antey aneyenh.

*Moses-el-atherr lher Nile-itwek kwatyan arrknganem mpwareyel*

<sup>14</sup> Ikwer-penh INGKART angkek Moses-ek, "Pharaoh ra anerl-ayntetyek awerr-antey. Ra Israel-kenh-rnem Egypt-they tyarlewey-angenh-antey. <sup>15</sup> Ingwepenh nga alha kwaty lher Nile-warl, kwaty impalh-itwek rtnay. Irretety weth akngemel. Nga mpwelha Pharaoh-ek, ra kwaty lher-warl apetyentyek, pwerlpirretyek. <sup>16-17</sup> Ra apetyenty, angka atyenh ikwer ila." Ingwepenh Moses-then Aaron-then alhek kwaty lher Nile-warl, Pharaoh-ek mpwelhetye. Pharaoh warrkenh-rnem-then apetyek, INGKARTelarl ilek-angkwarr. Moses-el Pharaoh ilek, "INGKART ra Akngey aneyel Israel-kenh-rnemek. Rap ayenh thwenek, ngkweng-warl iletyek. Alakenh ra ngenh ileyel, 'Arrngert angkey-angenh atyenh-rnemek, rernem alhetyek arlpaw-warl. Rernem aker tyenkerr arlpaw-itwek atyeng arrtyemel anthetyek, atyeng inkwerlhemel-anem. Nga atyeng awelhey-angenh.' Alakenh INGKARTel ngkweng-warl ilem arrpemarl, 'Ntwa ayernek Moses, 'Angwenth INGKART ran?'" Kel mwerr, ayeng arawerrng rlterrk ilkwakert aneyel, alakenh ntwa ayenh iterl-aretyek. Arraty ayeng ngkweng angkeyel! Moses-el irrertetyel kwaty lher Nile atwetyek. Ra kwaty atwenty, rap arrnga-anem irreman. <sup>18</sup> Ikwer-penhan irrpeng-rnem ingkerrenh ilweyen, kwaty inteng-anem irreyen. Egypt-areny-rnem arrantherr nthakenh kwaty antywey-angenh kwaty lher-penh, arrangkw-anem, kwaty rarl apmwirrem."

<sup>19</sup> Ikwer-penh INGKARTel Moses ilek, "Aaron ila, kwaty irrertetyel alhel-aretyek kwaty-rnem ingkerrenh Egypt-itwek, alay-rnem-then, lher-rnem-then, artnep-rnem-then, ngenty-rnem-then. Ra irrertetyel alhel-arem, kwaty-rnem rernemap ingkerrenh arrnganem irrem. Kwaty rtnwel-then tyampitel-then rernemap ingkerrenh arrnganem irrem arrpemarl, apmer arrpanenhel." <sup>20</sup> Moses-elap Aaron ilek, irrertetyel alhel-aretyek kwaty lher-itwek. Aaron rap atwek-anem kwaty. Kwaty ingkerrenh arrnga-anem irrek. Pharaoh-el warrkenh ikwerenhel-rnem-then rernemap arek. <sup>21</sup> Iррeng-rnem map ingkerrenh ilwek kwaty lher-itwek, intengerrek-anem. Kwaty intengerrek arrpemarl, Egypt-areny-rnem rernemap arek kwaty intengerrekarl-anem, menty antywey-angenh-anem. Kwaty-rnem ingkerrenh rernemap arrnga-anem irrek Egypt-itwek.

<sup>22</sup> Ikwer-penh ngangker-akert-rnem Egypt-areny-rnem rernem kwaty inpek, rernemap arrnga mpwarek arrpemarl, ikwer-rnem-kenh-angkwarr. Pharaoh-el arek-penh, ra awerrirrek arrpemarl. Rap nthwekern awelhey-angenh irrek ikwer-atherr Moses-ek-atherr Aaron-ek-atherr. Alakenh INGKARTel arrwekel ilek renh-atherr Moses-atherr Aaron-atherr, Pharaoh rarl awerr irrem ikwer-atherrety. <sup>23</sup> Pharaoh rap renh-atherr iwerl-alhek, apmer ikwerenhel-warl-anem ra alpek. Rap awelhey-angenh ikwer-atherr, ikwer-atherr iterrey-angenh. <sup>24</sup> Egypt-areny-rnem rernemap nthwekern kwaty antywey-angenh. Rernemap ngenty-anem angernenh kwaty lher arrerenty-itwek kwatyek, kwatyek nthwerl-apenh-antey.

<sup>25</sup> INGKARTel kwaty lher Nile-itwek arrnga kwaty-penh mpwarek. Ikwer-penh Moses ra anenh apmer ikwerenhel arlta 7-ek-atwety.

<sup>1</sup> Ikwer-penh INGKARTel Moses ilek, "Iley-alha Pharaoh ikwer angka atyehn." Kel Moses alhek Pharaoh-warl iletyek, "Alakenh INGKART ngkweng ilem, 'Atyehn-rnem arlpaw-warl alhetyek, atyeng tnakemel inkwerelhetyek. Arrngert angkey-angenh, tyarlewa renh-rnem!" <sup>2</sup> Nga arrngert angkentyan, atha antyetyerr-rnem thwenem Egypt-ampeny-warl, apmer ingkerr arrngeleyek. <sup>3</sup> Antyetyerrel-rnem kwaty lher Nile-itwek arrngeleyek. Rernem kwaty-they warl arrpanenh-warl aylpetyek. Ampererrey-alhetyek warl ngkwenk-warl, warl-rnem warrkenh-rnem-kenh-warl, warl-rnem Egypt-areny-rnem-kenh ingkerrenh-warl. Pantyel atnarnpey-alhetyek. Rernem atnarnpey-alhetyek amern amperney-angker-itwek-then arlangarr amernek-arelh-itwek-then ingkerrenh-itwek-antey. <sup>4</sup> Antyetyerr-rnem atnarnpem ngkweng-itwek, warrkenh-rnem-itwek-then, ingkerrenh-itwek Egypt-itwek." Aläkenh Moses-el Pharaoh renh ilek.

<sup>5</sup> Ikwer-penh INGKARTel Moses ilek, "Aaron ila, 'Irretetyel alhel-aretyek kwaty lher-nem ingkerrenh-warl, kwaty alay-rnem-warl-then kwaty ingkerrenh-warl-antey.' Ra alhel-aretyel, antyetyerr-rnem kwaty ingkerrenh-they tyerrelhem Egypt-itwek." <sup>6</sup> Kel Aaron-el irrertetyel alhel-arek kwaty lher-rnem, alay-rnem-then ingkerrenh Egypt-itwek. Antyetyerr akngerr-anem tyerrelhek kwaty-they. Rernem atnarnpey-alhek Egypt-itwek apmer ingkerrenhel. <sup>7</sup> Ngangker-akert-rnem Egypt-areny-rnem rernem irrkatty mpwarek arrpemarl, antyetyerr-rnem ingwer-rnem tyerrelhek kwaty-they arrpemarl. Antyetyerr akngerr innga-anem Egypt-itwek anen! <sup>8</sup> Ikwer-penh Pharaoh warrkenh anyent ilek, Moses-then Aaron-then ingwerl-alpetyek. Ra renh-atherr ilek, "INGKART ayerna, antyetyerr ingkerrenh iwetyek atyengety, ingkerrenh-kety. Ra iwentyel, atha arrenthanterr tyarlewetyek, arrantherr arlpaw-warl alhetyek, aker tyenkerr INGKARTek arrtyemel anthetyek."

<sup>9</sup> Moses-el Pharaoh ayernek, "Ilenger ayeng angkem INGKARTek ngkweng, ngkwenh-rnemek-then? Atha apek ayernenty INGKART, ikwer-penh antyetyerr-rnem ingkerr warl ngkwenh-they warl-rnem warrkenh ngkwenh-rnem-kenh-they tyerrelhemel rernem alpem. Rernem alpem kwaty lher Nile-warl, irrkatty ikwer-warl."

<sup>10-11</sup> Pharaoh angkek Moses-warl, "Ingwelarreng INGKART ayerna."

Moses angkek, "Ya! Ayeng angkem INGKARTek ingwelarreng. Antyetyerr-rnem ingkerrenh alpetyek ngkweng-they, warrkenh Egypt-areny-rnem ingkerrenh-they. Rernem warl-rnem-they tyerrelhem, kwaty lher Nile-warl ingkerrenh alpem. Ikwer-penh ntwa iterl-arem INGKART ra innga anyent-antey, Akngey anwekantherrenh, ingwer-rnem-ampeny-wen."

<sup>12</sup> Ikwer-penh Moses Aaron-then Pharaoh iwerl-alhek. Ingwepenh Moses INGKARTek arlek, "Antyetyerr ingkerrenh aknga Egypt-they!" <sup>13</sup> INGKARTel Moses awek, rap alakenh mpwarek. Antyetyerr-rnem ilwek, apmer arrpanenhel, warl ingkerrenhel-then, akethel-then. <sup>14</sup> Egypt-arenyel-rnem antyetyerr-rnem ingkerrenh ipmernem rernem akwetyeynenh. Antyetyerr-rnem rernem ingkerrenh intengerrek. <sup>15</sup> Pharaoh ra antyetyerr ipmernem arekel, ra awerr arrpemarl irrek. Moses-ek Aaron-ek-atherr awelhey-angenh arrpemarl ra irrek. Aläkenh INGKART arrwekel angkek, Pharaoh ra awerr arrpemarl irrem.

### *INGKARTel aheny-rnem thweneyel Egypt-ampeny-warl*

<sup>16</sup> Ikwer-penh INGKARTel Moses ilek, "Aaron ila, 'Irretetyel ahern atwetyek.' Ra ahern atwentyel, aheny akngerr-anem ahern-they tyerrelhem, Egypt-ampeny-itwek apmer arrpanenhel arrngeleyek." <sup>17</sup> Kel Aaron-el irrertetyet inemel ahern atwek-anem, Moses-elarl ilek-angkwarr. Aheny-rnem tyerrelhek ahern-they anamerl-antey, Egypt-itwek apmer arrpanenhel. Aheny-rnem alkerel aparnperrek, artwernem-then arelh-rnem-then ingkerrenh artek, atnwenth ingkerrenh-then artek rernem. <sup>18</sup> Ikwer-penh ngangker-akert-rnem arrkernelhenh, aheny-rnem ahern-they tyerreyek-arrpanety, ikwer-rnem-kenh-angkwarr. Ywarn-antey arrkernelhenh, arrangkw. Aheny-rnem artwernem-itwek atnwenth-rnem-itwek anenh-antey. <sup>19</sup> Ngangker-akert-rnem angkek-anem Pharaoh-ek, "Arrangkw nthakenh aheny-rnem mpwarey-angenh anwanther, akwerrp anwanther. Arawerrng rlterrk Akngey-kenhantel Aaron-el ahern-they aheny-rnem mpwarey-angker." Pharaoh ran awerr-antey, awelhey-angenh arrangkw. Aläkenh INGKART arrwekel angkek Moses-ek, Pharaoh ra awerr anerl-ayntem.

### *INGKARTel ameng-rnem thweneyel Egypt-warl*

<sup>20</sup> INGKARTel Moses ilek, "Ingwepenh akwenta, kwaty lher-warl alha. Nga mpwelha Pharaoh ikwer. Ra apetyenty, angka atyehn ikwer ila." Kel Moses aläkenh Pharaoh-ek mpwelhek. Pharaoh apetyek lher-warl. Moses-el Pharaoh ilek, "Aläkenh INGKARTel ngkweng ilem, 'Atyehn-rnem arlpaw-warl alhetyek, atyeng tnakemel inkwerelhetyek.

Tyarlewa, arrngert angkey-angenh! <sup>21</sup> Nga arrngert angkenty, atha ameng-rnem arrekantherr-warl thwenetyek, arrenhantherr arwengkeleyek. Ameng-rnem ngenh ampereleyek, warrkenh-rnem ngkwenh-then, Egypt-areny-rnem ingkerrenh-antey. Ameng-rnem akngerrerreyen h warl ikwer-rnem-itwek ingkerrenh Egypt-itwek, ahern ingkerrenhel rernem aparnperreyen h. <sup>22</sup> Atha ameng-rnem thweney-angenh apmer Goshen-ampeny-warl, Israel-kenh-rnem anew-aneyel-warlan, arrangkw. Ameng-rnem nthakenh anperirrey-angenh apmer Goshen-ampeny-warl. Ntwa ameng-rnem arenty Egypt-areny-rnem-itwek, ntwa ayenh iterl-aretyek, ayengan INGKART inngarl anem Egypt-ampeny-itwek. <sup>23</sup> Arraty, ingwelarreng arawerrng rlterrk el atha ameng-rnem thwenem Egypt-areny-rnem-warl. Ameng-rnem alheyen h arrekantherr-warl, atha atyenh-rnemant arntartn-arem ameng-kety. Ameng-rnem alhey-angenh atyenh-rnem-warl.”

<sup>24</sup> Kel alakenh ayntek. INGKARTel ameng-rnem akngerr thwenek ikwer-rnem-warl. Rernem aylpenhek warl Pharaoh-kenh-warl, warl-rnem warrkenh-rnem-kenh-warl-then. Ameng akngerr inngel-anem artey-alhek Egypt-itwek. <sup>25</sup> Pharaoh-el thwenek warrkenh anyent Moses Aaron-then ikngwerl-alpetyek. Pharaoh angkek ikwer-atherr, “Ya! Apmer nhek-antey arrantherr aker tyenkerr arrtyemel antherl-ayntetyek Akngey arrekantherrenhek!”

<sup>26</sup> Moses-el tyernek renh, “Nthakenharl alakenhan? Anwernantherr pwelek-rnem atwem, ampernenty, INGKARTek anthenty, Egypt-areny-rnem, ahelerrekerr anwernekantherr. Rernem ilteny apek, ‘Ilekek arrantherr pwelek-rnem atwetyl? Imper anwernekantherr! Anwernantherr kwenerem ikwerek altyerr-rnem!’ Ikwerpenharl rernem apwertel anwernantherr wekerr, ipmek atwekerr. <sup>27</sup> Alakenh anwernantherr apmer nhek-antey aker tyenkerr arrtyey-angenh-antey INGKARTek. Anwernantherr arlpaw-warl alhey-areny itwern irrpetyek-atwety. Arlpaw-itwekant anwernantherr aker tyenkerr arrtyemel anthetyek INGKARTek Akngey anwernekantherrenhek. Alakenh INGKARTel ilek.”

<sup>28</sup> Pharaoh-el ilek Moses-ek, “Ya, arrantherr alhenherr-arey arlpaw-warl Egypt-they. Arleng alhey-angenh. Angath-antey alhenherr-arey, aker tyenkerr arrtyemel anthetyek INGKARTek Akngey arrekantherrenhek. Alhey-alentyel, ayerna INGKART, ameng-rnem irrentetyek anwernekantherr-they.”

<sup>29</sup> Moses angkek ikwer, “Ya. Ayeng alpem, ayeng angkey-alpem INGKARTek. Ingwelarreng ameng-rnem ngkweng-they alpem, warrkenh ngkwenh-rnem-they-then Egypt-areny-rnem-they-then. Atyeng awelha! Irrtywerremel iley-angenh! Arrngert angkey-angenh, anwernantherr arlpaw-warl alhetyek, aker tyenkerr arrtyemel anthetyek INGKARTek.”

<sup>30</sup> Ikwer-penh Moses-el iwerl-alhek Pharaoh, INGKART-warl angkek-anem. <sup>31</sup> INGKARTel Moses awek. Ingwepenh INGKARTel ameng-rnem irrentek Pharaoh ikwer-they, warrkenh-rnem-then-they, Egypt-areny-rnem-then-they. Ameng-rnem ingkerr ilwenherrek-anem. <sup>32</sup> Pharaoh ra awerirrek arrpemarl, awelhey-angenh. Arrwekel-antey ra ilek, ra Israel-kenh-rnem tyarlewetyek Egypt-they. Ra arrngert angkek arrpemarl, renh-rnem tyarlewety-angenh, rernem Egypt-they arlpaw-warl alhey-angenh.

## 9

### *INGKARTel atnwenth-rnem Egypt-areny-rnem-kenh atwetyl*

<sup>1</sup> INGKARTel ilek Moses, “Pharaoh-warl iley-alha angka atyenh.” Kel Moses Pharaoh-warl alhek angketyek, “Alakenh INGKART rey-antey Akngey Israel-kenh-rnem-kenh ngkweng illem, ‘Atyenh-rnem arlpaw-warl alhetyek, atyeng tnakemel inkwerlheteyek. Tyarlewa renh-rnem, arrngert angkey-angenh’” <sup>2-3</sup> Nga apek arrngert angkenty Israel-kenh-rnem-kety. Ntwa antwerrkenty renh-rnem Egypt-itwek, INGKARTel pwenty thwenem nantew arrekantherrenh-warl, tangkey-rnem-warl, kamwerl-rnem-warl, pwelek-rnem-warl, yep-yep-rnem-warl, nanikwet-rnem arrekantherrenh-warl ingkerrenh apmer arrpanenh-warl Egypt-itwek. Atnwenth-rnem ilwenherrem ingkerrenh. <sup>4</sup> Atnwenth-rnem Israel-kenh-rnem-kenh ilwenherrey-angenh, itetharl anem. INGKARTel renh-rnem arntartn-areyel. <sup>5</sup> Arraty, INGKART angkek atyeng, “Ingwelarreng atnwenth-rnem Egypt-areny-rnem-kenh ingkerrenh ilwenherrem!”

<sup>6</sup> Kel ingwer-inger INGKARTel pwenty thwenek, atnwenth-rnem ingkerrenh Egypt-areny-rnem-kenh arntetyerrek, Moses-elarl ilek-angkwarr. Ingkerrenh ilwenherrek. Atnwenth-rnem Israel-kenh-rnem-kenh ilwey-angenh, arrangkwarl. <sup>7</sup> Pharaoh-el atnwenth-rnem Egypt-areny-rnem-kenh ilwenty ra arek. Ra warrkenh-rnem ilantheik,

Goshen-ampeny-warl alhetyek, Israel-kenh-rnem-warl. Rernem arey-alhek atnwenth-rnem Israel-kenh-rnem-kenh iteth-antey ingkerr. Rernem alpek Pharaoh ikwer-warl. Rernem ilek, "Atnwenth ikwer-rnem-kenhan iteth ingkerrarl!" Pharaoh awerr-antey anenh, awelhey-angenh. Ra arrngert angkek arrpemarl.

*INGKARTel twenty artweker thweneyl Egypt-areny-rnem-warl*

<sup>8</sup> Ikwer-penh INGKARTel ilek Moses-atherr Aaron-atherr, "Alenherr-atherr ikwenty inetyek. Moses, ntwa ikwenty inemel, iwa alker-warl, Pharaoh-el ngenh aretyek.

<sup>9</sup> Ikwenty ra ahern-apeny irrem, alherrpel apmer arrpanenh-warl iwem. Ahernel artem Egypt-areny-rnem atnwenth-rnem-then, artweker akngerr irrem ikwer-rnem-itwek. Artweker akngerr arka ingkerr-warl rernem arrernelhem, tywen-angketyarr."

<sup>10</sup> Ikwer-penh Moses-el-then Aaron-el-then ikwenty inek. Ratherrap Pharaoh-warl alhek. Moses-el ikwenty iwek ikwer arrwekel alker-warl. Egypt-areny-rnem ingkerrenh atnwenth-rnem ingkerrenh-then rernem artweker-akert irrek. Rernem artweker-rnem anthwek-anem. <sup>11</sup> Ngangker-akert-rnem Egypt-areny-rnem artweker-akert-anemarl irrek. Nthakenh rernem Moses-angkwarr rtney-angenh. <sup>12</sup> INGKARTel Pharaoh renh awerrelekk arrpemarl. Ra Moses-ek-atherr Aaron-ek-atherr awelhey-angenh. Alakenh INGKARTel arrwekel-antey ilek Moses, Pharaoh-arl ra awerrirrem arrpemarl.

*INGKARTel apertew-rnem iweyel Egypt-areny-rnem-warl*

<sup>13</sup> INGKARTel Moses ilek, "Ingwepenh akemirretyek, Pharaoh renh aretyek. Ila Pharaoh ikwer angka atyenh." Kel Moses ingwepenh akemirrek, Pharaoh-warl iletyek alhek, "Alakenh INGKART Israel-kenhel ngkweng ilem, 'Atyen-hrnem arlpaw-warl alhetyek, rernem atyeng tnakemel inkwerelhetyek. Tyarlewa, arrngert angkey-angenh. <sup>14</sup> Nga apek arrngert angkenty, twenty atha arrekantherr-warl thwene. Atha ngenh irrwampenh-anthetyek, warrkenh ngkwengh-rnem-then, Egypt-areny-rnem ingkerrenh. Ntwa ayenh iterl-aretyek, ayengan Akngey anyentarl aneyel, ingwer apek aney-angenh. <sup>15-16</sup> Atha arrhanthanterrenh atwenty, arrantherrap ingkerrenh ilwenherremarl. Aleyaw arrangkw-anemarl! Mwerr-anemarl nga, iteth-anemarl atha ngenh atnyeneyel. Atha ilek-ilek mpwarey-angker arrangkw-they, ntwa ayenh iterl-aretyek, ayeng arawerrng ilkwakert. Ingwer-rnemel angka atyenh iterl-apeyenh apmer arrpanenh-warl, itna atyenh tnakemel." <sup>17</sup> INGKARTel Pharaoh renh ilek arrpemarl, 'Nga awerr-antey irrpeltherreyel. Nga ahelerreyel atyenh-rnem-kety, tyarlewey-angenh renh-rnem. <sup>18</sup> Atyeng awelh! Ingwelarreng atha thwene apertew, ngkweltyeletyek apmer arrpanenh Egypt-itwek. Arrantherr alakenh apertew arey-angenh, akwerrarl. <sup>19</sup> Warrkenh ngkwengh-rnem thwena apmer arrpanenh-warl. Renh-rnem ila, pwelek-rnem atnwenth ingwer-rnem-then anyenteletyek, warl ikwer-rnem-kenh-warl renh-rnem akwernetyek. Ingwepenh apertewl Egypt-itwek atwem-kety. Ingkerrenh-antey atwem-kety akethel rtneyel-rnem artwernem-then atnwenth-rnem-then. Akethel rtneyel-rnem ingkerrenh ilwenherrem.' Alakenh Moses-el Pharaoh ilek.

<sup>20</sup> Pharaoh-kenh warrkenh-rnemel Moses renh awek, rarl angkenh. Ingwer-rnem arternel ikwer awelhen, rernem INGKART-kety aterirrenh. Rernem warrkenh tyayl-areny-apeny-rnem ikwer-rnem-kenh anamerl-antey ikngwerl-alhek, atnwenth-rnem-then. Rernemap ingkerrenh warl-warl akwernek. <sup>21</sup> Warrkenh Pharaoh-kenh ingwer-rneman Moses-ek awelhey-angenh, angka INGKART-kenhek. Warrkenh-rnem tyayl-areny-apeny-rnem ikwer-rnem-kenh atnwenth-rnem-then rernem akngetyey-angenh warl ikwer-rnem-kenh-warl, akwerney-angenh. Akethel-antey rtnenherrenh.

<sup>22</sup> Ikwer-penhan INGKART angkek Moses-warl, "Akwa alker-warl-athetk atnyena. Atha kwaty apertew-rnem renh-rnem alker-they iwetyek ikwer-rnem-warl, renh-rnem ingkerrenh atwetyek, artwernem-then atnwenth-rnem-then amern-rnem-then ingkerrenh-antey Egypt-itwek." <sup>23-24</sup> Moses-el irrertyet inek, alker-warl-athetk atnyenek. INGKARTel apertew-anem iwek Egypt-warl. Awely-awely angkek, kwaty apertew-akert rntwek Egypt ikwer-itwek. Alakenh inngarl! Apertew akngerr ayntek ahernel. Egypt-arenyel-rnem alakenh-anyem ingwer-inger arey-angenh, aleyant rernem arek! <sup>25</sup> Apertewl ingkerrenh aketh-itwek rtneyel-rnem innga atwek Egypt-ampeny-itwek. Ingkerrenh ywerrerl-alhek aketh-itwek, artwernem-then atnwenth-rnem-then. Amern weyt ingkerrenh atwek, alperr-then arwel-they atwek. <sup>26</sup> Goshen-ampeny-itwek, Israel-kenh-rnem-itwek apertewl atwey-angenh, arrangkwarl.

<sup>27</sup> Pharaoh-el warrkenh ikweren ilantheik, Moses Aaron-atherr ingwerl-alpetyek, ratherr ikwer-warl angketyek. Pharaoh ikwer-atherr ilelhek, "Athan apmwel-areth mpwarek. Ayeng atyenh-rnem-then INGKART-kety ament aneyel. INGKARTarl arrayt inngarl, anwekantherr-apeny-weny ra aneyel. <sup>28</sup> INGKART atyeng ayernenherr-atherr.

Apertew ipmelhetyek awely-awely-then. Ra anwenhantherr atwelyel-kety. Alhewer arrantherr alhetyek, atha arrenhantherrenh tyarlewem, antwerrkey-angenh-anem.”<sup>29</sup>

<sup>29</sup> Moses Pharaoh-warl angkek, “Ayeng tawen nhenh-they alpem. Ayeng alpentyelan, akwa atha alker-warl atnyenem, athap INGKART ngkweng ayernem. Ra apertew ywerrelhileyek. Nthakenh ra apertew thweney-angenh, awely-awely arrantherr nthakenh awey-angenh arrpemarl. Arrantherr ahern nhenh iterl-arem INGKART-kenh-anem. <sup>30</sup> Athan iterl-areyel arrenhantherr, arrantherr Akngay INGKART-kety aterirrey-angenh-antey.”

<sup>31</sup> Arrwekel-antey kwaty apertew-akert rntwey-angenh-antey, antywer arlpenty itna flax lyapek Egypt-itwek apmer arpanenh-itwek. Amern parley lyapek arrpemarl. Flax amern parley-then ampeng-anem irrek apmer arpanenh-itwek. Kwaty apertew-akert rntwek, apertewel flax-then amern parley-then athenemel atwek arrpemarl. <sup>32</sup> Amern weyt-then amern ingweran weyt-apeny-then alerl-antey, ampengirrey-angenh-antey. Apertewel renh-rnem atwek, kel mwerr-antey, lyapenh-antey.

<sup>33</sup> Moses ra Pharaoh iwerl-alhek, tawen-they aketh-warl alhek. Ranem akwa-atherr irrwerlelek alker-warl-athek, INGKART ayernemel. Apertew awely-awely-then kwat� then arterneplek, ywerrek-anem. <sup>34</sup> Pharaoh ra alakenh-anyem arek. Ra apmwel-ayeth mpwarek arrpemarl. Ra awerr arrpemarl irrek, warrkenh ikwer-rnem-kenh-then awerrirrek, awelhey-angenh anen. <sup>35</sup> Pharaoh-el Israel-kenh-rnem nthakenh tyarlewy-angenh renh-rnem, antwerrkek-antey. INGKARTarl alakenh arrwekel-antey angkek Moses-ek, Pharaoh-arl ra awerrirrem arrpemarl.

## 10

### *INGKARTel intely akngerr thweneyel Egypt-warl*

<sup>1</sup> INGKARTel Moses ilek, “Pharaoh-warl angketyek alha. Atha renh warrkenh-rnem-akert awerrelek, ayeng arawerrng rlterrkel iyiparrernelhetyek ikwer-rnem-itwek. <sup>2</sup> Atha renh-rnem atwem-penh, arrantherr ayenh iterl-arayntetyek, ayengan INGKART inngarl aneyel, akngay-arrpanney-rnem ikwer-rnem-kenh arrangkwarl. Ingkern-penhel-rnem ayenh iterl-arayntetyek arrpemarl, aler-rnem-then arrengay-rnem-then artartey-rnem-then rernem ilerrel-anetyek ingkern-theyal, Egypt-areny-rnem atha atwek arawerrng rlterrkel-akertel.”

<sup>3</sup> Moses Aaron-then Pharaoh-warl angketyek alhek. Warl ilkwa ikwerenh-warl aylpenhek, ratherr Pharaoh ikwer-warl angkey-alhek-anem, “Alakenh-anyem INGKART anwernekantherrenh ngkweng-warl angketyek, ‘Nga atyeng arleng-alenty awelhey-angenh, ngap tnakelheylan. Atyenh-rnem apmer arlpaw-warl alhetyek, aker tyenkerr rernem ayenh arrtyemel anthetyek, atyeng inkwerelhemel. Ikwer-rnem arrngert angkey-angenh, tyarlewa renh-rnem! <sup>4</sup> Ngarl arrngert angkety, ntwa atyenh-rnem antwerrkenty, intely-rnem akngerr atha thwenem apmer ngkwennh-warl ingwepenhan. <sup>5</sup> Intely-rnem ingkerrenh arteyeh apmer Egypt-itwek. Nthakenh ahern arey-angeneleyen, intely-rnem artem-kety. Apertewel atwek-penh amern weyt irrpetyap-anem lyapenh. Intely-rnem apetyeyen, amern weyt ingkerrenh arlkweyenh, alperr-then ingkerr-antey. <sup>6</sup> Intely-rnem warl ngkwennh-warl aylpeyenh, warl warrkenh-rnem-kenh-warl-then, warl Egypt-areny-rnem-kenh-warl-then, warl ingkerrenh-warl. Arrwekelenyel-rnem alakenh intely akngerr innga arey-angenh. Egypt-arenyel-rnem alakenh arey-angenh, arrangkw. Aleyant-anem areyenh.” Alakenh Moses Pharaoh-warl angkek, intwemel alpek-anem.

<sup>7</sup> Warrkenh-rnem ikweren Pharaoh ikwer-warl angkek-anem, “Moses nhenhan anwenhantherrenh kwantheyelan. Ra apmwel-areth anwenhantherrenh mpwareyel, apmer nhenh-itwek. Ilek-anem nga menty angkeyel Moses-ekan? Israel-kenh-rnem tyarlewa apmer nhenh-they, rernem arlpaw-warl alhetyek, INGKARTek Akngay ikwer-rnem-kenhek tnakemel inkwerelhetyek. Ntwa iterl-areyel, ra apmer nhenh Egypt kel apmwele.”

<sup>8</sup> Kel warrkenh-rnem alhek, Moses Aaron-atherr ikngwerl-alpek. Pharaoh angkek ikwer-ather, “Ya! Kel alhenherr-arey apmer arlpaw-warl, tnakemel inkwerelhetyek INGKARTek Akngay arrekantherrenhek. Atha arrenhantherr menty tyarlewem, arrngert angkey-angenh-anem. Kel angwenharlap apmer arlpaw-warl alhem. Akngerr?”

<sup>9</sup> Moses ikwer-warl angkek, “Anwernantherr ingkerrenh, artwamp-rnem artwa akely-rnem-then, arelh-rnem-then ampernem-then, pwelek-rnem-then yep-yep-rnem-then ingkerrenh-antey. Anwernantherr apmer arlpawel aney-alhemel, kwenty anwernantherr atnyeneman, INGKARTek inkwerelhetyek.”

<sup>10</sup> Pharaoh Moses-warl angkek, "Arrangkwaw! Athan arrenhantherr tyarlewenty arelh-rnem-then ampernem-then-angkwarz, arrantherr apay-alpekkerr, atwetyek anenhantherr ingkerr Egypt-itwek. Mwanty atyeng awelhenherr-atherr, ament iypelant awey-angenh. Ayeng mwerr-weny arrekantherr anem. Arrantherr arelh-rnem ampernem-then atnwenheyneyek apek? Arrangkwaw! Nthakenh atha renh-rnem tyarlewey-angenh. <sup>11</sup> Arrangkwaw. Artwernament apmer arlpaw-warl alhenherr-arey, INGKARTek tnakemel inkwerelhetyek. Alakenh-anyem mpwelan arrwekel-antey ayerneh. Arelh-rnem-then ampernem-then artenyarl anayntem!" Pharaoh-kenh warrkenh-rnem rernem Moses-atherr Aaron-atherr warl-they irrentek-anem.

<sup>12</sup> Ikwer-penhan INGKARTel Moses ilek, "Akwa irrwerlala alker-warl-athet, Egypt apmer ingkerrenh-angkwarz. Intelty akngerr-anem apetyeyen Egypt ikwer-warl, ingkerrenh-angkwarz arteyenh. Apertewel atherrk atwek-penh, atherrk intweyneylek angkep arrpemarl. Inteltyel-rnem alperr-rnem atherrk ingkerr arlkwem."

<sup>13</sup> Kel Moses-el irrettety ikweren inek, Egypt apmer arpanen-h-warl alhel-arek. INGKARTel alherrp ilkwa akngerrakw-they thwene. Alherrp ra arltel-then ingwel-then aleth innga pwenh. Ingwepenhan alherrp ra intelty akngerr innga akngetyek. <sup>14</sup> Intelty-rnem ahern ingkerrenh artenh, apmer ingkerr artenh, apmer Egypt-itwek. Rernem iterrek, "Aleyant anwantherr arek intelty akngerr innga." Aley anwantherr arey-angenh arrpemarl intelty akngerr innga. <sup>15</sup> Intelty-rnem atnarnpem ahernel. Ahern irrpwrel inngirrek. Apertewel atwekarl-penh, atherrk-rnem arwerl-rnem angkep lyaperrenh. Inteltyel-rnem ingkerrenh-antey arlkwek, atherrk-rnem alperr-rnem-then amern-rnem-then. Egypt-itwek arwerl-rnem ingkerr alperr-weny, atherrk-weny, arrangkw-anem ayntek.

<sup>16</sup> Pharaoh-el anamerl-antey warrkenh ikweren thwene, Moses-atherr Aaron-atherr ingwerl-alpetyek. Pharaoh angkek ikwer-atherr, "Atha INGKART Akngey arrekantherrenh-angkwarz apmwel-areth mpwarek, mpwelek-angkwarz-then. Ayeng mpwelek awelhey-arey. <sup>17</sup> Atyeng ahelerrey-angenh anenher-atherr! Tyarlewenherr-atherr ayenh apmwa atyenh-they, awakelhey-angenh, angkep ayenh atwey-angenh! Mpwel INGKART ayernenherr-atherr, intelty ywerrelhityek anwekantherr-kety. Arrangkwelan, anwantherr ingkerrarl ilwenherrem amern-weny, inteltyel-rnem ingkeren arlkwek!"

<sup>18</sup> Moses-el Pharaoh renh iwerl-alhek, INGKART-warl angkek. <sup>19</sup> INGKARTel Moses renh awekarl angkenh, ran alherrp akngartewek-anem, altwerl-they-anem pwey-alhek-anem. Alherrpel intelty-rnem ingkerrenh kwaty alay-warl-anem iwek. Kwaty alay itnan Apennng-angketyarr. Egypt-itwek intelty arrangkw-anem. <sup>20</sup> Ikwer-penhan INGKARTel Pharaoh renh awerr arrpemarl mpwarek, nthakenh ra Israel-kenh-rnem tyarlewey-angenh Egypt-they.

### *INGKARTel alker renh atwemengkeleyel*

<sup>21</sup> INGKARTel Moses renh ilek. "Akwa irrwerlila alker-warl-athet. Atwemengkirrem Egypt-ampeny-itwek, apmer arrpanen-h, arerrey-angen-hant-arey atwemengkel." <sup>22</sup> Kel Moses ra akwa alker-warl-athet irrwerlilek. Atwemengkirrek-anem Egypt-ampeny-itwek ingkerrenh-angkwarz. Atwemengk ayntek arlta irrpetyek-atwety. <sup>23</sup> Artwernem ingkerrenh nthakenh arerrey-angen-hant-arey, atwemengk ayntek-kety-anem. Arlta irrpetyel rernem alhey-angenh anek, apmer anyentel-antey anenh. Rernem arey-angenh anek arrangkw. Israel-kenh-rnem-itwel Goshen-ampeny-itwel arlta-antey aynteh, rernem arenh-anteyarl. Atwemengkirrey-angenh, arrangkw. Lyenentyel-apeny anenh rernem.

<sup>24</sup> Pharaoh-el thwene, warrkenh renh, Moses ingwerl-alpetyek. Pharaoh ikwer angkek, "Ya! Arrantherr alhenherr-arey apmer arlpaw-warl, INGKART tnaketyek, ikwer inkwerelhetyek. Atha arrenhantherr nthakenh antwerkey-angenh. Arelh-rnem-then ampernem-then atnwenheynenherr-arey. Pwelek-rnem-then yep-yep-rnem-then nanikwet-rnem-then nhel-antey anerl-ayntetyekarl."

<sup>25</sup> Moses tyernek Pharaoh-ek. "Arrangkwaw! Nthakenh anwernantherr pwelek-rnem yep-yep-rnem-then nanikwet-rnem-then akngeynem, anwantherr INGKARTek arrtyemel anthetyek. <sup>26</sup> Anwernantherr yerlirreyel ikwer-rnem ingkerrenh, arrtyemel anthetyek INGKART anwernekantherrenhek. Inpa iterl-arey-angenh, aker ilek-apeny renh anwernantherr antheman, akngerr apek, irrpetye apek. INGKARTel ingwer-inger anwernenhantherr ilem wenh."

<sup>27</sup> INGKARTel Pharaoh arwengkilek, awerr inngarl ranap anenh. Israel-kenh-rnem ra tyarlewey-angenh arrangkw-antey. Rernem anenh-antey. <sup>28</sup> Pharaoh-el Moses iltek,

"Nhenh-they intem-antey alpa, apey-alpey-angenh-anem. Ayeng apey-alpenty, atha ngenh ipmek atwemarl!"

<sup>29</sup> Moses-el renh tyernek, "Mwerr, ntwa ayenl ilek wenh. Ayeng aleth-antey alpetyek. Ayeng apey-alpey-angenh, ngenh aretyek."

## 11

*Moses-el ileyel Pharaoh, "INGKARTel aler awey arrwekelely-rnem Egypt-areny-rnem atweyen"*

<sup>1</sup> INGKARTel Moses arrwekel-antey ilek, "Atha Pharaoh Egypt-areny-rnem-then anyent-inger-antey atweyen. Ikwer-penh ra arrenhantherrenh tyarlewem, arrantherr Egypt-they alhetyek. Pharaoh-el arrenhantherr ingkerrenh irrentem Egypt-they. <sup>2</sup> Israel-kenh-rnem-warl angkeyek alha. Renh-rnem ila, Egypt-areny-rnem ampwal-rnemek thilp-penhek-then gold-penhek-then ayernetyek." Alakenh-anyem INGKARTel arrwekelely-antey ilek Moses-an. <sup>3</sup> Arrwekel-antey Egypt-areny-rnem ilkelhey-angenh anenl Israel-kenh-rnemek. INGKARTel renh-rnem mpwarek, awelhetyek Israel-kenh-rnemek. Egypt-arenyel-rnem iterl-arek Moses renh, artwa mwerrarl ra anenl. Ikwer-penh Israel-kenh-rnem rernem Egypt-areny-rnem ayernek thilpek, gold-ek-then. Egypt-areny-rnemel renh-rnem iltey-angenh arrangkw. Rernem mwerr Israel-kenh-rnem-angkwarr anek. Rernem Israel-kenh-rnem thilp akngerr gold-then akngerr anthek.

<sup>4</sup> Ikwer-penhan Moses angkek Pharaoh-ek, "Alakenh-anyem INGKART ngkweng-warl angkem, 'Ingwa ampepenyel Egypt-itwek ayeng alhayntem. <sup>5</sup> Ayeng ampereraytem Egypt ikwer-itwek, atha aler awey arrekantherrenh-rnem arrwekelely-rnem ingkerrenh atwem. Atha alerengkw ngkwenh awey arrwekelely-rnem atwem arrpemarl. Atha pwelek irrwey arrwekelely-rnem atwem arrpemarl. <sup>6</sup> Ikwer-penhan Egypt-arenyel-rnem artewentyel artnem alerikw ikwer-rnem-kenhek. Artewentyel innga nhephenn rernem artnem. Rernem angkerrem alakenh, "Anwantherr awank alakenh artney-angenh. Ingwer-inger anwantherr alakenh artney-angenh." Rernem iterrek, "Aleyant anwantherr intem-antey artnalhelhirrenh." Aleyan arrangkw-anemarl, intem-antey artnalhelhirrey-angenh ikwer-apeny. <sup>7</sup> R lengk ingwel Israel-kenh-rnem rernem mwerranem anem, akayel atnalhelirreyel. Arengk-rnem Egypt-areny-rnemek rnkernelheyen-harl, arengk-rnem Israel-kenh-rnemek rnkernelhey-angenh arrangkwarl. Israel-kenh-rnemant atha arntartn-areyel. Atha Egypt-areny-rnem arntartn-arey-angenh, arrangkw. Alakenh ntwa iterl-arem ayeng INGKART." Alakenh-anyem INGKART ngkweng-warl angkeman. <sup>8</sup> Ikwer-they warrkenh ngkwenh-rnem atyeng-warl apetyem kwenerrey-alhemel. Rernem angkem, "Moses! Alha nhenh-they, ngkwenh-rnem ingkerrenh atnwenheyina apmer nhenh-they, rernemarl ngkweng awelheyel-rnem." Alakenh-anyem rernem atyeng angkenty, atha renh-rnem iwerl-alhem alhemel-anem." Moses ra ahelerrek, Pharaoh renh iwerl-alhek-anem.

<sup>9</sup> Ikwer-penh INGKART angkek Moses-warl, "Pharaoh ngkweng awelhey-angenh-antey. Atha renh arwengkilek, ayeng rawerrung rletterk-akert aremirretyek Egypt-itwek, ingkerrenhel ayenl iterl-aretyek." <sup>10</sup> Kel arraty. Moses-atherr Aaron-atherr ratherr arawerrung rletterk INGKART-kenh iylparrernenh, Pharaoh-el aretyek. INGKARTel aleth-antey Pharaoh renh awerrt mpwaren, Pharaoh ra awelhey-angenh anenl. Ra Israel-kenh-rnem tyarlewey-angenh-antey, rernem Egypt-they alperlewetyek. Ra renh-rnem arleng-alenty antwerrkenh.

## 12

*INGKARTel ileyel Moses, aker tyenkerr arlkwetyek Anperarl Alhek "Passover"*

<sup>1-2</sup> INGKARTel Moses-atherr Aaron-atherr ilek Egypt-itwek, "Aherrety arpanenhel alkent lyertenly arrantherr iterl-areman, renh itnewem Abib. <sup>3</sup> Mpwel alhenh-atherr Israel-kenh-rnem alakenh-anyem iletyek, 'Mpwelhenh-arey arlta 10-ek-atwety. Ikwer-penhan warlek-artweyel-rnem aker yep-yep inenherr-arey, rernem yep-yep akely atwetyek apmer amentew-ament. <sup>4</sup> Irrpetyapant apek warl anyentel anem, rernem apek aker yep-yep nthakhen arlkwey-angenharl warl anyent-itwek ywerrelhilemel, irrpetyapelan. Apmwarl alakenhan, rernem anyenterremel arlkwentyan mwerrarl, akngerrelarl atrnwenth ywerrelhilemelarl arlkwem. <sup>5</sup> Yep-yep ilek-apeny arrantherr rlwanem wenh, arlkwetyek? Yep-yep ampwerrk aherrety anyentel ilkwerrek irrwey mwerr-angker rlwanetyek, alyelk inngarl. Yep-yep-wenyelan nanikwet irrwey akely rlwanenherr-arey."

<sup>6</sup> INGKARTel renh-atherr ilek, "Yep-yep renh inenty, arrantherr renh arntarntaretyek arlta 4-ek-atwety. Ikwer-penhan ingkeny aylpenhentyelan, Israel-kenh-rnem arrantherr aker yep-yep atwetyek-anem inkwartereyel, warl arrpanenh-itwek-anem. <sup>7</sup> Ikwer-penhan arrantherr warl arriw akern-ampeny yep-yep-penh arrngel aperneteyek, irrker-atherr-then warl arrpanenh-itwek, warl yep-yepparl arlkwek-penh-rnem-kenhant. <sup>8</sup> Ingwa ikwerel-antey yep-yep rwel amperneteyek. Aker renh arrantherr arlkweytyek, alperr tyekertel-then amern ilperr-ilperr-then. <sup>9</sup> Aker arleyt arlkwey-angenh. Kwatyal amperney-angenh arrangkw. Aperrickl arrantherr aker renh amperneteyek, akapwert-then arlaw-atherr akwa-atherr analty-then ingkerrenh-antey. <sup>10</sup> Ingkerrenh arlkwenherr-arey. Ingkeny tyerrelhenhey-ahlentyel, aker ampeny apek ayntentyan, arrantherr arlkwey yang menty aretyek. Rwewarl iwenh-arey, aker ampeny ingkerrenh-antey ikwentyirremel ampeteyek."

<sup>11</sup> INGKARTel renh-atherr ilek, "Alakenh-anyem arrantherr aker arlkwetyekan. Aker arlkwey-alentyel, arnkwel aylpeteyek pwetel-then. Irretety inenherr-arey, arrantherr alethel alpeteyek. Aker-then amern-then anamerl-antey arlkwenherr-arey wenh. Tyenkerr nhanyem INGKART-kenh arrantherr itnewem Anperarl Alhek 'Passover'. <sup>12</sup> Ingwa ikwerel-antey ayeng alkerel alhayntem Egypt-angkwarr. Atha alerikw awey arrwekeleny-rnem-then atnwenth irrwey arrwekeleny-rnem-then ingkerrenh atwem Egypt-itwek. Ayeng INGKART innga, arawerrng rlterrk ilkawert. Egypt-arenely-nemaril ingkart-arrpanety-rnem mpwarek apwert-penh arwerl-penh-then, rernem apenteyel kwenrirrerl-anemel ikwer-rnem-warl. Atha renh-rnem ywerrelhilem. <sup>13</sup> Arnga atha arenty arriw-itwek, ayeng anperarl alhem, awey arrekantherrenh arrwekeleny-rnem atha atwety-angenharl. Atha Egypt-areny-rnemant atwem. <sup>14</sup> Rlengk-they arrantherr arlta nhenhek iylpangkerl-ayntetyek. Aherrety arrpanenhel alkent lyerten Abib irrentyel, arlta impenel, arrantherr kwenty atyeng inkwerelhemel arlkwetyek. Aler-rnem-then arrengey-rnem-then artartey-rnem-then arrekantherrenh rernem inkwerelhemel angkayntetyek atyeng-warl intem-antey.

<sup>15</sup> Arrantherr tyenkerr Anperarl Alhek 'Passover' arlkwek-penh, kwenty ingwer arrantherr arlkwaytenherr-arey arlta 7-ek-atwety. Amern ilperr-ilperrant arrantherr arlkwerl-ayntem arlta 7-ek-atwety. Amern pikinpat-akert arlkwey-angenh, arrangkw. Arlta arrwekel ikwerel, pikinpat warl-they inemel iwetyek, arlkwey-angenh. Ingwerentyel amern pikinpat-akert arlkwenty arlta 7-ek-atwety, arrantherr renh irrentenherr-arey intem-antey. Atyenh-wenyarl ra. <sup>16</sup> Arlta anyent arrwekel ikwerel-anem arrantherr akarrirretyek, atyeng inkwerelhetyek wenh arlta anyent ingkern 7 ikwerel-then. Arlta atherrel, nthakenh arrantherr warkirrey-angenh, arrangkw. Warkant ipmenherr-arey, amernant alhewer ampernemel. <sup>17</sup> Arlta 7-ek-atwety alakenh-anyem arrantherr amern tyenkerr arlkwem, itnan 'Amern Ilperr-ilperr'. Arrantherr amern ilperr-ilperr arlkwem, arrantherr iterl-arerl-ayntetyek, atharl arrenhantherr Egypt-they atnwenheynem. Rlengk-they aler arrekantherrenh-rnem-then arrengey arrekantherrenh-rnem-then artartey-rnem-then rernem iterl-arayntem, iylpelerrey-angenh arrangkwari. Arrantherr nhenh-angkwarr apenterl-ayntetyek, atha arrernek-angkwarr. Arrantherr intem-antey kwenty arlkwayntetyek. <sup>18</sup> Aherrety arrpanenhel alkent arrwekel arrantherr itnewem Abib. Abib ra irrentyel, arrantherr anenherr-arey arlta 14-ek-atwety. Mpwelhenn-arey ingkeny aylpenhentyek. Ikwer-penhan amern ilperr-ilperrant arlkwenherr-arey. Amern ilperr-ilperr arlkwenherr-arey arlta 7-ek-atwety. <sup>19-20</sup> Pikinpat iwenherr-arey warl-they, amern ilperr-ilperr arlkwey-alenty. Ingwerentyel amern pikinpat-akert arlkwenty, renh irrentenherr-arey, aleth-antey alpeteyek. Arlta 7-penh, ingkeny tyerrelhenh-penh arrantherr alhewer amern pikinpat-akert arlkwetyek. Nhenh atha arrekantherr arrernek, arrantherr Israel-kenhel-rnem angka nhenh apentetyek, ingwerl-rnem arrekantherr-itwek aneyel-rnem-then. Apmer ingwel apek aney-alpenty, amern ilperr-ilperr arlkwetyek-antey arlta impen ikwerel, angka nhenh apentemel." Alakenh INGKARTel Moses-then Aaron-then ilek.

<sup>21</sup> Ikwer-penhan Moses-el artwa thwenek, artwamp Israel-kenh-rnem ingwerl-alpeteyek. Moses ra angkek ikwer-rnem, "Anyent ingkerrenh yep-yep akely anyentarl anyentarl ineynenh-arey. Atwenherr-arey, aker tyenkerr apmer amentew-ament arrantherr arlkwetyek. <sup>22</sup> Yep-yep atwentyel, arrnga tyampit-warl thelenh-arey. Ikwer-penhan alperr tyekert arrnga-warl apelyele. Arriw-warl apernem akern-ampeny irrker-atherr. Arrantherr anenherr-arey warl kwenel-antey ingwepenhek-atwety. Aketh-warl tyerrelhey-angenh. <sup>23</sup> Ingwel rlengl INGKART ampererrarl-ayntem antyerl atwety-angker-akert. INGKART-then antyerl-then ratherr atwerl-apayntem Egypt-areny-rnem. INGKARTel arrnga arriw-itwek arenty, anper-antey alhem, arrenhantherr atwety-angenh. INGKARTel antyerl atwety-angker artwerelem, arrenhantherr atwekkerr."

<sup>24</sup> INGKARTel ilek, "Arrantherr angka nhanyem apentenherr-arey intem-antey. Yep-yep akely arrantherr atwenherr-arey aherrety arrpanenhel, intem-antey. Angka nhenh atha arrernek arrekantherr, aler-rnem-then arrengey-rnem-then artartey-rnem-then, arrantherr apenterl-ayntetyek intem-antey." <sup>25</sup> Arrantherr anerl-ayntetyek apmer wethel, atharl arrenhantherr alhelekel, angka nhenh yep-yep-akert apenterl-ayntenherr-arey intem-antey. <sup>26</sup> Ingwer-inger aler arrekantherrenh alakenh ayernenty, 'Ilekekarl aker tyenkerr yep-yep anwantherr arkwewyel? Ilekekarl yep-yep anwantherr atwelyan alakenh?' <sup>27</sup> Rernem alakenh-anyem ayernenty, arrantherr alakenh arraty-antey iletyek, 'Aker tyenkerr anwantherr arlkwem, INGKARTek inkwrelhemel, rarl anwenhantherr Egypt-they atnwenhey-alpek apmer nhenh-warl. Anwantherr Israel-kenh-rnem Egypt-itwek anen htyayl-areny-apeny. INGKART alkerel alhek, ra Egypt-areny akngerr atwek, alerikw arrwekeleny-rnem ikwer-rnem-kenh atwek. Rap alkerel anper-antey rwaylpen-hek warl-rnem anwekantherrenh-rnem-angkwarr. Ra menty arek anwernehantherr atwely-angenh. Anwernehantherr ilwekerr atnyenek.' Israel-kenhel-rnem awek-pen, rernem ampwethel arrernalhek kwenerremel, INGKARTek inkwrelhemel. <sup>28</sup> Ikwer-pen-hen rernem apmer-warl-anem alpek. Yep-yep rernem atwek, warl-anem arriw ingkerrenh arrngel aperneyen, INGKARTel Moses-then Aaron-then ilek-angkwarr-antey.

#### *INGKARTel awey alerikw arrwekeleny-rnem Egypt-areny atwelyel*

<sup>29</sup> Ingwa ampepenyel INGKARTel awey arrwekeleny-rnem ipmek atwek ingkerrenh Egypt-areny-rnem-kenh. Pharaoh-kenh awey alerikw arrwekeleny ipmek atwek, awey alerikw arrwekeleny-rnem warrkenh-rnem-kenh-then ipmek atwek ingkerrenh-antey. Pwelek irrwey arrwekeleny-rnem yep-yep-then ingkerrenh-antey ipmek atwek arrpemar. <sup>30</sup> Ingwa ikwerel-antey Pharaoh-then warrkenh ikweren-hrnem-then ingkerrenh Egypt-areny-rnem-then akemerrek warl ingkerrenh-itwek. Aler awey arrwekeleny ikwer-rnem-kenh ingkerrenh ilwek. Rernem ingkerrenh artnalhelirrek aler ikwer-rnem-kenhek.

#### *Israel-kenh-rnem Egypt renh iwerl-alheyel, apmer arlpaw-warl alhemel*

<sup>31</sup> Ingwa ikwerel-antey INGKARTel awey alerikw arrwekeleny atwek, pwelek-rnem-then, Pharaoh-el warrkenh thwene, Moses Aaron-then ingwerl-alpetyek, renh awetyek. Ra ikwer-atherr angkek, "Arrantherr Israel-kenh-rnem alpenherr-arey, anwernehantherr ipmemel. Anwernehantherr-itwek aney-angenh-anem. Apmer arlpaw-warl alhewer alhenherr-arey, INGKARTek tnakemel inkwerelhetyek." <sup>32</sup> Yep-yep-rnem pwelek-rnem-then atnwenheyenel ingkerrenh-antey. Alhenherr-arey ikwer-rnem-akert apmer arlpaw-warl. INGKART-anem ayernen-hatherr, ayen-then arntarnt-aryntetyek." Alakenh-anyem Pharaoh-ilek Moses-atherr Aaron-atherr. <sup>33</sup> Egypt-arenyel-rnem Israel-kenh-rnem ilek, "Arrantherr Egypt-itwek anayntem, anwernehantherr ingkerrenh-antey ilwenherrem! Anamerl apmer-they alpenherr-arey!"

<sup>34</sup> Israel-kenh-rnem rernem arrwekel-antey ar lengarr amern arleyenp-warl kwaty thelek, amern mpwaretyek. Pikinpat arrerney-angenh-antey. Israel-kenh-rnem anyentarl-anyentarl ar lengarr amernenp renh arrernek-anem yakweth-warl. Yakweth amernenp renh arertnek anpeth-warl, akngeyn-ayntetyek. <sup>35-36</sup> Moses-el arrwekel-antey Israel-kenh-rnem ilek, rernem Egypt-areny-rnem ayerneytek thilpek gold-ek-then arnkwer nemek-then. INGKARTel arrwekel-antey ilek Egypt-areny-rnem, rernem mwerr-angkwarr anetyek Israel-kenh-rnemek. Egypt-areny-rnemel ampwal-rnem arwa ahewer-anem antek Israel-kenh-rnemek.

<sup>37</sup> Israel-kenh-rnem apmer Rameses ikwer-they anperl-alhek, apmer Succoth-warl alhenh. 600,000-pel artwernem ingketyl alperlewenn, arelh-rnem-then ampernem-then.

<sup>38</sup> Apmer ingwer-areny-rnem alhek armpemar, Israel-kenh-rnemel-arleng. Rernem ingkerrenh-antey alhekan. Yep-yep-rnem pwelek-rnem-then nanikwet-rnem-then akngerr atnwenheynek. <sup>39</sup> Ingwa ampepel-antey rernem aynteyarr-alpek, amern ilperr-ilperr amperneyarr-alpek, pikinpat-weny arrangkw, anamerlari rernem anpenhew-kety, arlwar rtnelhelenh arrangkwarl.

<sup>40</sup> Egypt iwerl-alhey-alenty Israel-kenh-rnem arleng-alenty Egypt-itwek anen, aherrety 430-ek-atwety rernem anen. <sup>41</sup> INGKART-kenh-rnem ingkerrenh alperlewek arlta ikwerel Egypt-they. <sup>42</sup> Ingwa ikwerel INGKARTel Israel-kenh-rnem arntarnt-arem el atnwenheynek Egypt-they. Israel-kenhel-rnem ingwa anyent aleth-antey iterl-arem, iyplerrey-angenh. Rernem ingwa nhenhel atyek-antey arntarnt-arelhetyek aleth-antey. Rernem iterl-arey-areny, INGKARTel arrwekeleny-rnem arntarnt-arek.

<sup>43</sup> Ikwer-penhan INGKARTel ilek Moses-atherr Aaron-atherr, "Angka nhenh atha arrekantherr arraty ilem aker tyenkerrek itnan Anperarl Alhek 'Passover', arrantherr

mwerr-angkwarr apenterl-ayntetyek, tyenkerr atnyenetyek. Israel-kenhel-rnemant alhewer yep-yep nanikwet-then arlkwem. Apmer ingwer-arenyel-rnem nthakenh alakenh arlkwey-angenh.<sup>44</sup> Israel-kenhel apek warrkenh apmer ingwer-areny inem payemeleyek. Kel artwerrenty-penhel warrkenh rap aker tyenkerr alhewer-anem ra arlkwem. Warrkenh ra ampa apek, nthakenh aker tyenkerr arlkwey-angenh, arrangkarl.<sup>45</sup> Alethang apmer ingwer-areny, warrkenh alyepearl warrkirreyel arrekantherr-itwel, nthakenh ra aker renh arlkwey-angenh arrangkw."

<sup>46</sup> INGKARTel ilek, "Arranther Israel-kenhel-rnem aker arlkwenty, warl kwenitwek anayntetyek. Aketh-warl tyerrelhey-angenh, aker arlkwetyek. Aker ngkvernrlweth-akey-angenh.<sup>47</sup> Israel-kenh-rnem arranther ingkerrenhel arlkwenherr-arey.<sup>48</sup> Apmer ingwer-areny ilkelhenty aker tyenkerr renh arlkwetyek, artweweny-antey apek, artwemernt renh mpwaretyek ikweren-hrnem-then, aker renh arlkwey-alenty. Aker alhewer-anem arlkwetyek ikwer-rnem-itwel. Artweweny ra nthakenh arlkwey-angenh.<sup>49</sup> Angka nhenh Israel-kenh-rnemek ikwerel aneyel-rnemek-then. Arranther ingkerrenh angka nhenh mwanty apentetyek." Alakenh-anyem INGKARTel ilek Moses-atherr Aaron-atherr aker tyenkerrek, itnan Anperarl Alhek "Passover". Ikwer-penhan Moses-atherr Aaron-atherr ratherr alhek, Israel-kenh-rnem ileyek.

<sup>50</sup> Israel-kenh-rnem INGKARTek awelhenh, rarl renh-rnem ilanthek-angkwarr-antey, tyenkerr arlkwetyek. <sup>51</sup> Arlta ikwerelan INGKARTel Israel-kenh-rnem Egypt-they atnwenhek, ingkerrenh-antey.

## 13

### Aler awey arrwekelely INGKART-kenhant

<sup>1-2</sup> INGKART angkek Moses-ek, "Israel-kenh ingkerrenh ila, 'Artwa arelh-then ratherr awey arrwekelely INGKARTek anthetyek, warrkir-ayntetyek ikwer. Pwelek irrwey akely arrwekelely Israel-kenhel-rnem tyenkerr INGKARTek anthetyek arrpemarl. Yep-yepl-then nanikwet-then tangkey-then irrkaty-angkwarr ikwer anthetyek arrpemarl. Arrwekelely-rnemant INGKART-kenh ingkerrenh, ingwer-rnem mentyarl.'

<sup>3</sup> Moses angkek Israel-kenh-rnemek, "Arlta nhenh arranther Egypt-they anperal-alhem. Nhethay-anyem arranther iterl-arayntetyek arlta anyent impen nhenh, iylpelerreyang. Arranther warrkirrenh tyayl-areny-apeny Egypt-itwel. INGKARTel arrenhantherr atnwenhey-alpek arawerrng rlterkel. Arlta nhenhelan amern ilperr-ilperrant arranther arlkwetyek. Amern pikinpat-akert arlkwey-angenh, mentyarl.

<sup>4</sup> Alkent nhenh arranther itnewem Abib. Arlta nhenh arranther anperal-alhek Egypt-they. <sup>5</sup> Awank-akerr INGKARTel ilek Abraham-ek, Isaac-ek-then, Jacob-ek-then, arrwekelely-rnem arrekantherrenhek, apmer Canaan anthetyek arrekanther. INGKARTel alhelek ikwer-rnem, 'Ingwer-inger atha apmer nhenh ingkern-penh-rnemek ngkwenh-rnemek anthem. Lyertan apmerel aneyel Canaan-areny-rnem, Hitt-kenh-rnem, Amor-areny-rnem, Hiv-areny-rnem, Jebus-areny-rnem.' Angka nhenh arraty innga! INGKARTel arrenhantherr amern-angketyarr-warl atwenheyneyen. Apmer ikwerel aney-alpentyek, arlta impen anyentel renh atnyenetyek aherrety arpanenhel, arranther iterl-arayntetyek. Arranther akarrerr-ayntetyek aherrety arpanenhel, iylpangkerl-ayntetyek, arrantherarl Egypt-they alpek. <sup>6</sup> Arranther akarrerrentyel, amern ilperr-ilperrant arranther arlkwetyek arlta 7-ek-atwety. Amern pikinpat-akert arranther arlkwey-angenh, mentyarl. Arlta anyent ingkernel 7-el arranther kwenty atnyenetyek, INGKARTek inkwerelhemel. <sup>7</sup> Nhenhan arraty. Apmer ikwerel, arlta 7-ek-atwety amern pikinpat-akert nthakenh arlkwey-angenh, mentyarl. Pikinpat iwenherrarey ingkerrenh-antey."

<sup>8</sup> Moses-el ilek, "Arrantherarl tyenkerrek akarrirrenty, arranther alerikw-rnemek tyenkerr anayntiletyek, rernem iylpangketyek, 'INGKARTel anwernenhantherr atnwenhey-alpek Egypt-they. Ran anwernenhantherr arntarnt-arek. Alakenh-anyem anwantherr akarrerirreyel, ikwer iterretyek, amern ilperr-ilperr arlkwetyek.'

<sup>9</sup> Arranther INGKARTek iterrel-ayntetyek, rarl arrenhantherr arntarnt-arenh. Arranther angka Akngey-kenh arnkewarl, iytelarr-warl ingkwernem arrernelhemel ilyewarl, akapwert-warl. Alakenh iylpelerrey-angenh anayntiletyek, angka ikweren-hek intem-antey awelherl-ayntetyek, arranther iterl-arem, rarl arawerrng rlterkel arrenhanther Egypt-they atnwenhey-alpek. <sup>10</sup> Atyeng awelhennh-arey! Aherrety arpanenhel alkent Abib ikwerel, arranther aleth-antey aker tyenkerr-then amern ilperr-ilperr-then arlkwayntetyek."

<sup>11</sup> Moses-el ilek, "INGKARTel arrenhantherr apmer ikwer-warl atnwenhem, apmer Canaan-warl. INGKARTel alhelek, 'Atha apmer arrekanther anthetyek.' Apmer

irrkaty ra alhelek arrwekeleny-rnemek, ra apmer ikwer-rnem anthetyek. <sup>12</sup> Apmer ikwerel aney-alpentyel, angka nhenh-angkwarr apenterl-ayntetyek. Avey arrwekeleny-rnem INGKART-kenh ingkerrenh anem. Pwelek irrwey akely arrwekeleny tyenkerr INGKARTek-anem anthetyek, yep-yep-then tangkey-then. Renh-rnem ipmek atwetyek INGKART-kenh-angkwarr, alakenh renh-rnem anthetyek INGKARTek. Irrwey arrwekeleny-rnemant INGKART-kenh ingkerrenh anem. <sup>13</sup> Tangkey irrwey akely arrwekeleny-akert apek, arrantherr arrekantherr atnyen-ayntetyek. Alakenh-anyem mwerr. Tangkey ntwa atnyenentyel, ntwap yep-yepearl atwemel anthetyek INGKARTek. Ikwer-penhan ntwa tangkey yanh ngkwenhant-anem atnyena. Yep-yep atwey-angnenhel, tangkey yanh atwa rtemal arternemel INGKARTek, yep-yep mentyarl. Avey arrwekeleny-rnem arrekantherrenh arrantherr INGKART-they angkep payemeleyek.”  
...

#### *INGKARTel Israel-kenh-rnem iylparrerneyel, nthenh-angkwarr rernem alhetyek*

<sup>17</sup> Pharaoh-el Israel-kenh-rnem Egypt-they tyarlewk-penh, Akngeyel renh-rnem atnwenhey-angnenh iwerr Philistia-angkwarr. Iwerr Egypt-they arraty-antey aynteyneyel Philistia-angkwarr apmer Canaan-warl. Akngeyel iterrenh, “Atha Israel-kenh-rnem atrwenhenty iwerr Philistia aynteyel-angkwarr, ahelengkwel-rnem renh-rnem ater-anthekkerr, renh-rnem atwey-ayntekkerr. Rernem angkep alpekerr Egypt-warl. Menty, iwerr ingwer-angkwarr atha atnwenheyenem.” Alakenh-anyem Akngey ra iterrek. <sup>18</sup> Apmer arlpaw-angkwarr ra atnwenhek amperang-amper kwaty ilkwa ingwer-ampeny-warl, itnan alay Apenng-angketyarr. Israel-kenhel-rnem irrryart-then alkwert-then atnyenenh, rernem atwerretyek.

<sup>19</sup> Moses-el Joseph arrewaly ngkwern akngeyennh. Awank-akerr Joseph ra ilwey-alenty, ra awayikw-rnemek angkek alakenh-anyem, “Akngeyel arrenhingkerr arntarnt-arem. Ra arrenhingkerr atnwenheyen Egypt-they. Arringkerr arraty ayen alheletyek, ayeng ilwenty, arringkerr arrewaly ngkwern ayen akngeynetyek apmer Canaan-warl, ikwer-itwek akwernetyek.” Kel alakenh-anyem Joseph renh alhelek awayikw-rnemel.

<sup>20</sup> Israel-kenhel-rnem Egypt iwerl-alhek-penh, rernem apmer Succoth-itwek ayntenh. Ikwer-penhan rernem apmer Etham-warl alpek. Etham arrer-antey apmer arlpaw-itwek. <sup>21-22</sup> INGKARTel ikwer-rnem iylparrernek, nthek-angkwarr rernem alhetyek. INGKART ra arrwekel alhenh, iwerr ikwer-rnem arratyilemel, rernem renh arraty apenteny-ayntetyek. Artel ra alhenh kwenpay arlpenty-angkwarr. Ingwelan ra kwenpay arlpenty lherrm-akertel yerlirrenh ikwer-rnemek, rernem apentetyek. Iwerr arratyileynenh, rernem apentetyek apmer ikwer-warl. Renh-rnem alakenh-anyem atnwenheyenenh ingwa arrpananel arlta arrpananel, aleth-antey. Renh-rnem iwerl-alhey-angnenh.

## 14

<sup>1-2</sup> INGKART angkek Moses ikwer-warl, “Ila Israel-kenh-rnem apmer Pi Hahiroth ikwer-warl angkeperretyek. Ila renh-rnem apmer ampepel aynteynetyek, arrerentyel apmer Migdol kwaty alay itnan Apenng-angketyarr-itwek. Ikwer-itwek aney-alpetyek, kwaty alay impalthe. Apmer Baal’Zephon alay intwar-ampeny-itwel aneyel. <sup>3</sup> Pharaoh ra alakenh-anyem iterrem, ‘Ya nthakenh Israel-kenh-rnem anterrey-angnenh aleyan, rernem iterl-areyang, nthek-angkwarr alpetyek wenh. Rernem atyengety anterrey-angnenh. Arrangkw aleyan. Atha renh-rnem antwerrkeyen arrer-antey arlpaw-itwek.’ Alakenh-anyem Pharaoh ingwer-inger iterretyek. <sup>4</sup> Atha Pharaoh arwengkilem, ra arrenhantherr alwernetyek. Atha ahelengkw-rnem ingkerrenh ilwerl-athenem atwem. Ikwer-penh arrantherr iterl-aretyek, ayeng rliterrk ilkwa-akert aneyel. Arrantherr ayen traketyek inkwerelhemel. Egypt-areny-rnem rernem iterl-arem-anem arrpemarl, ayeng INGKART ingkerrenhek aneyel.” Alakenh-anyem INGKART angkek Moses-warl. Israel-kenhel-rnem awek, INGKARTarl Moses-warl angkek. Kel rernemap apmer Pi Hahiroth-itwek ayntey-alpek.

#### *Pharaoh artwa atningk ikwerenh-rnem-akert artenhirreyel Israel-kenh-rnemek*

<sup>5</sup> Ingwerentyel Pharaoh renh ileytek alhek, “Israel-kenh-rnem anterrek.” Pharaoh elarl awek-penh, rap atyetyart ampep-rnem-then angkek, “Ilekek anwantherr intwarek wenh, antwerrkey-angnenhan? Rernemarl kel anterrekan! Anwantherr renh-rnem antwerrkey-areny! Angwenh-rnem-anem anwekantherr warrkirreyenhan?” <sup>6</sup> Pharaoh ra pakey nantewelarl atyeng-akngenh-warl nganerl-alhek. <sup>7</sup> Ra ikngwerl-alhek artwa ahelengkw-rnem 600-pel. Rernem alkwert-rnem-then irrryart-rnem-then inerl-alhek, pakey-rnem-warl nganerl-alhetyek, atwerretyek. Rernem ingkerrenh Pharaoh-angkwarr alhek. Ahelengkw atyetyart-rnem alhek arrpemarl pakey-akert. <sup>8</sup> INGKARTel

Pharaoh renh arwengkilek. Pharaoh-el atningk ikweren-hrnem-akertel Israel-kenh-rnem alwernek, renh-rnem atwetyek-anem. Israel-kenh-rnem rlterrk innga alhenh-antey, alhengkerirrey-angenh. <sup>9</sup> Pharaoh ra ahelengkw ikweren-hrnem-akert Israel-kenh-rnem arrererrelhek apmer Pi Hahiroth-itwek, kwaty alay itnan Apennng-angketyarr ikwer-itwek. Apmer Baal Zephon intwar-ampeny kwaty alay.

*Israel-kenh-rnem artarnpenheyel artempel intwar-ampeny-warl, kwaty alay Apennng-angketyarr ikwer-angkwarr*

<sup>10</sup> Israel-kenhel-rnem Egypt-areny-rnem arrer-anem apetyenty arnarek. Rernemap aterirrek, INGKARTek-anem arlek, ra renh-rnem arntarnt-aretyek ahelengkw-rnem-kety. <sup>11</sup> Rernem Moses aytarrp-ilek, “Ilek! ntwa anwernenhantherr Egypt-they atnwenhey-alpek? Anwantherr ingkerrenh ilweyeh wenh! Egypt-itwek anwantherr aney-areny, ikwer-itwek anwantherr ilweyek-atwety! <sup>12</sup> Anwernenhantherr ngkweng ilelhek Egypt-itwek, ‘Aney wenh anwernenhantherr nhel-antey, menty alpey-angenh warrk-anem irremel.’ Alakenh-anyem anwernenhantherr arrwekel ngkweng ilelhekan! Ntwa anwernenhantherr ilek, anwernenhantherr ngkweng-angkwarr alhetyekarl! Aleyan anwernenhantherr arlpawek ahelengkw-rnemel atweyehn ingkerrenh-antey!”

<sup>13</sup> Moses angkek, “Kel mwerr! Aterirrey-angenh! Rlterrk anenherr-arey! INGKARTek anwantherr nhnenh mpwelhey, rarl anwernenhantherr ingkerrenh arntarnt-aremarl. Anwantherr Egypt-areny-rnem arrer-anem arnareyel, nhepuhan anwantherr renh-rnem areyang-anem. <sup>14</sup> Arternpant anetyek. INGKARTel Egypt-areny-rnem ingkerrenh atweyehn.”

<sup>15</sup> Ikwer-penh INGKART angkek Moses-warl, “Ilek! ntwa atyeng arlkeyelan wenh? Israel-kenh-rnem ila, kwaty alay Apennng-angketyarr-warl alhetyek. <sup>16</sup> Irretety irrwrelala, irrertetyel kwaty-warl alhel-ara. Kwaty amentant-atherri irretetyek, ampepan ahern artwerretyarl aytetyek, arrantherri alhetyek ikwer-angkwarr. <sup>17</sup> Atha Egypt-areny-rnem arwengkileyeh. Alakenh rernem arrenhantherr alwernem kwaty-angkwarr. Alakenh-kety atha renh-rnem kwatyek akwernem, rernem arrenhantherr alwernekerr. Atha ingkerrenh ilwerl-athenem, Pharaoh-then ahelengkw-rnem-then pakey-akert-rnem-then nantew-akert-rnem-then. Ikwer-penh arrantherri ayenl iterl-aretyek, ayeng rlterrk ilkawakert aneyel. Arrantherri ayenl tnaketyek inkwerelhemel. <sup>18</sup> Ikwer-penhan Egypt-arenyel-rnem rernem iterl-arem, ayeng INGKART ingkerrenhek aneyel.” Alakenh angkek INGKART Moses-ek.

<sup>19</sup> Antyerl Akngey-kenh arrwekel alhayntenh Israel-kenh-rnemek, ra ikwer-rnem yerlirek, rernem renh apentetyek. Kwenpay arlpenty arrwekel alhenh ikwer-rnemek arrpemarl. Kwenpay antyerl-then ingkernel-anem alpek. Antyerl renh-rnem arntarnt-arayntetyek Egypt-areny-rnem-kety. <sup>20</sup> Kwenpay ampepel-anem irrek, Israel-kenh-rnem-thelek Egypt-areny-rnem-thelek. Ingwerrek-anem. Kwenpay Israel-kenh-rnemekant arrtyernenh-antey. Israel-kenh-rnem lyenentyl arenh-antey ingwel, mwerr alhenh. Kwenpayel artek Egypt-areny-rnem, renh-rnem arey-angenhelek-anem. Atwemengkirrek ikwer-rnem-itwekant. Rernem ingwel Israel-kenh-rnem arrererremel atwekerr; alakenh-kety atwemengkirrek.

<sup>21</sup> Moses-el kwaty renh-anem alhel-arek irrertety ikwerel. INGKARTel alherrp thwenek, akngerrakw-they ingwel aleth pwenh. Kwaty akwarrant-atherri antwerkenh, ampepel ahern artwerretyarl aytetyek. <sup>22</sup> Israel-kenh-rnem ahern artwerretyel anperl-alhek kwaty ampepel-antey. Kwaty akwarrant-atherri rtney-alpek apwert-areny. <sup>23</sup> Pharaoh pakey-akert-rnem-then nantew-akert-rnem-then rernem ingkern-they renh-rnem apentek, kwaty ilkwa-angkwarr. <sup>24</sup> Atwemengkel-antey ingkeny tyerrelhey-angenh-antey, INGKARTel Egypt-areny-rnem arek kwenpay lherrm-akert-they. Renh-rnem arwengkelek, rernem apatemetl ywarn iterrenh. <sup>25</sup> Pakey-kenh weyl aylpek ahern rtwel-anem, rernem ywarn ayteng-inenh. Egypt-areny-rnem arlkahelerrek, “Anwantherr Israel-kenh-rnem menty ipmey-areny renh-rnem! INGKARTel renh-rnem arntarnt-areyel-kety, ikwer-rnem-they atwelyel-kety!”

<sup>26</sup> Israel-kenh-rnem artempel intwar-ampeny-warl irrek, INGKARTel Moses ilek-anem, “Irretety irrwrelala, kwaty-anem alhel-ara ikwerel. Alakenhan kwaty ra angkep-anem anterrey-alpetyek, Egypt-areny-rnem artenhetyek, pakey-rnem-then nantew-areny-rnem-then ingkerrenh-antey. Kwatyel akwernetyek renh-rnem.” Alakenh INGKARTel Moses renh ilek. <sup>27</sup> Kel Moses-el kwaty alhel-arek irrertetyel. Ingkeny tyerrelhenn-anem.

Ra alhel-arek-penh, kwaty angkep anyenterrenhey-alpek. Egypt-areny-rnem angkeper-reynetyek arrkernelhek ywarn-antey. INGKARTel renh-rnem ilwerl-athenek ingkerrenh-antey kwaytel. <sup>28</sup> Innga kwaty angkeperrek, kwaytel ahelengkw-rnem-then pakey-akert-rnem-then nantew-areny-rnem-then ingkerrenh akwernenhek. <sup>29</sup> Arrwekel-antey Israel-kenh-rnem ahern artwerretyel alperlewenh ampepel-antey. Kwaty akwarrant-atherrtney-alpek apwert-apeny. Kwaty alay intwar-ampenyal Israel-kenh-rnem iteth-antey ingkerrenh rtney-alhek.

<sup>30</sup> Alakenh-anyem INGKARTel Israel-kenh-rnem arntarnt-arenh Egypt-areny-rnem-kety. Israel-kenh-rnemel Egypt-areny arrewaly ingkerrenh rernem arek, kwaty impaltherlarl aynten. <sup>31</sup> Rernem iterl-arek, INGKARTelarl renh-rnem arntarnt-arenh arawerrng rlterrk. Akater-anem rernem rtnenherrenh, angkerrenh-anem, "Innga INGKART ra rlterrk ilkawakert. Anwantherr ingkerrenhel renh iterl-arayntetyek, rarl anwenhantherr arntarnt-arek Egypt-areny-rnem-kety. Anwantherr Moses renh apent-antey, INGKARTel innga renh atyetyart arrernek anwekantherr."

## 15

<sup>1</sup> Moses Israel-kenh-rnem-then arlen-alenty aylelheyl, INGKARTek inkwerelhemel.

...<sup>20</sup> Miriam Aaron-kenh angkwerikw aneh, angkakert Akgney-kenh. Ra ampwal rlterrpelheley-angker inek, rntwenh-anem ikwer-akert. Arelh ingwer-rnem ingkerrenh rntwenh arrpemarl ikweren-angkwarr. <sup>21</sup> Miriam alakenh aylelhek, "INGKARTek aylelhenherr-arey, rarl anwenhantherr arntarnt-arek Egypt-areny-rnem-kety. Ra nantew-then ahelengkw-then-antey ingkerrenh kwaty-warl iwek."

### *Angka kwaty arrngeynp-akert*

<sup>22</sup> Moses-el kwaty alay Apennng-angketyarr ikwer-they renh-rnem atnwenheynek apmer arlpaw ikwer-warl, itnan Shur. Arlta irrpetyek-atwety ingketyel alperlewenh, kwatyek ywarn nthweyneh. Kwaty arey-angenr arrangkw-antey. <sup>23</sup> Rernem apmer Marah renh arey-alhek. Kel kwatyan ikwer-itwel nthakenh rernem antywey-angenr. Kwaty arrngeynp, alakenh-anyem rernem apmer Marahan itnewek, alakenh anayntileyl, "Kwaty apmwa". <sup>24</sup> Israel-kenh-rnem Moses-ek tyel-angkenh, "Kwaty mwerr-weny wenh! Arrngeynparl wenh, nthakenh anwantherr antywey-angenhan! Nthenharl kwaty mwerran antywey wenh? Nthenharl wenh?"

<sup>25</sup> Moses apatemel aneh. Rap INGKARTek arlkek, "Ilay atyeng, nthakenh atha angkethakw-rnem ileman!" INGKARTel arwerl akely ikwer iyiparrernek. Moses-el arwerl renh kwaty arrngeynp ikwer-warl iwek. Kwaty ra mwerr-anem irrek, antywetyek-anem.

INGKARTel angka rlterrk ingwer-anem renh-rnem anthe, rernem apenterl-ayntetyek, arraty-angkwarr anayntetyek. Renh-rnem arrkernek, rernem mwerr-angkwarr apek apenterl-ayntetyek. <sup>26</sup> Ra angkek ikwer-rnem, "Ayengan INGKART wenh, Akgney arrekantherrenh. Ayeng atyetyart ilkwa ingkerrenh. Ayeng apek arrekanther angkenty, arrantherr atyeng awelhetyek, atyeng antwerr aney-angenr. Atha arrenhantherr ilem, arraty-angkwarr anayntetyek. Arraty-angkwarr anetyek atyeng. Angka atyeh apenterl-ayntetyek arraty-angkwarr. Arrantherr arraty-angkwarr anenty, nthakenh atha arrenhantherr arntety anthey-angenr. Arrantherr mwerr anetyek, arntety-weny. Atha Egypt-areny-rnem arntety anthe. Ayeng INGKART innga, atha arrenhantherr mwerriley-angker."

<sup>27</sup> Ikwer-penhan Israel-kenh-rnem apmer Elim-warl rernem arey-alhek. Apmer Elim ikwer-itwek kwaty apeynt 12-pel aynten, arwerl ilkwer nem-then 70-pel. Rernem kwaty apeynt impalther anen.

## 16

### *INGKARTel amern alker-areny aker thip-then thweneyley, rernem arlkwetyek*

<sup>1</sup> Israel-kenh-rnem rernem apmer Elim iwerl-alhek, arlpaw-warl alperlewenh, itnan Sin. Arlpaw Elim-they Sinai-they ampepel-angkwarr-antey. Egypt-they rernem alperlewenh-antey, alkent anyentel. <sup>2-3</sup> Arlpaw-itwek amern-weny, arrangkw. Israel-kenh-rnem tyel-angkek-anem Moses-ek-atherr Aaron-ek-atherrety. "Ilekek mpwel apmer apmwarl nhnen-warl atnwenhey-alpek! Amern-weny arrangkwarl-anem! Anwantherr ingkerrenh ilweyen wenh, amern-wenyel! Egypt-itwel INGKARTel anwenhantherr ipmek atwenty, mwerrarl! Lyertan anwantherr apmer nhnenhelarl ilweyen amern-weny!"

<sup>4</sup> INGKART angkek Moses-warl, “Atha thwenem amern alker-areny arrekantherr, kwaty rntwem-apeny. Arrantherr amern akngerr arlkwem. Arlt aarrpanenhel atha thwenem, arrantherr amern arlkwerl-ayntetyek-anem. Amern akely arlt aanyentekant inetyek arrekantherr. Arlt aarrpanenhel atha arrenhantherr arrkernerl-ayntem, nthakenh arrantherr irrem wenh, atyeng-angkwarr anetyek apek.<sup>5</sup> Arlt 6-el Friday aarrpanenhelant arrantherr amern akngerr inetyek arlt aingwerel-rnem-apeny-weny. Friday-elant amern akngerr inetyek, amperneteyek. Friday-el Saturday-el arrantherr arlkwetyek, arlt aimpnel.”

<sup>6</sup> Moses-atheri Aaron-atheri ilelhek Israel-kenh-rnemek, “Aylern arrenhantherr Egypt-they atnwenhey-angenh, arrangkw. Ingwel rlengk arrantherr iterl-aretyek, INGKARTel antarrenhantherr Egypt-they atnwenhey-alpek.<sup>7-8</sup> Ingwelarreng arrantherr areyenh, INGKARTel arrtyerneyen ingkenyel-apeny, rlterrk ilkwakert. Ra arrekantherr-warl apetyeyen. Arrantherr aylernek ahelerrek, alakenh-anyem arrantherr INGKART irrwerl-arenyekarl ahelerrek! Ra arrenhantherr awek. Ra aylerneh ilanthek wenh, arrenhantherrenh apmer nhenh-warl atnwenhey-alpetyek. Aylern ikwer awelhenn, ayler warrkirreyel ikwerarl.” Moses angkek ikwer-rnem, “Atyeng awelhennherr-arey! Arlt aarrpanenhel atwerrp-atwerrp, INGKARTel aker arrekantherr anthem arlkwerl-ayntetyek. Ingwepenh arrpanenhel ra amern antherl-ayntem arrekantherr, arrantherr arlkwerl-ayntetyek. Arrantherr arlkwayntem wenh aker-then amern-then-anem wenh, angaykw irrey-angenharl.”

<sup>9</sup> Ikwer-penhan Moses angkek Aaron-ek, “Ila renh-rnem, ‘Arrantherrarl aylerneh arlkarewek wenh. INGKARTel arrenhantherr awek. Alakenh-kety arrantherr akarirretiek INGKART-warl-anem.’”<sup>10</sup> Kel Aaron-el renh-rnem akarrelekg ingkerreh-antey. Aaron rarl ikwer-rnem angkenh-antey, rernem kwenpay arlpaw ikwer-angkwarr arleng arenh. Kwenpay ilkwa amparrkenhey-alpenh ikwer-rnem-warl-athet. INGKARTan kwenpayelr anenh, rlterrk ilkwakert.

<sup>11-12</sup> INGKART Moses-warl angkek kwenpay-they, “Atha awek Israel-kenh-rnemelar mpwelehn arlkarewek. Alakenh-anyem ila renh-rnem, ‘Alakenh INGKART angkek arrekantherr, ‘Atwerrp-atwerrp atha arrenhantherr akerel wanteyen. Ingwepenh atha arrenhantherr amern akngerr wanteyen. Nthakenh arrantherr angaykw irrey-angenh, amern akngerr-anem wenh. Ikwer-penhan arrantherr iterl-arem, ayengan INGKARTarl, Akngey arrekantherrenh.’”

<sup>13</sup> Arlt irrikaty ikwerel-antey atwerrp-atwerrp, Israel-kenhel-rnem thiip atwelkarr akngerr arek, ikwer-rnem-warl alkerel apetyek. Alker-they rernem akngerr arrernele-henh ahern-warl, ahern ingkerreh arrkngelek. Ingwepenh ingkeny tyerrelhenhey-ahlyentiel ahern-itwek rernem arek, kwaty aypmerr ahern-itwek.<sup>14</sup> Ingkeny irrwerlekel, ahern artwerretyerrek. Rernemap amernan aperelty-apeny ahern-itwek arek.

<sup>15</sup> Rernem apatemu ayernelek, “Ilek nhnenhan wenh?”

Moses-el renh-rnem tyernek, “Amern nhnenhan. INGKART ra thwenek, arrantherr arlkwetyek.<sup>16</sup> Alakenh-anyem INGKARTel ayenh ilek, ‘Tyampit-warl amern ineyn-ayntetyek arlt aarrpanenhel aleth-antey. Artwek arelhek ampek anyentam-ayntewarl.’”<sup>17-18</sup> Israel-kenh-rnem tyampit-warl inerl-apenh. Ingwerel-rnem akngerr inek, ingwerel-rneman akelyarl inek. Ingwerel-rnem akelyarl inek, rernem mwerr arlkwetyek. Ingkerrenhel amern akngerr-antey inek.

<sup>19</sup> Ikwer-penhan Moses angkek ikwer-rnem, “Lyert-antey ingkerreh-antey arlkwenherr-arey wenh, ywerrelhiletyek, ingwepenhk atnyeney-angenh.”<sup>20</sup> Ingwer-rneman Moses-ek awelhey-angenh. Rernem amern ingkerreh-antey arlkwey-angenh, amern irrytertel-akwernekg ingwepenhk. Amernan tyerr-angketyarr irrek, intengerrek. Moses ikwer-rnem ahelerrek.

<sup>21</sup> Ingwepenh arrpanenhel rernem amern akwetyey-aynteh, amern arlt aanyentekant arwa. Ingkeny tyerrelhenhey-alhennh-apeny, rwenp-anem irremel amern ra irrkngwerrenh-anem, arrangkwirremel-anem.

<sup>22</sup> Arlt 6-el Friday-el rernem tyampit atherr-warl ineyam-aynteh. Artwamp atyetyart-rnem Moses-warl apetyek, angketyek ikwer-warl, “Rernem tyampit atherr-warl amern inek.”

<sup>23</sup> Moses angkek, “Kel mwerr. Alakenh-anyem INGKARTel ilek, ‘Ingwelarreng Saturday-el arlt aimpnel arrantherr ayenh tnakemel inkwerelhetyek. Arrantherr warrkirrey-angenh anetyek arrangkw, arrantherr anetyek ltyerremel. Lyertan amern ingwer ampernenherr-arey rwel apek, rtamp mpwaretyek. Amern ingwer tyampit-warl kwatyl arrytenherr-arey apek. Ingwepenhk amern ingwer atnyeneherr-areyarl.’”

<sup>24</sup> Rernem alakenh amern ampernek ingwepenhk, Moses-elarl ilek-angkwarr-antey. Amern intengerrey-angenh arrangkw, tyerr-weny-anem arrangkw-anem mwerr-anem.

25 Moses-el ikwer-rnem ilek, "Lyertan arlta impen INGKART-kenh. Anenherr-arey warrkirrey-angenh. Arrantherr amernek nthwney-alhenty, arrantherr arem arrang-warl. Amern apmwerrkeny renhant arlkwenherr-arey wenh, arrantherrarl apmwerrkel inekant. <sup>26</sup> Alakenh-anyem INGKART-kenh angka aynteyelan. Arrantherr Sunday-they Friday-ek-atwetyant amernek nthwetyek, arlta 6-ek-atwety-antey. Saturday-el mentyarl, nthakenh arrantherr amernek ahern-itwek nthwney-angenharl. Arlta ikwerel Saturday impen INGKART-kenh, Ityerrey-angker." Alakenh Moses-el ilek.

<sup>27</sup> Arraty innga. Arlta Saturday ikwerel ingwer-rneman ingwepenh amernek nthwetyekarl alhek. Arrangkw-antey rernem nthwennh ywarn-antey. <sup>28</sup> INGKARTel ilek Moses renh, "Ay! Nthakenh arrantherr irreyelan? Atharl arrenhantherr ilek-angkwarr! Atyeng awelhey-angenharl arrantherr, apal nthwennh! <sup>29</sup> Atyeng awelhenherr-arey! Atha arrenhantherr ilek, Saturday-el warrkirrey-angenh anetyek, arteny anetyek! Friday-el atha arrenhantherr amern akngerr anthayntem arlta atherrek-atwety arwa. Saturday-el arrantherr anyentel-antey anayntetyek, alhey-angenh." <sup>30</sup> Ikwer-penhan rernem Saturday arrpanenhel Ityerremel anenh, warrkirrey-angenh-anem, arrangkw-anem anenh.

<sup>31</sup> Israel-kenhel-rnem amern renh itnewek mana. Mana aynteyel "Ilek nhenhan?". Mana amern arlter aperelty-apeny. Mana arrkerneyel ngkwarl antemarn-apeny.

<sup>32</sup> Moses angkek-anem, "INGKARTel ilek, atha amern mana arrernetyek tyampit ilkwe-warl, intem-antey atnyenetyek, ampernemel renh arayntetyek aleth-antey. Amern renh arenty, rernem iylpangkerl-ayntetyek, INGKARTelarl arrwekelely-rnem atnwenhey-apek Egypt-they, ra amern irrkaty renh anthenh apmer arlpaw-itwek. Ampernem rernem alakenh angkenty, 'Ay! Amern irrkaty!'

<sup>33</sup> Moses-el Aaron ilek, "Tyampit ilkwa ina, amern mana renh ikwer-warl arrerna. Renh arrerna box impen INGKART-kenh-warl, ingkern-penhel-rneman amern renh aleth-antey iterl-arayntetyek." <sup>34</sup> Kel Aaron-el tyampit inek, amern mana arrernek ikwer-warl. Ra tyampit box impen-warl arrernek INGKART-kenh-angkwarr. Israel-kenhel-rnem box aleth-antey atnyeneneh amern mana-akert. <sup>35-36</sup> Israel-kenh-rnemel amern mana arlkwenh, aherrety 40-ek-atwety. Apmer arlpaw-itwek rernem ampererrehn ingketyl aleth-antey. Ikwer-penhan rernem apmer Canaan-warl arrer-anem irrek, INGKARTel renh-rnem amern mana anthey-angenh-anem, arrangkw-anem.

## 17

### *Moses-el apwert-they kwaty inpeyel*

<sup>1</sup> Israel-kenh-rnem anperl-alhek arlpaw itnan Sin-they. Akngerr-inger INGKARTel renh-rnem thwenek apmer ingwer-warl alhetyek, kel rernem alherlewek rarl ilek-angkwarr. Ingwer-inger rernem apmer Rephidim-el aynteh-anem. Apmer Rephidim-el rernem aynten arlpawel kwaty-wenyel, nthakenh rernem antwney-angenh. <sup>2</sup> Rernem Moses ikwer ahelerrek, renh ayernek, "Kwaty-wenyel arrangkwarl! Kwaty anwenhantherr antherl-ayna wenh, anwantherr antywetyek!"

Moses ikwer-rnem angkek, "Ilek arrantherr atyeng ahelerreyel? Ilekek arrantherr INGKART arrkerneyelarl? INGKART-angkwarr apek arrantherr apentey-angenh! Arrantherr iterreyel apek, INGKARTel anwenhantherr iwerl-alhenty-arrpantey! Arrantherr iterreyel apek, INGKART rlterr-k-weny, nthakenh ra anwenhantherr arntarnt-arey-angenh! Arrantherr alakenh iterreyel, INGKART arrekantherr ahelerrem!"

<sup>3</sup> Rernem angkethakw-anem irrek, kwaty-wenyel. Rernem Moses-ek aleth-antey tyel-angkerrenh. "Ilekek ntwa anwenhantherr Egypt-they atnwenhey-apek wenh arlpaw-warlan kwaty-weny-warlan? Ilekekarl ntwa anwenhantherren ampernem-then, atnwenth-rnem-them nhenh-warl atnwenhey-apek, aherrety inngewarl wenh? Anwantherr ingkerrenh ilwenherretyek arlpawel, kwatyek arrangkw-itwek wenh! Ilek-anem anwantherr antyweman?"

<sup>4</sup> Moses INGKARTek arlek, "Nthakenh atha nhenh-rnem ileman? Rernem atyeng awelhey-angenh. Rernem apwertel ayenw wekerr, ipmek atwekerr!"

<sup>5</sup> INGKART angkek Moses-warl, "Artwa ampwernem ikngwa. Nga-then artwa ampwernem-them arrwekel alhetyek, Israel-kenh-rnem ingkern-they alhetyek. Irretety irrkaty aknga, arrwel ntwa kwaty lher Nile ikwerel atwek. Anamerl-apeny alha!

<sup>6</sup> Apwert itnan Sinai ikwer-warl alhenherr-arey wenh. Sinai-itwek ntwa apwert ilkwa arey-alhem wenh. Ayeng apwert-itwek rtnem, arrekantherr-itwek arrwekel-apeny-itwekarl. Apwert renh atwa irrertetyel. Kwaty-anem apwert-they thelehetyek, arrantherr antywetyek-anem angkethakwel." Moses INGKARTek awelhenh. Ra alhek,

kwaty renh atwek apwert-itwek irrertetyel, artwamp-rnemel renh arenh-antey. Kwaty-anem thelelhek apwert ikwer-they. Rernemap antywek-anem ingkerrenhel-antey.<sup>7</sup> Moses-el apmer renh itnewek Massah-anem. Massah aynteyel arrkerneyelarl, Israel-kenhel-rnem INGKART arrkernek. Israel-kenh-rnem kwaty-weny anek, INGKART arrkernek, ayernerremel, “INGKARTang anwekantherr-itwek aneyel-antey? Arrangkw apek. INGKARTelang anwenhantherr arntarnt-areyel-antey? Arrangkw apek wenh.” Moses-el apmer renh ingwer-angkwarz itnewek, itna Meribah. Meribah-an ayntek ilterreyelarl, Israel-kenh-rnem kwaty-they ilterrenharl arlkarewemel.

#### *Israel-kenh-rnem Amalek-areny-rnem-then atwerreyel*

<sup>8</sup> Israel-kenh-rnem apmer Rephidim-el anen, Amalek-areny-rnem akngerr apetyek, renh-rnem atwetyek. <sup>9</sup> Moses angkek Joshua-warl, “Ntwa artwa mwerr-rnem rlwaneynek, arrantherr atwerreyek Amalek-areny-rnem-itwek. Ingwelarreng ayeng alhem, apwert irrwerl-itwek rtney-alhetyek-anem. Irretety renh atha akngem, INGKARTelarl ayenh anthek. Atha irretety ikwerel alhel-arerl-ayntem, arrantherrarl atwerrerl-anem-angkwarz, arrantherr renh-rnem ingkerrenh atwetyek.”

<sup>10</sup> Joshua Moses ikwer awelhek. Ra artwer nem rlwaneynek, Amalek-areny-rnem atwetyek. Moses apwert irrwerl-warl nganek, Aaron-then artwa ingwer-then itnan Hur.<sup>11-12</sup> Moses-el irretety irrwerlelek akapwert irrwerl-ampeny atnyenek. Rap irrwerl-warl irretety renh antwerrek, Israel-kenh-rnem Amalek-areny-rnem antengelenh-antey. Moses artwamp-anem, akwa-atherr alhengkerr-anem irrek. Ra irretety renh irrwerl antwerkey-angenh arrangkw-anem. Akwa alhengkerr-anem kwenerrenh-anem, Amalek-arenyel-rnem Israel-kenh-rnem antengelenh-anem. Aaron-el-atherr Hur-el-atherr ratherr apwert akely arrernek, Moses ra anerl-ayntetyek. Ikwer-penh Aaron-el-atherr Hur-el-atherr akwa-atherr Moses-kenh antwerkenh irretety-akert irrwerl-antey, ingwerel-rnem atwerrenh-angkwarz-antey. Aaron-elan akwa arraty-ampeny antwerkenh, Hur-elan ayleng-ampenyarl antwerkenh. Ratherr alakenh-anyem akwa-atherr Moses-kenh antwerkenh, ingkeny aylpenhetyek-atwety. <sup>13</sup> Alakenh-anyem Joshua-then irlkenty Israel-kenh-rnem-then rernem Amalek-areny-rnem antengelel atwek.

<sup>14</sup> INGKART angkek Moses-ek, “Angka nhenh atwerrenharl-penh pip-warl ingkwern-aynta, ingwerel-rnem iterl-arayntetyek iylpelerreye-angenh. Angka nhenh Joshua-warl iterl-ayntetyek, atha Amalek-areny-rnem ingkerrenh altheneyen. Ingkern-penhel-rneman renh-rnem iterl-arey-angenh, akwerrp.”

<sup>15</sup> Ikwer-penh Moses-el apwert-rnem arrernek, ampwal aker arrtyerneyek-arelh mpwarek INGKARTek. Ra renh itnewek, “INGKARTel Anwenhantherrenh Arntarnt-arayntem Ahelengkw-rnem-kety.” <sup>16</sup> Moses angkek-anem, “Atha irretety alhel-arek irrwerl-warl-athet, INGKART aneyel-warl. INGKARTel aleth-antey atwayntem Amalek-areny-rnem.”

## 18

#### *Jethro Moses-warl alheyel*

<sup>1-4</sup> Arrwekel-antey Moses-el anewikw ikwerenh Zipporah alerikw-atherr-anem thwenek malyeyikw-warl Jethro-warl apmer Midian-warl. Moses-el alerikw ilkwa itnewek Gershom, alakenh anayntileyl, “Ayeng alethang apmer ingwer-areny.” Moses-el alerikw ingweran itnewek Eliezer, alakenh anayntileyl, “INGKART akngey atyen-kenhel ayenh arntarnt-arenh, ayenh iteth-antey atnyenek, Egypt-areny ahelengkw-kety!” Jethro Moses-kenh malyeyikw artwa ingkart arrpemarl anen Midian-areny-rnemek. Ra angka ilek-ilek awek, Akngeyelarl arntarnt-arek Moses Israel-kenh-rnem-then, INGKARTelarl Israel-kenh-rnem atwenhey-alpek Egypt-they.

<sup>5-6</sup> Ikwer-penh Jethro-then anewikw Moses-kenh-then alerikw-atherr-then apetyek, Moses aretyek arlpaw-itwek. Moses anen apwert Akngey-kenh Sinai-itwek apwert aknganenty-itwek. Jethro-el artwa angkakert thwenek Moses-warl, “Jethro malyey ngkwenh ra apetyeyel ngkweng-warl alerengkw ngkwenh-atherr-then anewengkw ngkwenh-then.”

<sup>7</sup> Moses malyey ikwerenh-warl arnekerrek. Rap ikwer kwenerrek, renh arrwantyemel-anem. Ratherr angkerrek, “Mwerrang nga?” Rernem kalikw-warl aylpenhek-anem. <sup>8</sup> Moses-el Jethro ilek, “INGKARTelarl anwernenhantherr arntarnt-arenh ahelengkw Egypt-areny-rnem-kety. Ra anwernenhantherr arntarnt-arenh apmwangketyarr-angkwarz. Ra anwernenhantherr Egypt-they atnwenhek apwert nhenh-warl.”

<sup>9</sup> Jethro-el inkwerelhemel awek, INGKARTel renh-rnem arntarnt-arenh Egypt-areny-rnem-kety. <sup>10</sup> Rap angkek, "Inkwerelhenherr-arey INGKARTek, rarl arrenhantherr arntarnt-arek Pharaoh-kety, ahelengkw Egypt-areny-rnem-kety. <sup>11</sup> Aleyan atha iterlareyel, INGKART rlterrk innga, INGKART-arrpantey ingwer-rnem arrangkwarl. INGKARTel Egypt-areny-rnem atwek, rernemarl Israel-kenh-rnemek irrpelthirrenh, tnakelhemel." <sup>12</sup> Jethro-el aker pwelek aker ingwer-rnem-them akngek Moses-warl-anem. Moses-el aker tyenkerr arrtyemel anthek Akngeyek. Aaron-then artwamp Israel-kenh-rnem-them Jethro-itwek akarirrek. Rernem amern tyenkerr arlkwek, Akngeyek inkwerelhemel.

<sup>13</sup> Ingwepenh akngerr ingwer-rnem apetyek Moses-warl, ikwer-itwek rtnenherrenh atwerrpek-atwety. Rernem renh ayernenh, angka arratyiletyek ikwer-rnem. <sup>14</sup> Jethro-el arek, Moses rarl alakenh angka arratyileneh. Ra angkek, "Nthakenh nga irreyelan? Ilekek ntwa angka arratyileyl amentelan, aleth-antey ngenh ayernem, ingwepenh-they atwerrpek-atwety ingkerrenhel?"

<sup>15-16</sup> Moses-el renh ilek, "Artwa ingwer atherr ilterrenty-penh, ratherr atyeng-warl apetyem, ayenh ayern-ayntetyek-anem. Ratherr akaltyirretyek Akngey-kenh-angkwarr. Atha renh-atherr ilem, Artwa nhanyem arraty aneyel. Artwa ingwer arraty-weny." Atha angka arratyilem ikwer-atherr, Akngey-kenh angka anayntilemel. Alakenh-anyem akngerr atyeng-warl apetyem, ayern-ayntetyek."

<sup>17-18</sup> Jethro-el Moses ilek, "Nhayman warrk ilkwa ngkweng, ngarl ament warrkirreyel angkwarr. Nga alhengkerr anem wenh arlkarewelheyel, ingwer-rnem arlkarewelheyel arrpemarl, ngenh ayerneyel intem-antey, alhengkerr anteyel. <sup>19-20</sup> Awelha atyeng! Atha angka mwerr ngkweng iletyek. Ntwa Akngey ayernetyek ingkerrenhek-antey. Ntwa akalty-antherl-ayntetyek angka Akngey-kenh, iylparrernetyek renh-rnem arratty-angkwarr anetyek wenh. Nga apek atyeng awelhenty, Akngey ngkweng-itwek anayntetyek. <sup>21</sup> Artwa mwerr-rnemant rlwan, artwa mwerr Akngeyek awelhem-rnemant. Rernem irrywerrey-angenh man inetyek, arrangkw. Rernem arraty inngarnemant ankety-weny. Renh-rnem atyetyart arrerna ingkerrenhek, rernem ingwer-rnem arntarnt-arayntetyek, arlwarey 10-ek apek, 50-ek apek, 100-ek apek, 1000-ek apek. <sup>22</sup> Artwa atherr ilterrenty-penh, ratherr atyetyart renh-tangkwel ayern-ayntetyek. Atyetylartel renh-atherr arterpelenty, kel mwerr. Arrangkw apek, ratherr ilterrenty-antey, kel ratherr atyetyart ilkewarl alhetyek, ayern-ayntetyek. Atyetylartel renh-atherr arterpelenty, kel mwerr. Alakenh atyetyart ingwer-rnem-angkwarr-tangkwel ratherr arratyilerrem, ngenh arlkarewey-angenh anayntetyek. Arrangkwelan, kel ratherr ngkweng-warl alhetyek, ngenhant ayern-ayntetyek, renh-atherr arrattyiletyek. <sup>23</sup> Ntwa alakenh mpwarent, Akngeyel ngenh ilenty, ngan mwerr-anem anem alhengkerrerrey-angenh, Israel-kenh-rnem inkwerelhem-anemarl, mwerrant-arey anetyek." Alakenh Jethro-el Moses ilek.

<sup>24</sup> Moses malyeyikw ikwerenhek awelhek, alakenh mpwarek rarl renh ilek-angkwarrantey. <sup>25</sup> Ra rlwanek artwa mwerr-rnem, atyetyart ikwer-rnem rnkernek, atyetyart anetyek arlwarey artwa 10-ek apek, 50-ek apek, 100-ek apek, 1000-ek apek. <sup>26</sup> Rernem aleth-antey angka arratyileneh ikwer-rnem. Angka awerr ayntenty, rernem Moses-warl alhenh, angka arrattyiletyek.

<sup>27</sup> Moses-el malyeyikw ikwerenhek awelhek, apmer ikwerenh-warl alpetyek. Rap apmer Midian-warl-anem alpek.

## 19

*INGKART angkeyel Israel-kenh-rnem-warl apwert aknganenty Sinai-itwek*

<sup>1-2</sup> Israel-kenh-rnem Egypt renh iwerl-alhek-penh, rernem alkent atherrel aleth alhek. Ingwer-ingeran rernem aremerrey-alhek arlpaw-itwek itnan Sinai. Ampepitwek rernem ayntek apmer Rephidim-itwek. Ikwer-penhan rernem apwert Sinai ikwer-itwek aynteyarr-alpek, apwert impalthe. <sup>3-7</sup> Moses apwert ikwer-warl nganenhek, Akngey awetyek. INGKART apwert irrwerl-they Moses-ek arlek, "Alakenh-anyem nga angketyek Israel-kenh-rnemek Jacob-kenh-rnemek." Ra angka Moses-ek ilek. Kel Moses apwert-they atwarrenhey-alpek. Ra artwamp-rnem akarrelek, rernem angkerretyek. Ra ikwer-rnem ilek, "Alakenh INGKART arrekantherr angkeyel, 'Arranther INGKART ayenh arek, atha Egypt-areny-rnem atwek. Arranther iterlareyel, atha arrenhantherr Egypt-they atnwenhey-alpek. Atha arrenhantherr mwerr-angkwarr atnwenhey-alpek apwert nhenh-warl atyeng-warl. Atha arrenhantherr arntarnt-arenh, irretyelarl akwerrik ikwerenh arntarnt-arem-apeny. Alakenhaym atha

arrenhantherren arntarnt-arenh. Mwerranty atyeng awelhenherr-arey, angka atyenh-rnem mwerr-angkwarr apentemel. Ingkerrenh apmer arrpanenhel aneyel-rnem, atyenh ingkerrenh. Arranther Israel-kenh-rnem atyeng awelhenty, atha arrenhantherren ayerrpelem, arranther atyenh ingkerrenh anem impen mwerr-rnemarl. Arranther atyengant awelh-ayntetyek apenterl-ayntetyek. Arranther ingkerrenh ingkart-rnem anetyek, atyengant warrkrr-ayntetyek intem-antey. Israel-kenh-rnem arranther ingkerrenh atyeng-angkwarr mwerr-angkwarr anayntetyek!”<sup>8</sup> Artwamp-rnemel Israel-kenh-rnem angka INGKART-kenh ilek. Rernem apey-alpek, Moses-warl angkek-anem, “Kel mwerr. INGKARTel ilek-angkwarr, anwantherr ikwerant awelhem. Anwantherr anemarl, ikwerant warrkirrem.” Moses ra angkep apwert-warl nganek, INGKART-warl angkek, “Israel-kenh-rnem alakenh angkek, ‘Anwantherr ngkwengant warrkirretyek.’”

<sup>9</sup> INGKART angkek Moses-warl, “Ayeng ngkweng-warl apetyeyen kwenpay irrpwerl-angkwarr, ayeng ngkweng angketyek. Ingwer-rnemelan awenty-penhan, rernem ngenh iterl-arem-anem ngarl atyenh angkakert, rernem ngkwengant awelh-ayntem intem-antey.”

<sup>10-13</sup> INGKART angkek ikwer-warl, “Israel-kenh-rnem-warl alha, angka atyenh iletyek.” Kel Moses atwarrenhey-alpek apwert-they Israel-kenh-rnem-warl. Ra renh-rnem ilek, “Alakenh INGKARTel arrekantherr ileyel, ‘Arrantherr ingwa atherrel atyeng mpwelhetyek, ayenh aretyek. Pwerlpirretyek. Arnkwa lhewetyek. Ingwa atherrel-phen ayeng apetyeyen irrwerl-they apwert Sinai ikwer-warl. Ingkerrenh ayenh areyenh, ayengarl irrwerl-they apwert-warl apetyeyen. Arrer-warl alhewer alhey-angenh, apwert aknganenty ikwer-warl, arleng-antey rtneyek. Ingwernty apwert ikwerl rtnenty, renh ipmek atwemarl. Arrewaly arney-angenh, arrantherrap renh apwertel wetyek, irrtiyartl apek atanthyek, pewenarrel apek. Innga, artwa apek apwert aknganentyel rtnenty, atnwenth apek, renh ipmekarl atwemarl. Terampet arranther awentyel, arranther alhewer nganetyek apwert-warl.’” Alakenh Moses-el Israel-kenh-rnem ilek.

<sup>14</sup> Angka awek-penhl Israel-kenh-rnem pwerlpirek. Rernem arnkwa lhewek, arnkwa mwerr-angker-warl aylpemel. Rernem arrayt mpwelhenh, INGKART aretyekant-anem.<sup>15</sup> Moses ikwer-rnem angkek, “Arrantherr ikwer mwanty iterretyek. Artwernemay, anew arrekantherrenh-itwek ingwa atherrel ayntey-angenh mentyarl. Arnkentyel-tangkwel ayntenherr-arey. Arelh-rnemay, ament-tangkwel amperrel ayntenherr-arey.” Alakenh angkek Moses Israel-kenh-rnemek. Ingwa atherrel rernem mpwelhek.

<sup>16</sup> Ingwepenh rernem awely-awely arek, artewentyel innga awek. Kwenpay irrpwerl-erel apwert renh artek-anem. Terampet angkelh-angkelhelerl-anentyt awek rernem. Ingkerrenh aterirrek-anem.<sup>17</sup> Moses-el renh-rnem apmer-they atnwenhenh, rernem anyenterremel Akngeyek-anem mpwelhetyek. Rernem rtnenherrey-alhek apwert arrerentyel.<sup>18</sup> INGKART irrwerl-they apetyen apwert-warl rwakert. Kwertel apwert renh artek. Kwert alker-warl-athetk itntenh. Apwert ra akngelhek-anem rlterrk innga.<sup>19</sup> Terampet ra arnterram-arnterr angkek. Moses Akngeyek angkek. Moses-el awek kwaty awely-awely angkakert, Akngey artewentyel angkenh ikwer-angkwarr.

<sup>20</sup> Inga INGKART ra irrwerl-they apetyek apwert irrwerl-warl. Irrwerl-they ra Moses-el arlek, “Moses, nganey-alhetyek apwert irrwerl-warl.” Kel Moses nganenhenk apwert irrwerl-warl.<sup>21</sup> INGKART angkek Moses-ek, “Atwarrenhey-alpa, renh-rnem iley-alpa, ‘Arranther nthakenh apetyey-angenh apwert-warl, INGKART renh aretyek! Arranther alakenh-anyem arety, arranther ilwemarl wenh!’<sup>22</sup> Atyetyart-rnem ilenherr-arey arrpemarl, ‘Arrantherr pwerlpirretyek, arnkwa lheweyek, INGKART ikwer arrayt mpwelhem-anem, ra arrenhantherr atwemarl.’”

<sup>23</sup> Moses angkek INGKARTek, “Kel mwerr. Arrayt inngarl yanhan. Ingwer-rnem apwert nhenh-warl nthakenh nganey-angenh. Ntwarl arrwikel-antey anwenhantherr ilek, ‘Apwert aknganenty nenh arrer-warl alhey-angenh anetyek.’”

<sup>24</sup> INGKART angkek Moses-warl, “Apwert-they atwarreyna, Aaron ingwerl-alpa apwert nhenh-warl. Ingwer-rnem atyetyart-rnem-then ila, ‘Arrantherr yanhel-antey mpwelhetyek, apwert nhenh-warl apetyey-angenharl, mentyarl. Arrantherr arrer apetyenty, INGKARTel arrenhantherrenh atwemarl. Arleng-antey anew-anenherr-arey.’”

<sup>25</sup> Kel Moses atwarrerl-alpek, Israel-kenh-rnem iletyek, INGKARTarl angkek-angkwarr.

## 20

*Akngayel Moses angka rlterrk 10-pel antheyel*

<sup>1</sup> Akngay angkenh Israel-kenh-rnemek alakenh-anyem, <sup>2</sup> “Ayengan Akngay arrekantherrenh, itnan INGKARTarl. Atharl arrenhantherrenh Egypt-they atnwenhey-alpek,

Egypt-arenuel-rnemarl arrenhantherrenh warrk ilkwa anthenh-kety, arrantherry tyayl-areny-apeny warrkirreh.

<sup>3</sup> Ayengan Akngey arrekantherrenh anem. Arrantherry altyerr-arrpanney ingwer-rnem apentey-angenh anetyek. Atyengant arrantherry inkwerelhetyek.

<sup>4-5</sup> Akngey-arrpanney ingwer-rnemel mpwarem apwert-penh arwel-penh. Rernem altyerr-arrpanney mpwarem irrwerl-areny-apeny apek ahern-areny-apeny apek kwaty-areny-apeny apek. Rernem ikwer-rnem kweneraytetyek inkwerelhemel. Alakenh-anyem rernem apmwel-ayeth mpwarem atyengen. Alakenh-anyem arrantherry mpwarey-angenh! Akngey-arrpanney arrantherry mpwarey-angenh, kwenerrey-angenh ikwer-rnem. Menty ayntetyek! Ayengan Akngey arrekantherrenh anem, itnan INGKARTarl. Atha arrenhantherry antwerrkeman, atyen-hrnem. Arrantherry atyeng arlkarerrenty, altyerr-arrpanney apenterl-anenty, alakenh-they ayeng arrekantherry ahel-errem. Arrantherry apek alakenh atyengety intwemelerenty, atha aler arrekantherrenh atwem alhewer, arrengey-rnem-then, artartey-rnem-then atwemarl, ingkern-penh-rnem ingkerrenh atwem alhewer. <sup>6</sup> Ingwer-rnemel angka atyen-h apenterl-ayntem, rernem atyeng arteentyel ilkelh-ayntem, ayeng ikwer-rnem ikwer-rnem-kenh-then aleth-antey arteentyel ilkelh-ayntem. Nthaken atha renh-rnem iwerl-alhey-angenh.

<sup>7</sup> Itnan atyen-h impen. Arrantherry itna atyen-h INGKART arwa iley-angenh, arrantherry arrayt-angkwarrant itna atyen-h ileyek. Arrantherry itna atyen-h apmwangkwarr itnewenty, atha arrenhantherry atwem.

<sup>8</sup> Arrantherry arlta ltyerreng-angker atyen-h iterl-ayntetyek. Arlta Saturday anyent impen ikwerel, arrantherry atyengant iterretyek wenh, atyeng iylpelirrey-angenh. <sup>9</sup> Arlta 6-ek-atwetyant arrantherry alhewer warrkirrey-ayntetyek. <sup>10</sup> Arlta 7-el impen ltyerreng-angkerarl, arlta atyenharl. Ayengan Akngey arrekantherrenh, itnan INGKARTarl. Arlta ikwerel warrkirrey-angenh anetyek. Angka nhenh ingkerrenhekarl, aler-rnem arrekantherrenhek-then, warrkenh-rnemek-then, pwelek-rnem arrekantherrenhek-then, alethang-rnemek-then rernemarl aneyel arrekantherry-itwek. <sup>11</sup> Awank-akerr atha ingkerrenh arrpmernekk arlta 6-ek-atwety. Atha alker-then ahern-then kwaty alay-rnem ingkerrenh-then arrpmernekan. Atha ahernel alheyel-rnem-then alkerel alheyel-rnem-then kwaty-areny-rnem-then atnwenth ingkerrenh arrpmernekk. Ikwer-panhan arlta 7 Saturday-elan ayeng ltyerreng-angenh-anem anenh. Alakenh atha arlta anyent impen renh itnewek, arrantherry ltyerryaytetyek.

<sup>12</sup> Arrantherry akngeyek-then ameyek-then awelhetyek, rernem arrenhantherrenh ilenty. Antwerr alhey-angenh. Arrantherry ikwer-rnem awelhemel iylpareth anetyek, inkwerelhemel. Arrantherry ikwer-rnem awelhenty, arrantherry arleng-alenty anem apmer ikwer-itwek, atharil arrekantherry anthem.

<sup>13</sup> Arrantherry ingwer-rnem ipmek atwety-angenh anetyek.

<sup>14</sup> Arrantherry anewikw ingwer-kenh ikngwey-angenh anetyek.

<sup>15</sup> Arrantherry ingwer-kenh ampwal ilek-ilek irrtiyertel iney-angenh anetyek.

<sup>16</sup> Arrantherry court-itwek ingwerenty irrtiyerremel iley-angenh, arrantherry ingwer-enty angka arraytant ileyek.

<sup>17</sup> Arrantherry alharlkwerrey-angenh ingwer-rnemek anetyek. Arrantherry ingwer-kenh apmer-they apek, anewikw-they apek, pwelek-akerr-they, tangkey-akerr-they, war-kenh ikweren-they alharlkwerrey-angenh anetyek. Ampwal nhenh-rnem aynteng, ingwer-kenhanh aynteyel.

Angka rlterrk nhenh-rnem arrantherry aleth-antey apenterl-ayntetyek ipmey-angenh.”

*INGKART ra Israel-kenh-rnem-warl arrererreyel, rernem ikwerety aterirreyel*

<sup>18</sup> Israel-kenh-rnem ingkerrenh apwert ikwer-itwek arrerentyet rtnenherrenh. Rernem awely-awelye awek angkenharl, terampet-anem angkelh-angkelhelenty awek. Kwert-angketyarr rernem apwert-itwek arek. Rernem arek-panhan, rernem aterirrek-anem, arleng-anem rtney-alpek apwert ikwerety. <sup>19</sup> Rernem Moses-warl angkek, “Ngant anwekantherry angkey-areny. Akngey apek anwekantherry angkenty, anwantherry ilwekerrarl. Anwantherry ngkwengant awelhem.”

<sup>20</sup> Moses ikwer-rnem angkek, “Aterirrey-angenh! Akngey apwert nhenh-warl apetyek, rarl arrenhantherrenh arrkernetyek, arrantherry renh apek apentetyek. Ra ilkelheyel, arrantherry ikwer iterretyek aleth-antey, apmwangkwarr aney-angenh.” <sup>21</sup> Rernem rtnen apwert ilkwetthey arleng-antey. Moses-ant alhek kwenpay ikwer-warl Akngey-warl. ...

<sup>20</sup> ... Akngey angkek Israel-kenh-rnemek, “Atha antyerl arrekantherr-warl thwenetyek, ra arrekantherr-akert yerlirretyek apmer ikwer-warl, atharl awank-akerr arrekantherr anthek-warl. Ra arrenhantherr arntarnt-arayntetyek ahelengkw-rnem-kety. <sup>21</sup> Arrantherr arternpel antyerl ikwer awelhenherr-arey. Ran angkakert atyenah-akert, ament-weny-antey. Arrantherr ikwer irrpeltherrenty, ra arrenhantherr apmwekety arntarnt-arey-angen. <sup>22</sup> Arrantherr arternp ikwer awelhenty, angka atyenah-angkwarr apentynty, ahelengkw ingwer-rnem arrekantherr arrkngert angkentyan, kel atha ahelengkw-rnem atwemarl. <sup>23</sup> Antyerl atyenah arrwekel yerlirr-ayntem, arrantherr apent-ayntetyek apmer Canaan-warl. Aleyan Amor-areny-rnem, Hitt-kenh-rnem-akerr, Perizz-areny-rnem-akerr, Canaan-areny-rnem-akerr, Hivite-areny-rnem-akerr, Jebus-areny-rnem-akerr rernem anew-aneyel. Atha renh-rnem irralkemel ilwerl-atheneyen. <sup>24</sup> Yanh-areny-rnemel mpwarem altyerr-arrpantey-rnem apwert-penh arwerl-penh-then gold-penh-then. Altyerr-arrpantey-rnem ikwer-rnem-kenhek kwenerrey-angenharl anetyek arrantherr, angka ikwer-rnem-kenhek awelhey-angen anetyek. Altyerr-arrpantey-rnem ikwer-rnem-kenh ingkerrenh ngkwelteyletyek. Apwert arlpenty-rnem ikwer-rnem-kenh ingkerrenh ngkwelteyletyek arrpemarl. <sup>25</sup> Arrantherr ayenh apenterl-ayntetyek inkwrelhemel. Ayeng Akngey arrekantherrenh, itnan INGKARTarl. Arrantherr ayenh apentynty, atha arrekantherr amern akngerr anthem kwaty-then-antey. Arrantherr arntetyerrey-angen. <sup>26</sup> Arrantherr ingkerrenh arleng-alenty anerl-ayntem. Arelh ingkerrenh mwerr anerl-ayntem, arntetyerrey-angen. Ampa akely-rnem mwerr anerl-ayntem arntety-weny. Ampa akngerr atha arrenhantherr anthem.”

<sup>27</sup> INGKART angkek Israel-kenh-rnemek, “Arrantherr Canaan-warl alhentyel, arrantherr tawen arpanenh-warl alhey-alenty, atha tawen-areny-rnem ater-antheyen. Rernem ingkerrenh anterreyen arrekantherrety. <sup>28</sup> Atha ingwer-rnem Hivite-areny-rnem Canaan-areny-rnem-then Hitt-kenh-rnem-then irrenteyen, arrantherr apmer ikwer-rnem-kenh-warl alhey-alenty. <sup>29</sup> Arrantherr Canaan-warl alhey-alenty, atha apek renh-rnem irrentey-angen hheretyt anyentel, menty. Apmer ingkeny, werrk-apeny, atnwenth ateralth-angketyarr, apmer alther. Alakenh atha apmer-areny-rnem Canaan-thy irrenterl-ayntem arternpel-antey. <sup>30</sup> Atha renh-rnem irrpetyarl-irrpetyarl irrenterl-ayntem wenh, arrantherr akngerrelan apmer renh inemarl, apmer mwerr arntarnt-ayntemel.”

<sup>31</sup> INGKART angkek Israel-kenh-rnemek, “Apmer arrekantherrenh Canaan-ampeny kwaty alay Apenng-angketyarr-they altwerl ayerrer ayntayntem. Apmer kwaty alay itna Ilkwarl-they akngerrakw ayntayntem. Apmer arlpaw itna Sinai-they ayerrer ayntayntem. Apmer kwaty lher Euphrates-they antekerr ayntayntem. Apmer Canaan ampepelarl. Atha arrenhantherr rlerrikilem, arrantherr-anem yanh-areny-rnem Canaan-thy irrenterl-ayntem. <sup>32</sup> Ikwer-rnem alakenh angkey-angen, ‘Anwantherr apmer nhnenhel arrekantherr-itwek mwarrant-arey anetyek, atwerrey-angen anetyek.’ Menty. Alakenh ikwer-rnem angkey-angen. Apmer nharen-yrnem-kety amenterretyek, altyerr-arrpantey-rnem ikwer-rnem-kenh-kety-then. <sup>33</sup> Canaan-el apmer arrekantherrenh rernem ilkelhem anayntetyek. Menty. Nthakenh rernem aney-angen, arrangkw. Arrngert angkenherr-arey. Rernem arrenhantherrenh apmwangkwarr ilekerr. Rernem altyerr-arrpantey-rnem apetyey. Rernem arrenhantherrenh-anem ilanthekek, arrantherr altyerr-arrpantey-rnem apenterl-ayntetyek. Rernem arrenhantherrenh arrkernekerr, arrantherr apmwangkwarr apenterl-ayntetyek.”

## 24

*Israel-kenh-rnemel Moses ileyel, “INGKARTel anwenhantherr ilek-angkwarr, anwantherr ikwer awelhetyek”*

<sup>1</sup> INGKARTel Moses ilek apwert irrwerl-they, “Aaron, Nadab-then, Abihu-then artwamp 70-pel Israel-kenh-rnem-then renh-rnem ingwerl-alpa wenh, atyeng-warl apetyetyek. Arrer-apeny apetyey-angen. Atyengety arleng-antey anetyek kwenerremel. <sup>2</sup> Moses, nga anyentant atyeng-warl arrer-apeny apetya. Israel-kenh-rnem ingwer-rnem ilenherr-arey, apwert-warl nganey-angen anetyek.”

<sup>3</sup> Moses alpek ikwer-rnem-warl, angkakert INGKART-kenh. Rernem ikwer angkek, “Alakenhaym mwerrarl wenh. INGKARTel ngkweng-angkwarr angka ilem, anwantherr awelhemarl.” <sup>4</sup> Moses-el pip-warl ingkernek, INGKARTel renh ilek-angkwarr. Ing-wepenh ra apwert akely-rnem akarrelek, akerek-arelh mpwarek INGKARTek. Renh rnkernek-anem apwert Sinai arrerenty ikwer-itwek. Apwert arlpenty ingwer-rnem 12 ra rnkerneynek akert-arryat. Apwert-rnem 12-pel ileyel, Israel-kenh-rnem 12-pel amentew-ament rernem iterl-arayntetyek. <sup>5</sup> Moses-el artwa akely-rnem thwenek,

aker atwetyek. Aker pwelek-rnem rernem apwert-rnem-itwek ampernek. Rernem INGKARTek arrtyemel aker tyenkerr anthek, ikwer inkwerelhemel. Aker ingwer-rnem ingkerrenhel arlkwek, mwerr ingkerr rernem anew-anenh INGKARTek.<sup>6</sup> Aker rernem atwek-penh, Moses-el arrnga aker-penh inpek, arlengarr-rnem-warl amentewament theleynek. Arrnga ingwer-rneman ra apwert-rnem-warl akerek-arelh-warl theleynek.<sup>7</sup> Moses-el pip-anem inek, Akngey-kenh angkernem-akert, ra atayel-antey innga reytemilek, ingkerrenhel Akngey-kenh angka awetyek. Rernem ikwer angkek, "Ilek-ilek INGKART-kenh angka pip nhenh-itwek ayntem, anwantherr ikwer awelhem."

<sup>8</sup> Moses-el arlengarr-rnem arrnga-akert inek, ra arrnga ikwerel arlperry iwek ikwer-rnem-warl, irrpelhelek renh-rnem arrngel INGKART-kenh-angkwarr. Ra ikwer-rnem angkek, "INGKARTel anwenhantherr alhelek, rarl anwenhantherr aleth-antey arntarnt-arayntem. Arrantherr alhelek arrpemarl, arrantherr angka ingkerrenh apenterl-ayntetyek pip nhenh-itwek. Alakenh-they atha arrekantherr-warl arrnga-anem iwek."

<sup>9</sup> Moses Aaron-then Aaron-kenh alerikw atherr Nadab-then Abihu-then artwamp 70-pel-then Israel-kenh-rnem rernem apwert irrwerl-warl nganek, Akngey renh awetyek.<sup>10</sup> Apwert ikwer-itwek rernem Akngey Israel-kenh-rnem-kenh renh arey-alhek. Ingka Akngey-kenh kweneng-ampeny-itwek iwerr-ampeny ayntenhekarl rernem arek, iwerr ra arrtyernek alker-ampeny, apwert turquoise-ampeny.<sup>11</sup> Arraty innga! Artwamp-rnem Israel-kenh-rnem rernem Akngey anngei innga-antey arek! Alhewer rernem arek renh, ranap atwey-angenh-antey renh-rnem mwerr-antey. Ikwer-penh rernem amern arlkwek, kwaty-then antywemel.

### *INGKARTel Moses-ek apwert ilperr-ilperr atherr angkakert antheyel*

<sup>12</sup> INGKART angkek Moses-ek, "Atyeng-warl nganenhey-alha. Mpwelha-anem atyeng, atha ngenh apwert ilperr-ilperr atherr anthetyek. Apwert atherr-itwek atha ingkwernek angkernem, ingwer-rnemel reytemilemel akaltyerrerl-ayntetyek."

<sup>13-14</sup> Ikwer-penhan Moses artwamp-rnem-warl angkek, "Arrantherr mpwelhenherr-arey nhenh-itwek. Aaron-atherr Hur-atherr arteny mpwelhayntem arrpemarl, ratherr ament angka arratyiletyek ingwer-rnemek ingkernan, aylanth alhemarl-kety. Joshua-ant atyeng-itwek apetyetyek wenh." Kwtengeler Moses-kenh itnan Joshua. Moses-el Joshua ikngwek, ratherr atherr-antey apwert-warl nganenhek, apwert Akngey-kenh. Moses-el Joshua ampep-warl arrernenhek-anem, ra apwert irrwerl-warl nganenhek ament-anem.

<sup>15</sup> Moses apwert-warl nganenhek, kwenpayel apwert ingkerrenh artenhek-anem. <sup>16</sup> Innga, INGKART irrwerl-they kwenerrek-anem apwert irrwerl-warl, lyenenty rlterrk ilkwakert arrtyernenh. Kwenpayel apwert renh artek arlta 7-ek-atwety. Arlta ingkernalan INGKART Moses-ek arlkek kwenpay-they. <sup>17</sup> Israel-kenh-rnem rwa lherrm-ampeny apwert irrwerl-itwek rernem arenh. <sup>18</sup> Moses anenh apwert ikwer-itwek, kwenpayel apwert artek. Ra anenh apwert-itwek arlta 40-ek-atwety. ...

## 31

### *INGKARTel Israel-kenh-rnem ileyel, Saturday arlta impen ikwerel warrkirrey-angenh anetyek*

<sup>12</sup> ... INGKART Moses-ek angkek, <sup>13</sup> "Israel-kenh-rnem alakenh ila, 'Arrantherr angka INGKART-kenh apenterl-ayntetyek Saturday ikwer, arlta impen INGKART-kenh ltyerrey-angker. Saturday arpanenhel arrantherr ltyerretyek, INGKARTek iterrerl-ayntetyek. Ikwer-penhan arrantherr renh iterl-aryntetyek, rarl arrenhantherr arratyilek. Arrantherr mwerr anerl-ayntem INGKART-kenh-angkwarr. Aler arrekantherrenh-rnem-then, arrengay-rnem-then, artartey-rnem-then rernem iterl-aryntetyek arrpemarl aleth-antey. Alakenh-anyem arrantherr mwerr INGKARTek anerl-ayntetyek intem-antey, INGKART-kenh-anem anem.

<sup>14</sup> Saturday ament arlta ingwer-ampeny-weny, arrangkw. Saturday-an INGKART-kenh arlta impen. Ingwerentyel apek Saturday-el warrkirrem, arrantherr artwa renh ipmek atwetyek. <sup>15</sup> Warrkirreyek Sunday-they Friday-ek-atwetyant arlta 6-ek-atwetyant. Alakenhan mwerrarl. Saturday arpanenhel ltyerrayntetyek warrkirrey-angenh. Arlta Saturday-el arrantherr INGKARTek iterr-ayntetyek inkwerelhemel. Ingwerentyel apek Saturday-el warrkirrenty, ipmek-antey renh awem. <sup>16</sup> Saturday arpanenhel arrantherr ltyerrayntetyek warrkirrey-angenh. Arrantherr INGKARTek iterr-ayntetyek inkwerelhemel, ingkern-penhel-rnem arrpemarl aleth-antey. <sup>17</sup> Arrantherr INGKARTek atyeng Saturday arpanenhel iterrerl-ayntetyek aleth-antey, atha arrenhantherrenh aleth-antey arntarnt-arayntem. Arrantherr iterl-areyel, alker-then ahern-then ingkerrenh atha arrpmernek arlta 6-ek-atwety. Arlta 7-elan ayeng warrkirrey-angenh ipmelhek,

arwa-anem anek ltyerremel. Alakenh arrantherr ayenh iterl-arayntetyek intem-antey, ingkern-penh-rnem rernem ayenh iterl-arayntetyek arrpemarl intem-antey.”

<sup>18</sup> INGKART ipmelhek-anem Moses-warl angkenh-penh Sinai apwert-itwek. Akngey ra angka apwert ilperr-ilperr atherr-warl arrwekel-antey ingkwernek ilytel. Ra Moses-ek apwert ilperr-ilperr atherr anthek, angka ikwerenh-akert.

## 32

*Israel-kenh-rnem kwenerreyel pwelek irrwey gold-penh mpwarek-itwek*

<sup>1</sup> Moses apwert Sinai-itwek arleng-alenty anen-hantey. Israel-kenh-rnem alhek Aaron-warl, rernem renh ayernek, “Atyeyengkew Moses-alew? Nthakenh ra irrek? Ilek-kety ra apey-alpey-angenh? Artwa rarl anwenhantherr Egypt-they atnwenhek. Ilwek apek ra. Aaron-ay! Ilengem ntwa anwekantherr mpwara arwerl-penh apek, apwert-penh apek, ra altyerr anwekantherr anetyek. Ra ilayntetyek apek, nthenh-angkwarr anwantherr alhetyek.”

<sup>2</sup> Aaron angkek ikwer-rnemek, “Iylpek-arelh-rnem gold-penh arelh arrekantherrenh-kenh atyeng anthenherr-arey, aler arrekantherrenh-kenh-then.” <sup>3</sup> Rernemap iylpek-arelh-rnem akngetyek, Aaron-ek anthek. <sup>4</sup> Aaron-el iylpek-arelh-rnem akngerr arrernek tyampit ilkewararl. Tyampit ilkwa rwitwek arrernek irrngwerreyek. Ra gold renh-anem ipert pwelek-apeny-warl thelek, pwelek irrwey-arrpanteryek gold-penh mpwarek. Israel-kenh-rnemel arek-penh, rernem angkerrek, “Israel-kenh-rnemay! Nhenh arenherr-arey! Akngey nhanyemelan anwenhantherrenh Egypt-they atnwenhey-alpek nhenh-warl!”

<sup>5</sup> Aaron-el awek-penh, ra apwert-rnem arrernek amperneyek-arelh, pwelek ikwer-itwek arrwekel-ampenyek. Ra angkek ikwer-rnemek, “Ingwelarreng anwantherr anyenterreyek kwenty arlkwetyek. Anwantherr rntwetyek aylelhemel INGKARTek inkwerelhemel!” <sup>6</sup> Arlita ingwerelan Israel-kenh-rnem ingwepenh-antey akemerr-aytek, rernem pwelek-rnem inek atwemel-anem. Pwelek ingwer-rnem arrangkwirremel ampek, INGKARTek inkwerelhetyek-arrpanteryek. Pwelek ingwer-rnem rernem irrnyewek, aker ampernemel arlkwetyek, INGKARTek inkwerelhetyek-arrpanteryek. Rernem aker arlkwennh, ngkwarl wayn-then antywemel, terangk irrenh. Ikwer-penh rernem arelh-rnem mpweny ingwerl-alhenh, artnewarl anterrenh.

<sup>7</sup> INGKART angkek Moses-ek, “Anamerl-antey apwert-they alpa ngkwenh-rnem-warl, ntwarl Egypt-they renh-rnem atnwenhey-alpek. Rernem apmwerrerrek-anem. <sup>8</sup> Rernem angka atyenhek awelhey-angenh-anem menty anek, apmwel-areth mpwarek. Rernemap pwelek irrwey gold-penh mpwarek. Aker-anem rernem ampernek, pwelek ikwer anthemel. Rernem ikwer kwenerr-ayntetyek inkwerelhemel. Rernem angkerrek alakenh, “Israel-kenh-rnemay! Nhenh arenherr-arey! Akngey nhanyemelan anwenhantherrenh Egypt-they atnwenhey-alpek nhenh-warl!”

<sup>9</sup> Ikwer-penh INGKART angkek Moses-ek, “Atha weth-rnem iterl-areyel, rernem awerr innga, iyelpelat awem. <sup>10</sup> Ayeng ikwer-rnem ahelerreyel, atha renh-rnem ywerrelhilemel atweyenh. Atyeng arrngert angkey-angenh! Atha anewengkw ngkwenh alerengkw ngkwenh-atherr-then nthakenh ipma atwey-angenh, arrangkw. Ngkwenh-rnem-theyarl akngerram-akngerr irreyenh.”

<sup>11</sup> Moses-el amperrngerremel ayernek INGKART, “INGKARTay! Ahelerrey-angenh ngkwenh-rnemek. Weth-rnem ntwa atnwenhey-alpek Egypt-they arawerrng rletterkel. <sup>12</sup> Ntwa renh-rnem atwenty, Egypt-areny-rnem alakenh ngkweng irrpelthirrekerr, INGKARTel ikweren-hrnem atnwenhey-alpek Egypt-they apmer arlpaw-warl, renh-rnem ilwerl-athenetyek apwert-itwek!” Menty, nga ahelerrey-angenh ngkwenh-rnemek, renh-rnem atwey-angenh! <sup>13</sup> Abraham-ek-then Isaac-ek-then Jacob-ek-then iterra! Awank-akerr ntwa alheleneh ikwer-rnem angkemel, ‘Ntwa alerengkw-then artartey-rnem-then arrengey-rnem-then akngerr atnyenem. Rernem akngerr innga aneyenh, antyarr alkerel aneyel-apeny. Atha apmer Canaan ikwer-rnem anthem, ikwer-rnem aleth-antey ayntetyek.’ Alakenh-anyem ntwa renh-rnem alhelek.” <sup>14</sup> INGKARTel Moses awek-penh, ra ingwer-angkwarr-anem iterrek. INGKARTel ikwerenh-rnem ywerrelhilemel atwey-angenh.

<sup>15</sup> Ikwer-penhan Moses atwarrerl-alhek apwert-they, ra apwert ilperr-ilperr atherr akngeynek. Apwert ikwer-atherr-itwek INGKARTel arrwekel angka ikwerenh ingkwernek atherr-angkwarr-antey arrwekel-ampeny-then ingkern-ampeny-then. <sup>16</sup> Moses-elan apwert atherr mpwarey-angenh arrangkw, Akngeyelant arrwekel-antey apwert atherr mpwarek, ra angka ikwerenh-rnem apwert atherr-itwek ingkwernek.

<sup>17</sup> Moses apwert-they atwarreynenh-antey, ra Joshua rlwatek ampep-itwek. Rernem apmer arrerirrek-anem. Joshua-el awek, ingkerrenharl arlkenh. Ra angkek Moses-ek, "Awa! Israel-kenh-rnem apek atwerreyel!"

<sup>18</sup> Moses angkek Joshua-ek, "Arrangkw. Israel-kenh-rnem inkwerelhey-angenh, rernem atwerrenty-penh. Rernem artney-angenh, rernem atwerrenty-penh. Atha renhr-nem awyearyl, rernem aylelherreyel."

<sup>19</sup> Moses arrer-anemirrek ikwer-rnem-warl, ra pwelek irrwey gold-penh arek. Ra ingwer-rnem arek rntwerl-anenty. Ra ikwer-rnem ahelerrek-anem. Ra apwert atherr ahern-warl iwek. Apwert atherr akelhek-anem apwert Sinai impalh-itwek. <sup>20</sup> Ikwer-penhan ra pwelek gold-penh renh inek. Ra rwewarl iwek, gold kwaty-apeny irngwerrenhek. Ikwer-penhan ra gold ahern-warl thelek, irrerterretyek. Ikwer-penhan ra gold ngkwelyekek lher-apeny-anem. Gold renh inek, kwaty-warl ra iwemel. Israel-kenh-rnem ra ilek, "Arranther kwaty gold ikwer-akert antywetyek."

<sup>21</sup> Moses Aaron-warl angkek, "Ilek ntwa weth-rnem akngartewek INGKART-kety pwelek nhenh-warl? Alakenhaym apmwarl! Rernem artewentyl apmwelhelek."

<sup>22</sup> Aaron angkek Moses-warl, "Nga atyetyart atyenh. Atyeng ahelerrey-angenh. Ntwa renh-rnem iterl-areyel, rernem apmwangkwarr iterreyel aleth-antey. <sup>23</sup> Rernem atyeng angkek alakenh, 'Ayteyengkw Moses nthakenh irrek? Ilek-kety ra apey-alpey-angenh? Artwa weth ra anwenhantherrenh Egypt-they atnwenhey-alpek. Ilwek apek ra. Aaron-ay! Ilengem ntwa anwekanthery mpwara arwerl-penh apek apwert-penh apek, ra altyerr anwekanthery anetyek. Ra ilayntetyek apek nthenh-angkwarr anwanther alhetyek.' <sup>24</sup> Ayeng Israel-kenh-rnemek angkek, 'Gold iylypek-arelh-rnem arrekantherrenh-they lhelenherr-arey, ilek-ilek gold-penh-then. Ayenh-anem anthemel.' Ingkerrenh-antey gold-penh rernem atyeng anthelempwalek ilet-ilek. Gold-rnem atha rwewarl iwek, pwelek irrwey-anem rwethey tyerrelhenhey-ayntek!"

<sup>25</sup> Moses ra renh-rnem arenh, arwengk-apeny arkenty. Aaron ra renh-rnem iltey-angenh arrangkw. Moses ament angkek, "Ingwerel-rnem atherrelhelekk, anwekanther arlkwentey-angenh-rnem." <sup>26</sup> Moses arriw ilkwa-itwek rtney-alhek. Ra ingkerrenhek arlkek, "Ingwer-rnemel apek INGKART apentyetyek ilkelhem, atyeng-angkwarr apetyetyek!" Levi-kenh-rneman rernem Moses-itwek rtney-alhek. <sup>27</sup> Ikwer-penhan Moses Levi-kenh-rnemek angkek, "INGKART Akngey Israel-kenh-rnem-kenh alakenh-anyem ra arrenhanther ileyel, 'Artwernem, arranther inkwartey inenherr-arey! Apmer-warl alhemel awayengkw-rnem-then atyeyengkw-rnem-then arranther iterl-areyel ingwer-rnem-then ingkerrenh ipmek atwetyek.' <sup>28</sup> Levi-kenh-rnem rernem Moses-ek awelhek. Rernem inkwartey-rnem inek, 3,000 innga rernem ipmek atwek. <sup>29</sup> Moses Levi-kenh-rnemek angkek, "Lyertan INGKART-angkwarr anetyek arranther, atyetyart arranther anayntetyek, INGKART ikwer warrkirk-ayntetyek. Arranther ikwer awelhek, awayengkw-rnem-then atyeyengkw-rnem-then alerengkw-rnem-then ipmek atwek. Alakenh-they INGKART arrekanther inkwerelhek."

<sup>30</sup> Arla ingwerelan Moses angkek Israel-kenh-rnemek, "Arranther apmwangkwarr mpwarek. Lyert atha INGKART ayernem arrekanther. Ayeng ikwer-warl angkenty, ra arrekanther ahelerrey-angenh anetyek, apmwa arrekantherretye iwetyek, arranther apek ikwerenh-anem arpemarl anem." <sup>31</sup> Moses alhek INGKART-warl ayernetyek, "Weth-rnemel apmwel-areth mpwarek. Rernem pwelek gold-penh mpwarek, ikwer kwenirr-ayntetyek inkwerelhemel. <sup>32</sup> Irrepern-rnem atwey-angenh. Menty rernem anetyek. Renh-rnem angkep atwey-angenh, rernem apmwel-areth mpwarek-penh. Renh-rnem atwey-angenh, ayenhant ntwa atwetyek. Ayenh ntwa katy atwetyek, menty ingwer-rnem aney-akenh. Ayeng ikwer-rnem katy ilwetyek. Itna atyenh ipara pip ilkwa ngkwenth-they, ntwarl itna atyenh ingkwernek ingwer-rnem-then, rernem ngkwenth-rnem intem-antey anetyek."

<sup>33</sup> INGKART Moses-ek angkek, "Ingwer apek apmwangkwarr alhenty, atyeng ilkelhey-angenh, atha itna ikwerenh pip ikwer-they iparem. <sup>34</sup> Israel-kenh-rnem-warl alpa, atnwenha renh-rnem apmer atha alhelek-warl, atha ngenh arrwekel-antey ilek-warl. Antyerl atyenh arrekanther yerlirrem, iwerr arrekanther iylparrernetyek, apmer ikwer-warl alpetyek. Apmwel-areth aneyel-rnem atha ingwer-inger atwemant-anem." <sup>35</sup> INGKARTel Israel-kenh-rnem arntety ilkwa anthelempwalek, rernem apmwel-areth mpwarek-they.

### 33

<sup>1</sup> INGKART angkek Moses-warl, "Apmer nhenh iwerl-alhennherr-arey, nga-then ingwer-rnem-then, ntwarl renh-rnem Egypt-they atnwenhek. Alhennherr-arey apmer ikwer-warl, atharl arrwekel-antey alhelek Abraham-ek-rnem-then Isaac-ek-rnem-then Jacob-

ek-rnem. <sup>2</sup> Atha arrwekel-antey antyerl thwenem arrekantherr-warl yanh-areny-rnem irrentetyek, Canaan-areny-rnem, Amor-areny-rnem-then, Hitt-kenh-rnem-then, Perizz-areny-rnem-then, Hiv-areny-rnem-then, Jebus-areny-rnem-then. <sup>3</sup> Alhenherr-arey apmer ikwer-warl, amern-angketyarr-warl arwengalker-angketyarr-warl. Nthak-enh ayeng arrekantherr-itwek alhey-angenh, arrantherr awerr-rnemarl wethey, atyeng awelhey-angenh. Ayeng arrekantherr alhenty apmer ikwer-warl, atha ampepel apek arrenhantherr ilwerl-athenekerr.

<sup>4-6</sup> Arrwekel-antey INGKART Moses-ek angkek, “Angka nhenh Israel-kenh-rnem ila.” Kel Moses Israel-kenh-rnemek angkek, “Alakenh INGKARTek arrenhantherr ileyl, ‘Arrantherr awerr innga. Ayeng apek arrekantherr-angkwarr alhenty, atha apek arrenhantherr ilwerl-athenekerr. Ampwal-rnem iylpek-arelh-rnem-then nikeleth-rnem-then akwek-arelh-rnem-then lhelenherr-arey. Alerl ayeng iterrey, nthakenh atha ileman.’” Angka nhenh awek-penh, rernem ampwal-rnem lhelek apwert itna Sinai-itwek. Rernem amperrngerrek, ampwal-rnem angkep arrerneyney-angenh-anemarl.

#### *INGKART Moses-warl angkeyel kalikw-itwek*

<sup>7</sup> Moses-el apmelerri kalikw artenh, apmer-they arleng. Kalikw renh itnewek, “Kalikw-itwek INGKART ayernetyek.” Ingwerentyel INGKART ayernetyek, rap alhem kalikw ikwer-warl, apmer-they akwerr-ampeny-warl. <sup>8</sup> Moses kalikw-warl alhenhel, rernem arriw-ampeny kalikw akely-rnem-itwek rtney-alhenh. Rernem Moses intwarenh, kalikw-warl aylpenharl. <sup>9</sup> Moses kalikw-warl aylpenhel, kwenpay arlpenty apetyek irrwerl-they, arriw-ampeny-itwek artenh. Kwenpay ikwer-they INGKART Moses-warl angkenh. <sup>10</sup> Kwenpay renh arenh kalikw arriw-itwek, ingkerrenhel apmelerri kalikw arriw ikwer-rnem-kenh-itwek rtnenh, INGKARTek kwenerretye. <sup>11</sup> INGKART Moses-warl kalikw-itwek angkenh. Ratherr arerrenhant-atherr angkerremel. Ikwer-penh Moses apmer-warl alpenh. Joshua ra kalikw ikwer-itwek apmelerri arteny anen alpey-angenh. Joshua Nun-kenh alerikw anen, ra kwertengel Moses-kenh anen.

#### *INGKARTel alheleyel, ra ikwerenh-rnem-itwek anayntetyek, rernem alperlewetyek*

<sup>12</sup> Ingwer-inger Moses-el INGKART ayernek, “Ntwa ayenh arrwekel-antey alakenh ilek, ‘Atha ngenh Moses iterl-areyel, ayeng inkwerelheyel ngkweng.’ Ntwa ayenh ilek arrpemarl, ‘Ntwa nhenh-rnem atnwenheyetyek apmer ingwer-warl-anem.’ Kel atha ngenh lyert ayernetyek, ‘Angwenh ntwa thwenem, atyeng-angkwarr ilkwaterr?’ Ntwa ayenh iley-angenh-antey. <sup>13</sup> Nga atyeng inkwerelhentyan, ntwa ayenh ngkwenh-angkwarr akalty-antha. Atha ngenh iterl-aretyek. Ayeng ilkelheyel, nga atyeng intem-antey inkwerelh-ayntetyek. Nhenh-rnemek iterra iylpelerrey-angenh-antey. Ntwa renh-rnem ayerrpelek, ngkwenh-rnem anayntetyek.”

<sup>14</sup> INGKART angkek Moses-warl, “Ayeng arrekantherr-angkwarr alhem. Arrantherr mwarrant-arey anetyek, ahelekgw-rnem nthakenh arrekantherr atwerrey-angenh.”

<sup>15</sup> Moses ikwer-warl angkek, “Nga anwekantherr yerlirrey-angenh apek, ntwa anwenhantherr apmer ingwer-warl thweney-angenh anetyek. <sup>16</sup> Nga anwekantherr yerlirrenty, ingwer-arenyel-rnem iterl-arayntetyek, ngarl anwekantherr inkwerelheyel. Anwantherr ngkwenh-rnemarl impenarl, ingwer-rnem arrangkwarl.”

<sup>17</sup> INGKART angkek Moses-ek, “Alakenh mwerr. Nga mwerr innga angkek. Atha ngenh Moses iterl-areyel innga, ayeng ngkweng inkwerelheyel. Alakenh-they ayeng arrekantherr-angkwarr alhem ilkwaterr.”

<sup>18</sup> Moses angkek INGKART-warl, “Atha ngenh arem, arawerrng rlterrk lyenenty arrtyernty.”

<sup>19</sup> INGKART angkek ikwer-warl, “Ya. Ayeng ngkweng-angkwarr rwaylpenhem. Ayeng ngkweng aremirrem. Ntwa aretyek, ayengarl mwerr-angker innga. Ayeng ngkweng itna mwerr-angker atyenh-anem ilelhetyek. Itnan atyenh INGKART. Ayeng ilkelhenty atha ingwer-rnemek amperrngirremel arntarnt-arem arrpemarl. <sup>20</sup> Ayeng ngkweng aremirretye. Nthakenh ayeng inngerr aremerrey-angenh ngkweng-warl. Ingwerentyel inngerr ayenh arenty, rap ilwemarl. <sup>21</sup> Ay, apwert nhak aray. Apwert ikwer-itwek rtnerl-alha. <sup>22</sup> Atha arrtyerneyen rlterrk ilkawerk apwert-angkwarr anper-alhentyel. Ayeng anper-alhey-alentyarl, atha ngenh apwert intey-warl ikwer-itwek akwernem, atha ngenh ilytel arteyenh. <sup>23</sup> Atha ngenh arteyenh-tangkwel, ikwer-penh altywerilem arrpemarl, ntwap artepant-anem ayenh intwareyehan.”

<sup>1</sup> INGKART angkek Moses-warl, "Apwert ilperr-ilperr atherr akaltha, atharl ingwer weth arrwekel-antey mpwarek-apeny. Apwert ingwer atherr angakert ntwa iwek, ratherrap akelhek-anem. Atha apwert ilperr-ilperr atherr-warl irrkaty-angkarr ingkwneretyek." <sup>2</sup> Ingwepenh-antey apwert ilperr-ilperr atherr akngetya apwert itna Sinai-warl. Ayeng ngkweng-warl apwert irrwerl-itwek angketyek. <sup>3</sup> Ingwerently akngetey-angenh, ngant apety. Ingwer-rnem ila, 'Apwert nhenh-warl apetyek!' Yep-yep-rnem-then pwelek-rnem-then renh-rnem antwerrketyek, atherrk apwert ilkwa-angkwarr rernem arlkweynekerr."

<sup>4</sup> Moses-el apwert ilperr-ilperr atherr akaltheik. Ingwepenh ra apwert Sinai-warl nganek apwert ilperr-ilperr atherr-akert. Alakenh INGKARTel renh arrwekel ilek-angkwarr. <sup>5</sup> INGKART kwenpay-angkwarr Sinai apwert-warl apetyek. Ran apetyek, Moses-itwek arrer rtney-alhek. Ra itnewelhek INGKART. <sup>6</sup> Moses-warl arrwekel-ampeny-itwek ra anper-alhek. Ra ikwer-warl angkek, "Ayeng INGKART, Akngey innga. Ayeng aleth ampermerrgerreyel ingkerrenhek, ayeng mwerr innga iterreyel ikwer-rnemek. Rernem apmwel-areth atyeng anem, ayeng anamer ahelerrey-angenh ikwer-rnemek, arrangkw. Ayeng ikwer-rnem artewentyel ilkelheyel-antey. Atha renh-rnem alhelenty, nthakenh ayeng ingwer-angkwarr iterrey-angenh. Ayeng arraty ikwer-rnem-warl angkem aleth. <sup>7</sup> Alakenh-anyem innga. Ayeng mwerr ingkerrenhek aneyel. Rernem apmwel-ayeth atyengety anenty, ikwer-penh rernem atyeng-warl apey-alpenty, atha renh-rnem irrentey-angenh, arrangkw. Menty, atha renh-rnem angkep atwey-angenh. Ayeng ikwer-rnem inkwerelheyel inngay. Ingwer-rnem apek apmwangkwarr aleth anenty, angkeperrey-angenh, atha renh-rnem inngarl atwem, alerikw-rnem-then arrengey-rnem-then artartey-rnem-then ingkerreh-antey atha aleth-antey irrwampenh-anthemel atwem arrpemarl."

<sup>8</sup> Moses anamerl-antey ahern-itwek kwenerrek, ampwethel arrernelhek, Akngey-warl inkwelhemel angkek. <sup>9</sup> Moses angkek ikwer-warl, "INGKARTay, nga apek atyeng inkwelhenty, anwekantherr-angkwarr alhayntetyek. Rernem awerr innga, iypelant awem. Apmwa anwekantherrenh iwa, angkep atwey-angenh. Anwenhantherr intem-antey atyena, anwantherr ngkwenk-rnem anetyek."

<sup>10</sup> INGKART angkek-anem, "Atha arrenhantherr innga alhelem. Rernem ayen haryen, ayengarl ilek-ilek mpwarey-angker arawerrng rlterrk-akert, arrantherr aketh-antey aretyek. Arrwekel ingwer-rnemel arey-angenh alakenh-anyem. Ingwer-rnem arrekantherr-itwek aneyel-rnemel areyenh arrpemarl. <sup>11</sup> Arrantherr angka atyenhk awelhetyek, atharl lyert ilem. Atha Amor-areny-rnem, Canaan-areny-rnem-then, Hitt-kenh-rnem, Perizz-areny-rnem, Hiv-areny-rnem, Jebus-areny-rnem-then ingker-renh irrenteyenhp apmer ikwer-they, apmer atharl arrwekel arrekantherr alhelek. <sup>12</sup> Arrantherr apmer Canaan-warl alhentyel, mwantz arntarnt-arelhemel anayntetyek yanh-rnem-kety, mwarrant-arey arrantherr aney-angenh ikwer-rnem-itwel, rernem arrenhantherrenh apmwangkwarr-anem akngartewekerr. <sup>13</sup> Tyaty-arrpantey-rnem rernem mpwarek. Ampwal akerek-arelh-then apwert impen-rnem-then rernem tyaty kwen-itwek rnkernek, ampwal arlpenty-rnem-then. Rernem altyerr-arrpantey-rnem ilek-ilek apentyeyel. Ingkerreh ngkwelteleyek atakemel, ampwal akerek-arelh-rnem-then, apwert impen-rnem-then, ampwal arlpenty-rnem-then. <sup>14</sup> Ayengan INGKARTarl. Arrantherr altyerr-arrpantey-rnemek kwenirrey-angenh anetyek. Arrantherr atyengant awell-ayntetyek."

<sup>15</sup> INGKART angkek, "Mwantyel arntarnt-arelenherr-arey yanh-rnem-kety. Mwarrant-arey arrantherr apmer ikwer-areny-rnem-itwek aney-angenh. Rernem altyerr-arrpantey-rnem apent-ayntem apmwangkwarr. Rernem aker tyenkerr arrtyemel anthem altyerr-arrpantey-rnemek. Arrenhantherr apmwangkwarr angkepilekerr. Menty awenh-arey! <sup>16</sup> Artwa aler arrekantherrenh-rnem kwey alejak ikwer-rnem-kenh-itwek itengerrey-angenh anetyek. Aleyak ikwer-rnem-kenh altyerrekk-arrpantey kwenerremel tnaketyek. Rernem artwa aler arrekantherrenh-rnem irrkaty-angkwarr arrpemarl akalty-anthekerr.

<sup>17</sup> Ingwerel-rnem gold rwel arrtyemel irrngwerretyek, altyerr-arrpantey mpwaremel ikwer-penh. Alakenh mpwarey-angenh arrantherr anetyek.

<sup>18</sup> Amern ilperr-ilperr-akert arrantherr kwenty arlkwetyek inkwelhemel, kwenty itna 'Amern ilperr-ilperr'. Arlta 7-ek-atwety arrantherr amern ilperr-ilperr arlkwetyek pikinpat-weny, atharl ilek-angkwarr-antey. Arrantherr alakenh mpwaretyek alkent Abib ikwerel-antey aherrety arrpanenhel. Arrantherr amern ilperr-ilperr renh kwenty arlkwayntetyek, arrantherr iterretyek Abib ikwerel, Egypt-theylr anperl-alhekan.

<sup>19</sup> Avey arrwekeleny-rnem-then atnwenth irrwey arrwekeleny-rnem-then rernem atyenh ingkerreh. <sup>20</sup> Tangkey arrwekeleny ntwa apek iteth atnyenetyek, yep-yep

akelyant antha atyeng. Arrangkwel apek, tangkey renh akertemal atwetyek. Arrantherr aler awey arrekantherrenh arrwekeleny-rnem ingkerrenh payemeletyek atyeng-they. Ingwerenty rtnemel angkenty atyeng-warl, ra ayenh aker tyenkerr antheynetyek-tangkwel.

<sup>21</sup> Arita 6-ek-atwety warrkirr-ayntetyek, arla 7-el ltyerretyek warrkirrey-angenh. Ahern angerney-angenh, ntang ineyney-angenh, ikwer-kety ltyerretyek-antey. Menty anetyek arla ikwerel.

<sup>22</sup> Aherrety arpanenhel arrantherr kwenty arlkwayntetyek itna Pentecost ikwerel. Ntang weyt arrwekeleny-penh arrantherr atyeng anthetyek. Ingwer-inger arrantherr kwenty ingwer arlkwayntetyek, ntang weyt ingkern-penh arrantherr atyeng anthetyek.

<sup>23</sup> Aherrety arpanenhel irrpety-inger artwernem ingkerrenh rernem akarirretyek arrwekel-antey atyeng. Ayeng INGKARTarl, Akngey innga Israel-kenh-rnem-kenh.

<sup>24</sup> Arrantherr aherrety arpanenhel irrpety-inger atyeng-warl apetyenty, atha Canaan-areny-rnem arrwekel-antey apmer ikwer-they irrentem. Atha arrenhantherrenh apmer akngerr arppemarl anthem. Nthakenh ingwer-rnemel apmer renh angkep rakeyney-angenh arrekantherr-they.

<sup>25</sup> Arrantherr aker atyeng anthenty, amern tyenkerr-then. Amern pikinpat-weny ayenh anthetyek. Arrantherr yep-yep renh attwentyel, tyenkerr itna Anperarl Al-hek 'Passover', aker tyelk arrerney-angenh ingwepenhek-atwety. Arrantherr rwel arrtyetyek ingkerrenh-antey. <sup>26</sup> Aherrety arpanenhel, ntang weyt arrwekelarl lyapek akngetyenherr-arey, kalikw atyenh-warl, amern tyenkerr mwerr-angker ayenh anthetyek.

Nanikwet akely apek ampernenty arrantherr, amikw ikwerenh aylpatyel arrtyey-angenh."

<sup>27</sup> INGKART angkek Moses-warl, "Ingkwernetyek angka nhenh. Alakenh atha ngenh alheleyel, Israel-kenh-rnem arrantherr atyenh-rnem intem-antey anayntetyek." <sup>28</sup> Moses INGKART-itwek anenh, arita 40-ek-atwety. Amern arlkwey-angenh kwaty antywey-angenh. Apwert ilperr-ilperr atherr-warl INGKARTel ingkwernek angkernem 10, rernem aleth-antey apenterl-ayntetyek.

*Moses apwert Sinai-they atwarrelhenhey-alpeyel innegerr amparrkenh*

<sup>29</sup> Moses-anem apwert Sinai-they atwarrenhey-alpenh, apwert ilperr-ilperr atherr-akert iltyel akngey-alpenh. Moses inngerr amparrkenh, ra Akngey-itwek angkenh-penh. Ra iterl-arelhey-angenh inngerrarl amparrkenh. <sup>30</sup> Aaron-then Israel-kenh-rnem-then rernem inngerr Moses arek amparrkenharl. Rernem ikwerety aterirrek. Alakenh-they rernem arrer-warl alhey-angenh ikwer-warl. <sup>31</sup> Moses ikwer-rnemek atayel arlek, "Atyengety aterirrey-angenh! Arrer-warl apetyenherr-arey!" Aaron artwamp-rnem-then arrer-warl ikwer-warl apetyek. Ra ikwer-rnem angkek. <sup>32</sup> Ikwer-penh ingkern-anem Moses-warl arrererrenhey-alhek. Ra ikwer-rnem angka ilenh, INGKARTelarl apwert Sinai-itwek renh ilek. <sup>33</sup> Moses ikwer-rnem-warl angkek-penh, ra inngerr-anem arnkwa akelyel artelhek. <sup>34</sup> Moses ra kalikw-warl aylpenh aleth INGKART-warl ayernetyek. Ra arnkwa akely apmelerr lhelenh, INGKART-warl angkey-alhenty. Ra kalikw iwerl-alhenh, apmer-warl alpenh, ra ingkerrenhek iley-alpenh, INGKARTel ilek-angkwarr. <sup>35</sup> Ingkerrenhel renh arey-ayntenh, inngerr Moses amparrkenharl. Ikwer-penh ra inngerr apmelerr artelhenh-anem arnkwa akely ikwerel. ...

## 40

*Kwenpay INGKART-kenh-anem ra kalikw impen arteyel*

<sup>34</sup> ... Moses-el kalikw impen artek. Ra ampwal impen-rnem ingkerrenh akwernek Akngeyel renh ilek-angkwarr. Moses-el warrk ywerrelhilek-penh, kwenpay INGKART-akert alker-they apetyek, kalikw impen artek. INGKART-kenh lyenentyel kalikw kwen alhernek. <sup>35</sup> Kwenpayel iwerr arrngelek, Moses nthakenh kalikw-warl kwen aylpenhey-angenh.

<sup>36-37</sup> Kwenpayel kalikw-itwek artenhel-antey, Israel-kenh-rnem apmerel-antey anenh. Kwenpay rarl anperl-alhenh, Israel-kenh-rnemel kwenpay renh apentenh, apmer ingwer-warl-anem. <sup>38</sup> Alakenh-anyem innga. Itwernek kwenpayel kalikw artenh. Ingwelan kwenpay amparrkenh rwapenyarl. Israel-kenh-rnem apmer arpanenhel-warl alpenhel, rernem kwenpayan kalikw-itwek arenh.

## Pip Namp 1 Samuel

### Angka Samuel-akert, atyetyart Saul-akert, David-akerr Angka 1 Samuel alakenh aynteyel

Angka nhenhan artwernem irrpety-akert, itnerneman Samuel, Saul, David. Samuel-an Akngey-wenh artwa angkakert, awank-akerr anenhp apmer Israel-itwew. Saul-tangkwel anenhp atyetyart ilkwa arrwekelely, Akngelyelar arrernew Israel-wenh-rnemew. Arraty-angkwarr-tangkwel ra anenhp, Akngelyelar ilanthew-angkwarr. Ikwer-penh ingwer-ingwer ra ipmelhenhew Akngely-wety, awelhey-angenh-anem ikwer. Akngelyelan David-anem rlwanew, atyetyart ilkwa aneyew, Saul-an menty-anemarl. Saul-el alharlkewew David, rap renh ipmew atwewyew-anew akngerr-inger.

*Arelh Hannah-el INGKART ayerneyel, avey renh antheyew*

<sup>1</sup> Artwa anyent anenhp itnan Elkanah. Ranap Ephraim-wenh-antey, apmer Ramah-el anenhp apwert-ampeny-itwew. <sup>2</sup> Artwa Elkanah ra arelh atherr-akert anenhp itnan Hannah Peninnah-then. Peninnah-an ampakertarl anenhp, Hannah-an arrangkwarl.

<sup>3</sup> Aherrety arrpanenhel artwa ra alpenh apmer ikwer-they ikwerenh-rnem-akert apmer Shiloh-warl. Apmer ikwer-itwew ra aylpey-alhenh warl INGKART-wenh-warl, kwener-aynteyew INGKARTew. INGKART ran Atyetyart Ilkwa Ingkerrenhew. Artwamp anenhp apmer ikwerel itna Eli. Artwa alerikw ikwerenh-atherr Hophni Phinehas-then, ingkart-atherr anenhp warl INGKART-wenh-itwew. <sup>4</sup> Arlta ingwerel Elkanah-el aker tyenkerr anthenh INGKARTew apmelerrel-ayeth, rap ikwerenh-rnemew-then anthenh, arlkwaynteyew. Aker ra anthenh Peninnah-ew ampernemew-then. <sup>5</sup> Arelh ingweran ikweran Hannah ampenyenarl, INGKARTelarl arrngertewew ampenyety. Ikweran Elkanah-el aker akngerrarl anthenh, rarl ikwer ilkelhenhew artewentyel. <sup>6</sup> Peninnah-el renh kwanthenh ahelerreyew-atyety, ra ampenyenarl. <sup>7</sup> Aherrety arrpanenhl alakenh ayntehn. Apmeler Hannah aylpenh warl INGKART-wenh-warl, arelh ingwerelan renh kwanthenh, rap artnenh-anem. Arlka ra apmwerrenh, nthakenh arlkwey-angenh. <sup>8</sup> Mpovernikwan ikwer angkenh, “Nthakenh ngan irreyel? Artney-angenh. Arlkwemer ntwa. Arlka apmwa aney-angenh. Ampa irrwey atnyeneyew iterrey-angenh artewenty. Ayengan ngkwegng ilkelheyel artewenty!”

<sup>9</sup> Ingwer-ingweran, rernemarl arlkwenh-penh apmer Shiloh-itwew, Hannah-an rtnerl-alhew-anem. Rap alhew warl INGKART-wenh-warl, angkaynteyew ikwer. Artwamp Eli-an anenhp arriw-itwew. <sup>10</sup> Hannah-an arlkarl apmwerrew innga, rap artnemel angkenh INGKART ikwer. <sup>11</sup> “INGKARTay! Ngan Atyetyart Ilkwa Ingkerrenhew! Ayengan arwa warrkenh ngkwenh. Amperrngerla atyeng, ayengan arlka apmwarl. Iylpelerlewey-angenh ayenh. Nhaym atha ngenh ayerneyel. Avey atyeng antha! Ntwa ayenh avey anthem, athap ngenh angkew antheynem, raw ngkwegng warrkerreyew amperreyew-atyety. Nthakenh alta renh akey-angenh, ingwer-rnemel renh areyew, ra ngkwenharl.”

<sup>12-13</sup> Rap intem-antey arreytemel angkenh INGKART-warl arleng-alenty. Eli-el arew, arrakertantarl akngelhenn, avey-angenh. Ra iterrew ikwer terangkew-arrpantey, <sup>14</sup> rap angkew, “Ilekew nga terangkan apetyew? Ngkwarl yanh iwa!”

<sup>15</sup> Hannah-el tyernew, “Arrangkw artwampay! Ayengan terangk-wenyarl. Ayengan arelh arlkarl apmwerreyelar. Ngkwarl atha antywey-angenh, arrangkw. Ayengan arreytenh alyepel INGKARTewarl, ikwer illelhenn. <sup>16</sup> Ayenh apmwa antwey-angenh. Ayengan artnemelarl anenhp. INGKART atha ayernenh, ayenh alpemeleyew.”

<sup>17</sup> Eli-an angkew, “Irreperi nga! Artewentyiterrey-angenh alpanem. Anantherr Israel-wenh-rnemel Akngely mwerr-angker apentem. Ra anthemarl, ntwa renh ayernentyan.”

<sup>18</sup> Hannah angkew ikwer, “Nga mwerr-angkwarrarl atyeng angkew.” Rap anperl-alhew mwerr awelhemel, amern-anem arlkwey-alpew.

<sup>19</sup> Arlta ingwerel ingwepenh Elkanah akwentew, rap alhew ikwerenh-rnem-akert anyent-inger-anem, INGKART-warl kwenerremel angkaynteyew. Ikwer-penh rernem angkew-anem alpew apmer Ramah-warl.

INGKARTel Hannah iylpelerlewey-angenh-antey, rarl ayernenhew. <sup>20</sup> Ikwer-penh ingwer-ingwer ra avey-anem atnyenew, rap renh itnewew Samuel. Rap angkew, “Atha renh itnewem Samuel, atharl INGKART ayernew-angkwarr-antey, renh atyeng antheyew.”

*Hannah-el arretengeleyel, avey Samuel antheyew INGKARTew arrwekel-antey*

<sup>21</sup> Aherrety anyent-penh Elkanah alhew ikweren-h-nem-akert apmelerrel-ayeth apmer Shiloh-warl, kwener-aynteyew INGKART-warl, aker tyenkerr-then anthaynteyew ikwer. Elkanah-el ikwer antheyew, rarl arrwekel-antey arretengelew. <sup>22</sup> Arelh Hannah-an artenyarl anew. Rap angkew, “Aweyan atha aylpatyel-antey wanteyel. Rarl aylpaty-wety ipmelhem, athap renh akngemarl Shiloh-warl, INGKART-warl-anem antheyew. Ra anayten-then ikwer-itwew.”

<sup>23</sup> Elkanah-el tyernew, “Kel. Ngarl ilkelhem alakenh. Alerl anaynten-atherr, awey aylpaty-wety ipmelhentyew. INGKARTel ngenh alpemelem, ntwarl arretengelew-angkwarr.” Hannah-an anenh awey ikweren halerl-antey alkenhelenh, rarl aylpaty antywenh-antey-akert.

<sup>24</sup> Aherrety irrpety-penh aweyel amernant-anem arlkwenh. Elkanah alhew ikweren-h-nem-akert apmelerrel-ayeth warl INGKART-wenh-warl Shiloh-warl. Amenhang-atherran alhew-anem ikwer-rnem-angkwarr. Rernem akngew pwelek irrwey ilkwa, amern arlety ampwerrk, ngkwarl-anem arranty nanikwet yenp-penh-akert. <sup>25</sup> Elkanah-el Hannah-el-then pwelek ipmew atwew INGKARTew, ratherr awey-then akngew artwamp Eli-warl. <sup>26</sup> Hannah angkew ikwer, “Artwampay, ntwa ayenh iterl-areyel apek? Awank-akerr ayengan rtney-alhenh ngkweng-itwel, artnemel angkenh INGKART-warl. <sup>27</sup> Atha ayernenh, ampa ayenh antheyew. Rap ayenh awew, nhanemap ayenh anthewan, atharl ayernewan. <sup>28</sup> Aleyan atha renh anthem INGKART-warl-anem. Ra warrkerr-aynteyew ikwer ampwerreyew-atety.” Rarl renh ilew, INGKARTelarl renh awew, Eli ra kwenerrew INGKART-warl-anem.

## 2

... <sup>11</sup> Ikwer-penh Elkanah angkep alpew ikweren-h-nem-akert apmer Ramah-warl. Avey ran anenharl Shiloh-itwew. Eli-elan renh akalty-anthenh, INGKARTew warrkerr-aynteyew.

### *Eli-wenh alerikw apmwatherr*

<sup>12</sup> Eli-wenh alerikw-atherr, Hophni-atherr Phinehas-atherr, ratherr ingkart apmwatherr anenh. INGKARTew awelhey-angenh ratherr anenh. <sup>13</sup> Ingwerenteyel INGKARTew aker anthenh, ratherr aker inenh apmwangkwarr artwa ikwer-they. INGKARTel awank-antey alakenh ilew, “Ingwerenteyel aker anthem atyeng, artwa ingkartel aker anter-tangkwel rwel arrtyemer atyeng. Artwa akerew-arteyel kwatylel tyelk arrtyem, artwa ingkartel ra inem-anem ikwerew.” Ratherranap apmwel-ayetharl inenh alakenh. Ingwerenteyel aker arrtyen, ratherr warrkenh anyent thwenen, ikwer-atherr inaynteyew. <sup>14</sup> Warrkenhel fork arlpenty ilkwel atanthenh. Aker akngerr apek ra inenh, aker akely apek. Ratherr inenh alakenh apmwel-ayeth akngerr-wenh. Ratherrap Israel-wenh-rnem ingkerrew irrkhet-angkwarr mpwarenh, rernemar alhenh apmer Shiloh-warl, aker INGKARTew anthaynteyew. <sup>15</sup> Ratherr mpwelhey-angenh, anter-tangkwel arrtyeyew, arrangkw. Artwa warrkenh ra angkenh artwa akerew-artey ikwer, “Aker artwa ingkartew-atherr antha, ratherr rwel arrtyemel arlkweyew. Aker kwaty-penhew ratherr ilkelhey-angenharl. Aker arlety ikwer-atherr antha!”

<sup>16</sup> Artwel ra apek tyernem, “Alerl anter-tangkwel arrtyey-ingkerr. Ntwap aker inem-anem.” Warrkenh ran angkenh, “Arrangkw! Anamerl ayenh anthay, rakerl-alhewerr-anem atha ngenh!”

<sup>17</sup> Alakenh Eli-wenh alerelikw-atherran mpwarenh apmwangkwarr innga. Ratherr angka INGKART-wenh awelhey-angenh. INGKARTan ahelerrew ikwer-atherr.

### *Hannah-el Samuel arerlenty-akngengh*

<sup>18</sup> Avey Samuel ra warrkerrenh INGKARTew. Ra aylpenh artwa ingkart-wenh arnkwel. <sup>19</sup> Aherrety arrpanenh amelikw ikweren hkwet akely rlengkeny mpwarenh ikwer artwa ingkart-wenh-apeny. Rarl alhenh apmeler-angkwarr apmer Shiloh-warl, rap kwet rlengkeny akngengh ikwer. <sup>20</sup> Eli-el INGKART ayernenh Elkanah-ew Hannah-ew-atherr alakenh, “INGKARTay, ntwa arelh nhenh anthev awey akely, rarl ngenh ayernenh. Rap ngkweng-anem anthev. Antha nhenh-atherr ampa ingwer-rnem-anem.” Ratherrap alpenh apmer-warl-anem angkep. <sup>21</sup> Inngarl INGKART mwerr anenh Hannah-ew. Ikwer-penh ra ampa ingwer-rnem-anem atnyenew; awey-rnem irrpety, kwey atherr.

Ikwereng-arey-antey Samuel ra ilkwerreyen-h INGKART-wenh warl-itwew, warrker-renharl ikwer.

### *Eli-el alerikw-atherr ilteyel*

<sup>22</sup> Eli-an artwamp innganem. Ra awenh, alerikw ikweren-h-atherrelarl apmwel-ayeth mpwarenh Israel-wenh-rnemew. Ra awenh arrpemarl, ratherrarl irryertel alhenh

arelh warrkenh-rnem-akert, INGKART-wenh kalikwelarl warrkerrenh-rnem, arriwarl arntarnit-arenh-rnem. <sup>23</sup> Rap angkew ikwer-ather, "Akngerrrel ayenih ileyel, mpwelarl apmwa innga mpwareyel. Ilekek mpwel alakenhan apmwelheleyel?" <sup>24</sup> Akngerran angkerreyel mpwelew, apmwel-ayetharl mpwareyel, rernemap apetyem ayenih ileyew. <sup>25</sup> Mpwel iterl-arem, artwa anyent apmwelhelem ingwerew, Akngeyarl ikwer katy angkem apek. Artwa anyent apek apmwelhelem INGKART-warl-athet, nthakenh ingwer ikwer katy angkey-angenh-anem, arrangkwarl."

Alerikw ikweren-atherranap ikwer awelhey-angenharl, arrwekel-anteyarlap INGKARTan iterrew, renh-ather ilwerl-atheneyew.

<sup>26</sup> Awey Samuel-an ilkwerreynen arraty-angkwarr. INGKART ikwer ilkelhenh artewentyingwern-angkwarr.

### 3

#### *INGKART arlkeyel Samuel-ew*

<sup>1-2</sup> Awey Samuel-el ra artwamp ingkart Eli alpemelenh. Warrk ikweren alakenh aynten INGKARTew. Eli artwamp innganem irrew, arrkay-anem arenh. Rarl anenhenh-arey, INGKART irrpetyapewant angkenh. Irrpetyapelant altyerr INGKART-wenh arenh.

Ingwa ingwer-ingweran artwamp ankwayntenh. <sup>3</sup> Samuel ra amerrik-anem, rap aynten-anem warl INGKART-wenh-itwew, box impen Akngey-wenh-angkwarr. Atemwengkel-antey, lyenenty anter alip-akert ampenh-antey. <sup>4</sup> INGKART arlkew awey ikwer, "Samuel-ay!"

Ra tyernew, "Yew! Ilekay?" <sup>5</sup> Rap anterrew Eli-warl angkey-alhew, "Ilekay? Nga atyeng arlkew."

Eli-an angkew, "Arrangkwew. Ayengan arlkey-angenh. Alpa ayntey-alpa." Rap alpew ayntey-alpew-anem. <sup>6</sup> INGKART arlkew arrpemarl Samuel-ew, "Samuel-ay!" Rap akwentew, anterrew Eli-warl arrpemarl angkey-alhew, "Ilekay? Nga atyeng arlkew."

Artwampan angkew, "Aweyay, ayeng ngkweng arlkey-angenh. Alpa ayntey-alpa." <sup>7</sup> Samuel-elan INGKART iterl-arey-angenh-antey, arrangkw-antey. Aleyant ikwer angkew alakenhan, ranap alhengk-awey-angenh.

<sup>8</sup> INGKART arlkew arrpemarl, "Samuel-ay!" Rap akwentew, Eli-warl arrpemarl anterremel angkey-alhew, "Yew! Ilekay? Nga atyeng arlkew." Artwampel iterl-arew-anem, INGKARTarl arlkensh ikwer, <sup>9</sup> rap angkew, "Alpa ayntey-alpa. Ingwerenty ngkweng arlkenty, angka alakenh, INGKART, angka atyeng-warl. Ayengan awelhem-anem ngkweng." Ra alpew ayntey-alpew arrpemarl.

<sup>10</sup> INGKART rtney-alhew arrer-anem Samuel-itwew, rap angkew ikwer irrkatty-angkwarran, "Samuel-ay!"

Samuel angkew, "INGKART, angka atyeng-warl. Ayengan awelhem-anem ngkweng."

<sup>11</sup> INGKART angkew ikwer-warl, "Atha mpwarem ingwer-lkwer-anem apmer nhenh Israel-itwew. Ingwer-rnem apateyelpeyeh, rernemarl aweyen alakenh." <sup>12</sup> Eli-rnem atha ilwerl-atheneyew, atharl ilew-angkwarr arrwekel-antey. <sup>13</sup> Alakenh atha renh ilew, 'Ayengan ahel-anem irreyel ngkweng ngkwenh-rnemew-then, athap arrenhantherren ilwerl-atheneyen. Ntwa iterl-arenhan, artwa alerengkw ngkwenh-atherrarl nyerr-weny awelhey-angenh angka atyenew anen. Ingkerrenh ikwer-ather, ilkelhey-angenh-anem irrew. Ntwan renh-ather artwereley-angenh, arrangkw. <sup>14</sup> Alakenh-wety atha arrwekel-antey ngenh ilenih ngkwenh-rnem-then, "Arrantheran apmwelhelem akngerr-inger-anem. Aker arrtyey-angenh-anem atyeng-warl, arrangkw-anem. Nthakenh ntwa ayenih apmwa nhewetyan arternpeley-angenh." <sup>15</sup> Samuel-elarl awew-penh, rap aynteynew-anem.

Ingwepenh-antey ra arriw altywerelew warl INGKART-wenh-itwew. Ra atererrew, Eli ilewerr, INGKARTarl ikwer angkew. <sup>16</sup> Artwampan arlkew ikwer, "Samuel apetyal!"

Samuel-el tyernew, "Yew! Ilekay?" <sup>17</sup> Artwampel ayernew, "Nthakenh Akngeyan angkew ngkweng-warl? Ila atyeng-warl arraty. Ntwa arraty atyeng iley-angenh, Akngeyan ngkweng ahelerrem artewentyel."

<sup>18</sup> Samuel-el ilew arraty-antey angka ingkerr akertew-atety. Eli angkew, "Inngarl ran INGKART ilkwarl. Ra arraty-angkwarr mpwarem."

<sup>19</sup> Samuel ra ilkwaniem irrew. Angkernem rarl angkenh, innganemarlap rerneman, INGKARTarl ikwer-itwel anen. <sup>20</sup> Akngerrrel Israel-wenh-rnemel renh iterl-arenh. Rernem ingkerrenhel iterl-arenh, Samuel rarl artwa angkakert INGKART-wenh anen.

<sup>21</sup> Akngerr-inger INGKART aremerrey-alhenh ikwer-warl apmer Shiloh-itwew. Ra renh akalty-anthenh, arraty angkaynteyew.

**4**

<sup>1</sup> Alakenh Samuel angkenh Israel-wenh-rnemew.

*Philistia-areny-rnemel irryert-ineyel box impen Akngey-wenh*

Ingwer-ingweran artwa ahawarr akngerr Philistia-areny-rnem akarrerrew, atwerreyew werreyew-then pewenarrel Israel-wenh-rnem-then. Israel-wenh-rnem ayntey-alhew apmer Ebenezer arrerenty. Philistia-areny-rneman ayntey-alhew apmer Aphek arrerentyarl, ipert ingwer-ampenyarl. <sup>2</sup> Rernem alhew ampep-warl, werreyew Israel-wenh-rnem-then. Philistia-areny-rnemel renh-rnem ipmew atwew, akngerr innga, 4,000.

<sup>3</sup> Israel-wenh-rnemarl alpew angkep apmer ikwer-rnem-wenh-warl, artwamp-rnem ayernerrenh, "Ilek-wety INGKARTel renh-rnem tyarlewew, anewantherrenh-rnem atweyew? Apmer Shiloh-warl alhey, box impen Akngey-wenh inerleweyew. Anantherr box renh atnyeneyew atwerrentyeng-arey Philistia-areny-rnem-then. Akngeyelan anenhantherrenharl alpemelem."

<sup>4</sup> Rernemap artwernem thwenew Shiloh-warl, box impen Akngey-wenh inerleweyew. Rerneman iterrew, "INGKART Ilkwa Ingkerrenhew ra box-itwew aneyel aympell-akert atherr ampepel." Artwamp ingkart Eli alerikw ikweren-atherr, Hophni Phinehas-atherr, ratherr alhew arrpemarl, box impen arntartn-arenhey-alpaynteyew.

<sup>5</sup> Rernemarl akngey-alpew box renh, Israel-wenh-rnem inkwerelhemel arkalhelerrew. Arlkewarlel ahern akngenhelhelew. <sup>6</sup> Philistia-areny-rnemel awew, rernemap ayernerrew, "Nthakenh irreyel? Ilekewarl Israel-wenh-rnem arlkahelerrew?"

Rernemarl awew, Israel-wenh-rnemel box impen Akngey-wenh atnyeney-alpew, <sup>7</sup> rernemap atererrew. Rernemap apatemel angkerrew, "Pwertay! Akngey ikwer-rnem-wenh ikwer-rnem-warl-anem apetyew! Aleyant alakenh irrewan! Irrwernelhew innganem anantherr! <sup>8</sup> Nthakenh ingwerentiel anenhantherrenh arntartn-arey-angenh nhelkwer-wety! Ananther awew, rarl apmwa innga mpwarew Egypt-areny-rnemew arlpaw-ampeny-itwew. <sup>9</sup> Ananther Philistia-areny-rnem rlterrk-antey aneyew! Renh-rnem antengeleyew, anantherraw atyetyart ikwer-rnem aneyew. Rernem anewantherr atyetyartarl anewerr! Atererrey-angenh ikwer-rnem-wety! Artewenty atweyew ananther!"

<sup>10-11</sup> Rernemap inngarl rlterrk alhew ikwer-rnem-angkwarr, ipmew-anem atwemel artwa ahawarr Israel-wenh-rnem 30,000. Ikwereng-arey Philistia-areny-rnemel irryert-inew box impen Akngey-wenh. Eli-wenh alerikw-atherr, Hophni-atherr Phinehas-atherr, ratherr ilwew arrpemarl. Ingwer-rneman arlperryarl anterrew, apmer-warl angkep alperlewew.

*Eli ilweyel*

<sup>12</sup> Arlta ikwerel-antey artwa anyent angka apmwakert anterrew, rernemarl atwerrenh-they. Ranap Benjamin-wenh-antey, rap anterreyenh apmer Shiloh-warl, arleng innga. Arlka apmwa innga anterrenh; arnkwa ra iterrew, akapwert-warl ahern arrernelhew ikwer-rnem-wenh-angkwarr, rarl ikwer-rnem artewenty ampperrngerrew.

<sup>13-15</sup> Eli-an artwamp innganem, 98, aparrng-anem. Ra anenh arriwel arntartn-arelhemel, chair-el anerl-anemel. Ra atererremel iterrew artewenty, apmwa innga ayntewerr box impen Akngey-wenh ikwer.

Artwa rarl apmer-warl aremerrenhew, angka apmwa ilerl-apen, akngerran artnalhelerrew-anem. Eli-el awew, rap arlkew artwa ikwer, "Nthakenh irreyel? Ilekewarl akngerr artnalhelerreyel alakenhan?"

<sup>16</sup> Artwa ra anterrew Eli-warl angkey-alhew, "Artwampay! Ayengan anterrey-alhew, rernemarl atwerrenh-they!"

Artwampel aynew, "Nthakenh irreway?" <sup>17</sup> Ra tyernew, "Anantherr Israel-wenh-rnem anterrey-alpew Philistia-areny-rnem-wety. Rernem artwa ahawarr ingwer-rnem anewantherrenh-rnem atwew, alerengkw ngkwenh-atherr-then. Box impen Akngey-wenh rernemap irryert-inew anewantherr-they!" <sup>18</sup> Eli-an anenh-antey chair ikwer-itwew. Rarl awew, Philistia-areny-rnemelarl box impen irryert-inew, rap atynew artepel-ayeth ahern-warl. Artwamp antyelty irrewarl innga, rap rternng-anem akelhew. Artwa ilkwa ra anenh Israel-itwew aherrety 40-ew-atety. ...

**5**

*Akngelyel apmwel-ayeth mpwareyel Philistia-areny-rnemew*

<sup>1</sup> Philistia-areny-rnemel irryert-akngeynew box impen Akngey-wenh. Ebenezer-they akngeynew apmer ingwer-warl Ashdod-warl, Philistia-itwew. <sup>2</sup> Rernemap aylpenhew

ikwer-akert warl Dagon-wenh-warl. Dagon ampwal ilkwa apwert-penh arnwarnew. Philistia-areny-rneman kwenerrenh ikwer-warl inngewarz-arrpantey. Rernemap ar-ternew box impen ikwer-itwew.

<sup>3</sup> Ingwepenh ingwerelan Ashdod-areny-rnem akwentew, rernemap arew ampwal ikwer-rnem-wenh, ahernel-anem atnertel-ayeth ayntenh. Arrwekel-ampeny box impen itwew ra ayntenh. Rernemap renh rnkerneynew angkep arrpemarl.

<sup>4</sup> Ingwepenh ingwerelan rernem arew, ampwal ra aytnew arrpemarl. Arrwekel-ampeny box ikwer-itwew ra ayntenh ahernel arrpemarl, atnertel-ayeth. Arlkan mwerr-antey akelhey-angenh-anteyarl. Akapwert akwatherr akelhewarl, arriw-itwew ayntenh aketh-itwew. <sup>5</sup> Warrkenh Dagon-wenh-rnemel ampwal arangelew arriw-wety. Rernem ingwer-rnem-then arraty alhey-angenh-anemarl arriw-angkwarr. Rernem atnarnpenhenh-anem ikwer-angkwarr, warl ikwer-warlarl aylpenhenhan, ampwal renh lthwenewerr-arrpantey. Rernem atnarnpenhenh-antey angka nhenhan ingkwernenh-arey.

<sup>6</sup> INGKARTel apmwel-ayeth mpwarew Ashdod ikwer-ampeny-areny-rnemew. Ingkerrenh wangkew tywen-angketyarr-anem. <sup>7</sup> Ashdod-areny-rnemel arew arntety apmwa, rernemap angkerrew, “Anantherr Akngey Israel-areny-angkwarr irrwernel-hew innganem. Dagon-an Akngeyel atwem arrpemarl! Iwemer anantherr box Akngey-wenh!” <sup>8</sup> Rernem yangkelhew, artwa ilkwa apmer ingwer-ampeny-areny-rnem apetyeyew, akarrerreyew Ashdod-itwew. Rernemap renh-rnem ayernew, “Nthakenh ilem anantherr box Akngey Israel-areny-wenh nhenhan, arntety-wety?”

Rernem tyernew, “Apmer ingwer-warl Gath-warl-anem thwenerh-arey.” Box renhap rernem apmer Gath-warl-anem akngeynew.

<sup>9</sup> Rernemarl akngeynew-penh, INGKARTel apmwel-ayeth mpwarew Gath-areny-rnemew-anem irrkaty-angkwarr, ater-anthew renh-rnem artewenty. Ingkerrenh wangkew tywen-angketyarr, akely-rnem ilkwernem-then. <sup>10</sup> Kel Philistia-areny-rnemel box renh apmer ingwer-warl-anem Ekron-warl akngeynew.

Rernemarl arrer-anem irrew box ikwer-akert apmer Ekron-warl, akngerr ikwer-areny arkalhelerrew arnarewarlel. “Pwertay mentyaw! Nhenh-rnemelan box renh Akngey-wenh apmer nhewarl-anemarl akngetyew! Ilwerl-atheneyehanap ingkerrenh!” <sup>11</sup> Rernem yangkelhew, artwa ilkwa apmer ingwer-ampeny-areny-rnem apetyeyew, akarrerreyew arrpemarl. Ekron-areny-rnem ikwer-rnem angkew, “Box yanh iwey! Thweneyney angkep apmer ikweren-h-warl, ingkerrenh-anem ipmew atbewerr apmer arrpanenh-itwew Philistia-ampeny!”

Ilwernerrew akngerr arntety ikwer-penh. INGKARTel ater-anthew renh-rnem alak-enharl. Rap apmwel-ayeth innga mpwarew Philistia-areny-rnemew. <sup>12</sup> Ingwer-rnem iteth-antey anenh-rnem, arntety ilkawakert anenh tywen-angketyarr. Rernemap altyerr ikwer-rnem-wenhew arkalhelerrenh, renh-rnem ayerneyew mwerreleyew. ...

## 7

<sup>1-2</sup> [Kel Philistia-areny-rnemel thweneynew angkep box impen Akngey-wenh Israel-warl. Israel-wenh-rnemelan] akngeynew apmer Kiriath Jearim-warl, warl Abinadab-wenh-warl apwert irrwerl-warl. Rernemap arrernew alerikw ikweren-h Eleazar, box renh arntarnt-araynteyew. Box ra rtnen haherry 20-ew-atety warl ikwer-itwew.

### *Samuel-an artwa ilkwa aneyel Israel-itwew*

Ikwereng-arey Israel-wenh-rnem alpwely anenh, intem-antey ayernenh INGKART, renh-rnem alpemeleyew. <sup>3</sup> Samuel-el renh-rnem ayernew, “Inngang arrantherr angkeperrem INGKART-warl! Aarrantherrap alakenh irremer. Iwenh-arey ilek-ilek yanh-rnem arwerl-penh apwert-penh. Ampwal yanh-rnem iwenh-arey amarl-arrpantey itnan Astarte-rnem. Ampwal yanh-rnem Israel-areny-weny, arrangkw. Apmer ingwer-areny-wenh. INGKART anyentewant nakemel kwenerreyew, rap arrenhantherrenh arntarnt-arem Philistia-areny-rnem-wety.” <sup>4</sup> Rernemap awelhew, iwemel ampwal renh-rnem, artwarppantei itnan Baal-rnem amarl-arrpantey itnan Astarte-rnem-then. Rernemap INGKARTewant-anem nakemel kwenerrenh.

<sup>5</sup> Ikwer-penh Samuel yangkelhew Israel-wenh-rnemew, “Akarrerrenh-arey apmer Mizpah-itwew. INGKART atha ayerneyew arrewantherr.”

<sup>6</sup> Akngerr akarrerrew-anem apmer ikwer-itwew. Samuel atyetyart ikwer-rnem anenh. Kwaty rernem inpew, thelemel ahernl-warl. Alakenh rernem INGKARTew ilelhew nyerrerremel apmwa ikwer-rnem-wenh-they. Arta ikwerel rernem amern arlkwey-angenh anenh, rernemap ilelhew, “Apmwel-ayeth mpwarew anantherr INGKART-angkwarr.”

<sup>7</sup> Philistia-areny artwa ilkternemel awew, Israel-wenh-rnemarl akarrerrew Mizpah-itwew, rernemap atnwenhew artwa ahawarr akngerr apmer ikwer-warl. Israel-wenh-rnemel awew, ingwer-rnemarl apetyen, rernemap atererrew. <sup>8</sup> Rernemap angkew Samuel-warl, “INGKART katy ayern-aynta anewanther, ipmelhey-angenh. Ayerna, anenhantherrenh mwanty arntarnt-areyew ikwer-rnem-wety.” <sup>9</sup> Samuel-el inew yep-yep akely, rap renh arrtyew ingkerreh-antey INGKARTew. Ra ayerneynen intem Israel-wenh-rnemew, INGKART rap renh awew-anem.

<sup>10</sup> INGKARTel alakenh mpwarew, rarl Samuel awewel. Samuel rarl yep-yep akely arrtyeheng-arey, Philistia-areny-rneman arrerarl apetyen, ahel apmer ikwer-warl. INGKARTelap arwerlk ilkwa angkel-angkelhelew awely-awely-apeny. Philistia-areny-rnem atererrew artewenty innga apatemel, rernemap aterel-anem anterreynew. <sup>11</sup> Israel-wenh-rnemel alwernew Mizpah-they apmer Beth Car-ew-atety, akngerr ipmew atwenhew ampep-itwew. <sup>12-13</sup> Philistia-areny-rneman arlperry anterrew apatemel, arleng-alenty alpew, apey-alpey-angenh apmer Israel-warl. Samuel rap apwert ilkwa anyent inew, rknernew-anem ampep-itwew apmer atherr-itwew, Mizpah-itwew Shen-itwew-then, ingkerrel iterl-araynteyew. Rap angkew, “INGKARTel anenhantherrenh arntarnt-arenh.” Rap apwert renh itnewew “Apwert Arntarnt-arey-angker-wenh.”

INGKARTel renh-rnem arntarnt-arenh arleng-alenty Philistia-areny-rnem-wety, Samuel iteth-antey anenheng-arey. ...

## 8

*Israel-wenh-rnemel ayerneyel, atyetyart ilkwa ikwer-rnem arrerneyew*

<sup>1-2</sup> Samuel alerikw atherr-akert. Alerikw ilkwan itna Joel, alerikw akelyan itnan Abijah. Aynarlewarl artwamp-anem irrew, ra arrernew renh-atherr ilkwa Israel-wenh-rnemew. Ratherr court-ew-arteyp-atherr, apmer Beersheba-itwew warrkerrenh. <sup>3</sup> Ratherranap aynarlew-apeny-weny. Anketyarlap ratherran, apwtant inaynteyew iterrenh. Artwa apmwel-rneman renh-atherr apwert anyelkel anthenh, ratherraw renh-rnem court-itwew tyarlew-aynteyew.

<sup>4</sup> Ingwer-ingweran artwamp-rnem akarrerrew apmer Ramah-itwew, angkeyew Samuel-warl. <sup>5</sup> “Ngan artwamp-anem irrew. Alerengkw ngkwenh-atherr ngapeny-weny. Ratherran mwerr-wenyarl ilkwa aneyew anewanther. Ntwa arrernemer artwa ilkwa anyent, atyetyart anewanther aneyew. Apmer ingwer-rnem-itwewan atyetyart ilkwa anyentarl aneyneyel. Anantherran ilkelheyel irrkaty-angkwarr arrpemarl.”

<sup>6</sup> Samuel-an arlkarerrew, rernemarl alakenh angkew-wety. Rap angkey-alhew INGKART-warl. <sup>7</sup> INGKART angkew ikwer, “Awelha ikwer-rnem, rernemarl ayerneyel-angkwarr. Rernem ngkweng-wety arlkarerrey-angenharl. Inngan atyeng-wetyarl rernem arlkarerreyel. Ilkelhey-angenh atyeng, ayeng atyetyart aneyew ikwer-rnem, arrangkw-anem. <sup>8</sup> Awank-akerr alakenh aytew, atharl arrwekeleeny-rnem atnwenhey-alpenh apmer Egypt-they. Rernem intem-antey atyeng-wety angkeperrenh, ampwal apmer ingwer-areny-rnemew kwenerrenh. Aleyan rernem irrkaty-angkwarr-antey mpwareyel. Ngkweng-wety-anem arlkarerreyel arrpemarl. <sup>9</sup> Mwerrarl ikwer-rnem awelheman. Menty rernem atyetyart ilkwa ingwer iney. Mwanty-tangkwel angka ikwer-rnem, ‘Atyetyart yanh-lkwer anenty, rap riterrkarl mpwarem arrewanther. Rap ilanthen, ilek-ilek mpwareyew rlterrkarl-angkwarr ikwer.’”

<sup>10</sup> Samuel-el artwamp-rnem ilew, INGKARTarl angkew-angkwarr. ...

<sup>11</sup> Rernem awelhey-angenh ikwer. “Arrangkw! Artwa atyetyart anyent anewanther arrerneyew!” <sup>12</sup> Apmer ingwer-rnem-itwewan artwa atyetyart ilkwa anyentarl aneyneyel. Anantherran ilkelheyel irrkaty-angkwarr arrpemarl. Atyetyart rap atnwenh-ayntem anenhantherrenh, atwerr-aynteyew ingwer-rnem-itwew.” <sup>13</sup> Samuel alhew, INGKART ileyew, rernemarl angkew-angkwarr. <sup>14</sup> INGKARTel tyernew, “Awelha ikwer-rnem. Atyetyart yanh-lkwer arrerna ikwer-rnem.”

Samuel angkew artwamp-rnemew, “Kel. Alakenh mpwarem atha. Alpenh-arey-anem apmer-warl ingkerr.”

## 9

*Samuel-el Saul rlwaneyel, atyetyart aneyew Israel-wenh-rnemew*

<sup>1</sup> Artwamp ilkwa anenh itna Kish, ranap Benjamin-wenh-anteyarl. <sup>2</sup> Kish-wenh alerikw itna Saul-arl. Artwa akely inngerr mwerr-angkerarlap ran, arlpenty inngar ingwer-rnem-angkwarr anenh, Israel-itwew.

<sup>3</sup> Artwamp Kish-el tangkey akngerr atnyenreh. Ingwer-ingweran tangkey-rnem ingwer-angkwarr irrtiyert-alpew. Kish-ap angkew alerikw Saul-ew, “Nga warrkenh

anyent-then alhenh-atherr, tangkey-rnemew nthweyew." Ratherrap anperl-alhew, <sup>4</sup> nthweyew Ephraim-itwew apwert-angkwarr-tangkwel, ikwer-they Shalisha-ampeny-angkwarr-anem. Arrangkw-antey, arey-alhey-angenh-antey. Ikwer-they ratherr nthweyew alhew Shaalim-ampeny-warl-anem. Arrangkw-antey. Benjamin-ampeny-anem arrangkw arrpemarl ywarew. <sup>5</sup> Ratherrap alhew Zuph-ampenyew-atety-anem. Saul angkew, "Arleng-alenty aylanth apetyew. Angkep alpey, akngey atyenh artewenty iterremel mpwelherl-anewerr aylewanth, tangkey weth-rneman menty-anemarl ipmey." <sup>6</sup> Warrkenhel tyernew, "Alerl-antey. Artwamp weth-aweb, angka Akngey-wenh-akert? Ra apmer nhel arrer-antey aneyel. Tyak inngarl ran. Aylanth renh ayernemer. Ra apek iterl-areyel, tangkey-rnemarl alpew." ...

<sup>14</sup> Ratherrarl apmer ikwerel aremerrew, ratherrap artwamp Samuel arnarew. Ra alhenh apwert-warl, rernemarl aker arrtyenh-warl INGKARTew. <sup>15</sup> Arrwekel-antey INGKARTel renh ilew alakenh, <sup>16</sup> "Atha areyel, atyenh-rnemarl ingwer-rnemel alhengkerr-antheyel. Rernem ayenh ayernenh, athap renh-rnem awew. Ingwelarreng atha artwa akely thwenem ngkweng-warl, ranap Benjamin-wenh-anteyarl. Rap atyenh-rnem arntarnt-arem Philistia-areny-rnem-wety. Anter alip theleyew akapwert-warl. Alakenh renh atyetyart arrerneyew atyenh-rnemew Israel-wenh-rnemew."

<sup>17</sup> Samuel-el Saul warrkenh-then arnarew, INGKART angkew ikwer, "Yanh ra apetyeyel, atharl ngenh ilew apmwerrkel. Ran atyenh-rnemew atyetyart aneyen." Samuel mpwelhew ikwer-atherr keyt-itwew.

<sup>18</sup> Saul-el iterl-arey-angenh artwamp renh, arrangkw-antey. Rap angkey-alhew ikwer apal, "Artwamp altyerr arey-angker aneyel apmer nhennh-itwew. Nthekarlap warlan ikwrenh?"

<sup>19</sup> Samuel-el tyernew, "Ayengaw, altyerr arey-angkeran. Mpwelanth alhenh-atherr arrwekel apwert yanh-warl, akerarl arrtyem-warl INGKARTew. R lengkan mpwelanth amern arlkwem atyeng-itwel. Ingwelarreng atha ngkweng-warl anayntelemel ilem, ngarl akwerrng iterreyel. Mpwelanthap apmer-warl-anem alpem. <sup>20</sup> Tangkey weth-rneman anterrewarl arlta irrpetyel, menty-anemarl ipmey. Ingwerentyl renh-rnem arey-alhew kel-antey. Angka nhennh-anem iterra. Ntwa apek awew, akngerr alakenh angkerrew, "Artwa Kish-wenh-anteyarl rlwaneman, atyetyart anewantherr aneyew Israel-wenh-rnemew?" ...

<sup>25</sup> Rernem apey-alpew apwert irrwerl-they apmer Samuel-wenh-warl. Samuel-el Saul atnwenhew warl irrwerl-warl alkey-warl, ratherraw angkerreyew. Ingwelan Saul-then warrkenh-then ayntew irrwerl arlkarl-itwew.

<sup>26</sup> Ingwepenh-antey Samuel arlkey-ayntew Saul-ew, "Akwentenh-atherr, apmer-warl-anem alpeyew." Saul-then Samuel-then keyt-warl-athetk-anem anperl-alhew. <sup>27</sup> Samuel angkew-anem ikwer, "Artwa warrkenh yanh thwena, arrwekel irreyew. Ngan alerlarl mpwelha. Atha ngenh angka INGKART-wenh-tangkwel iley-alkenh." Warrkenh ra anperl-alhew arrwekel.

## 10

<sup>1</sup> Samuel-el anter alip inew, thelemel Saul-warl akapwert-warl. Rap renh arrwantyew arreyl atherr-angkwarr ikwer-rnem-wenh-angkwarr angkemel, "INGKARTel ngenh arrerneyel, atyetyart aneyew ikwerenh-rnemew. Ntwap renh-rnem arntarnt-arem ahelengkw-rnem-wety apmer arrpanenh-arey. ... <sup>6</sup> Inweng INGKART-wenh ngkweng-warl arrerneyeh, arrwarrengel ngenh rletterkeleyew. Ntwap angka INGKART-wenh ileyen, angkakert Akngey-wenh-rnemarl akarrerreyenh-arey. Ngap ingwer-lkwer-anem anem. <sup>7</sup> Ntwarl alakenh arem, ntwap iterl-areyew, Akngeyan ngkweng-itwel arranem anayntem. Ilkelhentyel ntwa ilek-ilek mpwaraynteyew." ...

<sup>9</sup> Saul-arl anperl-alhew, anamerl-antey Akngeyel renh ingwer-lkwerelew. Ikwerel-antey ra angka INGKART-wenh ilew, artwamparl angkew-angkwarr. ...

<sup>17</sup> Samuel yangkelhew Israel-wenh-rnemew, "Ingkerr akarrerreyew apmer Mizpah-itwew." ...

<sup>24</sup> Rernem akarrerrew apmer ikwer-warl. Samuel-el Saul-anem arrwekel rnkernew. Samuel angkew ingkerrew, "Artwa nhenn arenh-arey! INGKARTel renh rlwanew, atyetyart aneyew! Ingwerentyl alakenh aney-angenh rapeny, arrangkw!"

Akngerr inkwerelhemel arkerrew ikwer, "Intem-antey ra aneyew atyetyart!" ...

## 11

*Saul-el akngerr arntarnt-areyel apmer Jabesh-itwew*

<sup>1</sup> Ikwer-penh atyetyart ilkwa apmer Ammon-areny apetyew itnan Nahash, artwa ahawarr akngerr-akert. Rernemap amperelew apmer Jabesh renh Gilead-ampenyitwew. Akngerr ikwer-itwew nthakenh alhey-angengh aketh-warl anew. Rernem angkakert thwenew atyetyart ikwer-warl, alakenh angkeyew, "Ipnew anenhantherrenh atwey-angengh! Ngan atyetyart anewantherr anem. Anantherran warrkenharl ngkweng anem. Pip-warl anantherr alakenh ingkerrenhel ingkwerney, itnernem ingkwernel-hewey ingkerrenh pip ikwer-warl."

<sup>2</sup> Atyetyartel thweneynew angkakert angkep, alakenh angkeyew, "Kel. Atha arrenhantherrenh atwey-angengh. Anngat arraty-ampeny atha tyerrem arrewantherr-itwew. Alakenharlan Israel-wenh-rnem nyerr-antheyew."

<sup>3</sup> Artwamp-rnem apmer ikwer-areny-rnemel angkakert thwenew angkep atyetyart ikwer-warl, alakenh angkeyew, "Alerl anantherr aney arlta 7-ew-atety-tangkwel. Kel anantherr thwenem angkakert-rnem apmer arrpanenh-warl Israel-ampeny-warl. Ingwer-rnem apetyey-angengh apek, anenhantherrenh alpemeleyew. Arrangkwelan, anantherr ngkweng-warl anthelhem. Ntwap anenhantherrenh annga tyerrem-anem."

<sup>4</sup> Angkakert-rnem aremerrew apmer Saul-wenh-itwew Gibeah-itwew, angka apmwak-ert. Apmer ikwer-areny-rnemel awew, rernemap atayel artnalhelerrenh. <sup>5</sup> Saul-an apal warrkerrenh katen-itwew. Karl apey-alpenh pwelek atherr-akert, rap awew artnalhelerrenharl. Rap ayernew, "Nthakenh irreyelay? Ilekew akngerr artnalhelerreyel?" Rernem renh ilew, angkakert-rnemelar ilew-angkwarr.

<sup>6</sup> Saul-el awew, Inweng Akngey-wenhel renh rlterrkelew anamerl-antey arawerrng ilkwel. Ra ahelerrew arteventy atyetyart Ammon-areny ikwer. <sup>7</sup> Pwelek ikweren-atherr ipmew atwew, nayp ilkwel akep-akalthemel akely-akely. Angkakert akngerr-tangkwel akarrelew, aker akely-akely anthemel ikwer-rnem. Rap apmer arrpanenh-warl Israel-ampeny-warl thwenew, angkey-alheyew alakenh, "Aker tyeyp nhenh arenh-arey! Artwa ingkerrenhel apentyeyew Saul-then Samuel-then, Ammon-areny-rnem-then werreyew! Artwa anyent arteny anenty, Saul-elap pwelek ikweren-areny akep-akaltheyen aker nhenh-apeny!" Alakenhan Saul-el akngerr ater-anthew, INGKARTelar rlterrkelewel. Rernemap ikwer anyent-inger awelhew. <sup>8</sup> Saul-el akarrelew artwa akngerr apmer anyent-itwew Bezek-itwew; 300,000 Israel-areny, 30,000 Judah-areny-rnem.

<sup>9</sup> Saul-rnemel ilanthew angkakert Jabesh-areny-rnem, "Jabesh-areny-rnem ilenh-arey, Ingwelarrengan ingwepenh-antey anantherr irrentemel atweyen Ammon-areny-rnem!"

Jabesh-areny-rnemel awew, rernemap irrngerney irrew. <sup>10</sup> Rernemap angkakert thweneynew angkep atyetyart Ammon-areny-warl, alakenh iley-alheyew irrywerremel irrywerl-ampernemel, "Ingwelarreng anantherr anthelhem ngkweng-warl menty-anem. Ntwarrp anem, pwarrk antha, ngarl angkew-angkwarr."

<sup>11</sup> Saul-el ikweren-rnem irrpety-inger akalkelh-ayntew ingkeny tyerrelhey-angenghel-ante, 110,000 ingkerr amentew-ament, 330,000-penh. Aherlkewarlel-anem rernem anterrerrew apmer Ammon-areny-rnem-wenh-warl, artwa akngerr ipmew atwew. Rernemap renh-rnem atwenh-antey ingkeny ampepew-atty. Irrpetyapant-anem Ammon-areny-rnem aneyelpew, rernemap anterrerrew ingweram-angkwarr. ...

## 15

### Saul awelhey-angengh INGKARTew

<sup>1</sup> Ingwer-ingweran artwamp Samuel angkew Saul-ew, "INGKARTel ayen hew, ngenh atyetyart arrerneyew ikweren-rnemew Israel-wenh-rnemew. Awelha angka nhenhew-anem, rarl ayen hew ngwamp. <sup>2</sup> Awank-akerr, Israel-wenh-rnemarl alperlewenh Egypt-they, Amalek-areny-rnem apetyew, renh-rnem atwew. Aleyan athanemarl renh-rnem atwew, rernemarl alakenh-anyem apmwa mpwarew atyenh-rnemew. <sup>3</sup> Amalek-areny-rnem atwew alhenh-arey! Arrtyemel ilek-ilek ikwer-rnem-wenh! Ingkerrenh atwew ywerrelhelemel; artwernem, arelh-rnem, ampernem, pwelek-rnem, yep-yep-rnem, kamwerl-rnem, tangkey-rnem-akerr ingkerr-antey! Atyeng ingkerrenh antheyew alakenh."

<sup>4</sup> Saul-el angka thwenew apmer arrpanenh-warl, artwa ahawarr-rnem akarrerreyew apmer anyentel Telaim-el. Akngerr akarrerrew apmer ikwer-itwew; 200,000 Israel-areny-rnem, 10,000 Judah-areny-rnem. <sup>5</sup> Ra renh-rnem atnwenhew apmer Amalek-areny-rnem-wenh-warl, rernemap irryert-aylpew atwaty-itwew, apmer ikwer-itwew arrer-antey. <sup>6</sup> Ikwereeng-arey ingwer-rnem-then aneh apmer ikwerel, Ken-areny-rnem.

Saul-el angkakert ikwer-rnem thwenew, alakenh angkeyew, "Arrantherr Ken-areny-rnem alhemer-tangkwel arnangerremel, atha ingkerr ilwerl-atheneyenh-wety Amalek-areny-rnem. Nthakenh atha arrenhantherrenh atwey-angenh, arrantherrarl Israel-wenh-rnem alpemelew, arrwekeleny-rnem awank-akerrarl alperlewenh Egypt-they." Ken-areny-rnem alhew-tangkwel apmer ikwer-they arnangerremel.

<sup>7</sup> Saul-el artwa ikweren-hrnem-akertel alwernew Amalek-areny-rnem apmer Havilah-they apmer Shur-ew-atety, akngerrakw-ampeny Egypt-they. <sup>8</sup> Saul-wenh-rnemel ipmew atwew artwa, arelh, ampa ingkerreh-antey. Atyetyart Amalek-arenyan itnan Agag rernem atwey-angenh, arrangkwarl. <sup>9</sup> Itetharl renh atnyenew. Atnwenth mwerr-rnem-them iteth atnyenew; yep-yep, pwelek, akwerrk-rnem-then ikwer-rnem-wenh. Atnwenth apmvernemant rernem ipmew atwew. Ingkerrehn ipmew atwey-angenh-antey, arrangkw. Rernem awelhey-angenh, INGKARTelarl Saul ilew-angkwarz.

<sup>10</sup> Ikwerel-antey INGKARTel artwamp Samuel ilew, <sup>11</sup> "Saul-an atyeng awelhey-angenh. Intwemelerrew atyeng-wety. Ayengan amperrngerreyel, atharl renh atyetyart arrernew." Samuel-el awew, rap arlka apmwerrew. Ankawakel ra artnemel angkew INGKARTew.

<sup>12</sup> Ingwepenh-antey Samuel akwentew, alhew-anem, Saul-ew nthweyew. Ingwerentyel renh iley-ayntew, "Arrangkw nhenh. Saul ra alhew apwert Carmel-warl. Apwert ikwer-itwew apwert arlpenty-anem ra rnkernew, ingkerrel iterl-araynteyew, rantarl Amalek-areny-rnem ywerrelhelemel atwew. Ikwer-penh ra alhew apmer Gilgal-warl-anem."

<sup>13</sup> Samuel-elarl renh arey-alhew, Saul angkew, "Samuel-ay! INGKARTel ngenh irrngerney-anthermer! Atha kel-antey mpwarew, rarl ilanthew-angkwarz!"

<sup>14</sup> Samuel angkew, "Ntwa ilek-ilek ingkerr ywerrelhelemel atwey-angenh! Aleyan atha aveyel, yep-yep-rnem pwelek-rnem-then artneyelarl!"

<sup>15</sup> Saul-el tyernew, "Artwa ahawarr-rnemel, rernemarl alakenhan mpwarew! Rernem atnwenth mwerr-rnem inew Amalek-areny-rnem-wenh. Iteth-antey rernem atnyenew, ntaww arrtyaynteyew INGKARTew. Ingwer-rneman anantherr ipmewarl atwew."

<sup>16</sup> Samuel-el renh akeleytelew. "Akeleyt awelha atyeng-tangkwel! Atha ngenh ileyew, INGKARTarl atyeng angkew-angkwarz ingwel."

"Ya, ila ayenh."

<sup>17</sup> "Akely-tangkwel nga illehew. Nga ilkwa aneyew arrkernelhey-angenh. INGKARTel ngenh ilkwarl arrernew, ikweren-hrnemew atyetyart anaynteyew. <sup>18</sup> Ra ngenh ilanthew, atweyew apmwa yanh-rnem Amalek-areny-rnem. Ngenh ilanthew, renh-rnem ywerrelhelemel atweyew ingkerreh-antey. <sup>19</sup> Ilekew nga awelhey-angenh ikwer? Ilekew ntwa apmwa mpwarew INGKART-wenh-angkwarz? Ra ngkweng ahelerrew, ntwarl inew ilek-ilek ikwer-rnem-wenh."

<sup>20</sup> Saul-el apatemel tyernew, "Ay? Innga ayeng awelhew INGKARTew! Atha mpwarew, rarl ayehn ilanthew-angkwarz! Atha atwew ingkerr; artwa, arelh, ampethen. Atyetyart Agag-then atha akngay-alpew iteth-antey. <sup>21</sup> Artwa ahawarr-rnemel, rernem inew atnwenth mwerr-rnemant ikwer-rnem-wenh! Yep-yep-then pwelek-rnem-then rernem akngay-alpew, ntaww arrtyaynteyew INGKARTew apmer nhenh-itwew Gilgal-itwew."

<sup>22</sup> Samuel angkew, "INGKART ilkelhem, angka ikweren-hew-tangkwel awelh-aynteyew. Aker pwelhew ra ilkelhem alyepant. Anter pwelhew ra ilkelhem alyepant. Ikwerarl awelhemewant ra inkwerelhem. <sup>23</sup> Ntwa iterl-aremer, ingwerenty awelhey-angenh INGKARTew, rap apmwa inngarl mpwarem. Apmwarlap alakenhan, inweng apmwa ayernenty-apeny. Ingwerenty tangkemel anenty, INGKARTan ikwer inkwerelhey-angenh. Apmwarlap alakenhan, ampwal-rnemewarl kwenerreyel-apenyarl arweler-penhew apwert-penhew. Nga awelhey-angenh angka INGKART-wenhew, rap ngkweng-wety intwemelerrew arrpemarl. Nga atyetyart apmwanem irrew Israel-wenh-rnemew! Ngarl apmwelhelew-wety, INGKARTel ilew, 'Nthakenh nga atyetyart aney-angenh-anem, arrangkw.'"

<sup>24</sup> Saul angkew, "Ayeng-antey apmwelhelew. Awelhey-angenh INGKARTew ngkweng-then. Ayeng atererrew artwa ahawarr-rnem-wety, ikwer-rnemewant awelhew. <sup>25</sup> Athan ngenh ayernem, ahelerrey-angenh atyeng. Alpey-angenh atyeng-wety. Apey-alpa atyeng-itwel atyenh-rnem-warl. Ayeng INGKARTewant kwenerremel angkaynteyew."

<sup>26</sup> Samuel-anap alakenharl ikwer angkew, "Ngan awelhey-angenh INGKARTew. Nthakenh ayeng alpey-angenh ngkweng-itwel. Ngan awelhey-angenh INGKARTew, rap ngkweng awelhey-angenh arrpemarl. Nga atyetyart apmwanem irrew! Ngarl apmwelhelew-wety, INGKARTel ilew, 'Nthakenh nga atyetyart aney-angenh-anem, arrangkw.' ...

## 16

*Samuel-el David-anem arrerneyel arrwekel-antey atyetyart Israel-wenh-rnemew*

<sup>1</sup> Ingwer-ingweran INGKART angkew Samuel-ew, “Samuel-ay! Saul ra atyetyart apmwanem. Athan renh alpemeley-angenh-anem. Ilekew nga amperngerreyel ikwer? Pweter anter alip-akert ina. Alhanem, artwamp Jesse areyew apmer Bethlehem-itwew. Alerikw anyent ikwerenath tha rlwanew, atyetyart areyew, menty-anemaral Saul-an.”

<sup>2</sup> Samuel-an angkew, “Nthakenh atha alakenh arnwarney-angenh! Ingwerentyel Saul ilewerr, ra ayenh ipmew atwewerr!”

INGKARTan angkew, “Kapey-kapey akngeyna. Alakenh angkey-alha Bethlehem-arenyrnemew, ‘Atha arrtyemel antheyew kapey-kapey nhenh INGKART-warl.’ <sup>3</sup> Artwamp Jesse ila, ra alerikw ikwerenhr-nem-akert apetyeyew, aker arlkweyew. Athap ngkweng ilém, artwa nthek-apeny atha rlwanewan, ntaww theleyew anter alip ikwer-warl akapwert-warl. Alakenh-anyem atha renh rlwaneyew atyetyart arrwekel-antey.”

<sup>4</sup> Samuel awelhew, INGKARTarl angkew-angkwarr, rap anperl-alhew-anem Bethlehem-warl. Ra aremerrey-alhew apmer ikwer-itwew, artwamp-rnem arnekerrey-ayntew ikwer, arrewemel atererremel. Rernemap ayerney-ayntew, “Nga apetyew, angka mwerr-angker ileyew? Arrangkw apek?”

<sup>5</sup> Samuel-el tyernew, “Ya, ayeng inkwerelhemel apetyew, kapey-kapey nhenh arrtyemel antheyew INGKARTew arrewantherren-itwel. Arrewantherren-rnem ilenh-arey arnwarnelheyew, anantherraw kapey-kapey ingkerrenhel arrtyeyew INGKARTew.” Artwamp renh Jesse ra ilew arrpemarl alerikw ikwerenhr-nem-then. Rap renh-rnem alpemelew arnwarnelheyew.

<sup>6</sup> Ingkerral akarreww, Samuel-el arew alerikw alkenh Jesse-wenh, itnan Eliab. Rap iterrew, “Nhaym apekarl ran, INGKARTelarl rlwanewan.”

<sup>7</sup> INGKARTan angkew Samuel-ew, “Nhenh-weny. Atha yanh rlwaney-angenh. Ya, atha iterl-areyel, ran arpentyrl rterrkarl. Kel artwernem arrantherren alakenh iterrem. Atyenh-angkwarran alakenharl; atha renh kanper iterl-areyel.”

<sup>8</sup> Samuel-el Jesse ayernew, alerikw ingwer-anem ikweren thweneyew Abinadab. Rap apetyew. Samuel-an angkew, “INGKARTel nhenh rlwaney-angenh.” <sup>9</sup> Jesse-el thwenew Shammah-anem. Samuel angkew, “Arrangkw. INGKARTel yanhan rlwaney-angenh arrpemarl.” <sup>10</sup> Jesse-el 7 ingkerrenh anyentarl-anyentarl rnkerneynew Samuel-angkwarr. Rap angkew, “INGKARTel rlwaney-angenhrl nhenh-rneman.” <sup>11</sup> Samuel-elap ayernew, “Alerengkw ingwer apek ngkwenn aneyel?”

Rap tyernew, “Ya. Alerey akely David-anem, ranap peleyn-itwew yep-yep-rnem arntarnt-areyel.”

Samuel angkew, “Ingwerenty thwena, renh ingwerleweyew. Anantherrap ikwertangkwal mpwelhem. Nthakenh arlkwey-angenh amentel.”

<sup>12</sup> Jesse-el thwenew ingwerenty, David ingweyew. Renhap ingwerl-alpew, ranap artwa mwerr-angker akely. INGKART angkew Samuel-warl, “Nhanyemart ran! Rtnrl-alhanem! Anter alip thelanem akapwert-warl!”

<sup>13</sup> Rap inew anter alip pweterl-akert, thelemel David-warl akapwert-warl. Awayikw ikwerenhr-nemelan arenh. Arltai ikwer-penhan David rterrkarl-anem anew Inweng INGKART-wenh-akert. Samuel ra alpew-anem apmer ikwerenhr-warl Ramah-warl.

*David-an Saul-ew warrkerreyel*

<sup>14</sup> Inweng INGKART-wenh alpew-anem atyetyart Saul-they. INGKARTelan inweng apmwanem thwenew, Saul renh alhengkerr-antheyeew.

<sup>15</sup> Warrkenh ikwerenhr-nem angkew ikwer, “Atyetyartay! Anantherr areyel, INGKARTelarl inweng apmwa ngkweng-warl thwenew, ngenh alhengkerr-antheyeew.

<sup>16</sup> Anantherr alhem, artwa ingwerenty ingweyew, ampwal weth-lkwer ketay-apeny pelayerreyew ngkweng. Inweng apmwel ngenh alhengkerr-anthem, ra ampwal ngkweng pelayerrem, ngap mwerr-anemaral awelhem.”

<sup>17</sup> Saul angkew ikwer-rnem, “Ya, artwa mwerrew nthweyew alhenh-arey, ampwal mwerr pelayerrey-angkerew, akngetyem atyeng-warl.”

<sup>18</sup> Warrkenh anyent angkew, “Atha iterl-areyel artwamp anyent Bethlehem-areny itnan Jesse-arl. Alerikw anyentan ikwerenhl akalyarl, ranap artwa mwerr-angker akelyarl. Ra anaynt angkem, ranap ater-weny arnkattyarl. INGKART arrer innga anem ikwer-itwel.”

<sup>19</sup> Saul-el angkakert thwenew Jesse-warl, alakenh angkeyew, “Atyetyart Saul ra ilkelheyl, ntwa alerengkw David yep-yepew-arteyp thweneyew ikwer-warl.”

<sup>20</sup> Jesse-elan tangkey inew, rap amern akngerr tywenew ngkwarl-then, arranty nanikwet yenp-penh-akert. Rap alerikw ikwerenlh ilew, alheyew apmer Saul-wenh-warl, tangkey-then nanikwet akely-then akngemel.

<sup>21</sup> David rap warrkerrenh Saul-ew-anem. Saul-an ikwer ilkelhew artewenty. Rap renh ilanthew, irryart-then alkwert-then ikwer katy akngayteyew, Israel-wenh-rnemarl werrenh ingwer-rnem-then. <sup>22</sup> Saul-el thwenew angkakert Jesse-warl arrpemarl, alakenh angkeyew, "Saul David-ew ilkelheyl artewenty. Menty anaynteyew, ikwer warrkerr-aynteyew."

<sup>23</sup> Akngerr-inger INGKARTel thwenew inweng apmwa, Saul alhengkerr-anthaynteyew. David pelayerrrl-aynenh ampwal ikwerenlh, inweng apmwa irrentenlh. Saul ra mwerr-anem awelhenh.

## 17

*David-el artwa arlpenty Goliath atweyel ipmew amentel-antey*

<sup>1</sup> Ingwer-ingweran Philistia-areny-rnem akararerrew apmer Socoh-itwew Judah-ampeny-itwew, werreyew Israel-wenh-rnem-then. Rernem ayntey-alhew apmer ingwer-itwew, Socoh arrerenty. <sup>2</sup> Saul-el Israel-wenh-rnem akarrelew, rernemap ayntew peleyn-itwew apmer Ila-itwew. Ikwer-itwew rernem arnwarnelherrew, atwerreyew Philistia-areny-rnem-then. <sup>3</sup> Apwert anyent arrer-antey arrpemarl ayntenlh. Rernemap peleyn-they alpew apwert ikwer-warl. Ikwer-they rernem arew, ingwer-rnemelan renh-rnem arntartn-arenh apwert ingwer-ampeny-theyarl.

<sup>4</sup> Artwa ahawarr anyent Philistia-areny itna Goliath anenh, ranap apmer Gath-areny. Artwa arlpenty ilkwa inngarlap ran. <sup>5-6</sup> Aheng-areyan ra aylpenh ampwalel ilek-ilek-warl, arlka ilpelheyew-arelh. Ampwal-rneman awerr innga, ayen-penh arnwarnew. Ingwerelan akpwertarl ilpelhenh, ingwer-atherran arlaw aylpeyew-arelharl. Arneltyarl ingwerelan ilpelhenh, ranap awerr inngarl. Ra irryart atherr akngenh, akarteng-then arlpenty-then. Irryart akartengan ayen-penh arrpemarl, rap piltel antwerrkerl-apenh arety-angkwarr. <sup>7</sup> Irryart arlpentyan arrwekel-ampeny arrelyparl ayen-penharl. Ranap awerr innga arrpemarl. Artwa ahawarr ingweran alhenh arrwekel, alkwertarl ikwer katy akngenh.

<sup>8</sup> Arlta arpananhel ra alhenh ampep-warl, arlkey-alhenh atayel Israel-wenh-rnemew alakenh, "Israel-wenh-rnemay! Ilekew arranther mpwelheyel? Arranther ahawarr-arrpantey! Ayenh arenh-arey! Ayengan ahawarr inngarl Philistia-areny! Arrantheran arwa Saul-wenh warrkenh-rnem! Artwa anyent-anem rlwanenh-arey thwenemel, aylanthaw atwerreyew! <sup>9</sup> Ra ayenh ipmew attwenty, anantherr ingkerrenh alpem Israel-warl, arewantherr warrkerrey-alpeyew. Atha renh ipmew attwenty, arrantherr Philistia-warl alpem, anewantherrarl warrkerrey-alpem. <sup>10</sup> Arrwekel-antey arlka alpwelyerrey-angenh! Thwenenh-arey artwa anyent atyeng-warl, aylanthaw atwerreyew!" <sup>11</sup> Saul-el Israel-wenh-rnemel-then awew, rernemap atererremel apateyelpew.

...

<sup>15-16</sup> Arlta arpananhel ingwepenh atwerrp artwa arlpenty ra angkey-ayntenlh alakenh arlta 40-ew-atety.

David-an alperl-arrernenlh Saul-wenh apmer-they aynikw-wenh apmer-warl, yep-ypep-rnem arntartn-aynteyew aynewikw-wenh-then.

<sup>17</sup> Ingwer-ingweran aynikw ikwerenlh angkew, "Yakweth nhenh ina ntang ampeng-akert, rtamp-rnem 10-anem. Aknga awayewengkw-rnem. <sup>18</sup> Aker cheese-rnem 10 aknga, anhemel atyetyart ahawarr-rnemew. Anamerl! Ayeng artewenty iterremel ampperrngerreyel awayewengkw-rnemew. Angka akngey-alpa ikwer-rnem-wenh. Atha iterl-areyew, rernem mwerr-antey aneyel. <sup>19</sup> Alha apmer peleyn-warl Elah-warl. Anewantherrenh-rnem-then Saul-akerr werreyel Philistia-areny-rnem-then peleyn ikwer-itwew."

<sup>20</sup> David awelhew aynewikw. Rap artwa ingwer-tangkwel arrernerl-alhew, yep-ypep-rnem arntartn-aynteyew. Ingwepenh ingwerelan ra ampwal-rnem tywenerl-alhew tangkey-warl, rap anpenh-anem. Rarl aremerrey-alhew peleyn ikwer-itwew, rap arey-alhew, artwa ahawarr-rnem mpwelhenh, werreyew-anem. Rernem arlkalhelerrenh arnkatalhelemel. <sup>21</sup> Israel-wenh-rnem-then Philistia-areny-rnem-then rernem rtenmel arerrenh. <sup>22</sup> David-el anthenhew ampwal-rnem artwa amernarl arntartn-arenhew. Rap anterrew, ahawarr-rnemarl rtenh-warl, awayikw ikwerenhrnem areyew. <sup>23</sup> Rap angkey-alhew ikwer-rnemel-arleng. Artwa arlpenty Goliath ra alhew ampep-warl apmelerr-angkwarr, atayel angkerl-apenh. David-el renh awew,

alakenharl angkenh. <sup>24</sup> Israel-wenh-rnemelan renh arew, rernemap anterrew aterel ikwer-wety.

<sup>25</sup> Rernem arrwekel-antey alakenh angkerrenh, "Arlta arrpanenr ra apetyeyel, kwanth-aynteyew arrkentelhelemel anenhantherrenh. Artwa anyentel anewanther-renhel renh ipmew attwenty, Saul-el renh apwert akngerr anthem, kwey alerikw-then ikwerenr anthem. Artwa apwert akarreley-angker-rnemel nthakenh ikwerenr-rnem iley-angkenh-anem, Atyetyart Saul-ew apwert attheyew."

<sup>26</sup> David angkew artwerinemew, arrerarl ikwer-angkwarr rtnehr-rnemew, "Artwa yanhel anenhantherrenh nyerrel-antheyel. Ingwerentyel renh akeleytelemer. Ilekarl Saul-el anthem, ra artwa renh ipmew attwentyewan? Nthakenh ra arrkentelheley-angenh artwa ahawarr INGKART-wenh-rnem, Akngey inngewenh-rnem, arrangkw!"

<sup>27</sup> Rernem renh ilew, rernemarl angkerrew-angkwarr arrwekel-antey.

<sup>28</sup> David-wenh awayikw alkenh Eliab ra awew, rap ahelerrew ikwer. "Ilekewarl ngaw apetyew? Yep-yep irrpetyap akely weth-rnem-alew? Angwenhel renh-rnem arntarnt-areyel aleyan? Ngan apmwelheleyel! Ilekew nga arrkernalheyel ilkwarppantey? Nga arrkent apetyew arwa, araynteyew werreyelar!"

<sup>29</sup> David-el ayernew, "Ilekew ntwa ayenhan ilteyel? Ilekel ayengan apmwelhelew? Arwarl athan ayerneyell!" <sup>30</sup> Rap artwa ingwer-anem ayernew, "Ilekarl Saul-el anthem, ra Goliath renh ipmew attwenty?" Artwa ra ilew, rernemarl arrwekel-antey angkerrenh-angkwarr. <sup>31</sup> Ingwerenty alhew-anem, Saul renh ileyew, David-arl angkew-angkwarr. Saul-el artwa anyent-anem thwenew, David ingweyew.

<sup>32</sup> David angkew ikwer, "Atyetyartay! Nthakenh anantherr atererremel aney-angenh artwa yanh-wety! Ayeng alhem. Atha renh amentel-antey atweyew."

<sup>33</sup> Saul-elan tyernew, "Arrangkwarl! Nthakenh ntwa renh atwey-angenh! Ngan artwa akelyarl, ran ahawarr arnkattyarl, akelyank anew ahawarr."

<sup>34</sup> David-an angkew, "Yep-yep synaty-wenh-rnem atha arntarnt-arem. Layenel yep-yep anyent apek antwerrkem, iytar-akngemel arlkweyew, payel apek. <sup>35</sup> Atnwenth ahelengkw atha alwernem atwemel, yep-yep tyarleweweyew-atety. Ra atyeng arrker-nelhem thnweweyew, alherremel. Atha renh antwerrkem altethey, atwemel ipmew. <sup>36</sup> Akngerr-inger atha atwew layen-then pay-then. Athap ahelengkw yanh Philistia-areny atwem irrkaty-angkwarr, rarl nyerrel-antheyel ahawarr Akngey-wenh-rnem. Akngey rant anyent alkenh aneyel. <sup>37</sup> INGKARTel ayenh arntarnt-arew atnwenth ahelengkw-rnem-wety, rap ayenh arntarnt-arem arrpemarl artwa ahelengkw yanh-wety."

Saul-an angkew ikwer, "Kel. Alha, atwerreyew mpwelanth, INGKARTel ngenh arntarnt-aremarl."

<sup>38</sup> Aheng-areyan Saul aylpenh ampwalel ilek-ilek-warl, arlka ilpelheyew-arelh. Ampwal-rneman awerr innga, ayen-penh arnwarnew, rap anthew David-ew, raw aylpeyew. Rap ampwal ikwer anthew, ayen-penh arrpemarl, akapwert ilpelheyew-arelh-then. <sup>39</sup> David aylpew-anem, rap piltel arnerelhew, nayp arlpenty Saul-wenh arrerremel. Ngwampant ra ampwal awerr yanh-lkwerelan aylpew, renhap alhey-angenehew.

Rap angkew Saul-ew, "Nthakenh ayeng alhey-angenh alakenh. Ayengan nhelkwer-warl aylpey-angenh." Rap lhelew, <sup>40</sup> irrrerty ikwerenr inew ampwal tyangay-apeny yepn-penh-then, anpenhew-anem. Ilpay-itwew ra akwetyew apwert alyek-rnem 5, yakweth-warl akwernemel. Rap alhew artwa Philistia-areny ikwer-warl-anem.

<sup>41</sup> Goliath alhew arrpemarl ikwer-warl. Ahawarr ingwerelan alkwertarl katy akngeynenh arrwekel. Ratherrap David-an arrerelhew. <sup>42</sup> Artwa arlpenty ilkwell atherremel David arrkentelhelew, "Ngan artwa aleyarl! <sup>43-44</sup> Ilekew nga arwerl-akertan apetyel? Arengkang ayengan ngkweng? Kel apetya! Atha ngenh ipmew atweyew, thiipel-then atnwenth ahelengkw-rnemel-then ngenh arlkweyew! Atha ngenh ilwerl-athenem!" Rap altyerr ikwerenr-rnem ayernenh, David atweyew.

<sup>45</sup> David-el tyernew, "Nga apetyeyel, ayenh atweyew nayp arlpenty-akert, irryart atherr-anem. Ayenganap alhem ngkweng-warl, ngenh atweyew, INGKART Atyetyart Ilkwa Ingkerrenh rarl ayenh thwenew. Rant riterrk anyent aneyel. Renhant ahawarr Israel-wenh-rnemel apentemarl. Ntwanap renh arrkentelhelewarl. <sup>46</sup> Rlengkanap ayenh alpemelem INGKARTel, ngenh atweyew. Athap ngenh athenemel atweyehn, ahenty-then akerrh-arternemel. Rlengkan arranther Philistia-areny-rnem ipma aytteyehn, thiipel-then atnwenth ahelengkw-rnemel-then arrenhantherrenh arlkweyeh! Alakenh ingkerrel iterl-areyew, Akngey Israel-areny rant anyent inngan. <sup>47</sup> Anantherr akngerr akar-rerrewel iterl-areyew, INGKARTel ikwerenr-rnem arntarnt-arem ikwerenr-angkwarr. Nayp arlpenty-akert irryart-then-akert nthakenh renh alpemeley-angenh, arrangkw.

Anantherran ikwerenrh-rnem, ament-wenyarl, anantherrap arrenhantherrenh ywerrel-heleyenh ingkerrenh!"

<sup>48</sup> Goliath retangkwel alhew, David atweyew. David-an anamerl-antey anterrew ikwer-warl, <sup>49</sup> apwert-anem tyerenhew yakweth ikwerenrh-they. Tyangayel ra wew renh rlwantey, ngkwernan iltewew akapwert-itwew. Goliath-an atmertel-ayeth aytnew ahern-warl, ayntey-alpew-anem.

<sup>50</sup> Alakenh David-el artwa Goliath renh ipmew atwew. Nayp arlpentyel ra atwey-anghen, arrangkw. Ra apwert tyangay-akertel renh wew. <sup>51</sup> Rap anterrew ikwer-warl, rtney-alhew ikwer-itwew irrwerleng. Goliath-wenh pilt-they ra tyerreylelpew nayp arlpenty, ahenty-anem akerrh-atwew renh, arlkethen akapwert-then ather-releyelpew. Philistia-areny-rnemel arew, ahawarr ilkwa ikwer-rnem-wenh aynter-anenty, rernemap anterrerrew. <sup>52</sup> Israel-wenh-rnemel renh-rnem ingkern-they alwernew, arlkemel atayel. Iwerr Shaaraim-angkwarr alwernew apmer Gath Ekron-then ikwer-atherrew-atety. Ipma akngerr aynteynenh iwerr ikwerel. ...

## 18

### *Saul-el David alharlkweyel*

... <sup>6</sup> David-el artwa arlpenty Goliath ipmew atwew-penh, Israel-wenh-rnem ingkerr alperlewenh apmer-warl. Apmer arrpanenh-they arelh-rnem apetyew, renh-rnem rlwateyew, rntweynenh aylelheynenh inkwerelhemel. Ingwer-rnem teram akely pelayerrenh, ingwer-rneman ampwal ketay-apenyarl pelayerrenh. <sup>7</sup> Rernem alakenh aylelherl-apen:

"Saul-el ahelengkw akngerr atwew,  
David-elan ahelengkw akngerr innagarl atwew!"

<sup>8</sup> Saul-el awew, rap ahelerrew artewenty innga. Ra iterrew alakenh, "Rernem angkeyel, David-elan ahelengkw akngerr innagarl atwew atyeng-angkwarr. Atyetyart apek renh arrerneyew arrkernelheyel."

<sup>9</sup> Ikwer-theyan rap alharlkwemel renh arntarnt-arenh intem-antey.

<sup>10</sup> Arlta ingwerelan INGKARTel inweng apmwa arrpemarl thwenew Saul-warl. Ra artewentyel arwengkerrenh, warl kwenel anenh, arlkenty iwenh. David-an ampwal ketay-apenyarl ikwer pelayerrenh apmelerr-angkwarr. Saul-el ran irryart atyenenh itepel, <sup>11</sup> rap iwew, alakenh iterremel, "Arnelty-angkwarr atha renh akwerterrp atantheyew!" David-an arnangerrew anamerl-antey irryart-wety. Atherr-inger ra renh atantheyew-anew. Atherr-inger David anamerl-antey ikwer-wety arnangerrew. ...

## 19

### *Saul arrkernelheyel, David atweyew ipmew*

<sup>1</sup> Ingwer-ingweran Saul-el alerikw ikwerenrh Jonathan ilanthew warrkenh ikwerenrh-nem-then, "David ipmew atweyew!" Alerikwanap David-ew artewentyelarl ilkelhenh, <sup>2</sup> rap David ilew, "Aynatyan arrkernelheyel, ngenh ipmew atweyew! Anterra, irryert-aylpeyew katen-itwew! Arntarnt-arelha ingwelarreng ingwepenh. <sup>3</sup> Atha aynaty atnwenhey-alhem katen ikwer-warl, ngarl irryert-aylpem-itwew. Ayengap angkemarl ikwer-warl ngkweng-they. Rarl alpem-penh, athap ngenh ilem, rarl angkew-angkwarr."

<sup>4</sup> Ingwepenh Jonathan aynikw ikwerenrh-then rtnenrh katen ikwer-itwew, David-ew angkerrenh. Jonathan-el ra David-akert mwerrarl ilhenh alakenh, "Nthakenh ntwa apmwa mpwarey-angenh ikwer. Ra apmwelheyy-angenharl ngkweng. Ilek-ilek mwerr-angker mpwarew ngkweng, ngenh alpemelemel. <sup>5</sup> Ra artewenty iterrey-angenh, ipmew atwewerran, arrangkw. Rap arnkaytel artwa ilkwa Philistia-areny ipmew atwew. INGKARTel innagarl Israel-wenh-rnem alpemelew ikwereng-arey. Ntwan arew arrpemarl, ngap inkwerelhew. Ilekewarl nga iterrew, renh ipmew atweyewan?"

<sup>6</sup> Saul awelhew alerikw ikwerenrh Jonathan-ew. "INGKART aweyel-wety, ayeng ngkweng arraty angkew. Ayeng arrkernelhey-angenh, David ipmew atweyew!"

<sup>7</sup> Saul rarl alpew-wety, antengan Jonathan arlkew David-ew, tyerrelheyew. Rap renh ilew, aynikw ikwerenharl angkew-angkwarr. Ratherrap Saul ikwer-warl-anem alhew. David ikwer warrkerrenh arrpemarl angkep.

<sup>8</sup> Ingwer-ingweran Philistia-areny-rnem apetyew arrpemarl, atwerreyew Israel-wenh-rnem-then. David ran atyetyart ahawarr-anem anew, rap Philistia-areny akngerr atwew. Ingwer-rneman aterel anterrerrew arleng.

9-10 David alpew apmer Saul-wenh warl-anem, ikwer warrkerreyew. Ingwer-ingweran Saul-warl INGKARTel inweng apmwa thwenew arrpemarl. David-an apmwal ketay-apeny pelayerrenh apmelerr-angkwarr. Saul-elan irryart arrpemarl atnyeneneh itepel, rap iterrew, renh atantheyew arnelty-angkwarr akwerterrp-antey. Irryartel warlant awew. David-an anterrew mwerr-antey ikwer-wety.

<sup>11</sup> Saul-el artwernem thwenew, warl David-wenh arntarnt-areyew ingwel, ingwepenh renh ipmew-anem atweyew. Akeley ikwerenhel Michal-el renh ilanthew, "Anamerl anterra ingwel-antey! Mpwelhey-angen! Ingwepenh rerneh ngenh ipmew atweyayntewerr!" <sup>12</sup> Rap renh rwepel atwarrelhelew wintew-angkwarr, rap mwerr-antey irryert-anterrew. ... [David-an anterrew artwamp Samuel-wenh apmer-warl Ramah-warl. Saul-el awew, rap alhew, nthweyew ikwer apmer ikwer-itwew.] ...

## 20

### *Jonathan-el mpwernikw ikwerenhl David alpemeleyel*

<sup>1</sup> Ikwer-they David irryert-anterrew apmer Naioth-they Ramah-ampeny-itwew. Ra alhew Jonathan-wenh apmer-warl, renh ayerneyew, "Nthakenh irrew ayeng? Ilekel ayeng apmwelhelew? Ilek-wety aynelengkw ayenhp ipmew atweyew nthweyel?"

<sup>2</sup> Jonathan-el tyernew, "Arrangkwarl! Nthakenh ngenh ipmew atwey-angen! Aynelatay ayenhp iley-angen, ra ilkelhem, ngenh atweyew. Ra ayenhp ilem-tangkwell, rarl ilkelhem-angkwarran. Ikwerenhl-angkwarran. Nthakenh ayenhp irrywerremel iley-angen. Apalarl nga angkeyel, innengeweny!"

<sup>3</sup> David-el renh akeleytelew-anem. "Aynelengkw iterl-areyel, aylanthan arrerant-atherr mpwernenhenheng-atherr-anemarl. Ra alakenh iterrewerr, 'Nthakenh alerey iley-angen. Arlka ra apmwerrewerr!' Awelha atyeng! Innga wenh! R lengk-antey ayeng ilwem apek!"

<sup>4</sup> Jonathan angkew, "Kel, ngarl iterreyel. Nthakenh irrem ayeng ngkweng aleyan?"

<sup>5</sup> David angkew, "Ingwellarreng akngerran akarrerreyen, INGKARTew angkaynteyew inkwerlhemel alkent ingkaytel apmelerrel-ayeth. Akngerr akarrerreyen, apmer aynewengkw-wenh-itwew, kwenty arlkwerreyew. Ayenhp-then ra ilew, ikwer-itwew arlkweyew. Ayeng ingwa atherrel irryert-aneyew-tangkwell katen-itwew. Mwerrang alakenhan?" <sup>6</sup> Aynelengkw atyeng ayernenty, ila renh alakenh: 'David-el ayenhp ayernew, "Mwerrang ayeng alheman apmer Bethlehem-warl? Aherretty arrpanenh atyenh-nem akarrerrem arrpemarl apmelerr-angkwarr apmer ikwer-itwew, aker arrtyeyew INGKARTew." <sup>7</sup> Aynengkw angkentay, 'Mwerl,' kel mwerrarl. Ra ahelerrenty, ntwa iterl-ararl, ra iterreyel, ayenhp ipmew atweyewarl.' ...

<sup>24</sup> David alhew-anem, irryert-aylpewey katen-itwew.

Arlta ingwerelan akngerr akarrerrew apmer Saul-wenh-itwew. Saul-an aneh, amern arlkwemel <sup>25</sup> chair ikwerenhel irrkaty-angkwarr, alerikw-warl-athek. Atyetyart ahawarr itna Abner anehn arrpemarl Saul-awa. David-ant ywerrew. <sup>26</sup> Saul-el arenh akeleytel, ingwerty ayerney-angen-antey. Rap iterrehn ament-antey, "David apekan arnwanelhey-angen-anteyarl, apetyeyew nhewarl. Ra apek ilek-ilek mpwarenh, nthakenh alhewer apetyey-angen-antey."

<sup>27</sup> Arlta ingwerelan Saul-el ikwer arew arrangkw-antey arrpemarl. Rap alerikw ikwerenhl-anem ayernew, "Ilek-wety David-an aneyel, apetyey-angen? Apmwerrkelan ra apetyey-angen arrpemarl."

<sup>28</sup> Alerelikw tyernew, irrywerremel alakenh ilemel, "David-el ayenhp intem-antey ayernew, renh tyarlewew, Bethlehem-warl alhewey. <sup>29</sup> Ra angkew, 'Aherretty arrpanenh atyenh-rnem akarrerrem apmer ikwer-itwew, aker arrtyeyew INGKARTew. Awayatay atyehn yangkelhew, ayeng alhewey ikwer-rnem-warl. Ngan mpwernaty atyenharl, ntwap ayenhp tyarlewemer, alhewey awayatay atyenh-rnem areyew.' Alakenh ra angkew, nthekwern apetyey-angen, amern arlkweyew ngkweng-itwel."

<sup>30</sup> Saul ra artewenty innga ahelerrew alerikw ikwerenhw, rap renh alakenh iltew, "Amengkw ngkwenh apmwa aneh, ngan rapeny arrpemarl! Atha iterl-areyel, ngarl awelheyel Jesse-wenh alerikwew, atyeng awelhey-angen! Nyerrelarl alakenhan, amengkw-then nyerrel-anthem ntwa!" <sup>31</sup> David iteth-antey anenty, nthakenh nga atyetyart Israel-itwew aney-angen. R lengk-antey artwa thwena, renh ingwerl-alpewey atyeng. Nthakenh ra iteth aney-angen!"

<sup>32</sup> Jonathan-el aynikw ikwerenhl ayernew, "Ilek-penh ra ilwem? Ilekel ra apmwelhelew?" <sup>33</sup> Aynelikw awew, rap irryart ikwer-warl iwew, ipmew renh-anem atantheyew. Alerikw ra anamerl-antey arnangerrew irryart-wety. Rap iterl-arew-anem, aynikw ikwerenharl ilkelhew, David ipmew atweyew.

<sup>34</sup> Rap ahelerremel rtnerl-alhew, aketh-warl-anem tyerrelhenhew. Arlta ikwerelan ra amern arlkwey-angenh irrew, arlkarl apmwerrew. Arlka alpwelyerrew, aynikwarl ahelerrew David-ew artewenty.

<sup>35</sup> Ingwepenh ra alhew katen-warl, David-ew angkeyew. ...

<sup>41</sup> ... David tyerrelhey-ayntew-anem apwert-rnem-they. Irrpty-inger kwenerrew ra Jonathan-warl-athek. Ratherr arrwantyerrew arreyl atherr-angkwarr Jew-rnem-wenh-angkwarr. Jonathan artnew ikwer, David ran artnew arrpemarl artewentyel. <sup>42</sup> Jonathan angkew, "Alpanem mwanty-antey. INGKARTel ngenh arntarnarem. Aylanthan mwarrant-atherr anem intem-antey. INGKARTel aweyel, aylanthalr alakenh angkeyel. Rap alpemelem ngkwenh-rnem atyeh-rnem-then mwarrant-arey anaynteyew intem." David anperl-alhew-anem, Jonathan alpew arrpemarl apmer-warl.

## 21

### *Artwamp ingkart Ahimelech-el David alpemeleyel*

<sup>1</sup> Ikwer-penh David alhew apmer Nob-warl, areyew artwamp ingkart itnan Ahimelech. Artwamp rarl renh arey-alhew, rap atererremel arrenew ikwer-wety. Rap renh ayernew, "Ilekew ngan apetyew amentan? Nthekarl artwa ahawarr ngkwenh-rneman? Ilek-penh ngan?"

<sup>2</sup> David-el tyernew irrrtywerremel, "Atyetyart Saul-el ayeh thwenew, irrrtyertel-antey warrk ikwer mpwareyew. Nthakenh atha iley-angenh, rarl ayeh ilanthew-angkwarr. Artwa ahawarr-rneman atha ilew, arrwekel alheyew, apmer ingwer-itwew ayeh rlwateyew. <sup>3</sup> Amern apek ntwa atnyeneyel? Antha atyeng. Rtamp-rnem irrpyetayap apek? Amern ingwer-rnem apek antha."

<sup>4</sup> "Rtampewan ayeng arrangkwarl. Amern weth-lkwer nhenhant tyenkerrew-arelh. Artwa ingkartelant arlkwey-angker. Nga artwa ngkwenh-rnem-then arelh-rnem-wety amenterrenty, mwerrarl atha anthem."

<sup>5</sup> David angkew, "Ya! Alakenh arrpemarl anantherr irrem, atyetyart ilkwewarl warrkerreyelelan. Anantherr kel-antey arelh-rnem-wety amenterrew." <sup>6</sup> Rap renh amern tyenkerr anthew, rtampew arrangkwel. Amern apmwerkeny ra anthew. Amern rlengkenyan ayntenh-antey tapayel INGKART-wenh-itwew.

<sup>7</sup> (Ikwereng-arey artwa warrkenh anyent Saul-wenh anenh arrpemarl itnan Doeg, apmer Edom-areny. Ra INGKARTew kwenerremel angkenh. Ranap yep-yepew-arteyp rltwarl, rap awenh, David-arl angkenh artwamp ingkartew.)

<sup>8</sup> David angkew artwampew, "Arrangkw-anteyarl ayeng apetyew, ampwal-rnem iney-angenh-antey. Atyetyartel ayeh ilew, anamerl-antey alheyew. Irrtyart apek ntwa atnyeneyel? Nayp arlpenty apek?"

<sup>9</sup> Ra tyernew, "Ya, nayp arlpenty yanhan artwa Philistia-areny-wenh Goliath-wenh. Ntwa renh ipmew atbew apmer peleyn Ila-itwew. Arrangkw-anem ingwer atnyeney-angenh. Nga ilkelhentyelan aknga. Pantyelarl artelheyel aynteyel, arnkwa artwa ingkart-wenh arrerenty."

David-an angkew, "Mwerr-angkerarl yanhan ingwer-rnem-wenh-angkwarran! Antha atyeng." ...

## 22

### *Saul-el ilantheyel, artwa ingkart-rnem atweyew ipmew*

... <sup>9</sup> Artwa weth Edom-areny Doeg ra angkep alpew, Saul iley-alpew, "Atha David arew apmer Nob-itwew. Ran alhew artwa ingkart Ahimelech-warl Ahitub-wenh alerikw-warl. <sup>10</sup> Ahimelech ra ikwer INGKART ayernew, amern anthemel nayp arlpenty-then Goliath-wenh Philistia-areny."

<sup>11</sup> Saul-el awew, rap yangkelhew, Ahimelech ra apetyeyew ikwer-warl ikwerenh-rnem-akert. Rerneman artwa ingkart-rnem, apmer ikwer-itwew anenh. Rernem alhew ingkerr Saul-wenh apmer-warl, rarl angkew-angkwarr. <sup>12</sup> Rerneman aremerrey-alhew, ra angkey-ayntew Ahimelech-ew, "Alerikw Ahitub-wenhay! Awelha atyeng!"

Ra tyernew, "Ilek?"

<sup>13</sup> Saul-el ayernew, "Ilekew ngan iterrew, ayeh alakenh irrrtywerl-amperneyew? Atyeng-wety rlengkan arlkarerreyel nga. Nga apek iterreyel, Jesse-wenh alerikw atyetyart ilkwa arrerneyew? Ntwa renh alpemelew amernel, nayp arlpenty-then ntwa anthew renh. INGKART-then ntwa ayernew ikwer! Yanhan atyeng-wetyarl arlkarerrewarl. Rap ingwer-ingwer mpwelhem, ayeh ipmew atweyew!"

<sup>14</sup> Artwamp ingkart angkew, "Arrangkw atyetyartay! David inngarl ngkweng warrkerreyel! Artewenty warrkerreyel ingwer-rnem-apeny-weny! Ra malyengkw

ngkwenharl, atyetyart ahawarr. Ingkerr apmer ngkwenh-itwew renh ilkelheyel artewenty. <sup>15</sup> Akngerr-inger atha INGKART ikwer ayernew apmelerr-angkwarz, ngap atyeng ahelerrey-angenharl! Nthakenh ntwa ayenh aytarrp-iley-angenh atyenh-rnemthen, arrangkw! Anantherr iterl-arey-angenharl, apalarl anenh!"

<sup>16</sup> Saul-an angkew, "Nga ngkwenh-rnem-then ilwem rlengk-antey!" <sup>17</sup> Rap warrkenh ikweren-hrnem ilanthew, "Artwa ingkart-rnem ingkerr atwennh-arey ipmew! Rernem awelheyel David-ew, atyeng awelhey-angenharl. Rernem iterl-arew, rarl atyeng-wety anterrenh, atyeng iley-angenh, arrangkw!" Warrkenh-rnemelanap nthakenh INGKART-rnem atwey-angenh.

<sup>18</sup> Saul angkew Doeg-ew, "Kelaw! Ntweteyaym artwa ingkart yanh-rnem ipmew atwali!" Doeg ra apmer ingwer-arenyarl, rap awelhew, Saul-elarl renh ilanthew-angkwarz. Artwa ingkart-rnem 85 ra ipmew atwew. <sup>19</sup> Ikwer-they ra alhew apmer artwa ingkart-rnem-wnh-warl Nob-warl, rap ipmew arrpemarl ingkerrenh atwew; ampa, arelh, pwelek, tankkey, yep-yep-rnem-then.

<sup>20</sup> Artwa anyentant mwerr-antey anterrew apmer ikwer-they itnan Abiathar. Aynikwan ikweren Ahimelech, arrengikwan ikweren Ahitub-arl. Ra alpew David-rnem-angkwarz. ...

## 24

### *David-el Saul nyerrel-antheyel*

<sup>1</sup> Ingwer-ingweran Saul artwa ahawarr ikweren-hrnem-akert alhew, rlwaterremel werreyew Philistia-areny-rnem-then. Rernemarl angkep alpewel, ingwerentyel renh alakenh ilew, "David-rneman apmer aterterr-ampeny-itwew aneyel En Gedi-itwew."

<sup>2</sup> Rap akarreleynew artwa ahawarr akngerr apmer arrpanenh-they Israel-ampeny-itwew, 3,000. Rap anpenhew, nthweyew David-rnemew. Nthweyenh apwert-rnem-angkwarz, apmer itnan Nanikwet Akngerr.

<sup>3</sup> Ikwer-itwew ra yard yep-yepew-arelh arey-alhew intey-ampenyew. Rap aylpenhew intey-warl-tangkwell iylweylperreyew. David-an artwa ikweren-hrnem-akertarl arrwekel-antey irrtiyert-aylpew intey ikwer-warl akert inngewarl. Intey ran ilkwa innga. Saul apalarl aylpenhew, renh-rnem arey-angenh. <sup>4</sup> Artwerneman arreytenh David-warl, "Ntwa iterl-areyel, INGKART alakenh angkew, 'Atha ngenh alpemelemarl, ngkweng-warl apmwa mpwarem-rnem atwewaywarl. Ntwap mpwarem alhewer ikwer-nem, nga ilkelhentyelan." Ya, ntwap renh ipmew atwemer!" Rap aperteynenh Saul-warl, arnkwanem akert akely ilterrenhew nap ykwerenhel. Saul-an anenh-antey, avey-angenh-antey.

<sup>5</sup> Ikwer-penhan David artewenty-anem iterrew, rarl Saul-ew apmwelhelew-pen.

<sup>6</sup> Ra arreytemel angkew, "Nthakenh atha apmwa mpwarey-angenh atyetyart atyenew, INGKARTelan renharl rlwanewarl, atyetyart ilkwa aneyew Israel-ew. Nthakenh atha renh arnep-arney-angenh, arrangkw." <sup>7</sup> Alakenharl ra angkew, rap renh-rnem iltew, Saul atwewerr. Saul tyerrelhenhew intey-they aketh-warl-anem.

<sup>8</sup> David-el renh alkwernew-tangkwell. Ranemarl tyerrelhenhew aketh-warl intey-they. Rap arlkew ikwer, "Atyetyartay!" Saul-el artepang areyelpew. David-an kwenerremel angkew, <sup>9</sup> "Akngerr ingwer-rnem ngkweng angkeyel, atha akwel apmwa mpwareyew ngkweng. Ilekew nga awelheyel ikwer-rnemewan?" <sup>10</sup> Ngwampan INGKARTel aylenhanh pweytelew intey-itwew. Ingwerentyan angkew atyeng, "Ntwa atwemeri ipmew renh!" Ayenganap amperrngerewarl ngkweng. 'Arrangkw! Nthakenh atha atwey-angenh atyetyart atyen. INGKARTel renh rlwanew, atyetyart aneyew Israel-ew!" <sup>11</sup> Malyeyay, nhenh ara! Arnkwa akert akely atha antwerkkeyel, atharl ngwamp akew! Atha ngenh ipmew atwey-angenh-antey, arrangkw! Ntwa iterl-aremer, ayeng ngkweng apmwelheley-angenh! Nthakenh ayeng atyetyart aneyew arrkernelhey-angenh ngkweng-angkwarz. Nganap ayeng nthweyelarl intem, ayenh ipmew atwewayew.

<sup>12</sup> Ingwer-ingweran INGKARTel court-emeleyenh aylenhanh. Ngkweng awakelheyenh apek ra, ngarl atyeng-warl-athet apmwelhelew. Athanap nthakenh ngenh atwey-angenh, arrangkw. <sup>13</sup> Ntwa angka iterl-areyel, anantherrarl ilerrem. Anantherr alakenh ilem: 'Akngerr el nthakenh apmwa mpwarey-angenh. Apmwelant mpwarem alakenhan.' Nthakenh atha ngenh atwey-angenh..."

<sup>14</sup> David-arl angkew-pen, Saul-el ayernew, "Malyey! Nganang innga angkeyel?" Rap artnew artewentyel. <sup>15</sup> "Arraty nga angkeyel. Ntwan mwerr atyeng mpwarew, ayengan ngkweng apmwelhelewarl. <sup>16</sup> Aleyan nga atyeng amperrngerew. INGKARTel aylenhanh pweytelew intey-itwew, ntwa ayenh ipmew atwey-angenharl. <sup>17</sup> Artwa

ahawarrelarl arey-alhem anyent ingwer, nthakenh ra tyarlewey-angenh renh. Alakenh-anyemarl anewantherrenh-angkwarran. Nganap alakenh-wenyarl. Ntwa mwerr atyeng mpwarew. Alakenhan INGKARTel ngkweng-anem mwerr mpwarem.<sup>20</sup> Atha iterlareyel, ingwer-ingweran nga atyetyart Israel-itwew aneyen. Ikwer-penhan ngkwenh-rnem-anem atyetyart aneyen.<sup>21</sup> INGKARTelarl aweyel-wety, ilelha-tangkwel atyeng, ntwa atyenh-rnem atwey-angenh-antey, ngarl atyetyart anemeng-areyan. Atyetyart nga anentyel, mwerr anaynta ikwer-rnem, rernem mwerr-anem anaynteyew, ingwer-rnem iylpelerry-angenh anewerr itna atyenew.<sup>22</sup> David-el renh ilew, rarl ayernew-angkwarr. Saul alpew apmer-warl-anem. David-an alpew arrpemarl ikweren-hrnem-akert apwert-rnem-warl, irryert anaynteyew.

## 25

*David-el artwa Nabal-anem ipmew atweyew-aew*

<sup>1</sup> Artwamp Samuel-an ahaperrew-anem. Israel-wenh-rnem akarrerrew, artnalheler-renh. Rernemap renh akwernew apmer ikweren-hitwew Ramah-itwew.

Ikwer-penh David alpew artwa ikweren-hrnem-akert apmer arterterr-ampeny-warl Maon-warl.<sup>2-3</sup> Artwa anyent apmer Maon-areny anenh itna Nabal, Caleb-wenh-antey. Apmer ikwerenhan apmer Carmel-ampeny-itwew. Ran apwert akngerr-akert, yep-ype-rnem 3,000, nanikwet-rnem 1,000. Artwa ahelengkwarpal ran. Akelty ikwerenhan itnan Abigail. Ranap inneng mwerr-angker, tyakarl anen.

Ingwer-ingweran Nabal-el yep-ype alta akenh apmer ikwer-itwew.<sup>4</sup> David-el awew, apmer arlpawelarl anenhel.<sup>5</sup> Rap ilew artwa akely-rnem 10 alakenh, ‘Carmel-warl alhenh-arey, artwa Nabal areyew. Alakenh ikwer angkenh-arey, ‘Atyetyart David mwerr-angkwarr angkeyel ngkweng!<sup>6</sup> INGKARTel ngenh arntarnt-arem ngwenh-rnem-then atnwenth-rnem-then!<sup>7</sup> Atha awew, ntwarl yep-ype-rnem altanem akeyel. Anantherran artwa yep-ypep-artey ngkwenk-rnem arntarnt-arenh mwantz, irryert-iney-angenh ikwer-rnem-they. Ahawarr ingwer-rneman irryert-awarr. Anantherran arntarnt-arem ingwer-rnem, irryertew iterrey-angenh.<sup>8</sup> Ayerna ngkwenh-rnem! Rernem ilem irrkaty-angkwarr. Alakenh anewantherr mwerr anemer nga, anantherrarl ngkweng warrkerreyel-ampeny. Atha awew arrpemarl, ntwarl ilew akngerr ngwamp, akarrerreyew amern kwenty arlkweyew. Anantherran angayakw aneyel. Amern-then aker-then apek ntwa anthem?’<sup>9</sup>

<sup>9</sup> Rernemap alhew apmer Nabal ikweren-harl, iley-alhew David-arl angkew-angkwarr. Ranap tyerney-angenh-anteyar.

<sup>10</sup> Rap renh-rnem ayernew, ‘Angwenharl David raw? Nthenh-ampeny Jesse-wenh alerikwan? Ran warkenhan ingwer-rnem-ampeny, atyetyart ikwer-rnem-wenh-wetyarl anterreyel.<sup>11</sup> Warrkenh atyenh-rnemwant atha antheman amern aker-then kwat�-akerr. Nthakenh atha anthey-angenh arrewantherrant atyenh-rnem-wetyan. Atha arrenhantherrenh iterl-arey-angenh. David-el thweney-angenh apek arrenhantherrenh?’<sup>12</sup>

<sup>12</sup> Rernemap alpew, David iley-alpeyew.<sup>13</sup> David angkew artwa ikweren-hrnemew, ‘Nayp arlpenty-rnem inenh-arey! Mpa, alhey ikwer-warl!’ Nayp arlpenty-rnem rernem arrernerl-alhew pilt-warl. David-el nayp arlpenty ikweren hinel-alhew arrpemarl. Rap anpenhew artwernem 400-akert. 200 ingwer-rneman anenh, apmer arntarnt-araynteyew anteng.

<sup>14</sup> Warrkenh anyent Nabal-wenh anterrew akeyel Nabal-wenh-warl Abigail-warl, iley-alhew-anem, ‘David-el thwenew angkakert-rnem apmer ikwer-they, atyetyart anewantherrenhew angkeyew. Ranap apmwel-ayett angkew ikwer-rnem.<sup>15</sup> Rerneman mwerr-angker anenh anewantherr, anantherrarl yep-ype-rnem arntarnt-arenheng-arey. Rernem irryert-iney-angenh anewantherr-they.<sup>16</sup> Iternew ingwel-then rernem arntarnt-arenh anenhantherrenh mwantz, yep-ype-rnemal akarrelenhan.<sup>17</sup> Atyetyart nhenh anewantherrenh irrwernelhew ament-antey. Apmwa innga aytewerr anewantherr apmer nhenh-itwew. Nthakenh ntwa renh ilem? Ranap apmwarl, nthakenh ayeng ikwer angkey-angenh, arrangkw!’<sup>18</sup>

<sup>18</sup> Abigail ra mpwelhey-angenh. Rap ilek-ilek akarrelew: rtmp-rnem 200, ngkwarl arranty nanikwet-wenh yep-penh-akert atherr, aker yep-ype ampeng-rnem 5, ntang ampeng yakweth-akert 5 arrpemarl, amern akngerr akatyerr-ampeny, amern akngerr tywerrk-ampeny. Rap tywenew tangkey-rnem-warl-anem.<sup>19</sup> Warrkenh ikweren-hrnemew ra angkew, ‘Arrantherr arrwekel alhenh-arey. Ayengan ingkern-theyarl alhem.’ Artwa ikwerenew ra iley-angenh.

<sup>20</sup> Abigail anperl-alhew tangkey-akert, rap apwert atwatyle-antey alpenh. Rap David-anem areynenh, artwa ikweren-hrnem-akertarl apetyen.<sup>21</sup> David-arl alpenhel, ra

iterreynenh alakenh, "Arrangkwewap atha arntarnt-arenhan artwa ikwerenh-rnem yep-yep-rnem-then apmer nhenh-ampeny-itwew. Mwerr ayeng anenh ikwer, ran atyeng apmwel-ayetharl angkew. <sup>22</sup> Atemwengkel-antey atha atweyen artwa, aweyrnem ingkerr apmer ikwerenh-itwew. Atha alakenh mpwarey-angenhan, ayengap iterwernelhem Akngey-angkwarr!" Alakenh David iterreynenh.

<sup>23</sup> Abigail-elarl renh arenhew, rap atwarrenhew anamerl-antey tangkey-they, kwenerrew-anem ikwer. <sup>24</sup> Rap angkew, "Atyetyartay! Alerl-antey! Awelherl-ayna-tangkewl atyeng! Nga atyeng ahelerremer, mentyarl Nabal-an. <sup>25</sup> Ikwer awelhey-angenh apmwa yanhew. Nabal-an itna arwengkarl, alakenh ra mpwarem apmellerr. Ayengan aney-angenharl, warrkenh ngkwenh-rnemarl apetyeweng-areyan apmer anewantherrenh-warl.

<sup>26</sup> INGKARTel ngenh artwerelew, akngerr ipmew atwewerr. Ngap anewantherr ahelerrey-angenh-anem. INGKARTelan ingwer-rnem atwemer, rernemarl apmwa mpwarem ngkweng, rarl Nabal arwengk atweyen-apany. <sup>27</sup> Nhenh araw! Atha akngetyew amern ilek-ilek ngkweng, artwa ngkwenh-rnemel-then arlkweyew. <sup>28</sup> Atha ngenh ayernem, ayenh ntwa ipmeyew, artwa atyehelarl apmwa ngkweng mpwarew-wety. Atha iterl-arem, ingwer-ingweran INGKARTel ngenh atyetyart ilkwa arrerneyen Israel-ew. Ingwer-anem ngkwenh-antey atyetyart ilkwa aneyen irrkaty-angkwarr. Ngarl apmer-ingwer-areny-rnem-then werrerl-anem, ngap warrkerrem ikwer. Arraty-angkwarr-antey anaynteyew intem-antey nga ampwerreyew-atety. <sup>29</sup> Aleyan ingwer-rnemel ngenh alwernem, ipmew atweyew. INGKARTelan ngenh arntarnt-arem mwantz, iteth-antey anaynteyew. Ngan impenarl ikweren. Ingwer-rneman ra rlengk-anteyarl ywerrelheleyen. <sup>30</sup> Rarl mwerr ngkweng mpwarew-penh, ngap anem atyetyart ilkwa Israel-itwew, rarl arrwekel-antey angkew-angkwarr. <sup>31</sup> Ntwarl atweyew-anewelan, nga nyerr-anemarl awelheyew-anew. Awethem ntwa atwey-angenh-antey anenhanther-renh. Ngarl atyetyart ilkwa aneyenhel, atyeng iylpelerrey-angenh-antey." Abigail angkew arternpellem David-ew alakenh.

<sup>32</sup> David-an angkew, "INGKART atha nakem, Akngey Israel-areny! Rarl ngenh thwenew, ayenh rlwateyew. <sup>33</sup> Ra mwerr ngkweng mpwaremer, ngarl mwantz arraty iterrew-angkwarr. Ntwa ayenh artwerelew, akngerr ipmew atwewerr, ayengan ahelarl apetyen. <sup>34</sup> Innga INGKARTelarl ayenh artwerelew, ngkwenh-rnem atwewerr. Nga anamerl-antey atyeng arnekerrew, atha atemwengkel-antey atwewerr artwa, aweyrnem-then ingkerr apmer ngkwenh-itwew!"

<sup>35</sup> Rap ilew artwa ikwerenh-rnem, ilek-ilek amern ingkerr ineyew, Abigail-elarl akngetyew. Rap angkew ikwer, "Alpanem inkwerelhemel apmer ngkwenh-warl. Ayengarl ngkweng awelhew, athap mpwarem, ntwarl ayernew-angkwarr."

<sup>36</sup> Arelh ra alpenh apmer-warl, arrwekelan akngerr akarrerrew apmer ikwerenh-itwew, amern kwenty arlkwerreyew artwamp ikwerenh-itwel. Nabal-an inkwerelhemel aylelhenh ngkwarl-penh. Abigail-arl aney-alpewel, ra iley-angenh-antey artwamp renh, David-akert. <sup>37</sup> Ingwepenhan Nabal awelhenh mwerr-anem, Abigail-el renh ilew-anem angka apmwerrkeny. Rarl awewel, inweng-weny irreyelpew, arntety-anem. Rap lerrpanem irrew, nthakenh akngelhey-angenh-anem. <sup>38</sup> Arla 10-penh INGKARTel atwew-anem renh, rap ilbew-anem.

<sup>39-40</sup> David-elarl awew, rarl ahaperrew, rap angkew, "Nakem INGKART! Artwamp ra apmwel-ayeth atyeng angkenh. INGKARTel renh ywerrelheley, apmwel-ayetharl angkenh-penh. Ra ayenh artwerelew arrpemarl, apmwa mpwarewerr."

David-el angka thwenew Abigail-warl, renh ayernew, itengerreyew ikwer-warl. Rap angkakert-rnem thwenew apmer ikwer-warl Carmel-warl, rernemap angkey-alhew Abigail ikwer, "David-el anenhantherrenh thwenew. Nga ikwerenh-anem aneyew."

<sup>41</sup> Ra kwenerremel angkew alakenh, "Ya, ayeng alpem. Ayeng ikwer warrkerrem artwa ikwerenh-rnemew-then, ingkety-then apek irrarlk-aynteyew." <sup>42</sup> Rap nganew tangkey-warl anamerl-antey, anpenhew-anem. Arelh warrkenh-rnem 5 alpew arrpemarl ikwer-angkwarr. Rernemap ingkerr-antey alpew-anem David-warl. Ratherr iteng-anem irrew.

<sup>43-44</sup> David-wenh akelty arrwekeleny itnan Michal, Saul-wenh alerikw. Saul-elap renh rakeynew, artwa ingwer-warl-anem anthew Paltiel-warl, apmer Gallim-areny-warl. David-elan akelty ingwer-anem inew itnan Ahinoam, apmer Jezreel-areny. Ikwer-theyan rap Abigail-anem pweytelew Ahinoam-warl.

<sup>1</sup> Ingwer-ingweran artwernem apmer Ziph-areny-rnem Gibeah-warl alhew, Saul-ew nthweyew. Rernemap angkew, "David-rnem irryert-anew-aneyel apwert Hakilah-itwew Jeshimon-itwew."

<sup>2</sup> Anamerl-antey Saul-el akarlelew artwa ahawarr-rnem Israel-wenh 3,000. Alhew-anem, David-ew nthweyew apmer ikwer-warl. <sup>3</sup> Rernemap ayntey-alhew apwert-ampeny-itwew iwerrel. David-rneman irryert-anew-anen-hantey apmer aterterr-ampeny-itwew.arl awewel, Saul apwert Hakilah-itwew aney-alhew, <sup>4</sup> rap thwenew artwa ikwerenh-rnem areyew. Rernemap irryert-they arerl-alpew, Saul ikwerenh-rnem-akertarl anen.

<sup>5</sup> Ingwelan David alhew apmer Saul-wenh-warl. Irryert-they rap renh arey-alhew atyetyart ahawarr-then Abner, alerikw Ner-wenh. Ratherr ampepel aynten, artwa ahawarr-rnemelan renh-atherr ampepewelew.

<sup>6</sup> Artwa atherr alhew David-angkwarr, Ahimelech-an artwa Heth-arl alhenh, Abishai-an Zeruiah-wenharl. Zeruiah ra David-wenh angkwerikwarl, rap ampikw atherr atnyenew, Joab-then Abishai-atherr. Awayikwan ikwerenh Joab. David-el ayernew, "Angwenh anyent apetyem atyeng-angkwarr Saul-warl?"

Abishai-an angkew, "Ayeng alhem."

<sup>7</sup> Ampepenyel ratherr apertenew apmer Saul-wenh-warl. Ingkerrenh ankwa apelp aynten. Ratherr arey-alhew Saul-atherr, ampepelarl aynten. Irryart ikwerenh rtnenh ahernel arrer-antey.

<sup>8</sup> Abishai arreytew, "Atyetyartay, nhenh ara! INGKARTan ilkelheyel, ntwa artwamp yanb atweyew ipmew, ngkweng-warl apmwma mpwareyelan! Irryartel atantheyew atha akwerterrp-antey! Ra ilweyew anamerl!"

<sup>9</sup> David-el tyernew, "Nthakenh ntwa renh atwey-anen! INGKART ngkweng awakelhewerr! Ra renh rlwanew, atyetyart aneyew anewanther. <sup>10</sup> Ingwer-ingwer INGKART ranney renh ywerrelhelem; arntety-angkwarr apek, ahangkwarr apek, rwengk. Nthakenh aylanth atwey-anen! <sup>11</sup> Atha INGKART intem ayernem, atha renh atweewerr, renhan rlwanewarl. Tyampet-then irryart-thenan aylanth iney anterremel."

<sup>12</sup> Ratherrap inerl-alhew, anterremel apmer ikwer-they. Ingwerentyel arey-anen-hantey. Ingkerrenh ankwa apelp-antey aynten, INGKARTelarl renh-rnem ankwarthenew arteventyel.

<sup>13</sup> Ratherrap artarnpenhew peleyn ingwer-ampeny-warl, arleng-anem apwertel rtney-alhew irrwerl. <sup>14</sup> David-an arlkew, "Abner! Aweyel apek ntwa ayen?"

Ra tyernew, "Angwenh aley arlkayel, atyetyartan atyekelyel?"

<sup>15</sup> David kwanthemel angkew, "Abner, artwa ilek-apeny ngan? Nga ilelhem atyetyart ahawarr ilkwa ingwer-rnem-angkwarr! Ntwa arntarnt-arey-anen atyetyart ngkwenh! Ngwamp ingwerenty alhew apmer arrewantherrenh-warl, atyetyart ipmew atweyew-anew! <sup>16</sup> Ngan ahawarr-arrpantey ilkwa! INGKARTel ngenh ipmew ilwerl-athenemer ahawarr ngkwenh-rnem-then! Arrantherr arntarnt-arey-anen arteventy atyetyart, rarl rlwanew! Nhak aral! Irryart atyetyart-werh-alew? Tyampet ikwerenh-alew?"

<sup>17</sup> Saul akwentenhey-alpew, rap David alhengk-awew. "Malyey? Ngang aleyan angkeyel?"

<sup>18</sup> David-el tyernew, "Ya atyetyart, ayeng angkeyel! Ilekew ntwan ayen intem alwerneyel? Ayengan apmwelheley-angenharl! Ilekew ayenhan ayntarrp-ileyle? <sup>19</sup> Arternp atyeng awelha! INGKARTel apek ngenh ilew, atyeng-wety arlkarerreyew? Kel aker apek atha arrtyem ikwer, raw atyeng awakelhey-angenharl, atweyewan angkep. Artwernemel apek ilew, atyeng-wety nga arlkarerreyew? Kel INGKARTelan renh-rnem atwem, rernemarl ayenb irrentew atyehn-rnem-they. Nthakenh ayeng apmer atyehnel Israel-el aney-anen-hanem. Nthakenh ayeng INGKARTew aney-anen. Alethang-apeny, apmer ingwerel-anem anem. Akngerran apmer ikwer-arenyel apentye-angenharl INGKART. <sup>20</sup> Nthakenh ayeng apmer nhenhel ilwey-anen, INGKART-they arleng. Ayengan akelyarl, artwa atyetyart-wenyarl. Ilekew nga atyengan nthweyel? Aker-apenyarl ntwan ayen alwerneyel?"

<sup>21</sup> Saul-an angkew, "Ayengarl apmwelheleyew. Ngan mwerrarl atyeng. Nthakenh ayeng ngkweng apmwelheley-angenb arrpemarl. Ntwan ayenb atwey-anen-hantey ipmew. Ayengarl apmwelheleyew arteventy. Ngan alerey atyehn-apeny. Apey-alpa atyeng-warl!"

<sup>22</sup> David angkew, "Irryart ngkweng nhantey! Artwa anyent thwena, apetyeyew ineyew. <sup>23</sup> Ngwampang INGKARTel aylenhanthenh pweytelew, atha ipmew atwey-anen-hantey ngenh. Ra ngenh rlwanew, atyetyart aneyew. Nthakenh atha ngenh atwey-anen, arrangkw! INGKART ra mwerrarl, ikwerarl awelheyel-rnemewan, arraty-thenarl aneyel-rnemewan. <sup>24</sup> Alakenh ayeng ilkelheyel, ra atyeng mwerr aneyew,

iteth-then ayenh atnyeneyew, ngwamparl ayeng ngkweng iterrew-apeny, ipmew atwey-angenh-antey ngenh.”

<sup>25</sup> Saul-an angkew, “INGKARTel ngenh arntarnt-arem! Ingwer-ingweran nga atyetyart ilkwa aneyenh, ilek-ilek mwerr-angker mpwarerl-aneyenh.”

David alpew-anem apmer ikwer-they, Saul alpew arrpemarl Israel-warl.

## 28

*Saul-el ayerneyel arelh ngangker-akert*

... <sup>3</sup> Arrwekel-antey Saul-el ngangker-akert-rnem irrentew apmer Israel-they, INGKARTelarl ilew-angkwarr.

Ikwer-they artwamp angkakert Samuel ahaperrew. Israel-wenh-rnem artnalhelerrew ikwer, renh akwernew apmer ikweren-ittew Ramah-ittew.

<sup>4</sup> Ingwer-ingwer Philistia-areny-rnem akarrerrew apmer Shunem-ittew, werreyew Israel-wenh-rnem-then. Saul-el akarrelew ahawarr-rnem apmer Gilboa-ittew, Shunem-they arrer-antey arrpemarl. <sup>5</sup> Rarl Philistia-areny-rnem arew, rap atererremel artewen-tyel apatew. Akngerr innarl renh-rnem arew, ywarn-anemap iterrewan. <sup>6</sup> INGKART ra ayernew. INGKARTel renh tyerney-angenh. Altyerr-angkwarr, artwa angkakert-angkwarr-then ra tyerney-angenh, arrangkw. Apwert artwa ingkart-wenh impen renharl iwew impalkert, ra iynwanyerr apek aytneyew, INGKART renh lwewarreny-angenh, arrangkw. <sup>7</sup> Saul angkew artwa ikwerenh-rnemew, “Arelh ngangker-akertew nthwenh-arey. Atha Samuel ayerneyew ikwer-angkwarr. Ra apek ayenh tyerneyew.”

Rernem ikwer angkew, “Anyentan aneyel apmer Endor-ittew.”

<sup>8</sup> Rap arnkwa ingwer-warl-anem aylpew, ingwerelhelemel. Ingwel-antey ra alhew artwa atherr-akert, arelh ikwer nthweyew. Ra renh arey-alhew, rap angkew, “Aveyaw-rnemew katy angka atyeng! Artwa anyent ipma atha itnewem. Ina atyeng!”

<sup>9</sup> Arelhel ra tyernew, “Ilekew ngan apetyew? Ntwa iterl-areyel, atyetyart Saul-elarl ngangker-rnem irrentew Israel-they! Ntwa ayenh irrwerneyel! Saul-el ingwer-rnem ilewerr, ayenh atwewyew ipmew!”

<sup>10</sup> Saul-el tyernew, “Atha ngenh arraty ilem, INGKARTelarl aveyel-wety. Nthakenh ngenh ingwerentyel atwey-angenh, ngkweng awakelhey-angenh!”

<sup>11</sup> Arelhelap ayernew, “Aveyaw nthek-apeny ngkweng atha inem?”

“Artwamp angkakert weth. Ina renh atyeng.”

<sup>12</sup> Arelh angkew Samuel-wenh inwengew, rap apetyew ikwer-warl. Rarl renh arew, rap arlkentyt iwew. Ran angkew Saul-ew, “Ilekew ntwa irrtiyerl-ampernewan? Ngan Saul-arl!”

<sup>13</sup> Saul angkew, “Kelaw! Atererrey-angenh! Ilek ntwa areyel?”

Ra tyernew, “Inweng anyent atha areyel, ahern-theyearl aremerrey-ayntew nhanyem.”

<sup>14</sup> Saul-el ayernew, “Ilek-apeny raw?”

“Artwamp arnkwa arlpenty-akert apetyeyel.”

Saul-el iterl-arew Samuel renh, rap kwenerrew, ilperr-ayntemel atnertel-ayeth ahern-ittew.

<sup>15</sup> Samuel-ap angkew-anem, “Ilekew ntwan ayenh atyekelew, apey-alpeyew ngkweng-warl ipmethey?”

Rtmemel Saul-el tyernew, “Apmwa innganem aleyan atyeng ayntem! Philistia-areny-rnem apetyeyel, ayenh atwewyew. Akngeyan atyeng-wety ilkelhey-angenh-anem, avey-angenh ayenh. Angkey-angenh atyeng artwa angkakert-angkwarr, altyerr-angkwarr apek. Arrangkw, ayeng apateyel-anem, aleyan ngenh-anem atha ayernem.”

<sup>16</sup> Samuel-an angkew, “INGKARTan ngkweng-wety intwemelerrew, awelhey-angenh-anem. Nthakenh ntwa ayenhan ayerney-angenh-anem, ngenh alpemeleyew, arrangkw.

<sup>17</sup> Ayengarl iteth anenheng-arey, ra angka ngkweng-akert arrwekel-antey ayenh ilew. Athap ngenh ilew. Inngarlap aleyan ayntew. Ngan atyetyart Israel-ew aney-angenh-anem. INGKARTel kel-antey arrernew atyetyart ingwer-anem ngkweng-wety. David-arlak ran. <sup>18</sup> Ra alakenh mpwarew, ngan ikwer awelhey-angenharl. Rarl ahelerrew Amalek-areny-rnemew, ra ngenh ilanthew, renh-rnem ingkerrehn ywerrel-heleyew, atrnwenth-rnem-then ikwer-rnem-wenh. Ntwanap alakenh mpwarey-angenh, rarl ilanthew-angkwarr. <sup>19</sup> Philistia-areny-rnemel ngenh ipmew atweyeh ahawarr ngkwengh-rnem-then. Ingwelarreng INGKARTel ngenh iwerl-alheyen. Philistia-areny-rnemel ngenh alerengkw ngkwengh-rnem-then ipmew atweyeh. Arrakerr apey-alpem, aney-alpeyew atyeng-itwel ipmernem-itwel.”

<sup>20</sup> Saul ra amern-weny anenh arla anyentew. Rarl awelhewel, rap alpwelyerreyelpew. Ra artewentyel atererrew aytnemel ahern-warl.

<sup>21</sup> Arelhel arew, Saul-arl arrewemel ayntenh ahern-itwew, rap angkew, "Ayeng ngkweng awelhew. Ayeng atererrew, ntwa ayenh ipmew atwewerr. Athan ngkweng mpwarew, ntwarl ayernew-angkwarz. <sup>22</sup> Ngan atyeng-anem awelhemer. Amern atha ngenh antheyew, ngenh rlterrkeleyew, nga alpeyew-anem apmer-warl."

<sup>23</sup> Ran angkew, "Arrangkw. Nthakenh atha arlkwey-angen." Artwa ikweren-atherr irrkaty-angkwarz angkew, "Atyetyartay, amern ntwa arlkwemer!" Rap awelhew ikwer-nem. Rap akwentel, pangkel-anem aneh.

<sup>24</sup> Kapey anterant rtenh apmer-itwew arelh-wenh, rap atwew anamer-antey. Akerarl ampenh, amern arlely inew, rtamp-anem ampernew pikinpat-weny.

<sup>25</sup> Rap ampeng-anem anthew Saul-ew ingwer-atherrew-then. Rernemap arlkwerl-alhew, alpew-anem atemwengkel-antey. ...

### 31

#### *Saul alerikw ikweren-rnem irrpety-then ilweyel*

<sup>1</sup> Arlta ingwerelan Philistia-areny-rnem Israel-wenh-rnem-then atwerrenh, werrenh pewenarrel apwert Gilboa-itwew. Israel-wenh ahawarr akngerr ilwernerrew ikwer-itwew, ingwer-rneman aterel anterrerrew. <sup>2</sup> Philistia-areny-rnemel Saul alweren alerikw ikweren-rnem-then, rernemap renh-rnem arrerelhennhew. Alerikw ikweren-rnem irrpety ipmewarl atwew; Jonathan, Abinadab, Mallki-Shua. <sup>3</sup> Ahawarr Saul-awel rtnenherrenharl-rnem rernem artewenty wenh ipantey. Philistia-areny-rnemel Saul renh akngerr-inger wew pewenarrel, artertilew renh amperelemel.

<sup>4</sup> Ahawarr ingwerelan alkwertarl katy antwerrkenh. Saul angkew ikwer, "Nayp arlpenty ngkwenh ina, atanhanem ayenh ipmew! Yanh-rnemel INGKART iterl-arey-angenh-rnemel arrkentelhelewerr ayenh, ayenh-mernt atwewerr!"

Ahawaran atererrew, nthakenh renh atwey-angen. Saul ran amentel-antey nayp ikwerenh inew, atanthalhemel atnert-antey ipmew. <sup>5</sup> Artwa ahawarrel arew, atyetyart ikwerenh ipmarl ayntenh, ranemarl ipmew atanthalhew. <sup>6</sup> Saul, alerikw ikweren-rnem, artwa ikwerenh alkwert akngerl-aney-angker-then ingkerrenh-antey rernem ilwernerrew arlta ikwerel.

<sup>7</sup> Angka apmwa arlpimperrew Jezreel, Jordan-angkwarz. Israel-wenh-rnemelarl awew apmer ikwer-atherr-ampeny-they, rernem anterrerrew aterel. Apmerant-anem aynteyelpew. Philistia-areny-rnem-anemarl aney-alpew apmer Israel-wenh-rnem-wenh-itwew.

<sup>8</sup> Arlta ingwerelan Philistia-areny-rnem angkep alpew apwert Gilboa-warl, ilek-ilek ineyew ipmernem-wenh. Saul rernem arey-alhew ipma arrpemarl alerikw ikweren-rnem-then irrpety. <sup>9</sup> Renhap ahenty-anem akerrth-atwew, lhelpelhew arnkwa awerr ahew-arelh. Akngerr anterrenh apmer arpanenh-warl Philistia-ampeny-warl, angka inkwerelhemel ileyew. Rernemap aylpenhew warl kwenerreyew-arelh-warl, altyerr ikwer-rnem-wenh-warl nakemel aylelherreyew. <sup>10</sup> Arnkwa awerr Saul-wenh arrernew warl yanah-ikwer-warl, rernemarl altyerr amarl Astarte-warl kwenerrenh-warl. Saul ipma rernem atanthew parrik-warl apmer Beth Shan-itwew aketh-ampeny.

<sup>11</sup> Angka apmwa awew apmer Jabesh Gilead-ampeny-they-then. Rernem arlka apmwerrew, Philistia-areny-rnemelarl alakenh mpwarew Saul ikwer. Rernemap iterl-arew, rarl renh-rnem alpemelenh arrwekel-antey. <sup>12</sup> Artwa arnkaty-rnem ingwel-antey alhew, Jabesh-they ankawkel alhemel Beth Shan-warl, ipmernem inerl-alpeyew. Rernemap ipma aynenheng-rnem atwarrelheley-alhew warl-they, akngeynemel Jabesh-warl. Apmer ikwer-rnem-wenh-itwew renh-rnem arrtyey-alpew, <sup>13</sup> ngkewn-rnem akwerenemel arwerl awenth anyent intert-itwew. Arlta 7-ew-atety rerneman amern arlkwey-angenh anew amperrngerremel, Saul-ew iterremel.

## Pip Namp 2 Samuel

### Angka atyetyart David-akert

### Angka 2 Samuel alakenh aynteyel

Angka Samuel-wenh arlpenty-tangkwel aynten. Aleyan pwek atherr-anem, Namp 1-then Namp 2-then. Pip arlpenty-wety rernem atherrelew.

Atyetyart Saul-arl ahaperrew-wety, akngerr Judah-wenh-rnemel David-anem arrernew, atyetyart ranem ikwer-rnemew aneyew. Israel-wenh ingwer-rnemelan Saul-wenh alerikw arrernew itnan Ishboseth, atyetyart ikwer-rnemewan aneyew. Rernemap werrenh aherrety 7-ew-atety.

Ikwer-penhan David-anem anenhew atyetyart ingkerrew. Rarl atyetyart anenhangarey, ra apmer ingwer-areny-rnem-then irrentew, rernemarl ilkelhenh, aneyew apmer ikweren-hitwew. Atyetyart mwerr-angkerarlap ran, INGKARTarl apenten. Ranap anyent-ingerarl apmwelhelew. Artwa ingwer-wenh arelh ra inew. Rap INGKART-warl nyerrerremel angkew, rarl apmwelhelew, rap ikwer awakeley-angenh. David-wenh alerikw-rneman awelhey-angenh INGKARTew anew.

*David-el aweyel, Saul-arl ahaperrew*

<sup>1</sup> Philistia-areny-rnem Israel-wenh-rnem-then atwerrenh, werrenh apwert Gilboa-itwew, Saul-arl ahaperrew ikwer-itwew.

Arlta ikwerel-antey David-rnem Amalek-areny-rnem-then werrenh arrpemarl apmer ingwer-itwew. Renh-rnemarl antengele-penh, David-rnem alpew-anem apmer Ziklag-warl apal-antey. <sup>2</sup> Arlta atherr-penh artwa akely-anem aremerrew Saul-rnem-they. Arnkwarl ilterrelhew-akert, akapwert-then ahernel artelhew, rarl angka apmwakert apetyew. Rap kwenerrey-alhew David-warl.

<sup>3</sup> David-el ayernew, “Nthek-they ngan apetyew?”

Ra tyernew, “Ayengan apmer Gilboa-they anterrey-alhew, ahelarl atwerrew-they.”

<sup>4</sup> “Nthakenh irrew? Ila atyeng!”

“Rernem ahawarr akngerr Israel-wenh-rnem wew ipmew pewenarrel. Ingwer-rneman arlperry antererrew. Saul-then alerikw ikweren Jonathan-then ipmew atwew arrpemarl.” ...

<sup>11</sup> David-el artwa ikweren-hrnemel-then arnkwa ilterrew, rernemarl arlka apmwereyelpew Saul-ew-then Jonathan-ew-then. <sup>12</sup> Rernemap artnew ingwelew-atety, amerithen arlkwey-angenh-anem. Rernem amperrngerrew Israel-wenh-rnemew, INGKART-wenh-rnemarl ilwernerrew. ...

## 2

*Judah-areny-rnemel David arrerneyel, atyetyart aneyew ikwer-rnem*

<sup>1</sup> Ikwer-penhan David-el INGKART ayernew, “Nthakenh irrem? Alpemang ayeng, aneyalpeyew, apmer anyent-itwew Judah-ampeny-itwew?”

INGKARTel tyernew, “Ya, alpa.”

David-el ayernew, “Apmer nthennh-warl?”

“Hebron-warl.”

<sup>2</sup> Kel David alpew, aney-alpew-anem apmer ikwer-itwew. Akelty ikweren-hatherr alpew ikwer-angkwarr; Ahinoam Jezreel-areny, Abigail Carmel-areny-then, inpertarl irrew Nabal-ew. <sup>3</sup> David ikweren-hrnemel alpew arrpemarl ampangketyarr. Ingwer-rneman alpew tawen Hebron ikwer-warlarl, ingwer-rneman alpew apmer ingwer-rnem-warlarl arrer-antey arrpemarl ikwer-ampeny. <sup>4</sup> Judah-areny-rnem akarrerrew-anem Hebron-itwew, David arrerneyew atyetyart ikwer-rnem, anter alip thelemel akapwert-warl, ikwer-rnem-wenh-angkwarr. ...

*Israel-wenh ingwer-rnemel arrerneyel Ishboseth atyetyart ikwer-rnemew*

<sup>8</sup> Ikwereng-arey Saul-wenh atyetyart ahawarrel, alerikw Ner-wenhel itnan Abner, ra akngetyew artwa anyent Ishboseth apmer Mahanaim-warl. Ranap Saul-wenh alerikwarl. <sup>9</sup> Abner-el renh arrernew atyetyart ingwer-rnemew: Gilead-areny-rnemew, Asher-areny-rnemew, Jezreel-areny-rnemew, Ephraim-areny-rnemew, Benjamin-areny-rnemew-then.

<sup>10</sup> Ishboseth ra 40-anem irrew, renharl atyetyart Israel-ew arrernew. Rap atyetyart anew aherrety atherrew-atety. Judah-areny-rnemelanap David-arl atyetyart arrernew ikwer-rneman. <sup>11</sup> Rap atyetyart anew aherrety 7 alkent 6-ew-atety Hebron-itwew. ...

**3**

<sup>1</sup> Saul-arl ilwew-penh, ikwerenhen-rnem David-wenh-rnem-then intem-antey werrenh arlengew-alenty. David-wenh-rnem akngerrerrew, ingwer-rneman irrpetyap-anem irrew. David-wenh-rneman Judah-areny-rnemarl, ingwer-rneman Israel-areny-rnemarl.

...

**5**

*David atyetyart aneyel ingkerrenhew-anem Israel-ampeny-itew*

<sup>1</sup> David anenh atyetyart Judah-areny-rnemwant-tangkwel. Ingwer-ingweran Israel-wenh ingkerr akarerrew Hebron-itew, alakenh David-ew angkeyew, "Ngan anewantherr-apetylaryal. <sup>2</sup> Saul-arl anenheng-arey atyetyart ingkerrew anewantherr Israel-wenh-rnemarl, nga anenh atyetyart ahawarr-rnemewarl. Ikwereng-arey alakenh INGKARTel ngenh ilew, 'Ngan ingwer-ingwer atyetyart aneyen, arntarnt-areyen, atyehn-rnem Israel-wenh-rnem, yep-yeparl arntarnt-arem-apeny.'

<sup>3</sup> Alakenh angkemel artwamp-rnem alhew David-warl, Hebron-warl rarl anenh-warl. Rap angkew, "Ya, ayeng atyetyart anem arrewantherr ingkerrew, arrantherrarl angkew-angkwarz." Rap alakenh ingkwernew pip-warl-anem. Ingkerrenh ingkwernehliew pip ikwer-warl. Artwamp-rnemel renh atyetyart arrernew Israel-ew-anem, anter alip thelemel akapwert-warl, ikwer-rnem-wenh-angkwarz.

<sup>4</sup> David ra 30-anem irrew, renharl atyetyart Israel-ew arrerneweng-areyan. Rap anew atyetyart arlengew-alenty, aherrety 40-ew-atety. <sup>5</sup> Aherrety 7-ew-atety David ra anew atyetyart Judah-areny-rnemew-tangkwel apmer Hebron-itewan. Ikwer-penh ra atyetyart anew ingkerrew-anem, rap atyetyart ilkwanem aney-alpew apmer Jerusalem-itew-anem. Rap apmer atherr pweytelew-anem, Judah-then Israel-then. Apmer ilkwa renh itnewew Israel-anem. ...

**7**

*INGKARTel David ileyel, "Ngkwenh-rneman atyetyart-anem intem anayntem"*

<sup>1</sup> INGKARTel David alpemelemel arntarnt-arenh ahelengkw apmer ingwer-areny-rnem-wety. Ingwer-rneman werrey-angenh-anem ipmelhew Israel-wenh-rnem-then. David-ap inkwerelhemel-anem anenh warl ilkwa ikwerenhen-itew Jerusalem-itew. <sup>2</sup> Rap angkew artwa angkakertew Nathan-ew, "Ayengan aneyel warl mwerr-angker ilkwa nhenh-itew, box impen Akngey-wenh ranap rtneyel kalikw-itew-antey! Warl ingwer atha arteyew box ikwer."

<sup>3</sup> Nathan-el tyernew, "INGKARTelan ngenh arntarnt-arem. Kel ilek-ilek ntwa mpwarem, nga ilkelhentyelan."

<sup>4</sup> Nathan-ewan INGKARTelan angka ingwerarl ilew altyerr-angkwarz, rarl ankwayntenh-itew. <sup>5</sup> Ra ilew, alakenh David ileyew:

"David, ngan warrenh atyehn. Ayeh awa. Menty ayntey, warl artey-angenh box impen ikwer. <sup>6</sup> Warlel ayengan aney-angenh, atharl atnwenhenheng-arey Israel-wenh-rnem Egypt-they. Aleyan ayeng warlel aney-angenh arrpemarl, kalikwel-anteyarl aneyel. Kalikwel-antey ayeng anenh, Israel-wenh-rnemarl alhenh ikwer-akert apmer arrpanenh-warl. <sup>7</sup> Atha atyetyart-rnem arrernenh, renh-rnem arntarnt-araynteyew. Atyetyart renh-rnemanap atha ilanthey-angenharl, warl mwerr-angker ilkwa arteyew ikwer, arrangkw.

<sup>8</sup> Kel, mwanty-antey awelha atyeng. Ngan yep-yep arntarnt-arey-angker-tangkwel anew. Athap ngenh-anem arrernew, atyetyart anayew Israel-wenh-rnemew. <sup>9</sup> Ayengan arrer innga alhenh ngkweng-itew, ntwarl ilek-ilek mpwarenheng-arey. Atha ngenh alpemeleh, apmer ingwer-areny-rnem irrenteyew ahelengkw-rnem Israel-they. Aleyan atha ngenh ilkwanem mpwarem. Akngerr apmer arrpanenh-arenyel ngenh iterl-areyenh, mwerr-angker antwemel. <sup>10-11</sup> Awank-they athan atyetyart-rnem atyehn-rnemew arrernenh. Ingwer-rnemelan atyehn-rnem alhengkerr-anthenh, renh-rnem-then atwerrenh. Nhepenh-anyem athan renh-rnem arntarnt-araynteyew apmer nhenh-itew. Apmer ikwer-rnem-wenh-anem, ikwer-itew rernem akeleyt anaynteyew, atererrey-angenh-anem. Ingwer-rnemel renh-rnem ipmeyew-anem.

Arrwekel-antey atha ngenh ilem. Ngkwenh-rnem atha ilkwanem mpwareynem. <sup>12</sup> Ngarl ahaperreyen, ngenhap akwerneyen, ngkwenh-rnemarl aynteyel-itew-antey. Alerengkw ngkwenh anyentan atyetyartarl atha rlwaneyen, renh rlter-rkelemel. Rap aneyen atyetyart rlterr ikwerenhen-rnemew aleth-antey arlengew-alenty. <sup>13</sup> Nthakenh ingwerentyl apmer nhenh rakey-angenh ikwer-they. Alerikw

ikwerenh-rnem ingkern-penh-rnem-then rernem atyetyart-anem aneyenhan temantey. <sup>14</sup> Ayengan aynikw ikwerenh-apenyarl aneyenhan, ran alerey atyehn-apenyarl aneyenhan. Ra apmwelhel-aynteman, atha renh arrattyel-ayntemarl, artewentyel arntarnt-arayntemel akalty-anthayntemel aynelikw-apeny. <sup>15</sup> Saul-ew ayeng ilkelhenh-tangkwel. Ikwer-penhan ayeng ilkelhey-angenh ikwer, athap ngenh-anem atyetyart arrenew ikwer-wety. Alerengkw ngkwenhewan ayeng ilkelh-ayntemarl intem, rarl atyetyart aneyenheng-areyan. <sup>16</sup> Ngkwenh-rnem intem anayntem. Anyent ngkwenhan atyetyartarl intem anayntem."

Alakenh INGKARTel ilew artwa angkakert Nathan-warl altyerr-angkwarr. <sup>17</sup> Ingwepenh ingwer-ingwer ra alhew, David-anem ileyew, INGKARTarl angkew-angkwarr ...

## 11

*David-el artwa ingwer-wenh arelh ineyel*

<sup>1</sup> Alyangkw-penh atyetyart-rnemel akarrelenh ahawarr ikwer-rnem-wenh, ingwer-rnem-then werrayteyew apmelerr-angkwarr. David-el atyetyart ahawarr Joab ilew, "Ahawarr ingkerr Israel-wenh-rnem akarrela, alheyew arrpemarl, werreyew Ammon-areny-rnem-then." Rernemarl alhewel, rernemap rlwatew ahawarr Ammon-areny-rnem, atwew-anem artewentyal ampep-itwew renh-rnem. Apmer Rabbah-anem rernem amperlelew ikwer-penhelan. Apmer ikwer-areny-rnem nthakenh tyerrelhey-angenh amperlewarl-wety.

David-an artenyarl anenhan Jerusalem-itwew.

<sup>2</sup> Rap atwerrp-anem ankwtethay akwenthaw, aketh-warl-anem tyerrelhew, rtnehan-anem warl irrwerl-itwew. Rap ayternew-anem, arelharl pwerlperrenh. Arelh inngerr mwerr-angker inngarlap ran. <sup>3</sup> Rap warrkenh ikwerenh thwenew, alakenh ayerneyew, "Angwenharl raw nhenhey?" Warrkenh rap apey-alpew ilemel, "Bathsheba-arl yanhan, Eliam-wenh alerikw. Mpwer nikwan ikwerenh Uriah-arl Heth-wenh-antey." <sup>4</sup> David-el renh thwenew, arelh renh ingweweyew ikwer. Ra ngwampant irrarlkelhenh, arelh-rnemarl irrarlkelhem-angkwarr alkent arrpanenhel, ikwer-rnem-wenh-angkwarr. Bathsheba-ap alhew, David-arl angkew-angkwarr, ayntenh-anem ratherr. Ikwer-penhap ra alpew-anem apmer ikwerenh-warl.

<sup>5</sup> Arntetyel-anem arelhel ra angka thwenew David-warl.

<sup>6</sup> David-el awew, ra thwenew angka Joab-warl, rernemarl werrenh-warl. Rap angkew, "Ahawarr Uriah thwena atyeng-warl."

Renhap thwenew Joab-el. <sup>7</sup> David-elarl renh arew, rap ayternew, "Joab-alew? Mwerrangay? Ahawarr Israel-wenh-rnem mwerr arrpemarl? Artewentyang rernem werrenh Ammon-areny-rnem-then?" <sup>8</sup> Uriah-el renh tyernew. David angkew ikwer, "Kel-anem alpa apmer-warl akelty ngkwenh-warl, pwerlperreyew ltyerremel. Joab-warl ingwelarrengant alpa." Rarl alpew, David-el aker mwerr-angker thwenew warrkenh-angkwarr, Uriah-atherrel arlkweyew. <sup>9</sup> Uriah-anap apmer ikwerenhel ayntey-alpey-angenharl, arrangkw. Ran ayntew warrkenh-rnem-itwew atyetyart-wenh-rnem-itwel, aketh-itwew, David-wenh-itwew.

<sup>10</sup> Warrkenh anyentel David ilew, "Uriah-an ayntey-alpey-angenharl warl ikwerenh-itwew." Rap warrkenh renh ilew, Uriah ingweweyew. Rarl apetyew, David-el renh ayternew, "Ilek-wety ngan alpey-angenh, ltyerreyew? Artewentyarl nga warrkerrenh, arleng-theythen nga apetyew."

<sup>11</sup> Uriah-el tyernew, "Nthakenh ayeng alpey-angenh apmer atyehn-warl. Akngerr werreyel-antey Ammon-areny-rnem-then: ahawarr-rnem Israel-areny, ahawarr-rnem Judah-areny, atyetyart ahawarr-rnem, Joab-akerr. Rernemap aynteyel ampep-itwew, kalikwan intelheyel. Box impen Akngey-wenh wethan rtneyel arrpemarl. Nthakenh ayeng alpey-angenh apmer atyehn-warl akelty atyehn-warl, aker arlkweyew, ngkwarl-then antyweweyew, arrangkw! Arraty atha ngenh ilem, nthakenh ayeng alakenh irrey-angenh!"

<sup>12</sup> David-an angkew ikwer, "Kel. Apmer atyehn-itwew anerl-alha. Ingwelarrengant atha ngenh thwenem."

Kel Uriah atherr-inger ayntew Jerusalem-itwew. <sup>13</sup> David-el anthew amern akngerr ngkwarl-then ilpertelhemel. Rap angkew, "Ngkwarl-then antywa!" Uriah-an terangk innganem irrew.

Ra alpey-angenh akelty ikwerenh-warl, ayntey-alpew panty ikwerenh-itwew warrkenh-rnem-itwel arrpemarl, irrkaty-angkwarr.

<sup>14</sup> Ingwepenh David-el awew, pip-anem ingkwernew atyetyart ahawarr Joab ikwer. Rap angkew Uriah-ew, "Pip nhenhan anthey-alha atyetyart ngkwenhew Joab-ew." Apalel-antey ra akngew. <sup>15</sup> Pip-angkwarr alakenh ilew, "Uriah renh thweneyew artewentyel werreyel-ampeny-warl, Ammon-areny-rnem arrerenty. Ingwer-rnem ila, arleng-apeny rtneyew ikwer-wety, renh pewenarrel ipmew wey-alkenh."

<sup>16</sup> Israel-wenh-rnemelan apmer Rabbah amperelenh-antey. Joab-el iterl-arew, ahawarr Ammon-areny tyak-rnemarl rtnenh. Rap Uriah thwenew, renh-rnem weyew arrer-they. <sup>17</sup> Ammon-areny-rnem arrer-anem irrew, arrer-they-anem wemel. Ingwer-rneman Israel-wenh-rnem wew ipmew. Uriah-an wew ipmew arrpemarl.

<sup>18</sup> Joab-el artwa angkakert thwenew, David ileyew, alakenh irrenh apmer ikwer-itwew. <sup>19</sup> Ra angkew, "Atyetyartew angka apmwa ila. <sup>20</sup> Ra ahelerrewerr, arrangkwewarl rerneman ilwernerrewarl. Ra ayernewerr alakenh, 'Ilekew arrantherr wenh arrer-theyan? Arrantherr apek alakenh iterrew, "Nthakenh wey-angenh anenhantherrenh Ammon-areny-rnemel?" <sup>21</sup> Arrantherr apek iylpelerrew angka Abimelech-akertew, Gideon-wenh alerikwew? Ra ilwew irrkaty-angkwarr arrpemarl apmer Thebez-itwew. Arelh anyentel apwert ilkwa iwew warl irrwerl-they, renhap ipmewarl lthew. Ilekew arrantherr arrererrewan? Atyetyartelarl ayernem alakenh, ila renh, 'Uriah-an ilwew arrpemarl.'

<sup>22</sup> Artwa angkakertan alhew Jerusalem-warl David-warl, ra angka iley-alhew, Joab-elarl ilanthew-angkwarr-antey. <sup>23</sup> Rap angkew-anem alakenh, "Ammon-areny-rnem arrer-anem apetyew tawen ikwer-rnem-wenh-they, werreyew ampep-itwew. Anantherr renh-rnem angkep-antey alwernew tawen ikwer-warl. <sup>24</sup> Tawen-areny-rnem rernemanem wey-ayntew. Rernem ahawarr ngkwenh-rnem ingwerentyakant wew ipmew. Uriah ngkwenh wew ipmew arrpemarl."

<sup>25</sup> David-elan awew, rap angkew, "Angkep alpa, Joab ileyew alakenh, 'Arlka apmwerrey-angenh. Ahel atwerrenh, alakenharlap irrem. Ingwerenty ilwem, ingwerentyan arrangkwarl. Arternp-antey arrkernelh-ayntenh-arey, warl-then atakeyew apmer ikwer-itwew ingkerr.' Alakenh ila, intem-antey arlka apmwerrey-angenh ra anyew." David ra tangkew-anem.

<sup>26</sup> Bathsheba rarl awew, mpwernikw ilwewarl, ra artnew ikwer. <sup>27</sup> Arlta 7-ew-atetyra artnew ikwer-rnem-wenh-angkwarr. Ikwer-they David-el warrkenh thwenew ikwer-warl, renh ingwerl-alpeyew. Ratherrap itengerrew-anem. Ingwer-ingwer awey-anem ikwer-atherrenh anew.

INGKARTelanap renh-atherr arenh. Rap inkwerelhey-angenh, David-arl apmwelheewan.

## 12

### *Artwa angkakertel Nathan-el David ilteyel*

<sup>1</sup> Kel INGKARTel ilew artwa angkakert Nathan, "Alha David-warl, ileyew renh angka nhenh. 'Artwa atherr anenh apmer anyentel-antey irrikatayel. Ingwerelan ilek-ilek akngerr apwert-then atyeneneh, arrangkwarl ingweran anenh. <sup>2</sup> Ingwerelan yep-yep pwelek-rnem-then akngerrarl atyeneneh, <sup>3</sup> ingwerelan yep-yep amarl akely anyentantarl atyeneneh, rarl payemelew. Ra warl-itwew alkenhelew ikwerenh-rnem-itwew. Amern ikwer-rnem-wenh arlkew, kwaty-then irrkwa ikwerenh-they antywennh. Rap iynwerl-ayntenh alerikw ikwerenh-apeny.

<sup>4</sup> Ingwer-ingweran alethang anyent apetyew apmer arleng-they, rap ayntey-alhew apmer artwa apwert akngerr-akert-wenh-itwew. Ran ilkelhew, aker amperneyew alethang ikwer. Rap atnwenth ikwerenhan atwey-angenharl. Artwa irrepern ikwer-they ra yep-yep akely rakew, alethang ikweran amperneyew." Alakenh Nathan-el David ilenh.

<sup>5</sup> David-el angka renh awew, rap ahelerrew artwa ikwer, rap angkew Nathan-ew, "Athan arraty ileyel, INGKARTelarl aweyel. Artwa yanh apmwelhelew. Ingwerentyel ipmew renh atwemer! <sup>6</sup> Ra athamerrey-angenhel apmwel-ayeth rakew. Rap yep-yep-rnem 4 anthem angkep ikwer!"

<sup>7</sup> Nathan angkew David-ew, "Ngarlap ran! Angka nhenhan ngkweng-akert! INGKARTelarl ilew angka nhenhan atyeng. Ra ngenh atyetyart arrernew Israel-wenh-rnemew. Saul-elarl ngenh ipmew atweyew-anew, ra ngenh arntarttarenh. <sup>8</sup> Ra ngenh atyetyart arrernew Saul-wety. Akelyt ikwerenh-rnem ngkwengant-anem. Ngap atyetyart-anem apmer atherr-angkwarr-anem, Israel-ew Judah-ew-anem. Atyetyart apek anem apmer ingwerew-then? Kel, INGKARTel apek anthem ilek-ilek arrpemarl.

<sup>9</sup> Ilek-wety nga angka ikwerenhenew awelhey-angenh? Nga apmwelhelew ikwer-angkwarz. Ntwa Uriah thwenew, artewentyelarl werrenh-ampeny-warl, Ammon-areny-rnemelaw renh weyew pewenarrel ipmew. Ntwaw nheng arelh ikwerenhen iney-alkenh ngkwengant-anem.

<sup>10</sup> Kel, ngarl apmwelhelew, ngkwenh-rnem-then ntwa irrwernew. Intem-antey apmwat ayntayntem ngkwenh-rnemew, akngerr ilwerl-aneyen. Alakenh aynteyen, ngarl INGKART-wety arkarerrenh, aketylart ntwa Uriah-wenh inew ngkweng.

<sup>11</sup> INGKARTel ngenh angka ingwer-then ileyl. Ingwer-ingweran alerengkw anyen-telan ngkwenhel irrwerneyen ngenh. INGKARTel renh artwreley-angenh, rarl ineyenhel aketyl ngkwenh-rnem, alhewer aynteyen ikwer-rnem-akert. <sup>12</sup> Anykel ntwan aketyl Uriah-wenh inenh. Ranap aketyl ngkwenh-rnem anayntarl ineyen, akngerrelaw areyew."

<sup>13-14</sup> David-an angkew Nathan-ew, "Ayeng apmwelhelew INGKART-angkwarz." Nathan angkew, "Ya, arraty! Alakenharl apmwelhelelem arrkentelheleyel INGKART renh. Ranap ngkweng awakelhey-angenh. Ra nthakenh ngenh ipmew atwey-angenh. Avey irrngarl ngkwenh rantap ahaperreyenharl."

#### *David-wenh alerikw irrngarl ilweyel*

<sup>15</sup> Nathan alpew-anem apmer-warl. Aketyl Uriah-wenhel awey akely David-wenh atnyenew, awey rap arntety ilkwerrew-anem, INGKARTelarl renh arntetyelew. <sup>16</sup> David-el intem-antey ayernenh INGKART awey ikwer, ra mwerrerreyew. Amern arlkwey-angenh, arrangkw, amperrgerrewarl ra awey ikwer. Ingwa arrpanenh ra aylpenh warl ikwerenhen-warl ayntayteyew, ayntenh arlertek-itwew ra. Pangk mwerrel ayntey-angenh. <sup>17</sup> Akngerr-inger warrkenh ikwerenhen-rnem apetyen ikwer-warl araynteyew. Ywarn-antey renh ilenh rtnerl-alheyew. Ywarn rernem arrkernelhenh, amern antheyew.

<sup>18</sup> Arlita 6-penh ampa akely ahaperrew. David-wenh warrkenh-rnem atererrew, renh ilewerr angka apmwa. Rernem iterrenh alakenh: "Ampa akelyarl iteth-antey anenheng-arey, anantherr ywarn iterrew, angkeyew ikwer. Ran iylpelant awenh anenhantherrenh. Nthakenh anantherr angka apmwa nhenh iley-angenh, ra artewenty atwelhewerr!"

<sup>19</sup> David-el warrkenh-rnem arew arreyterrenharl. Rap iterl-arew, ampa akelyarl ahaperrew. "Ayengan alerey-weny-anem anem, ngay?"

Rernem tyernew, "Ya."

<sup>20</sup> Rap rtnerl-alhew. Rap pwerperreyew alhew, anterel-then apernelhew inteng-inteng mwerr-angkerel, arnkwel-anem mwerr-angkerel aylpemel. Rap warl INGKART-wenh-warl-anem aylpew, angkaynteyew ikwer-warl kwenerremel. Rap alpew-anem warl ikwerenhen-warl, ayernemel warrkenh ikwerenhen-rnem, amern ikwer akngetyeyew, raw arlkweyew.

<sup>21</sup> Rernem renh ayernew, "Nthakenh irreyel? Ampa akelyarl iteth anenheng-arey, ngan ayntemelant artnenh, amern arlkwey-angenh. Rarl ahaperrew-penh, ngan anamerl-antey akwentew, amern-anem arlkwemel! Nthakenh ngan irreyel?"

<sup>22</sup> Ra tyernew, "Ya, amparl iteth anenheng-arey, ayeng ayntemelant artnenh, amern arlkwey-angenh. Ayengan iterrenh, 'INGKART apek atyeng amperrgerreyew. Ampa akely ra mwerrleyew apek.' <sup>23</sup> Ran kel ahaperrew. Amern arlkwey-angenh nthakenh atha renh angkep itetheley-angenh, arrangkw. Ingwer-ingweran ayeng ahaperreyen arrpemarl. Aylakap aneyen itengant-atherr. Nthakenh ra atyeng-warl apey-alpey-angenh nhenh-warlan."

<sup>24</sup> David alyep-antey angkew aketyl ikwerenhenew Bathsheba-ew, irrngerney-antheyew. Ingwer-ingwer awey ingwer-anem ratherr atnyenew, renhap itnewem Solomon. INGKART ilkelhew artewenty ampa akely ikwer, <sup>25</sup> rap artwa angkakert Nathan ilew, "Alha, ileyew renh-atherr, ratherr renh itnewemer Jedidiah, ayengarl artewentyel ikwer ilkelheyel..."

## 15

#### *Absalom ilkelheyel, atyetyart aneyew aynikw-angkwarz*

<sup>1</sup> Ikwer-penh ingwer-ingweran David-wenh alerikw Absalom ilkelhew, atyetyart ilkwa aneyew. Pakey mwerr-angker ra inew nantew atherr-akert, ra akngaynteyew. Rarl pakey-akert alhenh, artwa 50 anterrenh arrwikel-ampeny, atyetyart ilkwarppantey ra. <sup>2</sup> Ra ingwepenh-antey akwenteh, alhenh rtnaynteyew keyt ilkwitwew. Keyt-angkwarz akngerr alhenh Jerusalem-warl. Akngerr alhenh, atyetyart David ayern-aynteyew, renh-rnem arratel-aynteyew. Absalom ra arlkey-ayntenh ikwer-rnem,

"Ay! Nthenh-areny?" Artwa ra tyernenh apek, "Ephraim-wenh-antey, Benjamin-wenh-antey" apek. Alakenh. <sup>3</sup> Alerikw David-wenh ra angkayntenh irrtiyerremel, "Awelha atyeng! Ngan arratyarl, ingweran ngkweng-warl apmwelhelewarl. Atyetyart aynaty yanhan nthakenh akngerrew awelhey-angenh, rernem alhenty ikwer-warl, arrangkw. Ra kwertengerl atnyeney-angenharl, katy ayern-aynteyew arrewantherr." <sup>4</sup> Intem ra alakenh angkenh ingkerrew. Rap angkenh, "Ayeng atyetyart anemer apmer nhennitewan! Ayeng mwerrarl ingkerrenhew aynayntem irrkaty-angkwarr! Ingwerentyl apek ayenah ayernem, athap arratyarl ilem renh-rnem mwerr-angkwarr!"

<sup>5</sup> Ingwerentyl apek aremerrey-alhenh alerikw David-wenh-warl, rernemap kwenerrey-alhenh, artwa ilkwew-arrpantey ikwer iterrenh. Renh-rnem itep antwerrenh atnyenemel arrwantyemel, rernemaw ikwer ilkelh-aynteyew-awaty, Jew-rnem-wenh-angkwarr. <sup>6</sup> Artwa Israel-wenharl alhenh, atyetyart David ayernemel araynteyew, alerikw ikwerenhl alakenh irrayntenh. Alakenhan ra Israel-wenh-rnem akalty-anthenh, ikwerant-anem ilkelh-aynteyew, David menty-anem.

<sup>7-8</sup> Ra alakenh irrenh arleng-alenty. Aherrety 4-penh, ra irrtiyerremel angkew aynikw ikwerenhw atyetyartew, "Artwampay, ayengarl anen apmer Geshur-itwew Aram-ampeny-itwew, atha INGKART alakenh ilew, 'Ntwa ayenah tyarlewenty, Jerusalem-warl alpeyew, ayengan ngkweng kwenerrey-alpem apmer Hebron-itwew.' Mwerrang atyeng alpeyewan Hebron-warl, INGKARTew kwenerr-aynteyew?"

<sup>9</sup> David-el tyernew, "Kelaw. Mwerr nga alhewer alpem." Rap alhew Hebron-warln anem.

<sup>10</sup> Alerikw David-wenhel ra angkakert anyelkel thwenew, Israel-wenh-rnem ileyw alakenh: "Terampet arlkenty awem, arrantherr ingkerr arlkenh-arey, 'Absalom ra atyetyart anewantherr! Rernemap renh arrernew atyetyart Hebron-itwew!'" <sup>11</sup> Alerikw David-wenhel ilew artwernem 200, ikwer-angkwarr alheyew Hebron-warl, aker artyaynteyew INGKARTew. Ra arlkarerrenh David-wety, artwernemelan renh apentew apalearl. <sup>12</sup> Aker arrtyeyew-athath, ra yangkelhew artwamp Ahithophel-ew-tangkwel, apetyeyew apmer ikwerenhl-they Giloh-they. Ahithophel-an kwertengerl anen David-ew-tangkwel awank. Anper arey-angkerlap ran.

Alakenh-anyem akngerrenn iterrew, alerikw David-wenhant-anem apent-aynteyew, menty-anem renhan. Renh apentey-angenh-anem, ikwer awelhey-angenh-anem.

#### *Atyetyart David irrtiyert-anterreyel*

<sup>13</sup> Ikwer-penh artwa angkakert anyent alhew David-ew, rap angkew, "Israel-wenh-rnemel apenteyel alerengkw-anemarl!"

<sup>14</sup> David apateyelpew. Rap warrkenh ikwerenhn-rnemew angkew, ikwer-itwelarl anenhn-rnemew Jerusalem-itwew, "Mpa! Ingkerrenh anantherr irrtiyert-anterrey, antwerrkewerr anenhantherrenh! Anamerl-antey anantherr alpey, ra atep-atakewerr apmer nhenh, ingkerrenh atwemel!"

<sup>15</sup> Warrkenh-rnemel tyernew, "Ya atyetyartay! Anantherr ngkweng awelhem, ntwarl ilem-angkwarr."

<sup>16</sup> David rap anpenhew ikwerenhn-rnem-akert. Ra kwey warrkenh-rnem 10 ilew, ikwer-itwelarl itengerrew-rnem, ayannteyew anteng, arntarnt-araynteyew warl ikwerenhl ...

<sup>32</sup> Rernemap anperlarr-alhew Apwert Alip-warl, rernemarl awank kwenerremel angkenh Akngey-warl ikwer-itwew. Kwertengerl anyent David-wenhel, Hushai-el, rlwatew renh-rnem apwert ikwer-itwew. Ranap Ark-wenh-anteyarl. Ra aremerrey-ayntew arnkwa ilterrelhenty-akert ahern-angketyarr akapwert, rarl amperrngwerrew atyetyart ikwerenhw. <sup>33</sup> David-an angkew ikwer, "Apentey-angenh ayenah. Anngangewerr ntwa ayenah. <sup>34</sup> Nga alpem irrtiyert-antey Jerusalem-warl, aleraty atyehn ileyw irrtiyerremel alakenh, 'Atyetyartay! Ayengan ngkweng-anem warrkerreyew. Awankan ayeng warrkerrenh aynengkwew-tangkwel. Aleyan ayeng ngkwengant-anem warrkerreyew.' Ngarl alakenh angkeman ikwer, ntwa ayenharl alpemelem. Ahithophel, anper arey-angker weth, rarl angka arraty angkenty, ntwa aleraty atyehn apatelhelem, angka ingwerarl ikwer ilemel." ...

## 16

#### *Shimei-el David arrarleytel ilteyel*

... <sup>5</sup> David-arl arrer-anem irrew apmer Bahurim-warl ikwerenhn-rnem-akert, artwa anyent itnan Shimei aremerrey-ayntew, renh-rnem rlwatew. Ranap Saul-wenh akwerrk-anteyarl. Rap arrarleytel iltayntew David, <sup>6</sup> apwertel-then wew renh-rnem. David

ra akngerr-akert arrpemarl alpenh, Shimei-elan apwertel wenh-antey. <sup>7</sup> Rap apmwel-ayeth angkew David-ew alakenh: "Irrwerney-angker apmwa! Ahelengkw! Atwenh-atwenh! Atyetyart-arrpantey! Alpa! <sup>8</sup> INGKARTel ngenh irrwernem aley-anyem angkep, ntwarl Saul-wenh-rnem akngerr atwew! Ngap atyetyart-anem arrernelhew ikwewetwy! INGKARTelap arrernew alerengkw ngkwenh Absalom-anem, atyetyart aneyew ngkweg-wety! Ngan ahelengkwarl, nga ament-antey irrwernelhew!"

<sup>9</sup> Artwa atyetyart ahawarr anyent itnan Abishai, Zeruiah-wenh ampiwk, ra angkew, "Atyetyart, artwa apmwa nthakenh alakenh ngkweg-warl angkey-angenh! Ayenh tyarlewa, akapwert atha amentewarl ileyew!" Zeruiah ra David-wenh angkerikkwarl, rap ampiwk atherri atnyenew, Joab-then Abishai-atherri.

<sup>10</sup> David-an awayen-heng-atherrew angkew, "Mentyaw! Mpwelan arlarl! INGKART ranter apek ilew renh, ayenh arrarletyel ilteyew alakenh. Nthakenh ingwerentyel artwereley-anghen renh." ...

#### *Absalom-rnem aremerreyel Jerusalem-itwew*

<sup>15</sup> Arita ikwerel-antey Absalom, alerikw David-wenh, ikweren-hrnem-then Israel-wenh-rnem-then aremerrew apmer Jerusalem-itwew. Ahithophel-an, artwa anper arey-angker weth, ra ikwer-itwel arrpemarl alhenh. <sup>16</sup> Artwa Hushai ra alhew, alerikw David-wenh rlwateyew. Hushai ra kwertengerl David-wenh-anteyarl anen, ratherrarl awank-they alhenh akely-they. Ra irrywerremel arlkew, "Atyetyart Absalom ngan mwerr! Nga atyetyart anemer intem-antey!"

<sup>17</sup> Alerikw David-wenhel tyernew, "Ilekew nga alakenh arlkeyel? Ngap alhemer David-angkwarr."

<sup>18</sup> Hushai irrywerremel angkew, "Nthakenh ayeng David-angkwarr alhey-angenh aley. Nganemarl atyetyartan. INGKARTel Israel-wenh-rnem-then ngenh rlwanew, nga atyetyart aneyew. Ayengan ngkwenh-anemarl. <sup>19</sup> Aley mwerr-angkwarr-anem. Ayeng ngkweg warrkerrem irrkaty-angkwarr, ayengarl aynewengkw warrkerreh-apeny." Alerikw David-wenh ament iterrew, "Ya inngarl ra ileyel."

<sup>20</sup> Alerikw David-wenh ra angkew artwa ingwerew-anem, artwa anper arey-angker wethew, "Kelap. Ntwanem ila anewanther, nthakenh irrem ananther?"

<sup>21</sup> Ra tyernew, "Kwey warrkenh 10 aynengkw ngkwenh-warlarl itengerrew-rnem. Rernem antengarl anerh, warl arntarn-araynteyew. Ngap ayntem ikwer-rnem-enp. Alakenhan ntwa aynengkw ngkwenh nyerrel anthem, rap ngkweg-wety arlkarerrem artewenty innga. Ingkerrelan iterl-areyenh, nganemarl atyetyart ilkwa anerl-aneyenh aleyan, warl ikweren-hitwewan. Rernemarl awem, ntwa arnkaytel mpwarem, rernem ngenh apentem innganemarl." <sup>22</sup> Warrkenh-rnemel kalikw mpwarew warl irrwerl-itwew, akngerrel areyew. Alerikw David-wenh ra aylpenhew arelh 10 ikwer-rnem-warl nyerr-weny.

<sup>23</sup> Alakenh alerikw David-wenh awelhew angka artwa anper arey-angker-wenhew, aynikwarl awelhenn-angkwarr-apeny. Ratherr iterrew, anper arey-angker rarl angka Akngey-wenh iley-angker anen, Akngey angkerl-anenty-arrpantey. Ratherran apmelerrel-ayeth ayernenh, ikwer awelhemel.

## 17

<sup>1</sup> Artwa anper arey-angker weth, Ahithophel, ra angkew arrpemarl alerikw David-wenh Absalom-ew, "Alerl atha rlwaney ahawarr-rnem 12,000, aynengkw renh alwerneyew rlengk ingwel. <sup>2</sup> Aleyan ra arlka apmwanem alhengkerr-then. Rap apateyelpeyeh, ayengarl ikwer arwapeny aremerreyelpeyeh, antwerrkeyew. Ikweren-hrnem mentyarl anterrey. Renhantap atha ipmew-antey atweyenh. <sup>3</sup> Ingwer-rneman atha arlweleyenh, akngey-alpeyeh nhenh-warl. Rernemarl areyn, atyetyart ikwer-rnem-wenh ipma, rernemap inkwerelhemel mwerr-antey antelhenhey-alpeyeh."

<sup>4</sup> Alerikw David-wenh artwamp Israel-wenh-rnem-then rernem angkerrew, "Ya, alakenhan mwerrarl."

#### *Hushai-el irrywerl-amperneyel alerikw David-wenh Absalom*

<sup>5</sup> Alerikw David-wenh angkew-anem, "Kel. Kwertengerl Hushai weth, iley renh-anem, apetyeyew anewanther-warl. Angka ikweren-hew-tangkwal ananther awelheyew."

<sup>6</sup> Hushai rarl apetyew, alerikw David-wenhel renh ilew, artwa anper arey-angkerarl angkew-angkwarr. Rap ayernew, "Nthakenh ngan iterreyel, Hushai? Angka artwa anper arey-angker-wenhew ananther awelhem? Arrangkw apek? Nthakenharlap ananther irrem?"

<sup>7</sup> Hushai-elan irrywerremel tyernew, "Artwa anper arey-angker yanhan arrayaryl angkem. Aleyanap arrangkwarl. Angka yanhan apmwarl, rarl ngwamp ilew.

<sup>8</sup> Ntwa aynengkw ngkwenh iterl-areyelarl, ran ahawarr rlterrkarl. Artwa ahawarr ikwerenhr-nem rlterrk arrpemarl, atnwenth ahelengkw-rnem-apeny. Ran tyak innga, ar lengarl ayntey-alhem arntarnt-arelhemel ahawarr-rnem-wetyan. <sup>9</sup> Apwert intey-warl apek ra irryert-aylpenn, apwert-ampenyel. Nthakenh renh arey-alhey-angenh. Ra aremerremel atwewerr anenhantherrenh, ahawarr akngerr ipmew atwewerr. Anantherr mpwelhemer-tangkwell. Alakenh awenty ingwer-rnem iterrem, ‘Atyewey pwertay! David-rnemelan rerneman althenew Absalom-rnem!’ <sup>10</sup> Rernem alakenh iterrenty, rernemap atererrem. Arnkaty-rneman atererrewerr arrpemarl. Ingkerrelan iterl-areyel, aynengkw ngkwenh ikwerenhr-nem-then rlterrkarl. Nthakenh antengeley-angenh, arrangkw.

<sup>11</sup> Alakenh-wety nga irremer: ahawarr-rnem-tangkwell akarrelemer Israel-itwew apmer arpanenh-itwew, akngerr innga alperr-apeny. Ntwarrp renh-rnem yerl-akngem. <sup>12</sup> Nthakenh aynengkw irryert-aylpay-angenh anewantherrenh-wety. Anantherr renh arey-alhem, renh atwemel artewenty, rap anamerlarl ilwem. Ikwerenhr-nem ilwem arrpemarl. <sup>13</sup> Ra irryert-aylpentyan tawen anyent-itwew apek. Anantherr ingkerrenh lhelpelhelem warlan, apwert-rnem rwepel iyttar-akngemel arleng. Apmer aketh-anem aynteyelpayew. Intem anantherr alakenh irrayntem antwerrkeyew-atety.

<sup>14</sup> Alerikw David-wenhel artwamp Israel-wenh-rnemel-then rernem awew, rernemap angkerrew, “Angka arrwekelelyan artwa anper arey-angker-wenhan mwerr-wenyarl. Angka kwertengerl Hushai-wenhan mwerrarl.” INGKARTel renh-rnem arneper-arnew, alakenh iterreyew. Ra ilkelhew, rernem apentyeyew angka anyelkel-antey Hushai-wenharl, alerikw David-wenh renh irrwerneyew. INGKARTel artwerelew, rernem awewerr angka artwa anper arey-angker-wenh. ...

## 18

### *David-rnemel alerikw David-wenh-akerr antengeleyel*

<sup>1-2</sup> David-el akarrelew ahawarr ikwerenhr-nem, rap renh-rnem ilew akalkerreyew amentew-ament. Rap atyetyart ahawarr-rnem irrpety arrerneynew ikwer-rnem-akert, renh-rnem yerl-akngeyew; Joab, ayteiykw ikwerenhr Abishai, Ittai Gath-areny-anem. Rap ingkerrenh ilew, aneyew 1,000 ingweran, 1,000 ingweran, 1,000 ingweran. Rap 1,000 ikwer-rnem atyetyart ahawarr anyentel-anyent arrerne. Irrkaty-angkwarr-anem rap akalkelhew arrpemarl 100-anemarl. Rap 100 ikwer-rnem atyetyart ahawarr anyentel-anyent arrerne.

Rap angkew ingkerrew, “Mpa! Alhey-anem, atwewey anantherr renh-rnem! Ayengan alhem arrpemarl arrewantherrenh-angkwarr!”

<sup>3</sup> Ahawarr-rneman angkew, “Arrangkwarl! Nthakenh nga apetyey-angenh anewantherrenh-angkwarr! Ngan artwa ilkwarl, anantherran arrangkwarl. Ngenharl rernem alwerneyel, ipmew atwewyan. Anantherran ingkerr anterrenty, rernem alwerney-angenharl. Anantherr ingkerr ilwenty, rernem iterrem, ‘Kel mwerr menty!’ Nga ilwentyan, rernem inkwerelhem inngarl. Mwerr ngan anaynta tawen nhenh-itwew-antey anteng. Anewantherrl rlterrk irrentyan, ntwa ahawarr ingwer-rnem thwenem ingkern-they, alpemeleyew.”

<sup>4-5</sup> David-el tyernew, “Kel. Ayeng awelhem, arrantherrarl angkew-angkwarr.” Rap arlkew atayel, akngerrel aweyew, “Joab! Abishai! Ittai! Athamerrenh-arey Absalom-ew! Ran alerey atyenhan!”

Rap keytel rtneh, ahawarr-rnem intwarenh, rernemarl anperl-alhew.

<sup>6</sup> David-wenh-rnem anperlarr-alhew, Israel-wenh-rnem-anem rlwattemel artnampeny-itwew Ephraim-itwew. <sup>7-8</sup> Rernem arnerant-arey alwernerremel atwerrenh, artnitwew werrenh. David-rnemel Absalom-rnem antengelew, akngerr atwemel ipmew. Akngerr innga ingwer-rnemanap angkethakw aperrerterremel ilwernerrew artnitwew. Arlta ikwerel-antey akngerr ilwernerrew, 20,000 innga.

<sup>9</sup> Rernemarl werreheng-arey, alerikw David-wenh ra alhenh tangkey-akert. Rap aynikw-wenh-rnem-anem rlwateyelpew, rap anterreyew-anem arrkernelhew. Tangkeyan anterrew arwerl ilkewarl arraty-antey kweneng-apert. Arwerl iylpeylatherrel renh itethey antwerrkey-ayntew, rap aynterrarrerrey-alhew, tangkeyan anper-anteyarl anterrew.

<sup>10</sup> Artwa anyentel aynikw-wenhel renh arey-alhew, rap alhew Joab-warl. “Ngwamp innga atha alerikw David-wenh arerl-alhew, arwerl-itwewarl aynterrarrerrenh!”

<sup>11</sup> Joab angkew ikwer apatemel, “Innga ntwarl arew? Ntwap renh anamerl-antey atwemer ipmew! Athan ngenh apwert akngerr anthem atyetyart ahawarr-wenh pilt-then!”

<sup>12</sup> Artwa ran tyernew, “Nthakenh atha alakenh iley-angenh! Ya, ntwa rleng apwert akngerr anthem ayenh. Athanap renh ipmew atwney-angenharl atyetyart-wenh alerikwan, arrangkw! Anantherr ingkerrel awew, rarl Ittai-then mpwelenh ilanthenh alakenh: ‘Absalom-ew amperrngerrenh-arey! Alerey atyenh-anteyarl ran!’ <sup>13</sup> Atha apek renh ipmew atwem, aynikw ikwerenhel anamerl-antey awem. Ran ingkerr iterl-areyel, rap ayenh-anemarl atwewerr ipmew. Ntwa apekan ayenh alpemeley-angenh, alakenh angkemel, ‘Ayengan arlarl! Ayengan ingwerarl!’”

<sup>14</sup> Joab angkew, “Nthakenh ayeng mpwelhey-angenh ngkweng intem!” Rap irtyart irrpety inerl-alhew, alhew-anem alerikw David-wenh-warl, arwerlelarl ra aynterrarrerrenh-warl. Rap arnelty-antey atanthew, rarl iteth-antey aynterrarrerrenh arwerl-itwew. <sup>15</sup> Artwa 10 Joab-itwew antelhew, rernemap renh ipmew-antey atwew.

<sup>16</sup> Anamerl-antey Joab-el terampet angkelh-angkelhelew atayel. Alakenhan David-wenh-rnemel iterl-areyew, rernem ipmelheyelpew, Israel-wenh-rnem alwerney-angenh-anem. <sup>17</sup> Alerikw David-wenh rernem inew, iwemel renh irrka intwer-warl ampep-warl artnewarl. Apwert-rnem-anem rernem arrernew irrwerleng. Ikwerel-antey Israel-wenh-rnem arlperry anterreynew angkep apmer ikwer-rnem-wenh-warl.

...

<sup>31</sup> [Ikwer-theyan Joab-el artwa anyent thwenew, angkep anterreyneyew David-warl angkakert.] Rap angkey-alhew, “Atyetyartay! Angka mwerr-angker awa! INGKARTel atwew artewenty innga ingwer weth-rnem, ngkweng-wetyarl arlkarerrenh-rnem!”

<sup>32</sup> David-el ayernew, “Alerey-alew atyenh Absalom? Mwerr-anteyang ra?”

Artwa ra tyernew, “Irrwerney-angker weth-rnem, ngenharl alhengkerr anthenh, rernem ingkerrarl ilwemer artwa akely rapeny!”

<sup>33</sup> David arlka apmwerreyelpew. Rap aylpenhew kwen-anem, keytelarl rtneh-penh, artnemel artewenty. Rarl alpenhel, ra arlkenty iweynenh, “Alerey atyenh Absalom! Ayengarl ilwemeran. Ngan alerey atyenharl!” ...

## Matthew Matthew-el ingkwernek pip-warl Angka Akngey-kenh

*Matthew-el angka ingkwernek, arrwekelely-kenh angka ayntenharl, rarl awek-penh, in-  
gkerrenhel Jesus renh iterl-aretyek, Akngey-kenh inngarl, rernem ingkerrenh itethirretyek  
ikweren-angkwar; ikweren-angkwar apentetyek. Angka arrwekelely Akngey-kenh  
ayntenharl, ra innganem irrek. Jew-rnem-tangkwel rernem itethirrek Jesus-wenyankel.  
Akngey ilkelheyel ahern-areny ingkerrenhek, renh-rnem itethiletyek. Alakenh-anyem ra  
Jesus renh thwenek ahern nhenh-warl, ingkerrenh itethiletyek.*

### *Jesus Christ-kenh*

*(Luke 3:23-38)*

- 1 Arrwekelely Abraham anenh. Abraham-they Jesus-kenh-rnem anenh arrpemarl, atyetyart David-ek-atwety. Nhenh-rnem Jesus Christ-kenh.
- 2 Abraham Isaac-kenh aynikw anenh. Isaac Jacob-kenh aynikw anenh. Jacob Judah-kenh aynikw anenh, alerikw ingwer-rnem-then Jacob-kenh.
- 3 Judah Perez-kenh Zerah-kenh aynikw, Amikw ikwer-atherrenh Tamar. Perez Hezron-kenh aynikw, Hezron Ram-kenh aynikw.
- 4 Ram Amminadab-kenh aynikw, Amminadab Nahshon-kenh aynikw. Nahshon aynikw Salmon-kenh.
- 5 Salmon aynikw Boaz-kenh. Amikw ikweren Rahab. Boaz aynikw Obed-kenh. Amikw ikweren Ruth. Obed Jesse-kenh aynikw.
- 6 Jesse Atyetyart David-kenh aynikw. David aynikw Solomon-kenh, amikw ikweren artwa Uriah-itwek arrwekel itengirrek.
- 7 Solomon Rehoboam-kenh aynikw, Rehoboam Abijah-kenh aynikw, Abijah, Asa-kenh aynikw.
- 8 Asa Jehoshaphat-kenh aynikw, Jehoshaphat Joram-kenh aynikw, Joram, Uzziah-kenh aynikw.
- 9 Uzziah Jotham-kenh aynikw anenh. Jotham Ahaz-kenh aynikw anenh. Ahaz Hezekiah-kenh aynikw anenh.
- 10 Hezekiah Manasseh-kenh aynikw anenh. Manasseh Amon-kenh aynikw anenh. Amon Josiah-kenh aynikw anenh.
- 11 Josiah Jeconiah-kenh aynikw anenh, Jeconiah-kenh aytewikw-rnem-then. Rernem iteth anenharl-antey, ahelengkw-rnemel Israel-kenh-rnem apmer Babylon-warl atnwenheynek-kety.
- 12 Israel-kenh-rnem apmer Babylon-they alpek. Shealtiel aynikw ikweren Jeconiah. Shealtiel Zerubbabel-kenh aynikw anenh.
- 13 Zerubbabel Abiud-kenh aynikw anenh. Abiud Eliakim-kenh aynikw anenh. Eliakim Azor-kenh aynikw anenh.
- 14 Azor Zadok-kenh aynikw anenh. Zadok Akim-kenh aynikw anenh. Akim Eliud-kenh aynikw anenh.
- 15 Eliud Eleazar-kenh aynikw anenh. Eleazar Matthan-kenh aynikw anenh. Matthan Jacob-kenh aynikw anenh.
- 16 Jacob Joseph-kenh aynikw, Joseph Mary-kenh anewikw, Mary rey-antey Jesus renh ampa akely atnyenek. Renhey-antey itneweyel Christ-an.
- 17 Abraham-they David-ek-atwety, 14 anenhek. Atyetyart David-they 14-ek-atwety arrpemarl anenhel Babylonia-el anenh-rnemek-atwety. Babylonia-el anenh-penh 14-ek-atwety anenhek Christ-ek-atwety.

### *Mary-el Jesus renh atnyeneyel*

*(Luke 2:1-7)*

- 18 Mary Joseph-itwek itengirrey-angenh-antey, amperr-arenyel-antey. Mary ra Joseph alhelekarl anenh. Joseph ra arrwekelely Atyetyart David-kenh arrpemarl, arleng-alenty ikweren-rnem anenhey-alpek. Itnweng Rlwartel Mary renh ampa akely anthek.
- 19 Joseph ra artwa arraty anenh. Ra iterrehn ipmelhetyek, artwa ingwer-akert-arrpantey.
- 20 Ra altyerr arek-anem. Ingkart-kenh angel-el renh ilek, "Joseph-ay, alerikw David-kenh, Itnweng Rlwartel ampa akely Mary anthek. Mary renh anew ngkweng inay, itengirretyek.
- 21 Alerl ampa ra atnyeneyeh. Renh itnewa Jesus. Itna alakenh-anyem aynteyel ingkerrenh itethileyeh apmwekety."
- 22 Ingkart ra arrwekel ilek-angkwar-antey, innganem ra alakenh ayntek, angkakert arrwekelely arrwekel ilek-angkwar-antey, rap innganem ayntekan.
- 23 "Aleyak ra

ampa akely atnyeneyenh. Renh itneweyel Immanuel. Itnan alakenh-anyem aynteyel. Akngey anwekantherr-itwek anem."

<sup>24</sup> Joseph ra akemirrek, ratherr itengirrek-anem, angel-el renh ilek-angkwarr-antey.

<sup>25</sup> Ratherr iteng ayntey-angen, awey ra aney-alentyan. Mary-el Jesus renh atnyenek-anem. Joseph-el awey renh itnewek Jesus.

## 2

### *Artwernem apetyeyel akngerrakw-they*

<sup>1</sup> Herod atyetyart anen-hantey arrwekelan Jesus atnyenek apmer Bethlehem-itwek, ahern Judea-ampeny-itwek. Artwa rernem ayerrer-they apetyek apmer Jerusalem-warl. Antyarrantarl artwel-rnem iterl-arenh apmer nthek-angkwarr ra born-irrek. Antyarr aremirrek ikwer-rnem-warl. Antyarrel ikwer-rnem-warl iyiparrernek, antyarr-angkwarrant rernem iterl-arek, antyarr renh apentyek, rarl ikwer-rnem iyiparrerne-man, rarl ikwerel born-irrekan. <sup>2</sup> Rernem ayernek, "Nthenh ampa akely ra, Jew-rnem-kenh atyetyart ilkwa? Anwantherr antyarr ikweren-harenhey-alpenh, renharl antyarrel iyiparrernek. Anwantherr antyarr renh aremel apenteck. Anwantherr apetyek, ikwer inkwerelhemel."

<sup>3</sup> Atyetyart Herod ra angka awek, rap arkarirrek atyetyart ingwer Jew-rnem-kenh-kyet. Jerusalem-areny ingwer-rnem arkarirrek arrpemarl. Rernem aterirrenh atyetyart Herod-kety, ahelengkw-rnem ilanthekek, renh-rnem atwetyek. <sup>4</sup> Herod-el-anem tyaty-areny atyetyart ilkwernem-then akarrilek, artwa Moses-kenh angka akalty-anthey-angker-rnem-then, renh-rnem ayernek, "Nthenharlap ran, artwa itethiley-angker nheng aynteyel. Nthenh-itwek ra aremirreyenhan, pip arrwekeleny Akngey-kenhel aynteyel-angkwarr-antey?"

<sup>5</sup> Rernem renh ilek, "Bethlehem-itwek, ahern Judea-ampeny-itwek, angkakert arrwekeleny angkarl arrwekel ingkwernek-angkwarr-antey, ra irrkngarl ayntek.

<sup>6</sup> Akngey-kenh pip arrwekeleny alakenh aynteyel: "Judea-ampenyl Bethlehem-areny-rnem rernem atyetyart ilkwakert-anem aneyenh. Bethlehem-areny anyent ra atyetyart Israel-kenh-rnem arntarnt-areyenh."

<sup>7</sup> Herod artwa tyak-rnemek anyelkel yangkelhek, renh-rnem ayernek, "Ilenger arran-therr antyarr arek?" <sup>8</sup> Ra renh-rnem ilanthek, "Bethlehem-warl alhenherr-arey, ampa ikwer nthwetyek. Arrantherr arenty-penh, arrantherr atyeng-warl apey-alpenherr-arey, ayenh-anem iletyek. Ayengan ikwer-warl alhetyek arrpemarl, ikwer inkwerelhetyek arrpemarl."

<sup>9-10</sup> Artwa tyak-rnem Herod ikwer awelhek. Rernem antyarr wethey areyenh arrpemarl, awankarl rernem arek ayerrer. Rernem antyarr renh arek-penh, rernem ikwer artewentyel inkwerelhek innga. Ra ikwer-rnem iyiparrernek. Antyarr ra ampa akely ayntenh-itwek-anem arlanirrek.

<sup>11</sup> Artwernem warl kwen-warl aylpenhek, amenheng-atherr arey-alhek. Rernem kweniirey-alhek ampwethel alernenhemel. Rernem ikwer anthek ilek-ilek, apwert gold-then apernelhey-angker mwerr-angker inteyel-rnem-then.

<sup>12</sup> Ikwer-penhan rernem altyerr arek. Rernem angkarl awek-penh, rernem ilek, "Arrantherr iwerr ingwer-angkwarr alpenherr-arey atyetyart Herod-kety." Rernem iwerr ingwerel-anem ikwerety alpek.

### *Rernem aterel anterreyel apmer Egypt-warl*

<sup>13</sup> Artwa tyak rernem alpek-penh, Ingkart-kenh angel Joseph ikwer aremirrek, Ra renh ilek, "Akemirra, ampa akely-then amikw-then akngeyna Egypt-warl. Herod-arl ikwer nthweyel-kety, renh atwetyek. Arrantherr ikwer-itwel anem, atha arrenhantherr iletyek-atwety."

<sup>14</sup> Ingwa ikwerel-antey Joseph-el anew ikweren-h-then ampa akely-then Egypt-warl akngeynek. <sup>15</sup> Rernem-anem aney-alpek. Herod ra ilwekarl-kety, Akngeyel renh-rnem ilanthek, rernem angkep alpetyek, Israel-warl. Akngey-kenh angka alakenh aynteck, angkakert arrwekeleny ingkwernek-angkwarr-antey, "Atha alerey atyenh renh atwenhek, Egypt-they." Angka arrwekeleny innganem ayntek.

### *Ahelengkwel-rnem ampa akely-rnem ipmek atwetyel*

<sup>16</sup> Herod ra iterl-arek-anem, artwa tyak arleng-areny rernemarl renh irrtywerl-ampernek, ra ahelirrek-anem. Ra ahelengkw-rnem thweneck, awey akely-rnem atwetyek. Avey aherrety atherrek-atwety anen-h-rnem, ra ingkerrenh atwetyek, artwa tyak-rnem awek-penh, arlta ilengerarl Mary-el Jesus renh atnyenek, rernemarl antyarr arek-penh-angkwarr.

<sup>17</sup> Angka innganem ayntek. Angkakert arrwekeleny Jeremiah ra arrwekel ilenh-angkwarr-antey, <sup>18</sup> “Apmer Ramah-itwek rernem artewentyel artnalhelirreyen. Israelen-kenh-rnem artneyen ampa ikweren-hrnemek, arternpirrey-angen, rernemarl ingker-renh ilwem.”

### *Rernem alpeyel Egypt-they*

<sup>19</sup> Atyetyart Herod ra ilwek-penh, Ingkart-kenh angel ra altyerr-angkwarr aremirrek, Joseph ra Egypt-itwek anenharl-warl. <sup>20</sup> Angel angkek, “Akemirra, ampa akely-then amikw-then akngeyna apmer Israel-warl. Ahelengkw ingkerrenh kel ilwekarl-kety.”

<sup>21</sup> Joseph ranem akemirrek, amenheng-atherr akngeynek apmer Israel-warl. <sup>22</sup> Herod-kenh alerikw Archelaus ranem atyetyart ahern Judea-ampeny-itwek aneh. Joseph ranem awek-penh, ranem aterirrek. Ra altyerr arek, Ingkartelar renh ilanthek, ra Galilee-warl alpetyek. <sup>23</sup> Rernem Nazareth tawen-itwek aney-alpek. Akngey-kenh angkakert arrwekeleny-rnemel ingkernek, “Renh-anem itneweyn ‘Nazareth-areny,’” Angka arraty innganem ayntek.

## 3

### *John-el ingwer-rnem akalty-antheyel*

(Mark 1:3-8; Luke 3:1-18; John 1:19-28)

<sup>1</sup> Ingwer-inger, John Baptise-emeley-angker ra ingwer-rnem akalty-antherl-apen hahern Judea-itwek, apmer arlpaw-itwek. <sup>2</sup> “Angkepirrenherr-arey apmwekety Akngey-warl, arlta Atyetyart ikweren arrerirreyelar-kety, ingkerrenhel anwantherr Akngey renhant-anem apentetylek.”

<sup>3</sup> John rey-antey arkeyel angkakert, Angkakert Isaiah-kenh pip arrwekel aynteyel: “Angkakert ra arkeyel apmer arlpawel. Iwerr arraty-angkwarrant ingkerrenhel apenterl-ayntetylek!”

<sup>4</sup> Arnkwan ikweren alta kamwerl-penh, pilt yenp-penh arertnelhenh. Ra intely-rnem arlkwenh, ngkwarl arwengalker-then.

<sup>5</sup> Ingkerrenh apmer Jordan-ampeny-they John-warl akarirrek apmer Judea-areny-rnem-then, Jerusalem-areny-rnem-then. <sup>6</sup> Rernem ilelhek John-ek, rernemarl apmwak-ert aneh. John-el renh-rnem baptise-emelek Jordan ilpayek.

<sup>7</sup> Pharisee-rnem-then Sadducee-rnem-then John ikwer-warl apetyek arrpemarl, renh-rnem baptise-emeletylek. John-el renh-rnem ilek, “Arrantherr apmwangkwarrant apentetylek. Kel ingwerentiel arrenhantherr ilek, arrantherr apmwekety angkepirretyek-arrantieky Akgney-warl! Akgney arrekantherr ahelirreyel-antey. <sup>8</sup> Arrantherr innga angkepirretyek apmwekety, ingkerrenhel arrenhantherr aretyek. <sup>9</sup> Arrantherr Abraham-kenh-rnem trakelhey-angen anetyek. Akgney ilkelheyel ingwerek-ingwer ikweren-hrnem anetyek. Akgneyel Abraham renh arntarn-arenh, rarl ikwer awelhenh. Ikwer awelheyel-rnem rernem ikweren-hrnem innga aneyel. Akgney ra ampa akngerram-akngerrilem, rernem arraty-angkwarr apenterl-ayntetylek. Ran ilek-ilek mpwarem, artwernem apwert-penh mpwarey-angker. <sup>10</sup> Artwa apmwernem arwerl apmwarl arternemel, rwewarl iweg-apeny. Alakenh-apeny arrenhantherr iwekerr, arrantherr arraty-angkwarr apentey-angen-then.”

<sup>11</sup> “Atha arrwekel arrenhantherr kwaytelant baptise-emelem, arrantherr apmwekety ipmelhetyek. Artwa ingweran atyeng-they rlterrk inngan apetyem, ingkern-theyarl. Ayeng rlterrk-wenyarl, warrkenh apmwamwamarl, ran Atyetyart inngarl. Ra Itnweng Rlwart arrerney-angker. <sup>12</sup> Alakenh-anyem arlta ingkernel Akgneyel apmwangkwarrarl ahelyel-rnem ingkerr-antey rwewarl iweyenh, irrarkemel ampetyek, atherrk ilpatileyel-apeny.”

### *John-el Jesus renh baptise-emeleyel*

(Mark 1:9-11; Luke 3:21-22; John 1:31-34)

<sup>13</sup> Jesus Galilee-they anperl-alhek Jordan lher-warl, John-el renh baptise-emeletylek.

<sup>14</sup> John arrngert angkek, “Ilekek ngan atyeng-warl apetyek? Ntwa ayenh baptise-emeley-areny!”

<sup>15</sup> Jesus-el renh ilek, “Kel aleyan alakenh aynteyel: arraty-angkwarr-antey marenyle-arreh, Akngey-kenh angka aynteyel-angkwarr-antey.” John-anem ikwer awelhek.

<sup>16</sup> John-el Jesus renh baptise-emelek-anem. Kwaty-they tyerrelhenhey-alpek-anem kwenpay-anem amentant atherrirrekarl ra arek. Itnweng Rlwart ikwer-warl apetyek irrwerl-they, thip pwelker-apeny. <sup>17</sup> Ingkerrenhel awek alker irrwerl-theyarl angkek, “Nhanyem alerey atyenh, ayangan ikwer inkwerelheyel.”

**4**

*Arrentyel Jesus renh arrkerneyel  
(Mark 1:12-13; Luke 4:1-13)*

<sup>1</sup> Itnwengel-anem Jesus renh atnwenhek apmer arlpaw-ampeny-warl, arrentyel renh arrkerneyek. <sup>2</sup> Jesus ra amern arlkwey-angenh anenh, arla 40-ek-atwety, angayakw. <sup>3</sup> Arrenty ra ikwer-warl apetyek, angkemel, “Akngay-kenh alerikw apek nga. Apwert nher nem akngartewa, amern irretyek, Akngay-kenh rlterr-akertel.”

<sup>4</sup> Jesus-el renh tyernek, “Akngay-kenh pipel aynteyel: ‘Ingwerenty nthakenh amer-nelant itethirrey-angenh. Rernem angka Akngay-kenh-angkwarrant itethirretyek.’”

<sup>5</sup> Arrentyel Jesus renh atnwenhek Jerusalem-warl, tern ilkewar. Akngay-kenh apmer aknganen-twarl. Arrentyel Jesus renh tyaty ilkwa Jew-kenh irrwerl-warl atnwenhek, warl irrwerl-itwet rnkernek. <sup>6</sup> Arrentyel renh ilek, “Akngay-kenh alerikw apekap ngan? Kel irrwerl-they nhenh atnarnpa. Nthakenh nga atwelhey-angenh. Akngay-kenh pipel alakenh aynteyel: ‘Akngayel angel-rnem thwenem, ngenh anterrk-wetyek, atwelheker.’”

<sup>7</sup> Jesus-el renh tyernek, “Akngay-kenh pipel alakenh aynteyel: ‘Nthakenh Ingkart Akngay arrkerney-angenh rlterrkek, rlterr ilkwangkwarr.’”

<sup>8</sup> Ikwer-penh Arrentyel Jesus renh atnwenhek apwert irrwerl inngewarl-anem. Arrenty-anem ikwer lwewarrernek apmer ingkerr tern ilkternem, apmer ilek-ilek-akert, mwerr-angker-akert. <sup>9</sup> Arrentyel renh ilek, “Nga atyeng awelhemel kwenirrenty,atha ingkerrenh ngenh anthem.”

<sup>10</sup> Jesus-el renh tyernek, “Arrenty, atyengety alhay! Akngay-kenh pipel aynteyel: ‘Akngay anyent ikwerant awelhetyek, Ingkart Akngay renhant apenterl-ayntetyek.’”

<sup>11</sup> Arrentyel Jesus renh iwerl-alhek-anem. Angel irrwerl-areny ikwer-warl apetyek, renh arntarnt-aretyek.

*Jesus-el renh-rnem akalty-antheyel  
(Mark 1:14-15; Luke 4:14-15)*

<sup>12</sup> Artwa ahelengkw-rnemel John tyayl-warl akwernek. Jesus-el angka awek-penh, ra apmer Galilee-warl alhek. <sup>13</sup> Ra Nazareth-itwet aney-angenh, ra anper-antey alhek Capernaum tawen-warl, ikwer-itwet aney-alhek, apmer Zebulun-itwet, Napthali-itwet. <sup>14</sup> Akngayel angka arrwekel arrernek-angkwarr-antey, kel arraty-anem ayntek, angkakert Isaiah-el ilenh-angkwarr-antey. <sup>15</sup> “Awelhennherr-arey, Zebulun-areny-rnem-then, Napthali-areny-rnem-then, Jordan-they intwarr-ampeny, Galilee ahern artwa alethang-angketyarr. <sup>16</sup> Arrantherr apatemel aneyel, ingwemerntel aneyel-ampeny, Ingkart iterl-arey-angenh. Arrekantherr arrer-anem ilwetyekan. Lyenentyel arrekantherr arrtyerneyen, arrantherr iwerr arraty-angkwarr apentetyek.”

**Anayntileyl:** *Lyenentyel arrtyerneyen, iwerr arraty apentetyek. Alakenh-anyem Jesus lyenenty-ampeny anwekantherr aneyel, anwantherr arraty apenterl-ayntetyek.*

<sup>17</sup> Jesus ranem renh-rnem akalty-anthenh, “Angkepirrenherr-arey apmwekety Akngay-warl-athet! Arla ikweren arrer-anem ra Ingkart ingkerrenhek anetyek.”

*Jesus-el kwertengerl 4-pel rlwaneyel  
(Mark 1:16-20; Luke 5:1-11; John 1:35-42)*

<sup>18</sup> Jesus alhenh Galilee kwaty alay impalh-angkwarr. Ra awayenheng-atherr arek. Anyent Simon itnan ingweran Peter, ingweran Andrew-arl. Netting ratherr kwaty-warl iwenh, irrpeng anterrkwetyek. <sup>19</sup> Jesus-an angkek ikwer-atherr, “Apetyenherr-atherr atyeng-angkwarr, atha mpwelenh akalty-anthetyek, mpwel ingwer-rnem akalty-anthetyek Akngay-kenh angkek, rernem-anem apentetyek arrpemarl, irrpeng mentyar!” <sup>20</sup> Ratherr ikwer-angkwarr antelher-alhek netting iwerl-alhemel.

<sup>21</sup> Jesus ra alhenharl-antey, ra James-then John-then arek, Zebedee-kenh alerikw-atherr. Ratherr rtnwa kwen-itwet, aynikw-itwet netting mpwarenh. Jesus-el renh-atherr ayernek arrpemarl, “Atyeng-angkwarr apetyenherr-atherr!” <sup>22</sup> Ratherr rtnwa renh iwerl-alhek, aynikw-then-antey, Jesus-angkwarr antelher-alhek.

*Jesus-el akngerr akalty-antheyel, arntety-rnem-then mwerrileyel  
(Luke 6:17-19)*

<sup>23</sup> Jesus ran ahern ingkerrenh-angkwarr alhenh Galilee-ampeny. Jew-rnem akalty-anthenh, Jew-kenh tyaty akely-rnem-itwet, angka mwerr-angker ilerl-arenh. Akngay rant atyetyart ingkerrenhek aneyel. Ranem arntety-rnem mwerrilerl-arenh. <sup>24</sup> Rernem ahern Syria-ampenyel angka awek. Rernem arntety ilek-ilek-akert-rnem ikwer-warl

akngetyek, arrenty-akert-rnem-then, arwengkw-rnem-then, nthakenh alhey-angenh-rnem-then. Jesus-el renh-rnem ingkerrenh mwerrilek.

<sup>25</sup> Galilee-ampeny akngerr arnngerrl arek-penh, ra apwert irrwerl-warl alhek kwertengerl ikwerenhrnem-akert. <sup>2</sup> Rnem renh-rnem akalty-anthek.

## 5

### *Akngeyel renh-rnem arntarnt-areyel*

(Luke 6:20-23)

<sup>1</sup> Jesus-el akngerrarl arek-penh, ra apwert irrwerl-warl alhek kwertengerl ikwerenhrnem-akert. <sup>2</sup> Rnem renh-rnem akalty-anthek.

<sup>3</sup> “Rernemarl ikwer-warl angkepirretyek arrkernelheyel, Akngeyel renh-rnem arntarnt-arem. Rernem Akngey-kenh-rnem ingkerrenh anem.

<sup>4</sup> Rernemarl amperrngirreyel, Akngeyel renh-rnem arntarnt-arem, arternpilemel.

<sup>5</sup> Rernem iterl-arelheyel rernemarl ahern-areny-rnem arwa aneyel, rernem ahern-areny ingkerrenhek atyetyart aneyeh.

<sup>6</sup> Akngeyel ingwer-rnem arntarnt-arem arrpemarl, rernemarl ikwer arraty-angkwarr awelheyel, arratyirretyek ikwerenhr-angkwarr. Akngeyel ikwer-rnem iwerr mpwarem, itnweng mwerr-angker anthemel.

<sup>7</sup> Ingwer-rnem mwarrant-arey arntarnt-arerreyel, Akngeyel renh-rnem arntarnt-areyel ingkerrenh-anteyarl arrpemarl.

<sup>8</sup> Arraty-angkwarr aneyel-rnem, Akngey ikwer-rnem inkwerelhem.

<sup>9</sup> Aylperrepwenty atyetyart ilkewernem aheketyarl arrkngert angkeyel-rnem, Akngeyel renh-rnem alerey antweyel.

<sup>10</sup> Rernem arraty-angkwarr alhetyek arrkernelheyel. Ingwer-rnemel renh-rnem irrwerneyelar, Akngeyel renh-rnem arntarnt-arem arrpemarl.

<sup>11</sup> Arrantherr atyeng-angkwarr alhetyek arrkernelheyel-rnem, ingwer-rnemel arrenhantherr irrwerneyelar, Akngeyel arrenhantherr arntarnt-areyel arrpemarl.

<sup>12</sup> Irrkngerney anaynta! Akngeyel ngenh atyeny-aynteman, apmer aknganenty-itwek. Awank-akerrarl ingwerel-rnem Akngey-kenh angkakert-rnem irrwernek-apeny, aleyarl aynteyel arrpemarl.

### *Angka thalt-akert, angka lyenenty-akert*

(Mark 9:49-50; Luke 14:34-35)

<sup>13</sup> “Aker-warl thalt arrernem. Thalt-penh nthakenh apmwirrey-angenh, intengirrey-angenh, arleng-alenty mwerr aynem. Thalt-weny aker anamerl intengirrem, ik-weweny. Alakenh-anyem Akngey-kenh angka aynteyel. Akngey-kenh angkekety amentirrenty, rap aleth-antey apmwirreman, Akngey-kenh-angkwarr apentey-angenh. Ikwer-angkwarr akaltyirrenty, rernem arleng-alenty mwerr aneman.

<sup>14</sup> Lyenentyel arrtyernem-apeny, iwerr aketh arem. Ahern-areny ingkerrenhel arrenhantherr aketh-antey arem arrpemarl, nthenh-angkwarr alheman. Warl-rnem apwert irrwerl-itwek artelhenharl. Ingwer-rnemel aynayt arem arleng-they. Ingwer-rnemel arrenhantherr aynayt arem arrpemarl, rernem arraty-angkwarr apenteyelan. <sup>15</sup> Lherrm amputy, nthakenh ntwa tyampet-warl akwerney-angenh. Renh aketh-akem arrermetyek irrwerl-warl, ingkerrenhel aynayt aretyek. <sup>16</sup> Arrantherr arraty-angkwarr apententy, ingwer-rnemel arrenhantherr aketh arem arrpemarl, rernem Akngey-kenh-angkwarrant apentem arrpemarl, ikwer inkwerelhemel.”

### *Moses-kenh angkakert*

<sup>17</sup> “Angka Moses-kenh aynteyel, angka arrwekeleny angkakert-rnemel pip-warl ingkwernerl aynteyel arrpemarl. Atyeng arrantherr iterreyel, ayeng angka ingwer-akert apetyentyek-athen, angka Moses-kenh arrwekelenyek iyelpirrentyek-athen. Angka nthakenh iparelhey-angenh. Ayengan apetyek atha Akngey-kenh angka irrkaty renhey-antey arrekantherr iletyek, angka Akngey-kenh arlperrityleyek, ywerreyek-awety. <sup>18</sup> Arraty innga atha arrenhantherr ileyel. Angka Akngey-kenh ywerrey-angenh, ahern-then alker-then ywerrey-alenty. <sup>19</sup> Angka Moses-kenh arrwekeleny-kety amentirrenty, ingwer-rnem apmwel-aretharl akalty-anthenty, arrantherr apmwelhileyl Akngey-kenh-angkwarr. Angka Akngey-kenh arraty apententy, ingwer-rnem arraty akalty-anthenty, arrantherr Akngey-angkwarr mwerrarl aneyeh. <sup>20</sup> Pharisee-kenh-rnem, artwa ilkwa Moses-kenh-rnem rernem apmwangkwarr apenteyel. Arrantherr arraty-angkwarr apenterl-ayntetyek. Arrangkwelan, angka Pharisee-kenh Moses-kenh apententy, arrantherr Akngey-kenh apmer-warl aylpey-angenh.”

### *Ahel iltenty-akert*

<sup>21</sup> “Moses-kenh angka arrwekeleny angka alakenh aynten, ‘Ra ingwer ipmek attwenty, renh angkep atweyen arrpemarl.’ <sup>22</sup> Athan arrenhantherr ileyl, ‘Ingwerentyel apek iltenty, arlta ingkernel Akngeyel renh ayerneyen arrpemarl. Arrantherr ingwer-rnem apmwa anttwenty, rwa aknganenty arrwekel ikwer mpwelheyel arlta ingkernel.’

<sup>23-24</sup> Ngethen ingwerenty-then ahel mpwelanth ilterrekarl-penh, nga ikwer-warl alhetyek-tangkwel, sorry antwelhetyek, tyaty-warl aylpey-angenh, Akngey renh tyenkerr anthey-alenty. Ahenp-antey alhey-angenh. Ikwer-penh-anem ntwa Akngey renh tyenkerr anthey-alpem-anem, mwarrant-atherr anetyek. Alakenh-anyem Akngey-angkwarran mwarrant-arey anetyek.

<sup>25</sup> Arrkent arwa ilterrey-angenh. Angketangkwel arratyilerrey mwerr-angkwarr, ra ngenh court-warl akngekern, court-arenyle ngenh tyayl-warl akwernekerr. <sup>26</sup> Fine ilkwa ntwa payemeley-angenh, nthakenh nga tyerrelhey-angenh.”

### *Anew inetyek*

<sup>27</sup> “Akngey-kenh angka alakenh aynteyel: ‘Ingwer-kenh anewikw nthakenh ikngwey-angenh.’ <sup>28</sup> Athan arrenhantherr arraty ileyl, angka awerr innga. Nga arelh ingwerek ahenty anenty ikngwetyek-arrpantey, ngap apmwangkwarr iterreyelan. <sup>29</sup> Ntwa apek apmwangkwarr mpwareyel anngel. Ntwa apek annga atherr-akert apmwangkwarr mpwareyel-kety, mwerr ntwa annga anyent tyerrelhemel iwetyek, ngap Akngey-kenh apmer-warl aylpeman, annga anyent-akert. <sup>30</sup> Ntwa apek apmwangkwarr mpwareyel itepel. Ntwa apek itep atherr-akert apmwangkwarr mpwareyel-kety, mwerr ntwa itep anyent akelhem iwemer, mwerr-angkwarr Akngey-kenh apmer-warl aylpetyek.”

**Anayntileyl:** *Anwantherr arwa akelhey-angenh, impen-antey. Alakenh-anyem angka anayntileyl, Ingkart ra impen inngarl, anngethen iltylethen-angkwarran. Kel Jesus-el arwa renh-rnem ilek, rernem iterretyek, rernem apmwelhileker.*

### *Ratherr iwerretyek*

<sup>31</sup> “Angka arrwekeleny alakenh aynteyel: ‘Mwerr arelh ikweren iwem. Artwa pip-warl itna inkwernelhemel, arelh ikweren pip renh anthemel, arelh ra pip renh aremel, artwa renh iwey-alentyan.’ <sup>32</sup> Athan arrenhantherr arraty ileyl, angka atyehn awerr. Arelh ra artwa ingwer-angkwarr antelhenty, kel alakenh mwerr iwemarl. Arrangkwarl, arelh ngkwenh ntwa twenty apmwel-areth, Akngey-angkwarr apmwa aynteyel.”

### *Ingkart itnewemel irrtywerremel angkey-angenh*

<sup>33</sup> “Arrwekeleny-kenh aynteyel arrpemarl, ‘Ingkart itnewemel irrtywerremel ilelhey-angenh, Ingkartel arem.’ Arraty ntwa angkayntetyek. <sup>34</sup> Angka atyehnawerr, atharl arrenhantherr ileyl. Alkenh itnewey-angenh, irrtywerremel ilelhey-angenh. <sup>35</sup> Ahern itnewey-angenh arrpemarl, ikweren arrpemarl. Jerusalem itnewey-angenh arrpemarl, apmer ilkwa atyetyart impen ikweren arrpemarl. <sup>36</sup> Irrtywerremel ilelhey-angenh, arratyant nga ilelhetyek. <sup>37</sup> Yaw apek, arrangkw apek, alakenh arraty innga nga ilelhetyek. Ingwer-angkwarr nga ilelhenty, arrenty-kenh-angkwarrarl.”

### *Angkep atwey-angenh*

(Luke 6:29-30)

<sup>38</sup> “Angka arrwekeleny aynteyel: ‘Ingwerentyel annga attwenty, ntwa renh annga angkep atweynetye arrpemarl. Ingwerel ngenh arntek renh attwenty, renh arntek atwem arrpemarl.’ <sup>39</sup> Ayengan arrekantherr-warl angkem, ngenh apek arreyl anyent-ampeny attwenty, renh angkep atwey-angenh, aleth-antey atwerrerl-anekerr. Nga menty anthelhetyek ra ngenh arreyl ingwer-angkwarr-anemarl attwenty. <sup>40</sup> Ingwerentyel kwet ngkwenhek ayernenty, ntwa kwet renh alhewer anthem arnkwa ingwer-then anthem. Akngey-kenh-angkwarr alakenh aynteyel. <sup>41</sup> Ingwerentyel ngenh ilanthenty, ikwer-angkwarr alhetyek, nga ikwer-angkwarr alha anper-antey, ikwer awelhemel. Angath-antey alhey-angenh. <sup>42</sup> Ingwerentyel ngenh amerenly ayernenty angayakwel, ntwa renh amern anthetyekan. Ampwal ilek-ilek renh anthetyek arrpemarl.”

### *Ingwer-rnem arntarnt-aretyek, ikwer-rnem amperrngirretyek*

<sup>43-44</sup> “Ingwer-rnemel ileyl, ikwer-rnem-kenh arntarnt-arayntetyek. Angka atyehnawerr, atharl arrenhantherr ileyl, alakenh aynteyel, ingkerrenh arntarnt-arayntetyek alethang-rnem-then arntarnt-arayntetyek. Ingwerentyel ngenh irrwernenty, ntwa Akngey ayernetyekan ikwer, renh arntarnt-aretyek. <sup>45</sup> Arrantherrap Akngey-kenh-rnem ingkerrenharl aneman, arrantherrap alakenh mwarrant-arey anetyek. Akngeyel ingkeny arrernek ingkerrenhek, apmwernemek-then mwerr-rnemek-then, ilek-ilek ra

anthek, kwaty anthek, amern ingkerrenh lyapelhiletyek, aker-then anteril-ayntetyek atherrenky. <sup>46</sup> Ahern-areny-kenh alakenh aynteyel, ngkwenh-rnemant arntarnt-aryntetyek apmelerreny. Apmwamwam man kapmentek iney-angker-rnem rernem arntarnt-aryntetyek arrpemarl, apmelerreny. Akngey-kenh ingwer-angkwarr aynteyel, ingkerrenh arntarnt-aryntetyek. Alakenh Akngeyel anwenhantherr angkep antheman. <sup>47</sup> Ingwer-rnem Akngey apentey-angenh-rnem rernem ikwer-rnemekant inkwerelheyel. Alakenh-apeny-weny anayntetyek mwerr-angkwarr. <sup>48</sup> Arrantherr mwerr innga anayntetyek, Akngey irrwerl-areny aneyel-apeny.”

## 6

### *Tnakelhey-angenh*

<sup>1</sup> “Mwerr-arrpantey tnakelhey-angenh, arraty-angkwarr nga anetyek, ingwer-rnemel arrenhantherr awekerr. Arrantherr tnakelhenty, Akngey irrwerl-arenyel arrenhantherr nthakenh arntarnt-arey-angenh.

<sup>2</sup> Ntwa irreporn-rnem man anthenty, ingwer-rnem akarriley-angenh, rernem ngenh aretyek. Apmwangkwarr alheyl-rnem rernem alakenh tnakelheyel, tyaty akely kwenel iwerr impalhel, ingwer-rnemel renh-rnem aretyek, tnaketyek. Atha arrenhantherr arraty ileyel, Akngeyel renh-rnem anthey-angenh.

<sup>3</sup> Ntwa irrepern-rnem arnkwa anthenty anyelkel-antey, tnakelhey-angenhel, ingkerrenhel ngenh arekerr, <sup>4</sup> Akngeyelant ngenh aremel, rap ngenh arntarnt-arem arrpemarl.”

### *Alakenh Akngey-warl angkaynta*

(Luke 11:2-4)

<sup>5</sup> “Ingwer-rnem alhem tyaty akely-rnem-warl, aketh-warl, Jew-rnem angkerreyel-warl. Akngerr akarirrenty, rernem angkem Akngey-warl, ingwerel-rnem renh-rnem mwerr-arrpantey aretyek, tnaketyek. Rernem tnakelheyel. Akngey alakenh-kety arlkarireyel. Kel ra renh-rnem arntarnt-arey-angenh.

<sup>6</sup> Ament Akngey-warl angkenty mwerrarl. Akngey ilkelheyel, ngenh arntarnt-aremarl.

<sup>7</sup> Arrantherr aleth-antey angkey-angenh, artwa ingwer-arenyel-rnem angka akngerrileyel-apeny ingkart ikwer-rnem-kenh-warl. <sup>8</sup> Aleth angkey-angenh, rernem angkeyel-apeny. Anyent-inger-antey angketyek, kel ra ngenh aweyelarl. <sup>9</sup> Arrantherr alakenh ayernem, ‘Akngey anwekantherrenh, ngarl irrwerl aneyel. Ingkerrenh akalty-antha, anwantherr ngenh arraty iterl-aretyek. <sup>10</sup> Apey-alha, ingkerrenhek ingkart anetyek. Ingkerrenh arratyila, ngkweng awelhetyek, irrwerl-areny ingkerrenh ngkweng awelheyel-apeny. <sup>11</sup> Anwenhantherr intem-antey amern antherl-aynta. <sup>12</sup> Apmwa anwekantherrety iwa, anwernantherr arratyilerretyek, mwarrant-arey anwernantherr anetyek. <sup>13</sup> Anwernantherr apmwewarl irrekerr atnyena. Arrenty anwernekantherr irrpelthirreyelarl-kety, anwernenhantherr arntarnt-ara.’”

<sup>14</sup> Jesus-el renh-rnem ilek, “Arrantherr ingkerrenh mwarrant-arey-anem anetyek atwerrey-angenh, Akngeyan arrekantherr ingkerrenhek inkwerelhem, apmwa ingkerrenh-kety, arrekantherrety Akngeyel iwem. <sup>15</sup> Arrangkwelan, Akngeyel apmwa arrekantherrety iwey-angenh.”

### *Rernem amern-kety ipmelhetyek*

<sup>16</sup> “Ingwer-inger amern-kety ipmelhem, amernekant aleth iterrey-angenh, Akngeyekant iterrel-ayntetyek. Ingwer-rnem artwerrety anew-aneyel, irrepern antwelhemel. Akngey ikwer-rnem inkwerelhey-angenh, renh-rnem angkep anthey-angenh. <sup>17</sup> Alakenh amern-kety ipmelhenty, artwerrety aney-angenh. Inngerr lhewelhem apmelerreny-angkwarr. Irrepern antwelhey-angenh ingwer-rnemek. <sup>18</sup> Akngeyel kel aketh-antey areyel, arrenhantherr angkep anthem.”

### *Ampwal akngerr ayerrpiley-angenh*

(Luke 12:32-34)

<sup>19</sup> “Ampwal akngerr ayerrpiley-angenh ahern nhenh-itwek. Arrangkwarl ikwer-angkwarran. Ampwal akngerr apwert man-then akarriley-angenh, ingwerentiyert-inekerri, interrkkel arlkwekerr. <sup>20</sup> Arraty-angkwarr apenterl-ayntem. Rap arrenem ilek-ilek mwerr-angker arrekantherr irrwerl-itwek. Mwerr-angker ayntayntem intem-antey irrwerl-itwek, nthakenh ywerrey-angenh, arrangkw. Ingwerentiyel irrtyert-iney-angenh, interrkkel arlkwey-angenh, arrangkw. <sup>21</sup> Arrantherranap ampwal ikwer-rnemant iterreyel, arrantherr ampwal renh-rnemant apenteyel.”

*Angka lyenenty-akert*  
(Luke 11:34-36)

<sup>22</sup> “Annga mwerr-akertel ntwa iwerr arrayt apenteyel-apeny, anaynt-apeny.  
<sup>23</sup> Aparrngelan iwerr arrayt apentey-angenh arrangkwarl, aperrertirrerl-alpeyel. Aparrngel-apeny rernem apmwangkwarr apenteyel, atwemengkel-apeny. Rernem Akngey-kety amentirreyel.”

*Angka man-akert*  
(Luke 12:22-31; 16:13)

<sup>24</sup> “Arrantherr apwert man akngerrekant iterrerl-anenty, arrantherrap Akngey-kenh angkek-anem iylpelirrem-anem, Akngey-kenh angkan apentey-angenh, amentewarl-anem. Akngey-kenh angkan impenarl. Manek artewentyel iterrey-angenh, Akngey-kenh angkekant artewentyel iterr-ayntetyek. Nthakenh ntwa atherr-angkwarr apentey-angenh.

<sup>25</sup> Alakenh iterrey-angenh, ‘Amern ilek atha arlkwetyek, ilek atha antywetyek, arnkwa ilek-warl ayeng aylpetyek?’ Iteth anayntetyekant nga iterr-ayntetyek, Akngey-kenh-angkwarr apenterl-ayntetyek. <sup>26</sup> Thip yanh-rnem arenh-arey. Thip nthakenh amentel amern lyapelhiley-angenh, amern warl-warl akwerney-angenh, awakelhey-angenh. Akngey irrwerl-areny rant thip-rnem wanteyel, arntarnt-areyel. Arrantherr Akngey-kenh impen thip-rnem-angkwarr. Anwenhantherr arntarnt-areyel arrpemarl.

<sup>27</sup> Arrantherr artewentyel iterrerl-anenty, arrantherrap arwapeny ywerreman. <sup>28-29</sup> Arnkwekant iterrey-angenh. Solomon arnkwa mwerr-angker-warl aylpenh. Arnkwan ikweren hahern-areny-kenhant. Akngeyelant alpeyt mwerr-angker arrernek ahern nhewarl. Alpeyt arnkternem-angkwarr mwerr-angker innigarl inngelheyle!

Alpeyt yanh-rnem arenherr-arey! Anyentel-antey aneyel rernem arnkwel mwerr ilelhey-angenh. <sup>30</sup> Akngeyel atherrk lyapelhileyel. Atherrk arlenyirrem aherretyle, rernem antywer arrtyem. Akngeyel atherrk renharl arntarnt-areyel-apeny, ra anwenhantherr iwerl-alhey-angenh arrpemarl, arnkwa ilek-ilek anthemel arntarnt-arem mwerr-angkwarr. Arrantherr apal, Akngey renh tnakey-angenh, rarl anwenhantherr ingkerrenh arntarnt-arem.

<sup>31-32</sup> Artewentyel iterrey-angenh, ‘Ilek anwantherr arlkwem, ilek anwantherr antywem, arnkwa ilek-warl anwantherr aylpeman?’ Ingkart apentey-angenh-rnem alakenh iterreyelan. Akngey alker-areny ra arrenhantherr areyel, ranem arrenhantherr ilek-ilek anthemel, arntarnt-arem-then. <sup>33</sup> Arrantherr-anem ikweren-angkwarr apenterl-ayntetyek arrayt-angkwarr, Akngeyel arrenhantherr atnyenem.

<sup>34</sup> Ampwal ilek-ilek akngerr arrerney-angenh ingwer-ingerek. Ngant ikwerant iterreyek. Arlta arrpanenhel Akngeyel arenhantherr arntarnt-areyelan.”

## 7

*Ingwer-rnem akngakey-angenh*  
(Luke 6:37-38, 41-42)

<sup>1</sup> “Arrantherr ingwer-rnem tyatyemiley-angenh, akngakey-angenh. Arrantherr renh-rnem apmwa antwey-angenh, Akngeyel ngenh arrpemarl ilekerr. <sup>2</sup> Nga mwerr-arrpantey ilelhenty, ngap irrywerreyelarl. Alakenh Akngeyel ngenh akngakeyenh mwerr-rnem-they.

<sup>3</sup> Artwa anyent annga arwerl-akert nthakenh arey-angenh. Mwerr-arrpantey irrywerremel ilelheyel. Ra artwa ingwer annga ahern-angketyarr ileyel, ‘Annga ahern-akert irrarlkella ntwa anaynt arey-alkenh!’ <sup>4</sup> Nthakenh ingwerek alakenh angkey-angenh, ‘Atha ahern akely irralketyek annga ngkweng-itwel.’ Arrangkw! Ra apek arrkay arem, annga arwerl ilkwakert. <sup>5</sup> Rarl alakenh angkem, rap irrywerremarl. Ra arwerl anngethey-tangkwell tyerrelhem, mwerr-anem arey-kety. Rap ahern akely irralkem annga ingwer-itwel-anem.”

**Anayntileyel:** *Jesus-el angka ilenh, rernem iterreyek, tnakelhey-angenh. Artwa Moses-kenh-rnem rernem mwerr-arrpantey ilelhenh, ingwer-rnem apmwekety angkepiletyek-arrpantey ikwer-rnem-kenh-angkwarrant apenterl-ayntetyek.*

<sup>6</sup> “Nhanyem angka Akngey-kenh impen. Rant angkepiley-angker. Ahern-arenyelant amperl nthakenh angkepiley-angenh. Apwert mwerr-angker impen, nthakenh pikepik anthey-angenh. Aker mwerr-angker arengk apmwala nthakenh anthey-angenh. Akngey-kenh angka impen arrpemarl apwert mwerr-angker impen-apeny.”

**Anayntileyel:** *Akngey-kenh angka impen, apwert mwerr-angker-apeny, aker impen mwerr-angker-apeny. Alakenh atnwenth pikepik anthey-angenh-apeny,*

**arengk apmwa anthey-anhenh-apeny, alakenh anwantherr Angka Akngey-kenh atnyenem, ingwer-angkwarrarl iterreyel-rnem anthey-anhenh.**

<sup>7-8</sup> “Ntwa Akngey ayernenty, ranap ngenh anthemarl. Ntwa renh ayernenty, ranap ngkweng lwevarrernemarl. Ran iwerr ngkweng mpwareyel, ntwa ikwerenh-angkwarr apentetyek. Inngarlap ran! Akngey ranap ngkweng mpwaremarl, ngap aylpenhem-anem. <sup>9</sup> Alerengkwel ngenh amernek apek ayernem. Ntwa apwert ikwer anthey-anhenh, arrangkw! Ntwa amernant anthem arlkwetyekan. <sup>10</sup> Alerengkwel ngenh aker irrpengek apek ayernem. Ntwa rtnwem ahelengkw ikwer anthey-angenharl, arrangkw! Ntwa aker irrpengant anthetyek arlkwetyekan. <sup>11</sup> Arrantherran apmwamwam aneyel, arrantherrap iterl-areyelarl, ilek-ilek mwerr-angker anthayntetyekan ampernemek. Akngey irrwerl-arenyan arrantherr-apeny-wenyarl, ilek-ilek anthey-angker. Ra mwerr-angkerarl arrekantherr anthem, arrantherr renh ayernentyan. Rant iterl-areyel. <sup>12</sup> Anwantherr ilkelheyel ingwer-rnemel anwenhantherr mwerr-angkwarr arntarnt-aretyek. Alakenh anwantherr mwerr-angkwarr renh-rnem-tangkwel arntarnt-aretyek. Akngey-kenh angka arrwekeleny aytteyel, Moses-kenh-angkwarr angkakert ingwer-rnem-angkwarr-then.”

*Iwerr atherr-akert*

<sup>13</sup> “Iwerr akely alpeyel Ingkart-kenh-angkwarr, nga arraty-angkwarr apentetyekan. Akngerr alpeyel iwerr ilkwangkwarr, apmwel-aretharl alheyel-rnem. Akngeyel renh-rnem ywerrelhileyen. <sup>14</sup> Irrpetyap alheyel Ingkart-kenh-angkwarran. Rernem iteth intem-antey aneyen.”

*Arwerl amern-akert*

(Luke 6:43-45)

<sup>15</sup> “Mwantyel arntarnt-arelhetyek mwerranty arraty apentetyek artwa apmwernem-kety. Rernem irrywerremel angkakert mwerr-arrpantey ilelheyel-kety, yep-yep-rnem anik mwerr aneyel-apeny. Artwa apmwernem ahelirreyel arengk artnwerel ahelirrem-apeny tnhwerrremel. Rernem apmwangkwarr akalty-antheyel, ngenh apmwewarilek-err. <sup>16</sup> Apmwarlap ran, arwerl arleny-penh nthekwern amern iney-angenh. Apmwa nthekwern akey-angenh, amern arnwekety akey-angenh arwerl arleny-penh apmwarl. Amern akatyerr akey-angenh arwerl arntek-arntek-penh apmwarl.”

**Anayntileyel: Apmwangkwarr akwerrpel akalty-antheyel-rnem arwerl arleny-rnem-apeny. Angka mwerr akalty-anthey-anhenh akwerrpel-rnem, amern apmwamwam-apeny.**

<sup>17</sup> Jesus-el angka ingwer-anem ikwer-rnem ilenh. “Arwerl ingweran amern mwerr-akertarl, arwerl apmwarenyan amern mentyarl. <sup>18</sup> Arwerl arleny-penh nthekwern amern akey-angenh. Amernek ywarn nthweyel. <sup>19</sup> Arwerl arlenyan apmwarl, rwewarl iwem arwerl renh.

<sup>20</sup> Angkakert irrywerrey-angker-rnem rernem arwerl arleny-apeny. <sup>21</sup> Apmwel-areth aneyel-rneman rernem arlkeyen, ‘Ay, Ingkartay.’ Rernemap Akngey-kenh-warl aylpey-angenh. Arraty-angkwarr apenteyel-rnemant, Akngey ikwerenh-rnem aneyen. <sup>22</sup> Arltal ingkernel ingwer-rnem arlkeyen, ‘Ay, Ingkartay. Anwantherr angka ngkwenh ilerl-apeny arrpemarl, anwantherr arrenty-rnem irrentek, itna ngkwenh itnewemel, ilek-ilek mpwarek, rlterrk ngkwenh-akertel.’ <sup>23</sup> Athan renh-rnem ileyen, ‘Alpenherr-arey atyengety, athan arrenhantherr iterl-arey-angenharl.’”

*Warl atherr-akert*

(Luke 6:47-49)

<sup>24</sup> “Rernem apek angka atyenh awek-penh, rernem arraty-angkwarr apenteyel rlterrkanem, artwa warl apwert irrwerl rlterrkl-itwek artek-apeny. <sup>25</sup> Kwaty-anem rntwey-alhek, atnyerr ilkwanem alhek. Warl atakelhey-angenh arrangkw, ra anyentel-antey apwert rlterrkl ikwerel cement-apeny-itwek artelhenh. <sup>26</sup> Artwa ingwerel angka atyenh arwa iypelant awek atyeng awelhey-angenh. Ra anamerl ywerreyen warl apmwamwam anamerl ywerrek-apeny. <sup>27</sup> Kwaty ilkwa rntwey-alhek. Atnyerr alhek, awerel rlterrkl pwey-alhek, warl apmwamwam renh-anem atakenhek, kel. Warl rlterrkl intem-antey aneyen, warl apmwamwam arrangkwarl, angath-antey atakelheyel. Artwa akalty intem-antey aneyel, Akngey-kenh. Artwa arwengk angath-antey ywerreyen, warl apmwamwaman angath-antey ywerremel atakelhek-apeny.”

<sup>28-29</sup> Jesus rarl angka ilenh-penh, ingkerrenh-anem apatek, rarl renh-rnem rlterrkl innga akalty-anthek Akngey-kenh-angkwarr, artwa Jew-kenh akalty-anthey-angker-rnemel rlterrkel akalty-anthey-angenh.

**8**

*Jesus-el artwa tywen-angketyarr mwerrileyel  
(Mark 1:40-45; Luke 5:12-16)*

<sup>1</sup> Jesus apwert-they atwarrerl-alhek, akngerr ingwer-rnemel renh apentek. <sup>2</sup> Artwa tywen-angketyarr apetyek Jesus-warl. Tywen ywerrey-angen intem-anteyarl anen. Ra kwenirrenh Jesus-itwek, ampwethel alernelhemel. Ra angkek, “Nga rliterrk innan, mwerriley-angker. Ntwa ayenh mwerriletyek tywen-rnem atyeng-they ywerrehila, ayeng tywen-weny alyelk-anem anetyek.”

<sup>3</sup> Jesus ranem renh arnep-arnek, angkemel, “Ayeng ilkelheyel, ngenh atha mwerriletyek.” Tywen-rnem arwapeny ywerrerl-alhek, mwerrirreyelpak. <sup>4</sup> Jesus ra arrngkert angkek, “Akater-anem aney-alpa! Ingwer-rnem-warl ilelhey-angen anetyek, athari ngenh tywen-angketyarr-penah mwerrilek. Atyetyart tyaty ilkwa Jew-rnem-kenh-arenyek nga anyentekant ilelhey-alpa, ra ngenh mwerr-anem aretyek. Ntwa aker tyenkerr Atyetyart anthetek, Moses-kenh angka aynteyel, aker Atyetyartek anthetyek, ingkerrenhel ngenh aretyek, ngarl mwerrirrek-anem, ntwarl aker tyenkerr Atyetyart anthek.”

*Jesus-el atyetyart Rome-areny-kenh warrkenh mwerrileyel  
(Luke 7:1-10; John 4:43-54)*

<sup>5</sup> Jesus apmer Capernaum-warl-anem alpek. Artwa ahelengkw atyetyart irlkentyek-artwey Rome-areny ikwer-warl apetyek, ayernetyek. <sup>6</sup> “Ingkartay, warrkenh atyenh arlan aynteyel, akngelhey-angnenhirrek, arlka ingkerr kwarnelheyel-kety.”

<sup>7</sup> Jesus angkek, “Ayeng alhem ngkweng-angkwarr, renh mwerriletyek.”

<sup>8</sup> Atyetyart irlkentyek-artwey ilelhek, “Ngan ilkwarl atyeng-angkwarr. Ayengan artwa apmwamwamarl. Ayeng nyerirreyel ngkwengety, atha ngenh warl atyenh-warl atnwenheynekerr. Nga arntety ikwer angka, renh mwerriletyek. <sup>9</sup> Ayeng atyetyart arrpemarl ingwer-rnemek. Atha apek anyent ilanthem, rap awelhemarl. Atha anyent ingwerek arlkem, rap atyeng-warl apetyem. Atha warrkenh anyent ilanthenty, rap awelhemel warrkirremlar. Ngan atyetyart ilkwa innga, ingwer-rnem ngkweng awelhemarl.”

<sup>10</sup> Artwa renh awek-penah Jesus ra apatek, rantarl renh-rnem ilek, “Artwa nhen-helant ayenh tnakeyel innga, ayengarl rliterrk ilkwakert, arleng-they mwerriley-angker. Ranap Jew-wenyarl, alethangarl. Nharenry-rneman arrangkwarl. <sup>11</sup> Akngerr akarrirreyeh apmer arpanenh-they amern kwenty arlkwetyek arrwekelely-rnem-itwek. Abraham-akerr, Isaac-akerr, Jacob-akerr, Rernem ingkerr anerl-aneyen Akngey-itwel. Akngey-kenh-rneman ingkerrenh mwerr anayntem, inkwerelhemel amern kwenty arlkwerl-anemel. Jew-rnem alethang-rnem-them pweytirreyen anerl-anemel arrpemarl. Akngeyelanap renh-rnem ingkerrenh arntarnt-arerl-aneyen. <sup>12</sup> Jew-rnem Akngey-kenh arrwekel anenh-rnem arrangkwarl. Rernem ywarn iterremel arrangkeyen, Akngeyarl ikwer-rnem-kety intwemelirreyen-h-kety.”

<sup>13</sup> Jesus-el atyetyart renh ilek, “Kel alpa, atha warrkenh ngkweng mwerrilek, ntwarl ayenh tnakek.” Kel warrkenh ra mwerrirreyelpak.

*Jesus-el akngerr mwerrileyel  
(Mark 1:29-34; Luke 4:38-41)*

<sup>14</sup> Jesus-el awek, arelh ampwa Simon-kenh arntety rwenparl ayntenh. <sup>15</sup> Jesus alhek ikwer-warl, itep ikwerenhanterrakwek. Arelh ranem mwerrirrek. Ra akemirrek, amern-anem ra ampernek Jesus-ek.

<sup>16</sup> Atwemengkel ingwer-rnemel atnwenhey-alhek arrenty-akert-rnemek Jesus ikwer-warl. Ranem arrenty-rnem irrentek ikwer-rnem-they, Akngey-kenh angka rliterrk-akertel, arntety-rnem-them mwerrilek. <sup>17</sup> Alakenh angkakert Isaiah-el angka arrwekel ingkwernek, ra innganem irrek, “Ra arntety-rnem ingkerrenh mwerriley-angker.” Alakenh angka arraty innganem irrek.

*Rernem ilkelheyel Jesus-angkwarr apentetyek  
(Luke 9:57-62)*

<sup>18</sup> Jesus-el artwa akngerr arek. Ra angkek kwertengerl ikwerenhrnemek, “Mpa, kwaty ilkwangkwarr anwantherr artarnpenhey intwarr-ampeny-warl.” <sup>19</sup> Artwa anyent atyetyart Moses-kenh rap angkek Jesus-ek, “Atha ngenh apentetyek, ingweram-angkwarr nga alhenty.”

<sup>20</sup> Jesus-el renh tyernek, “Arengk artnwer rernem inteyelarl aynteyel. Thip-rnem atharkwel aneyel, Artwa Impen Akngey-kenh ayeng apmer-weny arrangkwarl, ayeng arwarl apmer arpanenh-warl alheyel.”

<sup>21</sup> Kwertengerl anyent ikwer angkek, “Ingkartay! Akngey atyenh ilwetyek arrer-anem. Ayeng alpetek, renh arntarnt-arey-alpetek. Renh aytarently-penh, ayeng apey-alpem arrpemarl, atha ngenh apenterl-ayntem arrpemarl.”

<sup>22</sup> Jesus angkek ikwer, “Menty, ingwerel-rnem renh aytarey. Ayenhantarl apenterl-aynta, mwerr-ayteng.”

*Jesus-el kwaty awer-akert arternpileyel*

(Mark 4:35-41; Luke 8:22-25)

<sup>23</sup> Nganerl-alhek rernem rtnewewarl-anem anperl-alhek. <sup>24</sup> Kwaty awer-akert apetyek rntwney-alhek rlterrk innga. Awer ilkwel renh-rnem akngelhew-akngenhilek. Kwaty ankwayerl-apenl apal. <sup>25</sup> Kwertengerl ikwerenrh-rnemel Jesus akwenthelhilek. Rernemap renh ilek, “Ingkartay, kwatylel anwenhantherr ilwer-atheneke!”

<sup>26</sup> Jesus-an angkek ikwer-rnem, “Ilek-ketyarl arrantherr aterirreyel, atyeng irrpelthirremel-apeny, atharl arrenhantherren arntarnt-areyelan?” Jesus artewentel arlek, awerek, atnengkirretyek. Kwaty awer-akert atnengkirreylepk, arwapeny. <sup>27</sup> Kwertengerl ikwerenhel-rnem Jesus renharl arek-penh, rernem ikwerety aterirrek, rarl kwaty awer-akert arternpilek rlterrkel. Rernemap ayernerrek, “Nthakenh awerthen kwaty-then ikwerant awelheyl.”

*Artwa atherr arrenty akngerr-akert*

(Mark 5:1-20; Luke 8:26-39)

<sup>28</sup> Jesus rtnwel artarnpenhek Galilee kwaty ilkwangkwarr kwertengerl ikwerenrh-nem-akert, apmer Gadara-warl. Artwa arrenty-akert atherrel Jesus renh arlengek arnarek, apetyenharl. Ratherr kanper-antey anekirrey-ayntek Jesus-warl apmer awenning-angketyarr-they. Arrewaly-kenh awenning-angketyarrel ratherr anen, nthakenh ikwer-atherr-warl alhey-angenh, ahelengkwek-atherrety. <sup>29</sup> Artwa ratherr arlek, “Jesus, ngan Alerikw Akngey-kenh. Ntwa arraty ilay. Ilekek ngan apetyek? Aylernanthenh ntwa atwetyek? Arlta ingkerelant Akngeyel anwernenhantherr atweyeh!”

<sup>30</sup> Apwertel atnwenth pikepik akngerr rtnenherrenh. <sup>31</sup> Arrenty-rnemel Jesus renh ilek, “Irrentey-angenh anwernenhantherr, apmer arleng-warl! Anwernenhantherr atnwenth yanh-rnem-warl thwena!” <sup>32</sup> Jesus-el kel renh-rnem irrentek, “Alpenherr-arey wenh!” Rernem kel tyerrelhekk artwa ikwer-atherr-they, alhemel atnwenth-rnem-warl. Atnwenth rernem kel anterrerrek arrenty-akertan. Rernem arnkarr-they aytnek, kwaty alay kwen-warl. Rernem ilwek kwatylel kwen.

<sup>33</sup> Artwa atnwenth arntarnt-arey-angker-rnem tawen-warl anterrerrek. Rernem ilay-alhek tawen-areny-rnem, atnwenth-rnem kel ilwek kwaty ilkwa kwen, Jesus-earl arrenty-rnem irrentek artwa ikwer-atherr-they. <sup>34</sup> Tawen-areny-rnem ingkerrenh rernem-anem alhek, rernem-anem Jesus renh aretyek. Rernem Jesus ikwerety aterirrek, itnweng rlterrk-akert-kety. Rernem angkenh, “Nga apmer ilenh-they alpetek, apmer ingwer-warl-anem.”

## 9

*Jesus-elan artwa lerrp mwerrileyel*

(Mark 2:1-12; Luke 5:17-26)

<sup>1</sup> Jesus rtnewewarl nganek, kwaty-angkwarr artarnpenhek. Ra angkep-anem alpek apmer ikwerenh-warl, tawen Capernaum-warl. <sup>2</sup> Artwa ingwerel-rneman artwa lerrp anyent akngey-alhek pantyel, Jesus-warl. Jesus-el renh-rnem arek, rernemarl renh trakek mwerriley-angker. Ra artwa lerrprenh ilek, “Apmwan atha ngkwengety iwem.”

<sup>3</sup> Artwa Pharisee-rnem-then Moses-kenh akalty-anthey-angker-rnem-then rernem angkerrenh, “Ran nhenhey irrtywerremel ilelheyel Akngey-arrpantey. Akngeyelant apmwan iwem!”

<sup>4</sup> Jesus-el iterl-arek artwa renh-rnem, rernemarl ikwer irrpelthirremel angkerrenh. Ra renh-rnem ilek, “Arrantherran apmwel-aretharl angkerreyel, atyeng irrpelthirremel!

<sup>5-6</sup> Ayengan Akngey-kenh Artwa Impen. Akngeyel ayenhl thweneh ahern nhenh-warl, rlterrk innga. Akngeyel ayenhl rlterrklek, artwa arntety mwerrileyek, apmwa ingkerrenh-they iwetyek, arrantherr ayenhl iterl-aretyek. Atha akwenthelhilemel thweneh, ra apmer-warl alpetek panty inerl-alhemel.” Jesus angkek artwa arntetyek, “Akwentenhey-alpa, panty ngkwenh inerl-alhemel, apmer-warl-anem alpa!” <sup>7</sup> Artwa arntety-penh akwenterl-alhek, panty inerl-alhemel. Alpek-anem ra apmer-warl, mwerr-anem. <sup>8</sup> Akngerrel intwarek apatemel, arntety rarl apmer-warl alpek. Rernem

Akngayek-anem inkwerelhek, rarl ahern-areny-rnem rlterrilek, ingkerrenh mwerril-ayntetyek. Rernemap angkerrenh-anem, "Ngay! Akngay inngarl yanhan!"

*Jesus-el artwa Matthew renh rlwaneyel  
(Mark 2:13-17; Luke 5:27-32)*

<sup>9</sup> Jesus ra alpenh, ran artwa arek, itnan Matthew. Ra man akwetyen, kapment-warl anthayntetyek. Jesus-anem angkek ikwer, "Atyeng-angkwarr apetyal!" Ra warrk ikweren-h-kety ipmelhek, Jesus-angkwarrant-anem antelhenhek.

<sup>10</sup> Ikwer-penhan Jesus kwertengerl ikweren-h-rnem-akertel amern arlkwek artwa apmwerneh-itwek, man akwetyey-angker-rnem-itwek warl kwenek. <sup>11</sup> Phariee ingwer-rnemel Jesus-kenh kwertengerl-rnem ayernek, "Ilekek ra amern arlkweyel man akwetyey-angker-rnem-itwek, apmwa ingwer yanh-rnem-itwek?"

<sup>12</sup> Jesus ra awek rernemarl angkerrenh. Ra renh-rnem ilek, "Ngangkerel arntety-rnemant arem, mwerr-rnem nthakenh arey-angenh. Ingwer-rnem rernem mwerr-arrpanteyarl iterl-arelheyel, atyeng-angkwarr-wenyarl. Ayengarl ran apmwa atha iwey-angkeran, arntety mwerriley-angkeran. <sup>13</sup> Angka Akngay-kenh-angkwarr akaltyirra! Atha mwerr-rnemant arntarnet-arey-angenh. 'Angka ingweran aynteyel amern tyenkerr anthetyek. Nga ingwer-rnemek-tangkwel amperngirra!' Alakenh-anyem Akngay-kenh pipel aynteyel, anwantherr iterl-aretyek. Ayeng ilkelheyel ingwer-rnemek-them amentewarl alheyleh-rnemek-then, Akngay-kenh angkek awelhey-angenh-rnemek, rernem atyeng-warl angkepirretyek."

*Ingwerel-rnem Jesus renh ayerneyel  
(Mark 2:18-22; Luke 5:33-39)*

<sup>14</sup> John-kenh kwertengerl-rnem apetyek Jesus-warl. Rernem renh ilek, "Anwantherr Phariee-rnem-then Akngayekant iterreyel, amernek iterrey-angenh. Kwertengerl ngkwenh-rnem-alew? Amern-kety ipmelhek arrpemarl?"

<sup>15</sup> Jesus ikwer-rnem angkek, "Artwa anyent itengirrem-angkwarr, ingkerrenhel ikwer-angkwarr amern kwenty arlkwetyek, inkwerelhemel. Alakenh-anyem, kwertengerl atyeh-rnem anyentirremel aylperrem, amern kwenty arlkwetyek, atyeng inkwerelhemel. Ayengarl alpeyeh-ketyant, rernem ipmelheyelpeyeh."

<sup>16</sup> Arnkwa apmwamwamel-rnem nthakenh anwantherr atanthey-angenh arnkwa mwerr-warl, renh arnwarnetyek. Arnkwa apmwamwam altherrkirrey-angker arrpemarl. Anwantherr menty arnkwa apmwamwam iwey, arnkwa mwerran atnyenemel."

<sup>17</sup> Jesus-el renh-rnem ilek, "Anwantherr theley-angenh ngkwarl wayn lyerteny arranty apmwamwam-warl. Arranty apmwamwam altherrkirremarl. Arranty-they ngkwarl wayn thelelhekkerr ingkerrenh-antey, rwenpirretyan. Arranty ampwanemarl. Anwantherr ngkwarl wayn lyertenyan arranty mwerr-warl-anem thelethetyek. Arranty mwerr-itwek wayn mwerr aynteyel, thelelhey-angenh anetyek."

**Anayntileyel: Alakenh-anyem Jesus-el renh-rnem akalty-anthek, "Arrantherr arranty apmwamwam iwem-apeny, arrantherr arnkwa apmwamwam iwem-apeny, arrantherr Phariee-rnem-kenh angka iwenherr-arey, angka apmwa, atyengant-anem awelhennherr-arey."**

*Kwey ilweyel, arelh arntety anyent  
(Mark 5:21-43; Luke 8:40-56)*

<sup>18</sup> Jesus angkenharl-antey, artwa Atyetyart ilkwa ranem apetyek, ampwethel arnernelk kwenirremel, "Kwey alerey atyeh kel ilwek. Renh arnep-arna, ra angkep itethirretyek."

<sup>19</sup> Jesus ra rtnerl-alhek, ikwer-angkwarr antelhenhek, kwertengerl ikweren-h-rnem-akert. <sup>20</sup> Arelh anyent arntety inngan, aherrety 12-ek-atwety, arleng-alenty anenh. Arelh ra ingkern-they apetyek, arnkwanem Jesus-kenh arnep-arnek. <sup>21</sup> Ra ament-anem iterrek, "Atha arnkwa ikwerenhar arnep-arnenty, ayengap mwerrarl ireman."

<sup>22</sup> Jesus ranem artepang arek arelh renh, ra ikwer angkek, "Nga mwerr-anem irrek, ntwarl ayenh tnakek." Kel ikwerel-antey ra mwerrirrek.

<sup>23</sup> Warl atyetyart-kenh-warl ra aylpenhek, ra arek ingwer-rnemarl artnalhelirrenh.

<sup>24</sup> Ra angkek, "Arnangerrenherr-arey! Kwey ngkwenh ilwey-angenh, ankwarl ra aynteyel." Ingkerrenh Jesus ikwer atherrenh irrpelthirremel. <sup>25</sup> Ingkerrenh aketh-warl irrentek-penh, Jesus ra aylpenhek, arrewaly rarl ayntenh-warl. Ranem akwethey rnkernek, rtnerl-alhetyek. Kwey ra akwentenhey-alpek-anem.

<sup>26</sup> Ingkerrenhel ahern Judea-ampeny-they rernem angka awek-anem, Jesus-elarl renh itethilek.

*Jesus-el artwa aparrng atherr mwerrilek*

<sup>27</sup> Jesus apmer ikwer-they anperl-alhek, artwa aparrng atherrel Jesus renh apentenhanngkern-they. Ratherr arlek, "Aylekanth amperrngirra! David-kenh alerikw!" <sup>28</sup> Jesus ranem warl kwen-warl aylpenhek. Artwa aparrng ratherr ikwer-warl apetyek, Jesus-el renh-atherr ayerne, "Mpwelanth ayenh tnakeyel, atha mpwelanth mwerriley-angker?" "Kel Ingkartay, aylernanth ngenh tnakeyel," ratherr alakenh angkek.

<sup>29</sup> Jesus-el annga renh-atherr arnek, angkemel, "Kel mpwelanth mwerrirrem-anem, ayenh tnakekarl-penh." <sup>30</sup> Kel ratherr mwerrirrek-anem. Jesus ikwer-atherr arrngert angkek, "Ingwer-rnemek ilelhey-anghen, atharl mpwelanth mwerrilek." <sup>31</sup> Apmer arrpanenh-warl ratherr ilelherl-apenh, renh-atherrall mwerrilek Jesus-el.

### *Jesus ra artwa akerter angkey-angenh renh mwerrileyel*

<sup>32</sup> Jesus anperl-alhek kwertengerl ikwerenhr-nem-akert, ingwer-rnemel artwa arrenty-akert atnwenhek Jesus-warl. Arrentyl artwa arrwekel-antey renh angkey-angenh ilek. <sup>33</sup> Jesus-el arrenty renh irrentek, artwa ikwer-they. Artwa rap angkek-anem, mwerr-anem. Jesus renh arek-penh, ingkerrenh inkwerelhemel iterrek, "Aleyant anwantherr arek, Israel-ampenyek arey-angenh."

<sup>34</sup> Artwa Pharisee rernem angkerrenh, "Artwa yanh arrenty atyetyart-kenh rlterrak-akert arrenty ingwer-rnem irrenteyel."

<sup>35</sup> Jesus ra apmer arrpanenh-warl akalty-antherl-apenh, Akngey-kenh-angkwarr apenterl-ayntetyek, Jew-kenh tyaty-itwek, arntety-rnem mwerrilerl-apenh. <sup>36</sup> Ra ingkerenhr arek, ra ikwer-rnem amperrngirrek, rernemarl ywarn iterrehn. Ingwerentyel renh-rnem akalty-anthey-angenh. Rernem apatemel anenh, atyetyartek arrangkw, yep-yep atyetyart-weny apatemel arlperryirrem-apeny. <sup>37</sup> Ra kwertengerl ikwerenhr-nem ilek, "Akngerr ingwer-rneman Akngey-kenh angka awey-angenh-antey. Angkakert apetyey-angenh-antey, renh-rnem akalty-anthetyek. <sup>38</sup> Ingkart Akngey ayernetyek, angkakert thwenetyek, angka mwerr-angker ilerl-apayntetyek, akwerrp-rnem-warl."

## 10

### *Jesus-el kwertengerl ikwerenhr-nem rlwaneyel (Mark 3:13-19; Luke 6:12-16)*

<sup>1</sup> Jesus-el kwertengerl ikwerenhr 12 akarrilek, ranem renh-rnem rlterrakilek, rernem-anem rlterrak ikwerenhr-akertel arrenty-rnem irrenterl-apayntetyek, arntety ilek-ilek-akert-rnem mwerrilerl-apayntetyek.

<sup>2</sup> Nhanyem itnernem ikwer-rnem, Simon, itnan ingweran Peter, awayikw ikwerenhr Andrew, James-then John-then, Zebedee-kenh alerikw-atherr. <sup>3</sup> Philip-then Bartholomew-then, Thomas-then Matthew, man kapment-warl akwetyey-angker, James-then, Alphaeus-kenh alerikw, Thaddeus-then. <sup>4</sup> Ingweran itnan Simon Patriot. Judas Iscariot rarl Jesus renh ahelengkw-rnem-warl ahayiwenh.

### *Jesus-el angkakert 12 thweneyel (Mark 6:7-13; Luke 9:1-6; 10:1-12)*

<sup>5</sup> Jesus-el angkakert 12 thwenek, Ranem renh-rnem ilek, "Jew-weny-rnem-warl alhey-angenh, Samaria-areny-rnem-warl alhey-angenh, <sup>6</sup> Israel-kenh-rnem-warlant alhenherry, rerneman atyetyartek arrangkwarl, rernem apatemelar aneyel-rnem-warl, yep-yep apatemel rtneyel-apeny. <sup>7</sup> Ilenherr-arey, arla kel-anemarl arrerirreyel-kety, irrwerl-areny atyetyart ingkerrenhek anetyek. <sup>8</sup> Arntety-rnem mwerriletyek, arrewaly-rnem itethiletyek, tywen-rnem ywerrelhiletyek arntety-rnem-they, arrenty-rnem irrentetyek. Akngeyel ilek-ilek arrekantherr kel antek. Arranther ngkwelyekant iterrey-angenh, arranther ingkerrenh ingwer-rnem mwerriletyek arwa. <sup>9</sup> Ngkwely ilek-ilek akngeyney-angenh, thilp apek. <sup>10</sup> Yakweth akngey-angenh, arnkwer nem akngey-angenh, ingkety aylpey-angker mentyarl, irrertety akngey-angenh. Ingwerentyel arrenhantherr anthem mwerr-angkwarr, warrk-penh.

<sup>11</sup> Apmer ingwer-warl alhenty, warl anyentel-antey aney-alhetyek. <sup>12</sup> Warl ikwer-warl aylpenteyel, Akngey ayerna, renh-rnem ingkerrenh arntarnt-aretyek. <sup>13</sup> Rernem ngkweng inkwerelhenty, nga ikwer-rnem-itwek mwerr aneman. Rernem ngkwengety arkarirrenty, ikwer-rnem-kety amentirrem arrpemarl. <sup>14</sup> Tawen-areny-rnem ngkwengety arkarirrenty, irrpelthirrem, ahern tertangkwelhila ingkety-theyan. Tawen-arenyel-rneman arem, rernem iterremarl, 'Anwantherr arntetyirreyen, Akngeyel anwenhantherr arntety ilkwa antheyen, anwantherrarl ikwer inkwerelhey-angenh-they.' Menty-anem yanh-rnem iwerl-alhem alpemelant-anem. <sup>15</sup> Arla ingkernel Akngeyel arkarirreyelarl-rnem ingkerrenh renh-rnem atwem, Sodom-areny-rnem-then Gomorrah-areny-rnem arrwekel atwek-apeny."

*Ingwer-rnemel irrwerneyen hkwertengerl-rnem  
(Mark 13:9-13; Luke 21:7-19)*

<sup>16</sup> “Kel-anem alhenherr-arey, mwanty-antey. Arrantherran anik ahelengkw-weny, yep-yep-rnemarl anik aneyel-apeny. Ingwer-rnem ahelengkw arengk artnwer-apenyarl. Arrantherr mwanty-antey arnwarnelhemel mwarrant-arey aney-alhenherr-arey, ikwer-rnem-itwel ahelengkw-weny, thip rwelyarr anikarl aneyel-apeny. <sup>17</sup> Mwantyel arntarnt-arelherr-arey artwa apmwa ahelengkw-rnem-kety arrenhantherren atwekerr tyaty Jew-kenh akely-rnem-itwek. <sup>18</sup> Artwa apmwer nemel arrenhantherr arrerneyen h angka ilkwewarl, atyetyart-rnem-warl angketyek. Arrantherr angka atyeh iletyek Jew-weny-rnemek nyerirrey-angenh. <sup>19</sup> Atyetyart ilkwel arrenhantherr angka ilkwewarl arrernenty, arrantherr ilelhetyek ikwer-warl, aterirrey-angenh. Akngeyel arrenhantherr akwerrng rlterrilem, arrantherr arraty angketyek. <sup>20</sup> Angka ngkwenh-weny. Akngey-kenh Itnwengel arrenhantherr akwerrng rlterrilem, arrantherr arraty angketyek.

<sup>21</sup> Artwel-rnem ayteyikw ikwer-rnem-kenh ahayiwayen h ahelengkw-rnemel atwetyek. Ingwer-rnemelan alerikw ikwer-rnem-kenh ahayiwayen h, ahelengkw-rnemel atwetyek. Ampel-rnem amey ikwer-rnem-kenh-then akngey ikwer-rnem-kenh-then ahayiwayen h, ahelengkw-rnemel atwetyek. <sup>22</sup> Akngerr arrekantherrety arkarirreyen h ayenharl apenteyel-kety. Arrantherr atyeng-angkwarr apententy, atyengety amentirrey-angenh, arrantherr intem-antey iteth aneyen h. <sup>23</sup> Tawen-areny-rnem arrenhantherr atwetyek arrkernehlhenty, tawen ingwer-warl alhenherr-arey. Akngey-kenh Artwa Anyent Impen ayeng apey-alheyen h arrer-anem.

<sup>24-25</sup> Kwertengerl 12 lyertant akaltyirreyel, atyetyart-wenyarl, warrkenh atyeh-rnemarl. Ingwer-ingeran ra alyepel akalty-anemarl, ingwer-ingeran artewentyel akalty-anemarl. Rernem warrkirreyel, atyetyart alerl irreyen h. Ingwer-rnem atyeng irrpelthirrenh, rernem kwertengerl-rnemek irrpelthirreyen h arrpemarl, rernem atyeng warrkirrenharl-kety. Ingwer-rnemel apek ayen h Satan antwem, rernem arrenhantherr Satan antweyen h arrpemarl.”

**Anayntileyel:** *Jesus-el angka ikwer-rnem alakenh anayntilek, “Ingwer-rnem atyeng irrpelthirreyel, rernem kwertengerl atyeh-rnemek irrpelthirreyel, rernem atyeng warrkirreyelarl-kety.”*

*Akngereyekit iterretyek  
(Luke 12:2-7)*

<sup>26</sup> “Ingwer-rnem-kety aterirrey-angenh. Ingkartel arem. Nthakenh anyelkel arlengkewelhey-angenh. Ingwer-ingerant arerl-arrernem-anem. <sup>27</sup> Atha arrenhantherr angka atyeh anyelkel-antey ileyel. Atha arreytemel arrenhantherr ileyel, ingwer-ingerant arrantherr alhewer arnkayel iletyek. Ingwer-ingerant arrantherr angka atyeh aketh-antey alhewer iletyek, ingkerrenhel awetyek. <sup>28</sup> Ingwer-rnem-kety aterirrey-angenh. Rernem arlkant ngenh atwem, itnweng atwetyek arrangkwarl. Ahern-areny-kety aterirrey-angenh. Arrantherr Akngereyekit iterrerl-ayntetyek, rantarl arlkethen itnweng-then ywerrelhiley-angker. <sup>29</sup> Thip nyengk akely atherr tharlemiletyek man akelyek. Nyengk ahern-warl ayntenty, Akngeyel renh areyelarl. <sup>30</sup> Alta ingkerr akapwert-itwek nthakenh count-emiley-angenh, Akngey akalty arrpemarl. <sup>31</sup> Rarl thip nyengk-rnem arntarnt-areyel-apeny, rap arrenhantherr mwantyel arntarnt-arem arrpemarl.”

*Jesus-kenh angka alhewer ilayntetyek  
(Luke 12:8-9)*

<sup>32</sup> “Arrantherr ilelhenty ingwer-rnemek arrantherr atyeh-rnem aneyel, arlta ingkernel athap Akngey irrwerl-areny ilem, arrantherr kwertengerl atyeh-rnem aneyel.

<sup>33</sup> Arrantherr atyengety arkarirrety, arlta ingkernel athap Akngey irrwerl-areny ilem, arrantherr atyeh-wenyarl.”

*Rernem amentirreyen h Ingkart-kety  
(Luke 12:49-53)*

<sup>34</sup> “Arrantherr atyeng iterreyley, ayeng apetyek ahern nhenh-warl, ingkerrenh arternpiletyek-arppantey. Arrangkwarl! Akngerr ilterrerrl-aneyen h arnerant-arey atyeng-they. <sup>35</sup> Rernem ilterrerrl-aneyen h, ayenhenh-rnem ilterrerrl-aneyen h atyeng-they, amenheng-rnem atyeng-they ilterrerrl-aneyen h arrpemarl, anherrenheng-rnem atyeng-they ilterrerrl-aneyen h arrpemarl. <sup>36</sup> Ngkwenh-rnem ilterrerrl-aneyen h atyeng-they arrpemarl.

<sup>37</sup> Arrantherr atyeng inkwerelh-ayntetyek innga, ngkwenh-rnemant inkwerelhey-angenh. <sup>38</sup> Arrantherr arlka menty anthelhem, ayen hant arrantherr apenterl-ayntetyek.

<sup>39</sup> Arrantherr amentewarl-anem alhenty, arrantherrap ywerrem-anem, intem iteth aney-angenh. Arrantherr arlka menty anthelhenty, arrantherrap Akngey-angkwarr iteth intem aneman."

*Akngayel renh-rnem angkep antheyen  
(Mark 9:41)*

<sup>40</sup> "Ingwerenty ngkweng inkwerelhenty, rap atyeng inkwerelhem arrpemarl. Ingwerenty atyeng inkwerelhenty, rap Akngeyek inkwerelhem arrpemarl rarl ayenh thwenek angkakert. <sup>41</sup> Ingwerenty apek artwa angkakert ikwer inkwerelhenty, Akngeyel renh arntarnt-arem arrpemarl. Ingwerenty artwa arratyek inkwerelhenty, Akngeyel renh arntarnt-arem arrpemarl, artwa arraty arntarnt-arem-apeny. <sup>42</sup> Ingwerenty apenyng aprek kwaty irrernt anthenty, nga atyenh kwertengerlarl aneyel, Akngey ikwer inkwerelhem. Akngeyel renh mwantyel arntarnt-arem arrpemarl."

## 11

*Angka John Baptise-emeley-angker-akert  
(Luke 7:18-35)*

<sup>1</sup> Jesus-el kwertengerl ikweren 12 ilanthek-penh, ranem alpek tawen-areny-rnem akalty-anthayntetyek, angka ikwer-rnem anayntiletyek.

<sup>2</sup> John Baptise-emeley-angker tyayl-itwek anen. Ranem awek-penh, John-el kwertengerl ikweren-rnem thwenek Jesus-warl. <sup>3</sup> Rernem Jesus renh ayernek, "Ngang John-el arrwekel ilenhan? Ingwerentyek apek anwantherri mpwelhem?"

<sup>4</sup> Jesus-el renh-rnem tyernek, "Alhenherr-arey, John iletyek, arrantherr anngetherri ayenh awek-penh, arek-penh. <sup>5</sup> Aparrng-penhel-rneman areyel-anem, lerrp-penhrnem mwerr alheyel-anem, tywen-angketyarr-penhrnem mwerrirrek, iyelpel awey-angenh-rnem aweyel-anem, arreway-penhrnem itethirrek-anem, akwerrp-rnemel angka mwerr-angker aweyel. <sup>6</sup> Akngeyel renh-rnem arntarnt-areyel, rernemarl ayenh tnakeyel."

<sup>7</sup> John-kenh kwertengerl-rnem alpek. Jesus-el-anem ingkerrenh angka John-akert ilek, "Ilek-apeny artwa arrantherr arekan apmer arlpaw-itwek? Atherrk arlpenty-apeny, artwa awerr-wenylar. <sup>8</sup> Ilek-apeny artwa arrantherr arekan, arnkwa mwerr-angker-akert? Atyetyart ilkwekenh apmerelarl aneyel? <sup>9</sup> Ilek arrantherr arekan? Akngey-kenh angkakertan? Ran angkakert anyent impen inngarl! <sup>10</sup> Ranap irrkaty-antey, Akngey-kenh pipel aynteyelarl. Angkakert anyent impen rey-antey: 'Atha angkakert thwenetyek arrwekel, iwerr mpwaretyek, rarl apetyemek.' <sup>11</sup> John ranem ahern-areny ingkerrenh-angkwarr impen-antey Akngey-kenh. Akngey-kenh-angkwarr apenteyel-rnem, rernem John-angkwarr ilkwa innga anem.

<sup>12</sup> Artwa ahelengkw akgngerr-anem ilkelhenh, Akngey-itwek aney-alpetyek. Rernem angkakert-rnem ipmek atwek. <sup>13</sup> Angkakert Akngey-kenh-rnemel ingwer-rnem akalty-anthenh. Akngeyel Moses law anthek arrpemarl. Rernem akalty-anthenh, John Baptise-emeley-angker ra aremirreyek-atwety. <sup>14</sup> John ra aneyel, angkakert arrwekeleny Elijah anen-apeny. Awank-akerr Akngeyel ilek, renh thwenetyek ahern nhenh-warl. Renhey-antey anwantherri iterl-areyel. <sup>15</sup> Arrantherr atyeng awelhenherr-areyel!"

<sup>16-17</sup> Jesus-el renh-rnem ilek, "Ampernem arlkalhelirreyel ampa ingwer-rnemek, 'Ilek-kyetiar arrantherr arlkarirreyel arrkent alhewer ntwelhelirrey-angenh anwekantherr-itwek? Arlkarirreyelarl. Rernem amperrngirremel anwekantherr-itwek artney-angenharl.' Ampernem arlkarirreyel artwa nharen-yrnemarl atyengety arlkarirreyel-apeny.

<sup>18</sup> John ran artwa ipmeng, amern arlkwey-angenh, ngkwarl wayn antywey-angenh, arrangkw. Arrantherr ikwer angkerrenh arretyt-akertek-arrpantey! Arrantherr ikwerety arlkarirrenh. <sup>19</sup> Akngey-kenh Artwa Impen ayeng kel apetyek. Arrantherr ayenh ayntarrp-ileyel anketyt-arrpantey, amern akgngerr arlkwerl-antenyt-arrpantey, ngkwarl wayn akgngerr antywey-antenyt-arrpantey. Ayeng artwa apmwernem-itwel, arwa alhewer anem, ikwer-rnem-kety arlkarirrey-angenh. Ayeng alhewer anem man-awarr-rnem-itwek arrpemarl, ankety-rnem-itwek, man kapmentek akarrileyel-rnem-itwek. Akngey-kenh-angkwarr arratyarl aynteyel, alakenh-anyem atha apenteyel."

*Ingwer-rnem Jesus ikwer awelhey-angenh  
(Luke 10:13-15)*

<sup>20</sup> Tawen arrpanenhel Jesus-el ilek-ilek mpwarek. Tawen-areny-rnem apmweketyt angkepirrey-angenh-antey, apmwantey. Alakenh Jesus-el renh-rnem ilen, <sup>21</sup> "Tawen Korazin-areny-rnem angkepirrey-angenhan. Akngeyel arrenhantherr artewentyl innga

irrwampenh-antheyen. Alakenh irrkaty arrpemarl aynteyen ingwer-rnemekan tawen Bethsaida-arenyekan. Rernem ayen angetherr arek, atharl akngerr mw-errilenh, rernemap atyengety arkarerrekarl. Tawen Tyre-areny-rnem-then tawen Sidon-areny-rnem-then. Rernem-alew? Rernemap nyerrirrem, apmwa ikwer-rnem-kety angkepirrem. Rernemap arnkwa apmwamwamel aylpem inmenthel-then aper-nelhemel. Arrantherr akwerrp, atyeng awelhey-angenh.<sup>22</sup> Arlta ingkernel, Akngeyel tawen Tyre-areny-rnem-then tawen Sidon-areny-rnem-then irrwampenh-antheyen alyepelant. Rap tawen Korazin-areny-rnem-then tawen Bethsaida-areny-rnem-then irrwampenh-antheyen artewentyel innga.

<sup>23-24</sup> Tawen Capernaum-areny-rnem-alew? Rerneman apmwel-areth iterreyel alakenh, 'Akngayel anwernantherrenh irrwerl-warl akngayneyen, ikwer-itwel aney-alpetye. Jesus-el ilek-ilek mwerr-angker mpwarenh arrekantherr-itwek.' Alakenhap rernem iter-reyelan. Rernem atyeng awelhey-angenh-anteyarl. Akngay rap renh-rnem atweyen. Sodom-areny-rnem-alew? Akngayel renh-rnem atwek, rernem renh arraty apentey-angenh-they. Alakenh-anyem ra arrenhantherr atwemarl."

*Jesus-el renh-rnem arntarnt-arem  
(Luke 10:21-22)*

<sup>25</sup> Ikwer-penh Jesus angkek, "Akngayay, ngan atyetyart ingkerrenhek, ahern-areny-rnemek, alker-areny-rnemek. Ayeng ngkweng inkwerelheyel, ntwarl angka ngkwenh anayntilek, akwerrp-rnemek, ingkerrenhel ngenh iterl-aretyek-awaty, arraty apenterl-ayntetyek. Akalty-arrpantey ingwer-rnem tnakelheyel, angka ngkwenh nthakenh iterl-arey-angenh.<sup>26</sup> Alakenh Akngayay, ntwa anwekantherr arrernekk arrwekel."

<sup>27</sup> Jesus kwertengerl ikwerenh-rnemek angkek arrpemarl, "Akngay atyehel alakenh ayen arrernekk. Akngayelant ayen iterl-areyel innga. Atha anyentelant Akngay renh iterl-areyel innga. Atyeng-angkwarrant rernem Akngay renh iterl-aretyek.

<sup>28</sup> Atha arrenhantherr mwantiel arratylem, arrantherr ingwer-angkwarr iterreyelkety. <sup>29</sup> Atyeng-angkwarr akaltyirra, atha arrenhantherr alpemiletyek. <sup>30</sup> Arrantherr ayen apententy, mwerrarl arrekantherr aynteyel, awerr-wenyarl."

## 12

*Arlta impen ltyerrey-angker  
(Mark 2:23-28; Luke 6:1-5)*

<sup>1</sup> Arlta anyent impen Saturday-el, Jesus alhek kwertengerl ikwerenh-rnem-akert amern weyt-angketylarr-angkwarr. Kwertengerl ikwerenh-rnemel amern weyt inenhek, angayakwirrekerr. <sup>2</sup> Pharissee-el-rnem Jesus renh iltek, "Angka anwekantherrenh aynteyel, arlta nhelan nthakenh warkirrey-angenh. Kwertengerl ngkwenh-rnem amern weytarl inenhey-alhek Saturday-el, arlta anyent impenel. Apmwel-aretharl amern weytan inenhey-alhek, law anwekantherrenh rernem apmwilenhey-alhek."

<sup>3</sup> Jesus angkek artwa Pharissee-rnemek, "Mwerr amern anwantherr inenhey-alhek angayakwirrekerr. Arrantherrap iterl-aremer ingwer-rnemarl awank amern inek-apeny arrpemarl, David-kenhel-rnem. <sup>4</sup> Rernem Akngay-kenh warl impen-warl aylpek. Rernem amern tyenkerr impen akngay angayakwirrekerr. David-el renh-rnem ilek, 'Amern inenhetek angayakwirrekerr, arwa alhewer. Angka arrwekeleny aynteyel, tyaty-areny atyetyart-rnemelant amern impen arlkwtwyek.'<sup>5</sup> Atyetyart ilkwerenm priest-rnem-then rernem alhewer warkirreyel-antey, ipmelhey-angenh arlta Saturday-el. Alakenh mwerrarl. Ingwer-rnemel renh-rnem ayntarrp-iley-angenh. <sup>6</sup> Angka atyehan impen innarl, tyat ilkwa arrangkwarl. <sup>7</sup> Nthakenh arrantherr kwertengerl atyeh-rnem ayntarrp-iley-angenh arrpemarl. Akngay-kenh angka alakenh aynteyel, irrepern-rnem amernel wantetyek, ipmelhey-angenh. Amern tyenkerr Akngayek arrerney-angenh. <sup>8</sup> Ayengan Akngay-kenh Artwa Impen anyent, arlta ltyerrey-angker ikwer atyetyart. Atha anyentelant iem, arlta ikwer, kwertengerl atyeh-rnem rernem arlkwtwyek."

*Jesus-el mwerrileyel artwa anyent akwarl arlwerrelhek, akngelhey-angenh  
(Mark 3:1-6; Luke 6:6-11)*

<sup>9</sup> Saturday-el, Jesus alhek warl kwen-warl Jew-kenh tyaty akely-warl. <sup>10</sup> Artwa anyent akwa arlwerrelhekarl akngelhey-angenh anenh warl kwenel. Pharissee-el-rnem Jesus renh arek, arrer-they, ra arntety renh mwerrilentyek. Artwa rernem angkerrenh, "Arlta Saturday-el rlengkan Jesus-el nthakenh arntety mwerriley-angenharl. Moses-kenh angka nhenh arrwekel aynteyel." Jesus renh arek Pharissee-el-rnem, ra akengenty irrenty

arla anyent impen nhel. "Moses-kenh angka aynteyel, arla Saturday-el nthakenh arntety mwerriley-angenh."

<sup>11</sup> Jesus-el artwa ilkwernem ilek, "Angka nhenhek iterrenh-arey arrantherr. Yep-yep apek aytnem irrkevarl, mwernelhemel. Ntwa renh angkep tyerrenhey-alpem itethilemel? Yep-yep itethilem-apeny arla Saturday-elan, <sup>12</sup> Kel alakenh atha artwa arntety alhewer itethilem arrpemarl, arla Saturday-elan." <sup>13</sup> Artwa arntety renh ilek Jesus-el, "Akwa arratyirra!" Artwa ra akwa arratyirrek, mwerr-anem, akwa ingwer-apeny.

<sup>14</sup> Pharisee-rnem rernem tyerrelhek tyaty-they. Rernem tyel-angkerrenh Jesus ikwer, rarl arntety renh mwerrilek, arla anyent impen apmwilek Jesus-el. Rernem angkerrenh Jesus renh atwetyek.

#### *Isaiah-kenh angka innaganem irreyel*

<sup>15</sup> Jesus-el awek, rernemarl ikwer mpwelhenh, ranem alpek apmer ingwer-warl. Akngerrel renh apentek. Ikwer-penhan, ra akngerr arntety-rnem mwerrilek. <sup>16</sup> Jesus-el renh-rnem artwerilek, "Arrantherr ingwer-rnem-warl iley-angenh. Arrantherr akater aney-alpenherr-arey. <sup>17</sup> Angka Akngey-kenh arraty innaganem irrek. Angkakert Isaiah arrwekel ingkwernek, Akngey alakenh angkek, <sup>18</sup> 'Aray, nhanyem artwa warrkenh atyen, atharl renh rwanek. Ayeng ikwer inkwrelheyel. Atha Itnweng atyen arrernek ikwer-warl, ra angka arraty ilerl-apayntetyek Jew-weny-rnemek, rernem arraty-angkwarr apenterl-ayntetyek ingkerrenhel. <sup>19</sup> Ra ingwer-rnem-then iltey-angenh, ra artewentyel arlkey-angenh iwerr ampepel. <sup>20</sup> Ra ingwer-rnem pwerep-anthey-angenh, rernem mwerr-angkwarr aneyel. Ra ikwer-rnem-itwel aneyen. <sup>21</sup> Apmer arleng-areny, Jew-weny-rnem rernem renh iterl-arayntetyek-awayt, rarl renh-rnem itethileyenh. Alakenh angkek Akngey."

#### *Atyetyart Arrenty-rnem-kenh*

(Mark 3:20-30; Luke 11:14-23; 12:10)

<sup>22</sup> Ingwer-rnemelan artwa aparrng anyent Jesus-warl atnwenhek. Artwa akerter arrenty-akert. Jesus-el renh mwerrilek. Artwa ranem mwerr angkek, mwerr-anem arek. <sup>23</sup> Rernem apatek, angkerrenh, "Nhanyem David-kenh innga!" <sup>24</sup> Pharisee-el-rnem awek-pen, rernem ikwer angkerrenh, "Artwa nhan arrenty-kenh rlterrak-akertel. Arrenty-kenh atyetyartel Jesus renh rlterrakilek, arrenty-rnem irrentetyek ingwer-rnem-they!"

<sup>25</sup> Jesus-el renh-rnem iterl-arek, rernemarl angkerrenh. Rap angkek, "Arrenty-kenh rlterrak-akertel nthakenh atha irrentey-angenh ikwer-rnem-they. Ra ayenh rlterrakiley-angenh, ikwerenh-rnem irrentetyek. Akngey-kenh Itnweng-akertarl ayengan. Itnweng rlterrak-akertel atha arrenty-rnem ingkerrenh irrentetyek. <sup>26</sup> Atyetyart arrenty-kenhel nthakenh ikwerenh-rnem irrentey-angenh.

<sup>27</sup> Arrantherr iterreyel, rarl ayenh rlterrakiler-anenty-arrpantey, arrenty irrentetyek. Arrekantherenh-rnem-alew, arrenty irrentey-angker ingwer-rnem-alew? Arrenty atyetyartel renh-rnem rlterrakiley-angenh, arrangkw! Arrantherr alakenh ayntarppilenty, irrentey-angker ingwer-rnem arrekantherr ahelirrem. <sup>28</sup> Akngey-kenh Itnweng-akertelant atha arrenty-rneman irrentetyek. Akngey-kenh-angkwarr alakenh aynteyel, arrantherr iterl-aretyek. <sup>29</sup> Artwa rlterrakan aneyel warl ikwerenhel. Ingwerenty nthakenh aylpey-angenharl, arnkwa ikwerenh irrtyert-inetyek. Artwa rlterrak anyent ingwerarl apetyem warl ikwerenh-warl, renh anterrkwemel, arertnemel, arnkwa ikwerenh ingkerrenh akngeynemel. Atyetyart arrenty-kenhan artwa rlterr-areny. Ayeng anyent ran rlterrakan, arrenty-kenh atyetyart antengileyek, arrenty ingwer-rnem irrentetyek.

<sup>30</sup> Ingwerenty atyeng awelhey-angenh, rap atyengety amentirrekarl, rap apmwangk-warrarl anem ilpertel mpwareyel, ingwer-rnem Akngey-kety amentirrem arrpemarl. <sup>31</sup> Ra Akngey-warl angkepirrenty, Akngeyel kel apmwa ikwerety iwem. Ra Itnwengek irrpelthirrenty, Akngeyel apmwa ikwerety iwey-angenh. <sup>32</sup> Ra Akngey-kenh Artwa Impenek irrpelthirrenty, Akngeyel kel apmwan ikwerety iwem rarl ikwer-warl angkepirrem. Ra Itnweng Rlwartek irrpelthirrenty, Akngeyel apmwa ikwerety iwey-angenh, ahern nhel, apmwan ikwerety iwey-angenh intem-antey."

#### *Amern arwerl-penh*

(Luke 6:43-45)

<sup>33</sup> Jesus-el angka ingwer-anem ikwer-rnem ilenh. "Arwerl mwerran amern mwerr-akertarl, arwerl arleny arrangkw amern-wenyarl. Arrantherr ayenh iterl-arey-angenh arwerl arleny-apeny. <sup>34</sup> Arrantherr anyelk-awarr, rtnwem anyelkel alheyel-apeny. Mwerr-arrpantey arrantherr angkeyel. <sup>35</sup> Artwa mwerr, ra mwerr iterreyel. Ra mwerr

angkeyel ingwer-rnemek. Artwa apmwa ra apmwangkwarr iterreyel. Ra apmwel-areth angkem ingwer-rnemek. Mwerran ra mwerr-antey ilelhem. Apmwan ra apmwantey ilelhem.<sup>36</sup> Atha arrenhantherr arraty ilem. Arlta ingkernel Akngeyel ingkerrenh ayerneyen, nthakenharl rernem angkenhan, arraty-angkwarr apek, apmwangkwarr apek.<sup>37</sup> Mwerrarl angkenh-rnem, arrantherr Akngey-angkwarr arraty aneyen. Apmwel-areth angkenh-rnem Akngeyel renh-rnem irrenteyen."

*Rernem Jesus renh arlkareweyel, ilek-ilek mpwarayntetyek  
(Mark 8:11-12; Luke 11:29-32)*

<sup>38</sup> Pharisee-el-rnem renh ayernek "Ilek-ilek-angkwarr mpwara, Akngey-kenh rlterrk-akertel, anwanther ngenh iterl-aretyek, Akngey-kenh innga." Moses-kenhel-rnem ayernek arrpemarl.

<sup>39-40</sup> Jesus-el renh-rnem ilek, "Arrantherr angka ilek-ilek ayerneyel-kety menty-anem, yanh ipmenherr-arey. Arrantherran apmwarl! Arrantherran intemarl arlkareweyel, 'Mwerr-angker mwanty mpwara Akngey-wenh rlterrk-akertel!' Nthakenh atha alakenh-anyem mpwarey-angenh arrekantherr. Athan angka Jonah-akertant ilem. Ranap angkakert Akngey-kenh arrwekeley. Arrantherr angka weth iterl-areyel. Aylperr ilkwrenh kwertnew, ingwa atherrel ra aynten aylperr-itwel kwen. Akngeyel aylperr iylarnek, Jonah renh iteth-antey rlkwethiel iwenhey-alpetyek aketh-warl kwaty impalth-warl. Ikwer-panhen rap tawen ilkwewarl Nineveh-warl alhek-anem, ra apmer ikwer-areny-rnem iletyek, apmwekety angkepirretyek Akngey-warl-athet. Ayengan Artwa Impen Akngey-kenh, ayengap arrekantherr katy ilweyen, awenng kwenel aynteyen ingwa atherrel, Jonah-arl aylperr-itwel atnertel kwenel ayntek-apeny, ingwa atherrel.<sup>41</sup> Nineveh-areny-rnem Jonah-ek awelhek, rarl angka Akngey-kenh ilenhek. Rernemap nyerrirrek-anem, apmwekety angkepirrek. Akngeyel mentyant renh-rnem arek, atwey-angenharl. Kel ayengan Atyetyart ilkwa inngarl Jonah-angkwarr. Arlta ingkernel, Akngeyel ingkerrenh-antey ayerneyen, rernem arraty-angkwarr apententyek. Arlta ikwerel-antey, Nineveh-areny-rnemel arrenhantherrenh apmwa antweyen, arrantherrarl atyeng awelhey-angenh-antey, apmwekety angkepirrey-angenh-antey.<sup>42</sup> Arrantherr angka iterl-areyel arelh atyetyart Sheba-areny-akert. Rap arleng alhek innga Solomon ikwer-warl, Akngey-kenh angka akalty-ayteng awetyek. Ayengan akalty inngarl Solomon-angkwarr. Arlta ingkernel, Akngeyel ingkerrenh-antey ayerneyen-angkwarr, arelh ra arrenhantherr apmwa antweyen arrpemarl, arrantherr atyeng awelhey-angenh-they."

*Arrenty anyent angkep-antey apeyam-alpeyel  
(Luke 11:24-26)*

<sup>43</sup> Jesus angkek ikwer-rnem, "Arrenty-wenh-angkwarrarl alakenh-anyeman. Arrenty ra artwa anyentel-arleng-tangkwel anem, ingwerentyel renh irrentem-anem ikwer-they. Ra artwa renh iwerl-alhem-anem, rap anpenhem-anem arlpaw-ampeny-warl-anem ywarn-antey nthwerl-ayntetyek, artwa ingwerek-anem, ikwer-itwel ltyerretyek.<sup>44</sup> Ran ament angkem, 'Ayengan angkep artwa ikwer-warl alpem, ayengarl awank anenhwarl.' Rap angkep alpem, artwa renh mwerr-anem arey-alpem, arlkan iylpwanem arrenty-weny-anem.<sup>45</sup> Artwa renh arem-penh, arrenty ra alpem, apmwa innga 7 ingwer-rneman ikngwerl-alpetyek, rernemap ingkerrenh artwa ikwer-warl aylpeyarr-alpetyek-anem. Artwa irrepern ra arrenty anyent-akert-tangkwel. Aleyan ra arrenty akngerr-akert-anem apmwa innganem. Angka atyenh apentey-angenh-they, alakenh apmwangkwarr apenteyel."

*Jesus-kenh amikw-then aytiekw-rnem-then  
(Mark 3:31-35; Luke 8:19-21)*

<sup>46-47</sup> Jesus-el akngerr ingwer-rnem akalty-anthenh. Amikw ikwerenh aytiekw ikwerenh-rnem-then apetyek, renh aretyek. Rernemap akethel rtney-alhek, aknggerarl arrngelel-kety. Ingwerentyel renh ilek, "Ntwa nhak-rnem awetyek alha! Amengkw ngkwenh aytiekw ngkwenh-rnem-then ngkwenh mpwelheyel akethel."

<sup>48</sup> Ran angkek, "Kakey atyehan angwenh-rnemarl? Amey atyeh angwenharl? Nharenly ingkerrenharl arrangkwarl, nhelarl aneyel-rneman. Arrantherr Akngeyek awelhenty, arrantherr atyeh arrpemarl.<sup>49</sup> Kwertengerl ilenh-rnemant atyeh inngerneman!<sup>50</sup> Angka Akngey-kenharl apenteyel-rnem atyeh ingkerrenh."

<sup>1</sup> Arlta anyent ikwerel-antey, Jesus warl-they tyerrelherl-alhek kwaty irrker-ampeny-warl. Ranem arrernelhey-alhek. <sup>2</sup> Akngerr innga akarirrek apmer arpanen-they Jesus-warl, rap ilenh angka ikwer-rnem. Akngerrelarl tyetilek-kety ra rtnwewarl-anem nganek, kwaytelarl rtnwa rtenh-warl. Ra rtnwethay-anem anemel-anem, angkan ikwer-rnem ilenh. Akngerr rtenherremel awelhenh Jesus ikwer kwaty ilkwa impaltheil. <sup>3</sup> Jesus-el angka akngerr ilenh. "Awelhenh-arey atyeng! Artwa anyentel ra ntang weyt iwerl-apen, amern lyapetyek. <sup>4</sup> Artwa ra ntang weyt ingwerentyan iwerr arlertek-warl iwerl-apen. Thip-rnemel apetyemel arlkwek ingkeren. <sup>5</sup> Artwa ra ntang weyt ingwerentyan ahern apwert-angketyarr-warl iwerl-apen. Rernemap alyepel lyaperrek. Artekkerr kwen-aylpay-angenh ahern apwert-angketyarrel. Nthakenh lyapey-angenh ahern apwert-angketyarrelan arrangkw. <sup>6</sup> Atherrk-rneman arlenyirrek-anem itwern-penh kwaty-wenyl. <sup>7</sup> Artwa ra ntang weyt ingwerentyan ahern arkerl-angketyarr-warl iwerl-apen. Arkerl artekerrel amern weyt lyapey-angenhilek. Arkerl-angketyarrelan lyapey-angenh amern weyt arrangkw. <sup>8</sup> Artwa ra ntang ingwerentyan ahern mwerr-warl iwerl-apen. Amern weyt ahern mwerrarl lyapek. Ntang weyt anyent-they amern akngerr lyapek, ntang 30 apek. Ntang weyt anyent ingwer-they 60 apek, ntang weyt anyent ingwer-they 100 apek. Aparnp-anem irrenh. Arnkengeny-anem inpanem."

<sup>9</sup> Jesus-el renh-rnem ilek, "Angka nhanyem mwerr atha arrekantherr ilem, arranther-rap iterl-arenherr-arey!"

<sup>10</sup> Kwertengerl ikwerenh-rnem rernem renh ayernek, "Ilek ntwa angka anyelkelan ileyel anwekantherr. Angka ngkwenh anayntila anwekantherr!"

<sup>11</sup> Jesus-el renh-rnem ilek, "Nhanyem atha angka arrekantherr anayntilek, Akngey-kenh-angkwarr. Nthakenh atha angka ingkerr ingwer-rnemek anayntiley-angenharl. Nthakenh atyengan akngerr awelhey-angenharl. <sup>12</sup> Arranther Akngey-kenh angkek mwantyel awelhenty, inkwerelhemel, Akngeyel arrenhantherr intem-antey akaltyilem. Arrangkwelan, Akngeyel arrenhantherr akalty-anthey-angenh. <sup>13</sup> Atharl rernem angka anyelk-rnem awekarl-penhan, rernem ywarn iterrey-alpeyel. <sup>14</sup> Isaiah-el angka alakenh ingkwernekk. Angka innganem ayntek, 'Rernem ayenh awek-pen, rernem mwantyel awelhey-angen-antey. Rernem ayenh arek-pen, rernem ayenh iterl-arey-angen-antey, akwerrp.' Angka innganem irrek. <sup>15</sup> Rernem iylpel awelhey-angenh ingkerrenh. Rernem arey-angenh aparrng-apeny. Rernem atyeng mwantyel awelhenty, rernemap ingkerr Akngey-warl angkepirremarl.'

<sup>16</sup> Arrantherr annga mwerr-akertel anngetherr areyel, iylpa mwerr-akertel aweyel, <sup>17</sup> Angkakert arrwekeleny-rnem artwa arraty-rnem-then rernem ilkelhenh, ayenh aretyek, aley arrantherr ayenh anaynt areyel-apeny. Rernem ilkelhenh ayenh awetyek, aley arrantherr ayenh aketh aweyel-apeny.

<sup>18</sup> Angka nhanyem awelhenherr-arey, atharl arrenhantherr ilem, angka ntang-akert.

<sup>19</sup> Amern weytarl arlperrty iwem-apeny, angka nhanyem Akngey-kenh ingkerrenh angkwarr arlperrtyirrem. Ingwer-rneman ntang weytarl iwerr arlertek-warl iwek-apenyarl. Rernem Akngey-kenh angkek awelhem-tangkwel, rernem Akngey-angkwarr-anem apentyel. Arrentyel Akngey-kenh angka ilpertileyel. Rernem intwemelirreyel Akngey-kety, rernem intem-anem apmwel-areth aneyen. <sup>20-21</sup> Ingwer-rnemel Akngey-kenh angka awemarl-pen, rernem mwerrarl apentyel angath-antey. Rernem ntang weytarl apwert-angketyarrelan iwek-apenyarl. Artekkerr-rnem aylpeyel angath-antey apwert-angketyarrelan. Rernem alakenh-anyemarl Akngey-kenh angka apentyel angath-antey. Rernem ipmelhemant-anem, ahe lengkwl-rnem atwekkerr, apmwia mpwarekerr. <sup>22</sup> Ingwerentyan ntang weytarl arkerl-angketyarr-warl iwek-apenyarl. Rernem Akngey-kenh angka iylpelant aweyel. Rernem apwert manek ampwal ingwerentyek-then iterrelr-anem apmwel-areth. Mwerrek iterrekerr, ikwerant iterreyel. Rernem anterrkweyel-apeny ilpertilemel, arkerlrel ntang weyt anterrkweyel-apeny. <sup>23</sup> Ingwerentyan ntang weytarl ahern mwerr-warl iwek-apenyarl. Rernem Akngey-kenh angka awemel, rernem inkwerelhem."

### Atherrk apmwakert

<sup>24</sup> Jesus-el angka ingwer-anem ilenh. "Akngayan Ingkart ingkerrenhek aneyel, alakenh-apeny anem. Artwa atyetyart anyentelan ntang weyt iwerl-apen, amern ament lyapetyek. <sup>25</sup> Ingwel ra arkwantyenth warrkenh ikweren-hrnem-then. Artwa apmwel apetyek, antywer apmwernem iwerl-apen weyt-angketyarr-warl.

<sup>26</sup> Atherrk mwerr-rnem lyapek, atherrk apmwernem-then lyapek iyntwerel.

<sup>27</sup> Warrkenh ikwerenhel-rnem renh ayernek, 'Nthakenharl atherrk apmwia nhenh-rneman lyapek mwerr-itwelan?'

<sup>28</sup> Atyetyartel renh-rnem ilek, ‘Artwa apmwel atherrk apmwer nem lyapelhiletyek.’ Warrkenh ikwerenh-rnem angkerrenh, atherrk apmwer nem tyerreynetyek. Rernemap renh ayernek, ‘Atherrk apmwer nem anwantherr tyerreneyar?’

<sup>29</sup> Ra angkek, ‘Menty, ipmenherr-arey, amern-rnem-then tyerrekkerr. <sup>30</sup> Amern ntang ampengirrentyelant, atha warrkenh atyenh-rnem thwenem, renh-rnem ingkerrenh tyerretyek, apmwer nem akgakemel, mwerr-rnem ingwer-ampeny-warl arrernemel, atherrk apmwa rwewarl iwetyek. Mwerr-angkwarr atherrk mwerr-rnem pweytiletyek, warl ilkewewarl akwerney-alenty.’

*Angka arwerl-akert*

(Mark 4:30-32; Luke 13:18-19)

<sup>31-32</sup> Jesus-el angka ingwer-anem ikwer-rnem ilenh, “Akngay-kenh-angkwarr alakenh aynteyel arrpemarl. Ntang ankwer rernmarl lyapeyel-apeny ahernel. Ntang ankerr-penh lyapem arwerl ilkwa. Thip-rnem ikwer-warl arrernalhemarl. Ankerr anyent-apeny, Akngay-kenh anyent anenah.”

**Anayntileyel:** *Ntang arwerl akngerr aneyel-apeny, Akngay-kenh-rnem akngerr-anem aneyel. Rerneman arlperryirrem, ntang arwerl akngerr arlperry aneyel-apeny. Alakenh-anyeman irrpetyapelant Akngay-kenh angkan apenteyel. Ikwer-penhan akngerrel-anem Akngay-kenh angka apenteyel. Rerne man arlperryirrem, ntang arwerl arlperry aneyel-apeny.*

*Amern arlwariley-angker-akert*

(Luke 13:20-21)

<sup>33</sup> Jesus-el renh-rnem angka ingwer-anem ilenh, “Amern arlety akely-penh amern ilkwerrem, arlwar rtnemel, arlwariley-angker-akert. Amern akngerr-anem amper nem. Alakenh-anyemar yanhey, Akngay-kenh-angkwarr. Akngay-kenh-rnem akngerram-akngerr irreyen arrpemarl, amern arlwariley-angker-akert-apeny. Alakenh-apeny Ingkart-kenh-rnem akngerram-akngerrirem arrpemarl.”

*Angka anyelk-angkwarr akalty-antheyel*

(Mark 4:33-34)

<sup>34</sup> Angka angath-antey renh-rnem akalty-anthenh, angka arrpanenh ikwer-rnem anayntileyel-angenh. Angka anyelk-antey ayntenh, angka iley-angenh anaynt. <sup>35</sup> Akngay-kenh angkakert ra arrwekel ingkwernek-angkwarr-antey, kel arraty innga ayn tek. Akngay-kenh angka alakenh aynteyel: “Atha angka anyelk ikwer-rnem iley. Arrwekelely-rnemel angka anyelk-rnem awey-angenh-antey.”

*Jesus-el angka anayntileyel ikwer-rnem*

<sup>36</sup> Kwertengerl ikwerenh-rnem Jesus ikwer-warl apetyek, renh ayernetyek, “Angka weth atherrk apmwepenh anayntila, ntang weyt-they iyntwerelarl lyapek.”

<sup>37</sup> Jesus-el angka ikwer-rnem anayntilek, “Akngay-kenh Artwa Anyent Impen, ayeng artwa ntang mwerr iwerl-apenh-apeny. <sup>38</sup> Apmer amern-angketyarrel atherrk akngerr, ahern nhelarl akngerr aneyel-apeny. Akngayek awelheyelarl-rnem ntang mwerr-apeny. Arrency-kenh-rnem, rernem atherrk apmwapeny. <sup>39</sup> Atherrk apmwa iwey-angkeran anayntileyel arrentyen. Warrkenh-rnem anayntileyel angel-rnem.”

<sup>40</sup> Atherrk apmwa rwewarl iwem-apeny, alaker-anyem aynteyel arlta ingkernel. <sup>41</sup> Akngay-kenh Artwa Impen atha angel-rnem thweneyeh, apmwer nem akgakeyeh ikwerenh-rnem-they. <sup>42</sup> Angel-rnemel ingkerrenh inem, apmwangkwarr alheyel-rnem-then akgakeyeh, rwa ilkewewarl iweman, ingkerrenh artewentyel arrangkeyeh-warl.

<sup>43</sup> Akngay-kenh-rnem arrtyerneyeh ingkenyel-apeny, ikwerenh ingkerrenh. Angka nhanyem mwerr atha arrekantherr ilem, arrantherrap ingkerrenhel iterl-aretyek!”

*Angka ampwal impen-akert*

<sup>44</sup> “Artwa ingwerel ampwal man-angketyarr arerl-alpek, inkwerelhemel. Ranem man renh arlwarrernek. Ra arterl-alhek, ra ingwer-inger apey-alpetyek. Ra anyent ikwerant arrkernelhenh, renhant inetyek. Ra ilek-ilek ikwerenh tharlemilek, apmer man-angketyarr renh payemeley-alenty. Ampwal man-angketyarr impen, mwerr-angker Akngay-kenh-angkwarr alakenh arrpemarl, impen alakenh-anyem aynteyelan.”

*Angka apwert impen-akert*

<sup>45</sup> “Artwa anyent ingwer apwert pearl mwerr-angker ikwer nthwerl-apenh, impenek-antey. <sup>46</sup> Ra apwert mwerr-angker store-itwek arerl-alpek. Ra apwert arlwarrenherl-alpek, apmer ikwerenh-warl alpemel. Ra apwertekant arrkernelhenh. Artwa ranem

ampwal ilek-ilek ikwerenhanharle, apwert pearl mwerr-angker renh payemeley-alenty man ilkwel. Man ingkerrenh arimpek, apwert renhant payemeleyek. Akngey-kenh impenekey-antey arrpemarl, apwert pearl-apeny.”

**Anayntileyel: anwantherr Akngey-kenh-angkwarr anetyek arrkernelheyel arrpemarl, artwa rarl arrkernelhenh-apeny. Anwantherr Akngeyek iterreyn-nynteteyek, impenekey-antey.**

*Angka netting-akert angka irrpeng ingwerek-ingwer-akert*

<sup>47</sup> Jesus-el angka ingwer-anem ikwer-rnem ilenh, “Akngey-kenh-angkwarr alakenh aymteyel; artwernem rernem netting iwek kwaty-warl, irrpeng ingwerek-ingwer anter-rkwetyek. <sup>48</sup> Rernem-anem netting renh kwaty irrkerr-ampeny-warl ayteng-akngeynek irrpeng-angketyarr. Ikwer-penhan rernem irrpeng renh-rnem akngakeyenh. Irrpeng mwerr-rnem rernem atnyeneyel. Irrpeng apmwernem rernem menty iwem. <sup>49</sup> Alakenh-apeny arla ingkernel ayteneh. Angel-rnem apetyeyen, apmwa ingkerrenh akngaketyek, mwerr-rnem-they. <sup>50</sup> Renh-rnem-anem ingkerrenh rwa aknganenty ikwer-warliweyen, ikwer-itwek-anem rernem artewentyel innga arrangkeyenh.”

<sup>51</sup> Jesus-el renh-rnem ayernek, “Arranther angka nhenh aweyel?” Rernem angkek, “Kel, anwantherr aweyel!”

<sup>52</sup> Ikwer-penhan ra renh-rnem ilek, “Store-arenyel ampwal ilek-ilek tharlemileyel, awankeny-rnem-then lyerteny-rnem-then. Ingkart Akngey-kenh angka ingkerrenhek arraty akaltyirretye, angka arrwekeleny-angkwarr akaltyirretye angka lyerteny-angkwarr akaltyirretye. Alakenh-anyem Akngey-kenh-angkwarr arraty apenteyel.”

*Nazareth-areny-rnem Jesus ikwer irrpelthirreyel*

(Mark 6:1-6; Luke 4:16-30)

<sup>53-54</sup> Jesus tawen Nazareth, apmer ikwerenhanwarl alpek. Ra warl kwen-warl aylpek, Jew-kenh tyat� akely-warli. Ra renh-rnem akalty-anthenh. Ingwer-rnem Jesus-ek inkwerelhek. Rernem angkerrenh, “Jesus rantarl ingkerrenh-angkwarr iterl-areyel, ran akalty innga. Ranap ngangker-akert inngarl nhenhey, arntety mwerriley-angkerarl.” Akngerr ingwer-rneman Jesus-ek irrpelthirremel angkerrenharl, <sup>55</sup> “Jesus ahern-areny-kenh alerikw! Ilek-ilek arwerl-penh arnwarye-angkeran-kenh! Ilenan Mary-kenh ampikwarl! Atyeyikw-rneman ikwerenhan apmer nhareny-rnemarl. Itnan atyeyikw-rnem ikwerenhan, James, Joseph, Simon, Judas. <sup>56</sup> Arrempikw-rneman ikwerenhan apmer nhareny-rnemarl. Ran anwantherr-apeny arrpemarl, Akngey-kenh inngewenyarl.”

<sup>57</sup> Jesus angkek, “Apmer nhareny-rnemantarl atyeng irrpelthirremelan angkerreyel, ayeng angkakert Akngey-kenh inngewenyarl. Atyen-hrnem atyeng irrpelthirreyel arrpemarl.”

<sup>58</sup> Apmer-areny-rnem ikwer irrpelthirrenharl-kety, Jesus-el renh-rnem mwerriley-angenh.

## 14

*John Baptise-emeley-angker atwelyel*

(Mark 6:14-29; Luke 9:7-9)

<sup>1</sup> Herod, atyetyart Galilee-arenyel angka awek, Jesus-elarl arntety-rnem mwerrilenh, apmer arrpanenhek. <sup>2</sup> Herod ra ywarn iterrenh John Baptise-emeley-angker ikwer. Ra warrkenh-rnem ilek, “Rang angkep ipmepenh itethirrek, rang apmer arrpanenhek mwerrileyel?”

<sup>3-4</sup> Herod-kenh awayikw anewikw ikwerenhan arelh anyent itnan Herodias. Herod-el anew ikwerenhan rakek. John-el renh ilek, “Ntwa nthakenharl awayengkwan anew ikwerenhan rakek? Apmwel-aretharl alakenhey! Awayengkw-anteyarl anew ikwerenhan ntwa rakekan, arraty-wenyal!” Arelh Herodias ra ahelirrek John ikwer. Herod-el artwa ahelengkw thweneh, John renh anterkwetyek, tyayl-warli akwernetyek. <sup>5</sup> Herod aterirrek ingwer-rnem-kety, ingwer-rnemelarl John renh iterl-arek Akngey-kenh angkakert. Herod atherr-angkwarr iterrenh, mwerr-angkwarr, apmwangkwarr.

<sup>6</sup> Atyetyart Herod-rnem-then Atyetyart ilkwa ingwer-rnem-then, apmer Galilee-areny-rnem akarirrek, rernem amern kwentying ingkerrenhel arlkwetyek. Atyetyart ahelengkw-rnem-then rernem akarirrek ingkerrenh amern ingkerrenhel arlkwetyek arrpemarl. Arelh Herodias-kenh ampikwarl rntwenh ikwer-rnem ingkerrenhek. Aleyak ikwer rernem inkwerelhek, rarl mwerr-angker Herod-kenh apmerel rntwenhek. <sup>7</sup> Herod-el kwey renh ilek, “Ilek-ilek akngerrek nga arlkwententy, atha ngenh anthem.”

<sup>8</sup> Arelh Herodias ra iterrek, John renh atwetyek. Kwey ra amikw ikwerenhan Herodias-warli alhek. Ra amikw renh ayernek, “Ilekekarl atha ayernem Atyetyart ilenan?”

Amelikw renh ilanthek, "Akapwert John Baptise-emeley-angker yanh ina, pmwar-warl arrernemel, ayenh anthemel!" Ikwer-penhan kwey rap Atyetyart Herod-warl alhek. Ra Atyetyart Herod renh ilek, "Akapwert John Baptise-emeley-angker arterna, pmwar-warl arrernemel, ayenh anthemel."

<sup>9</sup> Herod ra amperngant-anem irrek John ikwer. Akngerrel renh awekarl-kety, ra nthakenh akengeny angkey-angen. Nthakenh ra arrkngert angkey-angen.  
<sup>10-11</sup> Herod-el ahe lengkw thwenek tyawl-warl, John ahenty arternetyek. Ahe lengkwel arreylpel akapwert arternek, akapwert renh pmwar-warl arrernemel, kwey renh anthek. Kwey ra amikw-warl akngeyn, John Baptise-emeley-angker akapwert.

<sup>12</sup> John-kenh kwertengerl-rnemel angka awek, rarl ilwek. Rernem apetyek, ipma awenng-warl akwernetyek. Rernem renh akwernekk. Rernem Jesus renh angka ilek.  
<sup>13</sup> Jesus ra angka John-akert awek-penh ra nganerl-alhek rtnewararl, ra Galilee kwaty ilkwangkwarr artarnpenhek, apmer alther-warl, ampeny-warl, ra ament anayntetyek. Ingwer-rnem ingkern-they artenhirrek-anem ikwer-warl, ingkel alhemel tawen-they.

*Jesus-el 5,000 wanteyel  
(Mark 6:30-44; Luke 9:10-17; John 6:1-14)*

<sup>14</sup> Jesus-anem rtnwetthey atwarrek, ra akngerr arek. Ra ikwer-rnem amperngirrek, ingkerrenh arntety-rnem-then mwerrilek.

<sup>15</sup> Atwerrp, kwertengerl ikwerenh-rnem Jesus-warl apetyek, ikwer angkek, "Amern-wenyarl nhanyeman, arrangkwarl. Yanh-rnem ingkerrenh-antey thwena tawen-rnem-warl, amern-tangkwel inerl-alpetyek. Atwerrpirrekerrem-awaty!"

<sup>16</sup> Jesus angkek, "Arlkarel arranther wantenher-arey."

<sup>17</sup> Rernem Jesus renh ilek, "Amern ampeng 5-pelant, aker irrpeng atherr-thenant."

<sup>18</sup> Jesus-el renh-rnem ilek, "Atyeng-warl akngetyenherr-arey!" <sup>19</sup> Jesus-el renh-rnem ilek, rernem arrnerelhetyek atherrk-warl. Amern irrpetyap aker irrpeng-atherr Jesus-el inek. Ra Ingkart Akngey-warl angkek inkwerelhemel, rarl amern anthek, aker irrpeng-then anthek. Jesus-el amern rlweth-akek. Ra kwertengerl ikwerenh-rnem anthek, rernem-anem antheynetyek ingwer-rnem. Jesus-el aker irrpeng rlweth-akek. Ra anthek kwertengerl ikwerenh-rnem rernem antheynetyek ingwer-rnem.

<sup>20</sup> Rernem ingkerrenhel arlkwek-penh, rernem atnerteng-anem anek. Rernem aker-tang arlkwekarl-penh, rernem rtnwa amernek-arelh 12-pel-warl ampwerrk iweynek.

<sup>21</sup> Artwa 5,000-el amern arlkwek, arelh-rnem-then, ampernem-then ingkerrenhel.

*Jesus ra ingkel irrwerlap-alheyel kwaty ampep-angkwarr, ahern-angkwarr-apeny  
(Mark 6:45-52; John 6:16-21)*

<sup>22</sup> Jesus-el kwertengerl ikwerenh-rnem ilanthek, rernem rtnwel kwaty anthenayn-ampeny-warl artarnpenhetyek arrwekel-antey, ra ingwer-rnem ilanthek rernem apmer-warl-anem alpetyek. <sup>23</sup> Rap apwert irrwerl-warl nganek, Akngeyek ament angketyek. Atwerrpirrek-anem, ra ament-areny aneh. <sup>24</sup> Rtnwa ranem kwaty ampep-itwek. Awer ilkwel rtnwa renh akngelhew-akngelhilek.

<sup>25</sup> Ingwepenh ingkeny tyerrelhetyek, ra ingkel irrwerlap-alhek kwaty ampep-angkwarr, ahern-apeny. <sup>26</sup> Kwertengerl ikwerenh-rnem renh arek, rernem aterir-remel arlkenh, "Arrewalye yanhan." Rernem aterirrek, arrewalyek-ather.

<sup>27</sup> Jesus-el renh-rnem ilek, "Artewentiyel aterirrey-angenh! Ayengarl nhan!" <sup>28</sup> Peter-el renh tyernek, "Ingkartay, ayenh ila, ayeng kwaty-angkwarr alhetyek ngkweng-warl!"

<sup>29</sup> Ranem angkek, "Apetya." Peter ranem rtnwetthey atwarrelhilek, kwaty-angkwarr ingkel alhemel Jesus-warl. <sup>30</sup> Ranem aterirrek alherrp-kety, kwen-anem aylper-alhetyek-anek. Ra arlek, "Ingkartay, ayenh itethila!"

<sup>31</sup> Jesus ra anamerl-antey iltya ikwerenh anterrkwek angkemel, "Ilek-kety ntwa ayenh tnakey-angenh!" <sup>32</sup> Ratherr rtnewararl nganek, kwaty awer-akert arternp-anem irrek atnengk-anem. <sup>33</sup> Rernem renh tnakek, "Nga Akngey-kenh alerikw innga!"

*Jesus-el akngerr mwerrileyel apmer Gennesaret-itwek  
(Mark 6:53-56)*

<sup>34</sup> Rernem artarnpenhek intwarr-ampeny-warl, apmer Gennesaret-ampeny-warl.

<sup>35</sup> Apmer ikwer-areny-rnemel renh arek-penh, rernem-anem ingwer-rnem ilek. Apmer arrpanenh-they arntety-rnem akngetyenh ikwer-warl. <sup>36</sup> Rernem iterrenh, "Anwantherr arnkwa ikwerenh arnenty anwantherr mwerrirremarl." Rernem arnkwa arnep-arnek-penh rernem mwerrirrek-anem, arntety-weny-anem.

## 15

*Pharisee-rnemel angka arrwekeleleng-angkwarr apenteyel  
(Mark 7:1-13)*

<sup>1</sup> Moses-kenh-rnem-then Pharisee-rnem-then Jesus-warl akarirrek Jerusalem-they.  
<sup>2</sup> Rernem arek, kwertengerl Jesus-kenhel-rnem itep aterngel amern alhewerarl arlkwek, itep lhewelhey-angenhel. Jew-rnem itep lhewelhenh amern arlkwey-alenty. Rernem Jesus renh ilek, "Kwertengerl ngkwenhel-rnem nthakenarl itep lhewelhey-angenharlan amern arlkwey-alenty. Arrwekeleleng-kenh apmer nhel aknganek amern arlkwey-alenty itep lhewelhetyek."

<sup>3</sup> Jesus-el renh-rnem tyernek, "Arrantherr Akngey-kenh angkekety intwemelirrek, ahern-areny-kenhant arrantherr apenteyel. <sup>4</sup> Atha ileyel Akngey-kenh angkel: 'Arrantherr ameyek akngeyek awelhennh-arey' Moses-kenh angka alakenh-anyemar aynteyel arrwekelelengyan: 'Akngayek ameyek apmwel-areth angkentyek, renh ipmek atwem.' <sup>5</sup> Arrantherr apmwel-areth akalty-antheyel, Akngey-kenh-angkwarr-weny. Arrantherr man ikwerel amey-rnem-then akngey-rnem-then arntarnt-arey-angen, man ilenh arrantherr ayerrpyleyel. Arrantherr irrtiyerremel ileyel man nhenhan Akngey-kenh-arrpantey. <sup>6</sup> Arrantherr Akngey-kenh angkekety ipmelhek, angka arrekantherrenh-angkwarrant akalty-antheyel. <sup>7</sup> Arrantherr irrtiyerremel ilelheyel. Awank-akerr Isaiah-el Akngey-kenh angka pip-warl ingkwernek, arrantherran aneyel-apeny.

<sup>8</sup> Akngey angkek ikwer-rnem, 'Arrantherr irrtiyerremel atyeng inkwerelheyel, atyeng-angkwarr apentey-angen. <sup>9</sup> Arrantherr apenteyel arrekantherrenh-angkwarrant, ahern-areny-kenh-angkwarrant, Akngey-kenh-angkwarr-weny. Alakenh arrantherr ingwer-rnem apmwangkwarr akalty-antheyel.'

*Alakenh Akngey-angkwarr apmwelhilem  
(Mark 7:14-23)*

<sup>10</sup> Jesus-el akngerr ingwer-rnem akarrilek. Ra renh-rnem ilek, "Atyeng arrantherr awelhetyek arternp. <sup>11</sup> Amern arrantherr arlkwetyek alhewer, nthakenarl arrantherr apmwelhiley-angen Akngey-angkwarr, amern alhewer arlkwemel. Arrantherr apmwel-areth angkenty, arrantherr Akngey-angkwarr apmwelhilemarl."

<sup>12</sup> Kwertengerl ikwerenhel-rnem renh ilek, "Pharisee-rnem ngkweng ahelirrenh nga apmwel-areth angkenty-arrpantey."

<sup>13</sup> Jesus-el renh-rnem ilek, "Apmwangkwarrarl akalty-antherl-anentyan, Akngayel renh iwemarl, arwerl apmwa iwem-apeny. Pharisee-rnem arwerl apmwapeny. <sup>14</sup> Artwa aparrngel nthakenh atwenhey-angen artwa aparrng ingwer. Ratherr atherr-anteyarl atynekkerr irrkewarl aparrngant-atherr."

***Anayntileyel: Alakenh-anyem Jesus-el ikwer-rnem ilenh, Pharisee-rnem arwerl apmwapeny anen, rernem artwa aparrng-apeny.***

<sup>15</sup> Peter-el renh ayernek, "Angka anyelk anwernekantherr anayntila, angka amern alhewer arlkwentyek."

<sup>16</sup> Jesus angkek, "Ntwa iterl-arey-angen-antey, ywarn iterreyel! <sup>17</sup> Amern alakenh arlkwemer, nthakenh arleng-alenty ayntey-angen, rap atnert-they ywerrem. <sup>18</sup> Apmwel-areth angkenty, arrakert-they angka apmwel-areth ikwerenhl tyerrelheman. Alakenh apmwelhileyl Akngey-angkwarran. Amern-then aker-then arrangkwarl, nthakenh Akngey-angkwarr apmwelhiley-angen. <sup>19-20</sup> Arrantherr apmwel-areth iterrenty, arrantherrap Akngayek-y amentirremarl, apmwelhilemarl. Arrantherr ingwerenty ipmek atwenty, ingwer-kenh arrkar irrtiyertel ikngwenty, arrantherr irrtiyertel inenty, arrantherr tyel-angkenty ingwer-rnemek, arrantherrap Akngey-kety apmwangkwarrarl aneman. Amern arlkwenty itep aterrng-akertel nthakenh Akngey-angkwarr apmwelhiley-angen. Kel ntwa amern arlkwetyek alhewer."

*Areh Canaan-areny anyentel Jesus renh tnakeyel  
(Mark 7:24-30)*

<sup>21</sup> Jesus ra anperl-alhek apmer Tyre-warl, Sidon-warl. <sup>22</sup> Ikwer-penh arelh Jew-weny Caanan-areny-anem anterrey-alhenh Jesus ikwer-warl arlkemel, "Ingkartay, David-kenh, atyeng amperrngirra! Ampa atyenth arrenty-angketyarr!"

<sup>23</sup> Jesus-el renh tyerney-angen, arelh rarl aleth-antey ikwer arlkeynenh. Kwertengerl ikwerenhr-nem Jesus ikwer angkek, "Areh yanah irrenta".

<sup>24</sup> Jesus ran angkek, "Akngayel ayenh thwenek, atha Israel-kenh-rnemant arntarnt-aryantetyek, rernem aperrertirrekerr amentirrekerr yep-yep-rnem ingwer-rnemarl aperrertirrem-apeny atyetyart-wenyl."

<sup>25</sup> Arelh ranem arrer-apeny irrek. Rap kwenirrek-anem ikwer angkemel, "Ingkartay, atyeng amperrngirral!"

<sup>26</sup> Jesus-el renh ilek, "Atha Jew-rnemant arntarnt-areyel, atyenh-rnemant. Anwantherr ampernem-tangkwel wantey. Ampel-rnem-tangkwel arlkwenty-penh arengk-rnemant-anem wantemel. Atha atyenh-rnem Jew-rnem-tangkwel arntarnt-areyel."

<sup>27</sup> Arelh angkek ikwer, "Arengkel-rnem arlkwetyek arrpemarl, arengk-kenh amerian rernem iwetyek arrpemarl. Jew-rnem rernem ingkerrehn atyenh-rnem-kety arkarir-reyel. Atyenh-rnemant arengk-apenyarl aneyel, Jew-rnem-angkwarr. Atha ngenh iterl-areyel, ntwa ingkerrehn arntarnt-arey-angker. Atyeng-then amperrngirral!"

<sup>28</sup> Jesus ran angkek, "Nga atyeng arternp awelhek, kel atha ngenh arntarnt-arem." Kel anamerl-antey arrenty tyerrelhek kwey ikweren-they, kwey ikweren mwerr-anem irrek.

<sup>29</sup> Jesus apmer ikwer-they alpek, ra kwaty Galilee impalh-angkwarr alhenh. Ra apwert ilkwewarl nganek, apwert-itwek anen. <sup>30</sup> Akngerrr ikwer-warl akarrirek, Rernem arntety-rnem-then akngayneke ikwer-warl, lerrp-rnem-then aparrng-rnem-then akerter-rnem-then arntety ingwer-rnem-then. Jesus-el renh-rnem mwerrilek. <sup>31</sup> Ingkerrehn apateyelpek. Akerter-rnem mwerr-anem angkenh, lerrp-penh rernem mwerr-anem alhenh. Aparrng-penh-rnem arenh-anem. Rernem inkwerelhek Akngay Israel-kenhek, Jesus-elarl ingkerrehn mwerrilek, Akngay-kenh rlterrakertel.

*Jesus-el artwa 4,000 wanteyel, arelh-rnem-then ampernem-then*

*(Mark 8:1-10)*

<sup>32</sup> Akngerrr akarrirek Jesus-warl. Amern ingkerrehn ywerrelhilek. Jesus irrepern angayakw-rnemek amperrngirrek. Jesus ilelhek kwertengerl ikweren-hrnemek, "Ayeng irrepern angayakw-rnemek amperrngirreyel. Arlta irrpety-inger rernem anwekantherr-itwel anen, angayakw. Nthakenh atha renh-rnem thweneyney-angenh, apmer arleng-warl alpetyek, rernem aytnay-alpekerr angayakw angath-antey."

<sup>33</sup> Kwertengerl ikweren-hrnemel renh ayernek, "Amernan anwantherr nthenth-itwel inem artwa arnkengeny wantetyek? Arrangkwarl nhenhan, aherretyarl! Atherrkeny-weny!"

<sup>34</sup> Jesus-el renh-rnem ayernek, "Amern akngerrelang arrekantherrenhan?" Rernem renh tyernek, "Ya, amern ampeng 7-ant aynteyel, aker irrpeng irrpety."

<sup>35</sup> Jesus-el ingkerrehn ilek, "Arrantherr ingkerrehn anen-herr-arey ahernel." <sup>36</sup> Jesus-el amern 7 renh-rnem inek aker irrpeng-rnem-then. Ra Ingkart Akngay-warl angkek, inkwerelhemel, amern-then aker-then akngerr anthetyek. Jesus-el amern-then aker-then rlweth-akek, kwertengerl ikweren-hrnem anthemel, rernem artwa ingwer-rnem antheynetyek ingkerrehn.

<sup>37</sup> Jesus-el amern irrpety-penh irrpelthel akngerrilek, ingkerrehn wantetyek. Amern akngerr menty-anem irrek. Kwertengerl rernem ingkerrehn amern-rnem akwetyeynek, teram 7-warl ampwerrk iwemel ingkerrehn. Teram 7 amern akngerr-akert rtnen.

<sup>38</sup> Artwa 4,000 rernem atnerteng-anem anen, arelh-rnem-then ampernem-then.

<sup>39</sup> Jesus-el ingkerrehn thwenek, rernem apmer-warl alpetyek. Jesus rtnnewarl nganek. Rtnwa ikwerel rernem alhek apmer ingwer-ampeny-warl-anem, apmer Magadan-warl.

## 16

*Rernem Jesus renh arlkareweyel*

*(Mark 8:11-13; Luke 12:54-56)*

<sup>1</sup> Artwa Pharisee-rnem Sadducee-rnem-then Jesus-warl apetyek, ilerretyek. Rernem renh arrkerrek, Akngay-kenh rlterrkek, ingwerek-ingwer-angkwarr mpwaretyek, mwerriletyek. <sup>2</sup> Ranem renh-rnem ilek, "Alken rnter-rnter irrenty atwerrpan ntwa arem, kel iterl-arem-anem ingwepenh alker akethirrem arrpemarl. <sup>3</sup> Kwenpayel artem, ingwepenh kwaty rntweyen-hanem. Arrantherr alhengk-areyel alker yanh, kwatayarl rntweyen. Kwaty rntwey-alenty arrantherr arem, arrantherrap iterl-arem. Arrantherr aleyan iterl-arey-angenh, nthakenharl irreyehn."

**Anayntileyel: Jesus-el ikwer-rnem ilek, "Ayeng Akngay-kenh Impen. Arrantherr atyeng awelhey-angenh, ayengarl Akngay-kenh innga. Atha ilek-ilek mpwarek, Akngay-kenh angka akalty-anthek. Arrantherr atyeng irrpelthirrenharl."**

<sup>4</sup> Jesus-el renh-rnem ilek, "Arrantherr angka ingwerek-ingwer ayerneyel-kety menty-anem ayenh ipmenherr-arey. Arrantherran apmwarl! Arrantherran ayenh intemarl arlkareweyel, 'Mwerr-angker mwanty mpwara Akngay-kenh rlterrakertel!' Atha

alakenh-anyem mpwarey-angenh arrekantherr. Athan angka Jonah-akertant ilem arrekantherr.”

**Anayntileyl:** *Ranap angkakert arrwekelely Akngey-kenh. Arrantherr angka weth iterl-areyel. Aylperr ilkwel renh kwertnek, ingwa atherrel ra aynten aylperr-itwel kwen. Aylperr ilkwel renh kwertnew, ingwa atherrel ra aynten aylperr-itwel kwen. Akngeyel aylperr iylarnek, Jonah renh iteth-anterey rlkwethirrelhiletyek aketh-warl, kwaty impalh-warl. Ikwer-penhan rap tawen ilkwewarl Nineveh-warl alhek-anem, ra apmer ikwer-areny-rnem ileyek, apmwekety angkepirretyek Akngey-warl-athet.* “Ayengan Artwa Impen Akngey-kenh, ayengap arrekantherr katy ilweyeh, awenng kwenel aynteyen ingwa atherrel, Jonah-arl aylperr-itwel atnert kwenel ayntek-apeny, ingwa atherrel.” Matthew 12:39 aynteyel arrpemarl.

*Mwantyel arntarnt-arelhenherr-arey Phariee-rnem-kety  
(Mark 8:14-21)*

<sup>5</sup> Kwertengerl ikweren-hrnem kwaty ilkwangkwarz artarnpenhek. Rernem amern am-peng iwerl-alhek apmerek. <sup>6</sup> Jesus-el renh-rnem ilek, “Mwantyel arntarnt-arelhenherr-arey artwa Phariee-rnem-kety, artwa Sadducee-rnem-kety. Ahelarl rernem arlwar rtneyel-kety, thwet-penh-apeny, apmwangkwarz rernem akalty-antheyel-kety.”

<sup>7</sup> Kwertengerl ikweren-hrnem apal angkerrenh Jesus-el renh-rnem ilerl-anentyek-athen, “Ra ahelirreyel anwekantherr, anwantherrarl amern iwerl-alhekek-arnterl.”

<sup>8</sup> Jesus-el iterl-arek, rernemarl ikwer angkerrenh. Ra renh-rnem ilek, “Ilekekarl arrantherran amernek angkerreyel, arrantherr amern iwerl-alhek-penhan? Arrantherr ayen tnakey-angenh, atha ingkerrenh amernel wantey-angker! <sup>9</sup> Ayen arrantherr iterl-aremer, ayeng Akngey-kenh rlterrkar-akert. Arrantherr ayen iterl-aremer, atha artwa akngerr 5,000 wantek, amern 5-pelel. <sup>10</sup> Arrantherr ayen iterl-aremer, atharl 4,000 amerne-then akerel-then wantekarl amern 7-pelel.”

<sup>11</sup> Jesus-el renh-rnem ilek, “Mwantyel arntarnt-arelhenherr-arey Phariee-rnem-kety, Sadducee-rnem-kety. Ayeng amernek angkey-angenh. Mwany arnwarnelhemel yanh-rnem-kety, rernemarl apmwangkwarz rernem akalty-antheyelarl-kety.”

**Anayntileyl:** *Alakenh-anyem Jesus-el renh-rnem ilek, rernem iterretyek. Ra renh-rnem ilek, rernem arntarnt-arelh-ayntetyek. Anterkwetyek rernem arrkernelhenn, apmwangkwarz alhenh-rnem.*

<sup>12</sup> Kel rernem iterl-arek-anem, rarl artwa ingwer-rnemek angkenh, Phariee-rnem-then Sadducee-rnem-then rernemarl apmwangkwarz akalty-anthenh.

*Peter-el Jesus renh Christ itneweyel  
(Mark 8:27-30; Luke 9:18-21)*

<sup>13</sup> Jesus ra apmer Caesarea Philippi-warl apetyek, ra kwertengerl ikweren-hrnem ayernek, “Artwa angwenh Akngey-kenh Impenan rernem ileyel?”

<sup>14</sup> Rernem angkek, “Ingwer-rnemel ileyel John Baptise-emeley-angker apek, Elijah apek, Jeremiah apek, Akngey-kenh angkakert ingwer-rnem apek.”

<sup>15</sup> Ra renh-rnem ayernek, “Ilek arrantherr atyeng angkerreyel?”

<sup>16</sup> Simon Peter-el renh ilek, “Nga Christ-arl, Akngey-kenh alerikwari.”

<sup>17</sup> Jesus-el renh ilek, “Simon, Jonah-kenh alerikw, Akngeyel ngenh arntarnt-areyel innga! Ahern-arenylel ngenh akalty-antheye-angenh. Akngey atyeng irrwerl-areny anyentelant ngenh akalty-anthekan, ntwa ayen iterl-aryntetyek! <sup>18</sup> Peter rlterrkarl ngan. Apwert rlterrkarl warl artelhem-apeny, Peter rlterrkar arrpemarl. Atyen-rnemel rlterrkarl-angkwarz apenterl-ayntetyek ngkweng-angkwarz. Arrentyel renh-rnem nthakenh ywerrelhiley-angenh.” Alakenh-anyem Jesus-el renh itnewek, itnan apwertarl, Peter renh. <sup>19</sup> “Atha ngenh mwerr-angkwarz arraty rnkerneyel, apmwa ingkerrenh-they iwetyek. Ntwa apmwa ingwer-they twenty Akngey-kenh-angkwarz, kel. Akngeyel artwa renh areyel mwerr-anem, arraty-anem. Ntwa apek ingwer-they apmwa iwey-angenh, Akngeyel renh areyel arrangkwarl, apmwakert-anteyarl.”

<sup>20</sup> Jesus-el kwertengerl ikweren-hrnem artwerek, “Atyeng angkerrey-angenh arrantherr anayntetyek, ayengarl Anyent Impenan, Akngeyel ayen thwenek ahern nhenh-warl.”

*Jesus ilelheyel  
(Mark 8:3—9:1; Luke 9:22-27)*

<sup>21</sup> Ikwer-penhan Jesus-el renh-rnem akalty-anthek, “Arlta atyehan arrer-anem. Alerl ayeng Jerusalem-warl alpetyek. Jew-kenh tyaty-areny Atyetyartel-rnem-then priest-rnemel-then ayenh anterrkweyeh, irrwampenh anthemel. Ahelengkwel-rnem ayenh ipmek atweyehn. Ingwa atherr-penh ayeng ipmepenh akemirreyeh arrpemarl.”

<sup>22</sup> Peter-el renh ilek, “Akngayel ngenh iwerl-alhey-angenh. Ahelengkwel-rnem ngenh atwelye-angenh.”

<sup>23</sup> Jesus-el renh ilek “Atyengety alhay Satan-ay! Ngarl iterreyel ahern-areny-kenh-angkwar, Akngay-kenh-angkwarr-weny!”

<sup>24</sup> Jesus-el kwertengerl ikweren-hrnem ilek, “Arlka menty anthelhem atyeng-angkwarr apenterl-ayntetyek, amentewarl alhey-angenh. Ingwerenty apek iteth anetyek ilkelhenty, ra atyeng-angkwarr apenterl-ayntetyek, ikwer-rnem-angkwarr iterrey-angenh.

<sup>25</sup> Nga amentewarl alhenty, ngap ilweman. Nga atyeng-angkwarr apententy, ngap iteth aneman. <sup>26</sup> Nga ahern-arenyekant iterrenty, ngap amentewarl irrem, ywerrem-anem.

<sup>27</sup> Akngay-kenh Artwa Impen ranem apey-alpeyehn Akngay-kenh rlterrk ilkwakert, angel-rnem-akert. Ranem renh-rnem arntarnt-areyeh, rernemarl mwerr-angkwarr apenteh. <sup>28</sup> Ingwerel-rnem Akngay-kenh Artwa Impen areyeh-antey, ikwerenh-rnem-akert, rernem ilwey-alenty.”

## 17

*Jesus apey-alheyel arlertek rlterrk ilkwakert*

(Mark 9:2-13; Luke 9:28-36)

<sup>1</sup> Arlta 6-penh, Jesus-el renh-rnem atnwenhek apwert irrwerl ikwer-warl, amentewarl. Peter-then James-then awayikw ikweren-h John-then. <sup>2</sup> Kwertengerl ikweren-hrnem arek, inngerr renh arrtyernenty, ingkenyel arrtyernem-apeny, arnkwan arlter inngak-ertel. <sup>3</sup> Arrwekelely-atherr, Moses-then Elijah-then Jesus-itwel aremirrek arrpemarl. Rernem angkerrenh.

<sup>4</sup> Peter angkek Jesus ikwer, “Ingkartay, awethem ntwa anwernenhantherr atnwenhey-alhek nhewarl. Mwerr anwernenhantherr lywenty irrpety rnkerney, ingweran ngkwengarl, ingweran Moses-ekarl, ingweran Elijah-ekarl. Nga apek ilkelhentyekan.”

<sup>5</sup> Peter rarl angkenh-antey, kwenpayel-anem renh-rnem artek ingkerrehn-antey. Rernem angkanem awek, irrwerl-theyarl angkek, “Nhenh alerey atyehn, ayeng ikwer inkwerelheyel, ikwer awelhenherr-arey!”

<sup>6</sup> Rernem awek-penh, rernem ilperr iwelhek aterel. <sup>7</sup> Jesus-el renh-rnem arnep-arnek, angkemel, “Akemirrenherr-arey, aterirrey-angenh!” <sup>8</sup> Rernem-anem itnywenenhey-alpek Jesus anyentant-anem rtnerl-anenty.

<sup>9</sup> Rernem apwert-they atwarrenhey-alpenh, Jesus-el renh-rnem artwerilek, “Anyelk aney-alpenherr-arey, arrantherrall ayenh aytarek-penh. Ingwer-rnem iley-angenh, Akngay-kenh Artwa Impen ayeng ipmepenh itethirrenty-penhelant ingwer-rnem ileyteyek.”

<sup>10</sup> Kwertengerl ikweren-hrnem Jesus renh ilek, “Moses-kenh angka akalty-anthenh-anthenh-rnem ileyel, Elijah retangkwelarl apetyeyeh arrwekelan, Christ-ek-athath.”

<sup>11-12</sup> Jesus angkek, “Ya, arraty inngarl! Elijah kel arrwekel apetyek, ingkerrehn akalty-iletyek, rernem Akngay-angkwarr arratyirretyek. Rernem Elijah ikwer irrpelthirrenh. Alakenh-anyem rernem ayenh Artwa Anyent Impen Akngay-kenh irrpelthirremel atweyehn, ipmek-atwety. Akngay-kenh angka alakenh aynteyel.”

<sup>13</sup> Kel rernem iterl-arek-anem, “John wethekarl nhan angkeyel anwekantherr!”

**Anayntileyl:** *Jesus-el angkanem Elijah-penh ilek, renh-rnem akalty-anthetyek. John anenh Elijah anenh-apeny, Akngay-kenh angkakert.*

*Jesus-el awey arrenty-akert mwerrileyl*

(Mark 9:14-29; Luke 9:37-43)

<sup>14</sup> Rernem apetyek, artwa akngerr akarrirek-warl. Artwa anyent apmer ikwer-areny apetyek kwenirremel, Jesus ikwer-warl angkek, <sup>15</sup> “Ingkartay, atha awey arntety atyehn akngetyek ngkweng-warl, ntwa renh mwerriletyek. Awey ra arwengk-arwengk irreyel, rwewarl aytneyel, kwatwy-warl-then. <sup>16</sup> Atha ywarn-antey ayernek kwertengerl ngkweng-rnem, rernem awey atyehn mwerriletyek. Rernem arrangkwarl.”

<sup>17</sup> Jesus angkek, “Akngerr-inger ayeng arrekantherr ywarn arrkernelh, atha arrenhantherr akaltyileyek. Atyeng arrantherr arlkwentey-angnenh, iypelantarl awenh. Nthakenh ayehan arrantherr iterl-arey-angenh, ayengan arlertek ilkwakert? Awey ilenh atyeng-warl akngetya!” <sup>18</sup> Rernem akngetyek awey renh Jesus ikwer-warl. Jesus-el arrenty renh irrentek. Awey ra mwerrirrek-anem.

<sup>19</sup> Kwertengerl ikwerenhel-rnem renh ayernek ament-itwek, “Jesus, nthakenh ngkwengantarl arrenty ilenhan awelhemel alpek, anwernantherr ywarnarl ikwer arrker-nelhek, arrenty renh irrentetyek.”

<sup>20</sup> Jesus-el ilek kwertengerl ikwerenhr-nem, “Arrantherr Akngey renh rlterrk tnakey-angenh. Arrantherrap Akngey renh tnakenty, arrantherr apwert renh ilenty akngel-hetyek, kel ra akngelhem. Ntwa Akngey renh tnakentyelan ntwa ilek-ilek mpwarem.”

*Jesus ilelheyel, ingwer-ingerarl ra ilweyenhan*

*(Mark 9:30-32; Luke 9:43-45)*

<sup>22-23</sup> Rernem alhek, apmer Galilee-angkwarz. Jesus-el kwertengerl-rnem ilek, “Ahelengkwl-rnem ayen artwa anyent impen Akngey-kenh anterkwemel atweyenh. Ingwa atherr-penh, ayeng ipmepenit ethirremel akwentyehn.” Rernem ikwer alpwelyirrek-anem amperrngirremel, rarl renh-rnem ilek.

*Tax maney payemeleyek*

<sup>24</sup> Jesus kwertengerl ikwerenhr-nem-akert Capernaum tawen-warl apetyek. Man akwetyey-angker rernem Peter renh ayernek, “Atyetyart ngkwenhel man antheyel Jew-kenh tyaty ilkwareny-rnemek, arrangkw apek?”

<sup>25</sup> “Yaw, ra man antheyel,” Peter-el renh-rnem ilek. Peter ra apmer-warl alpek. Jesus-el renh ayernek, “Atyetyart ahern-areny-rnemel angwennh-rnem-they man-rnem ineyel, alerikw-rnem-they apek, ingwer-rnem-they apek?”

<sup>26</sup> Peter-el renh tyernek, “Ingwer-rnem-they.” Jesus-el renh ilek, “Alerikw-rneman arrangkwarl, man anthey-angenharl. <sup>27</sup> Mwerr alakenh anwantherr ikwer-rnem irrwernelhey-angengan, ikwer-rnem awelhemel. Nga alhetyek irrpeng anterkwetyek. Arrakert altywerilemel, ngkweltyan ikwer-itwek anetyek, man akwetyey-angker an-themel, man tyaty ilkwareny-rnem-warl anthetyek.”

## 18

*Kwertengerl ikwerenhr-nem angkerreyel, Atyetyart ilkwa anetyek*

*(Mark 9:33-37; Luke 9:46-48)*

<sup>1</sup> Kwertengerl 12 apetyek Jesus ikwer-warl renh ayernetyek, “Ngenharl apenteyel-rnem, kwertengerl angwenharl atyetyart ilkwan ingwer-rnem-they?”

<sup>2</sup> Jesus arlek ampa akely anyentek. Jesus ra ampa akely renh ampepek rnkernek. <sup>3</sup> Ra renh-rnem ilek, “Atha arrenhantherr ileyel. Ampernem-apeny arrantherr akarirreyek Akngey-warl, ikwer awelhetyek, Akngey Atyetyart arrekantherrenh anem. Arrang-kwelan, Akngey intwemelirrem arrekantherrety. <sup>4</sup> Ampa nhanyem atyetyart-arrpantey ilelhey-angenharl. Artwa anyent atyetyart-arrpantey tnakelhey-angenh, Akngeyel arrernem atyetyart ilkwa kwertengerl ingkerrenhek anetyek. <sup>5</sup> Ampa akely ikwer arrantherr inkwerelhenty, arrantherr atyeng inkwerelhem arrpemarl. Ampa akely arrantherr arntarnt-arem-apeny, arrantherr ayenhan arntarnt-aretyek arrpemarl.”

*Ingwerentyl renh-rnem arrkerneyel, rernem apmweleyek*

*(Mark 9:42-48; Luke 17:1-2)*

<sup>6</sup> “Ingwerentyl kwertengerl atyenh-rnem arrkernenty, rernem apmweleyek, Akngeyel renh arntety ilkwa antheyen. Ra irrwampenty awelhekerr, ingwerel nthakenh renh kwaty ampep-warl iwemer, apwert ilkwa ikwer-warl arrernenty itewarl. Artwa ingwerel atyenh-rnem apmwelenty, Akngeyel renh arntety ilkwa antheyen. Atyenh-rnemarl apmweleyelarl-kety, artwa ikwer-warl apwert ilkwa itewarl arntetyek renh kwaty-warl ikwerenp iwemel. Atyenh-rnem ra apmwelerl-anekerr renh iwetyek intem-antey kwaty kwen-warl. <sup>7</sup> Artwa anyentel ingwer-rnem rwewilenty, Akngeyel renh arntety anthenam.

<sup>8</sup> Artwa itepel apmwel-areth mpwareyel ingketyel apek. Artwa anyentel itep-atherr-akertel apmwel-areth mpwareyel-kety, mwerran itep anyent-angkwarz renh alkathemel iwemer, ra itep-atherr-akertan rwa ilkwel apmwakert aney-kety. Mwerr-ayteng ra anetyek Akngey-kenh apmer-itwek intem-antey itep anyent-akert. <sup>9</sup> Artwa anyentel annga atherr-akertel apmwel-areth mpwareyel-kety, mwerran annga renh tyerremer iwemel. Mwerr-ayteng ra anetyek Akngey-kenh apmer-itwek intem-antey annga anyent-akert. Annga atherr-akertel apmwel-areth mpwareyel-kety, rwa ilkwevarl alhetyek.”

**Anayntileyel: Anwantherr arwa akelhey-angenh, impen-antey. Alakenh-anyem angka anayntileyel, Ingkart ra impen inngarl, anngethen iltylethen-angkwarzan. Kel Jesus-el arwa renh-rnem ilek, rernem iterretyek, rernem apmwelhilekerr. Kel Jesus-el arwa renh-rnem ilek, rernem iterretyek, rernem apmwelhilekerr.**

*Angka yep-yep anyentarl akngerr-they aperrertirremel alheyel  
(Luke 15:3-7)*

<sup>10</sup> Jesus-el renh-rnem ilek, "Arrantherr Akngey-angkwarr apenteyel-rnem-kety arlkairrey-angenharl. Itnweng ikwer-rnem-kenh Akngey-kenh apmer-itwek aneyel.  
<sup>12</sup> Artwa anyentel yep-yep akngerr 100 arntarnt-arenh. Yep-yep anyent amentirrek ikwer-rnem-they. Aperrertirrek. Artwa ra yep-yep ingwer-rnem iwerl-alhem, yep-yep anyent ikwer nthwetyek. Rap nthwem yep-yep anyent renh arey-alheyek-atwety.  
<sup>13</sup> Ra renh arey-alhem, rap ikwer inkwerlhem. Rap item, 'Inngantey atha arey-alhek!'  
<sup>14</sup> Akngey ilkelheyel ingkerrenhek, ingwer-rnemarl amentirreyel-rnemek-then rernem ikwer-warl ingkerrenh angkepirretyek."

*Mwerr-angkwarr arratyilerretyek  
(Luke 17:3)*

<sup>15</sup> "Ingwerenty ngkweng apmwel-areth angkenty, mpwelanth-atherrap arratyilerretyek. Ra ngkweng awelhenty, mpwelanth mwarrant-atherr-anem anayntetyek. Ingkart-kenh-angkwarr alakenh aynteyel. <sup>16</sup> Ra apek ngkweng awelhey-angenh, ntwa ingwer-rnem ikngwetyek, ingkerrenh-angkwarr-anem arratyilerretyek, rernem ingkerrenhel awetyek, anngether. <sup>17</sup> Ingwer-rnemek awelhey-angenh arrangkw, tyaty-areny-rnemel renh arratyiletyek angkerremel. Tyaty-areny-rnem ingkerrenh alhetyek ikwer-warl, rernem ingkerrenhel awetyek, anngether aretyek. Ra apek tyaty-areny ingkerrenhek awelhey-angenh, menty-anem renh tyarlewetyek, ra apmwangkwarr menty alhetyek.

<sup>18</sup> Nga mwerr angkenty, Akngey mwerr angkem arrpemarl. Nga arrkngert-angkenty, Akngey arrkngert angkem arrpemarl. Ntwa apmwia ingwer-they iwem Akngey-kenh-angkwarr, kel. Akngeyel renh areyel arraty. Ntwa apek ingwer-they apmwia iwey-angenh, Akngeyel renh areyel arrangkwarl, apmwakert-anteyarl.

<sup>19</sup> Arrantherr angkerrenty, Akngey renh ayernenty, Akngey irrwerl-areny awelhem, rap arntarnt-areman. <sup>20</sup> Rernem akarirrenty, itna atyenh-angkwarr, ayeng ikwer-rnem-itwek aneyel arrpemarl intem-antey."

*Angka warrkenh awerr-akert*

<sup>21</sup> Peter Jesus-warl apetyek. Peter-el renh ayernek, "Arleng-alentyang anwantherr angkep atwerrey-angenh anetyek, mwarrant-arey anem, arratyilerretyek? Ra attwenty arrpemarl, anwantherr renh atwey-angenh arrpemarl. Angkep atwey-angenh ngay? 7-ingerant attwenty, anwantherr renh angkep atwey-angenh?"

<sup>22</sup> Jesus-el renh tyernek, "7-inger-weny. Intem-antey atwerrey-angenh arrantherr anetyek, Akngey-kenh-angkwarr!"

<sup>23</sup> Akngey-kenh-angkwarr alakenh aynteyel; atyetyart ilkwel warrkenh-rnem akarilem, angkerretyek, pwek iparetyek, man ilkwarl alheleyel. <sup>24</sup> Artwa ingwerel-anem renh alhelenh 50 million-arl. <sup>25</sup> Artwa ra arrangkw-antey anen, pwek iparey-angenh-antey, ranem tharlemilek anewikw-then, alerikw-then ingkerrenh, apmer ikwerenh-then-antey, pwek renh iparetyek.

<sup>26</sup> Artwa ra ampwethel alernenhemel, kwenirrek. Ra illelhek, 'Ayengan manwenyarl, arrangkwarl. Alerl mpwelha, ingwer-ingerant atha ngenh man ingkerrenh antheynetyek, pwek iparetyek.' <sup>27</sup> Atyetyart ra ikwer amperrngirrek, irrepernek, manwenyek. Ranem renh ilek, 'Kel, menty angkep anthey-angenh, pwek payemeley-angenh.'

<sup>28</sup> Artwa warrkenh ra alpek-anem, ra artwa ingwer-anem arey-alpek, rarl man thilp 100 alhelenh, man akely. Itethey anterrkwemel ra angkek, 'Man ntwa ayenh angkep anthenhey-alpal!'

<sup>29</sup> Artwa ranem ampwethel alernenhemel kwenirrek, 'Alerl mpwelha, atha ngenh angkep anthetyek.' <sup>30</sup> Artwa warrkenh ra warrkenh ingwer tyayl-warl akwernek, man anthey-angenh-they.

<sup>31</sup> Warrkenh ingwer-rneman ikwer amperrngirrek. Rernem-anem atyetyart renh ilek, 'Artwa warrkenh ingweran tyayl-itwek aneyel.' <sup>32-33</sup> Atyetyart rantey yangkelhek artwa arrwekelari ikwer illehekek, apetyetyek. Ra angkek, 'Ngan apmwangkwarrarl alheylel! Athan ngenh menty-anem tyarlewek, pwek iparey-angenh. Nga ingwer-rnemek amperrngirrey-angenh, ayengarl ngkweng amperrngirrek-apeny.' <sup>34</sup> Atyetyart ranem ahelirek. Ra warrkenh renh ahayiwek tyayl-areny-warl. Tyayl-arenyel renh tyayl-warl intem akwernekk pwek ikwerenh ra ipareyek-atwety."

<sup>35</sup> Jesus angkek, "Akngey-kenh-angkwarr alakenh-anyem aynteyel arrpemarl. Nga awerr ingwer-rnemek aneyel, Akngey irrwerl-areny atyenh ngkweng awerr arrpemarl mpwelheyel, nthakenh ngenh arntarnt-arey-angenh."

## 19

*Arrkarenheng-atherr iwerretyek  
(Mark 10:1-12)*

<sup>1</sup> Jesus rarl ingkerrenh akalty-anthenh-penh, ra apmer Galilee-they alhek, apmer Judea-warl alhek, lher Jordan-they intwarr. <sup>2</sup> Akngerrel renh apentek. Ra arntety-rnem mwerrilek.

<sup>3</sup> Artwa Pharisee-rnem ikwer-warl apetyek, renh arrkernetyek. Rernem renh ayernek, "Mwerrang artwel anew ikweren h iwetyek?" Rernem iterrenh renh arrkernetyek, ra apmwel-areth angkentyek, rernem renh angka ilkwewarl arrernetyek.

<sup>4</sup> Jesus-el renh-rnem ilek, "Arrantherr iterl-arey-areny, Akngeyelarl angka nhenh anwekantherr arrernekk. Moses-kenh angkan alakenh aynteyel, atharl arrenhantherr ileyl. Akngeyel artwethen arelh-then arrernekk, ahern nhenh-warl. <sup>5</sup> Artwa akely amek-arenty-iperr ra amikw-then aynikw-then ipmem-anem ra arnkentyel-anem aneyel itengerrey-alentyan. Ratherr intem iteng anetyek. <sup>6</sup> Akngeyel renh-atherr itengilemel anthek artwa renh. Nthakenh ratherr iwerreyang, intem-antey ratherr anetyek. Nthakenh ingwerel renh-atherr akgakey-angen."

<sup>7</sup> Rernem renh ilek, "Alakenh Moses-kenh angka aynteyel: 'Artwa pip-warl itna inkwernelhemel, arelh ikweren h pip renh anthemel, arelh ikwerety ipmelhetyek.'"

<sup>8</sup> Jesus angkek, "Akngey-kenh angka aynten arrwekel, nthakenh iparey-angen. Moses-el angka arrernekk ingkern-they, rernemarl amentewarl alhenh-kety. Alakenh-they Moses-el angka arrernekk, ingkern-penhel-rnem apenterl-ayntetyek.

<sup>9</sup> Arelh ngkwenh ntwa itwenty, ntwa arelh ingwer ikngwenty, ntwa Ingkart-angkwarr apmwelhilem. Arelhel arrkarikw ikweren h itwenty, artwa ingwer-anemarl ikngwetyek, mwerr arelh renh iwem."

<sup>10</sup> Kwertengerl ikwerenhel-rnem Jesus renh ilek, "Alakenh aynteyel mwerr, anewweny ament anetyek."

<sup>11</sup> Jesus-el renh-rnem ilek, "Ingwer-rnem alakenh anetyek, Akngeyel ikwer-rnem arrernekk-angkwarr-antey. <sup>12</sup> Ingwer-rnem arrangkwarl. Rernem anew inetyek ywarn. Ingwer-rnem itengirrey-angen, Akngeyek warrkirk-ayntetyek."

*Jesus-el ampa akely-rnem atryeneyek  
(Mark 10:13-16; Luke 18:15-17)*

<sup>13</sup> Akngerr Jesus-warl alhek, ampa ikweren-hrnem-kenh-akert, ra akapwert renh-rnem arneyek. Jesus-kenh kwertengerl-rnemel ampa renh-rnem irrentek. <sup>14</sup> Jesus-el arek kwertengerl ikweren-hrnem ampernemarl irrentek. Ra ahelirrek, angkemel, "Ampernem menty apetyey atyeng-warl! Alakenh ikwer-rnem arrkngert angkey-angen!" Ayeng arlkwenteyel ampernem ingkeren h atyeng-warl apetyem. Akngey arlkwenteyel ra Ingkart ikwer-rnemek anetyek. Ampernem-apeny arrantherr akarrirrenty Akngey-warl, ikwer awhelhetyek, Akngey Atyetyart arrekantherrenh aneyel." <sup>15</sup> Jesus-el ampernem akapwert iityel renh-rnem arnek. Jesus rap ayernek Akngey, ra ampa ingkerrenh atnyeneyek. Kel ra alhek-anem.

*Artwa anyent man akngerr-akert  
(Mark 10:17-31; Luke 18:18-30)*

<sup>16</sup> Artwa anyent man akngerr-akert Jesus ikwer-warl anterrey-alhekarl. Ra arrernel-hek kwenirremel, Jesus-itwel angkemel, "Akalty-anthenh-anthenhay. Nthakenh ayeng iteth intem anetyek?"

<sup>17-19</sup> Jesus-el renh ilek, "Nthakenhrl ntwa ayen h ayerneyel, mwerr-angkwarr apenterl-ayntetyek? Akngeyant anyent mwerr! Ntwa Moses-kenh angka renh iterl-areyelarl. Ntwa ingwerent ipmek atwetyekarl arrangkwarl. Ingwer-kenh anewikw nthakenh ikngwetyek. Ampwal-rnem nthakenh irryterl iney-angen. Ingwer-rnemek irrywerremel iley-angen, innagt ntwa iletyek. Akngeyek-then ameyek-then awelhetyek. Ingwer-rnem mwerranty arntarnt-arerl-ayntetyek, ngkwenh-rnem arntarnt-areyel-apeny. Alakenh apententy, nga iteth intem-antey aneyen."

<sup>20</sup> Artwa ra Jesus renh ilek, "Ayengan law ilenh-angkwarr apenteh awey akelyankel. Angka ingwer apek aynteyel, ayntetyek?"

<sup>21</sup> Jesus-el renh ilek, "Ampwal akngerr renh-rnem tharlemila man inemel, artwa ilenh-rnem, irrepern-rnem, man-weny-rnem ntwa man anthem. Ikwer-penhan Akngeyel-anem ngenh arntarnt-arem, ngenh atnyenem. Atyeng-angkwarrant-anem apetyal!"

<sup>22</sup> Artwa man-akert ra iterrek man-then ampwal-rnem-then ingkerrenh ra menty impen ayerrpiletyek. Artwa ra amperrngirrek, "Nthakenh-angkwarr ayeng iteth intem-antey aneyen, man akngerr-akert, ampwal akngerr-akert?"

<sup>23</sup> Jesus-el kwertengerl ikweren-hrnem ilek, "Man-areny ilenh-rneman rernem Akngey-angkwarr anetyek arrangkwarl. Rernem manantarl apenteyel. <sup>24</sup> Kamwerlan neyl altywer akely-angkwarran nthakenh aylpenhey-angen, arrangkwarl. Kamwerlan altywer akely-angkwarr aylpey-angen-h-apeny, man akngerr-akert-rneman Akngey-kenh-angkwarr aylpey-angen. Akngeyel nthakenh anyentiley-angen ikweren-hrnem-war."

<sup>25</sup> Kwertengerl ikweren-hrnem ywarn iterrek. Rernem renh ayernek, "Ilek-apeny-rneman Akngey-kenh-angkwarr aylpem, Akngeyel ikweren-hrnem-warl anyentiletyek?"

**Anayntileyel:** *Kwertengerl rernem iterrenh Akngeyelang man-areny-rnemekant inkwerelhentyek-athen, man akngerran man-areny renh-rnem anthentyek-athen.*

<sup>26</sup> Jesus angkek, "Akngey rantarl iterl-areyel ikweren-hrnem-warl anyentiletyek, ahern-arenyel-rnem iterl-areyang arrangkw."

<sup>27</sup> Peter-el renh ilek, "Anwernantherr-alew? Kwertengerl anwernantherran ampwal-rnem menty-anem ipmek, ngenhant-anem apenteyel. Akngeyel anwernenhantherr pweytilem, ikweren-hrnem-warl? Anwantheri inem arrpemarl?"

<sup>28</sup> Jesus-el renh-rnem ilek, "Akngey-kenh Artwa Impen ayeng aney-alpeyeh chair mwerr-angker-itwel rlterrk ilkwakert. Kwertengerl arrantherr arrpemarl chair mwerr-angker 12-itwek aney-alpeyeh arrpemarl. Arrantherr Israel kenh-rnem 12 amentew-ament ayerneyen."

**Anayntileyel:** *Israel-kenh alerikw-rnem 12 anenh. Akngerr arlpimpirrek ikwer-rnem-they, rernem akngerram-akngerrirrek. Ingkern-penh-rnem akngerr innga anew-anenh.*

<sup>29</sup> "Artwa anyentarl alhenty, angka atyehn-akert ikweren-hrnem iwerl-alhemel, angka Akngey-kenh ingwer-rnem ilerl-apayntetyek, Akngeyel renh aleth-antey arntarnt-arem. Artwa ra alhentyelan, ahern ikwerenharlap ra iwerl-alheman, ikweren-hrnem-then, warl ikweren-h-then, ra iteh intem-antey aneyen. Akngeyel renh antheyen akngerr innga renh arntarnt-areyeh intem-antey. <sup>30</sup> Akngerr ilkelheyel Akngey-angkwarr apentetyek. Akngerr arrkernalheyel Atyetyart ilkwa anetyek, warrkenh iylpareth-rnem-they. Rernem arrangkwarl. Warrkenh iylpareth-rnem rerneman Atyetyart ilkwa aneyen."

## 20

### Rernem warrkirreyel amern-angketyarr-itwek

<sup>1</sup> Jesus-el angka anayntilek ikwer-rnem. "Akngey-kenh-angkwarr alakenh aynteyel. Ingwepenh atyetyart alhek tawen-warl, warrkenh-rnem ikngwerl-alpetyek, amern-angketyarr-itwek warrkirreyek. <sup>2</sup> Ra angkek, 'Arrantherr atyeng warrkirrenty, atha arrenhantherr man ilkwa anthetyek.' Rernem mwerr angkenh ikwer. Ranem renh-rnem arrwekel thwenek amern-angketyarr-warl. <sup>3</sup> 9 o'clock ingwepenh-antey, ranem artwa ingwer-rnem arey-alhek, tawen-itwek apatemel rnterl-anenty. <sup>4</sup> Ranem angkek ikwer-rnem, 'Arrantherr atyeng warrkirrenty, atha arrenhantherr payemelem.' Rernem ikwer-angkwarr iylpareth antelhek. <sup>5</sup> Ra tawen ikwer-warl alhek arrpemarl, rap arey-alhek artwa ingwer-rnem-anemarl, rernem apatemel rnterl-anenty. Renh-rnem ra ayerney-alhek warrkek arrpemarl, ra renh-rnem man anthetyek. <sup>6</sup> Atwerrp-anem 5 o'clock ra alhek arrpemarl tawen ikwer-warl. Ra ingwer-rnem-anemarl arey-alhek rnterl-anenty. Ra renh-rnem ayernek, 'Ilekel arrantherr rntenherreyel apatemel?' <sup>7</sup> Rernem ikwer ilelhek, 'Ingwerentyl anwenhantherr warrk anthey-angen.' Ranem renh-rnem ilek, 'Arrantherr amern-angketyarr-itwek atyeng warrkirreyek.' <sup>8</sup> Atwerrp-anem atyetyart yangkelhek, warrkenh anyentek, ra apetyetyek, ra ingwer-rnem ngkwelty antheyetyek warrk-penh. Ranem artwernem ilek, 'Ingkernarl apetyek-rnem-tangkwel man antha!'

<sup>9</sup> Ra artwa ingkern-theyarl apetyek-rnem man ilkwa anthek. <sup>10</sup> Arrwekelarl warrkirrek-rnem, rernem-anem apetyek, man inetyek. Rernem iterrek, 'Man ilkwa innga anwantherri ineyen', arrwekelarl warrkirrey-alhek-rnem. <sup>11</sup> Rernem atyetyart ilkwa iltek, 'Ntwa man ilkwan anthek ingkern-they apetyek-rnemantarl!' <sup>12</sup> Artwa ingwer-rneman hour anyent warrkirrenh, ingkern-they apetyek-rneman, anwantherri itwern ilkwel aleth arlkarewelhenh. Ingkernarl apetyekel-rneman nthakenharl man ilkwa inek?

<sup>13</sup> Atyetyart ranem artwa anyent tyernek, 'Atha ngenh man ilkwa antheynek, weth atharl ngenh arrwekel ilek-angkwarr-antey. <sup>14-15</sup> Man ngkwenh inerl-alha, akngeynemel apmer-warl. Atha renh-rnem man ilkwa antheyel mwerr-angkwarr. Ilek-they ntwa

alharlkwek artwa ingwer-rnem, atharl man akngerr anthe? Man ilkwarlatha alhewer payemelem!”

<sup>16</sup> Jesus angkek, “Akngay-kenh alakenh aynteyel, Akngayel ingkerrenh arntarnt-arem arrpemarl, ingkernarl apetyek-rnem arntarnt-arem arrpemarl.”

*Jesus kwertengerl ikwerenh-rnemek ilelheyel  
(Mark 10:32-34; Luke 18:31-34)*

<sup>17</sup> Jesus alhek Jerusalem-warl. Kwertengerl ikwerenh-rnemel renh apentek. Akngerrelan renh-rnem apentek ingkern-theyearl. Ra ilelhek kwertengerl ikwerenh-rnemek, <sup>18</sup> “Awelhenherr-arey atyeng! Rlengk apmer Jerusalem-warl anwantherr alhem. Ayeng Akngay-kenh Artwa Impen. Anwantherrarl Jerusalem-el aney-alhem. Ahe lengkw-rnemel ayenhanterrkweyehn ikwer-itwel. Ayenhanrenem akngayen, atyetyart tyat-areyeny ilkwernem-warl, atyetyart ilkwa Moses-kenh angka akalty-anthayel-rnem-warl. Rernem ayenhanayiweyehn, ingwer-rnemel ayenhan ipmek atwetyek. <sup>19</sup> Rernem ayenhanayiweyehn, Jew-weny ahelengkw-rnem-warl, rernem ayenhan ipmek atwetyek. Rernem ayenhan irrwaremel, whip-el-tangkwel atwetyehn, ayenhan renrem ipmek atwetyealenty. Ayeng ipmepen akemirreyehn ingwa atherr-pen.”

*James-then John-then ratherr Jesus renh ayerneyel  
(Mark 10:35-45)*

<sup>20</sup> Zebedee-kenh alerikw-atherr amikw ikwer-atherrenh apetyek Jesus-warl, kwenirremel. <sup>21</sup> Jesus-el renh ayernek, “Ilekay?”

Areh ra renh ilek, “Nga Atyetyart ilkwa aneyehn, Ntwa arraty ilay, ampa atyehn-atherr Atyetyart ilkwa arrpemarl ngkweng-itwel aneyehn?”

<sup>22</sup> Jesus-el awayenhang ilek, “Mpwel atyeng mwerranty awelhenherr-atherr. Ahelengkw-rnemel ayenhanterrkweyehn. Mpwel-alew? Mpwel arlakmenty anthalhem arrpemarl, ayeng anthalhem-apeny?”

Ratherr ilelhek Jesus ikwer-warl, “Ya, menty ahelengkw-rnemel aylernenh irrwampetyek atwety!”

<sup>23</sup> Jesus-el renh-atherr ilek, “Rernem innga mpwelenh irrwampetyek atwetyehn, ayenhan irrwampetyek atwetyehn-apeny. Inpa, athan iterl-arey-angenharl, Akngayelantarl iterl-areyel angwenharl Atyetyart ilkwa atyeng-apeny aneyehn, Akngay atyehelantarl atyetyart ilkwa arrerneyehn.” <sup>24</sup> Kwertengerl 10 ingwer-rnem kwertengerl ikwer-atherrety arkarrirek ratherrarl Atyetyart ilkwa anetyek arlkwentek, Jesus-apeny. <sup>25-26</sup> Kwertengerl ikwerenh-rnem Jesus ra ilek, “Atyetyart Jew-weny ilkwernem awerr aneyel-rnem-angkwar, arrantherr apentyang-angenh. Arrantherr mwerranty anenher-arey. Ingwer atyehn-rnem Atyetyart ilkwa anem, mwerr-angkwar ingkerrenh arntarnt-aretyek. <sup>27</sup> Arrantherr arntarnt-arerretyek, warrkenh iylpareth awelheyel-apeny. Alakenh atha arrenhantherr atyetyart ilkwa arrernem. <sup>28</sup> Akngay-kenh Artwa Impen anyent ayeng kel apetyek ahern nhenh-warl, ingkerrenh mwerr-angkwar arntarnt-aretyek iylparethel. Ayeng arlkan anthalhem ingkerrenhek.”

*Jesus-el artwa aparrng atherr mwerrileyel  
(Mark 10:46-52; Luke 18:35-43)*

<sup>29</sup> Jesus kwertengerl ikwerenh-rnem-akert apmer Jericho-they alhek, akngerrel renh-rnem apentek. <sup>30</sup> Artwa aparrng atherr iwerr impaltheh aneh. Ratherr awek ingwerterarl renh-atherr ilek, “Jesus apetyem nhangkwarr.” Ratherr arlkek Jesus ikwer, “Jesus, David-kenh, aylekanth amperrngirra!”

<sup>31</sup> Akngerrel renh-atherr ilek, “Akater anenher-atherr! Jesus renh arlkareweyang!” Ratherr artewentel arlkek Jesus ikwer arrpemarl, “Artwa David-kenh! Aylernanth amperrngirra!”

<sup>32</sup> Jesus-el renh-atherr ayernek, “Nthakenh atha ilem?”

<sup>33</sup> Artwa aparrng ratherr Jesus-warl angkek, “Ingkartay, annga mwerrila, aylernanth mwerr-anem aretyek!”

<sup>34</sup> Jesus ikwer-atherr amperrngirrek, annga renh-atherr annga rikerliletyek, ratherr arleng aretyek. Artwa aparrng ratherr kel mwerr arleng aremel-anem, Jesus-anem apentek.

<sup>1</sup> Jesus kwertengerl ikwerenh-rnem-akert apmer ingwer-warl alhew Jerusalem-they arrer-antey, apmer Bethphage-warl, apwert Alip-angketyarr-arrangarr. Jesus-el kwertengerl atherr thwenek, ratherr arrwekel alhetyek, <sup>2</sup> “Mpwelanthan alhenherr-atherr tawen-warl. Mpwelanthap tangkey atherr arey-alhenherr-atherr, tangkey amenheng-atherr. Rwep lhelenherr-atherr, atyeng-warl inenhey-alhemel. <sup>3</sup> Ingwerentyel mpwel-henh ayernenty, mpwelanth ilenherr-atherr, ‘Ingkart ikwer ayernalnth akngeyneyel wenh tangkey nhan.’ Ra anthem-anem.”

<sup>4</sup> Alakenh-anyem Akngey-kenh angka arraty aynthen, angkakert arrwekelenyel ilenh-angkwarr-antey. <sup>5</sup> “Jerusalem-areny-rnem, atyetyart ilkwa rarl apetyeyen, tangkey-akert. Ra tnakelhey-angenh, tangkey ateralath-akert.”

<sup>6</sup> Ratherr anperl-alhek, Jesus-elarl ilanthek-angkwarr-antey. <sup>7</sup> Ratherr tangkey renh-atherr ayteng-akngeynek Jesus-warl. Ratherr arnkwa tangkey artep-atherr-warl arrernek. Jesus-anem tangkey ateralath-warl nganek. Alakenh-anyem Akngey-kenh angka arraty inneganm irrek, angkakert arrwekelenyel ilenh-angkwarr-antey.

<sup>8</sup> Akngerr ingkerrenhel arnkwa ahern-warl panty iweynek, tangkey alhetyek ikwer-angkwarr Jesus-akert. Ingwerel-rnem alperrarl akek. Rernem ayattheweyneyek tangkey Jesus-akert ra alhetyek panty-angkwarr. Tangkey alhek panty-angkwarr Jesus-akert. <sup>9</sup> Artwa akngerrel Jesus renh apentek. Ingkerrenh ikwer inkwerelhek arrwekel-warl alhenh-rnem-then, ingkern-theyarl alhenh-rnem-then. Rernem Jesus-ek inkwerelhemel arlek, “Anwantherr Atyetyart ilkwek inkwerelhey, David-kenh innga! Akngeyelarl renh thwenek anwekantherr-warl. Akngeyel renh arntarnt-areyel, ra Atyetyart ilkwa ingkerrenhek aneyel!”

<sup>10</sup> Jesus alhek apmer Jerusalem-warl. Ingkerrenh ikwer inkwerelhek, ayernerremel, “Artwa angwenharlap ran nhenhey?”

<sup>11</sup> Rernem angkerrenh, “Nhenhan Jesus-arl, angkakert Nazareth-areny ahern Galilee-areny.”

### *Jesus Jew-rnem-kenh tyaty ilkewewarl alheyel*

(Mark 11:15-19; Luke 19:45-48; John 2:13-22)

<sup>12</sup> Jew-rnem-kenh tyaty ilkwitwek weker-rnemel aker tharlemileneh, store-arrpantey. Ingwerel-rnem aker thindl tharlemileneh. Jesus ra arek ingwerel-rnemarl aker tyenkerr tharlemileneh, ra ingkerrenh-antey renh-rnem irrentek, taypel-rnem iwemel, ampwal ngkweltyek-arelh-rnem-then. Jesus-el renh-rnem weker-rnem irrentek. <sup>13</sup> Ra renh-rnem ingkerrenh ilek, ‘Akngay-kenh angka alakenh aynseyel: ‘Ingkerrenh akarirrerl-ayntetyek warl nhenh-warl, Akngeyek inkwerelhemel.’ Irryert-awarr-rnemantarl apmer nhenh-warlan arrantherr arrernek!”

<sup>14</sup> Artwa aparrng-rnem-then artwa lerrp-rnem-then ikwer-warl apetyek Jew-kenh tyaty ilkwitwek. Ra renh-rnem mwerrilek. <sup>15</sup> Jew-rnem tyaty ilkwitwek ampernem arlkahelirrenh, “Nhanyem David-kenh.” Artwa priest-rnem-then Moses-kenh akalty-anthey-angker-rnem-then rernem arek-penh rernem ahelirrek-anem. Rernem Jesus renh ilek,

<sup>16</sup> “Ntwa apek yanh-rnem alhengk-aweyel, rernemarl arlkahelirreyel?” Jesus-el renh-rnem ilek, “Angka Akngey-kenh arrwekeleny aynseyel: ‘Ampernem ayehn tnakeyel arratty-angkwarr.’” <sup>17</sup> Ra renh-rnem iwerl-alhek-anem apmer Bethany-itwel aney-alpek.

### *Jesus-el arwerl renh ileyel*

(Mark 11:12-14, 20-24)

<sup>18</sup> Ingwepenh Jesus Bethany-they anperl-alhek apmer Jerusalem-warl, kwertengerl ikwerenh-rnem-akert. Ra angayakw-anem irrek ampepel. <sup>19</sup> Arleng-they, ra arwerl tywerk arek. Ra alhek arrer-warl amernek aretyek. Amern aney-angenh arrangkw-antey ra arek, alparrant. Jesus-el arwerl renh ilek, “Arwerl nhephn nthakenh ingwerentyel amern arlkwey-angenharr intem-antey!” Arwerl arleny-anem irrek.

<sup>20</sup> Kwertengerl ikwerenh-rnem renh awek, rarl alakenh angkenh, rernem apatek.

<sup>21</sup> Jesus-el kwertengerl ikwerenh-rnem ilek, “Anwantherr Akngey tnakem, ikwer irrpelthirrey-angenh, arrantherr alakenh mpwarem. Arrantherr areyel apwert aleyarl altyweneylel? Arrantherr apwert ilenh ilenty, ra alpetyek kwaty ampep-warl, ra inngarl awelhemel kwaty ampep-warl arrernelhem-apeny, Akngeyan arrekantherr awelhem, alakenh-anyem. <sup>22</sup> Akngeyan arrekantherr awelhem, alakenh-anyem, arrantherr renh tnakenty, renh ayernenty.”

### *Atyetyart ilkewernemel Jesus renh ayerneyel*

(Mark 11:27-33; Luke 20:1-8)

<sup>23</sup> Jew-rnem-kenh tyaty ilkwewarl aylpek. Ra renh-rnem akalty-anthenh. Atyetyart Jew-kenh tyaty-areny-rnem-then artwa ilkwernem-then ikwer-warl apetyek. Rernem renh ayernek, "Angwenhel ngenh atyetyart arrernek, ingkerrenh akalty-anthetyek."

<sup>24</sup> Jesus-el renh-rnem ilek, "Atha arrenhantherr anyent-inger arwa ayernem, arrantherr apek atyeng iletyek. Arrantherr atyeng ilenty, athap arrenhantherr ilem arrpemarl, angwenhelarl ayenhan thwene. <sup>25</sup> Angwenhel John renh arrernek, ingkerrenh baptise-emeleyek, irrwerl-arenyel apek, ahern-arenyel apek?"

Rernem angkerrenh, "Nthakenh anwantherr Jesus renh iley-angenh, Akngeyel John renharl thweneh ahern nhenh-warl, anwenhantherr Jesus-elarl arraty ilekerr, anwantherr John ikwer awelhey-angenharl, akengentyarl John ikwer irrpelthirrenh. <sup>26</sup> Nthakenharl anwantherr iley-angenh, atyetyart ahern-arenyelarl John anwekantherr-warl thwene, ingwer-rnemarl anwekantherr ahelirrekerr, rerneman John iterl-areyel, rarl Akngey-kenh angkakert inngan arenyel. Rerneman John tnakeyelarl, rarl Akngey-kenh angkakert innngarrpantey." <sup>27</sup> Rernem Jesus ikwer-warl angkek, "Inpa, iterl-areyel-angenh, angwenhelarl John renh thweneh ahern nhewarl."

Jesus angkek ikwer-rnemek, "Arrantherr ayenh arraty tyerneyang-kety, nthakenh atha arrekantherr arraty iley-angenh arrpemarl, angwenhelarl ayenh thweneh ahern nhewarl."

#### *Aler atherr-akert*

<sup>28</sup> "Atha angka arrekantherr iletyek. Artwamp-kenh alerikw-atherr anenh. Artwamp ra alerikw alkenh ilanthe, amern grapes-angketyarrel warrkirreyek. <sup>29</sup> Alerikwan menty-tangkwal angkek, 'Arrangkw.' Iterreral-alpek.

Ikwer-penh ra nyerrirrerl-alpek, rap angkep-anem alpek. Ra aynikwek awelhek, atherrk lyapelherl-ayntetyek.

<sup>30</sup> Artwamp ra alerikw ingwera lanthe-anem. Alerikwan angkek, 'Ya, kel ayeng alhem!' Ranap arrangkw alhey-angenharl."

<sup>31</sup> Jesus-el renh-rnem ayernek, "Alerikw nthenh-apenyarl aynewikw awelhekan?" Rernem renh ilek, "Alerikw wetharl renh-tangkwal ayernek, rant ikwer awelhekan." Jesus-el-anem ikwer-rnem ilek, "Apmwernem ingkerrenh rernem Akngey-warl angkepirrenhey-alpeyeh nyerrirremel, man akarriley-angker-rnem-then arelh apmwangkwarrarl alheyel-rnem-then. Rernem Akngey-kenh-angkwarr aylpeyel, arrantherran arrangkwarl.

<sup>32</sup> John Baptise-emeley-angker ra iwerr arraty arrekantherr iylparrernekarl, arraty-angkwarr apentetyek. Arrantherranap ikwer irrpelthirrenhan. Apmwangkwarr alhenh-rnem, man akarriley-angker-rnem-then arelh apmwernem-then ikwer awelhenharl, Akngey-warl angkepirremel. Arrantherran anngetherr arek arrpemarl, angkepirrey-angenharl, John ikwer awelhey-angenh."

#### *Angka amern grapes-akert*

(Mark 12:1-12; Luke 20:9-19)

<sup>33</sup> "Arrantherr atyeng awelhenherr-arey. Apmerek-artwelyel amern grapes lyapelhilek, parrik apwert-penh artek, amern grapes lyapetyek parrikew kwen. Warl arpentyt ra artek, artwa anyent irrwerl anayntetyek, arntarnt-arelherl-anemel, ingwerenty irryert apetyekerr amern aketyek. Irrkanem kwen angernemel, amern grapes lthwayntetyek, akarr areyirreyek. Atyetyartel warrkenh-rnem arrernek amern grapes arntarnt-aryntetyek, ra apmer ingwer-warl alhey-kety. Kel ra apmer ingwer-warl alhek."

<sup>34</sup> Amern ampengirrentyel, ra warrkenh-rnem thwene, amern grapes ampeng awaketyek ikwer. <sup>35</sup> Ingwer-rnemel warrkenh anyent atwek, ingwera ipmek-antey atwek, ingwer apwertel wek. <sup>36</sup> Ra warrkenh ingwer-rnem thwene, akgerr. Rernem renh-rnem atwek arrpemarl.

<sup>37</sup> Ran angkek, 'Alerey anyent atyenh atha renh thwene, rernem apek ikwer awelhetyek.' Atyetyartel alerikw ikweren anyent-antem thwene. <sup>38</sup> Atyetyart kenh alerikw rernem arnarek, rernem angkerrenh, 'Ingwer-ingeran ranem grapes-angketyarrel atyetyart arenyeh. Anwantherr renh atwey, anwekantherr grapes-angketyarr areyntey-alkenh.' <sup>39</sup> Rernem renh anterrkwek, aketh-warl-anem iwemel ipmek atwek-anem renh."

<sup>40</sup> Jesus-el renh-rnem ayernek, "Nthakenharl arrantherr iterreyel, atyetyart ra apey-alpeyehnel, nthakenharl warrkenh-rnem irreyeh?

<sup>41</sup> Atyetyart priest-rnem-then artwa ilkwernem-then rernem renh tyernek, 'Ra renh-rnem ipmek atweyeh. Ranem warrkenh mwerr-rnem arrerneyeh, rernem

grapes-angketyarr mwerr arntarnt-arayntetyek, amern grapes ikwerenrh arraty ikwer awaketyek.”

**Anaytileyel:** *Akngey-kenh angkakert-rnem warrkenh-rnem-apeny. Atyetyart-kenh alerikw Jesus-apeny. Akngayel angkakert-rnem thwenek atyetyartel warrkenh-rnem thwenek-apeny. Ranem Jesus alerikw ikwerenrh thwenek arrpemarl ahern nhenh-warl, atyetyartel alerikw ikwerenrh thwenek-apeny. Phariee-rnem apmer arntarnt-arey-angker-rnem-apeny.*

<sup>42</sup> Jesus-el renh-rnem ilek, ‘Arranther Akngey-kenh angka arrwekelely iterl-arey-areny. Angka alakenh aynteyel: ‘Arwerl arpenty ingwerel iwem apmwek-athen. Arwerl ran impen-antey, lywenty artetyek. Ingkartel renh arrernek anwekantherr.’ <sup>43</sup> Arranther ikwer impen anyentek awelhey-angenh, arranther amentewarl irrekerr ikwerenrh-angkwarr-kety. Ingwer-rnemel renh tnakenty, ra renh-rnem arntarnt-aremarl.’

**Anaytileyel:** *Jesus angka nhenh-anem ikwer-rnem ilek, rernem arraty iterl-arayntetyek. Alakenh-anyem ilelhek ikwer-rnem, “Jew-rnemel ayenh iwerl-alhek, arwerl apmwapeny-arrpantey. Rernem ayenh ipmek atweyen.” Jesus ran arwerl impen mwerr-angker weth-apeny, ingkerrenh ikwer inkwerelh-ayntetyek.*

<sup>45</sup> Atyetyart tyat-areny-rnem-then Phariee-rnem-then rernem awek-penh, rernem iterl-anem-arek, “Anwekantherrip nhenhey angkeyel wenh!” <sup>46</sup> Rernem iterrenh renh atwetyek-arrpantey. Rernem aterirrenh, ingwer-rnem-kety, rernemarl renh iterl-arenh angkakert Akngey-kenh.

## 22

*Angka tyenkerr-akert  
(Luke 14:15-24)*

<sup>1</sup> Jesus-el angkanem ikwer-rnem ilek, renh-rnem akalty-anthek arrpemarl, <sup>2</sup> “Akngey-kenh-angkwarr alakenh aynteyel. Atyetyart anyent anenh. Akngerr akarirrek, amern kwenty arlkwetyek, alerikw ikwerenrh itengirrenty aytaretyek. <sup>3</sup> Warrkenh-rnem thwenek, ingwer-rnem ikngwerl-alpetyek. Rerneman arkarirrek ikwerety. <sup>4</sup> Ra warrkenh ingwer-rnem thwenek, Ingkerrenh ikngwerl-alpenherr-arey, amern kwenty arlkwetyek, aker pwelek anter-akngerr ilek-ilek, arlkwetyek-antem.”

<sup>5</sup> Rernem ikwer awelhey-angenh. Ingwer-rnem amern weyt atherrik inetyek, ingwerenty amentewarl alherlewenh, ingwerenty amentewarl anew-anenh. Ingwer-rnem store-itwek warrkirrenh ampwal ilek-ilek mpwarenh. <sup>6</sup> Ingwer-rnemel warrkenh ingwer-rnem anterkwemel atwek ipmek-antey.

<sup>7</sup> Atyetyartel inngantey ingwer-rnem irlkentyilek, rernem apmwernem atwetyek, warl-rnem arrtyeynetyek. <sup>8-9</sup> Ra warrkenh ingwer-rnem thwenek, ingkerrenh ikngwerl-alpetyek, ‘Ingwer-rneman arrwekelarl ayernek-rneman arkarirreyel amern kwenty ikwer-warl apetyeyangenh. Apmer arrpanenhel-warl ingkerrenh ikngwerl-alpenherr-arey, ingkerrenh apetyeyek, kwenty arlkwetyek.’ <sup>10</sup> Rernem amperirrenhey-alpek akwerr-warl ikngwerl-alpek, artwa ingwerek-ingwer ikngwenhey-alpek warl ikwerenhwarl, amern arlkwetyek, artwa mwerr-rnem-then apmwernem-then ingkerr apey-alhek amern kwenty arlkwetyek. Akngerr innga akarirrek, warl kwen arrkngalek-anem.

<sup>11</sup> Akngerr akarirrek, arnkwa mwerr-angkerel aylpemel. Atyetyart rap arey-alhek artwa ingweran arnkwa aterrng-akertarl, arnkwa mwerrek aylpey-angenh. <sup>12</sup> Atyetyart ranem ayernek, ‘Ilek-kety nga arnkwa mwerrelan aylpey-angenh?’ <sup>13</sup> Atyetyartel-anem artweran ilanthek, artwa ilyatherr arerntetyek, ingkety-atherr-then aketh-warl-anem iwetyek, atwemengk-warl, artewentyel arrangkeyel-rnem-warl. <sup>14</sup> Akngey akngerrek yangkelhek, irrpety ingwer-rnemant-anem ra arrwekel-antey rlwaneynek, ikwerenrh-nem anayntetyek.”

**Anaytileyel:** *Ingkart Akngey ingkerrenhek arrkernelheyel, ikwer-angkwarr ingkerrenh anetyek. Ingkerrenhek, apmer arrpanenhel ingkerrenh aneyel-rnemek. Ra ingkerrenhek ilkelheyel, ikwer-angkwarr ingkerrenh anetyek. Ingwer-rnem arkarirrenh kwenty ikwerenrh arlkwekerr; aley-anyem ingwer-rnem Akngey-kenh angka awekerr arkarirreyel-apeny. Alakenh angka nhanyem anayntileyel.*

*Man kapmentek anthetyek  
(Mark 12:13-17; Luke 20:20-26)*

<sup>15</sup> Phariee-rnem anyentirrek angkerretyek, rernem Jesus renh irrtywerl-ampernetyek, ra apmwel-areth angkenty renh awetyek. <sup>16</sup> Herod-el-rnem-then,

Pharisee-rnem-then rernem artwernem thwenek, Jesus renh ayernetyek, "Ingkartay, anwantherr ngenh iterl-areyel. Ngan artwa arraty aneyel, ntwa Akngey-kenh angka arraty akalty-antheyel. Nga ahern-arenyek awelhey-angenh.<sup>17</sup> Nthakenh nga iterreyel, anwernantherr kapment ilkewernem man antheynetyek, menty?"

<sup>18</sup> Jesus ra iterl-arek, rernemarl irrywerremel angkek ikwer-warl. Ra renh-rnem ilek, "Arranther ayenhanterr arkerneyel, ayeng arrekantherr akengenty angketyek."

**Anayntileyel: Rernem arrkernelehenh ikwer, ra akengenty angkentyek. Ra akengenty angkenty, rernem renh ingwer-ingerant anterrkwetyek, renh ipmek atwetyek.**

<sup>19</sup> "Ngkwelty atyeng akngetiyay, atha tax maney aretyek." Rernem ngkwelty anyent renh antheke.<sup>20</sup> Jesus angkek, "Angwenharl inngerr-akertan nhenhan, itna angwenh-kenh-akert nhan?"

<sup>21</sup> Rernem ikwer ilek, "Caesar, atyetyart kapment ilkwarlap ran nhenhey!"

Jesus-el renh-rnem ilek, "Man-areny-rnemelar arrenhantherr manek ankem, arrantherr man renh-rnem anthenherr-arey, rernem-anem kapment man renh antheylek. Akngey-kenh warrk-rnemel man ineynem, arrantherr ingkerrehel arrernetyek arrpemarl, Akngey ikwer-anem rernem man renh arrernetyek."<sup>22</sup> Jesus renh awemel, rernem apateyelpekk, Jesus-el angka arraty ikwer-rnem ilekarl. Kel rernem alpek-anem.

#### *Rernem ipmepenh itethirreyen*

(Mark 12:18-27; Luke 20:27-40)

<sup>23</sup> Artwa Sadducee-rnem Jesus ikwer-warl apetyek, renh ayernetyek. Sadducee-rnem akalty-anthenh, arrewaly intem-antey ayntem, nthakenh ipmepenh akwentey-angenh. Rernem Jesus renh ayernek.<sup>24</sup> "Ingkartay, Moses-el angka anwekantherr arrernek, arelh inpertirrenty, aytelyikw ranemarl arelh ikwer-warl itengirretyek ikwer-atherrenhanemarl, ampa ingwer-anem anetyek.

<sup>25-26</sup> Anew ikwerenhek arelh anyent ran inpertirrek ampeweny-anteyarl, ra aytelyikw ikwerenht-itwel itengirrek arrpemarl. Arelh ra inpertirrek aytelyikw ingwerek-anemarl, ampeweny-antey arrpemarl. Aytelyikw-rnem 6 ilenh-rnem arelh anyent ikwer-itwel-antey, rernem ingkerrehn anyentarl-anyentarl itengirrek, arrewaly ingwer iylpeler-lewenty, awayikw ingwer-itwel itengirremel, ra ampeweny arrangkw arrpemarl. Artwa anyent aytay aynek itengirrek, arelh ikwer-itwel-antey. Artwa ranem ilwek, ampeweny-antey, arelh anyent ikwerenhek ampa ikwer-atherrenh aney-angenh-antey.<sup>27</sup> Arelh ranem ilwek.<sup>28</sup> Artwa rernem ipmepenh akemirrenty, artwa angwenharlap arelh ikwerenhek innang?"

<sup>29</sup> Jesus-el renh-rnem ilek, "Arrantherr apmwel-areth akalty-antheyel Akngey-kenh angka arrantherr iterl-arey-angenh. Arrantherr Akngey iterl-arey-angenh-antey, Akngeyan rlterrk ilkawertarl aneyel, ingkerrehn ipmepenh itethiletyek."<sup>30</sup> Rernem ingkerrehn itethirremel alpeyenr rernem aney-alpeyenr intem-antey, arelh-itwel itengirrey-angenh, irrwerl-areny-rnem-apeny.<sup>31</sup> Akngeyel arrwekel-antey renh-rnem ilek, rernem angkearl itethirreyen, ipmepenh. Arrantherr angka ilenh iterl-arey-areny, angka ilenh Akngey-kenh pipel arraty inngarl aynteyel. Arwerl wetherarl lherrm ampenh-apeny.<sup>32</sup> Akngeyel Moses renh ilek, 'Ayeng ngkwenhek-rnem ingkerrehn Atyetyart aneyen, Abraham-ek, Isaac-ek, Jacob-ek.' Rernem itethantey aneyarr-alpekk Akngey-kenh apmerel irrwerl, Abraham-akerr, Isaac-akerr, Jacob-akerr. Arrantherran ingwer-rnem apmwel-aretharl akalty-antheyel intem iltwenty-arrpantey. Rernem ipmepenh itethirremel ingkerrehn alpekk Akngey-itwel aney-alpekk, intem-antey. Alakenh-anyem, anwantherrarl ilwem, Akngeyel anenhantherrenh angkep arrpemarl itethilem, anwantherrap apmer ikwerenhek-warl irrwerl alpem, ra arrenhantherr arntarnt-arayntetyek apmer ikwerenhek-itwel intem-antey."

<sup>33</sup> Jesus-el renh-rnem apatel-antheke.

#### *Angka Akngey-kenh innga*

(Mark 12:28-34; Luke 10:25-28)

<sup>34</sup> Pharisee-el-rnem awek-penh, rernem anyentirrek, angkerretyek.<sup>35</sup> Artwa anyent ingwerel Jew-kenh-angkwarran iterl-arenhan. Ranem Jesus ikwer arrkernelehen, ayernemel,<sup>36</sup> "Ingkartay, Moses-el angka akngerr anwekantherr arrernek. Ntheneh-apenyarl angka rlterrk impen inngan, anwantherr renh apentetyek?"

<sup>37</sup> Jesus-el renh tyernek, "Anyent renhant apentetyek, anyent ikwerant iterretyek",<sup>38</sup> Angka nhanyem impen, arrwekeleny.<sup>39</sup> Akngey-kenh angka ingweran alaken-haym aynteyel: 'Arrantherr ingwer-rnem arntarnt-arayntetyek, ikwer-rnem inkwerelh-ayntetyek, ampa arrekantherrenh-rnem arntarnt-areyel-apeny.'<sup>40</sup> Angka ingwer-rnem

arrangkwarl, Moses-kenh angka ingwer-rnem artwa angkakert ingwer-rnem-anem ingkern-they-anem aremirrek."

*Artwa David-kenh*

(Mark 12:35-37; Luke 20:41-44)

<sup>41</sup> Pharisee-rnem ikwer-itwek rtenh-antey, Jesus-el renh-rnem ayernek, <sup>42</sup> "Nthakenh arrantherr iterl-areyel Christ itethiley-angker renhan. Angwenh-kenh ran?"

"Ranem Atyetyart David-kenh," rernem renh tyernek.

<sup>43</sup> Jesus-el-anem renh-rnem tyernek, "Akngay-kenh itnwengel ikwer lwewarrennek. David-el Christ renh itnewek 'Atyetyart atyenh'. <sup>44</sup> Akngayel atyetyart atyenh renh ilek, 'Atyeng-itwel ana! Arkarirreyel-rnem, atha ngenh atyetyart arrernem ikwer-rnem.' <sup>45</sup> Nthakenh atyetyart David-kenh? David-el renh atyetyart antwelyel. Nthakenh arrantherr iterreyel."

<sup>46</sup> Ingwerentyel arraty renh tyerney-angenh-they, rernemap menty-anem ipmelhek, angka ingwerek ayerney-angenh-anem.

**Anayntileyel: David-they ingkern, ingkern-penh ranem apetyek.**

## 23

*Jesus-el Pharisee-rnem-then Moses-kenh angkakert-rnem akalty-antheyel*  
(Mark 12:38-40; Luke 11:37-52; Luke 20:45-47)

<sup>1</sup> Jesus-anem ingkerrenh-warl angkek kwertengerl ikwerenh-rnem-warl-then, <sup>2</sup> "Pharisee-rnem-then Moses-kenh-rnem-then akaly innga aneyel, angka Moses-kenh-angkwarran. <sup>3</sup> Rernem Moses-kenh angka arraty akalty-antherl-anenty, arrantherr ikwer-rnem awelh-ayntetyek, Pharisee-kenh-angkwarr apentey-angenh. Rernem ingwer-rnem akalty-anthem, rernem Akngay-kenh-angkwarr arraty apentey-angenh.

<sup>4</sup> Rernem ingwer-rnem akalty-anthem, rernem renh-rnem aleth arntarnt-arey-angenh-anemarl. <sup>5</sup> Rernem tnakelheyel. Mwantyel arntarnt-arelhennherr-arey yanh-rnemkety kwet arlpenty-akert-kety! Akngay-kenh pip-rnem rernem rlwewarl arerntnelhem iytellarr-apeny akwewarl-then, ingkerrenhel renh-rnem arayntetyek. <sup>6</sup> Warl ikwer-warl rernem anyentirrem, angkerr-ayntetyek. Rernem arrwekel-warl arrernelhetyel arrngeleleng ingwer-rnem-kety, rerneman tnakelhetyek. Ingkerrenhel inkwerelhemel amern arlkwetyek, rerneman arrwekel-warl arrernelhetyek arrngeleleng ingwer-rnem-kety, rerneman tnakelhetyek. <sup>7</sup> Akngerr akarirrenty-warl, akngerrel renh-rnem tnakelh-ayntetyek, ingkart ilkwarrpantey.

<sup>8</sup> Arrekantherr akaly-anthey-angker anyentant. Akngay anyent irrwerl-areny rant ingkerrenhek aneyel. Ingkerrenh arrantherr aneyel, awayenhang-apeny, angkwerenhang-apeny. <sup>9</sup> Ingkart ahern-areny ntwa tnakey-angenh, Akngay-arrpantey. Akngay alker-arenyekant anwantherr awelhetyek. <sup>10</sup> Nthakenh ingkart rltwa tnakelhey-angenh. Artwa itethiley-angker rant atyetyart arrekantherrenh aneyel. <sup>11</sup> Ingwerenty apek atyetyart ilkwa anenty, rap warrkenh ingwer-rnemek. <sup>12</sup> Artwa anyent ilkwarrpantey ilelhenty, Akngayel renh areyel arrangkwarl. Artwa ra apmwamwam ilelhenty, Akngayel renh areyel mwerrarl.

<sup>13</sup> Yaw-yaw! Pharisee-rnem-then angka Moses-kenh akalty-anthey-angker-rnem-then! Akngayelan arrenhantherr artewentyel innga irrwampenh-antheyen! Arrantherr angka Akngay-kenh arraty akalty-anthey-angenh, akngerr ingwer-rnem akaltyirrelyek, ikwerenh-angkwarr anayntetyek. Arrangkwaw! Rerneman angka ikwerenh iterl-arey-angenh, arrantherr-apeny! Rernem irrtwyerremel angkeyel Akngay-warl-athek arleng-alenty. Akngayelarl ingkerrenh court-emileyen, rap renh-rnem irrwampenh-antheyen, irrtywalth renh-rnem. Ingwer-rneman ra alyepel irrwampenh-antheyen.

<sup>15</sup> Artwa Pharisee-rnemay, Moses-kenh-rnem-then arrantherr apmwangkwarr akaltyileyel. Arrantherr apmer arleng-warl alheyel, artwa anyent angkepiletyek, renh Ingkart angkwarr akaltyiletyek. Arraty-wenyl arrantherr apmwangkwarr akalty-antheyelarl, apmwangkwarr apenterl-ayntetyek, arrantherr apenteyel-apeny!

<sup>16-17</sup> Rernem irrtwyerremel ilelhetyel tyaty ilkwangkwarr. Alakenh ingwer-rnem irrtwyerremel ilelhetyel, 'Gold innga aynteyel-apeny tyaty ilkwitwel, arraty ayeng angkeyel wenh.' Tyaty ilkwa impen, gold-an arrangkwarl.

<sup>18</sup> Apwert ilperr-ilperr impen ikwer tyenkerr amperneteyek. Ingwer-rnemel irrtwyerremel ilelhetyel alakenh, 'Apwert ilperr-ilperr tyaty ilkwitwel innga aynteyel-apeny, innga atha ileyel.' <sup>19-20</sup> Ingwer-rnem alakenh irrtwyerremel ilelhetyel, 'Gold tyaty ilkwel innga aynteyel-apeny, arraty innga atha ileyel.' Ingwer-rnem alakenh angkeyel, 'Tyaty ilkwa alakenh aynteyel-apeny, innga arraty atha ileyel.' <sup>21</sup> Akngay-kenh warl ilkwa nhel anwantherr iterretyek, arraty apentetyek Akngay-kenh-angkwarr.

Inngant nga ilelhetyek, irrywerremel ilelhey-angenh. <sup>22</sup> Ingwer-rnem irrywerremel ilelheyel alakenh, 'Alkenhel arem'. Arrkent iley-angenh, arrantherr iterretyek Akngey anyent ikwer. Anwantherr iterretyek ra irrwerl-itwel anwekantherr mpwelheyel, irrywerremel ilelhey-angenh.

<sup>23</sup> Artwa Pharissee-rnemay! Akngeyelan arrenhantherrenh artewentyel irrwampenhantheyen! Arrantherrarl amern atherrk akep-akalthem, akely anthem Akngeyekan, Moses-elarl akalty-anthenh-angkwarr. Angkan ikweren arrangkwarl. Angka akely nhan, arrangkwarl. Arrantherr arratyilerrey-angenh, ingwer-rnem arntarnt-arey-angenh, arrantherr Akngey-angkwarr arraty apentey-angenh. Arrantherr angka apenterl-anem angka ingkerr! <sup>24</sup> Arrantherr angka anyent impen ikweretyan iypelir-rekarl. Arrantherr angka apmwel-aretharl apenteyel, angka mwerr-angkwarr apentey-angenh.

<sup>25</sup> Arrantherr Pharissee-rnem apmwel-areth iterreyel. Arrantherr mwerr-arrpanterey inngelheyel, kwenan apmwarl. Arrantherr apmwernemarl rnter-rnem. <sup>26</sup> Arrantherr artwa aparrng-apeny. Arrantherr apmweketyt aykepirretyek Ingkart-warl. Ikwer-penh arrantherr Akngey-angkwarr arraty aneman.

<sup>27-28</sup> Arrantherr iterl-arelheyel arraty-angkwarr-arrpantereyarl. Arrantherr arlka kwenan apmwakert-anteyarl! Warl mwerrarl intelheyel-arrpanterey ntwa arem, warl apmwarl kwenan. Arrantherr apmwakert-antey aneyel, warl mwerr-arrpanterey intelheyel-apeny.

<sup>29</sup> Akngeyelan arrenhantherrenh inngarl artewentyel irrwampenhantheyen! Awank-akerr artwa angkakert Akngey-kenh-rnem rernem akwernek awennig-warl. Arrantherr awennig-rnem ayterlkwel aperneyel mwerr-angker ilemel, angkakert-rnem iylpangk-ayntetyek. <sup>30-31</sup> Arrwekeleneyel-rnem angkakert-rnem atwenh. Rernemap awelhey-angenh angka Akngey-kenhek, arrangkw. Alakenh-anyem arrantherr awelhey-angenh arrpemarl. <sup>32</sup> Arrantherran irrywerremel ilelheyel arraty-angkwarr-arrpanterey, rernemarl angkakert-rnem atwenh-apeny. <sup>33</sup> Arrantherr Ingkart-kety amentirrek. Rwa ilkwa arrwekel arrekantherr mpwelheyel.

<sup>34</sup> Arrwekel-antey Akngey angkek, 'Atha angkakert-rnem artwa akalty ingwer-rnem then arrekantherr Jew-rnem-warl thwenetyek. Arrantherrarl ingwer-rnem ipmek atwem, ingwer-rnem arwerl iylypeyl-atherr-warl arrernem, ingwer-rnem whip-el atwem Jew-rnem-kenh tyat yakey-rnem-itwek, ingwer-rnem arntety anthemarl apmer arrpannel.' <sup>35-36</sup> Awank-akerr Cain-el ayteyikw Abel-tangkwel atwek. Ingwer-rnemel-anem atwenh angkakert Akngey-kenh-rnem. Artwa anyent Zechariah Barachiah-kenh alerikw rernem atwek arrpemarl, rarl rtnenh tyat ilkwa Jew-rnem-kenh kwen-itwel, ampwal rwek-arehl arrerenty. Yaw-yaw, atha arrenhantherrenh arraty ileyel. Akngeyan ahelirreyel arrekantherr. Arrwekeleney-rnemel angkakert Akngey-kenh-rnem awank-akerr atwenh-they, Akngeyelan arrenhantherr atweyehn arrpemarl.'

*Jesus amperrngirreyel tawen Jerusalem-areny-rnemek  
(Luke 13:34-35)*

<sup>37</sup> Jesus-an amperrngirreyelpek Jerusalem-areny-rnemek. "Ayengan ikwer-rnem amperrngirreyel Jerusalem-areny-rnemek! Rernem Akngey-kenh angkakert-rnem atwek, Akngeyelarl ikwer-rnem thwenek. Rernem apwertel wemel, ipmew-antey atwek renh-rnem. Ayenganap ilkelhenh, renh-rnem ingkerrenh-antey arntarnt-arayntetyek. Ayengan ilkelhenh, renh-rnem ingkerrenh akarrileyek, tywek-tywekelarl akely-rnem akarrileyek, aympelhel artemel. Alakenh-anyem. Arrangkwarl! Rernem ingkerrenhel ayenh artepelant arek! <sup>38</sup> Alakenh-anyem Akngeyelan apmer Jerusalem arntarnt-arey-angenh. Apmer yanhan ampeny arrangkw aynteyenh, alkey-anem. Tyat ilkwa renhanap atep-atakeyenh ahernel-anem arlperryt-anem ayntey-ayntey-alheyen. <sup>39</sup> Rernem ayenh arey-angenh arleng-alenty apmer yanh-itwek. Ingwer-inger ayeng angkek apetyeyenh. Rernemap ayenh areyen-anem, alakenh-anem angkemel, 'Artwa nhanyem mwerr-angker! Akngeyelan renh thwenek rlterrak-akertel!' " Angka nhanyeman Jesus-elan ilenh Jerusalem-areny-rnem-akert.

## 24

*Ingwerel-rnem tyat ilkwa atakeyenh  
(Mark 13:1-2; Luke 21:5-6)*

<sup>1</sup> Jesus ra tyat ilkwa iwerl-alhekk-penh, kwertengerl ikweren-rnem apetyek ikwer-warl angkemel, "Warl nhenn-rnem ara!"

<sup>2</sup> Jesus angkek, "Ingwer-ingeran ingwerel-rnem atakem-anem, tyat ilkwa yanh akwarrkirreyenh."

*Rernem atwerreyen**(Mark 13:3-13; Luke 21:7-19)*

<sup>3</sup> Rernem apwert alip-angketyarr irrwerl-warl nganek. Rernem ament rtnenherren-hel, rernem renh ayernek-anem, "Llengerarl ingwerel-rnem tyaty ilkwa ilenh atakeyenh, akwarrkirretyek? Nthakenh anwantherr arlta ingkern iterl-areyenh? Ngarl apey-alpey-alpeyehan ilekel anwernenhantherr ileyenhan?"

<sup>4</sup> Jesus-el renh-rnem tyernek, "Mwantyel arntarnt-arelhenherr-arey, <sup>5</sup> Ingwer-rnemarl apetyem-kety rernem irntywerremel illehelyenh-kety ayeng-arrpantey, 'Ayeng Akngeyel wetharl awank-akerr alhelek, ayeng nhanyem-anem apetyek arrekantherr-warl.' <sup>6</sup> Apmer arrpaneh atwerrerl-anenty arrantherr awerl-aneyen. Aterirrey-angenh arrantherr anetyek. Apmer aparnpan rernem ahel atwerreyen ahern-then alker-then ywerrey-alenty. <sup>7</sup> Apmer ingwer-areny-rnem-then ahel atwerrerl-aneyen. Angayakwel ilwenherreyen, ahern akngelheyen. <sup>8</sup> Alakenh-anyem aytneyen ingweleman, ahern-then alker-then ywerrey-alenty.

<sup>9</sup> Arrantherr atyeng-angkwarr apentyeyel-kety rernem arrenhantherr tyayl-warl akw-erneyen, ingkerrenhel ngenh atweyen. Ingwer-rnem arrekantherrety arlkarireyen, arrantherrarl atyeng-angkwarr apentyeyen. <sup>10</sup> Ingwer-rnem intwemelirreyen, ingwer-rnem ahelegngkw-rnem-warl ahayiweyenh tnhwerant-arey aneyen. <sup>11</sup> Irrtywerrey-angker akngerr apetyeyen Akngey-kenh angkakert-arrpantey, irntywerremel ilerl-aynteyek. <sup>12</sup> Akngerrel apmwangkwarr apentyeyen, ipmelhemel-anem mwarrant-arey arnanekerr. <sup>13</sup> Arrantherr atyeng-angkwarr apenterl-anenty arlta ingkernek-awtety, Akngeyel arrenhantherr itethileman. <sup>14</sup> Angka atyenh arlpimpireyenh apmer arrpaneh-warl, angka ilpertel-warl rernem ingkerrenhel awek-penh, arlta ra arrer-anemar."

*Artwa ahelegngkw apmer Jerusalem-itwek aneyen**(Mark 13:14-23; Luke 21:20-24)*

<sup>15</sup> "Arlta ikwerel, ahelegngkw Jew-kenh tyaty ilkwitwek aneyen. Akngey-kenh pip angka arrwekeleeny-akert Akngey-kenh angka aytneyel, Akngey-kenh angkakert Daniel-elarl ingkernekk. Arrantherrawl awem, tyaty ilkwa ikwerelarl Atetyart ilkwa ra aneyen, <sup>16</sup> arrantherr Judea-areny-rneman alhetyek, apwert-warlarl. <sup>17</sup> Arnkwek iterrey-angenh, arrantherr arwa apwert-warl anpenheyekant. <sup>18</sup> Awangk alhentyel, kwetek angkep alpey-angenh, menty ra aytney. <sup>19</sup> Ayeng amperngirreyel arelh-rnemek, rernem ampa akely irrepern atnyeneyel-kety."

<sup>20</sup> Jesus angkek, "Akngay rantarl arlta anyent iterl-areyelan, anwantherr iterl-arey-angenharl. Arrantherr Akngey renh ayerney aherretty arrerneyek, irrerntel arrenhantherr atwekerr. Renh ayerney arrpemarl, arlta arrerneyek, arrantherr alhewerarl alhaynteyek, ltyerrey-angker-wenye. <sup>21</sup> Arlta anyent ikwerel, artwa ingkerrenh arntetyirreyen, alakenh awank-akerr anwantherr arntetyirrey-angenh. Anwantherr ingkern arntetyirrey-angenh alakenh. <sup>22</sup> Arrer-anem anwantherr mpwelhem. Arlta irrpetyap-penh Akngeyel ikweren-hrnem ingkerrenh arntart-areyenh. <sup>23</sup> Akngerr arrekantherr-warl apetyem, arrenhantherr irntywerremel iletyek, Akngeyel renh-rnem thwennyty-arrpantey ahern nhewarl, Christ-apeny. Rernem alakenh ingkerrenh-warl ilelhem. Arrantherr iyelpant renh-rnem awetyek, arrenhantherr ilpertileyekarl ilenhan arrkernelheyel. <sup>24</sup> Rernem apetyem, Christ-arrpantey Akngey-kenh angkakert-arrpantey, angka ilek-ilek-akert rernem arrekantherr arrkernelhetyek, arrantherr ikwer-rnem-kenh-angkwarr apentyeyek. <sup>25</sup> Mwantyel arntarnt-arelhenherr-arey ikwer-rnem-kety, arrenhantherr ilpertilekerr, atharl arrenhantherr arrwekel ileyel-angkwarr."

*Jesus ra apey-alpeyeh**(Mark 13:24-27; Luke 21:25-28)*

<sup>26</sup> "Ingwer-rnemel alakenh ileyel, 'Christ ra apmer arlpawelarl aremirrek.' Ingwer-rnemel ileyel, 'Christ ra warl kwenel irntyertewelheyel ingwer-rnem-kety.' Ikwer-rnem awelhey-angenh. <sup>27</sup> Ingkerrenhel Artwa Impen renh areyenh arrpemarl, anaynt, ahern-arenyel awely-awely areyel-apeny. <sup>28</sup> Thip-rnem akarirreyel ipmitwel, thip inkwel. Anwantherr anaynt areyenh arrpemarl, rarl apey-alpeyehok."

**Anaytileyel: Jesus-el renh-rnem angkanem ilenh, rernem ikwer arntarnt-arelhetyek. Thip-rnem akerek arntarnt-arelheyel-apeny, anwantherr Jesus ikwerant arrpemarl arntarnt-arelhetyek.**

<sup>29</sup> "Ingkeny-then, alkent-then, antyarr-then rernem ingkerrenh akngelheyen, ayeng Anyent Impen aremirrey-alenty. Ingkeny-then alkent-then ywerreyen. Antyarr ingkerrenh irrwerl-they aytneyen."

<sup>30</sup> Arlta anyent ikwerel, ingkerrenhel ayenh arnareyenh, Artwa Impen anyent Akngey-kenh irrwerl-they apetyenty, rlterrk ilkwakert. Rernem artneyenh ingkerr. <sup>31</sup> Terampet angkelh-angkelhileyenh. Ikwer-theyan, atha alker-areny-rnem thwenem, rernem alhetyek, apmer arrpanenh-warl, Akngey-kenh-rnem ingkerrenh akarrilenhey-alpetyek."

*Anwantherr iterl-arey-angenh, ilenger Jesus ra apey-alpeyenh  
(Mark 13:28-31; Luke 21:29-33)*

<sup>32-33</sup> "Arrantherr iterrenherr-arey, arepampeyel akarley ampengirrentyel ngkweng ileyl aherrety ampep-anem. Akarleyel ileyl-apeny aherrety ampep arrer-anem, ingkeny-then alkent-then ratherr arrenhantherr ileyen, ayeng alerl apey-alpeyenh arrekantherr-warl ahern nhewarl. Ayeng apey-alpeyenh ahern nhewarl antyarr-then aytntyent, ahern-then alker-then akngelhenty. <sup>34</sup> Itetharl aneyel-rnem ingwer-rnemel rernem iterl-aremel areyenh arrpemarl. <sup>35</sup> Innga atha arrenhantherr ileyl. Ahern-then alker-then ywerreyenh. Angka atyenh intem-antey aytneyenh."

*Jesus-el renh-rnem ileyl, rernem ikwer mpwelhetyek  
(Mark 13:32-37; Luke 17:27-30, 34-36)*

<sup>36</sup> "Nthakenh ingwerentyel arlta iterl-arey-angenh, ilenger ayeng apey-alpeyenh ahern nhewarl. Alker-arenyel-rnem-then iterl-arey-angenh. Akngey anyent rant iterl-areyel, ilenger ayeng apey-alpeyenh ahern nhewarl.

<sup>37</sup> Rap irrkaty-angkwarr aytneyenh Noah-arl anenh-angkwarr-antey. <sup>38</sup> Rernem apatemel anenh, ikwer-rnem-kenh-angkwarrant anenh, amernant arlkwerrenh, ngkwarlant antywerrnh, itengirrenh apmelerreny-angkwarr. Akngey iterl-arey-angenh. Noah-el rtnwa ilkwa arnwarnenh. <sup>39</sup> Akngeyel kwaty ilkwa thwenek. Noah-an aylpenhek ikwerenh-rnem-akert rtnwewarl kwen. Kwaty atnyerr ilkwa ra ingwer-rnem ilwerl-athenek. Akngey-kenh Artwa Impen anyent apey-alpey-alenty, alakenh aytneyenh.

<sup>40</sup> Artwa atherr amern-angketyarrel warrkirrerl-anenty, angel-rnemel anyentant inerl-alheyen, ingweran iwerl-alheyenharl. <sup>41</sup> Arelh atherr apek anerl-aneyehn, ntang atherl-anemel, angel-rnemelan anyentant inerl-alheyen, ingweran iwerl-alheyenharl. <sup>42</sup> Mwantyel arntarnt-arelh-herr-arey! Arrantherr iterl-arey-angenh, ilenger Ingkart arrekantherrenh apey-alpeyenh. <sup>43</sup> Apmerek-artweyel nthakenh iterl-arey-angenh, anyelk-awarr ra apey-alheman. Ra arntarnt-arelhem, irryert-awarr ra anyelkel inekerr. <sup>44</sup> Arrantherr iterl-arey-angenh, ilenger Artwa Impen ayeng apey-alpeyenh. Akngey-kenh arlta impen anwantherr iterl-arey-angenh inpa aneyenh. Atyek-antey arntarnt-arelh-ayntenherr-arey!"

*Mwanty arntarnt-arelh-ayntetyek, Jesus-arl angkep apetyeyenh  
(Luke 12:35-48)*

<sup>45</sup> "Artwa ilkwa anyent anem warrkenh akngerrew-arteys. Atwerrpan ra angkem ikwerenh-rnemek, 'Ayengarl alhem-kety, arrantherran warl atyenh akarerl-ayntenherr-arey! Mpwelherl-anemel, ayengant apey-alpetyek-atety, arntarnt-arelh-hemel.' Akngerr apmer ikwerel akarrireml, amern akngerr inkwerelhemel amern kwenty arlkwerrem. Ingwa ikwerel-antey artwa ilkwa ra alpem warl ikwerenh-warl. Warrkenh ikwerenh-rnem, atyek-antey anem, arntarnt-arelhem ikwer lyenty-akert. Artwa ilkwan inkwerelhem, warrkenh ikwerenh-rnemarl atyek-antey ikwer mpwelhemek, rarl ilanthek-angkwarr. Ra renh-rnem illem arrernelhetyek, rap amentel-antey amern-anem ampernem, rernem arlkwetyek. <sup>46</sup> Artwa ilkwa alhem-tangkwel. Rarl apey-alpemel, warrkenh renh arey-alpem, mwerrarl warrkirrerl-anenty. Ra inkwerelhem, rap angkem warrkenhek, 'Nga artwa mwerrarl atyeng warrkirreyel. <sup>47</sup> Ngan atyetyart aneyenh warlek, pwelek-rnemek, ilek-ilek atyenh ingkerrenhek.'

<sup>48</sup> Warrkenh ingweran arrayt warrkirrey-angenh. Ra iterrem, 'Atyetyart atyenh apey-alpey-angenh-antey, ywerreyel-antey.' <sup>49</sup> Warrkenh apmwa ra warrkenh ingwer-rnem atwem. Ran aynterlant-anem, amernant akngerrarl arlkwemel, ngkwarl-then antywem, terangk irreyek-atwety. <sup>50</sup> Warrkenh apmwa apal aytntem, atnaraty, atyetyartarl apey-alpeyenh. Ingwer-ingerant atyetyart apey-alpek anyelkel. <sup>51</sup> Atyetyartel warrkenh apmwa artewentyel atwem, irrentemel artwa apmwerneh-warl, atyetyart ikwer awelhey-angenh-rnem-warl-anem." Alakenh-anyem Jesus ikwer-rnem angkenh.

<sup>1</sup> Jesus-el renh-rnem ilek, "Angka atha iletyek, Akngey-kenh-angkwarr alakenh aynteyel. Artwa ra aleyak anyent-itwek itengirrey-alenty, aleyak 10 rernem alherlewek artwa anyent rlwatetyek lyenenty-akertel. <sup>2</sup> Aleyak 5-pel ingwer-rneman akwerrparl. 5-pel ingwer-rneman akaltyarl. <sup>3</sup> Aleyak 5-pel akwerrpel-rnem anter akelyarl akngek, rernem lyenenty lyerrtyiletyek. <sup>4</sup> 5-pel akalty-rnem rernem anter ilkwarl akngek, anter ywerrekerr, lyenenty lyerrtyiletyek.

<sup>5</sup> Rernem ingkerrenh mpwelhenh arleng-alenty. Renh-rnem ankwel atwek, rernem ankwarem ayntek. <sup>6</sup> Ampepenyelanan ingweran arlek, 'Artwa yanhey ra apetyeyel-anem! Mpa anwantherr arnekirrey ikwer-warl!'

<sup>7</sup> Aleyak-rnem akwertenhey-alpek, ingkerrenhel lyenenty-anem lyerrtyilek. <sup>8</sup> 5-pel ingwer-rnem akwerrpel-rnem anterek-anem ayernenh aleyak ingwer-rnem, 'Anter ingweran anthenherr-arey, lyenenty ywerrekarl-kety!'

<sup>9</sup> 5-pel ingwer-rnemel tyernek, 'Arrangkw. Arrantherr store-warl alhenherr-arey anter ament payemeletyek!'

<sup>10</sup> 5-pel ingwer-rnem akwerrp-rnem alhek anter inetyek, artwa ra aremirrek ingkerarl, rernemarl store-warl alhek-kety. 5-pel aleyak akalty-rnem mpwelhenh, kel rernem aylpenhek warl ikwer-warl artwa ikwer-angkwarr, amern kwenty rernem arlkwetyek, artwa ra itengirrey-alenty. Ingwerentyl arriw martek-anem.

<sup>11</sup> Ikwer-penhan aleyak akwerrp-rnem apey-alpek-anem warl ikwer-warl arrpemarl. Rernem arlek, 'Ingkartay! Warl altywerilay! Warl altywerilay! Anwernantherr aylpenhetyek arrpemarl!'

<sup>12</sup> Artwa angkek, 'Atha arrenhantherr arrayt ilem, atha arrenhantherr iterl-arey-angenh.'

<sup>13</sup> Jesus-el angkanem anayntilek, "Alakenh-anyem aynteyel, ayeng apey-alpeyen arrpemarl. Arrantherr mwanty arntarnt-arelhetyek, arrantherr iterl-arey-angenharl, ilenger ayeng apey-alpeyenhan."

### *Angka warrkenh 3-pel-akert*

(Luke 19:11-27)

<sup>14</sup> "Akngay-kenh-angkwarr alakenh aynteyel, artwa anyentel artwa warrkenh irrpety arrernerl-alhek, rernem apmer arntarnt-arerl-ayntetyek. <sup>15</sup> Kel ra renh-rnem iterl-arek. Artwa ra arrwekel anthek artwa anyent man 5,000-anem. Artwa ingweran anthek 2,000, artwa ingweran 1,000. Artwa atyetyart alethel-anem ikwer-penhan anperl-alhek.

<sup>16</sup> Atyetyart ra alhek-kety Artwa anyent ingwer 5,000-akertel, ra 5,000 ingwer-anem mpwarek. <sup>17</sup> Artwa 2,000-arl anthek, 2,000 ingwer-anem mpwarek, irrkaty-angkwarr arrpemarl. <sup>18</sup> Artwa anyent ingwer 1,000 anthekarl, ra irrka angernek, irrkewarl irryert akwernetyek arlengkewemel.

<sup>19</sup> Ingwer-ingeran atyetyart angkep-anem apetyek apmer ikwerenh-warl. Ranem renh-rnem anyentel-anyentel manek ayerneynek. <sup>20</sup> Artwa 5,000-arl anthek ran ilelhek, 'Atha 5,000 ingwer-anem ngkweng mpwarek.'

<sup>21</sup> Atyetyart ranem angkek, 'Ntwa mwerr-angkwarr mpwarek wenh! Ayeng ngkweng inkwerelheyel. Apetyay atyeng-angkwarr apmer mwerr-angkerel anetyek.'

<sup>22</sup> Warrkenh ingwer 2,000-arl anthek, ranemarl ilelhek, 'Atha 2,000 ingwer-anem ngkweng mpwarek.'

<sup>23</sup> Atyetyart ranem angkek, 'Ntwa mwerr-angkwarr mpwarek, ayeng ngkweng inkwerelheyel. Apetyay, atyeng-angkwarr apmer mwerr-angkerel anetyek.'

<sup>24</sup> Warrkenh ingweran 1,000-akertel atyetyart ikwer ilelhek, 'Ayengan arrangkwarl. Atyetyartay, ngan artwa awerrarl. Ntwa arwa alhewer man iney-angkeran ingkerrenh-they. <sup>25</sup> Ayeng aterirrek, man ingkerrenh irrkewarl akwernek, arlengkewemel. Nhanyem man ngkwengh ingkerrenh-antey.'

<sup>26</sup> Atyetyart ranem renh ilek, 'Ngan warrkenh apmwarl, alhengkerrarl. Ntwa ayen iterl-areyel, atha ingkerrenh akarriley-angker, amern atha lyapelhey-angenh-itwek. <sup>27</sup> Ntwa man bank-warl arrerney-areny areyilemel.'

<sup>28</sup> Man ngkwengh antha artwa 5,000-akert-warl. <sup>29</sup> Arrayt-angkwarr apenteyel-rnem Akngay-kenh-rnem arntarnt-areyenh. Apmwangkwarr alheyl-rnem, Akngay ikwer-rnem-kety ipmelheyen. <sup>30</sup> Warrkenh apmwa akwerr-ampeny-warl irrenteyen, atayel arrangkeyel-rnem-warl.'

**Anayntileyel: Warrkenh mwerr atyetyart ikwer awelhenh-apeny, anwantherr Ingkart Akngayek awelh-ayntetyek. Ingkart Akngayel anwenhantherr arrernek, ikwer warrkirk-ayntetyek. Anwantherr ikwer awelhenty, ra anwenhantherr anthem arrpemarl.**

*Angka yep-yep-akert nanikwet-akert-then*

<sup>31</sup> Jesus-el renh-rnem ilek, "Ayeng Artwa Impen Akngey-kenh. Ayeng apey-alpeyenh rlterrk ilkawakert angel-rnem-then. <sup>32</sup> Ahern-areny-rnem ingkerrenh rernem anyentir-reyenh atyeng-warl. Atha ingkerrenh akngakeyenh artwa anyentelarl yep-yep-rnem-then nanikwet-rnem-then akngakeyenh-apeny. <sup>33</sup> Yep-yep-rnem atha akngakeyenh arraty-ampeny-warl. Nanikwet-rnem atha akngakeyenh ayleng-ampeny-warl."

<sup>34</sup> Athanem arraty-ampeny-rnem ileyenh, 'Apetyenherr-arey, Akngey atyehn arrekan-therr inkwrelheyel. Apmer nhnen atha arrekantherr arrwekel-antey mpwarek, ahern nhnen arrprerney-anghen-antey. <sup>35</sup> Ayeng angayakwirrek, arrantherr amern anthek arlkwetyek. Ayeng angkethakwirrek, arrantherr ayenh kwaty antywetyek anthek. Ayeng alethangank, arrantherr ayenh arntarnt-arenh. <sup>36</sup> Ayeng arnkwek arrangkw anenharl, arrantherr ayenh arnkwa anthek. Ayeng arntetyirrek, arrantherr ayenh arntarnt-arenh. Ayeng tyayl-itwek anenharl, arrantherr atyeng-warl apetyek rwanng aretyek weth-lkwer ilkwathererr.'

<sup>37</sup> Mwerrel-rnem renh tyernek, 'Ingkartay! Ilenger ngenh anwernantherr angayakw arek, amern-anem anthemel? Ilenger ngenh anwernantherr angkethakw arek, kwaty-anem antywetyek anthek? <sup>38</sup> Ilenger ngenh alethang anwernantherr arek, warl-warl-anem atnwenheynek? Ilenger ngenh anwernantherr arnkwek arrangkw arek, arnkwanem ngkweng anthemel? <sup>39</sup> Ilenger ngenh arntety anwernantherr arek, tyayl-itwek-then ngenh arek?'

<sup>40</sup> Atha tyerneyen, 'Atha arrenhantherr arraty ilem, arrantherr alakenh-anyem irrepern-rnem arntarnt-arek, rernem atyehn-rnem ingkerr.'

<sup>41</sup> Ikwer-penhan ra ayleng-ampeny-rnemek ilek, 'Arrantherr apmwernem alhenherr-arey atyengen! Alhenherr-arey rwa aknganenty-warl aletharl ampeyel-warl. Atha rwa mpwarekarl, renh-rnem arrtyetyek arrenty-kenh-rnem-then. Rwa nthakenh ilwernelhey-angenh. <sup>42</sup> Ayeng angayakwirrek, arrantherr ayenh amern arlkwetyek anthey-angenh. Ayeng angkethakwirrek, arrantherr ayenh kwaty antywetyek anthey-angenh. <sup>43</sup> Ayeng alethang anek, arrantherr atyengetye intwemelant irrek. Ayeng arnkwek arrangkw anenharl, arrantherr ayenh arnkwa anthey-angenh. Ayeng arntetyirrek, ayenh arntety arntarnt-arey-angenh. Ayeng tyayl-itwek anek, arrantherr ilkwathererr apetyey-angenh atyeng-warl.'

<sup>44</sup> Apmwel-rnem renh tyerneyen, 'Ingkartay! Anwernantherr ngenh angayakw arey-angenh? Anwernantherr angkethakw arey-angenh? Anwernantherr ngenh alethang anwernantherr arey-angenh? Anwernantherr ngenh arnkwek arrangkw arey-angenh? Ilenger ngenh arntety anwernantherr arek, tyayl-itwek-then, ngenh arntarnt-arey-angenh?'

<sup>45</sup> Atha tyerneyen, 'Atha arrenhantherrenh arraty ilem, arrantherr apek artwa apmwamwam atyehn-rnemek alakenh-anyem arntarnt-arey-angenh, rernem atyehn-rnem ingkerr.'

<sup>46</sup> Apmwerneman alheyen apmer rwa aknganentyarl aleth ampeyel-warlarl. Mwerr-rneman apmer mwerr-warl alheyen, rernem intem-antey iteth aneyen ikwer-itwek.'

## 26

*Rernem angkerreyel Jesus renh anterrkwetyek, atwetyek  
(Mark 14:1-2; Luke 22:1-2)*

<sup>1</sup> Jesus-el renh-rnem akalty-anthek. Ikwer-penhan ra kwertengerl ikwerenh-rnem ilek, <sup>2</sup> "Arlta atherr-inger aytetyel tyenkerr-anem arlkwey-alenty. Ahelengkwel-rnem ayenh Akngey-kenh Artwa Impen artwa ingwer-rnem-warl ahayiwayen, rernem arwerl iypeyl-atherr-warl atanathyek."

<sup>3</sup> Moses-kenh-rnem-then, tyat-areny ilkwer nem-then Atyetyart Jew-rnem-kenh-then, rernem akarrikrek, aytetyart ilkwa tyat-areny Caiaphas-kenh apmer-warl. <sup>4</sup> Rernem angkerrenh, Jesus renh anterrkwemel, renh ipmek atwetyek irrtyertel, <sup>5</sup> "Alerl-antey ra anayntey, akngerrel anwenhantherr atwekerr, ahelirremel ikwer-they."

*Jesus apmer Bethany-itwel  
(Mark 14:3-9; Luke 7:36-50; John 12:1-8)*

<sup>6</sup> Jesus apmer Bethany-itwel anen. Ra amern arlkwenh Simon-kenh warlel, kwertengerl ikwerenh-rnem-akertel. Simon-arl anen awank tywen-akert apmer ikwerenhel, ra mwerr-anem aleyan. <sup>7</sup> Arelh anyentel anter mwerr-angker thelek, akapwert Jesus renh apernemel, arelh rarl anter renh payemelek man akngerrel. <sup>8</sup> Kwertengerl-rnemel renh arek, rarl Jesus akapwert anterel apernek. Rernem

angkerrenh, “Ilek ra anter mwerran arimpeyel? <sup>9</sup> Ilek-ketyarl ra anwenhantherr anthey-angenh? Anwantherr tharlemiletyek, man akngerr inetyek, man-weny-rnem, irrepernem anthemel.”

<sup>10</sup> Jesus-el renh-rnem iterl-arek, rernemarl tyel-angkerrenh. Jesus-el renh-rnem ilek, “Arrantherr ahelirreyang ikwer, mwerr-angkwarr ayenh anterel apernek. <sup>11</sup> Mwerr-angkwarr arrantherr man-weny-rnem arntartnarem. Aleth man-weny-rnem anayntem arrekantherr-itwel. Ayeng nthakenh aleth aney-angenh ahern nhel. Lyert arrantherr atyeng iterretyek. <sup>12</sup> Mareny-angkwarr arelh ra anterel apernek, ingwer-rnemel ayenh awenng-warl akwernetyek.” Jew-rnemel apmelerr arrewayl anterel apernenh awenng-warl akwerney-alenty. <sup>13</sup> “Atyenh-rnem apmer arpanenh-warl alhentyel, angka atyenh ilayntetyek, rernem ingwer-rnem ileyenh, arelh anyentelarl ayenh anterel akapwert apernek mareny-angkwarr.”

*Judas Atyetyart-rnem-warl alheyel*

(Mark 14:10-11; Luke 22:3-6)

<sup>14</sup> Kwertengerl anyent, Judas, apmer Iscariot-areny alhek Atyetyart ilkwa tyaty-areny-rnem-warl Jesus renh ahayiwetyek, rernem Jesus renh anterrkwetyek, rernem renh ipmek atwetyek. <sup>15</sup> “Atha arrekantherr Jesus iylparrernenhenty, arrantherr renh anterrkwetyek, man ilek-apeny arrantherr ayenh antheman?” Rernem Judas renh man 30 payemelek. <sup>16</sup> Judas ra ament-anem iterrek nthakenh-angkwarr ra Jesus renh ahayiwenh ahelengkw-rnem-warl.

*Jesus-el tyenkerr arlkweyel kwertengerl ikwerenh-rnem-akert*

(Mark 14:12-16; Luke 22:7-23; John 13:21-30)

<sup>17</sup> Arlta impen anyent ikerel, Jew-rnem akarrirek amern tyenkerr arlkwetyek. Jesus-kenh kwertengerl-rnem apetyek. Rernem renh ayernek, “Nthenh-warl anwantherr akarrirem, anwantherr tyenkerr atyenhiletyek?”

<sup>18</sup> Jesus angkek, “Alhenherr-arey, artwa anyent renh iley-alhenherr-arey, ‘Ingkartel anwernantherrenh thwenek, arlta ikerenh arrerirrek, ranem tyenkerr arlkwetyek kwertengerl ikwerenh-rnem-akertel, warl ngkwenh-itwek.’” <sup>19</sup> Rernem kel tyenkerrek atyenhilek arrawkel, Jesus-elarl renh-rnem ilek-angkwarr.

<sup>20</sup> Ingwel, Jesus kel alhek kwertengerl ikwerenh-rnem-akert amern tyenkerr arlkwetyek. <sup>21</sup> Rernem amern arlkwenharl, Ra kwertengerl 12 ikwerenh-rnem ilek, “Artwa anyentel ayenh ahayiweyehn artwa ahelengkw-rnem-warl, rernem ayenh ipmek atwetyek.”

<sup>22</sup> Kwertengerl ikwerenh-rnem amperrngirrek Jesus ikwer. Anyentel-anyentel rernem renh ayernek, “Ayeng-alew, Ingkartay?”

<sup>23</sup> Jesus-el renh-rnem ilek arrpemarl, “Artwa anyentel atyeng-itwek amern arlkweyel, rarl ayenh ahayiwem artwa ahelengkw-rnem-warl. <sup>24</sup> Angka Akngey-kenh alakenh aynteyel: ‘Akngay-kenh Artwa Anyent Impen ra ilwem.’ Artwa anyentel ayenh ahayiwem artwa ahelengkw-rnem-warl, ayenh atwetyek. Ikwer-penh rap irrkngey-weny-anemarl aneyenh. Akngayel renh atwem. Artwa ilenh rarl apmwangkwarr alkenhirrek.”

<sup>25</sup> Judas-el renh ayernek, “Ayeng-alew, Ingkartay?” Jesus-el renh tyernek, “Ngarl arraty ilelhek-angkwarr-antey!”

<sup>26</sup> Rernem amern arlkwerrenharl-antey, Jesus-el amern inek, Akngayek angkemel inkwerelhemel, rarl amern renh anthek. Ikwer-they, Jesus-el amern renh rlweth-akek. Ra kwertengerl ikwerenh-rnem anthek, angkemel, “Ina, arlkwa. Nhenhan arlka atyenhharlap ran.”

<sup>27</sup> Tyampet wayn-akert inek-penh, ra Akngay angkek inkwerelhemel, rarl wayn renh anthek. Ikwer-penh ra renh-rnem anthek antywetyek. <sup>28</sup> Jesus angkek, “Nhenhan arrngka atyenhharlap ran. Arrngka thelelhentyel ayeng ilwem, ingkerrenh-they apmwia irralkeyek. Akngayel arrenhantherr alhelek, apmwia arrekantherretty iweyek, arrenhantherr anyentelhiletyek ikwerenh-rnem-warl. <sup>29</sup> Anyent-inger-antey atha wayn nhenhan antywetyek ahern nhenh-itwek. Ingwer-ingerant, atha ngk-warl wayn lyertyen antywem, Akngay atyenh-kenh apmer-itwekant.” <sup>30</sup> Rernemap ayleherrek-anem, Ingkart Akngay-warl-athek, inkwerelhemel. Rernem warl ikwer-they Apwert Alip-angketyarr-warl alhek.

*Peter ielheyel*

(Mark 14:27-31; Luke 22:31-34; John 13:36-38)

<sup>31</sup> Jesus angkek, “Ingwel lyert arrantherr alhem, arlperryirremel, yep-yep-rnem arlperryirremel anterrem, weth-apeny. Akngay-kenh angka arrwekeleny alakenh

aynteyel: 'Yep-yep arntarnt-arey-angker attwenty, yep-yep-rnemarl ingkerrenh arlper-ryirremel anterrem.'

<sup>32</sup> Akngeyel ayenh itethilenty-penhan, ayeng apmer Galilee-warl alhem arrwikel."

<sup>33</sup> Peter illehk, "Kwertengerl ingwerel-rnem ngenh menty iwerl-alhenty, athan nthakenh ngenh iwerl-alhey-angenh."

<sup>34</sup> Jesus-el Peter renh ilek, "Atha ngenh arraty ileyel, tywek-tywek irrwey ingwepenh arlkey-ayntekerrem-awaty, nga ilelhetyek irrpety-inger ntwa ayenh iterl-arey-angenh akwerrp."

<sup>35</sup> Peter-el Jesus renh ilek, "Menty! Ayeng alakenh ilelhey-angenh ikwer-rnem-warl. Atha ngenh iwerl-alhey-angenh, aylenhanth-atherr-antey ahelengkw-rnemel atwetyek." Kwertengerl ingwer-rnem illehk arrpemarl, renh-rnem ingkerrenh atwetyek ahelengkw-rnemel.

### *Jesus Akngey-warl angkeyel*

(Mark 14:32-42; Luke 22:39-46; John 12:27)

<sup>36</sup> Jesus apmer ingwer-warl alhek kwertengerl ikwerenh-rnem-akert, apmer Gethsemane. Jesus kwertengerl ikwerenh-rnem ilek, "Nhel arrantherr anayntenherr-arey, ayeng alhey-kety Akngey-warl angketyek."

<sup>37-38</sup> Jesus-el artwa irrpety atnwenhek, Peter-akerr, artwa ingwer atherr-then, Zebedee-kenh alerikw-atherri renh-rnemant ra atnwenhek. Jesus illehk, "Ayengarl artewentyel iterremel ilwetyek-anem irreyel-kety. Arrantherr atyek anayntenherr-arey."

<sup>39</sup> Jesus ilperr-ayntek Ingkart Akngey-warl angkemel, "Akngeyay, ayeng ilkelheyel artwa ahelengkw ilenh-rnem ntwa atyengety anterrkwetyek, ayenh atwekerr. Ntwa atyengety renh-rnem anterrkwa, nga arlkwententyarlan." Ikwer-penhan, Jesus angkek arrpemarl, "Akngey, ngarl rlterrk innan, mwerr ayenh menty rernem arntety ilkwa anthey, ayenh ipmek atwey, ngarl arlkwenteyel-angkwarr. Ayeng ngkweng aweiheyel."

<sup>40</sup> Jesus apey-alpek kwertengerl ikwerenh-rnem-warl. Ra renh-rnem arey-alpek ankwanterey aynterl-anenty. Ra Simon Peter renh ilek, "Ilekekarl arrantherr ankwanterey aynteyel, ngwang ywerrey-angenh ayeng anamerl-antey arrekantherr-warl apey-alpek. <sup>41</sup> Arrantherr atyeng atyek arntarnt-arelherl-anemer. Arrenantherr ingwerentiyel ar-kernem, arrantherr apmwangkwarr apentetyek. Arrantherr Akngey renh ayerneteyek kwenirremel, arrantherr apmwangkwarr apentekerr. Arrantherr ahern-areny arwarl, arraty-angkwarr apenterl-ayntetyek-arrpantey."

<sup>42</sup> Jesus alhek Ingkart Akngey-warl angketyek irrkaty-angkwarr arrpemarl. Ra angkek, "Akngey, mwerr ayenh menty rernem arntety ilkwa anthey awaretyel, ngarl arlkwenteyel-angkwarr. Ayeng ngkweng aweiheyel."

<sup>43</sup> Jesus kwertengerl ikwerenh-rnem-warl apey-alpek. Ra arey-alpek renh-rnem ankwanterey aynterl-anenty arrpemarl. Rernem atyek-anem aney-angenh, renh-rnem ankwel interm-antey itnatwenn. Jesus-el renh-rnem akwenthilek, rernem akater-anem ingkerrenh anenh, nyerrirremel. <sup>44</sup> Jesus alhek Akngey-warl angketyek arrpemarl, angka irrkaty arrpemarl.

<sup>45</sup> Jesus kwertengerl ikwerenh-rnem-warl apey-alpek, ra arey-alhek renh-rnem ankwanterey aynterl-anenty arrpemarl. Jesus-el renh-rnem ilek, "Arrantherr ankwanterey arrpem interm aynteyel. Kel arrantherr ankwayntek. Artwa ahelengkw-rnemel Akngey-kenh Artwa Aynet Impen ayenh rleng anterkweyen, artwa apmwernem-warl ahayi-wemel. <sup>46</sup> Ingkerrenh akwentheneh-arey, anwantherr alhetyek. Artwa ilenhel-anyem ayenh ahayiweyeh, artwa ahelengkw-rnem-warl, ayenh rernem anterrkwetyek."

### *Ahelengwel-rnem Jesus renh anterrkwetyel*

(Mark 14:43-50; Luke 22:47-53; John 18:3-12)

<sup>47</sup> Judas apetyek ikwer-warl. Ra ahelengkw-rnem ikngwerl-alpek Jesus ikwer-warl. Atyetyart ilkwer nem-then Atyetyart Jew-kenh tyat-areny-rnem-then, rernem ahelengkw renh-rnem thwenek. Ahelengkw-rnem nayp arlpenty-akert apetyek, walth-then-akert. <sup>48</sup> Judas-elarl renh-rnem ilek arrwikel, rernem iterl-aretyek, "Athan artwa weth renh arrwanteyem, arrantherraw renh anterrkweneh-areyarl." Ahelengkw-rnemel Jesus renh alhengk-arek, Judas-elarl arrwikel ilek-penh.

<sup>49</sup> Judas Jesus ikwer-warl apetyek angkemel, "Atyetyartay!" Judas-el Jesus renh anterrkwemel arrwantey. Jew-rnemel artwa ingkerrenh rlwatinremel, rernem arrwanytirremel apmelarr-angkwarr.

<sup>50</sup> Jesus angkek ikwer, "Ilekek nga apetyek?" Kel ahelengkw-rnemel renh anterrkwek, Judas-elarl arrwanteyek-warl. <sup>51</sup> Kwertengerl anyent Jesus-kenhel nayp arlpentyel atyetyart ilkwa ikwerenh warrkenh renh iylpa rlweth-arternek.

<sup>52</sup> Jesus-el renh ilek, “Nayp arlpenty yanh arrerneyna, ingwerentiyel ikwer-anterl angkep atwekerr nayp arlpenty-akertel. <sup>53</sup> Ayeng arlkwententyarlan, atha Akngey renh ayernem, ra angel akngerr thwenetyek atyeng-warl, ayenh itethiletyek. <sup>54</sup> Kel, mentyarl. Akngey-kenh angka nhenhan inngarl aynteyel, arrwekelelarl ra atyeng arrerneke.”

<sup>55</sup> Jesus-el renh-rnem ilek, “Ilekekarl arrantherr apetyek irrityertelan, ayenh arrantherr anterrkwetyekan? Nayp arlpenty-rnem-thenan, walth-rnem-thenan arrantherr akngetyek, ayenh atwetyek, ayeng apmwa atwetye-angker-arrpantey! Akngey-inger atha arrenantherr akalty-anthenh angka Akngey-kenh, ieler-anemel, Jew-rnem-kenh tyaty ilkwitwek. Arrantherr ayenh anterrkwemer ikwer-antey artwa akngerrel arenty-angkwarr. Arrayt-wenyarl alakenh arrantherr ayenh anterrkwek. <sup>56</sup> Kel mwerr ayenh arrantherr anterrkwemer, alakenh Akngey-kenh angka pipel aynteyel-angkwarr, angkakert arrwekelely-rnemel ingkwernek-angkwarr, alakenh-anyem innganem atyeng mpwelheyel arrwekel.” Kwertengerl ikweren-hrnem kel aterel anterrerrek.

*Atyetyart ilkwer nemel Jesus renh arrkerneyel*

(Mark 14:53-65; Luke 22:54-55, 63-71; John 18:13-14, 19-24)

<sup>57</sup> Ahelengkwel-rnem Jesus renh akngek Caiaphas-kenh warl-warl atyetyart ilkwewarl. Atyetyart ilkwer nemel-then Moses-kenh-rnem-then ikwer-warl akarrirek.

<sup>58</sup> Peter-el renh-rnem apentelek, arleng-theyearl. Peter arrernelhek atyetyart-kenh yard-warl, ahelengkw-rnem-itwek. Ra akarenh, nthakenh rernem Jesus renh ileyeh.

<sup>59</sup> Atyetyart ilkwer nemem mpwelhenh, ingwer ayernetyek, Jesus renh ayntarrp-iletyek, rernem renh ipmec atwetyek. <sup>60</sup> Rernem apatek nthakenharl rernem Jesus renh atweyen. Ingwer-rnemel ywarn-anteyarl Jesus renh ayntarrp-ilenh. Artwa ingwer atherr apetyek, renh ayntarrp-iletyek. <sup>61</sup> Ratherr ilenh irritywerremel, “Jesus ilenh angkek, tyaty ilkwa Jew-rnem-kenh ataketyek, tyaty ingwer-anemarl artey-alkenh arlta irrpety-inger-penh.”

<sup>62</sup> Tyaty-areny atyetyart ilkwe Jesus renh ayernek, “Ntwa anwenantherr tyerney-angenh-antey. Nthakenh rernem ngkweng angkerreyel? Ntwa anwernekantherr arrayt ilay!” <sup>63</sup> Jesus akater anek, tyerney-angenh. Atyetyart ilkwe ayernek arppemarl, “Aken-hel arem, nga arrayt-antey atyeng ilelha! Ngenhang Christ Akngeyel anwernenhantherr ilek, ngenh thwenetyek anwernekantherr-warl, ahern nhewarl, Akngey-kenh alerikw?” <sup>64</sup> Jesus ikwer ilelhek, “Ya, arrantherr areyenh, ayeng iteth alpenty Ingkart Akngey-warl intem ayeng aney-alpeyenh ikwer-itwel. Ayeng Atyetyart ilkwa aneyenh intem-antey, Akngey-apeny. Arrantherr ayenh areyenh, Ingkart Akngey-kenh apmer-they kwenpay-angkwarr apey-alpenty.”

<sup>65</sup> Artwa atyetyartel arnkwa ikweren-hnemel ilterrek angkemel, “Nhenhey apmwel-areth angkeyel Akngeyek. Ran nhenhey Atyetyart Akngey-apeny-arrpanteyarl ilelheyel! Arrantherr renh awek rarl angkek Akngeyek. <sup>66</sup> Nthakenh arrantherr iterreyel, nthakenh rarl apmwel-areth Akngeyek angkek?”

Rernem angkerrenh, “Arrathyarl anwantherr renh ipmek atwem.” <sup>67</sup> Artwa ingwer-nemel apelharl iwek, renh atwem. Ahelengkw-rnemel renh anna rag-el artek apparrng illem, renh atwemel. <sup>68</sup> Artwa ahelengkw-rnemel renh ayernek, “Ngan akaltyarl, Akngey-kenh Impen. Angwenhel ngenh atwelyel?”

*Peter irritywerremel ilelheyel*

(Mark 14:66-72; Luke 22:54-62; John 18:15-18, 25-27)

<sup>69</sup> Peter-an akethel anenh. Kwey warrkenh Atyetyart tyaty-areny-kenhel Peter renh alhengk-arek ayernemel, “Ngan alhenhap Jesus Galilee-areny-angkwarr. Atha ngenh weth arekan, ngay?”

<sup>70</sup> Peter ilelhek irritywerremel, “Inpa, atha iterl-arey yangarl renh.” <sup>71</sup> Peter anperl-alhek keyt-warl. Kwey warrkenh ingwerel Peter renh arek arppemarl. Ra ilek artwa ingwer-rnem-warl-anem, “Nhanyemarl ran Jesus Nazareth-areny-angkwarral alhenhan, atharl renh alhengk-arekan.”

<sup>72</sup> Peter irritywerremel ilelhek arppemarl, “Akenhel arem, arrangkw, atha iterl-arey-angenh renh.”

<sup>73</sup> Artwa ingwer-rnemel Peter renh ilek, “Inngarl nga alhenh Jesus-angkwarr apmer Galilee-ampeny. Galilee-areny-apeny nga angkeyelan.”

<sup>74</sup> Peter irritywerremel ilelhek arppemarl, “Ingkartel arem, arrayt inngay ayeng angkem. Ayeng akwerrp, atha renh iterl-arey-angenh.” Peter-el renh tyewk-tywek irrwey awek rarl ingwepenh arlkey-ayntek. <sup>75</sup> Peter ra iterl-arek, renharl Jesus-el arrwekel ilek-angkwarr, “Tyewk-tywek irrwey ingwepenh arlkey-ayntekerr-awayt nga irritywerremel irrpety-inger ilelhem.” Kel Peter alpek. Rap artewentyel artnenh-anem.

## 27

*Pilate-el Jesus renh ayernemel arrkerneyel  
(Mark 15:1; Luke 22:66; 23:1-2; John 18:28-32)*

<sup>1</sup> Ingwepenh Atyetyart tyaty-areny-rnem-then, atyetyart apmer-areny-rnem-then, rernem akarrirrek angkerretyek, Jesus renh awtweyek. <sup>2</sup> Rernem-anem renh arertnemel, Atyetyart Pilate-warl atnwenhek.

*Judas ilweyel  
(Acts 1:18-19)*

<sup>3</sup> Judas-el kel ahelengkw-rnem-warl Jesus renh ahayiwek. Ranem ywarn iterrek amperngirremel. Rap angkepirrek tyaty-areny atyetyart ilkternem-warl, Jew-rnem-kenh atyetyart-rnem-warl alhek-anem. Ra ngkwelty-rnem atyetyart tyaty-areny-rnem angkep antheynetyek-arrpantey. <sup>4</sup> Ranem angkek nyerrirremel, “Ayeng-anem Akngey-angkwarz apmwelhilek, artwa mwerr innga atha ahayiwek ahelengkw-rnem-warl. Artwa alyelk ra apmwel-areth mpwarey-angen.”

Rernem renh ilek, “Ntwap renh ahayiwek anwekantherr-warl. Anantherr arlarl.”

<sup>5</sup> Judas ran ngkwelty-rnem tyaty ilkwa kwen-warl iwek-penh, ranem ament ipmek aynterrarrewelhek.

<sup>6</sup> Tyaty-areny atyetyart ilkternemel ngkwelty renh akwetyemel, angkerrenh, “Artwa awtweyekarl anthekearl. Nthakenh ngkwelty nhenh angkep akwerney-angenh tyaty-warl.” <sup>7</sup> Rernem angkerrek-anem, apmer aterterr renh ingwer-itwek payemeletyek. Rernem iterreh, awenng angneretyek, alethang arrewaly akwernetyek. Artwa ahernen-penh mpwarey-angker anyent ra apmer tharlemilek ikwer-rnem. <sup>8</sup> Alakenh-they aley rernem “Apmer Arrkngangketyarry” itneweyel-antey. <sup>9</sup> Jeremiah-kenh pip alakenh arraty innganem aynteyel, rarl arrwekel ilenh-angkwarz-antey: “Ngkwelty 30-el payemeletyek, man rernem Israel-kenh artwa anyentek payemeletyek. <sup>10</sup> Rernem aterterr renh-anem payemelek, atnthepeh arnwarney-angker-kenh, Akngeyel renh-rnem ilantheck-angkwarz-antey.”

*Pilate-el Jesus renh ayerneyel  
(Mark 15:2-5; Luke 23:1-7; John 18:33-38)*

<sup>11</sup> Rernem Jesus renh atnwenhek Atyetyart Pilate ikwer-warl. Pilate-el Jesus renh ayernek, “Nganang Atyetyart ilkwa Jew-rnem-kenh, ngay?”

“Ya, alakenh nga angkeyel.” Jesus-el renh tyernek.

<sup>12</sup> Tyaty-areny atyetyart ilkwel-rnem Jesus renh ayntarrp-ilek, ra irrywerremel illehenty-arrpantey. Jesus akater-anem rtnenh, tyerney-angenh.

<sup>13</sup> Pilate-el Jesus renh ayernek arrpemarl, “Ngenharl rernem ayntarrp-ilek, nthakenh ngan angkem?” <sup>14</sup> Jesus akater-anem rtnenh, tyerney-angenh. Atyetyart ra ikwer apatek-anem, rarl akater-anem rtnenhek.

*Pilate-el Jesus renh ipmelheyel, Barabbas renh tyayl-they tyarlewewel  
(Mark 15:6-15; Luke 23:13-26; John 18:39-40; 19:6-16)*

<sup>15</sup> Aherrety arrpannel, amern tyenkerr arlkwenh apmelerr-angkwarz, Pilate-el artwa anyent tyayl-they tyarlewenh. <sup>16</sup> Artwa Barabbas artwa apmwa innga tyayl-itwek anenh. <sup>17</sup> Rernem ingkerrenh akarrirrek, Pilate-el renh-rnem ayernek, “Angwenh athan tyarlewem tyayl-theyan? Barabbas apek? Jesus apek, rernem renh itneweyel Christ, Akngeyelarl arrwekel ilek, renh thwenetyek aheren nhenh-warl ingkerrenh itethiletyek.” <sup>18</sup> Pilate-arl akalty, atyetyart-rnem Jesus-kety arlkariirrenh.

<sup>19</sup> Pilate-el renh tyatymilanh-angkwarz-antey, Pilate-kenh anewikwel angka thwenek ikwer-warl, “Artwa alyelk yanb ipmay! Ayeng artwa yanhek ilkelhey-angenh, renh awtweyek, altyerr apmwa atha arek-penh.”

<sup>20</sup> Tyaty-areny atyetyart ingwer-rnem-then rernem renh-rnem ingkerrenh ilek, “Arranther Pilate ilenherr-arey, ra artwa Barabbas tyayl-they tyarlewetyek, Jesus-ant awtweyek.” <sup>21</sup> Pilate-el renh-rnem ayernek arrpemarl, “Artwa nthenn-apeny atha tyarleweman?”

Rernem arlek, “Barabbas renhant tyarlewa!”

<sup>22</sup> Pilate-el renh-rnem ayernek arrpemarl, “Nthakenh atha Jesus renh ilem? Rernem renh Christ antweyek Akngeyelarl thwenek?”

Rernem arlek artewentyel, “Renh arwerl iylpeyl-atherr-warl atanthenherr-arey, renh awtweyek!”

<sup>23</sup> Pilate-el renh-rnem ayernek, “Ilekek awtweyek? Ran arlarl.”

Rernem artewentyel innga arlek, “Renh arwerl iylpeyl-atherr-warl atanthenherr-arey, renh awtweyek!”

<sup>24</sup> Atyetyart Pilate ra arek, ingkerrenh ahelirrenhant-anem. Kwatyel ilyatherr lhewelhek, anngetherr ikwer-rnem-itwek, "Arrantherrant ilkelheyel renh atwetyek. Ayeng arlarl!"

<sup>25</sup> Rernem renh ilek, "Kel menty anwenhantherr ayntarrp-ilem ingkerrenhel, renh ipmek atwenty-penh, ingkern-penh-rnem-then ayntarrp-ilem arrpemarl."

<sup>26</sup> Pilate-el Barabbas renh tyarlewek, tyayl kwen-they. Pilate-el ahelengkw-rnem ilek, rernem Jesus renh whip-el atwayntetyek arwerl iylpeyl-atherr-warl atanthyetek.

*Rernem Jesus renh arrkentelhilemel ileyel  
(Mark 15:16-20; Luke 23:11; John 19:2-3)*

<sup>27</sup> Ahelengkwel-rnem Jesus renh atnwenhek warl ilkwa rlterrk-warl, warl Atyetyart ilkwa Rome-areny-kenh-warl. Ahelengkw ingwer-rnem ikwer-rnem-warl akarrirrek. <sup>28</sup> Rernem arnkwa lhelek, ikwer-they, kwet arpenty rnter-rnter-warl-anem renh akwernek. <sup>29</sup> Rernem mwekart-apeny mpwarek, arrelyp-angketyarr atyetyartek-arrpanchtek. Jesus akapwert-warl arrernemel, arwerl ilyta arrty-warl arrernemel. Rernem renh arrkentelhilemel ilek kwenirremel, "Nganap Atyetyart ilkwa Jew-rnem-kenh." <sup>30</sup> Rernem apelh ikwer-warl iwek, akapwert-anem renh arwerlel atwemel.

<sup>31</sup> Rernem irrpelthirremel kwanthenn-penh, rernem kwet lhelek, arnkwa ikwerenhwarl-anem akwernemel. Rernem renh atnwenhek, rernem renh atanthyetek, arwerl iylpeyl-atherr-warl.

*Ahelengkw-rnemel Jesus arwerl iylpeyl-atherr-warl atanthyetek  
(Mark 15:21-32; Luke 23:26-43; John 19:17-18)*

<sup>32</sup> Artwa anyent, itnan Simon apmer Cyrene-areny. Ahelengkw-rnemel arwerl iylpeyl-atherr-anem arrernekk Simon ikwer-warl, ra arwerl renh aylpwer-akngayn-ayntetyek. Simon-el arwerl iylpeyl-atherr iytarrik-akngaynenh.

<sup>33</sup> Ahelengkw-rnemel Jesus renh apwert ilkewearl atnwenhek, apwert itnan Golgotha, apwert ngkvern akarnng-apeny. <sup>34</sup> Ahelengkw-rnemel arwerl mwerr-angker alperr-penh ngkwarl wayn-warl thelek, Jesus renh anthemet, ra irrwampenty awelhekerr, renh arlepilityek, renh atanthyent arwerl iylpeyl-atherrek. Rap arrkernek-anem. Jesus-el ngkwarl menty arek, antywey-angenh. <sup>35</sup> Ahelengkwel-rnem arnkwa ikwerenhwlehlek, ahern-warl iwemel. Rernem Jesus renh arwerl iylpeyl-atherr-warl atantheek. Ahelengkwel-rnem arrkenirek arnkwa Jesus-kenhek, antengileyek. <sup>36</sup> Kel rernem renh arenh-anem, arrernelhemel. <sup>37</sup> Ahelengkw-rnemel pip arrernekk arwerl iylpeyl-atherr-warl angka ikwer-rnem-kenh-akert, "Nhanyem Atyetyart Jew-rnem-kenh."

**Anayntileyl:** *Ahelengkw-rnemel pip ingkvernek, ra akengentyt angkentyt arrpanchtey. Irrtywerremel renh tyatyemilek, ra angkentyt-arrpanchtey. Angka arrwekeleny Rome-kenh apmelerr ayntenh-angkwarz; pip alakenh arrernetyek.*

<sup>38</sup> Artwa apmwatherr rernem arrernekk Jesus-angkwarz ilwetyek. Artwa apmwatherr rernem rnkernek, akwarrant-atherr, Jesus ampepekilemel.

<sup>39</sup> Akngerr angkepelarreng alhenh, Jesus ikwer irrpelthirrerl-anemel, <sup>40</sup> Rernem arlek, "Weth ntwa anwernenhantherr ilek, ntwarl tyaty ilkwa Jew-rnem-kenh atakenty-penhil, ntwa tyaty ilkwa ingwer-anemarl artetyek akwel. Ngan arlertek ilkawakert akwel. Nga ament-anem itethelhila! Atwarra arwerl iylpeyl-atherr-they!"

<sup>41</sup> Atyetyart ilkwa tyaty-areny-rnem-then atyetyart ingwer-rnem-then Moses-kenh-rnem-then, rernem ikwer irrpelthirrenh. Rernem arrkent ikwer angkerrenh, <sup>42</sup> "Ran artwa ingkerrenh arntety-penh itethiley-angker, ranem ament-anem itethelhiley! Ra ament itethelhilenty, anwantherr ingkerrenhelarlap iterl-areman, rap Atyetyart ilkwa Jew-rnem-kenharl aneman. <sup>43</sup> Ra Akngay tnakayel. Ra ilelhek, ra Akngay-kenh alerikw akwel. Akngayelant renh itethilemer." <sup>44</sup> Artwa apmwaa weth atherrel Jesus renh arrkentelhilenh arrpemarl.

*Jesus ilwelyel  
(Mark 15:33-41; Luke 23:44-49; John 19:28-30)*

<sup>45</sup> Ingkeny arlita ampepel ingwerrerl-alhek, atwerrpek-atwety. <sup>46</sup> Jesus-el Akngay renh ayernek, "Akngay atyenh, Akngay atyenh, ilek-kety ntwa ayenh menty arek?"

<sup>47</sup> Ingwer-rnem Jesus-arrangarr rtnenherrenh. Rernem Jesus renh awenh, angkemel, "Jesus ra arkeyel Elijah ikwer. Elijah Akngay-kenh angkakert arrwekeleny ran."

<sup>48</sup> Artwa anyentel ngkwarl wayn-warl antywer renh apelyilek, Jesus renh arwerl arpenty-they antywetyek. <sup>49</sup> Ingwer-rnem angkerrenh, "Anwantherr mpwelhey Elijah ikwer-warl apetyetyek, renh arwerl iylpeyl-atherr-they tyarlewenty anwantherr aretyek." <sup>50</sup> Kel Jesus arlek, ilwemel.

<sup>51</sup> Rag arlpenty Jew-kenh tyaty ilkwitwek ilterrelhek, irrwerl-they, kwenek-atwety. Ahern akngenherl-akngenhelhilek. Apwert-rnem akelhemel ngkweltyirremel. <sup>52</sup> Awenng-rnem altywerirrek, arrewaly-rnem itethirrek, Ingkart-angkwarz apenteyel-rnemarl. <sup>53</sup> Rernem awenng-they akemirrek. Ra itethirrek-penh, rernem Jerusalem-warl alhek. Rernem aremirrek, akgerr ingwer-rnemek,

<sup>54</sup> Atyetyart ahelengkw-rnem-kenh ahelengkw-rnem-then rernem arek. Rernem ahern akngelhenh-akngelhenhak awelhek. Rernem aterirrek angkerrenh, “Jesus ranap Akngey-kenh Alerikw innarl ilehny.”

<sup>55</sup> Arelh akgerr rernem akarirrek apmer Galilee-they, renh arntarnt-aretyek, Jesus arwerl iylpeyl-atherrek ilwey-alenty. Rernem Galilee-they apetyek. Rernem arleng-they arntarnt-arelheneh. <sup>56</sup> Mary Magdala-areny, Mary ingwer-then, James-then Joseph-then, ikwer-atherrenh amikw, ingwer, James-then John-kenh amikw, rernem ikwer-rnem-itwel rtnenh. James-then John-then Zebedee-kenh alerikw-atherr anenh.

*Rernem Jesus renh awenng intey-warl akwerneyel*

*(Mark 15:42-47; Luke 23:50-56; John 19:38-42)*

<sup>57</sup> Atwerrp, artwa man-angketyarr apetyek itnan Joseph, artwa mwerr Ingkart-areny apmer ingwer-areny itnan Arimathea. <sup>58</sup> Joseph-el Pilate renh ayernek, arrewalyek. Pilate-el ingwer ilek, ra arrewaly renh arwerl iylpeyl-atherr-they atwarrehiletyek, Joseph renh anthetyek.

<sup>59</sup> Arnkwa mwerranem ataperrelek. <sup>60</sup> Joseph-kenhel-rnem arrewaly renh intey awenng-warl akwernek. Intey awenng renh ilkwilek awank-akerr, arrewaly-anem intey-warl akwerney-alenty, apwert ilkwa arriw-itwek arrngertiwemel. Kel ra alpek-anem.

<sup>61</sup> Mary Magdala-areny-then, Mary ingwer-then ratherr intey akarelhileneh.

<sup>62</sup> Ingwepenh arlta ltyerrey-angker ikwerel, tyaty-areny atyetyart ilkwernem-then artwa Pharissee-rnem-then Pilate-warl akarirrek. <sup>63</sup> Rernem ikwer angkek, “Jesus ra irtyweremel ikwer-rnem ilelhenty-arrpantey, ingwa atherr-penh ipmepenit ethirremel apey-alpetyek-arrpantey. <sup>64</sup> Artwer nem irrpety thwenay, arriw ilenh akarerl-ayntetyek arlta irrpetyek-atwety, kwertengerl ikwerenhr-nemel ipma renh tyerremel akgerek, ingwer-rnem-anem ilek, itethirrenty-arrpantey.”

<sup>65</sup> Pilate-el renh-rnem ilek, “Ahelengkw-rnem atnwenha, rernem awenng renh akarerl-ayntetyek.” <sup>66</sup> Atyetyart rernem apwert renh mwantyel akentek rliterr, ahelengkw renh-rnem-anem rnkernek, awenng renh akarerl-ayntetyek.

## 28

*Jesus ipmepenit ethirreyel*

*(Mark 16:1-8; Luke 24:1-12; John 20:1-10)*

<sup>1</sup> Arlta ltyerrey-angker Ingkeny tyerrelhey-alentyel, Mary Magdala-areny Mary ingwer-then alhek, intey renh aretyek.

<sup>2</sup> Ikwer-penh ahern akngelhekarl ratherr awek, Ingkart-kenh angel ikwer-atherr-warl apetyek irrwerl-they. Ranem apwert renh atwepert-iwek, ranem apwert ikwer-itwek anenh. <sup>3</sup> Angel ranem lyenentyel-apeny arrtyernek, arnkwan ikwerenhr arlter innga.

<sup>4</sup> Ahelengkw-rnem aterirremel ahern-warl aytnek, ipmapeny-anem ayntenh.

<sup>5</sup> Angel angkek ikwer-atherr, “Aterirrey-angenh anenher-atherr! Atha mpwelanth iterl-areyl. Mpwelanth Jesus-ek nthwelyel, arwerl iylpeyl-atherr-warl atanthekek. <sup>6</sup> Ra nheneh aney-angenhanem. Akgelye renh itethilek, weth rarl ingkerrenhek arrwekel illelhek-angkwarz. Apetyenh-atherr, intey renh aretyek, rarl ayntenh. <sup>7</sup> Alhenherr-atherr, kwertengerl ikwerenhr-nem iletyek, rarl ipmepenit ethirrek. Ra Galilee-warl alhek arrwekel, arrantherr alhetyek renh arey-alhetyek. Alakenh-anyem ayeng angkakert apetyek, mpwelenhanth atha ilek.”

*Jesus aremirrek kwertengerl ikwerenhr-nem-warl*

*(Luke 24:36-49; John 20:19-31)*

<sup>8</sup> Ratherr aterirremel-antey anterrek inkwerelhemel, kwertengerl-rnem iletyek.

<sup>9</sup> Jesus-el renh-atherr rlwatek, ratherr-anem kwenirremel arrnernelhek ingkety atherr anterrkwek, ikwer inkwerelhek. <sup>10</sup> Jesus angkek, “Aterirrey-angenh, kwertengerl atyenh-rnem ilenherr-arey, rernem ayenh Galilee ikwer-itwek arey-alhetyek.” <sup>11</sup> Ratherr alhenharl-antey ahelengkw-rnem tern ilkwewarl alhek. Rernem tyaty-areny atyetyart-rnemek angka ilek.

<sup>12</sup> Atyetyart tyaty-areny-rnem-then rernem angkerrenh, ahelengkw-rnem payemeleyek rernem menty akater anayntetyek, ingwer-rnemek angka Jesus-akert iley-angenh, rarl itethirrek. Atyetyart ingwer-rnem angkerrenh arrpemarl. <sup>13</sup> “Ingwer-rnem

ilaynthenherr-arey, kwertengerl weth-rnemelarl arrewaly tyerremel irryert akngek, awenng-they. Anwantherr arnkwa ayntenharl-antey. <sup>14</sup> Pilate ra angka awenty, mw-errarl anwantherr renh ilem, nthakenh arrenhantherr ayntarrp-ileyangarl.” <sup>15</sup> Rernem ahelengkw-rnem man payemelek. Rernem-anem akater anenh. Apmer Judea-areny-rnem rernem arraty iterl-arey-angenh-antey.

*Jesus alker-warl alpeyel*

*(Mark 16:19-20; Luke 24:50-53; John 20:19-23; Acts 1:6-11)*

<sup>16</sup> Kwertengerl 11-pel alhek Galilee-warl, apwert ilkewewarl, Jesus-el kel renh-rnem ilek arrwekel, renh rlwatetyek. <sup>17</sup> Rernem renh arek, ikwer inkwerelhemel. Ingwer-rnem arrangkwarl, ikwer irrpelthirrenh.

<sup>18</sup> Jesus ikwer-rnem-warl apetyek angkemel, “Akngeyel ayenh arrernek, alker-areny-rnemek, ahern-areny-rnemek, Ingkart ingkerrenhek anetyek. <sup>19</sup> Apmer arrpanenh-warl alhenherr-arey, ingkerrenh akalty-anthetyek, rernem kwertengerl atyeng-anem anayntetyek. Baptise-emelenherr-arey renh-rnem itna Akngeyek, Alerek, Itnweng Rlwartek angkemel. <sup>20</sup> Akalty-anthenherr-arey renh-rnem, angka atyehn ingkerrenh ywerreyek-atwety. Ayeng arrekantherr-itwek aneyenh, ahern nhenh ywerreyek-atwety.”

## Mark Mark-el ingkwernek pip-warl Angka Akngey-kenh

*John-el akngerr akalty-antheyel*

(Matthew 3:1-12; Luke 3:1-18; John 1:19-28)

<sup>1</sup> Nhanyeman angka mwerr-angker Jesus Christ-ek, Akngey-kenh Alerikw. <sup>2</sup> Akngey-kenh angkakert artwa Isaiah anenh. Awank-akerr Isaiah-el ingkwernek Akngey-kenh angka pip-warl. Akngey alakenh-anyem angkek, “Angka atyehn-akert atha thwenem ikwer-rnem-warl, rernem iterl-aretyek Ingkartarl ingkern-they apetyem.” <sup>3</sup> Angkakert irrkayt ra arkeyel apmer arlpawel, “Anwantherr iterrey mwerr-angkwarr, Ingkart ikwer mpwelhetyek, rarl apetyemek.” <sup>4-6</sup> Alakenh-anyem, John, Baptise-emeley-angker apmer arlpaw-itwel anenh. Arnkwan ikweren John-kenh alta kamwerl-penh, pilt yenp-penh-akert. Ra intely-rnem arlkwenh, ngkwarl arwengalker-then. Akngerr-anem apmer arrpanenh-they, apmer Judea-ampenyel, John-warl akarirrek, tawan Jerusalem-areny-rnem-then. Rernem ilelhek John-ek, rernemarl apmwakert anenh. John angkek ingkerrenhek, “Anwantherr Akngey-angkwarr-anem apentyek. Angkepirrenh-arey apmwekety, Akngey-warl. Atha arrenhantherr baptise-emilem. Akngeyel apmwa arrekantherretty iwyetek.” Ra renh-rnem ingkerrenh baptise-emilek, Jordan Ilpayek.

<sup>7</sup> John ilelhek ikwer-rnem, “Artwa ingweran atyeng-they rlterrk inngan apetyem ingkern-theyarl. Ayeng nthakenh kwenirrey-angenh pwet ikweren lhelhetyek. Ran Atyetyart ilkwa anwekantherrenh, ayengan rlterrk-wenyarl. <sup>8</sup> Atha arrwekel arrenhantherrenh baptise-emilem kwatyalant. Rarl apetyem inngan anwekantherr-warl. Ra Itnweng Rlwart ikweren arrerneyek anwekantherr-warl.”

*John-el Jesus renh baptise-emileyel*

(Matthew 3:13-17; Luke 3:21-22)

<sup>9</sup> Ikwer-penhan Jesus-anem Jordan Ilpay-warl, Nazareth-they apmer Galilee-ampeny-warl apetyek. John-el renh kwatyl baptise-emilek. <sup>10</sup> Jesus tyerrelhemel kwaty-they, rap arek kwenpay-rnem amentirrenty. Ikwer-they, rap arek Itnweng Rlwartarl apetyek irrwerl-they, ikwer-warl, thip-apeny. <sup>11</sup> Akngey-kenh angka irrwerl-itwek ra awek, rarl angkek, “Ngarl alerey atyehn. Ayeng ngkweng inkwerelheyel.”

*Arrentyel Jesus arrkerneyel*

(Matthew 4:1-11; Luke 4:1-13)

<sup>12</sup> Ikwer-they, Akngey-kenh Itnwengel thwenek Jesus renh iparrp-antey aherrety-warl. <sup>13</sup> Alkent anyentel ra anenh, apmer arlpawel. Arrenty ikwer-warl apetyek, Jesus renh arrkerneyek rlterrkkek, rarl ikwer-angkwarr awelhetyek. Jesus apmer atnwenth ateralth-angketyarrel anenh. Angel-rnemel renh arntarnt-arenh.

*Jesus-el Akngey-kenh angka akalty-antheyel*

(Matthew 4:12-17; Luke 4:14-15)

<sup>14</sup> Artwa ahelengkwek John anterrkwek. Ra renh tyayl-warl akwernek. Ikwer-they Jesus apmer Galilee-warl alhek, Akngey-kenh angka mwerr-akert, akalty-antheyek. <sup>15</sup> Jesus-el renh-rnem ilek, “Kel, Akngey ikwerenr-nemek Atyetyart alkenh anetyek. Angka mwerr nhenh awemel, arranther apmwekety angkepirrenhey-alpenherr-arey Akngey-angkwarrant apentyek.”

*Jesus-el kwertengerl 4-pel rlwaneyel*

(Matthew 4:18-22; Luke 5:1-11)

<sup>16</sup> Jesus alhek kwaty ilkwa impalh-angkwarr, apmer itnan Galilee. Ra awayenhang-atherr Simon Andrew arek, aker irrpeng anterrkwenherl-anenty, netting-akertel.

<sup>17</sup> Jesus angkek, “Atyeng-angkwarr apetyen-herr-atherr. Atha akaltyiley mpwelenh, akngerr-anem ikngwerl-alpenherr-atherr, Akngey-warl.” <sup>18</sup> Awayenhangel-atherr netting iwerl-alhek, Jesus-anem apenteck.

<sup>19</sup> Jesus-el arey-alhek Zebedee-kenh alerikw-atherr, James, John, ratherrarl netting arnwarnenh rtnwitwek, aker irrpengek-arelh. <sup>20</sup> Jesus-el renh-atherr ilek, “Atyeng-angkwarr apetyen-herr-atherr.” Zebedee, aynikw ikwer-atherrenh ratherr iwerl-alhek rtnwitwek-antey, warrkenh-rnem-akert.

*Artwa arrenty akngerr-akert*

(Luke 4:31-37)

<sup>21</sup> Jesus kwertengerl ikwerenh-rnem-akert tawen Capernaum-warl alhek. Jesus alhek Jew-rnemarl warl kwenel angkerrenh-warl Saturday-el, arlta anyent impenel. Ra renh-rnem akalty-anthek. <sup>22</sup> Rernem Jesus renh awemel, rernem apateyelpek, rarl angka arraty rlterrk innga ilek, alhewer-antey. Rernem angkerrenh “Akalty-anthenh-anthenh nel-rnem anwenhantherr apmwel-areth akalty-antheyel. Rernem nyerrantarl irreyel. Rernem akwerrparl, alhewer akalty anthey-angen.”

<sup>23</sup> Artwa arrenty-akert aylpenhek warl kwenel Jew-rnemarl angkerrenh-warl. Ra artewentyel arlek, <sup>24</sup> “Jesus Nazareth-areny, nga ilekek apetyek? Ntwa atwetyek anwernenhantherrenh irrentetyek apmer nhethay? Ntwa anwernenhantherrenh yw-errelhilemel atwetyek? Atha ngenh iterl-areyel, ngan Akngey-kenh angkakert impenarl apetyek!”

<sup>25</sup> Jesus angkek arrency ikwer-warl, “Nga akater ana! Tyerrelha ikwer-they!” <sup>26</sup> Artwa ra arwengkirrek, arrency-kety. Arrency ra artewentyel arlek, artwa ikwer-they tyerrelhemel. <sup>27</sup> Rernem apatemel arek. Ingkerrenh rernem angkerrenh, “Artwa nhanyem ngangker rlterrk-akertan, arrency artwa arntety-they iwey-angkeran! Artwa nhanyem akalty inngan! Arrency-rnem awelheyel Jesus ikwerant.”

<sup>28</sup> Ingkerrehel awek apmer arrpanenhel Galilee-ampenyel Jesus-elarl arrency ir-rentek.

*Jesus-el arelh ampwa mwerrileyel, arntety ingwer-rnem-then  
(Matthew 8:14-17; Luke 4:38-41)*

<sup>29</sup> Jew-rnemarl warl kwenel angkerrenh-they, Jesus-el ikngwerl-alhek artwa atherr James-then John-then. Artwa 5-pel, Simon-then Andrew-then ikwer-atherrenh apmer-warl alhek. <sup>30</sup> Jesus-el awek arelh ampwa Simon-kenh arntety rwenparl aynteh. <sup>31</sup> Jesus alhek ikwer-warl, renh itep anterrkwemel, akwentehilek. Ra renh mwerrilek. Arelh ra amern anthek ingkerrenhek.

<sup>32</sup> Atwemengkel, ingwer-rnemel atwenhey-alhek arntety-rnem-then arrency-akert-rnem-then Jesus ikwer-warl. <sup>33</sup> Ingkerrenh tawen Capernaum-areny-rnem akarirrek warl arriw-warl, rernem Jesus renh aretyek. <sup>34</sup> Jesus-el arntety akngerr mwerrilek, arrency-rnem irrentek, ingwer-rnem-they. Arrency-rnemel kel iterl-arek Jesus rarl Alerikw Akngey-kenh apetyek. Arrency-rnem Jesus-ek angkey-angen-anem. Jesus-el kel renh-rnem akatelhilek.

**Anayntileyel: Jesus iterrek, “Ingwer-ingerant ayeng ikwer-rnem ilelhetyek, ayengarl Akngey-kenh Alerikw Impenan. Arrentyel nthakenh ikwer-rnem iley-angen alakenh.”**

*Jesus alheyel apmer arrpanenhel apmer Galilee-ampenyel  
(Luke 4:42-44)*

<sup>35</sup> Jesus ingwepenh-antey warl-they alhek, ra ament-areny Akngey-warl angketyek. <sup>36</sup> Simon ikwerenh-rnem-akert alhek nthwetyek ikwer. <sup>37</sup> Rernem renh arey-alhek. Simon-el renh ilek, “Ingkerrenh ngkweng nthweyel!”

<sup>38</sup> Jesus angkek, “Ayeng ahern nhenn-warl apetyek, Akngey-kenh angkakert apmer arrpanenhek atha iletyek.” <sup>39</sup> Ra alhek apmer arrpanen-warl, apmer Galilee-ampenyel. Ra arrency-rnem irrentek, ingkerrenh, ikwer-rnem-they. Ra akalty-anthek Jew-rnem ingkerrenh, arraty-angkwarr renh apent-ayntetyek.

*Jesus-el artwa tywen-angketyarr mwerrileyel  
(Matthew 8:1-4; Luke 5:12-16)*

<sup>40</sup> Artwa tywen-angketyarr apetyek Jesus-warl. Ra kwenirrenh Jesus-itwel ampwethel alernelhemel. Ra angkek, “Ngan rlterrk inngan, mwerriley-angker, ntwa ayen mwerriletyek. Nga ilkelhentyarl apekan, ntwa ayen mwerrila!”

<sup>41</sup> Jesus amperrrngirrek ikwer. Ra itep arrernekk ikwer-warl. Ra angkek, “Ayeng ilkelheyel, ngenh atha mwerriletyek. Kel, nga mwerr-anem.” <sup>42</sup> Tywen ikwer-they ywerrek kanper-antey. Ra mwerr-anem irrek.

<sup>43</sup> Jesus-el artwa renh ilek, <sup>44</sup> “Akater-anem aney-alpa! Atyetyart tyaty ilkwa Jew-rnem-kenh-arenyek nga anyentekant ilelhey-alpa, ra ngenh mwerr-anem aretyek. Ntwa aker Atyetyart-warl anta! Moses-kenh angka aynteyel aker Atyetyartek anthetyek, ingkerrenh ngenh aretyek, rernem iterretyek ngarl mwerrirrek-anem, ntwarl aker Atyetyart-warl akngek.”

<sup>45</sup> Artwa ra akngerrek-anem ilelhey-alpek, renharl mwerrilek Jesus-el. Jesus tawen arrpanen-warl alhey-angen-antey. Tawen-areny-rnem-ketyan Jesus anper-alhenh, rernem renh arlkarewerl-anekerr. Akngerr ingwer-rnem-anem apetyek Jesus-warl, apmer arrpanen-they.

## 2

*Jesus-elan artwa lerrp mwerrileyel  
(Matthew 9:1-8; Luke 5:17-26)*

<sup>1</sup> Jesus angkep-anem apetyek apmer Capernaum-warl, ra apmer anyentel-antey anen. Ingkerrenhel awek Jesus ra apmerelarl aney-alpek. <sup>2</sup> Rernemap akarirrenhey-alhek-anem. Warl kwenan arrkngalek akngerrel, ingwer-rneman rtenherrenh arriwelarl, Jesus-kenh angka awetyek. Jesus-el ilenh Akngey-kenh angka ikwer-rnem.

<sup>3</sup> Artwa 4-pelelan akngey-alhek artwa lerrp anyent pantyel Jesus-warl. <sup>4</sup> Akngerrelarl arrkngalek-kety iwerran kwen aylpekkerran, rernem apatenh akethel-antey. Rernemap iterrek, rernem nganetyek irrwerl-anem. Rernemap warl renh irrwerl altywerilek, rernemap artwa arntety renh pantyinp rwepel atwarrelhilek, ingkerrenharl Jesus-itwel rtenherrenh-warl.

<sup>5</sup> Jesus-elan iterl-arek kanper-antey, rernemarl renh iterl-arek mwerriley-angker. Ran artwa arntety renh ilek, "Apmwan atha ngkwengety iwem."

<sup>6</sup> Artwa Pharisee-el-rnem, artwa akalty-anthenh-anthenh-rnem-then Jesus renh iypelant awenh. Rernem angkerrenh, <sup>7</sup> "Ilek-arrpantey ran nhenh angkeyel? Ran nhenhey apmwel-areth angkeyel Akngey-arrpantey. Akngey anyentelant apmwaniwem!"

<sup>8</sup> Jesus-el iterl-arek artwa renh-rnem, rernemarl ikwer irrpelthirremel angkerrenh, "Ran nhay nthakenh apmwa iwey-angengan arntety-they." Ra renh-rnem ilek, "Arrantherran angkerreyel nthakenh atha apmwa iwey-angengan arntety-they. Arrantherran apmwel-aretharl angkerreyel, atyeng irrpelthirremel!" <sup>9-10</sup> Akngeyelan ayenhl rterrilek, artwa arntety mwerrileyek, apmwa ikwer-they iwetyek. Nthakenh atha renh akwenthilemel thwenem, ra apmer-warl alpetyek, panty ikwerenhl inerl-alhemel. Awelhenh-arey atyeng! Atha Akngey-kenh angka arrekantherri ileyek. Ayengan Akngey-kenh Artwa Impen. Akngeyel ayenhl thwenek rterrak-akert, apmer ingkerrenh-warl rterrak innga. Atha apmwa ingkerrenh-they iwey-angker, Akngeyelar ayenhl rterrilek." Jesus angkek artwa arntetyek, <sup>11</sup> "Akwerterl-alha, panty ngkwenh inerl-alhemel, apmer-warl alpa."

<sup>12</sup> Artwa arntety-penh akwenterl-alhek, panty inerl-alhek. Alpek-anem ra apmer-warl, mwerr-anem. Akngerrel intwarek apatamel arntety rarl apmer-warl alpek. Rernem Akngeyek-anem inkwerelhek. Rernemap angkek-anem, "Ngay! Akngey innarl yanhan! Artwa anper innarl ilenh! Mwerriley-angker innarlap ran nhenhey! Aleyant anwanther arek alakenh-anyem mwerriley-angker!"

*Jesus-el artwa Levi renh rlwaneyel  
(Matthew 9:9-13; Luke 5:27-32)*

<sup>13</sup> Jesus alhek Galilee kwaty ilkwa impalh-warl. Akngerr ikwer-warl apetyek, ra renh-rnem Akngey-kenh angkek akalytylek. <sup>14</sup> Ikwer-penhan ra alhek. Ra Levi, Alphaeus-kenh alerikw arey-alhek, ngkweltyarl ingkerrenh-they akarrilenh, man kapment-warl anthetyek. Irrtyert-awarrarl ra anen. Jesus angkek ikwer, "Atyeng-angkwarr apetya!" Levi warrk ikwerenhl ipmerl-alhek, ra Jesus-angkwarrant-anem alhek.

<sup>15</sup> Ratherr alhek Levi-kenh apmer-warl, amern arlkwetyek. Irrtyert-awarr ingwer-nem Levi-kenh apmer-warl akarirrek. Jew-rnem renh-rnem arkarirrenh manarl rernem ingkerrenh-kety irrtyertwenh, kapment-warl anthetyek. Apmwa ingwer-rnem Levi-kenh apmer-warl akarirrek arrpemarl, Jesus renh awetyek.

<sup>16</sup> Pharisee-el-rnem Jesus arek apmwernem-itwekarl amern arlkwek kwertenger-larl ikweren-hrnem-akertel. Pharisee-el-rnem ayernek Jesus-kenh kwertengerl-rnem, "Ilekkarl arrantherr amern arlkweyel apmwernem-itwekarl? Anwanther amern arlkwey-angenh apmwa yanh-rnem-itwek."

<sup>17</sup> Jesus-el awek Pharisee-el-rnemarl angkek kwertengerl ikweren-hrnemek. Ra angkek, "Arntety-wenyarl ingwer-rnem ngangker-akertel mwerrileyek arlkwentey-angenharl aneyel. Ayengarl ran apmwa atha iwey-angker, mwerriley-angker. Ingwer-rnem iterl-arelhlek rernem mwerr-angkwarr-arrpanteyarl aneyel, atyeng-angkwarr-wenyarl. Atha renh-rnem nthakenh apmwa iwey-angenh ikwer-rnem-they, rernem arlkwentey-angenh apmwa ikwer-rnem-they atha iwetyek."

*Ingwerel-rnem Jesus renh ayerneyel  
(Matthew 9:14-17; Luke 5:33-39)*

<sup>18</sup> Jew-rnem-kenh arlta anyent impenel, Pharisee-el-rnem menty amern arek, arlkwey-angenh, John-kenh kwertengerl-rnem-then. Rernem Akngeyekant iterrenh. Ingwer-rnemel Jesus renh ayernek, "Nthakenharl amern arlkweyel kwertengerl ngkwenh-rnem

arlta lyertan arrangkwarl amern arlkwetyek?" Pharisee-rnem John-kenh kwertengerl-rnem-then, rernem arraty-angkwarr apenteyel, arlta nhel amern arlkwetyek, arrangkwarl.

<sup>19</sup> Jesus angkek, "Artwa anyent itengirrem-angkwarr ingkerrenhel ikwer-angkwarr tyenkerr arlkwetyek, inkwerelhemel. Alakenh-anyem, kwertengerl atyenhel-rnem amern arlkwetyek arrpemarl, atyeng-angkwarr. <sup>20</sup> Ikwer-penhan rarl apmer-warl alypek, tyenkerr arlkwey-angenh arrangkw-antey, Akngeyekant iterremel. Alakenh-anyem ayeng alpeyeh Ingkart Akngey-warl. Kwertengerl atyenhel-rnem amern arlkwey-angenh, Akngey ikwerant iterremel aneyen."

**Anayntileyl: Jesus anyelk-angkwarr angkek. "Alakenh-anyem-apeny artwa apmwernemel ayenh anterrkweyeh. Kwertengerl atyenh-rnem amern ipmelheyenh-anem, Akngeyant-anem rernem ayerneyen."**

<sup>21</sup> Arnkwa apmwamwamel-rnem nthakenh anwantherr pweytiley-angenh arnkwa mwerr-warl, renh arnwarnetyek. Arnkwa apmwamwam altherrkirrey-angker arrpemarl. Anwantherr menty arnkwa apmwamwam iwey, arnkwa mwerran atyenemel."

<sup>22</sup> Jesus-el renh-rnem ilek, "Anwantherr theley-angenh ngkwarl wayn lyerteny arranty apmwamwam-warl. Arranty apmwamwam altherrkirremarl. Arranty-they ngkwarl wayn thelelhkerr ingkerrenh-antey, rwenpirrentyan. Arranty apmwanemarl. Anwantherr ngkwarl wayn lyertenyan arranty mwerr-warl-anem theleyek. Arrantherr arranty apmwamwam ipmem-apeny, arrantherr arnkwa apmwamwam iwem-apeny, arrantherr Pharisee-rnem-kenh angka ipmenherr-arey, atyengant-anem awelhenherr-arey."

**Anayntileyl: Pharisee-kenh angkan apmwamwamarl, ahern-areny-kenh ar-warl. Nthakenh itethiley-angenh. Arranty apmwamwam Pharisee-kenh angka akalty-anthenh-apenyarl. Nthakenh ingkerrenh iteth aney-angenh. Jesus-kenh angkan arranty mwerr-apenyarl, arnkwa mwerr-apeny-thenarl. Ingkerrenh ikwerenh-angkwarr apententy, rap renh-rnem itethileman.**

*Jesus atyetyart arlta impen anyent ikweran*

*(Matthew 12:1-8; Luke 6:1-5)*

<sup>23</sup> Arlta anyent impen Saturday-el, Jesus alhek kwertengerl ikwerenh-rnem-akert amern weyt-angketyarr-angkwarr. Kwertengerl ikwerenh-rnemel amern weyt inen-hek, angayakwirrekerr. <sup>24</sup> Pharisee-el-rnem Jesus renh iltek, "Angka anwekanther-renh aynteyel, arlta nhelan nthakenh warrkirrey-angenh. Kwertengerl ngkwenhel-rnem amern weytarl inenhey-alhek Saturday-el, arlta anyent impen. Rernemap warrkirrenhey-alhek-apeny. Apmwel-aretharl amern weytan inenhey-alhek law anwekantherrenh arlta anyent impen nhel law-arl ntwa anwekantherrenh apmwelenhey-alhek."

<sup>25</sup> Jesus angkek artwa Pharisee-rnemek, "Mwerr amern anwantherr inenhey-alhek angayakwirrekerr. Arrantherrap iterl-aremeringwer-rnemarl awank amern inek-apeny arrpemarl, David-kenhel-rnem." <sup>26</sup> Rernem Akngey-kenh warl impen-warl alypek. Abiathar Atyetyart anenh warl ilkwel. Rernem amern tyenkerr impen akgek angayakwirrekerr. David-el renh-rnem ilek, "Amern inenhetyek angayakwirrekerr, arwa alhewer."

<sup>27-28</sup> Jesus illehik ikwer-rnemek, "Ayengan atyetyart ilkwarl David-angkwarr. Ayengan Akngey-kenh Artwa Impen anyent. Angka atyenh aynteyel, arlta Saturday-el amern arlkwetyek angayakwirrekerr, arwa alhewer."

### 3

*Jesus-el mwerrileyl artwa anyent akwarl arlwerrelhek, akngelhey-angenh*

*(Matthew 12:9-14; Luke 6:6-11)*

<sup>1</sup> Saturday-el, Jesus alhek warl kwen-warl Jew-rnem angkerrenh-warl. Artwa anyent akwa arlwerrelhek, akngelhey-angenh anenh warl kwenel. <sup>2</sup> Pharisee-el-rnem Jesus renh arek, arrer-they, ra arntety renh mwerrilentyek. Artwa rernem angkerrenh, "Arlta Saturday-el rlengkan Jesus-el nthakenh mwerriley-angenharl. Moses-kenh angka nhenh arrwekel aynteyel." Jesus renh arek Pharisee-el-rnem, rarl akengentiyirrek arlta anyent impen nhel. "Moses-kenh angka aynteyel, arlta Saturday-el nthakenh ingwerenty mwerriley-angenh."

<sup>3</sup> Jesus-el arntety renh ilek, "Nga akethel nhel rtua, ngenh ingkerrenhel aretyek."

<sup>4</sup> Jesus-el renh-rnem ilek, "Nthek-angkwarran arrantherr angkerreyel? Atyeng ilenherr-arey law arrekantherrenhan nthek-angkwarral? Atha apek mwerrilem renh arlta

anyent impen nhel rlenk. Atha apek ilwerl-athenem renh arlta impen nhel." Rernem akatek, tyerney-angenh.

<sup>5</sup> Jesus ahelirrek Pharisee-ek-rnem, rernem artwa arntety amperrngirrey-angenhok, rernemap iterl-arek ra menty ilwetyek. Jesus amperrngirrek Pharisee ikwer-rnem, rerneman mwerranty ikwer awelhey-angenh. Artwa arntety renh ilek Jesus-el, "Akwa arratyirral!" Artwa ra akwa arratyirrek, mwerr-anem.

<sup>6</sup> Pharisee-rnem alhek Herod-rnem-warl, rernem tyel-angkerretyek Jesus ikwer, rarl arntety anyent mwerrilek, arlta anyent impen apmwelek, Jesus-el. Rernem angkerrek, Jesus renh atwetyek.

#### *Akngerr akarrireyel Jesus-warl*

<sup>7-8</sup> Jesus kwertengerl ikweren-h-nem-akert akarrirek, kwaty ilkwa Galilee impaltheleanter. Akngerr apmer arrpaneh-they ikwer-warl akarrirek, Galilee, Judea, Jerusalem, Idumea, Jordan Ilpay akngerrakw-areny-rnem-then. Rernem akarrirek, apmer Tyre-ampeny-they, apmer Sidon-ampeny-they. Rernem Jesus renh awek, rarl arntety anyent renh mwerrilek. <sup>9</sup> Akngerr akarrirek Jesus-warl, renh awetyek. Akngerrelarl tyetilek-kety kwaty ilkwa impalthek. Jesus kwertengerl ikweren-h-nem-akert rtnwewarl nganek, Jesus ra ingkerrenh akalty-anthetyek rtnwethey.

<sup>10</sup> Ikwer-panhan, ra akngerr arntety-rnem mwerrilek. Arntety ingwerel-rneman renh ayernek, renh-rnem-anemaril mwerriletyek. Rernem iterrek, "Anwantherr renh arnep-arnenty, anwantherrap mwerrarl irremar." <sup>11</sup> Arrentyl-rneman renh arek rarl arntety-rnem mwerrilek. Arrenty-rnem aytnarl-alhek kwenirremel. Rernem artewentyl arlkek, "Ngan Akngey-kenh ingarl apetyek." <sup>12</sup> Jesus-el arrenty-rnem akatek, "Arrantherr ingwer-rnem-warl iley-angenh, ayeng Akngey-kenh Alerikw. Arrantherr akater aney-alpenherr-arey."

**Anayntileyl:** *Irrpetiyapant Akngey-kenh angkek awelhetyek akaltyirremel. Ingwer-ingeran akngerrel-anem angka ikweren-h-angkwarr apenteyel akaltyirremel.*

#### *Jesus-el kwertengerl ikweren-h-nem rlwaneyel*

(Matthew 10:1-4; Luke 6:12-16)

<sup>13</sup> Jesus alhek apwert ilkwewarl kwertengerl ikweren-h-nem-akert. <sup>14</sup> Jesus ra rlwanek irrpetiyap kwertengerl ikweren-h-nem ikwer-itwek anetyek ilkwather, rernem apmer ingwer-rnem-warl alhetyek, Jesus-kenh angka iletyek. <sup>15</sup> Jesus-el rlterrak ikweren-h anthek, kwertengerl ikweren-h-nemel arrenty-rnem irrentetyek. <sup>16-18</sup> Jesus-el artwernem 12 rlwanek, ra renh-rnem Akngey-angkwarr akaltyiletyek, kwertengerl ikweren-h-nem-anem rernem anetyek. Itnan renh-rnem ra itneweynek, Simon, awayenhenh-ather James, John, Andrew, Philip, Bartholomew, Matthew, Thomas, James, Alphaeus-kenh alerikw, Thaddeus, Simon Patriot, Judas Iscariot. Simon atherr ra rlwanek, anyentarl Jesus-el itnewek Peter, ingwer Canaan-areny, itnan Simon Patriot. Kwertengerl awayenhenh-ather itna James, John, Zebedee-kenh alerikw-ather. Jesus-el renh-ather arrkent akenh itnewek "Artwa ahawarr-ather." <sup>19</sup> Apmer Iscariot-areny, itnan Judas, rarl artwa ahelengkw-rnem atnwenhek Jesus-arl anenh-warl, rernem renh anterrkwetyek, atwetyek.

#### *Atyetyart arrenty-rnem-kenh*

(Matthew 12:22-32; Luke 11:14-23; 12:10)

<sup>20-21</sup> Jesus alpek apmer ikweren-h-warl, rarl awank-akerr anenh-warl. Akngerrarl akarrirek elikwer-warl, renh amern arlkwey-angenhilek.

<sup>22</sup> Artwa ilkwernem apmer Jerusalem-areny-rnem-then artwa akalty-anthenh-anthenh-rnem-then apetyek Jesus ikwer-warl. Rernemap ikwer angkerreh, "Artwa nhenh arwengk-apenyarl angkeyel. Atyetyart arrenty-kenhelan Jesus renh rlterrakilek, ra arrenty-rnem ingkerreh irrentetyek."

<sup>23</sup> Jesus-el artwa ingkerrenh akarrilenhey-alpek, rernem ikwer-warl apetyetyek, Ra renh-rnem akalty-anthetyek ingkerrenh. Rap renh-rnem ilek, "Awelhenherr-arey atyeng, atharl arrekantherr inngarl ileyel." <sup>24-26</sup> Arrenty-kenh rlterrak-akertel nthakenh atha irrentey-angenh ikweren-h-nem-they. Ra ayenhl rlterrakiley-angenh, ikweren-h-nem irrentetyek. Akngey-kenh Itnweng-akertarl ayengan, arrenty-rnem ingkerrenh irrentetyek. Atyetyart arrenty-kenhel nthakenh ikweren-h-nem irrentey-angenh.

<sup>27</sup> Artwa rlterrak aneyel warl ikwerenhel. Ingwerentyl nthakenh arnkwa ikweren-h ingkerrenh iney-angenh. Artwa anyent ingwer rlterrak apetyem warl ikweren-h-warl renh anterrkwemel, renh arertenemel, arnkwa ikweren-h ingkerrenh akngeynemel. Atyetyart Arrenty-kenh artwa rlterrak-apeny. Ayengan ikwer-they rlterrak inngarl,

ikweren-hnem irrentetyek. <sup>28</sup> Artwa ingwerenty ra apmwel-areth intem anayntem, Akngeyelan ikwerety apmwa iwemarl. <sup>29-30</sup> Artwa anyent rarl Akngey-kenh Itnweng apmwelem, Akngeyelan ikwerety apmwa nthakenh iwey-angenh-anemarl, arrangkw-anemarl. Ra apmwel-areth intem anem ilweyek-atwety. Akngeyel renh nthakenh arntarnt-arey-angenh-anem, arrangkw-anem. Rap menty anem, ilweyek-atwety."

*Jesus-kenh amikw-then ayteyikw-rnem-then*

*(Matthew 12:46-50; Luke 8:19-21)*

<sup>31</sup> Jesus-kenh amikwel-then ayteyikw-rnemel-then rernem awek apmer ingwer-they Jesus ra arwengkirrentyek-athen. Rernem angkerrenh, "Ingwerel-rnem ileyel Jesus rarl arwengkirrek. Mpa! Anwantherr ikwer-warl alhey, anwantherr renh aretyek." Rernem ikwer-warl ingkerrenh alhek. Rernem artwa anyent thwenek angkakert, Jesus renh ikngwetyek. <sup>32</sup> Ra Jesus renh ilek, "Amengkw-then ayteyengkw-rnem-then ngkweng akethel mpwelheyel."

<sup>33</sup> Jesus-el renh-rnem ilek, "Atyen-hnem akethel mpwelheyel, ngay? Ayeng Akngey-kenh arrpemarl. <sup>34-35</sup> Arranther Akngeyek mwantyel awelhem, arrantherap Akngey-kenh inngarlan aneman, amey atyen-apeny, ayteyat atyen-hnem-apeny. Akngey anyent angkwarran, anwantherr aneyel ikweren-hnem. Arranther amey atyen-apeny, ayteyat atyen-hnem-apeny."

## 4

*Jesus-el angka artwa ntang-akert ikwer-rnem ileyel*

*(Matthew 13:1-17; Luke 8:4-10)*

<sup>1</sup> Akngerr innaga akarirrek apmer arrpanenh-they Jesus-warl, rap ilenh angka ikwer-rnem. Jesus-el akalty-anthek renh-rnem Galilee kwaty ilkwa impalthelek. Akngerrelarl tyetilek-kety ra rtnewewarl-anem nganek, kwatyerlarl rtnwa rtnenh-warl. Ra rtnwetheyanem anemel-anem, angkan ikwer-rnem ilenh. Akngerr rtnenherremel awelhenh Jesus ikwer kwaty ilkwa impalthelel. <sup>2-3</sup> Ra angka akngerr ilenh. "Awelhenh-arey atyeng! Artwa anyentel ra ntang weyt iwerl-apeny, amern lyapetyek. <sup>4</sup> Artwa ra ntang weyt ingwerentyan iwerr arlertek-warl iwerl-apeny. Thip-rnemel apetyemel arlkwek ingkerrenh. <sup>5</sup> Artwa ra ntang weyt ingwerentyan ahern apwert-angketyarr-warl iwerl-apeny. Rernemap alyepel lyaperrek. Artekkerr kwen-aylpay-angenh ahern apwert-angketyarrel. Artekkerran nthakenh lyapey-angenh ahern apwert-angketyarrelan. <sup>6</sup> Atherrk-rneman arlenyirrek-anem itwern-penh kwaty-wenyl. <sup>7</sup> Artwa ra ntang weyt ingwerentyan ahern arlkerl-angketyarr-warl iwerl-apeny. Arlkerl artekerrel amern weyt anterrkwek, nthakenh lyapey-angenhilek. Aylertenharl renh, intwey-angenh ilenh. Arlkerl-angketyarrelan lyapey-angenh amern weyt arrangkw. <sup>8</sup> Artwa ra ntang ingwerentyan ahern mwerr-warl iwerl-apeny. Amern weyt ahern mwerrelan mwerrall lyapek. Ntang weyt anyent-they amern akngerr lyapek, ntang 30 apek. Ntang weyt anyent ingwer-they 60 apek, ntang weyt anyent ingwer-they 100 apek. Aparnp-anem irrenh. Arnkengeny-anem inpanem."

<sup>9</sup> Jesus-el renh-rnem ilek, "Angka nhanyem mwerr atha arrekantherr ilem, arrantherap iterl-arenherr-arey!"

*Jesus-el angka artwa ntang-akert anyantileyel*

*(Matthew 13:10-17; Luke 8:9-15)*

<sup>10</sup> Akngerr ingwer-rnem alperlewek apmer-warl, angka mwerrarl awek-penh. Jesus-akerr kwertengerl ikweren-hnem-then anenharl akngerr ingwer-rnem-then. Rernem renh ayernek, "Ntwa anwernenhantherr angka ngkwenthal anayntila!" <sup>11</sup> Jesus-el renh-rnem ilek, "Nhanyem atha angka arrekantherr ilem, Akngeyelarl ikweren-hnem ingkerrenh arntart-areyel-apeny. Nthakenh atha angka ingkerr ingwer-rnemek iley-angenharl. Nthakenh atyengan akngerr awelhey-angenharl. <sup>12</sup> Rernem apek atyeng mwantyel awelhenty, rernemap ingkerr Akngey-warl angkepirremarl. Akngeyel apmwa ikwer-rnem-kety iwem. Atharl angka ikwer-rnem ilek, rernem angka atyenh awekarlpenhan, rernem ywarn iterrey-alpeyel."

<sup>13</sup> Jesus-el renh-rnem ilek arrpemarl, "Angka nhanyem arrantherr iterl-arey-angenharl, angka ingweran nthakenh arrantherr iterl-arey-angenh. <sup>14</sup> Amern weytarl arlperryt iwem-apeny, angka nhanyem Akngey-kenh ingkerrenh-angkwarr arlperrytirrem. Akngey-kenh angka arlperrytirrem arrpemarl ingkerrenh-angkwarr, ingkerrnemel ileyel ingkerrenhek. <sup>15</sup> Ingwer-rneman ntang weytarl iwerr arlertek-warl iwek-apenyarl. Rernem Akngey-kenh angkek awelhem-tangkwel, rernem Akngey-angkwarranem apenteyel. Arrentyel Akngey-kenh angka ilpertileyel, thip irrpwerl ilengel-rnem

ntang ilpertilem-apeny. Rernem intwemelirreyel Akngey-kety, rernem intem-anem apmwel-areth aneyen. <sup>16-17</sup> Ingwer-rnem angath-antey Akngeyan apenteyel. Rernem Akngey-kenh angka awemarl-penh, rernem mwerrarl apenteyel angath-antey. Rernem ntang weytarl apwert-angketyarrelan iwek-apenyarl. Artekkerr-rnem aylpeyel angath-antey apwert-angketyarrelan. Ingwerel-rnem alakenh-anyemarl Akngey-kenh angka apenteyel angath-antey. Rernem ipmelhem-anem. <sup>18</sup> Ingwerentyan ntang weytarl arkerl-angketyarr-warl iwek-apenyarl rernem Akngey-kenh angka iypelant aveyel. <sup>19</sup> Rernem apwert manek ampwal ingwerentyek-then iterrel-anem apmwel-areth. <sup>20</sup> Ingwerentyan ntang weytarl ahern mwerr-warl iwek-apenyarl. Rernem Akngey-kenh angka awemel, rernem inkwerelhem.”

*Angka lyenenty-akert  
(Luke 8:16-18)*

<sup>21</sup> Jesus-el renh-rnem ilek, “Lyenenty nthakenh arrantherr irryertewey-angenh. Lyenenty arrtyenherr-arey, akethel ingkerrenhel aretyek. Iylpel awelhenherr-arey atyeng! Artwa anyentel lyenenty arrerneteyek ampep-warl, ingkerrenhel aretyek. Ra irryertewey-angenh teram-warl, ra irryertewey-angenh kweneng-apert pang-warl. <sup>22</sup> Ingwerel ilek-ilek irryert akwernem, ingwerentyel nthakenh arey-angenh. Ingwer-ingerer renh arerl-arrenem. <sup>23</sup> Arrantherr angkek Akngey-kenh mwantyel awelhenherr-arey, atharl arrekantherr ilem.”

**Anayntileyel: Akngey-kenh angka irryertewelheyel-apeny. Ingwer-ingeran ingkerrenhel aketh-antey iterl-areyen.**

<sup>24</sup> “Arrantherr angkek Akngey-kenh awelhemer mwantyel. <sup>25</sup> Arrantherr Akngey-kenh angkek mwantyel awelhenty, inkwerelhemel, Akngeyel arrenhantherr intem-antey akaltillem.”

*Jesus-el angka artwa ntang-akert ingweran ikwer-rnem ileyel*

<sup>26</sup> Jesus-el renh-rnem ilek, “Atha arrekantherr iley, Akngeyelarl ikweren-hrnem ingkerren arntart-areyel-apeny. Nthakenharl athan anayntilem arrekantherr? Alakenh-anyem atha arrenhantherr ilem, arrantherraw iterl-aretyek. Artwa anyentelan ntang weyt iwerl-apem, lyapetyek ahern-warl. <sup>27-28</sup> Rap ankwayntem ingwel, atnaraty ayntemel, ntang weytan ament lyapey-alkenharl kwaty-penh. Ntang rap amern-akert-anem lyapem. Artwa ra iterl-arey-angenh, ntang weyt ahernelant lyapelhilem. Ntang weytan atherrk lyapem, amern-akert. <sup>29</sup> Artwa ra apetyem-anem, amern weyt akalthetyek nayp arrelyp amper-amperel. Ranem amern inem-apeny akngerr, Akngeyelan alakenh-anyemarl ikweren-hrneman akarrilem.”

**Anayntileyel: Jesus-el angka nheneh ikwer-rnem ilen. Ingkart Akngeyelant ingkerrenh angkepilem ikwer-warl-athek. Ingwer-rnem iterreyel, “Nthakenhap atha ahern-areny renh-rnem angkepilem Akngey-warl?” Akngey renh ikwer-rnem ayerntelyelant, atha renh-rnem angkepilem. Akngeyelant renh-rnem angkepilem, ikweren-hrnem-anem rernem anetyek.**

*Jesus-el angka ntang ankerr-akert ikwer-rnem ileyel  
(Matthew 13:31-35; Luke 13:18-19)*

<sup>30</sup> Jesus ikwer-rnem angkek, “Nthakenh Akngeyelan ikweren-hrnem akarrileyel? Nthakenharl atha ilem arrenhantherr? Angka impen Akngey-kenh-angkwarr atha ilem. <sup>31</sup> Ntang ankwerernarl lyapeyel-apeny ahernel. <sup>32</sup> Ntang ankerr-penh lyapem arwerl ilkwa. Thip-rnem ikwer-warl arrernelhemarl. Ankerr anyent-apeny, Akngey-kenh anyent anen. Ntang arwerl akngerr aneyel-apeny, Akngey-kenh-rnem akngerr-anem aneyel. Rerneman arlperryirrem, ntang arwerl akngerr arlperry aneyel-apeny. Alakenh-anyem arrpetyapant Akngey-kenh angkan apenteyel. Rerneman arlperryirrem, ntang arwerlel arlperry aneyel-apeny.”

*Jesus-el angka arrpanenh ileyel*

<sup>33</sup> Jesus-el ingwer-rnemek angka arrpanenh ilen angath-antey. Ra ilek renh-rnem nhek-awtwy. Angka alakenh-anyem irrpetyapant iterl-arenh. Akngerr ingwerel-rnem angkeyan iterl-arey-angenharl. <sup>34</sup> Jesus-el kwertengerl ikweren-hrnem-warl ilen angka akngerr ilen ywerrelhemel.

*Jesus-el kwaty awer-akert atnengkileyel arwapeny  
(Matthew 8:23-27; Luke 8:22-25)*

<sup>35</sup> Atwerrp, Jesus angkek kwertengerl ikweren-hrnemek, “Mpa! Kwaty ilkwangk-warr anwantherr artarnpenhey akngerrakw-apeny-warl.” Nganerl-alhek rernem

rtnnewarl-anem anperl-alhek. <sup>36</sup> Jesus ra kwertengerl ikwerenh-rnem-akert artarnpen-hek kwaty ilkwangkwarr akngerrakw-ampeny-warl. Rtnwa ingwer-rneman ingkern-theyan renh-rnem apentek arrpemarl kwaty ilkwangkwarr. <sup>37</sup> Kwaty awer-akert apetyek rntwey-alhek rlterrk innga. Awer ilkwel renh-rnem akngelhew-akngelhilek. Kwatyen lherrparnpek-anem rtnnewarl, rtnwan aylperl-alhetyek-anek-anem. <sup>38</sup> Jesus rtnwa ingkernel rtemale ankwaynterl-apenh. Kwertengerl ikwerenh-rnemel Jesus akwenthelhilek. Rernemap renh ilek, "Akalty-anthenh-anthenhay, akwentyay! Ntwan anwernenhantherr kwaty-kety arntarnt-arey-angen. Ntwa anwernenhantherr kwatayel aylpenty aretyekarl ngan arlkwenteyel?"

<sup>39</sup> Jesus artewentyel arlek awerek, atnengkirretyek. Kwaty awer-akert atnengkir-reylpe, arwapeny.

<sup>40</sup> Jesus-an ikwer-rnem angkek, "Ilek-ketyarl arrantherr aterirreyel, atyeng irrpelthirremel-apeny, atharl arrenhantherrenh arntarnt-areyelan?"

<sup>41</sup> Kwertengerl ikwerenh-rnem Jesus renharl awek-penh rernem ikwerety aterirrek, rarl kwaty awer-akert ilek rlterkel. Rernemap ayernerrek, "Nthakenh awer-then kwaty-then ikwerant awelheyel?"

## 5

*Artwa arrenty akngerr-akert  
(Matthew 8:28-34; Luke 8:26-39)*

<sup>1</sup> Jesus rtnwel atarnpenhek Galilee kwaty ilkwangkwarr kwertengerl ikwerenh-rnem-akert. Rernem apmer Gerasa kwaty ilkwa impalthek rtnwa rnkernek. <sup>2</sup> Artwa arwengk arrenty akngerr-akertel Jesus arlengek arnarek, apetyenharl. Ra kanper-antey anekirrey-ayntek Jesus-warl apmer awenng-angketyarr-they. Arrewaly-kenh awenng-angketyarrel ra aneh, arnkawakert-weneyel. <sup>3-4</sup> Akngerr-inger apmer ikwer-arenyle-nem renh arernek tyeynel, arlaw atherr, akwatherr. Ran renh tyeyn akenhant. <sup>5</sup> Intem-antey ra awenng arrerentyel aneh, apwert-ampenyel. Akngerr-inger ra ilperl arreypel akelhenh, artewentyel arlkemel, arlta arrpanenhel ipantey arkenh, ingwepenhek-atwety.

<sup>6</sup> Ra anterremel Jesus-warl anekirrek, kwenirrey-alhemel, ampwethel alernelhemel. <sup>7-8</sup> Jesus-el ilek, arrenty kel tyerrelhetyek, artwa ikwer-they. Artwa ra arlek, "Jesus, ngan Alerikw Akngey-kenh irrwerl-areny. Ilekek ngan apetyek? Ntwa atyeng arraty ilay, ntwa ayenh irrenteyang!"

<sup>9</sup> Jesus-el renh ayernek, "Itnan ilek nga?"

<sup>10</sup> Artwa ra ilelhek, "Itna ayeng 'Akngerr', ayeng arrenty akngerr-akert." Ra arrknert angkek Jesus-ek, "Ntwa irrentey-angen renh-rnem apmer arleng-warl!"

<sup>11</sup> Apwertel atnwenth pikepik akngerr 2,000 rtnnenherrenh. <sup>12</sup> Arrenty-rnemel Jesus renh ilek, "Irrentey-angen renh-rnem apmer arleng-warl! Anwernenhantherr atnwenth pikepik-rnem-warl thwena!" <sup>13</sup> Jesus-el kel renh-rnem irrentek. Rernem kel tyerrelhek artwa arwengk-they, alhemel pikepik-rnem-warl. Pikepik-rnem kel anterrek. Rernem kwaty alay-warl aylpenhek, intem-antey. Rernem ilwek kwaty ilkwel kwen.

<sup>14</sup> Artwa ingwer-rnem pikepik arntarnt-arey-angker-rnem tawen-warl alhek. Rernem iley-alhek tawen-areny-rnem, pikepik-rnem kel ilwek kwaty ilkwa kwenel. Tawen-areny-rnem rernem-anem alhek, rernem-anem aretyek. <sup>15</sup> Rernem artwa renh arek, rarl mwerr-anem aneh, arnkawakert-anem, rarl mwerr-anem iterremel aneh. Rernem Jesus ikwerety aterirrek, itnweng rlterrk-akert-kety. <sup>16</sup> Rernem angkerrenh artwa ikwer pikepik-rnemek-then. <sup>17</sup> Rernem Jesus renh ilek, "Nga apmer ilenh-they alpetyek, apmer ingwer-warl-anem."

<sup>18</sup> Jesus nganetyek irrek rtnnewarl, artwa ra Jesus renh ayernek, "Ayeng-then ngkwang-angkwarr alhey, mwerrang ngay?" <sup>19</sup> Jesus angkek, "Menty! Nga apmer-warl alpa, ngkwenkheh-rnem ilelhey-alpa, atharl ngenh mwerrilek, Itnweng Akngey-kenh rlterrk-akertel."

<sup>20</sup> Artwa ra apmer Decapolis-warl alhek, 10 tawenel aneh-rnem-warl. Ra ilelhek in-kerrenhek, "Jesus-el ayenh mwerrilek." Rernem apatemel awek. Rernem angkerrenh, "Ilenharl angka mwerran!"

*Arelh arntety anyent. Kwey ilwelyel  
(Matthew 9:18-26; Luke 8:40-56)*

<sup>21</sup> Jesus rtnwel Galilee kwaty ilkwangkwarr alhek. Akngerr Jesus-warl ingkerrenh kwaty impaltheck-warl akarrikrek. <sup>22</sup> Atyetyart Jew-rnem-kenh ra aneh, itnan Jairus.

<sup>23</sup> Artwa atyetyartel Jesus renh ilek, "Kwey atyehn ilwetyek arrer-anem. Apetyay! Renh

arnep-arna, ra mwerrirretyek!” <sup>24</sup> Akngerr ingkerrenhel renh-atherr apentek. Akngerrel renh-atherr tyetilek, rer nem arrer-they renh awetyek.

<sup>25-26</sup> Ingkerrenh akarirrek Jesus-warl. Arelh anyent arntety inngan, aherrety 12-ek-awtety, arleng-alenty aneh. Ra ngangker arrpanenh-warl alhenh, renh mwerrileyek. Ngangker-akertel renh mwerriley-angenh, tywen-antey ra kwarnelheyel. Arehel ngangker-akert-rnem man ingkerrenhek antheik, ingkerrenh-antey, ra man-weny-anem. Ngangker-akertel-rnem renh artewentyel-anem arntety antheik.

<sup>27</sup> Rap awenh ingwer-rnemel ilerrer-anenty, “Jesus ra arntety ilkwa mwerriley-angker.” <sup>28</sup> Ra ament-anem iterrek, “Atha arnkwa ikweren arnep-arnenty, ayengap mwerrarl ireman.” <sup>29</sup> Arelh ra arnkwanem Jesus-kenh arnep-arnek-penh, ra mwerr-anem irrek, arntety-weny-anem.

<sup>30</sup> Jesus ra iterl-arek, renharl ingwerentyel arnep-arnek, itnweng ikweren alhek, arntety ikwer-warl, mwerrileyek. Rap angkek, “Angwenhel arnkwa atyenthal arnep-arnek?” Ingkerrenh akarirrek Jesus-warl, akngerrel renh tyetilek.

<sup>31</sup> Kwertengerl ikweren-rnemel Jesus renh ilek, “Akngerr ngkweng-warl apetyem. Nthakenh ntwa iterl-arey-angenh akngerr-angkwarr. Akngerr nhenh-angkwarran ntwa nthakenh alhengk-areyang renhan, rarl arnkwa ngkwenh arnep-arnekan.” <sup>32</sup> Jesus-el artepang arenhey-alpek, “Angwenhel atyenthal arnkwan arnep-arnek?”

<sup>33</sup> Arntety ra apetyek Jesus-warl. Kwenirrey-alhek-anem ra. Ra aterel anem arrewek Jesus-kety. Ra arraty-antey Jesus-warl ilelhek rarl arnkwa arnep-arnek-penh, “Ayengarl arntety intem-antey anehel, atha arnkwa ngkwenh arnep-arnek. Ayeng mwerr-anem irrek, atharl arnkwa ngkwenh arnep-arnek-penh.”

<sup>34</sup> Jesus ikwer angkek, “Ayenh ntwa iterl-aremer, ayeng Itnweng Akgney-kenh rlterrak-akert. Aterirrey-angenh ana! Akgneyel ngenh arntarnt-areyel.”

<sup>35</sup> Jesus-el angkantey ilenh, artwa ingwer-rnem apmer Jairus-kenh-they angkakert apetyek. Rernem angkek Jairus-warl, “Ngan akalty-anthenh-anthenh ilenh-itwel annangelheyel! Ngwang angkey-angenh ilenh-itwel. Kwey ngkwenh kel-antey ilwek!”

<sup>36</sup> Jesus-el renh-rnem awek. Rap angkek Jairus-warl, “Artewentyel iterrey-angenh! Irpelthel mwerriley-angker ayengan, kwey renh mwerrileyek.”

<sup>37</sup> Jesus arrkngert angkek, “Menty irrpetyap atyeng-angkwarr apetyey! Peter-then awayenhh-atherr, James-then, John-then.” <sup>38</sup> Rernem Jairus-kenh apmer-warl alhek. Rernem awek, Jairus-kenh apmer-itwel, ingwer-rnem artnalhelhirrenh. Artewentyelap rernem artnenn, amperrngirremel. <sup>39</sup> Jesus angkek, “Ilekek arrantherr artnalhelhirreyel? Kweyan ilwey-angenharl ankwarl aynteyel!” <sup>40</sup> Ingwer-rneman ikwer atherrenh, irrpelthirremel. Rernem iterl-arek kwey rarl kel ilwek. Jesus-el thwenek ingwer-rnem, tyerrelhemel alhetyek, warl-they. Jesus-el atnwenhek kwey-kenh amikw-then aynikw-then kwertengerl ikweren-hrnem-then arrewaly-warl. <sup>41-43</sup> Jesus-el itepel kwey renh anterrkwek. Ra akwentalhilek kwey renh angkemel, “Kwey, akwental!” Kwey ra akwentelek, rap alhenh-anem. Ingkerrenhap inkwerelhek-anem. Jesus angkek, “Ingwer-rnem iley-angenh-antey.” Jesus-el ilek amikw-then, aynikw-then, “Amern-anem renh anthenherr-atherr, ra arlkwetyek!”

## 6

### *Nazareth-areny-rnem Jesus ikwer irrpelthirreyel*

*(Matthew 9:18-26; Luke 4:16-30)*

<sup>1</sup> Jesus tawen Nazareth, apmer ikweren-h-warl alpek, kwertengerl ikweren-rnem-akert. <sup>2</sup> Saturday-el, ra warl kwen-warl alypek, Jew-rnemarl angkerrenh-warl. Ra renh-rnem akalty-anthenh. Ingwer-rnemantarl Jesus-kenh angkek inkwerelhek. Rernem angkerrenh, “Jesus rantarl ingkerrenh-angkwarr iterl-areyel, ran akalty innga. Ranap ngangker-akert inngarl nhenhey, arntety mwerriley-angkerarl.” Akngerr ingwer-rneman Jesus-kenh angkek irrpelthirremel angkerrenharl, <sup>3</sup> “Jesus ahern-arenyarl mwerran ilek-ilek arwerl-penh arnwarney-angkeran! Ilenhan Mary-kenh ampikwarl! Ayteyikw-rneman ikweren apmer nharen-y-rnemarl. Itnan aytteyikw-rnem ikweren, James, Judas, Joses, Simon. Arrempikw-rneman ikweren apmer nharen-y-rnemarl. Ran anwantherr-apeny arrpemarl, Akgney-kenh inngewenyarl.”

<sup>4</sup> Jesus angkek, “Apmer nharen-y-rnemantarl atyeng irrpelthirremelan angkeyel, ayeng angkakert Akgney-kenh inngewenyarl.” <sup>5</sup> Akngerr-warl Jesus-el itep arrernek irrpelthirrenharl-rnem-warl-then. Irripetyapantarl ikwer inkwerelhek. Rernem ap arntety-penhan mwerrarl irrek. <sup>6</sup> Jesus rap ywarn iterrek ikwerarl irrpelthirrenhek-rneman. Ikwer-theyan ra apmer arrpanenh-warl alhek, Akgney-kenh angka ingkerrenh-warl ileyn-ayntetyek.

*Jesus-el kwertengerl 12 ikwerenhn-nem thweneyel  
(Matthew 10:5-15; Luke 9:1-6)*

<sup>7</sup> Jesus-el kwertengerl ikwerenhn-nem ingkerrenh-antey rlterrilek. Ra renh-nem atherrarl-atherrarl thwenek, rernem alhetyek angka Akngey-kenh-angkwarr akalty-anthetyek. Ra renh-nem rlterrilek, rernem arrenty-rnem irrenteyek. <sup>8</sup> Ra angkek ikwer-rnem, “Atnemel arrantherr irrenty alhetyek akngenherr-arey. Amernan arrantherr akngeyang, menty! Arrantherr alhentyelan yakwethan mentyarl ayntaynte, manenpan. Ilyant alhenherr-arey atnemant-akert. <sup>9</sup> Ingketyek-arelh impen akngenherr-arey, arnkwa arkelant akngenherr-arey.” <sup>10</sup> Jesus-el atherr-atherrarl amentew-ament ilek, “Mpwelanth alhem tawen-warl, warl anyentel-antey aney-alhenherr-ather! Mpwelanth warl anyentelarl aney-alhenty-penh, mpwelanth tawen ingwer-warl-anemarl alhetyek. <sup>11</sup> Mpwelanthanthalr tawen-arenyel-rnem irrentey-ayntem irrpelthirremel, ahernan irralkelhenh-atherrarl ingkety-theyan. Tawen-arenyel-rneman arem, ingketyarl mpwelanth irralkelheman ahern, rernem iterremarl, ‘Anwantherr arntetyirreyen, Akngeyel anwenhantherr arntety ilkwa antheyen, anwantherrarl renh-ather arey-ayntem, inkwerelheyangel.’ Ikwer-theyan, mpwelanth tawen ingwer-warl-anemarl alhenherr-atherran.”

<sup>12</sup> Jesus-kenh kwertengerl-rnem apmer arrpanenh-warl alhek, renh-nem iletyek, rernem mwerr-angkwarr anetyek, apmwekety angkepirremel Akngey-angkwarrant-anem apentetyek. <sup>13</sup> Kwertengerl ikwerenhn-nem rernem arrenty akngerr irrentek tawen arrpanenhek. Rernem arntety-rnem mwerrilek, tawen arrpanenhek. Rernem anterl apernek, Akngey-warl angkemel, renh-nem mwerriletyek.

*John Baptise-emeley-angker ilwelyel  
(Matthew 14:1-12; Luke 9:7-9)*

<sup>14</sup> Herod-el Jesus renh awek, rarl arntety-rnem mwerrilenh, apmer arrpanenhek. Herod ra ywarn iterrehn John, Baptise-emeley-angker, “Rang angkep ipmepenh itethirrek, rang apmer arrpanenhek mwerrileyel.” <sup>15</sup> Ingwer-rnem angkerrenh, “Elijah rang alker-they apey-alpek anwekantherr-warl, arntety-rnem mwerriletyek, apmer arrpanenhek.” Ingwer-rneman angkerrenh, “Artwa angkakert ingwer ipmepenh angkep itethirremel, apey-alpek anwekantherr-warl, apmer arrpanenh arntety-rnem ingker-renh mwerriletyek.” <sup>16</sup> Atyetyart Herod apal angkenh, “John-ap ran! Itethirrenhey-alpekan, atharl thwenek ingwerel renh ahenty rlweth-aketyek, atwetyek!”

<sup>17</sup> Herod-el kel iterl-arek, rarl ahelengkw thwenek, ra John renh anterrkwemel atwetyek. <sup>18</sup> Awayikw ikwerenhn Herod-el anew ikwerenhn raken, itnan Herodias. John-el renh ilek, “Ntwa nthakenharl awayengkwan anew ikwerenhn raken? Apmwel-aretharl alakenhey! Awayengkw-anteyarl anew ikwerenhn ntwa raken, arraty-wenyarl!” Arelh Herodias ra ahelirrek John ikwer. Herod-el John renh anterrkwek, tyayl-warl akwernemel. <sup>19</sup> Arelh Herodias ra iterrek, John renh atwetyek. <sup>20</sup> Herod aterirrek John-keny, rarl arraty Akngey-angkwarr anen-hkety. Herod-el arntarnt-arenh renh arleng-alenty. Herod atherr-angkwarr iterrenh, mwerr-angkwarr, apmwangkwarr.

<sup>21</sup> Arelh Herodias mpwelhenh Atyetyart ilkwek, renh ayerneyek, John renh atwetyek. Atyetyart Herod-rnem-then Atyetyart ilkwa ingwer-rnem-then, apmer Galilee-areny-rnem akarirrek, rernem amern ingkerrenh arlkwetyek. Atyetyart ahelengkw-rnem-then rernem akarirrek ingkerrenh amern ingkerrenh arlkwetyek arpemarl. <sup>22-23</sup> Arelh Herodias-kenh ampikw rntwenh ikwer-rnem ingkerrenhek. Aleyak ikwer rernem inkwerelhek, rarl mwerr-angker Herod-kenh apmerel rntwenhek. Herod-el kwey renh ilek, “Ilek-ilek akngerrek nga arlkwentisty, atha genh anthem.”

<sup>24</sup> Kwey ra amikw ikwerenhn, Herodias-warl alhek. Ra amikw renh ayernek, “Ilekek artha ayernem Atyetyart ilenhan?” Amelikw renh ilanthe, “Akapwert John Baptise-emeley-angker yanh ina, pmwar-warl arrernemel, ayen anthemel!”

<sup>25</sup> Ikwer-penhan kwey rap Atyetyart Herod-warl alhek. Ra Atyetyart Herod renh ilek, “Akapwert John Baptise-emeley-angker aka, pmwar-warl arrernemel, ayen anthemel.”

<sup>26</sup> Herod ra ampperrngant-anem irrek John akapwert ikwer. Akngerrel renh awekarl-kety, ra nthakenh akengenty angkey-angen. Nthakenh ra arrkngert angkey-angen.

<sup>27</sup> Herod-el thwenek ahelengkw tyayl-warl, John ahenty rlweth-aketyek. <sup>28</sup> Ahelengkwel arreylpel akapwert rlweth-akek, akapwert renh pmwar-warl arrernemel, kwey renh anthek. Kwey ra amikw-warl akngeynek, John Baptise-emeley-angker akapwert. <sup>29</sup> John-kenh kwertengerl-rnemel awek, rarl ilwek. Rernem apetyek, ipma awennng-warl akwerneyek. Rernem renh akwernek.

*Jesus-el artwernem 5,000 wanteyel  
(Matthew 14:13-21; Luke 9:10-17; John 6:1-14)*

<sup>30</sup> Kwertengerl Jesus ikwerenhan-nem Jesus ikwer-warl apetyek. Rernem ilelhek rernemarl akalty-anthek apmer arrpanenhek, mwerr-angkwarr apmer arrpanenhek anetyek Akngey-kenh-angkwarr. <sup>31</sup> Akngerr Jesus ikwer-warl apetyek. Kwertengerl ikwerenhan-nem-akert Jesus renh amern arlkweyangilek akngerrel. Jesus angkek kwertengerl ikwerenhan-nemek, "Mpa, anwantherr alhey, apmer ingwer-warl, ikweren-nem-kety!" <sup>32</sup> Nganerl-alhek rtnewarl, rernem kwaty ilkwangkwarr artarnpenhek artempel ingwer-warl. <sup>33</sup> Ingwerl-rnem renh-rnem iterl-arek apmer ingwer-warlar rernem artarnpenhek kwaty ilkwangkwarr, rtnwel. Kwaty ilkwa anper-alhemel, rernem alhek ikwerenhan-nem-warl.

<sup>34</sup> Akngerr Jesus ikwer-warl akarirrek. Ra renh-rnem akalty-anthek, atwerrpek-atwety. <sup>35</sup> Kwertengerl ikwerenhel-rnem Jesus renh ilek, "Ingwer-rneman thwena tawen-rnem-warl, amern ikwerenhan-nem-kenh ineyek, atwerrpirrekerrem. <sup>36</sup> Amern-wenyarl nhanyeman, arrangkwarl. Atwerrpirrekerrem-away renh-rnem thwenal"

<sup>37</sup> Jesus angkek, "Arranther wantenherr-arey." Rernem ywarn iterrek, rarl Jesus-el renh-rnem ilek. Rernem angkek, "Man akelyarl nthakenh amern ineyang artwa akngerrek."

<sup>38</sup> Jesus angkek, "Amern aretyek alhenherr-arey akngerrek." Rernemap amernek nthwerl-apenh. Rernem Jesus renh ilek, "Aker irrpeng atherr, amern irrpetyap." <sup>39</sup> Jesus-el ilek kwertengerl ikwerenhan-nem, rernem iletyek akngerr arrernelheteyek ingkerrenh atherrk-warl. <sup>40</sup> Ingkerrenh rernem arrernelhelk amentew-ament.

<sup>41</sup> Aker irrpeng-atherr amern irrpetyap Jesus-el inek. Ra Ingkart Akngey-warl angkek inkwerelhemel, ra amern akngerr anthetyek, aker irrpeng akngerr anthetyek. Jesus-el amern rlweth-akek. Ra kwertengerl ikwerenhan-nem anthek, rernem-anem antheynetyek ingwer-rnem. Jesus-el aker irrpeng rlweth-akek. Ra anthek kwertengerl ikwerenhan-nem rernem antheynetyek ingwer-rnem.

<sup>42-44</sup> Artwa akngerrel amern arlkwek-penh, rernem mwerr-anem, atnerteng-anem anek. Artwa akngerrel amern arlkwek. Rernem arrangkw-anem aneyel, rernem atnerteng-anem aneyel Amern akngerr-antey aynten. Rernem amern akngerr ywerrelhey-angenh. Amern ikwerenhan-nem-angkwarr akngerr-anteyarl. Rernem akarriilek arrernemel teram 12-warl. Amern akngerr-anteyarl rtnen 12 teram ikwer.

### *Jesus kwaty irrwerl-angkwarr alheyel*

(Matthew 14:22-33; John 6:15-21)

<sup>45</sup> Jesus-el ilek kwertengerl ikwerenhan-nem, rtnwel rernem kwaty ilkwangkwarr artarnpenheteyek, apmer Bethsaida-warl. Ingwer-rnem Jesus-el ilerl-alhek rernem apmer-warl alperleweteyek.

<sup>46-48</sup> Ra nganek apwert ilkwewarl, ra angketyek Akngey-warl. Jesus apwert irrwerlel ament-areny rtnen. Rtnwa kwaty ilkwa ampepel rtnen kwertengerl ikwerenhan-nem-akert. Kwartengerl ikwerenhan-nem artarnpenhek kwaty ilkwangkwarr artempel ingwer-warl. Jesus-el arnarenh renh-rnem ikwerenhan-nem-kenh awerelarl twetiwenh. Rtnwa arraty alheyang, renh-rnem alhengkerl anthek. Jesus ingwepen kwaty ilkwa ampepel apetyek, ngwangkant akethirrenhey-alhentyel. <sup>49-50</sup> Jesus ikwerenhan-nem renh arnarek kwaty ilkwa ampepel, rarl apey-alhenh ingketyel kwaty ilkwa ampepel. Rernem aterirrek. Rernem iterrek, "Artwa itnweng arrewaly anwekanther-warl kwaty ilkwa ampepel apetyeyel." Rernem arlkek, aterirremel.

Jesus angkek, "Aterirreyang anenherr-arey! Ayeng Jesus. Aterirrey-angenh arranther!" <sup>51</sup> Jesus ra nganek rtnewarl, kwatyan atnengk-anem irrek. <sup>52</sup> Kwartengerl ikwerenhan-nem ywarn iterrek, rarl amern akngerrilek.

### *Jesus-el arntety-rnem mwerrileyel apmer Gennesaret-itwek*

(Matthew 14:34-36)

<sup>53</sup> Jesus kwertengerl ikwerenhan-nem-akert rtnwel kwaty ilkwangkwarr alhek artempel ingwer-warl, tawen Gennesaret-itwek. <sup>54</sup> Rernem atwarirrek rtnwa ikwer-they. Akngerr yanh-arenyel-rnem Jesus renh iterl-arekarl. <sup>55</sup> Rernemap anterreyelpel-anew, arntety-rnem akarriiletyek, ingkerrenhel panty-warl, renh-rnem arrernemel, Jesus-el mwerrileyek. <sup>56</sup> Apmer arrpanen-h-they arntetyan apeyarr-alhek Jesus-el mwerrileyek. Arntetyel-rnem Jesus renh ayernek, arnkwa ikwerenhan-nem-kenh. Rernemarl Jesus-kenh arnkwa arnep-arnek-penh, rerneman mwerr-anem irrek.

<sup>1</sup> Moses-kenh-rnem-then Pharisee-rnem-then anen, Jerusalem-areny-rnem-then. Rernem Jesus-warl akarrikrek. <sup>2</sup> Rernem arek, kwertengerl Jesus-kenhel-rnem itep aternngel amern alhewerarl arlkwek, itep lhewelhey-angenhel.

<sup>3</sup> Jew-rnem-then, Pharisee-rnem-then itep lhewelhenh amern arlkwey-alenty. <sup>4</sup> Amern store-ek inemel, rernem irralkemel ingkerrenh kwaytel, rernem ampernemel arlkwey-alenty. Arrwekelely-rnem-kenh angka nhenh aynten. Tyampet-rnem irrkwernehm-then ingkerrenh rernem irralkek, rernem amern ampernemel arlkwey-alenty.

<sup>5</sup> Rernem Jesus renh ilek, "Kwertengerl ngkwenhel-rnem nthakenarl itep lhewelhey-angenharlan amern arlkwey-alenty. Arrwekelely-kenh apmer nhel aknganek amern arlkwey-alenty itep lhewelhetyek."

<sup>6</sup> Jesus-el renh-rnem ilek, "Arrantherr tnakelheyel. Awank-akerr Isaiah-el Akngey-kenh angka pip-warl ingkwernek, arrantherran aneyel-apeny. Akngey angkek ikwer-rnem, <sup>7</sup> 'Arrantherr irrywerremel atyeng inkwerelheyel, angka atyenh-angkwarr apentey-angen. Arrantherr akwerrng iterreyel arrekantherrenh-angkwarrant, alakenh-anyem arrekantherrenh iterreyer Akngey-kenh-angkwarr-weny."

<sup>8</sup> Jesus-el renh-rnem ilek arrpemarl, "Arrantherr iterreyel arrekantherrenh-angkwarrant, arrantherr anetyek. Arrantherr Akngey-kenh-angkwarr apentey-angen. <sup>9-10</sup> Atha ileyel Akngey-kenh angkel, 'Arrantherr amey-rnem-then, akngey-rnem-then ikwer-rnem awelhenherr-arey. Moses-kenh angka alakenh-anyemarl aynteyel arrwekelelyan. Ameyek, akngeyek awelheyang, arrantherr apmwangkwarrarl aneyel.' <sup>11-12</sup> Arrantherr arntarnit-areyang akngey-then amey-then. Arrantherr apmwel-areth akalty-antheyel, Akngey-kenh-angkwarr-weny. Arrantherr man ikwerel amey-rnem-then akngey-rnem-then arntarnit-arey-angen, man lelenh arrantherr ayerrpileyel. Arrantherr irrywerremel ileyel man nhenan Akngey-kenh-arrpantey. <sup>13</sup> Arrantherr angka Akngey-kenh ingkerrenh ipmeyel, angka arrekantherrenh-angkwarr apenteyel."

*Apmwakert ingkerrenh anwantherr aneyel, anwantherr apmwel-areth aneyel  
(Matthew 15:10-20)*

<sup>14-15</sup> Jesus-el renh-rnem akarrilek. Ra ilek, "Atyeng arrantherr awelhenherr-arey arternp. Amern arrantherr arlkwetyek alhewer, nthakenarl arrantherr apmwelhiley-angen, amern alhewer arlkwemel. Angka Akngey-kenh nhenh aynteyel, amern alhewer arlkwetyek. Arrantherr apmwel-areth angkenty, arrantherr Akngeyek apmwelhileyel."

**Anayntileyel:** *Jew-rnem-kenh-angkwarr aynten awank-akerr. Moses-kenh angka rernem apenteh, rernem nthakenh aker ingwerek-ingwer arlkwey-angen. Rernem alakenh-anyem iterrenh, rernem aker-rnem arlkwenty, rernem Akngey-kety apmwangkwarr irrem.*

<sup>17</sup> Jesus-el renh-rnem ilek-penh, ra apmer-warl alpek kwertengerl ikwerenh-rnem-akert. Kwertengerl ikwerenhel-rnem renh ayernek, "Ntwa anwernenhantherr anayntileyek angka irrkaty, ntwarl renh-rnem ilek-apeny." <sup>18-19</sup> Jesus-el renh-rnem ilek, "Arrantherr ywarn-antey iterreyel angka nhenan atharl arrenhantherr ileyelan. Amern arrantherr inemel alhewer arlkwetyek, nthakenh apmwelhiley-angen. Amern arrantherr arlkwenty, kwernenhenty atnert-warl, rap atnert-they ywerrenhem. Amern, aker, alhewerarl arrantherr arlkwemel.

<sup>20-22</sup> Arrantherr apmwel-aretharlap iterrenty, arrantherr apmwangkwarrarlap aneman. Arrantherr ingwer-kenh arrkar irryertel ikngwenty, arrantherr apmwangkwarrarlap aneman. Arrantherr irryert-awarr anenty, arrantherr apmwel-aretharl ilenh-angkwarran-anem. Arrantherr ingwerenty atwenty, arrantherrap apmwangkwarrarlap aneman. Arrantherrarl irrywerremel ilenty, arrantherr apmwangkwarrarlap aneman. Arrantherr ahelirrenty ingwer-rnemek, arrantherr apmwangkwarrarlap aneman. Arrantherr tyel-angkenty ingwer-rnemek, arrantherr apmwangkwarrarlap aneman. Arrantherr ingkerrenh-angkwarr alhewer alhenty, arrantherr apmwangkwarrarl anem. Arrantherr mwerr-arrpantey tnakelhenty, arrantherr apmwangkwarrarlap aneman. Arrantherr Akngeyek irrpelthirrenty, arrantherr apmwangkwarrarl anem. <sup>23</sup> Alakenh-anyem, arrantherr apmwangkwarrarl anem, arrantherrarl iterreyel-angkwarr, arrantherr Akngey-kenh-angkwarr apmwelhileyel, ikwer inkwerelheyang-anem. Amern alhewer arlkwemel, nthakenh arrantherr apmwelhiley-angen."

*Arelhel Jesus renh iterl-areyel, Jesus ra mwerriley-angker  
(Matthew 15:21-28)*

<sup>24</sup> Jesus ra apmer Tyre-warl alhek, warl ingwer-kenhel aney-alhek. Jesus-el renh-rnem ilek, "Ingwer-rnem iley-angen, rernem ayenh arlkarewerl-anekerr. Ayeng artenyel

aneyel, atha kwertengerl atyenh-rnemantarl akaltyilem.” <sup>25-26</sup> Arelh apmer Phoenicia-areny ra awek, Jesus-arl aney-alhek warl ingwer-kenhel. Arelh alethang anyent Greek, angka ingwer angkenh, Jew-kenh angkeweny. Ra Jesus-warl alhek, kwenirrey-alhemel, ampwethel alernelhemel. Kwey ikwerenrh arrenty apmwakertarl anenh. Amikwel Jesus renh ayernek, “Ampa atyenh-kety, ntwā arrenty irrental!” <sup>27</sup> Jesus angkek, “Nthakenh atha ingwer-rnem arntarnt-arey-angenh. Anwantherr ampernem-tangkwel wantey. Atha atyenh-rnemantarl, Jew-rnem arntarnt-areyel. Rernem ampernem-apeny atyenh. Arengk-rneman ampel-rnem arlkwenty-penhant wantey. Atha atyenh-rnem, Jew-rnem-tangkwel arntarnt-areyel. Atha arrenty-rnem Jew-rnem-kety irrentem.”

<sup>28</sup> Arelh anyent angkek ikwer, “Arengkel-rnem arlkwetyek arrpemarl, arengk-kenh amernan rernem iweyek arrpemarl. Jew-rnem rernem ingkerrenh atyenh-rnem-kety arlkarirreyel. Atyenh-rneman arengk-apenyarl aneyel, Jew-rnem-angkwarr. Jew-rnemel renh-rnem arntarnt-arey-angenh. Atha ngenh iterl-areyel, ntwā ingkerrenh arntarnt-arey-angker. Ayenhen-then arntarnt-ara!”

<sup>29</sup> Jesus-el arelh ilek, “Nga arraty atyeng-warl angkek. Kel arrenty tyerrelhemel alpek kwey ngkwewh-they.” <sup>30</sup> Arelh apmer ikwerenrh-warl alpek. Ra arek, arrenty kel tyerrelhemel alpenty kwey ikwerenrh-they.

*Jesus-el mwerrileyel artwa angkey-angenh akerter, iylda arwengk avey-angenh*

<sup>31</sup> Jesus alpek apmer Tyre-ampeny-they, apmer Sidon-angkwarr, Galilee kwaty ilkwewarl. Ra apmer Decapolis-angkwarr alhek. <sup>32</sup> Artwa ingwer-rnemel artwa anyent atnwenhek Jesus-warl. Ra angkey-angenh, iylda arwengk avey-angenh akerter. Rernem Jesus renh ayernek, ra renh mwerrileyek, iylda altywerileyek, mwerr-anem ra angketyek.

<sup>33</sup> Jesus-el artwa anyent renh tawen-they akwerr-warl atnwenhek. Jesus-el itep-atherrel iylpatherr-warl arrernek, artwa arwengk ikwer-warl. Jesus-el itep ikwerenrh-warl apelh arrernek. Ra aleny artwa arwengk renh itepel arnep-arnek, ra mwerr angketyek, awetyek. <sup>34</sup> Jesus-el irrwerl alker itnywene, angkemel, “Iylpatherr irrpelthel altywerila!” <sup>35</sup> Ikwer-penh artwa ra mwerr-anem aveyel-anem, mwerr-anem angkeyel-anem.

<sup>36</sup> Jesus-el renh-rnem artwerilek, “Ingwer-rnem-warl iley-angenh. Akater anenherr-arey, atharl artwa anyent mwerrileyek.” <sup>37</sup> Ingkerrenh rernem artewentyel iterrek, angkerrenhan, “Ngangker innang yanhey, artwa yanhan arntety-rnem mwerriley-angkerlarap ran, avey-angenh-rnem-then, angkey-angenh-rnem-then.”

## 8

*Jesus-el 4,000 wanteyel  
(Matthew 15:32-39)*

<sup>1</sup> Akngerr akarirrek Jesus-warl. Amern ingkerrenh ywerrelhilek. Jesus irrepern angayakw-rnemek amperngirrek. <sup>2</sup> Jesus ilelhek kwertengerl ikwerenrh-rnemek, “Ayeng irrepern angayakw-rnemek amperngirreyel. Arla irrpety-inger rernem anwekantherr-itwel anenh, angayakw. <sup>3</sup> Nthakenh atha renh-rnem thweneyney-angenh, apmer arleng-warl alpetyek, rernem aytnay-alpekerr angayakw angath-antey.”

<sup>4</sup> Kwertengerl ikwerenrh-rnemel renh ayernek, “Amernan anwantherr nthek-warl inem? Akngerr nhenh-rnem-akertan? Arrangkwarl nhenhan, aherretyarl! Atherrkeny-weny!”

<sup>5</sup> Jesus-el renh-rnem ayernek, “Amern akngerrelang arrekantherrenhan?” Rernem renh tyernek, “Ya, amern ampeng 7-ant aynteyel.”

<sup>6</sup> Jesus-el ingkerrenh ilek, “Arrantherr ingkerrenh anenherr-arey ahernel.” Jesus-el amern 7 renh-rnem inek. Ra Ingkart Akngay-warl angkek, inkwerelhemel, amern akngerr renh anthetyek. Jesus-el amern rlweth-akek, kwertengerl ikwerenrh-rnem anthemel, rernem artwa ingwer-rnem antheynetyek ingkerrenh. <sup>7</sup> Aker irrpeng-rnem-then irrpety kwertengerl ikwerenrh-rnemel inek, Jesus renh anthemel. Ra Ingkart Akngay-warl angkek, inkwerelhemel aker irrpeng renh anthetyek. Jesus-el aker irrpeng renh rlweth-akek, kwertengerl ikwerenrh-rnem anthemel, rernem artwa ingwer-rnem antheynetyek ingkerrenh. <sup>8-9</sup> Jesus-el amern irrpety-penh irrpelthel akngerrilek, ingkerrenh wantetyek. Ingkerrenh 4,000 inkwerelhek, Jesus-elarl amern ingkerrenh wantek. Amern akngerr menty-anem irrek. Kwertengerl rernem ingkerrenh amern-rnem akwetyeynek, teram 7-warl ampwerrik iwemel ingkerrenh. Teram 7 amern akngerr-akert rtnen. Jesus-el ingkerrenh thwenek, rernem apmer-warl alpetyek. <sup>10</sup> Jesus, kwertengerl ikwer-rnem-akert rtnewewarl nganek. Rtnwa ikwerel rernem alhek apmer ingwer-ampeny-warl-anem, apmer Dalmanutha-warl.

*Pharisee-el-rnem Jesus renh arlkareweyel*

<sup>11</sup> Rernem atwarirrek rtnwethey. Pharisee-rnem Jesus-warl apetyek, renh ilerreytek. Rernem renh arrkernek, Akngey-kenh rlterrkek, ingwerek-ingwer-angkwarr mpwaretyek, mwerriletyek. <sup>12</sup> Jesus-el renh-rnem ilek, “Arrantherrarl angka ingwerek-ingwer ayenh ayerneyel-kety. Menty! Ayenh ipmenherr-arey, arlkareweyang! Ayeng menty-anem aneyel arrekantherrety.” <sup>13</sup> Jesus alhek ikwer-rnem-kety. Ra rtnwel nganerl-alhek. Ra apmer ingwer-warl alhek, kwaty ilkwangkwarr anthenayn, kwertengerl ikwerenhnem-akert.

*Pharisee-rnem arlwar rtneyel thwet-penh-apeny*

<sup>14</sup> Kwertengerl ikwerenhel-rnem amern ampeng iwerl-alhek apmerek. Amern anyentant rernem akngek. <sup>15</sup> Jesus-el renh-rnem ilek, “Mwantyel arntarnt-arelhenherr-arey Jew-kenh angkarl apentyel-rnem-kety, Atyetyart Herod-kety. Ahelarl rernem arlwar rtneyel-kety, thwet-penh-apeny, apmwangkwarrarl rernem akalty-antheyel-kety.”

<sup>16</sup> Kwertengerl ikwerenhnem angkerrenh, “Ra ahelirreyel anwekantherr, anwantherrarl amern iwerl-alhekek-arnterl.”

<sup>17</sup> Jesus-el ra iterl-arek, kanper-antey, rernemarl ikwer angkerrenh. Ra renh-rnem ilek, “Ilekearl arrantherran iterreyelan, amern arlkwey-angenhan? Arranther Ingkerenhel artewentyel iterl-arey-angenhan-antey. Kel, arrantherr areyelan, arrantherr iterl-arey-angenharl. Kel, arrantherr aweyelan, arrantherr iterl-arey-angenharl. <sup>18</sup> Ayenh arrantherr iterl-aremer, ayeng Akngey-kenh Itnweng rlterrkk-akert. Arrantherr ayenh iterl-aremer, atha artwa akngerr 5,000 wantek, amern irrpetyapel, aker irrpetyapel.” <sup>19</sup> Jesus-el renh-rnem ayernek, “Nthakenty teram arrantherr amern-then aker-then akwetyemel ampwerrk iwek, rernemarl akertang arlkwek-penh?” Rernem ikwer ilelhek, “Anwernantherr amern-then aker-then 12 teram-warl akwetyemel ampwerrk iwek.”

<sup>20</sup> Jesus-el renh-rnem ilek, “Arranther ayenh iterl-aremer, atharl 4,000 amern-then aker-then wantekarl.” Jesus-el renh-rnem ayernek, “Nthakenty teram arrantherr amern-then aker-then akwetyemel ampwerrk iwek, rernemarl akertang arlkwek-penh?” Rernem Jesus ikwer ilelhek, “Anwernantherr amern-then aker-then 7 teram-warl akwetyemel ampwerrk iwek.”

<sup>21</sup> Jesus-el renh-rnem ilek, “Arranther ayenh iterl-aremer, ayeng Akngey-kenh Itnweng rlterrkk-akert.”

*Jesus-el artwa aparrng mwerrilek apmer Bethsaida-itwek*

<sup>22</sup> Jesus, kwertengerl ikwerenhnem-akert apmer Bethsaida-warl alhek. Artwa tawen-arenyel-rnem artwa aparrng Jesus-warl atnwenhek, renh mwerriletyek. <sup>23</sup> Jesus-el aparrng renh tawen-they akwerr-warl atnwenhek. Jesus-el apelhel annga apernek. Jesus-el renh ayernek, “Ntwa apek areyel?”

<sup>24</sup> Artwa aparrng ra ilelhek Jesus-warl, “Ya, artwernem atha areyel-anem, arwerl-apenyarl arrkay alherleweyel.” <sup>25</sup> Jesus-el annga artwa aparrng renh arnep-arenek arrpem. Artwa Jesus-warl ilelhek, “Atha anaynt-anem areyel.” Ra ingkerrenh-anem arek. <sup>26</sup> Jesus-el artwa renh ilek, “Kel-anem apmer-warl alpa! Tawen-angkwarr alpey-angenhan, akwerrel-antey alpa! Ingwerel-rnem-anem ngenh ayerney-ayntekerr, ayenh arlkarewerl-anekerr.”

*Peter-el Jesus renh “Christ” itneweyel*

(Matthew 16:13-20; Luke 9:18-21)

<sup>27</sup> Jesus kwertengerl ikwerenhnem-akert apmer Caesarea Philippi-ampeny-warl alhek. Jesus-el kwertengerl ikwerenhnem ayernek, “Nthakenh atyeng angkerreyel akngerran?”

<sup>28</sup> Rernem ikwer ilek, “Ingwer-rneman ngkweng iterreyel John baptise-emiley-angker-arrpanteyarl, ngan ipmepenh itethirremel apey-alpenty-arrpantey. Ingwer-rneman ngkweng iterreyel angkakert Elijah-arrpanteyarl, ahern nhewarl apey-alpenty-arrpanteyarl, irrwerl-they. Ingwer-rneman ngkweng iterreyel angkakert ingwer-arrpanteyarl, ipmepenh itethirremel apey-alpenty-arrpanteyarl.”

<sup>29</sup> Jesus-el kwertengerl ikwerenhnem ayernek, “Angwenh-arrpantey arrantherr iterl-areyel ayenhan?” Peter ra ilek, “Ngan Christ-arl, Akngeyel awankarl anwernenhantherr alhelekarl, ngenh thwenetyek anwernekantherr-warl, ahern nhewarl.”

<sup>30</sup> Jesus-el renh-rnem artwerilek, “Alerl, iley-angenhan-antey, ayengarl innang Christ-an, ingwer-ingerant artwa ingwer-rnem ilenherr-arey.”

*Jesus ilelheyel*

(Matthew 16:21-28; Luke 9:22-27)

<sup>31</sup> Jesus-el kwertengerl ikwerenh-rnem ilek, "Moses-kenh-rneman atyeng irpelthirremel angkerreyel ayen renrem atwetyek, atyetyart ilkwa tyaty-areny-rnem-then. Ayeng ipma ayntem ingwa atherrel. Ingwa ather-penh, Akngey-kenh Artwa Anyent Impen ayeng ipmepenh itethirremel akwenteyen." <sup>32</sup> Jesus-el aketh-antey anaytilek, angka arrayt larl ingwa ather-penh ipmepenh akwenteyen. Peter arleng-antey rtney-alhek, ingwer-rnem-kety, ratherr angkerreyek. Peter arrkngert angkek Jesus ikwer-warl, "Nthakenh renrem ngenh ipmek atwey-angenh, nga intem iteth aneyen." <sup>33</sup> Jesus-el Peter renh ilek, "Menty! Ntwa ayen arrkerneyel, arrenty-kenh angkel, ngan ahern-arenyekarl awelheyel, Akngey-kenh-angkwarr-weny. Akngey atyeng arlkwententyarlan, renrem ayen menty ipmek atwetyek."

<sup>34</sup> Jesus-el ingkerrenh akarrilek. Rernem Jesus ikwer-warl apetyek, kwertengerl ikwerenh-rnem-then. Jesus-el renh-rnem ilek, "Arrekantherrenh-angkwarr arrantherr iterrey-angenh. Atyengant arrantherr iterrel-aytentenherr-arey. Apmwel-rnem arrenhantherr ileyel, arrenhantherr arwa ilpertileyel, ayenhan arrantherr apentekerr, ingwerel-rneman ilperteleyel. <sup>35</sup> Atyehel-rneman ayen apentetyek, intem-antey renrem ilwyekey-atwety, angkepirrey-angenh, angka atyehn ilerl-apayntetyek. Apmwel-rnem renh-rnem atwenty arwel iylypeyl-ather-warl arrernemel, kwertengerl atyehel-rnem ayen apentetyek. Rernem intem-antey iteth aneyen." <sup>36-37</sup> Arrantherr ampwal akngerrekant atnyenenty, Akngeyekan arrantherr iylypelirrenty, arrantherr intem iteth aney-angenh. Mwerr-ayteng arrantherr Akngeyekant inkwerhelhetyek. <sup>38</sup> Apmwel-rnem artwa anyent renh arrernem, ra atyengety angkepirreyek, ra atyeng ilkelheyang iretyek nyerrirremel, ra ipma intem-antey aynteyen. Artwa anyentarl atyengety angkepirrenty, ra ipma intem-antey aynteyen. Ingwer-ingerant Artwa Anyent Impen Akngey-kenh ayeng apey-alpeyenh, alker-areny-rnem-akert, Akngey-kenh rlterrk-akertel. Angka ilkwewarl angkerreyenh-angkwarr atha ileyen, 'Artwa nhanyeman atyengety angkepirrek, ra ipma intem-antey aynteyen. Ayeng ikwerety angkepirrem, rarl atyengety angkepirrek-apeny.'

## 9

<sup>1</sup> Jesus angkek ikwer-rnemek, "Awelhenherr-arey atyeng! Akngey aremirreyen ikwerenh-rnem-warl arlertek ilkwakert, atyetyart ingkerrenhek. Arrantherr ingkerrenhel arlertek ilkwakert renh areyen arrantherr ilwey-alentyel."

*Jesus apey-alheyel arlertek rlterrk ilkwakert  
(Matthew 17:1-13; Luke 9:28-36)*

<sup>2-3</sup> Arla 6-puhan, Jesus-el kwertengerl-rnem irrpety, apwert irrwerl-warl atnwenhek, rernem ilarrerl-alhetyek akngerr-kety, Peter-akerr, James-akerr, John-akerr. Rernem apwert ilkwewarl nganey-alhek. Kwertengerl-rnem-itwel anngetherr Jesus ingwer irrek. Kwertengerl ikwerenh-rnem arek Jesus renh arnkwa arlter-akertel arryternenty, arlertek rlterrk innge. Ingwerel nthakenh arnkwer nem arnwarney-angenh arlter ingga mpwaremel. <sup>4</sup> Arrwekeleeny-ather, Moses-then Elijah-then Jesus-itwel aremirrek. Ratherr arrwekeleeny Akngey-kenh angkakert ather anenh, ratherr ywerrey-alenty. Ratherr ather-antey Jesus-itwel angkerrenh.

<sup>5</sup> Kwertengerl Peter anyentan angkek Jesus ikwer, "Ingkartay, awethem ntwa anenhantherrenh atnwenhey-alhek nhewarl. Mwerr anwernanther lywenty irrpety rnkerney, ingweran ngkwengarl, ingweran Moses-ekarl, ingweran Elijah-ekarl. Ngapek ilkelhenty." <sup>6</sup> Peter apal-apal angkek ikwer-ather, ratherr ahern-arenyek-athen, rernemarl ater-anem irrek Moses-then Elijah-then aremirrek-kety.

<sup>7</sup> Ikwer-puhan kwenpayel-anem renh-rnem artek. Akngey kwenpay-angkwarr angkek, "Nhanyem alerey atyehn. Ayeng ikwer inkwerelhem. Arrantherr ingkerrenh ikwerant awelhemel anenherr-arey!" <sup>8</sup> Kwertengerl-rnemel artepang arek angkakert ikwer-ather. Rernem arek Jesus anyentant-anem rtnrl-anenty.

<sup>9</sup> Jesus atwarrel-alhek apwert-they kwertengerl irrpetyap ikwerenh-rnem-akert. Jesus-el artwerilek kwertengerl ikwerenh-rnem, "Ingwer-rnemek ileyang aney-alpenherr-arey, arrantherrarl apwert irrwerlek arek-penh. Ayengarl Akngey-kenh Artwa Impenan. Ayeng ilwenty-penhel, ayengarl itethirremel, Akngey-warl irrwerl alpeyenh. Ikwer-puhan arrantherr akngerr-warl-anem ileyek." <sup>10</sup> Kel rernem akatek, iley-angenh-antey ingwer-rnem-warl, Jesus-el renh-rnem ilek-angkwarr. Rernem ywarn iterrek Jesus rarl renh-rnem ilelheyelpekek, rarl ipmepenh itethirremel akwenteyenhek.

<sup>11</sup> Kwertengerl ikwerenhel-rnem Jesus renh ilek, "Moses-kenh angka akalty-anthenh-anthenhel-rnem ileyel, 'Elijah retangkwelarl apetyeyen arrwekelan, Christ, Akngeyel

awank-akerrarl anwernenhantherr alhelek, ran apetyeyen hingkern-theyarl ahern nhewarl.”

<sup>12-13</sup> Jesus angkek, “Ya, arraty inngar! Elijah apetyek arrwekel ingkerrenh akaltyiletyek, rernem Akngey-angkwarz apentetyek. Rernem Elijah ikwer irrpelthirrenh, iterl-arey-angenh. Rernem renh irrpelthirremel atwek, ipmek-atwety. Alakenh-anyem rernem Artwa Anyent Impen Akngey-kenh irrpelthirremel atwewayen, ipmek-atwety. Akngey-kenh angka alakenh aynteyel.”

*Jesus-el awey arrety-akert mwerrileyel  
(Matthew 17:14-20; Luke 9:37-43)*

<sup>14</sup> Rernem alpek kwertengerl ingwer-rnem-warl. Rernem arenhey-alpenh kwertengerl ingwer-rnem, rernemarl kwertengerl Moses-kenh-rnem-then ilerrenh.

<sup>15</sup> Apmer ikwer-areny-rnem Jesus ikwer inkwrelhek, renh arnaremel. Ikwer-warl rernem anterrey-alhek.

<sup>16</sup> Kwertengerl ikweren-hnem Jesus-el ayernek, “Nthakenh arrantherr ingwer-rnem-then ilerreyel?”

<sup>17</sup> Artwa anyent apmer ikwer-areny Jesus ikwer-warl angkek, “Ingkartay, ngan akalty-anthenh-anthenh mwerr inngar! Atha awey anyent atyen akngeteyek ngkweng-warl, ntwa mwerriletyek, renh angkeyangilek arrentyel. <sup>18</sup> Akngerr-inger arrentyel renh anterrkwenh. Awey ra aytnek, arntek akarlkwelhemel, apelh-angketyarr irremel. Ra arwengkirremel aytnek, akngelhey-angenh irrek. Atha ywarn-antey ayernek kwertengerl ngkweng-hnem rernem awey atyen mwerriletyek, arrenty ikwerety irrentetyek. Rernem renh ikwer-they irrenteyek-arrpanter, arrangkwarl.”

<sup>19</sup> Jesus angkek, “Akngerr-inger ayeng arrekantherr ywarn arrkernelhek, atha arrenhantherr akaltyileyek. Atyeng arrantherr arlkwentey-angenhel, iypelantarl awenh. Nthakenh ayenhan arrantherr iterl-arey-angenh, ayengan arlertek ilkawakert? Awey ilenh atyeng-warl akngetya!”

<sup>20</sup> Rernem akngeteyek awey renh Jesus ikwer-warl. Arrentyel awey renh arwengkilek. Intewek ahern-warl. Awey arwengk aytnek, apelh-angketyarr irremel.

<sup>21</sup> Jesus-el awey aynikw ikweren-hnem ayernek, “Arlta ilekel ra arwengkirrenh? Intem-anteyang?” Aynikw ikwerenhel Jesus renh tyerne, “Alakenh ra awey akely ilenh arwengkirrenh artnerrenty-iperrank. <sup>22</sup> Akngerr-inger arrentyel renh ipmek atwetyek, ra arrkernelheyel awey ilenh, rwevarl awey renh akngeynetyek. Ra kwat�-warl aylpenhetyek ilwetyek, kwat� kwenel. Ingwer-rnemel ileyl ngap ran arntety mwerriley-angkeran. Ngapek ra rlterrk-akertan arntety mwerriley-angkeran, aylernekanth amperngirra! Awey aylernekanth mwerrila!” aynikwel Jesus renh ayernek.

<sup>23</sup> Jesus-el renh ilek, “Nga atyeng iterreyel, atharl awey ilenh mwerriley-angenh. Ntwa ayenhan iterl-aremer, ayeng arntety mwerriley-angker.”

<sup>24</sup> Anamerl-antey aynikwan artnemel angkek, “Ya, ngenh atha tnakeyel, ntwarl renh mwerrilem. Akalty-antha ayen, mwerranty atha ngenh iterl-aretyek.”

<sup>25</sup> Jesus-el arek, akngerrarl akarrirek ikwer-warl, anamerl-antey. Jesus rap rlterrk angkek arrenty ikwer, “Arrety, arwengkiley-angker nga! Atha ngenh ilem, tyerreha awey ilenh-they! Angkepirrey-angken, intem-antey alpa!”

<sup>26</sup> Arrety artewentyel arlkek. Rap awey renh arrewelhilek, rarl tyerrehek ikwer-they. Awey rap ipmapeny-anem aytnek. Akngerran angkerrenh, “Awey ra kel ilwekl!”

<sup>27</sup> Jesus-el awey renh akwa anterrkwemel, akwentelhilek.

<sup>28</sup> Jesus warl kwen-warl aylpek. Kwertengerl ikweren-hnemel renh ayernek, “Jesus, nthakenh ngkwengantarl arrenty ilenhan awelhemel alpek, anwernantherr ywarnarl ikwer arrkernelhek, arrenty renh irrentetyek. Akaltyila anwernenhantherr, anwernantherr arrenty-rnem irrentetyek.”

<sup>29</sup> Jesus-el ilek kwertengerl ikweren-hnem, “Arraty arrantherr perayirremelantarl Akngey ikwer-warl, arrantherr arrenty ilenh irrenteman.”

*Jesus ilelheyel arrpemarl  
(Matthew 17:22-23; Luke 9:43-45)*

<sup>30</sup> Jesus iterrek kwertengerl ikweren-hnem akaltyiletyek ament-itwek, akngerr ingwer-rnem-kety. Apmer ikwer-they rernem alhek, apmer Galilee-angkwarz. <sup>31</sup> Jesus-el anyelkel renh-rnem ilek, ingwerel-rnem renh awekerr. “Ahelengkwel-rnem ayenhan Artwa Anyent Impen Akngey-kenh rernem anterrkwemel atwewayen. Ingwa atherr-penh, ayeng ipmepenh itethirremel akwentyeyen.” <sup>32</sup> Kwertengerl ikwerenhel-rnem ywarn iterl-arek, rarl renh-rnem ilek. Aterirrekarl rernem Jesus renh ayernekerran.

*Kwertengerl ikwerenh-rnem angkerreyel, Atyetyart ilkwa anetyek  
(Matthew 18:1-5; Luke 9:46-48)*

<sup>33</sup> Rernem warl kwen-warl aylpey-alhek, apmer Capernaum-itwel. Jesus-el renh-rnem ayernek, “Ilekekarl arrantherr ilerenhey-alpenh, anwantherrarl apetyenharlan?”

<sup>34</sup> Rernem nyerrirremel akatek. Jesus ran tyerney-angenh, rernemarl ilkelhenh Atyetyart ilkwa anyent anetyek, kwertengerl ingkerrenhek, Jesus rapeny.

<sup>35</sup> Jesus-el renh-rnem ilek, “Arrantherr Atyetyart ilkwa anetyek, arrantherr warrkenh-apeny anetyek, ingwer-rnem arntarnt-aremek.”

<sup>36</sup> Jesus-el ampa akely anyent rnkernek, akwa arrernemel ikwer-warl. Ra renh-rnem ilek, <sup>37</sup> “Atyeng inkwerelhemel, arrantherrap Akngeyek inkwerelhetyek arrpemarl, rarl ayenh thwenek, ahern nhewarl. Ampa akely ikwer arrantherr inkwerelhenty, arrantherrap atyeng inkwerelhem arrpemarl. Ampa akelyarl arrantherr arntarnt-aremek, arrantherr ayenhan arntarnt-aretyek arrpemarl.”

*Artwa ingwerel arrenty renh irrenteyel  
(Luke 9:49-50)*

<sup>38</sup> John angkek, “Artwa anyent ingwerel arrenty irrentek itna ngenh-apeny itnewemel, rlterrk ngkwenh-akertel, arrenty-rnem irrentetyek. Anwernantherr renh iltek, ‘Nga ipmelha, ngan ingkart-wenyarl, anwernantherrarl ingkart inngan!’”

<sup>39</sup> Jesus angkek, “Menty! Renh tyarlewa! Arratyarl ra ayenh itna itneweyel arrenty renh irrentetyek, ra atyeng apmwel-areth angkey-angenh.” Jesus-el John renh ilek, artwa ilenh iltey-angenharl. <sup>40</sup> “Artwa ilenhan atyeng ilkelheyelarl, ra atyeng irrpelthirrey-angenharl.” <sup>41</sup> Jesus-el renh-rnem ilek arrpemarl, “Arraty atha arrenantherr ileyel, ingwerentyel ngenh apek kwaty anthenty, nga atyenh kwertengerlarl aneyel, Akngey ikwer inkwerelhem. Akngeyel renh mwantyel arntarnt-aremk.”

*Ingwerentyel renh-rnem arrkerneyel, rernem apmweleyek  
(Matthew 18:6-9; Luke 17:1-2)*

<sup>42</sup> “Ingwerentyel kwertengerl atyenh-rnem arrkerneyt, rernem apmweleyek, Akngeyel renh arntetye ilkwa antheyen. Ra irrwamperty awelhekerr, ingwerel nthakenh renh kwaty ampep-warl iwemer, apwert ilkwa ikwer-warl arrernenty itewarl. Artwa ingwerel atyenh-rnem apmwelenty, Akngeyel renh arntetye ilkwa antheyen. Atyenh-rnemarl apmweleyek-kety, artwa ikwer-warl apwert ilkwa itewarl arertnetyek renh kwaty-warl ikwerenp iwemel. Atyenh-rnem ra apmwelerl-anekekk renh iwetyek intem-antey kwaty kwen-warl. <sup>43</sup> Artwa itepel apmwel-areth mpwareyel. Artwa anyentel itep-atherr-akertel apmwel-areth mpwareyel-kety, mwerran itep anyent-angkwarr itep renh akemer iwemel, ra itep-atherr-akertan rwilkwel apmwakert aney-kety. Mwerr-ayteng ra anetyek Akngey-kenh apmer-itwek intem-antey itep anyent-akert. <sup>45</sup> Artwa ingketyel apmwel-areth mpwareyel. Artwa anyentel ingkety-atherr-akertel apmwel-areth mpwareyel-kety, mwerran ingkety renh akemer iwemel, ra ingkety-atherr-akertan rwilkwel apmwakert aney-kety. Mwerr-ayteng ra anetyek Akngey-kenh apmer-itwek intem-antey ingkety anyent-akert. <sup>47</sup> Artwa anngel apmwel-areth mpwareyel. Artwa anyentel anna atherr-akertel apmwel-areth mpwareyel-kety, mwerran anna renh tyerremer iwemel, ra anna atherr-akertan rwilkwel apmwakert aney-kety. Mwerr-ayteng ra anetyek Akngey-kenh apmer-itwek intem-antey anna anyent-akert. <sup>48</sup> Tyerrel-rnem-tangkwell renh-rnem arlkweyeh rernem rwel-anem ampey-alentyan. Rwa ilkwa ampeyeh intem-antey.

<sup>49</sup> Thalt-penh atnwenth mwerrarl ayntem, intengirrey-angenh.

<sup>50</sup> Thalt-weny atnwenth anamerl intengirrem. Thalt mwerr-angker ilenh-apeny ingkerrenh mwerrant-arey anetyek, inkwerelhemel.”

## 10

*Arrkarenheng iwerretyek  
(Matthew 19:1-12; Luke 16:18)*

<sup>1</sup> Jesus Jordan Ilpay-angkwarr artarnpenhek, apmer Judea-warl alhek. Akngerr akarrirrek ikwer-warl. Ra renh-rnem ingkerrenh akaltyilek.

<sup>2</sup> Pharisee-rnem ikwer-warl apetyek, renh arrkerneyek. Rernem renh ayernek, “Mwerrang artwel anewn ikwerenh iwetyek?” Rernem iterrenh renh arrkerneyek, ra apmwel-areth angketyek, rernem renh angka ilkewarl akngetyek.

<sup>3</sup> Jesus-el renh-rnem ayernek, “Ilek-angkwarrarl Moses-kenh angkan aynteyel?”

<sup>4</sup> Rernem renh ilek, “Moses-kenh angka nhenh aynteyel: ‘Artwa pip-warl itna ingkernalhemel, arelh ikwerenh pip renh anthemel, arelh renh iwetyek.’”

<sup>5</sup> Jesus angkek, "Moses-el arrenhantherr iterl-arenh, arrantherrarl apmwel-areth aneyel, ikwer-angkwarz-anem arrenhantherr law renh anthek. <sup>6</sup> Arrantherr iterl-aremer Akngeyel angka nhenh anwekantherr anthek, atharl arrenhantherr ileyl. Akngeyel arelh-then artwethen arrernek, ahern nhenh-warl, ratherr intem iteng anetyek. <sup>7</sup> Ra artwel amikw-then aynikw-then ipmem-anem ra arnkentyel-anem aneyel itengerrey-alentyan. <sup>8</sup> Akngeyel renh-atherr itengilemel anthek artwa renh. Nthakenh ratherr iwerreyang, intem-antey ratherr anetyek. <sup>9</sup> Nthakenh ingwerel renh-atherr akngakey-angenh."

<sup>10</sup> Jesus warl kwens-warl aylpenhek, kwertengerl ikwerenhn-rnem-akert. Rernem Jesus renh ayernek, "Nthakenharl ntwa Pharisee-rnem ilek?" <sup>11</sup> Jesus angkek, "Arelh ngkwenh ntwa iwem, ntwa arelh ingwer-rnemarl ikngwetyek, ntwa ilenh iwem apmwel-aretharl. <sup>12</sup> Arelh anyentel arrkarikw ikwerenhn iwerl-alpem, artwa ingwer-warl-anemarl alhemel, apmwel-aretharl."

*Jesus-el ampa akely-rnem atnyeneyel*

(Matthew 19:13-15; Luke 18:15-17)

<sup>13</sup> Akngerr Jesus-warl alhek, ampa ikwer-rnem-kenh-akert, ra akapwert renh-rnem arnetyek. Jesus-kenh kwertengerl-rnemel ampa renh-rnem irrentek.

<sup>14</sup> Jesus-el arek kwertengerl ikwerenhn-rnem ampernemarl irrentek. Ra ahelirrek, angkemel, "Ampernem menty apetyeng atyeng-warl! Alakenh ikwer-rnem arrkgert angkey-angenh! Ayeng arlkwenteyel, ampernem ingkerrenh atyeng-warl apetyetyek. Akngey arlkwenteyel, ra Ingkart ikwer-rnemek anetyek. <sup>15</sup> Atha arrenhantherr ileyl. Ampernem-apeny arrantherr akarirretyek Akngey-warl, ikwer awelhetyek, Akngey Atyetyart arrekantherrenh anem." <sup>16</sup> Jesus rap ampernem atnyeney-ayntek-anem. Rap akapwert ilyel renh-rnem arnek. Jesus rap ayernek Akngey, ra ampa ingkerrenh atnyeneyek.

*Artwa anyent man akngerr-akert*

(Matthew 19:16-30; Luke 18:18-30)

<sup>17</sup> Jesus rarl anperl-alhek-warl, artwa man akngerr-akert anyentan Jesus ikwer-warl anterrey-alhekarl. Ra arrernelhek kwenirremel, Jesus-itwel angkemel, "Akalty-anthenh-anthenhay, ngan artwa mwerran. Nthakenh ayeng iteth intem anetyek?"

<sup>18</sup> Jesus-el renh ilek, "Nthakenharl ayenh mwerran ntwa ileyl? Akngeyantarlr ntwa mwerran iletyek. <sup>19</sup> Ntwa Moses-kenh angka renh iterl-areyelarl, ntwa ingwerenty ipmek atwetyekarl arrangkwarl. Ingwer-kenh anewikw nthakenh ikngwey-angenh. Ampwal-rnem nthakenh irrytertel iney-angenh. Ingwer-rnemek irryterremel iley-angenh, inngant ntwa iletyek. Akngeyek-then ameyek-then awelhetyek."

<sup>20</sup> Artwel Jesus renh ilek, "Ingkartay, ayengan law ilenh-angkwarz anek awey akelyank."

<sup>21</sup> Jesus inkwerelhek ikwer, renh awemel, rarl ikwer ilelhek. Jesus-el renh ilek, "Artwa ilenh-rnem, irrepern-rnem, man-weny-rnem ntwa man ingkerrenh-then ampwal-rnem-then renh-rnem antheyna! Ikwer-penhan Akngeyel-anem ngenh arntart-arem, ngenh atnyenem. Man antheynenty-penh atyeng-angkwarz-anem apetyal!"

<sup>22</sup> Artwa man-akert ra iterrek man-then ampwal-rnem-then ingkerrenh ra menty impen anterrkwetyek. Artwa ra amperngrirrek, "Nthakenh-angkwarz ayeng iteth intem-antey aneyenh, man akngerr-akert, ampwal akngerr-akert?"

<sup>23</sup> Jesus-el kwertengerl ikwerenhn-rnem ilek, "Man-areny ilenh-rneman rernem Akngey-angkwarz anetyek arrangkwarl. Rernem manantarl apentyeyel." <sup>24</sup> Kwertengerl ikwerenhn-rnem ywarn iterrek. Rerneman iterrehn Akngeyelang man akngerran man-areny ilenh-rnem anhentyek-athen. <sup>25</sup> Jesus angkek, "Kamwerlan neyl altywer akely-angkwarzan nthakenh aylpenhey-angenh, arrangkwarl. Kamwerlan altywer akely-angkwarz aylpey-angenh-apeny, man akngerr-akert-rneman Akngeyel nthakenh anyentiley-angenh ikwerenhn-rnem-warl."

<sup>26</sup> Kwertengerl ikwerenhn-rnem ywarn iterrek. Rernem renh ayernek, "Ilek-apeny-rneman Akngeyel ikwerenhn-rnem-warl anyentileyek?"

<sup>27</sup> Jesus angkek, "Akngey rantarl iterl-areyel ikwerenhn-rnem-warl anyentileyek, ahern-arenyel-rnem iterl-areyeng arrangkw."

<sup>28</sup> Peter-el renh ilek, "Anwernantherr-alew? Kwertengerl anwernantherran ampwal-rnem menty-anem ipmek, ngenhant-anem apentyeyel. Akngeyel anwernantherr anyentilem, ikwerenhn-rnem-warl?"

<sup>29-30</sup> Jesus-el renh-rnem ilek, "Artwa anyentarl alhem, angka atyehn-akert ikwerenhn-rnem iwerl-alhemel, angka Akngey-kenh ingwer-rnem ilerl-alpetyek, Akngeyel renh

aleth-antey arntarnt-arem. Artwa ra alhentyelan, ahern ikwerenharlap ra iwerl-alheman, ikwerenh-rnem-then, warl ikwerenh-then, Akngeyel renh arntarnt-areyenh, intem-antey. Akngey ra ingwer-rnem renh anthem ilkwatherr, warl ingwer-rnem-then. Apmwernem arrkernelherl-aneyenh, apmwangkwarz apentetyek-arrpantey, rernem-anem arkarirremel atweyenh. Ra iteth intem-antey aneyenh.<sup>31</sup> Akngerr ilkelheyel Akngey-angkwarz apentetyek. Akngerr ilkelheyel Atyetyart arrwekel anetyek, warrkenh iylpareth-rnem-they. Rernem ingkern-they apetyeyenh, warrkenh iylpareth-rnem-warl.”

*Jesus ilelheyel kwertengerl ikwerenh-rnemek  
(Matthew 20:17-19; Luke 18:31-34)*

<sup>32</sup> Jesus kwertengerl ikwerenh-rnem-akert Jerusalem-warl alhek. Kwertengerl ikwerenh-rnemel renh apentek. Akngerrelan renh-rnem apentek ingkern-theyarl. Rernem aterirrek, ingwer-rnemel Jesus renh atwekerr apmer Jerusalem-itwek. Jesus arlek kwertengerl ikwerenh-rnemek, rernem rtnetyek.<sup>33</sup> Ra ilelhek kwertengerl ikwerenh-rnemek, “Awelhenherr-arey atyeng! Rlengk apmer Jerusalem-warl anwantherr alhem. Ayeng Akngey-kenh Artwa Impen. Anwantherarl Jerusalem-el aney-alhem. Ahelengkw-rnemel ayenh anterrkweyenh ikwer-anem. Ayenh rernem akngeyeyen, atyetyart tyat-arey ilkwernem-warl, atyetyart ilkwa Moses-kenh angka akyl-anthenh-anthenh-rnem-warl. Rernem ayenh ahayiwetyek, alethang ahelengkw-rnem-warl, rernem ayenh ipmek atwepy-alenty.<sup>34</sup> Rernem ayenh irrwaremel whip-el-tangkwel atweyenh, ayenh rernem ipmek atwepy-alenty. Ingwa atherr-penh ayeng ipmepenit ethirreyenh.”

*James-then John-then ratherr Jesus renh ayerneyel  
(Matthew 20:20-28)*

<sup>35</sup> Artwamp Zebedee-kenh alerikw-atherr, James-akerr, John-akerr. Ratherr Jesus renh ayernek, “Ingkartay, aytern ngenh ayernetyek apetyek.”

<sup>36</sup> Jesus-el renh-atherr ayernek, “Ya, ilekekay?”

<sup>37</sup> Ratherr renh ayernek, “Nga Atyetyart ilkwa aneyenh, kwertengerl ngkwenh-atherr, aytern apekanap Atyetyart ilkwa arrpemarl aneyenh, ngay? Ntwan ayternen arratyantey ilay.”

<sup>38</sup> Jesus-el renh-atherr ilek, “Mpwel atyeng mwarrantly awelhenherr-atherr. Ahelengkw-rnemel ayenh artewentyel irrwampetyek atweyenh. Mpwel-alew? Ahelengkw-rnemel mpwelenh artewentyel irrwampetyek atweyenh arrpemarl?”

<sup>39</sup> Ratherr ilelhek Jesus ikwer-warl, “Ya, menty ahelengkw-rnemel ayternen irrwampetyek atwepy!”<sup>40</sup> Jesus-el renh-atherr ilek, “Inpa, athan iterl-arey-angenharl. Akngeyelantarl iterl-areyel, angwenharl ingweran Atyetyart ilkwa atyeng-apeny aneyenh, atyetyart ilkwan ingkerrenhek aneyenh, ayeng-apeny.”

<sup>41</sup> Kwertengerl ingwer-rnem kwertengerl ikwer-atherr arlkarirek ratherrarl Atyetyart ilkwa anetyek arlkwentek, Jesus-apeny.<sup>42-43</sup> Kwertengerl ikwerenh-rnem Jesus ra ilek, “Atyetyart ilkwernem apmer arrpanenh aneyel-rnem-apeny-wenyarl arrantherr mwarrant-arey anenherr-arey. Rernem atyetyart awerr ingkerr. Ingwer atyenh-rnem Atyetyart ilkwa anem, mwerr-angkwarz ingkerrenh arntarnt-aretyek.<sup>44</sup> Arrantherr Atyetyart ilkwa anem, arrantherr renh-rnem arntarnt-aretyek, warrkenh iylpareth awelheyel-apeny.<sup>45</sup> Akngey-kenh Artwa Impen anyent kel apetyek ahern nhenh-warl, ingkerrenh mwerr-angkwarz arntarnt-aretyek iylparethel, warrkenh-rnem iylpareth awelheyel-apeny.”

*Jesus-el artwa aparrng renh mwerrileyel  
(Matthew 20:29-34; Luke 18:35-43)*

<sup>46</sup> Jesus kwertengerl ikwerenh-rnem-akert apmer Jericho-warl alhek. Akngerrel renh-rnem apentek. Artwa aparrng Bartimaeus, Timaeus-kenh alerikw iwerr impalthelel anenh. Rap ingwer-rnem ayerneyam-aynten renh-rnem ngkweltyek arlkarewemel.

<sup>47</sup> Ra awek ingwerentyelarl renh ilek, “Jesus Nazareth-arey apetyem nhangkwarr kwertengerl ikwerenh-rnem-akert.” Artwa aparrng arlek Jesus ikwer, “Jesus, David-kenh alerikw, atyeng amperrngirral!”<sup>48</sup> Akngerrel artwa aparrng renh ilek, “Akater ana! Jesus renh arlkareweyang!” Aparrng artewentyel arlek Jesus ikwer arrpemarl, “Artwa David-kenh! Annga ayenh mwerrila, atha aretyek!”

<sup>49</sup> Jesus rtnek, artwa ingwer-rnemek angkemel, “Atnwenhey-alhenherr-arey atyeng-warl, artwa aparrng ilenh!” Rernem artwa aparrng renh ilek, “Aterirrey-angen, Jesus ikwer-warl apetya!”<sup>50</sup> Artwa aparrng kwet ikwerenh iwemel, Jesus ikwer-warl atnarnpenhek, inkwerelhemel.

<sup>51</sup> Jesus-el renh ayernek, "Nthakenh atha ngenh ilem?" Artwa aparrng Jesus-warl angkek, "Ingkartay, annga ayen mwerilla, aremel arrpemarl ayeng anetyek!"

<sup>52</sup> Jesus-el artwa renh ilek, "Kel, ntwa ayen iterl-areyel, ayengan mwerriley-angker. Kel ntwa mwerr arleng aremel-anem nga anem." Artwa aparrng kel mwerr arleng aremel-anem, Jesus-anem apentek.

## 11

*Jesus apmer Jerusalem-warl alheyel  
(Matthew 21:1-11; Luke 19:28-40; John 12:12-19)*

<sup>1</sup> Jesus kwertengerl ikwerenhnem-akert alhek apmer atherr-warl, itnan apmer ratherr Bethany, Bethphage. Apmer Jerusalem-they apmer ratherr arrer-antey, Apwert Alip-arrangarr. <sup>2</sup> Jesus-el kwertengerl ikwerenhnem-atherr thwenek, ratherr arrwekel alhetyek, "Mpwelanthan alhenherr-atherr tawen-warl. Mpwelanthap tangkey ateralth rwep lhelhennherr-atherr arwerl-itwek atyeng-warl ayteng-akngey-alpenherr-atherr. <sup>3</sup> Ingwerentyel mpwelanhay ayernenty, 'Ilekek mpwelanth rwep lhelhelye?' Mpwelanth ilenherr-atherr, 'Ingkart-kenh aylernanth. Ingkartel angkep arrpemarl ngenh anthenhey-alpem.'

<sup>4</sup> Ratherr alhek apmer ikwer-warl, ratherr arey-alhek tangkey Jesus-elarl ilek-angkwarr-antey. Ratherr rwep renh lhelhennh. <sup>5</sup> Ingwer-nremel renh-atherr ayernek, "Ilekek mpwelanth tangkey lheleyel?" <sup>6</sup> Ratherr renh-nrem ilek Jesus-elarl renh-atherr ilek-angkwarr. Rernem artwa renh-atherr tyarlewek, ratherr tangkey renh atyeng-akngeyneyek.

<sup>7</sup> Ratherr ayteng-akngeynek tangkey Jesus-warl. Ratherr arnkwa tangkey artep-warl arrernek. Jesus tangkey-warl nganek. <sup>8</sup> Akngerrel arnkwa ahern-warl panty iweynek, tangkey alhetyek ikwer-angkwarr Jesus-akert. Ingwerel-nrem alperrarl akek. Rernem ayattheweynekyek tangkey Jesus-akert ra alhetyek panty-angkwarr. Tangkey alhek panty-angkwarr Jesus-akert.

<sup>9-10</sup> Artwa akngerrel Jesus renh apentek. Ingkerrenh ikwer inkwerelhek arrwekel-warl alhenhnem-then, ingkern-theyarl alhenhnem-then. Rernem Jesus-ek inkwerelhemel arlek, "Akngeyel artwa nhanyem anwekantherr-warl thwenek. Anwantherr Atyetyart ilkwel inkwerelhey, Akngeyelarl renh thwenek anwekantherr-warl. Akngeyel renh arntarnt-areyel, ra Atyetyart ilkwa ingkerrenhek aneyel, David-arl anenh-apeny aneyel."

<sup>11</sup> Jesus alhek apmer Jerusalem-warl. Kel ra tyaty ilkwa Jew-nrem-kenh-warl aylpenhey-alhek, ra tyaty ilkwa renh arwa aretyek. Atwerrp-anem, Jesus apmer Bethany-warl anperl-alhek, kwertengerl ikwerenhnem-akert.

*Jesus-el arwerl renh ileyel  
(Matthew 21:18-19)*

<sup>12</sup> Ingwepen Jesus Bethany-they anperl-alhek apmer Jerusalem-warl, kwertengerl ikwerenhnem-akert. Ra angayakw-anem irrek ampepel. <sup>13</sup> Arleng-they, ra arwerl tywerk arek. Ra alhek arrer-warl amernek aretyek. Amern aney-angenh arrangkw-antey ra arek. <sup>14</sup> Jesus-el arwerl renh ilek kwertengerl ikwerenhnem-akert, "Arwerl nhopenh nthakenh ingwerentyel amern arlkwey-angenharl intem-antey!" Kwertengerl ikwerenhnem renh awek, rarl alakenh angkenh.

*Jesus Jew-nrem-kenh tyaty ilkwewarl alheyel  
(Matthew 21:12-17; Luke 19:45-48; John 2:13-22)*

<sup>15</sup> Jesus kwertengerl ikwerenhnem-akert Jerusalem-warl alhek. Jew-nrem-kenh tyaty ilkwitwek weker-nremel aker tharlemilenh, store-arrpantey. Jesus ra arek ingwerel-nremarl aker tharlemilenh, ra ingkerrenh-antey renh-nrem irrentek, taypel-nrem iwemel, ampwal ngkwletyek-arelh-nrem-then. Ingwerel-nrem aker thiaparl tharlemilenh, Jesus-el renh-nrem aker ingkerrenh irrentek. <sup>16</sup> Jesus arrkngert angkek ikwer-nrem, "Warl nhenh-angkwarr nthakenh aker akngey-angenh." <sup>17</sup> Ra renh-nrem ingkerrenh akalty-anthek, "Akngay-kenh angka warl nhel aynteyel ingkerrenh apmer arrpanenh-they akarrireteyek warl nhenh-warl, Akngeyek inkwerelhemel. Irrtyert awarr-rnemantarl apmer nhenh-warlan arrantherr arrernek!"

<sup>18</sup> Atyetyart Jew-nrem-kenh tyaty ilkwernem-then Moses-kenh angkakert-rnem-then, rernem awek Jesus-kenh angka. Rernem angkerrenh Jesus ikwer, renh atwetyek. Atyetyart rerneman aterirrek ingwer-nrem-kety, renh anterrkwey-angenh-antey, akngerr rernem Jesus ikwer inkwerelhek-kety.

<sup>19</sup> Atwerrp, Jesus kwertengerl ikwerenhnem-akert alhek apmer Jerusalem-they akwerr-warl.

*Arwerl tywerrk arlenyirrek rernem arey-alheyel*  
*(Matthew 21:20-22)*

<sup>20</sup> Ingwepenh-antey, arwerl tywerrk arlenyirrekarl rernem arey-alhek, Jesus-elarl arwerl tywerrk renharl ilek-penh. <sup>21</sup> Peter-el arwerl tywerrk renh alhengk-arek, angkemel, “Ingkartay, ngarl weth arwerl tywerrk nhek akengenty angkek, ra arleny-anem irrek.”

<sup>22</sup> Jesus-el kwertengerl ikwerenhan-nem ilek, “Anwantherr inkwerelhetyek Akngeyek, ikwer irrpelthirrey-angenh. <sup>23-24</sup> Arrantherr areyel apwert ilenharl altyweneyel? Arrantherr apwert ilenh ilenty, ra alpetyek kwaty ampep-warl, ra inngarl awelhemel kwaty ampep-warl arrernelhem. Apwert ilenhan arrekantherr awelhemel kwaty ampep-warl arrernelhem-apeny, Akngeyan arrekantherr awelhem, alakenh-anyem.

<sup>25</sup> Arrantherr Akngey ayernetyek, arrantherr mwarrant-arey-anem anemer. Arrantherr ingkerrenh mwarrant-arey-anem anetyek, Akngeyan anwekantherr ingkerrenhek inkwerelhem, apmwa ingkerrenh-kety, arrekantherret Akngeyel iwem.”

*Atyetyart ilkwerinemel Jesus renh ayerneyel*  
*(Matthew 21:23-27; Luke 20:1-8)*

<sup>27</sup> Jesus kwertengerl ikwerenhan-nem-akert Jew-rnem-kenh tyaty ilkwewarl aylpenhek, apmer Jerusalem-itwem. Moses-kenh akalty-anthenh-anthenh-rnem-then, atyetyart ikwer-arey-rnem-then Jesus ikwer-warl apetyek. <sup>28</sup> Artwa rernem Jesus renh ayernek, “Angwenhelarl ngenhan thwenek, ingkerrenh mwerr-angkwar akaltyiletyek, arntety-rnem mwerriletyek?”

<sup>29</sup> Jesus-el renh-rnem ilek, “Atha arrenhantherr-anem ayerney, arrantherr atyeng-anem arrayt ietyek. Atyengarl arrantherr arrayt ilem, atha arrekantherr ietyek, angwenhelarl ayenhan thwenek. <sup>30</sup> Angwenhelarl John Baptise-emeley-angker thwenek ahern nhenh-warl, ingkerrenh kwatye baptise-emeleyek? Akngeyel apek? Ahern-arenyel apek?”

<sup>31</sup> Rernem angkerrenh, “Nthakenh anwantherr Jesus renh iley-angen, Akngeyel John renharl thwenek ahern nhenh-warl, anwenhantherr Jesus-elarl arrayt ilekerr, anwantherr John ikwer awelheyangarl, akengentyarl John ikwer irrpelthirrenh, renharl Akngeyel thwenek inngarl ahern nhewarl. <sup>32</sup> Nthakenharl anwantherr iley-angenhan Atyetyart ahern-arenyelarl John anwekantherr-warl thwenek, ingwer-rnemarl anwekantherr ahelirrek, rerneman iterl-areyel Akngeyel John renh thwenekarl.” <sup>33</sup> Rernem Jesus ikwer-warl angkek, “Inpa, iterl-arey-angen angwenhelarl John renh thwenek, ahern nhewarl.” Atyetyart ilkwerinem apatemel, akater-anem rtnenherrenh. Jesus angkek ikwer-rnemek, “Arrantherr ayen tyerneyang-kety, nthakenh atha arrekantherr iley-angen, angwenhelarl ayen thwenek ahern nhewarl.”

## 12

*Apmer amern grapes-angketyarr*  
*(Matthew 21:33-46; Luke 20:9-19)*

<sup>1</sup> Jesus-el renh-rnem akalty-anthemel ilek, “Artwa Atyetyart amern grapes lyapelhilenh-ilenh. Artwa anyentel grapes ntang iweyn-ayntetyek, amern lyapetyek, parrik-anem arteynemel, amern grapes lyapetyek parrikel kwen, warl arlpenty-anem artemel, artwa anyentel ikwer-warl nganetyek, irrwerl-they arayntetyek, amern ingwerentyel inekerr. Irrkanem kwen angernemel, amern grapes renh lthwetyek, ingketyel-anem lthwemel amern grapes-penh akarr areyirretyek. Atyetyartel warrkenh-rnem arrernekk amern grapes arntart-arayntetyek, ra apmer ingwer-warl alhey-kety.

<sup>2</sup> Amern grapes ampeng awaketyek artwa Atyetyart ikwer. Amern grapes arntart-arenh-arenhle warrkenh ikwerenrh ra thwenek ra anthetyek amern grapes artwa Atyetyart renh, ament arrpemarl. Amern grapes renh artwa warrkenh anyentel ra amern grapes ra arlperryilemel anthek artwa ingkerrenhek. Atyetyart anyent ra thwenek artwa warrkenh ikwerenrh amern grapes inetyek. <sup>3</sup> Rernem artwa warrkenh renh atwek amern grapes-angketyarr-they irrentemel, amern grapes-they alharkwek.

<sup>4</sup> Artwa warrkenh Atyetyart ikwerenrh-warl apetyek, grapes-weny. Atyetyart ra warrkenh ingwer-anemarl thwenek, amern grapes ikwerenrh renh inetyek. Rernem artwa warrkenh ingwer-anemarl irrentemel akapwert atwek. Ra Atyetyart ikwerenrh-warl amern grapes-weny arrangkw-antey apek. <sup>5</sup> Atyetyartel warrkenh ingwer-anemarl thwenek, amern grapes ikwerenrh inetyek. Rernem warrkenh ingwer-anemarl ipmek atwek. Anyentarl-anyentarl Atyetyartel warrkenh ikwerenrh-rnem amern grapes-angketyarr-warl thwenenh, amern grapes inetyek. Rernem warrkenh ingwer-anemarl atwek, ingwer-rneman ipmekarl atwek.

<sup>6</sup> Atyetyart ikwerenhanerikw anyentant-anem aneyelpek. Atyetyart ra iterrek, ‘Artwa aler anyent atyenh atha thweney, rernem apek nyerrirremel, amern grapes atyenh anthetyek.’ Atyetyart ra alerikw ikwerenhanerikw thwenek, amern grapes inetyek. <sup>7</sup> Rernem arnarek, atyetyart ikwerenhanemarl alerikw apetyeyel amern grapes inerlalpetyek. Rernem angkerrenh, ‘Ay, atyetyart alkenh ikwerenhanerikw-anem apetyeyel, aynikw ikwerenhan ilwenty-ketyan ranemarl apmerek-artwey amern grapes-ek Atyetyart aneyenhan!’ Amern grapes-angketyar-they alharlkwelhek, rernem apmer renh grapes-angketyar-they. Atyetyart aney-kety. <sup>8</sup> Rernem alerikw renh ipmek atwek, arrewaly renh iwenel parrik-they akwerr-warl.

<sup>9</sup> Atyetyart ra apey-alpentyelan, warrkenh amern grapes-angketyarrel aneyel-rnem, renh-rnem ingkerrenh atwetyek, warrkenh ingwer-rnem-anemarl arrernemel, amern grapes-angketyarrek, rernem amern grapes mwantyel arntarnt-arayntetyek.”

**Anayntileyl:** *Jesus-el angka ingwer-anem ikwer-rnem ilek, Akngey ran atyetyart grapes-angketyarrek-artwey-apeny. Ran atyetyart innarl Jew-rnem-kenh. Akngeyel angkakert-rnem awank-akerr thwenek. Rernem angkakert ikwer-rnem awelhey-angenh. Rernem renh-rnem atwenhant. Ingkern-theyl ra alerikw ikwerenhanerikw ikwer-rnem-warl. Rernem renh ipmek atwek arrpemarl.*

<sup>10-11</sup> Jesus-el renh-rnem ingkerrenh ilek, “Arrantherr Akngey-kenh angka weth iterlaremer. Arwerl arpenty ingwerel iwem apmwek-athen. Arwerl ran mwerr-angkerarl ilenhey, Akngeyel warl artek arwerl-penh. Anwantherr apatenty-kety, Akngeyel anwekantherr mwerr-angkwarr warl arteyek. Ayeng arwerl arpenty impen wethapeny. Akngeyel aynenhanerikw aneyelpek. Atyetyart ingkerrenhek aneyek. Akngey atyeng inkwerelheyel. Ingwer-rnem atyeng inkwerelheyel arrpemarl.”

**Anayntileyl:** *Jesus angka nhenh-anem ikwer-rnem ilek, rernem arraty iterl-arayntetyek. Alakenh-anyem ilelhek ikwer-rnem, “Jew-rnemel aynen iwerl-alhek, arwerl apmwapeny-arrpantey. Rernem aynen ipmek atweyenhan.” Jesus ran arwerl impen mwerr-angker weth-apeny, ingkerrenh ikwer inkwerelh-ayntetyek.*

<sup>12</sup> Artwa ilkwerenem Jew-rnem-kenh rernem iterrek, “Jesus anwekantherr angkeyel, anwantherr artwa warrkenh apmwerenem ilenhan-rnem-apeny irrekerr.” Rernem iterrek Jesus renh anterrkwetyek, rernemap iterrek artwa ingwer-rnem-ketyarl, menty-anem.

*Man kapmentek anthetyek  
(Matthew 22:15-22; Luke 20:20-26)*

<sup>13</sup> Pharisee-el-rnem-then Atyetyart Herod-el-rnem-then rernem artwa ingwer-rnem thwenek, rernem Jesus renh ayernetyek, ra Atyetyart ilkwerenemek akengenty angkentyek. Ra akengenty angkenty, rernem renh ingwer-ingerant anterrkwetyek. <sup>14</sup> Artwa anyent Jesus-warl angkek, “Anwernantherr ngenh iterl-areyel, ntwa Angka Akngey-kenh arraty ileyel. Nthakenh nga iterreyel, anwantherr kapment ilkwerenem man anthetyek?” <sup>15</sup> Jesus ra iterl-arek, rernemarl ikwer irritywerremel angkerrenh arraty-angkwarr-arrpantey Ra renh-rnem ilek, “Arrantherr aynenhanerikw, ayeng arrekantherr akengenty angketyek. Ngkwelty atyeng akngetya, atha aretyek!”

<sup>16</sup> Rernem ngkwelty anyent renh anthek. Jesus angkek, “Angwenharl innngerr-akertan nhenhan?” Rernem ikwer ilek, “Caesar, atyetyart ilkwarlap ran nhenhey!”

<sup>17</sup> Jesus-el renh-rnem ilek, “Man-areny-rnemelarl arrenhantherr manek ayernenty, arrantherr man renh-rnem anthenherr-arey, rernem-anem Atyetyart Caesar man renh anthetyek. Akngey-kenh warrk-rnemel man ineynam, arrantherr ingkerrenhel arrernemel arrpemarl, Akngey ikwer-anem rernem man renh arrernetyek.” Rernem Jesus renh awemel, rernem apateyelpek.

*Rernem ipmepenh itethirreyenhan  
(Matthew 22:23-33; Luke 20:27-40)*

<sup>18</sup> Artwa Sadducee-rnem Jesus ikwer-warl apetyek, renh ayernetyek. Sadducee-rnem iterrenh, arrewaly intem-antey ilwem, ra nthakenh ipmepenh akwentyang-angenh.

<sup>19</sup> Rernem Jesus ikwer angkek, “Moses-el angka anwenhantherr anthek, arelh impertirrenty, aytteyikw ranemarl arelh ikwer-warl itengirretyek ikwer-atherrenh-anemarl, ampa ingwer-anem aneyek. <sup>20-21</sup> Anew ikwerenhek arelh anyent ran impertirrek ampeweny-anteyarl, ra aytteyikw ikwerenhanerikw itengirretyek arrpemarl. Aytteyikw-rnem 6 ilenhan-rnem arelh anyent ikwer-itwel-antey, rernem ingkerrenh anyentarl-anyentarl itengirretyek, arrewaly ingwer iylpelerlewenty, awayikw ingwer-itwel itengirremel, ra

ampeweny arrangkw arrpemarl. Artwa anyent aytay aynek itengirrek, arelh ikweritwel-antey. <sup>22</sup> Artwa ranem ilwek, ampeweny-antey, arelh anyent ikwerenamp aikwer-atherrenh aney-angenh-antey.” <sup>23</sup> Sadducee-el-rnem Jesus renh ayernek, “Artwa rernem ipmepen akmirrenty, artwa angwenharlap arelh ikwerenhh inngan?”

<sup>24</sup> Jesus-el renh-rnem ilek, “Arrantherr apmwel-areth iterreyel Akngey-kenh angka arrantherr iterl-arey-angenh. Arrantherr Akngey iterl-arey-angenh-antey, Akngeyan rlterrk ilkawekartari aneyel. <sup>25</sup> Rernem ingkerrenh itethirremel alpeyen Akngey-kenh apmer-warl, rernem aney-alpeyen intem-antey, arelh-itwel itengirrey-angenh, irrwerl-areny-rnem-apeny. <sup>26</sup> Akngeyel arrwekel-antey renh-rnem ilek, rernem angkeparl itethirreyenh, ipmepen. Arrantherr angka ilenh iterl-arey-areny, angka ilenhian Akngey-kenh pipel arraty inngarl ileyel, arwerl wethelarl lherrm ampenh-apeny. Akngeyel Moses renh ilek, ‘Ayeng ngkwenhek-rnem ingkerrenhek Atyetyart aneyen, Abraham-ek, Isaac-ek, Jacob-ek.’ <sup>27</sup> Rernem iteth-antey aneyarr-alpek Akngey-kenh apmerel irrwerl, Abraham-akerr, Isaac-akerr, Jacob-akerr. Arrantherran apmwel-aretharl iterreyel intem iltwentyek-arrpantey. Rernem ipmepen itethirremel ingkerrenh alpek Akngey-itwel aney-alpek, intem-antey. Alakenh-anyem, anwantherrarl ilwem, Akngeyel anenhantherrenh angkep arrpemarl itethilem, anwantherrap apmer ikwerenhh-warl irrwerl alpem, ra arrenhantherr arntarnt-arayntetyek apmer ikwerenhh-itwel intem-antey.”

*Angka impen atherr Ingkart-kenh  
(Matthew 22:34-40; Luke 10:25-28)*

<sup>28</sup> Artwa anyentan Jesus-kenh angkek mwantyel awelhenh inkwerelhemel. Ra angkek, “Moses-el angka akngerr anwenhantherr anthek. Ilekek angka Atyetyart inngan, anwantherr renh apentetyek?”

<sup>29</sup> Jesus angkek, “Angka Akngey-kenh impenan nhanyeman-angkwarral atha ileyel, ‘Israel-kenh-rnemay, arrantherr atyeng awelhenherr-arey! Akngey anyent impen aneyel. Ingwer ikwer-apeny aney-angenh arrangkw, rant anyent aneyel. <sup>30</sup> Anyent renhant ingkerrenhel apentetyek, anyent ikwerant ingkerrenh iterretyek.’ Angka nhanyem impen. <sup>31</sup> Akngey-kenh angka ingweran alakenh aytteyel, ‘Arrantherr ingwer-rem arntarnt-aretyek, ampa arrekantherrenh arrantherr arntarnt-areyel-apeny.’”

<sup>32</sup> Artwa Moses-kenh anyent, ra Jesus-ek inkwerelhek, rarl angka arraty-angkwarr illelhek. Ra angkek, “Ntwa arraty-angkwarr ingkerrenhek ileyel, Akngey anyent impen aneyel ingkerrenhek anwekantherr, ingwer ikwer-apeny aney-angenh arrangkw. <sup>33</sup> Amern tyenkerr anwantherr Jew-rnemel anthem Akngey renh. Anwantherr Akngey-kenh angka ilenh-angkwarr anwernantherr apentetyek, amern tyenkerr Akngey-angkwarr anthey. Arraty-ayteng anwantherr ingkerrenh arntarnt-arem, ampa anwekantherrenh anwantherr arntarnt-areyel-apeny ntwarl anwenhantherr ilenh-angkwarr. Akngey-kenh impen apentetyek-ayteng.”

<sup>34</sup> Artwa anyent rarl angkek arraty, Jesus-el renh ilek, “Nga Akngey-kenh-apenyarl aneyel.” Kel ingwer-rnem akatek, Jesus renh ayerney-angenh.

*Artwa David-kenh  
(Matthew 22:41-46; Luke 20:41-44)*

<sup>35</sup> Jew-rnem-kenh tyaty ilkwitwek, Jesus-el intem-antey renh-rnem akalytylek. Jesus-el renh-rnem ilek, “Moses-kenh-rnem nthakenh ileyel David-kenh artwa Christ inngan?”

<sup>36</sup> Akngey-kenh Itnwengel ikwer lwewarrernek. David-el ilek, ‘Akngeyel Christ, atyetyart atyeny renh ilek, aylermanh anyent-apeny aneyel.’ Akngeyel renh ilek, ‘Ingwerentyl arlkirreyel-rnem, atha ingkerrenh renh-rnem menty ipmem.’

<sup>37</sup> David-el Christ renh itnewek, ‘Atyetyart atyeny.’ Ayeng Christ Atyetyart ilkwa inngan Akngey-kenh rlterrk inngakertel. Ayengan David-kenh artwa arrpemarl, atyetyart ilkwa David-angkwarr.” Jesus renh awemel, rernem ingkerrenh inkwerelhek.

<sup>38</sup> Jesus angkek, “Mwantyel arntarnt-arelenherr-arey Moses-kenh angkakert ilenh-rnem-kety, kwet arlpenty-akert-rnem-kety, rernemarl ileng tawenel tnakelherl-apeyel-kety, rernem arrenhantherr ilpertilelhekerr. <sup>39</sup> Rernem warl kwenel Jew-rnem angkerreyel-warl alheyl, rernemant arrwekel-warl arrerhelheyel arrngelelem ingwer-rnem-kety, rernemant tnakelhetyek. Ingkerrenhel inkwerelhemel amern arlkwetyek, rernemant arrwekel-warl arrernellhetyek arrngelelem ingwer-rnem-kety, rernemant tnakelhetyek. <sup>40</sup> Rernemant warl-rneman arrngeleyel inpert-rnem-ketyan. Rernem Akngey-warl irrywerremel angka ilemel-arrpantey. Akngerr-inger, Akngeyel Moses-kenh angkakert-rnem iltem.”

*Arehl invertelan ngkwelty ikwerenrh ingkerrenh arrerneyel  
(Luke 21:1-4)*

<sup>41</sup> Jesus-an anenh tyaty Jew-rnem-kenhel kwen arrerenty, Jew-rnemarl Akngayek inkwerelhemel angkerrenhel. Ran arenh akngerr, rernemarl ngkwelty ampwal manek-arelh-warl arrernenh. Ingwer-rnemelan man akngerr-akert-rnemelan apetyek tyenkerr man akngerrarl arrernekk. <sup>42</sup> Arelh invert-anem apetyek, rap ngkwelty akely atherrant arrernekk.

<sup>43</sup> Jesus-an angkek kwertengerl ikwerenrh-nemek, “Apetyenrh-arey. Atha angka arraty arrekantherr iletyek. Arelh invertelan ngkwelty akely atherrh arrernekk, Akngayekan ra akngerrarl. Ingwer-rnemelan akngerr arrernekk, Akngayekan ra akelyarl. <sup>44</sup> Man akngerr-akert-rnemelan amern ikwer-rnem-kenh inek-penh ngkwelty akngerrarl akngey-alpek. Arelh invertelan ingkerrenharrl arrernekk. Arrangkw-anem ra aneyel, amern iney-angen.”

## 13

*Ingwerel-rnem tyaty ilkwa atakeyenh  
(Matthew 24:1-2; Luke 21:5-6)*

<sup>1</sup> Jesus-el arek tyaty ilkwarl Jew-rnem-kenh, kwertengerl ikwerenrh-nem-akertel. Rernem Jew-rnem-kenh tyaty ilkwewarl aylpenhek. Rernemap tyerrelhek tyaty ikwer-they, rernem arek inkwerelhemel. Kwertengerl anyent ikwerenrh Jesus-ek angkek, “Tyaty ilkwa mwerr-angkerarl artek nhanyeman.”

<sup>2</sup> Jesus angkek, “Ingwer-ingeran ingwerel-rnem atakem-anem, tyaty ilkwa yanh akwarrkirremel, ngkweltyirretyek.”

*Rernem atwerreyenh  
(Matthew 24:3-14; Luke 21:7-19)*

<sup>3</sup> Rernem Apwert Alip-warl nganek. Rernem ament rtnenherrenh, Peter-akerr, James-akerr, Andrew-akerr John-akerr. Jesus-anem rernem ayernek, <sup>4</sup> “Ilengerarl ingwerel-rnem tyaty ilkwa ilenh atakeyenh, akwarkirremel ngkweltyirretyek? Ngarl Akngay-kenh apmer-warl alpenty-penhan, angwenhelarl anwernekantherr ileman ngarl ahern nhewarl apey-alpeyenh arrpemarl?”

<sup>5</sup> Jesus-el renh-rnem ilek, “Mwantyel arntarnt-arellenherr-arey, ingwer apetyemarl, arrenhantherr ingwer-angkwarrarl ilekerr. Mwantyel awelheyek ikwer. <sup>6</sup> Apmwa ahern-areyng ingkerrenh akngerr arlpimpirreyenh ahern nhel arrekantherr-warl, arrenhantherr irrywerremel iletyek, ‘Ayeng Akngayel wetharl awank-akerr alhelek, ayeng nhanyem-anem apetyek arrekantherr-warl.’ Akngerr ingwer-rnemel apentemarl angka Atyetyart ilenh-kenh-angkwarr.

<sup>7</sup> Ingwer-rnemel atwerreyel-kety arrantherr aterirrey-angenh anetyek. Ahern-then alker-then ywerreyenh. Aparnpa apmer arpanenh ahel atwerreyenh. Aparnpa apmer arpanenh ingkerrenh ahel atwerreyenh ahern-then alker-then ywerrey-alenty. <sup>8</sup> Apmer ingwer-areny-rnem-then ahel atwerreyenh. Apmer ingwer-areny-rnem atwerl-apem apmer ingwerek. Ahern nharl akngelheyenhel, ingkerrenh warl-rnem-then akngenerl-akngenghelhileyenh. Ingkerrenh apateyenh amern-wenye, apmer arpanenhel. Ingkerrenh arntety ilkwa aynteyenh apmer arpanenhel. Artwa apmwer nemel mwerr-rnem ingkerrenh atweyenh.”

<sup>9</sup> Jesus-el kwertengerl ikwerenrh-rnem ilek, “Mwantyel arntarnt-arellenherr-arey artwa apmwer nem-kety! Rernem arrenhantherr atweyenh warl Jew-rnemarl angkerrenh-itwek. Artwa apmwer nemel arrenhantherr akngayeh angka ilkwewarl Atyetyart-rnem-warl angketyek. Arrantherr angka atyeng-angkwarr ilemer. <sup>10</sup> Kwertengerl atyenh-rnem alheyeh apmer arpanenh-warl angka atyenh ilerl-aperytetyek ahern-then alker-then ywerrey-alenty.

<sup>11</sup> Atyetyart ilkwel arrenhantherr angka ilkwewarl arrernem, arrantherr ilelhetyek ikwer-warl. Arrantherr aterirrey-angenh angketyek Akngay-kenh Itnweng-akert. Akngay-kenh Itnwengel arrenhantherr akwerrng rliterrkilemel anthem, arrantherr arrayt iterl-aremel angketyek.

<sup>12</sup> Artwel-rnem atyeyikw ikwer-rnem-kenh ahayiwem, ahelegkw-rnemel renh-rnem atwetyek. Ingwer-rnemelan alerikw ikwer-rnem-kenh ahayiwem, ahelegkw-rnemel renh-rnem atwetyek. Ampel-rnem amey ikwer-rnem-kenh-then akngay ikwer-rnem-kenh-then ahayiwem, ahelegkw-rnemel renh-rnem atwetyek. <sup>13</sup> Akngerrel arrekantherrety arkarirreyel ayenharl apenteyel-kety. Arrantherr arrytenh-rnem ingkerrenh aneyenh, arrantherr intem-antey iteth aneyenh.”

*Artwa ahelengkw apmer Jerusalem-itwek aneyen*  
*(Matthew 24:15-21; Luke 21:20-24)*

<sup>14</sup> “Arlta ikwerel, ahelengkw Jew-kenn tyaty ilkwitwek aneyen. Arrantherrarl awem, tyaty ilkwa ikwerelarl Atyetyart ilkwa ra aneyen, arrantherr Judea-arenyrneman alhetyek, apwert-warlarl. <sup>15</sup> Arnkwek iterrey-angenh, arrantherr arwa apwert-warl anpenheyekant. <sup>16</sup> Kwetek angkep alpey-angenh, menty ra ayntey. <sup>17</sup> Ayeng amperngrirreyel arelh-rnemek, rernem ampa akely irrepern atnyeneyel-kety, ingwer-rneman thapelarl aneyel-kety ampa akely-rnem-akert. <sup>18</sup> Angwenhelarl arita anyent renhan iterl-areyel? Akngey rantarl iterl-areyelan, anwantherr iterl-arey-angenharl. Arrantherr renh ayerneyek, perayirremel, rwenpelant arla anyentan anwantherr atnyeneyek, irrerntel renh-rnem atwekerr, irrerntelhelekerr. <sup>19</sup> Arltta anyent ikwerel, artwa ingkerrenh arntetyirreyen, alakenh awank-akerr anwantherr arntety ilkwa atnyeney-angenh. Alakenh anwantherr arntety ilkwa atnyeney-angenh arppemarl, arntety ilkwa nhanyemarl anwantherr atnyenem-apeny. <sup>20</sup> Arrer-anem anwantherr mpwelhem arlaa irrpetyap-anem. Arltta irrpetyap-penh Akngeyel ikwerenh-rnem ingkerrenh arntarnt-areyeh.

<sup>21-22</sup> Arrantherr renh-rnem iylpelant awenherr-arey. Arrantherr ikwer-rnem awelhey-angenh, rernem irrtiywerremel arrenhantherr ileyel-kety. Akngerr arrekantherr-warl apetyem, arrenhantherr irrtiywerremel ileyek ilek-ilek mpwaretyek, renh Akngeyel thwennyty-arrpanetyek ahern nhewarl, Christ-apeny. Rernem alakenh ingkerrenh-warl illehem. Rernem alakenh ingkerrenh-warl illehem. Rernem apetyem, arrenhantherr arrkernetyek, arrantherr ikwer-rnem-angkwarr anetyek. Arrantherr iylpelant renh-rnem awetyek, arrenhantherr ilperteleyek arlenhan arrkernelheyel. Arrantherr renh-rnem iterl-arem, iylpelant awetyek. <sup>23</sup> Mwantyel arntarnt-arelhennherr-arey ikwer-rnem-kety, arrenhantherr ilperteleyek, athar arrenhantherr ileyel-angkwarr.”

*Artwa Akngey-kenh Impen aremirreyen rterrkk ilkwakert*  
*(Matthew 24:29-31; Luke 21:25-28)*

<sup>24-25</sup> “Arlta anyent ikwerel, akngerr arntety ilkvakert aneyen. Akngerr apmer arrpananhel atwerreyen. Ingkeny-then, alkent-then, antyarr-then rernem ingkerrenh akngelheyen, Christ anyent impen aremirrey-alenty. Ingkeny-then alkent-then ywer-reyeh. Antyarr ingkerrenh irrwerl-they aynteyen.

<sup>26</sup> Ingkerrenhel ayen arnareyeh, Artwa Impen anyent Akngey-kenh irrwerl-they apetyenty, rterrkk ilkwakert. <sup>27</sup> Ikwer-theyan, atha alker-areny-rnem thwenem, rernem alhetyek, apmer arrpanenh-warl, Akngey-kenh-rnem ingkerrenh akarilenhey-apyetyek.”

*Angka arwerl tywerrk-akert*  
*(Matthew 24:32-35; Luke 21:29-33)*

<sup>28-29</sup> “Arrantherr iterreherr-arey, arepampeyel akarley ampengirrentyel ngkweng ileyel aherrety ampep renh. Akarleyel ileyel-apeny aherrety ampep arrer-anem, ingkeny-then, alkent-then ratherr arrenhantherr ileyeh, ayeng alerl apey-alpeyeh arrekantherr-warl ahern nhewarl, ahern-then alker-then ywerrey-alenty. Alkent-then akngelhey-angenh, arlan aneyel anyentel-antey. <sup>30-31</sup> Arrantherr apmer nhelarl aneyel-rnem, arrantherr ingkerrenh ilweyeh, atha arrenhantherr inngarl ileyel. Angka atyenhan arraty inngarl aynteyel. Jerusalem-arenyel-rnem tyaty ilkwa Jew-rnem-kenn atakeyeh ngkweltyilemel, arrenhantherr-anem rernem ingkerrenh atweyeh. Innga atha arrenhantherr ileyel. Ahern-then alker-then ywerreyen. Angka atyen intem-antey aynteyeh.”

*Jesus ra apey-alpeyeh*  
*(Matthew 24:36-44)*

<sup>32</sup> “Anwantherr alker-areny-rnem-then iterl-areyang, ilenger ayeng apey-alpeyeh ahern nhenh-warl. Ingkart Akngey anyent rant iterl-areyel ilenger ayeng apey-alpeyeh ahern nhewarl. <sup>33</sup> Mwantyel-antey arntarnt-arelhennherr-arey! Arltta anyent ikwerel, anwantherr iterl-arey-angenh ilenger ayeng apetyem. <sup>34-36</sup> Atyetyart inwekel alhem-kety, ra warrkenh-rnem arrernerl-alhem, rernem apmer ikwerenh akarerlyntetyek. Warrkenh anyentel warl iwerr renh arntarnt-arem atyekel-antey, ingwer-rnem aylpenhey-alhekerr apmer-warl. Warrkenh-rnemel iterl-arey-angenh ilenger Atyetyart ra apey-alpeyeh, atwerrr apek, ingwa ampepel apek, ingwepenh apek. Atyek-antey mpwelhayntenherr-arey ayting! <sup>37</sup> Angka ilenh atha ileyel apmer arrpananhok, atyeng rernem intem mpwelhayntetyek.”

## 14

*Rernem angkerreyel Jesus renh anterrkwetyek, atwetyek  
(Matthew 26:1-5; Luke 22:1-2; John 11:45-53)*

<sup>1-2</sup> Jew-rnem akarirrenh, amern alerrkw arlkwetyek, Anperarl Alhek “Passover” tyenkerr atnyenetyek, Akngeyek inkwerlhemel. Arlt atherr-inger ayntek tyenkerr-anem arlkwey-alenty. Moses-kenh-rnem-then Atyetyart Jew-rnem-kenh-then, tyat�areny ilkwernem-then angkerrenh, Jesus renh anterrkwemel, renh ipmek atwetyek, “Alerl-antey ra anayntey, akngerry anwenhantherr atwekerr, ahelirremel ikwer-they.”

*Jesus apmer Bethany-itwel aneyel*

<sup>3</sup> Jesus apmer Bethany-itwel aneh, Simon-kenh warlel, kwertengerl ikwerenhnem-akert, Simon-arl aneh awank tywen-akert apmer ikwerenhel, ra mwerr-anem aleyan. Rernem aneh-itek, arelh anyentel anter mwerr-angker thelek, akapwert Jesus renh apernemel, arelh rarl anter renh payemelek man akngerr. <sup>4</sup> Ingwer-rnemel arek, anterel ra Jesus akapwert apernek. Rernem angkerrenh, “Ilek ra anter mwerran arimpeyel? <sup>5</sup> Ilek-ketyarl ra anwenhantherr anthey-angenh? Anwantherr tharlemiletyek, man akngerr inetyek, man-weny-rnem irrepern-rnem anthemel.”

<sup>6</sup> Jesus-el ilek, “Arrantherr ahelirreyang ikwer, mwerr-angkwarr ayenah anterel apernek. <sup>7</sup> Mwerr-angkwarr arrantherr man-weny-rnem arntarnit-arem. Aleth man-weny-rnem anayntem arrekantherr-itwel. Ayeng nthakenh aleth aney-angenh ahern nhel. Lyert arrantherr atyeng itterretyek. <sup>8</sup> Mareny-angkwarr arelh ra anterel apernek, ingwer-rnemel ayenah awenng-warl akwernetyek.” Jew-rnemel arrewaly anterel apernenh awenng-warl akwerney-alenty. <sup>9</sup> “Atyeh-rnem apmer arrpanenh-warl alhentyel, angka atyeh ilayntetyek, rernem ingwer-rnem ileyeh arelh anyentelarl ayenah anterel akapwert apernek mareny-angkwarr.”

*Judas Atyetyart-rnem-warl alheyel*

*(Matthew 26:14-16; Luke 22:3-6)*

<sup>10</sup> Kwertengerl anyent, Judas, apmer Iscariot-areny alhek Atyetyart ilkwa tyat�areny-rnem-warl Jesus renh ahayiwetyek, rernem Jesus renh anterrkwetyek, rernem renh ipmek atwetyek. “Atha arrenhantherr atwenhey Jesus-warl, arrantherr renh anterrkwetyek.” Artwa ilkwel-rnem Judas renh man alhelek. Judas ra ament-anem iterrek artwa ilkwa renh-rnem ra irryertel atnwenheteyk artwa akngerr-kety, Jesus kwertengerl ikwerenhnem-akertarl aneh-warl. <sup>11</sup> Atyetyart-rnem inkwerelhekk, angkarl rernem awek, rernem renh ilek man anthetyek, rarl Jesus ahayiwem ikwer-rnem-warl, rernem renh atwetyek. Judas iterrehn, artwa irrpetyap irrentyelant Atyetyart-rnem-warl Jesus renh ahayiwetyek, rernem renh anterrkwetyek, atwetyek.

*Jesus-el tyenkerr arlkweyel kwertengerl ikwerenhnem-akert*

*(Matthew 26:17-30; Luke 22:7-23; John 13:21-30)*

<sup>12</sup> Arlt impen anyent ikwerel, Jew-rnem akarirrek amern tyenkerr arlkwetyek. Rernem yep-yep akwerrk-rnem atwek, arlkwetyek. Jesus-kenh kwertengerl-rnem apetyek. Rernem renh ayernek, “Nthenh-itek anwantherr ingkerrenh akarirrem, anwantherr tyenkerr arlkwetyek?” <sup>13-14</sup> Jesus angkep kwertengerl ikweren-hatherrek, “Mpwelanth arey-alhenherr-atherr tawenek, artwa anyentel kwat�ar tyam-petel akngeyneyel. Mpwelanth renh apenteynenherr-atherr, warl kwen-warl. Artwa renh iley-alhenherr-atherr, ‘Ingkartel aylernenh thwenek, apmerek-artwey ngenh awetyek, nthekek anwantherr tyenkerr arlkwem.’ <sup>15</sup> Apmerek-artweyel mpwelekanth iyiparrerney, room irrwerl-ampeny anwantherr tyenkerr arlkwetyek.”

<sup>16</sup> Kwertengerl ikwerenhnem-therr alhek apmer Jerusalem-warl. Ratherr arey-alhek artwa anyent renh, kwat� ra akngeyn-anenty tyam-petel. Ratherr renh apentek, warl kwen-warl. Ratherr kel tyenkerrek atyenhilek arrwikel, Jesus-earl renh-atherr ilek-angkwarr. Ikwer-penhan ratherr angkep alkek Jesus-warl.

<sup>17-18</sup> Ingwel, Jesus kel alhek kwertengerl ikwerenhnem-akert amern tyenkerr arlkwetyek. Ra kwertengerl <sup>12</sup> ikwerenhnem ilek, “Artwa anyentelan amern arlkweyel nhenhey arrpemarl anwekantherr-itek, rarl ayenah ahayiweyen artwa ahelengkw-nem-warl, rernem ayenah ipmek atwetyek.”

<sup>19</sup> Kwertengerl ikwer-rnem amperngirrek Jesus ikwer, renharl awekel rarl ilelhek ikwer-rnem. Anyentel-anyentel rernem ilelhek, “Ayengan arrangkwarl! Atha ngenh ahelengkw-rnem-warl ahayiwey-angenharl!”

<sup>20</sup> Jesus-el renh-rnem ilek arrpemarl, “Artwa anyentel anwekantherr-itek amern arlkweyel, artwa anyent rarlap ayenah ahayiwem artwa ahelengkw-rnem-warl. <sup>21</sup> Angka Akngey-kenh alakenh aynteyel: ‘Akngey-kenh Artwa Anyent Impen ra ilwem. Artwa

anyentel ayenh ahayiwem artwa ahelengkw-rnem-warl, ayenh atwetyek.' Artwa anyentarl ayenh ahayiwem-penh, rap irrkngerney-weny-anemarl aneyen. Ayenh ahayiwek ahelengkw-rnem-warl, Akngeyel renh atwem. Artwa ilenh rarl apmwangkwarr alkenhirrek, rernem renh alkenhilek apmwangkwarr."

### *Tyenkerr Ingkart Jesus-kenh*

<sup>22</sup> Jesus-el-anem amern inek, Akngeyek angkemel inkwerelhemel, rarl amern renh anthek. Ikwer-they, Jesus-el amern renh rlweth-akek. Ra kwertengerl ikwerenh-rnem anthek, angkemel, "Amern nhenhan arlka atyeharlap ran."

<sup>23</sup> Tyampet wayn-akert inek-penh, ra Akngey angkek inkwerelhemel, rarl wayn renh anthek. Ikwer-penhan ra renh-rnem anthek antywetyek. Ingkerrenhel antywiek. <sup>24</sup> Jesus angkek, "Wayn nhenhan arrknga atyeharlap ran. Arrknga thelehentyel ayeng ilwem, ingkerren-they apmwa irrarkkeyek. Akngeyel arrenhantherr alhelek, apmwa arrekantherretye iweyek, arrenhantherr anyentelhiletyek ikwerenh-rnem-warl. <sup>25</sup> Nthakenh atha wayn antywewy-angenh arrekantherr-itwek, ahern nhenh-itwekan. Ingwer-ingerant, atha ngkwarl wayn lyerteny antywem, Ingkart Akngey-kenh apmer-itwekant." <sup>26</sup> Rernemap aylelherrek-anem, Ingkart Akngey-warl-athet, inkwerelhemel. Rernem warl ikwer-they Apwert Alip-warl alhek.

### *Peter ilelheyel*

(Matthew 26:31-35; Luke 22:31-34; John 13:36-38)

<sup>27</sup> Jesus angkek, "Akngey-kenh angka alakenh aynteyel: 'Yep-yep arntarnt-arey-angker atwenty, yep-yep-rnemarl ingkerrenh arlperryirremel alhem.' Ingwel lyert arrantherr alhem, arlperryirremel, yep-yep-rnem arlperryirremel alhem, weth-apeny."

<sup>28</sup> Akngeyel ayenh itethelnty-penant, ayeng arrwekel alhem apmer Galilee-warl."

<sup>29</sup> Peter ilelhek, "Kwertengerl ingwerel-rnem ngenh menty iwerl-alhenty, athan nthakenh ngenh iwerl-alhey-angenh."

<sup>30</sup> Jesus-el Peter renh ilek, "Atha ngenh arrayt ileyel, tywek-tywek irrwey ingwepenh arlkey-ayntekerrem-awaty, nga ilelheteyek irrpety-inger ntwa ayenh iterl-arey-angenh akwerrp."

<sup>31</sup> Peter-el Jesus renh ilek, "Menty! Ayeng alakenh ilelhey-angenh ikwer-rnem-warl. Atha ngenh iwerl-alhey-angenh, ayternanth-atherr-antey ahelengkw-rnemel atwetyek." Kwertengerl ikwerenh-rnem ilelhek arrpemarl, renh-rnem ingkerrenh atwetyek ahelengkw-rnemel.

### *Jesus Akngey-warl angkeyel*

(Matthew 26:36-46; Luke 22:39-46)

<sup>32</sup> Rernem apmer arwerl-angketyarr-warl alhek, artna inngewarl, itnan apmer ran Gethsemane. Jesus kwertengerl ikwerenh-rnem ilek, "Artna nhel arrantherr anayntenherr-arey, ayeng alhey-kety Ingkart Akngey-warl angketyek."

<sup>33-34</sup> Jesus-el atnwenhek artwa irrpety ikwerenh-rnem, Peter-akerr, James-akerr, John-akerr, renh-rnemarl ra atnwenhek. Jesus ilelhek, "Ayengarl artewentyel iterremel ilwetyek-anem irreyel-kety, arrantherr atyek anayntenherr-arey."

<sup>35</sup> Jesus ilperr-ayntemel ayntenh, Ingkart Akngey-warl angkemel, "Akngeyay, ayeng ilkelheyel artwa ahelengkw ilenh-rnem ntwa anterrkwetyek atyengety ayenh atwekerr. Ntwa atyengety renh-rnem anterrkwa, nga arlkwententyarlan." <sup>36</sup> Ikwer-penhan, Jesus angkek arrpemarl, "Akngey, ngarl riterrk innan, ngarl arlkwentem ikwer-rnem ayenh menty arntetye ilkwa anthetyek, ipmek atwetyek. Mwerr ayenh menty rernem arntetye ilkwa anthey, ayenh ipmek atwey, ngarl arlkwenteyel-angkwarr. Ayeng ngkweng awelheyel."

<sup>37</sup> Jesus apey-alpek kwertengerl ikwerenh-rnem-warl. Ra arey-alpek renh-rnem ankwantey aynterl-anenty. Ra Simon Peter renh ilek, "Ilekekarl arrantherr ankwantey aynteyel? Arrantherr atyek-anem anerl-anenty, atha arey-alpemer, ngwang ywerrey-angenh ayeng anamerl-antey arrekantherr-warl apey-alpek." <sup>38</sup> Arrantherr atyeng atyek arntarnt-arelherl-anemer. Arrenhantherr ingwerentyel arrkernem, arrantherr apmwangkwarr apentetyek. Arrantherr Akngey renh ayernetyek kwenirremel, arrantherr apmwangkwarr apentekerr."

<sup>39</sup> Jesus alhek Ingkart Akngey-warl angketyek irrkaty-angkwarr arrpemarl. <sup>40</sup> Jesus kwertengerl ikwerenh-rnem-warl apey-alpek. Ra arey-alpek renh-rnem ankwantey aynterl-anenty arrpemarl. Rernem atyek-anem aney-angenh, renh-rnem ankwel intemantey itnatwenh. Jesus-el renh-rnem akwentelhilek, rernem akater-anem ingkerrenh anenh, nyerrirremel.

<sup>41</sup> Jesus alhek Ingkart Akngey-warl angketyek arrpemarl. Jesus kwertengerl ikwerenhrnem-warl apey-alpek, ra arey-alhek renh-rnem ankwanterey aynterl-anenty arrpemarl. Jesus-el renh-rnem ilek, "Arrantherr ankwanterey arrpem intem aynteyel. Kel, anyentinger arrantherr ankwayntek. Artwa ahelengkw-rnemarl Akngey-kenh Artwa Anyent Impen ayenh rlengk anterrkweweny. <sup>42</sup> Ingkerrenh akwentherr-arey, anwantherr alhetyek. Artwa anyent ilenh arrantherr areyel? Ilenhel-anyem ayenh ahayiwek, artwa ahelengkw-rnem-warl, ayenh rernem anterrkwetyek."

*Ahelengkw-rnem Jesus renh anterrkweyel*  
(Matthew 26:47-56; Luke 22:47-53; John 18:3-12)

<sup>43-45</sup> Apmwernem Judas ikwer-angkwarr apetyek, Jesus renh iylparrernetyek. Ra ikngweler-alpek ahelengkw-rnem Jesus ikwer-warl. Apmwernem ayen arpenty-akert apetyek, walth-then-akert. Atyetyart ilkwerenm-then Atyetyart Moses-kenh-rnem-then, rernem ahelengkw renh-rnem thwenek. Judas-elarl renh-rnem ilek arrwel, ikwer-rnem iylparrernetyek, "Athan artwa weth renh arrwantyem, arrantherraw renh anterrkwenherr-areyarl." Ahelengkw-rnemel Jesus renh alhengk-arek, Judas-elarl ilek-penh. Judas Jesus ikwer-warl apetyek angkemel, "Atyetyartay." Ra angkek alakenh Judas, renh ra anterrkwemel arrwantyek. Jew-rnemel artwa ingkerrenh rlwatinremel, rernem arrwantyemirremel. <sup>46</sup> Kel ahelengkw-rnemel renh anterrkwek, Judas-elarl arrwantyek-warl.

<sup>47</sup> Kwertengerl anyent Jesus-kenhel Atyetyart ilkwekenh warrkenh renh iylda rlweth-akek. <sup>48</sup> Jesus-el renh-rnem ilek, "Ilekekarl arrantherr apetyek irryertelan, ayenh arrantherr anterrkwetyekan? Ayen arpenty-rnem-thenan, walth-rnem-thenan arrantherr akngetyek, ayenh atwetyek, ayeng apmwa atwet-angker-arrpantey!" <sup>49</sup> Athan angka Jew-rnem-kenh apmweley-angnenharl. Akngerr-inger atha arrenhantherr akalty-anthenh angka Akngey-kenh, ilerl-anemel, Jew-rnem-kenh tyaty ilkwitwek. Arrantherr ayenh anterrkwemel ikwer-antey artwa akngerrel arenty-angkwarr. Arraty-wenyaral alakenh arrantherr ayenh anterrkwek. Alakenh Akngey-kenh angka nhenharl pipel aynteyel-angkwarr, mwerran ayenh arrantherr anterrkwemel."

<sup>50</sup> Kwertengerl ikwerenhr-nem aterel anterrek, arlperryirremel. <sup>51-52</sup> Artwa anyent arnkeweny ra pantyelant artelhek. Ahelengkw-rnemel renh anterrkwemel panty-they, ra tyerrelhemel anterrek arnkeweweny-anem.

*Atyetyart ilkwerenmel Jesus renh arrkerneyel*  
(Matthew 26:57-68; Luke 22:55, 63-71; John 18:13-14, 19-24)

<sup>53</sup> Jesus renh anterrkwek ahelengkw-rnemel, warl Atyetyart ilkwekenh-warl akngeyinemel. Atyetyart alkenh ingwer-rnem akarirrek Moses-kenh-rnem ikwer-itwel. <sup>54</sup> Peter-el ingkern-they apenteck ahelengkw-rnem Jesus-arl rernem atnwenheynek. Peter aney-alhek ahelengkw-rnem-itwel, warl ilkwa Atyetyart-kenh arrerenty. Rwl-anem rernem ingkerrenh anek, arlterrngirremel. <sup>55</sup> Atyetyart ilkwerenmel rernem angkerrenh, "Angwenharl ikwer akaltyan rarl renh awek-penhan, Jesus rarl law anwekantherrenh apmwel-areth angkekan? Angwenhel anwenhantherr arraty-antey, rarl awek-penhel? Anyent ingwerel anenhantherr ileyek arraty-antey, rarl Jesus renh awek-penhel. Intem-antey rernem renh-rnem ayernen, rernem arraty ileyek." <sup>56</sup> Angka ingkerrenh ilenh ingwerek-ingwer irrytwerremel. <sup>57</sup> Ingwer-rnemel ilenh irrytwerremel, "Tyaty Jew-rnem-kenh ilkwa aketyek angkenty-arrpantey ra ilek, renh arlta irrpety-inger-penh tyaty ingwer-anemarl artetyek angkenty-arrpantey." <sup>58</sup> Alakenhaym, angka ingwerek-ingwer rernem ilenh irrytwerremel. <sup>59</sup> Atyetyart ilkwel-rnem iterl-arey-angenh ingwerek-ingwer artwa ingwerel-rnem angkan ilenh, Jesus angkenty-arrpanteyarl angka amentew-ament ingkerrenh. Rernem apatek Jesus renh atwekkerr.

<sup>60</sup> Atyetyart ilkwel Jesus renh ayernek, "Nthakenh rernem ngkweng angkerreyel? Ntwa anwernekantherr arraty ilay!" <sup>61</sup> Jesus akater anek, tyerney-angenh. Atyetyart ilkwel ayernek arrpemarl, "Nga arraty-antey atyeng ilelha! Ngenhang Christ Akngeyel anwernenhantherr alhelek, ngenh thwenetyek anwernekantherr-warl, ahern nhewarl?"

<sup>62</sup> Jesus ikwer ilelhek, "Ya, arrantherr areyenh, ayeng iteth alpenty Ingkart Akngey-warl intem ayeng aney-alpeyenh ikwer-itwel. Ayeng Atyetyart ilkwa areyenh intem-antey, Akngey-apeny. Arrantherr ayenh areyenh, Ingkart Akngey-kenh apmer-they apey-alpenty."

<sup>63</sup> Artwa Atyetyartel arnkwa ikwerenhr ilterrek angkemel, "Nhenhey apmwel-areth angkeyel Akngeyek. Ran nhenhey Atyetyart Akngey-apeny-arrpanteyarl ilelheyl!"

<sup>64</sup> Arrantherr renh awek rarl angkek Akngeyek. Nthakenh arrantherr iterreyel, nthakenh rarl apmwel-areth Akngeyek angkek?" Rernem angkerrenh, renh ipmek atwetyek.

<sup>65</sup> Artwa ingwer-rnemelan apelharl iwek, Jesus ikwer irrpelthirremel. Ahe lengkw-rnemel renh annga rag-el artek aparrng illemel, renh atwemel. Artwa ahe lengkw-rnemel renh ayernek, "Angwenhel ngenh atwelye?" Kel ahe lengkwel Jesus renh atwek arrpemarl.

*Peter irrywerremel ilelheyel*

(Matthew 26:69-75; Luke 22:56-62; John 18:15-18, 25-27)

<sup>66</sup> Peter-an rwelarl anenh, arlterngirremel irrernt-kety. <sup>67</sup> Kwey warrkenh Atyetyart tyaty-areny-kenhel Peter renh alhengk-arek ayernemel, "Ngan alhenhap Jesus Galilee-areny-angkwarz. Atha ngenh weth arekan, ngay?"

<sup>68</sup> Peter ilelhek, irrywerremel, "Inpa, atha iterl-areyangarl renh." Peter anperl-alhek keyt-warl rtney-alhemel keyt-itwel. Tywek-tywek irrwey ra awek. Anyent-inger ra arlek.

<sup>69</sup> Kwey warrkenh ra Peter renh arek arrpemarl. Ra ilek artwa ingwer-rnem-warlnem, "Nhanyemarl ran Jesus-angkwarrarl alhenhan, atharl renh alhengk-arekan."

<sup>70</sup> Peter irrywerremel ilelhek arrpemarl, "Arrangkw, atha iterl-arey-angenh renh." Artwa ingwer-rnemel Peter renh ayernek, "Inngarl nga alhenh Jesus-angkwarz apmer Galilee-elan. Galilee-areny-apeny nga angkeyelan."

<sup>71</sup> Peter-el irrywerremel ilelhek arrpemarl, "Ingkartel arem, arraty inngay ayeng angkem. Ayeng akwerrp, atha renh iterl-arey-angenh."

<sup>72</sup> Peter-el renh tywek-tywek irrwey awek, rarl ingwepenh arlkey-ayntek. Peter ra iterl-arek, renharl Jesus-el ilek-angkwarz, "Tywek-tywek irrwey ntwa ingwepenh arlkey-ayntekerr-awaty ntwa atyeng irrywerremel irrpety-inger iletyek." Kel Peter artnenh-anem.

## 15

*Pilate-el Jesus renh ayernemel arrkerneyel*

(Matthew 27:1-2, 11-14; Luke 23:1-5; John 18:28-38)

<sup>1</sup> Moses-kenh Atyetyart-rnem-then Atyetyart tyaty-areny-rnem-then, atyetyart Jew-rnem-kenh-then, rernem akarirrek ingkenyarl tyerrehenhey-alhekel, angkerretyek. Rernem angkerrenh, rernem Jesus renh arerntemel atnwenheteyk Atyetyart ilkwa ikwer-warl. Rernem Jesus renh atnwenhek Atyetyart Pilate ikwer-warl, renh rnkernek Atyetyart Pilate-itwel.

<sup>2</sup> Pontius Pilate-el Jesus renh ayernek, "Nganap Atyetyart ilkwa Jew-rnem-kenh, ngay?" "Ya, arraty nga angkeyel," Jesus-el tyernek.

<sup>3</sup> Atyetyart ilkwel-rnem Jesus renh ayntarrp-ilek, ra irrywerremel ilelhenty-arrpantey.

<sup>4</sup> Pilate-el Jesus renh ayernek arrpemarl, "Ngenharl rernem ayntarrp-ileyel, nthakenh ngan angkem?" <sup>5</sup> Jesus akater-anem rtnenh, tyerney-angen. Pilate ywarn-antey iterrek, Jesus rarl akatemel-anem rtnenhew. Pontius Pilate-el Jesus renh ahayiwek, rernem renh atwetyek.

*Rernem Atyetyart renh ayerneyel, Jesus renh atwetyek*

(Matthew 27:15-26; Luke 23:13-25; John 18:39—19:16)

<sup>6</sup> Amern Anperarl Alhek "Passover" tyenkerr arlkwek-penh, Pilate-el artwa anyent tyayl-they tyarlewetyek. <sup>7-8</sup> Artwa Barabbas ahe lengkw atwenh-atwenh tyayl-itwek anenh. Jew-rnem akngerr Atyetyart Pilate ikwer-warl alhek, renh ayernetyek, ra artwa anyent tyayl-they tyarlewetyek.

<sup>9</sup> Atyetyart ilkwel renh-rnem ayernek, "Angwenh athan tyarlewem tyayl-theyan? Jesus, atyetyart ilkwa Jew-rnem-kenhang atha tyarlewem?" Ra ilkelhenh Jesus renh tyarlewetyek. <sup>10</sup> Pilate iterrehn Atyetyart tyaty-areny-rnem Jesus-kety arkarir-renh, ingwer-rnem ingkerrenh ikwerantarl inkwerelhek. Ikwer-theyan rernem renh rnkernek.

<sup>11</sup> Atyetyart tyaty-areny ingwer-rnemel Jew-rnem ingkerrenh ilek, "Arranther Pilate ilenherr-arey, ra artwa Barabbas tyayl-they tyarlewetyek." <sup>12</sup> Atyetyart Pilate-el renh-rnem ayernek arrpemarl, "Angwenh athan tyarleweman? Atyetyart alkenh Jew-rnem-kenh arranther lileyel, nthakenhارتatha renhan ilem?"

<sup>13</sup> Jew-rnem ikwer arlek, "Renh arwerl iylypeyl-athererr-warl tywena, renh atwetyek."

<sup>14</sup> Pontius Pilate-el renh-rnem ilek, "Nthakenh anwantherr renh ayntarrp-iley-angenh, ran anwekantherr akengenty mpwarey-angenharl." Rernem arlek arrpemarl, "Renh arwerl iylypeyl-atherrek tywenenherr-arey, renh atwetyek!"

<sup>15</sup> Pontius Pilate ikwer-rnem awelhenh. Ra Barabbas renh tyarlewek, tyayl kwen-they. Rap ahe lengkw-rnem ilek, rernem Jesus renh whip-el atwayntetyek, rernem

ahelengkw ingwer-rnem-anem Jesus renh anthetyek, rernem renh arwerl iylpeyl-atherrek tywenetyek, renh ipmek atwetyek.

*Ahelengkwel-rnem Jesus renh arrkentelhileyel  
(Matthew 27:27-30; John 19:2-3)*

<sup>16</sup> Ahelengkwel-rnem Jesus renh atnwenhek warl ilkwa rlterrk-warl, warl Atyetyart-kenh-warl. Ahelengkw ingwer-rnem ikwer-rnem-warl akarirrek. <sup>17</sup> Rernem arnkwa ikwerenlhelheik warl, kwet arlpenty irrpwerle-anem renh akwernek. Rernem Atyetyart-kenh mwekart-apeny mpwarek, arrelyp-angketyarr, Jesus akapwert-warl arrernemel. <sup>18</sup> Rernem renh arrkentelhilemel ilek, “Nganap Atyetyart ilkwa Jew-rnem-kenh.” <sup>19</sup> Rernem apelh ikwer-warl iwel, akapwert-anem renh arwerlel atwemel, ikwer irrpelthirremel, renh tnakeyek-arrpanter.

<sup>20</sup> Rernem irrpelthirremel kwanthenh-penh, rernem arnkwa irrpwerl lhelheik, arnkwa ikwerenlhelheik-warl-anem akwernek. Rernem renh atnwenhek, rernem renh atanthyek, arwerl iylpeyl-atherremel.

*Ahelengkw-rnemel Jesus arwerl iylpeyl-atherr-warl atantheyel  
(Matthew 27:31-44; Luke 23:27-43; John 19:28-30)*

<sup>21</sup> Artwa anyent, itnan Simon apmer Cyrene-areny apetyen renh tawen Jerusalem-warl, apmer ingwer-they. Ahelengkw-rnemel arwerl iylpeyl-atherr-anem arrernek Simon ikwer-warl, ra arwerl renh aylpwer-akngayn-ayntetyek. Simon-el arwerl iylpeyl-atherr iyattar-akngaynenh. Simon ikwer-atherrenh aynikw aneh, Rufus-atherr, Alexander-atherr.

<sup>22</sup> Ahelengkw-rnemel Jesus renh apwert ilkewararl atnwenhek, apwert itnan Golgotha, ranap apwert akarnng-apeny. <sup>23</sup> Ahelengkw-rnemel arwerl mwerr-angker alperr-penh ngkwarl wayn-warl thelek, Jesus renh anhemel, ra irrwampenty awelhekk, renh arlepilityek, renh atanthyek arwerl iylpeyl-atherrek. Jesus-el ngkwarl menty arek, antywey-angenh.

<sup>24-25</sup> Ahelengkwel-rnem arnkwa ikwerenlhelheik, ahern-warl iwemel. Ingwepenh, rernem Jesus renh arwerl iylpeyl-atherr-warl atantheik. Rernem arwerl iylpeyl-atherr Jesus-emp irrwerlikek, arraty rkernemel, ra arwerl iylpeyl-atherrel irrwel ilwetyek-atwety. Ahelengkwel-rnem arrkenirek arnkwa Jesus-kenhek, antengileyek. <sup>26</sup> Ahelengkw-rnemel pip arrernek arwerl iylpeyl-atherr-warl angkakert ikwer-rnem-kenh, “Nhanyem Atyetyart Jew-rnem-kenh.” <sup>27</sup> Artwa apmwatherr rernem arrernek Jesus-angkwarl ilwetyek. Artwa apmwatherr rernem rkernek, akwarrant-atherr, Jesus ampepekiemel. <sup>28</sup> Jew-rnem akngerr angkepelarreng alhenh, Jesus ikwer irrpelthirrerl-anemel, “Weth ntwa anwerenhantherr ilek, ntwarl tyaty ilkwa Jew-rnem-kenh akenty-penhel, ntwa tyaty ilkwa ingwer-anemarl anwernekantherr artelhetyek akwel. Ngan arlertek ilkwakert akwel. <sup>29</sup> Nga ament-anem itethelhila! Atwarra arwerl iylpeyl-atherremel!”

<sup>30</sup> Atyetyart ilkwa tyaty-areny-rnem-then Moses-kenh-rnem-then, rernem ikwer irrpelthirremel, angkepelarreng alhenh. Rernem arrkent ikwer angkerrenh, “Ran artwa ingkerrenh arntety-penh itetheley-angker, ranem ament-anem itethelhiley!” <sup>31</sup> Ra ament itethelhilenty, anwantherr ingkerrenhlarlap iterl-areman, rap Atyetyart ilkwa Jew-rnem-kenharl aneman.” Artwa apmwa weth-atherrel Jesus renh arrkentelhilenh arrpemarl.

*Jesus ilweyel  
(Matthew 27:45-56; Luke 23:44-49; John 19:28-30)*

<sup>32</sup> Ingkeny arlta ampepel ingwerrerl-alhek, atwerrpek-atwety. <sup>33</sup> Jesus-el Akngay renh ayernek, “Akngay atyen, Akngay atyen, ilek-kety ntwa ayen menty arek?”

<sup>34</sup> Akngerr Jesus-arrangarr rtnenherrenh. Rernem Jesus renh awenh, angkemel, “Jesus ra arlkeyel Elijah ikwer. Elijah Akngay-kenh angkakert arrwekelely ran.” <sup>35</sup> Artwa anyentel ngkwarl wayn-warl antywer renh apelyilek, Jesus renh arwerl arlpenty-they arrakert renh irrpelhilek angkemel, “Anwantherr mpwelhey Elijah ikwer-warl apetyetek, renh arwerl iylpeyl-atherr-they tyarlewenty anwantherr aretyek.” <sup>36</sup> Kel Jesus arlkek, ilwemel.

<sup>37</sup> Rag arlpenty Jew-kenh tyaty ilkwitwek ilterrelheik, irrpelhilek-they kwenek-atwety.

<sup>38</sup> Atyetyart ahelengkw-rnem-kenhel arek Jesus ilwenty. Ra angkek, “Jesus ranap Akngay-kenh Alerikw inngarl ilenhey.”

<sup>39</sup> Akngerr ingkerrenh rernem akarirrek, renh aretyek, Jesus arwerl iylpeyl-atherrek ilwey-anty. Mary Magdala-areny, Mary ingwer-then, James-then Joses-then, ikwer-atherrenh amikw, ingwer itnan Salome, rernem ikwer-rnem-itwel rtenh.

Rernem irrkaty-rnem-antey, kwertengerl-rnem Jesus-kenh rernem arntarnt-arenh, apmer Galilee-itwel.

*Joseph-el Jesus renh awenng-warl akwerneyel  
(Matthew 27:57-61; Luke 23:50-56; John 19:38-42)*

<sup>42-43</sup> Jew-rnem ltyerrenh warrk-weny-anem, arlta Saturday-el, nthakenh arrewayly akngey-angenh awenng-warl. Arlta Saturday ikwer-rnem-kenh anek, ltyerrey-angker. Joseph artwa mwerr apmer ingwer-areny itnan Arimathea. Friday-el atwerrp, ra alhek Atyetyart Pilate-warl, renh ayernetyek arrewaylyek.

<sup>44</sup> Pilate ra iterrek ywarn. Pilate-el ahelengkw Atyetyart renh ayernek, "Jesus ra iteth-antey?" <sup>45</sup> Ahelengkwel renh ilek, "Jesus kel ilwek." Pilate-el Joseph renh ilek, ra arrewayl renh arwerl iylpeyl-atherr-they atwarrelhiletyek, renh awenng-warl akwernetyek.

<sup>46</sup> Joseph-el arnkwa mwerr-angker payemelek, arrewayl renh ikwerenp akwernetyek, awenng-warl. Joseph-el arrewayl renh arwerl iylpeyl-atherr-they atwarrelhilek, renh mwerr-angkwarz awenng-warl akwernetyek. Arnkwa mwerrel-anem ataperrelek, ra intey awenng-warl akgek. Joseph-kenhel-rnem arrewayl renh intey awenng-warl akwernek, apwert ilkwa arriw-itwel arrkngertewemel. Intey awenng renh ilkwilek, awank-akerr, arrewayl-anem intey-warl akwerney-alenty.

<sup>47</sup> Mary Magdala-arenyel-then, Mary Joseph-kenh amikwel-then ratherr arek Joseph-el apwert ilkwa arriw awenngek arrkngertewenty.

## 16

*Jesus ipmepenh itethirremel akemirreyel  
(Matthew 28:1-8; Luke 24:1-12; John 20:1-10)*

<sup>1</sup> Saturday ingwel, arelh-rnem alhek, Mary Magdala-areny-akerr, Salome-akerr, Mary, James-kenh amikw-akerr. Rernem alhek anter inetyek, arrewayl renh apernetyek anterel. <sup>2</sup> Sunday atwemengkel-antey rernem awenng-warl alhek. <sup>3</sup> Rernem angker-reynenh, "Artwa angwelenh apwert yanh arnangelhileyenh intey-theyant?" <sup>4</sup> Rernem arenhek awenng intey rarl arrwekel-antey altyerirrek.

<sup>5</sup> Rernem intey-warl aylpenhek. Rernem arek artwa anyent arnkwa arlter-akert anerl-anenty. Rernem aterirrek ikwerety.

<sup>6</sup> Artwa anyent akgek ikwer-rnem, "Aterirreyang atyengety arrantherr! Atha arrenhantherr iterl-areyel, arrantherr apetyek Jesus Nazareth-areny aretyek, rarl arwerl iylpeyl-atherrel ilwek. Nhenh Jesus ayntey-angenh, arrangkw. Ra iteth akwentemel alpek. Nhenh arrantherr areyel, arrangkw. Arenherr-arey, nhelanyemarl ra ayntenh ipman! <sup>7</sup> Jesus kel alhek apmer Galilee-warl arrwekel-antey. Arrantherr alhentyel, arrantherr renh arey-alhem apmer Galilee-ek. Arrantherr Peter renh ilenherr-arey kwertengerl ingwer-rnem-then, atharl arrenhantherr ilek-angkwarz."

<sup>8</sup> Rernem intey-they aterel anterrek, artwa ikwerety. Rernem arrewey-alhek, ywarn iterl-aremel. Rernem angka iley-angenh-antey, Jesus-arl akemirrek-penh.

<sup>9</sup> [Jesus kel itethirremel akwentelel awenng-they. Rap aremirrek Mary Magdala-areny ikwer-warl, Mary irrkaty ikwer-warl, rarl arrety 7-pel ikwer-they awank-akerr irrentek-warl. <sup>10</sup> Mary rarl arek-penh, kwertengerl Jesus ikwerenhr-nem ra ilek. Jesus ikwer kwertengerl ikwerenhr-nem apal amperrngirremel artnenh, ra intem ipmek ayntentyek-athen. <sup>11</sup> Mary renharl awek-penh, kwertengerl ikwerenhr-nem iterrek Mary-el irrtiyerremel ilentyek-athen.

*Jesus aremirreyel kwertengerl ikwerenhr-atherr-warl*

<sup>12</sup> Jesus aremirrek kwertengerl ikwerenhr-atherr-warl ampepel, apalarl ratherr tawen-they alpenh-warl. Ratherr Jesus renh arek arlka lyerten-akert-anemarl ra aremirrek. <sup>13</sup> Kel, ratherr tawen-warl alpek. Ratherr kwertengerl ingwer-rnem iley-alpek, ratherrarl Jesus renh arek. Rernem renh-atherr iylpelant awenh irrpelthirremel, ratherr irrtiyerremel ilerl-anentyek-athen.

*Jesus aremirreyel kwertengerl ingwer-rnem-warl*

<sup>14</sup> Ingwer-ingeran Jesus aremirrek kwertengerl ikwerenhr-nem-warl-anem, rernemarl amern arlkwenh-warl. Jesus-el renh-rnem ilek, "Rernem ayenharl arek-penhel-rneman, innigarl arrekantherr-warl ilek, arrantherr ikwer-rnem irrpelthirrenharl, irrtiyerremel ilenty-arrpanteyarl." <sup>15</sup> Jesus-el renh-rnem thwenek. "Angka atyenh apmer arpanenhek iley-ayntenherr-arey!" <sup>16</sup> Rernem atyeng irrpelthirrey-angenh awelhem, rernem kel baptise inem, Ingkart Akngeyel renh-rnem intem-antey atyenyenem. Ingwerl-rnem ayenh iylpelant awem irrpelthirremel, rernem ipma intem-antey aynteyenh. <sup>17</sup> Artwa anyent

atyeng irrpelthirreyang awelhem, ra atyenh rlterrk ilkwakertel arrenty ingkerrenh-they irrentem. Artwa anyent rarl atyeng mwerr-angkwarz awelhem, ra tyakarl angka ingwerek-ingwer angkem.<sup>18</sup> Artwa anyent rarl atyeng awelhem, irrpelthirreyang, ra rtnwem anterrkwem tnhwey-angenh, arrangkw. Artwa anyent rarl atyeng awelhem, irrpelthirreyang, ra apmwa ilwenh-ilwenh antywem, nthakenh ra ilwey-angenh. Artwa anyent rarl atyeng awelhem, ra arntety-rnem mwerrilem ingkerrenh, itep ikwerenhel arnep-arnemel.”

*Jesus alker-warl alpeyel  
(Luke 24:50-52; Acts 1:6-11)*

<sup>19</sup> Kel ilek-penh, Jesus ra alker-warl alpek, Ingkart Akngey-itwel aney-alpek intem-antey. <sup>20</sup> Kwertengerl ikwerenhnemel ilerl-apenh apmer arrpanenhek. Akngey-kenh rlterrk-akertel rernem arrenty ingkerrenh-they irrentek. Rernem arntety-rnem mwerrilek. Ingwerel-rnem renh-rnem arek, angkemel, “Akngey-kenh akalty inngarl nherinemey!”]

## Luke Luke-an rarl Angka Mwerr-angker Jesus-akert ingkwernew

*Luke-elan pip-warl ingkwernew angka mwerr-angker nhanyeman, thwenew-anem artwa alkenh-warl Theophilus-warl*

<sup>1</sup> Ya, Theophilus, angka nhanyem ngkweng.

Akngerrelan angka Jesus-akert ingkwernew. Rap ilek-ilek mwerr-angker mpwarew, rarl anenhel ahern nhenh-itwew. <sup>2</sup> Ingwer-rnemelan renh arew, rarl iteth-tangkwel ahern nhenh-itwew anen. Rernemap apmer arrpanenh-warl alenh, angka ingwer-rnemew ilerl-apnen. <sup>3</sup> Rernem atyeng awank-antey ilew. Ayengan akaltyerrew mwanty, renh-rnem ayernemel. Ayengan ilkelhew arrpemarl artetwentyel, angka nhenh Jesus-akert ngkweng ingkwerneyew. <sup>4</sup> Ntwa angka nhenh alyepel iterl-areyel. Nthakenh nga iterreyel? Arraty apek? Apmwel-ayeth apek nhenhey? Alakenh atha ngkweng ingkwerneyel, ntwa arraty-angkwarr iterl-areyew-awaty.

*Antyerlelan Zechariah ileyel, "Anewelengkw Elizabeth-el awey akely alerikw atnyeneyen"*

<sup>5</sup> Awank-akerr Herod-an apmer ilkwa Judea-ampeny-itwew atyetyart alkenh anen. Apmer ikwer-itwew artwa anyent anen, itnan Zechariah. Zechariah ran Abijah-wen-antey anew, ranap artwa rltwa tyaty ilkwa Jew-rnem-wenh-arenyarl. Akely ikwerenht itnan Elizabeth, ranap Aaron-wenh-anteyarl anew.

<sup>6</sup> Ratherrap Akngey-wenharl anen, arraty-angkwarrarl. Aletharl ratherr angka Akngey-wenh rlterrkan arraty-angkwarr apentenh. Ratherrap Akngeyew awelhenh, rarl ikwer-atherr angkenhew. <sup>7</sup> Zechariah-then Elizabeth-then ampwather, ratherrap ampewenty-antey anen, Elizabeth-el nthakenh ampa atnyeney-angen, arrangkw.

<sup>8</sup> Ingwer-ingweran Zechariah tyaty ilkwtwew Jerusalem-itwew warrkerrenh. Aher-rety nhel aytew ikwer-rnem-wenh-anem, warrkerreyew warl ikwer-itwew. Abijah-wenh-rneman rernemap artwa rltwernemarl. <sup>9</sup> Rernemap artwa anyent rlwanenh, tyaty ilkwevarl aylpeyew. Rap arrtyenh arwerl irrtiyel mwerr-angker intey-angker Ingkartew. Arlda ikwerel-antey rernemap Zechariah-anem rlwanew. Rap kwen aylpenhew, arwerl irrtiyel arrtyeyew. <sup>10</sup> Ingwer-rneman akethelarl akarrerrenh, Akngey-warl-athel angkayteyew.

<sup>11</sup> Zechariah-an kwendarl rtñenh, Ingkart-wenh antyerl ikwer-itwel aremerrey-alhew-anem. Rap arrer-antey rtñenh apwert ilkwangkwarr, rwa rarl ampenh-angkwarr.

<sup>12</sup> Zechariah rarl arew, antyerlrl rtney-alhew, rap ikwer-wety artetwentyel innga ater-errew. <sup>13</sup> Antyerlan ikwer angkew, "Zechariah, atererrey-angen! Ntwa Akngey awey akelyew ayernenh, ran ngenh awenharl. Akely ngkwenhel awey akely atnyeneyen."

Ntwap renh John itnewa. <sup>14</sup> Mpwelantharl renh atnyeneyenhel, rap mpwelenhanthenn irrngerney-anthem. Akngerran ikwer irrngerney irreyen arrpemarl. <sup>15</sup> Ranap Inweng Akngey-wenh-akertarl, renharl atnyeneyenhan. Rarl ilkwerreyenhel, Ingkartel renh alkenh inngarlap ileyenhan, rap ngkwarl wayn nthekwern antwyey-angen, arrangkw.

<sup>16-17</sup> Ingkart Akngeyel arawerrng ikwerenht antheyenhan, rarl artwa angkakertew Elijah-ew awank-akerr anthew-apaney. Akngeyelap renh Inweng ikwerenht-akert Jew-rnem-warl thweneyen. Ingwer-rnemelan aweyen angkerl-anenty, rernemap Ingkart Akngey-warl angkeperrenhey-alpeyeh. Rap akwerrng arratyeleynh. Amperneman aynaynewantherrenh-then awelherreyew. Ingwer-rneman Akngeyew awelhey-angen-hrnem, rap akwerrng arratyeleynh, rernem arraty-anem aneyenhan. Alakenh-anyem alerengkw ngkwenh rap akngerr arratyeleynh. Rernem Ingkartew mpwelheyen, rarl ahern nhenh-warl apetyeyen." Alakenh-anyem antyerl Zechariah-ew angkew.

<sup>18</sup> Zechariah-el antyerl ayernew, "Inngang angka ngkwenh arraty? Aylanthan ampwather-anem! Nthakenh aylanth awey akelyan atnyenem?"

<sup>19</sup> Antyerlel renh tyernew, "Ayengan Gabriel. Ayeng Akngey-itwew rtneyel irrwerl-itwew. Ra ayenh thwenew, angka mwerr-angker ngkweng ileyew. Nganap atyeng awelhey-angenhan!" <sup>20</sup> Ranap inngarl aytteyeh! Nhepenh-anyem nga angkey-angenhan, ngap akterl-anem arlengew-alenty aneyenhan, ngarl atyeng irrpeltherrew. Alerengkw ngkwenh atnyeneyenhel, Akngeyelap ngenh angkiparreleyen arrpemarl." Alakenh-anyem antyerlan ikwer angkew.

<sup>21</sup> Zechariah-an antyerlew tyaty ilkwtwew awelhenh, ingwer-rneman akethel-antey rtñenherrenh. Rernem ikwer mpwelhenh, aketh-warl tyerrelheyew. Rernemap iterrenh, "Nthakenh irrew, kwenan arleng-alenty ywerrew?" <sup>22</sup> Rarl kwen-they

tyerrelhenhey-alpew, ranap nthakenh iley-angenharl, rarl antyerl arew. Rap akertetheyant iltyerrenh, ikwer-rnem angkeyew-arrpantey. Rerneman iterl-arew-anem, rarl altyerr mwerr-angker warl kwen-itwew arew.

<sup>23</sup> Zechariah rap tyaty ilkwitwew arlta 7-ew-atety anen. Rarl warrk irrenh-penh, rap apmer-warl-anem alpew.

<sup>24</sup> Ikwer-penhan akelty ikweren Elizabeth alerl-antey mpwelhenh. Rap warl kwen-itwew alkent 5-ew-atety anen, rarl nyerrerrenh, ingwer-rnemel renh arewerr. <sup>25</sup> Rap angkenh ament-antey, "Ayengan ampeweny anen. Akngerrel ayen hwanthenh, rernemap ayen nyerrel anthenh. Aleyan Akngeyel ampa atyeng anthew-anem. Kel-anem, ayeng aketh-warl tyerrelhem. Ayenharl akngerrel areyen, rernem atyeng inkwerelheyen, Akngeyelan ayen arntarnt-arayntemar!"

#### *Antyerl Gabriel-an Mary-ew angkeyel, "Ntwa avey akely atnyeneyen"*

<sup>26</sup> Elizabeth warl ikweren-they tyerrelheweng-arey, Akngeyel antyerl Gabriel thwe-new tawen anyent-warl, itnan Nazareth, apmer Galilee-ampeny-itwew. <sup>27</sup> Rap antyerl thwenew, kwey aleyak Mary-ew angkeyew. Mary-anap Joseph-ewant mpwelhenh, ranap artwitwewan ayntey-angenh, arrangkw-antey. Joseph ran atyetyart David-wenh-antey anew. <sup>28</sup> Antyerlan Mary-warl apetyew, rap ikwer angkew, "Ya, Mary! Ingkart ngkwendeng-arlenq aneyel, ngkweng inkwerelhemel!" <sup>29</sup> Mary-an apatew. "Ilek-athet wenh ra alakenh atyeng angkew?"

<sup>30</sup> Antyerlan ikwer angkew, "Mary, Akngeyan ngkwengarl inkwerelheyel. Atererrey-angenh. <sup>31</sup> Ngap mpwelheyen, avey akely atnyeneyew, ntwap renh Jesus-arl itneweyenhan. <sup>32</sup> Rarl ilkwarreynhelan, atyetyartarlap ingkerrew ra aneyenhan. Ingkerrelanap renh Alerikw Akngey-wenh ileyen. Ilkwarpal ra aneyen, Akngey ilkwa irrwerl-areny-wenh Alerikw. Akngeyel renh rlwanew, atyetyart alkenh aneyew, David anenh-apeny, David-wenh-rnem-they. Awank-akerr ra atyetyart alkenh Israel-wenh-rnem-wenh anen. <sup>33</sup> Ampengkw ngkwenhan atyetyart alkenh Israel-wenh-rnem-wenh intem-antey aneyen."

<sup>34</sup> Mary-el antyerl ayernew, "Aleyak ayeng, akwerrp-antey. Nthakenh atha ampa akely atnyeneman?"

<sup>35</sup> Antyerlan ikwer angkew, "Inweng Mwerr-angker irrwerl-arenyan ngkweng-warl apetyeyen, rap ngenh kwenpayel-apeny arteyeh. Avey akely renh atnyenentyel, akngerrelanap renh Alerikw Akngey-wenh ileyen. <sup>36</sup> Ntwa arelhampw Elizabeth iterl-areyel. Ingwer-rnem alakenh angkerrenh, 'Elizabeth-el nthakenh ampa akely atnyeney-angenh, arrangkw!' Ranap mpwelheyel-anemarl. Alkent irrpety-penhel ra avey akely atnyeneyen. <sup>37</sup> Inngarlap ra! Akngeyel ilek-ilek anthey-angker!" Alakenh-anyem antyerl angkew Mary-ew.

<sup>38</sup> Mary-an antyerlew angkew, "Inngarlap alakenhan, ngarl atyeng angkeyel. Ayengan Akngeyewant-anem aneyen. Ayengan ikwer mpwelheyew, Ingkartel ampa akely atyeng antheyew-atety." Antyerlan alpew-anem, Mary-an iwerlelpew-anem.

#### *Mary alheyel Elizabeth arerl-alpeyew*

<sup>39</sup> Ikwer-penhan ingwer-ingwer Mary-el apmer ikweren iwerl-alhew, Elizabeth arerl-alpeyew. Rap anamerl-antey apmer akely ikwer-warl alhew apwert ilkwangketyarry-warl, Judea-ampeny-itwew. <sup>40</sup> Rap Zechariah-wenh apmer-warl alhew, Elizabeth-ew arlkew-anem. Rap kwen aylpenhew, Elizabeth-anem atnyeney-alheyew. <sup>41-44</sup> Elizabeth-el Mary arlkewarl awew, rap artewentyel inkwerelhew. Elizabeth-an Inweng Mwerr-angker-akertel Mary-ew angkew, "Ngan inngan inkwerelhem arelh ingwer-rnem-angkwarz. Ayengan arelhampwarl. Ilekew nga apetyew, ayen areyew? Atha ngenh awew, ngarl atyeng arlkew, ayeng awelhemel artewentyel inkwerelhew. Akngeyel ngkweng ampa mwerr-angker inngarlap antheyen. Ran ngkweng artewentyel innga inkwerelheyel, ampa akelyewan inkwerelheyel arrpemarl. Ampengkw ngkwenhan atyetyart ilkwa aneyen, ingwer-rnem-weny-apeny aney-angenharl. <sup>45</sup> Angka wethan, Ingkart-wenh antyerlelarl ngenh ilew, rarl innga wenh aynteyen. Akngeyan ngkweng inkwerelheyel, ngarl ikwer awelhew, rarl innga ngkweng angkew." Alakenh Elizabeth-an Mary-ew angkew.

#### *Mary-an Akngey-warl-athet aylelheyel*

<sup>46-49</sup> Mary rap alakenh Ingkartew aylelhenh-anem:

"Yew! Akngeyan atyeng iterreyel, ilek-ilek atyeng mpwareyew. Ayengan kwey aleyakarl, Akngeyewant anem, akely-anteyarl ayeng."

Atha renh nakem. Ayengan Akngey-warl-athet inkwerelheyel, rarl ayen arntarnt-areyel.

Nhepenh-anyem akngerran angkayntem, ‘Mary-ay! Akngeyel ilek-ilek ngkweng mpwarenh!’ Akngey mwerr-angker innga.

<sup>50</sup> Akngeyel angka ikwerenh-warl awelheyel-rnem arntarnt-arem; arrwekel-penh-rnem-then, rlengkeny-rnem-then, ingkern-penh-rnem-then.

<sup>51</sup> Ran rlterrk ikwerenh lwewarrernew. Ingwer-rneman mwerr-arrpantey illelhenn-rnemarl, Akngeyelan renh-rnem arlpertyelew, rap renh-rnem ikwer-wety intem-antey thwenew.

<sup>52</sup> Ingwer-rneman atyetyart ilkewernem anenharl, renh-rnem arrangkwarl arrerneynew. Arrangkwarl anen-hrnem rerneman atyetyart ilkewernem ikwer-rnem-angkwarraneyen.

<sup>53</sup> Ingwer-rneman angayakw amern-wenyarl anen. Akngeyelan ikwer-rnem anthew, mwerr-angker arlkweyew.

Ingwer-rneman akngerr-akertarl. Akngeyel ilek-ilek akngew, rap renh-rnem arrangkw-anemarl anthew.

<sup>54-55</sup> Awank-akerr Akngey arrwekelely-rnemew angkew, rarl ikwer-rnemel-arleng anayntem, ampernemel-arleng-then.

Abraham-ew ra angkew, ran ikwer ilkelheyel ampernemew-then, rap aleth-antey arntarnt-arem.

Inngarlap ran arntarnt-arenh iylpelerrey-angenharl. Iylpelerrey-angenh Israel-wenh-rnemew.

Intem-antey ra arntarnt-araynten, renh-rnem atnyenerl-anemel.”

Alakenh-anyem Mary-an Akngey-warl-athet aylelhenn.

<sup>56</sup> Ikwer-penh Mary Elizabeth-wenh apmer-itwew alkent irrpetyew anew, rap angkep-anem apmer ikwerenh-warl Nazareth-warl alpew.

### *John Baptise-emeley-angker renh irrngaral atnyeneyel*

<sup>57</sup> Mary-elan Elizabeth iwerlepew, angkep-anem apmer ikwerenh-warl alpew. Elizabeth-elan awey akely-anem atnyenew.

<sup>58</sup> Ingwer-rnem angkew Elizabeth-wenh-rnemew apmer ikwer-areny-rnemew-then alakenh, “Ingkart Elizabeth-ew iterrenh!” Rernemap ingkerrenh inkwerelhew. <sup>59</sup> Kel awey akely renh atnyenew, arla 7-penh ingwer-rnem Zechariah-wenh apmer-warlarl alhew. Rerneman renh artweleyew Jew-rnem-wenh-angkwarr. Rernemap iterrenh, renh itneweyew Zechariah-apeny. <sup>60</sup> Elizabeth ranap ikwer-rnem arrngert angkew, “Mpwelhenh-arey! Zechariah itnewey-angen. John-arl renh itneweyewan!”

<sup>61</sup> Rernem ikwer angkew, “Ilekewarl ntwa John-an itnewem? Mpwelewanthenrneman itnaan alakenh ayntyey-angen!” <sup>62</sup> Rernemap akerterant-anem iltyerrenh, angkeyew-arrpantey Zechariah-ew, awey-wenh aynikewew. Rernemap ayernew, “Ilek itna ntwa awey akelyewan arrernem?” <sup>63</sup> Zechariah itep iltyerrew, renh-rnem ayerneyew ampwal alyekew ingkwerneyew-arelhew. Rap alakenh ingkwernew, “Itnan John.” Rernem ywarn iterrew.

<sup>64</sup> Arntwapeny Zechariah-el itna ingkwernew, Akngeyelan renh angkiparrelew, Zechariah rap renhan nakew. <sup>65</sup> Ingwer-rnemarl rtnenherrenh-rnem atererrew, rernemarl Zechariah awew. Ywarn rernem iterrew, apatew-anem. Rernem alherlewew, angka ingwer-rnemew iterl-apenh, apwert-angkeyarr-itwewarl anen-hrnemew, Judea-ampeny-itwew. <sup>66</sup> Akngerrrel angka ampa akely John-akert awew. Rernem iterl-arew, ra Ingkart-wenh Inweng Mwerr-angker-akert. Rernemap ayernerrew, “Ampa akely yanh ilkwerreyenhelan, nthakenharlap ra irreyahan?”

### *Zechariah-an Akngey-warl-athet aylelhenn*

<sup>67</sup> John-wenh aynikw Zechariah rarl alakenh-anyem Inweng Mwerr-angker-akert aylelhenn:

<sup>68</sup> “Anantherran Israel-wenh-rnem, anantherr Ingkart nakem, Akngey anewantherrenh. Rap anewantherr-warl apey-alpew anaynteyew, anenhantherrenh arntarnt-araynteyew.

Rap apmwa anewantherr-wety irralkeyew, anenhantherrenh angkep ikwer-warl-athet pweytelemel.

<sup>69</sup> Ran atyetyart David-apeny thwenew, awank-akerrarl anen-hrnemew, David-wenh-antey. Ran anenhantherrenh iteth atnyen-ayntem Akngeyew.

<sup>70-72</sup> Alakenh-anyem angkakert Akngey-wenh-rnemel ilenh awank-akerran.

Akngeloyan anenhantherrenh ingwer-rnem ilkelhey-angen-h-wety iteth atnyen-ayntem, atwerreyelarl-wety-then.

Ra anenhantherrenh ilew, rarl arntarnt-araynteyen, iwerl-alhey-angen, arrangkw.

Ra anewanthererr iterr-ayntem, rarl Abraham awank-akerr ilew-angkwarr.  
 73-75 Akngeyel Abraham ilew,  
 'Atha arrenhantherrenh ingwer-rnem ilkelhey-angen-h-wety iteth atnyen-ayntem, atwerreyelarl-wety-then.'  
 Ran anenhantherrenh iteth atnyen-ayntem, anantherran renh apent-aynteyew atererrey-angenhel, ikwer intem-antey arraty anaynteyew.  
 Angka Akngey-wenh inneganemarl ayntem! Anantherr inkwerelhem Akngey-warl-athek."  
 Alakenh-anyem Zechariah Akngey-warl-athek aylelhenh.  
 76-77 Rap awey akelyew John-ew-anem alakenh aylelhew:  
 "Alereyay! Ngarl ilkwerreyehan, ingwer-rnemel ngenh angkakert Akngey-wenh ilayntem.  
 Akngeyan inngarl wenh irrwerl aneyel.  
 Nga alheyen, ingwer-rnem alakenh ileyew, 'Ingkartan apey-alpeyeh rlengk-penh-antey'  
 Nga alheyen, ingwer-rnem apmwangkwarr aneyel-rnem alakenh ileyew, 'Akngeyelan arrenhantherrenh irralkey-angker'  
 Rap renh-rnem iteth atnyen-ayntem ikwer.  
 78-79 Akngeyan mwerr-angker aneyel, ingwer-rnemew ingkerrenhew athamerremel.  
 Rlengkan anewantherr apmwarl aynteyel, atemwengkel-apeny aneyel.  
 Anantherr apmwangkwarr aneyel, iterl-arey-angenh, arraty alheyewan.  
 Anantherran illewerr atererreyel. Itwernel anewantherr iwerr lwewarrernem.  
 Alakenh-anyem Akngeyan apmer mwerr-angker-they apetyeyeh.  
 Rap anewantherr iwerr lwewarrernem, arraty anantherr anaynteyew.  
 Ran alakenh-anyem anenhantherrenh alpemelem, rarl anewantherr artewentyel ilkel-heyelarl."

Alakenh-anyem Zechariah-an alerewikwan aylelhenh.

<sup>80</sup> John rap ilkwanemerrew, Inweng Akngey-wenhel renh rlterrkelew-anem. Ra ament-anem arlpaw-itwew anenh-tangkwel, angka Akngey-wenh ingwer-rnemew-anem ilerl-apen.

## 2

### *Mary-el awey akely Jesus atnyeneyel*

1-2 John Baptise-emeley-angker atnyeneweng-arey, atyetyart anenh itnan Quirinius, ranap atyetyart apmer Syria-itwew. Artwa ilkwa ingweran apmer Rome-itwew anenh, itnan Atyetyart Augustus, ranap atyetyart ilkwarl apmer arrpanenhew. Ra ikweren-h-rnem ilanthew, apmer renh-rnem atnyenew-warl alherleweyew, itna pip-warl ingkwernelheyew. Aleyant alakenh ikweren-h-rnem itna pip-warl ingkwernelh-ayntew.

<sup>3</sup> Akngerr ingwerentyan apmer ikwer-rnem-wenh-warl alpew, renh-rnemarl atnyenew-ampeny-warl, itna pip-warl ingkwernelheyew. <sup>4</sup> Joseph tawen Nazareth-itwew anenheng-arey, Galilee-ampeny. Ran tawen Bethlehem-aren, Judea-ampeny. Apmer irrkaty-itwew atyetyart David-arl awank-akerr anenh-itwew, Joseph-anap David-wenh-anteyarl anew. Joseph-an Nazareth-they Bethlehem-warl alpew, itna pip-warl ingkwernelheyew.

<sup>5</sup> Mary-an ikwerel-arleng alpew arrpemarl. Akely-penh Mary Joseph-ew anthew, ratherrap arrangkw-antey aynteyang-penh-weny-antey. Mary-anap Inweng Mwerr-angker-akert mpwelhenh-anem. <sup>6-7</sup> Ratherrall Bethlehem-warl arrernelhew, ratherrap apmerew-arrpantey nthwenh, wak pwelek-wenhel-anem aylpemel aynteyew. Wak ikwer-itwew Mary-el awey akely atnyenew, rap renh ataperrelew pantyel. Rap athenew ampwal atherrkew-arelh-warl, pwelek-rnemarl wanteyelew-arelh-warl.

### *Antyerlel yep-yepew-artey-rnem ileyel, Jesus-arl atnyenew*

<sup>8</sup> Ankwarengel artwa yep-yepew-artey-rnem Bethlehem arrerenty anenh. Rerne-man apmelerrel-ayeth yep-yep-rnem arntarnt-arenh. <sup>9</sup> Antyerl Ingkart-wenhan aremerrey-alhew, rtney-alhew ikwer-rnem-itwew. Ranap rliterrk Ingkart-wenh-akert, rap ingkenyel-apeny arrtyernew. Yep-yepew-artey-rneman atererrew ikwer-wety.

<sup>10</sup> Antyerl ikwer-rnem angkew, "Atererrey-angenh! Ayengan apetyew, angka mwerr-angker ileyew. Angka nhenh arrenhantherrenh ingkerrenh irrngerney-antheyen."

<sup>11</sup> Tawen Bethlehem-itwew, atyetyart David-arl anenh-itwew, ampa akely ngwamp atnyenew. Ran apmwa irralkey-angker, itnan Christ. Renharl Akngeyel ilew, rarl ahern nhenh-warl thweneyew, ranap atyetyart ingkerrenhew aneyen. Nhanyem ran, Akngeyarl angkew, ra ahern nhenh-warl thweneyew. <sup>12</sup> Atharl arrewantherr

lwewarrernem, ampa akely renh areyew. Arrantherr alhenty Bethlehem-warl, ampa akely renh wak pwelek-wenh-itwew arey-alhenh-arey. Ra ataperrel aynteyel pantyel ampwal atherrkew-arelh-itwew, pwelek-rnemarl wanteyelew-arelh-itwew." Alakenh-anyem antyerlan yep-yepew-arteyp-rnemew angkew.

<sup>13</sup> Antyerlarl angkew-penh, antyerl akngerr-anem aremerrew irrwerl-they apmer ikwer-itwew, rernemap Akngey alakenh nakew:

<sup>14</sup> "Arrantherr ingkerrenhel Akngey irrwerl-areny mwerr-angker ilenh-arey! Akngeyan inkwelhem arrewantherr. Mwerr-angkwarr aneyel-rnem rernem arlka mwerr-anem aneyen!"

<sup>15</sup> Ikwer-penhan antyerl-rnem ywerrerl-alhew-anem, rernemap irrwerl-warl alpew-anem. Yep-yepew-arteyp-rnem angkerrew, "Mpa, alhey Bethlehem-warl, ampa nheng areyew, antyerlelarl anewantherr ilew." <sup>16</sup> Rernem anperlarr-alhew anamerl-antey, wak pwelek-wenh ikwer nthweweyew. Wak ikwer-itwew rernem aylpey-alhew, Mary-then Joseph-then arey-alhew ampa irrnarl akely-akert. Ran aynten ampwal atherrkew-arelh-itwew. <sup>17</sup> Rernem renh arew, rernemap aynikw-then amikw-then angka ilew, antyerlelarl ikwer-rnem iley-alhew. <sup>18-20</sup> Yep-yepew-arteyp-rnemel angka ikwer-atherr ilew-penh, Mary intem-antey angka ikwer iterreynen. Rernemap alpew-anem wak pwelek-wenh ikwer-they yep-yep-rnem-warl. Rernemarl alperlewenhel, rernem inkwelhemel aylelheynen Akngeyew alakenh, "Inngarl nhenhan! Anantherr ampa akely arey-alhew, antyerlelarl anewantherr ilew-angkwarr!" Ingwer-rnemel renh-rnem awew, inkwelhemelar aylelheynen Akngeyew, rernemap apatew.

*Joseph-el-then Mary-el-then ampa akely tyaty ilkewewarl akngeyneyel, renh itneweyew Jesus*

<sup>21</sup> Ampa akelyarl atyenew-penh, arlta 7-penh, Joseph-then Mary-then Jerusalem-warl ikwer-akert alhew. Ratherr renh tyaty ilkwa Jew-rnem-wenh-warl akngeynew. Ratherrap renh Jew-rnem-wenh-angkwarr artweleyew, renh itnewemel Jesus, antyerlelarl Mary arrwekel-antey ilew.

<sup>22</sup> Alkent anyent-penh Joseph-then Mary-then Jesus-akert angkep alpew Jerusalem-warl, tyaty ilkwa ikwer-warl arrpemarl, Moses-elarl akalty-anthenh-angkwarr. Ratherr Jesus tyaty ilkewewarl akngeynew, Akngey-warl renh antheyew Moses-wenh-angkwarr. <sup>23</sup> Moses-wenh-angkwarr alakenh aynteyel: "Awey arrwekeleny atyenem, aynelikw-then amelikw-then renh Akngey-warl-tangkwell anthem." <sup>24</sup> Angka rlterrk ikwer-angkwarr arrpemarl, "Ampa atyenem, amelikwan pwelker atherr Akngeyew anthem." Alakenh-warl Joseph-then Mary-then tyaty ilkewewarl alhew, pwelker atherr antheyew, artwa rlterremel katy arrtyeyew Akngey-warl-athet.

<sup>25</sup> Ikwereng-arey artwamp anyent Jerusalem-itwew anenh itnan Simeon. Ran mwerr-angker, ran angka rlterrk Akngey-wenh mwanty apenten. Ran Akngeyew arternp mpwelhenh. Ra areyew, ikweren-rnem Israel-wenh-rnem renh-rnem tyarlewent, ikwer-rnem-wenh-angkwarral anenh-wety. <sup>26</sup> Inweng Mwerr-angker ikwer awank angkew, "Ngarl itetharl aneyel-awayt, ntwap inngarl artwa renhan areyenh, Akngeyelarl thwenew." <sup>27</sup> Arlta ikwerel-antey Joseph-then Mary-then Jesus-akert tyaty ilkewewarl alhew, Inweng Mwerr-angkerel artwamp Simeon ilew, tyaty ilkewewarl arrpemarl alhewey.

<sup>28</sup> Simeon-el ampa akely Jesus arey-alhew, rap renh iney-alhew. Rap renh antwerrkew-anem, angkemel irrwerl-warl Akngey-warl-athet alakenh:

<sup>29</sup> "Ingkart ngan ilkwarl! Angka awankarl ntwa atyeng ilew, rap inngarl aleyan ayntem! Aleman ayeng mwerr-anem, ayengan mpwelheyel-anem ilweyew-athath."

<sup>30-31</sup> Atha awey akely arew-anem, ntwarl anewantherr-warl thwenew. Rarl ilkwerreynelan, ra apmwa akngerr-wety irrarkkeyen. Alakenh ngarl arrwekel-antey iterrew, renh thweneyew ingkerrew.

<sup>32</sup> Ra lyenenty-apeny, rarl alethangew-rnem iwerr lwewarrerneyen ngkweng-warl-athet.

Ingkerrelan ngkwenh-rnem Israel-wenh-rnem mwerr antweyen."

Alakenh-anyem Simeon angkenh Akngey-warl-athet.

<sup>33</sup> Aynikw-then amikw-then Jesus-wenh apateyelpew, ratherrarl awew, Simeon alakenh angkenh.

<sup>34</sup> Artwamp ra angka mwerr-angkwarr angkew ikwer-atherr, rap Mary-ew-anem angkew, "Akngelyelan ampengkw ngkwenh thwenew, raw Israel-wenh-rnem ingkerrew angkeyew. Ingwer-rnemel awelheyelarl-rnem Akngey-itwel aney-alpeyenh. Awelhey-angenh ingwer-rneman, ingwer-angkwarr rwelarl aney-alpeyenh. Ingwer-rnemel renh-rnem angka Akngey-wenh ilerl-aneyen. Awelhey-angenh-rneman arlkarerreyen, rernemap apmwel-ayeth angkerl-aneyen intem. <sup>35</sup> Rernem irryertel

apmwel-ayeth angkeyen-h-nem, iterrerl-anemel apmwel-ayeth rernem, kel ingwer-nmelan iterl-areyeharl. Mary, ngethen arkan apmwerrerl-alheyen-h, ntwarl areyehn, ampengkw ngkwenh ilwenty.” Artwamp Simeon-elan alakenh-anyem Mary ilew.

<sup>36</sup> Jerusalem-itwew arelhampw innga aneh, itnan Anna. Ranap angkakert, angka Akngay-wenh iley-angker. Ranap alerikw Phaniel-wenh, Asher-wenh-antey anew. Aleyakank ra itengerrew, rap anehn mpwernikw-akert aherrety 7-ew-atety, rap impert-anem irrew ingwer-ingwer. <sup>37</sup> Rap impert anehn, amperrel anehn aherrety 84-ew-atety. Arlti arrpanenh ra tyaty ilkewaral alhenh, Akngay-warl-athetk angkaynteyew. Itwernew-then ingwel-then ra angkaynteyew ikwer, rap amern arlkwey-angenh anehn, ra Akngayew angkaynteyew-athath.

<sup>38</sup> Simeon Mary-ew angkenheng-arey, Anna-an aylpenhew arrpemarl tyaty ilkewaral. Ingwer-rneman anehn arrpemarl. Rernem artwa ikwer mpwelhenn, Akngayelarl thweneyen-h. Raw Jerusalem-arey-rnem tyarleweyen-h, ikwer-rnem-wenh-angkwarrarl anehn-wety. Anna-el ampa akely-akert Nazareth-warl, Galilee-ampeny-warl. <sup>40</sup> Awey Jesus rap ilkwerreynenh-anem, Akngayew akaltyerremel. Akngayan ikwer inkwerelhew.

<sup>39</sup> Joseph-el-then Mary-el-then pwelker atherr Akngay-warl anthew-penh, ratherrap angkep alpew ampa akely-akert Nazareth-warl, Galilee-ampeny-warl. <sup>40</sup> Awey Jesus rap ilkwerreynenh-anem, Akngayew akaltyerremel. Akngayan ikwer inkwerelhew.

### *Jesus apmerrk-anem tyaty ilkwitew aneyel*

<sup>41-42</sup> Aherrety arrpanenhel Jew-rnem akarrerrem, kwenty arlkweyew. Rernemarl akarrerrem, amern ilperr-ilperr arlwarelheley-angenh arlkwew-arlkwem, aker yep-yep-then. Rernemap iylpangkem, antyerl Akngay-wenhelarl awey alkenh-rnem Egypt-arey-rnem-wenh atweyenh awank-akerr. Rap mentyarl arew awey alkenh-rnem Israel-wenh-rnem-wenh, renh-rnem ipmew atwey-angenh. Aynikw-then amikw-then Jesus-wenh apmell Jerusalem-warl alhenh. Jesus-an apmerrk-anem, 12-anem, ranap aleyst ikwer-atherrel-arleng alhew.

<sup>43</sup> Arlti irrpetiyap-penh rerneman ingkerrenh ipmelhew, Nazareth-arey-rnem alperlewew-anem. Jesus-an Jerusalem-itwew artenyarl anehn, aynelikw-then amelikw-then iterl-arey-angenh, apalel ratherr alpew. <sup>44</sup> Ratherran iterrew, ra ikwerenh-rnemel-arleng alperl-anenty-arrpantey. Alpew ratherr ingwel-anem irrew, ratherrap nthwenh-anem, ingwer-rnem ikwer ayernemel. <sup>45</sup> Arrangkw. Ratherrap ikwer ywarew, ingwepen-h-antey ingwer-ingweran angkep arrpemarl Jerusalem-warl alpew, ikwer nthweyew. <sup>46</sup> Arlti atherr-penhalan ratherr renh arey-alhew-anem tyaty ilkwa Jew-rnem-wenh-itwew. Rarl artwa angka Moses-wenhew akalty-anthey-angker-rnemel-arleng ampepel anehn. Jesus rap ikwer-rnem awelhenn, renh-rnem ayernemel-anem. <sup>47</sup> Rernemap apatew, rarl renh-rnem ametyew-arrernenh. <sup>48</sup> Aynelikw-then amelikw-then Jesus-wenhel arey-alhew, ratherrap apatew arrpemarl ikweran. Amikw ikwerenh ikwer angkew, “Ampay! Ilekewarl nga alakenh-anyeman iterrew? Aylernanthap ngkweng ywarn iterrew, apmer arrpanenhel ngkweng nthwenhan!”

<sup>49</sup> Jesus-elan ayernew, “Ilekewarl mpwelanthp atyeng nthwenh? Mpwelanthp iterl-aremer, Akngay atyehn-wenh apmerel ayeng anerl-aneyew!” <sup>50</sup> Ratherran iterl-arey-angen-h-antey, rarl ikwer-atherr angkewan.

<sup>51</sup> Jesus-an ilkwaterrel-arleng Nazareth-warl alpew-anem, rap intem-anem ikwer-atherr awelhenn. Amikwan angka ikwerenh-rnemew intem-antey iterreynenh. <sup>52</sup> Rap ilkwerrew, arraty-angkwarr-anem akalty-anem ra anehn. Akngayan ikwer inkwerelhew, ingwer-rnem-then ikwer ilkelhew.

## 3

### *John Baptise-emeley-angkerel akngerr akalty-antheyel (Matthew 3:1-12; Mark 1:3-8; John 1:19-28)*

<sup>1</sup> Atyetyart akngerr apmer arrpanenhel anehn. Artwa alkenh anyent Rome-arey anehn, itnan Atyetyart Tiberius, apmer arrpanenhew-arteyp. Ran aherrety 15-ew-atety atyetyart alkenh apmell arnenh. Artwa Rome-arey ingweran anehn, itnan Pontius Pilate, ranap atyetyartarl anehn Judea-ampeny-itwew. Artwa ingweran itna Herod, atyetyartan anehn Galilee-ampeny-itwew. Awayikw ikwerenhan itna Philip, atyetyartan anehn apmer atherrew-antey. Iturea-ampeny-itwew-then Traconitus-ampeny-itwew-then. Artwa ingweran itna Lysanius, atyetyartan anehn Abilene-ampeny-itwew. <sup>2</sup> Artwa Jew atherr anehn, Jerusalem-arey ratherran, itnan Annas-then Caiaphas-then. Ratherrap artwa rltwa anehn tyaty ilkwa Jew-rnem-wenh-itwew.

Artwa nhenh-rnem atyetyartarl anenheng-arey, John-an apmer arlpaw-ampenyel anenh. Zechariah-wenh alerikwarlap ran. Akngeyel angka ikweren ikwer ilew-anem.

<sup>3</sup> Kel John-el angka Akngey-wenh awew, rap ilpay Jordan-el-antey alhenh, rap angka ilerl-apen akngerr ingwer-rnemew alakenh:

"Arrantherran amperrngerrenh-arey, apmwetthey angkeperrenhey-alpenh-arey! Arrantherr iterreh-arey, arraty-angkwarr Akngey-warl-athek anaynteyew! Akngey rap apmwa ingkerr arrewantherrenh irrarkem. Atharl arrenhantherrenh baptise-emele kwaty-warl, ingwer-rnemel areyew, arrantherr apmwewetyt angkeper-renty!"

Alakenh-anyem John-el ingkerrenh ilenh.

<sup>4</sup> Nhenhan angka irrkaty-antey John-akert, Isaiah-el pip-warl ingkwernew awankakerr. Ranap angkakert Akngey-wenh, rap alakenh ingkwernew:

"Artwa anyent apmer arlpawel ament-areny arlkeyel-anem alakenh, 'Arrantherr iwerr arratyelenh-arey, Ingkart anewantherrenh rarl apetyeyenhew!'

<sup>5</sup> Alakenh-apeny wenh! Atwaty-atwaty ingkerrenh ahernel artem! Apwert arrpanenh akalthemel ilperr-ilperrelemel!

Iwerr amper-amper-rnem-then arratyellemel! Iwerr ikert-ikert-rnem-then alyelkelemel!

<sup>6</sup> Ingkerrelan aley ingwer-ingwer areyenh-anem, rap apmwa akngerr-wetyt irralkyeyen."

Alakenh-anyemarl Isaiah-elan pip-warl ingkwernew John-akert.

<sup>7</sup> Akngerr akarrerrenh John-warl apmer arrpanenh-they, ra renh-rnem kwaty-warl baptise-emel-aynteyew. John rap ikwer-rnem angkew, "Arrantherr irrywerl-amperney-angker-rnem! Arrantherr apmwel-ayeth apmwel-ayeth apek alakenh iterreyel:

'Anantherran Akngey-wenh-angkwarr alheyel. Anantherran kwaty-warl baptise-emelenty, Akngeyelanap anenhantherrenh apmwa antwey-angenh.'

Arrangkwaw! Apmwel-ayetharl aneyel-rnem, Akngeyel renh-rnem ikwer-wetyt arleng irrentem. Arrantherran apmwel-ayeth anenty, Akngeyelan arrenhantherrenh-anem arleng irrentem intem-antey. <sup>8</sup> Apmwel-ayetharl alheyel-penh, arraty-angkwarr-anem alhaynteyew. Apmwewetyt angkeperrenhey-alpenh-arey, Akngeyel areyew, arrantherrarl aneyel arraty-angkwarr. Arrantherr alakenh angkeyel:

'Anantherran Abraham-wenh-antey awank-akerr-penh. Akngeyel Abraham arntarn-tarenh, rap anenhantherrenh arleng ikwer-wetyt thweney-angenh, arrangkw.'

Arrantherr apmwel-ayeth iterreyel! Akngey ilkelhenty, ran Abraham-wenh-rnem apwert nhenh-rnem-they arnwarnewerr arrewantherr-wetyt. Rap arrenhantherrenh intem-antey irrentem. Nhan inngarl! <sup>9</sup> R lengkan Akngey mpwelheyel, apmwernem rwewarl iweyew. Rernem arwerl amern apmwakert-apeny. Arwerl nhelkwer anantherr arternemarl, rwewarl iwemel. Alakenh arrewantherr irrewerr, arraty-angkwarr Akngeyew alhemer!" Alakenh-anyem John ikwer-rnemew angkew.

<sup>10</sup> Rernemarl awewel, ayernew-anem, "Nthakenh irrem anantherr, arraty Akngeyew anaynteyew?"

<sup>11</sup> John-el tyernew, "Arrantherr arnkwa atherr atnyeneyel, anyentan ingwerentiyakew arnkewenewy anthenh-arey. Arrantherr amernarl atnyeneyel, ingwerentiyakew amern-wenyew antherreynemel."

<sup>12</sup> Artwer nem apwert akarreley-angker-rnem apetyew John-warl. Rernemap apwert kapmentew akarrelenh. Rernem apetyew ikwer-warl, ra renh-rnem kwaty-warl baptise-emeleyew. Rernemap ayernew, "Nthakenh irrem anantherr, arraty Akngeyew anaynteyew?"

<sup>13</sup> Ra tyernew, "Apwert akngerr akngey-angenh ingwer-rnem-wetyt. Apwert akngen-herr-arey, kapmentelarl ilanthew-angkwarr."

<sup>14</sup> Artwa ahawarr-rnem-anem apetyew John-warl, rernemap ayernew, "Nthakenh irrem anantherr, arraty Akngeyew anaynteyew?"

John-el tyernew, "Pwerp-anthey-angenh ingwer-rnem, rernem apwert antheyew. Ingwer-rnem iley-angenh, ikwer-rnemew nga irryterl angkem apek, rerneman apwert antheyneyew. Apwert akngerr angwarey-angenh. Arrantherr apwert-akert inkwer-hemel anerl-anemer, arrewantherrew-arteylearl warrk-penh anthew-akert."

<sup>15</sup> Ingkerrel awew, John-arl angkenh, rernemap inkwer-hemel iterreh-anem, "Artwa nhenh apek Akngeyelarl thwenew ahern nhenh-warl."

<sup>16</sup> John-an ingkerrew angkew, "Arrangkw. Ayengan artwa ingwerarl. Atha arwa baptise-emeley-angker kwaty-warlant. R lengk-penh-antey ranem apetyeyel, ayeng-apeny-wenyarlap ran. Ayengan warrkenh akelyarl, ranem atyetyart ilkwarl. Atharl kwaty-warl arrenhantherrenh baptise-emeley-angker. Ranap arrenhantherrenh

irrarlkey-angker Inweng Mwerr-angkerelarl, rwelarl apmwamwam irrarlkemel ampem-apeny.

<sup>17</sup> Angka atha arrewantherr ileyew. Anantherran ingkerrenh ntang-apeny. Arantherran iterl-areyel, arelhelarl ntang aympernem-apeny. Ra ntang mwerr-angker tyampet-warl arrerney nem, ingwer-ingwer arlkwaynteyew, irrnya ntang-penh rwe-warlarl iweynemel. Alakenh-anyem artwa ran apetyeyen, ranap mwerr-rnem-then apmwer nem-then amenteeleyen. Ran mwerr-rnem aleth-antey atnyeneyen, rap apmwer nem-rnem thalath-antey warl.” <sup>18</sup> Alakenh-anyem John-elan ingkerrenh ilenh. Rap aleth-antey angka mwerr-angker Akngey-wenh ilenh, rernem Akngey-warl-athek angkeperrenhey-alpeyew.

<sup>19</sup> John-elarl akalty-anthenheng-arey, artwa atyetyart Herod-an apmwel-ayeth anen. Rap anentyikw ayteyikw-wenh rakew, itna Herodias. Ra ikwer amentew atnyeneyew. Ayteyikw ikweren h itnan Philip. John-elan alakenh Herod iltew, “Ntwan apmwel-ayeth ayteyewengkw Philip-ew arnwärnew! Ilekewarl ntwa arelh ayteyengkw-wenhan rakah?” John-elan Herod iltenh, rarl aleth-antey apmwelhelenh.

<sup>20</sup> Herod apmwelhelew arrpemarl. Rap artwa ahawarr ikweren-hrnem ilanthew, John tyayl-warl akwerneyew. Rernemap renh akwernew, Herod-elarl ilew-angkwarz.

*John-el Jesus baptise-emeleyel kwaty-warl  
(Matthew 3:13-17; Mark 1:9-11)*

<sup>21</sup> John tyayl-warl akwerney-angen-h-antey, rap akngerr intem kwaty-warl baptise-emelh, Jesus-thenap ra baptise-emelew arrpemarl. Jesus kwaty-they tyerrelhey-ayntew, rap Aynewikw ikweren h angkenh. Anamerl-antey altywererrew alkeran, <sup>22</sup> Inweng Mwerr-angker-anem apetyew irrwerl-they thip-apeny. Pwelker-apenyarlap ran, rap Jesus-warl arrernelhew. Akngeyan angkew irrwerl-they, “Ngan anyentarl alerey atyen. Ayeng ngkweng artewentyel ilkelheyel. Ntwa ayen irrngerney illem.”

*Jesus-wenh-rnem anen awank-akerr*

<sup>23</sup> John-elarl renh kwaty-warl baptise-emelew-penh, Jesus rap alhenh, ingwer-rnem akalty-anterl-apen. Ran 30-anemarl irrew. Akngerran iterrenh, ra Joseph-wenh alerikw-arrpantey.

<sup>24</sup> Joseph-an alerikw Heli-wenh. Heli-an alerikw Matthat-wenh. Matthat-an alerikw Levi-wenh. Levi-an alerikw Melki-wenh. Melki-an alerikw Jannai-wenh. Jannai-an alerikw Joseph-wenh.

<sup>25</sup> Joseph-an alerikw Mattathias-wenh. Mattathias-an alerikw Amos-wenh. Amos-an alerikw Nahum-wenh. Nahum-an alerikw Esli-wenh. Esli-an alerikw Naggai-wenh.

<sup>26</sup> Naggai-an alerikw Maath-wenh. Maath-an alerikw Mattathias-wenh. Mattathias-an alerikw Semein-wenh. Semein-an alerikw Josech-wenh. Josech-an alerikw Joda-wenh.

<sup>27</sup> Joda-an alerikw Joanan-wenh. Joanan-an alerikw Rhesa-wenh. Rhesa-an alerikw Zerubbabel-wenh. Zerubbabel-an alerikw Shealtiel-wenh. Shealtiel-an alerikw Neri-wenh.

<sup>28</sup> Neri-an alerikw Melki-wenh. Melki-an alerikw Addi-wenh. Addi-an alerikw Cosam-wenh. Cosam-an alerikw Elmadam-wenh. Elmadam-an alerikw Er-wenh.

<sup>29</sup> Er-an alerikw Joshua-wenh. Joshua-an alerikw Eliezer-wenh. Eliezer-an alerikw Jorim-wenh. Jorim-an alerikw Matthat-wenh. Matthat-an alerikw Levi-wenh.

<sup>30</sup> Levi-an alerikw Simeon-wenh. Simeon-an alerikw Judah-wenh. Judah-an alerikw Joseph-wenh. Joseph-an alerikw Jonam-wenh. Jonam-an alerikw Eliakim-wenh.

<sup>31</sup> Eliakim-an alerikw Melea-wenh. Melea-an alerikw Menna-wenh. Menna-an alerikw Mattatha-wenh. Mattatha-an alerikw Nathan-wenh. Nathan-an alerikw David-wenh.

<sup>32</sup> David-an alerikw Jesse-wenh. Jesse-an alerikw Obed-wenh. Obed-an alerikw Boaz-wenh. Boaz-an alerikw Salmon-wenh. Salmon-an alerikw Nahshon-wenh.

<sup>33</sup> Nahshon-an alerikw Amminadab-wenh. Amminadab-an alerikw Admin-wenh. Admin-an alerikw Arni-wenh. Arni-an alerikw Ram-wenh. Ram-an alerikw Hezron-wenh. Hezron-an alerikw Perez-wenh. Perez-an alerikw Judah-wenh.

<sup>34</sup> Judah-an alerikw Jacob-wenh. Jacob-an alerikw Isaac-wenh. Isaac-an alerikw Abraham-wenh. Abraham-an alerikw Terah-wenh. Terah-an alerikw Nahor-wenh.

<sup>35</sup> Nahor-an alerikw Serug-wenh. Serug-an alerikw Reu-wenh. Reu-an alerikw Peleg-wenh. Peleg-an alerikw Eber-wenh. Eber-an alerikw Shesar-wenh.

<sup>36</sup> Shesar-an alerikw Cainan-wenh. Cainan-an alerikw Arphaxad-wenh. Arphaxad-an alerikw Shem-wenh. Shem-an alerikw Noah-wenh. Noah-an alerikw Lamech-wenh.

- <sup>37</sup> Lamech-an alerikw Methuselah-wenh. Methuselah-an alerikw Enoch-wenh. Enoch-an alerikw Jared-wenh. Jared-an alerikw Mahalalel-wenh. Mahalalel-an alerikw Kenan-wenh.
- <sup>38</sup> Kenan-an alerikw Enosh-wenh. Enosh-an alerikw Seth-wenh. Seth-an alerikw Adam-wenh. Adam-an artwa arrwekelely, Akngeyelarl arnwarnew.

## 4

*Arrenty ilkwelan Jesus arrkerneyel  
(Matthew 4:1-11; Mark 1:12-13)*

<sup>1</sup> Jesus Inweng Mwerr-angker-akert anperl-alhew ilpay Jordan-they. Inweng Mwerr-angkerl renh atnwenheynew apmer arlpaw-warl. <sup>2</sup> Apmer ikwer-itwew arrenty ilkwel renh arrkerneh inwek 40-ew-atety, renh Akngey-wety intwemeleyew-arrpanterey. Arlt aarrpanenh amern-weny ra anenh, angayakw innganem irrew.

<sup>3</sup> Arrenty ilkwa ra Jesus-warl alhew, rap ayernew, "Inngang ngan Alerikw Akngey-wenh? Ila awpert nhnenh, amern irreyew, ntwa arlkweyew!"

<sup>4</sup> Jesus-el tyernew, "Arrangkw wenh! Nthekwern atha arnwarney-angenh! Alakenh aynteyel pip Akngey-wenhel:

'Nthekwern arrantherr iteth intem-antey aneyang, amernant arlkwemel.'

<sup>5</sup> Ikwer-penh arrenty ilkwel Jesus atnwenhew apwert irrwerl inngewarl, apmer arrpanenhap lwevarrenenh. Rap angkew ikwer, <sup>6</sup> "Akngeyel atyeng apmer arrpanenh-then ilek-ilek mwerr-angker-then anthew. Ayeng ilkelhenty, athap anthem ingkerrenh-antey ingwerentyakew. <sup>7</sup> Nga atyeng kwenerrenty, athap ngkweng ingkerrenh-antey anthem arrpemarl."

<sup>8</sup> Jesus-el tyernew, "Arrangkw wenh! Nthekwern ayeng ngkweng awelhey-angenh! Alakenh aynteyel pip Akngey-wenhel:

'Arrantherr kwener-aynteyew Akngeyewant. Anyentew ikwerew awelh-aynteyew.'

<sup>9</sup> Arrenty ilkwel Jesus atnwenhew tawen Jerusalem-warl-anem. Rap renh irrwerl rnkernew tyaty ilkwa Jew-rnem-wenh-warl, irrwerl innga. Rap ayernew, "Inngang ngan Alerikw Akngey-wenh? Atnarnpa warl irrwerl nhenh-they ahern-warl! <sup>10</sup> Alakenh aynteyel pip Akngey-wenhel:

'Antyerl-rnem ileyeh Akngeyelan, ngenh mwanty arntarnt-araynteyew. <sup>11</sup> Rernemap itep-they ngenh antwerrkenheyew, aytnewrann. Nthekwern ngenh atwey-angenh, arrangkw.'

<sup>12</sup> Jesus-el tyernew, "Arrangkw wenh! Nthekwern ayeng ngkweng awelhey-angenh! Alakenh aynteyel pip Akngey-wenhel arrpemarl:

'Akngey arrkerney-angenh, ra apmwelheleyew-arrpanterey.'

<sup>13</sup> Arrenty ilkwel rarl Jesus arrkerneh-penh, rap ywerrerl-alhew-anem. Rap ikwer mpwelhenh ingwer-ingwerwant-anem.

<sup>14-15</sup> Jesus-an Inweng Mwerr-angker arawerrng-akert rap angkep alpew Galilee-warl. Rap tyaty Jew-rnem-wenh arrpanenh-warl alhenh, renh-rnem akalty-antherl-apaynteyew Akngeyew. Galilee-areny-rnem angkerrenh alakenh ikwer, "Ran mwerr-angkwarr anenhantherrenh akalty-antheyel."

*Nazareth-areny-rnem Jesus-wety arlkarerreyel  
(Matthew 13:53-58; Mark 6:1-6)*

<sup>16</sup> Jesus alhew tawen Nazareth-warl, rarl ilkwerrew-warl. Saturday-el, arlt alyerrey-angker Jew-rnem-wenh-angkwarr ikwerel, ra tyaty Jew-rnem-wenh ikwer-itwew aney-alhew. Ran apmelerr alhenh. Rap rtnerl-alhew, angka Akngey-wenh ingwer-rnemew reytemeleleyew. <sup>17</sup> Artwa rltwa warlew-arteylel pip arlpenty anthew ikwer ranap angkak-ert Isaiah-el awank-akerr ingkwernewarl. Ranap pip panty-apey ataperreleyelarl. Jesus-el pip arlpimpelew, rap angka nhanyem arew-anem, rap ingwer-rnemew alakenh reytemelew-anem:

<sup>18</sup> "Ayengan Inweng Mwerr-angker-akert-anem. Akngeyel ayenh rlwanew, angka mwerr-angker ikwer-akert irrepern-rnem-warl ilaynteyew, akwerrp-rnem-warl-then iterl-arey-angenh-rnem-warl.

Ingwer-rnemew apmwelarl, renh-rnem rwepel-apey arertnew. Akngeyel ayenh thwenew, renh-rnem ileyew, ra apmwa ikwer-rnem-wety irrarlkemarl.

Ra ayenh thwenew aparrng-rnem-warl, rernem areyew-awayt.

Ra ayenh thwenew, ingwer-rnem-then ileyew, Akngeyel renh-rnem arntarnt-aremarl, ingwer-rnemelarl apmwel-ayeth ikwer-rnem arnwarnem-wetyan.

<sup>19</sup> Ra ayenh thwenew, ingkerrenh ileyew, 'Akngeyan arrewantherr iterreyel, ra arrenhantherrenh akngey-alpeyew angkep ikwer-warl.'

<sup>20</sup> Jesus-el angka reytemelew-penh, rap pip ataperrelew, angkep antheynew artwa rltwa warlew-arteyew. Rap arrernelheynew-anem, ingwer-rnem akalty-antheyew. Rernemap renh atwew-arenh. <sup>21</sup> Rap angkew ikwer-rnemew, "Angka yanhan atyeng-akert, Isaiah-elarl ingkwernew. Angka atharl ngwamp reytemelenh, inngarlap ran rlengk aystem."

<sup>22</sup> Rernemarl awewel, Jesus-arl alakenh angkew, rernemap apateyelpew. Nakewanem renh ayernerremel rernem, "Nthekwern ra angkeyel alakenh? Ran alerikw Joseph-wenh, apmer nhenh-areny!" <sup>23</sup> Ra angkew ikwer-rnem, "Atha arrenhantherrenh iterl-areyel. Arrantherr ayen hilem, 'Jesus-ay! Ntwa mwerr-angker mwanty mpwara arawerrng-akertel apmer nhenh-itwew, ngarl ilkwerrew-itwew!' Arrantherr awew, ingwer-rnemarl angkerrenh, atharl arntety-rnem mwerrelenh tawen Capernaum-itwew. Arrantherr ayen ayernem apek, athan alakenh mpwarey-angker. Arrantherr apek ayen alakenh kwanthem, 'Ngangkeray! Ntwa ingwer-ampeny-areny-rnem mwerrelenh! Nhenh-areny-rnem-alew?" <sup>24</sup> Kel awelhenh-arey atyeng! Apmer ingwer-areny-rnem angkakert Akngey-wenh awelhem, apmer ikwerenh-areny-rneman arrangkwarl.

<sup>25</sup> Awelheyel arrantherr atyeng? Arrantherr angka Elijah-akert iterl-areyel. Ranap angkakert Akngey-wenh Israel-areny awank-akerr anen. Akngeyelan kwaty thweneyangarl aherrety irrpetyelan. Amern-weny aytent, ingkerrenh-anem angayawan apmer ikwer-itwew. Kel akelyt invert Jew-rneman akngerral anen Israel-itwew. <sup>26</sup> Akngeyelanap Elijah thweneyangarl akelyt invert Jew ikwer-rnem-warlan, renh-rnem alpemeleyew, arrangkwarl. Ra renh thwenew akelyt invert Sidon-areny-warl, tawen Zephany-areny-warl.

<sup>27</sup> Arrantherr angka Elisha-akert iterl-areyel. Ranap angkakert Akngey-wenh Israel-itwew awank-akerr anen arrpemarl. Apmer ikwer-itwew arntety Jew-rnem akngerr anen tywen-angketyarr. Elisha-elan ikwerenh-rnem mwerreley-angenh, arrangkw. Ranap artwa alethang Naaman mwerrel, apmer ingwer-areny Syria-areny." Alakenh-anyem Jesus-el akalty-anthenh.

<sup>28</sup> Kel ingkerrenharl warl ikwerel anew-anen awelherremel, rerneman Jew-rnemarl. Jesus rernem awew, rarl alakenh angkenh, rernemap ahelerrew ikwer. <sup>29</sup> Rernemap rtnerlarr-alhew, renh antwerrkemel, atnwenheynemel aketh-warl arleng. Tawen Nazareth ranap apwert-itwew irrwerl. Rernemap renh akngeynew apwert impalth-warl, renh twetiweyw irrwerl-they, ra aytneyew kwenel-athek ilwelye. <sup>30</sup> Rernem nthekwern renh antwerrkey-angenh, arrangkw. Ran alanty-alperl-alhew ikwer-rnemwety.

#### *Jesus-el arrenty irrenteyel artwa anyent-they*

<sup>31</sup> Ikwer-penh Jesus tawen Capernaum-warl alhew, Galilee-ampeny-warl. Ran apmer ikwer-itwew aney-alhew Saturday-ew-atety. Arlta ikwerel-antey, arlta Ityerrey-angker Jew-rnem-wenh-angkwarr ikwerel, rap aylpew tyaty Jew-rnem-wenh ikwer-warl. Rap angka Akngey-wenh akalty-anthenh. <sup>32</sup> Angka ikwerenhant rap ilenh, angka ingwer-rnem-wenh iley-angenh, arrangkw. Rernemap apatewari ikwer. <sup>33</sup> Artwa arrenty-akert anen warl ikwer-itwew. Rarl akalty-anthenh-arey, arrenty alakenh arlkew, <sup>34</sup> "Ay! Ngan Jesus Nazareth-areny! Nthakenh ileyeh ntwan anenhantherrenh? Ngang irrwerl-they apetyew, anenhantherrenh irrenteyew? Atha ngenh iterl-areyel. Ngan artwa mwerrarl, Akngeyelarl thwenew. Ngan inngarl ikwerenh!"

<sup>35</sup> Jesus-el arrenty iltew, "Nga akeleyt anaynta! Tyerrelha ikwer-they!" Arrentyelan artwa renh ilatwew athenemel, rap ikwer-they tyerrelhew-anem. Artwa renhanap akep-akalthey-angenh-antey, mwerr-antey.

<sup>36</sup> Ingkerrelap arew, rernemap apatew angkerremel-anem, "Angka ilek-ampeny ran angkeyel? Artwa nhenhel angka rltterrk ingwer-lkwer ileyel. Ran arrenty-rnem ileyel, rernemap iylparethelarl awem! Rernem tyerrelherl-alhem, alpem-anem!" <sup>37</sup> Apmer yanh-areny-rnemel angka ikwer-akert ileyenh ingwer-rnemew Galilee-areny-rnemew.

#### *Jesus-el akngerr ingwer-rnem mwerreleyel*

(Matthew 8:14-17; Mark 1:29-34)

<sup>38</sup> Ikwer-penh Jesus warl ikwer-they anperl-alhew, apmer Simon-wenh-warl-anem alhew. Simon-ew apelty-rnemel renh ayernew, "Mwerikw Simon-wenh arntety aytentey warl nhak-itwew, akpwert rwemp innga. Ntwa apek renh alpemelem?" <sup>39</sup> Ra rtney-alhew akelyt arntety ikwer-itwel, rap angkew, "Ipmelha! Tyerrelha ikwer-they!" Arwapeny tyerrelherl-alhew arntety ran, rap ywerrrel-alhew-anem. Akelyt rap akwentenhey-alpew, amern-anem ikwer-rnem anthew.

<sup>40</sup> Arlta ikwerel-antey, itwernan aylperl-alhenhel, apmer ikwer-areny-rnemel arntety-rnem arrenty-akert-rnem-then akngetyeh Jesus-warl, ra mwerreleyew. Ra itep-anem

arrernenh ikwer-rnem-warl, mwerrelelemel. <sup>41</sup> Arrenty-rnem tyerrelhenh ingwer-rnem-they, arrenty rernemap ikwer arlkenh, “Ngan Alerikw Akngey-wenh!” Rernem iterl-arew, Akngeyelarl renh thwenew ahern nhenh-warl. Arrenty-rnem ilkelhew, angka ikwer-akert ingkerrenhew ileyew. Rap arrenty renh-rnem akeleytelew apatelhelemel, ilewerr ingwer-rnem-warl.

<sup>42</sup> Ingwepenih ingwerelan itwernarl aherlkewel-anem. Rap akwenterl-alhew, apmer ingwer-warl-anem anperl-alhew, apmer akeleyt-ampeny-warl-anem. Ra ament-anem anaynteyew, Akngey-warl-athek angkaynteyew-anem. Arntety-penh-rneman ikwer nthwenh arrpemarl ingkernan. Rernem renh arey-alhew, ikwer angkemel, “Nga anemer anewantherrel-arleng.” <sup>43</sup> Ra tyernew, “Arrantherr iterreyel arewantherrenharrp-angkwarr. Akngeyel ayenh thwenew, angka mwerr-angker Jew-rnem ingkerrew ileyew. Atha renh-rnem ileyew, Akngeyan Ingkart ingkerrew apmer arrpanenh-arenyew aneyel. Nthekwern ayeng anayntey-angken arewantherr-itwel apmer nhel. Ayeng alheyew apmer ingwer-rnem-warl-then. Kel ayeng alpeyel-anem.”

<sup>44</sup> Ikwer-penh Jesus-an alhenh ingweram-angkwarr apmer Jew-rnem-wenh-itwew. Rap angka mwerr-angker Akngey-akert ilerl-apenh tyaty Jew-rnem-wenh arrpanenh-itwew.

## 5

*Jesus-elan kwertengel-rnem irrpety rlwaneyel  
(Matthew 4:18-22; Mark 1:16-19; John 1:35-42)*

<sup>1</sup> Ingwer-ingweran Jesus kwaty alay impalthel rtnen Galilee-itwew. Akngerr akarrenrenh, angka Akngey-wenh awaynteyew. Arrerant-arey rernem ikwer-itwew rtnenherrew, arrer-they awaynteyew. <sup>2</sup> Rap rtnwa atherr arew, kwaty impalth-itwewarl rtnen. Rtnnew-arteyp-rnem aylperr antwerrkey-angker-rnem, rernemarl netting rwep-penh aylperrew-arelh irrarlkenh. <sup>3</sup> Ra rtnwa anyent-warl nganerl-alhew, ranap Simon-wenharl. Rap Simon ilew, ra rtnwa renh arleng-awatyeleyew impalth-they. Rap rtnwa arleng-awatyeleyew. Jesus rap arrernelhew-anem, rap rtnwel anerl-anemel akngerr innga akalty-anthenh.

<sup>4</sup> Rarl akalty-anthenh-penh, rap Simon-ew angkew, “Rtnwa nhenhel alherlewey kwaty intwer-warl-awaty. Ntwa ngkweng apeley-rnemel-then netting kwaty-warl atwarrelhelenh-arey, aylperr-rnem antwerrkeyew.”

<sup>5</sup> Simon-an angkew, “Anantherr ankawakel ywarn-antey arrkernenh, aylperr-rnem antwerrkeyew-arrpaney. Arrangkw! Kel athap netting atwarrelhelem, aylperr-rnem antwerrkeyew, ntwarl ilanthew.” <sup>6</sup> Rernemap kwaty intwer-warl-awaty alherlewey, netting atwarrelhelew, aylperr akngerr innga antwerrkew-anem. Netting akeleyew-anew-anem aylperr akngerr-akert. <sup>7</sup> Ra akelehewerr, rernem rtnwa ingwer-akert-rnemel ilyterrew-anem, renh-rnem alpemeleyew. Ingwer-rnem apetyew, rernemaw ingkerrenh netting rtnwa atherr-warl ayteng-ineyew. Rtnwa atherran aylperl-alheyew-anew, aylperr akngerrelarl awerrelew.

<sup>8-10</sup> Aylperr antwerrkey-angker-rnemel aylperr akngerr arew, rernemap apateyelpew-anem. Simon Peter-then ikwer apeley atherr-then, James-then John-then, rerneman apateyelpew arrpemarl. James-then John-then ratherr alerikw-atherr Zebedee-wenh.

Simon Peter rap Jesus-ew kwenerrew-anem angkemel, “Atyetyart, alha arleng atyeng-wety! Ayengan artwa apmwai!”

Jesus-an Simon Peter-ew angkew, “Atererrey-angkenh. Ntwa aylperr akngerr inenh-apey awank-they, nhepenh-anyem ntwa artwa akngerr-anem Akngey-warl akngey-apeyehn.”

<sup>11</sup> Ikwer-penh rernem rtnwa atherrel impalth-warl alpew, arlwereng-warl iytarr-akngew, rnkernenhemel. Simon Peter-then James-then John-then rernem ingkerrenh-antey iwerlelpew, Jesus-anem apertenhew.

*Jesus-el artwa tywen-angketyarr mwerreleyel  
(Matthew 8:1-4; Mark 1:40-44)*

<sup>12</sup> Ikwer-penh Jesus anenh apmer ingwerel. Apmer ikwer-itwew artwa anyent tywen-angketyarr anenh. Rarl renh arew, ra kwenerrew-anem ikwer ahern-warl angkemel, “Ingkartay! Atha iterl-areyel, ntwa arnty mwerreley-angker. Nga ilkelhenty, tywen-rnem mwerrela atyeng-itwew. Yenp alyelkela.”

<sup>13</sup> Rarl amperngerrew-anem ikwer, rap itep-anem ikwer-warl arrernew angkemel, “Ya wenh! Atha ngenh mwerreleyew!” Arwapeny tywen-rnem arrangkwerrenhew.

<sup>14</sup> Rap renh ilew-anem, “Ingwer-rnem-warl ilelhey-angkenh, tywen-rnemarl mwer-rerrew! Alhetangkwel tyaty Jew-rnem-warl. Artwa rltwa tyatyw-artey ikwer ilelha.

Arternp rtna, ra arlka ngenh areyew. Ra ngenh areyew, nga mwerr-anem tywen-weny-anem. Aker-anem ikwer antha, ra ngkweng katy arrtyeyew, Moses-elarl ilew-angkwarz. Alakenh-anyem akngerrel iterl-areyew, ngarl mwerr-anem irrew."

<sup>15</sup> Artwa ranap ingwer-rnemew ilelherl-apenh. Angka Jesus-akert arlpimperrew apmer arrpanenh-warl. Akngerr-anem akngerr-anem akarrerrenh ikwer-warl, angka ikwerenaweyew, arntety-penh mwerrerreyew. <sup>16</sup> Akngerr-wetyan ra anperl-alhenh ament-antey apmer alkey-warl, Akngey-warl-athet angkaynteyew.

*Jesus-el artwa lerrp mwerreleyel Capernaum-itwew  
(Matthew 9:1-8; Mark 2:1-12)*

<sup>17</sup> Ingwer-ingwer Jesus anenh warl anyent-itwew kwen, akngerr akalty-anthenh. Artwa Pharisee-rnem artwa angka Moses-wenhew akalty-anthey-angker-rnem-then rernem anenh. Ingwer-rnem Jerusalem-areny, ingwer-rnemarl apmer arrpanenh-areny, Galilee-ampeny-areny, Judea-ampeny-areny. Akngeyel renh rlterrkelnh, arntety akngerr mwerrel-aynteyew.

<sup>18</sup> Artwa ingwer-rnem apetyew, artwa lerrp panty-akertel akngetyemel. Rernem kwen akngeyew, Jesus-ew arrerenty arrerneyew. <sup>19</sup> Ingwer-rneman rtnenherrenh arriwel-antey, nthakenh kwen aylpey-angenh, arrangkw. Rernemap iterrew, artwa lerrp ikwer-akert nganenheyew ladder-angkwarz warl irrwerl-warl. Warl renh irrwerl altywerelew-penh, rernemap artwa arntety renh pantyinp rwepel atwarrelhelew ampep-warl, Jesus-arl anenh-warl.

<sup>20</sup> Jesus-el artwa lerrp arew ikwer apetyl-rnem-then, rap iterrew, "Artwa nhenn-rnemel iterl-areyel, atha renh mwerreley-angker." Rap angkew artwa lerrpew, "Athan apmwaa ngkweng-wety irrarkem. Atha ngenh atwey-angenh, ngarl apmwel-ayeth anenh-panhan."

<sup>21</sup> Artwa Pharisee-rnem artwa angka Moses-wenhew akalty-anthey-angker-rnem-then rernem awew, Jesus-arl ikwer angkew. Rernemap iterrenh, "Nthekwern ra alakenh angkey-angenh! Ran Akngey-arrpantey iterreyel! Akngeyelant apmwaa irrarkkey-angkeran, angkep pweyteleyew!"

<sup>22</sup> Kanper-antey Jesus-el iterl-arew, rernemarl iterrenh. Rap ayernew, "Ilekewarl arrantherr alakenh atyeng iterreyel? <sup>23</sup> Nthakenh ayeng irrem artwa lerrp nhennhew? Atha apek apmwaa ikwer-wety irrarkem. Atha apek ilanthem, ra rtnerl-alheyew. <sup>24</sup> Ayengan Artwa Inngarl Akngey-wenh, atha lwewarrerneyew, Akngeyelarl arawerrng atyeng anthew, apmwaa ingkerrenh irrarkkeyew." Jesus-an angkew artwa lerrpew, "Awelha atyeng. Rtnerl-alha, panty ngkwennh inerl-alha, apmer-warl-anem alpemel!"

<sup>25</sup> Anamerl-antey artwa lerrp-perh rtnerl-alhew, panty ikwerenh inerl-alhew, apmer-warl-anem alpew. Rap aylelheynen inkwerelhemel Akngeyew, apmer-warl alpenhel. <sup>26</sup> Ingkerrel renh intwarenh, rarl apmer-warl alpenh panty-akert. Rernemap apatelypew, inkwerelhemel-anem angkerrenh, "Inngang wenh! Akngey rlterrk inngarl! Aleyant anantherr ngwampant alakenh arew!"

*Jesus-el artwa Levi rlwaneyel, renh apent-aynteyew  
(Matthew 9:9-13; Mark 2:13-17)*

<sup>27</sup> Jesus-el artwa lerrp mwerrelew-penh, rap warl ikwer-they alpew-anem. Ra warl apwert akarreleyew-arelh arey-alhew. Artwa anyent warrkerrenh warl ikwer-itwew itnan Levi. Itna ingweran Matthew, rap apwert-anem akarrelenh kapmentew. Apwert akarreley-angker-rnem akngerr irryert-awarr-rnem. Rernem apwert akngerr iney-angker atnyenemel, akelyant anthem kapmentewan. Jesus-el Levi arey-alhew, rap angkew, "Atyeng-angkwarz-anem apetya, ayenh apentemel!" <sup>28</sup> Levi rtnerl-alhew, warrk ikwerenw iwerlelpew, Jesus-anem apenten.

<sup>29</sup> Ikwer-penh Levi-el Jesus kwertengerl ikwerenh-rnem-then atnwenheynew warl ikwerenh-warl, kwenty arlkweyew. Apwert akarreley-angker-rnem arlkwemel anenh. Ingwerentyak-rnem-then anenh, angka Moses-wenharl apentyang-angker-rnem. <sup>30</sup> Artwa Pharisee-rnem artwa angka Moses-wenhew akalty-anthey-angker-rnem-then rernem anenh arrpemarl. Rernemap kwertengerl-rnemew angkew, "Apwert akarreley-angker-rnem-itwel arrantherr arlkwemel aneyel, angka Moses-wenh apentyang-angker-rnem-then-itwelan! Ilekew arrantherr alakenhan?"

<sup>31</sup> Jesus-el awew, rernemarl angkew, rap angkew, "Ngangker-rnemel nthekwern mwerr-rnem mwerreley-angenh, arrangkw. Arntetyant mwerreley-angker. <sup>32</sup> Nthakenh atha alakenh mwerr-rnem iley-angenh, anaynteyew arraty-angkwarz. Ayeng apetyew, atha apmwernemant ilaynteyew, Akngey-warl angkeperrenhey-alpeyew, ikwerewant anaynteyew."

*Angka arrwekelenyew awelhey-angnenh. Angka Jesus-wenhew awelh-aynteyew  
(Matthew 9:14-17; Mark 2:18-22)*

<sup>33</sup> Ingwer-rnemel Jesus ayernew, “Akngerr-inger kwertengerl John-wenh-rnem kwertengerl artwa Pharissee-rnem-wenh-then rernem amern arlkwey-angnenh-anem arlengew-alenty anem, Akngey-warl-athek angkaynteyew. Alep arrantherr-alew? Ilekew ntwan kwertengerl ngkwenh-rnem-themel intem amern arlkwem?”

<sup>34</sup> Jesus-el angka ilew renh-rnem alakenh: “Arrantherr iterl-areyel, artwethen arelh-then arlwetherren anewantherrenh-angkwarr. Artwa arlwetherrenh-aynteyew-athath, ikwer apely-rnem apetyem apmer ikwerneye-warl, rernemap tyenkerr-anem arlkwem ingkerrenh. Rernemap arlkweyel aleth-antey, rarl aneyel-awayt ikwer-rnemel-arleng.

<sup>35</sup> Ikwer-penh artwa renh akngew-penh, rernemap amern arlkwey-angnenh irrem. Artwa rapeny ayeng ywerrerl-alheyen h kwertengerl-rnem-wety. Rernem amern arlkwey-angnenh anem, Akngey-warl-athek angkaynteyew-anem.”

<sup>36</sup> Jesus ikwer-rnem angkew, “Atha angka nhanyem ileyew arnkwa awankeny-akert, altherrk-akert. Nthakenh ntwa arnkwa ngwampeny-they akalthey-angnenh, awankeny-warl wap arrerneyew, arrangkw. Arnkwa ngwampeny rap apmwamwam irewerr. Nthekwern ntwa arnkwa ngwampeny awankeny-warl atanthey-angnenh, ingwer-lkwerarlap aynteman.”

<sup>37</sup> Jesus-el angka ingwer-anem ilew ampwal ngkwarl waynew-arelh-akert, ampwal yenp nanikwet-penh arratty-apeny-akert. Rap angkew, “Nthekwern anantherr ngkwarl wayn rlengkeny rlkwerrp-akert theley-angnenh ampwal awankeny-warl, rap wangkemarl antyerlperremel. Artwa akwerrp alakenh irrem. Ngkwarl wayn thelelhem ampwal-they ahern-warl, ampwal ranap apmwamwam. <sup>38</sup> Artwa akaltyel thelem ngkwarl wayn rlengkenyan ampwal rlengkeny-warl, arraty-angkwarr.”

**Anaynteleyel: Jesus-el angka ilenh, renh-rnem akalty-antheyew. Arnkwa awankeny yenp awankeny-then angka Akngey-wenh arrwekeleny-apeny, Moses-elarl akalty-anthenh-angkwarr. Jesus-wenh angkangkwarr aynteyel arnkwa rlengkeny yenp rlengkeny-then-apeny.**

<sup>39</sup> “Ngkwarl wayn antywenh-antywenh-rnem rernem ngkwarl awankeny arrkernem, arleng-alentyar rtnenh-penh, rernemap angkem, ‘Ngkwarl nhanyem mwerrarl, ngkwarl rlengkeny-apeny-wenyarl!’ Rernemap ngkwarl rlengkenyan iyelpant irremel iwerlelpem.”

**Anaynteleyel: Jesus-el angka ilenh, renh-rnem akalty-antheyew. Ngkwarl wayn awankeny angka Akngey-wenh arrwekeleny-apeny. Jesus-wenh angkangkwarr aynteyel ngkwarl wayn rlengkeny-apeny. Akngerran awelhem angka Moses-wenhew, mwerr antwemel. Angka Jesus-wenhew rernem awelhem, rernemap mwerr-angker inngarl antwem.**

## 6

*Jesus-el arlta ltyerrey-angker ikwer akalty-antheyel, rernem iterl-areyew  
(Matthew 12:1-8; Mark 2:23-28)*

<sup>1</sup> Saturday anyentel, arlta ltyerrey-angker Jew-rnem-wenh-angkwarr ikwerel, Jesus kwertengerl ikwerenh-rnem-akert apmer arlpaw-apeny-angkwarr alhenh. Rernemap amern weyt-angketyarrel alhenh. Kwertengerl-rnemel amern weyt akeynenh irryewerl-apenh, arlkwemel arlkwemel. <sup>2</sup> Artwa Pharissee-rnemel arew renh-rnem, rernemap angkerrew, “Moses-wenh-angkwarr aynteyel, nthakenh anantherr warrkerrey-angnenh arlta ltyerrey-angker nhenhelan. Anantherr ingkerrenh ltyerremer. Kwertengerl yanh-rnem apmwelheleyel, rernemap warrkerreyel, amern inaynteyew.”

<sup>3</sup> Jesus angkew artwa Pharissee-rnemew, “Alhewerarl anantherr amernan inayntem, arlta anyent nhenhel ltyerreyew-arelhelan. Arrantherr angka Atyetyart David-akert iterl-areyel, rarl amern inerl-alpew kalikw Akngey-wenh-they. David ikwerenh-rnem-akert amern-weny angayakw anehn, <sup>4</sup> rap aylpew kalikw ikwer-warl, amern tyenkerr renh inerl-alpeyew. Moses-wenh-angkwarr aynteyel, artwa rltwa kalikw-areny-rnemel amern tyenkerr arlkwemel. David-el arlkwew, artwa ikwerenh-rnemew anthemel alhewer-antey arrpemarl amernan. Rernem amern tyenkerr arlkwewan, Akngeyanap ahelerrey-angnenh ikwer-rnem. <sup>5</sup> Ayengarl nhayman angkeyel! Ayengan Artwa Inngarl Akngey-wenh, atyetyart ilkwarl David-angkwarran. Alhewerarl amern akarreleyew arlta ltyerrey-angker nhenhelan, atyengan mwerrarl alakenh!”

<sup>6</sup> Arlta ingwerel ltyerrey-angkerel, Jesus aylpenhew tyaty Jew-rnem-wenh-warl. Rap aney-alhew, ingwer-rnem-anem akalty-anthenh. Artwa anyent akwa apmwa

arlwerrelhewarl anen. <sup>7</sup> Artwa Pharissee-rnemel artwa angka Moses-wenhew akalty-anthey-angker-rnemel-then rernem artewentyel Jesus aren. Rernem renh aren, ra apek artwa akwa apmwa mwerrelentyew. Rernem alakenh iterrenh, "Jesus-el artwa mwerrelenty arla ltyerrey-angker nhenhel, rap apmwelhelemlar. Ingwerenty mwerrelenty, rap warrkerremarl!" Rernem mpwelhenh arntarnt-arelhemel, ra apmwel-helentyew. <sup>8</sup> Ra iterl-arenh, rernmarl iterrenh. Rap angkew artwa akwa arlwerr-arlwerrew, "Rtnel-alha, ingwer-rnemel ngenh areyew." Artwa rap rtnerl-alhew-anem.

<sup>9</sup> Jesus-el rtnerenherharl-rnem ayernew, "Nthakenh arrantherr iterreyel? Nthakenh angka Moses-wenhehan ileyel? Nthakenh irrem arntetyewan arla ltyerrey-angkerelan? Renh arntarnt-arem apek, mwerrelemel? Menty apek renh ipmem? Renh apek alpemelem? Atwem apek renh?" <sup>10</sup> Jesus-el renh-rnem arew-penh, rap angkew artwa ikweran, "Akwa arratyela!" Akwa rap arratyerreyelpew, mwerr-anem. <sup>11</sup> Rernem arew, Jesus-elari artwa arntety mwerrelew, rernemap pwetherrew. Rernemap akarrerrew, alakenh angkerreyew, "Nthakenh anantherr arrngert angkem, Jesus-el ra alakenh arrpemarl mpwarewerr?"

*Jesus-el kwertengerl-rnem 12 rlwaneyel  
(Matthew 10:1-4; Mark 3:13-18)*

<sup>12</sup> Ingwer-ingwer Jesus apwert ilkwewarl nganeynenh, Akngeyew angkaynteyew, rap ankawkel ikwer angkenh. <sup>13</sup> Ingwepenhan ra arlkew renharl apenteyel-rnemew, rernemap ikwer-warl alhew apwert irrwerl-warl. Rap artwernem 12 rlwanew kwertengerl-rnem ikwer, rap angkew-anem, "Arrantherr angka mwerr-angker ilerl-apayntenh-arey."

<sup>14</sup> Artwa nhenh-rnem rlwanew Jesus-el:

Simon, renh Peter itnewew; aytiekw Peter-wenh Andrew; awayenheng-atherr James-then John-then; Philip; Bartholomew;

<sup>15</sup> Matthew; Thomas; alerikw Alphaeus-wenh itnan James; Simon, kapment-wety apmelerr rarl arlkarerreh;

<sup>16</sup> alerikw James-wenh Judas; Judas Iscariot-akerr.

Ingwer-ingweran Judas Iscariot-el Jesus artwa Jew alkenh-rnem-warl ahayiwemarl, rernem atwemel antwerrkeyew.

*Jesus-el akngerr mwerreleyel  
(Matthew 4:23-25)*

<sup>17</sup> Ikwer-penh Jesus kwertengerl ikweren-hrnem-akert atwarrenhey-alpew apwert irrwerl-they kwenel-athek ahern aterterr-warl. Apmer ikwer-arenyan akngerr akar-rerrew arrpemarl. Ingwer-rneman Judea-ampeny-areny Jerusalem-areny-then anew-anen. Ingwer-rneman kwaty alay impalh-areny, Tyre-areny Sidon-areny. Ingkerreh-antey ikwer mpwelhenh. <sup>18</sup> Rernemap apetyew, ikwer awelheyew. Arntety-rnem-then apetyew, ra mwerreleyew. Ingwer-rneman arrenty-akert apetyew, rap arrenty-rnem irrentew. <sup>19</sup> Arawerrng riterrk Akngey-wenh-akertel ra arntety-rnem mwerrelenh. Rernem arrerant-arey rtnerenherrehn ikwer-itwew, ra renh-rnem arnep-arneyew.

*Akngay ntwap apenty, ngap inkwerelhemarl  
(Matthew 5:1-12)*

<sup>20</sup> Jesus-el kwertengerl ikweren-hrnem aren, rap angkew-anem ikwer-rnem, "Kel-anem arrantherran aleyn irrpetyapnt apek atnyen-ayntem, Akngeyan arrewan-therr inkwerelhemarl. Akngey-wenh-anem arrantherran. Ran Atyetyart arrewan-therrenh, rap arrenhantherrenh arntarnt-areyenh.

<sup>21</sup> Kel-anem arrantherran aleyn angayakw-anem apek, Akngeyan arrewantherr inkwerelhemarl. Rap amern-anem anthem, arrantherrap atnerteng-anem irreyenh. Kel-anem arrantherran aleyn alpwelyerremel-anem apek artnem, Akngeyan arrewan-therr inkwerelhemarl. Ingwer-ingweran rap arrenhantherrenh irrngerney-antheyenh, arrantherrap atherreyenh-anem.

<sup>22</sup> Ayeng Artwa Innga Akngey-wenh, arrantherr ayenh apentyew. Ingwer-rneman arrewantherr ilkelhey-angenh irremarl, arrenhantherrenhap kwanthemarl, irrtiy-werremel ilem, irrentemel. Akngeyan arrewantherr inkwerelhemarl.

<sup>23</sup> Awank-akerr akngerran arlkarerrehn angkakert Akngey-wenh-rnem-wety. Rlengkan arrantherr angkakert weth-rnem-apeny. Ingwer-ingwer arrantherr aney-alpem Akngey-itwel, rap arrewantherr ilek-ilek mwerr-angker antheyenhan. Arrantherr-rap ikwer itterr-ayntenh-arey inkwerelhemel."

Alakenh Jesus-an angkenh ikwer-rnem.

<sup>24</sup> Ikwer-penh Jesus ingwer-rnemew-anem angkenh, rernemarl rtnenherrenhew awelherremel.

“Kel-anem arrantherr aleyan ilek-ilek-anem apek atnyen-ayntem. Ingwer-ingweran ampwal-rnem arrewantherrenh apmwanem aynteyehn.

<sup>25</sup> Kel-anem arrantherr aleyan amern akngerr-anem apek atnyen-ayntem. Ingwer-ingweran arrantherr angayakw-anem amern-weny-anem irreyehn.

Kel-anem arrantherran atherreyel-anem apek. Ingwer-ingweran arrantherr alpwelyerremel-anem artneyehn.

<sup>26</sup> Kel-anem ingwer-rneman mwerr-anem apek angkem arrewanther. Awank-akerr arreng aynewantherrenhel alakenh ilenh angkakert-arrpantey-rnem-wety, irrty-herremel iley-angker-rnem-wety.”

#### *Ingwer-rnemew ilkelh-aynta, angkep atweyney-angen*

<sup>27</sup> Jesus angkew ikwer-rnem, “Angka nhenh awenh-arey! Ingwer-rnem arrewantherety arlkarerrenty, arrantherran mwerr-angkwarril ikwer-rnem anaynteyew.

<sup>28</sup> Ingwer-rnemel arrenhantherrenh apmwel-ayeth iltenty, apmwethen mpwarenty, arrantherrap Akngeyarl ayernenh-arey ikwer-rnem. <sup>29</sup> Ingwerel ngenh itepel attwenty arreyl ingwer-angkwarr, menty anhelha. Angkep atwey-angen. Menty anhelha, arreyl ingwer-angkwarr-them ra ngenh atwey. Arnkwa ingwerel rakenty, menty ikwer antha. Arnkwa ingwer-then ikwer antha. <sup>30</sup> Ingwerel ayernen, ntwap antharl. Ra apek intenty ayerney-anghel, kel renh ayerney-angen, angkep anthenhey-alpeyew.

<sup>31</sup> Arrantherran inkwrelheyew, ingwerentyl mwerr arrewanther arnwarnentyan. Kel alakenh arrantherran ingwer-rnemew arnwarneyew.

<sup>32-33</sup> Arrantherr ingkerrew ilkelherl-anemer. Nthakenh arrantherr rlwaney-angenhan, arrewanther ilkelhentyant ingwerenty, arrangkw. Apmwangkwarrarl aneyel-rneman alakenh-anyem. Rernem ingwer-rnemewant ilkelh-ayntem, rernemarl ikwer-rnem ilkelheyel-apeny. Ingwerentyakew rernem ilkelhey-angen. Arrantherr apek rernem-apeny, apmwangkwarrarl aneyel-rnem-apeny. Akngeyelan nthakenh arrenhantherrenh mwerr-angker anthey-angenhan, arrantherr alakenh arnwarnenty-penh.

<sup>34</sup> Arrantherr apwert arlenherl-anemer alhewer ingwer-rnemew-then. Nthakenh arrantherr rlwanentyant apwert anthey-angen, ingwerentyew arrewanther angkep anthentyewant, arrangkw. Apmwangkwarrarl aneyel-rnem alakenh-anyem. Rernem apwert arlenthem irrpetyapewant, apwert angkep anthey-angkerew-rnemant. Ingwerentyakan apwertew intywekey-angker-rnemarl. Rernem iltiyant-anem apek, apwert-weny, nthakenh angkep anthey-angen. Arrantherran apek apmwangkwarrarl aneyel-rnem-apeny, apwert angkep anthey-angkerew-rnemant arlenthemarl. Akngeyel nthakenh arrenhantherrenh mwerr-angker anthey-angenhan, arrantherr alakenh arnwarnenty-penh.

<sup>35</sup> Arrantherran athamerrerl-anemer ingwer-rnemew, arrewanther ilkelheyangewrneman, ikwer-rnem mwerr arnwarn-ayntemel. Akngey-wenh-angkwarr-apeny, rarl ingkerrenhew athamerreyel-apeny, mwerr-rnemew-then apmwernevemew-then. Rap ingkerrenhew ilek-ilek mwerr-angker anthem. Alakenh-anyem arrantherr anherl-anemer ingwer-rnemew. Arralty-aney-angen, rernem nthekwern angkep antheyney-angenarl. Akngeyan arrewanther inkwrelhemarl. Arrantherr alakenh anenty, Akngey irrwerl-arenyelap arrenhantherrenh alerikw-rnem antwem. <sup>36</sup> Ingarlap! Ingwer-rnemew atham-atham anaynteyew, Akngey-apeny.” Alakenh-anyem Jesus-el akngerr akalty-antheynem.

#### *Ingwer-rnemew tyel-angkey-angen*

(Matthew 7:1-6)

<sup>37</sup> Ikwer-penh Jesus angkew ikwer-rnem, “Ingwer-rnem apmwa antwey-angen, Akngeyelap arrenhantherrenhan apmwa antewerr arrpemarl. Ingwer-rnem ayntarrp-iley-angen, Akngeyelap arrenhantherrenh ayntarrp-ilewerr arrpemarl. Ingwer-rnem arrewanther apmwelhelem, menty-anem ipmenh-arey iylpelerremelant. <sup>38</sup> Arrantherr akelyant anthem ingwer-rnemew, Akngey ran akelyant anthem arrewantherarl. Arrathy akngerr anthem ingwer-rnemew, Akngey ran akngerr anthem arrewantherarl.

Arrantherr iterl-areyel, ntangarl anantherr akarrelemp-apeny. Tyampet-warl arrerneyem-apeny arriew-atty. Alakenh-anyem Akngeyel antheyinem, lherrparnpseyew-atty. Arrantherr ingwer-rnemew athamerrerl-anenty, Akngeyan arrewantherarl athamerrem arrpemarl, ilek-ilek-then antheyinemel.”

<sup>39</sup> Jesus-el angka akely irrpety-anem ilenh: “Artwa aparrngel nthekwern atnwenhey-angenh artwa aparrng ingwer itep-they, arrangkw. Ratherr atherr-anteyarl aytnewerr irrkewarl.”

**Anaynteleyel:** *Jesus-el angka ilenh, renh-rnem akalty-antheyew. Artwa angka Moses-wenhew akalty-anthey-angker rerneman artwa aparrng-apeny. Aparrngelan arrkay arem. Alakenh-anyem rernem mwanty awelhey-angenh angka Akngey-wenhew anaynt, arrangkw. Rernemap apmwangkwarrarl anen. Nthakenh rernem alakenh angkey-angenh ingwer-rnemew, “Ngan apmwelhelew. Ngan anemer arraty ayeng-apeny.”*

<sup>40</sup> “Apmerrkel nthekwern iterl-arey-angenh, akwerrp-antey, artwapeny-wenyarl ra. Rarl ilkwerreyenhel, rap artwant artewentyelan akaltyerreynen.”

**Anaynteleyel:** *Jesus-el angka ilenh, renh-rnem akalty-antheyew. Rerneman anemer, angka artwa Pharissee-rnem-wenhew awelhey-angenh, rernemarl akwerrp apmerrk-rnem-apeny. Rerneman angka Jesus-wen hikwerant awelhemer, akaltyerremel.*

<sup>41</sup> “Ngarl iterreyel, nga mwerr-arrpantey, ngantey irrtywerreyelarl. Nthekwern ntwa ingwerentyak arratyeley-angenh, ntwarl angka Akngey-wenhew apmwel-ayeth akalty-anthem. Artwa aparrng-apenyarlap ngan, anngei arey-angenh. <sup>42</sup> Nthakenh ingwerew alakenh angkey-angenh, ‘Atyeng apeleyay, atha ahern akely irrarlkeyew annga ngkweng-itwew’. Arrangkw! Ntwan apek arrkay areyel, arwerl arlpentyelarl ilpeyl annga ngkwenhan! Ngarl alakenh angkeyel, ngap irrtywerreyelarl. Ntwap arwerl ina annga ngkwenh-they-tangkwl, ntwap mwerr-anem arem. Ntwap ahern akely irrarlka amnga ingwerentyak ikwer-itwew-anem.”

**Anaynteleyel:** *Jesus-el angka ilenh, renh-rnem akalty-antheyew. Nthakenh rernem ingwer-rnem apmwa antwey-angenh. Artwa arraty aney-angenh ra arwerl arlpentyel annga ilperl-anenty-apeny. Nthakenh anaynt arey-angenh, ingwer-rnem-then arratyeley-angenh.*

*Angka arwerl amern mwerr-akert*

(Matthew 7:15-20)

<sup>43</sup> Jesus-el angka ingwer-anem ikwer-rnem ilenh. “Arwerl mwerran amern mwerr-akertarl, arwerl ingweran paytey-angketyarrarl amern apmwakertarl. <sup>44</sup> Anantherr amern iterl-aremarl arwerl arrpanenh-itwew. Amern tywerrk nthekwern arlketyerr-angketyarrel aney-angenh, arrangkw. Amern arnwekety nthekwern alatyeytel aney-angenh, arrangkw.

<sup>45</sup> Alakenh nga iterrel-aynteyew akwerrngan. Kel alakenhaym nga angkeman. Nga mwerr-angkwarr aneyel, ngap mwerr iterreyel akwerrngan, ngap angka mwerrarl angkem arrakertan intem. Nga apek apmwa, ngap apmwel-ayeth iterreyel akwerrngan, ngap apmwel-ayetharl angkeyel arrakertan intem.”

*Angka artwa warl arnwarney-angker atherr-akert*

(Matthew 7:24-29)

<sup>46</sup> Jesus angkew ikwer-rnem, “Ilekewarl arrantherr ayenah antweyel ‘Ingkart’? Arrantherr atyeng awelhey-angenh. Arrantherr aney-angenh, ayengarl angkeyel-angkwarr, arrangkw. <sup>47</sup> Ilek-apeny artwa ran, rarl atyeng awelhem? Ran arraty anem Akngeyew, ayengarl angkeyel-angkwarr. Rap ikwer-itwel aney-alpem intem. <sup>48</sup> Ran artwa anyent-apeny, rarl warl arnwarneyew-apeny. Ran apmer ahern rlterrk alalewew. Wararl arnwarnew-penh, rlterrk innga rtnewan. Kwaty apangw ilkwa rntwey-alhew, atnyerr-anem apetyew warl ikwer-warl, ranap nthekwern atakelhey-angenharl.

<sup>49</sup> Atha ileyew angka ingwer-anem, artwa ingwer-akert-anem. Ran warl arnwarneyew arrpemarl. Ran apmer ahern rlterrk alalewey-angenh, arrangkw. Ran warl arlwetereng-warl arnwarnew, ilpay impalth-warl. Kwaty apangw ilkwa rntwey-alhew, atnyerr-anem apetyew warl ikwer-warl, warlap atakenhew-anem. Arrantherr angka atyenh awenty, arrewantherrenharrp-angkwarr alhem, arrantherranap artwa nhenh-apenyarl. Arrantherr nthekwern Akngey-itwel aney-alpey-angenh intem, arrangkw.”

## 7

*Jesus-el artwa warrkenh ahawarr alkenh-wenh mwerreleyel*

(Matthew 8:5-13; John 4:43-54)

<sup>1</sup> Ikwer-penh Jesus akngerrew angkenh-penh, rap angkep alpew tawen Capernaum-warl. <sup>2</sup> Artwa ahawarr alkenh apmer ikwer-itwew anenh. Ran atyetyart ahawarr-rnem 100-ew, ranap atyetyart alkenh Rome-arenyaw warrkerrenh. Ran artwa warrkenh

anyent atnyenew, rarl ikwer ilkelhenh. Warrkenh ranap arntetyarl, kelepenh ilweyew-anenh. <sup>3</sup> Artwa ahawarr alkenhel awew, Jesus-elarl akngerr mwerrelenh. Rap artwa Jew alkenh-rnem thwenew Jesus-warl, renh ayerneyew, artwa warrkenh renh mwerreleyew. <sup>4-5</sup> Artwa rernem Jesus-warl alhew, rernemap angkew ikwer, "Atyetyartay! Apetya anewantherrel-arleng, artwa arntety nhak mwerreleyew. Artwa ahawarr alkenh-wenh warrkenharlap ran. Artwa ahawarr ran mwerr-angker. Ranap atham-atham anewantherr Jew-rnemew, rarl apwert anthew anewantherr, warl akarerrreyew-arelyew. Alakenh-anyem nga apetyemer, artwa warrkenh ikwerenh mwerreleyew." <sup>6</sup> Jesus angkew, "Kel ayeng alhem." Ra anperl-alhew ikwer-rnemel-arleng. Artwa anyent anterrew, artwa ahawarr alkenh ileyew, Jesus-arl apetyen.

Artwa ahawarr alkenhel awew, Jesus-arl arrer-anem apetyen, rap nyerrerrew. Rap ikwer apelty-rnem ikwer-warl thwenew, renh ileyew apetyey-angen. Rernemap renh ampep-itwew arey-alhew, angkanem ilew ikwer, artwa ahawarr alkenharl angkew-angkwarr: "Ngan alkenharl atyeng-angkwarr. Ayengan artwa mwerr-wenyarl. Ayeng nyerrerreyel, ngenh nthakenh atha rlwatey-angen, arrangkw. Warl atyehn-warl apetyey-angen. <sup>7-8</sup> Atha ngenh nthakenh iley-angen, nhenh-warl apetyeyew. Atha iterl-areyel, nga Akngeyew warrkerreyel. Ntwa awemarl, rarl ilantheman. Alakenh-anyem ayeng warrkerrem atyetyart alkenh Rome-arenyw. Ayeng atyetyart ahawarr-rnem 100-ew. Atha anyent ilanthem alakenh, 'Yanh-angkwarr!', rap alhem. Atha anyent ingwer ayernem, 'Apetya!', rap apetyemarl. Atha anyent ingwer ilanthem, 'Warrkerra!', rap warrkerremarl. Ngan ayeng-apenyarl. Ngarl angkem-apeny, rap anamerl irrem. Arwa angka, warrkenh atyehn rap anamerl-antey mwerrerremarl."

<sup>9</sup> Jesus-el awew, rap apateyelpew. Ra angkew ingwer-rnemew rtnenherrenharl-rnemew, "Aleyant atha awew alakenhan! Atha inngarl arrenhantherr ileyel. Artwa ahawarr weth ranap alethangarl, rap atyeng rlterrk iterreyel. Atha artwa Jew renh arey-angen-antey, rarl atyeng aley rlterrk iterrenharl." <sup>10</sup> Artwa ahawarrew apelty-rnem rernemap warl-warl alperlewew-anem angkep. Rernemap aremerrey-alpew warlitwew, warrkenh mwerr-anem arey-alpew, arntety-weny-anem.

#### *Jesus-el akely invert-wenh ampikw itetheyel ipmepen*

<sup>11</sup> Ikwer-penh Jesus anperl-alhew Capernaum-they tawen akely-warl Nain-warl. Kwertengerl ikwerenh-rnem akngerr ingwer-rnem-then alherlewenh ikwerel-arleng. <sup>12</sup> Rerneman apmer ikwer-warl arrer-anem alherlewenh, akngerr-anem rernem arey-alhew. Ikwer-areny-rnem apmer ikwer-they artnemel alherlewenh, artwa ipma ampwal ilperr-ilperr-ayeth akngeyenn. Artwa akelyarlap ran, rarl ilwewan. Amewikw-wenh ranap anyentarl. Akely irrepern ran invert, artnemel alhenn. <sup>13</sup> Jesus-el renh arew, amperrrngerrew-anem ikwer, rap angkew, "Artney-angen." <sup>14</sup> Ra alhew, ampwal ilperr-ilperr-anem arnew. Artwernem ampwalarl akngeyenn-rnem rtneyelpew. Rap angkew artwa ipmew, "Awelha atyeng! Akwenta!" <sup>15</sup> Anamerl-antey artwa ipmepen akwentenhey-alpew, rap angkenh-anem. Artwa rap rtnenh-anem. Jesus-el renh atnwenhew amikw ikwerenh-warl.

<sup>16</sup> Ingkerrel arew, artwa ipmepen rtnerl-alhewarl, rernemap atererrew apateyelpemel. Rernem inkwelrehemel angkew alakenh Akngeyew, "Jesus ran angkakert Akngey-wenh! Akngey rlengken apetyew, anenhantherrenh arntarnt-areyew!" <sup>17</sup> Angka Jesus-akert rap arlpimperrew apmer arpanenh-warl Judea-ampeny-warl, apmer ingwer-rnem-warl-then.

#### *Angka Jesus-then John Baptise-emeley-angker-akert (Matthew 11:1-19)*

<sup>18-21</sup> Jesus angka Akngey-wenh ilerl-apen-h-antey. Arntety-rnem akngerr ikwer-warl apetyen, rap renh-rnem mwerrelerl-apen. Rap apparrng-rnem-then mwerrelenh, rernem areyew. Ingwer-rnem arrenty-akert apetyen ikwer-warl, rap arrenty-rnem irrenten ikwer-rnem-they.

Ikwerel-antey ra alakenh warrkerrerl-apen, John Baptise-emeley-angker tyaylel-antey anenh. Kwertengerl-rnemel John-wenhel John arerlenty-akngeng tyayl-itwew, rernemap angka Jesus-akert iley-alhenn. John-el ayernew, "Nhenhang ran, Akngeyelarl ilew, rarl ahern nhenh-warl thweneyen? Atha iterl-areyew." Rap kwertengerl atherr thwenew Jesus-warl, renh ayerneyew. Ratherr ikwer-warl alhew ayernew-anem, "Ngang ran, Akngeyelarl rlwanew, ahern nhenh-warl thweneyew? Arrangkw apek. Ingwerentyakew-antey apek mpwelh-ayntem alerl-antey? Rwengk."

<sup>22</sup> Ra renh-atherre tyernew, "Alpenh-atherre mpwelanth John-warl, ayenh iley-alpenh-atherre. Ilenh-atherre ilek-ilek, mpwelanth arew. Ilenh-atherre ilek-ilek, mpwelanth

awew. Aparrng-penh-rnemel areyel, lerrp-penh-rnem alheyel-anemarl. Tywen-angketyarr-penh-rnem alyekl-anem, arwengk-penh-rnemel aveyel-anemarl. Ipmepehn-rneman iteth-anem, apwert-weny-rnemel angka mwerr-angkerant-anemarl aveyel.<sup>23</sup> Mpwelanth atherr-angkwarr iterrey-angenh atyeng, Akngeyanap mpwelewanth inkwerelhemarl.”

<sup>24</sup> Kwertengerl John-wenh atherr angkep alpew, ikwer ileyew. Jesus ingwer-rnemew angkew rtnenherrenharl-rnemew, “Arrantherr atyeng awelhenh-arey! Arrantherr John iterl-areyel. Renh tyayl-warl akwerneyew-athath, ra aneh apmer arlpaw-ampenyl-tangkwl. Ilekewarl arrantherr John-ew nthwenh? Arrantherr apek iterrenh ikwer, ra irrwerlap-aynterl-anenty-arrpantey? Arrangkw! John-an alakenh-wenyarl. <sup>25</sup> Artwa ilek-apenyew arrantherr nthwenh? Artwa arnkwa rlengkeny-akertew arrantherr nthwenh? Arrangkw! Arnkwa rlengkenyarl aylpeyel-rnem rerneman atyetyart-rnem, warl ilkwer nemelarl aneyel-rnem. John-an alakenh-wenyarl. <sup>26</sup> Kel ilenh-arey ayenh. Artwa ilek-apenyew arrantherr nthwenh? Arrantherr apek angkakert Akngey-wenhew nthwenh? Ya wenh! John renh thwenew Akngeyel angka ikweren-h-akert. Ran angkakert ingwer-rnem-apeny-weny.

<sup>27</sup> Awank-akerr Akngeyel angkakert ikweren Malachi ilew, rarl John ahern nhenh-warl-tangkwl thweneyew, Jesus renh thweneyew-athath. Akngey alakenh Jesus-ew angkew,

‘Atha artwa thweneyen h ikwer-rnem-warl, akwerrng renh-rnem arratyelyew, rernem ngkweng awelheyew-awayt. Alakenh ra iwerr arratyelyen.’

<sup>28</sup> Awelhenh-arey atyeng! John angkakert ingwer-rnem-angkwarr ilkwarl, rernemarl aneh apmer nhenh-itwew awank-akerr. Aleyan Akngey-wenh-rnemarl John-angkwarr ilkwa. Ingkern-penh-rnem-then John-angkwarr ilkwa arrpemarl, rernemarl arrer-they ayenh iterl-areyel.”

<sup>29</sup> Akngerrelan John awenh. Apwert akarreley-angker-rnem kapmentew rernem awenh arrpemarl. Ra ingkerenh kwaty-warl baptise-emelenh, rernemap iylparethel awelhenh, rernemap angkenh, “Akngey-wenh-angkwarr mwerrarl!” <sup>30</sup> Akngey ilkel-henh, artwa Pharisee-rnem artwa angka Moses-wenhew akalty-anthey-angker-rnem-then rernem arraty ikwer anaynteyew. Rernem John-ew awelhey-angenh, arrangkw. John-el nthekwern renh-rnem kwaty-warl baptise-emeley-angenh. Rerneman ilkelhey-angenh irrenh angka Akngey-wenh-wety, Akngey rarl John ilew.

<sup>31</sup> Jesus ikwer-rnem angkew, “Alep arrantherr-alew? Arrantherr nthekwern inkwerelhey-angenh! <sup>32</sup> Arrantherr ampernem-apeny, amentant atherrelerremel arkenterrem. Ingwer-rnemel arlkem alakenh ingwer-rnemew,

‘Arrantherr rntwey-angenh, anantherrarl aylelherrenhew inkwerelhemel!

Arrantherr artney-angenh, anantherrarl aylelherrenhew alpwelyerremel’

Ampernem-apenyarlap arrantherran! <sup>33</sup> Ingwer-rnem-apeny-wenyarl John. Ran amern arlkwey-angenh, ngkwarl wayn antywey-angenh, arrangkw. Irrkalty antemarn-thenant arlkwenh. Arrantherr renh arew-penh, arrantherrap apmwel-ayeth angkew, ‘Ra arrenty-akert!’ <sup>34</sup> Ayengan Artwa Inngarl Akngey-wenh. Athan apmelerrel arlkweyel, antyweyel ingwer-rnemel-apeny. Arrantherr apmwel-ayeth ileyel, ‘Jesus amern akngerr arlkweyel, ngkwarl-then antyweyel! Ikwer apetyl-rnem apwert akarreley-angker-rnem angka Moses-wenh apentey-angenh-rnem-then!’ Arrantherr atyeng alakenh tyel-angkeyel. <sup>35</sup> Awelhenh-arey atyeng! Arrantherran John-wenh-angkwarr ilkelhey-angenh aneh. Atyenh-angkwarran ilkelhey-angenh arrpemarl arrantherr! Akngeyelan arraty-angkwarr mpwarew, rarl aylanthenh thwenew. Rernem aylanthenharl apenteyel-rnem, rernemap arraty-angkwarr anem. Alakenh-anyem ingkerrel arem, Akngeyelarl arraty-angkwarr aylanthenh thwenew.”

### *Angka Jesus-akert arelh apmwethen-akert* (Matthew 26:13; Mark 14:3-9; John 12:1-8)

<sup>36</sup> Artwa Pharisee anyent aneh itnan Simon, rap angkew Jesus-ew, “Nga apetyem apek warl atyenh-warl, amern arlkweyew.” Jesus alhew warl ikweren-h-warl, ratherrap amern arlkwenh ilperr-ayntemel.

<sup>37</sup> Tawen ikwer-itwew arelh apmwah aneh. Ra awew, Jesus-el amern arlkwenh warl Simon-wenh-itwew. Ra apwert akngerr anthew, pweterl akely anter-akert ineyew, mwerr-angkerarl intenh-akert. <sup>38</sup> Ra kwen-anem aylpenhew warl ikwer-warl anter-akert, Jesus ingkety-angkwarr ingkern-they rtney-alhew artnemel. Rap altyweneyelpew arrngwelty thelelhemel ingkety ikwer-itwew. Ingkety ra iparenh alta arlpentyel arrwantyemel, anter thelemel.

<sup>39</sup> Simon-el arelh arew, rarl mpwarenh, ra iterrew, "Inngarl artwa nhenh angkakert Akngey-wenh? Renh iterl-aremer ra! Arelh apmwel renh arnep-arneyel!"

<sup>40</sup> Jesus-el iterl-arew, rarl iterrenh, rap angkew, "Simon, atha ngkweng angka ileyew." Rap tyernew, "Ya, ila atyeng."

<sup>41</sup> Jesus ikwer angkew, "Artwa atyetyartel apwert arlenthew artwa atherrew. Rap 10,000 tala anthew ingwerewan 1,000 tala ingwerewan. <sup>42</sup> Ikwer-penh ingwer-ingwer arrangkw-anem anem ratherr apwert-weny-anem. Ratherr ywarn-anem iterrew, apwert angkep antheynewy atyetyart-warl. Artwa atyetyart rap ahelerrey-angenh ikwer-ather, arrangkw. Rap angkem, 'Mwerr, menty', rap renh-ather tyarlewew."

Angka Jesus-el ilew-penh, rap ayernew, "Simon, nthakenh nga iterreyel? Artwa nthenh-apeny inngan artwa atyetyart ikwer ilkelhem?"

<sup>43</sup> Simon-el tyernew, "Artwa weth apek, ikwerarl atyetyartel 10,000 tala anthew, rarl apwert akngerr alhewer-antey anthew."

Jesus angkew, "Mwerr, arraty nga angkew!"

<sup>44</sup> Jesus-el artepang areynew, arelh-anem arew, rap Simon-ew angkew, "Arelh nhenh ntwa areyel, rtneyelar! Ayeng apetyew warl ngkwenh-warl, ntwa atyeng kwaty anthey-angenharl anewantherrenh-angkwarran, ingkety iparelheyew. Arelh nhenhelarlap ingkety arrngwelty ikwerenhel-anem irralkenh, alta arlpentyel-then iparenhan. <sup>45</sup> Ayeng apetyew warl ngkwenh-warl, ntwa ayenh arreyl arrwanteyey-angenharl anewantherrenh-angkwarran. Arelh nhenhelarlap ingketyan arrwanteyey-alhenhan. <sup>46</sup> Ayeng apetyew warl ngkwenh-warl, ntwa atyeng anter mwerr-angker anthey-angenharl anewantherrenh-angkwarran, inngerr apernelheyew altethen. Arelh nhenhelarlap anter mwerr-angker intey-angkerel ingkety aperney-alhenhan.

<sup>47</sup> Ingwer-rnem ament iterreyel, rernem apmwelhelem alyepelant. Akngeyel apmwa irralkem ikwer-rnem-wety, rernem Akngeyew alyepant ilkelhenty. Ingwer-rneman arelh nhenh-apenyarl. Rernem iterl-arelhem apmwa innga. Akngeyel apmwa irralkem ikwer-rnem-wety, renh-rnem angkep ikwer-warl-athetk pweytelenhey-alpemel. Rernem Akngeyew artewentyl ilkelheman, intem iterrel-anemel ikwerewant. Arraty atha ileyel! Akngeyel apmwa irralkew arelh nhenh-wety, renh angkep ikwer-warl-athetk pweytelenhey-alpew-anem alhewer-antey. Alakenh-anyem arelh ra atyeng inngan ilkelheyel."

<sup>48</sup> Jesus angkew arelh ikwer, "Irrepern, nga apmwel-ayeth aneh. Atha apmwa ingkerr irralkew ngkweng-wety, ngenh Akngey ikwer-warl-athetk pweytelenhey-alpew-anem alhewer-antey."

<sup>49</sup> Ingwer-rnemel awew, rernem angkerrew, "Ra nthekwern alakenh angkey-angenh! Akngeyant alakenh angkey-angker!"

<sup>50</sup> Jesus angkew arelh ikwer, "Ngarl atyeng iterrew, Akngeyelap apmwa ngkweng-wety irralkew. Arlka mwerr-anem aney-alpa."

## 8

### *Angka arelh-rnem-akert, Jesus-arl alpemelenh*

<sup>1</sup> Ikwer-penh Jesus kwertengerl ikwerenhr-nem-akert alhenh, angka mwerr-angker ilerl-apenp apmer arpanenht-itwew. Ra akngerr ingwer-rnem ilerl-apen, Akngeyan atyetyartarl aneyenh ingwer-rnemew, rernemal ikwer iterreyel-rnemewan.

<sup>2</sup> Arelh-rnem irrpetyap alherlewenh ikwerel-arleng. Ingwer-rnem arntety-tangkwel aneh, rap awank renh-rnem mwerrelew. Ingwer-rneman arrenty-akertarl aneh, rap awank arrenty-rnem ikwer-rnem-they irrentew. Arelh ingweran itnan Mary Magdal-areny. Jesus-el awank arrenty-rnem 7 irrentew ikwer-they. <sup>3</sup> Arelh ingweran itnan Joanna. Mpwerikwan ikwerenhr itnan Cuza, artwa ilkwa aneh atyetyart Herod-wenh apmerel. Arelh ingweran itnan Susanna, arelh ingwer-rnem-akerr. Arelh nhenhrnem Jesus kwertengerl ikwerenhr-nem-thebel-arleng alherlewenh, rernemap renhrnem arntartar-arerl-apen, amern-then apwert-then antherl-apen.

### *Angka artwa ntang-akert*

(Matthew 13:1-23; Mark 4:1-9)

<sup>4</sup> Ingwer-ingwer akngerr innga akarrerrew Jesus-warl apmer arpanenht-they, ranap angka nhanyem ikwer-rnem ilenh.

<sup>5</sup> "Artwa amern lyapelheley-angkeran aneh, rap amern weyt lyapelhelenh. Rap alhew yakweth ntang-akertinp, ntang arlperry iwaynteyew. Rarl alhenhel, ntang-rneman ra iwerl-apen. Ntang ingwer-rneman ra iwew iwerr arlertek-warlarl. Akngerrelan ntang-rnem lthwerl-apen. Thip-rnem arrernelhenh, ntang-anem arlkweynenh. <sup>6</sup> Ntang

ingwer-rneman ra iwew ahern apwert-angketyarr-warlarl, rernemap alyepelant lyaperrew. Artekerran nthakenh lyapey-angenh ahern apwert-angketyarrelan, arrangkw. Atherrk-rneman itwern-penh rtwewenyel arlenyerrew-anem.<sup>7</sup> Ntang ingwer-rneman ra iwew ahern arkerl-angketyarr-warlarl. Arkerl-rnemelap atherrk akely-rnem ilperteleynew, rernem nthakenh lyapey-angenh, apmwerrew-anem.<sup>8</sup> Ntang ingwer-rneman ra iwew ahern itwelh-itwelh-warlarl. Atherrk-rnem rernemap mwerrarl lyapew ntang-penh. Atherrk-rnemarl ampeng-anem irrew, amern akngerr ingap ayntewan, rernem arlkwaynteyewan. Ntang anyent-they ntang akngerr lyapew, 100 innga.”

Jesus-elarl angka ilew-penh, rap atayel ingkerrew angkew, “Iylpel mwanty-antey awenh-arey!”

*Jesus-el angka artwa ntang-akert renh anaynteyel  
(Matthew 13:10-23; Mark 4:10-20)*

<sup>9</sup> Ikwer-penhan kwertengerl-rnem Jesus-wenh apetyew ikwer-warl ayerneyew, “Anantherran angka ntang-akert iterl-arey-angenh. Anenhantherr akalty-antha, anantherr iterl-arynteyew.”

<sup>10</sup> Jesus-el angka renh anayntelew ikwer-rnem. “Akngrey rarl Atyetyart aneyel ikweren-hrnemew. Atha arrenhantherrenhant alakenh akalty-anthem. Ingwer yanh-rnem atha nthakenh akalty-anthey-angenharl, athap angka nhelkwer-rnem ikwer-rnem ilemarl. Ayengarl ikwer-rnem angkem,

‘Rernem ayenh anngelant arem, rernemap ayenh iterl-arey-angenharl, arrangkw. Rerneman ayenh iylpelant awem, awelhey-angenh, akwerrp-antey.’”

<sup>11</sup> Jesus angkew ikwer-rnem, “Alakenhaymarlap angka nhenhey aynteyel. Angka Akngrey-wenh ranap ntang-apeny. Angka rap ingweram-angkwarr arlperryerrem.

<sup>12</sup> Ntang ingwer-rneman artwa wethel ra iwew iwerr arlertek-warlarl. Akngerr iwerr nhenh-apenyarl. Rernem angka Akngrey-wenhew awelhem-tangkwel, rernemap Akngrey arrkernev. Arrenty ilkwan apetyem, rap angka mwerr-angker ilpertelem, thipelarl ntang arlkwem-apeny. Rerneman ipmelhem-anem, Akngrey apenty-angenh, Akngelyelarl nthakenh renh-rnem intem-antey antwerrkey-angenh, arrangkw.

<sup>13</sup> Ntang ingwer-rneman ra iwew ahern apwert-angketyarr-warl. Artekerr-rneman nthakenh aylpey-angenh ahern apwert-angketyarr-warl, arrangkw. Alakenh-anyem aknggerrelan angka Akngrey-wenh awem, inkwerelhem-anem Akngrey-angkwarr, arwa angath-antey. Apmwa ayntentyelan, rernem ipmelhem, angka Akngrey-wenh apenty-angenh, arrangkw. Rernem iylpelerrem, angka Akngrey-wenh iwerlelpem.

<sup>14</sup> Ingwer-rneman ahern arkerl-angketyarr-apeny. Rernem angka Akngrey-wenh awem-tangkwel, apwertel-then ampwal-rnemel-then renh-rnem ilpertelem-anem. Rerneman ament-antey arralty-anem, ilek-ilek mwerr-angkerew iterrem, arrkentel-arlengant aynteyew. Alakenh-anyem ilek-ilek ingwer-rnemel akwerrng ilpertelem-anem, arkerl-rnemelarl atherrk-rnem lyapey-angenhelem-apeny. Angka ranap nthakenh renh-rnem rlterrkeley-angenh, arrangkw. Rernemap arraty aney-angenh Akngeye-wan.

<sup>15</sup> Ingwer-rneman ahern itwelh-itwelh-apenyarl. Rernem angka Akngrey-wenh intem-antey antwerrkem. Arraty-angkwarr-anem rernem anem. Apmwarl ayntemeng-arey, rernem angka Akngrey-wenh apentem intem-antey. Alakenh-anyem rernem mwerr-angker warrkerrem Akngeyewan, ntang akngerrarl ahern itwelh-itwelhelan lyapeyem-apeny.

### *Angka lyenenty-akert*

<sup>16</sup> Jesus-el angka ingwer-anem ilenh. “Kwenyel anantherr lyenenty arrtyem. Anantherr nthakenh arlengarrel artey-angenh, nthakenh pantyel artey-angenh, arrangkw. Anantherr irrwerl tywenem, ingwerentyel anaynt arenhey-alhem warl-itwew, rernemap aylpenhey-alhemarl.<sup>17</sup> Kel angka Akngrey-wenh alakenh-anyem. Atha akngerr akalty-anthem angka nhelkwerel, rerneman arraty iterl-arey-angenharl. Ingwer-ingwer Akngelyelang angka ikweren-h anaynt ileyenh. Angkan ikweren-h irrtyertel ayntey-angenh, aknggerrelan iterl-areyenh-anem.”

***Anaynteyel: Jesus-el angka ilenh, renh-rnem akalty-antheyew. Rarl ahern nhenh-itwew anenh-antey, irrpetyapelant angka ikweren-h awenh. Ingwer-ingweran aknggerrel-anem angka anaynt ikweren-h aweyenh apmer arrpanenh-they.***

<sup>18</sup> “Kel arrantherran atyeng mwanty awelh-ayntenh-arey! Akngrey arrantherr awem iylparethel, rap arrenhantherrenh akalty-anthem, ilek-ilek iterl-areyew. Arrantherr

ikwer awelhey-angen, rap arrenhantherrenh akwerrngarl ilpertelem. Arrantherrap angkan ikwerenih iyipelerlewem-anem." Alakenh Jesus angkew ikwer-rnem.

*Jesus-wenh amikw-then aytayikw-rnem-then  
(Matthew 12:46-50; Mark 3:31-35)*

<sup>19</sup> Ingwer-ingwer Jesus anenh warl anyent-itwew, akngerr ingwer-rnem akalty-anthenh. Amikw ikwerenih aytayikw ikwerenih-rnem-then apetyew, renh areyew. Rernemap arleng-antey rtney-alhew, akngerrel arrngelew-wety. <sup>20</sup> Ingwerentyel renh ilew, "Amengkw ngkwenh aytayengkw ngkwenh-rnem-then mpwelheyel ngkweng akethel, ngenh areyew." <sup>21</sup> Ran alakenh tyernew, "Angka Akngey-wenharl awelheyel-rnem rernemarl amey atyenh aytayaty-rnem-thenan. Rernemarl atyenh-rnem innang."

*Jesus-el kwaty rwarr-akert arternpeleyel  
(Matthew 8:23-27; Mark 4:35-41)*

<sup>22</sup> Ingwer-ingweran Jesus angkew kwertengerl ikwerenih-rnemew, "Mpa! Alhey anan-therr kwaty alay anthenayn-ampeny-warl." Rernemap nganerlarr-alhew rtnwearl, anperlarr-alhew-anem.

<sup>23</sup> Rerneman kwaty alay-angkwarr artarnpeyenh, ran ankwanem irrenhew. Kwaty rwarr-akert-anem rntwney-alhew rlterrk innga, renh-rnem akngenherl-akngenhelhelew. Kwatyan lherrparnpew-anem rtnwearl, aylperl-alheyew-anew-anem, aterelerreye inngap aytewarl.

<sup>24</sup> Jesus-anem rernem atyekewl, "Ingkart akwentay! Kwatyel anenhantherrenh ilwerl-athenewerr!"

Rap akwentenhey-alpew, atayel innga angkew rwarrew-then kwatyew-then. Ingker-rap arternperreyelpew. <sup>25</sup> Ran angkew ikwer-rnem, "Ater-anemarl arrantherr irreyel? Ilekew atyeng awelhey-angen?" Arrantherr ayenh iterl-aremer! Nthakenharl athan arrhanhantherrenh iwerl-alhey-angen!"

Rernem apatemel atererrew, rernemap angkerrew, "Pwertay! Artwa ilek-apenyarlap nhenhan? Rwarrel-then kwatyel-then renh awem!"

*Artwa arrenty akngerr-akert  
(Matthew 8:28-34; Mark 5:1-20)*

<sup>26</sup> Ikwer-penh Jesus kwertengerl ikwerenih-rnem-akert alhew rtnwa ikwerel kwaty alay anthenayn-ampeny-warl. Rernemap kwaty alay-angkwarr artarnpenhew apmer Galilee-they, aremerrey-alhew tawen Gerasa ikwer-itwew-anem. <sup>27</sup> Rernem rtnwethey atwarrew, kwaty impalthel-anem rtenh. Artwa arwengkan apmer ikwer-arenly Jesus-warl arnekerrey-ayntew. Ranap arrenty-akert, arnkewewenyarl intem alhenh, apmer ikwerenih-rnem-itwel aney-angen, arrangkw. Rap intey-angketyarrel anenh, ipmernemarl akwernenh-itwew. <sup>28-29</sup> Apmer ikwer-arenly-rnemel renh arerternh teyeynl itep-atherr ingkety-atherr-then. Arrentyarl angkep ikwer-warl aylpeyam-alpennrlterrkelenh, rap teyyn-rnem akalthenh, arleng-anem anterremel. Arrentyel rwew-alhenh, ra arleng ament alhaynteyew.

Jesus-elan renh arew, rap arrenty-anem iltew, "Arrenty apmway! Tyerrelha ikwer-they!" Artwa ra arlkenty iwew atayel, rap kwenerrey-alhew, Jesus-arl rtenh-itwew. "Jesus-ay! Nga Alerikw Akngey-wen! Nthakenh ileyew ntwa ayenh? Ayengan irrepern apmwa. Ayenh irrwampenh-anthey-angen!"

<sup>30</sup> Jesus-el ayernew, "Itnan ilek nga?"

Arrenty akngerran ikwer-itwew anenh. Ra tyernew, "Itna ayeng 'Akngerr'." <sup>31</sup> Arrenty-rnemel renh ayernenn akngerr-inger, "Irrentey-angen anenhantherr arrenty apmwer nem antwrrkeyel-warl, aleth-antey tyarlewey-angen-warl!"

<sup>32</sup> Pikepik akngerran arlkewew-arlkwenh arrer-antey apwertel. Arrenty rernem ayernew, "Irrenta anenhantherr pikepik yanh-rnem-warl!" Ra renh-rnem irrentew, rernemarl ayernew-angkwarr-antey. <sup>33</sup> Rernem artwethey tyerrelhew, anamerl-antey aylpew pikepik-rnem-warl. Pikepik-rnemarl arwengkerrew, anterrew arlperry-anem. Rernem anterrew kwenel-athet, kwaty alay-warl aylpew, ilwenherrew-anem.

<sup>34</sup> Pikepikew-arteyp-rnemel arew, rernemap tawen Gerasa-warl anterrew, apmer akely-rnem-warl-then. Rernem ingkerenh ilew, "Pikepik-rnem arwengk-arwengk kwaty-warl aylpewaw!" Rernemap apmer akely-arenly-rnem-then ilew. <sup>35</sup> Akngerrel angka awew, rernem anterrerrew areyew, nthakenh irrenhan. Rernemap Jesus arey-alhew, artwa arwengk-penh ikwer-itwew mwerr-anem arnkawakert anenh. Akwerrng arraty-anem anenh, arrenty-weny-anem. Rernemap Jesus-wetyan atererrew. <sup>36</sup> Ingwer-rnemel rernemarl arewel, rernemap ingkerrew ilew, artwarl arrenty-akert-penh mwerrerew.

<sup>37</sup> Tawen Gerasa-areny-rnem artewentyel atererrew, rernemap Jesus ilew, “Nga alpemer apmer nhenh-they apmer ingwer-warl.”

Jesus kwertengerl ikwerenh-rnem-akert nganerl-alhew rtnwearl, rernemap anper-alheyew-alenty alerl-antey rtnenherrenh. <sup>38</sup> Artwa arwengk-penh ra angkew ikwer, “Atyetyartay! Mwerrang ayeng alpem ngkweng-angkwarr?” Ra tyernew, <sup>39</sup> “Nthekwern ntwa ayenhenperty-angenh. Ngkwenh-rnem-warl alpa. Iley-alpa, Akngeyarl ngkweng amperrngerrew, rarl ngenh mwerrelew.” Ra kwertengerl ikwerenh-rnem-akert anper-alhew, artwa ran alpew apmer ikwerenh-warl. Rap akngerr ilerl-apenh alakenh, “Jesus el arwengk-penh ayenhenperty-angenh.”

*Jairus-wenh kwey alerikw arelh arntety-then-akert  
(Matthew 9:18-25; Mark 5:21-43)*

<sup>40</sup> Ikwer-penh Jesus kwertengerl ikwerenh-rnem-akert apey-alpew kwaty alay Galilee anthenayn-ampeny-they. Akngerrl renh arnarenh, rernemap ikwer arnekerrey-ayntew kwaty alay impalh-itwew. <sup>41-42</sup> Artwa anyent itnan Jairus anenh, artwa irltarlap ran tyaty Jew-rnem-wenh-itwew. Anyentant ikwerenh kwey alerikwan, ranap 12-arl. Arntety inngap ra ayntenh, ilwewy-anemel. Jairus rap apetyew, ampwethel arrerrelhew, Jesus-arl rtnenh-itwew. Rap ayernew arnemel, “Mwerrang apetyem apmer atyenh-warl?” Jesus rap alhew Jairus-el-arleng. Ingwer-rnemel renh-atherr apentyenyn, tyet inngitwew ingkerreh-antey alperlewenh.

<sup>43</sup> Arelh anyent ingwerarl alpenn ikwer-rnemel-arleng, ranap arelh-rnem-wenh arntety-akertarl aherrety 12-ew-atety. Ngangker-rnemel ra apwert akngerr antheynenh, apwertenanap ywerrew-anem. Ngangker-rnemel nthekwern renh mwerreley-angenh, arrangkw. Rap arntety intem-antey anenh. <sup>44</sup> Rap Jesus-warl apetyew ingkern-angkwarr, arnkwa Jesus-wenh arnerlewew. Anamerl-antey arntety ywerrenhew.

<sup>45</sup> Jesus-el renh-rnem ayernew, “Angwenhel ayenhen arnerlewew?” Rernem ingkerreh angkew, “Rwengkl!” Peter ikwer angkew, “Ingkartay, akngerr nhenhan tyetel alperleweyl!”

<sup>46</sup> Jesus angkew, “Innga wenh! Ingwerentyel ayenhen arnew! Atha iterl-areyel, arawerrngarl tyerrelherl-alhew atyeng-they!”

<sup>47</sup> Arelh rarl arnewan alakenh iterrenh, “Pwertyay! Ayeng iterrew anyelkel arneyew-arrpanety. Jesus-el ran ayenhen iterl-areyelarl. Ayeng nthakenh irryert aylpey-angenh.” Rap atererrew, kwenerrey-alhew arrewemel, Jesus-arl rtnenh-itwew. Ingwer-rnemel renh arenh, rap angkew ikwer-rnem, “Ayeng wenh! Ayeng arntety aherrety 12-ew-atety anenh. Atharl arnkwa Jesus-wenh arnerlewew, anamerl-antey-anem ayeng mwerrelenhew.” <sup>48</sup> Jesus ikwer athamerrew artewentyel, rap angkew, “Arelhampway! Nga mwerrelewew, ngarl atyeng irlterrk iterrew. Apmer-warl alpanem, nyerrerrey-angenh alhewer-anem.”

<sup>49</sup> Jesus angkenh-antey arelh ikwerel-arleng, artwanem apetyew angkakert Jairus-wenh apmer-they. Jairus ran rtnenh-antey Jesus-el-arleng. Artwa ra angkew Jairus-ew, “Arrangkw wenh! Alerengkw ngkwenh atnengkanerrew. Arrangkwel-anem Ingkartakngetyey-angenh, menty-anem.”

<sup>50</sup> Jesus-el awew, rap angkew Jairus-ew, “Artewentyel iterrey-angenh. Nga atyeng awelhenty, alerengkw ngkwenh mwerrelew.”

<sup>51</sup> Rernemal ingkerreh arternp-antey alperlewenh, rernemap aremerrey-alhew Jairus-wenh apmerel-anem. Jesus arrngert angkew ingwer-rnemewan, kwen aylpen-hewerran. Rap ilew, irrpetiyapant aylpenheyew ikwerel-arleng; Peter, awayenhang-atherr James-then John-then, kwey-wenh aynikw-then amikw-then-akerr. <sup>52</sup> Ingwer-rnem kwen arrwekel-antey aylpew, rernemap artnalhelerrenh kwey ipma ikwer. Ra ikwer-rnem angkew, “Artnalhelerrey-angenhaw! Kwey nhenhan ilwey-angenh, ankwarl aynteyle!”

<sup>53</sup> Ingkerrel awew, rarl angkew, rernemap irrpeltherremel atherrew ikwer, rernemarl iterl-arew, kwey rarl ipma aytenh. <sup>54</sup> Ra kwey itep-they antwerrkew, angkew-anem, “Kwey akwenta!” <sup>55-56</sup> Anamerl-antey rwarr ikwer-warl apey-alpew, kwey rap iteth-anem akwentenhey-alpew. Aynelikw-then amelikw-then arew, ratherrap apateyelpew. Jesus ikwer-atherr angkew, “Amern anthenh-atherr ikwer. Ingwerentyak iley-angenh, atharl kwey renh itethelew ipmepenh.”

*Jesus-el kwertengerl-rnem 12 thweneyel apmer arrpanenh-warl  
(Matthew 10:1-16; Mark 6:7-13)*

<sup>1</sup> Ikwer-penh Jesus-el kwertengerl ikweren-h-nem 12 akarrelew ikwer-warl. Renh-nem ra rlterrkeleyew, rernem arrenty-rnem irrent-aynteyew, arntety-rnem-then mwerrel-aynteyew. <sup>2</sup> Rap renh-rnem ilew, "Arrantherr apmer arrpanen-h-warl alhaynteh-arey. Ingwer-rnem ilerl-apayten-h-arey, Akngeyan atyetyart ilkwa ingkerrenhew apmer arrpanen-h-areyew. Arntety-rnem-then mwerrelerl-apayten-h-arey. <sup>3</sup> Ilengem akngayney-angenh; irrertety-weny, yakweth-weny, amern-weny, apwert-weny, arnkwa ingwer-weny, arrangkw. Arwa alhenh-arey. <sup>4</sup> Arrantherr apmer ingwerel aremerrey-alhem, ingwerentyel apek ilem warl ikweren-hel aneyew. Kel mwerr, anenh-arey ikwerel-arleng, akafty-anthenty-penant alperl-alhemel. <sup>5</sup> Arrantherrarl apmer ingwerel aremerrey-alhem, ingwerentyel iley-angenh apek, warl ikweren-hel aneyew. Irrentewerr apek apmer yanh-arey-rnemel, awelhey-angenh apek arrewantherr. Menty aney, alpemant ikwer-rnem-wety. Pwet atherr lhelehn-h-arey, ahern apmer yanh-wety irrarlkemel anewantherren-h-angkwarr. Alakenh-anyem rernem iterl-areyew, Akngeyan ahelerreyel ikwer-rnem." Alakenh Jesus-el renh-rnem ilanthew.

<sup>6</sup> Kel kwertengerl-rnem anperlarr-alhew, rernemap apmer arrpanen-h-warl alhenh, angka mwerr-angker Akngey-wenh ilerl-apenh, arntety-rnem-then mwerrelerl-apenh.

#### *Atyetyart Herod-el Jesus iterl-arey-angenh*

(Matthew 14:1-11; Mark 6:14-29)

<sup>7-9</sup> Angka Jesus-akert ingweram-angkwarr arlpimperrew. Ingwer-rnem angkerreh, ran John Baptise-emeley-angker apek, itetherrenty-arrpaney ipmepenh. Renharlap Herod-el awank ipmew atbew. Ingwer-rneman angkerreh, ran Elijah apek, angkakert Akngey-wenh awank anenharl-arrpaney. Ingwer-rneman angkerreh, ran angkakert Akngey-wenh ingwer arrwekeleny apek, itetherrenty-arrpaney ipmepenh. Herod-el angka Jesus-akert awew, rap ilpertelelheme iterrew, "Atha artwa atyenh-rnem ilanthew, John akapwert akeyew. Artwa angwenh ran nhenhey, alakenh arnwernerl-apeyel? Atha renh rlwateyew."

#### *Jesus-el artwernem 5,000 wanteyel*

(Matthew 14:13-21; Mark 6:30-44; John 6:1-16)

<sup>10</sup> Angka mwerr-angker Akngey-wenh ilerl-apenh-penh, kwertengerl Jesus-wenh-rnem apey-alpew ikwer-warl. Rernem ilelhey-alpew ikwer, rernemarl mpwarerl-apenh. Ra renh-rnem atnwenheynew akngerr-wety tawen ingwer-warl Bethsaida-warl. <sup>11</sup> Akngerrel awew, rarl alpew apmer ikwer-warl, rernemap renh apentyew. Ra renh-rnem arnarew apetyenharl, rap arnekerrey-ayntew ikwer-rnem. Ra ikwer-rnem angka ilew, Akngey atyetyart ingkerrew anem. Arntety-rnem-then ra mwerrelenh arrpemarl.

<sup>12</sup> Jesus warrkerreh-antey ingkeny aylpeyew-atety. Kwertengerl-rnem 12 angkew ikwer, "Anantherr apmer arlpaw-itwew aneyel amern-weny. Ntwa renh-rnem apmer ikwer-rnem-wenh-warl thwenemer, rernem amern ineyew, ankwethen aynteyew."

<sup>13-14</sup> Ra tyernew, "Arrantherran anthenh-arey amern ikwer-rnem!"

Artwernem 5,000 anew-anenh, arelh-rnem-then ampernem-akert; akngerr inngey. Kwertengerl-rnem angkew Jesus-ew, "Anantherr amern akelyant atnyeneyel, amern rtamp-rnem 5, aker aylperr atherr-then. Anantherr nthakenh alhey-angenh, amern akngerrew ineyew."

Ra kwertengerl ikweren-h-nemew angkew, "Lhenh-arey renh-rnem, rernem arlwarey-arlwarey arrernelheyew, ingwer-rnem 50, ingwer-rnem 50 arrpemarl." <sup>15</sup> Kwertengerl-rnemel renh-rnem ilew, rernem arrernelheyneyew alakenh. <sup>16</sup> Ra inew amern rtamp-rnem aker aylperr atherr-then, irrwerl-warl-athetk aremel, "Akngayay, anantherr inkwerelhem, ntwarl amern-then aker-then anthew anewantherr." Rap rlweth-akeynew amern-then aker-then akelyar-akely, antheynemel kwertengerl-rnemew-anem. Rernem antheynenheng-arey, amern-then aker-then akngerrerrew. Rernem antherl-apenh, akngerrel arlkweyew. <sup>17</sup> Ingkerrel atnerteng irreyew-atety arlkewew. Rernemarl arlkewew-penh, kwertengerl-rnemel amern ampeny-ampeny akwetyerl-apenh, rtnwernem 12-warl arrernerl-apenh arriewew-atety.

#### *Peter-el ileyel arrayt-angkwarr angka Jesus-akert*

(Matthew 16:13-20; Mark 8:27-30)

<sup>18</sup> Ingwer-ingwer Jesus ament alhew, Akngey-warl-athetk angkaynteyew. Kwertengerl ikweren-h-nem ikwerel-arleng aneyarr-alhew. Rap renh-rnem ayernew, "Ilek ingwer-rnemelan ayenh ilem?"

<sup>19</sup> Rernem tyernew, "Ingwerentyelan ngenh ileyel John Baptise-emeley-angker-arrpaney. Ingwerentyel ngenh ileyel Elijah-arrpaney. Ingwerentyelan ngenh ileyel

angkakert Akngey-wenh-arrpantey, awank-akerrarl anenh, ipmepenitetherrenty-arrpantey.”

<sup>20</sup> Jesus angkew, “Arrantherr-alew? Ilekarl arrantherr ayenh ileyel?”

Peter-el tyernew, “Ngan artwa renh, Akngeyarl awank-akerr angkew, ra ahern nhenh-warl thweneyew.”

<sup>21</sup> Jesus arrngert angkew ikwer-rnem alakenh, “Innga wenh! Arrantherrap ingwerentyak iley-angenh, Akngeyelarl ayenh thwenew ahern nhenh-warl.”

### *Jesus ilelheyel*

(Matthew 16:21-28; Mark 8:31—9:1)

<sup>22</sup> “Ayengan Artwa Inngarl Akngey-wenh. Ingwer-ingwer apmwel-ayeth-anem atyeng aynteyen. Arlka ayeng irrwampeyeh, ayengap apmwia awelheyen. Akngerr atyeng-wety arlkarerreyen; atyetyart-rnem Jew-rnem-wenh, artwa rltwernem tyaty ilkwareny-rnem-then, artwa angka Moses-wenhew akalty anthey-angker-rnem-akerr. Ingwer-rnemel ayenh atwneyen ipmewarl. Ingwa atherr-penhan ayeng angkeparl itetherreyen ipmepen.” Alakenh-anyem ra ilelhew kwertengerl ikweren-hrnemew.

<sup>23</sup> Jesus angkew akngerrew, ikwerel-arlengarl anenh-rnemew, “Ingwerenty ayenharl apenteyew, ra nthakenh ikwerenharrrp-angkwarz alhey-angenh, arrangkw. Ingwer-rnemel renh irrwampenh-anthem, ayenh apententy. Ran ipmelhey-angenh, ayenh apent-aynteyew intem-anteyarl. <sup>24</sup> Ra iterreyel apek ament, mwanty iteth-antey arntarnt-arelh-aynteyew. Alakenhan apmwel-ayetharl iterreyel. Rap atnengkanerrem arrpemarl, nthakenh Akngey-itwel intem-antey aney-alpey-angenh, arrangkw. Alakenh apek ingweran iterreyel, ‘Ayeng apek ilwenty, atharl Jesus apenteyel, kel mwerrarl.’ Rap Akngey-itwel intem-antey aney-alpem.

<sup>25</sup> Ingwerentyel apek ilek-ilek mwerr-angker inaynteyew ikwer. Apwert-then ra inaynteyew, amern-then inaynteyew, arnkwethen akngerr inaynteyew. Ampwal yanh-rnem-akert ra nthekwern Akngey-itwel aney-alpey-angenh, arrangkw! Ra ayenh apentey-angenh, rap ilwemarl, nthekwern Akngey-itwel aney-alpey-angenh, arrangkw. <sup>26</sup> Ayengan Artwa Inngarl Akngey-wenh. Ingwer-ingweran ayeng apey-alpeyeh irrwer-they antyerl akngerr-akert. Anantherrap arrtyernenhey-alpeyeh itwernel-apeny, rlterrk Akngey-wenh-akertel.

Arrantherr apek nyerrerrem, ayenh apentewerr angka atyenh-wety-then, ayengap arrantherr-wety nyerrerrem arrpemarl. <sup>27</sup> Ayengan arraty angkeyel arrewantherr. Ingwerenty apmer nhelarl rlengk anew-aneyel-rnem, rernem Akngey annel areyeh. Rernem ilweyew-alenty, rernem areyeh, Akngeyarl atyetyart ilkwa aneyenhangkerew.”

### *Jesus amparkeyel apwert irrwerl-itwew*

(Matthew 17:1-13; Mark 9:2-13)

<sup>28</sup> Wik anyent-penh Jesus alhew apwert irrwerl-warl, Akngey-warl-athet angkaynteyew-anem. Rap kwertengerl-rnem irrpety atnwenhew, Peter awayenheng-atherr James-then John-then. <sup>29</sup> Jesus-arl angkenh Akngeyew, inngerran ingwer-lkwererrew, arnkwa arlter innga irrew, amparkew-anem. <sup>30</sup> Arwapeny artwa atherr-anem ikwerel-arleng rtneyelpew, angkey-alhew ikwer, ratherranap Moses-then Elijah-then. <sup>31</sup> Rernemap ingkerrenh amparrenh. Artwa ratherr angkew Jesus-ew, “Rlengk-anteyap nga ilwey-alhem Jerusalem-itwew, Akngeyelarl awank ilew-angkwarz.”

<sup>32</sup> Jesus-arl angkenh artwa ingwer-atherrew, Peter artwa ikwer apety atherr-then ankwa apelp aynteh. Rernem ankwtethay akwenthay-alpew, rernemap arew, Jesus artwa ingwer-ather-then ingkerrenh rernem amparrenh. <sup>33</sup> Artwa ingwer-ather alpeyew-alenty rtnenh, Peter angkew, “Ingkartay! Mwerr anantherr mpwelhenh-antey! Anantherr lywenty-rnem irrpety mpwareyew; ngkwengarl anyentan, ingweran Moses-ewarl, ingweran Elijah-ewarl!” Ran iterl-arey-angenh, ranap apmwel-ayeth angkenh. Ra iterrehn, artwa atherrang anyenty-arrpantey ahern nhenh-itwew alerl.

<sup>34</sup> Peter angkenh-antey, kwenpayel-anem renh-rnem ingkerrenh artew, kwertengerl-rneman atererrew. <sup>35</sup> Rernemap awew, Akngey rarl angkew kwenpay-they alakenh-anyem, “Nhanyem Alerey atyenh-antey, atharl awank ilew, renh thweneyew ahern-warl. Awelhenh-arey ikwer, rarl angkeyelewan arrewantherr!”

<sup>36</sup> Akngey angkenh-penh, rap ywerrerl-alhew, kwertengerl-rnemel arew, Jesus-arl ament-anem rtnenh. Rernemap iterl-arew, mwerr-angker rernem arew. Rernem ingwer-rnemew iley-angenh-antey. Ingwer-ingwerantap rernem ilerl-arrernew ingwer-rnemewan.

*Jesus-el arrenty irrenteyel awey anyent-they  
(Matthew 17:14-23; Mark 9:14-29)*

<sup>37</sup> Ingwepenh ingwerel Jesus kwertengerl-rnem irrpety-akert atwarreynen apwert irrwerl-they. Ingwer-rnemel arew, rernemarl atwarrenhey-alpenh, akngerr innga ikwer-rnem arnekerrew. <sup>38</sup> Artwa anyentan arlkew, “Atyetyartay! Amper-rngerra aleray anyentew! Akngemang atha renh ngkweng-warl, raw mwerrerreyyew? <sup>39</sup> Arrentyan aylpem ikwer-warl angkepelarreng, awey rap arlkenty iwem. Arrewelheleyan-alpem renh angkepelarreng, iwem renh ahern-warl-them. Iylkerreytan thelhem arrakert-they. Arrenty ran antelhem ikwer-itwel intem-antey. Rap angkep apeyam-aylpem ikwer-warl, renh irrwampenh-anthem intem-antey, awey rap ilweyew irrem. <sup>40</sup> Atha kwertengerl ngkwenh-rnem ayernew, arrenty irrenteyew ikwer-they. Rernemap arrangkwarl, irrentey-angenharl.”

<sup>41</sup> Jesus angkew ikwer-rnemew ingkerrew, “Arrantherran atyeng awelhey-angenh arrangkw-antey! Arrantherran apmwel-ayetharl iterreyel. Ayengan arlkarewelheyel, arrenhantherrenh akalty-anthetyl angkepelarreng! Ayeng nthakenh arrewantherrelarleng aney-angenh arleng-alenty!” Rap artwa ikwer angkew, “Akngetya alerengkw ngkwenh atyeng-warl.”

<sup>42</sup> Aynelikw awey renh akngetyen, arrentyel renh ilatwew ahern-warl arrewel-helemel. Jesus-el arrenty irrentew awey ikwer-they, renhap atnwenhew-anem aynikw-warl. <sup>43</sup> Ingwer-rnemarl rtnenherrenh, rernemap apatew. Rernem angkew, “Inngangay! Akngeyel arnwarnem arawerrng-akertel!”

*Jesus ilelheyel, ingwer-ingwerarl ra ilweyeh  
(Matthew 17:22-23; Mark 9:30-32)*

Ingkerrenh angkerrenh-antey, Jesus nakenh. Rap angkew kwertengerl ikwerenhnemew, <sup>44</sup> “Awelhenh-arey arternp atyeng! Ayengan Artwa Inngarl Akngey-wenh. Ingwerentyl ayenah ahayiweyen artwa apmwernem-warl, rernem ayenah atweyew ipmew-antey.” <sup>45</sup> Kwertengerl-rnemel nthakenh iterl-arey-angenh, rarl ilelhenh ikwer-rnem. Akngey ikwer-rnem arrngert angkew, rernem iterl-arewerr. Rernem apatenh, renh ayerneyew, angka ikwer-rnem anaynteleyew.

*Angwenh artwa ilkwan anem  
(Matthew 18:1-5; Mark 9:33-37)*

<sup>46</sup> Ikwer-penh kwertengerl-rnem angkerrenh, rernemap ilterrenh alakenh, “Angwenharlap ilkwa inngan anewanther-they?” <sup>47</sup> Jesus-el nthakenh renh-rnem awey-angenh. Kel ra renh-rnem iterl-arenhan, rernemarl alakenh iterrenhan. Ra ilew, ampa akely apetyeyew, rtneyew ikwerel-arleng. <sup>48</sup> Ra angkew kwertengerl-rnemew, “Nga ampew mwerr anem, ngap atyeng mwerr anem arrpemarl. Ngan atyeng mwerr anem, ngap Akngeyewarl mwerr anem arrpemarl. Akngey ranap ayenharl thwenew. Ngarl akely antwelhem, ngap ilkwarl Akngey-angkwarr.” Alakenh Jesus angkenh ikwer-rnem.

*Artwa ingwerelan arrenty-rnem irrenteyel  
(Mark 9:38-41)*

<sup>49</sup> John-an angkew, “Ingkartay! Anwernantherr arew, artwa anyentel arrenty-rnem irrentenharl, itna ngkwenhel itnewemel. Anwernantherr renh iltew, anewantherrenh-areny-wenyarlap ran.”

<sup>50</sup> Jesus angkew, “Arrngert angkey-angenh. Ran anewanther tyel-angkey-angenh, ranap anewanther-apeny.”

*Samaria-areny-rnem arlkarerreyel Jesus-wety*

<sup>51</sup> Kel Jesus-el iterl-arenh, rarl Jerusalem-itlew ilweyeh, irrwerl-anem alpeyenh angkep. Ra iterrew, Jerusalem-warl alheyew-antey, rap anperl-alhew-anem. <sup>52</sup> Galilee-they ra alheyew akwerterrp-antey Samaria-ampeny-angkwarr Judea-warl. Rap angkakert-rnem thwenew arrwikel Samaria-warl, apmer ikwer-rnem alaleweyew.

<sup>53</sup> Apmer ikwer-areny-rnemel awew, Jesus-arl alpenh Jerusalem-warl, rernemap angkew, “Arrangkw! Nthakenh ra nhel ayntey-angenh! Jew-rneman arrantherr apmer arrewantherrenh ayntemer!” <sup>54</sup> Angkakert-rnem angkep alpew, Jesus ileyew, Samaria-areny-rnemarl angkew. James-then John-thenel awew, ratherrap ahelerrew angkew-anem, “Ingkartay! Ayla ayernem Akngey, rwa thweneyew irrwerl-they, renh-rnem ilwerl-atheneyew?”

<sup>55</sup> Ra arrngert angkew. <sup>56</sup> Rernem anper-antey apmer ikwer-angkwarr alhew, apmer ingwerel-anem ayntey-alhew.

*Jesus apenteyewan rlterrkarl  
(Matthew 8:18-22)*

<sup>57</sup> Rernem iwerrel-antey alperlewenh Jerusalem-warl, artwa anyent rernem arey-alhew. Artwa rap angkew Jesus-ew, “Atha ngenh apenteyew, ingweram-angkwarr nga alhenty.”

<sup>58</sup> Jesus-el tyernew, “Arengk artnwer inteyel ayntem ntywetyarl. Thip akerrkan atharkwel ayntem ntywetyarl. Artwa Innga Akngey-wenh athan apmer atnyeney-angnenh.”

<sup>59</sup> Jesus angkew artwa ingwerew, “Apenta ayenh!”

Artwel tyernew, “Ingkartay! Akngey atyenh ilwneyew-aneyel. Ayeng angkep alpeyew, renh arntarnt-arey-alpeyew. Renh akwernenty-penh, atha ngenh apenteyenh-anem.”

<sup>60</sup> Jesus angkew ikwer, “Inweng Akngey-wenh atnyeney-angnenh-rnem menty rernem akwernerl-ayntey. Nga alhemer, ingwer-rnemarl ilerl-apaynteyew, Akngeyan ikwer-rnem atyetyart anaynteyew, renh-rnem arntarnt-araynteyew.”

<sup>61</sup> Artwa ingweran angkew arrpemarl, “Ingkartay! Atha ngenh apenteyew. Ayeng tangkwel apmer-warl alpeyew arrwekel, atyenh-rnem atha iley-alpeyew, ayengan alpeyel ngkwengel-arleng.”

<sup>62</sup> Jesus-el tyernew, “Arrangkw. Ntwa ayenh apententy, nthekwern nga angkeperrey-angnenh. Ngan iterreyel angkeperreyew, nthekwern ntwa angka Akngey-wenh iley-angnenh, rarl atyetyart ingkerrew aneyel, arrangkw.”

## 10

*Jesus-el kwertengerl-rnem 72 thweneylew apmer arrpanenh-warl*

<sup>1</sup> Ikwer-penh Jesus-el rlwanew 72 ingwer-rnem-anem. Ra renh-rnem atherrarl-atherrarl thweneylew, rap angkew ikwer-rnem, “Apmer ingkerr-warl alhayntenh-arey, ingwer-rnem ilerl-apaytenh-arey, ayengan ingkern-theyaml alheyen. <sup>2</sup> Akngerr ingwer-rnem aneyel apmer arrpanenhel. Rernem mpwelheyel, angka mwerr-angker Akngey-wenh awaynteyew. Athanap warrkenh-rnem irrpetyapant atnyeneyel, ingwer-rnem akalty-anthaynteyewan. Arrantherr ayernemer alakenh, ‘Akngayay, ntwa warrkenh ingwer-rnem rlwana, akngerr ingwer-rnem awelheyew ngkweng.’ <sup>3</sup> Kel-anem alhenh-arey. Mwanty-antey alhenh-arey, rlterrk inngarl arrewantherr aynteyenh-wety! Arrantherran anik, yep-yep-apenyarl. Ingwer-rneman ahelengkw, artnwer-apenyarl. <sup>4</sup> Ampwal-rnem akngeyney-angnenh; yakweth-weny, apwert-weny, pwet anyentan. Arrantherr ingwer iwerr-itwew rlwateny, aleth angkey-angnenh, kel anperl-alhemel arrpemarl.

<sup>5</sup> Arrantherr apmer anyent-itwew aremerrey-alhem, warl anyent-warl-tangkwel alhenh-arey. Arrantherr aylpenheyew-alenty warl ikwer-warl, angkenh-arey artwa warlew-artey ikwer alakenh, ‘Akngayel ngenh arnep-arnem ngkwennh-rnem-then, mwanty arntarnt-arem intem-antey.’ <sup>6</sup> Artwa yanh apekan ahelengkw, Akngayel apmer ikwer-arnem-then. <sup>7</sup> Artwa ahelengkw-weny apek ra, Akngayel apmer ikwer-arnem arnep-arney-angnenh. Artwa ahelengkw-weny apek ra, Akngayel apmer ikwer-arnem arnep-arney-angnenh. <sup>8</sup> Artnwer-apenyarl warl ikwer-itwewant anenh-arey, warl ingwerel ayntey-angnenh. Amern-then aker-then arlkwenh-arey, warl ikwer-areny-rnemarl antheman. Kwaty-then antywennh-arey, rernemarl antheman. Rernem arntarnt-arem arrenhantherrenh, pay-apeny anthemel, arrantherrarl atyeng warrkerreyelan.

<sup>9</sup> Arrantherr apek anperl-alhenty apmer ingwer-warl. Apmer ikwer-areny-rnem inkwerelhemel arnekerrem apek arrewantherr. Warl ikwer-rnem-wenh-warl apek arrenhantherrenh atnwenheynem, antheman amern ilek-ilek. Kel arrantherrap inkwerelhemel arlkwenh-arey ikwer-rnem-itwew. <sup>10</sup> Mwerrelenh-arey arntity-rnem apmer ikwer-areny. Renh-rnem ilenh-arey, arltarl arrer-anem irreyel-wety, Akngayarl ingkerrenhew atyetyart aneyenh, arntarnt-areyen renh-rnem. <sup>11</sup> Arrantherr alhenty apmer ingwer-warl apek. Apmer yanh-areny-rnem arlkarerrem arrewantherr-wety, rernemap awelhey-angnenh arrewantherr. Kel ampererremel alhenh-arey apmer ikwer-angkwarr, alakenh angkemel, ‘Arehn-arey nhanyeman! Anantherr arrewantherrety pwet-they ahern nhenh-arey lertnem. Awelhenh-arey! Arltan arrer-anemerreyel, Akngayarl ingkerrenhew atyetyart aneyenh, renh-rnem arntarnt-areyen. Arrantherranap Akngey-wetyan arlkarerreyelarl!’ Alakenh-anyem arrantherr ilerl-apemer apmer ikwer-itwew. <sup>12</sup> Arltan anyentel, ingkerrenh-antey ywerreyelpayenhel, Akngayelan akarrelenhey-alpeyeh apmer arrpanenh-areny-rnem ikwer-warl. Ra renh-rnem ayerneyew, nthakenh rernem anenarl. Rap apmwernehan irrwampenh-antheyen, mwerr-rnemantarl ra arntarnt-areyenhan.

Arrantherr apek iterl-areyel angka tawen Sodom-akert? Awank-akerr Akngeyel irrwampenh-anthew ingkerrenh apmer ikwer-itwew, rernemarl apmwel-ayeth anenh. Ran ikwer-rnemew ahelerrew. Kel arlt aanyentel, ingkerrenharl ywerreyelpeyenhel, ra irrwampenh-antheyenah alyepel Sodom-areny-rnem. Ingwer-rnem arrewantherr awelhey-angenh-rnem, Akngey rap artewentyel renh-rnem irrwampenh-antheyenah." Alakenh-anyem Jesus angkew artwernem 72 ikwer-rnem.

*Jesus-el ilteyel ikwer awelhey-angenh-rnem*

(Matthew 11:20-24)

<sup>13</sup> Jesus angkew ingkerrew, "Tawen Korazin-areny-rnem Akngeyel renh-rnem irrwampenh-antheyenah artewentyel innga. Rernem atyeng awelheyangan. Alakenh irrkaty arrpemarl aytneyenah ingwer-rnemewan tawen Bethsaida-arenyewan. Rernem ayenah arew, atharl akngerr mwerrelenh, rernemap atyeng-wety arlkarerrewarl. Ayeng tawen Tyre-warl tawen Sidon-warl-then alheyew-anew, mwerrelr-aneyew-anew renh-rnem, rernem atyeng awelhemerarl. Rernemap nyerrerrem, apmwa ikwer-rnem-wenh-wety angkeperrem. Rernemap arnkwa apmwamwamel rernem aylpem anewantherrenh-angkwarz, inmmenthel-then apernelhemel. Alakenh-anyem ingwer-rnemel renh-rnem areyew, rernemarl apmwewety angkeperrew. <sup>14</sup> Arlt aanyentel, ingkerrenh ywerreyelpeyenhel, Akngeyel tawen Tyre-areny-rnem-then tawen Sidon-areny-rnem-then irrwampenh-antheyenah alyepelant. Rap tawen Korazin-areny-rnem-then tawen Bethsaida-areny-rnem-then irrwampenh-antheyenah artewentyel innga. <sup>15</sup> Tawen Capernaum-areny-rnem-alew? Rerneman apmwel-ayeth iterreyel alakenh, 'Akngeyel anwernantherrenh irrwerl akngeyneyeh, ikwer-itwel arey-alpeyew. Jesus anenh apmer anwerewantherrenh-itwew, rap ilek-ilek mwerr-angker mpwarenh.' Alakenhap rernem iterreyelan. Rernem atyeng awelhey-angenh-anteyarl. Akngey rap renh-rnem arleng ikwer-wety iweyehan."

<sup>16</sup> Jesus angkew artwernem 72 ikwer-rnem, "Ingwerenty arrewantherr awelhem, rap atyengan awelhem arrpemarl. Ingwerenty arrewantherretty arlkarerrem, atyeng-wety ra arlkarerrem arrpemarl. Ingwerenty atyeng-wetyan arlkarerrem, rap Akngey-wetyan arlkarerrem arrpemarl. Akngey rarlap ayenah thwenew ahern nhenh-warl." Alakenh-anyem Jesus-arl angkew artwa 72 ikwer-rnemewan. Rernemap anperl-alhew apmer arrpanenh-warl-anem.

*Kwertengerl-rnem 72 angkep alpeyel Jesus-warl*

<sup>17</sup> Ikwer-penh ingwer-ingwer artwa 72 weth-rnem, Jesus-arl thwenew-rnem, rernem inkwerelhemel apey-alpew Jesus-warl. Rernemap ilelhew, "Ingkartay! Innga wenh! Anwernanther arrenty-rnem iterl-apenh, itna ngkwenh itnewemel, rernemap awelhew anwerewanther! Anwernanther irrentew arntety-rnem-they, rernemap ywerrerlahew!"

<sup>18</sup> Jesus ikwer-rnem angkew, "Atha arew, arrenty alkenh Satan-wenh arawerrng akelyarl-akelyarl irrenhey-alpenh. Ran rlterrk-weny-anem. <sup>19</sup> Arrantherr atyeng awelhenh-arey! Atha arrewantherr rlterrk anthem, athap arrenhantherrenh arntartnaryantem. Arrantherr rtnwem ahelengkw-rnem lthwerl-apayntem arnperrk-rnem-then, arrantherrap alethel alhayntem arntety-weny. Arrantherrap Satan-angkwarz-anem rlterrkarl. Nthekwern ra irrwampenh-anthey-angenh, arntety-then anthey-angenh, arrangkw. <sup>20</sup> Arrantherrap inkwerelhemel angkeyel, 'Innga wenh! Arrency-rnem anwernenhantherr iylparethel aveyel!' Mwerr-angkwarz arrantherr inkwerelhemel angkem, 'Akngeyel anenhantherr iterl-areyel, rarl anenhantherr itna ingkwernew pip ikwerenh-warl.'"

<sup>21</sup> Jesus-arl angkenh artwernem 72 ikwer-rnem, Inweng Mwerr-angkerel renh irrngerney-anthew. Ra angkew alakenh Aynikw ikwerenhew, "Akngeyay, ngan atyetyart alkenh ingkerrew ahern nhenhew-then alkerew-then. Atha ngenh nakem. Ntwa angka ngkwenh ilew akwerrp-rnem-warl. Ntwa angka ngkwenh iley-angenharl akalty-rnem-warl. Ya, Akngey, ntwa alakenh arnwarnew, ngarl ilkelhew-angkwarz." Alakenh Jesus angkew Aynikw ikwerenhew.

<sup>22</sup> Jesus artwernem 72 ikwer-rnem angkew arrpemarl, "Akngeyel ilek-ilek ikwerenh atyeng anthew. Ayengan Alerikw ikweren. Rant anyentel ayenah iterl-arem innga. Athant anyentel renh iterl-arem innga arrpemarl. Atha rlwanew-rnemel rernemarl Akngey iterl-arem arrpemarl, atharl renh lwewarrernem ikwer-rnem."

<sup>23</sup> Jesus-el artepang arenhey-alpew, ra angkew kwertengerl-rnem 12 ikwer-rnemant, "Arrantherr inkwerelheyel-anem, aleyan arrantherrarl annel areyel ilek-ilek mwerr-angker-rnem. Aleyant Akngeyel lwewarrernew alakenh. <sup>24</sup> Angkakert Akngey-wenh arrwekeleny-rnemel Atyetyart ilkwernelem-then rernem ilek-ilek mwerr-angker

areyew, aley arrantherrarl areyel-apeny. Rernem aweyew, aley arrantherrarl aveyel-apeny. Arrangkw. Alakenh-anyem atha arrenhantherrenh ilem inkwerelhenty.”

*Artwa atham-atham Samaria-areny  
(Matthew 22:34-40; Mark 12:28-34)*

<sup>25</sup> Artwa akalty anyent anenh, ranap angka Moses-wenhew akalty-anthey-angkerarl. Rap Jesus arrkerneyew rtnerl-alhew. “Atyetyartay! Nthakenh irrem ayeng, Akngey-itwel intem-antey aney-alpeyewan.”

<sup>26</sup> Jesus-el tyernew, “Ntwa kel angka Moses-wenh iterl-areyel. Ilek angka nhenhelan aynteyel.”

<sup>27</sup> Artwa akalty angkew, “Alakenh angka Moses-wenhel aynteyel: ‘Artewentyel ilkelh-aynta Akngeyewan, ikwer anthelhemel, ikwerant iterremel, ikwer warrkerremel.’ Alakenh-then ra aynteyel: ‘Ngarl arntarnt-arelhem-apeny mwanty, ntwap ingwer-rnem arntarnt-araynta arrpemarl.’”

<sup>28</sup> Jesus-an angkew ikwer, “Arraty nga angkeyel. Nga alakenh irrenty, ngap alpem Akngey-itwel, aney-alpeyew intem-antey.”

<sup>29</sup> Artwa akalty ra ilkelhew, Jesus-el renh nakeyew, rap ayernew, “Angwenharlap atha arntarnt-areman?”

<sup>30</sup> Jesus-el angkanem ilew artwa ikwer. “Artwa Jew anyent anenh Jerusalem-itwew. Rap iterrew, alheyew tawen ingwer-warl Jericho-warl, rap anperl-alhew-anem. Artwa irryert-awarr-rnem irryert-aylpew arrwekel iwerrel, rernemap renh apetyenharl arnaynta. Rernemap renh antwerrkemel apwert rakew. Renhap arnkwa lhelemel atwew, iwerlepel ahern-itwew ayntaynteyew, rap kelepenh ilweyew-anew.

<sup>31</sup> Ikwer-penh artwa rltwa tyaty Jew-rnem-wenh-areny alhew iwerr irrkaty ikwerel. Ra arenhew, artwarl aynteh, rap anper-antey alhew ikwer-angkwarr.

<sup>32</sup> Artwa warkenhen tyaty Jew-rnem-wenh-areny iwerr ikwerel arrpemarl alhenh, ranap Levi-wenh-antey. Arrer innga arntety ikwer-angkwarr alhew, rap iterrew, ‘Ayeng arlarl.’ Arenhemel anper-antey ra alhewan.

<sup>33</sup> Artwa ingwer-anem tangkey-akert alhenh iwerr ikwerel arrpemarl, ranap Samaria-arenyarl. Ra arey-alhew, artwa arntetyarl aynteh, rap amperrngerrew ikwer. <sup>34</sup> Rap alhew ikwer-warl, ngkwarl wayn thelew artwa tywen-rnem-warl, anterel apernemel arertnew-anem. Rap artwa renh tangkey-warl tywenerl-alhew, akngeynew warl anyent-warl-anem. Rap renh athenew panty-warl, ankawek-anem renh arntarnt-arenh.

<sup>35</sup> Ingwepenhan artwa Samaria-areny ra apwert-anem anthew artwa apmerek-arteiyew. Rap angkew, ‘Ayengarl alpeyel-wety-anem, atha ngkweng apwert nhanyem anthem. Ntwa artwa arntety nhanyem arntarnt-araynta. Ingwer-ingwer ayeng apey-alpentyan, athap ngenh apwert anthem, artwa ran arternp mwerrerr-aynteyew.’”

<sup>36</sup> Jesus-elarl angka ilenh-penh, ra artwa akalty-anem ayernew, “Nthakenh ngan iterreyel angka nhenhew? Artwa nthennh-apenyel arntarnt-arenh artwa arntety mwantyel?”

<sup>37</sup> Artwa akaltyan angkew, “Artwa wethaw Samaria-areny, renharl alpemelew!”

Jesus-an angkew ikwer, “Ya, arraty. Anantherr iterl-areyel, Jew-rnem ilkelhey-angenh Samaria-areny-rnemewan. Artwa Samaria-areny ranap arntarnt-arenh artwa Jew ikwer. Alakenh-anyem nga alhemer, ingwer-rnemew mpwareyew mwerr-angker. Ngkwenh-rnemewant iterrey-angenh. Jew-rnemewant iterrey-angenh. Ntwa mwerr mpwaraynta ilkelhey-angenh-rnemew-theñ.”

*Angkwerenheng-atherr Martha-then Mary-then*

<sup>38</sup> Jesus kwertengerl ikwerenh-rnem-akert iwerrel-antey alhenh Jerusalem-warl, rernemap aremerrey-alhew apmer ingwerel. Arelh itna Martha anenh apmer ikwer-itwel, rap renh-rnem ilew, amern arlkweyew apmer ikwerenh-itwew. <sup>39</sup> Rernem kwen aylpenhew warl ikwer-warl, aney-alhew-anem. Martha-wenh ayteyikw Mary anenh Jesus-itwel. Jesus-el renh akalty-anthenh. Mary ran awelhenh ikwer. <sup>40</sup> Martha warrkerrenh artewenty innga, amern akngerr ampernemel. Rap alhengkerreww, rap alhew, Jesus ayerneyew, “Ingkartay, ayek! ntwan areyel? Mary-el ayenh iwerl-alhew. Ayengant ament warrkerreyel. Ntwa renh ilemer, ayenh alpemeleyew!”

<sup>41</sup> Rap renh tyernew athamerremel, “Martha-ay! Ilekew nga ahelerreyel Mary-ewan? Ilekew nga arralty-aneyel, amern akngerr ampern-aynteyewan? <sup>42</sup> Mwerr-angkwarr iterra, Mary-arl iterreyel-angkwarr. Nthakenh ayeng ikwer arrngert angkey-angenh.”

## 11

*Jesus-el kwertengerl ikwerenhn-nem akalty-antheyel, Akngeyew angkaynteyew  
(Matthew 6:5-15)*

<sup>1</sup> Arlta ingwer-ingwerelan Jesus anenh, Aynikw ikwerenhew-anem angkemel. Rarl angkenh-penh, kwertengerl anyent apetyew ikwer-warl, angkey-alhew ikwer, “Inkartay! Akalty-antha anenhantherr, arraty angkaynteyew Akngeyew, John-elarl kwertengerl ikwerenhn-nem akalty-anthenh-apeny. Ntwa apek akalty-anthem anenhantherr alakenh?”

<sup>2</sup> Jesus-an angkew ikwer-nem, “Alakenh angkayntehn-arey:  
‘Akngeyay, ingkerrelarl ngenh iterl-aremer, nakemel angkerl-anemer.  
Ngan Atyetyart ingkerrew. Anantherr ingkerrenh ngkweng awelhem.  
<sup>3</sup> Intem anthaynta amern-then aker-then anewantherr arlta arrpanenhel.  
<sup>4</sup> Ingwer-nemel apmwel-ayeth anewantherr mpwarenty, menty-anem anantherr renh-nem ipmemel tyarlewem iylpelerremel.

Anantherr apmwelhelynt, anantherr ngenh ayerneyew, apmwia irrarlkeyew anewantherr-wety. Anenhantherr awakelhey-angenh, angkep atweyewan.  
Intem arntarnt-araynta anenhantherr, arrkernewerr anenhantherr ingwerentyel, apmwel-ayeth anaynteyew.”

Alakenh angkeman arrantherr Akngeyewan.”

<sup>5</sup> Jesus-an angkew ikwer-nem, “Nhanyem atha arrewantherr angka ilem. Nga apek alhem ampepenyel warl ngkwenh-nem-wenh-warl, amernew aparelheyew. Ntwa apek ayernem alakenh, ‘Apmarleyay! Amern atyeng antha,<sup>6</sup> atyenthal apetyewew arleng-they. Ayengan apateyel, nthakenh atha ilem. Ayengan arrangkw, ilekel atha wantey-angenh.’

<sup>7</sup> Warl ikwer-arenyan kwen-they-antey apek angkem, ‘Atyekeley-angenh! Ipma anenhantherr! Ayengan atyenh-nem-akert aynteyel, arriwan atha akentew-anem. Nthakenh akwentye-angenh, amern ngenh antheyew, arrangkw.’<sup>8</sup> Ra apek alakenh ngkweng angkem aynterl-anemel, arrangkw nthakenh ngenh anthey-angenh. Nga apek iterrem ngkwenh-wenyarl. Ntwa renh ayernem alhewer-antey, rap akwentenhey-alpemarl. Rap amern-anem nyerrerremel ngkweng anthem, ingwer-nemel renh awewerr; rarl iylpelant aweyel.

<sup>9</sup> Arternp awelhenn-harey arranther! Ntwa ayerna Akngey, ranap ngkweng anthemar. Nga nthwa, ranap ngkweng lwewarrernemarl. Ntwa arriw rltar-atwa, ranap ngkweng altywerelemlar.<sup>10</sup> Inngarlap ran! Ntwa Akngey ayernenty, ranap nthakenh iylpelant awey-angenharl. Nga nthtwenty, ranap nthakenh irryert-aylpey-angenharl. Ntwa arriw rltar-attwenty, Akngey ranap ngkweng altywerelemlar, ngap aylpenhem-anem.

<sup>11</sup> Alerengkwel ngenh aker aylperrew apek ayernem. Ntwa rtnwem ahelengkw ikwer anthey-angenharl, arrangkw! Ntwa aylperrant anthem arlkweyewan.<sup>12</sup> Ampengkwel ngenh aker kwartew apek ayernem. Ntwa atneth-akert ikwer anthey-angenh, arrangkw!

<sup>13</sup> Arrantherran apmwangkwarz aneyel, arrantherrap iterl-areyelarl, ilek-ilek mwerr-angker anthaynteyewan ampa arrewantherrenhewan. Akngey irrwerl-arenyan arrantherr-apeny-wenyarl. Ra mwerr-angker inngarl anthem. Ra arrantherr-apeny-wenyarl. Ra anthem Inweng Mwerr-angkerarl arrewantherr, arrantherr renh ayernentyan.”

*Angka arrenty ilkwakert  
(Matthew 12:22-32; Mark 3:20-30)*

<sup>14</sup> Arlta ingwerelan Jesus-el artwa arrenty-akert arey-alhew. Arrentyel artwa renh angkey-angenhelenh. Jesus-el arrenty irrentew ikwer-they, artwa rap angkenh-anem. Akngerrelan apatemel arew.<sup>15</sup> Ingwer-neman angkerrenh, “Atyetyart arrenty-nem-wenhel Jesus yanhan rlterrkelew, ra arrenty-nem irrent-aynteyew.”

<sup>16</sup> Ingwer-neman iterrew, Jesus arrkerneyew, rernemap ayernew, “Mwerr-angker mwanty mpwaraynta arawerrng-akertel! Alakenh anantherr areyew, Akngeyelanang inngarl ngenh thwenew.”

<sup>17</sup> Jesus-elan kanper-antey iterl-arew, rernemarl iterrenh, rap angkanem ikwer-nem ilew. “Artwa ilkwa apek atyetyart anem apmer anyentew. Akngerr apmer ikwer-arenynem apek amentew-amenterrem, intem-antey rernem atwerrerl-anenty. Nthakenh rerneman anyent-antey aney-angenh, rernemap ingkerrenh arlperry alhem. Apmer ikwer-nem-wenh-itwew irrpetyapant-anem aneyelpem. Artwa ilkwa ran atyetyart irrpetyapew-anem anem.

Akgerr-rneman altyernem-then atwerrem apek intem. Nthakenh rerneman anyent-antey aney-angenh, rernemap ingkerrenh arlperry alhem. Apmer ikwer-rnem-wenh-itwew irrpetyapant-anem aneyelpem.

<sup>18</sup> Arrantherran iterreyel, atyetyart arrency-rnem-wenhel ayenh rlterrkelerl-anenty-arrpantey. Arrangkwarl yanhey! Ran atyetyart atyeng aney-angenharl. Ran atyetyart arrency-rnemewantarl aneyel. Nthekwern ra arrency-rnem irrentey-angenh, ra atyetyart arrency-rnem irrpetyapew aneyelpewerr. Nthekwern atyetyart arrency-rnem-wenhel ikwerenh-rnem irrentey-angenh, arrangkw. <sup>19</sup> Arrantherr iterreyel, rarl ayenh rlterrkelerl-anenty-arrpantey, arrency-rnem irrent-aynteyew. Iterrehn-arey arrpemarl arrantherr! Arrewantherrenh-rnem-alew, rernemarl arrency-rnem irrentey-angker arrpemarl? Arrency Satan-elang renh-rnem rlterrkley-angenh, arrangkw! Nga alakenh angkenty, rernemap ngkweng ahelerrem, rernemarl ilem, ‘Rlterr Akngey-wenhelant arrency irrentey-angker.’ <sup>20</sup> Akngey atyetyart ilkwanem ingkerrew anem. Arawerrng ikwerenh-akertel athan arrency-rnem irrentey-angker inngarl. Anngel arrantherr aley areyel.”

<sup>21</sup> Jesus-el angka ingwer-anem ilenh, arawerrng Akngey-wenhan rlterrk Satan-wenhangkwarz. “Artwa rlterrk ilkwel warl ikwerenh arntarnt-arem. Rarl alakenh arntarnt-arem, ilek-ilek ikwerenh mwanty ayntem warl kwenel. Ingwerentyakel nthakenh irryert-iney-angenh. <sup>22</sup> Artwa ingwer rlterrk innga ikwer-angkwarz apetyenty, renhap athenemel atwem. Rap inem ilek-ilek warlelarl aynteyel-rnem, rap arlperryelemel anhem ikwerenh-rnemew-anem.”

**Anayteleyel:** *Jesus-el angka nhenh ilenh, renh-rnem akalty-antheteyew. Arrency alkenh artwa arrwekeleny-apeny. Jesus-an artwa rlterrk ingwer-apenyarl, ranap rlterrk inngarl. Ranap arrency-rnem arrpewernemel irrenteyel Akngey-wenh a rawerrng ilkawerkel.*

<sup>23</sup> Jesus angkew, “Ingwerenty atyeng ilkelhey-angenh, atyenh-wenyarl ra. Ran ingwer-rnem atyeng-warl akngetey-angenh, ranap renh-rnem atyeng-wety thweneyelarl arleng.”

*Arrency anyent angkep-antey apeyam-alpeyel  
(Matthew 12:43-45)*

<sup>24</sup> Jesus angkew ikwer-rnem, “Arrency-wenh-angkwarrarl alakenh-anyeman. Ra artwa anyentel-arleng-tangkwel anem, ingwerentyelap renh irrentem-anem ikwer-they. Ra artwa renh iwerl-alhem-anem, rap alhem-anem, arlpaw-ampeny-warl-anem ywarnantey nthwem, artwa ingwerew arternperreyew. Ran ament angkem, ‘Ayengan angkep artwa ikwer-warl alpem, ayengarl awank anehn-warl.’ <sup>25</sup> Rap angkep alpem, artwa renh mwerr-anem arey-alpem. Ranap arrency atnyeney-angenh-anem. Inweng Akngey-wenh rap atnyeney-angenh arrpemarl, rarl warl aternng-weny arey-alpem-apeny, iylpwanem. <sup>26</sup> Arrency rarl arem-penh, ra alpem, apmwa innga 7 ingwer-rneman ingwerl-alpeyew, rernemap ingkerrenh artwa ikwer-warl aylpey-alpem-anem. Artwa irrepern ra arrency anyent-tangkwel atnyenenh. Aleyan ra anem apmwa innganem, arrency akngerr-akert. Angka atyenhew awelhemer apenterl-anemel, alakenh ikwer apmwa ayntewerr arrpemarl.”

<sup>27</sup> Jesus-arl angkenh-antey, arelh anyent arlkew, “Amengkw rarl ngenh alkenhelew ra inkwerelheyell!”

<sup>28</sup> Jesus-el tyernew, “Arrangkwarl. Ingwer-rnem angka Akngey-wenhewarl awelheyel-rnem, rernemarl inkwerelheyel inngan.”

*Ingwer-rnemel areyew, Jesus-elarl mwerr-angker rlterrk-akertel mpwareyel  
(Mark 8:11-12; Matthew 12:29-32)*

<sup>29</sup> Akngerr-anem akngerr-anem akarrerrenh Jesus-warl, rap angkew ikwer-rnem. “Arrantherran apmwarl! Arrantherran intemarl ayerneyel, ‘Mwerr-angker mwanty mpwara Akngey-wenh a rawerrng-akertel!’ Nthakenh atha alakenh-anyem mpwarey-angenh arewanther. Athan angka Jonah-akertant ilem. Ranap angkakert Akngey-wenh awank-akerrarl anenh. <sup>30</sup> Arrantherr angka weth iterl-areyel. Aylperr ilkwel renh kwertnew, ingwa atherrel ra aynteh aylperr-itwel kwen. Akngeyel aylperr iylarnew, Jonah renh iteth-antey rlkwethel iwenhey-alpeyew aketh-warl kwaty impalth-warl. Ikwer-penh anem rap tawen ilkewar Nineveh-warl alhew-anem, ra apmer ikwer-areny-rnem ileyew, apmwewety angkeperreyew Akngey-warl-athet. Ayengan Artwa Inngarl Akngey-wenh, ayengap arrewanther katy ilweyenh, awenngel ingwa atherrel aynteyenh, Jonah-arl aylperr-itwel ingwa atherrew ayntew-apeny. Ayengap angkep itetherreyenhan ipmepenh, arrantherraw Akngey-warl-athet angkeperreyew.

<sup>31-32</sup> Nineveh-areny-rnem Jonah-ew awelhew, rarl angka Akngey-wenh ilenhew. Rernemap nyerrerrew-anem, apmwewetyan angkeperrew. Akngeyel apmwa irralkew ikwer-rnem-wety, rap ikwer-rnem awakelhey-angenharl, angkep renh-rnem atweyewan, arrangkwarl. Kel ayengan ilkwa inngarl Jonah-angkwarr. Arlta anyentel, Akngeyel ingkerrenh-antey rnkerneyen, renh-rnem ayernemel, iylpareth rernem awelhenty. Arlta ikwerel-antey, Nineveh-areny-rnemel arrenhantherrenh apmwa antweyenh, arrantherr atyeng awelhey-angenharl, apmwewety angkeperrey-angen.

Arrantherr angka iterl-areyel arelh atyetyart Sheba-areny-akert. Ra awew, atyetyart Solomon akalty innga. Rap alhew antekerr-they arleng innga, Solomon renh aveyew, akalty innga angkenh. Ayengan akalty inngarl Solomon-angkwarr. Arlta anyentel, Akngeyel ingkerrenh-antey rnkerneyen, renh-rnem ayernemel, iylpareth rernem awelhenty. Arlta ikwerel-antey, arelh atyetyart Sheba-arenyel arrenhantherrenh apmwa antweyenh, arrantherr atyeng awelhey-angenharl, apmwewety angkeperrey-angen."

### *Lyenentyel anaynteyew*

<sup>33</sup> Jesus-el angka ingver-anem ilenh. "Kwenyel anantherr lyenenty arrtyem. Anantherr nthakenh arlengarrel artey-angen, nthakenh pantel artey-angen, arrangkw. Anantherr irrwerl tywenem, ingwerentyel anaynt arenhey-alhem warl-itwew, rernemap aylpenhey-alhemar. <sup>34</sup> Alakenh-anyem annelan iwerr anewantherr lwewarrernem, anantherrap anaynt-anem arem. Annal mwerr arem, mwerran anantherr anem lyenentyel-apeny. Anna apmwa, anantherr anem atemwengkel-apeny. <sup>35</sup> Mwanty anaynt, lyenenty ngkwenh ilwewerr, aparrngerrewerr nga! <sup>36</sup> Nga intem anem lyenenty Akngey-wenhel, renh apentemel, ntwa renh iterl-arem inngarl. Nthakenh ngenh atemwengkel artey-angen. Nthakenh ngan apal aney-angen, iypelant renh avey-angen."

### *Jesus-el artwa Pharisee-rnem ilteyel*

(Matthew 23:1-39; Mark 12:38-40)

<sup>37</sup> Ikwer-penh Jesus-elarl akalty-anthenh-penh, artwa Pharisee anyentel renh ilew, amern arlkweyew warl ikweren-ittew. Jesus alhew ikwerel-arleng, amern arlkweyew. <sup>38</sup> Artwa Pharisee-el renh arew, rap apatew. Rap iterrew, "Ay! Artwa nhenh iltya atherr irralkelhey-angen Moses-wenh-angkwarr, amern arlkweyew-alentyan."

<sup>39</sup> Jesus ikwer angkew, "Arrantherr Pharisee-rnem tyampet aketh-ampeny aleth irralkeyel. Arrantherr apmwel-ayeth iterreyel. Aketh-ampeny arrantherr mwerr-arrpanter, kwenan apmwarl. Arrantherr apmvernemarl rnter-then. <sup>40</sup> Arrantherr arraty iterrey-angenharl. Akngeyelan arrenhantherrenh arnwarnew, iterl-areyel arrenhantherrenh kanper. <sup>41</sup> Arrantherr arraty anemer. Amern-rnem akngerr arrantherr atnyeneyel. Kel ingwer-rnem anthenherr-arey arrangkwarl aneyel-rnem. Alakenh Akngeyan inkwerelheyenharl arrewanther, rap inngarl arrenhantherrenh apmwewety irralkeyenhan.

<sup>42</sup> Arrantherr artwa Pharisee-rnemay! Akngeyelan arrenhantherrenh artewentyel irrwampenh-antheyen! Arrantherrarl lyapelheleyel-apeny amern atherrk akely-rnem akep-akalthemel, akelyarl-akely anthem Akngeyewan, Moses-elarl akalty-anthenh-angkwarr. Mwerr-angker. Ingwer-rnem-alew? Arrantherr mwerr ingwer-rnemew arnwarney-angen, arrangkw. Arrantherr Akngeyew artewentyel ilkelhey-angen, arrangkw. Arrantherr artewentyel ilkelhemer Akngeyew ingwer-rnemew-then. Alakenh anyem arrantherr Moses-angkwarr apentem.

<sup>43</sup> Arrantherr artwa Pharisee-rnemay! Akngeyelan arrenhantherrenh artewentyel irrwampenh-antheyen! Arrantherr alhenty tyaty Jew-rnem-wenh-warl, arrwekel intem aney-alhem, ingwer-rnemel arrenhantherrenh araynteyew-away. Arrantherr inkwerelhem, ingwer-rnemarl arrewanther kwenerrey-alhem, atyetyart ilkwa antwem.

<sup>44</sup> Arrantherr artwa Pharisee-rnemay! Akngeyelan arrenhantherrenh artewentyel irrwampenh-antheyen! Ingwer-rnemel arrenhantherrenh arem, rernemap iterrem, arrantherran mwerr-arrpanter. Arrantherran anenty apmwel-ayeth, ingwer-rnemel apentem, rernemap apmwel-ayeth arrpemarl irrem. Akngeyan arrewantherr awakelheyen, rap atweyenh arrpemarl!" Alakenh-anyem Jesus angkew artwa Pharisee-rnemew.

### *Jesus-el artwa angka Moses-wenhew akalty-anthey-angker-rnem ilteyel*

(Matthew 23:1-36; Mark 12:38-40)

<sup>45</sup> Artwa akalty anyent awelhenh, ranap artwa angka Moses-wenhew akalty-anthey-angkerarl. Rap angkew Jesus-ew, “Atyetyartay! Ntwarl artwa Pharissee-rnem alakenh iltem, ntwap anwernantherrenhan iltem arrpemarl!”

<sup>46</sup> Jesus-el tyernew, “Yew-yew! Arrantherr angka Moses-wenhew akalty-anthey-angker-rnemay! Akngeyelan arrenhantherrenh artewentyel irrwampenh-antheyenhpwrep-anthem, angka ingkerr Moses-wenhew awelheyew. Alakenh ingwerentyel artwa pwerep-anthem, ilengem awerr akngaynteyew-apeny. Pwerep-antheyel arrantherr alakenh wenh, arrantherranap renh-rnem alpemeley-angenh, arrangkw.

<sup>47</sup> Akngeyelan arrenhantherrenh inngarl artewentyel irrwampenh-antheyenhpwrep-anthem, angkakert-rnem atwenharl awank-akerr. Rernemap awelhey-angenh angka Akngay-wenhew, arrangkw. <sup>48</sup> Arrantherranap awenng-rnem inngelhelemel intem aperneyel. Arreng arrewantherrenh-rnem arrayt anyent-arrpantey, rernemarl angkakert-rnem atwenh awank-akerr. <sup>49</sup> Arrwekel-antey Akngayel iterl-arenh alakenh. Rap angkew, ‘Atha angkakert-rnem ingwer-rnem-then Jew-rnem-warl thweneyew. Rernemarl ingwer-rnem atwem ipmew, ingwer-rneman alhengkerr anthemantarl.’ <sup>50-51</sup> Cain-el ayteyikw Abel-tangkwel atwew. Ingwer-rnemel-anem atwenh angkakert Akngay-wenh-rnem. Artwa anyent Zechariah rernem atwew arrpemarl, rarl rtnehy tyaty ilkwa Jew-rnem-wenh kwen, ampwal rwew-arelh arrerenty. Yew-yew, atha arrenhantherrenh arrayt ileyl. Akngayan ahelerreyel arrewanther. Ra arrenhantherrenh ayntarrp-ileyenh, arreng arrewantherrenh-rnemelar angkakert Akngay-wenh-rnem atwenh awank-they.

<sup>52</sup> Yew-yew! Arrantherr angka Moses-wenhew akalty-anthey-angker-rnemay! Akngeyelan arrenhantherrenh inngarl artewentyel irrwampenh-antheyenhpwrep-anthem, akngerr ingwer-rnem akaltyerreyew, ikwerenh-angkwarr anaynteyew. Arrangkwaw! Rerneman angka ikwerenh iterl-arey-angenh, arrantherr-apeny!

<sup>53</sup> Ikwer-penh Jesus anperl-alhew apmer ikwer-they. Artwa Pharissee-rnem-then artwa angka Moses-wenhew akalty-anthey-angker-rnem-then rernem renh apenteynenh intem. Rernem ahel ikwer angkerrenh, renhap intem ayerneynenh. <sup>54</sup> Rernemap ikwer arrkernalhenh, ra apek apmwel-ayeth angkenteyew, rernem ayntarrp-ileyew renharl.

## 12

### *Mwanyt angkaynteyew, Akngayelarl aweyel-wety*

<sup>1</sup> Akngerr-anem akngerr-anem akarrenherrenh Jesus-warl, interrenty rtnehyerrenh ankertewerrenhanap. Rap kwertengerl ikwerenh-rnemew-tangkwel angkenh. “Mwanyt anayntehn-arey, artwa Pharissee-rnem-apeny irrewerr. Rernem aney-angenh, rernemarl angkem-angkwarr. <sup>2</sup> Rernem nthakenh irryertel apmwel-ayeth mpwarey-angenh, Akngayelarl arem-wety. Ra arem, rap apmwlan anayntehnhey-alpem angkepearl, akngerrel iterl-areyewan. Arrantherran nthakenh irryertel apmwel-ayeth mpwarey-angenh arrpemarl. <sup>3</sup> Kel mwanyt angkayntehn-arey. Arrantherr apek ingwerew irryertel ingwel angkem. Ingwerentyakel awemarl, rap ingwepenh akngerrew iley-ayntem. Arrantherr apek warl kwen-itwew arreytemel angkem. Ingwerentyakel awemarl, rap atayel angka arrewantherrenh iltem, akngerrel aweyew.”

### *Ingwer-rnem-wety atererrey-angenh, Akngay-wetyant atererreyew (Matthew 10:26-31)*

<sup>4</sup> Jesus angkew kwertengerl ikwerenh-rnemew, “Arrantherr atyeng apelyt-rnem, athan arrenhantherrenh arrayt ileyl. Atererrey-angenh artwa ahelengkw-rnem-wety. Rerneman arrenhantherrenh ipmew atwey-angker. Ipmew attwenty-penhan rernem nthakenh arrenhantherrenh irrwampenh-anthey-angenh-anem, arrangkw-anemarl. <sup>5</sup> Arrantherr Akngay anyent-wetyant atererremer. Ilkelhentyelan rap arrenhantherrenh-tangkwel atwewerr, rap iwegwerr rwa ilkwewarl-anem, aletharl ampeyel-warl. Ikwer-wety arrantherr atererremeran. <sup>6</sup> Nyengk yanh-rnemew iterrehn-arey. Anantherran iterrem, nyengkew-rnem apmwewathen. Akngayanap ikwer-rnem athamerrem, iypel erlewey-angenh renh-rnem. <sup>7</sup> Arrewanther Akngayan athamerrem inngarl. Arrantherr akngerr innga alperr-apeny. Ranap kanper ingkerrenh anyentarl-anyentarl iterl-arem. Rarl thip-rnem arntarnt-arem-apeny, rap arrenhantherrenh mwanyt inngarl arntarnt-arem.”

*Angka Jesus-akert ilaynteyew alhewer  
(Matthew 10:32-33)*

<sup>8</sup> Jesus kwertengerl ikwerenh-rnemew angkew, “Ayengan Artwa Inngarl Akngey-wenh. Ayengan arraty arrewantherr angkeyel. Arrantherr ingwer-rnem ilenty, alhewer angkemel, ‘Athan Jesus apenteyel’, ayeng arrewantherr inkwerelhemarl. Athap ilem antyerl Akngey-wenh-rnem, ‘Inngarl rernem ayen ayenteyel’<sup>9</sup> Arrantherr apek ingwer-rnem ilem, ‘Athan Jesus-arl iterl-arey-angenh’, ayengap arrewantherr-wety intwemelerremarl. Athap ilem antyerl Akngey-wenh-rnem, ‘Renh-rnem atha iterl-arey-angenhaw’<sup>10</sup> Arrantherr apek atyeng apmwel-ayeth angkem, Artwa Akngey-wenh Innga ikwer. Arrantherrap Akngey-warl alakenh angkem, ‘Akngayay! Apmwa atyeng-wety irrarka.’ Rap apmwa renh irrarkem arrewantherr-wety. Rap arrewantherr awakelhey-angenharl, arrenhantherrenh angkep atwewayan, arrangkwarl. Arrantherr apek apmwel-ayeth angkem Inweng Mwerr-angker Akngey-wenh ikwer. Akngayelanap nthakenh apmwa renh irrarkey-angenharl arrewantherr-wety, arrangkwarl. Arrantherrap apmwa ikwer-akert-antey anayntem intem-antey.

<sup>11</sup> Arrantherr ayen apentyent, mwanty ingwer-rnemel arrenhantherrenh antwerkewerran, tyaty Jew-rnem-wenh-warl akngewerr-anem. Rernem arrenhantherrenh court-warl apek akngewerr-anem. Artwa rltwernemel-then atyetyart ingwer-rnemel-then rernemap arrenhantherrenh arrker nem, ayern-ayntem-anem intem. Atererrey-angenh, rernemarl ayernem-wetyan.<sup>12</sup> Inweng Mwerr-angker Akngey-wenh ra akalty-anthem, angkeyew arraty, rernem ayernentyan.”

*Angka artwakert ampwal akngerr akarreley-angker*

<sup>13</sup> Akngerr ingwer-rnem anen-hantey, Jesus-ew awelherrenh. Artwa anyentan angkew ikwer, ‘Atyetyartay! Awayat� atyehel-then ayla akngey aylewenh iylpelerlewew. Awayat� atyehel akngew akngey-wenh ilek-ilek ingkerrenh. Ntwa renh ilemer, ampwal-rnem arlperryeleyew atyengarl ingwertyan.’

<sup>14</sup> Jesus-el tyernew, “Ayengan arla, mpwel-wenharl yanhan! Nthakenh atha iley-angenh. Mpwelarrp arlperryelenh-atherri!”<sup>15</sup> Rap ingkerrew-anem angkew, “Arternp anemel awelhenherr-arey. Anketyerrarl-aney-angenh! Nthakenh arrantherr ampwal akngerrew inkwerelhey-angenh. Nthakenh ilek-ilekel arrenhantherrenh akngey-angenh Akngey-warl, arrangkwarl.”

<sup>16</sup> Jesus-el angkanem ilenh ikwer-rnem. “Artwa anyent anen ampwal akngerr-akert. Ra apmer akngerrew-arteyp anem, rap amern akngerr lyaplhelenhan.”<sup>17</sup> Warlan amern akwerneyew-arelh ingkerrenh arrngelew. Rap nthakenh amern lyertenryne man akwerney-angenh, ingwer-ingwer arlkwaynteyewan. Rap ywarn-anem iterrew.<sup>18</sup> Rarl ament iterreh-penh, ra angkew, ‘Alakenh atha mpwarey. Atha warl akely-rnem atakey, ilkwernem-anem arteyneyew. Alakenhan mwerrarl, atha amern ingkerrenh akwerneyew ampwal-rnem-then.’<sup>19</sup> Kel ilek-ilek atha atnyeneyel-anem, ayeng Ityerreyew-anem, warrkerrey-angenh-anem. Atha inkwerelhemel amern-then arlkwaynteyew, ngkwarl-then antwaynteyew.’

<sup>20</sup> Akngayel ranap renh arew, angkew-anem ikwer, ‘Ngan apmwel-ayeth iterreyel! Rlengkan ingwel nga ilwem! Amern yanh-rnem-alew, ngkwengarl ntwa amentew akarrelenh? Rernemap ingwer-rnemewant-anem aynteman.’

<sup>21</sup> Jesus-el angka ilenh-penh, rap angkew ikwer-rnem, “Alakenh-anyem irrem artwa anketyewan, ampwal mwerr-angker-rnemarl akarreleyel amentew, ingwer-rnem anthey-angenh. Ran Akngayew iterrey-angenh. Ra iterreyel, rant ilek-ilek atnyenerl-annty-arrpanter, Akngey-angkwarran arrangkwarl.”

*Arralty-aney-angenh  
(Matthew 6:25-34)*

<sup>22</sup> Ikwer-penh Jesus angkew kwertengerl ikwerenh-rnemew, “Nthakenh arrantherr intem artewenty iterrey-angenh amernew-then arnkwe-then. Akngayel arrenhantherrenh arntarnt-aremarl.”<sup>23</sup> Mwerrarl amern-then arnkwethen atnyeneyew. Iteth aneyew mwerr inngarl.<sup>24</sup> Angerl yanh-rnem arenh-arey. Rernem-alew? Rernem irrngwa ilkanthey-angenharl, amern atherrkeny lyapeyewan, arrangkw. Amern ampergerrenty, rernemap akalhemel iney-angenh, arrangkw. Rernem amern warl-warlanem akwerney-angenh, ingwer-ingwer-anem arlkwaynteyew. Arrangkwarl! Akngay rant renh-rnem wantem, rarl ikwer-rnem athamerreman. Arrewantherranap ran athamerrem inngarl, nthakenh iwerl-alhey-angenh!<sup>25-26</sup> Arrantherr ilkelheyel, arleng-alenty anaynteyew, ampwerreyew-atety. Nthakenh arrantherr iterrey-angenh, arleng-alenty anaynteyew, arrangkw. Arleng-alenty apek arrantherr anem, arrangkw apek. Alakenh artewenty iterrey-angenh, amern akngerr ineyew, arrantherr arlkwaynteyew.

<sup>27</sup> Arnkewewan artewenty iterrey-angenh arrpemarl. Alpeyt yanh-rnem arenh-arey. Rernem-alew? Rernem warrkerrey-angenh. Arnkwethen atanthey-angenh, rernem aylpeyew, arrangkw. Mwerr-angkerarl rernem rtnew-rtnem. Atyetyart Solomon, awank-akerrarl anenh, arnkwa mwerr-angker arlkeny-arlkenyelarl ra aylpenh. Arnkwa Solomon-wenh mwerr-angker, alpeyt-rnemanap mwerr-angker inngarl! <sup>28</sup> Akngeyel arnwarnew ilek-ilek alpeyt-rnem atherrk-rnem-then. Aherretylel rernem arlenyerrem, anantherrap arrtyem-anem. Ra ingkerr arntarnt-arem, arrewantherr Akngey artewenty athamerrem, nthakenh iwerl-alhey-angenh! Artewenty iterrey-angenh, arnkwa aknger-rel aylpaynteyew. Arrantherran Akngeyewan awelh-aynteyew. Irrtywerremel renh apentey-angenh!

<sup>29</sup> Kel iterrey-angenh alakenh, ‘Amern-then aker-then-alew? Kwaty-then teylipl-then-alew?’ Alakenh artewenty iterrey-angenh! <sup>30</sup> Ingwer-rnem Akngey iterl-arey-angenh-rnemel rernem alakenh intem iterrem. Akngey irrwerl-arenyel arrenhantherrenh iterl-aremarl, nthakenh iwerl-alhey-angenh. Ra iterl-arem, arrantherrarl amern-weny arnkeweweny-thenan aneyelan, rarlap anthem anrewantherr. <sup>31</sup> Akngeyan atyetyart ilkwa ingkerrew, rap arrenhantherrenh arntarnt-areyel. Ikwerew ament arrantherr iterrenty, rap anthem amern-then arnkwethen ampwal ingwer-rnem-thenan arrewantherr.’

*Ilek-ilek mwerr-angker Akngey-itwel irrwerl  
(Matthew 6:19-21)*

<sup>32</sup> Jesus angkew kwertengerl 12 ikwer-rnem, “Arrantherran irrpetyap. Atererrey-angenh. Arrantherr yep-yep-rnem-apeny, Akngeyan yep-yepew-artey-apenyarl. Rap arrenhantherrenh ayerrpelew, ikwer-itwel aney-alpeyew. <sup>33</sup> Ampwal-rnem arrantherrarl akarrelenh-rnem ahern nhenh-itwew, arrangkwarlak ikwer-angkwarzan. Ampwal-rnem akngerr apwert-then akarrelenty, ingwerentyel irrtyert-inewerr apek, interkel arlkewewerr apek. Ampwal-rnem tharlemehn-arey, apwert-anem ingwer-rnemew anthemel arrangkwarl aneyel-rnemew. Arrantherrap alakenh-anyem Akngey-warl anthem. Rap arrernem arrewantherr ilek-ilek mwerr-angker irrwerl-itwew. Mwerr-angker ayntayntem intem-antey irrwerl-itwew, nthakenh ywerrey-angenh, arrangkw. Ingwerentyel irrtyert-iney-angenh, interkel arlkwey-angenh, arrangkw. <sup>34</sup> Arrantherr iterl-arenty, Akngeyel ilek-ilek mwerr-angker arrewantherr irrwerl-itwew atnyeneyel, arrantherrap intem iterrem Akngeyew. Arrantherr ilek-ilekant atnyenem ahern nhenh-itwew, arrantherranap iterrem ampwal ikwer-rnemewant.”

*Mwantu arntarnt-arelh-aynteyew, Jesus-arl angkep apetyeyen-h-wety  
(Matthew 24:45-51)*

<sup>35-37</sup> Jesus angkew ikwer-rnem, “Mwantu arntarnt-arelh-ayntenh-arey atyeng, ayengarl angkep apey-alheyenah ahern nhenh-warl. Angka nhew awelhenn-arey.

Artwa ilkwa anyent anenh warrkenh akngerrew-artey. Atwerrpan ra angkew ikwerenh-rnemew, ‘Ayengarl alhem-wety atyeng apeley areyew, arrantherran warl atyehn arntarnt-arayntenh-arey. Mpwelherl-anemel, ayengant apey-alpeyew-atety, arntarnt-arelhemelel atyeng.’ Rap anperl-alhew ikwer apeley-wenh apmer-warl-anem. Akngerr apmer ikwerel akarrerrenh, amern akngerr inkwerelhemel kwenty arlkwer-renh.

Ingwa ikwerel-antey artwa ilkwa ra alpew warl ikwerenh-warl. Warrkenh ikwerenh-rnem atyek-antey anenh, arntarnt-arelhennh ikwer lyenenty-akert. Rarl arlkey-alpew, rerneman arriuw ikwer altywerelew. Artwa ilkwan inkwerelhew, warrkenh ikwerenh-rnemarl atyek-antey ikwer mpwelhemew, rarl ilanthew-angkwarz. Ra renh-rnem ilew arrernelheyew, rap amentel-antey amern-anem ampernew, rernem arlkweyew.

<sup>38</sup> Mwerrang awelheyelay? Artwa ilkwa ingwer apek apey-alpew ampepenyel ingwel, aherrk-aherrkel apek. Warrkenh ikwerenh-rnem atyek-antey mpwelhenh ikwer, rernemap inkwerelhey-ayntem, artwa ilkwa ran inkwerelhew arrpemarl ikwer-rnem.”

<sup>39</sup> Jesus-elan angka ingwer-anem ikwer-rnem ilenh. ‘Irtyert-awarr alhew anyelkel-antey warl anyent-warl. Rap warlew-artey iley-angenh-antey, warlew-artey ra ikwer atyek-anteyarl arntarnt-arelhherl-anewerr, alwernemel renh irrentewerrarl. Rap kwen aylpenhew, ilek-ilek-anem inew. <sup>40</sup> Ayengan Artwa Inngarl Akngey-wenh. Arrantherr atyeng arntarnt-arelhelyewan, arrantherrarl iterl-arey-angenh, ayengarl angkep apey-alheyenah. Arrantherr apal anerl-anewerr, ayengan arwapeny apey-alheyen, aremerrey-alheyenah.’ Alakenh-anyem Jesus ilelhenh kwertengerl ikwerenh-rnemew.

<sup>41</sup> Peter-el Jesus ayernew, “Ingkartay, 12 anwernantherrant iterrem angka nhenhew? Ingkerrenh-antey apek iterrem angka ikwer?”

<sup>42</sup> Jesus-elan tyernew alakenh: “Atha angka arrenhantherrenh artwa akalty-akert ileyew, rarl arraty intem Akngeyew anem. Artwa ilkwel artwa nhelkwer-anyem arew. Rap renh arrernew, atyetyart ampepel aneyew, rarl warrkenh ingwer-nrem arntarnt-araynteyew, amern antherl-aynteyew. <sup>43</sup> Artwa ilkwa alhew-tangkwel. Rarl apey-alpewel, warrkenh renh arey-alpew, mwerrarl warrkerrenh artewentyel. <sup>44</sup> Ra inkwerelhew, rap angkew warrkenhew, ‘Nga mwerr-angker innga warrkerrew. Nhepenh-anyem nga warlewant atyetyart aneyanghen. Ngan atyetyart aneyen iley-ilekew; warlew, pwelek-rnemew, atherrkw, ilek-ilek ingkerrenh atyenhew.’

<sup>45</sup> Warrkenh ingweran arraty warrkerrey-angenh apek. Ra iterrew, ‘Atyengewarteyp apey-alpey-angenh-antey, intem apek alhew.’ Ran iltemel atwenh warrkenh ingwer-rnem, artwernem-then arelh-rnem-akerr. Ran aynterlant-anenh, amernant akngerrarl arlkwemel, ngkwarl-then antywenn, terangkerreyew-atety. <sup>46</sup> Rap apal ayntem, ikwerew-artearyl apey-alpewel. Artwa ikwerew-arteylel renh artewentyel atwew, irrentemel ingwer-rnemarl anenh-warl, Akngey apentey-angenh-rnem-warlanem.” Alakenh-anyem Jesus ikwer-rnem angkenh.

<sup>47</sup> Jesus-el angka warrkenh-akert anaynteyew. “Mwerr arrantherr aweyel angka nhnenhan? Warrkenhel iterl-areyel arraty-angkwarr, ikwerew-arteylearl renh ilanthew-angkwarr, rap alakenh irremer. Ra apmwelhelenty, ikwerew-arteylel renh artewentyel irrwampenh-anthem. <sup>48</sup> Ikwerew-arteylel renh mwanty iley-angenh apek, alakenh ileyew. Warrkenh ra apmwelhelenty, ikwerew-arteylel renh alyepelant irrwampenh-anthem. Kel alakenhaym Akngeyelan anthem warrk akely ingwerenty anyentew. Akngey ilkelhem, ikwer arraty warrkerreyew. Rap renh ayerney-angenh warrk ingwerewan. Akngeyel apek warrk ilkwarl ingwerentyak anyentew anthem-anem. Akngey ilkelhem, ra ikwer arraty warrkerreyew arrpemarl. Nthekwern ra alakenh angkey-angenh, ‘Warrk nhayman ilkwarl, nthekwern atha arnwarney-angenh.’”

*Altyernem amentew-amenterreyen Jesus-they  
(Matthew 10:34-39)*

<sup>49</sup> Jesus-elan kwertengerl ikwerenh-rnem akalty-anthenh-antey, rap ikwer-rnem angkew, “Ayeng apetyew ahern nhenh-warl, angka Akngey-wenh ilaynteyew. Ingwer-rnemelan iylparethel avey-angenh. Akngeyel renh-rnem rwewarl iweyen, aletharl ampeyel-warl. Ayengan iterreyel, ‘Akngey alakenh anamerl irremer!’ <sup>50</sup> Ingwer-rnemel-tangkwel ayenh atweyen, artewentyel irrwampenh-anthemel. Akngeyel ilew awank-akerr, alakenharl irreyen. Ayengan artewentyel iterreyel-anem mpwelheyel, ayenh rernem ywerrelhelemel ipmew atwyew-atety. <sup>51</sup> Arrantherr apmwel-ayeth iterreyel alakenh, ‘Jesus-ang apetyew ahern nhenh-warl, ingwer-rnem ileyew, akeleyt anaynteyew?’ Arrangkwarl! Akngerr ilterrerrl-aneyen arnerant-arey atyeng-they. <sup>52</sup> Ingwer-rnem altyernem anerl-aneyen warl anyentel. Ingwer-rnemel ayenh apenteyen, ingwer-rnemelan arrangkw apek. <sup>53</sup> Rernemap ingkerrenh ilterrerrl-aneyen, akeleyt aney-angenh, arrangkw. Aynenheng-rnem ilterrerrl-aneyen. Amenheng-rnem ilterrerrl-aneyen arrpemarl. Anherrenheng-rnem ilterrerrl-aneyen arrpemarl. Alakenhaym akngerran ilterrerrl-aneyen atyeng-they.”

*Mwanty iterremel arraty anaynteyew  
(Matthew 16:1-3; Mark 8:11-13)*

<sup>54</sup> Jesus angkew akngerrarl rtnenherrenhew, “Arrantherrarl akwerrkel-akwerrkel arem, alker-itwewarl artenhey-alpem, arrantherrap alakenh angkem, ‘Ya, rlengkan kwaytarl rntwem.’ Raw inngarl rntweman. <sup>55</sup> Arepal twenty, arrantherr alakenh angkem, ‘Ya, aherrety-anem irrenhey-alpeyeh alerl-antey.’ Rap inngarl aherrety ireman. <sup>56</sup> Arrantherran arraty iterrey-angenh! Arrantherr arem akwerrkel-akwerrkel-then arepal-then, arrantherrap arem, nthakenh irreyen. Arratyip! Arrantherr iterl-aremer, ran aynteyen, ayengarl angkeyel-angkwarr. Rlengkan arrantherr annel iley-ilek areyel. Arrantherrap iterl-arey-angenh, nthakenh irreyen arrwikel.

<sup>57</sup> Arrantherr iterl-aremer, arraty aneyew. Kel arrantherr arraty anayntenh-arey! <sup>58</sup> Athan angka ilem, arraty-angkwarr aneyew-arelh. Mwanty innga iterreh-arey! Ntwa apek ingwerenty iltenh. Ra apek artewenty aheleerrew ngkweng, ngenh court-emeleyew apek. Nga angkemer ikwer-warl, arternp ikwer awelhemel. Ra apek ngkweng angkem, ‘Menty-anem iylpelerrey.’ Alakenhaym mwerrant-atherr-anem mpwelanth pweyterremarl. Ngetangkwel apek ikwer-warl ilelhey-angenh, ra ngenh inngarl court-emelewerr. Artwa court-ew-arteylel ngenh ilem, apwert akngerr ikwer antheyew. Ra ngenh ahayiwem-anem ilytemwerney-warl, akwernem-anem ilytemwerneyel ngenh. <sup>59</sup> Ngenhap arlengew-alenty tyayl-itwew atnyenem, ntwa apwert antheyew-atety,

artwa court-ew-arteyelarl ilanthew-angkwarz." Alakenh-anyem Jesus-el akngerr akalty-anthenh.

## 13

*Angkeperrenhey-alpa apmwethay, ilwewerr-anem nga*

1 Jesus-el akngerran akalty-anthenh-antey, ingwer-rneman apetyew ikwer-warl angka apmwakert. Rernemap ikwer-warl angkey-alhew, "Anantherran ngwampant apetyew Jerusalem-they. Nhakan akngerr Galilee-areny-rnem aylpew tyaty ilkewararl Jew-rnem-wenh-warl, Akngeyew kwenerr-aynteyew. Atnwenth-rnem-then rernem Akngeyew atwew arrtyemel. Rernemarl alakenh irrenhewarl, Atyetyart Pilate-wenh ahawarr-nem rernem alhew, aylpenhew-anem tyaty ilkewararl. Rernemap Galilee-areny-rnem ingkerrenh atwew-alhew ipmew-antey!"

2 Jesus-el awew, rap ayernew, "Nthakenharl arrantherran iterreyel? Ilek-wety akngerr Galilee-areny-rnem ilwew? Rerneman irrwernelhew, apmwel-ayetharl apek anenh? Akngeyelap apek renh-rnem irrwampenh-antheyew? Ingwer-rnem Galilee-arenyan mwerr-angkwarz apek anenh? 3 Awelhenh-arey atyeng arrantherr! Arrantherr nyer-terremel apmwewety angkeperremer Akngey-warl, arrantherran ilwewerr arrpemarl. 4 Arrantherr apek angka awew, artwa 18 weth-rnem tawen Siloam-areny-akert? Warl arlpewt ilkwa atakelhew, aytinemel ikwer-rnem-warl, lthwew-anem renh-rnem ipmew-antey. Rernem-alew? Arrantherr apek iterreyel, Siloam-areny-rneman apmwel-ayetharl anenh? Akngeyan ikwer-rnem iterrey-angenh apek, renh-rnem arntarn-arey-angenh, ingkerrenh-anemarl ilwew? Arrangkw, alakenh-weny. Rerneman apmwelhelew, arrantherr-apeny. 5 Arrantherr apmwewety angkeperremer Akngey-warl, arrantherrap ilwewerr arrpemarl."

*Angka arwerl amern-weny-akert*

6 Jesus-el renh-rnem akalty-antheyew, Akngeyan akngerrew mpwelheyel, rernem angkeperrenhey-alpeyew apmwethay, ra renh-rnem irrwampenh-anthewerr. Rap ilenh-anem angka ikwer-rnem. "Artwa ilkwelan katen atnyenreh, rap arwerl tywerrk-apeny lyapelhelenh katen ikwer-itwew. Rap arerlenty-akngengh amern anentyew arwerl ikwer-itwew ywarn-antey. 7 Rap angkew warrkenh ikwerenhew, 'Aherrety irrpewy-anem atha arenh arwerl nhenh amern anentyew. Arrangkw! Arwerl nhnhelan ahern arrngelem arrangkwew. Arterney-anem, arwerl ingwerant-anem lyapelheley-alkenh.' 8 Artwa warrkenh angkew, 'Artwa ilkway, aherrety anyentew-anem alerl mpwelhey. Alerl atha angerney ahern itwelhelemel, atna pwelek-wenh-anem arrernemel. 9 Aherrety anyent-penhel mwerr-anem apek lyapem. Kel mwerr. Amern aney-angengan, athap arternemarl.'

Alakenh-anyem Jesus-elan ilenh ikwer-rnem.

*Jesus-elan arelh arntety mwerreleyel arlt aikwerel ltyerrey-angker Jew-rnem-wenhel*

10 Ikwer-penh, Saturday-el, arlt aikwerel ltyerrey-angkerel, Jesus aylpenhew tyaty ilkewararl Jew-rnem-wenh-warl. Rap akngerr innga akalty-anthenh. 11 Arelh arntety anyent anenh. Ran artep apmwa alhenh, nthekwern arratyerrey-angenh, arrangkw. Arrenty anyentel renh arntetyelew awank-akerr, aherrety 18-el. 12 Jesus-el renh arew, rap arlkew-anem, ra apetyeyew. Rap angkew, "Irrepern ngan arelhampw! Atha arrenty ngkweng-wety irrentem." 13 Rap arelh arnew itepel, rap anamerl-antey arratyerrenhey-alpew-anem. Arelh rap artewentylel inkwerelhew, Akngey nakemel.

14 Artwa rltwa tyatyew-arteyel arew, ra ahelerrew Jesus-ew. Rap ingkerrenh iltew alakenh, "Arta 6-ant warckerreyew-arelh. Rlengkan Saturday-el, arlt ltyerrey-angker. Saturday-el anantherr Akngey-warl-athet angkem. Arlt aingwer-rnemel arrantherr apetyemer mwerrel-aynteyewan."

15 Jesus-el alakenh tyernew, "Arrantherr artwa rltwernem apmwel-ayeth iterreyel, Akngey apenterl-anenty-arrantey arraty! Arlt aippanhel arrantherr atnwenth-rnem tyarlewem, kwaty antywaynteyew, atherrk-then arlkwaynteyew. Nthakenh arrantherr angkethakw iwerl-alhey-angenh, rtnaynteyew parrikel kwen. Saturday-el arrantherran alakenh-anyem iwerl-alhey-angenh arrpemarl. 16 Arrantherranap atnwenthew ilek-ilekew amperrngerrem. Alakenh ayangan amperrngerrew arrpemarl arelhampw nhenhew, atha Saturday-el mwerrelelemel."

17 Artwa rltwernemel awew, rernemap apatew, Jesus-elarl nyerrel-anthew. Ingwer-rneman inkwerelhewarl, Jesus-elarl ilek-ilek mwerr-angker mpwarenhew arawerrng rltterr-k-akertel.

*Alakenh Akngey-wenh-rnem akngerrerrem  
(Matthew 13:31-32; Mark 4:30-32)*

<sup>18</sup> Ingwer-ingwer Jesus-elan akngerr akalty-anthenh angka Akngey-akertew, rarl atyetyartaneyen ingkerrenhew. Rap ayernew, “Nthakenharlap Akngey-wenh-rneman akngerrerrem? Ilek-apenyarlap rerneman? <sup>19</sup> Rernemanap arwerl akely-apenyarl. Thip anyent arrernelhem, atharkw arwerl ikwer-itwew mpwareyew. Arwerlrl ilkwerrem-warl thip akngerr-anem akarrerrem, atharkw arwerl ikwer-itwew mpwareyew. Alakenh-anyem akngerr-anem akarrerrem Akngey-warl.”

*(Matthew 12:33)*

<sup>20</sup> Jesus-elap renh-rnem ayernew arrpemarl, “Nthakenharlap Akngey-wenh-rnem akngerrerrem? Ilek-apenyarlap rerneman? <sup>21</sup> Arelhel apek amern rtamp akely ather-tangkwl ampernem. Rap amperneyeyel akngerrerreyew-atety, ingkerrenhel arlkweyew. Alakenh-anyem Akngey-wenh-rneman irrpetyap-tangkwl, ikwer-they akngerr-anem akngerr-anem irrem.”

*Angka arriw tyet-akert*

<sup>22</sup> Jesus alhenh-antey Jerusalem-warl. Rap apmer arrpanenh-warl alhenh, akalty-antherl-apen akngerr. <sup>23</sup> Ingwerelan renh ayernew, “Atyetyartay! Akngeyel irrpetyap apekant akngeyeyen, ikwer-itwel aney-alpeyew, akngerr-weny apek arrangkw?”

Jesus-el angkanem ikwer-rnem ilenh. <sup>24</sup> “Arrantherran arrayt anemer. Mwanty atyeng iterrenh-arey, irrwerl Akngey-itwel aney-alpeyew. Ranap arriw tyet-angkwarr aylperl-anenty-apeny. Akngerran akethelarl rtnerl-aneyen warl-itwew. Rernemap twetiwerrel-aneyen, kwen aylpeyew-anem. <sup>25</sup> Warlew-arteyelarl arriw akenteyen, ingwerenty nthakenh kwen aylpenhey-angen, arrangkw. Arrantherr Akngey-warl-athek arrayt aney-angenh-rnem, arrantherrap akethel rtnayntem. Arrantherrap arriwan rltar-atwerl-aneyen ywarn-antey, ayernerl-aneyen alakenh-anyem, ‘Atyetyartay! Arriw anewantherl altywerela!’

Warlew-arteyelan tyerneyen, ‘Arrangkwaw! Athan arrenhantherrenh iterl-arey-angen! Nthek-arenyarl arrantherran?’

<sup>26</sup> Arrantherrap angkeyen, ‘Iterl-areyelanalap ntwa anenhantherr! Anantherralap anen, amern arlkwenh ingkerrel-antey! Ntwa apmer anewantherrenh-itwew akalty-anthenh!’

<sup>27</sup> Ranap tyerneyen arrpemarl, ‘Rwengk, athan arrenhantherrenh iterl-arey-angen, ayen apenty-angenharl! Atha apmer arrewantherrenh iterl-arey-angen! Arrantherr irrywerremel ayen apenteh, apmwel-ayeth anemel! Alpenh-arey atyeng-wety!’

<sup>28</sup> Ikwer-penhan arrantherr areyen Abraham, Isaac, Jacob, angkakert Akngey-wenh-rnem-akert. Rernem ingkerr anerl-aneyen Akngey-itwel. Nthakenh arrantherran ikwer-rnemel-arleng aney-alpey-angen, arrangkw. Arrantherr ahelerremel artnerl-aneyen, Akngeyarl arrewantherr-wety intwemelerreyen. <sup>29</sup> Akngey-wenh-rneman anew-anerl-aneyen, inkwerelhemel amern kwenty arlkwerl-anemel. Jew-rnem alethang-rnem-then pwyterreyen anerl-anemel arrpemarl. Rerneman akngerrakw-areny, altwerl-areny, ayerrer-areny, antekerr-areny-akerr. Akngeyelanap renh-rnem ingkerrenh arntarnt-arerl-aneyen. <sup>30</sup> Akngeyan ilkelhew, Jew-rnem-tangkwl ikwer iterreyew rlterr. Rernemap ampep-they ipmelhew. Aleyan ingwer-rnemant-anem iterrem ikwer rlterr. Rernem-tangkwl Akngey-itwel aney-alpeyenh.’

<sup>31</sup> Jesus-arl angkenhewarl, artwa Pharissee-rnem apetyew ikwer-warl angkey-alhew, ‘Artwa atyetyart apmer Galilee nhenh-areny, artwa Herod, ra ilanthew, ngenh ipmew-antey atwewayw! Ngan alpeyew apmer nhenh-wety!’

<sup>32</sup> Ra tyernew, ‘Herod ra atyetyart apmwa. Ayengan atererrey-angen ikwer-wety. Arrantherr iley-alpenh-arey renh, athan arrenty-rnem irrent-ayntem alerl-antey, arntety-rnem-then mwerrel-ayntem. Ayengan warrkerr-ayntem, warrk atyen atha ywerrelheleyew-atety. <sup>33</sup> Ayengap anperl-alheyen Jerusalem-warl-anem. Arlita irrpetyel ayeng alpayntem iwerr ikwerel-antey apmer ikwer-warl. Akngeyelan ayen ilew, apmer ikwer-warl alpeyew. Herod-el nthakenh ayen ipmew atweway-angen apmer nhenh-itwew Galilee-itwew, arrangkw. Jerusalem-itwewant ayen ipmew atwewayhan, angkakert-rnem atwew-apeny ikwer-itwew. Rernemap ingkerr ilwew Jerusalem-itwew.’

*Jesus amperrngerreyel tawen Jerusalem-areny-rnemew*

<sup>34</sup> Jesus-an amperrngerreyelpew Jerusalem-areny-rnemew. ‘Ayengan ikwer-rnem amperrngerreyel Jerusalem-areny-rnemew! Rernem atwew Akngey-wenh angkakert-rnem, Akngeyelarl ikwer-rnem thwenew. Rernem apwertel wemel, ipmew-antey atwew renh-rnem. Ayenganap ilkelhew, renh-rnem ingkerrenh-antey arntarnt-araynteyew. Ayengan ilkelhew, renh-rnem ingkerrenh akarreleyew, tywek-tywekelarl akely-rnem

akarrelem-apeny, aympelhel artemel. Alakenh-anyem. Arrangkwarl! Rernemanap ayenh ingkerrenhel artepelant arew! <sup>35</sup> Alakenh-anyem Akngayelan apmer ikwer-rnem-wenh Jerusalem arntarnt-arey-angenh. Apmer yanhyan alkey-anem aytteyehn. Tyaty ilkwa renhanap atep-atakeyehn, ahernel-anem ayttey-alheyehn. Rernem nthakenh ayenh arey-angenh arleng-alenty apmer yanh-itwew. Ingwer-ingwer ayeng angkep apetyeyehn. Rernemap ayenh areyen-h-anem, alakenh-anem angkemel, ‘Artwa nhanyem mwerr-angker! Akgayelan renh thwenew arawerrng rlterrak-akertel!’” Angka nhanyeman Jesus-elan ilenh Jerusalem-areny-rnem-akert.

## 14

*Jesus-el arntety ingwer-anem mwerreleyel arltal ltyerrey-angker ikwerel*

<sup>1</sup> Saturday anyentel, arltal ltyerrey-angker ikwerel Jew-rnem-wenh-angkwarrel, Jesus alhew artwa Pharisee alkenh-wenh apmer-warl, amern arlkweyew. Artwa Pharisee ingwer-rnem artwa angka Moses-wennew akalty-anthey-angker-rnem-then rernem akarrerrew arrpemarl apmer ikwer-warl, amern arlkweyew. Rernemap mwanty-antey Jesus arntarnt-arenh. Rernem alakenh iterrenh, “Angka Moses-wenh ra apentyey-angenh apek, arntety ingwerenty mwerreleyel Saturday-el.”

<sup>2</sup> Artwa anyent anenharl arntety ilkvakert. Akwatherr-then arlaw-atherr-then ingkerrehn wangkew. Rap rtnerl-alhemel Jesus-warl alhew. <sup>3</sup> Jesus-elan artwa ilkwer nem-anem ayernew, “Nthakenh arrantherr iterreyel? Ilek Moses-wenh-angkwarra anteyel? Mwerrarlang artwa arntety mwerreleyewan arltal ltyerrey-angkerel? Arrangkw-part?” <sup>4</sup> Artwa ilkwerpeman akeleyterrew, arrangkw tyerney-angenh. Jesus-elan artwa arntety arnew, renh mwerrelew. Rap artwa arntety-penh thwenew, mwerr-anem alpeyew apmer ikweren-h-warl.

<sup>5</sup> Artwa ran alpew-wety, Jesus-el ayernerl-arrernew artwa ilkwer nem, “Angka nheneh iterrenh-arey arranther. Alerengkw ngkwenh apek aytnty-alhem irrkia intwer-warl Saturday-el. Ngap ikwer amperrngerrem, renhap tyerrem-anem. Pwelek ngkwenh apek aytuem. Ngap ikwer amperrngerrem, renhap tyerrem arrpemarl. Kel alakenh ayeng arntetyew amperrngerrew, athap mwerrelem Saturday-elan.” <sup>6</sup> Artwa ilkwa rerneman akeleyterrew, arrangkw tyerney-angenh, apatemel anew-anenh.

*Ilkwa aneyew arrkernelhey-angenh*

<sup>7</sup> Kel akngerry anew-anenh artwa Pharisee alkenh-wenh apmerel. Jesus-el arew, rernemarl ilkelhew ingkerrehn, arrwekel aneyew artwa alkenh-itwel, amern arlkweyew. Jesus-elan renh-rnem arew, rap angkanem ikwer-rnem ilew, rernem iterl-areyew.

<sup>8</sup> “Arrantherr iterl-areyel, artwethen arelh-then itengerrem anewantherrenh-angkwarr. Akngerran akarrerrem apmer anyent-warl, inkwerelhemel amern kwenty arlkwemel ikwer-atherr-itwel. Apmer ikwerel-arteylel apek ngenh ilem, ntwa amern arlkweyew arrpemarl. Pwertyw mwanty! Arrwekel aney-angenh artwa ilkwel-arlung. Arrwekel-antey apek ra artwa ingwer-tangkwelarl ilew, ilkwa ngkwing-angkwarrarl.

<sup>9</sup> Artwa apmerew-arteylel ngenh ilem, arnangerreyew artwa ilkwa ingwer-wety. Ngap aney-alpem ingkern-ampenyelarl. Akngerrrelap ngenh arem. Kel ngap artewenty inngey nyerrerrem-anem, ngay? <sup>10</sup> Ngarl apmer ikwerel aney-alhem, mwanty-tangkwel iterra. Ingkern-ampenyel-tangkwel aney-alhemer. Apmerew-arteylel ngenh arem, rap ngenh ilem, arrwekel-ampenyel aneyew ilkwer-itwel. Akngerrrelap ngenh arem, rernemap ngenh iterl-arem ilkwarl. <sup>11</sup> Kel alakenh-anyem aytteyel: nga ilkwa aneyew arrkernelhem, ingwer-rnemelap ngenh akelyarl ilem. Nga apek akely-antey inkwerelhemel anem, ingwer-rnemelap ngenh ilkwarl ilem.”

<sup>12</sup> Artwa alkenh Pharisee ikwer Jesus angkew-anem. “Ingwer-ingwer apek nga iterrem alakenh, ‘Atha apek ingwer-rnem ilem, apmer atyenh-warl apetyeyew, amern-then aker-then arlkweyew.’ Ngkwenh-rnemant ntwa iley-angenh. Ngkwing apety-rnemant ntwa iley-angenh. Ingwer-rnem apwert akngerr-akert ntwa iley-angenh. Arrangkw! Ingwer-ingwer rernem ngenh ilewerr, amern arlkweyew ikwer-rnem-itwew-anem. <sup>13</sup> Ntwa amern akngerr ampernenty, ngap alakenh irremer. Apwert-weny-rnem-then lerrp-rnem-then aparrng-rnem-then ntwa ilemer, amern ngkwing-itwew arlkweyew. <sup>14</sup> Yanh-ilkwer-rnemel nthakenh antheyney-angenh angkep. Akngayelanap ngenh arntarnt-arem, irrngerney-anthemel ngenh. Ingwer-ingweran ra antheynem angkep ngkwing. Arltal ikwerel, rarl itethelem arraty-angkwarr aneyel-rnem, rap inngarl antheynem ngkwing angkep.”

*Akngay ilkelhelyel akngerrrew ikwer-itwel arlkwemel aneyarr-alpeyew  
(Matthew 22:1-14)*

<sup>15</sup> Akngerr ingwer-rnem anew-anenh-antey artwa Pharisee alkenh-wenh apmer-itwew, amern arlkwemel Jesus-ew awelhenh. Rerneman apmwel-ayeth iterrenh alakenh, "Arrangkwari aneyel-rnem rernem nthakenh aney-alpey-angenh Akngey-itwel, arrangkw." Artwa anyentan ikwer angkew, "Anantherr inkwerelhem, Akngey-itwel anyey-alpeyew amern arlkwemel. Rap arntarnt-arayntem anenhantherrenh."

<sup>16</sup> Jesus-an angkew, "Atha angka ileyew artwa ilkwakert. Artwa rap amern akngerr inew aker-then, rap iterrew, 'Athap akngerr ilem, apetyeyew apmer atyen-h-warl, amern inkwerelhemel arlkweyew.' Rap ikwer-rnem yangkelhew, amern arlkweyew ikwer-itwew. Rernem apetyeyew, warrkenh ikweren-h-rnemel amer-then aker-then ampernentyewarlant. <sup>17</sup> Ikweren-h-rnemel ampernew-penh, rap warrkenh anyentan ikweren-h thwenew, ingwer-rnem ingwerl-alpeyew. 'Apetyen-h-arey arranther!' Artwa ilkwa atyengew-arteyarl mpwelheyel amern kwenty-akert'

<sup>18</sup> Rernemanap anyentarl-anyentarl arlkarerrew, apetyewerr amern arlkweyew. Artwa anyentan angkew, 'Ngwampam atha katen payemelew, athap rlengk areyew. Angkep alpa, ilerl-alpeyew artwa ngkwengew-artey, nthakenh atha ikwer-itwew arlkwey-angenharl.' <sup>19</sup> Artwa ingwer-anem angkew, 'Ngwampam atha pwelek-rnem 10 payemelew. Atha renh-rnem arrker nemel warrkemeleyew. Angkep alpa, iley-alpeyew artwa ngkwengew-artey, nthakenh atha ikwer-itwew arlkwey-angenharl.' <sup>20</sup> Artwa ingwer-anemarl angkew, 'Ngwampam ayeng itengerrew. Ayengan aneyew apmer-itwew akely atyehn-akert'

<sup>21</sup> Artwa warrkenh alpem, artwa ikwerew-artey iley-alpeyew, rernemarl arlkarerrew. Artwa ilkwa ra nyerr-anem irrew, rap ahelerremel angkew, 'Anamerl alha tawen-warl! Alha irrepern ileng-rnemew, iwerrel anyelelew-rnem nthweyew. Apwert-wenyew-rnem-then nthwa. Lerrpew-rnem-then aparrngew-rnem-then nthwa. Renh-rnem akngey-alpa apmer atyehn-warl, amern arlkweyew!'

<sup>22</sup> Warrkenh rap alhew, ikwer-rnem nthweyew. Rap renh-rnem arey-alhew, atnwenhew-anem artwa ilkwewenh apmer-warl. Rap angkey-alpew, 'Nhanteyaw! Atha akngey-alpew, ntwarl ilanthew-penh. Warl nhenhanap arrngeley-angen-h-antey. Akngerr innarl akarreyyen-h-wety.'

<sup>23</sup> Artwa ilkwan warrenh ikweren-h thwenew arrpemarl. 'Anamerl alha tawen aketh-ampeny-warl, ingwer-rnem irrkerel anew-anyelelew-rnem nthweyew. Rerneman apetyeyew arrpemarl apmer atyehn-warl. Warl atyehn akngerrel arrngelenheyew!'

<sup>24</sup> Rap angkew-anem akngerrel warl ikwer-itwew, 'Awelhenh-arey atyeng! Ingwer-rnemel atha ilew arrwekel-antey ywarn. Rernem ayen nyerrel anthew. Rernemap nthakenh amern atyehn arlkwey-angenharl, arrangkw!"

Jesus-elan angka nhenh ilenh, artwa ilkwe-rnemarl angka Akngey-wenh inwer-lewenh. Nthakenh rernem ikwer-itwel aney-alpey-angenh.

### *Jesus anantherr apentemer mwanty iterremel*

<sup>25</sup> Jesus-an alhenh-antey tawen Jerusalem-warl. Akngerrelan renh apenteynenh. Rap artepang arew, angkew-anem ikwer-rnem, <sup>26</sup> "Ingwerently athamerrem ikweren-h-rnemewant. Aynewikw-then amewikw-then ra ilkelhem. Ra ilkelhem akeltyew-then alerikkwew-rnem-then, awayikkwew-then angkwerikkwew-then. Rant mwantyelhem arrpemarl. Kel ra kwertengel atyehn aneyew apek, rap atyeng athamerremer artewentyel. Ra atyeng artewentyel ilkelheyew, ikweren-h-rnemewan alyepel. Ran ayen apenteyew, ikwer amenterrpwant iterrey-angenh. <sup>27</sup> Ra apek kwertengel atyehn aneyew, rap ayen intem apent-aynteyew, ipmelhey-angenh. Ingwer-rnemel apek renh irrwampenh-anthewerr, rarl ayenhan apenteyel. Intem aneyew ra, ipmelhey-angenh.

<sup>28</sup> Angka nhenhew awelhenh-arey arranther. Artwa anyent ilkelhew, warl arteyew. Rap iterrew-tangkwel, 'Apwert akngerr antheyew, warl arteyewan. Ya, apwert akngerr atha atyeneyley.' Rap warl mwerr-angker-anem artew. <sup>29</sup> Artwa ingwer-anemarl ilkelhew, warl arteyew. Ranap mwanty-tangkwel iterrey-angenh, arrangkw. Rap warl ilkwarppantey arteyew, apwert ikweren-h angath-antey ywerrew. Akngerrelan renh arew, warl ikweren-h ywerrelheley-angen-h-antey, rernemap artwa renh atherrelhelenh, <sup>30</sup> 'Ran mwanty-tangkwel iterrey-angenh! Aleyan ra apwert-weny warl-weny-then-anem!'

<sup>31</sup> Angka ingwerew-anem awelhenh-arey arranther. Artwa ilkwa atherr apmer ilkweyew-artey atherr anenh. Anyentel artwa ahawarr-rnem 10,000 atyenew, ingwerelan 20,000-arl atyenew. Ingwer-ingweran ratherr ilterrenhan. Artwa ilkwa arrwekeleny iterrew mwanty, 'Ran artwa ahawarr akngerrarl atyeneyley atyehn-rnem-angkwarr. Nthakenh atha atyehn-rnem ilanthey-angenh, ingwer-rnem atwewyew, arrangkw.

Rernem atyenh-rneman atwewerrarl! <sup>32</sup> Angkakert-rnem-tangkwel atha thwenemer arleng-they-antey, akeleyt-antey artwa ilkwa ikwer angkerl-alpeyew. Anyenterremer aylanth atwerrey-angenh.' Alakenh-anyem ra mwanty-tangkwel iterrew. Angkakert-rnem alhew artwa ilkwa ingwer-warl, rernemap ikwer angkerl-alpew akeleytelemel.' <sup>33</sup> Jesus-an angkew-anem ingkerrew, "Artwa warl artey-angker ra apwert-tangkwel arew, mwanty iterremel. Artwa ilkwa wethan iterrew artwa ikweren-hrnem ahwarr-nemew-tangkwel mwanty. Ingwerenty ayenh apenteyew, rap alakenh-tangkwel iterreyew mwanty, ra angkeperrewwer atyeng-wety. Ra iterremer, 'Ingwer-rnem ayenh irrwernewerr.' Rap atyeng-tangkwel iterremer. Ikweren-hrnemewan ra alyepel iterremer. Ampwal-rneman ra iwerlelpemer, ayenhant-anem apenterl-anemer."

*Thalt mwerr-angker-apeny aneyew  
(Matthew 5:13-16; Mark 9:49-50)*

<sup>34-35</sup> Jesus-el angka ingwer-anem ilew thalt-akert. 'Anantherr thalt rlker-anthem-apeny aker-warl, anantherrap angkem, 'Mwerr-angkerarl alakenhan.' Thalt ra apek menty aynterl-anem, rap apmwerrem-anem ikweweny-anem. Nthakenh anantherr mwerreley-angenh, arrangkw. Anantherrap iwem rapety-warl. Mwanty iterrenh-arey angka nhenhew, arraty-angkwaran anemel. Thalt-weny aker anantherr nthakenh arlkwey-angenh, ikweweny wethey. Irrkaty arppemarl Inweng Mwerr-angker-weny nthakenh anantherr Akngey-angkwarz aney-angenh, arrangkw."

## 15

*Yep-yep anyentarl aperrterrew-akert  
(Matthew 18:10-14)*

<sup>1</sup> Artwernem apwert kapmentew akarreley-angker-rnem angka Moses-wenh apentey-angenh-rnem-then rernem akarrerew, Jesus-ew awelh-aynteyew. <sup>2</sup> Artwa Pharisearnem artwa angka Moses-wenhew akalty-anthey-angker-rnem-then rernem tyel-angkenh Jesus-ew alakenh, "Artwa nhenhan apmwarl! Inkwerelhemel artwa apmwernem-itwew anerl-apeyel, amern-then arlkwerl-apeyel!"

<sup>3</sup> Jesus-el awew, rernemarl angkerrenh, rap angkanem ilenh. <sup>4</sup> "Artwa yep-yepew-artey anyent anenh, yep-yep-rnem 100 rarl atyenernh. Yep-yep anyent ament alhew, rap aperrterrew-anem. Artwa yep-yepew-arteyel 99 ingwer-rnem iwerl-alhew, atherrk arlkwaytneyew. Rap alhew, yep-yep anyent ikwer nthweyew. Rap nthwenh nthwenh arey-alheyew-atety. <sup>5</sup> Renharl arey-alhewel rap artewentyel inkwerelhewan, nthek-warl tywenerl-alhemel akngey-alpew-anem apmer-warl. <sup>6</sup> Rarl apmer-warl aremerrey-alpew, rap arlkey-alpew ikwer apelty-rnemew, 'Apetyenh-arey arranther! Anantherr ingkerrenh inkwerelheweyew. Yep-yep nhanyem atha inerl-alpew aperrterarl irew-penh!' <sup>7</sup> Ingwerenty Akngey iterl-arey-angenh ra nyerrerremel ikwer-warl angkeperrenty, irrwerlel aneyel-rnem inkwerelhem, yep-yepew-artey inkwerelhew-apeny yep-yep ikwerenhew. Ingwer-rneman kel-anteyarl arraty ikwer aneyel."

*Ngkwelty anyentarl ywerrew-akert*

<sup>8</sup> Jesus-el angka ingwer-anem ilenh. 'Arelh anyent anenh ngkwelty-rnem 10-akert. Ngkwelty-rnem gold-penh, nthakenh anthey-angenh, nthakenh iwey-angenh, arrangkw. Rerneran impenarl ikwerenh, ra atyenernh mwanty-antey. Ngkwelty anyentan aytnew, ywerrew-anem. Arelhel lyementy-anem arrtyew, warl ikwerenh irralkemel arternp. Rap nthwenh nthwenh arey-alheyew-atety. <sup>9</sup> Renharl arey-alhewel rap artewentyel inkwerelhewan. Rap ikwer apelty-rnemew arlkew, 'Apetyenh-arey arranther! Anantherr ingkerrenh inkwerelheweyew. Ngkwelty impen nhanyem atha arey-alhew ywerrewarl-penh!' <sup>10</sup> Ingwerenty Akngey iterl-arey-angenh ra nyerrerremel ikwer-warl angkeperrenty, irrwerlel aneyel-rnem inkwerelhem, arelh inkwerelhew-apeny ngkwelty ikwerenhew.'

*Artwamp alerikw atherr-akert*

<sup>11</sup> Jesus-el angka ingwer-anem ilenh. "Artwamp anyent alerikw atherr-akert. <sup>12</sup> Akelyelan aynikw ayernew, 'Akngayay! Ingwer-ingweran ntwa akalkelhelem ampwal-rnem apwert-rnem-then ayernew, anewantherrenh-angkwarz. R lengk-antey ayernew ntwa alakenh-anyem akalkemel!' Artwampel rap akalkelhelew-anem alerikwew-atherr.

<sup>13</sup> Ikwær-penh ingwer-ingwer alerikw akelyel akarrelew ilek-ilek apwert-rnem-then. Rap apmer ikwerenh iwerlelpew, apmer ingwer-warl-anem alpew arleng intem. Apmer ikwer-itwew ra arrkentel-arlengant anenh, apwert-akerr arimpemel apmwel-ayeth.

<sup>14</sup> Apwerten ikwerenh ingkerr ywerrew. Apatemel-anem ra aneyelpew.

Apmer ikwer-itwew kwaty rntwey-angen, arrangkw. Aynterrk aynten, amern-wen-then aynten. Akngerran angayakw anen. Artwa akely ran angayakw arrpemarl anen. Ywarn ra iterreh, amern ineyew arlkweyewan. <sup>15</sup> Rap artwa ilkwa apmer ikwer-areny warrkew-anem ayernew. Artwa ilkwel renh thwenew, pikepik ikwerenhnem arntarnt-araynteyew. Rap pikepik-rnem wanten. <sup>16</sup> Angwenhel renh amern anthey-angen, arrangkw. Rap angayakw-antey anen, amern apmwa pikepik-rnem-wenh angwaren.

<sup>17</sup> Ran iterreh, ‘Ayengan angayakw-anem inngay, ayengarl apmwelhelew. Artwa warrkewn akngey atyen-wenh-rnem rernemap amern akngerr arlkwem atnertengerreyew-atety. Ayenganap angayakwarl ilweyel! <sup>18</sup> Atha apmer nhenh iwerlpeamer, akngey atyen-wenh apmer-warl alpemel. Ayengap ikwer angkey-alpemel, “Akngayay, ayeng-antey apmwelhelew ngkweng. Iylpelant atha ngenh awen, Akngey irrwerl-areny-then. <sup>19</sup> Ayen alerey antwey-angen. Ayengan nyerterreyel. Warrkenh-anem ayen arrerna ngkweng.” Alakenh-anyem ayeng akngey atyen-warl angkeyew.’ Rap akwenterl-alhew, anperl-alhew-anem aynikw-wenh apmer-warl-anem.

<sup>20</sup> Rap arrer-anem alpenh aynikw-wenh apmer-warl. Artwapan intemey arntarnt-arelhenh ikwer, rap renh arnarew-anem arleng-itwew. Rap alerikw ikwerenhew amperrngerrew. Ra anterrew, atnyenew-anem arrwanteyemel.

<sup>21</sup> Alerikw ikweren angkew, ‘Akngayay, ayeng-antey apmwelhelew ngkweng. Iylpelant atha ngenh awen, Akngey irrwerl-areny-then. Ayen alerey antwey-angen.’

<sup>22</sup> Aynelikwanap renh akeleytelew, arlkemel artwa warrkenh ikwerenhnemew, ‘Apetyen-arey arranther! Anamerl alhenh-arey, arnkwa mwerr ineyew, alerey atyen aylpeyew! Iltyew-arelh-then pwet atherr-then ikwer akngetyey, ra aylpeyew! <sup>23</sup> Aker kapey-kapey anterant ikwer atwey, ananther amperneyew! Rlengk ananther twenty arlkwem! <sup>24</sup> Ayengan iterreh ilwentyew-athen ikwer. Ran iteth-antey! Ayeng iterreh, ra aporerterrenty-arrpantey, raw mwerr aney-alpew! Kel warrkenh-rnemel aker kapey-kapey atwew, rernemap anamerl-antey ampernew. Akngerran akarrerrew, inkwelhemel arlkeww-arlkweyew.

<sup>25</sup> Artwamp-wenh alerikw alkenhan warrkerrenh apal-antey katen-itwew. Warrkenh ra apey-alpew apmer-warl-anem. Ra arrer-anem apmer-warl alpenh, rap avey-nenh, akngerrarl inkwelhemel aylelherrenh. Rap akngerr-anem arew, rntwenharl warl kwenel. <sup>26</sup> Rap itep-anem iltyerrew warrkenh anyentew, ‘Ilekay? Nthakenh irreyel?’ <sup>27</sup> Warrkenhel tyernew, ‘Aytayengkw ngkwenk apey-alpew. Aynengkw ngkwenk inkwelhew innga, rarl mwerr-antey apey-alpew. Ra ilanthew, aker kapey-kapey anterant ikwer atweyew, ananther inkwelhemel arlkweyew ingkerrel.’

<sup>28</sup> Alerikw alkenhanap ahelerrew, rarl awewel. Ran warl kwen aylpey-angen, arrangkw. Ra akethel-antey ahelerremel rtnenh. Aynikw ikweren tyerrelhew warl kwen-they, rap ikwer angkew arternp-antey. ‘Ilek-wetyarl ntwa arleng-they-antey arey-alpew? Apetyaw, arlkweyew anewanther-ittew.’ <sup>29</sup> Alerikw alkenhan ikweren ahelerrenh-antey. ‘Arrangkw wenh! Arleng-alenty ayeng ngkweng warrkerrenh, iylpareth-then awelhenh ngkweng. Ntwanap atyeng aker kapey-kapey anthey-angenharl, atyen-rnem-akertel atha arlkweyewan! Nanikwet akely apek atyeng anthey-angen, arrangkw! <sup>30</sup> Alerengkw akely-alew ngkwenk? Ra apwertarl ngkwenk akngew, rap arimpew arelh apmvernem-akertel, iltyant-anem apmer-warlan apey-alpew! Ntwan iltey-angen, arrangkw! Ntwan ilanthew artwa warrkenh-rnem, aker kapey-kapey anterant atweyew, inkwelhemel arlkweyew akngerrel’

<sup>31</sup> Aynikwan alerikw alkenhew angkew, ‘Alereyay, awelha atyeng. Aylakan itengant-atherr anenharl. Ilek-ilek ingkerr aylewakenhan. <sup>32</sup> Mwerrarl alakenh-anyeman, ingkerrelarl inkwelhemel arlkweman, aytayengkw ngkwenk aney-alpew. Ayengan iterreh ilwentyew-athen ikwer. Ran iteth-antey aney-alpew. Ayengan iterreh, ra aporerterrenty-arrpantey, raw mwerr-antey aney-alpew!’

**Anaynteleyel: Jesus-el angka nhenh ilenh, renh-rnem akalty-antheyew, Akngayarl athamerrem ingkerrew. Akngay artwamp-apeny. Ingwerenty angkeperrem ikwer-warl, arraty aneyew, rap inkwelhem. Artwamp-wenh alerikw alkenhan ahelerrew, artwa ilkwa weth-rnem-apenyarl, artwa Pharisee-rnem-them artwa angka Moses-wenhew akalty-anthey-angker-rnem-apeny. Rerneman ahelerrew Akngayew, apmwel-ayetharl aneyel-rnemew athamerrenh.**

<sup>1</sup> Jesus-el angka ilenh kwertengerl ikwerenhen-rnemew. "Artwa ilkwa anyent anen, apwert-then ampwal-rnem-then mwerr-angker atnyenengh. Ra warrkenh anyent arrernew, ilek-ilek ingkerrenh arntarnt-araynteyew. Ingwer-ingwer ingwer-rnem artwa ilkwa ikwer angkew, 'Artwa warrkenh ngkwenh yanh irrytawarr! Rap apwertan ngkwenh apmwel-ayeth arimpeyel.' <sup>2</sup> Rap arlkew artwa warrkenh ikwerenhenh, apetyeyew ikwer-warl. 'Ingwer-rnemelan ngenh ileyel irrytawarr. Ntwan nheng apwert atyen apmwel-ayeth arimpeyel. Nthakenh ntwan ilew? Pip weth inerl-alpa, ntwarl ingkwernew-akert ilek-ilek apwert-then ikwer-warl. Arla irrpetyap-penh atha ngenh thwenem nhenh-they.'

<sup>3</sup> Warrkenhan iterrew, 'Atyengew-arteyel ayenh thweneyen. Warrk-weny-anem ayeng angayakw anerl-aneyen. Arlka apmwa ayengan thapel, nthakenh atha angerney-angenh, amern atherrk rnkerneyew. Nthakenh ayeng ingwer-rnemew aparelhey-angenh, nyerrel. Nthakenh-anem ayengan irreyen? <sup>4</sup> Ya, alakenh atha ilem. Ayengan anyenterrem ingwer-rnem-warl. Ayeng warrk-they ipmelhem, rernem ayenh ilem, aney-alpeyew apmer ikwer-rnem-wenh-itew, ayenh arntarnt-araynteyew.'

<sup>5</sup> Arrwekel-antey artwa ikwelan arlenthew anter-then ntang-then ingwer-rnemew. Artwa warrkenhel renh-rnem ilew, apetyeyew ikwer-warl. Rap artwa anyent ayernew, 'Ilek artwa atyengew-arteyel ngkweng arlenthew?' <sup>6</sup> Artwa ran tyernew, 'Teram-rnem 100 anter-akert-rnem.' Artwa warrkenh angkew, 'Anamerl pip weth ineyew alha, artwa atyengew-arteyelarl thwenew. 100-an ipara. 50-anem ingkwerna ikwer-warl.'

<sup>7</sup> Rap artwa ingwer-anem ayernew, 'Ilek artwa atyengew-arteyel ngkweng arlenthew?' Artwa ran tyernew, 'Yakweth-rnem 1,000 ntang-akert-rnem.' Artwa warrkenh angkew, 'Anamerl pip weth ineyew alha, artwa atyengew-arteyelarl thwenew. 1,000-an ipara. 800-anem ingkwerna ikwer-warl.'

<sup>8</sup> Kel artwa ilkwel awew, artwa warrkenh ikwerenhelarl anyelkel arrernew. Rap renh nakew, 'Ngan tyak inngarl. Nga iterrew mwanty-tangkwel. Ingwer-rnemel ngenh ayernem, aney-alpeyew apmer ikwer-rnem-wenh-itew, ngenh arntarnt-araynteyew.'

Jesus-elan angka nhenhan anayntelew kwertengerl ikwerenhen-rnemew. 'Akngerran iterrem ilek-ilek ahern-arenyewant artwa warrkenh rapeny. Rerneman ament arntarnt-arerr-aynteyew. Rerneman tyakarl Akngey-wenh-rnem-angkwarz. <sup>9</sup> Arternp awelhenh-arey arranther! Arranther anyenterrem artwa ingwer-rnem-warl artwa warrkenh rapeny. Ilek-ilek apwert-then anthenh-arey ingwer-rnemew, rernem arewanther ilkelhem. Arrantherarl ilek-ilek apwert-then atnyeney-angenh anem, Akngeyelanap arrenhantherrenh ayernem, alpeyew aney-alpeyew ikwer-itwel intem-antey.

<sup>10</sup> Artwa anyentel apekan ampwal akely-akely ayntengen katy arntarnt-arem. Ra apek arraty-angkwarz arntarnt-arem, renhap arrernem atyetyart ilek-ilek akngerrew-anem. Ampwal akely-akely ayntengen ra apek apmwel-ayeth arimpenty, ampwal akngerrewanap nthakenharl renh atyetyartan arrerney-angenh, arrangkw. <sup>11</sup> Arranther apek ahern-areny arraty arntarnt-arey-angenh, nthakenh Akngeyel irrwerl-theyan arrenhantherrenh anthey-angenharl. Arranther nthakenh arraty-angkwarz arntarnt-arey-angenh. <sup>12</sup> Ilek-ilek ayntengen arranther mwanty arntarnt-arey-angenh, Akngeyel nthekwern ilek-ilek anthey-angenh, arewantherren ament atnyen-aynteyew, arrangkw.

<sup>13</sup> Arranther iterrerl-anenty apwert akngerr inaynteyew, nthakenhanap Akngey-angkwarz arraty aney-angenh, arrangkw. Anantherr anemer Akngeyewant, apwert akngerrew iterrey-angenh." Alakenh Jesus-el kwertengerl ikwerenhen-rnem ilenh.

### *Jesus-el artwa Pharisee-rnem akalty-antheyel*

<sup>14</sup> Artwa Pharisee-rnem Jesus-ew awelhenh. Rerneman ankety-rnem apwertew, rernemel irrpeltherrenharl atherrenh ikwer. Rerneman alakenh apmwel-ayeth iterrenh, "Jesus apmwel-ayeth angkeyel. Mwerrarl anewanther apwert akngerr atnyeneyewan. Akngeyan anewanther inkwerelheyel, rarl apwertan anthem anewanther arratyarl anyelelew." <sup>15</sup> Rap angkew ikwer-rnem, "Artwa Pharisee-rnem irrywerremel arrantherren Akngey ikwer mwerr-arrpantey aneyel. Arranther inkwerelhem, ingwer-rnemel arrenhantherrenh araynteyew mwerr-arrpantey. Akngeyelanap arrenhantherren iterl-areyel, arrantherren akwerrng iterreyel apmwel-ayeth, apwertewant iterreyel. Ran arrenhantherrenh areyelar, ranap arewanther inkwerelhey-angenh.

<sup>16</sup> Awank-akerr Akngeyel anthew angka rlterr ikwerenhen Moses-warl. Angkakert-rnem Akngey-wenh-rnemel angka ikwerenhen pip-warl ingkwernenh, akalty-anthenh ingwer-rneman akngerr. Rernem alakenh arleng-alenty irrenh, John Baptise-emeley-angker aremerreyew-atety. John aylanthan angka mwerr-angker nharl ilenh, 'Akngeyan

ikelhelheyel, ikwerenh-rnem ingkerrenh aneyew, alpeyew aney-alpeyew ikwer-itwel intem-antey.' Aleyan akngerr-anem ilkelheyel Akngeyew, alpeyew aney-alpeyew ikwer-itwel. <sup>17</sup> Mwanty awelhenh-arey! Angka atyenhewan arrantherr awelhemer. Angka Moses-wenew arrantherr awelhemer arrpemarl. Angka Moses-wenhan aley aynteyel-antey anewanther. Nthakenh angka ikwerenh akely apek iparey-angenh, arrangkw. Arrwekelan alker-then ahern nhenh-then-tangkwel ywerreyelpeyen, angka rterrk Moses-wen ywerreyew-allenty.

<sup>18</sup> Angka Moses-wen aynteyel arrpemarl alakenh-anyem. Artwel nthakenh arelh ikwerenh iwey-angenh, alhemel arelh ingwer-itwel, aney-alhem. Alakenhan apmwel-ayetharl. Artwa ingwerel nthakenh arelh irrkaty iney-angenh, ran iteng-areny-antey. Alakenhan apmwel-ayeth arrpemarl."

*Artwa anyent apwert akngerr-akert artwa irrepern Lazarus-akert*

<sup>19</sup> Jesus-el angka ingwer-anem ilenh. "Artwa ilkwan anenh apwert akngerr-akert, warl mwerr-angker ilkwteww anenh. Ra arnkwa mwerr-angkerel aylpenh, rantarl arlkwenh amern mwerr-angker. <sup>20</sup> Artwa irrepern innga anenh itnan Lazarus, tywen-angketyarrarl ran. Arltla arrpanen ikwerenh-rnemel irrwerlap-akngenh warl mwerr-angker-warl, arriw aketh-warl renh athenhey-alhenh, aparelh-aynteyew. <sup>21</sup> Rap arenh, artwa ilkwelarl amern mwerr-angker arlkwenh. Ra amern ampeny-ampenyararl arlkwenh, artwa ilkwelarl iwenh. Arengk akngerr apmer ikwer-itwew akarrerrenh, rernemap tywen-rnem arrwantyenh artwa irrepern ikwer-itwew.

<sup>22</sup> Ingwer-ingweran Lazarus atnengkanerrew-anem. Antyerl-rnemel renh akngeynew irrwerl, aney-alpeyew Abraham-itwel-anem. Ikwer-itwew amern mwerr-angker akngerr ra arlkwenh.

Kel artwa apwert akngerr-akert ra atnengkanerrew arrpemarl. Ikwerenh-rnemel renh akwernew awenng-warl, <sup>23</sup> rap aney-alpew, rwa intemarl ampeyelel. Rap pwarrkerrenh artewentyel innga. Arleng-they ra arew, Abraham-then Lazarus-then anenh. <sup>24</sup> Rap iterrew, 'Abraham-an akngey aylewakenh wethey anenh awank-akerr'. Rap arlkew, 'Abraham-ay! Amperrngerra atyeng! Lazarus ila, iltya pwerlp-arrerneyew kwaty-warl. Renh thwena, aleny arneyew, ayenh arkarleleyew! Ayeng ampeyel rwa nhenhel, artewentyel pwarrkerremel'

<sup>25</sup> Abraham-el tyernew, 'Ngan iylpelerrew arrer-antey? Alakenh-anyem aynteyel. Ngarl iteth-antey aneh ahern-itwew, ntwap ilek-ilek mwerr-angker atnyenhenh akngerr. Lazarus-arl iteth-antey aneh ahern-itwew, rap arrangkwarl atnyenhenh, tyenant akngerr arlkitew. Aleyan ran inkwerelhemel-anem aneyel atyeng-itwel, ngan pwarrkerreyel artewentyel inngarl. <sup>26</sup> Alakenh-anyem aynteyel arrpemarl. Ampepelan irka ilkwa intwer arrngert aynteyel. Anantherr nthakenh ngkweng-warl alhey-angenh nhethay. Ngan nthakenh apetyey-angenharl anewantherr-warl yanh-they, arrangkw.'

<sup>27</sup> Rap arlkew rwethey, 'Kelew. Ayteyat-rnem 5 atyenh-rnem-alew? <sup>28</sup> Rerneman ingkerrenharl aneyel apmer akngey atyenh-wenhel. Lazarus thwena, renh-rnem ileyew, rernem arraty anaynteyew. Ayengan ikwer-rnem amperrngerryel, nhenh-warl rernem apetyewerr intemarl ampeyel-warl.'

<sup>29</sup> Abraham-el tyernew, 'Angkarlap ayteyelengkw-rnem iterl-areyel, Akngeyelarl Moses-ew anthew. Angka ingwer-rneman rernem iterl-areyel, angkakert Akngey-wenhrnemelarl ingkwernew. Rernemap awelhemer ikwer-rnemew.'

<sup>30</sup> Rap arlkew arrpemarl, 'Abraham-ay! Alakenh-wen! Lazarus alhemer angkep, angkanem ikwer-rnem ileyew. Rernemap inngarl awemer, Lazarus-el ilentyan, rernemap nyerrerremel angkeperrenhey-alpem Akngey-warl.'

<sup>31</sup> Abraham-el tyernew arrpemarl, 'Arrangkw, Lazarus atha thweney-angenh. Ayteyengkw ngkwenh-rnemel awenh Moses-wen angka, angkakert Akngey-wenhrnem-then. Rerneman awelhey-angenh ikwer-rnem, rernemap ingwerew awelhey-angenh arrpemarl.'

Alakenh-anyem Jesus-el artwa Pharissee-rnem ilenh.

## 17

*Ingwer-rnem arrkerney-angenh, apmwangkwarr alhaynteyew*

<sup>1</sup> Jesus angkew ikwerenh-rnemew, "Ingwer-rnemelan arrenhantherrenh arrker nem intem-antey, apmwangkwarr alhaynteyew. Akngeyelan renh-rnem artewentyel irrwampenh-antheyen. <sup>2</sup> Artwa ingwerel arrkerney-angker renh antwerrkemer, ahenty-they arerntemer rwepel apwert ilkewewarl, kwaty alay-warl iwemel. Ra alakenh apek irrey-angenh, Akngeyan ahelerrem inngay arrkerney-angker ikwer. <sup>3</sup> Kel mwanty anayntenh-arey, arrantherr ingwer-rnem arrkernewerr, apmwangkwarr alhaynteyew.

Ingwer ayenharl apenteyel apmwelhelenty ngkweng-angkwarr, ntwa renh ilemer, ra ipmelheyew. Ra nyerrerremel ngkweng angkem, 'Ya wenh, ayeng apmwelhelew ngkweng-warl. Atha ngkweng apmwa mpwarey-angenh arrpemarl.' Kel ntwa renh ipmemel arrpemarl, rarl apmwelhelew-penh. Nga anyenterreyew-anem ikwerel-arleng.<sup>4</sup> Kel arita anyent ikwerel rap intem arrpemarl apmwa mpwarayntem ngkweng. Rap angkepelarreng-anem nyerrerremel angkeyam-alpayntem ngkweng. Kel ntwap mentyarl renh intem awayntem iylpelrerremel ipmemel. Nga angkemer ikwer alakenh, 'Mwerr-anem ayeng ahelerrey-angenh ngkweng. Mwarrant-atherr-anem anaynteyew aylanthal.'

<sup>5</sup> Kwertengerl Jesus-wenh-rnem angkew ikwer, 'Rlterrak anewanther. Anenhanther-renh alkaly-antha, ingwer-rnem apmwepenh ipmemel tyarlew-aynteyew.'

<sup>6</sup> Rap angkew ikwer-rnem, "Arrantherr angkem, 'Rlterrak anewanther.' Kel arrantherran apek alyep iterrentyan irrpeltherrey-angenh, arrantherrap arwerl yanhew angkem alakenh, 'Arwerlay! Tyerrelha ahern-they! Kwaty alayel-anem ampepel rtney-alha!' Rap ngenh inngarl iylparethel awem." Alakenh-anyem Jesus angkenh kwertengerl ikwerenhr-nemew.

### *Warrkenh mwerr-angker anaynteyew*

<sup>7</sup> Jesus-el angka ilenh ikwer-rnem artwa warrkenh-akert. "Artwa warrkenhel apek kateneb angernem atyetyart ikwerew-arteyew. Yep-yep apek ra arntarnt-arem atyetyart-wenh. Ingkeny aylperl-alhem, rap apey-alpem atyetyart ikwerew-artey-wenh apmer-warl. Ikwerew-artey ikwer angkey-angenh alakenh, 'Apetya, aneyew nhel, amern nhenh arlkweyew.' Arrangkw, alakenh-weny. <sup>8</sup> Ikwerew-artey ikwer angkem alakenh, 'Amperna amern-then aker-then atyeng. Akngetyanem atyeng-warl. Kwaty atyeng thela, atha antyweyew. Atharl ywerrelhelem, amperna amern ngkwengant-anem.'

<sup>9</sup> Warrkenh rarl awelhem, atyetyart ikwerew-arteyelarl ilanthen, rap renh nakey-angenh, arrangkw. Ran warrkerrem iylparetharl. <sup>10</sup> Alakenh-anyem warrkenh rapeny arrantherran warrkerreyel Akngeyew. Arrantherran awelhew-penh Akngeyew, arrenhantherrenh ilanthew-angkwarr, nthakenh alakenh iterrey-angenh, 'Akngelyel anenhantherrenh nakemer, anantherrarl ikwer mwerr-angkerlar warrkerrenh.' Arrangkw. Arrantherran alakenh iterremet, 'Anantherran arwa warrkenh Akngey-wenh-rnem. Akngey rarl ileyel-angkwarr, anantherr apmelerr-angkwarr warrkerreyel.'

### *Jesus-el artwernem 10 tywen-angketyarr mwerreleyel*

<sup>11</sup> Jesus-an alhenh-antey iwerrel Jerusalem-warl kwertengerl ikwerenhr-nem-akert. Jesus alhew akwerterrp-antey Jerusalem-warl apmer Galilee-they apmer Samaria-angkwarr antekerr-antey. <sup>12</sup> Rernemap arrer-anem apmer akely-warl alhenh, artwernem 10-anem arnareynenh, Jesus-warl apetyenharl. Rernem tywen-angketyarr, nthekwern arrer alhey-angenh, arntety anthelp-anthewerr. <sup>13</sup> Rernemap arleng-antey rtney-alhew, arlkemel artefentiyel, "Jesus-ay! Atyetyartay! Amperrngerra anewanther!"

<sup>14</sup> Rarl renh-rnem arey-alhew-penh, rap angkew, "Arrantherr tyaty-warl alhenh-arey. Lwewarrernelhenh-arey artwa rltwa tyatyew-artey ikwer, ra arrenhantherrenh areyew mwerr-anem." Rernemap anperl-alhew. Rernemarl alperlewenh-angkwarr-antey, arntetyan arlkethay ywerrenhew ikwer-rnem-they.

<sup>15-16</sup> Artwa anyentan Samaria-arey ikwer-rnem-itwel alhenh, ingwer-rneman Jew-rnemarl. Artwa Samaria-arey arelhew, arlkarl alyelkerrenh, rap angkep alpew Jesus-warl, atayel nakemel Akngey. Rap kwenerrey-alpew, Jesus-arl rtnenh-itwew, "Jesus, ntwan ayenb mwerrelew! Mwerr-angker inngarl ngan Akngey!"

<sup>17</sup> Jesus angkew kwertengerl ikwerenhr-nemew, "Artwernem 10 mwerrelew, ngay? Artwernem 9 weth-rnem-alew?" <sup>18</sup> Anyent nhanyemant angkep iterrewan, inkwerel-hemel angkeyew Akngeyew. Alethangarlap ran, apmer Samaria-arey!" <sup>19</sup> Rap artwa arntety-penhew angkew, "Rtnrl-alha alpemel-anem. Ntwan iterl-arew, athan ngenh mwerreley-angker arawerrng Akngey-wenh-akertel, ngap mwerrelew."

### *Alakenh aynteyenh, Akngeyarl atyetyart ingkerrew aneyenh*

<sup>20</sup> Artwa Pharisee-rnem apetyew, Jesus ayerneyew, "Ilenger Akngeyan atyetyart aneyenh ingkerrew?" Jesus-el tyernew, "Arrantherr Pharisee-rnem ywarn arntarnt-arelheyenb areyew, Akngey atyetyart ingkerrew aneyenh. Nthakenh ingwerentyak angkey-angenh, 'Arenherr-arey arrantherr! Akngeyan apetyew, atyetyart nhenh-arey-rnemew aneyew!" <sup>21</sup> Nthakenh ingwerentyak angkey-angenharl, 'Arenherr-arey

arrantherr! Akngeyan apetyew, atyetyart yanh-areny-rnemew aneyew!' Alakenh-wenyarlap ran. Akngeyan kel atyetyart aneyel ikwerenh-rnemew, rernemarl rlterrk iterreyel ikwer. Arranther nthakenh renh arey-angenh anngel, arrangkw."

<sup>22</sup> Kwertengerl ikwerenh-rnemew-anem ra angkew, "Ayengan Artwa Inngarl Akngey-wenh, aneyelarl arrewantherr-itwel aley. Ingwer-ingwer arranther alakenh angkerreyen, 'Aleyan anewanther arlertek innga. Jesus anamerl-antey apey-alpemer!' Ywarn-antey arranther arntarherl-aneyen, ayeng apey-alpentyew. <sup>23</sup> Ayeng apey-alpewyel-alenty, ingwer-rneman irrtywerremel angkeyenhh arrewantherr, 'Jesus-an nhak! Alhey ananther ikwer-warl!' Ingwer-rnemarl irrtywerremel angkeyenhh arrewantherr, 'Jesus-an nhenh! Apetyenh-arey arranther!' Ilypareth awelhey-angenh ikwer-rnem. <sup>24</sup> Ayengarl apey-alpeyenh, ingkerrenhel iterl-areyenh. Ayengan arwapeny aremerreyelpeyenh, awely-awely rtneyel-apeny alkerel. Alakenh-anyem apmer arrpanenh-they ingkerrel ayenh areyenh. <sup>25</sup> Kel aleyan ayeng aneyel-antey ahern nhenh-itwew. Ingwer-rnemel ayenh atweyenh-tangkwell, pwarrk ilkwa anthemel ikwerew-alenty. Akngerr-anem rlengk aneyel ahern nhenh-itwew rernem arlkarerreyen, atyeng-wety.

<sup>26</sup> Ayengan Artwa Inngarl Akngey-wenh. Ayengarl apey-alpeyenheng-areyan, apal akngerran arnernkey anerl-aneyen, Akngey iterl-arey-angenh. Rap alakenh aynteyenhh awank-akerr-apeny, Noah-arl iteth anenheng-arey. Kwaty ilkwa apetyeyew-alenty, apal akngerran arnernkey anew-anen, Akngey iterl-arey-angenh. <sup>27</sup> Rernem ikwer-rnem-wenh-angkwarz anen; amernant arlkwerrenh, kwaty antywerrrenh, itengerrenh apmelerr-angkwarz, Akngey iterl-arey-angenh. Rernem alakenh anenheng-arey-antey, Noah-el rtnwa ilkwa mpwarenh. Akngeyel kwaty ilkwanem thwenew, Noah-an aylpenhew ikwerenh-rnem-akert rtnwewarl kwen. Kwaty atnyerr ilkwa ra ingwer-rnem ilwerl-athenew.

<sup>28</sup> Rap alakenh aynteyenhh awank-akerr-apeny. Ingweran Lot-arl iteth anenheng-arey. Ra apmer Sodom-they anterrey-alpeyew-alenty, apal akngerran arnernkey anew-anen, Akngey iterl-arey-angenh. Rernem ikwer-rnem-wenh-angkwarz anen; amernant arlkwerrenh, kwaty antywerrrenh, ilek-ilek payemelerrenh, ilek-ilek tharlemelerrenh, amern lyapelhelerrenh, warl-rnem arterrenh apmelerr-angkwarz, Akngey iterl-arey-angenh. <sup>29</sup> Lot rarl apmer Sodom-they anterrew ikwerenh-rnem-akert, Akngeyel thwenew rwa ilkwa lherrm ikwakeng irrwerl-they. Ra Sodom-areny-rnem ingkerrenh ilwerl-athenew.

<sup>30</sup> Yew-yew, ayengan Artwa Inngarl Akngey-wenh. Ayengarl ahern nhenh-warl apey-alpeyenh, apal akngerr ingwer-rneman arnernkey anerl-aneyen, awank-akerr-apeny, Akngey iterl-arey-angenh. <sup>31</sup> Arlta ikweren-antey, artwa anyentan rtnerl-aneyenhh akethel-antey warl ikwerenh-itwew. Rap anamerl-antey anterremer atyeng-warl, ilek-ilek mwerr-angker ikwerenhew iterrey-angenh, arrangkw. Arlta ikweren-antey, artwa ingwerel-anem katen angernerl-aneyen, amern lyapelheleyew. Rap anamerl-antey anterremer atyeng-warl, ilek-ilek mwerr-angker ikwerenhew iterrey-angenh, arrangkw. <sup>32</sup> Arranther iterl-areyel angka weth Lot-akert, wetharl anterrew tawen Sodom-they. Akeity ikwerenhew iterrenh-arey. Akngeyel tarawen renh arrtyew, akeity rap artepang arew, 'Ayengan angkep alpeyew, ilek-ilek mwerr-angker inerleweyew.' Rap anamerl-antey apwert-anem irrew. <sup>33</sup> Akngerran iterrey-angenh Akngeyew, apwertew ilek-ilekew-then iterrem. Alakenhan apmwel-ayetharl iterreyel. Rernemap ahaperrem arrpemarl, nthakenh Akngey-itwel intem-antey aney-alpey-angenh, arrangkw. Ingwer-rneman iterreyel alakenh apek, 'Ayeng arraty aneyew Jesus-ew. Ampwal akngerr apek atha atnyenem, arrangkw apek. Mwerralap alakenhan.'

<sup>34</sup> Ingwel apek ayeng apey-alpeyenh. Atherr apek aynterl-aneyenhh pantyel warl kwen-itwew. Antyerl-rnemelan anyentant inerl-alheyen, ingweran iwerlapeyeharl. <sup>35</sup> Atherr apek anerl-aneyen, ntang atherl-anem. Antyerl-rnemelan anyentant inerl-alheyen, ingweran iwerlapeyeharl. <sup>36</sup> [Atherrl apek katen mpwarerl-aneyen. Antyerl-rnemelan anyentant inerl-alheyen, ingweran iwerlapeyeharl.]

<sup>37</sup> Kwertengerl-rnemel renh ayernew-anem, "Apmer nthennh-itwewarlap ran alakenh aynteyenhh?"

Jesus-el tyernew, "Arlta ikwerel ingkerrenhel iterl-areyenh. Aker ipma ayntem artnel wethay, irret-y-rnem anamerl-antey akarrerrenhey-alhem ikwer. Alakenh-anyem ingkerrenh atyeng-warl akarrerreyen, ayengarl apey-alpeyenh."

<sup>1</sup> Jesus angkew kwertengerl ikweren-h-rnemew, "Akngeyew angkayntenh-arey arlta arrpanenh, ipmelhey-angenh. Angka nhennhew awelhenh-arey. <sup>2</sup> Tawen anyentitwew artwa anyent ahelengkw anenh court-ew-artey, artwa irrngerney-wenyarlap ran. Ranap nyerr-wenyarl. Akngey-angkwarr ra awelhey-angenh. Ingwer-rneman ra ilterl-arrernenh. <sup>3</sup> Tawen irrkaty ikwer-itwew arelh invert anenh. Ra angkepelarreng alpenh court ikwer-warl, arlkey-alhenh artwa court-ew-artey ikwer, 'Artwa ilkway! Amperrngerra atyeng! Artwa ahelengkw yanhelan ayenh court-emeleyel, arwa arrangkwew! Renh artwerela! Renharl innang court-emelemer!'

<sup>4</sup> Ran renh iyelpelant awenh arleng-alenty, arelh invertelanap intemarl renh ayerneynenh. Ingwer-ingwer ra iterrew ament, 'Ingwer-rnemelan ayenh ileyel ahelengkw. Ayenhan rernem ileyel nyerr-weny, ayengan Akngeyew awelhey-angenh, atharl ingwer-rnem iltem. Inngarl alakenh-anyem. <sup>5</sup> Arelh invert ranap apetyeyel angkepelarreng, ayenh alhengkerr anthaynteyew. Artwa renhan atha ilanthem, ipmelheyew renh court-emeley-angenh.' Alakenh-anyem artwa court-ew-artey ahelengkw iterrenh."

<sup>6</sup> Jesus-an angkew, "Artwa court-ew-artey ikwer iterrenh-arey! <sup>7</sup> Arleng-alenty ra arelh invert iyelpelant awenh. Arleng-alenty ra renh alpemeley-angenh, arrangkw. Akngeyanap alakenh-wenyarl! Ran awemarl, ikweren-h-rnemarl ikwer angkew. Rernemap ipantey apek ayern-ayntem, renh-rnem arntarn-arataynteyew. <sup>8</sup> Ra awemarl, rap renh-rnem iylparetharl alpemelem. Nhenhew iterrenh-arey! Ayengan Artwa Inngarl Akngey-wenh, ingwer-ingweran ayeng apey-alpeyeh. Arlta ikwerel-antey ayen-garl apey-alpeyehelan, atha arey-alpeyeh, irrpetiyapantarl atyeng iterrrl-aneyeh."

### *Artwa atherr Akngey-warl-athet angkeyel*

<sup>9</sup> Akngerr ingwer-rnem Jesus-ew awelhenh. Rerneman anyentarl-anyentarl apmwel-ayeth iterrenh alakenh, "Ayengant arraty aneyel. Ingwer-rneman apmwel-ayetharl." Jesus-el iterl-arenh, rernemarl iterrenh, rap angkanem ikwer-rnem ilenh. <sup>10</sup> "Artwa atherr alhew tyaty ilkwa Jew-rnem-wenh-warl, Akngey-warl-athet angkaynteyew. Artwa ingweran Pharisee-arl, ingweran apwert akarreley-angker kapmentewarl. <sup>11</sup> Artwa Pharisee-an ament-warl arleng-apenyarl rtneh. Rap nakelhemel angkew, 'Akngeyay, ayeng ngkweng inkwerelheyel. Ayengan arratyarl aneyel, ingwer-rnem-apeny-wenyarl. Athan irryert-iney-angenh. Ayengan anyelk-awarr-weny. Arelh artwa ingwer-wenh atha irryertel iney-angenh. Ayengan apmwewenyarl, apwert akarreley-angker yanh-apeny-wenyarl. <sup>12</sup> Monday arrpanen Thursday arrpanenh atha arlkwey-angenh amern-then aker-then, angkayntey-alkenh ngkweng. Ampwal atyenh-rnem apwert-then atha akalkel-ayntey-alkenh; alyepelarl ngkwengan, Moses-elarl alkalty-anthenh-angkwarr.' Alakenh-anyem artwa Pharisee angkew Akngeyew.

<sup>13</sup> Artwa apwert akarreley-angker ranap nyerrerremel arleng innga rtneh. Ran ilkelhew, angkeperreyew Akngey-warl-athet. Rap kwenerremel alakenh angkew, 'Akngeyay, amperrngerra atyeng! Ayengan apmwa innga!'

<sup>14</sup> Jesus ikwer-rnem angkew, "Artwa apwert akarreley-angker arratyerreynew Akngey-angkwarran, rarl angkew, 'Ayengan apmwarl!' Akngeyel renh irrarkew, apmwangkwarral alhenh-penh, rap ikwer inkwerelhew. Artwa Pharisee-an arrangkwarl, arratyerrey-angenh Akngey-angkwarr, ra nakelhewarl. Akngeyan ikwer inkwerelhey-angenh, arrangkw. Kel nthakenh nga nakelhey-angenh, mwerr antwelhey-angenh, Akngeyelan ngenh apmwa antbewerr. Nga angkem, 'Ayengan apmwa!', Akngeyelan apmwa ngkweng-they irrarkemarl, mwerr antwemel.'

### *Ampernem-apeny anaynteyew*

(Matthew 19:13-15; Mark 10:13-16)

<sup>15</sup> Akngerr ilkelhew, ampernem akngeteyew Jesus-warl, raw renh-rnem itepel arnep-arneyew, Akngey ayernemel ikwer-rnem. Kwertengerl ikweren-h-rnemel arew, rernemap renh-rnem irrentew. <sup>16</sup> Jesus-anap athamerrew ampa ikwer-rnem, rap angkew, "Ampernem menty apetyey atyeng-warl, arrngert angkey-angenh ikwer-rnem. Akngey-wenh-rneman ampa nhernem-apenyarl. <sup>17</sup> Mwantz awelhenh-arey arranther! Ampernemelarl ilkwerenawem, rernemap iterrem alakenh, 'Innga wenh! Irtywerremel iley-angenh.' Alakenh-anyem arranther angka atyenh awemer. Apmwel-ayeth iterrey-angenh, ayeng irrywerrerl-anentyew-arrpantey. Arranther atyeng awelhenty, arrantherrap intemarl Akngey-itwel aney-alpem."

### *Artwa apwert akngerr-akert*

(Matthew 19:16-30; Mark 10:17-31)

<sup>18</sup> Artwa rltwa tyaty Jew-rnem-wenh-areny ra angkew Jesus-ew, “Ngan akalty-anthey-angker mwerrarl. Ila ayenh, nthakenharl ayengan irrem, ayeng aney-alpeyew Akngey-itwel intem-antey?”

<sup>19</sup> Jesus-el tyernew, “Ilekewarl ntwa ayenhan mwerr antwelyel? Akngey rant anyent mwerr aneyel. <sup>20</sup> Angka weth Moses-wenh ntwa iterl-areyel. Ran alakenh aynteyel: ‘Anew ingwerentyak-wenh-itwel ayntey-angenh, ipmew atwely-angenh ingwerentyak, ayntengeny irryt-iney-angenh, court-itwew ilerl-aney-angenh ingwerentyak irrtyw-erremel, awelh-aynta aynewengkw-then amewengkw-thein iylpareth.’”

<sup>21</sup> Artwa rltwan angkew, “Akely-they athan angka nhenh-rnem ingkerrenh awew iylparethel. Aleyan atha iylparethel awelheyel-antey.”

<sup>22</sup> Jesus-el renh awew, rap angkew-anem, “Kel mwerr. Angka anyentant-anem ingweran aynteyel, nga awelheyew. Ilek-ilek ngkwenh ntwa tharlemelemer. Ntwa apwert inem-penh, ntwa irrepern-rnem angayakw amern-weny-rnemew antha. Ntwap ayenh apenta ilyantel-anem. Akngeyelan ngenh mwerr-angkwarr arntarnt-areman, ngarl alpemel aney-alpeyew ikwer-itwel.” <sup>23</sup> Artwa rltwelarl awew alakenh, rap arlka apmwerreylepew, ran apwert akngerrl atnyenew ilek-ilek-then.

<sup>24</sup> Jesus-el arew, rarl apmwerreylepew, rap ingkerrenhew-anem angkew, “Ingwerenty apwert akngerrarl atnyeneyel ilek-ilek-then, rerneman arraty iterrey-angenharl Akngeyew. Rernem alakenh iterrem, ‘Athan atnyenem ilek-ilek-then apwert-then. Akngeyew ayeng iterrey-angenh.’ Irrpetyapelant renh inngan atyetyart antwelyen. <sup>25</sup> Tangkey ampwal-akert nthakenh aylpey-angenh arriw tyet-angkwarr, arrangkw. Alakenh-anyem riterrk apwert akngerr-akert-rnemew aynteyel, Akngey-angkwarr alheyewan.”

<sup>26</sup> Akngerrel awew, rarl alakenh angkew. Rernemap apmwel-ayeth iterrenh alakenh: “Apwert akngerrarl ilek-ilek-then atnyeneyel-rnem, Akngeyel ikwer-rnem anthem. Ra renh-rnem anthem alakenh, rarl inkwerelhem ikwer-rnem. Innga ampwal akngerr-akert-rnem Akngey-wenh-rneman.” Apmwel-ayeth alakenh iterremel rernem angker-renh, “Akngeyel ingwer-rnem ampwal akngerr-akert-rnem iwerlelpem, ilek-apenyarlap ikwerenhr-rneman?”

<sup>27</sup> Jesus-el tyernew, “Ntwa amentel nthakenh mpwarey-angenh alakenh, arrangkw. Akngeyelant ngenh iteth atnyenem, ikwer-itwel intem aney-alpeyew.”

<sup>28</sup> Peter angkew ikwer, “Anantherr-alew? Anantherran ngenh apenteyel. Warrk-then warl-then altyernem-then iwerlelpew ingkerrenh.”

<sup>29</sup> Rap angkew ikwer-rnem, “Mwanty awelhenh-arey arranther! Ingwerenty apek apmer ikwerenhr iwerlelpem, ikwerenhr-nem anteng apmer-itwew, raw Akngeyew warrkerrey-alkenh. <sup>30</sup> Ingwer-ingwer Akngeyel renh anthem ilek-ilek mwerr-angker. Rap aney-alpem Akngey-itwel intem-antey.”

*Jesus ilelheyel, ingwer-ingwerarl ra ilweyen  
(Matthew 20:17-19; Mark 10:32-34)*

<sup>31</sup> Jesus-el kwertengelr ikwerenhr-nem akarrelew, rap angkew, “Awelhenh-arey arranther! Awank-akerr angkakert Akngey-wenh-rnemel angka atyeng-akert ingkwernew, angka Artwa Innga Akngey-wenh ikwer-akert. Ingwer-ingwer aynteyen, rernem ingkwernew-angkwarr. Arranther kel iterl-areyel, anantherrarl alheyel Jerusalem-warl. <sup>32</sup> Apmer yanh-itwew artwa Jew ilkwerenmel ayenh antwerkeyen, ayenhap ahayiweyeh artwa ahelengkw-rnemew-anem, artwa Rome-areny ikwer-rnem. Rernemap ayenh kwantheyen, apelh-then atyeng-warl iweyeh, ayenh atwelyen whip-el artewenty. Ayengap arwerl iypleyl-atherrel ilweyenhr-anem. <sup>33</sup> Ingwa atherr-penl ayeng angkep itetherrenhey-alpeyeh ipmepenh.”

<sup>34</sup> Kwertengelr-rneman apatmel iterrenh-antey alakenh, “Jesus-an atyetyart anewan-therrenh, nthakenh ilwey-angenh, arrangkw.”

*Jesus-el artwa aparrng mwerreleyel  
(Matthew 20:29-34; Mark 10:46-52)*

<sup>35</sup> Jesus alpenh ikwerenhr-nem-akert tawen Jericho-warl. Apmeran arrer-anem irrew. Iwerr-ampeneyel artwa aparrng anenh, rap apwertew ayerneyam-ayntenh.

<sup>36</sup> Rarl awenh, akngerrarl alpenh anper, rap arlkew-anem, “Ay! Nthakenh irreyel arrantheran?”

<sup>37</sup> Rernem renh tyernew ilelhemel, “Anantherran alpeyel Jerusalem-warl Jesus Nazareth-areny-angkwarr.”

<sup>38</sup> Rarl alakenh awew, artwa aparrng rap arlkew, “Jesus-ay! Ngan Atyetyart David-wenh-rnem-they! Amperrngerra atyeng!”

<sup>39</sup> Arrwekelarl alpenh-rnemel renh iltew, “Akeleyterra!” Ran arlkenh-antey ikwer irrkaty-angkwarr, “Jesus-ay! Ngan Atyetyart David-wenh-rnem-they! Amperrngerra atyeng!”

<sup>40</sup> Jesus rtneyelpew, rarl renh awewel. Rap ilanthew, “Akwegheyen renh, akngeteyew atyeng-warl.” Rernem renh akngeteyew Jesus-warl. Ra renh ayernew, <sup>41</sup> “Ilekay? Nthakenh ilem atha ngenh?”

Ran tyernew, “Atyetyart, ayengan ilkelheyel, atha areyew.”

<sup>42</sup> Jesus an angkew ikwer, “Annga altywerela! Aranem ntwa! Ntwa iterl-arew, atha ngenh mwerreley-angker, ntwap mwerr-anem areyel aleyan.” <sup>43</sup> Inngarlap ran arew aangel aleyant anaynt. Rap Jesus apenteynenh, alpenh Akngey nakemel. Ingkerrenhel renh arew apparrng-weny-anem, rernemap inkwerelhemel Akngey nakeynenh.

## 19

### *Artwa apwert akarreley-angker Zacchaeus*

<sup>1</sup> Jesus ikwerenh-rnem-akert alhew Jerusalem-warl, tawen akely-angkwarr Jericho-angkwarr rwaylpenhew. <sup>2</sup> Tawen ikwer-itwew artwa apwert akarreley-angker anenh itnan Zacchaeus. Ran atyetyart anenh artwa ingwer-rnem kapmentew apwertarl akarrelenh-rnemew. Apwert akngerr-akertarlap ran. <sup>3</sup> Ranap artwa akarteng akelyarl, rap ywarn-antey arrkernelhenh, Jesus areyew. Akngerr akarrenh arrer innga, Jesus arenh. Rerneman ilpenh ikwer-wety. <sup>4</sup> Zacchaeus iterrew, ra anterreyew arrwekel iwerr irrkaty-angkwarr. Rap nganew arwerl-warl, ra areyew-awayt Jesus arrwekel-they, ran anper-alhenty.

<sup>5</sup> Jesus arwerl-warl apetyew, rap itnywenew Zacchaeus, “Zacchaeus-ay! Anamerl atwarrenhey-alha! Rlengkan ayeng alheyew apmer ngkwenh-warl, aney-alheyen ngkweng-itwel.” <sup>6</sup> Rap anamerl-antey atwarrenhey-alpew, Jesus-anem ikwerenh-rnem-akert atnwenhew apmer ikwerenh-warl. <sup>7</sup> Akngerr intwarew, Jesus-arl alhew apmer Zacchaeus-wenh-warl. Rernemap angkerrew, “Pwertay! Nhak Jesus alhew artwa apmwewhenh apmer-warl, aney-alheyew ikwer-itwel!”

<sup>8</sup> Ikwer-pen, rernemarl anemel arlkwenheng-arey, rtnerl-alhew-anem Zacchaeus angkemelan, “Ingkartay! Atha apwert ilek-ilek-then akalkeleyew. Apwert ingweran antheyew irrepern-rnemew amern-weny-rnemew, ingweran atyengarl ayntem. Ayengan apwert akarreley-angker kapmentew. Atha inenh irryertel arrpemarl ingwer-rnem-they. Athan apwert ilkewant ayernenh, athap akert-they atyeng inenh. Atha angkep antheynem ingwerentyan alakenh: 100 tala atha inenh ingwer-they, athap antheynem 400 arrpemarl, mwarrant-atherr aneyew ikwer-perhan. Alakenh atha ingkerr-warl angkep antheynem. Athap angkep antheyneyew-anem akngerr-rnemew rlengkan.”

<sup>9</sup> Jesus angkew ikwer, “Akngeyelan apmw ngkweng-wety irrarkem, ngkwenh-rnem-wety-then. Ngan Abraham-wenh-antey, alakenh-anyem anantherr-apeny. Ngan iterreyel Akngeyew, Abraham-arl iterrenh-apeny. <sup>10</sup> Akngerr apmwel-ayeth aneyel, aperrerterremel. Ayengan Artwa Inngarl Akngey-wenh, ayengap apetyew, nthwewey ikwer-rnem. Ayengap apetyew, apmwernem irrarkem.”

### *Angka warrkenh-rnem 10-akert*

(Matthew 25:14-30)

<sup>11</sup> Tawen Jericho Jerusalem arrerenty. Akngerr-anem anenh apmer ikwer-itwew, awelherrenh Jesus-ew. Rernem iterrenh apmwel-ayeth alakenh-anyem, “Jesus alpenty tawen Jerusalem-warl, Akngayan aremerrem-anem. Rap Jesus atyetyart ilkwanem arrerneyen hingkerrew.” <sup>12</sup> Jesus-el iterl-arenh, rernem iterrenh alakenh, rap angkanem ilew ikwer-rnem.

“Apmer anyent-itwew artwa ilkwa anenh. Ingwer-ingweran atyetyart ilkwa apmer arleng-areny ra ikwer yangkelhew, alheyew ikwer-warl. Ra ilkelhew, renh atyetyart arrerneyew apmer ikwerenhew. <sup>13</sup> Ra anperl-alheyew-athath, ra arlkew warrkenh-rnem 10 ikwerenh-rnemew, apetyeyew ikwer-warl. Rap renh-rnem antheynew 1,000 tala amentew-ament, rap angkew, ‘Ayengarl alhem-wety apmer nhenh-they, arrantherrap payemel-aytent-arey ilek-ilek 1,000 tala nhenh-rnemel. Inayntenh-arey tharlemelemel ilek-ilek. Alakenh-angkwarr apwert atyenh akngerrel, ayeng apey-alpeyew-atety.’ Rarl angkew-pen, rap anperl-alhew arleng-anem.”

<sup>14</sup> Akngerr apmer ikwer-areny-rnem ikwer-wety arlkarerrenh. Rernemap angka ingkern-they thwenew atyetyart ilkwe warl: ‘Nthakenh ntwa arrerney-angenh artwa ilkwa weth atyetyart anewantherr. Anantherran arlkarerreyel ikwer-wety.’ <sup>15</sup> Atyetyart ilkwa awelhey-angenh ikwer-rnem. Ran arrernew artwa ilkwa weth renh, atyetyart

ikwerenh-rnemew aneyew apmer ikwer-itwew. Rap apey-alpew-anem apmer ikwerenh-warl.

Rarl apey-alpew, rap artwa warrkenh anyent thwenew, warrkenh weth-rnem 10 ingweyew. Rap renh-rnem ayernew, ‘Apwert atyen harrantherr akngerrelew?’

<sup>16</sup> Warrkenh anyent angkew, ‘Atyetyartay, ntwa 1,000 tala ayen hantew. Nhenh atha atnyeneyel-antey. Athap aleyan atnyeneyel 10,000-anem.’

<sup>17</sup> Artwa ilkwa angkew, ‘Ngan artewentiyel warrkerrew, atha ngenh ilanthew-angkwar. Ntwa apwert akely-akely mwerrarl atyeng akngerrelew. Atha ngenh atyetyart arrernem tawen 10 ikwer-rnem.’

<sup>18</sup> Warrkenh ingwer-anem angkew, ‘Atyetyartay, ntwa 1,000 tala ayen hantew. Nhenh atha atnyeneyel-antey. Athap aleyan atnyeneyel 5,000-anem.’

<sup>19</sup> Artwa ilkwa ra angkew, ‘Mwerr-angkeray! Atha ngenh atyetyart arrernem tawen 5 ikwer-rnem.’

<sup>20</sup> Warrkenh ingwer-anem angkew, ‘Atyetyartay, ntwa 1,000 tala ayen hantew. Atha rag-el ataperrelew, irryert-akwernew. <sup>21</sup> Artwa arlertekarl ngan! Ntwa pwerep-anthem ingwer-rnem, warrkerr-aynteyew ngkweng, ngenh-then anthaynteyew. Ayengan ngkweng-wety atererreyel. Apwert ngkwenh atha aytnelelewerr, ywerrewerr-anem. Ntwa ayen hantew ayernewerr, angkep anthenhey-alpeyew.’

<sup>22</sup> Artwa ilkwa ikwer ahelerrew. ‘Ngan artwa warrkenh apmwarl! Arraty nga angkeyel: atha pwerep-anthem ingwer-rnem, warrkerr-aynteyew atyeng, ayen hantew anthaynteyew. <sup>23</sup> Alakenh-wetyap ntwa anthem apwertan ayen hantew artwa bankarenayew. Rarl apwert inenty, rap apwert akely ngkwenh-warl pweytele, angkep anthenhey-alpeyew-athath. Ntwanap apwert ayen hantew rag-el ataperrelew!’ <sup>24</sup> Rap angkew ingwer-rnemew, arreral rtnenherrenh-rnemew, ‘Apwert rakenh-arey artwa apmwa yan-h-they, anthemel artwa warrkenh arrwekelenyew 10,000 talakertew.’

<sup>25</sup> Rernem angkew, ‘Atyetyartay, kelarl ran atnyeneyel 10,000! Ingwerew anthem!’

<sup>26</sup> Ra tyernew, ‘Ingwerentyan apek mwerr atyeng warrkerrem, athap anthem ilekilek akngerr ikwer. Ingwerel apek warrk ipmerl-alhem. Kel athap rakem ikwer-they, ingwer-anem anthemel. Ran arrangkw-anem aneyelpeyehn.’

<sup>27</sup> Rap angkew, ‘Ingwer ileng-rnem-alew atyeng-wety arlkarerreyel-rnem? Arrantherr renh-rnem itrl-areyelarl. Rernem artwa atyetyart ilkwa ilew, ayen hantew arrernewerl atyetyart apmer nhewen. Ingwer-rnem atyeng-wety ilkelhey-angenh irreyel-rnem, atyetyart arrernewerr, renh-rnem anamerl akngetyenh-arey nhewarl. Atha areyew, arrantherr renh-rnem ipmew atwenty.’

**Anaynteleyel:** *Jesus-el angka nhenh ilenh, renh-rnem akalty-antheyew. Ra Jerusalem-warl alhey-angenh, atyetyart aneyew, arrangkwarl. Ranem Aynikw ikwerenh-warl-tangkwel alpem, ra renh atyetyart irrwerl-itwew arrerneyew, angka nhenh-apeny atyetyart-akert. Ingwer-ingwer Aleriku Akngey-wenh ra atyetyart ilkwanemarl apetyeyen angkep ahern nhenh-warl. Ran apetyeyen-harl, ayerneyen ikwerenh-rnem, nthakenh rernem warrkerrenh-anem ikwer. Angka nhenh-itwew aynteyel-apeny, atyetyartel ayernenh ikwerenh-rnem. Alakenh. Jesus-arl alpew Aynikw ikwerenh-warl, Jew-rnem alakenh iterrenh, “Jesus-an nthakenh atyetyart aney-angenh anewantherr.” Rernem angka ikwerenhew awelhey-angenh. Ranap mwerrarl aneyen ikwerenh-rnemew, ikwerarl mwerr-angker warrkerrenhew.*

*Jesus alheyel tawen Jerusalem-warl  
(Matthew 21:1-11; Mark 11:1-11; John 12:12-19)*

<sup>28</sup> Ikwer-penh Jesus-arl alakenh angkenh-penh, ra tawen Jerusalem-warl-anem anperl-alhew. Arrwekelarl ran alpenh, ingwer-rnemelan apenteynenh. <sup>29</sup> Rap arrer-anem alpenh tawen atherr-warl, Bethphage-then Bethany-then. Apmer ratherr apwert impalh-itwew, apwert itnan Alip-itwew. Ra kwertengerl atherr ilew, <sup>30</sup> “Alhenh-atherr apmer angath-ampeny-warl. Mpwelanthap tangkey akely-anem arey-alhem, rwepelarl arertnew. Akelyarlap ran. Ingwerentyl ikwer-warl nganey-angenh-antey, arrangkw. Rwepl lhelemel akngey-alpenh-atherr atyeng-warl. <sup>31</sup> Ingwerentyl ayernew, ‘Ilekewarl mpwelanth rwepl lheleyel, tangkey irryert-akngeyew?’, alakenh ilenh-atherr, ‘Ingkartel akngeyew-tangkwel.’”

<sup>32</sup> Ratherrap apmer ikwer-warl alhew, tangkey-anem arey-alhew, Jesus-arl ilew-angkwarr-antey. <sup>33</sup> Ratherr rwepl lhelehn, tangkeyew-arteyp-rnemel ayernew, ‘Ilekewarl mpwelanth rwepl lheleyel, tangkey irryert-akngeyew?’

<sup>34</sup> Ratherr tyernew, “Ingkartel akngeyew-tangkwel.” <sup>35</sup> Ratherrap tangkey atnwenheynew Jesus-warl, arnkwanem arrernew tangkey artep-warl. Jesus nganerl-alhew,

alpenh-anem tangkey-akert. <sup>36</sup> Akngerrel renh arnarew, tangkey-akertel alpenh, rernemap arnkwernem arrerneynenh iwerr-warl arrwekel, jew-rnem-wenh-angkwarz. Rap irrwerleng arnkwernemel-arleng alpenh tangkey-akert.

<sup>37</sup> Apwert Alip-they Jesus-el arew, Jerusalem arrer-anem. Rarl atwarreynen h kwenel-athek tangkey-akert, akngerrelan renh apenteynenh. Rernem kel-antey arew, Jesus-elarl arntety-rnem akngerr mwerrelenh apmer arrpanenh-itwew. Rernemap inkwerelhemel arlkahelerrenh alakenh:

<sup>38</sup> "Akngrey nakey, rarl thwenew artwa nhenh anewantherr arawerrng ikwerenh-akertel! Renh mwerr antwem, rarl anenhantherrenh arntartn-areyel! Irrwerl-areny-rnemel renh nakemer arrpemarl, rernemarl alej mwarrant-arey-anem aneyel!"

<sup>39</sup> Artwa Pharissee-rnem rtntenherrenh arrpemarl ikwer-rnemel-arleng, rernemap angkew Jesus-ew, "Atyetyartay, ilta ngkwenh-rnem akeleytelemel! Nthakenh rernem ngenh alakenh nakey-angenh!"

<sup>40</sup> Ra tyernew, "Rernemarl akeleyt anenty, apwert nherem iwerrelarl aynteyel-rnem arlkewerr arrpemarl. Rernemarl katy Akngrey nakewerr!"

### *Jesus artneyel Jerusalem-areny-rnem*

<sup>41</sup> Jesus arrer-anem alpenh tawen Jerusalem-warl. Rarl arew apmer renh, rap artnenh-anem apmer ikwer-areny-rnemew. <sup>42</sup> Rap angkew, "Ayengan amperrngerreyel ikwer-rnem! Rernem apal aneyel, angka Akngrey-wenh iterl-arey-angenh. Ayengan ilkelhew, angkep rernem pweyterrenhey-alpeyew Akngrey-warl-athek anyenterremel. Rernemanap ayenh iylpelantar awenh. <sup>43</sup> Irrepern-rnem rerneman! Alethang ahelengkw-rnem akngerr akarrerreyen h apmer nhenh-warl Jerusalem-warl, renh-rnem atwewayew ingkerrenh. Rernemap amperelyen h, iwerr-anem ikwer-rnem-wety arrngeleyen h. <sup>44</sup> Ipmew-antey renh-rnem atwewayen h ampernem-then. Alethang-rnemelap ingkerrenh-antey apmer nhenh-itwew ywerrelheleyen h, warl-rnem atepatakeyen h. Apmeran peleyn-apeny-anem aynteyen h. Akngreyel ayenh thwenew, renh-rnem arntartn-areyew. Rernemanap atyeng awelhey-angenh, arrangkw." Alakenh-anyem Jesus-el amperrngerremel ilew Jerusalem-areny-rnem-akert.

### *Jesus aylpenhely tyaty ilkewewarl Jerusalem-itwew*

(Matthew 21:12-17; Mark 11:15-19; John 2:13-22)

<sup>45</sup> Ikwer-penh Jesus aylpenhew tyaty ilkewewarl Jew-rnem-wenh-warl Jerusalem-itwew. Warl ilkwa ikwer-itwew ra arew, akngerrelarl ilek-ilek tharlemelenh apwertew. Rap renh-rnem ahelerremel irrentew aketh-warl. <sup>46</sup> Rap renh-rnem iltew alakenh: "Nthakenh arrantherr aker tharlemeley-angenh nhenh-itwew. Ingwerentyam arnewantherr irryert-aware, warl ingwerenty-wenh-itwewarl irryert-inenh. Nthakenh irryert-aylpey-angenh nhenh-itwew, ilyemwerneyelarl antwerrkey-angenh, arrangkw. Warl nhenhan Akngrey-wenh. Angka ikweren h alakenh aynteyel:

'Warl ilkwa nhenhan atyeharl, ingwer-rnem arleng-they apety-aynteyew, ayenh nakemel ikwer-warl aylpaynteyew.'

<sup>47</sup> Renh-rnem irrentew-penh, Jesus-an aylpenhew tyaty ilkewewarl arlta arrpanenh, rap akngerr-anem akalty-anthenh ikwer-itwew. Artwa rltwernem Jew-rnem-wenh tyaty ilkwareny-rnem, artwa angka Moses-wenew akalty-anthey-angker-rnem, artwamp-rnem-then rernem renh mwantyel-antey arntartn-arenh. Rernem renh ipmew-antey atwewayew. <sup>48</sup> Akngerr ingwer-rneman inkwerelhemel akarrerrenh ikwer-warl, ikwer awelheyew. Artwa ilkwer nemel renh menty-antey amek-arew akngerr-itwew. Rernem arrkernelhenn, renh antwerrkeyew-arrpaney.

## 20

### *Artwa ilkwer nemel Jesus ayerneyel ywarn-antey*

(Matthew 21:23-27; Mark 11:27-33)

<sup>1</sup> Arlta ingwerel Jesus aylpenhew tyaty ilkewewarl Jew-rnem-wenh-warl, rap angka mwerr-angker ilenh akngerrew. Artwa rltwernem Jew-rnem-wenh tyaty ilkwareny-rnem, artwa angka Moses-wenew akalty-anthey-angker-rnem, artwamp-rnem-then rernem renh ayernew, <sup>2</sup> "Angwenhel ngenh thwenew, tyaty ilkwitwew akalty-antheyew? Atyetyart nthenn-apenyel ngenh thwenew, ingwer-rnem tharlemeley-angker-rnem tyaty ilkwethay irrent-aynteyew?"

<sup>3</sup> Ra ikwer-rnem angkew, "Alerlay! Athetangkwel arrenhantherrenh ayerneyew."

<sup>4</sup> John Baptise-emeley-angkerel akngerr kwaty-warl baptise-emelenh. Atyetyart nthenn-apenyel John thwenew? Akngreyel apek? Artwa ingwerel apek? Ayenh ilenherr-arey!"

<sup>5</sup> Rernem arreyterrenh alakenh: "Nthakenh anantherr angkem? Nthakenh anantherr iley-angenh, 'Akngayel wenh John thwenew.' Ra anenhantherrenh ayernewerr, 'Kel ilek-wety arranther ikwer awelhey-angenh?" <sup>6</sup> Nthakenh anantherr iley-angenh, 'Artwa ingwerel renh thwenew.' Ingwer-rnemel awewerr apmer nhenh-areny-rnemel, atwewerr-anem anenhantherrenh apwertel ipmew-antey. Rernem iterreyel, John Akngay-wenh angkakertarl anenh."

<sup>7</sup> Rernemap tyernew alakenh: "Anantherr iterl-arey-angenh, angwenhelarl John thwenew."

<sup>8</sup> Jesus ikwer-rnem angkew, "Arranther tyerney-angenh. Kel atha arrenhantherrenh iley-angenh, angwenhelarl ayenh thwenew, alakenh irreyew."

*Angka artwa katenew-artey-akert  
(Matthew 21:33-46; Mark 12:1-12)*

<sup>9</sup> Jesus-el angka ingwer-anem ilenh. "Artwa ilkwel katen atnyenenh. Ra ilkelhew, amern grapes lyapelheleyew. Antwyer-tangkwel ra akethelew, rap rnkerneynew arwerl grapes akely-akely-rnem-anem. Rap artwa ingwer-rnem arrernew, arwerl-rnem arntarnt-araynteyew, rarl aney-alpew-wety apmer ingwer-itwew intem-antey. <sup>10</sup> Arwerl-rnem ilkwerrew, amern ampeng-akert-anem. Artwa ilkwa rap warrkenh ikwerenhh thwenew katen ikwer-warl. Rap ilanthew, 'Katen ikwer-warl alha, grapes atyeng akngay-alpa.' Artwa katen arntarnt-aremel-rnem renh arnarew. Rernemap antwerrkemel atwey-ayntew, renh irrentemel arrangkw-antey. Rap artwa ikwerew-artei iley-alpew.

<sup>11</sup> Artwa ilkwel warrkenh ingwer-anem thwenew. Rernemap antwerrkemel atwey-ayntew, irrentemel renh arrangkw-antey arrpemarl. Warrkenh ra artwa ikwerew-artei iley-alpew. <sup>12</sup> Artwa ilkwa ra warrkenh ingwer-anem thwenew. Rernemap renh atwey-ayntew arrpemarl, parrik-angkwarr iwemel aketh-warl. Rap akwenterl-alhew, alpew-anem artwa ikwerew-artei iley-alpewyew.

<sup>13</sup> Artwa ilkwa ra iterrew, 'Nthakenh irrem ayeng? Alerey atyenh-anem atha thweney. Rernem mentyarl renh arey-ayntem, ran alerey atyenharl, ayengarl ikwer artewenty ilkelhem.'

<sup>14</sup> Artwa katen arntarnt-aremel-rnem artwa alerikw renhan alhengk-aremel arnarew. 'Nhak arenh-arey! Alerikw ikwerenhh-anemarl apetyeyel! Aynikw ikwerenhh ahaper-renty, rant-anem katenew-artey aneyenh. Atwey renh anantherr ipmew-antey, katen anewantherrenh araynteyenh.' <sup>15</sup> Rernemap renh atwey-ayntew, ipmanem iwemel parrik-angkwarr."

Jesus-an angkew akngerrew awelhenh-rnemew, "Nthakenh irrem artwa ilkwa raw? <sup>16</sup> Rap alakenh apek irrem. Ra alhem katen ikwer-warl, atwem-anem artwa renh-rnem ingkerr ipmew-antey. Rap artwa ingwer-rnem-anem arrernem, katen arntarnt-araynteyew."

**Anaynteleyel:** *Jesus-el angka ilenh akngerrew atyetyartew-rnem-then, renh-rnem akalty-antheyew. Akngayan atyetyart katenew-artey-apeny. Jew-rnemew-arteyarl ran. Jew-rnemelan katen arntarnt-areyel-apeny. Akngayelan angkakert-rnem thwenenh ikwer-rnem-warl. Rerneman awelhey-angenh, atwey-ayntenh renh-rnem. Rap Alerikw ikwerenhh-anem thwenew ikwer-rnem-warl. Irrkayt rerneman Alerikw atwew ipmew.*

Artwa ilkternemelarl Jesus awew apateyelpemel. Rernemap angkew, "Alakenh angkey-angenh!" Angka rernem awew-penh, artwa ilkternem-then ingwer-rnem-then angkew Jesus-ew, "Artwa katenew-artey nthakenh ingwer-rnem atwey-angenh. Ran ampeerrngerremer ikwer-rnem, atwey-angenh menty."

<sup>17</sup> Jesus-el renh-rnem aremel angkanem ilew, artwa ilkternemel aveyew. "Alakenhan aynteyel. Awelhenh-arey arranther!"

'Artwernem iterrew, lytwenty mpwareyew. Irrkernem-anem angernew, arwerl-rnem 4-anem rnkernew. Arwerl arlpenty rlterrk atherr-anem arrernew ltweper. Rernemap arew arrpemarl, arwerl ingwer angkeparl iweynew apmwarrpantey. Arwerl ranap impen inngarl, nthakenh iwey-angenh, lytwenty rlterrk antwerrkey-angker."

<sup>18</sup> Jesus angkew arrpemarl ikwer-rnem, "Ingwerentyel angka atyenh atwey-angenh, Akngayelan renh court-emeleyenhh. Thwenem renh rwa ilkewararl, aletharl ampeyel-warl."

*Angka apwertarl antheyel-akert atyetyart ilkwa Rome-areny ikwer  
(Matthew 22:15-22; Mark 12:13-17)*

<sup>19</sup> Artwa rltwernem Jew-rnem-wenh tyaty ilkwareny-rnem artwa angka Moses-wenhew akalty-anthey-angker-rnem-then rernem angka awew, Jesus-elarl ilenh. Rernemap ahelerremel iterrenh, "Angka weth artwa katen arntarnt-arenh-rnem-akert ran anenhantherrenh-apenyarl ileyel. Jesus-el apmwa antwelyel anenhantherrenh artwa renh-rnem-apeny. Antwerrkey anantherr renh!" Akngerrarl anenh-wety, rernem ywarn iterrew, renh antwerrkeyew. <sup>20</sup> Rernemap mpwelhenh, renh arrker nemel antwerrkeyew. Rernem iterrenh alakenh, "Anantherr renh antwerrkem, renhap artwa kapment-areny ikwer-warl atnwenheyew, renh court-emeleyew. Rap artwa ahelengkw-rnem ilanthem, renh ipmew atweyew."

Ikwer-penhan atyetyart ilkwernem Jew-rnem-wenh rernem warrkenh-rnem thwenew Jesus-warl. Rernemarl alpenhel, rernem alakenh iterreynenh, "Anantherr angka ikwerenawem-penh, ilmel court-angkwarz, Jesus rernem ipmew atweyew." <sup>21</sup> Jesus rernem alakenh irrtyertel ayernew, "Atyetyartay, nga arraty-angkwarz angkeyel ingkerrew. Ntwan akalty-antheyel Akngey-wenh-angkwarz arratyan. Alhewerarl irrkatty-angkwarz ntwa ileyel ingkerrew, artwa ilkwtilykwh-then ingwer-rnem-then. <sup>22</sup> Ila anenhantherrenh, nthakenh nga iterreyel? Jew-rnem anantherran apwert anthemang atyetyart ilkwa Rome-areny ikwer, rarl anenhantherrenh ilantheyel-angkwarz? Ar rangkw apek?"

<sup>23</sup> Jesus-el iterl-arew, rernem irrtyertelarl ayernenh, rap iterrenh, "Yanh-rnemel ayen ayerneyel irrtywerremel. Rernem ayen aweyew, apmwel-ayeth angkentyew. Rernem iterreyel, angka atyeh apmwarl, pip kapment-wenh apentey-angenh. Rernem iterrem, ayengarl alakenh angkem, 'Kapmentew apwert anthey-angenh. Arrantherr apwert Akngeyewant arrernem.' Alakenharl iterrenh-penh, rap angkew ikwer-rnem, <sup>24</sup> "Apwert anyent atyeng akngetyen-arey, atha areyew." Rernemap akngetyew, anthew-anem. "Arrantherr ayen ilenh-arey, inngerr angwenh-wenh? Itna ilek?"

<sup>25</sup> Rernem tyernew, "Atyetyart ilkwa Rome-areny."

"Kelap. Ingkerr ilek-ilek atyetyart Rome-areny-wenh arrantherr ikwerarl anthemer. Ingkerr ilek-ilek Akngey-wenhan arrantherr ikwer anthemer."

<sup>26</sup> Angka awew-penh, warrkenh-rnem angkerrew, "Nhenhan arraty angkeyel. Ran anenhantherrenh ilemer, apwert kapmentew anthewerr. Ranap alakenh angkey-angenh. Nthakenharlap anantherr ileylen court-angkwarz renh?" Rernemap akeleyt-anem rtnenherrenh, angkerrey-angenh.

*Ipmepeh angkep itetherrey-angker-akert  
(Matthew 22:23-33; Mark 12:18-27)*

<sup>27</sup> Ikwer-penh artwa ilkwa ingwer-rnem apetyew Jesus-warl, renh ayerneyew, itnan Sadducee-rnem. Rernem apmwel-ayeth iterrenh alakenh: "Ingwerenty nthakenh ipmepenh itetherrey-angenh. Ipma intemarl ayntem." <sup>28</sup> Rernem angkew ikwer, "Atyetyartay, awank-akerr Moses-el angka rlterr nhenh ingkwerneh anewantherr: Iteng anem ampeweny apek. Artwa ra ahaperrenty, atyeyikw ikwerenhel-anem amarl inpert inem, ampaaneyew. Ratherr iterremer alakenh, "Ampa nhenh awayikw-wenh-apeny."

<sup>29</sup> Awelha angka nhenhew. Awayenheng-rnem 7 anenh. Artwa arrwekeleny-tangkwel itengerrew, rap ahaperrenhew, ampa ikwer-atherr aney-angenh-antey. Arelh ikweren inpert-anemarl. <sup>30</sup> Atyeyikwel-anem arelh renh inew, rap ahaperrenhew, ampa ikwer-atherr aney-angenh-antey. <sup>31</sup> Atyeyikw ingwerel-anem arelh renh inew, rap ahaperrenhew arrpemarl, ampa ikwer-atherr aney-angenh-antey. Ikwerel-antey awayenheng-rnemel arelh anyent renh ineyenreh. Anyentarl-anyentarlrap rernem ahaperreynew ampeweny-antey. <sup>32</sup> Arelh inpert rant-anem iteth anenh intem. Ingwer-ingweran rernem ahaperrew. <sup>33</sup> Kel anantherr ngenh ayerneyew angka nhenhew. Akngerrarl iterrem, anantherr itetherrem ipmethey. Kel ingwer-ingwer ingkerrenh angkep itetherrenty ipmepenh, nthek-apenyarlrap mpwernikw inngan ikwerenhaneyen? Artwernem 7-ew ra inperterrew."

<sup>34</sup> Jesus angkew artwa Sadducee ikwer-rnem, "Aleyan ahern nhenh-itwew apmelerrel-ayeth artwethen arelh-then itengerrem. <sup>35-36</sup> Ingwer-ingwer Akngey-wenh-rnem ahaper-reyen, ipmepenhanap rernem itetherrem angkep arrpemarl. Rernemap antyerl-apeny-anem aney-alpeyenh, nthakenh itetherrey-angenh, arrangkw-anem. Nthakenh ahaperrey-angenh arrpemarl. Akngey-wenh ampernem-anem rerneman aneyen, ikwerel-arlung intem-antey aney-alpeyenh. <sup>37</sup> Inngarl aynteyel, akngerran angkep itetherreyen h ipmethey, alpeyenh aney-alpeyenh Akngey-itwel. Arrantherr angka Akngey-wenh iterl-areyel. Arrantherrap iterl-aremer angka weth Moses-akert, rarl arew, rwarl ampenh arwerl-itwew. Reytemarl ilem-penh arrantherr mwanty iterl-aremer.

Akngeyan angkew Moses-ew alakenh, ‘Ayengan Abraham-ew-artey aneyel, Isaac-ew-artey, Jacob-ew-artey.’<sup>38</sup> Rernemanap iteth-anteyarl aneyel! Akngey atyetyart aneyangenh ipmernemewan. Ran atyetyart aneyel iteth-rnemewant. Ikwerenh-angkwarran anantherr ingkerrehn iteth intemarl anem ipmepenh.”

<sup>39</sup> Artwa angka Moses-wenhew akalty-anthey-angker-rnem rernem awelhenh-antey. Rerneman angkew, “Arraty-angkwarr nga angkeyell!”<sup>40</sup> Ikwer-penh-antey artwa ilkwer nem ater-anemarl irrenh, renh ayernewerr.

*Artwa Christ ra atyetyart ingwer-ikwer David-angkwarran  
(Matthew 22:41-45; Mark 12:35-37)*

<sup>41</sup> Jesus angkew ikwer-rnem, “Artwa Christ-alew? Akngeyel ilew, renharl ahern nhenh-warl thweneyew. Akngerran apmwel-ayethan angkem alakenh, ‘Artwa Christ ran atyetyart ahern nharen-y-rnemewant, Atyetyart David-apeny. Christ ranap David-wenh-antey.’ Ilekewarl rerneman apmwel-ayeth alakenharl angkeyel? Rernem iterlaremer, Christ ranap Akngey-areny. Ran David-angkwarr ilkwarl.<sup>42</sup> Awank-akerr David-el aylelhenty nhenh ingkwernew pip Psalms-ewan:

‘Akngey angkew atyetyart atyenh-warl Christ-warl:

“Ngan ana arrerentyt atyengel-arleng arratty-angkwarrarl.

<sup>43</sup> Ingwer-rnem ngkweng-wety artewenty arlkarerreyel-rnem atha atweyenh, renh-rnem ngkweng-wety irrentemel.”<sup>44</sup>

<sup>44</sup> Atyetyart David-el artwa Christ itnewew ‘Atyetyart atyenh’. Christ ranap ilkwarl Atyetyart David-angkwarr. Ranap Akngey-areny.”

*Tangkey-angenh  
(Matthew 23:1-7; Mark 12:38-40)*

<sup>45</sup> Akngerran anenh apmer ikwer-itwew, awelherrenh Jesus-ew. Rap angkew kwertengerl 12 ikwerenh-rnemew,<sup>46</sup> “Mwantz anenherr-arey arrantherr! Artwa yanh-rnem iwarrerney-angenh, rerneman angka Moses-wenhew akalty-anthey-angker. Irrty-walth rernem. Rernem aylpem arnkwa mwerr-angker arlpentyel, ingwer-rnemel renh-rnem nakemel araynteyew-awaty. Rerneman inkwerelhem, ingwer-rnemarl ikwer-rnem kwenerrey-alhem, atyetyart ilkhem antwemel. Rernem aylpenty tyat Jew-rnem-wenh-warl, arrwekel-antey aney-alhem, ingwer-rnemel renh-rnem araynteyew-awaty. Akngerrarl akarrerremeng-arey, amern inkwerelhemel kwenty arlkweyew, rernem arrwekel-antey aney-alhem, ingwer-rnemel renh-rnem araynteyew-awaty.<sup>47</sup> Rernem arelh inpert-rnemew apmwel-ayeth mpwarem, ilek-ilek rakemel warl ikwer-rnem-wenh-they. Rernem irrtywerremel angkeyel Akngey-warl-athek arleng-alenty. Akngeyelarl ingkerrehn court-emeleyen, rap renh-rnem irrwampenh-antheyen, irrtywalth renh-rnem. Ingwer-rneman ra alyepel irrwampenh-antheyen.”

## 21

*Akely invertelan apwert impen-antey arrerneyel*

<sup>1</sup> Jesus anenh-antey tyat ilkwa Jew-rnem-wenh-itwew, arrerentyt apmwal apwertew-arelh ikwer-itwew. Ra arenh, apwert akngerr-akert-rnemel apwert arrernenh Akngeyew apmwal ikwer-warl.<sup>2</sup> Akely invert apetyew, ngkwelty akely atherrant arrernew. Rarl arrernew-penh, apwert-weny-anem ra aneyelpew.<sup>3-4</sup> Jesus-el arew, rap arlkew kwertengerl ikwerenh-rnemew, apetyeyew ikwer-warl. “Awelhenh-arey atyeng! Akngeyan inkwerelhem innga arelh nhenhew, apwertarl impen-antey ikwerenh ingkerr arrernew. Akngey ingwer-rnemew inkwerelhey-angenh. Apwert akngerr-antey rernem atnyeneyel. Ya, Akngeyan inkwerelheyel innga arelh nhenhew.”

*Jew-rnem-wenh tyat ilkwan atep-atakeyen*  
(Matthew 24:1-2; Mark 13:1-2)

<sup>5</sup> Ikwer-penh rernem tyerrelhew tyat ilkwethay aketh-warl. Kwertengerl-rnem angkew, “Tyat ilkwa nhanyem mwantz-antey artew apwert alyekl mwerr-angker-akert. Ilek-ilek mwerr-angker-them kwen, akngerrelarl Akngeyew arrernew.”<sup>6</sup> Jesus-el awew, rap angkew, “Arrantherran areyel tyat ilkwa nhenh. Ingwer-ingweran apwert nhenh-rnem rtney-angenh-anem irreyen. Alethang-rnemelan apwert-rnem atep-atakeyen, arlperryt iwemel.”

*Ingwer-rnemel irrwerneyen Akngey-wenh-rnem*  
(Matthew 24:3-14; Mark 13:9-13)

<sup>7</sup> Rernem angkew, “Atyetyartay, ilengerarl tyatyan innagan atep-atakeyen? Nthakenh-tangkwel irreyen, alakenh irreyew-alenty? Anantherr iterl-areyew.”<sup>8</sup> Jesus angkew,

"Mwantu anenherr-arey, ingwerentyakel arrenhantherrenh irrywerl-ampernewerr. Ingwerenty angkewerr, 'Ayeng nhanyem, Akngeyarl angkew, ra thwenem ahern nhenh-warl' Ingweran angkewerr, 'Arlta arrer-anemerreyel! Jesus apey-alpeyenh-anem!' Arrantherrarl awem, rernemarl alakenh angkem, awelhey-angenh arrantherr ikwer-nem.<sup>9</sup> Arrantherr awem, angkarl arlpimperrem, apmer arpanenh-itwew atwerreyel, atererremel aney-angenh. Arrantherr alakenh iterremer, 'Ahern-then alker-then rlengkantey ywerreyelpay-angenh. Ingwer-ingwerant apek ywerreyelpayen.'"

<sup>10</sup> Rap angkew arppemarl ikwer-nem, "Ya innga! Ahern-then alker-then ywerreyelpay-alenty, akngerran atwerreyen apmer arpanenhel arlperryt. Akngerr apmer ingwer-they alheyen, atwerr-aynteyew apmer ingwer-itwew.<sup>11</sup> Ahernan arrewemel iltewelheyen apmer arpanenh-itwew. Akngerran aneyen amern-weny angayakw, ywarn iterremel apatemel anerl-aneyen apmer arpanenh-itwew. Ingwer-neman arntety ilkwel atwerl-aneyen apmer arpanenh-itwew. Akngerrel ilek-ilek arerl-aneyen alker-itwew, atererremelap anerl-aneyen."

<sup>12</sup> Alakenh aynteyew-alenty apmwa, Akngey apentey-angenh-rnemelan arrenhantherrenh irrwnerl-aneyen. Rerneman arrenhantherrenh antwerpkeyen, court-emel-aynteyew tyaty Jew-rnem-wenh-itwew. Rernemap arrenhantherrenh tyayl-warl akwerneyen, rnker nemel arrwekel rtnaynteyew artwa ilkternem-itwew. Apmer arpanenh-itwew rernem alakenh mpwarayntem, arrantherrarl ayen apenteyel.<sup>13</sup> Rernem arewantherr alakenh mpwarem, arrantherran angka atyeng-akert ilemer alhewer, atererrey-angenh.<sup>14</sup> Iterrey-angenh alakenh, 'Nthakenh ayeng angkem ikwer-rnem?'<sup>15</sup> Athan arrenhantherrenh akalty-anthem, arrantherr angkeyew arraty-angkwar Akngey apentey-angenh ikwer-rnem. Rernemap ywarn iterrem, 'Nthakenh anantherr renh-rnem ayntarrp-ilem?'<sup>16-17</sup> Tywekererreyen arewantherrety ingwer-rneman, ayenharl arrantherr apenteyel-rnem-wety. Arewantherrenh-rnem-then arewantherr ahelerreyen, akwetyemel ayernerl-aneyen court-emelemel. Ingwerentya-man arewantherr ipmewarl atweyen.<sup>18</sup> Akngeyelanap arrenhantherrenh arntartnayntemel intem-antey, iteth atnyen-ayntemel.<sup>19</sup> Arrantherr ikwer rlterrk anentyan, angkeperrey-angenh, arrantherrap aney-alpem intemarl ikwer-itwel."

*Tawen Jerusalem-arl atep-atakeyenh  
(Matthew 24:15-25; Mark 13:14-23)*

<sup>20</sup> Jesus angkew kwertengerl ikweren-hrnemew, "Ingwer-ingweran arrantherr areyenh artwa ahawarr-rnem, alperrel-apeny ampereleyen apmer nhenh Jerusalem. Arltal ikwerelap arrantherr iylpangkeyen, 'Ya, apetyew-anem rernem nhanyem, anenhantherrenh ingkerr atweyew ipmew, warl-then atep-atakemel.'<sup>21</sup> Arrantherr Judea-arey-hrnem irryert-anterremer, apwert irrwerlel aney-alheyew. Arrantherran tawen-arey-hrnem irryert-anterremer arrpemarl. Arrantherr arlengarl anew-aneyel-hrnem, angkew alpey-angenh Jerusalem-warl.<sup>22</sup> Awank-akerr angkakert Akngey-wenh-rnemel ilew, Akngeyelar irrwampen-h-antheyen Jerusalem-arey-hrnem. Arltal ikwerel inngarl aynteyen, rernemarl inkgwernew-angkwar.<sup>23</sup> Rlterrkarlap aynteyen arelh arntety-rnemewan, ampangketyarr-rnemew-then. Nthakenh anterrey-angenh, irrepern-rnem! Ya, Akngeyelan irrwampen-h-antheyen ingkerrenhew Israel-wenh-rnem.<sup>24</sup> Artwa ahawarr-rnemel akngerr atweyen Jerusalem-arey nayp arlpentyel. Ingwer-rnem rernem arerntentyan akngeyeyen apmer ingwer-rnem-warl. Arlengew-alenty alehang-hrnem aneyen atyetyart tawen Jerusalem-ew ikwer-itwew. Ingwer-ingwerantap Akngeyelan renh-rnem irrenteyen."

*Jesus rarl angkep apetyeyen  
(Matthew 24:26-31; Mark 13:24-27)*

<sup>25-26</sup> Jesus-el akalty-anthenh-antey kwertengerl ikweren-hrnem. "Ikwerel-antey ingkeny, alkent, antyarr-then ingwer-lkwererreyen, akngelherreyen arrewemel. Akngerran iterreyen, 'Nthakenh-anem irreyel ahern nhenhan?' Rernemap aynterl-aneyen aterel. Kwaty alayan akngelheyen, arwerlk angkeyen artewenty inga. Akngerrelap aveyen, rernemap atereneyengel irreyen, apatemel ywarn iterremel.<sup>27</sup> Ikwerel-antey ayenhap arnareyen, Artwa Inngarl Akngey-wenh. Ayengap kwenpay-angkwar aremerreyen, amparrkeyen arawerrng rlterr-k-akertarl.<sup>28</sup> Kwertengerl atyenh-hrnem arrantherr arem apmwa ayntenty, atererrey-angenh. Arrantherr inkwerelhemer, ayengap arwapeny apetyem-anem, arrenhantherrenh mwantu arntarntareyew, inerleweyew."

*Angka aherrety-akert  
(Matthew 24:32-35; Mark 13:28-31)*

<sup>29</sup> Jesus-el angka ingwer-anem ilenh ikwer-rnem. “Arwerl ampweth-ampwethew iterrenh-arey. <sup>30</sup> Alpeytan lyapenhey-alpem, arrantherr iterrem, ‘Ya, aherrety-anem irrenhey-alpeyenh.’ <sup>31</sup> Alakenh-anyeman arrantherr iterreyenh, arrantherrarl arenty, ahern-then alker-then ingwer-lkwererrenty: ‘Ya, apetyeyenh-anem Jesus. Ra atyetyart-anem aneyew ikwerenh-rnemew arntarnt-aremel.’

<sup>32</sup> Atha arrenhantherrenh arrayet ileyel. R lengkarl iteth aneyel-rnem apmer nhel rernem alakenh areyenh Jerusalem-itwew, rernemarl iteth aneyelet-antey. <sup>33</sup> Ahern-then alker-thenarl ywerreyelpeyenh. Angka atyenhanap intemarl aynterl-aneyenh, ywerrey-angenh.”

*Mwantu anaynteyew, Jesus-arl arwapeny apetyeyenh-wety  
(Matthew 24:36-51)*

<sup>34</sup> “Mwantu-antey anaynteh-arey arrantherr! Anngangelhey-angenh amermel, ngkwarlel, apwertel-akerr ilpertelemel. Apmwangkwarr apek arrantherr anerl-anewerr arlta ikwerel, ayengarl arwapeny apetyeyenh-wety. <sup>35</sup> Ingkerrehn apmer arpanenh-itwew apateyelpeyenh, ayengarl arwapeny apetyeyenh. <sup>36</sup> Ya, arrantherrap intem atyeng arntarnt-arelh-aynteh-arey mwantu. Akngey-then ayern-aynteh-arey, arrenhantherrenh rlterrknel-aynteyew, apmwa ayntenty-angkwarr. Renh ayernemel, arrenhantherrenh rlterrknel-aynteyew, arrantherr ilelh-aynteyew nyerr-weny. Akngey-wen Artwa Inngel atha court-emeleyenh ingkerrenh-antey anyentarl-anyentarl.”

Alakenh-anyem Jesus-el renh-rnem akalty-anthenh, rernemarl alakenh-tangkwel ayernew, “Nthakenh-tangkwel irreyenh, nga apey-alpeyew-alenty?”

<sup>37</sup> Arlta arpanenh Jesus-el akngerr akalty-anthenh Jew-rnem-wenh tyaty ilkwitwew. Atwerrp-atwerrp ra akalty-anthenharl-penh, rap alpenh kwertengerl ikwerenh-rnem-akert, ankwaynt-aynteyew Apwert Alip-itwew. <sup>38</sup> Aherlkamenhey-alhenh akngerran akarrerrenh ikwer-warl tyaty ilkwitwew, angka ikwerenh awaynteyew.

## 22

*Artwa ilkwernem iterreyel, Jesus atwewyew ipmew  
(Matthew 26:1-5; Mark 14:1-2)*

<sup>1</sup> Tawen Jerusalem-itwew akngerr mpwelhenh tyenkerr ikwer apmelerrew. Jew-rnemarl akarrerrem, amern ilperr-ilperr arlwarelheley-angenh arlkeww-arlkwem, aker yep-yep-then. Rernemap iylpangkem, antyerl Akngey-wenharl awey alkenh-rnem Egypt-areny-rnem-wenh ipmew-antey atweynenh awank-akerr. Rap mentyarl arew awey alkenh-rnem Israel-rnem-wenh, renh-rnem ipmew atwewy-angenh. <sup>2</sup> Artwa rlterwernem Jew-rnem-wenh tyaty ilkwareny-rnem artwa angka Moses-wenhwew akalty-anthey-angker-rnem-then rernem angkerrenh alakenh: “Nthakenh Jesus-an anantherr irryertel antwerrkem, renh atwewyew?” Akngerr-wety rernem ywarn iterrenh apatemel, ingwer-rnem ikwer-rnem ahelerrewerr.

<sup>3</sup> Arretyt alkenhelan Satan-el Judas Iscariot arrkernew-anem. Kwertengerl ikwerenh-anteyarlap ran, Jesus-elarl ayerrpelew arrwekel-antey. <sup>4</sup> Rap irryertel-antey alhew artwa rlta tyaty ilkwareny-rnem-warl, iltymwerney tyaty ilkwareny-warl-then. Rap angkew, “Ayengan iterreyel, Jesus arrewantherr ahayiweyew. Nthakenharlap atha ileman?” <sup>5</sup> Rernemap inkwerelhemel awew, angkew-anem ikwer, “Anantherran apwert akngerr ngkweng anthem.” <sup>6</sup> Judas-an angkew, “Yew-yew.” Ran intem alakenh iterrel-apenh, “Ilengerarl atha renh-rnem ilanthem, Jesus antwerrkeyew? Irrpetyapantarl ikwer-itwel aneyeleng-arey apek?”

*Kwertengerl atherrel amern tyenkerr apmeler-angkwarr amperneyel Jesus-ew  
(Matthew 26:17-19; Mark 14:12-16; John 13:21-30)*

<sup>7</sup> Arlta ingwerelan rernem amern ilperr-ilperr arlkeww-arlkwem Jew-rnem-wenh-angkwarr. Ingkerrel yep-yep akely ahenty akemel atwew. Rernemap ampernew, arlkweyew-anem. <sup>8</sup> Jesus angkew Peter-ew-then John-ew-then, “Alhenh-ather, amern tyenkerr-rnem ineyew. Amern-rnem ampernenh-ather, arrernemel, anantherr kwenty arlkeww-arlkwew.”

<sup>9</sup> Ratherrap ayernew, “Nthek-ampeny-warl ayleranth amern-rnem ampernem?”

<sup>10</sup> Ra tyernew, “Alhenh-ather, Jerusalem-warl. Mpwelanthap renh arenheyen, artwa anyentarl apetyeyenh ampwal kwayew-arelh-akert. Renhap apentenh-ather warl anyent-angkwarr, aylpenhemel ikwer-angkwarr. <sup>11</sup> Angkey-alhenh-ather, alakenh warlew-arteiy ikwer, Ingkartel thwenew. Nthenn-itwewarlap anantherr tyenkerran arlkweyew?” <sup>12</sup> Artwa rap atnwenhem irrwerl, room taypel ilkwangketyarr-warl.

Ikwer-itwew amern tyenkerr-rnem ampernenh-atherr arrernemel, anantherr arlkewew-arlkweyew."

<sup>13</sup> Ratherrap anperl-alhew, inngarl arewan, Jesus rarl ilew-angkwarz arrwekel-antey. Amern tyenkerr-rnem arrernew-penh, ratherrap alpew Jesus-warl angkep-antey.

*Jesus-el tyenkerr arlkweyel kwertengerl ikweren-hrnem-akertel*

*(Matthew 26:17-30; Mark 14:17-26; John 13:21-30)*

<sup>14</sup> Ingkenyarl aylpenhewel, Jesus alhew kwertengerl ikweren-hrnem-akert apmer ikwer-warl. Rernemap arrernelhew, tyenkerr-anem arlkewew-arlkweyew.

<sup>15</sup> Rap angkew ikwer-rnem, "Ayengan ilkelhew-antey, tyenkerr nhenh arlkweyew arrewantherr-akert. Anantherrarl arlkwem-penh, ingwer-rnemelan ayenh irrwampen-hantheyen artewenty, ipmew-antey ayenh atweyehn. <sup>16</sup> Ingkerr atyeng awelhew-arey! Tyenkerr nhelkwer atha arlkwey-angenh arrpemarl alakenh. Ingwer-ningwerant, ayengarl ilwenty-penh, Akngeyan ikweren-hrnemew atyetyart aneyenh, athap arlkweyenh arrpemarl alakenh."

<sup>17</sup> Rap inew irrkwa ngkwarl wayn-akert, inkwerelhemel Akngeyan-anem nakew ngkwarl ikwer-akertel. Rap angkew-anem ikwer-rnem, "Ya, ngkwarl nhenhan inenh-arey. Antherrey nemel antywennh-arey akelyarl-akely. <sup>18</sup> Ngkwarl wayn nhenh atha antywennh-angenh arrpemarl ahern nhenh-itwew alakenh. Ingwer-ningwerant, Akngeyan ikweren-hrnemew atyetyart aneyenh, athap antywem arrpemarl alakenh."

<sup>19</sup> Amern-anem ra inew, rap inkwerelhemel Akngeyan-anem nakew amern ikwer-akertel. Akaltheynemel akelyarl-akely ikwer-rnem antheynew angkemel, "Arlka atyenh nhenhan. Ingwer-rnemelarl arlka atyenh-anem artewenty arleny-arrerneyen whip-el. Ayengan katy ilweyehn arrewantherr. Alakenhaym arranther amern arlkwerl-anem, atyeng iylpangkemel."

<sup>20</sup> Rernem tyenkerr arlkewew-penh, Jesus-el inew arrpemarl irrkwa ngkwarl wayn-akert, antheynemel angkemel-antey, "Arrnga thelem katy ilweyehn ayeng arrewantherr, apmwa irrarkenheyew. Akngeyel arretengelew, rarl anyent-anem arrenhantherren pweytellem ikwer-warl. Atharl arrnga thelem alakenh, Akngey arrewantherr angkem ingwer-rnemew-then, rarl apmwa irrarkem arrewantherr ingkerenh-they."

<sup>21</sup> Rap angkew ikwer-rnem, "Anyentan arrewantherr-they alherlenty-akngeyeh artwa ilkwerenem-warl irrytert-antey. Amernarl arlkwem-penh, rap ingwer-rnem-anem ileyenh, ayenh antwerrkeyew. <sup>22</sup> Artwa Inngarl Akngey-wenh ayengan ilwem, Akngey-wenh pipel aynteyel-angkwarz. Artwa irrytert-awarr renhanap Akngeyel artewentyel irrwampen-hantheyen."

<sup>23</sup> Kwertengerl-rnemel aeww alakenh, rernemap angkerrew, "Artwa nthek-apenyarlap ran?"

*Kwertengerl-rnem ilelheyel atyetyart ilkwa*

<sup>24</sup> Rernemarl anew-anenh-antey, kwertengerl-rnem alakenh angkerrenh anyentarl-anyentarl, "Ayengan atyetyart Jesus-they, arranther ingwer-rneman arrangkwarl!"

<sup>25</sup> Jesus angkew ikwer-rnem, "Atyetyart ahern nhenh-arey-rnem ahelengkwarl. Rernem akngerr pwerep-anthem, awelheyew ikwer-rnem. Rernem angkem, 'Mwerr-angkerant-arey anantherr anem apmer nhenh-itwew, ayengarl atyetyart ilkwarl.'

<sup>26</sup> Atyetyart ahelengkw yanh-rnem-apeny aney-angenh. Anyentarl arrewantherr-they atyetyart aneyew. Warrkenh-apeny nga anemer anyentarl, 11 yanh-rnemew warrkerreyaw. Ntwan arntarnt-arem 11 yanh-rnem. <sup>27</sup> Atyetyart ilkwa artwa ilek-apenyarlap ran? Weth ran taypelel anem, amernarl arlkwem, artwa warrkenharel ikwer akngetyem. Ayengarlap atyetyart ahelengkw weth-rnem-apeny-weny. Athap arrenhantherrenh arntarnt-arem.

<sup>28</sup> Arrantheran ayenh iwerl-alhey-angenh, rlterrkarl atyeng ayntewengarl, ingwer-rneman atyeng-wety intwemelerrevarl. <sup>29</sup> Akngey atyehnel ayenh atyetyart arrernew ingkerr ikweren-hrnemew. Alakenh-anyem ingwer-ingwer atharl arrenhantherrenh arrerneyen atyetyart-rnem. <sup>30</sup> Ayengan aney-alpem atyetyart irrwerl-itwew, kwertengerl-rnem arranther atyeng-itwel aney-alpem. Anantherrap inkwerelhemel kwenty arlkwerrem. Arranther chair amparrkentyl anem, Jew-rnem arntarnt-arem elingkerrenh."

*Jesus-el Peter ileyel, "Ngan ilelheyen, ntwan ayenh iterl-arey-angenh"*

*(Matthew 26:31-35; Mark 14:27-31; John 13:36-38)*

<sup>31</sup> Jesus angkew Simon Peter ikwer, "Simon, awelha atyeng. Arrenty alkenhel Satan-el Akngey alakenh ayernew, 'Mwerrang atha kwertengerl-rnem arrkernem artewentyel?' Akngeyan angkew, 'Kel mwerr.' Ingwerentyaman arranther iylpareth-antey ikwer

awelhem, apmwangkwarrarl angkeyelewan. <sup>32</sup> Athan ngkweng Akngay ayernew, Simon-ay, ngenh rlterrkeleyew. Atha iterl-areyel, ngarl atyeng-wety amenterrenheyen. Ngarl atyeng-warl angkeperrenhey-alpeyeh, ntwap ingwer-rneman rlterrkel-aynta.”

<sup>33</sup> Ra tyernew, “Arrangkwarl! Ngenh akwernem tyayl-warl, ayeng ngkweng-angkwarr alhem arrpemarl. Ngenh ipmew atwem, ayenhanap rernem atweyew arrpemarl.”

<sup>34</sup> Jesus angkew, “Ileyel atha ngenh arraty. Tywek-tywek arlkeyew-alenty rlengk atemwengkel-antey, irrpety-inger nga ilelheyen, ntwan ayenhanterl-arey-angenh.”

<sup>35</sup> Kwertengerl 12 ikwer-rnem-anem ra angkew, “Arrantherr iterl-areyel, atharl weth thwenew arrenhantherrenh, angka mwerr-angker iterl-apaynteyew. Iltyantarlap arrantherr alhew; apwert-weny, yawketh-weny, pwet anyentant. Ayek ingwer-rnemelan arntarnt-arew arrenhantherrenh?”

Rernem tyernew, “Ya, ingwer-rnemel anenhantherrenh arntarnt-arew inngarl.”

<sup>36</sup> Rap angkew, “Aleyan ingwer-lkwer-anem. Ingwer-rnemelan arrenhantherrenh arntarnt-arey-angenh. Aleyan arrewantherr mwerr-anemarl apwert-then yakweth-then akngayew. Ingwerentyl nayp arlpenty atnyeney-angenh apek. Ra kwet ikwerenhan themer apwertew. Apwert ikwerel ra nayp arlpenty-anem inemer. <sup>37</sup> Akngay-wenh pipelan alakenhan aynteyel: ‘Rernem angkeyeh, atharl angka Moses-wenh apenty-angenh.’ Ya, angka yanhan atyeng-akert. Rlengkan rernem atyeng-akert alakenhan-anyem ilem, Akngay-wenh pipelarl aynteyel-angkwarr.”

<sup>38</sup> Kwertengerl-rnem angkew, “Ingkartay, nhenh araw! Kelarl anantherran nayp arlpenty atherr atnyeneyel.”

Ra angkew, “Kel-antey. Alakenh angkey-angenh, menty. Arwa angkeyel.”

#### *Jesus-an aynewikw ikwerenhan keyel Apwert Alip-itwew*

(Matthew 26:36-46; Mark 14:32-42; John 12:27)

<sup>39</sup> Ikwer-penhan Jesus warl ikwer-they anperl-alhew kwertengerl ikwerenhan-rnem-akert, angkep alpew apmelerrel-aytew Apwert Alip-warl. <sup>40</sup> Rernemarl apwertel aney-alhew, rap angkew ikwer-rnem, “Akngay-anem arrantherr ayernenh-arey rlterrkeleyew. Arrentyel arrenhantherrenh arrkernewerr, angkeperreyew atyeng-wety.”

<sup>41</sup> Kwertengerl-rnem arrernelhew ingkerrenh-antey, Jesus-an arleng-awatyelew. Rap kwenerremel-anem angkenh alakenh-anyem, <sup>42</sup> “Akngay atyeh, ayeng ilkelheyel, ntwa artwereleyew ahelengkw yanh-rnem. Ayeh irrwampenhanthewerr, ipmew-antey atwemel! Ngarl ilkelhent, rernem ayenhan atwem, kel mwerrarl. Ayeng ngkweng awelhemarl. Ngkwenh-angkwarr mwerr.” <sup>43</sup> Antyerl-anem irrwerl-they anamerl-antey aremerrenhey-alhew, rlterrkeleyew renh. <sup>44</sup> Jesus-an arlka apmwerrenhew. Rap Akngay angkepelarreng ayernenh rlterrkel-antey irrkaty-angkwarr. Rlterrkel ayernenh-angkwarr, intyey-anem ikwer-they taltyaytnem kwaty-apeny.

<sup>45</sup> Akngay-warl angkenh-penh, ra rtnerl-alhew, alpemel-anem ikwer-rnem-warl. Rap renh-rnem arey-alpew, ankwarl ayntenhan-anem. Rernemarl amperrngerremel anew-anenh, ankwel-anem renh-rnem atwew. <sup>46</sup> Rap atyekellem ayernew, “Ay! Ilekewarl arantherran ankwan aynteyel? Akwenth-arey! Akngay ayern-aytenhan-arey artewenty, arrentyel arrenhantherrenh ilpertelewerr.”

#### *Artwa ahawarr-rnemel Jesus antwerrkeyel*

(Matthew 26:47-56; Mark 14:43-50; John 18:3-12)

<sup>47</sup> Jesus-an angkenh-angkwarr, kwertengerl Judas-anem aremerrey-alhew akngerr ingwer-rnem-akert. Rap alhew, Jesus-ew arrwanteyew-arrpantey. <sup>48</sup> Jesus-el ayernew, “Inngang ntwan ayenhan arrwanteyel? Arrangkw. Alakenhan ntwa ayenhan artwa ahawarr-rnem-warl lwewarrerneyew, antwerrkeyew.”

<sup>49</sup> Kwertengerl ingwer-rnemel arew, artwa ahawarr-rnem arrererrenhey-alhew, antwerrkeyew-anem. Rernem ayernew, “Ingkartay, mwerrang anantherr renh-rnem atanthem nayp arlpenty atherrel?” <sup>50</sup> Kwertengerl anyentelan nayp-anem tyerrenhew, rap artwa anyent-weny iylda akenhew arraty-angkwarr. Artwa warrkenharlap ran tyatylkwa Jew-rnem-wenh-arey artwa rltwewenh.

<sup>51</sup> Jesus-el renh-rnem artwerelew, “Ipmelhenh-arey arrantherr!” Rap iylda inew, arnemel mwerrelew-anem.

<sup>52</sup> Artwa rltwernem tyatylkwareny-rnem, iltymwerney tyatylkwareny-rnem, artwamp-rnem-then rernem ingkerrenh rtnenherrenh. Rernem mpwelherrenh, renh antwerrkeyew. Rap angkew ikwer-rnem, “Ilekew arrantherr apetyew nayp arlpenty-rnem-akert arwerl-them-akert? Athan ingwerenty ipmew atwey-angenh!” <sup>53</sup> Arlta arrpanenhel atha akngerr akalty-anthenh tyatylkwtew. Arrantherran ayenhan antwerrkemer ikwer-itwew. Nthakenh arrantherran ayenhan antwerrkey-angenh ikwer-itwew, ayengarl apmwel-ayeth aney-angenh, arrangkw. Arrantherrap ayenhan mentyarl

arew. Kel-anem aleyan arrantherr ayenhantherrkem. Arrentyel arrenhantherrenh ilanthew, ayenhantherrkeyew, awank-akerr Akngayan angkew-angkwarr.”

*Peter-an angkeyel, “Jesus atha iterl-arey-angenh”  
(Matthew 26:57-68; Mark 14:53-72; John 18:13-14, 19-24)*

<sup>54</sup> Rernemap Jesus antwerrkew, warl Caiaphas-wenh-warl-anem atnwenhew. Artwa Caiaphas ranap tyaty ilkwa Jew-rnem-wenhew-artey. Rernemarl renh akngeynenh, Peter-elan irrker-they apenteynenh. <sup>55</sup> Warl ikwer-itwew aketh-itwew, artwa ahawarr-nemel rwa arrtyew atheperrel. Peter-an alhew, aney-alhew ikwer-rnem-itwel, rwel-anem arlterrngerrey-alhew. <sup>56</sup> Kwey warrkenh anyentel alhengk-aremel angkew-ingwer-rnemew, “Artwa nhennan Jesus-ew apelyt arrpemarl.”

<sup>57</sup> Ra irrtywerremel angkew, “Rwengk, atha renh iterl-arey-angenh.”

<sup>58</sup> Ikwer-penh-antey ingwerel-anem alhengk-arew, “Ngan kwertengerl Jesus-wenh arrpemarl.”

Peter-el tyernew, “Rwengk, ayeng-weny!”

<sup>59</sup> Ingwer-ingweran ingwerel-anem renh alhengk-arew. “Ya, artwa nhanyem inngarl alhenh ikwerel-arleng. Ran angkeyel apmer Galilee-areny-rnem-apeny. Ranap ikwer-areny arrpemarl, Jesus-apeny.”

<sup>60</sup> Ran tyernew, “Arrangkw! Atha iterl-arey-angenh, ngarl angkeyel-angkwarr!” Rarl angkenh-angkwarr, tywek-tywekan arlkew-anem. <sup>61</sup> Kwen-they Jesus-elan renh artepang arew. Peter-el iterl-arew, rarl arrwekel-antey ilew, “Tywek-tywek arlkeyew-alenty rlengk atemwengkel-antey, irrpety-inger nga ilelheyen, ntwan ayenhantherrkeyew!” <sup>62</sup> Rap akwenterl-alhew, tyerrelhenhey-alhew aketh-warl-anem keyt-angkwarr. Ra artewentyel artnenh-anem, rarl arrwekel-antey angkew-penh, ra renh iterl-arey-angenh.

*Jesus-arl kwanthemel atweyel*

<sup>63</sup> Artwa ahawarr-rnemel Jesus antwerrkenh, rernemap arrkentelhelemel renh atweneh. <sup>64</sup> Rag-el annga atherran renh artew ayernemel, “Ntwarl arraty-antey iterl-areyel. Ilelha anewanther. Angwenhel ngenh atwewan?” <sup>65</sup> Rernem alakenhan ayernemel-antey kwanthenh renh akwetyemel.

*Jesus renh court-warl atwenheyeyel, artwa ilkwer nemel renh ayerneyew  
(Matthew 27:1-2; Mark 15:1)*

<sup>66</sup> Itwern tyerrelhewel, artwa ilkwer neman akarrerrew angkerreyew. Atyetyart Jew-rnem-wenh-rnem, artwa rltwa tyaty ilkwareny-rnem, artwa angka Moses-wenhew akalty-anthey-angker-rnem-then rernem ingkerr akarrerrew. Artwa ahawarr-rnemel Jesus renh rnkernew arrwekel-angkwarr. <sup>67</sup> Artwa ilkwer nemel renh ilew, “Arraty ilelheyew! Nganang artwa Christ, Akngayelarl ilew, rarl ahern nhennh-warl thweneyew?”

Ra tyernew, “Ayengan angkety alakenh, arrantherrrap irrpeltharl irrem. <sup>68</sup> Atha arrenhantherrenh ilenty, angkakert Akngay-wenh-rnemel ilenh, arrantherran awelhey-anghenarl. Ya, ayengan Artwa Inngarl Akngay-wenh. <sup>69</sup> Rlengk-antey ayeng alpeyenh, Akngay-itwel aney-alpeyew. Akngay ran arawerrng ilkawekartarl. Ayengan aney-alpeyenh ikwer-itwel, aylakap-atherr-anem aneyenhatyetyart alkenh-atherr.”

<sup>70</sup> Rernem awew, ayernew-anem, “Kelew, innga wenh nga Alerikw Akngay-wenh, ngay?”

Ra tyernew, “Inngarlap arrantherr alakenh angkeyel.”

<sup>71</sup> “Kel ananther awew! Ilekewarl ananther nthwem ingwer-warl, apmwa renh antweyew? Rantey ament ilelheyel, ran Akngay-wenh Alerikwarl!”

## 23

*Jesus renh atwenheyeyel atyetyart Pilate-warl  
(Matthew 27:11-14; Mark 15:1-5; John 18:33-38)*

<sup>1</sup> Artwa ilkwer nem rtnerl-alhew-anem, Jesus rernem atnwenhew artwa ilkwa Rome-areny-warl Pilate-warl. <sup>2</sup> Rernemap renh rnkernew arrwekel Pilate-itwew, aytarrp-ilew-anem alakenh, “Artwa nhel-anye mel Jew-rnem anenhantherrenh akalty-anthenh apmwel-ayeth! Ran arrkernehlhew, anenhantherrenh artwreleyew-arrpantey, apwert anthewerr artwa ilkwa Rome-areny ikwer! Ran ilelheyel Alerikw Akngay-wenh. Ranap Moses-wenh-angkwarr apenty-angenharl, rarl alakenh angkeyel. Ran Akngay-wenh-wenyl, artwa ananther-areny. Ranap ilelheyel artwa Christ, Akngayelarl ilew, rarl ahern nhennh-warl thweneyew, atyetyart Jew-rnemew-artey aneyew!”

<sup>3</sup> Pilate-elan ayernew, “Inngang ngan atyetyart Jew-rnemew-artey?”

Jesus-el tyernew, “Arratyan nga angkeyel.”

<sup>4</sup> Pilate angkew artwa ilkwernemew ingwer-rnemew-then, "Ywarn-antey atha renh ayerneyel. Ranap apmwelheley-angenh! Nthakenh atha renh atwney-angenh arrang-kewen. Atha renh tyarlewemer."

<sup>5</sup> Rernemanap ahelerremel arlkew, "Arrangkw wenh! Ran alhenh apmer arrpanenh-warl, Jew-rnem akalty-antherl-apenh, kapmentew awelhey-angenh anaynteyew. Apmer Galilee-angkwarr-tangkwell ra alhenh. Aleyan ra apetyew apmer nhenh-warl Jerusalem-warl-anem, irrwerneyew."

<sup>6</sup> Pilate-el awew, rap ayernew, "Artwa nhenhan Galilee-areny, ngay?"

<sup>7</sup> Rernemap angkew, "Ya, Galilee-arenyarlap ran!"

Pilate rap iterrew, renh thweneyew atyetyart Galilee-areny-warl Herod-warl. Ikwerel-antey, rernemarl Jesus ayernenh-angkwarr, Herod-an anenh tawen ikwer-itwew, rarl arwa apetyew. Pilate-then ilkelhey-angenhant-atherr anen.

#### *Atyetyart Herod-el Jesus ayerneyel*

<sup>8</sup> Rernemap Jesus atnwenhew artwa Herod-warl, atyetyart Galilee-areny-warl. Herod-an inkwerelhew, renh areyew, rarl angka awew, Jesus-elan ilek-ilek mpwarey-angker. Anngetherren-anem ra renh areyew, mpwarenty rlterrk ilkwakertel. <sup>9</sup> Akngerr-inger ra Jesus-an ayernenh. Ranap akeleytarl rtnehn, tyerney-angenh. <sup>10</sup> Artwa rlta tyaty ilkwareny-rnem artwa angka Moses-wenhew akalty-anthey-angker-rnem-then rernem awelhenn arrpemarl arrer-they, ahelerremelarl renh ayntarrp-llerrenh.

<sup>11</sup> Herod-el artwa ahawarr ikweren-rnem-akertel renh arrkentelhelenh. Rernemap arnkwa atyetyart-wenh mwerr-angkerel renh akwernew, angkep thwenemel artwa ilkwa ingwer weth-warl Pilate-warl-anem. <sup>12</sup> Arlta ikwerel-antey Pilate-then Herod-then mwarrant-atherr-anem aneyelpew.

#### *Atyetyart Pilate-el ilantheyel, Jesus atwneyew ipmew*

(Matthew 27:15-26; Mark 15:6-16; John 18:39-40; 19:6-16)

<sup>13</sup> Kel Jesus angkep thweneynew atyetyart Pilate-warl-anem. Akngerr-anem Pilate-el ilew, akarrerreyew ikwer-warl. Artwa rlta tyaty ilkwareny-rnem, atyetyart Jew-rnem-wenh-then ingkerrenh-antey akarrerrew. <sup>14-15</sup> Rap angkew ikwer-rnem, "Arrantherren artwa nhenh atyeng-warl akngetyew. Arrantherrap renh ayntarrp-ilenh, irrwernelhewarl. Athan renh ywarn-antey ayernenh, anngetherren arrewantherr-itwew. Renh thwenew Herod-warl-anem. Ran ayernenh arrpemarl ywarn-antey, rap renh thwenew angkep arrpemarl. Herod-atherr aylanthan iterreyel, ran apmwewenyarl. Atha nthakenh atyenh-rnem iley-angenh, renh ipmew atwneyew, arrangkw." <sup>16</sup> Pilate-an iterrenh, "Atyetyart Jew yanh-rnem inkwerelhem apek, ayengarl alakenh angkentyew, 'Atha artwa ahawarr-rnem ilanthem, renh whip-el atwneyant, tyarlewemel-anem.'" Rap alakenh angkew, "Atha atyenh-rnem ilanthem, rernem atwneyew artepant whip-el, renh tyarlewemel-anem."

<sup>17-19</sup> Ikwerel-antey rernem Jesus court-emelenh, artwa anyent anenh tyayl-itwew itnan Barabbas. Awank-akerr artwer nem atwerrenh Jerusalem-itwew. Ra nheng artwa anyent ipmew atwew, renhap tyayl-warl-anem akwernew. Ingkerrenh arkalhelerrenh, "Jesus yanh atwey! Barabbas-an tyarlewa anewantherr!" [Apmer ikwer-areny-rnemelarl tyenkerr weth arlkwenh, Pilate-el tyerrenh artwa anyent tyayl-they. Ra apmelerrel-ayeth alakenh irrenh.]

<sup>20</sup> Pilate-an ilkelhew, Jesus tyarleweyew. Ywarn-antey ra ayernenh arrpemarl.

<sup>21</sup> Rerneman arkalhelerrenh, "Arwerl iylpeyl-atherr-warl atantha! Arwerl iylpeyl-atherr-warl atantha!"

<sup>22</sup> Pilate angkew ikwer-rnem, "Arrangkw wenh! Ranap apmwelheley-angenh! Atha nthakenh atyenh-rnem iley-angenh, renh arrangkwew ipmew atwneyew. Atha renh-rnem ilanthem, rernem atwneyew artepant whip-el, renh tyarlewemel-anem."

<sup>23</sup> Arkalhelerrenh-antey atayel, "Arwerl iylpeyl-atherr-warl atantha!" Pilate rap awel-hew iylpareth-antey. <sup>24</sup> Ra renh-rnem akeleyteleyew-arrpanter, rap angkew, "Kelew!"

<sup>25</sup> Rap artwa renh Barabbas tyarlewew-anem tyayl-they, rernemarl arkalhelerrenh-angkwarr. Rap Jesus ahayiwew artwa ahawarr-rnemew, arwerl iylpeyl-atherr-warl atantheyew.

#### *Jesus-arl atantheyel arwerl iylpeyl-atherr-warl*

(Matthew 27:32-44; Mark 15:16-32; John 19:2-3)

<sup>26</sup> Ikwer-penh artwa ahawarr-rnemel Jesus atnwenhew atyetyart Pilate-wenh warl-they. Rernemap artwa anyent-anem rlwatew, Jerusalem-warlarl apetyen h apmer ingwer-they. Simon-arlak ran, apmer Cyrene-areny. Rernemap renh antwerrkew,

ilanthemel arwerl katy akngeyew Jesus-ew. Jesus arrwekelarl alhenh, Simon-el ingkern-theyarl apenteynenh arwerl-akertel. <sup>27</sup> Akngerr ingwer-rnemel Jesus apenten. Arelh-rnem artnalhelerrenh artewentyel ikwer. <sup>28</sup> Rap artepang aremel angkew ikwer-rnem, "Arelh Jerusalem-areny-rnemay! Atyeng artney-angen arrantherr! Amenheng nhenh-areny-rnemew artnenh-arey!" <sup>29-31</sup> Ya, pwarrk antheyen rernem ayen artewenty innga. Ingwer-ingwer arrewantherr Jerusalem-areny-rnemew apmwer nemel pwarrk ilkwa innga antheyen. Arrantherrap angkeyen, 'Arelh ampeweny-rneman inkwerel-heyel. Arelh ampernem-akertan amperrngerreyel-anem, apmwer nemel arlam aikwer-rnem-wenh atwew."

Arla ikwerel arrantherr apwert ilkwernem-warl anterreyen. Arrantherrap rtneyen apwert impalh-itwew, angkemel Akngeyew, 'Artwa ahawarr-rnemelan ipmew atwewerr, apwert nhenh-rneman ntwa arrewelhela, anewantherr-warl aytneyew, anewantherrenh ipmew lthweyew!"

<sup>32</sup> Artwa ahawarr-rnemel atnwenheyen artwa ingwer atherr-then, artwa ratherran irrwernelhewarl. Rerneman ilkelhew, artwa irrpety renh-rnem atwewyew. <sup>33</sup> Renh-rnem rernem atrwenheyen apwert anyent-warl itnan Akarnng. Apwert ikwer-itwew Jesus-itwew rernem arnkwan lhelp-lhelew. Atanthew-anem arwerl iylpeyl-atherr-warl, rnker nemel Jesus-enp-antey. Artwa apmwa atherr-then rnker new akwerrant-atherr, renh ampepewelemel. <sup>34</sup> Jesus itnywenemel angkew, "Akngeyay, akwerrparl rernem. Rernem iterl-arey-angen, apmwel-ayeth mpwareyel. Apmwa irrarka ikwer-rnem-wety." Artwa ahawarr-rnem map ntwelhelerrenh, ampwal iwemel namp-akert, Jesus-wenh arnkwa antengeyew.

<sup>35</sup> Akngerr rtnenherrenh-antey, Jesus arntarnt-arenh, aynterarerrenharl arwerl-itwew. Artwa Jew alkenh-rnemelan renh arrkentelhelenh irrpeltherremel alakenh, "Ra ingwer-rneman itethelew ipmepen. Rap ament itethelhelemer ipmewety. Inngang ran artwa Christ, Akngeyelarl arretengelew anewantherr, ra ahern nhewarl thweneyew? Rap atwarremer arwerl yanh-they!"

<sup>36</sup> Artwa ahawarr-rnemel renh arrkentelhelenh arrpemarl alakenh, "Ngkwarl tyekert antya anewantherr-itwel! <sup>37</sup> Inngang ngan atyetyart Jew-rnemew-arte? Anantherr iterl-areyew! Atwarra arwerl yanh-they!"

<sup>38</sup> Arwerl tyeylp arrernew arwerl iylpeyl-atherr ikwer-warl. Tyeylp ikwer-warl alakenh-anyem ingkwernew, "Artwa nhanyem atyetyart Jew-rnem-wenh." <sup>39</sup> Artwa apmwa anyentelan Jesus ra arrkentelhelenh arrpemarl. "Nheng nga artwa Christ. Atwarra arwerl-they, atwarrelhelemel aylernenhanth-then!"

<sup>40</sup> Artwa apmwa ingweren renh iltew. "Ipmelha, atherrelerl-aney-angen! Nga aterremer Akngey-wety! Anantherr ilweyew-anem arwerl nhenh-rnemel! <sup>41</sup> Kelarl aylewanthan mwerrarl ilweyew alakenh, apmwel-ayetharl mpwarew-pen. Artwa nhenhan apmwelheley-angen, arrangkw." <sup>42</sup> Jesus aremel ra angkew, "Iterra atyeng, ngarl rlengk-antey alpem irrwerl, atyetyart alkenh aney-alpeyew."

<sup>43</sup> Ra tyernew, "Atha ngenh arraty ileyel. Rlengk-antey aylanth alpem, aney-alpeyew apmer mwerr-angker-itwew irrwerl."

### *Jesus-arl ilweyel*

(Matthew 27:45-56; Mark 15:33-41; John 19:28-30)

<sup>44</sup> Arla ikwerel-antey arla ampepel atemwengkerreyelpew. Nthakenh ingkeny arey-angen. Apmer arpaneh-itwew atemwengkerrew arla ampep-they atwerrepew-atey. <sup>45</sup> Ingkeny arrtyneyelpew-anem angkeparl. Rag ilkwa aynterarerrenh tyat ylkwitwew. Atemwengkerrewel, rap iterrelhew ament-antey ampep-angkwar irrwerl-they kwenel-atek. <sup>46</sup> Jesus arlkew, "Akngey atyenhay! Ayeng ilweyel-anem! Inweng atyenh arntarnt-ara!" Ra alakenh angkew-pen, rap ilwew-anem.

<sup>47</sup> Atyetyart artwa ahawarr-rnem-wenel arenh arrer-they. Rap Akngey nakew alakenh angkemel, "Inngarl artwa nhenhan mwerr. Ran apmwelheley-angen, arrangkw." <sup>48</sup> Akngerr akararerrew. Rernem aytareyew, artwer nem irrpety arwerl-warl aynterarrewew, artwa apmwa atherr Jesus-anem. Rernemap amperrngerrew, alpew-anem apmer-warl, artewentyel artnemel. <sup>49</sup> Jesus-ew apetyr-nem ikweren-hrnem-then rerneman arleng-they arenh. Arelh Galilee-areny-rnemel arenh arleng-they arrpemarl, rernemarl apetyew Jesus-el-arleng apmer ikwer-they.

### *Jesus renh akwerneyel intey-warl*

(Matthew 27:57-66; Mark 15:42-47; John 19:38-42)

50-51 Kel artwa Joseph-an rtnen arwerl-itwew arrerenty, ranap apmer Arimathea-areny Judea-ampeny-areny. Ran arratyarl anen, Akngeyew mpwelhemel, rarl atyetyart ingkerrenhew aneyen. Artwa Jew ilkwarlap ran. Arrwekel-antey artwa

ilkwernem angkerrenh, Jesus renh atweyew. Joseph-elan ywarn-antey arrkernelhenh, artwereleyew-arrpantey. <sup>52</sup> Jesus-arl ilwew-penh, rap atyetyart Pilate ayerney-alhew, "Menty atha renh akngeyney, akwerneyew?" Pilate-el tyernew, "Ya, akngeyna." <sup>53</sup> Rap ikweren-h-rnem-akertel arwerl-they atwarrelhelew, arnkwa arlterel-anem ataperrelew, akwerinemel awenng-warl. Awennganap intey-penh, ingwerentyelarl akalthew apwert impalh-they. Intey ra arrangkwarl aytenten, ingwerenty akwerney-angenh-antey. <sup>54</sup> Friday atwerrp-atwerrp-anem. Joseph-wenh-rnemel renh anamerl-antey akwernew, ingkeny aylpenhewerr. Friday atwerrpan alakenh warrkenh Jew-rneman iterrem, "Warrk anantherr ipmelhem-anem. Nthakenh anantherr Saturday-el warrkerrey-angenh arlta ltyerrey-angker-wety."

<sup>55</sup> Friday ikwerel arelh weth-rnem, Jesus-el-arlengarl apetyew Galilee-they, Joseph-anem rernem apentew. Rernemap intey-warl alhew, Jesus-arl akwernew-warl, areyew. <sup>56</sup> Rernem arew-penh, apmer-warl-anem alperlewew, anter mpwareyew mwerr-angker intenh-akert. Anter ipma aperneyew-arelh Jew-rnem-wenh-angkwarr. Saturday-el rernem ltyerrew apmer ikwer-rnem-wenh-itwew, Moses-elarl akalty-anthenh-angkwarr.

## 24

*Jesus-arl angkep itetherreyel ipmepenh*

(Matthew 28:1-10; Mark 16:1-11; John 20:1-10)

<sup>1</sup> Ingwepenh-antey Sunday-el, arelh-rnem angkep alpew intey-warl anter mwerr-angker intenh-akert, rernemarl arrwekel-antey mpwarewenp. Mary Magdala-areny, Joanna, Mary ingwer-anem (James-wenh amikw), arelh ingwer-rneman, rernemarl alhenh ingkerrenh. <sup>2</sup> Intey-itwew rernem arey-alhew, apwertarl arnangelew arriw-they. <sup>3</sup> Rernem kwen aylpenhew areyew, Jesus ipma aytentyew. Rernemap ywarew ikwer, arrangkwarl. <sup>4</sup> Rernemarl apatemel ayernerrenh, artwa atherr arwapeny aremerrelyepew, rtneh-anem ikwer-rnem-itwel. Arnkwa ikwer-atherrenh ampar-kenh. <sup>5</sup> Rernem atererremel kwenerrew-anem. Ratherr angkew ikwer-rnem, "Ilekew arrantherr artwa itetherewan nthweyel ipmeweh-itwew-anem? <sup>6</sup> Ran nhenhel aney-angenh, arrangkw! Ran itetherrenhey-alpew, alhew-anem. Arrantherrlap iterl-areyel, wetharl arrwekel arrewantherrel-arleng anenh apmer Galilee-itwew. Angka nhenh ra ilenh arrewantherr:

<sup>7</sup> 'Ayengan Artwa Inngarl Akngey-wenh. Artwa apmwer nemew ayenh ahayiweyen. Rernem ayenh atweyehn ipmew-antey, tywenemel arwerl iylpeyl-atherr-warl. Ingwa atherr-penh ayeng itetherreyen arrpemarl ipmepenh.'

<sup>8</sup> Arelh-rnemel angka renh iterl-arew-anem.

<sup>9-10</sup> Rernemap intey-they alpew-anem, angka iley-alpew kwertengerl-rnem 11-ew ingwer-rnemew-then. <sup>11</sup> Kwertengerl-rnemanap awelhey-angenh. Rerneman iterrew, irrywerremel ilerl-anenty-arrpantey. <sup>12</sup> Peter-anap rtnerl-alhew-anem, anterremel intey-warl. Rantey anngetherr amentel areyew. Rarl intey-itwew aremerrey-alhew, rap ayerney-alhew kwen. Arrangkw. Arnkwa arlterant ra arew, ipma ataperreleyew-arelh. Apatemel-anem ra apmer-warl alpew.

*Artwa atherr alheyel tawen Emmaus-warl*

(Mark 16:12-13)

<sup>13</sup> Arlta ikwerel artwa atherr alhenh tawen akely-warl Emmaus-warl, Jerusalem-they arrerenty. Ratherrap Jesus apenten. <sup>14</sup> Alpenharl ratherr angkerreyenhenh Jesus-ew, ipma anaynt aytney-angenh intey-itwew. <sup>15</sup> Ratherrarl angkeynenh-antey, Jesus rantey-anem anteng-they alpew ikwer-atherr-warl, rap alpew-anem ikwer-atherrel-arleng. <sup>16</sup> Ratherran renh alhengk-arey-angenh, arrangkw. Ingwer-athen arenh.

<sup>17</sup> Rap renh-atherr aycernenh, "Nthakenh mpwelanth angkerrenh?"

Ratherr rtneyelpew, amperrngerremel ayternen. <sup>18</sup> Artwa anyent itnan Cleopas ra angkew, "Ingkerrelan iterl-areyel, Jerusalem-itwewarl apmwa aytew. Ntwan anyentelant iterl-arey-angenh?"

<sup>19</sup> Rap ayernew, "Apmwa ilek-apenyarlap ran?"

Ratherrap tyernew, "Artwa weth Jesus Nazareth-areny, ranap angkakert Akngey-wenharl. Arawerrng rlterrkell ra arntety-rnem mwerrelenh, angkethen akalty-anthenh Akngey-wenh arraty-angkwarr. Akngerran ikwer inkwerelhenh. Akngeyan ikwer inkwerelhenh arrpemarl. <sup>20</sup> Artwa rltwa tyaty-areny-rnem ikwer-wety arlkarerrenh atyetyart ingwer-rnem-then. Rernemap renh artwa ahawarr-rnem-warl ahayiwew atweyew, arwerl iylpeyl-atherr-warl-anem atantheyew. <sup>21</sup> Anantherranap renh apale-larl apenten. Anantherr iterl-aremer, Akngeyelarl anewanther thwenew Israel-wenh-rnemew. Anantherr iterrenh, rarl anewanther atyetyart ilkwa anem-arrpantey,

Rome-areny-rnem irrentemel. Alakenh ayntey-angenh, arrangkwarl. Ingwa atherrel-anem ra ipma ayntenh.<sup>22-23</sup> Ngwampan anantherr apateyelpew. Ingkeny aremerrey-angenh-antey, arelh-rnem alhew intey ikwer-warl, apey-alpemel angkakert-anem. Rernemarl kwen aylperl-alpew-penh intey-itwew, rernemap angka iley-alpew, 'Ywarn-antey anantherr nthwenh Jesus ikwer. Antyerl atherr aremerrey-ayntew, angkew-anem, "Jesus-an angkep itetherrew ipmepen!"'<sup>24</sup> Artwernem-anem alhew intey-warl. Rernemap arey-alhew, arelh-rnemelarl ilenh-angkwar-antey. Renhanap rernem arey-angenh, arrangkw."

<sup>25</sup> Jesus angkew ikwer-atherr, "Mpwelanthan arwengk apek, arraty iterrey-angenh? Mpwelanthan irrpeltherreyel angka artwa Christ-akert, awankarl angkakert Akngey-wenh-rnemel ingkwernenh!"<sup>26</sup> Mwerrarl artwa renh irrwampenh-antheyewan, ingkerrew katy ilweyew. Ingwa atherrel rarl ayntem-penh, rap angkeparl itetherreyenhp, Akngey-itwel-anem arey-alpemel arawerrng ilkawakertel."

<sup>27</sup> Rap renh-atherr akalty-anthenh arraty-angkwar, anaynt-then ilenh angka irrkaty ikwer-akert. Angka renh Moses-el angkakert Akngey-wenh-rnemel-then ingkwernew Akngey-wenh pip-warl.

<sup>28</sup> Rernemap aremerrey-ahew tawen ikwer-itwew Emmaus-itwew. Jesus-an alhenh-antey. Ingwer-atherran ilkelhew, aynteyew apmer ikwer-itwew.<sup>29</sup> Ratherrap angkew, "Ingkeny aylpeyneyel-anem, atemwengk-anem. Apetya aylewanthel-arleng." Rap aylpew warl anyent-warl, ikwer-atherrel-arleng anaynteyew.<sup>30</sup> Rernem arrernelhew, amern-anem arlkweyew. Amern inemel ra Akngey nakew. Acalthemel ra tyeylp atherr anthew ikwer-atherr.<sup>31</sup> Anamerl-antey ratherr renh alhengk-arew, "Nhenh Jesus-an!" Ranap arwapenyarl ywerrerl-alhew.<sup>32</sup> Ratherrap angkew, "Mwerr-angker innga, rarl aylewanthel-arleng alhenh iwerrel, angka Akngey-wenh ilenh anayntelemel. Arlkan aylanth mwerrerrelylpew."

<sup>33</sup> Ratherrap akwenterl-alhew, anamerl-antey angkep alpew Jerusalem-warl. Arey-alpew-anem kwertengerl-rnem 11 ingwer-rnem-then, apmer ikwerel-antey anew-anenh.<sup>34</sup> Rerneman ikwer-atherr iley-ayntew, "Innga! Jesus inngarl iteth! Ran aremerrew Simon-ew!"<sup>35</sup> Ratherr-anem ilelhew, "Aylanthalr iwerrel alhenh Emmaus-warl, Jesus-an pwyeterrenh aylewanth-ittew. Angka Akngey-wenh ra akalty-anthenh, aylanthalp renh alhengk-arey-angenh, arrangkw. Anantherrarl irrpety arrernelhew, rap amern-anem akew. Rarl amern akew-angkwar, aylanthalp renh alhengk-arew, rap ywerrerl-alhew-anem."

*Jesus-arl aremerreyel kwertengerl ikwerenh-rnemew  
(Matthew 28:8-10; John 20:19-23)*

<sup>36</sup> Ratherrarl angkenh-antey, Jesus rantey aremerrew, rtnenh-anem ikwer-rnem-itwew. Ra angkew, "Atererrey-angenh arrantherr."

<sup>37</sup> Rerneman apatemel atererrew, iterremel inweng ikwerenh-wety-arrpanety.<sup>38</sup> Rap angkew ikwer-rnem, "Ilek-wety arrantherr atyeng-wety atererreyel irrpeltherremel?"

<sup>39</sup> Nhenh ayengarl innga! Itep-then ingkety-then arenh-arey. Ayenh arnenh-arey, arrantherr iterl-arayteyew. Arlkan nhanyem atyenh irrkaty-antey!"

<sup>40</sup> Rap lwewarrernelhew-anem itep-atherr ingkety-atherr.<sup>41</sup> Rernemap inkwerelhew apatemel, ywarn iterremel. Rap ayernew-anem, "Amern-then aker-then atnyeneyel apek?"<sup>42</sup> Rernemap renh anthew aker aylperr, arrwekel-anteyarl ampernew.<sup>43</sup> Rap aylperr inew, arlkwemel anngethererr ikwer-rnem-itwew.

<sup>44</sup> Rap angkew ikwer-rnem, "Arrantherrap ayenh annge-anem arem, ayengarl itetherrew angkep ipmepen. Aleyan inngarl ayntem, athar ilenh arrwekel-antey, anantherrarl ingkerr anenhang-arey. Moses-el-then angkakert Akngey-wenh-rnemel-then rernem angkethen aylelhenty-then atyeng-akert ingkwernew awank-akerr. Rernem ilenh, ayengarl angkep itetherreyenhp ipmetyeh. Aleyanap innganem."

<sup>45</sup> Rap angka Akngey-wenh ilenh, anayntelemel ikwer-rnem, rernemaw mwanty awelheyew.<sup>46</sup> "Alakenh aynteyelan pip Akngey-wenhel. Akngeyel arretengelew, ayenh Jesus Christ thweneyew. Ra angkew, rernemarl ayenh ipmew atweyen, pwarrk anhemel artewenty. Rap angkew, ingwa atherr-penharl ayeng itetherreyenhp arrpemarl ipmepen.<sup>47</sup> Ra angkew arrpemarl, rarl ikwerenh-rnem thweneyenhp apmer arrpanenh-warl, angka mwerr-angker ilerl-apaynteyew. Alakenh aynteyelan arrpemarl: Jerusalem-warl-tangkwl rernem alheyen. Akngey-anem ilaynteyeh, apmwewety ipmelheyew, nyerrerremel angkeperrenhey-alpewey Akngey-warl-athek. Akngeyel apmwa ikwer-rnem-wety irrarkemel, ikwer-rnem awakelhey-angenh.<sup>48</sup> Ya, arrantherr ayenh arew annge, arrantherrap angka atyeng-akert ilerl-apayntem, ayengarl ilwew, itetherrenhey-alpew-anem angkep.

<sup>49</sup> Awank-akerr Akngeyel arretengelew, ra antheyen Inweng Mwerr-angker ikwerenhnemew. Athap thweney-alpeyeh arrewantherr. Apmer nhenh iwerl-alhey-angenh. Mpwelhenh-arey, Inweng Mwerr-angker Akngeyel arrewantherr antheyew, arrenhantherrenh rlterrkeleyew." Alakenh-anyem Jesus ilelhenh kwertengerl ikwerenhnemew.

*Jesus irrwerl alpeyel Aynikw ikwerenhn-warl*

*(Mark 16:19-20; Acts 1:6-11)*

<sup>50</sup> Ikwer-penh Jesus-el kwertengerl ikwerenhnem atnwenhew Jerusalem-they apmer akely Bethany-ew-atety. Ikwer-itwew ra itep-atherr irrwerlerrew, Akngey-anem ayernemel, renh-rnem arntarnt-araynteyew. <sup>51</sup> Rarl alakenh ayernenh-penh, rap renh-rnem iwerlelpew-anem. Akngeyel renh irrwerl akngeynew, ikwer-itwel aney-alpeyew. <sup>52</sup> Jesus-anem rernem kwenerremel nakew. Akwenterl-alhemel rernem inkwerelhemel-anem alpew Jerusalem-warl. <sup>53</sup> Arlta arrpanenhel rernem aylpenh-anem tyaty ilkwewarl Jew-rnem-wenh-warl, Akngey nakaynteyew.

## John

### Angka mwerr-angker John-elarl ingkwernek Jesus-penhan

*John-el angka ingkwernek, arrwekeleny-kenh angka ayntenharl, rarl awek-penhan, ingkerrenhel Jesus renh iterl-aretyek. Akngey-kenh innigarl, rernem ingkerrenh itethirretyek ikwerenh-angkwarr. Jesus ran Akngey-kenh angkarl.*

#### *Angka mwerr itethiley-angker-penhan*

<sup>1</sup> Awank-akerr Akngeyant arrwekel anenh ahern-wenyankel. Akngey-kenh angkanem nenh arrwekel ayntehn arrpemarl. <sup>2</sup> Angka nenh Akngey-kenh arrwekelenyarl ayntehn. Irrkatty rey-antey ayntenhan, angka rarl Akngey anenh. <sup>3</sup> Ra arrwekel-antey anenh, ahern ingkerrenh arrpmerney-angenh-antey. Ingkerrenh ilek-ilek ra arrpmernek, angka ikwerenh-angkwarr. <sup>4</sup> Angka ikwerenh-angkwarr ra iterrek, ilek-ilek arrpmerneteyek. Anwantherr itethirretyek ikwer-angkwarrant. Angka ikwerenh-angkwarr ahern-areny ingkerrenhel renh iterl-aretyek. <sup>5</sup> Lyenenty impen ra aleth arrtyerneyel, ra anwekantherr lwewarrerneyel. Jesus-el arrtyerneyel iwerr, anwantherr arraty-angkwarr apenterl-ayntetyek. Ingwerel-rnem Akngey iterl-arey-angenharl, rernem atwemengkel-apenayarl alheyelan. Lyenenty nthakenh ilwerney-angenh-then, intem-antey alherneyel. Lyenenty ywerreyangarl, intem-antey arrtyerneyel. Ingkerrenhek anyent ra lyenenty-akert anwekantherr ingkerrenhek anem.

<sup>6-7</sup> Akngeyel artwa anyent thwenek angkakert, itnan ikwerenh John, iterl-apayntetyek Akngey-kenh angka. Artwa ingkern-they apetyem lyenenty-apeny, rernem renh arraty tnakayntetyek. <sup>8-9</sup> John ra apetyek angkakert arrwekel, ingkerrenh akaltyiletyek, lyenenty-akertarl apetyeyenih ingkern-they. Lyenentyel iwerr arraty arrtyernem-apeny, artwa John ranem apetyeyenih, iwerr anwekantherr arratyiletyek. Ra ahern nenh-itwek aremirek, ingkerrenhel Ingkart iterl-aretyek tnakayntetyek, arraty-angkwarr apenterl-ayntetyek.

<sup>10</sup> Akngeyel ahern nenh arrwekel arrpmernek angka ikwerenh-angkwarr. Angka ikwerenh ra kel apetyek ahern nenh-warl-anem. Ahern-areny-rnem apalarl anenh, iterl-arey-angenharl. <sup>11</sup> Ra apetyek, ikwerenh-rnem-itwek anetyek. Rernem renh tnakey-angenharl. <sup>12</sup> Ingwerel-rnemantarl renh tnakek, ikwer inkwerelhek. Ra iwerr mpwarek ikwer-rnem, rernem Akngey-kenh-rnem anayntetyek. <sup>13</sup> Akngey-kenh aler innga rernem aneyel, rernem ikwerenh-angkwarrant anetyek, ahern-areny-kenh-angkwarr-weny.

<sup>14</sup> Akngeyel angka ikwerenh thwenek, artwa ahern nhel arrernek ingkerrenhek, mwerr-angkwarr aneyek, arraty-angkwarr. Ra anwekantherr-itwel anenh. Anwenhantherr kel renh arek, Akngey-kenh rlterrk ilkwakert, Akngey-kenh Alerikw Impen.

<sup>15</sup> John ra angka anwekantherr ilek, rarl Jesus arlka anngetherr arek. "Weth atha arrwekelarl arrekantherr ilek-angkwarr, rarl ingkern-they apetyeyenih rlterrk ilkwakert. Ra anyent-tangkwel arrwekel anenh, atyeng-wenyankel. Aleyan ra anyent-anem rlterrk ilkwakert. Ayengan arrangkwarl, arwa angkakertarl."

<sup>16</sup> Akngey anwekantherr inkwerelheyl aleth-antey anwenhantherr ra arntartnareyel. <sup>17</sup> Awank-akerr Ingkart anwekantherr angka rlterrk awerr Moses-angkwarr. Ra Jesus-angkwarr lwewarrernelhek, rarl anwekantherr inkwerelheyl athamirremel. <sup>18</sup> Ingwerentyel Akngey arey-angenharl. Alerikw anyentelant renh arek. Ra ikwer-itwek aneyel, Akngey rapeny arrpemarl, iwerr anyent-antey. Ra angka Akngey-kenh ingkerrenh akalty-anthetetyek.

#### *John-el akngerr baptise-emileyel kwaty lher Jordan-itwek*

*(Matthew 3:1-12; Mark 1:1-8; Luke 3:15-17)*

<sup>19</sup> John ra lher Jordan-itwek anenh. Atyetyart-rnem Jew-rnem-kenharl Jerusalem-itwek rernem tyaty-areny-then warrkenh-rnem-then John-warl thwenek, lher Jordan-warl, renh ayernetyek, angwenharl ran. <sup>20</sup> Ranem ilelhek, "Ayengan Christ inngeweny, renharl Akngeyel awank-akerr ilek, renh thwenetyek ahern nenh-warl."

<sup>21</sup> Rernem renh ayernek arrpemarl, "Ngan ilekarl? Nganang angkakert Elijah-arl apeyalpek? Angkakert wethang ngan apey-alpek, Moses-elarl awank-akerr ilek?"

Ra tyernek, "Arrangkw."

<sup>22</sup> Rernem ayernek arrpemarl, "Ngan ilekarl? Ingwer-rnemel anwenhantherr thwenekarl, ngenh ayernetyek, ngan ilekarl."

<sup>23</sup> John ra tyernek, "Angkakert Isaiah-el alakenh awank-akerr ingkwernek, ayengarl apmer arlpaw-itwek arlkeyenh, 'Iwerr arratyiletyek Ingkartek.'"

<sup>24-28</sup> Artwa Phariee-rnem apetyek arrpemarl lher Jordan-warl, apmer Bethany-warl. Rernem renh ilek, "Ngan arrangkwarl, Christ-wenyarl, angkakert Elijah-wenyarl, angkakert ingwer-wenyarl. Angwenhel ngenh thwenek ingwer-rnem baptise-emiletyek?"

John-el renh-rnem ilek, "Athan kwaytelant renh-rnem baptise-emiletyek. Aleyan arrekantherr-itwek ingwer aneyel, arrantherr renh iterl-arey-angenh. Ayengan arrwekel ikwer-they apetyek. Ayeng arrangkwarl, ra atyeng-angkwarr ilkwarl."

*Jesus ra Akngey-kenh yep-yep akely-apeny*

<sup>29</sup> Arla ingwerel John-el Jesus renh arnarek, rarl apetyen. Ranem ingkerrenh ilek, "Arenherr-arey! Artwa nhenh Akngey-kenh yep-yep akely ra! Ingkerrenh-they apmwa iwey-angker."

**Anayntileyl:** *Yep-yep akelyarlap ran. Ingkerrenh-they apmwa iwey-angker. Yep-yep inngarl rernem atwenh arrwekeleny-rnemel. Yep-yep akely arrpemarl. Irrwerl-areny-kenh. Arlkan menty anthelhek arrpemarl. Alakenh John-el renh antwenh.*

<sup>30</sup> "Weth atha arrwekel arrekantherr ilek, 'Artwa ra atyeng-they ingkern apetyem, ra atyeng-they rlterrk inngarl. Ra arrwekel aneh apmelerr, atyeng-wenyankel.'

<sup>31</sup> Arrwekel atha renh iterl-arey-angenh-antey. Aleyan atha renh iterl-areyel-anem. Ayengan kwaytelant baptise-emiley-angkerarl, atha Jesus-kenh angkanem iletyek Israel-kenh ingkerrenh."

<sup>32-33</sup> John-el renh-rnem ilek, "Akngay ra ayen arrener, ingwer-rnem baptise-emiletyek kwaytel. Ra ayen ilek arrpemarl, 'Ntwa artwa anyent areyen Itnweng Rlwart ikwer-itwek arrernelheyen, antelhemel. Itnweng ranem ikwer-warl antelhetyek aylpeyeh, ntwap renh iterl-areyeh Akngey-kenh Artwa Impen anyent Itnweng arrerney-angker. Itnweng Rlwart arrekantherr-warl-anem antelhetyek arrpemarl.

<sup>34</sup> Athanem renh anngetherr arek, ayeng ikwer akaltyan, artwa Akngey-kenh alerikw rarl!"

*Jesus-el Peter-atherr rlwaneyel, ratherr kwertengerl anetyek*

<sup>35</sup> Arla ingwerelan John Bethany-itwek aneh-antey, kwayt lher itnan Jordan akngerrakw-ampenyel. Kwertengerl atherr ikwerenhanen arrpemarl. <sup>36</sup> John-el Jesus intwarek, anper-anteyarl alhek. Ra angkek, "Arenherr-atherray, artwa Akngey-kenh yep-yep akely!"

<sup>37</sup> Kwertengerl ratherr John awek-penh, ratherr Jesus ingkern-they apetenhek.

<sup>38</sup> Jesus-el renh-atherr artepang arek, ratherrarl renh apetenhek. Rap angkek, "Ya, ilekek?"

Ratherr ayernek, "Akalty-anthenh-anthenhay, apmer nthenh-itwek ngan ayntem?"

<sup>39</sup> Ra renh-atherr ilek, "Aretyek apetyenherr-atherr." Ratherr-anem apmer ikwer-itwek aney-alhek atwerrpek-atwety. <sup>40</sup> Kwertengerl anyent Andrew, Simon Peter-kenh aytayikw. <sup>41</sup> Andrew Simon Peter ikwer nthwenh. Renh arey-alhemel ra renh ilek, "Aray! Christ-arl aylern arek." <sup>42</sup> Ranem Simon renh Jesus-warl atwenhek. Simon arnterr aremel, Jesus-el renh ilek, "Itnan ngkwenh Simon-arl. Ngan John-kenh alerikwarl. Athanem ngenh Peter itneweyel."

*Jesus-el Philip-atherr Nathanael-atherr rlwaneyel*

<sup>43</sup> Arla ingwerelan Jesus Galilee-ampeny-warl alhek. Ra Philip arey-alhek. Jesus-el renh ilek, "Nga atyeng-angkwarr apetyay."

<sup>44</sup> Philip ra Bethsaida-areny aneh, Andrew-atherr Peter-atherr ratherr tawen ikwer-areny arrpemarl. <sup>45</sup> Philip-el Nathanael renh arey-alhek, ra renh ayernek-anem, "Artwa nhenh apetyey-alenty Moses-el angka arrwekel ingkwernek, angkakert ingwer-rnem arrwekel ingkwernek arrpemarl, ikwer-wenyankel. Jesus apmer Nazareth-areny, Joseph-kenh alerikw."

<sup>46</sup> Nathanael-el renh ayernek, "Artwa mwerrang Nazareth-areny ran apetyek? Ar-rangkw apek."

Philip-el renh ilek, "Kel aretyek apetyay!"

<sup>47</sup> Jesus-el Nathanael arnarenh rarl apetyen ikwer-warl-athek, ra ingwer-rnemek angkek, "Artwa yanh Israel-areny iylpareth, apmwewenyarl!"

<sup>48</sup> Nathanael-el renh ayernek, "Nthakenh ntwa ayenhan iterl-areyel?"

Jesus-el renh ilek, "Atha ngenh arrwekel-antey arek awank-antey, Akngey-kenh arawerrng-akertel. Nga arwerl tywerrk lytwenty-itwek aneh. Philip-el ngenh ikngwey-angenh-antey."

<sup>49</sup> Nathanael-el ilek, "Akalty-anthenh-anthenhay, nga Akngey-kenh alerikw, Israel-kenh atyetyart nga aneyel."

<sup>50</sup> Jesus-el renh ilek, "Atha ngenh arek tywerrk lywel anerl-anenty arrwekel. Ntwa ayenh tnakeyel ayeng Akngey-kenh rlterrk-akert? Kel mwerr. Ingwer-inger ntwa ayenh areyehn rlterrk ilkwakert-anemarl.

<sup>51</sup> Atha ngenh arraty ileyel, ayeng Akngey-kenh Artwa Impen. Ingwer-inger arrantherr alkeran areyehn, alker altyewirrenty. Ikwer-they ntwa ayenh areyehn irrwerl-arenyrem artarn-akemel angkepelarreng atwarrenhey-alhemel nganeynemel arrpemarl latangkwarz atyeng-warl."

## 2

### *Jesus-el kwaty-penh wayn mpwareyel*

<sup>1-2</sup> Arlta atherr-penh Jesus kwertengerl ikwerenhnem-akert alhek tawen Cana-warl, Galilee-ampeny-warl, artwethen arelh-then itengerrenty aytaretyek. Jesus-kenh amikw alhek arrpemarl. Akngerr akarirrek amern kwenty arlkwetyek. Rernem ingkerrenhek yangkelek arrwekel-antey, amern akngerr arlkwetyek. <sup>3</sup> Kel wayn ywerrek, arrangkw-anem. Amikw Jesus-kenh ikwer-warl angkek. "Arrangkw. Wayn ingweran ntwa iney-angenh-anteyarl."

<sup>4</sup> Jesus ikwer-warl angkek, "Menty. Alerl-antey. Ingwer-ingerant arlta atyehel, atha ilek-ilek mpwaretyek, rernem ayenh iterl-aretyek-anem."

<sup>5</sup> Amikwel warrkenh-rnem ilek, "Awelhennherr-arey ampa atyehel, rarl arrenhantherrenh ilem."

<sup>6</sup> Ampwal apwert-penh kwatyek-arelh ilkwerenem rtenh 6 warl kwenel, ingkerrenh-antey iltya lhewelhetyek, amern arlkwey-alenty, angka Jew-rnem-kenharl arrwekel ayntenh-angkwarz. Kwatyek-arelh ilkwa 100 litres-ek-arelh. <sup>7</sup> Jesus angkek warrkenh-rnemek, "Kwaty inpenherr-arey ampwal-rnem-warl arriwek-atwety." Warrkenh-rnemek kwaty inpek, ampwal-rnem-warl. <sup>8</sup> Jesus-el warrkenh-rnem ilek arrpemarl, "Kwaty akely tyampit-warl thelenherr-arey, atyetyart ikwer-warl akngemel." Rernem Jesus ikwer awelhek. <sup>9</sup> Kwaty ra wayn-anem irrek, Jesus-angkwarz. Warrkenh-rnem rernem tyampit akely-warl thelek-penh, rernem waynek akaltyarl. Atyetyart ra kwaty akely-penh wayn-anemarl antywek, akwerpel. Ikwer-penh atyetyart arlek artwa anyent ikwer itengirrey-alenty ikwer. <sup>10</sup> Atyetyart apal angkek, "Wayn nhenhan mwerr-angkerarl. Wayn mwerr-angker nga awakelhek ingkernant ingkerrenhel antywetyekarl! Wayn apmwamwam antywey-angenh arrangkw. Wayn irrkweny antywey-angenh. Ingwer-rnemel wayn mwerr-tangkwel anthetyek, wayn akngerr rernem antywetyek. Rernem wayn mwerr ywerrelhilenty, anwantherr wayn apmwa renh anthetyek."

<sup>11</sup> Jesus-el kwaty-penh wayn mpwarek tawen Cana-itwek apmer Galilee-ek, rlterrk ilkwakertel, kwertengerl ikwerenhnem-akert renh aretyek. Rernem Jesus renh tnakekanem rlterrk ilkwakert. <sup>12</sup> Arlta ikwer-penh Jesus tawen ilkwa Capernaum-warl alhek kwertengerl ikwerenhnem-akert. Amikw-then atyeyikw-rnem-then alhek ikwer-angkwarz. Rernem tawen Capernaum-itwek aney-alhek arlta irrpetyel.

### *Jesus alheylel Jew-kenh tyaty ilkwewarl*

(Matthew 21:12-13; Mark 11:15-17; Luke 19:45-46)

<sup>13</sup> Arlta impen arrer-anem tyenkerr Anperarl Alhek "Passover" rernem arlkwetyek, Jesus kwertengerl ikwerenhnem-akert alhek Jerusalem-warl. <sup>14</sup> Rap Jew-rnem-kenh tyaty ilkwewarl aketh-ampeny-warl alhek Ra arey-alhek rernemarl pwelek-rnem yep-yep-rnem-then thip rwelyarr-rnem-then tharleminenh. Ra arek artwernem man-angketyarr taypel-itwek anerl-anenty, man change akngerr-akert. <sup>15</sup> Jesus ra arek-penh, ra ikwer-rnem ahelirrek, rernemarl apmwel-areth Akngey-kenh warl-itwek tharleminenh aker ilek-ilek. Whip ra mpwarek rwep-penh. Artwernem tyaty theyra irrentek yep-yep-rnem-then pwelek-rnem-then, taypel-rnem akngartewemel, man-angketyarr. Man arlperryt iwek. <sup>16</sup> Artwa thip-akert-rnemek ra arlek, "Thip-rnem arleng akngeynenherr-arey! Nhenhan Akngey atyehn-kenh warlarl. Arrantherr store-anem arrernek apmer nhenh-itwek apmer impen Akngey-kenh!" <sup>17</sup> Kwertengerl-rnemel awek-penh, rernem iterl-arek angka Akngey-kenh arrwekelenyarl ayntenh, "Ayeng arraty iterreyel warl ngkwenhek, warl menty artehl-aynteyek. Ayeng ahelirrek apmwel-arethal-anem anew-anen, angka Akngey-kenh iley-angker."

<sup>18</sup> Jew-rnem-kenh atyetyart-rnemel Jesus arek, rarl ingkerrenh irrentek tyaty ilkwethey, rernem apetyek renh ayernemel, "Akngeyelang ngenh ilanthek, ntwa ingkerrenh tyaty ilkwethey irrentetyek? Arrangkw apek." Rernem alakenh renh ayernek, ikwer irrpeltherremel.

<sup>19-21</sup> Jesus-el renh-rnem tyernek, "Arrantherry tyaty renh atakenty, atha angkep arrpemarl arteyenh ingwa atherr-penh." Atyetyart-rnemel Jesus-kenh angka iterl-arey-angenh. Rernem apal angkerrenh tyatye kang angkerl-anentyek-athen. Ran ingwer-angkwarr angkek. Ran arraty ilelhey-angenh, ingwa atherr-penh ra itetherrenhey-alpeyenh, arlkawm-werr-akert-anem. Atyetyart Jew-rnemel renh ilek, "Nthakenh ntwa warl renh angkep arteyenh arrpemarl ingwa atherr-penh? Warrkenh-rnem aherrety 46-ek-atwtye warrkirrenh awank-akerr, tyaty nhenh artetyek!" <sup>22</sup> Ingkartel Jesus renh itethilek-penh, kwertengerl-rnemel rernem angka arrwekeleny Akngey-kenh renh iterl-arek-anem, "Wethip ra anwekantherry awank ilelhek wenh! Inngarlap ran ilelhek angkeparl itethirreyen!"

*Jesus-el ingkerrenh iterl-areyel, rernemarl iterreyel*

<sup>23</sup> Jesus ra Jerusalem-itwek-antey anenh. Amern Anperarl Alhek "Passover" tyenkerr rernem arlkwenh. Akngerrel Jesus renh arek, rernem renh tmakek-anem rlterrk ilkwakert. Rernem angka arrwekeleny-they renh iterl-arek-anem. <sup>24-25</sup> Jesus-el arek, rernemarl renh apentenh. Rap iterremel ament angkek, "Rernemarl ayenh apenteyenh angath-antey, ikwer-penh rernem atyengety ipmelheyen-h-anem." Ra ikwer-rnem awelhey-angenh. Jesus-el arrwekel-antey renh-rnem iterl-arenh, rernemarl iterremel renh apentenh.

### 3

*Jesus-el Nicodemus akalty-antheyel*

<sup>1</sup> Artwa anyent Pharisee itnan ikwerenr Nicodemus. Ra Jew-rnem-kenh council anenh, artwa ilkwa. <sup>2</sup> Ra Jesus-warl apetyek ingwel irrtyertel, ingwerel-rnem renh intwarekerr. Ra Jesus-warl angkek, "Inkart inngarl ngan! Anwantherran ngenh iterl-areyel, ngenharl Akngeyel thwenek ahern nhenh-warl, ntwa ingkerrenh Akngey-kenh angka akalty-antheyek. Ntwa ilek-ilek mwerr-angkwarr mpwareyel, alakenh-anyem anwantherran ngenh iterl-areyel, Akngeyelarl ngenh rlterrkileyel."

<sup>3</sup> Jesus-el renh tyernek, "Atha ngenh arraty innga ilem, Nga Akngey-kenh-angkwarr aylpenty, ngap irrngarl arrpemarl ayntem."

<sup>4</sup> Nicodemus-el apatemel ayernek, "Nthakenharl ayeng irrkngarl arrpemarl aynteyenh. Kel ayeng ikwerrek!"

<sup>5</sup> Jesus-el renh tyernek, "Atha ngenh arraty innga ilem, nga kwaty-angkwarr Itnweng-angkwarr itethirreyek, nga irrngarl arrpemarl ayntem, Akngey-kenh-angkwarr aylpenty. <sup>6</sup> Arlkawm itethirrem arrwekel arwa ahern-areny-angkwarr, amikw-angkwarr, aynikw-angkwarr. Akngey-kenh ament arrpemarl, Itnweng-angkwarrant itethirrem. <sup>7</sup> Nga atyeng arraty awelhetyek, ywarn iterrey-angenh atharl ngenh ileyel-angkwarr innga. 'Nga irrngarl ayntetyek arrpemarl.' <sup>8</sup> Aweran arwa alhewer-angkwarr pweyel. Ntwa awer aweyel, ntwa iterl-arey-angenh nthenh-they ra apetyeyel. Renh iterl-arey-angenh arrpemarl nthenh-angkwarr ra pweyelan. Alakenh-anyem anwantherr iterl-arey-angenh, nthenh-angkwarr Itnweng Rlwart ikwer-warl apetyem, renh lyertenylem, artwa-anem ra irrngarl ayntem-anem ampa akely-apeny Itnweng Rlwart-angkwarr."

<sup>9</sup> Nicodemus-el Jesus renh ayernek, "Nthakenharl alakenhan?"

<sup>10</sup> Jesus-el renh ilek, "Ngan akalty-anthenh-anthenh inngan Israel-areny-rnem-kenharl. Ntwa angka nhayneman iterl-arey-areny! <sup>11</sup> Atha ngenh arraty innga ileyel. Anwantherry anngetherr arek arrpemarl. Atha iterl-areyel arraty angka irrwerl-areny-kenh-angkwarr, atyehnel-rnem iterl-areyel arrpemarl. Arrantherran anwekantherry awelhety-angenharl. <sup>12</sup> Atha angka ahern-areny-kenh ngkweng anayntilek. Atha angka ahern-areny-angkwarr anayntilem ngkweng, nga atyeng awelhety-angenharl. Nthakenhan ntwa iterl-areman, atharl angka irrwerl-areny-kenh anayntilem?

<sup>13</sup> Ahern-areny apmer irrwerl-itwek aney-angenh. Artwa Impen Akngey-kenh rant akalty irrwerl-arenyek. Anyent ran irrwerl-they apetyek. <sup>14</sup> Moses-elarl ampwal rtnwem-arpantey irrwerlilek apmer arlpaw-itwek, alakenh-anyem artwernemel Artwa Impen Akngey-kenh irrwerlileyenh arrpemarl. <sup>15</sup> Ingwer-rnem ikwer awelhenty, rernem iteth intem-anteyaneyen."

<sup>16</sup> Akngey ingkerrenhek artewentyel ilkelheyel ahern nhenh-areny-rnemek. Rarl alerikw anyentik ikwerenr arwa alhewer-antey thwenek ahern nhenh-warl. Ingwerentyel ikwerenr-angkwarr apenty, rap iteth intemaneyen, ilwey-angenh.

<sup>17</sup> Akngeyel alerikw ikwerenr thwenek ahern nhenh-warl, ra ahern-areny ingkerrenh itethiletyek, apmwer nem akngakey-angenh. Akngey ilkelhek, ra ingkerrenh iteth atyenyenetyek alerikw ikwerenr-angkwarr. <sup>18</sup> Rernem alerikw renh tnakenty, Akngeyel

nthakenh renh-rnem ayerney-angenh, court-emiley-angenh. Ikwer awelhey-angenh-rnem rernem apmwangkwarr alheyel. Akngeyel renh-rnem ayerneyen, rernemarl Akngey-kenh Alerikw Impen renh tnakey-angenh.

<sup>19-21</sup> Alakenh-anyem ra aynteyel, apmwangkwarr aneyel-rnem lyenenty-kety arlkarirreyel. Rernem lyenenty-warl apetyey-angenh, ingkerrenhel renh-rnem arekerr. Akngeyel renh-rnem akngakeyenh, rernemarl apmwangkwarr apentyel. Ahern nharenry-rnem apmwel-areh aneyel-rnem atwemengk-angkwarr anew-aneyel-rnem-warl, Lyenenty Akngey-kenh-akert ahern nhenh-warl apetyek. Ingwer-rnem arraty-angkwarr apentyel-rnem rernem ilek-ilek mwerr-angker mpwarek Akngey-kenh-angkwarr. Rernem lyenenty-warl apetyem, ingwerel-rnem aketh arem, ilek-ilek mwerr-angkwarr rernem mpwarek."

### *John Baptise-emeley-angker ra Jesus-penh ileyel*

<sup>22</sup> Ingwer-inger Jesus kwertengerl ikwerenrh-rnem-akert apmer Judea-ampeny-warl alhek. Jesus apmer ikwer-itwek aleth-antey aneh kwertengerl ikwerenrh-rnem-akert. Rernem ingkerrenh baptise-emelek. <sup>23-24</sup> Artwa ahelelgkwell John Baptise-emeley-angker renh tyayl-warl akwerney-angenh-antey. John ra ingkerrenh baptise-emelek arrpemarl apmer Aenor-itwek, apmer Salim-they arrer-antey, kwaty-angketyarr-itwek. Akngerr John-warl apetyenh, ra renh-rnem baptise-emeleyek. <sup>25</sup> Jew anyent kwertengerl John-kenh-rnem-warl apetyek. Ra renh-rnem iltey-alhek, "Arrantherr ilyta atherr lhewelhey-areny amern arlkwey-alenty. Moses-kenh angka aynteyel-angkwarr, ilyta atherr lhewelhetyek!"

<sup>26</sup> John-kenh kwertengerl-rnem ikwer-warl alhek, "Akalty-anthenh-anthenhay! Artwan weth ntwa iterl-areyel? Nga ikwer-itwel anenharl lher Jordan-itwek intwar-ampeny, ntwap ingkerrenh-anem ikwer akalty-anthek. Aley ra ingwer-rnem baptise-emeiley. Ingkerrenh ikwer-warl akarirreyel!"

<sup>27</sup> John-el renh-rnem ilek, "Akngeyelant renh rlterrkilem. Alakenhaym ra renh-rnem baptise-emelem, Akngey irrwerl-areny-kenh-angkwarr. <sup>28</sup> Arrantherr kel akalty, atharl arrenhantherr ilek, 'Ayengan inngewenyarl, Christ-wenyarl. Akngeyel ayenh arrwekel-antey thwenek, artwa ingwer-rnem atha angka ileyek, rernem ikwer mpwelhetyek, ra apetyentyek.' Alakenh-anyem atha arrekantherr arrwekel ilek. <sup>29</sup> Artwa anew ikwerenhwarl itengerrenty, rernem ikwerenrh-rnem akarirrem aytaretyek, inkwerelhemel. Ikwerenrh-rnem artwa ikwer inkwerelhem, rarl itengerrekek. Alakenh-ampeny ayeng Christ ikwer inkwerelheyel. <sup>30</sup> Innga, Akngey ra anyent renhant ingkerrenhek arrernek, ra atyetyart impen anetyek, atyeng-ampeny-weny. Ayengan akelye-awatyarl." Rernem ikwerant-anem inkwerelhetyek. Alakenh John ikwer-rnem illelhek.

### *Ran alker-areny*

<sup>31</sup> John angkek arrpemarl, "Anyent ran irrwerl-they apetyekan, ra atyetyart ingkerrenhek aneyel. Ayengan ahern-areny arwarz. Atha angka ileyel arwa ahern nharenryarl. Anyent rarl alker-they apetyek, ran atyetyart ingkerrenhek arl ahern-areny-rnemek-then irrwerl-areny-rnemek-then. <sup>32</sup> Irrwerl-areny anyent ra Akngeyek akalty. Artwa ahern-areny-rnem ikwer awelhey-angenharl. <sup>33</sup> Ingwer-rnem angka ikwerenhek awelheyel. Rernem Akngey renh arraty iterl-areyel tnakemel-anem alakenh, 'Akngey inngan'. <sup>34</sup> Irrwerl-areny anyent ran, Akngeyel renh thwenek, Itnweng Rlwart ikwer-warl arrernek. Alakenh-anyem-they alerikw ra Akngey-kenh angka innga ilerl-apeyel, Itnweng ikwerenhwakert.

<sup>35</sup> Akngey ra alerikw ikwerenhek inkwerelheyel, ra alerikw ikwerenhwakert ingkerrenh anthek, atyetyart anetyek ahern-areny-rnemek, irrwerl-areny-rnemek. <sup>36</sup> Rernem alerikw renh tnakenty, rernem intem-antey iteth aneyenh. Rernem ikwer irrpelthirrenty, rernem nthakenh iteth intem aney-angenh. Akngeyel renh-rnem ipmek atwewayen aleth-antey."

## 4

### *Jesus arelh Samaria-areny-warl angkeyel*

<sup>1</sup> Ingwer-ingeran, akngerelarrel Jesus-angkwarr alhenh, rernem baptise inetyek Jesus-kenh-angkwarr. Pharisee-rnemel awek, irrpetyapellant John-angkwarr baptise inenh. <sup>2</sup> Jesus-el baptise-emeley-angenh renh-rnem. Kwertengerl ikwerenrh-rnemelant renh-rnem baptise-emeilenh. <sup>3</sup> Jesus-el awek-penh, Pharisee-rnemarl ikwer angkerrenh, ra Judea-ampeny-they alpek, apmer Galilee-ampeny-warl arrpemarl ikwer-rnem-kety. <sup>4</sup> Ra apmer Samaria-ampeny-angkwarr alpek. <sup>5</sup> Ra Samaria-ampeny-warl irrenhek, tawan anyent-warl itnan ikwerenhwakert Sychar. Sychar-they arrer-antey apmer ran,

arrwekeleny Jacob-elarl alerikw ikweren Joseph apmer antherlelpe. <sup>6-8</sup> Kwaty ngenty ikwer-itwek anen. Apmer-areny-rnemel itnewek Kwaty Jacob-kenh. Jesus alhengkerirrek-anem, ingkel ra arlengel alhenh. Kwaty ngenty-arrangarr irrkerel ra anen. Ingkeny irrwerlel-antey. Kwertengerl ikweren-rnem arrwekel-antey alhek tawen-warl, amern payemeleyek. Arelh Samaria-areny kwaty iylpwert ikwer-warl apetyek, kwaty inpeteyek. Jesus inkek ikwer, "Kwaty ayen antha, atha antywetyek."

<sup>9</sup> Arelh apatemel angkek ikwer-warl, "Ngan Jew-arl, ayengan arelh Samaria-arenyarl. Nthakenh nga atyeng inkeyel, atha kwaty anthyetek, ntwa antywetyek?" Jew-rnem-kenh-angkwarr angka aytneyel, nthakenh amern arlkwey-angen Samaria-areny-rnem-itwek. Rernem amern amenterrpant arlkwenh. Alakenh-they ra apatek, Jesus-elarl ikwer inkek, kwaty antywetyek.

<sup>10</sup> Jesus-el renh tyerne, "Akngay ilkelheyel-angkwarr ament arrpemarl, arrantherr renh iterl-arey-angen, ilek-ilek anthey-angker. Ntwa ayen iterl-arey-angen-antey. Nga atyeng inkenty, atha kwaty impen ngenh anthem, kwaty impen itethiley-angker innga."

<sup>11</sup> Arelh ranem ikwer-warl angkek, "Atyetyartay! Ngenty kwaty-itwel yhanan kwen innga. Ampwal ngkwenh arrangkwarl kwaty inpeteyek. Nthenh-itwek ntwa impem, kwaty itethiley-angker? <sup>12</sup> Artwa arrwekeleny anwernekantherr Jacob ran ngenty angernek, ra kwaty antywenn ikwer-penh, alerikw-rnem-then atnwenth-rnem ingkerrenh anthwengilenh. Nganang ilkwa Jacob-angkwarran?"

<sup>13</sup> Jesus-el renh tyerne, "Ingwerentyl ngenty nhenh-penh antywenty, rap angkep angkethakw irrey nem. <sup>14</sup> Ingwerentyl kwaty impen antywenty, kwaty atharl anthem, rap anthweng intem-antey anem. Kwaty impen antywenty, nganem iteth intem-antey Akngay-kenh-angkwarr aneyen."

<sup>15</sup> Arelh angkek, "Atyetyartay, kwaty antha, ayeng anthweng intem anayntetyek, ayeng angkepelarreng ngenty nhenh-warl apey-alperl-anekerr."

<sup>16</sup> Jesus-el arelh renh ilek, "Ntwang anewengkw ngkwenh ikngwerl-alpa."

<sup>17</sup> Ra tyerne, "Ayengan anewek arrangkwarl."

Jesus angkek ikwer-warl, "Nga arratyarl ilelheyel, anew-akert-weny. <sup>18</sup> Ngkwenh anewengkw 5-pel arrwekel anen. Aley-anem nga artwa ingwer-itwel arwapeny aneyel. Ngarl atyeng ilelhekk arratyarl."

<sup>19</sup> Arelh angkek, "Atyetyartay, atha ngenh iterl-areyel, ngan Ingkart-kenh angkak-ertarl. <sup>20</sup> Arrwekeleny-rnem apwert Gerizim nhenh-warl akarirrenh Ingkartek kwenirrelyek. Arrantherr Jew-rnem Jerusalem-warl alhetyek, Ingkartek kwenirremel inkwerelhetyek. Nthenh ra Ingkart-kenh apwert aknganenty innga anwantherr ikwer kwenirrey-alhetyek, arratyek-ayteng? Apwert Gerizim apek? Apwert Jerusalem-itwek apek?"

<sup>21</sup> Jesus-el arelh renh tyerne, "Atyeng awelha. Ingwer-ingeran ingkerrenharl apmer arrpanenhel rernem Akngayek kwenirreyen arraty-angkwarr, apwert Gerizim-wenyant-anem Jerusalem-wenyant-anem. <sup>22</sup> Samaria-areny arrantherr arraty-angkwarr apentyang-angen. Alakenh-anyem anwernantherr Jew-rnemel iterl-areyel Ingkart-angkwarr arraty apenterl-ayntetyek. Anwernekantherr Ingkartel arrwekel-antey angka arrerne, angka ikweren arlpimpiletyek, anwekantherr-angkwarr, Jew-rnem-angkwarr. <sup>23</sup> Aley-anem, ingkerrenhel renh tnakerl-ayntetyek inkwerelhemel innga itnweng ikwer anthelhetyek. Aleyan Akngay-kenh Itnwengel renh-rnem Akngay-kenh angka akalty-anthetey-antey, rernem renh arraty-angkwarr apenterl-ayntetyek, akalty anayntetyek iterl-arem. Akngay arlkwenteyel, alakenh-anyem rernem inkwerelhetyek ikwer. <sup>24</sup> Akngayearlap Itnwengan. Akngay apentyel-rneman itnweng anthelhetyek, renh tnaketyek innga. Itnweng Rlwartel renh-rnem akalty-antheteyel."

<sup>25</sup> Arelh angkek, "Atha Christ renh iterl-areyel, Akngayel awank-akerr arrwekeleny-rnem ilek, renh thwenetyek ahern nhenh-warl. Ra apetyentyl ra anwekantherr ingkerrenh-anem anayntileyenh."

<sup>26</sup> Jesus-el renh ilek, "Ayengarl ran anyent angkeyel ngkweng-warl, Christ innga rey-antey ayeng."

<sup>27</sup> Kwertengerl ikwerenhel-rnem arey-alpek renh, rarl arelh ikwer-itwel angkenh-antey. Rap renh-rnem apatel-anthek. Rernem angkerrenh, "Ilek arelh ran Jesus ikwer-warl angkeyel?" Rernem Jesus renh ayerney-angen arrangkw.

<sup>28</sup> Arelh ra ampwal kwatyek-arelh iwerl-alhek, tawen-warl-anem alpek. Ra tawen-areny-rnem-warl angkek, <sup>29</sup> "Apetyenherr-arey, artwa nhak aretyek, ra ingkerrenh iterl-areyel, atharl mpwarek. Artwa ran Christ apek, Akngayelarl arrwekeleny-rnem ilenh, renh thwenetyek ahern nhenh-warl?" <sup>30</sup> Rernem tawen-they anperlarr-alhenn. Rernem Jesus-warl-athek apetyen, renh aretyek.

<sup>31</sup> Kwertengerl-rnem angkek, “Akalty-anthenh-anthenhay, amern arlkway!”

<sup>32</sup> Ra angkek ikwer-rnem-warl, “Atha amern impen atnyeneyel, arrantherr iterl-arey-angenharl.”

<sup>33</sup> Kwertengerl-rnem ayernerrenh, “Ingwerentyel apek amern akngetyek ikwer.”

<sup>34</sup> Jesus angkek, “Ayeng amernekant iterrey-angenh. Atha warrk renh ywerrelhiletyek Akngeyek, rarl ayenh warrk anthek. Alakenh-anyem ayeng Akngeyek warrkirreylek, ayeng rlterrk anayntetyek, amern akngerr atha arlkwenty-penh-apeny.

<sup>35</sup> Ntang weyt arrantherr twenty lyapelhiletyek. Ikwer-penh arrantherr ileyl, ‘Anantherr alkent 4-pel-penh amern weyt renh-rnem ampeng-anem akaltheyen.’ Amern weyt mpwelheyel, anwantherr renh akalthetyekan. Arrantherr ingkerrenh-angkwarr arenherr-arey! Akngerr mpwelheyel. Akngerr mpwelheyel, renh-rnem Akngey-warl akarrileyek.

<sup>36-37</sup> Amern weyt rernem lyapelhilek, artwa anyentel ntang weyt-rnem arlperry iwek. Ntang weyt lyapek, amern-akert irremel, artwa ingwer apetyek, ra amern weyt ampeng-rnem akeynetyek-anem arlenyarl irrek. Ratherr atherr-antey inkwerelhek amern-rnemek. Angka arraty innga aynteyel: ‘Artwa anyentel ntang weyt iwerl-apenh, artwan anyent ingwerelan amern weyt akaltherl-apenh ingkern-theyarl.’

**Anayntileyel:** *Ntang weyt Ingkart-kenh angkapeny. Alakenh-anyem artwa anyent ingwerelan angka Ingkart-kenh ilerl-apenh arlperryilemel, artwel ntang arlperry iwek-apeny. Artwa anyent ingwerel ingkerrenh akarrilem. Ingkart-warl artwa akalthe-angker ra ntang akarrilek-apeny. Alakenh artwa atherr-antey inkwerelhem Akngeyek.*

<sup>38</sup> “Alakenh-anyem atha arrenantherr ilantheyel, arrantherr ingkerrenh akarriley-halpetyek Akngey-warl. Arrantherr warrk Ingkart-kenh ingkerrenh mpwarey-angenh, arrangkw. Arrantherr alyepelant warrkenh, arrantherr artwernem arwapeny ikngwek Ingkart-warl-athek. Ingwer-rnem arrwekel-antey artewentyel Ingkartek warrkirrenh. Rernem ingwer-rnemek Ingkart-kenh angka ilerl-apenh. Arrantherr warrk ywerrelhilekant.”

<sup>39</sup> Samaria tawen ikwerel, arelh ikwer-rnem ilelhek, “Jesus-el angka atyeng ingkerrenh arraty-antey ilek, ayengarl arrwekel anenh-angkwarr-antey, anew akngerr-akert, mpweneys-awarr.” Rernem angka awek-penh rernem Jesus-ant-anem apenteh.

<sup>40</sup> Samaria-areny-rnem Jesus ikwer-warl apetyek. Rernem renh ayernek, ra apek apmer ikwer-rnem-kenh-itwek anetyek. Ra arla atherr-inger anenh ikwer-rnem-itwek.

<sup>41</sup> Ra renh-rnem Ingkart-kenh angka akalty-anthek. Samaria-areny-rnem ingwer-rnem aknggerel-anem Jesus renh apentek.

<sup>42</sup> Rernem arelh ikwer-warl angkek. “Anwernantherr angka ngkweng-they iterl-arey-angenh. Anwernantherr renh iterl-areyel anngetherr-penhel, anwantherr ikweren-angkwarr apentyel-anem. Anwernantherr iterl-areyel-anem, artwa nhennan ahern-areny ingkerrenh itethiley-angker innga.”

*Jesus-el atyetyart ilkwekenh alerikw mwerrileyel*

(Matthew 8:5-13; Luke 7:1-10)

<sup>43-44</sup> Jesus Samaria-areny-rnem-itwek anenh arla atherr-inger. Ra kwertengerl ikweren-rnemek angkek, “Ingwer-rnemel ayenh tnakeyel, atyenh-rnemel ayenh tnakey-angenh.” Ikwer-penh Jesus kwertengerl ikweren-rnem-akert Galilee-ampeny-warl alhek. <sup>45</sup> Jesus Galilee-ampeny-itwek aremirrey-alhek, ingkerrenh ikwer inkwerelhek arnekkirremel. Galilee-areny-rnemel arrwekel-antey rernem ikwer inkwerelhek, rernemarl renh arrwekel arek, rarl ilek-ilek mpwarenrlterrk ilkwakertel, tyenkerr Anperarl Alhek “Passover” arlkwenh-angkwarr Jerusalem-itwek.

*Jesus-el avey arntety-penh mwerrileyel*

<sup>46</sup> Ikwer-penh Jesus Cana-warl alpek, tawen irrikaty-warl ra arrwekel kwaty-penh wayn-anem akngartewek. Tawen Capernaum-itwek atyetyart anyent anenh. Alerikw ikweren arntety innga rwenp aynteh. <sup>47</sup> Atyetyart ra awek, Jesus Cana-itwek anenharl. Ra ikwer-warl alhek, renh ikngwetyek. Renh arey-alhek, ra renh artewentyeltyek ayernek, ra ikwer-angkwarr alhetyek, avey arntety renh mwerrileyek. “Apetya atyeng-angkwarr alerey atyenh mwerrileyek. Ra ilwekerr apek.”

<sup>48</sup> Jesus artwa ikwer angkek, “Arrantherr ayenh arenyelant, atha ilek-ilek mpwarem rlterrk ilkwakertel, arrantherr ayenh tnakem. Arrangkwelan, arrantherr ayenh tnakey-angenharl!”

<sup>49</sup> Artwa ra ikwer angkek arrpemarl, “Atyetyartay, kel mwerr! Atyeng-angkwarr apetya, alerey atyenh ilwekerr!”

<sup>50</sup> Jesus ikwer-warl angkek, “Apmer ngkwenh-warl alpa, alerengkw ngkwenh mwerrirrem.”

Artwa ra Jesus ikwer innga awelhek. Ra apmer-warl alpek.

<sup>51</sup> Arlta ikwerel-antey, warrkenh artwekenh-rnem apetyek ikwer-warl angkakert. “Alerengkw ngkwenh mwerrirrek-anem!” <sup>52</sup> Atyetyart ra renh-rnem ayernek, “Tlenger-antey ra mwerrirrek?”

Rernem renh tyernek, “Apmwerrkel-antey amern arlkwek-penh ra mwerrirrek.” <sup>53</sup> Atyetyart ra iterl-arek, Jesus-elarl renh ilek taym anyent ikwerel-antey, “Alerengkw ngkwenh mwerrirrem.” Ra Jesus-angkwarr apentenh-anem, ikwerenh-rnem rernem Jesus renh apentenh arrpemarl.

<sup>54</sup> Jesus-arl Galilee-ampeny-itwek anenh-antey, ra atherr-inger arawerrng rlterrkel mpwarek. Arrwekel ra wayn mpwarek kwaty-penh. Ikwer-penhan ra atyetyart-kenh alerikw mwerrilek.

## 5

*Jesus-el artwa lerrp mwerrileyl kwaty-itwek Bethzatha-itwek*

<sup>1</sup> Ingwer-inger Jesus ra Jerusalem-warl alhek, amern tyenkerr arlkwetyek Jew-rnem-kenh-angkwarr. <sup>2</sup> Jerusalem-itwek keyt itnan Yep-yep-kenh rtnenh, kwaty ilpay pwerpirrey-angker rtnenh, itnan Bethzatha. Kwaty-they arrer, lywenty 5-pel artelhenh-arrangarr.

<sup>3</sup> Akngerr lywenty ikwer-rnem-itwek anew-anenh, aparrng-rnem-then, lerrp-rnem-then, arntety ingwer-rnem-then.

**Anaytileyel:** *Rernemap iterrenh, Ingkart-kenh angel-el apek kwaty akngenhelh-akngenherl-alhenty-arrpantey. Kwaty rarl akngenheyelpem, rernemap arrkernelhem, kwaty-warl atnarnpetyek. Arrwekel retangkwel atnarnpem kwaty-warl rant mwerrirremarl.*

<sup>5</sup> Artwa ingweran, arntety anenh aherrety 38-ek-atwety. <sup>6</sup> Jesus-el arntety renh arek. Angka ra awek, rarl arleng-alenty lerrp anenh. Jesus-el renh ayernek, “Nga mwerrirretyek ilkelheylek apek?”

<sup>7</sup> Artwa arntety ra tyernek, “Ingwerentyel ayenh kwaty-warl pwerlpewey-angenh. Ayeng kwaty ikwer-warl pwerlpiretyek-anek, ingwerenty-tangkwel arrwekel-antey kwaty ikwer-warl pwerlpirrek, atyengety arrngelem.” <sup>8</sup> Jesus angkek ikwer-warl, “Akwenta! Panty inerl-alha apmer-warl alpemel-anem.” <sup>9-10</sup> Jesus ra angkek-angkwarr-antey, artwa ra mwerrirrenhey-alpek anamerl-antey, panty inerl-alhemel. Alpekant-anem apmer-warl. Arlta Saturday-el-antey Jesus-el artwa mwerrilek, arlta anyent impen ikwerel. Jew-rnem-kenh atyetyart-rnem rernemarl arek-penh, rernem artwa ikwer-warl alhek. Rernem artwa renh ilek, “Arlta lyertan Saturday-el impenarl! Angka anwekantherrenh aynteyel, nthakenh ntwa panty ngkwenh akngeyney-angenh arlta anyent impenel.”

<sup>11</sup> Artwa arntety-penh angkek ikwer-rnem, “Artwa rey-antey ayenh mwerrilek, ra ayenh thwenek apmer-warl alpetyek, ‘Panty ngkwenh inerl-alhemel kel alpa apmer-warl wenh.’”

<sup>12</sup> Rernem renh ayernek, “Artwa angwenhel ngenh ilekan, ‘Panty ngkwenh inerl-alhetyek, alpemel?’”

<sup>13</sup> Jesus ra alpek-anem, artwa renh mwerrilek-penh ra ywerrenhek-anem artwa akngerr-ampeny-warl. Artwa ra iterl-arey-angenh Jesus renh, rarl renh mwerrilek, artwa akngerrarl rtnenherrenh-kety. Ra ilelhey-angenh ikwer-rnem.

<sup>14</sup> Ikwer-penhan Jesus-el artwa renh arey-alhek tyaty ilkwitwek anerl-anenty. Ra angkek ikwer-warl, “Aley-anem nga mwerr. Apmwangkwarr alhey-angenh anaynta, arntety ilkwa arrpemarl irrekerr nga.” Kel artwa Jesus renh alhengk-arek-anem. <sup>15</sup> Artwa ra Jew-rnem-kenh artwamp-rnem iley-alpek, “Artwa ra ayenh mwerrilek, itnan ikwerenh Jesus.” <sup>16</sup> Arlta Ityerrey-angker impen ikwerel, Jesus-elarl renh mwerrilek, ingwer-rnem ikwer tyel-angkerrenh, renh ipmek atwetyek, “Angka anwekantherrenh-angkwarr apmwelhilek wenh!”

<sup>17</sup> Jesus ra angkek ikwer-rnem, “Akngey atyenh warkirreyel-apeny, ayengan aleth warkirreyen arrpemarl, nthakenh ipmelhey-angenh.” <sup>18</sup> Rernem artewentyl innga ikwer ahelirrek-anem, rarl arlta Ityerrey-angker impen-angkwarr warkirrenh, rernem artewentyl innga ahelirrek, rarl Ingkart Akngey akem, “Anyent-antey wenh.”

*Ingkartel Jesus atyetyart ilkwa arrerneyel*

<sup>19</sup> Jesus angkek Jew-rnem-kenh atyetyart-rnem-warl, “Atha arrenhantherr arrayt innga ileyel. Ayengan Akngey-kenh alerikwan. Nthakenh atha ilek-ilek mpwarey-angenh

amentel. Ayengan ikwer-angkwarrant warrkirreyel, rarl warrkirreyel-apeny. Atha Akngey arem, ayeng irrkaty-angkwarz arrpemarl warrkirrem, rarl warrkirreyel-apeny. <sup>20</sup> Akngey atyeng ilkelheyel. Ayengan alerikw ikweren, ra atyeng lwewarrernem warrk ikweren. Ingwer-inger ra atyeng ilek-ilek mwerr-angker ilkwarl lwewarrerneyen. Arrantherr ayen aremel, arrantherr apateyen. <sup>21</sup> Akngey ipmepenh itethiley-angker. Irrkaty-angkwarz arrpemarl, ingwer-rnem iteth anem atyeng-angkwarran Alerikw-angkwarz. Ingwer-rnem arwa alhewer atha renh-rnem itethilem, ayengarl arlkwenteyel-angkwarz-antey. <sup>22</sup> Akngeyel nthakenh ingwer-rnem ayerney-angenh, apmwangkwarrek apek mwerr-angkwarzrekk apek. Ra ayen arrernek, arlta ingkernel atha ingwer-rnem ayernetek, apmwangkwarz anentyek, mwerr-angkwarz anentyek. <sup>23</sup> Alakenh-they ingkerrenhel ayen tnakeyeh, irrkaty-angkwarz Akngey renem tnakeyel-apeny arrpemarl. Akngeyel ayen ahern nhenh-warl thwenek. Ingwerenty irrpelthirrenty, ra Akngeyek irrpelthirrem arrpemarl.”

<sup>24</sup> Jesus ikwer-rnem-warl angkek, “Atha arrenhantherr arraty innga ileyel. Akngey rarl ayen thwenek ahern nhenh-warl. Ingwerentyel angka atyenh awemel, ayen arraty tnaketyek, rap iteth intem aneman. Akngeyel renh tyatymiley-angenh, nthakenh irrwarey-angenh. <sup>25</sup> Atha arrenhantherr arraty ileyel. Ingwer-rnem kel innga awelhetyek-anem, atha renh-rnem ileyel-angkwarz, ayengan Akngey-kenh alerikw inngarl. Ingwerenty atyeng awelhenty, ra intem-antey iteth aneman atyeng-angkwarz. <sup>26</sup> Akngeyan ingkerrenh itethiley-angker. Ra ayen arrernek alerikw ikweren, atha ingwer-rnem itethileyek arrpemarl. <sup>27</sup> Alakenh-anyem ra Artwa Impen ikweren ayen atyetyart arrernek, atha atyenh-rnem akngaketyek, apmwernem-they. <sup>28</sup> Ayenharl awek-penh, arrantherr iterrey-angenh anenherr-arey, atharl arrenhantherr ilem. Ingwer-inger arrewaly-rnemel ayen aweyen, ayeng yangkelheyen ikwer-rnem. <sup>29</sup> Ingkerrenh arrewaly-penh itethirrenhey-alpeyenh. Ingwer-rneman arraty-angkwarz anenh-rnem renem iteth intem-antey aneyen. Ingwer-rneman apmwangkwarz anenh-rnem, atha renh-rnem akngakeyeh. Ikwper-penh atha renh-rnem irrenteyen-anem intem-antey.”

<sup>30</sup> Jesus Jew-rnem-kenh atyetyart-rnem-warl angkek, “Akngeyel ayen thwenek nhenh-warl. Ayeng nthakenh ament warrkirrey-angenh arrangkw. Ayeng ikwer awelhem, arraty-angkwarz. Atha ingkerrenh arraty-angkwarz tyatymileyek, angka ikweren-angkwarrant, atha amentel tyatymiley-angenh.”

#### *Irrpety angkakert-rnem Jesus-penh ileyel anwekantherr*

<sup>31</sup> “Alakenh-anyem ayeng angka atyeng-penh ament ilelhey-angenh. Anyentelant angka ilem, arrantherr ikwer awelhey-angenh. Moses-kenh-angkwarz alakenh aynteyel ament-kenh arrangkwarl. <sup>32</sup> Irrwerl-arenyel angka atyenh arraty ileyel arrpemarl, angka arraty innga, irrkaty rey-antey. <sup>33</sup> Arrantherr angkakert-rnem thwenek John Baptise-emeley-angker ikwer-warl, ayen renem iterl-aretyek. John-el ilek angka arraty innga, ayeng irrwerl-arenye inngarl. <sup>34</sup> Alakenh arrantherr angka John-kenh iterl-aretyek arrantherr ayen tnaketyek, Akngeyelari arrenhantherr itethileyek. John ra ahern-areny arwarl. Angka atyenh ament arrpemarl, irrwerl-areny-kenh.”

<sup>35</sup> John-el-tangkwel angka Ingkart-kenh ilerl-apenh, iwerr arraty-angkwarz apenterly-antetyek, lyenenty-akertel iwerr arraty apentem-apeny. Arrantherr ikwer alyep arwa awelhenh.

<sup>36</sup> John-el arrekantherr arraty innga ilenh angka atyenh. Ayeng warrkirreyel Akngey-kenh rlterrk-akert. Arrantherr ayen areyenh, arrantherrap Akngey renh iterl-areyenh, rarl ayen thwenek ahern nhenh-warl. <sup>37</sup> Akngeyel arrekantherr ilek arrpemarl angka atyenh, angka arraty innga. Arrantherr Akngey renh awey-angenh, arrantherr renh anngetherr arey-angenh. <sup>38</sup> Arrantherr ayen tnakey-angenharl, rarl ayen thwenek ahern nhenh-warl. Arrantherr angka ikweren-angkwarz apentey-angenh arrangkw. <sup>39</sup> Arrantherr angka reytemilek Akngey-kenh pipel aynteyel, arrantherr Akngey-itwel iteth intem-antey antetyek. Angka atyenh anyent ra Akngey-kenh pipel aynteyel. <sup>40</sup> Ilek arrantherr atyeng-angkwarz apentetyek ilkelhey-angenharl? Arrantherr atyeng-angkwarz apentetyek, arrantherr iteth intem antetyek.”

<sup>41</sup> Jesus angkek arrpemarl, Jew-rnem-kenh atyetyart-rnemek, “Atha nthakenh ahern-areny-rnem akarriley-angenh, renem ayen tnaketyek arrangkw. <sup>42</sup> Atha arrenhantherr iterl-areyel, arrantherr Akngeyel ilkelhey-angenh. <sup>43</sup> Akngey atyehel ayen thwenek rlterrk ikweren-akert ahern nhenh-warl. Arrantherr ayen tnakey-angenh, atyeng irrpeltherremel. Ingwerenty amenterrp apey-alhenty, Akngey-kenh rlterrk-wenyl, arrantherr ikwer inkwerelhem kanper-antey. <sup>44</sup> Arrantherr inkwerelherreyelant tnakerreyelant. Arrantherr Ingkartek inkwerelhey-angenharl tnakey-angenh-then.

Arrantherr ilkelhey-angenh, ra arrenhantherr mwerr antwetyek. <sup>45-47</sup> Atha arrenhantherr nthakenh ayntarpp-iley-angenh Akngey-kenh-angkwarr. Moses-kenh-angkwarr arrantherr apmwangkwarr apenteyel, angka arrwekeleny-angkwarrant. Moses ran awank-akerr atyeng-penh pip-warl ingkwernek. Arrantherr angka arrwekel-antey inkwerelhemel awek-penh, arrantherr atyeng inkwerelhey-areny tnakemel. Arrantherr apmwangkwarr apenteyel, arrwekel Moses-el angka ingkwernek, arrantherr irrpeltherremel awelhey-angenharl. Nthakenh-anem arrantherr angka nhenhek awelheman, atharl ileyelek?"

## 6

*Jesus-el artwa 5,000 wanteyel, arelh-rnem-then, ampernem-then  
(Matthew 14:13-21; Mark 6:30-44; Luke 9:10-17)*

<sup>1</sup> Ingwer-inger Jesus kwaty alay Galilee-angkwarr alhek, artempel ingwer-ampeny-warl rtnwel artarnpenhek. Kwaty alay itnan ingweran Tiberias. <sup>2</sup> Akngerrel Jesus renh arek, rarl akngerr mwerrilek, rernem renh apenteh-anem. <sup>3</sup> Jesus apwert irrwerl-warl nganenhek, kwertengerl ikwerenh-rnem-akert. Rernem aney-alhek apwert irrwerl ikwerel. <sup>4</sup> Arta kel arrerirrek-anem, tyenkerr Anperarl Alhek "Passover" rernem arlkwetyek. <sup>5</sup> Jesus-el arnarek, akngerrarl ikwer-warl-athek apetyen. Ra Philip ayernek, "Nthenh-itwek anwantherr amern ineman, artwa akngerr wantetyek?" <sup>6</sup> Jesus-el arrwekel-antey iterl-arenh, ra ingkerrenh wantetyek, ra Philip arwa ayernek, renh arrkernetyek.

<sup>7</sup> Philip angkek ikwer, "Manan anwekantherrenh akelyarl amern payemeleyek anwantherr nthakenh ingkerrenh amernel wantey-angenh."

<sup>8</sup> Kwertengerl ingwer angkek Jesus-ek. Ra Andrew Simon Peter-kenh aytayikw. <sup>9</sup> "Awey nhenhan amern akely ntang-penh 5-pel-akert, irrpeng akely atherr-then. Nthakenh akngerr wantey-angenh."

<sup>10</sup> Jesus-el kwertengerl-rnem ilek, "Ingwer-rnem ilenherr-arey, rernem ahernel anetyek." Kel rernem arrernelhek-anem ahern-warl, ahern atherrk-angketyarrel. Artwa akngerr anew-anenh 5,000 ampernem-then arelh-rnem-then. <sup>11</sup> Jesus-el amern inek, rap Akngey-warl angkek, "Anwantherr inkwerelheyel amern nhenh-rnemek, ntwarl anthekek." Jesus-el amern-rnem kwertengerl-rnemek anthek, rernem arlperry antheynetyek. Ra kwertengerl ikwerenh-rnem anthek aker irrpeng-rnem-anem, rernem arlperry antheynetyek. Alakenh Jesus-el amern akngerrilek, irrpeng-rnem-then. Ingkerrenh wantelhan-anem amern-rnem-then aker irrpeng-rnem-then.

<sup>12</sup> Rernem amern arlkew-penh, Jesus-el kwertengerl-rnem ilek, "Amern ampety ilenh-rnem aker-rnem-then akwetyenherr-arey arimpay-angenh." <sup>13</sup> Rernem amern ampety akwetyeynek, rtnwa 12-warl arrerneyinemel. Ampety akngerr-antey ayntenh ahernel, amern akely 5-penh.

<sup>14-15</sup> Ingkerrenhel arek-penh, rernemap angkerrenh, "Nhenhey-antey ra, Moses-elarl awank-akerr weth arrwekeleny-rnem ilek, 'Akngeyel artwa angkakert impen ahern nhenh-warl thwenem.' Anwantherr renh antwerrkey, atyetyart ilkwa anwekantherr arrerneyek." Jesus-el iterl-arenh, rernemarl ikwer angkerrenh. Jesus ament-anem apwert irrwerl-warl nganenhek, ikwer-rnem-kety.

*Jesus kwaty-angkwarr irrwerlel alheyel  
(Matthew 14:22-27; Mark 6:45-52)*

<sup>16</sup> Atwerrp-atwerrp Jesus-kenh kwertengerl-rnem kwaty alay Galilee-warl alhek.

<sup>17</sup> Rernem rtnnewarl nganek, anperl-alhek Capernaum-warl-athek kwaty-angkwarr artarnpenhek. Kel ingwanem irrenhek. Jesus ra ikwer-rnem-warl apetyey-angenh-antey. Ra apwertel-antey anenh. <sup>18</sup> Alherrp ilkwel kwaty renh akngenhelhilek.

<sup>19</sup> Kwertengerl-rnem artempel-they 5 kilometre-ek-atwety alhenh. Rernem artewentey arwerl arlpenty-akert warrkirrenh, kwaty-angkwarr alyarpn alheteyek. Ikwer-they rernem artwa arnarek, kwaty irrwerl-angkwarr ingkel ikwer-rnem-warl apetyenharl, renh-rnem rlwatetyek. Rernem renh alhengk-areyangarl, ikwerety aterirrek. <sup>20</sup> Jesus illehk, "Atyengety aterirrey-angenh, ayengan Jesus-arl." <sup>21</sup> Rernem iterrenh, renh rtnnewarl tywenetyek. Jesus ra rtnnewarl nganenhetyek irrek-anem. Rtnwa kel anamerl-antey artempel-warl irrenhek.

*Jesus ra ilelheyel ra amern itethiley-angker aneyel*

<sup>22</sup> Arta ingwerel, artempel anthenayn-ampeny akngerrakw anenh-rnem, rernem rtnwa anyentant arek. Rernem iterl-arek Jesus ra nganey-angenh-antey kwertengerl ikwerenh-rnem-akert. <sup>23</sup> Rtnwa irrpety ingwer-rnem-anem Tiberias tawen-they apetyek

aterterr-warl, rernem amern arlkwek-penh-warl, Jesus amernek inkwerelhemel angkek-penh-warl. <sup>24</sup> Rernem arek, Jesus-arl kwertengerl ikwerenh-rnem-akert alpek. Rernem rtnwewarl nganemel, Capernaum tawen-warl artarnpenhek, Jesus-ek nthwetyek.

<sup>25</sup> Jesus renh arek-penh, rernem renh ayernek, "Ingkartay, ilenger nga apetyek?"

<sup>26</sup> Jesus-el renh-rnem ilek, "Arrantherr atnerteng innganem, amernekant iterreyel, atyeng iterrey-angenh. <sup>27</sup> Amernek intem-antey iterrey-angenh, ahern-areny-rnem amernekant iterreyel-apeny. Amern ahern-arenyekant iterrey-angenh anayntetyek. Amern ahern-areny arwek amern apmwa, anamerl-antey apmwirrey-angker. Nthaken itethirrey-angenh amern ahern-areny-angkwarr. Ingkart Akngeyel ayen arrernek, arrenhantherr itethileyek, amern anthetyek, itethiley-angker. Arrantherr atyeng-angkwarrant iterretyek."

<sup>28</sup> Rernem renh ayernek, "Nthakenh anwantherr irreman, Akngeyek awelh-ayntetyek?"

<sup>29</sup> Jesus-el renh-rnem ilek, "Akngey-kenh-angkwarr alakenh aynteyel, arrantherr ayen tnaketyek, rarl ayen thwenek ahern nhewarl."

<sup>30</sup> Rernem renh ilek, "Mwerr-angker nga lwewarrernelha, ilek-ilek mpwara, anwantherr ngenh iterl-aretyek, Akngeyelarl ngenh thwenek ahern nhewarl. <sup>31</sup> Awank-akerr arrwekeleny-rnem alherlewenh apmer aherretyel. Akngeyel renh-rnem amern alker-arenyel wanten Moses-angkwarr. Ntwa anwenhantherr amern antherl-aynta arlta arrpanenhel, amern alker-areny. Akngey-kenh pipel aynteyel, arrwekeleny-rnemel arlkwenh amern alker-areny."

<sup>32</sup> Jesus-el renh-rnem ilek arrpemarl, "Atha arrenhantherr arraty innga ilem, Moses-el arrwekeleny-rnem amern alker-areny anthey-angenh. Akngey atyenhelant amern anthey-angker." <sup>33</sup> Jesus ranemarl ilelhek ikwer-rnem, "Akngeyel thwenek amern irrwerl-areny innga artwapeny. Akngeyelarl thwenek ahern nhewarl."

<sup>34</sup> Rernem angkek, "Amern intem-antey antherl-aynta!"

<sup>35</sup> Jesus ilelhek, "Ayengarl ran amern arrenhantherr itethiley-angker. Atyeng-angkwarr arrantherr apententy, atha arrenhantherr itethileyek angka atyehel. Arrantherr atnerteng-apeny anayntetyek. Angka atyehel atha arrenhantherr itethilem, atnerteng-anem-apeny, amernel itethilem-apeny, kwtayel itethilem-apeny. <sup>36</sup> Arrantherr ayen anngetherr areyel, arrantherr ayen tnakey-angenh. <sup>37</sup> Akngeyel akngerr atyeng-warl atnwenhem. Atha renh-rnem ayerrpilem, nthakenh renh-rnem irrentey-angenh.

<sup>38</sup> Akngey atyehel ayen thwenek ahern nhewarl. Ayeng ikwer awelheyl. <sup>39-40</sup> Akngey ayen ilkelheyel-angkwarr, atha renh-rnem ayerrpiletyek. Atha renh-rnem ipmepen akwentalhileyen arlta ingkernel. Akngey atyehel ilkelheyel-angkwarr, rernem alerikw ikweren ayen tnaketyek. Rernem ayen tnakenty, rernem intem itethaneyen. Arlta ingkernel atha renh-rnem ipmepen akwentalhileyen."

<sup>41</sup> Ra ikwer-rnem ilelhek, "Ayeng amern itethiley-angker, amern irrwerl-areny." Ikwer-penh rernem renh ayntarrp-ilek irrpelthirremel.

<sup>42</sup> Rernem angkerrenh, "Alerikw Joseph-kenh nhenhan! Anantherr aynikw-then amikw-then iterl-areyel, ahern-areny ather. Ra irrywerremel ilelheyel ra alker-theyapetyenty-arrpantay!"

<sup>43</sup> Jesus-el renh-rnem ilek, "Arrantherr atyeng irrpelthirrey-angenh! <sup>44</sup> Akngey rant ingkerrenh atnwenhey-alhem atyeng-warl! Akngey raney ayen thwenek ahern nhenh-warl. Rernem atyeng-angkwarr apententy, atha renh-rnem ipmepen akemelhileyen arlta ingkernel. <sup>45</sup> Awank-akerr, Akngey-kenh angkakert arrwekelenyel ilek, 'Akngeyel ingkerrenh akalty-antheyen.' Alakenh-anyem rarl Akngeyek awelhem ikwerel-hemel ra atyeng-angkwarr apentem. <sup>46</sup> Artwa ahern-arenyel nthakenh Akngey renh arey-angenh. Artwa rarl Akngey-they apetyek, rant Akngey arek. <sup>47</sup> Atha arrenhantherr arraty innga ilem, artwa anyentel ayen tnakenty, atyeng irrpelthirrey-angenh, ra iteth intem-antey anyen. <sup>48</sup> Ayeng anyeyel amern itethiley-angker, ingkerrenh itethileyel intem-antey. <sup>49</sup> Awank-akerr, apmer arlpaw-itwek arrwekelenyel-rnem amern alker-areny arlkwenh. Ikwer-penh rernem intem-antey itethirrey-angenh, amern-angkwarr, amern apmwirrey-angker. <sup>50</sup> Amern nhenh alker-theyarl apetyek. Amern renh arlkwenty, rernem nthakenh ilwey-angenh."

<sup>51</sup> Jesus ranem ilelhek, "Ayeng amern intem-antey itethiley-angker, ayeng alker-they apetyek. Amern nhenh arlkwenty, ra iteth intem anetyek. Amern nhenhan arlka atyeh. Ayeng arlka menty anhelhem, ahern-areny ingkerrenh itethileyek."

<sup>52</sup> Jew-rnemel awek-penh rernem angkerrenh, "Nthakenh ra anwekantherr arlka anhelhetyek, anwantherr renh arlkwetyek?"

<sup>53</sup> Jesus-el renh-rnem akalty-anthenh Jew-kenh tyaty akely-itwek, apmer Capernaum-itwek. "Aray, atha arrenhantherr arraty ileyel. Akngey-kenh Artwa Impen arlka

arlkwey-angenh, arrkngethen antywey-angenh, arrantherr nthakenh iteth intem-antey aney-angenh.<sup>54</sup> Arlka atyenh arlkwenty, arrknga atyenh antywenty, rap iteth intemarl aneman. Arlta ingkernel atha renh ipmepenh akwentalhileyen. <sup>55</sup> Arlka ayeng amern innga, arrknga ayeng antywey-angker inngan. <sup>56</sup> Arlka ayenh arlkwenty, arrknga ayenh antwenty, ayeng ikwer-itwek anem, ra atyeng-itwel anem arrpemarl. <sup>57</sup> Akngeyel ayenh thwenek, ran inngarlaneyel. Ran ayenh itethilek arrpemarl. Atha ingwer-rnem itethilem arrpemarl arlka ayenh arlkwenty. <sup>58-59</sup> Amern alker-they apetyek. Amern nhan arrwekeleny-rnem arlkwek, rernem ilwekarl. Amern atharl anthem ra intem iteth aneyen. Amern itethiley-angker ran. Akngeyel amern ikwer-rnem-warl thwenek, rernem arlkwetyek, amern apmwamwam."

### *Angka itethiley-angker-akert*

<sup>60</sup> Rernem awek-penh rernem ywarn iterrek. Kwertengerl ikwerenh-rnem angker-renh, "Angka rlterrk innga, nthakenh akaltyirrey-angenh".

<sup>61</sup> Jesus-el renh-rnem iterl-arek, rernemarl angka rlterrk ikwer angkerrenh. Jesus rap angkek-anem ikwer-rnem, "Arrantherr angka atyenh-they ilterreyel, atyeng irrpeltherremel? <sup>62</sup> Ayeng artwa Akngey-kenh innga. Arrantherr ayenh areyen, irrwerl-warl ayeng alpeyeh innga, arrantherr ayehn tnaketyek, ayengarl arraty angkeyel. <sup>63</sup> Itnwengelant ingkerrenh itethilem, ahern-arenyel nthakenh itethiley-angenh. Itnweng itethiley-angker. Angka atyenh-angkwarr, Itnweng irrkatty-they apetyek, itethiley-angker rantey. <sup>64</sup> Ingwer-rnemel ayenh tnakey-angenh." Jesus-el iterl-arek arrwekel-antey ingwer-rnemarl ikwer awelhey-angenh. Jesus-el arrwekel iterl-arek artwa weth renh, rarl renh ahayiwayenah ahelengkw-rnem-warl. <sup>65</sup> Jesus angkek arrpemarl, "Alakenh-anyem atha arrenhantherr arrwekel ilek, arrantherr ament atyeng-warl apetyey-angnenh arrangkw. Akngey atyehnel arrenhantherr atwenheyelant."

<sup>66</sup> Ikwer-penh kwertengerl ingwer-rnem Jesus ikweretye intwemelirrek, renh apentyey-anghen-anem. <sup>67</sup> Jesus-el kwertengerl 12-pel-anem ayernek, "Arrantherr-alew? Arrantherr atyengetye intwemelirrem arrpemarl? Nthakenh arrantherr irem?"

<sup>68</sup> Simon Peter-el renh tyernek, "Ingkartay! Angwenh-warl anwantherr alheman? Angka ngkwenh arraty innga, ingkerrenh itethiley-angker. <sup>69</sup> Anantherr ngenhant iterl-areyel, nga Akngey-kenh Impen Inngaaneyel."

<sup>70</sup> Jesus angkek, "Atha arrenhantherr 12-pel arrernek, arrantherr ayenh apenterlynytetyek. Artwa anyentel arretyy-angkwarr apentyeyel." <sup>71</sup> Ran angkek Judas ikwer, alerikw Simon Iscariot-kenh. Jesus-el kel renh arrernek, kwertengerl anetyek. Ingwer-inger ra Jesus renh ahayiwayenah ahelengkw-rnem-warl.

## 7

### *Jesus-kenh ayteyikw-rnemel renh apentyey-angenh*

<sup>1</sup> Jesus ra apmer arrpanenh-warl alhenh ahern Galilee-ampenyel. Ra nthakenh Judeael aney-angenh, Jew-kenh atyetyart-rnemarl ikwer angkerrenh-kety, rernem renh ipmek atwetyek. Alakenh-kety ra Galilee-el-antey anenh. <sup>2</sup> Arlta ra arrer-anem irrek ingkerrenh Jew-rnem anyentirretyek, rernem amern tyenkerr arlkwetyek, Judea-ampeny-itwek, tawen Jerusalem-itwek. Apmelerr-angkwarr rernem akarirrenh tyenkerr arlkwetyek, itna Rtakw-angketyarr ikwer-itwek. <sup>3</sup> Jesus-kenh ayteyikw-rnem ikwer-warl angkek, "Ilek-kety nga Judea-ampeny-warl alhey-angenh? Nga Judea-ampeny-warl alhenty, ilek-ilek ntwa anngetherr ingkerrenh-itwek mpwarem, kwertengerl ngkwenhelnem anyaynt aretyek-awaty, rernemap ngkweng inkwerelhem-anem ngenharl arek-penh, ilek-ilek ntwa mpwarek ikwer-rnem-itwek anngetherr. <sup>4</sup> Nthakenh anyelkel mpwarey-angenh ingkerrenhelap ngenh iterl-arynytetyek anyaynt. Ahern nhareny ingkerrenhel ngenh tnaketyek ntwa ilek-ilek mpwarey-angker. Ntwa ingkerrenh-itwek anngetherr mpwaretyek!" <sup>5</sup> Alakenh rernem apal angkek. Rernem ikwer irrpelthirrenh apal.

**Anayntileyel: Rernem iterl-arey-angenh, Akngeyelarl ikwer arrernek arrwekel-antey.**

<sup>6-8</sup> Ikwer-penh Jesus-el renh-rnem tyernek, "Ayengan mpwelheyel, Akngey rant ayenh Jerusalem-warl thwenetyek. Ahern nhareny-rnem arrekantherrety arkarirrey-angenharl, mwerrarlaneyel arrekantherr. Atyengetye rernem arlkirreyel, atharl renh-rnem ileyel, rernemarl apmwangkwarrant apentyeyel. Menty arrantherr alhenherr-arey, tyenkerr arlkwetyek. Ayeng artenyarl mpwelheyel-kety." <sup>9</sup> Alakenh ra arteny anenh Galilee-ampeny-itwek. Atyeyikwant-rnem alhek.

*Jesus Arlta Rtakw-angketyarr ikwer alheyel*

<sup>10</sup> Ingkern-they ra ingwer-rnemek ilelhey-angenh anyelkel-antey alhek Jerusalem-warl. <sup>11</sup> Atyetyart Jew-rnem-kenh angkerrenh Jesus renh antwerrketyek. Rernem ingwer-rnem ayernek, "Nthenh artwa Jesus wethan?"

<sup>12</sup> Rernem angkerrenh ikwer. Ingwer-rnem angkerrenh "Jesus ra mwerrarl". Ingwer-rneman tyel-angkerrenh, "Jesus ra irrtywaltharl". <sup>13</sup> Rernem anyelkel arreytemel angkerrenh. Rernem atyetyart-rnem-kety aterirrek.

<sup>14</sup> Arlaa irrpety-penh kwentyar rernem arlkwerrenh-angkwarr-antey, Jesus ra Jerusalem-warl aremirrey-alhek. Jesus-el renh-rnem Akngey-kenh angka akalty-anthet tyatyl ilkwitwek. <sup>15</sup> Artwamp-rnemel awek-penh, rernem Jesus ikwer apatemel angkerrenh, "Akalty inngey yanhey! Nthakenh artwa yanhel ingkerrenh-angkwarr iterlareyel? Ingwer-rnemel renh akalty-anthet-angenh, ra ament apek akaltyirrek!"

<sup>16</sup> Jesus-el tyernek, "Angka atyenh-wenyarl nhanyem, atharl akalty-antheteyel. Akngeyel ayenh thwenek, angka ikweren-h-akert. Angka atyenhel amenterrpel akalty-anthet-angenh. <sup>17</sup> Arrantherr Ingkart-kenh-angkwarr apentety, arrantherrap ayenh iterlarem-anem, atharl angka Akngey-kenh angka akalty-antheteyel, angka atyenh-weny. <sup>18</sup> Ingwerentyl angka amenterrpel akalty-anthet, ra tnakelhem ingwer-rnemek. Atha anyent renh tnakeyel, rarl ayenh thwenek, arrantherr renh tnaketyek arrpemarl. Alakenh-anyem atha arraty ileyel, irrtywerremel iley-angenh. <sup>19</sup> Moses-el Akngey-kenh angka rlterr arrernek arrekantherr arrwekel. Arrantherr apentey-angenharl! Arrantherr ayenh atwetyek angkerreyel, Moses-kenh-angkwarr arrantherr apmwelhileyel."

<sup>20</sup> Ingkerrenhel tyernek, "Ngan arwengkarl! Ilekek nga illeheyel ngenh atwetyekan?"

<sup>21</sup> Jesus-el renh-rnem tyernek, "Arrantherr ayenh arek, atharl artwa lerrp-penh mwerrilek arlta Saturday-el. Arrantherr aremel apateyelpuk. Arrantherr angkerrenh, 'Ran arntety mwerriley-angenh arlta nhel. <sup>22-23</sup> Arrantherr awey akely-rnem artwa mpwaretyek arlta 8-penh. Angka nhenhan Moses-kenh ayntey-angenharl, angka nhenh-rneman arrwekelely-kenh aynteyel. Alakenh-they arrantherr arlta Kel mwerr. Mwerr atha arntety-rnem mwerrilem arlta Saturday-el arrpemarl Ingkart-kenh-angkwarr.' <sup>24</sup> Jesus-el renh-rnem ilek, "Ingwer-rnem apentey-angenh. Arraty-angkwarrant ntwa apent-ayntetyek, Ingkart-kenh-angkwarrant."

<sup>25</sup> Ingwer-rnem Jerusalem-areny-rnem ayernerrenh, "Artwa nhenh rernem atwetyekar arrkernalleyel?" <sup>26</sup> Nhak renh arenh-arey! rarl akngerrarl akalty-antheteyel, ingkerrenhel renh awetyek! Ingwer-rnemel ahelirrey-angenharl, ikwer arrngert angkey-angenh. Atyetyart-rnemel apek renh iterl-areyel, ra artwa Christ, Akngeyelar renh thwenek ahern nhenh-warl! <sup>27</sup> Nthakenharlap ran? Anwantherr renh iterlareyel, ran Christ-wenyarl. Artwa nhenh anwantherr iterl-areyelar. Ra Nazareth-arenyarl, anwantherr apmer ikwerenh iterl-areyel. Nthakenh Christ-kenh apmer iterlarey-angenh ahern-arenyel." Alakenh rernem angkerrenh Jesus ikwer.

<sup>28</sup> Jesus-el tyatyl ilkwitwek akalty-anthet-antey, ra artewentyel arlek, "Arrantherr ayenh iterl-areyel nthek-arenyarl ayengan. Ayeng ament arwa apetyey-angenh. Ra ayenh thwenek angka ikwerenh arraty-akert. Arrantherranap renh iterl-arey-angenharl, rarl ayenh thwenek, ra arraty innga. <sup>29</sup> Athant renh iterl-areyel, rarl ayenh thwenek, ayengarl ikwer-they apetyek."

<sup>30</sup> Ingwer-rnemelan angwarenh, Jesus renh antwerrketyek. Akngeyel renh arntarn-arenh-antey, nthakenh rernem ikwer-warl arrerirrey-angenh-antey antwerrketyek. Rernem renh antwerrkey-angenh, arlta ikwerenh arrerirrey-angenh-antey ra ilwetyek. <sup>31</sup> Akngerrel Jesus renh apentek-anem. Rernem angkerrenh, "Artwa nhenhel ilek-ilek-angkwarr mpwareyel arawerrng ilkwakertel. Artwa Christ nhenhey!"

<sup>32</sup> Pharisee-el-rnem awek, rernemarl Jesus ikwer angkerrenh. Rernem ingkart priest, atyetyart-rnem-then anyentirrek. Atyetyartel-rnem ilyemwerney-rnem thwenek, Jesus antwerrketyek. <sup>33</sup> Jesus-el ahelengkw-rnem arnarek, rarl ingkerrenhek ilelhek, "Ayeng arrekantherr-itwek intem-antey nhel aney-angenh. Ayeng ikwer-warl angkep alpeyeh, rarl ayenh thwenek-warl. <sup>34</sup> Arrantherr atyeng nthweyeh, arrantherr nthakenh ayenh arey-angenh. Apmer ikwer-warl ayeng alpeyeh, ikwer-warl arrantherr ywarn-antey alheyen."

<sup>35-36</sup> Artwamp Jew-rnem apatemel ayernerrenh, "Apmer nthek-warlarl alpetyek ran illeheyel anwekantherr? Apmer nthennh inpa ywerreyelar? Apmer arleng-warl alpetyek, Jew-rnem akalty-antheteyek, apmer Greece-itwek anew-aneyel-rnem-warl?"

### *Jesus-el angka ileyel, kwaty itethiley-angker-akert*

<sup>37</sup> Arlaa 7-penh, arlta ingkern impen ikwerel rernem tyenkerr arlkwenh-antey, Jesus rtnerl-alhek atayel arlkemel, "Arrantherr angkethakw irrenty, atyeng-warl apetyenherr-arey! <sup>38</sup> Akngey-kenh angka alakenh aynteyel: arrantherr atyeng-angkwarr apentety,

arrantherr itethirretyek, angkethakwel kwaty antywem-apeny. <sup>39</sup> Kwaty itethiley-angker-apeny Itnweng Rlwart ran, itethiley-angker arrpemarl ran.” Jesus-el Itnweng Rlwart thwenetyek renharl apenteyel-rnem-warl. Ranap Itnweng Rlwart ikwer-rnem-warl thweney-anghenh-antey, arrangkw-antey. Jesus ra ipmepenh itethirrentyel, ra Itnweng Rlwart thweney-alpeyenh ikwer-rnem-warl.

*Ingwer-rnem ilterreyel Jesus ikwer-they*

<sup>40</sup> Ingwerel-rnem Jesus renh awek-penh, rernem angkerrenh, “Angkakert impen ingwer apek, Nhenhey-antey apetyek, Moses-elarl awank-akerr anwekantherr weth ilenh.”

<sup>41</sup> Ingwer-rneman angkerrenh, “Ra Christ apek.” Ingwer-rneman angkerrenh, “Christ ra apmer ingwer-they apey-alheyen Galilee apmer ikwerenh arrangkw. <sup>42</sup> Akngey-kenh angka alakenh aynteyel: ‘Christ ra atyetyart David-they apetyem. Christ ra ilkwerrey-areny David-kenh apmer-itwek Bethlehem-itwek.’ Bethlehem-itwek atyetyart David anenh awank-akerr.” <sup>43</sup> Alakenh rernem ilterrenh, ament-rnem. Ingwer-rnem Jesus-ek awelhenn, ingwer-rnem awelhey-anghenh. <sup>44</sup> Ingwer-rnemel Jesus renh angwarenh, renh anterrkwetyek. Arrangkw-antey, rernem renh antwerrkey-anghenh-antey.

*Atyetyart Jew-rnemel Jesus apentyey-anghenh*

<sup>45</sup> Ikwer-penhan ilyemwerney-rnem arrangkw-antey alpek-anem tyaty-areny ilkwer nem-warl Phariee-rnem-warl-then, anterrkw-anghenh-antey. Atyetyart-rnemel renh-rnem aynerk. “Arrantherr Jesus nhenh-warl akngeteyey-anghenh?”

<sup>46</sup> Iltyemwerney rernem tyernek, “Nthakenh anwantherr renh antwerrkey-anghenh, rarl arraty-angkwarr angkenh. Aleyant anwantherr awek! Artwa ingwerenty ikwer-apeny angkey-anghenh.”

<sup>47</sup> Phariee-el-rnem renh-rnem ilek, “Ra arrenhantherr ilpertelhilek angka apmwe-warl, ingwer-rnem ilpertelhilek-apeny! <sup>48</sup> Phariee-rnem atyetyart-rnem-then anwer-nantherr ikwer awelhey-anghenarl, renh tnakey-anghenh, mentyawi!” <sup>49</sup> Apal rernem angkerrenh, “Renharl tnakeyel-rnem, rernem Akngey-kenh angka arrwekeleny apentyey-anghenh akwerrp. Rernem apmwelhileyl Akngey-kenh-angkwarr. Akngeyel renh-rnem ikwerety irrenteyehn.”

<sup>50</sup> Nicodemus-el renh-rnem angarek. Artwa wethey arrwekel-antey alhek Jesus-warl ingwel. Ra atyetyart arrpemarl anenh. Ra angkek, <sup>51</sup> “Angka anwekantherrenh aynteyel. Ra ielhem-tangkwel, anwantherr awetyek, renh atwey-alenty.”

<sup>52</sup> Ikwer-they rernem tyernek, “Nicodemus-ay! Galilee-areny apek nga rapeny? Akngey-kenh pip reytemila, ntwa angka renh iterl-aretyek, ‘Angkakert Akngey-kenh Galilee-areny arrangkwarl, apmer ingwer-arenyarl?’”

<sup>53</sup> [Ingkerrenh apmer-warl alpek.

## 8

*Jesus arrngert angkeyel ikwer-rnem*

<sup>1</sup> Phariee-rnem alpek apmer-warl. Jesus rap apwert Alip-warl alhek. <sup>2</sup> Ingwepenh Jesus ra Jerusalem-warl-anem alhek tyaty ilkwewarl-anem. Ingkerrenh ikwer-warl apetyek. Ranem arrernelhekk, renh-rnem akalty-anthetyek.

<sup>3</sup> Artwa Phariee-rnem-then rernem arelh anyent akngeteyek ikwer-warl, Moses-kenh angka akalty-anthetey-angker-rnemel-then. Arelh renh ingwer-rnemel arek, artwa arelh ingwer-kenh ayntenh. Rernem renh ilek, artwa ingwer-itwelarl ayntenh. Arelh renh akngerr-itwek ampepek rknernek. <sup>4</sup> Rernem Jesus renh ilek, “Akalty-antheneh-anthenehay! Arelh nhenh arek, artwa ingwer-itwelarl ayntenh, ingwer-kenh. Anwekantherrenh-angkwarr apmwelhilek, law anwekantherrenh akeki!” Rernem arelh ikwer tyel-angkerrenh. <sup>5-6</sup> “Angka arrwekeleny Moses-kenh alakenh aynteyel, arelh apwertel wetyek. Nthakenharl ngan iterreyel?” Rernem Jesus renh ayntarrp-iletyek-arrpantey arrkerrelhenh, ra apmwel-areth angkentyek Moses-kenh angkek. Alakenh rernem renh arrkernek. Jesus-el iypelant awenh, renh-rnem tyerney-anghenh. Kwenirremel, ra ahern-itwek ingkwernek ilytel. <sup>7</sup> Rernem aleth-antey Jesus renh irrtywerremel arlkarewenn. Rtnerl-alhemel Jesus ra angkek, “Anyentel apek arelh nhenh apwertel wetyek. Artwa alykelant, artwa apmwewenyelant wetyek!” <sup>8</sup> Jesus ra kwenirrek arrpemarl, ra ahern-warl ingkwernek. <sup>9</sup> Rernem Jesus awek-penh, rernem nyerrirremel alpek, arlperryirremel. Artwamp-rnem-tangkwel alpek. Ikwer-theyan arelh ampwernem alpek. Artwa werretyerr-rnem-anem alpek. Ikwer-they artwa

anthety ingkern-they alpek arrpemarl. Ikwer-penhan Jesus-then arelh anyent rethenant-anem aneyelpekk. <sup>10</sup> Jesus rtnerl-alhek, arelh renh ayernek, "Ntwa Jew-rnem-kenh angka akek. Ingwerentyel ngenh ayntarrp-iley-angenh-antey, tyatymiley-angenh-antey."

<sup>11</sup> Arelh ra angkek, "Arrangkwaw, Ingkartay." Jesus-el renh ilek, "Atha ngenh nthakenh tyatymiley-angenharl, kel alpant-anem, apmwekety ipmelha.]

*Jesus ra ilelheyel, "Ayeng lyenenty impen ingkerrenhek aneyel"*

<sup>12</sup> Ikwer-penhan Jesus ikwer-rnem ilelhek, "Lyenenty impen arrtyerneyel-apeny, ayeng aneyel. Ingwerentyel atyeng-angkwarr apententy, ra iwerr renh iterl-arem-anem. Nthakenh ingwemerntel aney-angenh, aparrng-apeny. Ra iteth intem-antey anetyek Akngey-kenh-angkwarr."

<sup>13</sup> Artwa Pharissee-rnemel renh ilek, "Ngant anyent ilelherl-apeyel. Anwantherr angka ngkwenh iterl-arey-angenh. Angka arraty-weny." Rernem tyel-angkerrenh ikwer.

<sup>14</sup> Jesus-el renh-rnem ilek, "Athat iterl-areyel nthenh-they ayeng apetyekarl. Athant iterl-areyel arrpemarl ntheke-angkwarr ayeng alpeyeh. Apmer arrantherr iterl-arey-angenh, ayengarl ikwer-warl alpeyehan. Angka atyehn arraty inngan. <sup>15-16</sup> Arrantherr ayenh iterl-arey-angenh, arrantherr atyeng tyel-angkerreyelan, apmwamwam, ahern-arey-kenh-angkwarr apenteyel. Akngeyel ingkerrenh akngakeyeh, warrk atyehn-weny. Akngeyel ayenh thweneh ahern nhenh-warl. Alakenh aylernak ingkerrenh akngaketyek arraty-angkwarr. <sup>17-18</sup> Alakenh-anyem angka Moses-kenh aynteyel; artwa atherrel angka anyent renhey-antey ilenty, kel court-arey-kenh arraty-angkwarr. Angka anyent-angkwarr ayeng ilelheyel. Akngeyel ayenh angka irrkaty ikwer-akert thweneh ahern nhenh-warl. Angka irrkatyant-atherr aynteyel, atherr-antey, lipwel-antey, arraty-angkwarr."

<sup>19-20</sup> Jesus tyat ilkwitwek box arrerenty-itwek aneh, rernem apmelerr man ikwer-warl iweynenh. Ahelengkwl renh antwerrkey-angenh-antey, arlta ikweren arrerirrey-angenh-antey, ra ilwetyek. Ikwer-penhan rernem Jesus ayernek, "Nthenhan ngkwenh akngeyan?" Jesus-el renh-rnem ilek, "Arrantherr ayenh apentyey-angenh, akngey atyehn apentyey-angenh. Arrantherr atyeng-angkwarr apententy arrantherrap Akngey-kenh-angkwarr apentem arrpemarl."

*Jesus-el renh-rnem ileyel, "Ayeng alker-they apetyek"*

<sup>21</sup> Jesus-el Jew-rnem ilek arrpemarl, "Ingwer-inger ayeng alhem, apmer ingwer-warl. Arrantherr ywarn-antey alheyeh ikwer-warl. Arrantherr-anem atyeng ywarn-antey nthweyeh. Arrantherr apmwakert-antey ilweyeh."

<sup>22</sup> Rernem awek-penhan Jew-rnem apatemel ayernerrek, "Ran nheng angkek nthakenh ikwer-angkwarr alhey-angenh. Ranang amentel atwelheyen?"

<sup>23</sup> Jesus-el renh-rnem ilek, "Arrantherr ahern-arey-rnem aneyel ayeng ahern-arey-wenyarl arrekantherr-warl apetyek. Ayeng irrwerl-arenyarl. <sup>24</sup> Atha arrenhantherr kel ilek, arrantherr apmwakert-antey ilweyeh. Arrantherr ayenh irrpelthirremel aveyel tnakey-angenhel, arrantherr apmwakert-antey ilweman."

<sup>25</sup> Ikwer-penhan rernem Jesus ayernek, "Angwenharl ngan?"

Jesus-el renh-rnem ilek, "Ayeng weth arrekantherr arrwwekel-antey ilelhek. <sup>26</sup> Ayeng apetyek atha angka arraty ikwerenhanh iletyek. Atha angka ingwer-rnem arrekantherr iley-angenh. Atha angka akngerr arrekantherr-penhan ilek, arrantherr apmwangkwarr mpwarenh. Karl ayenh thweneh angka iletyek, rant arraty inngan."

<sup>27</sup> Jesus ra ikwer-rnem angka Akngey-kenh lenh. Rernem angka irrwel-arey renh iterl-arey-angenh-antey, akwerrp-antey. <sup>28</sup> Jesus-el renh-rnem ilek arrpemarl, "Ingwer-inger arrantherr Akngey-kenh Artwa Impen ayenh irrwerl tywenelhenty areyeh arwerl-itwek. Ikwer-penhan arrantherr iterl-areyeh-anem, ayeng Akngey-kenh Artwa Impen, weth ayeng arrwekel ilelhekarl-angkwarr. Arrantherr iterl-areyeh arrpemarl, atharl amentel apentyey-angenh. Akngey atyehnel ayenh akalty-anthenh-angkwarrant athan apentyeyel. <sup>29</sup> Akngeyel ayenh thweneh, ra atyeng-itwek aneyel. Ra nthakenh ayenh ipmey-angenh, ayengarl ikwer awelheyel."

<sup>30</sup> Rernem angka awek-penhan, akngerrel Jesus renh tnakek, ikweren-angkwarr apentemel-anem.

*Jesus Abraham-then*

<sup>31</sup> Jesus-el Jew ingwer-rnem ilek, renharl apentyey-rnem, "Arrantherr angka atyehn-angkwarr apententy, arrantherr kwertengerl atyehn-rnem innga aneyehn.

<sup>32</sup> Arrantherr angka atyehnk arrayt innga akaltyirrem. Ikwer-penhan arrantherr mwarrant-arey anetyek, nthakenh angka apmwa ingwer-kenhel arrenhantherr ilpertiley-angenh. Atyetyart ingwer aney-angenh arrekantherr, arrangkw."

<sup>33</sup> Rernem renh ilek, "Ilekek nga angkeyelan alakenh? Atyetyart ingwer aneyangnenh anwekantherri, arrangkw. Anwernantherran Abraham-kenh-rnem aneyel. Rant arrwekeleny anwernekantherrenh."

<sup>34</sup> Jesus-el renh-rnem ilek, "Atha arrenhantherr arraty innga ileyel, ingwerenty apek intwemelirrenty Akngey-kety, ra apmwangkwarr intem-antey aneyen, ra artwa apmwamwam aneyel Akngey-kenh-angkwarr. <sup>35</sup> Apmer ingwer-areny warrk-warl arwarl apetyek, arwa warrkirreyek. Alharntentanty alpetyek. Alerikw ra intem-antey apmerek-artwey aneyen. Ayeng Akngey-kenh alerikw anyent apmerek-artwey arrpemarl. <sup>36</sup> Arrenhantherr apmwekety itethilem, arrantherr apmwangkwarr apentey-angnenh-anem intem-antey. <sup>37</sup> Atha arrenhantherr iterl-areyel, arrantherr Abraham-kenh-rnem. Kel mwerr. Arrantherr angka atyenh-kety arlkarireyel. Alakenh-they arrantherr ayenh angwareyel, ayenh atwetyek. <sup>38</sup> Ayeng Akngey-itwek anenh, atha ingkerrenh anngetherr arek. Alakenh-they atha iletyek arrekantherr. Arrantherr apmwangkwarr apenteyel, arrenty-kenh, atyetyart arrekantherrenh-angkwarr."

<sup>39</sup> Rernem Jesus renh ilek, "Abraham-arl atyetyart anwernekantherrenh arrwekeleny."

Jesus-el renh-rnem ilek, "Abraham arraty-angkwarr anenh Akngey-kenh-angkwarr. Arrantherrral Abraham-kenh-rnem aneyel, arrantherrral arraty-angkwarr arrpemarl apentetyek. <sup>40</sup> Atha arrekantherr angka arraty ilek, atharl Akngey-kenh angka aweken-kenh. Arrantherr ayenh angwareyel, ipmek atwetyek. Abraham-kenh-angkwarr arrantherr Ingkart apentey-angnenh arrangkw. <sup>41</sup> Arrantherr arrwekeleny arrekantherrenh-angkwarrant apenteyel, arrenty-areny-kenh-angkwarr."

Rernem Jesus ikwer ilelhek, "Anantherr akwetyenty-wenyarl, anantherran Ingkart Akngey-kenh-rnem inngarl, ament-warl alhey-angnenh."

<sup>42</sup> Jesus-el renh-rnem ilek, "Akngay apek akngay arrekantherrenh, arrantherr atyeng inkwerelhetyek. Arrangkw, arrantherr atyeng inkwerelhetye-angnenh. Ayeng Akngey-they apetyek, rantey ayenh arrekantherr-warl thwenek, ayeng ament apetyey-angnenh.

<sup>43</sup> Arrantherr angka atyenh iylpelant aweyel. Arrantherr arlkariremel angka atyenhек awelhetye-angnenh. <sup>44</sup> Arrenty ra atyetyart arrekantherrenh aneyel, arrantherr arrenty ikwer awelhetyel. Arrenty rantey irrtywalth aneyel, ahelengkw atwetye-angker inngarl. Ra ament ikweren-angkwarrant apenteyel. Ra arraty ingkerrenhek iley-angnenh, ra Ingkart-kenh angka arraty-angkwarr apentey-angnenh. Ran ingwer-rnem akalty-antheyel, irrtywerrerl-ayntetyek. Arrantherr irrtywalth ahern-areny-rnem ingkerrenhel renh awem.

<sup>45</sup> Atha arrekantherr angka innga ilekarl-penh, arrantherr atyeng awelhetye-angnenharl irrpeltherremel! Arrantherr ayenh apentey-angnenh. <sup>46</sup> Arrantherr ayenh apmwani antwey-angnenh atyeng arrantherr arraty awelhetyek. Angka arraty atha ileyel.

<sup>47</sup> Akngey-kenh angkek awelhenty, Akngey-kenh anemarl. Arrantherr Akngey-kenh angka awelhetye-angnenh, arrantherranap Akngey-kenh-wenyarl."

### *Jesus-el ileyel angka Abraham-akert*

<sup>48</sup> Jew ingwer-rnem Jesus-ek angkek, "Nganang Samaria-areny aneyel, artwa arrenty-akert." Jew-rnem Samaria-areny-rnem-kety arlkarirenh.

<sup>49</sup> Jesus-el renh-rnem ilek, "Ayengan artwa arrenty-akert-wenyarl. Athan Akngey atyehant tnakeyel. Arrantherr artwa apmwek-athen ayenh areyel. <sup>50</sup> Ayeng nthakenh tnakelhetye-angnenh. Akngeyelant ayenh areyel, rant ayenh mwerr antwem. Akngey ra arrekantherr inkwerelhelyarl, arrantherr ayenh tnaketyek. <sup>51</sup> Atha arrenhantherr arraty ileyel, ingwerenty angka atyenh-angkwarr apententy, ra nthakenh ilwey-angnenh."

<sup>52</sup> Jew-rnemel renh ilek, "Anantherr kel akalty, ngan arrenty-akert inngarl aneyel! Abraham ilwek, Akngey-kenh angkakert-rnem ilwek arrpemarl. Ngan ilelhelyel, angka ngkwenh-angkwarr apententy, nthakenh ilwey-angnenh. <sup>53</sup> Nganang Abraham-angkwarr ilkwa? Abraham kel ilwek, angkakert-rnem-then ingkerrenh-antey ilwek arrpemarl. Angwenharl ngan ilelhelyel?"

<sup>54</sup> Jesus-el renh-rnem ilek, "Ayeng tnakelhetye-angnenh, arrangkw. Akngey rant ayenh tnakeyel. Arrantherr irrtywerrerl ilelhelyel Akngey-kenh-rnem-arrpantey. Arrangkwaw! <sup>55</sup> Arrantherr ikwer akwerrparl, ayengant ikwer akaltyarl. Arraty ayeng ilelhelyel, irrtywerrerl-angnenh. Ayeng ikwer akalty innga, ayeng angka ikwerenhek awelhetyel. <sup>56</sup> Arrwekeleny Abraham-el ayenh iterl-arenh arrwekel-antey ayeng apetyey-alenty ahern nhenh-warl. Ra atyeng inkwerelhek."

<sup>57</sup> Ikwer-penh Jew-rnemel Jesus tyernek, "Ngan artwamp-weny-antey! Nthakenh ntwa Abraham arek?"

<sup>58</sup> Jesus-el renh-rnem ilek, “Atha arrenhantherr arraty innga ileyel. Abraham-wenyanke ayeng anen.” <sup>59</sup> Rernem awek-penh, rernem apwert-anem inekan, Jesus-anem apwertel wetyek-anek. Jesus tyerrelhek warl ilkwethay irryertewelhemel.

## 9

### *Jesus-el artwa aparrng aretyek mpwareyel*

<sup>1</sup> Jesus kwertengerl ikwerenh-rnem-akert alhenh, ra artwa aparrng arey-alhek. Ra aparrng anen away akelyank. <sup>2</sup> Kwertengerl-rnemel Jesus renh ayernek, “Akalty-anthen-anthenhay! Ilek-penh artwa nhenh away akelyank aparrngirrek? Amikw-then aynikw-then apek apmwangkwarr alhenh? Akngeyel renh aparrngilek alakenh-anyem apek?”

<sup>3</sup> Jesus-el renh-rnem tyernek, “Menty! Artwa nhenh apmwangkwarr aney-angenh, amikw-then aynikw-then-antey, akelyank artwa aparrng anen. Atha arrekantherr-itwek anngetherr mwerriletyek, arrantherr aretyek-awayt, ayeng rlterrk ilkwa Akngey-kenh-akert aneyel. Arrantherr rlwanty-anenherr-arey! <sup>4-5</sup> Ayeng ahern nhenhel Akngey-kenh lyenenty impen-antey, ahern-areny ingkerrenhek. Athanem ingkerrenh-angkwarr iwerr arraty ilerl-apayntetyek. Itwernel-awayt anwantherr warrkirk-ayntetyek Akngeyel ayen hwenek ahern nhenh-warl, ayeng ikwer warrkirk-ayntetyek. Arla atyen arrerirreyel-kety ipmelhetyekan warrk-kety ingwel nthakenh warrk-kety ipmelhem-apeny.”

<sup>6</sup> Ikwer-penhan ra ahern-warl apelh iwek, apelh atnhanem mpwarew, artwa aparrng renh-anem annga atherr apernek atnthele-anem. <sup>7</sup> Artwa ikwer-warl ra angkek, “Kwaty ngenty Siloam-warl alha, inngerr lhewelhetyek.” Artwa ra kwaty-warl alhek, inngerr-anem lhewelhek, irrarkelhemel. Ra mwerranem arenh, annga rlketyek-anem. Kwaty Siloam alakenh aynteyel angka Aram-areny-kenhel, “Artwa renharl thwenek.”

<sup>8</sup> Artwa aparrng-penh apmer-warl alpek. Ikwerenh-rnemel renh arek, apatemet-anem rarl annga rlkem-anem apey-alpek, ra aparrng-tangkwel ngkwelty manek aparelhenh. Rernem ayernerrenh, “Artwa wethang ran nhay nhenhan aparrng ngkweltyek aparel-hen iwerr impalthele anerl-anemel?”

<sup>9</sup> Kel artwa ingwer-rnem angkerrenh, “Kel artwa rey-antey annga rlkeyel-anem!” Artwa ingwer-rneman angkerrenh, “Kel ra ikwer-apenyarl.”

Artwa aparrng-penh ranem ilelhek, “Kel ayengarl weth iwerr impalthele arrekantherr ngkweltyek inkeyam-aynten, aparrng-tangkwel.”

<sup>10</sup> Rernem artwa renh ayernek, “Nthakenharl ntwa areyel-anem? Ilekel annga mwerrilek?”

<sup>11</sup> Ra renh-rnem arraty-anem ilelhek, “Artwa anyent itnan Jesus ra ayen atnthele apelh-penhan annga atherr apernek, rap ayen ilantheck kwaty Siloam-warl alhetyek, inngerr irrarkelhetyek. Ikwer-penh atha annga rlkemelhemel-anem arek.”

<sup>12</sup> Rernem renh ayernek, “Nthenn-anem artwa ra, rarl ngenh mwerrilek?”

Ra tyernek, “Inpa, rwengk.”

### *Artwa aparrng-penh Pharisee-rnemel renh aleth-antey arlkarewerl-anem ayerneyel*

<sup>13-14</sup> Artwa aparrng-penh renh Jesus-elarl mwerrilek atntha apelh-penhen arlta Saturday-el, ltyerrey-angker impen ikwerel. Alakenh-they rernem artwa renh Pharisee-rnem-warl atnwenhek, rernem renh ayernetyek, nthakenharl irrek. <sup>15</sup> Pharisee-el-rnem artwa renh ayernek, “Nthakenh ntwa mwerr-anem anngel-atherr areyel-anem?”

Artwa aparrng-penh ra tyernek, “Jesus-el ayen annga apernek atnthele apelh-penhen. Ikwer-penh ayeng kwaty Siloam-itwek inngerr lhewelhek. Ikwer-penhan atha annga rlkemel-anem arek.”

<sup>16</sup> Rernem ilterren ikwer-they. Pharisee ingwer-rnem angkerrek-anem, “Artwa rarl artwa nhenh mwerrilekan arlta Saturday-el, ltyerrey-angker impen ikwerel. Alakenh apmwarl! Ra Ingkart-kenh angkakert-wenyarl!” Pharisee ingwer-rneman angkerrenh, “Artwa ra angkakert Akngey-kenh apek, mwerr-angkwarrarl.”

<sup>17</sup> Pharisee-rnemel artwa renh ayernek arrpemarl, “Nthakenh ngan angkem, artwa rarl annga atherr ngenh mwerrilekek?”

Artwa ra tyernek, “Artwa yanhan Akngey-kenh angkakertarl.”

<sup>18</sup> Pharisee-rnemel ikwer irrpeltherrenh, irrywerrerl-anenty-arrpantey. Ra ikwer-rnem ilelhek arratyarl, rarl ampa akelyank aparrng anen. Rernem amikw-then aynikw-then ikwer-atherr yangkelek, ratherr artwa ikwer-penh ileytey. <sup>19</sup> Ratherr apetyek. Pharisee-el-rnem renh-atherr ayernek-anem, “Nhenhang alerengkw mpwelekanthenn? Arratyang mpwelanth ileyel, akelyank-antey ra aparrng anen? Alakenh mpwelanth ileyel, nthakenharlap ra areyel-anem?”

<sup>20</sup> Ratherr tyernek, "Ya wenh, kel aylekanthenh. Arraty ra aparrng akelyank anenh." <sup>21-23</sup> Jew-rnem atyetyart-rnemel angka arrwekel-antey arrernek, "Ingwerentyl Jesus renh Christ itnewenty, anwantherr renh irrentem tyaty anwekantherrenh-they. Itengatherr alakenh arlarl illelhek, ratherrarl Jew atyetyart-rnem-kety aterirrenh. Lyertan aylanth iterl-arey-angenh, nthakenharl ra areyel-anem. Aylanth iterl-arey-angenh arrpemarl, angwenhelarl renh mwerrilek. Artwa ilkwa renhant ayernenherr-arey, ra kel arrekantherr illelhetyek, ampa akely-wenyarl!"

<sup>24</sup> Pharisee-el-rnem artwa renh ikngwerl-alpek arrpemarl, renh ayernetyek. Rernem ikwer-warl angkek, "Arraty innagt ielha, Akngeyel ngenh arekerr. Anwantherr artwa renh iterl-areyel, rarl ngenh mwerrilek. Ra artwa apmwa!"

<sup>25</sup> Artwa ra renh-rnem tyernek, "Atha artwa renh apmwa antwey-angenh. Arwa atha iterl-areyel, ayeng aparrng anenh awey akelyank, aleyan atha areyel-anem."

<sup>26</sup> Rernem artwa ayernek arrpemarl, "Nthakenharl ra ngenh mwerrilekan?"

<sup>27</sup> Artwa ra tyernek arrpemarl, "Atha arrekantherr arrwekel-antey ilek, rarl ayen mwerrilek. Arrantherr atyeng arrkent awelheyel? Arrantherr ilkelheyel, renh arrantherr apenteyek arrpemarl?"

<sup>28</sup> Rernem renh iltek-anem, "Ntwarl ikwerenh-angkwarr apenteyel, anwantherr Moses-kenh-angkarrant apenteyel? <sup>29</sup> Anwantherr Moses renh iterl-areyel, Akngeyel-larl renh arrernek. Artwa yanh anwantherr iterl-arey-angenharl, apmer nthenh-areny?"

<sup>30</sup> Ra ikwer-rnem-warl angkek arrpemarl, "Kel! Ranap anngetherr ayen mwerrilekarl, aleyant atha annga rikemel areyel-anem. Arrantherr apmer ikwerenh renh iterl-arey-angenh, ran irrwerl-areny. <sup>31</sup> Anwantherr iterl-areyel artwa apmwel Ingkart renh ayernenty, ra ikwer nthakenh awelhey-angenh. Ingkart-kenh-angkwarrarl aneyel-rnemekant awelhem. <sup>32</sup> Awank-they alakenh ayntenh, artwa ahern-arenyel aparrng renh mwerriley-angenh. <sup>33</sup> Artwa yanhelan ayen mwerrilekan, ran Ingkart-kenharl. Ahern-areny arrangkwarl. Innga, ran Ingkart-kenharl."

<sup>34</sup> Pharisee-rnem artwa aparrng-penh ikwer-warl angkek, "Nga apmwa anenh ampa akelyank. Ntwa anwenhantherr Ingkart-angkwarr akalty-anthey-angenh." Rernem Jew-rnem-kenh tyaty akely-they renh irrentek-anem, "Ngan nhel aney-angenh wenh!"

### *Pharisee-rnem artwa aparrng-apeny*

<sup>35</sup> Jesus-el awek, Pharisee-rnemelarl artwa renh irrentek tyaty akely-they. Jesus artwa ikwer nthwenh. Renh arey-alhek. Jesus-el renh ayernek, "Ntwa Artwa Impen Ingkart-kenh ayen tnakeyel?"

<sup>36</sup> Artwa ra ayernek, "Angwenharlap artwa ran, Ingkart-kenh Impenan? Atha renh innga tnaketyek arrpemarl inkwerelhemel."

<sup>37</sup> Jesus-el renh tyernek, "Ntwa kel anngetherr areyelarl! Ayeng rey-antey Artwa Impen Ingkart-kenh."

<sup>38</sup> Ra Jesus tyernek, "Ingkartay! Atha ngenh tnakeyel." Ra ampwethel arrernelhek Jesus-itwek kwenirremel, inkwerelhemel.

<sup>39</sup> Jesus angkek arrpemarl artwa ikwer-warl, "Ayeng apetyek ahern nhenh-warl, ingkerrenh atha arrkernetyek. Ingwer-rnem aparrng-apeny, ayen iterl-arey-angenh. Atha renh-rnem annga mwerrilem-apeny. Atha renh-rnem akalty-anthem, rernem ayen iterl-arem-anem. Mwerr-arrpantey tnakelheyel-rnem rernem apmwangkwarr aleth apenteyel amentel, artwa aparrngel iwerr apmwangkwarr apenteyel-apeny. Nthakenh atha renh-rnem mwerriley-angenh, akalty-anthey-angenh."

**Anaytileyl: Rernem amentewarl apentenartwa aparrngel apentenh-apeny. Rernem Jesus renh tnakey-angenh, iterl-arey-angenh. Alakenh Jesus-el renh-rnem ywarn arratyileneh, rernem ikwer awelhey-angenharl.**

<sup>40</sup> Pharisee-el-rnem renh awek. Rernem Jesus ikwer angkek, "Anwekantherr ngan angkeyel? Ntwa anwenhantherr aparrng antweyel, apmwangkwarr apenteyel-rnem?"

<sup>41</sup> Jesus angkek, "Arrantherr aparrng-apeny aneyel. Arrantherr illelheyel, arrantherr Ingkart-kenh-angkwarr apenteyel-arrpantey. Arrantherr apmwangkwarr-antey aleth apenteyel."

## 10

### *Angka yep-yep-akert*

<sup>1</sup> Jesus angkek, "Artwa irrtyert-awarr-rnem rernem akwerterrparl atnarnpenh keytkeyan. Rernem arrkernelhenh yep-yep-rnemek artwa apmwernemey. <sup>2-3</sup> Artwa keytelarl rtnenh. Iwerran ra altywerilenhey-apeny yep-yep-rnemekan. Artwa ingwerekanem. Artwa nhayman yep-yepek-artwey, renh-rnem akngenthal. Rap arlkenh yep-yep-rnem ikwer-rnemek. Ahenty renhant iterl-arenh. Yep-yepek-rnem ahentyan renhant

iterl-arenh. Alhengk-awenhan arreynan renh, ‘Wethip arlkeyel wenh! Anwekanther-  
renh wenh!’ Itnan ingwerek-ingwer iterl-arenh yep-yep-rnem, rap arkenharl ikwer-  
rnemek. Renh awerl-alhenharl rerneman.

<sup>4</sup> Rap renh-rnem tyerrenh aketh-warl-anem. Arrwekelarl ran alhenh yep-yeparl  
arntarnit-arenh ran, rerneman ingkern-they apentenh. Yep-yepel-rnem renh awerl-  
alhenh. Alhengk-awenhh renhantarl. <sup>5</sup> Ingwer-rnem rernem apentey-angenharl, iterl-  
arey-angenharl. Arreyn ingwer-lkwer, ingwerel-ayeth ingwer-lkwer rernem angkenharl.  
Renhant rerneman iterl-arenh, yep-yep renh-rnem arntarnit-arenhantarl. Ahentyan.  
Anterrenharl ingwer-rnem-ketyan arreyn ingwer-lkwer rernem awenharl yep-yepel-  
rnem, rernemap anterrenharl. Yep-yep-rnemek.”

<sup>6</sup> Jesus-elap angkan ikwer-rnemek ilenh, rernemap iterl-arey-angenhh, “Ilekek nhan  
Jesus-arl angkeyel wenh?”

*Jesus ilelheyel, “Ayengarlap ran yep-yep arntartt-arey-angker”*

<sup>7</sup> Iwerr aynteyneyel alakenhan, yep-yep-rnemek. Jesus-an angkek, “Ayengarlart iwer-  
ran, iteth-kenh apmer-warl! Ingkerrenhel ayenh iterl-areyel. <sup>8</sup> Ingwer-rneman angkeyel  
irryert-awarr-rnem. Atyenhh-rnem atyeng awelheyel, yep-yep-rnem awelheyel-apeny.  
<sup>9</sup> Ayengarlart iwerran. Athap itethilemarl ingkerr innga atyeng-angkwarr apetyeman  
rerneman iwerr-angkwarr. Apmer atyenh-warl apey-alpeman. Inkwerelheyek. Atyeng-  
angkwarrant inkwerelheyek mwerr-angkwarr.

<sup>10</sup> Artwa anyelk-awarr apetyem, ra yep-yep-rnem anyelkel inetyek atwetyek-then.  
Alakenh-anyemant ra apetyem. Ayengan apetyek, atyenh-angkwarrarl apenteyel-rnem  
ingkerrenh itethiletyek, intem-antey rernem iteth anetyek.”

*Jesus ilelheyel, “Ayeng yep-yep arntartt-arey-angker mwerr”*

<sup>11</sup> “Ayengarl yep-yep-rnem arntartt-arey-angker aneyel-apeny. Anyelk-awarr  
apetyenty, yep-yep-rnem irryert inetyek, ra yep-yep arntartt-arey-angker-tangkwel  
renh ipmek atwem. Yep-yep arntartt-arey-angker ra katy ilwem yep-yep ikweren-  
rnemek, renh-rnem arntarnt-aretyek apmwekety itethiletyek. <sup>12</sup> Warrkenh ingwer-rnem  
rernem manekant warrkirreyel, rernem atyeng-apeny-wenyarl. Yep-yep-rneman ikwer-  
rnem-kenh-wenyarl. Artwa ra man-awarr arengk artnwer arnarenty, ra aterel ikwerety  
anterrem, yep-yep-rnem iwerl-alhemel. Arengk artnwerl yep-yep-rnem thnwem. Yep-  
yep-rnem arlperryirremel anterrem arengk artnwer ikwerety. <sup>13</sup> Man-awarr rernem  
yep-yep-rnem innga arntartt-arey-angenharl. Alakenh-kety rernem aterel anterrem  
arengk artnwerel thnwekkerr.”

<sup>14</sup> “Ayengarl artwa yep-yep-rnem arntarnt-arey-angker aneyel-apeny. Atha yep-yep  
atyenh-rnem alhengk-aremarl, rernem atyeng akalty arrpemarl. <sup>15</sup> Irrkaty-angkwarr  
Akngeyelan ayenh alhengk-areyel arrpemarl. Ayeng ikwer akalty arrpemarl. Kel  
ayeng katy ilwetyek yep-yep atyenh-rnemek, renh-rnem arntarnt-aretyek apmwekety.  
<sup>16</sup> Yep-yep ingwer-rnem atyenh-rnem arrpemarl. Rernemap ingwer-areny-rnemarl.  
Atha renh-rnem akngetyem atyeng-angkwarr, rernem angka atyenh alhengk-awem-  
anem, ayeng ikwer-rnem arlkenty. Ikwer-penh atha ingkerrenh-antey renh-rnem  
anyentelhilem. <sup>17</sup> Alakenh-anyem Akngey atyeng artewentyel ilkelheyel, ayengarl arlka  
menty anthelhem, atyenh-rnemek katy ilwem. Ayeng ipmepenh itethirreyen. <sup>18</sup> Kel  
menty ayeng arlka anthelhem, ayeng katy ilwetyek ingkerrenhek alhewer. Akngeyel  
ayenh rlterrkilek, ayeng kel arlka menty anthelhetyek. Ra ayenh rlterrkilem, ayeng  
angkek itethirretyek arrpemarl. Alakenh-anyem Akngeyel atyeng arrernekk arrwekk.”

<sup>19</sup> Jew-rnemek angka awek-penh, ingwer-rnem ikwer inkwerelhek, ingwer-rnemarl  
arrangkwarl, irrpeltherrenh. <sup>20</sup> Rernem angkerrenh Jesus ikwer, “Ra arrenty-kenh  
itnweng-akertarl. Ran nenh arwengkarl angkeyel! Arrantherr ikwer awelhey-  
angenharl!”

<sup>21</sup> Jew ingwer-rneman angkerrek, “Jesus apek arrenty-kenh rlterrk-akert, nthakenh  
ra mwerr apmwel-areth angkey-angenhh! Nthakenharlap artwa aparrng-penh ra  
mwerilek, arrenty-kenh rlterrk-akertarlans?”

*Jew-rnem-kenh atyetyart-rnemek Jesus renh apwertel wetyek arrkernekk*

<sup>22</sup> Alyangkwel rernem akarrirenh Jerusalem-warl, tyenkerr Hanukkah arlkwetyek.  
Jesus anenh arrpemarl apmer ikwer-itwek. <sup>23</sup> Ingwer-inger Jesus ra aketh-ampenyel  
lytwenty-itwek itnan Solomon-kenh lytwenty, ikwer-itwek ra alhenh tyat ylkwitwek.  
<sup>24</sup> Jew ingwer-rnem Jesus ikwer-warl akarrirek, renh ayern-ayntetyek, “Nga arraty  
anwekanther ilelhey-angenhh-antey. Akngeyel apek ngenh Christ nhenh-warl thwenek,  
arl awank-akerr ilek, ahern nhenh-warl thwenetyek. Nga arraty innga ilelha,  
anwantherr ngenh iterl-arayntetyek.”

<sup>25</sup> Jesus-el tyernek renh-rnem, "Ayengan arrekantherr arrwekel-antey illehok, ayengan Christ-arl, Akngeyel arrwekeleny-rnem ilek, ayenah ahern nhenh-warl thweneyen. Arrantherry atyeng awelhey-angenharl. Akngeyel ayenah thwenek, rlterrk ikwerenhan-kertel ayeng warrkirk-ayntetyek. Arrantherry ayenah anngetherr areyel. Alakenh-anyem-they arrantherry ayenah iterl-arey-areny, ayeng Christ-arl, rarl ayenah thwenek. <sup>26</sup> Arrantherry ingkerrenh atyeng irrpeltherreyelar. Arrantherry atyeng-angkwarr apentey-angenharl. Arrantherran yep-yep atyehn-wenyen. <sup>27</sup> Yep-yep atyehn-rneman rernem angka atyehn alhengk-awemarl. Atha renh-rnem iterl-areyel arrpemarl. Rernem atyehn-angkwarr apenteyelar. <sup>28</sup> Alakenh-anyem-they rernem iteth intem Akngey-itwek aneyen. Nthakenh rernem ilwey-angenh. Ingwerel nthakenh renh-rnem akngakey-angenh atyeng-they. <sup>29</sup> Akngey atyehnel ayenah yep-yep-rnem-apeny anthek. Akngey ran ilkwa innarl, rlterrk-awaty aneyel ingwer-rnem-angkwarr. Ingwer-rnemel nthakenh renh-rnem Akngey-they akngakey-angenh. <sup>30</sup> Akngey-then ayeng-then anyent-antey aneyel. Akngeyel renh-rnem ayerrpilem, atha renh-rnem ayerrpilem arrpemarl."

<sup>31</sup> Jew-rnem-kenh atyetyart-rnemel Jesus renh awek-penh, rernem apwert-rnem inenh, apwertel-anem Jesus renh wetyek-anek. <sup>32</sup> Jesus ra angkek ikwer-rnemek, "Atha mwerr-angkwarr mpwarek ingkerrenhel ahern nhenh-itwek. Alakenh-anyem Akngeyel ayenah rlterrkilek. Arrantherry ingkerrenhel ayenah arek, ayeng mwerr-angkwarr ingkart-angkwarr warrkirrenh. Ilekek arrantherry ayenah apwertel wetyek?"

<sup>33</sup> Rernem Jesus ikwer irrpelthirrek, "Arrangkw. Nthakenh anwantherry ngenh atwey-angenh warrk ngkwenh-angkwarr. Ngan Ingkart-wenyarl. Ngan Akngey ilkwarrpanterey irrtwyerremel illehoyel, anyent-angkwarr-arrpanterey! Alakenh-they anwantherry ngenh apwertel wetyek!"

<sup>34-35</sup> Jesus angkek ikwer-rnemek, "Aknegey-kenh angka arrwekeleny aynteyel: 'Arrantherry akngey-rnem atyeng-apeny anyteyek.' Akngey-kenh pip arrwekeleny aynteyel, angka nhenh arraty innga aynteyel intem-antey. Pip-itwek Ingkart angkek ikwer-rnem-warl, ra renh-rnem akngey itnewek ikwer-apeny. <sup>36</sup> Akngeyel ayenah thwenek ahern nhenh-warl, ayenah arrernek impen ikweren. Ayeng antwelheyel Akngey-kenh Alerikw. Ilekek arrantherry ayenah apmwra antwelyel." <sup>37</sup> Arrantherry ayenah tnaketyek atharl Akngey atyehn-kenh warrk mpwareyel. <sup>38</sup> Arrantherry apek atyeng irrpeltherreyel, ayenah tnakey-angenh, atharl ileyl-angkwarr. Kel athan warrk mwerr mpwareyel Akngeyel mpwareyel-apeny. Alakenh-anyem-they arrantherry ayenah tnakey-areny. Ikwer-penhan arrantherry iterl-arey-areny, Akngey-then ayeng-then anyent-anteyarl."

<sup>39</sup> Jew-rnem atyetyart-rnemel awek-penh, rernem renh antwerrketyek arrkernelhek, tyayl-warl akwernetyek-arrpanterey. Ra ikwer-rnem-kety anterrek.

<sup>40</sup> Ra anperhek irrkaty-angkwarr-antey Jordan lher-angkwarr, John-elarl akngerr arrwekel kwatylel baptise-emilenh-angkwarr. Jesus ra apmer ikwer-itwek anenh. <sup>41</sup> Jesus ra ikwer-itwek anenharl-antey, akngerr ingwer-rnem ikwer-warl akarrirrek. Rernem angkerrenh, "John-el anenhantherrenh Akngey-kenh rlterrkil mwerriley-angenh. John-el angka arraty ilenh Jesus ikwer." <sup>42</sup> Apmer ikwerel akngerran antelhek-anem Jesus-angkwarr.

## 11

### *Lazarus ilwelyel*

<sup>1</sup> Artwa itnan ikweren Lazarus ra arntety ayntenh. Lazarus ra tawen akely Bethany-areny, angkwerekw ikweren-atherry Mary-atherry Martha-atherry. <sup>2</sup> Mary rey-antey arrpemarl, rarl Jesus apernek anterel, ingkety atherry altel-anem iparek anter-penh. <sup>3</sup> Mary Martha-atherry angkwerenheng ratherry ingwerenty angka thwenek Jesus ikwer-warl, "Ingkartay! Artwa weth ngarl ikwer ilkehoyel, ra arntety aynteyel."

<sup>4</sup> Jesus-el angka awek-penh ra angkek, "Ra nthakenh aleth-antey ilwey-angenh arntety-penh. Awaretyel atha renh itethilem, ingkerrenhel Akngey iterl-aretyek, tnaketyek inkwerelhemel, Akngey-kenh alerikw-then rernem ayenah tnaketyek arrpemarl."

<sup>5</sup> Jesus ikwer-rnem artewentyel ilkehoyel Martha-ek Mary-ek-then Lazarus-ek-akerr.

<sup>6</sup> Jesus apmer ikwerel arteny anenh-antey, arlta atherrel alhey-angenh. <sup>7</sup> Ikwer-penhan ra kwertengerl ikweren-hrnem-warl angkek-anem, "Apmer Judea-ampeny-warl anwantherry alpetyek."

<sup>8</sup> Kwertengerl-rnem apatemel angkek, "Akalty-anthenh-anthenhay! Lyert arwa Jew-rnemel ngenh apwertel ipmek wetyek-anek. Nga ikwer-rnem-warl angkep arrpemarl alpey-angenh!"

<sup>9</sup> Jesus-el tyernek, "Awaretyel ayeng alhetyek, arlta ikwerel. Ranem angkanem ilek ikwer-rnem. Artwa ingwerenty itwernekarl apek alheyel, ra nthakenh aytney-angenh."

Ra aketh areyel ingkenyelarl arrtyerneyel-angkwarz. <sup>10</sup> Atwemengkel apek alhem, rap aytnemarl, nthakenh arey-angenharl. Awaretyel ra alheyel itwernewarl. Awaretyel ayeng alhey arrpemarl.”

<sup>11</sup> Ikwer-penh Jesus angkek, “Lazarus ra ankwaynteyel, awaretyel ayeng ikwer-warl alhey, renh akemelhiletyek.”

<sup>12</sup> Kwertengerel-rnem tyernek, “Ingkartay! Ra apek ankwaynteyel, ra amentel akemirreyen.”

<sup>13</sup> Jesus ra iterl-arek, Lazarus rarl kel ilwek, ipma aynten. Kwertengerel-rnem rernem iterrenh Lazarus ankwaynterl-anenty-arrpantey.

<sup>14</sup> Jesus-el renh-rnem aketh-anem ilek, “Lazarus kel ilwek. <sup>15</sup> Mwerr ayeng ikwer-warl alhey-angenh-antey, arrantherr ayenh iterl-arayntetyek-anem. Mpa, kel anwantherr alhey ikwer-warl.”

<sup>16</sup> Thomas, itna ingweran Atyew, ra kwertengerl ingwer-rnem-warl angkek, “Alhey anwantherr Jesus-angkwarz, anwantherrap ikwer-itwel ilwetyek.”

#### *Jesus angkwerenheng-atherrek amperrngirreyel*

<sup>17</sup> Jesus ra tawen Bethany-warl alhek. Apmer-arenyel-rnem ikwer iley-ayntek, artwa Lazarus-arl arrewaly kel awenngel ayntek arlta 4-pelel. <sup>18</sup> Bethany ra Jerusalem-they arrer-antey, 3 kilometre apek. <sup>19</sup> Jew akngerr akarrirek Mary Martha ikwer-atherr-warl Jerusalem-they, renh-atherr arternpiletyek.

<sup>20</sup> Martha-el awek, Jesus rarl apetyen. Mary apmerel arteny anen. Martha Jesus ikwer-warl arnekirrek, <sup>21</sup> rap angkek, “Ingkartay! Nga ngwangk-antey apey-alhemer, aytetayt atyenih itetharl anemer! <sup>22</sup> Aleyan atha ngenhant tnakeyel, Akngey ntwa aytenih, ra kel ngkweng awelhem.”

<sup>23</sup> Jesus ikwer-warl angkek, “Aytetengkw ngkwenh itethirreyen arrpemarl.”

<sup>24</sup> Martha-el renh tyernek, “Ayeng akalty, ra iteth akemirreyen arlta ingkernel.”

<sup>25</sup> Jesus ikwer-warl angkek, “Ayengarl ran ipmepenh itetheley-angkeran. Ingwerel ayenh tnakenty, ra intem-antey iteth aneyen. <sup>26</sup> Ra ayenh tnakenty, ra intem-antey ilwey-angen, iteth aneyen. Ntwa ayenh tnakeyel?”

<sup>27</sup> Martha angkek, “Ya Ingkartay! Atha ngenh tnakem, ngan Akngey-kenh alerikw Christ-arl, renhey-antey Akngeyel ra arrwekelemy-rnem ilek ahern-areny-rnem-warl thwenetyek, renh-rnem ingkerrenh itethiletyek.”

<sup>28</sup> Alakenh-anyem angkek-penh ra Mary-warl angkey-alpek, “Akalty-anthey-angker kel ra apetyek, ra ngkweng-anem yangkelhek.”

<sup>29</sup> Mary ra anamerl-antey akemirrerl-alhek, ikwer-warl alhek. <sup>30</sup> Jesus ra tawen-warl alhey-angenh-antey, ra akwerrel-antey anek. <sup>31</sup> Akngerr akarrirek ikwer-atherr-warl arternpiletyek. Rernem Mary renh arek, rarl anamerl-antey warl-they tyerrelhenhek aketh-warl, aweng-warl alhenty-arrpantey. Rernem renh apenten, <sup>32</sup> Mary Jesus-warl apetyek, ampwethel-atherr arrernelhemel. Ra renh ilek, “Ingkartay! Nga awank-antey nenh-warl apey-alhemer, aytetayt atyenih iteth-anteyarl anemer.”

<sup>33</sup> Jesus-el arek, rarl artnenh, Jew ingwer-rnem artnenh arrpemarl. Ranem amperrngirrek ikwer-rnem.

#### *Anayntileyel: Ra artewentyel iterrek, rernemarl ikwer irrpelthirrenh, ipmepenh itethiley-angenh-arrpantey.*

<sup>34</sup> Ra renh-rnem ayernek, “Nthenh-warl arrantherr arrewaly renh irrtyert-akwernek?” Rernem renh ilek, “Ingkartay apetya, intwaretyek.”

<sup>35</sup> Jesus-anem artnek. <sup>36</sup> Jew-rnem angkerrek, “Ran Lazarus-ek artewentyel ilkelhek.”

<sup>37</sup> Ingwer-rnem alakenh angkerreh, “Ra artwa aparrngantarl annga rlkelhilek awankanrlterrak ilkawakert, ran apetyey-angenh arrewaly yanh mwerriletyek!”

#### *Jesus-el Lazarus ipmepenh itethilemel akemelhileyl*

<sup>38</sup> Jesus aleth-antey amperrngirrenh. Ra intey-warl alhek intwaretyek. Intey-itwek rernem apwert ilkwa arriw arrngertewek Jesus-el arey-alhek. <sup>39</sup> Jesus-el renh-rnem ilek, “Apwert ilkwa yanh arnangelhilenherr-arey arriw-they.”

Martha angkek, “Ingkartay! Arrewaly ayntek arlta 4-ek-atwety, aley-anem ra arrewaly inteng-anem inteyel.”

<sup>40</sup> Jesus angkek, “Atha ngenh kel ilek, ntwa ayenh tnakenty, ntwap areyenh, Akngey rlterrak ilkawakert inngarl aneyel!”

<sup>41</sup> Rernem apwert renh arnangelhilek intey-they. Jesus-arl alker-warl itnywenemel angkek, “Akngeway! Ayeng ngkweng inkwerelheyl, ntwarl ayenh awek. <sup>42</sup> Ayeng kel akalty ntwa ayenh aleth aweyel, ayengarl angkeyel-anem, nenh-rnem akalty anetyek, ntwarl ayenh thwenek.”

<sup>43</sup> Ikwer-penhan Jesus artewentyel arlek, “Lazarus-ay! Kel tyerrelha!”

<sup>44</sup> Lazarus ranem tyerrellek intey-they arrewaly-kenh arnkawakert-antey. Rernem arnkwa renh iltya ingkethay lheley-angenh-antey. Rag-el innerr artelhenh-antey. Alakenh Jesus-el renh-rnem ilek, "Arnkwa ikwer-they lhelenherr-arey, ra apmer-warl alpey-akenh." Akngerrel Jesus renh tnakenh, rernemarl renh arek, rarl Lazarus renh itethilek.

*Atyetyart-rnem angkerreyel, nthakenh Jesus renh ipmek atwetyek*

<sup>45</sup> Ingwer-rnem Mary-kenh apmer-warl alhek-rnem, rernem Jesus renh arek, ra Lazarus renh itethilek arrewaly-penh. Rernem Jesus renh-anem tnakemel apentek.

<sup>46</sup> Ingwer-rnem alpek Jerusalem-warl. Rernem Pharissee-rnem iley-alpek, Jesus-elarl Lazarus renh itethilek. <sup>47</sup> Pharissee-rnem anyentirrek, rernem angkerretyek atyetyart ingwer-rnem-then. "Nthakenh anwantherr artwa renh ileman? Ra ilek-ilek mpwareyl rlterrk ilkwakertel. <sup>48</sup> Anantherr renh arternpiletyek rernem renh apentekkerr, Rome-arenay atyetyart-rnem anwekantherr ahelirrekerr. Rernem tyaty ilkwa atakekerr, anwenhantherr Israel-arenay-rnem atwekerr arrpemarl."

<sup>49</sup> Council-rnem artwa anyent itnan Caiaphas-arl. Ra ingkart atyetyart anenh tyaty ilkwitwek. Ra ingwer-rnem-warl angkek, "Arrantherr arwengkarl, iterl-arey-angenh!" <sup>50</sup> Anwantherr renh menty tyarleventy atwety-angenh, Rome-arenayel-rnem anwenhantherr ingkerrenh-antey atwem. Anwantherr artwa anyent atwenty, Rome-arenayel-rnem anwenhantherr menty arem atwety-angenh. Alakenh-angkwarr ra katy ilwetyek ingkerrenhek." <sup>51</sup> Caiaphas ra ament angkey-angenh, Ingkart-kenh-angkwarr arrwekel angkek arraty-angkwarr, Jesus ra Jew ingkerrenhek katy ilwem, rernem iteth anetyek. <sup>52</sup> Arraty innga Jesus ra Jew-rnemekant katy ilwey-angenh. Ra Ingkart-arenay ingkerrenhek ilwek, apmer arpanenh-arenay-rnemek, renh-rnem anyentelhiletyek. <sup>53</sup> Ikwer-penhan Jew-kenh atyetyart-rnem iterrenh, nthakenh rernem Jesus renh ipmek atwetyek.

<sup>54</sup> Jesus-el iterl-arek, Jew-rnemarl ikwer angkerrenh, renh atwetyek. Alakenh-they ra Judea-ampenyel alhey-angenh, ingkerrenhel renh arekerr. Ra Jew-rnem-kenh atyetyart-rnem-kety arlengkewelhek. Ra tawen akely-warl alhek arlengkewelhemel, itnan Ephraim, apmer arlpaw-they arrerentyel. Ra ikwer-itwek anenh kwertengerl ikweren-rnem-akert.

<sup>55</sup> Jew-rnem Jerusalem-warl akarirrenh apmer arpanenh-they, Anperarl Alhek "Passover" tyenkerr arlkwetyek. Arlta arrerirrek arrpemarl. Rernem tyenkerr atyenhilek, akngerrel arlkwetyek. <sup>56-57</sup> Atyetyart ilkwernem rernem Jesus renh antwerrketyek-arrpantey arrkernelhenh Pharissee-rnem-then Jerusalem-itwek-antey. Rernem ingkerrenh ilek, "Arrantherr Jesus arenty, arrantherr anwekantherr iletyek." Ikwer-penhan ingkerrenh Jesus ikwer nthwenh. Rernem tyaty ilkwitwek akarirrek, rernem angkerrenh, "Jesus ra nthakenh apmer nheng-warl apetyey-angenh ngay?"

## 12

*Mary-el anter mwerr-angker intey-angker Jesus ingkatherr aperneyel*

*(Matthew 26:6-13; Mark 14:3-9)*

<sup>1</sup> Arlta 6-penh Anperarl Alhek "Passover" tyenkerr arrangkw-antey arlkwetyek-anek. Jesus tawen akely-warl alhek, itnan Bethany, apmer irrkatty ikwer-warl ra artwa Lazarus awank ipmepenih itethilek-warl. <sup>2</sup> Martha-el-then Mary-el-then amern ampernek ikwer, ra arlkwetyek apmer ikwer-itwek. Artwa Lazarus ikwer-itwek anenh arrpemarl. Angkwerikw Martha-el amern arlperryilemel anthek.

<sup>3</sup> Mary-el anter mwerr-angker intey-angker inek, rarl arrwekel man akngerrel payemelek. Anter renh-anem mwerr-angker intey-angker Jesus ingkatherr-warl thelek, alta kapwert-penhel-anem irrarkemel. Akngerrel anter renh internek mwerr-angker warl ikwer-itwek.

<sup>4</sup> Kwertengerl anyent anenh arrpemarl, itnan ikweren Judas Iscariot-arl. Artwa irrkatty rey-antey rarl ahlengkw-rnem-warl Jesus renh ahayiweyeh, ipmek atwetyek.

<sup>5</sup> Judas ra arek, Mary-elarl Jesus-kenh ingka atherr-warl anter thelenh, altel iparem. Ra ingwer-rnem ilek, "Arelh yanhelan anter arimpel. Ra anter renh tharlemiley-angenhenharl 300 thilp ngkwelty inetyek, ra ngkwelty renh-rnem anthemel-anem man-weny-rnem angayakw-rnem-then." <sup>6</sup> Judas el kelhel-angenh man-weny-rnemek amern-weny-rnem-thenek, arrangkw. Judas-el ngkwelty-rnem akwetyen kwertengerl ingwer-rnem-they. Ra man atnyeneneh yakweth akelyel. Ra irryterl yakweth akely-they inenh. Anyelkawarrarlap ran.

<sup>7</sup> Jesus-el Judas renh ilek, "Renh Iltey-angenh! Mareny-angkwarr ra ayenh anterel apernek, ingwer-rnemel ayenh awenng-warl akwerneyek." <sup>8</sup> Man-weny anayntem

intem-antey arrekantherr-itwel. Ayeng arrekantherr-itwel aney-angenh intem-antey ahern nhel. Arrantherr nthakenh ayenh arey-angenh ahern nhenh-itwek intem-antey. Lyert arrantherr atyengant iterretyek."

*Atyetyart ilkvernem angkerreyel Lazarus ipmek atwetyek*

9 Jew-rnemel awek, Jesus ra Bethany-itwek anehn, rernem alhek nthwetyek ikwer. Rernem alhek Lazarus renh aretyek arrpemarl, renharl arrewaly-penh Jesus-el itethilek. 10-11 Rernem Lazarus itetharl arek-penh, akngerr ingwer-rnem Jew-kenh-angkwarr-kety ipmelhek-anem, Jesus-angkwarrant rernem apentenh. Atyetyart ilkvernem alakenh-kety arkarirrenh. Rernem anyentirremel angkerrek, Lazarus-then ipmek atwetyek.

*Jesus Jerusalem-warl apetyeyel*

(Matthew 21:1-11; Mark 11:1-11; Luke 19:28-40)

12 Jew-rnem akngerr akarirrek arrwekel-antey Jerusalem-itwek, Anperarl Alhek "Passover" amern tyenkerr arlkwetyek. Rernem awek Jesus-arl apetyenh Jerusalem-warl. 13 Waly-rnem rernem akalthen ikwer inkwerelhemel. Jerusalem-they rernem alhek, Jesus renh rlwatyeyek, rarl apetyenh ikwer-rnem-warl-athek. Rernem arkerl-apenh, "Akngay ikwer anwantherr inkwerelhey! Akngayel anwenhantherr arrwekel ilek, renh anwekantherr-warl thwenetyek, ra atyetyarti anwekantherrenh ingkerrenhek anetyek. Akngay ra inkwerelheyel ikwer. Akngayel renh arntarnt-areyel. Israel-areny-kenh atyetyart ilkwa. Mwerr renh tnakayel ingkerrenhel."

14-15 Kel Jesus-el tangkey-anem arey-alhek. Ra tangkey ikwer-warl nganerl-alhek, iwerrel-antey alhenh. Angka nhenh irrkatty-antey Akngay-kenh pip arrwekeleny-itwek ayntenh-antey: "Jerusalem-areny-rnem arrantherr aterirrey-angenh anetyek! Atyetyart anwekantherrenh apetyeyel, tangkey-akert." 16 Kwertengerl ikwerenhr-nem angka arrwekeleny ikwer iyelpelirrekarlarl. Ingwer-ingeran Akngayel Jesus renh itethilek-penh, ra apmer irrwerl-warl alpek-penh, rernem iterl-arek-anem, Akngay-kenh pip arrwekeleny angka arrwekel ayntenh-angkwarr-antey.

**Anayntileyl: Angka arrwekel ayntenh Zechariah 9.**

17-18 Akngerr awank anehn apmer Bethany-itwek. Rernem Jesus anngetherr arek, Lazarus renharl itethilek. Lazarus ra intey-they tyerrelhek. Akngerr Jerusalem-warl alpek, rernem ingwer-rnem iley-alpek, renharl Jesus-el itethelek-penh. Alakenh-they akngerr akarirrek, Jesus renh rlwatyeyek. 19 Pharisee-rnemel akngerr arek. Rernem angkerrenh, "Nthakenh anwantherr irreman? Akngerrelarl Jesus renh apentyeyel angkwarran!"

20 Greece-areny-rnem ingwer-rnem Jerusalem-itwek arrwekel-antey akarirrek arrpemarl, Anperarl Alhek "Passover" tyenkerr arlkwetyek, inkwerelhemel. 21 Kwertengerl anyent itnan ikwerenhr Philip, ra Bethsaida-areny Galilee-ampeny. Ra anehn Jerusalem-itwek arrpemarl. Greece-areny-rnem Philip-warl alhek. Rernem angkek ikwer-warl, "Ananther ilkelheyel, Jesus aretyek." 22 Philip alhek Andrew-warl, renh iletyek. Ratherr atherr-antey alhek, Jesus renh iletyek.

23 Jesus ilelhek, "Arlta atyenh arrer-anem, Akngayel ayenh rlterrkileyen, ayeng atyetyart ingkerrenhek anetyek rlterrk ilkwakert, ingkerrenhel ayenh iterl-aretyek Artwa Impen Akngay-kenh. 24 Angka arraty innga ayeng ilelheyel arrekantherr, arrantherr ayenh iterl-aretyek. Artwa ingwerel ntang anyent ahern-warl iwem, amern lyapetyek. Ntang anyent ikwer-they akngerram-akngerrirreyen. Ntang anyent ywerreyen, ra intwenhey-alpeyen. Ikwer-they ntang akngerram-akngerr-anem irrem."

**Anayntileyl: Alakenh-anyem artwa anyent-they akngerram-akngerrirreyen arrpemarl. Ra ilwek. Rernem renh akwernek ahern intey-warl, ntang akvernem-ampeny. Ikwer-penh ra itethirrenhey-alpek, amern ntang intwenhey-alpek-ampeny. Ingkart-kenh-angkwarr alakenh aynteyel. Akngerrel renh tnakayel, rernem iteth-anem irrem intem-antey.**

25 "Nga amentewarl alhenty, ngap intem-antey iteth aney-angenh. Ntwa Akngay-angkwarr apentynta, nga intem-antey iteth aneyen. 26 Ingwerenty atyeng warrkirretyek, ra ayenh arraty apenterl-ayntetyek. Warrkenh atyenh-rnem ingkerrenh alhayntem atyeng-angkwarr intem-antey. Rernem atyeng warrkirrenty, Akngayel renh mwerr antwem."

*Jesus ilelheyel kwertengerl ikwerenhr-nemek*

27 Jesus kwertengerl ikwerenhr-rnemek ilelhek, "Ayeng amperrngirreyel. Nthakenh ayeng angkey-angenh. Ingwer-rnemel ayenh irrwampenh-antheyen, rernem ayenh atweyen. Kel menty rernem ayenh atwey. Akngay atha ayerney-angenh, ayenh itethiletyek. Ayeng ahern nhenh-warl apetyek, ingkerrenhek katy ilwetyek. 28 Akngayay!"

Arraty-angkwarz alakenhey, rernem ngenh iterl-arayntetyek, nga rlterrk ilkwakert aneyel.”

Ingkart-anem irrwerl-they angkek, “Ayeng arrwekel-antey ingkerrenh-warl lwewar-ernelhelok. Aley-anem ayeng ikwer-rnem-warl lwewarrnelhem arrpemarl, ayeng rlterrk ilkwakert aneyel.”<sup>29</sup> Angka artewenty innga. Ingwer-rnemel awek, awely-awely angkenty-apeny. Ingwer-rnem angkerrenh angel Jesus-el angkenty-arrpantey.

<sup>30</sup> Jesus angkek ikwer-rnem-warl, “Arrantherr iterreyel ra atyeng-warl angkenty-arrpantey. Arrangkw. Ran arrekantherr angkek, arrantherr renh iterl-aretyek, ra rlterrk ingga aneyel.”<sup>31</sup> Ingkartel ingkerrenh akngakeyenh, apmwa apek mwerr apek. Arrenty ra atyetyart ahern nhenh-itwek aneyel. Aley-anem Ingkartel renh irrenteyel.<sup>32</sup> Ingwerel-rnem ayenh tyweneyen. Ayeng arwerl iylpeyl-atherrel tywenelheyen. Ayeng ilweyen. Athan apmwan ingkerrenh-they iweyen. Atha atyeh-rnem ingkerrenh atyeng-warl akngetyeyen. Ingkerrenhel ayenh tnakeyenh.”<sup>33</sup> Jesus-el angka ikwer-rnem anayntilek, nthakenharl ra ilweyen.

<sup>34</sup> Ingkerrenh Jesus-warl angkek, “Arrangkw. Akngey-kenh Artwa Impen renh rernem tywenemel atwey-angen. Akngey-kenh pip alakenh aytetyel: ‘Christ ra aleth-antey iteth aneyen.’ Angwenharlart ran, Akngey-kenh Artwa Impen?”

<sup>35-36</sup> Jesus ikwer-rnem ilelhek, “Akngey-kenh lyenenty-akert arrwekantherr-itwek akeyl arwa anem ahern nhenh-itwek, arrer-anem ayeng alpeyen. Arrantherr arraty-angkwarz apenterl-ayntetyek, atyeng-angkwarz lyententy-akertel iwerr arraty apenteyel-apeny.”

<sup>37</sup> Jesus-el ilek-ilek mpwarenh ingkerrenh-itwek, rernem aretyek. Ingwer-rnem irrpeltherrenh, ikwer awelhey-angen.<sup>38</sup> Angka nhenh awank-akerr angkakert Isaiah-el arrwekel ingkwernek. Angka arraty innganem irrek. Isaiah-kenh alakenh ayntenh: “Ingkartay! Angwenhel anenhantherr tnakem, angka ngkwenh anwantherr ileyel? Arrangkw. Ingkerrenhel tnakey-angen-antey. Angwenhel arek, ntwa ilek-ilek-angkwarz mpwarenk rlterrk? Arrangkw. Rernem arey-angen-antey.”

<sup>39-40</sup> Isaiah-el angka ingweran ingkwernek awank-akerr: “Ingkartel renh-rnem mpwarek, rernem aparrng-apeny anayntetyek, Ingkartel renh iterl-arey-angen. Renh-rnem mpwarek arrpemarl, rernem angka Ingkart-kenh awey-angen anetyek. Alakenh-anyem-they rernem Ingkart-kenh-angkwarz angkepirrey-angen! Ra nthakenh renh-rnem mwerriley-angen.” Alakenh Isaiah-el awank-akerr ingkwerneh. Alakenh-anyem-they Jew-kenh atyetyart-rnemel Jesus apentey-angen.<sup>41</sup> Awank-akerr Ingkartel Isaiah ilek, Jesus ra arawerrng rlterrk-akert aneyen. Alakenh-anyem Isaiah-el angka arrwekel ingkwernek Jesus-wenyankel.

<sup>42</sup> Jew atyetyart ingwer-rnemel Jesus renh tnakenh. Rernem aterirrehn Pharisee-rnem-kety, ingwer-rnemek ilelhey-angen. Rernem ilelhenty Pharisee-rnemel, renh-rnem iltem Jew-rnem-kenh tyatik ikwer-they irrentemel.<sup>43</sup> Atyetyart-rnem ilkelhenn ahern-areny-rnemel renh-rnem tnaketyek, Pharisee-el-rnemant.

### *Jesus ahern nhenh-warl apetyek, ingkerrenh itethiletyek*

<sup>44</sup> Jesus artewentyel angkek, “Ingwerel apek ayenh arenty, ra Akngey-then-antey arem arrpemarl, rarl ayenh thwenek nhenh-warl.”<sup>45</sup> Ingwerel ayenh tnakenty, ra Akngey-then-antey tnakem arrpemarl, rarl ayenh thwenek nhenh-warl.<sup>46</sup> Ayeng ahern nhenh-warl apetyek lyenenty impen ingkerrenhek anetyek. Ingwerentyel ayenh tnakenty, ra iterl-arem-anem, ra nthakenh ingwemerntel aney-angen arrangkw. Ayeng lyenenty impen apetyek, ingkerrenh lyenenty ikwer-itwek anetyek, Akngey-then-anem iterl-arayntetyek. Lyenenty-akertel iwerr arraty apenteyel-apeny.<sup>47</sup> Ingwer-rnemel angka atyeh awem-penh rernemap ipmelhem-anem, atha nthakenh renh-rnem arrkerney-angen, apmwan antwemel, arrangkw. Ayeng apetyek, ingkerrenh itethiletyek.<sup>48</sup> Ingwerentyel menty angkem atyetyeg, angka atyeh-kety intwemelirrenty, arlta ingkernelant ra apmwelhileyel angka atyeh-angkwarz.<sup>49</sup> Atha amentel angka nhenh iley-angen. Akngey rarl ayenh thwenek, atha ikweren-angkwarz ileyel, rarl ayenh ilanthek-angkwarz.<sup>50</sup> Arrantherr angka ikweren tnakenty, arrantherr iteth intem aneyenhan. Alakenh-they atha arrekantherr ileyel arraty-angkwarz Akngey rarl ayenh ilanthek-angkwarz-antey.”

## 13

### *Jesus-el kwertengerl ikweren-rnem ingkety lheweyel*

<sup>1</sup> Jew rernem ngwangkant akarirreyel, rernem Anperarl Alhek “Passover” tyenkerr arlkwetyek. Jesus-el iterl-arek-anem, arlta ikweren arrer-anem, ra Akngey-warl

alpetyek ahern nhenh-they. Jesus amperngirrek ikwerenh-rnemek, renharl apenten-hrnemek ahern nhenh-areny-rnem. Ra ikwer-rnem ilkelhenh intem-antey ilwetyek-atwety.

<sup>2</sup> Ingkeny aylpenhekel, Jesus kwertengerl ikwerenh-rnem-akert anyentirrek, amern arlkwetyek. Judas Iscariot kwertengerl anyent ra anen arrpemarl ikwer-rnem-itwek, ra Simon-kenh alerikw. Arrenty ra Judas arrwekel-antey ilek, Judas ra Jesus renh ahayiwyetek ahelegengkw-rnem-warl.

<sup>3</sup> Jesus ra iterl-arelhel, Akngeyelarl renh rlterrklek, ra ingkerrenhek atyetyart anetyek. Ra akaly arrpemarl, ra Akngey-they apetyek, ra Akngey-warl alpem arrpemarl. <sup>4</sup> Rernem amern arlkwenharl-antey, Jesus arnkwa arlpenty lhelek, ahernwarl arrernemel. Aneny ra arertnelhek rag-el. <sup>5</sup> Kwaty-anem ra inpek rtnewarl. Anyentarl-anyentarl Jesus-el kwertengerl ikwerenh-rnem ingkety irralkeynek rag-el artwerretyilemel. <sup>6</sup> Jesus ra apetyek Peter-warl. Peter-el ayernek-anem, "Ingkartay! Ingka ayen-hthen ntwa irralkey-angenh."

<sup>7</sup> Jesus-el renh tyernek, "Lyertan arrantherr iterl-arey-angenh, atharl arrenhanther-renh ingkety irralkeyneyel. Ingwer-ingerant arrantherr iterl-areyehan."

<sup>8</sup> Peter ikwer arrngert angkek, "Ingka atyenh irralkey-angenh, menty!"

Jesus ikwer-warl angkek, "Nga arlkarirrenty, atyenh-wenyarl nga!"

<sup>9</sup> Peter ikwer-warl angkek, "Ingkartay! Ingka atyenh kwaytel irralika, akwatherr-then akapwert-then ingkerreh-antey!"

<sup>10</sup> Jesus angkek ikwer-warl, "Ingwer-rnem ingkerrenh irralkenty, rernemap alyelk ingkerrenh-anemarl, aternng-weny. Ahernel alhenty, rernem ingketyant aternng. Arrantherr alyelk, anyentant arrangkwarl alyelk-wenyarl." <sup>11</sup> Jesus ra arrwekel-antey iterl-arenh, anyentelarl renh ahayiwyen ahelegengkw-rnem-warl. Alakenh-anyem ra angkek anyent ikwer. Anyent apmwa anen ikwer-rnem-itwel.

<sup>12</sup> Jesus ra renh-rnem ingka irralkek-penh, ra arnkwa arlpentyel-anem alypek angkep arrpemarl. Ra arrernelhek arrpemarl, rap renh-rnem ayernek, "Ilekek atha arrenhanther Ingkarty 'Ingkart' itneweyel, 'Akalty-anthenh-anthenh-then.' Alakenh-anyeman arraty-angkwarrarl. Innga ayeng Ingkart arrekantherenh akalty-anthenh-anthenh-then. Arrantherr warrkenh atyenh-rnem. Atha arrenhanther Ingka lheweynek. Arrantherr irrkatty-angkwarr anetyek, ayeng aneyel-angkwarr-antey. Arrantherr-anemarl ingkern ingka lhewerr-ayntetyek. <sup>15-16</sup> Ayeng arrekanther lwevarrelhelhek, arrantherr arraty-angkwarr apentetyek. Arrantherr atyenh-angkwarr anayntetyek. Atha arrenhanther arraty-angkwarr ileyel, warrkenh ingwerenty nthakenh atyetyart ikwerenh-angkwarr ilkwa aney-angenh. Artwamp-angkwarr akely-antey aneyel. Artwa ra ingwer thwenem angkakert. Angkakert ra atyetyart ikwerenh akely-anteyarl aneyel. Warrkenh nthakenh ilkwa arrpem ilelhey-angenh. <sup>17</sup> Arrantherr mwerr-angkwarr alakenh apententy, Akngeyel arrenhanther arntarn-areyeh inkwerelhemel.

<sup>18-19</sup> Arrantherr alyelk aneyel mwerr-angkwarr. Anyentant alyelk-weny aneyel apmwa. Ingwer-inger artwa anyent ra atyengety intwemelirrenty arrantherr areyeh. Akngey-kenh angka aynteyel alakenh: 'Artwa ikwer-angkwarr atha amern-then aker-then arlkwem, ra atyengety intwemelirrem-anem apmwangkwarr.' Alakenh-anyem ayeng artwa ikwer-penh angkeyel arrwekel, arrantherr atyeng awelhetyek. Arrantherr renh areyeh atyengety intwemelirrenty, arrantherr angka atyenh iterl-areyeh, inngarl ayengan, Akngey-kenh alerikwan. <sup>20</sup> Atha arrenhanther arraty innga ileyel. Atha arrenhanther angka atyenh-akert thweneyel, arrantherr apmer arrpanenh-warl ilerl-apayntetyek. Ingwerenty arrekanther awelhenty inkwerelhemel, ra atyeng-then-antey awelhem inkwerelhemel. Ra akngey atyenhek awelhem arrpemarl, rarl ayen thwenelek."

*Jesus-el kwertengerl-rnem ileyel, Judas-elarl renh ahelegengkw-rnem-warl ahayiwyen*

<sup>21</sup> Jesus ra ilehek-penh ra alpwelyirrek. Ra kwertengerl-rnem ilek, "Innga atha arraty arrenhantherenh ileyel, kwertengerl anyentel ayen ahayiwyen ahelegengkw-rnem-warl, rernem ayen antwerkemel atwetyek."

<sup>22</sup> Kwertengerl rernem ywarn iterrek-anem. Rernem annant-arey arerrek ywarn iterremel. <sup>23</sup> Kwertengerl anyent ingwer Jesus-itwek anen. Jesus ra ikwer artewenteyel ilkelhenh intem. <sup>24</sup> Peter-el iltyelant renh ilek, "Jesus ayerna, angwenhek ra angkeyelan."

<sup>25</sup> Ra Jesus renh ayernek, "Ingkartay! Angwenhel ngenh ahayiwyen?"

<sup>26</sup> Jesus-el tyernek, "Atha amern akely arlkwerrng-warl apelyilem, athap anyent renh anthem, artwa anyent renhey-antey irrkatty-antey rarl ayen ahayiwyen." Jesus-el amern akely arlkwerrng apelyilek, renh Judas anthemel. Simon Iscariot-kenh

alerikwarlap ran. <sup>27-30</sup> Judas-elan amern anamerl-antey inerl-alhek. Arrenty Satan ikwer-warl antelhek.

Jesus angkek, "Judas, anamerl alha, nga ilkelheyel-angkwarz, ntwa mpwaretyek." Judas-el man atnyeneng yakwethenp. Kwertengerl-rnem iterrek, Jesus-el Judas ilanthek, rang tyenkerr atyenhlentyek-athen amern payemeletyek. Ingwer-rnem iterrek, Jesus-elarl Judas thwenentyek-athen, man man-weny-rnem antheynetyek-arrpantey.

### *Jesus-el kwertengerl-rnem ileyel, rernem mwerr-angkwarz anayntetyek*

<sup>31</sup> Judas alhek-penh Jesus-arl kwertengerl-rnemek angkek, "Ingwerel-rnem ayenl iterl-areyeh Akngey-kenh Artwa Impen, ayengarl rlterrk ilkawakert aneyel, Akngeyelarl ayenl rlterrikilek. Rernem iterl-areyeh Akngey rlterrk ilkawakert aneyel arrpemarl. Rernem ikwer inkwerelheyenp. <sup>32</sup> Arraty innga! Ayeng Akngey-kenh Artwa Impen. Akngey ra lwevarrelheyley ingkerrenh-angkwarz, Artwa Impen ayeng rlterrk ilkawakert aneyel. Lyert ayeng lwevarrelhem."

<sup>33</sup> Atyen-h-rnem, alerl ayeng alyep arrekantherr-itwek anem. Ikwer-penh arrantherr atyeng ywarn nthweyenp, arrantherrap nthakenh ayenl arey-angenp. Arrantherr iterl-areyel apek, atha Jew atyetyart-rnem arrwekel-antey ilek-penh? Atha ilek alakenh, 'Ayeng apmer ingwer-warl alpem. Arrantherr ywarn apmer ikwer-warl alpeyeh.' Aleyan atha angka irrkaty arrekantherr ileyel. Ayeng apmer ingwer-warl alpem. Arrantherr ikwer-warl alpey-angenp arrangkw. <sup>34</sup> Alakenh mwerr. Kel atha arrekantherr angka Akngey-kenh ingwer-anem arrenerm alakenh. Arrantherr ingwer-rnem arntarnt-arayntetyek, atharl arrenhantherr arntarnt-areyel-apeny. <sup>35</sup> Arrantherr mwarrant-arey anetyek. Alakenh-angkwarz ingwer-rnemel arrenhantherr iterl-arem, arrantherral kwertengerl atyenh-rnem aneyel."

### *Jesus angkeyel Peter-warl, "Nga ilelheyenp, ntwa ayenl iterl-arey-angenp-arrpantey"*

<sup>36</sup> Simon Peter-el Jesus ayernek, "Ingkartay! Nthenh-warl ngan alheyenp?"

Jesus-el renh tyernek, "Ayeng apmer ingwer-warl alpem. Nga ikwer-warl alerl alpeyeh, ingwer-ingerant-anem alpeyeh arrpemarl."

<sup>37</sup> Peter-el Jesus ayernek, "Ingkartay! Ilek-kety ayeng ngkweng-warl alpeyeh? Ingwer-rnemel ngenh atwekerr, atha ngenh arntarnt-arem. Kel rernem ayenl ipmek atwetyek, alakenh-anyem mwerrarl. Ayeng aterirrey-angenp, katy ngkweng ilwetyek ayeng arlka menty anthelhetyek."

<sup>38</sup> Jesus-el Peter renh ilek, "Nga katy atyeng ilwey-angenp. Atha ngenh arraty ileyel, ingwer-inger tywek-tywek irrwey ingwepenh arlkey-aytekerrem-awaty, nga irrpety-inger ilelhetyek, ntwa ayenl iterl-arey-angenp akwerrp-arrpantey."

## 14

### *Jesus-el iwerr mwerr mpwareyel Akngey-warl-athetk, anwantherr apent-ayntetyek*

<sup>1</sup> Jesus kwertengerl-rnemek angkek, "Artewentyl iterrey-angenp anayntetyek. Akngey renh tnakay, ayenl tnakem arrpemarl. <sup>2</sup> Akngey atyenh-kenh apmer ilkwa. Irrtyerrey-angenp atha arraty innga arrenhantherr ileyel. Ayeng arrwekel alpem, apmer arrekantherr mpwaretyek. <sup>3</sup> Ayeng apey-alpeyeh, atha arrenhantherr ikngwerl-alpetyek apmer nhak-warl, arrantherr aney-alpetyek Akngey-kenh apmer-itwek. Arrantherr atyeng-itwek anetyek. <sup>4</sup> Arrantherr iwerr iterl-areyel, ayengarl ikwer-warl alpeyeh."

<sup>5</sup> Thomas angkek, "Ingkartay! Anwantherr iwerr ikwer akwerrparl. Nthakenh anwantherr iwerr ikwer-warl alpeyeh?"

<sup>6</sup> Jesus ilelhek Thomas-ek, "Ayengarl iwerr anyentarl Akngey-warl-athetk. Atha angka arraty ingkerrenhek iley-angker. Atha anyentarl arrewaly-penhan itethilem. Nthakenh ingweretyek alpey-angenp Akngey-warl atyeng-wenyel. Atyeng-angkwarrant nga Akngey-warlan alpem. <sup>7</sup> Arrantherr ayenl iterl-arenty, arrantherr Akngey atyenh renh iterl-arem arrpemarl. Kel arrantherr ayenl arek-penh, arrantherr ikwer akalty."

<sup>8</sup> Philip angkek Jesus-ek, "Ingkartay! Anwantherr Akngey aretyek, anwantherr ikwer inkwerelhetyek."

<sup>9</sup> Jesus-el Philip renh ilek, "Ayeng arrekantherr-angkwarz alhenh, arrantherr ayenl iterl-arey-arenyp. Ingwerentyel ayenl aretyek, ra Akngey arek arrpemarl. Kel arrantherr Akngey renh arek. <sup>10</sup> Nga atyeng irrpelthirreyel-antey. Ntwa ayenl tnakey-arenyp, Akngey atyeng-itwel aneyel, ayeng Akngey ikwer-itwel aneyel arrpemarl. Angka anyent-antey. Angka atyenh-weny ikwerenhp-angkwarz Akngey warkirreyel. <sup>11</sup> Arrantherr ayenl tnakey-arenyp. Akngey atyeng-itwel aneyel, ayeng ikwer-itwel aneyel arrpemarl. Kel arrantherr ayenl tnaketyekant, atharl angka ikwerenhp ilerl-apenh,

ayeng warrkirrenh ikweren-hangkwarr, arrantherr arek. <sup>12</sup> Atha arrenhantherr arraty ileyel. Arrantherr atyeng-angkwarr apententy, arrantherr atyeng-apeny mpwareyen-han. Ayeng Akngey-kenh apmer-warl alpemarl-kety, arrantherr ilek-ilek mwerr-angker mpwareyen-han. <sup>13</sup> Arrantherr ayenh ayernenty itna atyenh-angkwarr, ayeng arrekantherr awelhem, ilek-ilek arrekantherr mpwarem, Akngey-kenh-angkwarr. Alakenh-anyem ingkerrenhel Akngey renh iterl-areyenh, ra rlterrk ilkwakertarl aneyel. <sup>14</sup> Arrantherr ayenh ayernenty itna atyenh-angkwarr, atha alakenh mpwarem arrekantherr.”

*Jesus-el kwertengerl-rnem ileyel, ra Itnweng Rlwart thweneyen*

<sup>15</sup> Jesus-el kwertengerl-rnem ilek, “Arrantherr atyeng artewentyel ilkelhenty, arrantherr angka atyenh-angkwarr apentem. <sup>16-17</sup> Atha Akngey ayernem, ra Itnweng Rlwart arrekantherr-warl thwenetyek, arrenhantherr akalty-anthayntetyek, ranem arrekantherr-itwek aleth-antey anayntetyek. Ahern-arenyel Itnweng renh iterl-arey-angenh. Arrantherr renh iterl-areyel, nthakenh ra arrenhantherr iwerl-alhey-angenh. Ra arrekantherr-itwel intem-antey aneyenh. <sup>18</sup> Ayeng Akngey-kenh apmer-warl alpenty, nthakenh atha arrenhantherr iwerl-alhey-angenh. Ayeng arrekantherr-warl apey-alpeyenh. <sup>19</sup> Ingwer-ingeran ahern-areny-rnemel ayenh arey-angenh, arrantherr ayenh areyenh iteth-antey anngether. Arrantherr iteth areyenh atyeng-angkwarr. <sup>20</sup> Arrantherr ayenh iterl-areyenh, ayengarl Akngey-kenh-angkwarr aneyenh. Arrantherr iterl-areyenh ayeng arrekantherr-itwek aneyel arrpemarl. Arrantherr atyeng-itwek aneyel arrpemarl. <sup>21</sup> Ingwerenty angka atyenh-angkwarr apentem, atharl renh anthek. Akngey ikwer inkwerelheyel, ayeng ikwer inkwerelhem arrpemarl. Ayeng ikwer-warl aremirreyenh, ra ayenh iterl-arayntetyek.”

<sup>22</sup> Judas ingwer, Judas Iscariot-weny, ra Jesus renh ayernek “Ingkartay! Ilek ngan alakenh angkek? Ilek nga lwewarrernelhem anwekantherrant? Ahern-areny ingwer-rnem-alew?”

<sup>23</sup> Jesus angkek Judas-warl, “Ingwerenty ilkelhenty atyeng-angkwarr apenterly-antetyek, ra atyeng awelh-antem. Akngey atyenh ikwer ilkelh-ayntem arrpemarl. Aylak ikwer-warl apetyem arrpemarl, ikwer-itwek anetyek. <sup>24</sup> Ingwerenty atyeng-angkwarr-kety arlkirirrenty, angka atyenhk ra awelhey-angenh. Angka atyenh-wenyarl Akngey atyenh-kenh, rarl ayenh thwenek ahern nhenh-warl angka ikwerenh-akert.”

<sup>25</sup> Jesus angkek kwertengerl-rnem-warl, “Atha arrenhantherr angka arrwekel-antey ilek ayeng alpey-alenty. <sup>26</sup> Ingwer-inger ayeng Akngey-kenh apmer-warl alpenty-penh, ra arrekantherr-warl Itnweng ikweren-h thweneyen, ranem arrekantherr ilkwatherr anetyek arntarant-arem. Itnwengel arrenhantherr akalty-anthayntetyek angka ingkerren-hangkwarr, arrenhantherr iylpangkelhil-antetyek, angka weth atharl arrekantherr ilek-angkwarr, ayengarl arrekantherr-itwel anenhel. <sup>27</sup> Arrantherr artewentyel iterrey-angenh anetyek. Aterirrey-angenh. Atha arrenhantherr irrngerney-antham arrantherr mwarrant-arey anetyek. Ahern-areny-kenh-angkwarr arternpirrey-angenh arrangkw. <sup>28</sup> Arrantherr wetharl ayenh awek-penh, ayeng alpeyenh. Ikwer-penh ayeng apey-alpeyenh arrpemarl. Akngey ra atyeng-angkwarr ilkwa inga. Arrantherr atyeng inkwerelhey-arey, ayengarl Akngey atyenh-warl alpem. <sup>29</sup> Arrwekel weth atha arrekantherr ilek, arraty-angkwarr apent-antyntetyek-anem ayeng apey-alpey-alenty. <sup>30</sup> Ahern-areny atyetyart ra nhenh-warl apetyeyenh. Ran atyetyart atyenh-wenyarl. Alakenh-anyem-kety ayeng nthakenh arrpemarl angkey-angenh. <sup>31</sup> Ayeng Akngey atyenhk awelhem, ingkerrenh ahern nhenh-areny-rnemel iterl-aretyek, ayeng Akngey-kenharl.”

Ikwer-penh Jesus kwertengerl-rnemek angkek, “Kel-antey. Mpa, alhey anwantherr.”

## 15

*Amern grapes-akert*

<sup>1</sup> Jesus illehelk, “Ayeng arwerl grapes rarl. Akngey atyenh ran amern grapes arntarant-arey-angker-apeny. <sup>2</sup> Waly amern-akert-rnem mentyarl arem. Waly-rnem amern-weny-rneman ra akalthemel iwem, waly ingwer-rnem amern-akert-rnem irreyek. <sup>3</sup> Mwerr arrantherr arraty aneyel, angka atyenh-angkwarr ayntarrp-iley-angenh.”

**Anayntileyel: Anwantherr arratyirrem angka ikweren-hangkwarr, alyelk-anem, waly mwerr-rnem aneyel-apeny.**

<sup>4</sup> “Atyeng-itwel ana, ayeng arrekantherr-itwel anem arrpemarl. Waly akenty ra arlenyirrem, arrangkwarl. Alperr amentirrenty, amern aney-angenh-anemarl. Arrantherr amentirrenty atyengety arrantherr arrangkwarl, atyeng-angkwarr apentey-angenhan. <sup>5</sup> Ayeng arwerl grapes-apeny, arrantherr waly-rnem-apeny. Atyeng-itwel arrantherr anenty, ayeng arrekantherr-itwel anem arrpemarl, arrantherr arraty-angkwarr aneman. Atyeng-angkwarr aney-angenh ayeng arrekantherr-itwel aney-angenh arrpemarl. <sup>6</sup> Ingwerenty atyengety amentirrenty, ra apmwrreyen, alper-rarl apmwa arlenyirrem-apeny arrangkw. Warrkenh-rnemel alperr arleny-rnem rwewarl iwem-apeny. <sup>7</sup> Arrantherr atyeng-angkwarr apententy, angka atyenh iterl-aremel awelhenty, ayeng arrekantherr awelh-ayntem arrpemarl, arrantherr atyeng ayernenty, athap arrenhantherr arntarnt-arayntem. <sup>8</sup> Arrantherr arraty-angkwarr apententy, ingkerrenhel Akngey renh iterl-aremel tnakemel, ran rlterrk inngarl aneyel. <sup>9</sup> Ayeng arrekantherr ilkelheyel, Akngey atyeng ilkelheyel-apeny. Ayeng arrekantherr ilkelheyel, Akngey atyeng ilkelheyel-apeny. Atyengety intwemelirrey-angenh, intemantey apenterl-ayntetyek. <sup>10</sup> Ra atyeng ilkelheyel, ayeng ikwer awelheyelarl. Ra nthakenh atyengety intwemelirrey-angenh. Ayeng innga arrekantherr ilkelheyel irrkaty-angkwarr-antey. Arrantherr atyeng awelhenty, ayeng arrekantherr-itwel anem, arrekantherretty intwemelirrey-angenh.

<sup>11</sup> Atha arrenhantherr ilek, arrantherr irrngerney anayntetyek ayeng aneyel-apeny. Ayeng ilkelheylel, arrantherr irrngerney innga anayntetyek. <sup>12</sup> Nhenhan angka atha arrekantherr intem-antey arrenernek: Ayengarl arrekantherr-itwel mwerr-angkwarz aneyel-apeny, arrantherr ingwer-rnem-then mwarrant-arey anayntetyek. <sup>13</sup> Alakenh-anyem artwa ra ikwerenh-rnemek artewentyel ilkelheylel, rap arlka menty anhel-hem, ikwer-rnem katy ilwetyek, renh-rnem itethiletyek.”

**Anayntileyel: Jesus irrker-angkwarz arwa ilelhek.**

<sup>14</sup> "Arrantherr angka atyenh-angkwarr apententy aleth-antey, arrantherrap atyenh-rnemarl anem. <sup>15</sup> Lyertan atha arrenhantherr itnewem atyenh-rnem-anemarl. Aleyan arrantherrarl iterl-areyel angka atyenh-angkwarr, ayengan iterreyel-angkwarr. Arrantherran warrkenh-weny-anemarl. Atha arrekantherr angka ingkerrenh ilek, Akngey atyenthal ayenh ilek-apeny. Warrkenh-rnemel atyetyart-kenh angka ingkerrenh iterl-arey-angenharl, rarl iterreyel-angkwarr. <sup>16</sup> Arrantherr ayenh arrerney-angenh, atyetyart arrekantherr anetyek. Atharl arrenhantherr ayerrpilek, atyenh-rnem anetyek. Atha arrenhantherr ayerrpilek, arrantherr Akngey-angkwarr warrkirkayntetyek intem-antey. Arrantherr Akngey ayernenty atyeng-angkwarr, Akngeyel arrekantherr awelhemarl. <sup>17</sup> Atha arrekantherr ileyel arrpemarl, angka nhenn ayntetyel-angkwarr: Arrantherr mwerr-angkwarr anayntetyek, artewentyel ilkelh-ayntetyek ingwer-rnemek."

*Jesus ilelhek, ahern nhareny-rnem ikwer ilkelhey-angenh*

<sup>18</sup> Jesus kwertenggerl-rnemek angkek arrpemarl, "Ingwer-rnem ahern nhareny-rnem arrekantherr ilkelhey-angenharl. Iterl-arayntenherr-arey, arrwekel-antey rernem atyengety arlkarirrenh-apeny. <sup>19</sup> Arrantherr ahern-aren-y-kenh-angkwarr apententy, ahern-aren-y rernem arrekantherr inkwerelhemarl. Arrangkw. Atha arrenhantherr ingkerrenh ayerrpilek atyen-h-rnem-anem. Alakenh-they rernem arrekantherretty arlkarirreyel. Arrantherrap ikwer-rnem-kenh-wenyarl. <sup>20</sup> Iterl-arenherr-arey, atharl arrenhantherr arrwekel ilek. Artwa warrkenh anem, ranap atyetyart ikweren-h-angkwarr ilkwewenyarl arrangkw. Ahern-aren-yel atyen-h-rnem atwetyek arrkernelhem. Irrkaty-angkwarr rernem arrenhantherr atyen-h-rnem atwetyek arrkernelhem arrpemarl. Ingwer-rnem angka atyenhek awelhek, atharl ikwer-rnem ilek. Irrkaty-angkwarr rernem arrekantherr awelhem, arrantherran angka ikwer-rnem ilenty.

<sup>21</sup> Ahern-areny-rnem rernem apal anenh, Akngey renh iterl-arey-angenh, rarl ayen thwenek ahern nhenh-warl. Arrantherran atyenh-rnemarl. Rernem arrekantherr irrpelthirrem arrpemarl, atyeng irrpelthirrenh-apeny, ikwer-rnemant awelhetyek.  
<sup>22</sup> Apalarl rernem anenh arrwekel. Ingkartel renh-rnem nthakenh ayntarrp-iley-angenh, arrangkw. Angka atyenh awek-penh rernem apmwangkwarz-antey aneyel. Ingkartel renh-rnem tyatyemilem.

<sup>23</sup> Ingwerenty atyengety arlkarirrenty, rap Akngey-kety arlkarirreyel arrpemarl.  
<sup>24</sup> Atha ilek-ilek mpwarek, ingkerrenhel aretyek, Akngey riterrk ilkwa. Rernem anngetherr arek. Ingkerrenhel ayenh arek, ayengarl ikwer-nrem-itwek warrkirrenh. Rernem atyeng ilkelhey-angenh-antey, Akngey atyenhек-then, rernem atyengety intwemelirrek. Rernem apmwelhilek Akngey-kenh-angkwarr. <sup>25</sup> Akngey-kenh angka alakenh arrwekel

aynteyel: ‘Ingwer-rnem arwa atyengety arlkarireyelarl apmwangkwarrarl.’” Angka innganem irrek.

<sup>26</sup> Jesus-el kwertengerl ikwerenh-rnem ilek, “Atha arrekantherr-warl-anem Itnweng arrernem. Ra Itnweng Akngey-they apetyem, atyen-angkwarr arrenhantherr akalty-anthetyek arrayt-angkwarr. <sup>27</sup> Arrantherr ayen aytarenhey-alpenh awank-they. Alak-enh arrantherr ingwer-rnemek iley-areny angka atyen.”

## 16

<sup>1</sup> Ikwer-penh Jesus angkek kwertengerl ikwerenh-rnemek, “Atha arrenhantherr ingkerreh-angkwarr akalty-anthek, arrantherr atyengant awelh-ayntetyek, angkep intwemelirrey-angen. <sup>2</sup> Ingwer-inger Jew-rnemel arrenhantherr tyaty akely-they ir-renteyeh, innga. Ingwer-inger rernem arrenhantherr ipmek atweyen, angka Akngey-kenh arrayt-angkwarr-arrpantey. <sup>3</sup> Rernem Akngey iterl-arey-angenharl. Rernem ayen iterl-arey-angen arrpemarl. Alakenh-they rernem arrenhantherr ipmek atweyen. <sup>4</sup> Aleyan atha arrekantherr ileyel arrwekel arrantherr angka nhanyem iylpangketyek, atharl arrenhantherr arrwekel ilek-angkwarr, atwekerr-awayt.”

Ikwer-penh Jesus angkek kwertengerl ikwerenh-rnemek, “Awank-akerr atha angka arrekantherr iley-angenh-antey, ingwerel-rnem arrenhantherr atweyen.”

### *Itnweng Rlwart-penh*

<sup>5</sup> “Akngelyel ayen thwenek ahern nhenh-warl. Ayeng Akngey-warl alpeyeh. Arrantherr ayen ayerney-angen, ‘Nthenh-angkwarr nga alpeyeh?’ <sup>6</sup> Arrantherr amperrngirremel ayen awek, ayengarl arrekantherr illehel. <sup>7</sup> Atha arrenhantherr arrayt ileyel, ayeng Akngey-warl alpenty, atha arrekantherr Itnweng thwenem ilk-watherr. Itnweng Rlwart apetyey-angen-antey. Ayeng alpentyelant atha Itnweng Rlwart arrekantherr-warl thwenem.

<sup>8</sup> Itnweng ra ahern-warl apetyeyeh, rap ingkerrenh akalty-antheyeh, rernem apmwekeyt angkepirretyek. Rantey arrpemarl ingkerrenh ileyeh, ayengarl arrayt aneyel, rernem ingkerrenh ayen iterl-areyeh, ingwer-inger Akngelyel ahern-areny ingkerrenh atha akgakeyeh. <sup>9</sup> Alakenh-they Itnweng ra ayenharl tnakey-angenh-rnem ileyeh, Rernem atyeng-warl angkepirretyek. <sup>10</sup> Ayeng Akngey-warl alpemarl-kety ra arrenhantherr arrayt innga akalty-antheyeh, ayengarl arrayt innga. <sup>11</sup> Apmwangkwarr apenteyel-rnemel iterl-aretyek, ahern-areny atyetyart renh Akngelyel kel ywerrelhilek.

<sup>12</sup> Angka ingwer-rnem aynteyel. Atha arrenhantherr nthakenh arrayt iley-angenh, arrantherr ywarn iterreyel-kety. <sup>13</sup> Akngey-kenh Itnwengel arrayt innga ileyel. Ingwer-inger Akngey-kenh Itnweng ra arrekantherr-warl apetyeyeh, ra angka ingkerrenh arrayt innga arrekantherr ileyeh. Ra Akngey-kenh-angkwarrant ileyeh, arrantherr iterl-aretyek nthakenharl irreyeh. <sup>14</sup> Itnwengel ayen tnakeyeh, ra angka atyen irrkaty-antey arrekantherr ileyeh. Alakenh-they arrantherr ayen iterl-areyeh, ayengarl rlterrk inngan. <sup>15</sup> Angka Akngey-kenh angka atyen arrpemarl. Atha arrwekel arrenhantherr kel ilek, Itnwengel arrenhantherr akalty-antheyeh, angka atyen renhey-antey.”

### *Jesus-el kwertengerl-rnem ileyel, rernem irrngerney anetyek*

<sup>16</sup> Ikwer-penh Jesus-el kwertengerl-rnem ilek, “Arlta irrpety-penh ayeng ywerreyeh, arrantherr ayen arey-angen-anem. Ingwer-ingerant ayeng aremirreyeh, arrantherr ayen areyeh-anem.” <sup>17-18</sup> Kwertengerl-rnem angkerrenh, “Nthakenh Jesus angkek, rarl ywerrel-alheyen, ingwer-ingerant aremirreyeh. Nthakenh ra illehel, ra Akngey-warl apetyeh? Anwantherr apateye.”

<sup>19</sup> Jesus-el renh-rnem iterl-arek, rernemarl apatemelel aneh, rernem renh ayernetyek. Jesus angkek, “Ayeng arrwekel-antey illehel, ‘Arlta irrpety-penh arrantherr ayen arey-angen-anem, ingwer-ingerant arrantherr ayen areyeh-anem.’ Alakenh-they arrantherr apatemelel angkerreyel apek? <sup>20</sup> Atha arrenhantherr arrayt ileyel, arrantherr atyen amperrngirreyeh artnemel, ahern-areny ingwer-rneman inkwerelheyelarl. Arrantherr amperrngirreyeh, ikwer-penh arrantherr inkwerelheyeh arrpemarl. <sup>21</sup> Ampa akely ikweren aney-alenty, amikw arntety amperrngirreyel. Ampa ikwerenh anekarl-they ra irrngerney-anem aneman. <sup>22</sup> Lyert arrantherr atyeng amperrngirreyel arrpemarl. Ingwer-inger atha arrenhantherr areyeh arrpemarl, arrantherr intem-antey atyen inkwerelheyeh amperrngirrey-angen-anem. <sup>23</sup> Ayeng nhethay alpenty, arrantherr ayen ayerney-angen. Atha arrenhantherr arrayt innga ileyel. Arrantherr Akngey atyen ayernenty, atyeng-angkwarr, ra arrenhantherr awemarl. <sup>24</sup> Arrantherr Akngey renh ayerney-angen-antey atyeng-angkwarr. Lyertan arrantherr renh ayernetyek, rarl

arrenhantherr kel awemarl, arrenhantherr anthemarl. Arrantherr inkwerelheyenhanem."

<sup>25</sup> Ikwer-penh Jesus kwertengerl-rnemek ilekhekk, "Atha angka ilek-ilek arrekantherr ilek anyelkel, arrekantherr arrayt anayntiley-angenh. Ingwer-ingeran atha angka Akngey-kenh arrekantherr anayntileyen, arrantherr arrayt-anem Akngey-kenh-angkwarr akaltyirreyek." <sup>26</sup> Arla ikwerel, Nthakenh atha anyentelant Akngey ayerney-angenh arrangkw. Arrantherr Akngey amentel renh ayernetyek, atyeng-angkwarr. <sup>27</sup> Arrantherr ayenh iterl-areyel, ayeng Akngey-kenh innga. Alakenh-anyem Akngey arrekantherr artewentyl ilkelheyel. <sup>28</sup> Ayeng Akngey-they apetyek ahern nhenh-warl. Aleyan ayeng Akngey atyenh-warl alpeyel ahern nhenh iwerl-alhemel-anem." Alakenh-anyem Jesus angkek.

<sup>29</sup> Kwertengerl-rnem ikwer angkek, "Nga anaynt-anem angkek, anyelk-weny. <sup>30</sup> Aley-anem anwantherr akaly. Ntwa ingkerrenh iterl-areyel, amentel irrwerl-areny-kenh-angkwarr, akwerrngelant atnyeneyel. Aleyan anwantherr ngenh iterl-areyel, ngarl inngan Akngey-they apetyek."

<sup>31</sup> Jesus-el renh-rnem tyernek, "Arrantherr atyeng arrayt awelheyel? <sup>32</sup> Atyeng arranthery awelhenherr-arey! Ingwer-inger arrantherr aterel anterremel alpeyeh apmer-warl, ayenh iwerl-alhemel. Kel mwerr, Akngey ilkwatherr atyeng-itwek aneyel, ayeng ament-weny. <sup>33</sup> Kel Atha arrenhantherr ilek, arrantherr arternp anayntetyek. Atyeng iterrey-angenh amperrngirrey-angenh. Artwa ahern-areny-rnemel arrenhantherr irrwerneyen. Arrantherr ikwer-rnem-kety aterirrey-angenh. Kel atha ahern-areny-rnem arrwekel-antey antengilek."

## 17

### *Jesus-el Akngey ayerneyel kwertengerl-rnemek*

<sup>1</sup> Jesus-el kwertengerl-rnem ilek-penh, ra alker-warl-athet itnywenek, ra Akngey-warl angkemel, "Akngayay! Ayengan alerengkw ngkwenn. Arla atyehn arrer-anem ayeng il-wetyek. Ayenh rlterrkila, ayeng rlterrk ilkwakert anetyek ngkweng-apeny, ingkerrenhel ngenh iterl-aretyek ngarl rlterrk innga aneyel. <sup>2</sup> Ntwa ayenh arrernek, ayeng Ingkart ahern-areny ingkerrenhek anetyek. Atha ingkerrenh itethiletyek ngkweng-angkwarr, ntwarl ayenh ilanthek-angkwarr. <sup>3</sup> Rernem iteth intem aneyek ngkweng-angkwarr, rernem ngenh iterl-aretyek, nga Akngey anyent innga aneyel, rernem ayenh iterl-aretyek arrpemarl, ntwarl ayenh thwenek ahern nhenh-warl. <sup>4</sup> Atha warrk ingkerrenh ywerrelhilek, ntwarl ayenh thwenek. Atha ingkerrenh akalty-anthek angka ngkwenn. Rernem akalty-anem, rernem ngenh iterl-areyel-anem, nga anyentarl rlterrk ilkwakert aneyel. <sup>5</sup> Akngayay, ahern nhenh arrpemerney-angenh-antey, aylak atherr-antey aneh rlterrk ilkwakert. Ayenh rlterrkila arrpemarl, aylak atherr-antey arrpemarl anetyek rlterrk ilkwakert.

<sup>6</sup> Ntwa kel ingwer-rnem rlwanek, rernem atyeng-angkwarr apentyek, kwertengerl atyenh-rnem anayntetyek. Rernem ngkwenn-rnem aneh, ntwa renh-rnem atyeng-warl atnwenhek. Rernem ngkweng arrayt awelheyel, angka ngkwenn-angkwarrant arrayt apentyek. <sup>7</sup> Rernem akalty-anem, ntwarl ayenh rlterrkilek. <sup>8</sup> Atha renh-rnem akalty-anthek, ntwarl ayenh ilanthek-angkwarr-antey. Rernem atyeng awelhek. Rernem atyeng akalty, ayengarl ngkweng-they apetyek. Rernem atyeng akalty arrpemarl, ntwarl ayenh thwenek ahern nhenh-warl. <sup>9</sup> Aleyan atha ngenh ayerney-angenh ahern-areny ingkerrenhek. Atyehn-rnemekant atha ayerneyel. Rernem ngkwenn-rnem, ntwap renh-rnem atyeng antek. Alakenh-anyem atha ngenh ayerneyel ikwer-rnem. <sup>10</sup> Nhenh-rnem atha atnyeneyel, ngkwenn-rnemarl. Nhenh-rnem ntwarl atnyeneyel-rnem atyenh-rnem arrpemarl irrkaty-antey. Rernem angka atyehn ingwer-rnemek ilerl-apentyek, rernem ayenh iterl-aretyek, ayengarl rlterrk ilkwakert aneyel. <sup>11</sup> Atha ahern nhenh iwerl-alhem-anem, ngkweng-warl alpem-anem irrwerl-warl. Kwertengerl atyenh-rnemant-anem anayntem ahern nhenh-itwek. Ntwa itna ngkwenn atyeng antek. Renh-rnem arntarnt-araynta apmwekety, rlterrk ngkwennhel rernem anyent-antey anayntetyek, aylakarl anyent-antey aneyel-apeny. <sup>12</sup> Atha renh-rnem arntarnt-arek, ngkweng-angkwarr. Ntwa ayenh rlterrk ilkwa antek, atha renh-rnem arntarnt-aretyek. Atha renh-rnem arntarnt-arek, rernem ngkwengety angkep irrekerr. Artwa anyentant ngkwengety angkepirrek apmwangkwarr. Ra ipma intem-antey aytteyen, angka ngkwenn arrwekel ayntenh-angkwarr.

<sup>13</sup> Akngayay! Lyert-antey ayeng alpetyek ngkweng-warl. Ayeng ngkweng-warl angkeyel ahern nhel, kwertengerl atyenh-rnemel ayenh awetyek, rernem atyeng inkwerelheyek, irrngerney anetyek arrpemarl. <sup>14</sup> Atha renh-rnem akalty-anthek angka

ngkwenh. Ingwer-rnem ahern nhenh-areny-rnem, apmwangkwarr apenteyel-rnem, rernem kwertengerl-rnem-kety arkarirreyel. Ayeng ahern-arenyek awelhey-angenh, rernem ahern-arenyek awelhey-angenh arrpemarl, arrangkw.

<sup>15</sup> Akgneyay, atha ngenh ayerneyel, rernem ahern nhenhel anayntetyek, ntwa renh-rnem arntarnt-aretyek arretyt-kety. <sup>16</sup> Atha ahern-areny-kenh-angkwarr apentey-angenh arrangkw. Rernem ahern-areny-angkwarr apentey-angenh arrpemarl. <sup>17</sup> Angka ngkwenh arraty inngarl. Kwertengerl-rnem rlterrakila, rernem ngkwegant arraty anayntetyek intem-antey. <sup>18</sup> Ntwa ayenah ahern nhenh-warl thwenek, alakenh-anyem atha nhenh-rnem thwenem, rernem angka mwerr ilerl-apayntetyek apmer arrpanenh-warl. <sup>19</sup> Ayeng arlka menty anthelhem ikwer-rnem, rernem ngkweg anthelhetyek arrpemarl, impen-angkwarr.

<sup>20</sup> Akgney, atha kwertengerl atyenh-rnemek ayerneyel. Rernem angka atyenh ilerl-apayntetyek ingwer-rnem-warl. Ingwer-rnem arntarnt-aryanta arrpemarl, rernem ngkweg-angkwarr apenterl-ayntetyek arrpemarl. <sup>21</sup> Akgney, atha ngenh ayerneyel, rernem anyent-angkwarr apenterl-ayntetyek ingkerr aylak anyent-antey aneyel-apeny. Ingkerrenhel renh-rnem awetyek, rernem ngenh iterl-aretyek, ntwarl ayenah thwenek ahern nhenh-warl. <sup>22</sup> Akgney, ntwa ayenah rlterrakilek. Alakenh-anyem atha renh-rnem rlterrakilem arrpemarl. Alakenh-anyem rernem anyent-angkwarr anetyek, mwarrant-arey, aylak anyent-angkwarr aneyel-apeny. <sup>23</sup> Akgney, ayeng ikwer-rnem-itwel intem-antey anem, nga atyeng-itwel intem-antey aneyel-apeny. Alakenh-anyem rernem anyent-antey aneyenah. Rernem ngenh iterl-aretyek, ntwarl ayenah thwenek, ahern nhenh-warl, ngarl ikwer-rnem ilkelheyel, atyeng ilkelheyel-apeny.

<sup>24</sup> Ahern nhenh arrpemerney-arenyen-antey, nga atyeng artewentyel ilkelhenh. Alakenh-anyem ntwa ayenah rlterrak antheek. Akgneyay, ntwa ayenah kwertengerl-rnem atyeng-warl atnwenhek. Ayeng ilkelheyel, rernem atyeng-itwek anetyek intem-antey, atyeng akalty irretyek, ayeng rlterrak ilkwakert, ngarl rlterrak aneyel-apeny. <sup>25</sup> Akgney, nga arraty inngarl. Ahern-areny ingwer-rnemelan ngenh iterl-arey-angenh. Atha ngenh iterl-areyel. Kwertengerl-rnemel ngenh iterl-areyel arrpemarl, ntwarl ayenah thwenek ahern nhenh-warl. <sup>26</sup> Atha aleth-antey ilayntem angka ngkwenh, rernem ingwer-rnemek artewentyel ilkelhetyek, nga atyeng artewentyel ilkelheyel-apeny, ayeng anyent-antey ikwer-rnem-itwek anetyek.”

## 18

*Iltyemwerney-rnemel tyaty-arenyel-rnem-then Jesus renh antwerrkeyel  
(Matthew 26:47-56; Mark 14:43-50; Luke 22:47-53)*

<sup>1</sup> Jesus-el Akgney ayernek-penh, ra kwertengerl ikweren-hrnem-akert alhek. Lher Kidron-angkwarr artarnpenhek intwar-ampeny-warl. Rernem alhek arwerl alip-angketyarr-warl. <sup>2</sup> Judas, kwertengerl anyent. Ingwer-ingerant ra Jesus renh ahayi-weyeh artwa ahelengkw-rnem-warl. Ra apmer renh iterl-arek, Jesus rernemamarl akarirrenh kwertengerl ikweren-hrnem-akert. <sup>3-5</sup> Judas apetyek artwa ahelengkw Rome-areny-rnem-akert, Jesus renh antwerrkeyek. Tyaty-areny iltyemwerney-rnem apetyek arrpemarl, Pharisee-rnemel renh-rnem thwenek tyaty-areny ilkwernemel-then. Rernem lyenenty-rnem-then rwalep-rnem-then akngetyek, walth-rnem-then. Jesus-el renh-rnem arnarek, akgerr. Ra arrwekel-antey iterl-arek, rernem apetyetyek, atwekerr-awaty. Ra rtnerl-alhek ayernemel, “Artwa angwenhek arrantherr nthweyel?”

Rernem tyernek, “Jesus Nazareth-arenyek anwantherr nthweyel.”

Jesus ra ilelhek, “Ayengarlap ra.” Judas ra ikwer-rnem-itwek rtnenh. <sup>6</sup> Jesus ikwer-rnem ilelhek-penh, rernem arlengirreyeh, ahern-warl aytinemel, ingkerr-antey.

<sup>7</sup> Jesus-el ayernek arrpemarl, “Angwenhek arrantherr nthweyel?”

Rernem renh tyernek, “Jesus Nazareth-arenyek.”

<sup>8</sup> Jesus-el renh-rnem ilek, “Kel ayeng arrwekel-antey arrekantherr ilelhek. Arrantherr ayenah inngantey arey-alhek. Artwa nhenh-rnem tyarlewenherr-arey, anterrkwey-angenh.” <sup>9</sup> Ahelengkw-rnemek ra arrngert angkek. Alakenh angka innganem irrek. Ra Akgney-warl kel angkek arrwekel-antey, “Akgneyay! Ntwa kwertengerl-rnem ingkerrenh atyeng antheek, atha renh-rnem atnyen-ayntetyek iylpelerlewey-angenh. Kel atha renh-rnem atnyeneyel-antey.”

<sup>10</sup> Simon Peter-el nayp arrylep-akertel iylda arternek arraty-ampeny-angkwarr, tyaty-areny-kenh warrenh itna ikweren Malchus.

<sup>11</sup> Jesus-el Peter ilek, “Nayp menty arrerneyna pilt-warl! Akgneyel ayenah thwenek, ayeng irrwampemel ilwetyek. Nthakenh ayeng Akgney-kety intwemelirrey-angenh awelhey-angenh-then.”

*Rernem Jesus Annas-warl atnwenheyel**(Matthew 26:57, 58; Mark 14:53, 54; Luke 22:54)*

<sup>12</sup> Ikwer-penhan irlkenty rernem Jesus renh antwerrkek arertnemel Jew-kenh iltyemwerney-rnemel-then. <sup>13</sup> Rernem renh akngek artwamp Annas-warl. Ran ahenterrikw Caiaphas-kenh anenh, Caiaphas tyaty-areny atyetyart ilkwa. <sup>14</sup> Caiaphas ran arrwekel-antey council-areny ingwer-rnem ilek, “Anwantherr artwa nhenh attwenty, Rome-arenyel-rnem anenhantherr menty arem. Anwantherr renh tyarlewent, rernemap anwenhantherr ingkerrenh atwemarl. Alakenh-they anwantherr Jesus renh ipmek atwey-areny.”

*Peter ilelheyel, ra Jesus iterl-arey-angenh-arrpantey**(Matthew 26:69-70; Mark 14:66-68; Luke 22:55-57)*

<sup>15</sup> Ahelengkw-rnemel Jesus akngaynek Annas-kenh apmer-warl. Peter-el-then kwertengerl ingwerel-then Jesus renh ingkern-they apentek. Atyetyart ilkwa tyaty-arenyel kwertengerl anyent weth iterl-arek. Rap renh mentyarl arek. Alakenh-they rant Jesus renh apentek, aylpenhek atyetyart-kenh yard-warl. <sup>16</sup> Peter aketh-itwek mpwelhenh keyt-itwel. Kwertengerl ingwerel renh arek. Kwertengerl ra yard-they tyerrelhemel alpek, ra arelh warrkenh ingwer-warl angkek, “Keyt altywerila, ra aylpenheteyk. Atha renh iterl-areyel, ran mwerrarl.” Ratherr atherr-antey keyt-angkwarr aylpenhek.

<sup>17</sup> Arelh ra Peter renh ayernek, “Nga apek Jesus-kenh kwertengerlarl?”

“Arrangkw.” Peter ilelhek, “Ayeng arlarl.”

<sup>18</sup> Ingwel irrernt-anem ayntek. Ahelengkw-rnem-then warrkenh-rnem-then rernem arlterrngirrey-ayntek rwel. Peter alhek ikwer-rnem-warl, rwel arlterrngirreyek arrpemarl.

*Atyetyart Annas-el Jesus renh ayerneyel arrkernetyek**(Matthew 26:59-66; Mark 14:55-56; Luke 22:66-71)*

<sup>19</sup> Atyetyart ilkwel Annas-el Jesus renh ayernek, “Angwenh kwertengerl ngkwenh-rnem? Ilek ntwa renh-rnem akalty-antheyel?”

<sup>20</sup> Jesus-el renh tyernek, “Athan aketh-antey ingkerrenh akalty-anthek, ingkerrenhel ayenh awetyek, atha anyelkel akalty-anthey-angenh. Atha ingkerrenh akalty-anthek tyaty akely-rnem-itwek, tyaty ilkwitwek, rernemamarl anyentirrenh. <sup>21</sup> Ntwa ayenh ayerney-angenh. Ntwa ingwer-rnem ayerney-areny, rernemarl ayenh awek. Rernemarl angka atyenh awekarl, rernem akaltyarl. Renh-rnem ayerna, rernem ngenh ileytek.”

<sup>22</sup> Jesus angkek-penhl, warrkenh ingwerel renh arreyl atwek angkemel, “Nga alakenh angkey-angenh atyetyart tyaty-areny ilkwekarl!”

<sup>23</sup> Jesus-el renh ilek, “Ilekek ntwa ayenh atwekarl, ayeng apmwel-areth angkenty-arrpantey? Ayeng apek apmwel-areth angkek, ayenh ilay!”

<sup>24</sup> Warrkenh-rnemel Jesus renh arertnek. Annas-el renh Caiaphas atyetyart ilkewewarl thwenek.

*Peter ilelheyel arrpemarl, ra Jesus iterl-arey-angenharl**(Matthew 26:71-75; Mark 14:69-72; Luke 22:58-62)*

<sup>25</sup> Peter ra rwitwek-antey arlterrngirrenh. Ingwerentyel renh ayernek, “Nganang kwertengerl Jesus-kenh?”

Peter ra ilelhek, “Arrangkwaw!”

<sup>26</sup> Atyetyart-kenh warrkenh ingwer rwitwek rtnenh, artwa weth-kenh, Peter-elarl arrwekel-antey iylpa nayp arlpnty arreypel arternek. Ra Peter alhengk-aremel ilek, “Ay! atha ngenh weth arekarl ikwer-itwek, apmer arwerl-angketyarr ikwer-itwek.”

<sup>27</sup> Peter ra irrtiyerremel ilelhek, “Arrangkw! Ayengarl arlarl!” Tywek-tywek irrwey arlek-anem.

*Pilate-el Jesus renh arrkerneyel**(Matthew 27:1, 2, 11-14; Mark 15:1-5; Luke 23:1-5)*

<sup>28</sup> Ingwepenh ingkeny tyerrelheyangel, ahelengkwel-rnem Jesus renh akngek Atyetyart Pilate-warl. Atyetyart ilkwa Rome-areny anenh Judea-areny-rnem-kenh. Jew-rnem-kenh atyetyart ingwer-rnem warl akethel-antey mpwelhek, aylpenhey-angenh artwa ingwer-rnem-kety, rernem aker Anperarl Alhek “Passover” tyenkerr alhewer arlkwetyek, angka arrwekelenyel ayntenh-angkwarr.

**Anayntileyel: Jew-rnem-kenh angka arrwekeleny ayntenh, Jew-rnemelant amern “Passover” arlkwetyek amentel, ingwer-rnem pweytirrey-angenh, rerne-mant ament arlkwetyek.**

<sup>29</sup> Atyetyart Pilate ra aketh-warl tyerrelhek, ra renh-rnem ayernek, “Ilekek arrantherr artwa nhenhan atnwenhey-alhek?”

<sup>30</sup> Rernem renh tyernek, "Artwa yanh apmwarl. Alakenh-anyem anwantherr renh atnwenhey-alhek ngkweng-warl."

<sup>31</sup> Pilate angkek ikwer-rnem, "Ayeng arlarl! Court arrekantherrenh-angkwarrant arranther tyatemiletyek renh."

Rernem ikwer-warl angkek, "Nthakenh anwernantherr renh tyatyemiley-angenh atwey-angenh, arrangkw. Rome-areny-rnem arranther arrngert angkek, nthakenh anwernantherr artwa apmwa renh tyatyemiley-angenh ipmek atwey-angenh. Arrantherrenh renh tyatyemileyek atwetyek!" <sup>32</sup> Alakenh-anyem angka innganem irrek. Jesus ra angka arrwekel-antey ilelhek, rernem renh arwerl iylpeyl-atherr-warl atanthey-alenty.

<sup>33</sup> Pilate ra warl ikwer-warl aylpenhek. Ra ahelengkw-rnem ilanthek, Jesus renh kwen-warl atnwenhey-alhetyek. Ra Jesus ayernek, "Arraty inngang ngan atyetyart Jew-rnem-kenh?"

<sup>34</sup> Jesus-el tyernek, "Ngang ament iterreyel, ayeng atyetyart Jew-rnem-kenh aneyel? Ingwerentyel apek ayen ngkweng-warl ilek?"

<sup>35</sup> Pilate angkek ikwer-warl, "Arwengk ngan! Ayengan Jew-wenyarl. Jew-rnem ngkweng-rnem atyetyart tyaty-areny-rnem-then rernem ngenh atnwenhey-alhek atyeng-warl. Nthakenh ngan irrek? Ngang irrwernelhekarl ikwer-rnem-warl?"

<sup>36</sup> Jesus-el renh tyernek, "Arrangkwarl ayengan Ayeng atyetyart ahern-areny-wenyarl. Kwertengerl atyehn-rnemel ingwer-rnem nthakenh atweyangarl atyeng-they."

<sup>37</sup> Pilate ikwer-warl angkek, "Nga ilelheyel nga atyetyart ilkwa?"

Jesus-el tyernek, "Ngan arraty angkeyel, ayengan atyetyart ilkwarl. Ayeng ahern-nhenh-warl apetyek, atha angka arraty iletyek ingkerrenhek. Ingwerenty atyeng awelhenty, rap angka arraty-angkwarrarl apenteman."

<sup>38</sup> Pilate-el Jesus ayernek, "Ilek-angkwarr angka arraty?" Pilate warl-they tyerrerl-alhek ingkerrenh rtneherrenh-warl. Ra angkek ikwer-rnem-warl, "Atha artwa renh ilek-ilek-angkwarr ayernek. Ra apmweweny alyek, nthakenh atha renh ayntarrp-iley-angenh. Ilekek atha renh atweman?"

*Pilate ahelengkw-rnem ileyel, rernem Jesus renh atantheyek arwerl iylpeyl-atherr-warl*

*(Matthew 27:15-31; Mark 15:6-20; Luke 23:13-25)*

<sup>39</sup> "Anperarl Alhek 'Passover' tyenkerr arlkwenty-penhel arranther apmelerr ayen ayerneteyek arratyarl, atha artwa anyent tyayl-they tyarlewetyek. Artwa angwenharl athan tyarlewem tyayl-theyan? Jesus, atyetyart ilkwan Jew-rnem-kenharl tyarlewem?"

<sup>40</sup> Rernem arlek, "Ranem mentyarl. Anwantherr ilkelheyel, Barabbas tyarlewetyek tyayl-theyl!" Barabbas artwa ahelengkw apmwarl ra anenh, ahel ra atwerrenh Rome-areny-rnem-thenarl.

## 19

<sup>1</sup> Ikwer-penh Pilate irlkenty ikwerenh-rnemek angkek, "Jesus renh whip-el atwetyek!"

<sup>2</sup> Rernem arwerl alekw-penh ampwal akapwertek-arelh mpwarek. Rernem alekw-penh arrernek Jesus ikwer-warl akapwert-warl. Arnkwa rrnter-rrnter arlpenty-warl-anem rernem Jesus renh akwernek atyetyart ilkwokenh-arrpantey. <sup>3</sup> Rernem ikwer-warl arreranem irrek, renh atwetyek. Rernem ikwer angkenh kwanthemel, "Nganem Jew-rnem-kenh atyetyartarl ilelhek!" Rernem renh arreyl atwek.

<sup>4</sup> Ikwer-penh Pilate warl-they tyerrelhek arpemarl Ran angkek ikwer-rnemek, "Atyeng awelhennherr-arey! Ayeng yangkelhem atyehn-rnemek, rernem Jesus renh atnwenhey-alhetyek nhenh-warl, arranther renh aytaretyek. Ilek-they arranther renh ipmek atweman? Ilenherr-arey atyeng, nthakenh ra apmwel-areth mpwarek. Artwa alyek arla atha areyel."

<sup>5</sup> Jesus warl-they tyerrelhek, akapwert mwekart arrelyp-angketyarr, arnkwa rrnter-rrnter-akert. Pilate Jew-rnem-kenh atyetyart-rnem-warl angkek, "Arenherr-arey! Ilenhey artwa ra!"

<sup>6</sup> Tyaty ilkwa atyetyart-rnemel ilyemwerney-rnemel-then Jesus arek-penh, rernem arlek, "Artwa renh atwetyek! Arwerl iylpeyl-atherr-warl renh tywenetyek!"

Pilate angkek ikwer-rnem, "Menty! Arrantherrant renh arwerl iylpeyl-atherr-warl aylpar-arrernenherr-arey! Atha renh arrwekel-antey arrkernemel ayernek, ilek-ilek-angkwarr. Ran apmwangkwarr mpwarey-angenh, arlarl ra."

<sup>7</sup> Rernem Pilate renh ilek, "Artwa nhenhan ilelhek Akngey-kenh alerikw-arrpantey. Alakenh-they renh atwetyek, angka arrwekeleny anwekantherrenh aynteyel-angkwarr!"

<sup>8</sup> Pilate ra aterirrek, rarl awek-penh. <sup>9</sup> Pilate-el Jesus warl kwen-warl atnwenheynek. Pilate-el renh ayernek, "Nthenh-areny ngan?" Jesus-el tyerney-angenh arrangkw, akater anenh. <sup>10</sup> Pilate-el renh ilek arrpemarl, "Atyeng-warl ilelha, ayengan atyetyart ilkwarl. Atha ingwer-rnem ilanthetyek ngenh tyarlewetyek. Arrangkw, nga atyeng-warl ilelhey-angenh, ngenh arwerl ilpeyl-athererr-warl atantheme."

<sup>11</sup> Jesus angkek ikwer-warl, "Akngayelant ngenh arrernek atyetyart ilkwa ahern-areny-kenh. Alakenh-angkwarr ntwa ayenh atwetyek alhewer. Artwa ingwerel ayenh ahayiwek ngkweng-warl, ra apmwangkwarr innga apenteyel."

<sup>12</sup> Pilate ilkelhek, Jesus renh tyarlewetyek, atwety-angenharl. Ra Jew atyetyart-rnem ayernek tyarlewetyek. Rernem arlkenh, "Artwa ra atyetyart ilkwarppantey ilelhenh. Rome-areny atyetyart ilkwa Caesar anyent-antey anwekantherrenh, ingkerrenh-kenh! Ntwa artwa yanh tyarlewenty, atyetyart ilkwa Rome-areny ngkweng ahelirrem!"

<sup>13</sup> Pilate-el awek-penh, ra Jesus atnwenhek aketh-warl. Pilate chair ilkwewarl arrernelhek. Hebrew angkel apmer alakenh aynteyel Gabbatha. <sup>14</sup> Arla anyent aynten Anperarl Alhek "Passover" tyenkerr arlkwey-alenty. Arla ampepel-antey Jew-rnem akarrirenh. Pilate angkek ikwer-rnem, "Nhenh arenherr-arey, atyetyart ilkwa arrekantherrenh."

<sup>15</sup> Rernem ikwer arkalhelirrek, "Aknga renh! Aknga renh! Arwerl iylpeyl-athererr-warl atanthal!" Pilate-el renh-rnem ayernek arrpemarl, "Atha atyetyart arrekantherrenh atwem, arwerl iylpeyl-athererr-warl atantheme?" Jew-rnem-kenh atyetyart-rnemel renh tyernek, "Rome-areny atyetyart ilkwa anwekantherrenh anyentant. Ingwerenty arrangkw." <sup>16</sup> Ikw-panhan Pilate-el Jesus-an ahayiwek irlkenty-rnem-warl, rernem arwerl iylpeyl-athererr-warl renh atanthetyek.

*Irlkenty rernem Jesus renh arwerl iylpeyl-athererr-warl aylpar-arrerneyel  
(Matthew 27:32-44; Mark 15:21-32; Luke 23:26-43)*

<sup>17</sup> Irlkentyel rernem Jesus renh Pilate-kenh warl-they akgnek. Arwerl iylpeyl-athererr rernem Jesus anpeth-warl tywenek, ra akngaynerl-ayntetyek. Rernem Jesus renh atnwenhek apwert-warl, itnan "Akapwert Ngkwern Akarnng". Jew-rnemel apmer itnewek Golgotha. <sup>18</sup> Irlkenty rernem Jesus renh arwerl iylpeyl-atherr-itwek atantheck naylel, ra ilwetyek. Artwa ingwer atherr arwerl iylpeyl-atherr-warl atantheck arrpemarl naylel. Irrkerat-atherr-itwek Jesus ampep-itwekarl. <sup>19-20</sup> Pilate-el irlkenty ilantheck, pip arwerl iylpeyl-atherr irrwerl-ampeny-warl tywenetyek. Rernem angka irrpetye-angkwarr ingkwernek, Jew-rnem-kenh-angkwarr, Rome-areny-rnem-kenh-angkwarr, Greece-areny-rnem-kenh-angkwarr. Angka nhanyem aynteyel pipel, "Nhanyem Jesus Nazareth-areny, Jew-rnem-kenh atyetyart ilkwa." Jesus ra arwerl iylpeyl-atherr-itwek aylpar-anenh, Jerusalem-arrangarr aketh-ampeny. Ingwer-rnem angkepelarreng arwerl iylpeyl-atherr-angkwarr alhenh, rernem pip renh irrwerl-ampeny-itwek reytemilerl-apenh.

<sup>21</sup> Atyetyart ilkwa tyaty-areny rernem pip renh arek arwerl-itwek, rernem angkey-alhek Pilate ikwer-warl, "Atyetyart Jew-rnem-kenh' ingkwerney-angenh. Alakenh ingkwerneyek, Jesus Jew-rnem-kenh atyetyart ilkwarppantey ilelhenh!"

<sup>22</sup> Pilate-el renh-rnem ilek, "Menty! Kel rernem arrayt ingkwernek. Nthakenh ingwer-angkwarr arrerney-angenh."

<sup>23</sup> Irlkenty 4-pelel arnkwa ikwerenh lhelek. Rernem arnkwer nem 4-pel-angkwarr arlwarey-arlwarey arrernek. Arnkwa arpenty mwerr-angker rernem ikwer-they lhelek arrpemarl. <sup>24</sup> Irlkenty-rnem angkerrek, "Arnkwa anyentek anwantherr arrkenirreyek, arnkwa renh antengileyek. Anyentel renh antengileyek anyent-antey, arnkwa ilterrey-angenh." Apwert akely-rnem iwemel rernem arrkenirrenh arnkwa renh antengileyek. Angka arrwekel alakenh aynten Akngay-kenh pip-itwek: "Rernem arrkenirreyek arnkwa atyehn-rnemek, arnkwa atyehn arlperryileyel." Angka arrayt innganem irrek-anem.

<sup>25</sup> Irlkenty-rnem arrkenirrenh Jesus-kenh arnkwek. Arelh 4-pel rtneh arwerl iylpeyl-atherr-itwek, Mary Jesus-kenh amikw, arnkwerey Mary-kenh, arelh ingweran Mary arrpemarl, Clopas-itwek itengerrekarl, ingwer Mary Magdala-areny-anem. <sup>26</sup> Jesus-el amikw ikwerenh arek, kwertengerl anyent-then, irrkatty ranneye ra ikwer aleth artewentyel ilkelhenh. Jesus angkek amikw ikwerenh-warl, "Artwa yanh ntwa ampaty akem." <sup>27</sup> Jesus angkek kwertengerl ikwer, "Ntwa arelh yanh amey akem." Ikwer-panh kwertengerl ra Jesus-kenh amikw atnwenheynek warl ikwerenh-warl, renh arntarnt-arey-alpetyek.

*Jesus ra arwerl iylpeyl-atherrel ilweyel  
(Matthew 27:45-56; Mark 15:33-41; Luke 23:44-49)*

<sup>28</sup> Jesus akalty-anem, rarl Ingkart-kenh warrk ingkerrenh ywerrelhilek-anem. Ikwer-penh ra ilelhek, "Ayeng angkethakw." Angka arrwekel pip-itwek ayntenh. Angka arraty innganem irrek. <sup>29</sup> Artwa anyentel renh awek-penh, ra rag akely-anem inek. Wayn arrngeynp-warl ra rag renh pwerlpewek apelyilemel. Rag renh ra arwerl akert-ampeny-warl arertnek. Jesus arrakert-warl ra arwerl alypenhey irrwerlilek, ra antywelp-antywetyek angkethakwel. <sup>30</sup> Jesus-el wayn akely rag-el arrkernek. Rap angkek, "Atha warrk atyeh ywerrelhilek." Akapwert kwenirreynek, ilwemel-anem.

### *Irlkentyel Jesus renh ngkerraly-ampeny atantheyel*

<sup>31</sup> Jesus ra ilwek arlta Friday-el. Jew-rnem tyenkerr Anperarl Alhek "Passover" ikwer mpwelhenn-antey, amern kwenty arlkwey-angenh-antey. Jesus-then artwa ingwer-atherr-then arwerl iylpeyl-atherr-itwek aylpar-anenh-antey. Jew-rnem-kenh atyetyart-rnem angkerrenh, rernem ingkeny aylpenhekerr-awaty atwarrelhiletyek arwerl iylpeyl-atherr-they ingwemerit irrekerr-awaty. Rernem alhek Pilate renh ayerneytek. Rernem ikwer angkey-alhek, "Artwa ahelengkw-rnem ilantha, 'Ngkwern arlaw atherr aketyek, aynterarirretyek rernem anamerl ilwem-anem. Artwa irlkentyel renh-rnem atwarrelhiley-areny ingkeny aylpenhekerr-awaty.'" Pilate-el renh-rnem ilanthek, arwerl ilkwel ngkwern arlaw atherr atweynetyek akalthemel. <sup>32</sup> Arrwekel rernem artwa anyent-kenh ngkwern arlaw atherr akek, ikwer-penh artwa ingwer-ampenyek-anem ngkwern arlaw atherr akek arrpemarl. <sup>33</sup> Rernem Jesus-warl apetyek, rernemap renh arey-alhek, ra kel ilwekarl. Rernem ngkwern akey-angenh-antey. <sup>34</sup> Artwa ahelengkw anyentel Jesus ngkerraly irryartel atantheik. Arrkngethen kwaty-then ikwer-they thelelhek. <sup>35</sup> Atha anngetherr renh arek, irryartelarl renh atantheik. Atha arrekantherr arraty ileyel, arrantherr ikwer awelh-ayntetyek. <sup>36-37</sup> Pip arrwekelenyel alakenh-anyem aynteyel: "Ngkwern akelhey-angenh arrangkw. Ingwer-rnemel renh atantheyen." Alakenh angka arraty innganem irrek.

### *Rernem Jesus renh arrewaly inteyek akwerneyel*

(Matthew 27:57-61; Mark 15:42-47; Luke 23:50-56)

<sup>38</sup> Artwa anyent Joseph Arimathea-areny anenh Jerusalem-itwek, ran Jesus-kenh-angkwarz apenten. Ra anyelk aterirrenh Jew-rnem atyetyart-rnem-kety. Alakenh-they ra ingwer-rnemek ilelhey-angenh, rarl Jesus-kenh-angkwarz apenten. Arlta ikwer-antey Joseph ra alhek, Pilate ayerneytek, Jesus arrewaly inetyek, renh akngaynekyek, intey-warl akwerneyek. Pilate angkek, "Kel mwerr." Joseph-el Jesus renh arrewaly arwerl iylpeyl-atherr-they atwarrelhilemel akngek. <sup>39</sup> Artwa ingweran Joseph-angkwarz alhek arrpemarl, itnan Nicodemus. Nicodemus anyent rethen Jesus-then ratherr angkerrenh ingwel arrwekel-antey. Nicodemus-el anter mwerr-angker akngerr interney-angker akngetyek, Jesus arrewaly aperneteyk intey-warl akwerney-alenty. <sup>40</sup> Artwa rernem arrewaly anterl apernek, ataperrelemel rag-warl. Jew-rnem-kenh arrwekeleny alakenh aynten, rernem arrewaly arerten, awenng-warl akwerney-alenty. <sup>41</sup> Jesus ra ilwek apmer arwerl-angketyarr-ampenyel. Intey lyerteny arrer-antey ayntek, rernemarl kel angernek arrwekel apwert irrker-itwek. Arrewaly ingwer-rnem akwerney-angenh-antey. <sup>42</sup> Arlta Saturday arrer-anem Jew-rnem akarrikrek, amern tyenkerr renh arlkwetyek. Artwa atherrel Jesus renh arrewaly intey-warl anamerl-antey akwernek.

## 20

### *Jesus itethirreyel ipmepen*

(Matthew 28:1-10; Mark 16:1-8; Luke 24:1-12)

<sup>1</sup> Arlta Sunday-el ingwepenh atwemengkel-antey Mary Magdala-areny intey-warl alhek. Ra apwert ilkwa arek, intey arriw apwert ilkwa altywerilekarl. <sup>2</sup> Ikwer-penh ra apmer irrkatty-warl anterreynek, Peter-then John-then anenh-warl. Jesus John-ek artewenty ilkelhenh. Ra renh-atherl ilek, "Ay! Ingwerentyel Ingkart arrewaly akngek intey ikwer-they! Nthek-warl rlengkan rernem akwernek?"

<sup>3</sup> Peter-then kwertengerl John-then anterrek intey-warl. <sup>4</sup> Peter-kety-awaty John arrwekel-antey anterrek intey ikwer-warl. <sup>5</sup> Ra intey ayternek, Jesus arrewaly aynterl-antenyek-arrpantey. Arrangkw. Ra rag-rnemant-anem arek, intey-warl alypenhey-angenh-antey. <sup>6</sup> Peter ra intey-warl alypenhek-anem, rag-rnemant arrpemarl arey-alhek. <sup>7</sup> Ra rag ingwer arey-alhek, Jesus renh akapwert ataperrelek-penh, rap ament-anem irrker-ampenyel aynten. <sup>8</sup> John intey-warl alypenhek arrpemarl. Ra rag-rnemant arek arrpemarl. Ra arek-penh ra Jesus renh tnakek-anem, rarl ipmepen itethirrek. <sup>9</sup> Kwertengerl atherl akwerrp-antey anenh, Akngey-kenh angka iterl-arey-angenh-antey, Akngey-kenh angka arrwekeleny arrwekel-antey alakenh aynten, Jesus ra angkep

itethirreyen ipmepenh. <sup>10</sup> Ratherr kwertengerl ingwer-rnem-warl-anem alpek angka ikwer-rnem iley-alpetyek.

*Jesus aremirreyel Mary Magdala-arenyek  
(Mark 16:9-11)*

<sup>11</sup> Mary Magdala-areny intey aketh-ampeny-itwek artnenh-antey, ra kwenirremel intey ayternek. <sup>12</sup> Ra angel atherr-anem arek, arrewalyarl ayntenh-itwel, arnkwa arlter-akert atherr anerl-anenty, ingwer akapwertarl ayntenh-angkwarrarl aneh, ingweran rlterrall ayntenh-angkwarrarl aneh. <sup>13</sup> Angel ratherr Mary renh ayternek, “Ilekek nga artneyel?”

Ra tyernek, “Ingwerel-rnem Ingkart atyenh arrewaly akngkek. Atha iterl-arey-angenh, ayeng akwerrp-antey nthenh-warl rernem renh akwernek.” <sup>14-15</sup> Ikwer-penh Mary-el artepang arenhey-alpek, Jesus-anem arek rtnerl-anenty. Ranap alhengk-arey-angenh-antey. Ra renh ywemek. Jesus-el renh ayternek, “Ilekek nga artneyel? Angwenhek nga nthwelyel?”

Ra renh tyernek, “Ayeng Ingkartek artneyel. Nthek-warl ntwa arrewaly renh akwernek? Atyeng ila, atha renh inerl-alpetyek.”

<sup>16</sup> Jesus ikwer angkek arrpemarl, “Mary-ay!”

Mary-el Jesus alhengk-arek-anem. Ra angkek, “Akalty-anthenh-anthenhay!”

<sup>17</sup> Jesus angkek Mary-warl, “Ayenh anterrkwey-angenh. Ingwer-inger ayeng Akngey-warl alpem. Ingkart Akngey anwekantherrenh-warl. Ntwa kwertengerl ingwer-rnem ila.”

<sup>18</sup> Ikwer-they Mary Magdala-areny ra kwertengerl-rnem iley-alpek, “Atha Ingkart arek!” Ra angka kwertengerl-rnem ilek arrpemarl, Jesus-el arrwekel ikwer ilek-angkwarr.

*Jesus kwertengerl ikwerenh-rnemek aremirreyel  
(Matthew 28:16-20; Mark 16:14-18; Luke 24:36-49)*

<sup>19</sup> Sunday-el atwerrp kwertengerl-rnem warl kwen-itwek aneh. Rernem aterirrenh Jew-rnem-kenh atyetyart-rnem-kety. Rernem arriw martek, ingwer-rnem aylpenhey-alhekerr. Jesus ranem ikwer-rnem-warl aremirrek. Ra angkek, “Arternp anenherr-arey, aterirrey-angenh.” <sup>20</sup> Ranem ilelhek, “Itep-then ingkety-then ayenh arenherr-arey, wetharl arrantherr ingkerrenhel aytarek nayl arrelypelarl atantheck.” Nayl arrelylpenn ingkerneyel-antey ingkety-atherr, itep-atherr-then. Ra ngkerraly irrker-ampeny lwewarrerrelhelh arrpemarl, renharl irrtyartel atantheck-penh ahelengkw-rnemel. Ra ingkernenh-antey arrpemarl. Kwertengerl-rnemel renh iterl-arek-anem, Jesus innga raney nhenhan. Rernem Ingkart ikwer inkwerelhelk.

<sup>21</sup> Jesus angkek ikwer-rnem-warl, “Arternp anenherr-arey, aterirrey-angenh. Akngeyel ayenh ahern nhenh-warl thwenek, ayeng ikwer warrkirk-ayntetyek. Athanem arrenhantherr irrkyat-angkwarr apmer arrpanenh-warl thweneyel, arrantherr atyeng-anem warrkirk-ayntetyek arrpemarl.” <sup>22</sup> Ranem renh-rnem pewilek, angkemel, “Kel arrantherr Itnweng Rlwart-akert-anem! <sup>23</sup> Arrantherr Akngey renhant ayernenty, ra apmwa ingkerrenh-they iweman. Arrantherr Akngey ayerney-angenh apmwa ikwer-rnem-they iwetyek, rernemap apmwakert-anteyarlaneyelan.”

*Jesus Thomas-warl aremirreyel*

<sup>24</sup> Thomas ikwer-rnem-itwel aney-angenh-antey, akwerrp-antey, Jesus iteth ipmepenh aretyek. <sup>25</sup> Kwertengerl ingwer-rnem Thomas ikwer ilelhek, “Anwantherr Jesus renh itetharl arek, rarl itethirremel anwernekantherr-warl aremirrek.”

Thomas-an ikwer-rnem irrpelthirrenh. Ra angkek ikwer-rnem-warl, “Arrangkw inggeweny. Nayl-penh itep amperl-aretyek, Irrtyart-penh ngkerraly irrker-ampeny-then arnep-arnetyek. Arenty-penh atha arraty-anem iterl-arem. Reyip nhay!”

<sup>26</sup> Sunday ingwerel kwertengerl-rnem warl kwen-itwek anew-anenh. Rernem arriw martek, ingwer-rnem ikwer-rnem-warl aylpekkerr. Thomas ra ikwer-rnem-itwek aneh arrpemarl. Jesus ra warl kwen-itwek ampep ikwer-rnem-itwek aremirrek. Rap angkek ikwer-rnem-warl, “Arternp anenherr-arey, aterirrey-angenh.” <sup>27</sup> Ikwer-penh ra Thomas ikwer-warl angkek, “Itep atherr ara, nayl-penh. Ilytel arna! Ngkerraly irrker-ampeny irrtyart-penh. Irripelthirrey-angenh ana, ayenh tnakemel!”

<sup>28</sup> Thomas ikwer-warl angkek, “Ngan Ingkart atyenh irrwerl-areny.”

<sup>29</sup> Jesus angkek ikwer-warl, “Ntwa anngetherr ayenh arek, ntwa ayenh tnakeyel-anem, ntwarl ayenh arek-penhant. Alakenh-anyem mwerrarl. Ingwerentyl apek ayenh arey-angenh-penh, rap ayenh tnakem-antey, ra Ingkart-angkwarran mwerr inngarl. Ingkartel

renh irrngerney-anthem! Ingwer-ingerant akngerr alakenh tnakem, mwerr-angkwarr alakenhey."

*Ilekek John-el angka nhenh pip-warl ingkwernek?*

<sup>30</sup> Jesus ra kwertengerl-rnem-akert ahern nhenhel anenhan-antey, ra ilek-ilek-angkwarr mpwarenh, Akngey-kenh arawerrng rlterrk-akertel. Pip nhenh-itwek atha ingkerreh ingkwerney-angen-antey, ilek-ilekarl Jesus-el mpwarek arawerrng rlterrk. <sup>31</sup> Atha angka ingkwernek Jesus-penh, arrantherr renh iterl-aretyek, ra Christ aneyel, awank-akerr renh Akngeyel alhelek, ahern nhenh-warl thwenetyek, Akngey-kenh alerikw. Atha arrekantherr angka nhenh-penh ingkwernek, arrantherr ikwerenh-angkwarr apenterl-ayntetyek, iteth intem-antey anayntetyek Akngey-kenh-angkwarr.

## 21

*Jesus kwertengerl-rnem-warl aremirreyel kwaty alay Galilee-itwek*

<sup>1</sup> Jesus kwertengerl ikwerenh-rnem-warl aremirrek, kwaty alay Galilee-itwek. Kwaty alay Tiberias itnan ingweran. <sup>2</sup> Kwertengerl ingwer-rnem kel ayerrer alhek Jerusalem-they Galilee-ampeny-angkwarr. Simon Peter, Thomas, Nathanael Cana-areny Zebedee-kenh alerikw atherr James, John-then, kwertengerl ingwer atherr-then. <sup>3</sup> Simon Peter ikwer-rnem-warl angkek, "Anwantherr awangk alhey, irrpeng inayntetyek netting-el."

Ingwer-rnem ikwer angkek, "Anwantherr ngkewng-angkwarr alhem arrpemarl, irrpeng-rnem inayntetyek." Kel rernem kwaty alay irrker-warl alhek, rtnnewarl nganerl-alhek. Ingwel aleth-antey ywarn arrkernalhenh, irrpeng inetyek-arrpanety, arrangkw.

<sup>4</sup> Ingwepenh ingkeny tyerrelhey-alenty, Jesus ra kwaty impalh-itwek rtnenh. Kwertengerl-rnemel Jesus arek rtnerl-anenty, rernemar renh alhengk-arey-angen-antey. <sup>5</sup> Jesus ra kwertengerl-rnemek arlek. Ra renh-rnem ayernek, "Arrantherr apek irrpeng inek?"

Rernem ielhek, "Arrangkw-antey."

<sup>6</sup> Jesus ra angkek ikwer-rnem-warl, "Netting kwaty-warl rtnwa-they arraty-ampeny-warl iwenherr-arey! Arrantherrap irrpeng akngerr ineman!" Netting rernem arraty-ampeny-warl rtnwethey iwek. Rernem irrpeng arnkengeny antwerrek netting-el. Rernem nthakenh netting renh iytarriney-angenh rtnnewarl aker arnkengeny-akert.

<sup>7</sup> Ikwer-penhan kwertengerl anyentan, Jesus ikwer artewentyel ilkelhenharl, ra Peter-warl angkek, "Yanhan Ingkartarl!" Peter-el awek-penh, ra arnkewarl aylpenhek-anem, rarl arrwekel lhelelk-penh irrpeng anterkwetyek warkirretyk iney-alenty. Peter ra kwaty-warl atnarpenhek. <sup>8</sup> Kwertengerl ingwer-rneman kwaty impalh-warl-athek rtnwel alpenh. Rernem impalh-they arrer-anem. Rernem netting awerr irrpeng-angketyarr renh iytarriney-angenhen.

<sup>9</sup> Rernem irrker-warl irrek, rtnwethey atwarrek-anem. Rernem rwanem arek ampenharl. Aker irrpeng aperrkel ampernenh, amern aynteh arrpemarl. <sup>10</sup> Jesus ra angkek, "Irrpeng-rnem atyeng-warl akngetyenherr-arey." <sup>11</sup> Peter rtnnewarl nganeynekk, rernem netting irrpeng-angketyarr iytarri-akngengi impalh-warl. Irrpeng 153 netting-itwek aynteh. Netting ra akelhey-angen-antey irrpeng akngerr-akert.

<sup>12</sup> Jesus ra angkek ikwer-rnem-warl, "Apetyenherr-arey, amern-then aker-then arlkwetyek." Rernem renh alhengk-arek, ra Ingkart. Rernem nyerrirrek, ayerney-angen-antey. "Nganang Jesus inngarl?" <sup>13</sup> Jesus ra amern inek, renh-rnem anthek. Irrpeng-rnem irrkatty-angkwarr ra renh-rnem antheynek. <sup>14</sup> Kel arrwekel ra atherr-inger ikwer-rnem-warl aremirrek. Jesus ra aremirrek kwertengerl-rnem-warl arrpemarl, ra ipmepenh itethirek-pernh.

*Jesus-el Peter ayerneyel irrpety-inger, "Mwerrang nga atyeng artewenty ilkelheyel?"*

<sup>15</sup> Kwertengerl-rnemel amern-then aker-then arlkwek-penh, Jesus-atherr Peter-atherr ament irrek. Jesus-el renh ayernek, "Simon-ay! John-kenh alerikway! Ngalew? Nganang atyeng artewenty ilkelheyel ingwer-rnem-angkwarr?"

Peter-el renh tyernek, "Ya, Ingkartay! Ntwarlap ayenh iterl-areyelarl, ayeng ngkweng artewenty ilkelheyelarl!"

Jesus-el renh ilek, "Yep-yep atyehn-rnem wantaynta." Ra alakenh anyelk-antey angkek. <sup>16</sup> Jesus-el renh ayernek arrpemarl, "Simon-ay! John-kenh alerikway! Nganang atyeng artewenty ilkelheyel?"

Peter-el renh tyernek, "Ya, Ingkartay! Ntwa ayenh iterl-areyel, ayeng ngkweng ilkelheyelarl."

Jesus angkek ikwer-warl, “Yep-yep atyenh-rnem arntarnt-arerl-aynta!”

**Anayntileyel: Yep-yep-rnem-apeny rernem aneyel, Akngey-kenh angka wantayntetyek, angka ikwerenh iterl-anem Akngey-kenh, ilayntetyek, rernemap Akngey-kenh angkek akaltyirretyek.**

<sup>17</sup> Jesus-el renh ayernek arrpemarl, “Simon-ay! John-kenh alerikway! Nganang atyeng artewenty ilkelheyel?” Jesus-el renh irrpety-inger ayernek-penh, Peter artwerrety-anem aneh.

Ra Jesus-warl angkek, “Ingkartay! Ntwan ingkerrenh iterl-areyel. Ntwa ayenh kel iterl-areyel, ayeng ngkweng ilkelheyelarl.”

Jesus angkek ikwer-warl, “Yep-yep atyenh-rnem arntarnt-arerl-aynta! <sup>18</sup> Atha ngenh arraty ileyel, awey akelyank nga arnkwel aylpenh, alhewer nga apmer ilek-ilek-warl alhenh, ngarl ilkelhenh-angkwarr. Ingwer-inger nga amperirrenty ingwer-rnemel ngenh anterkweyen, awka atherri arertneyen. Rernem ngenh apmer ingwer-warl akngayen, apmer nga ilkelhey-angenh-warl. <sup>19</sup> Atyeng-angkwarr aleth apenterl-ayntek, angkepirrey-angenh.” Jesus-el Peter renh ilek arrwekel-antey anwantherr iterl-areyek, Peter ra arwerl iylpeyl-atherrel ilwetyek arrpemarl. Peter ra Ingkartek awelhetyek, ingwer-rnemel Ingkart renh tnaketyek. Jesus-el Peter renh ilek, “Atyeng-angkwarr apenterl-aynta!”

*Jesus ra Peter-warl angkeyel kwertengerl ingwer-penh*

<sup>20</sup> Ikwer-penh Peter ra artepang arek, kwertengerl ingwer apetyen, Jesus rarl ikwer artewenty ilkelhenh. Kwertengerl irrkaty-antey Jesus ikwer-itwek aneh, Anperarl Alhek “Passover” tyenkerr arlkwenh-itwek, ra ilwey-alenty-itwek. Ra Jesus renh ayernek, “Angwenhel ngenh ahayiweyehn ahe lengkw-rnem-warl?” <sup>21</sup> Peter-el arnarek, rarl apetyen, rap Jesus-warl angkek, “Ingkartay! Artwa yanh-alew?”

<sup>22</sup> Jesus-el renh tyernek, “Ra apek iteth aneyen, ayeng ahern nhenh-warl apey-apetyek-atwety. Nhenhek iterrey-angenh. Atyengety intwemelirrey-angenh. Atyeng-angkwarr aleth-antey apenterl-aynta!” <sup>23</sup> Arraty innga. Ikwer-penh-antey kwertengerl-rnem apmwel-areth iterrenh, rarl iteth aleth anenty-arrpantey ilwey-angenh. Jesus ra alakenh angkey-angenh. Alakenh-anyem ra angkek Peter-warl, “Ra iteth anem apek, ayeng ahern nhenh-warl apey-alpeyek-atwety. Ikwer iterrey-angenh.”

*Nhenh Jesus-penh angka ywerreyel, John-el renh ingkwernek*

<sup>24</sup> Kwertengerl nhanyem rey-antey ilenh angka arrenhantherr Jesus-penh, Jesus ra warrk ikwerenh ingkerrenh ywerrelhilek. Artwa rey-antey arrpemarl angka nhanyem arraty innga pip-warl ingkwernek. Anwantherr renh iterl-areyel, ra arraty innga ilenh. <sup>25</sup> Jesus-el ilek-ilek mpwarek ahern nhenh-itwek. Nthakenh ingwerentyel ingkerrenh alakenh pip-warl ingkwerney-angenh, arrangkw. Angka ilek-ilek akngerr, nthakenh ingwerentyel ilek-ilek ingkwerney-angenh.

## Acts

*Luke-el pip atherr ingkwernekk. Angka ingwer Luke, Jesus-penh, rarl ilek-ilek mpwarek, arntety-rnem mwerrilek, rarl akngerr akalty-anthek. Ahelengkwel-rnem renh atanhek, arwerl iylpeyl-atherrek. Ra ilwek. Rernem renh intey-warl akwernek. Ingwa atherr-penh Jesus ra itethirrek. Akemirrek-anem. Akngeyel renh ipmepenh itethilek rlterrk ilkwakertel. Jesus kwertengerl ikwerenh-rnemek lwewarrernehlek. Rernem renh Akngey-kenh apmer-warl alpenty intwarek. Angka anyent ingweran Akngey-kenh Angka arlperryirrekarl, apmer arpanenh-warl. Akngey-kenh Itnweng apetyek ikwerh-rnem-warl, renh-rnem rlterrkiletyek, arnkatyiletyek. Akalty ingkerr Jesus-kenh angka awek-penh, rernemarl renh aytarek-penh, angka mwerr-angker rernem apmer arpanenhek ilerl-apenh. Acts-kenh angka aynteyel, rernem ilerl-apenh Akngey-kenh angka mwerr-angker. Luke-el Acts pip ingkwernekk, Akngey-kenh angka ingkerrenh-angkwarr arlpimpilek, rernem Jesus anyent renh iterl-arayntetyek.*

### *Angka mwerr-angker ilerl-apayntetyek*

<sup>1</sup> Theophilus-ay, pip weth iterl-aray, atharl awank ingkwernekk, angka Jesus-kenh ingkerenhh, rarl akngerr ingkerrenh-angkwarr akalty-anthek, arntety-rnem-then mwerrilek, apmer arpanenhek. Ra akely ayntek, rarl ilkwerrek, rarl warrkirrek, rarl akngerr akalty-anthek, rarl ilwek. <sup>2</sup> Ra alker-warl alpey-alentyel ra angkakert ikwerenh-rnem Itnweng Rlwartel akalty-anthek, rernem-anem apmer arpanenh-itwek akalty-anthetyek ikwerenh-angkwarr-antey.

<sup>3</sup> Irrwampenty awelhemel ilwek-penh, Jesus ra angkep arrpemarl itethirremel aremirrenhey-alpek, arla 40-ek-atwety arrpemarl. Ikwerenhel-rneman renh arnarek akngerr-inger, rarl angkep ikwerh-rnem-warl aremirrek, rarl itethirremel akwentek awenng-they. Jesus-el renh-rnem ilek, Akngey anyent aknganenty anyent ingkerrenh-hekk. Jesus-el renh-rnem akalty-anthek, Akngeyelarl ikwerenh-rnem arntarnt-aretyek. <sup>4</sup> Jesus-an angkek kwertengerl ikwerenh-rnem, “Alpey-angenh Jerusalem-they! Alerl, arrantherr mpwelhenherr-arey, Akngeyel arrenhantherr Itnweng anthetyek, atharl arrenhantherr arrwekel ilek-angkwarr, Akngeyelarl ingkerrenh alhelek, ingkerrenh ra Itnweng anthetyek. <sup>5</sup> John-el ikwerenh-rnem kwaytelant baptise-emelek. Arlta irrpetyinger-penh, arrantherr baptise inem Itnweng rlterrk ikwerenh-anem, Akngeyel Itnweng ikwerenh thwenem arrekantherr-warl.”

### *Jesus alker-warl alpeyel*

<sup>6</sup> Kwertengerl ikwerenh-rnem ikwerh-itwek anenharl-antey, rernem Jesus renh aynemek, “Ingkartay, ntwang Rome-areny-rnem irrenteyen, artwa Israel-areny anyent rlwanemel arrernem, anwekantherr atyetyart ilkwa anayntetyek?”

<sup>7</sup> Jesus angkek ikwerh-rnem-warl, “Akngay rantarl iterl-areyel arlta, atyetyart ilkwa arrernetyek. Rant akalty. <sup>8</sup> Itnweng ikwerenharl apetyem arrekantherr-warl, ingkerrenh Itnweng ikwerenh-akert rlterrk anetyek. Apmer ingkerrenh-angkwarr arrantherr ileytek, apmer arpanenhek, apmer Jerusalem-areny-rnemek, apmer Judea-areny-rnemek, apmer Samaria-areny-rnemek, ahern ingkerrenh-angkwarr arrantherr ilerl-apayntetyek angka atyeny.” <sup>9-10</sup> Jesus rarl ilek-penh, kwertengerl ikwerenh-rnemel renh intwarek, rarl kwenpay-angkwarr ywerrerl-alhek alker-warl. Rernem renh arey-angenh-anem. Rernem ikwerh ywarn-antey itnywenen, renh aretyek-arrpaney, ra ikwerh-rnem-kety ywerrenhek. Artwa atherr arnkwa arlter-akert-atherr ikwerh-rnem-warl aremirrek. <sup>11</sup> Ratherrap angkek, “Ilekek Galilee-areny-rnem arrantherr alkeran itnyweneyel? Jesus ra alpek irrwerl-warl! Ingwer-ingerant ra apey-alpeyeh, wetharl arrantherr renh intwarek-apeny arrpemarl.”

### *Kwertengerl-rnemel Matthias renh rlwaneyel, kwertengerl anetyek*

<sup>12-13</sup> Kwertengerl rernem apmer Jerusalem-warl-anem alpek, apwert arwerl alip-angketyarr-warl. Apwert Jerusalem-they arrer ayntenh. Rernem warl kwen-warl aylpenhek, itnan rernem Peter, John, James, Andrew, Philip, Thomas, Bartholomew, Matthew, James, Alphaeus-kenh alerikw, Simon, rarl Rome-areny-rnem-then atwerrenh, Judas-then, James-kenh alerikw. Rernem warl irrwerl-warl aylpenhek, irrkaty rernemarl awank anemh-warl.

<sup>14</sup> Kwertengerl rernem anyent-antey Akngey-warl angkenh. Arlta arpanenhel Mary arelh ingwerh-rnem-then Jesus-kenh aytayikw ingwerh-rnem-then, rernem kwertengerl ikwerenh-rnem-itwek anyentirrenh, Akngeyek angkayntetyek.

<sup>15</sup> Arlta ingwerel, 120 innganem Jesus-kenh kwertengerl-rnem akarirrek. Peter-anem rtnerl-alhemel, ikwer-rnem-warl angkek. <sup>16-17</sup> “Atyenh-rnemay, awank-akerr Itnwengel David renh akaltyilek, Judas renh iterl-aretyek, rarl Jesus ahelengkw-rnem-warl ahayiwayen, rernem renh ipmek atwetyek. Angka nhenh arraty innga. Judas rarl anwekantherr-itwek warrkirrenh. Ran innga Jesus renh ahelengkw-rnem-warl ahayiwek.” Alakenh Peter angkek.

<sup>18</sup> (Rernem Judas renh man anthek, ra renh-rnem atnwenhey-alhetyek Jesus ikwer-warl. Judas-el apmer renh payemelek-anem, man ikwerel. Judas ra ipmek atwelhek. Ra aytnelr-alhekk, ilwemel-anem. Atnalty-rnem aytnek ahern-warl. <sup>19</sup> Jerusalem-areny-rnem rernem ingkerrenhel awek, Judas rarl ilwek, Jesus renh ahelengkw-rnem-warl ahayiwek-penh. Judas-arl ikwer-itwek ilwek, rernem apmer renh itnewek Arrkngangketyarr.)

<sup>20</sup> Peter-el renh-rnem ilek arrpemarl, “Akngay-kenh angka arrwekeleny Psalm pipitwekan arrwekel aynteyelar, Judas ra ilwekerr-awaty: ‘Warl ikweren hrltwanem aynteyen. Ingwerenty aney-angenh-anem arrangkw innganem. Ingwerenty-anem warrk ikweren-h-warl arrernelhetek, rarl ilwek-kety.’

<sup>21-22</sup> Artwa anyent-anem anwantherr arrerneteyek, rarl ilerl-apayntetyek apmer arrpanenh-itwek, Jesus rarl itethirremel akwentek. Artwa anyent akaltyirrek Jesus-angkwarr ywerreyek-atwety, Jesus renharl ra aytarek, renharl John-el baptise-emelek, rarl renh aleth-antey Jesus renh apentek, alker-warl alpekek-atwety.”

<sup>23</sup> Rernem iterreh artwa nthenh-apeny rlwanetyek, ranem angkakert anetyek. Artwa anyent Joseph Barsabbas, ingweran Matthias. <sup>24-26</sup> Rernem Akngay-anem ayernek. “Ntwa ingkerrenh iterl-areyel, aleth-antey. Ntwa anwekantherr anayntila, anwantherr artwa anyent arraty rlwanetyek, angkakert anetyek, Judas rarl ilwek-kety, rarl apmwangkwarr amentewarl alhenh.” Apwert atherr-anem irrwerl-warl-athetk iwek arrkernelhemel. Apwert ratherr ahern-warl aytnek apek apwert-itwek ayntek. Apwert ikwer-itwek Matthias itna ayntek. Artwa Matthias rantey antengilek. Matthias ikwer-rnem-warl anyentirrek.

## 2

### *Itnweng Rlwart ikwer-rnem-warl apetyeyel*

<sup>1</sup> Pentecost arlta anyent ikwerel-antey Jesus ikweren-h-warl akarirrek. <sup>2</sup> Rernem awek awer-apeny arwerlk angkenty. <sup>3</sup> Anyentel-anyentel akapwert-warl lherrm-apeny arrernelhek, rernem warl kwen-itwek rtnenh-warl. <sup>4</sup> Itnweng Rlwart ra ikwer-rnem-warl antelhek, rernem angka ingwerek-ingwer angkerrenh, ingkerrenh awerrey-angenhant-arey.

<sup>5</sup> Jew-rnem apmer arrpanenh-they arwa apetyek, apmer Jerusalem ikwer-itwek anerl-apetyek. Rernem Ingkart-angkwarr apenten. <sup>6-7</sup> Arwerlk angkenty rernem awek, rernem ingkerrenh anyentirrek. Rernem ywarn iterrek, rernem angka ingkerrenh angkerrenh. ‘Nhenh-rnem Galilee-areny-rnem. <sup>8</sup> Nthakenh rernem angka ingwerek-ingwer angkerreyel? Anantherr renh-rnem aweyel, rernemar angka anwekantherr-apenyarl angkeyel. <sup>9</sup> Ingwer-rnem Parthia-areny-arl, Media-areny-arl, Elam-areny-arl, Mesopotamia-arenyarl, Judea-arenyarl, Cappadocia-arenyarl, Pontus-arenyarl, Asia-arenyarl, <sup>10</sup> Phrygia-arenyarl, Pamphylia-arenyarl, Egypt-arenyarl, Libya-arenyarl, Cyrene tawen-they arrer, ingwer-rnem apmer Rome-they apetyek. <sup>11</sup> Ingwer-rnem Jew lyerteny-rneman, ingwer-rnem Jew akely-penh-rnem, Crete-areny, Arabia-areny. Rernem angkerreyel, ‘Akngay rlterrk inngan.’”

<sup>12</sup> Rernem ywarn iterrek. Ingwer-rnem angkerrenh, “Ilek-arrpantey nhenhan?”

<sup>13</sup> Ingwer-rnemel renh-rnem arrkernelhilenh, terangk rernem angkerrerl-anenty-arrpantey.

### *Peter angkeyel ingkerrenhek*

<sup>14</sup> Peter ra kwertengerl 11-pel-itwek rtnenh. Ra aketh innga renh-rnem ilek, “Atyenh-rnem, arranherr ingkerrenh Jerusalem-areny atyeng mwantyel awelhennerr-arey, atharl arrekantherr illem. <sup>15</sup> Arranherr apmwangkwarr arrpantey ilerl-anemel. Nhenhan ingwepenh arwarl, nthakenh terangk irrey-angenh ingwepenh. <sup>16</sup> Akngay-kenh angkakert Joel ra awank-akerr anenh. <sup>17</sup> Akngay angkek ikwer-angkwarr: ‘Arlta ingkern ikwerel atha ingkerrenh-anem Itnweng atyenh antheyen. Ingkerrenhekek. Ikwer-penh awey arrekantherrel-rnem kwey arrekatherrel-rnem angka atyenh ileyen. Ayeng artwa akely-rnem arrekantherrenh-warl aremirreyen,

artwa ampwernem-warl-then, rernem altyerr areyenh. <sup>18</sup> Atha artwa warrkenh-rnem-then arelh warrkenh-rnem-then Itnweng atyenb anthem. Angka atyenb ingwer-rnem-warl rernem ileyenh. <sup>19</sup> Athanem ingwerek-ingwer lwewarrerneyek alker-itwek-then, ahern-itwek-then. Rernem rwa lherrm areyenh, kwert-then, arrkngethen. <sup>20</sup> Ingkeny ra ingwemerit irreyenh, alkent ra rnter-rnter irreyenh, arrkgapeny. Ikwer-penh Ingkart ra apey-alpeyenh rlterrk ilkwakert. <sup>21</sup> Arlta ingkern ikwerel, Ingkartel renh-rnem arntarnt-areyenh, rernemarl renh ayernenty, ra renh-rnem arntarnt-aretyek.' Alakenh-anyem Joel-kenh pip-itwek aytaney.

<sup>22</sup> Artwa Israel-kenh-rnem, arrantherr atyeng awelhennherr-arey, atharl arrenhantherr ilem, Jesus Nazareth-areny ikwer. Akngey rantey Jesus ikwer inkwerelhek, renh rlterrkilemel, ilek-ilek-angkwarr ra mpwarayntetyek. Kel arrantherr arek rarl ilek-ilek mpwarek. <sup>23</sup> Akngey ra arrwekel-antey iterrek, Jesus arrekantherr-warl thwenetyek, ingkerrenhek katy ilwetyek. Ra arrekantherr-warl kel thwenek. Arrantherr artwa apmwernehm-warl-then artwa ahelekgw-rnem-warl ahayiwek, rernem renh ipmek atwetyek, rernem renh arwel iylpeyl-atherrek atanthek. <sup>24</sup> Akngeyel renh angkep arrpemarl itethilek, rlterrk ikweren-hakertel. Arrewaly-rnem awenng-itwek aytaney. Rernem ywarn-antey ament akemirreyenh. Jesus ra awenngel aytenten arrpemarl. Akngeyel renh akemelhilek, rlterrk ikweren-hakertel. <sup>25</sup> Atyetyart David-el ingkwernek pip-warl arrwekel-antey Jesus-arl aremirreyenh. Ra alakenh-anyem ingkwernek: 'Ingkart ra atyeng-itwek arrer aneyel. Artwa ingwer-rnem ywarn atyenb arrkernalheyen, ayenb ilpitletyek. <sup>26</sup> Ayeng irrknngerney-anem aneyel, Akngeyekant-anem ayenb inkwerelhemel. Ayeng alhewer-anem anayntem, rarl ayenb arntarnt-areyel. <sup>27</sup> Ingkartel ayenb iwerl-alhey-angenh awenng-itwek. Ra ayenb arntarnt-areyenh, awenng-itwek, ayenb iwerl-alhey-angenh, ngarl ayteng ilkelheyel. <sup>28</sup> Ra ayenb akalty-anthek, arraty-angkwarr anetyek, ayeng aknganekarl iteth aneyenh. Ra ayenb irrknngerney anthek, atyeng-itwek intem-antey aneyenh.'

<sup>29</sup> Peter angkek arrpemarl, "Atyenb-rnem, angka David-kenh ayeng arraty angkeyel. Ra ilwek, rernem David renh awenng-warl akwernek. Aleyan awenng ikweren-hakertel aytaney. <sup>30</sup> David ra Ingkart-kenh angkakert anenb. Ra iterl-arek, Akngeyelarl renh alhelek, artwa anyent ikwer-rnem arrerentyek, ra aytetyart ilkwa anetyek."

<sup>31</sup> David ra iterl-arek, Ingkartel angkep anyent impen akemelhileyen. Ra ilek, Akngeyel renh awenng-itwel iwerl-alhey-angenh. <sup>32</sup> Akngeyel Jesus renh innga akemelhilek, arrewaly-penh itethilemel. Anwernantherr akalty, anwernantherr renh angetherr aytaremel arek.

<sup>33</sup> Jesus ranem alker-warl alpek, Akngey-itwek aney-alpek. Akngeyel Itnweng renh alhelek, renh anthetylek, Jesus ra Itnweng rlterrk anwenhantherr antheyel. Aleyan arrantherr areyel-anem, aveyel-anem, Itnweng renhey-antey. <sup>34</sup> David ra alker-warl alhey-angenh. Ra angka nhenh ingkwernek, ament ikweren-hangkwarr-weny: 'Ingkart angkek Ingkart atyenb-warl, "Atyenb-itwel ana! <sup>35</sup> Artwa apmwernehm atha antengileyek, rlterrk ilkwakertel, renh-rnem ywerrelhilemel, rernem ngkweng awelhetyek.'

<sup>36</sup> Israel-kenh-rnem ingkerrenh, arrantherr nhenhek ingkerrenhel iterl-aretyek, Jesus irrkaty weth nhnenhan arrantherr arwerl iylpeyl-atherrel atanthekarl. Akngeyel Christ arrernek, ra Ingkart arrekantherr ingkerrenhek anetyek." <sup>37</sup> Angka rernem awek-penh, rernem ywarn iterremel-anem anenb. Peter-anem rernem ayernek, kwertengerl ingwer-rnem-then, "Nthakenh-angkwarr arrantherr irreman?"

<sup>38</sup> Peter angkek, "Akngey-warl angkep irrenherr-arey, baptise inemel, itna Jesus-angkwarr, Akngeyelarl apmwa arrekantherrety iwem. Ikwer-penh Itnweng Rlwart ra antelheyen arrekantherr-warl, arrekantherr-itwek intem anetyek. <sup>39</sup> Alakenh-anyem Akngeyel arrekantherr arrernek, ampernemek-then ingkerrenhek, Itnweng ikweren-hthwenetyek. Apmer ingwer-areny-rnem-then Akngeyel ikwer-rnem arrernek arrpemarl, Itnweng ikweren-hthwenetyek."

<sup>40</sup> Peter-el renh-rnem akalty-anthek arrpemarl aleth-antey, "Arrantherr artwa apmwernehm-they angkep irretylek." <sup>41</sup> Rernem-anem Peter-ek awelhek. Rernem-anem Peter-warl apetyek, renh-rnem baptise-emeleyek. Arlta ikwerel-antey, Akngeyel artwa 3,000 innga anyentelhilek kwertengerl ikweren-hrnem-warl.

#### *Angka tyaty-areny arrwekeleny-rnemek*

<sup>42</sup> Angkakert-rnem rernem-anem ingwer-rnem akaltyilek. Rerneman aleth-antey anyentirrenh, amern arlkwetyek, Akngey-warl-anem rernem angketyek.

<sup>43</sup> Akngey Ingkartel kwertengerl-rnem akaltyilek, rernem ilek-ilek mpwaretyek. Angkakert rernem ilek-ilek mpwarek. Akngey Ingkart aremirrek, ikwer-rnem-warl,

rlterrk ilkwakert. Ingwerel-rnem rlterrk-akert arek-penh, rernem ater-anem irrek. <sup>44</sup> Rernem anyent irrenh, rernem mwarrant-arey anenh. Man-rnem-then rernem antherrenh arwa alhewer-antey, ampwal-rnem-then. <sup>45</sup> Ampwal ingkerrenh rernem tharlemilek, arrangkwarl anenh-rnem-then ingkerrenh arwa rernem man anthek irrepern-rnem. <sup>46</sup> Arlta arpanenr rernem anyentirrenh tyatv ilkwa Jew-rnem-kenh-warl, warl ilkwa anyent-itwek. Apmer ingwer-rnem-warl rernem alhenh, anyentirretyek amern arwa arlkwayntetyek. <sup>47</sup> Rernem irrkngnerney ingkerrenh anenh, Akngeyek inkwrelhemel. Ingwer-rnem ikwer-rnem inkwrelhek-antey arrpemarl, rernemarl iylpareth anenhek. Arlta arpanenhel Ingkartel ingwer-rnem pwetylenn, akngerram-akngerr ilemel, rernem Jesus ikwer-angkwarr iteth anayntetyek.

### 3

#### *Peter-el artwa lerrp mwerrileyl*

<sup>1</sup> Arlta ingwerel atwerrp 3 o'clock-el Peter-atherr John-atherr alhek, Jew-rnem-kenh tyatv ilkwewarl, Akngey-warl angketyek. <sup>2</sup> Arlta arpanenhel ingwer-rnemel artwa lerrp renh akngenh, arriw ikwer-warl renh arrernenh. Iwerr keyt rernem itnewek Keyt Mwerr-angker. Iwerr-angkwarr alhenh-rnem artwa lerrpel ngkweltyek ayerney-ayntenh. Ratherr arek artwa lerrp renh.

<sup>3</sup> Artwa ra John-atherr Peter-atherr ayerney-ayntek ngkwelty anthetyek, artwa lerrp renh, ratherr ikwer-angkwarr alhek warl kwen-warl. <sup>4</sup> Ratherr renh arek, atherrel-antey. Peter angkek ikwer-warl, "Aylenhanth ara!"

<sup>5</sup> Artwa lerrpel renh-atherr arek, ratherr ngkwelty anthentyek-arrpantey. <sup>6</sup> Peter ikwer angkek, "Ayeng ngkweltyek arrangkw! Atha ngenh ileyel, Jesus Christ Nazareth-areny itnangkwarr rtnerl-alha!" <sup>7-8</sup> Peter-el ilyta arraty-they renh anterkwemel rnkernekk. Ingkety rlterrk-anem irrek, ra atrarnpekk inkwrelhemel, alhemel-anem. Ra Peter-atherr John-atherr-angkwarr alhek, atrarnperl-apemel, Akngeyek inkwrelhemel. <sup>9</sup> Ingwerel-rnem arek rarl Ingkartek inkwrelherl-apen. <sup>10</sup> Rernem artwa renh aketh-antey alhengk-arek rarl iwerr ikwerel mpwelhemel artwernem manek arlkarewey-ayntenh Keyt Mwerr-angker-itwek. Rernem ywarn iterrek, "Nthakenh-anem artwa nhnenh irrekan?"

#### *Peter-el angka Jesus-kenh ileyel*

<sup>11</sup> Artwa ra Peter-atherr John-atherr anterkwenth-antey, akngerr ikwer-atherr-warl akarirrek. Lywenty ra itna Solomon-kenh Lywenty. <sup>12</sup> Peter-el renh-rnem arek, rernemarl ikwer-atherr-warl akarirrenh, ra angkek, "Israel-kenh-rnemay, ilekek arranther aylenhanth artewentyel areyel, aylanth rlterrk-arrpantey? Arranther apek iterreyel aylanth mwerr-arrpantey? <sup>13</sup> Ingkart Akngey irrkaty-antey aneyel. Abraham, Isaac, Jacob rernem ikwer inkwrelhek-antey. Ra Jesus, alerikw ikwerenhek inkwrelhek. Artwa irrkaty rey-antey ahelekgw-rnem-warl ahayiwek, renh ipmek atwetyek. Arranther ikwerety intwemelirrek. Pilate-el tyarlewetyek angkek, arranther ikwerety arlkariirrek. <sup>14-15</sup> Jesus ra arraty innga anenh. Arranther ikwerety arlkariirrenh. Arranther Pilate renh ayernek, artwa apmwya tyarlewetyek, artwa mwarrant atwemel. Itethiley-angkerarlap ran. Artwa rarl arranhantherr irrpelthel itethilek, renh arranther ipmek atwek. Akngeyel renh angkep itethilek. Anwanther-anem akalty, anwanther renh iteth arek-penh. <sup>16</sup> Artwa lerrp nhnenhel Jesus tnakeyel rlterrk ilkwakert. Alakenh-anyem Akngeyel renh mwerrilek, Jesus-kenh itnangkwarr. Kel yanhey-antey arranther arek.

<sup>17</sup> Atyenh-rnemay, arranther Atyetyart-rnemel-then apalel Jesus renh ipmek atwek. <sup>18</sup> Akngeyel angkakert ingwer-rnem-angkwarr arrwekel-antey ilek, Jesus ra irrwampenty awelhey-alenty, artwa apmw-rnem renh atwey-alenty. Akngey-kenh Angka ranem innga aynteyel. <sup>19</sup> Arranther Akngey-warl angkepirretyek apmwekety, rarl apmwa arrekantherretty iwem. <sup>20</sup> Akngeyel rlterrk arrenhantherr antheyenh, ra Jesus arrekanther thweneyenh. <sup>21</sup> Jesus ra alkerel-antey anem, Akngeyel ahern nhnenh lyertenyletyek, angkakert arrwekeleny ingwer-rnemarl awank-akerr ilek-angkwarr-antey. <sup>22</sup> Akngeyel renh-rnem Moses-angkwarr ilek, "Angkakert ingwer-anem atha arrekanther-warl thweneyenh. Ra Angkakert Moses-apeny anem, arranther ikwer awelh-ayntetyek. <sup>23</sup> Ingwer apek angkakert ikwer irrpelthirrent, Akngeyel renh iwerl-alhem intem-antey. Alakenh-anyem Akngey-kenh angka aynteyel. <sup>24</sup> Samuel-then angkakert ingwer-then rernem Akngey-kenh Angka akalty-anthek, Artwa Impen nhnenhey-antey. Angkakert rernem ingwer-rnem Moses-they ingkern akalty-anthek Akngey-kenh angka arrpemarl. <sup>25</sup> Arranther alakenh Akngey-angkwarr apentetyek. Angka Akngeyel arrernek arrwekeleny-rnemek. Angka ra Akngeyel Abraham ilek,

'Ngkwenh-rnem-angkwarz angka atyenh arlpimpireyenh, apmer arrpanenh-angkwarz, ahern-areny ingkerrenhel ayen iterl-arayntetyek-awaty.' <sup>26</sup> Akngeyel alerikw ikw-erenh arrekantherr-warl-tangkwel thwenek, arranther ikwer-warl angkepirretyeck apmwekeyt.'

## 4

*Jew-rnem-kenh atyetyart-rnemel Peter John ikwer-atherr ileyl, ratherr Jesus-kenh angka akalty-anthey-angenh anetyek*

<sup>1-2</sup> Peter-atherr John-atherr ratherr akngerr ingwer-rnem akalty-anthenh, Jesus ipmepen akemirrekarl. Ratherr renh-rnem ilenh, ingwer-rnem angkep ipmepen itethirreyenh, Jesus-apeny. Artwa tyaty-areny ingwer-rnem, atyetyart ilkwa ahelengkw-rnem-kenh, Sadducee-rnem-then, rernem apetyek ikwer-atherr-warl. Rernem ikwer-atherr ahelirrek. <sup>3</sup> Ingkeny kwenirreynenh-anem, ahelengkwel-rnem renh-atherr anterrkwek, tyaylek-anem akwernemel, ingwepenhek-atwety. <sup>4</sup> Akngerr ingwer-rnem ratherrarl renh-rnem akalty-anthek, rernem Jesus tnakek. Ingkart-rnem akngerr-anem irrek, 5,000.

<sup>5</sup> Ingwepenh artwa ampwernem-then Moses-kenh angkakert-rnem-then Atyetyart Jew-rnem-then rernem Jerusalem-itwek akarirrek. <sup>6</sup> Atyetyart tyaty-areny ilkwa Annas, Caiaphas, John, Alexander, Annas-kenh ingwer-rnem-then, rernem ingkerrehn akarirrek. <sup>7</sup> Rernem Peter-then John-then akngetyek tyayl-they, renh-atherr ampepitwek arrernek, rernem renh-atherr ayern-ayntetyek. Rernem renh-atherr ayernek, "Angwenhel mpwelenhanth rlterrilek, artwa lerrp mwerriletyek? Angwenh-kenh itnangkwarz mpwelanth itethileyl? Angwenh mpwelenhanth rlterrilek, mpwelanth arntety-rnem mwerriletyek?"

<sup>8-9</sup> Akngey-kenh Itnweng Rlwart-akertel Peter renh rlterrilek. Peter-el renh-rnem ilek, "Atyetyart-rnemay, artwamp-rnem-then, arranther aylerannah ayerneyel, nthakenh aylerannah artwa lerrp renh mwerrilek? <sup>10</sup> Aylerannah-anem arrenhantherr Israel-areny ingkerrehn iletyek. Aylerannah artwa lerrp renh mwerrilek, Jesus Christ Nazareth-areny-kenh itnangkwarz. Arranther Jesus renh arwerl ilypeyl-atherrel atan-thek ilwetyek-atwety. Akngey Ingkartel renh angkep ipmepen itethilek. <sup>11</sup> 'Arranther renh apmwek-atherr arenh. Ran inngarl, anyent impen.' <sup>12</sup> Jesus rant ingwer angkep itethilem. Jesus-kenh itnakertelant anwanther itethirrem."

<sup>13</sup> Atyetyart-rnem apatek, ratherrarl alhewer-antey ikwer-rnem-warl angkenh nyerrirrey-angenh, arnkaty innga. Rernem renh-atherr iterl-arenh, ratherr akwerrp aneh, akaltyirrey-angenh-antey awank. Artwa rernem iterl-arek, ratherrarl Jesus-itwek aneh awank. <sup>14</sup> Artwa lerrp-penh ra ikwer-atherr-itwek rtnenh. Artwa ra herrety 40-pel aneh, rarl mwerrirrek. Atyetyart-rnem apatek.

<sup>15</sup> Atyetyart-rnemel Peter-then John-then aketh-warl irrentek. Rernem ament-anem angkerrenh, <sup>16-17</sup> 'Nthakenh-anem artwa nhenh-atherr anwanther ileman? Jerusalem-areny-rnemel kelari iterl-areyel, ratherrarl renh mwerrilek. Ananther nthakenh arrangkw iley-angenharl. Ingwer-rnemel awekerr, anwanther renh-atherr menty iletyek Jesus-kenh angka ikwer.' <sup>18</sup> Rernem ikwer-atherr yangkelhek, ratherr apetyetyek. Atyetyartel-rnem renh-atherr artwerilek, "Mpwelanth Jesus-kenh Angka ingwer-rnem akalty-anthey-angenh anetyek."

<sup>19</sup> Peter-atherr, John-atherr ratherr artwa ingwer-rnem ayernenh, "Aylerannah Akngey Ingkartek awelhem apek, arrekantherr apek? <sup>20</sup> Nthakenh aylerannah akater aney-angenh. Aylerannaharl Jesus renh awek-penh, arek-penh, aylerannah ingwer-rnem ilem."

<sup>21-22</sup> Rernem ywarn-antey iterrek, ilekek renh-atherr atweman. Ingkerrenh Akngeyek inkwerelhek, rarl renh mwerrilek. Rernem renh-atherr menty-anem tyarlewek alpetyek, renh-atherr ilenh, "Mpwelanth apmwelhelentyan, anwanther mpwelenhanth atwemarl."

*Rernem Akngey ayernem, ra renh-rnem rlterriletyek, rernem angka mwerr-angker arnkatyel iletyek*

<sup>23</sup> Tyayl-they ratherr tyerrelhek-penh, ratherr Ingkart-areny-rnem-warl alpek. Ratherr angkanem iley-alpek, atyetyart rernemarl ilenh. Angkanem ilerl-apenh ingwer-rnem-warl. <sup>24</sup> Ingkart-areny rernem awek-penh, rernem Akngey Ingkart-warl-anem angkek, "Atyetyartay, ahern-then alker-then, kwaty alay-then, antyarr-rnem-then, ahern-areny ingkerrenh ntwa arrpmernekk. <sup>25-26</sup> Nga arrwekeleny David-ek alakenh angkek, 'Ilekek alethang-rnem ahelirreyel? Ilekek rernem atwerr-ayntetyek ilkelheyel? Atyetyart ahern-areny-rnem iterreyel, Akngey Ingkartek-then ikwerenh Christ-ek antengileyek

arrkernalheyel-arrpantey?" David-el ilek Itnweng Rlwart-akertel. <sup>27</sup> Nhel apmer Jerusalem-itwek artwa Jew-weny-rnem-then Atyetyart Herod-then Pontius Pilate-kenh-rnem-then anyentirrek artwa Israel-kenh-rnem-then, Jesus warrkenh arrayt ngkwenh atwetyek. <sup>28</sup> Rernem renh atwek ngarl arrwekel angkek-angkwarr-antey. <sup>29</sup> Ingkartay, anwantherr warrkenh ngkwenharl. Anwenhantherr rterrila, anwantherr arnkatyel angka ngkwenh ilerl-apayntetyek. <sup>30</sup> Ntwa arntety-rnem aleth-antey mwerrerl-aynta. Anwantherr arntety-rnem mwerriletyek Jesus-kenh itnangkwarr, anyent impen ngkwenh."

<sup>31</sup> Warl akngelhek. Jesus-arl apenten-hnem mwarrant-arey anenh. Itnweng Rlwart ikwer-rnem-warl apetyek, rernemap alhewer-antey ilerl-apenh.

### *Jesus-arl apenten-hnem rernem mwarrant-arey anetyek*

<sup>32</sup> Rernem ilterrey-angenh mwarrant-arey anenh Ingkart-angkwarr. Jesus-arl apenten ingwer-rnem rernem arwa alhewer antherrenh. <sup>33</sup> Itnweng Rlwartel angkakert-rnem arnkatyilek. Rernem ingkerrehn arnkatyel ilerl-apenh, "Jesus ra ipmepenh itethirrek." Akngeyel renh-rnem ingkerrehn arntarnt-arek. <sup>34</sup> Rernem ampwal ingkerrehn warl-rnem-then tharlemilek. Ingwer-rnemel ampwal atnyeney-angenh, ampwal ingkerrehn warl-rnem-then. Man-rnem rernem inek, ampwal tharlemilek-penh. <sup>35</sup> Artwa ingwer-rnem-warl antheynek, arrangkwarl anenh-rnemek, man-weny irrepern-rnem.

<sup>36-37</sup> Joseph-el apmer amern weyt-angketyarr ikwerenh tharlemilek, man ingkerrenh ra angkakert-rnem-anem anthek, man-weny-rnem anthetyek. Joseph Cyprus-areny artwa anenh. Itna ingweran rernem renh itnewek Barnabas, alakenh angkemel, "Ingwer-rnem irrkngerney anthey-angker".

## 5

### *Ananias Sapphira-atherr*

<sup>1</sup> Anewart-atherr artwa Ananias-then, arelh Sapphira-then, ratherr apmer amern weyt-angketyarr tharlemilek arrpemarl. Ratherr man ataperr ayerrpilek, ikwer-atherrant ratherral man ayerrpilek, ingwer-rnem-warl arrayt ilelhey-angenh anyelkel-antey. <sup>2</sup> Ananias ra man akely angkakert-rnem-anem anthek, irrtiyertel-antey. Ratherr irrtiyerremel ilelhenh, man ilkwa anthetyek-arrpantey. <sup>3</sup> Peter-el renh ilek, "Arrentyel ngenh anterkwek, nga ikwerant-anem awelhek. Ilekek nga irrtiyerrekan Itnweng Rlwart Akngeyel-kenhek?" <sup>4</sup> Apmer amern-angketyarr ntwa tharlemilek, man ntwa ayerrpilek ngkwenh-antey arrpemarl. Ngap Akngeyekant irrtiyerrekan, ahern-areny-rnem-wenyek!" <sup>5-6</sup> Ananias ra awek-penh, ra aytnerl-alhemel ilwek-anem. Artwa anthety rernem apetyek, arrewaly renh ataperrelek, rernem akngekan akwernetyekant-anem. Ingwer-rnem aterirrek.

<sup>7</sup> Atwerrp anewikw ikwerenh Sapphira aylpenhek, apal-antey. <sup>8</sup> Peter-el ayernek, "Ntwa amern-angketyarr tharlemilek man irrkaty ikwer-antey. Ananias-el man ingkerrenh-antey akngetyek?"

Sapphira-el ilek, "Ya, kel ra anthek, ingkerrenh-antey, lipwel-antey yanhan!"

<sup>9</sup> Peter-el ilek, "Mpwelanth irrtiyerremel Itnweng Rlwartek. Artwa yanh-rnem rtnenherreyel arriw-itwel. Rernem Ananias-tangkwel akwernek. Ikwer-panhen rernem ngenh-anem akwernem." <sup>10</sup> Sapphira aytnerl-alhek, ilwemel-anem. Artwa rernem aylpenhek, Sapphira arrewaly-anem arey-alhek. Rernem renh akngek, akwernetyek anewikw ikwerenh-itwek. <sup>11</sup> Tyaty-areny-rnem rernem-anem aterirrek. Akngerr ingwer-rneman aterirrek arrpemarl.

### *Rernem ilek-ilek mpwareyel*

<sup>12</sup> Ingkart-kenh angkakert-rnemel arntety-rnem mwerrilek Akngey-kenh Itnweng-akertel. Jesus-arl apenten-hnem anyentirrenh Solomon-kenh Lywenty-itwek. <sup>13</sup> Artwa ingwer-rneman inkwerelhek. Rernemap ikwer-rnem-itwek anyentirrey-angenharl.

<sup>14</sup> Akngerr ingwerel-rnem Ingkart-anem apenten, artwernem-then, arelh-rnem-then.

<sup>15</sup> Rernem arntety-rnem akngetyeh iwerrel-antey, panty-warl arrernemel. Rernem iterrek, lywenty ikwerenhel renh-rnem arnenty, rernem mwerrirreyek. <sup>16</sup> Ingwer-rnem tawen-el anenh-rnemel Jerusalem-ampenyel. Rernem arntety-rnem-then arrenty-akert-rnem-then atnwenhenh. Kwertengerl-rnemel renh-rnem mwerrilek.

### *Jew Atyetyart-rnemel renh-rnem alwerneyel, atwetyek*

<sup>17</sup> Atyetyart ilkwa Jew-kenh tyaty-areny-rnem-then Sadducee-rnem-then rernem ikwer-rnem-kety arlkariirrek. <sup>18</sup> Angkakert renh-rnem anterkwek, tyayl-ek-anem akwernemel.

<sup>19</sup> Ingwel Ingkart-kenh angel apetyek, arriw ikwer-rnem-anem altywerilek, renh-rnem

tyarlewek tyayl-they. <sup>20</sup> Angel-el renh-rnem ilek, "Tyaty Jew-kenh-warl alhenherr-arey, renh-rnem iletyek, rernem arraty-angkwarr apentetyek." <sup>21</sup> Ingkeny tyerrelhenhey-alentyel, rernem alhek tyaty ilkwewarl, renh-rnem akalty-anthetyek. Atetyart ilkwa warrkenh ikwerenh-rnem-then rernem Council-rnem akarrilek, rernem angkerretyek. Rernem angkakert-rnemek yangkelhek.

<sup>22</sup> Tyayl-areny ilytemwerney-rnem ikwer-rnem ywarek. Rernem ilek, <sup>23</sup> "Anantherr tyayl-warl alhek. Tyayl renh arey-alhek martekarl ra aynten. Tyayl arntarney-arey-angker-rnem arriw ikwer-itwek rtrenh. Anantherr arriw altywerilek, arrangkw-anem arey-alhek." <sup>24</sup> Ilytemwerney-rnem-kenh Atyetyartel angka awek-penh, ra ywarn iterrek. Jew-rnem-kenh Atyetyart-rnem ywarn iterrek arrpemarl. <sup>25</sup> Artwa anyent angkakert apetyek, renh-rnem iley-alhek, "Artwer nem ntwarl tyayl akwernek-rnem, rernem ingwer-rnem angka Akngrey-kenh ilerl-apeyel, tyaty ilkwa Jew-rnem-kenh aketh-ampeny-itwek." <sup>26</sup> Ilytemwerney atyetyart ilkwa ilytemwerney ingwer-rnem-then rernem angkakert-rnem akngrey-alpek, renh-rnem atwey-angenh, ingwer-rnemel ilytemwerney-rnem atwekerr, apwertele wekerr.

<sup>27</sup> Kwertengerl-rnem akngreyek Council-rnem-warl. Atyetyart ilkwa tyaty-arenyel renh-rnem ilek, <sup>28</sup> "Anwantherr arrwekel-antey arrenhantherr ilek, 'Jesus-kenh-angkwarr akalty-anthay-angenh.' Arranther Jerusalem ingkerrenh-angkwarr akalty-antheneh. Anwenhantherr ayntarrp-ileyel, Jesus atwenty-arrpantey."

<sup>29</sup> Peter kwertengerl ingwer-rnem-then angkek, "Ahern-arenyek awelhey-angenh, Akngreyek antey awelheyel. <sup>30</sup> Arranther Jesus renh atwek, arwel iylpeyl-atherr-warl, aylparirremel. Arrukeleny-rneman awelhenhan Akngreyek, rarl Jesus renh itethilemel ipmepen akemelhilek, Akngrey anyent rey-antey. <sup>31</sup> Akngrey ra Atyetyart anwekantherr arrernek, itethiley-angker. Akngrey Ingkartel renh arrernek, Israel-kenh-rnem apmwekety angkepirretyek, apmwa ingkerrenh-kety iwetyek. <sup>32</sup> Arranther ileyel, Itnweng Rlwartel ileyel arrpemarl. Rernem Akngreyek awelhenty, rernem Itnweng Rlwart-akert-anem."

<sup>33</sup> Council-rnemel awek, rernem ahelirrek, renh-rnem ipmek atwetyek. <sup>34</sup> Anyent ingweran Pharisee anenh, itnan Gamaliel. Ingkerrenhel renh mwerr antwenh. Ra impen Moses-kenh angka akalty-antheneh. Ranem ilytemwerney-rnem ilanthe, kwertengerl-rnem aketh-warl akngreyek. <sup>35</sup> Ra Council-rnem-warl angkek, "Artwa Israel-kenh-rnem mwantyel iletyek. <sup>36</sup> Apmwerrkel artwa anyent Theudas, ra ilelhek ra akwel atyetyart ilkwa anetyek. Artwa 400 irlkenty ikwer-angkwarr anenh arrpemarl. Artwa ingwerel renh ipmek atwek, ikwerenh-rnem anterrerrek, Artwa Impenarl atwek-kyet.

<sup>37</sup> Artwa anyent ingweran Judas Galilee-areny apetyek, kapment-rnem-el artwer nem count-emileyel-angkwarr-antey. Artwa ingwerel renh ipmek atwek arrpemarl. Artwa ikwerenh-rnem arlperryirrek arrpemarl.

<sup>38</sup> Alakenhaym-kety artwa renh-rnem menty-anem ipmenherr-arey. Angka nhenh apek ahern-areny-kenh anamerl ywerreyen weth-lkwer. <sup>39</sup> Akngrey-kenh angka rernemarl apek ileyelek, nthakenh arrkngert angkey-angnenan."

<sup>40</sup> Sanhedrin Council-rnem Gamaliel ikwer awelhek, rarl angka ilenhek, rernem angkakert-rnemek yangkelhek, rernem ahelengkw-rnem ilanthe, renh-rnem whip-el atwetyek, renh-rnem ilek, Jesus-kenh angka iley-angenh anayntetyek. Renh-rnem menty-anem tyarlewek.

<sup>41</sup> Rernem Council-rnem-kety alpek, irrkngeley-arey. Rernem inkwerelhek, Akngreyek warrkirretyek, ahelengkwel-rnemarl renh-rnem atwenh-kety. <sup>42</sup> Arlta arpanenhel rernem anyentirrenh Jew-rnem-kenh tyaty ilkwitwek, warl ingwerek-ingwer ikwer-rnem-kenh. Rernem ipmelhey-angenharl, intem-antey Akngrey-kenh angka ilenh, Jesus ran artwa, Akngreyel awank-akerr alhelek renh thwenetyek ahern nhewarl, ahern-areny ingkerrenh itethileyek.

## 6

*Rernem artwa 7-pel arrerneyel, Ingkart-kenh-rnem arntarnt-aretyek*

<sup>1</sup> Akngreyel akngerr ingwer-rnem pweytilek ikwerenh-rnem-warl. Angkakert ingwer-rneman angka Greek-arl angkenh. Ingwer-rneman angka Hebrew-arl angkenh. Rernem amern-they ilterrenh. Arelh Greek amperr-areny impert-rnemel amern iney-angenh, ingwer-rnemel arrkngalek-kety. Ingwer-rnemel arelh impert-rnem amernel wantey-angenh. Greek-arl angkenh-rnem arlkariрен Hebrew-arl angkenh-rnem-kety.

<sup>2</sup> Angkakert 12-el ingkerrenh anyentilek. Ikwer-penhan rernem ilek-anem, "Anwantherr mwerr-angkwarr Akngrey-kenh angka akalty-anthayntetyek ipmelhey-angenh,

amern arlperrtyelhiletyek. <sup>3</sup> Alakenh-anyem arrantherr artwa 7-pel mwerr-rnem iylpareth-rnem rlwanetyek, artwa Akngey-kenh Itnweng Rlwart-akert-rnem. Artwa akwerrng mwerr-rnem. Anantherr renh-rnem rkernetyek, amern rernem arlperrtyil-ayntetyek ingkerrenhek. <sup>4</sup> Anantherr Akngey ayern-ayntetyek ingkerrenhek, Akngey-kenh angka akalty-anthayntetyek.”

<sup>5</sup> Rernem inkwerelhek, rernem-anem Stephen rlwanek. Itnwengel renh rlterrilek. Artwa iylpareth Jesus-arl apenteyel. Ikwer-penhan rernem artwa ingwer-rnem-anem rlwaneynek, itnan ikwer-rnem-kenh Philip-akerr, Prochorus-akerr, Niconor-akerr, Timon-akerr, Parmenas-akerr, Nicolaus-akerr. Nicolaus Antioch tawen-areny anenh, Jew-wenyarl ilkwerrek. <sup>6</sup> Rernem artwa renh-rnem angkakert-rnem-warl akngetyek. Angkakert-rnemel iltya akapwert-warl arrernemel, Akngey renh ayernek, renh-rnem rlterrilek.

<sup>7</sup> Ikwer-penhan Jesus-arl apenteyel-rnemel renh-rnem akalty-anthek. Akngeyel-anem ingwer-rnem ikwer-rnem-warl anyentilek. Jew-rnem-kenh Atyetyart ingwerel-rnem Jesus renh tnakek arrpemar.

### *Jew ingwer-rnemel Stephen renh anterrkweyel*

<sup>8</sup> Akngeyel Stephen renh rlterrilek, renh arntarnt-arenh. Stephen ranem ilek-ilek mpwarek, arntety-rnem mwerrilek. <sup>9</sup> Artwa ingwer-rnem ikwerety arlkariirrek. Artwa rernem Jew-rnem anenh, apmer Cyrene-areny-rnem-then, Alexandria tawen-areny-rnem-then. Rernem ilelhenh, rernemarl arwa alhewer alhenn-rnem. Artwa ingwer-rnem apmer Cilicia-areny-rnem-then apmer Asia-areny-rnem-then. Rernem Stephen-akerr ilterrek. <sup>10</sup> Stephen-el renh-rnem irrpelthel antengilek, Itnweng Rlwart-akertel. <sup>11</sup> Ikwer-penhan rernem artwa apmwer nem thwenek, Stephen renh irrytwer-remel aytarrp-iletyek, “Anantherr Stephen renh awek, Moses-ek-then Akngeyek-then irrpelthirrenh.”

<sup>12</sup> Angka awek-penh Moses apenteh-rnem-then artwa ampwer nem-then ahelir-rek. Rernem-anem Stephen anterrkwemel Sanhedrin Council-warl-anem atnwenhek. <sup>13</sup> Artwa irrytwerrey-angker-rnemel Sanhedrin Council-angkwarr-anem renh irrytwer-remel aytarrp-ilek, “Artwa nhnen Akngey-kenh tyaty ilkwa impenek apmwel-areth angkeyel, Moses-kenh angkek irrpelthirrenh. <sup>14</sup> Anwantherr renh awek, rarl ingwer-rnem ilenh, Jesus Nazareth-arenyelar Akngey-kenh tyaty ilkwa akaltheyenh. Moses-kenh angkek ra irrpelthirreyel.” <sup>15</sup> Sanhedrin Council-rnemel Stephen renh artewentyel arek, rernem arek inngerr ikweren angel-kenh inngerr-apeny.

## 7

### *Stephen ilelheyel Sanhedrin Council-rnemek*

<sup>1</sup> Atyetyart ilkwel Stephen renh ayernek, “Nthakenh nga iterreyel? Angka arraty-antey ngkweng rernem angkerreyel?”

<sup>2</sup> Stephen-el renh-rnem ilek, “Atyenh-rnemay, atyeng awelhennherr-arey. Akngey anwekantherrenh rarl rliterrk ilkawakert aneyel, rant Abraham ikwer aremirrek, rarl apmer Mesopotamia anenh-warl, ra apmer Haran-warl alpey-alenty. <sup>3</sup> Akngeyel renh ilek, ‘Apmer ngkwenh iwerl-alha, ngkwenh-rnem-then, nganem apmer ingwer-warl alpetyek, atharl ngkweng iylparrernem-warl.’ <sup>4</sup> Kel apmer Chaldea renh iwerl-alkeh, ra apmer Haran-warl-anem alpek, ikwerel-anem intem-antey aney-alpek. Aynikw ikweren h kel ilwek-anem. Ikwer-penh Akngeyel Abraham renh apmer nhenh-warl arrernek, apmer nhenhel anwantherr lyert aneyel. <sup>5</sup> Akngeyel Abraham ikweren-hrnem-akert arwa alhelekan apmer renh anthey-angenh-antey. Akngeyel Abraham renh alhelek-antey, Abraham-kenh ampa aney-angenh-antey arrangkw-antey. <sup>6</sup> Akngeyel Abraham renh ilek, ‘Aray, ngkwenh-rnem apmer ingwer-ampeneyel aneyen h aherrety 400-ek-atwety. Rernem alethang-rnemek artewenty innga warrkirreyen. Alethang-rnemel renh-rnem warrk ilkwa antheyenh. <sup>7</sup> Atha alethang-rnem atweyen h ikwer-rnem-they. Ikwer-penhan ngkwenh-rnem apmer ikwer-they alpeyenh, nhenh-warlanem apey-alpeyenh, Akngeyek inkwerelhetyek.’

<sup>8</sup> Akngeyel Abraham renh ilanthek, ra angkep alhelekyek, ‘Ngkwenh-rnem artwiletyek ingkerrenh-antey rernem arlta 8-ek-atwety ilkwerrekarl.’ Alakenhaym awey ikweren Isaac artwilek, arlta 8 ikwerel. Isaac-kenh alerikw Jacob. Awney 12 Jacob-kenh ingkerrenh-antey.

<sup>9</sup> Joseph-kenh awayikw-rnem ikwerety arlkariirrek. Rernem-anem renh artwa alethang-rnem-warl tharlemilek. Rernem-anem renh apmer Egypt-warl akngaynek. Akngeyel Joseph renh arntarnt-arek-antey. <sup>10</sup> Akngeyel renh arntarnt-arek, ingwerel renh atwekerr. Akngeyel renh akaltyilek innga. Atyetyart Egypt-areny Joseph ikwer

inkwerelhenh, ranem renh Atyetyart ilkwa arrernek apmer Egypt-itwek, ampwal ingkerrenh ra arntarnt-aretyek.

<sup>11</sup> Amern akngerr lyapey-angenh-anem Egypt-itwek, Canaan-itwek. Amern-wenyl rernem angayakw-anem irrek. <sup>12</sup> Jacob-el awek Egypt-itwek amern akngerr ayttek. Ra anaynwekantherrenh 12 thwenek Egypt-warl. <sup>13</sup> Ikwer-penhan angkep arrpemarl amernek alpek Egypt-warl, Joseph ra ikwer-rnemek ilelhek-anem, ra ayteyikw ikwer-rnem-kenh anen. Atyetyart Egypt-arenyle angka awek arrpemarl.

<sup>14</sup> Joseph ranem aynikw ikwerenhek awayikw ikwer-rnemek-then ingkerrenh ingwer-rnemek-then yangkelhek, rernem Egypt-warl alhetyek. Ikwerenh-rnem akngerr anek, 75-pel. <sup>15</sup> Jacob Egypt-warl alhek, apmer ikwer-itwek-antey ilwek, arrwekeleny-rnem ilwek arrpemarl apmer Egypt-itwek. <sup>16</sup> Rernem-anem Jacob-kenh-rnem arrewaly-rnem inteyek akwernek apmer Shechem-itwek. Hamor-kenh-rnem-they payemelekar.

<sup>17</sup> Israel-kenh-rnem akngerr-anem irrek. Akngey iterrek renh-rnem akngeyentyek apmer ikwer-warl, Abraham renharl alhelek-warl. <sup>18</sup> Ikwer-penhan Atyetyart anyent ingwer Egypt-itwek anen, ranap Joseph-kenh angkek akwerrparl, iterl-arey-angenh. <sup>19</sup> Ra ingkerrenh irrytwerremel ilenh, Israel-kenh-rnem ilanthek, rernem ampa ikwer-rnem-kenh aketh-warl arrernetyek, rernem menty ilwetyek.

<sup>20</sup> Moses-anem ampa akely mwerr-angker aytenteh. Ra ilkwerrekarl. Amikw ikwerenhel aynikw ikwerenhel renh arntarnt-arek alkent irrpetyek-atwety. <sup>21</sup> Ikwer-penhan rernem akethek-anem renh arrernek, Pharaoh-kenh alerikwel-anem renh arek, apmer-warl-anem renh akngeyene, renh ilkwilek-anem. <sup>22</sup> Egypt-arenyle-rnem Moses renh akalty-anthek. Ra akalty inngirrek. Ranem Atyetyart ilkwanem anen.

<sup>23</sup> Moses ra aherrety 40-anem anen. Ra iterrek ikwerenh-rnem Israel-kenh-rnem-warl awangk alhetyek, renh-rnem aretyek. <sup>24</sup> Ra artwa anyent arek, Egypt-arenyle artwa Israel-kenh anyent atwenharl. Ranem artwa Egypt-areny ipmek atwek, artwa Israel-kenh renh itethilek. <sup>25</sup> Moses ranem iterrek apalel, 'Nhenh-rnemel ayenh iterl-areyel, Akngeyel ayenh arrernekarl, renh-rnem arntarnt-aretyek.'

<sup>26</sup> Arla ingwerel ra arek artwa Israel-kenh atherr atwerrerl-anenty arrpemarl. Ranem renh-atherr arrngertewek. Ra renh-atherr ilek, 'Mpwelanth apmer anyent-areny atherran. Ilekek-anem mpwelanth atwerreyelan?'

<sup>27</sup> Artwa retangkwel ahelirrek-penhel renh ayernek, 'Angwenhel-anem ngenh arrernek, nga atetyart anwekantherr anetyek, anwenhantherr ayern-ayntetyek?' <sup>28</sup> Nga ilkelheyel ntwa ayenh ipmek atwetyek, ntwarl artwa Egypt-areny apmwerrkel atwek-apeny.'

<sup>29</sup> Moses ra awek-penh ra aterel apmer Midian-warl anterrek, ikwerel aney-alpek. Avey-atherr-anem ikweren Midian-el anek. <sup>30</sup> Ra aherrety 40-ek-atwety Midian-el anen. Ikwer-penhan angel anyent-anem ikwer aremirrek, apmer arlpawel, apwert Sinai-itwek. Angel ranem arwerl ampekarl-itwek aremirrek. <sup>31</sup> Moses-el arwerl ampekarl renh arek, ranem ywarn iterrek. Ra arrer irremel-anem arwerl-anem arek. Ingkart-anem ikwer-warl angkek, <sup>32</sup> 'Ayeng Akngey ngkweng anem, Abraham-kenh Isaac-kenh, Jacob-kenh Akngey anem.' Moses-anem aterel arrewek. Ranem akapwert kwenirrek, arwerl renh arek.

<sup>33</sup> Ingkart-anem renh ilek, 'Ngarl yanh rtneyel amek-amek-itwel! Pwet ngkwenh ingkety-they lhelha!' <sup>34</sup> Atha arek Egypt-arenyle-rnemarl atyenh-rnem irrwampenty mpwareyel. Ayeng apetyek, renh-rnem itethileyek. Atha ngenh apmer Egypt-warl thwenem.'

<sup>35</sup> Moses Egypt-warl alpek. Ikwerenh-rnem ikwerety arkadirrenh. Rernem renh ilek, 'Angwenhel ngenh rnkernek, anwekantherr atyetyart anetyek, anwenhantherr ayernetyek?' Akngey rant Moses renh arrernek, ikweren-hnemek Atyetyart anetyek, renh-rnem itethileyek. Akngey Moses ek angkek angel ikwerenh-angkwarr angel rarl Moses-warl aremirrek arwerl ampekarl-itwek. <sup>36</sup> Moses-el aherrety 40-ek-atwety renh-rnem arntarnt-arek. Akngeyel renh rlterrilek, Moses-el ilek-ilek mpwarenh, Egypt-itwel, alay Apennng-angketyarr-itwel, aherrety arlpaw-itwek-anem. Ingkerrenhel Akngey renh iterl-arek, rarl rlterrilek inngan. <sup>37</sup> Moses rey-antey Israel-rnemek ilelhek, 'Ingwer-inger Akngeyel angkakert arrekantherr-warl thweneyen, ra ayeng-apenyarl aneyen. Ra artwa Israel-kenh arrpemarl aneyen.' <sup>38</sup> Moses ranatey arrpemarl ingkerrenh-akert anen, apmer arlpawel. Angel ra angkek Moses ikwer-warl Apwert Sinai-itwel, Moses-el-anem Akngey-kenh angka anwekantherr-warl ilteyek.

<sup>39</sup> Arrwekeleny-rnem Moses-ek awelhey-angenh, rernem Egypt-warl alpetyekant ilkelhenh. <sup>40</sup> Rernem Aaron renh ilek, 'Akngey anwekantherr mpwarey, anwenhantherr atnwenhetyek. Moses-el anwenhantherr nhenh-warl atnwenhey-alhek. Moses ranem nthakenh irrek? Anwantherr akwerrparl.' <sup>41</sup> Rernem altyerr-arrpanter mpwarek,

pwelek akely-apeny. Ikwer-penhan rernem altyerr-arrpantey ikwer inkwerelhek, tyenkerr anthemel, rernemarl mpwarek.<sup>42</sup> Akngey ikwer-rnem-kety intwemelirrek, ra renh-rnem ipmek. Rernem antyarr-rnemek inkwerelhek, Akngey-kenh angkakert arrwekelely aynteyel: ‘Israel-kenh-rnemel ayenh tyenkerr anthey-angenh aherrety 40-ek-atwety. <sup>43</sup> Ampwal ikwer-atherrant inkwerelhek, Molech, Rephan. Apmwekantarl apwert-penh, ikwer-atherrant inkwerelhek. Arranther ikwer-atherrant mpwarekarl-kety. Alakenh-anyem atha arrenhantherr apmer Babylonia-they anthenayn irrenteyen.’

<sup>44</sup> Akngey Moses ikwer kalikw lywetangkwel lwewarrernek. Ikwer-penhan ra Moses renh ilanthek kalikw renh mpwaretyek, rarl renh ilek-angkwarr-antey. Akngey-kenh ampwal-rnem kalikw ikwerenhel ayntek. Akngey arrwekelely-rnemel kalikw impen nhanyem arrpemarl atnyenennh.<sup>45</sup> Joshua-el-anem arrwekelely-rnem apmer Canaan ikwer-warl atnwenhek. Akngeyel apmer-areny-rnem irrentek. Rernem Akngey-kenh kalikw renh ikwer-rnem-angkwarr akngek. Kalikw ra anenh, David-arl atyetyart anenek-atwety. <sup>46</sup> Akngey ra David-ek inkwerelhek. David-el-anem renh ayernek, ‘Mwerr tyaty ilkwa anwantherr ngkweng artetyek?’<sup>47</sup> Solomon rant Akngey-kenh warl artek ingkern.

<sup>48</sup> Akngey irrwerl-areny nthakenh warl ilkwa aney-angenh, ahern-arenyelarl mpwarek-itwek. Akngey-kenh angkakert arrwekelely alakenhaym aynteyel: <sup>49</sup> ‘Alker-itwek apmer ikweren aneyel. Angka anwekantherr ahernek arrenerem. Ahern nhenh akely ikwer. Warl ilek-apeny arranther arteng arteman, ayeng ltyerretyek, ikwer-itwel?’ Alakenh Ingkart angkem.<sup>50</sup> ‘Aray, athantey arrpemarl alker-then ahern-then ingkerrehn arrpmernekarl.’ Alakenh-anyem Akngeyel ilenh.’

<sup>51</sup> Stephen-el renh-rnem ilek, “Arranther iylpel awey-angenh intem-antey aneyen. Arranther Itnweng Rlwart-kety intwemelirreyel, arrwekelely-rnem intwemelirrenh-apeny. Rernem Akngeyek awelhey-angenh.”<sup>52</sup> Rernem Akngey-kenh angkakert-rnem ipmek atwek. Angkakert-rnemel ilek artwa arraty ra apetyeyen. Ikwer-penhan arrantheran artwa arraty renh ahelengkw-rnemek ahayiwel, renh ipmek atwetyek.<sup>53</sup> Akngeyel angka arrekantherr anthek, angel-rnem-angkwarr, arranther arrka ikwerenhek awelhey-angenh.”

### *Rernem Stephen renh apwertel weyel*

<sup>54</sup> Rernem awek-penh, Sanhedrin Council rernem-anem ahelirrek.<sup>55</sup> Itnweng Rlwartel Stephen renh rlterrkilek. Alker-warl-athetk itnywenek, ranem Akngey renh arek rlterrk ilkwakert, Jesus akwa arraty-ampenyel rtnerl-anenty.<sup>56</sup> Stephen-el renh-rnem ilek, ‘Aray, atha alker renh altywerirrekrl itnyweneyel, Artwa Impen Akngey-kenh Akngey akwa arraty-ampenyel rtnerl-anenty’

<sup>57</sup> Rernem awek-penh rernem arlkkek, iylpa martelhemel iltyel. Rernem Stephen-warl anterrerremel. Rernem renh anterkwek.<sup>58</sup> Rernem renh Jerusalem-they iytarr-akngek. Ikwer-penhan rernem apwertel-anem wek. Artwa ilenh-rnem Stephen-arl rernem ayntarrp-ilek, rernem arnkwa arlpenty iylwemel, artwa anthety anthek arntarn-aretyek, itnan ikweren Saul.<sup>59</sup> Rernem Stephen renh apwertel wenh-antey, Stephen-el Akngey ayernek, “Ingkart Jesus-ay, ayeng ilwentyan, itnweng atyen ina!”<sup>60</sup> Ampwethel aernelhemel ra arlkkek, “Ingkartay, renh-rnem ayntarrp-iley-angenh anetyek.” Alakenh angkemel, ra kel ilwek-anem.

## 8

<sup>1-3</sup> Artwa mwerr irrpetyapel Stephen renh arrewaly inerl-alhek, renh arraty-angkwarr awenng-warl akwernetyek. Rernem ikwer amperngirrek. Saul-el arek, rernemarl Stephen renh ipmek atwek. Ra inkwerelhek. Saul ra Jesus-arl apenteyel-rnem-kety arlkariрен, renh-rnem-anemarl atwetyek ra alwernek. Saul ilkelhek, Jesus-arl apenteyel-rnem ywerrelhityek. Ingkart-areny rernem ateler anterter ikwerety, arlperryirremel alpek apmer ingwerek-ingwer-warl, apmer Judea-warl, apmer Samaria-warl. Angkakert rernemant-anem apmer Jerusalem-itwek anenh. Ra warl arrpanenh-warl alhek, arelh-rnem-then artwernem-then ra renh-rnem anterkwek, tyayl-warl akwernemel.

### *Philip-el renh-rnem angka mwerr-angker akalty-antheyel apmer Samaria-el*

<sup>4</sup> Jesus-arl apenteyel-rnem apmer arrpanenh-warl arlperryirrek Jerusalem-they. Rernem apmer-areny-rnem akalty-anthey-alhek, angka Jesus-kenh.<sup>5</sup> Philip apmer Samaria-warl alhek, tawen anyent-warl. Ranem ikwer-rnem angka anayntilek, Jesus anyent renhey-antey Akngeyelarl arrwekel weth alhelek awank-akerr, renh thwenetyek ahern nhewarl, ingkerrehn itethileyek.<sup>6</sup> Tawen-arenyel-rnem Philip-kenh angka awek.

Rernem arek, Philip-elarl ilek-ilek mpwarenh. <sup>7</sup> Rernem arek, rarl arrenty-akert-rnem mwerrilek. Arrenty-rnem ikwer-rnem-they artewentyel arlkemel tyerrelhek. Rernem arek, artwa lerrp-rnem mwerrirrekarl. <sup>8</sup> Alakenh aremel, tawen-areny-rnem irrkngerney innganem anenh.

<sup>9</sup> Tawen ikwerel artwa ingwer anenh, itnan Simon. Samaria-areny-rnemel renh apatemel arek, rarl ilek-ilek-angkwarr mpwarenh ahern-areny ngangker-akertel. Ranem tnakelhek. <sup>10</sup> Ingkerrenhel renh tnakenh, artwa apmwamwam-rnem-then, artwa atyetaryt-rnem-then. Rernem angkerrenh, "Ranap nhenhey altyerr-apenyarl, rlterrk inngarla." <sup>11</sup> Rernem Simon renh tnakenh, ilkwerl-alhek ywarn iterremel, rarl ilek-ilek-angkwarr itethilenh, arntety-rnem mwerrilemel. <sup>12</sup> Philip-el-anem tawen-areny-rnem akalty-anthemel ilek, "Akngay rant ingkerrenh-angkwarran arntarnt-areyel, Akngay rant Ingkart ingkerrenhek aneyel." Ra renh-rnem Jesus-kenh angka ilek arrpemarl. Artwernem-then arelh-rnem-then Philip-warl apetyek, renh-rnem baptise-emeleyek. <sup>13</sup> Simon-el Akngay renh tnakek arrpemarl. Ranem Philip-warl apetyek, renh baptise-emeleyek. Ikwer-penhan ra Philip-angkwarr alhenh. Simon ra apatek Philip-el-arl ilek-ilek-angkwarr itethilenhek, arntety-rnem-then mwerrilenhek.

<sup>14</sup> Jerusalem-itwek kwertengerl-rnemel awek, Samaria-areny-rnemelar Akngay-kenh angka tnakek. Alakenh-anyem rernem Peter-then John-then thwenek, apmer Samaria-warl. <sup>15</sup> Samaria-itwek-anem ratherr Akngay renh ayernek Itnweng Rlwart renh Ingkartarl apenteyle-rnem-warl thwenetyek. <sup>16</sup> Itnweng Rlwart ra ikwer-rnem-warl antelhey-angenh-antey, Jesus-kenh itnangkwarr. Philip-el renh-rnem baptise-emelek itnan Jesus-angkwarrant. <sup>17</sup> Ratherr itep arrernek akapwert-warl. Itnweng Rlwart ranem ikwer-rnem-itwek anenh.

<sup>18</sup> Simon-el arek kwertengerl ratherr iltya ikwer-atherrenh akapwert ikwer-rnem-warl arrernek, Itnweng Rlwart ikwer-rnem-warl antelhek-anem. <sup>19</sup> Ranem Peter-atherr man anthetyek ilkelhek. Ra alakenh angkek, "Ayehn rlterrkilay, athanem iltya ingkerrenhek arrerneyek Itnweng Rlwart ikwer-rnem-warl antelhetyek."

<sup>20</sup> Peter-el renh ilek, "Nthakenh ntwa Akngay-kenh rlterr kilay manel payemeley-angenh. Arrangkw-kety alha, Akngayel ngenh atwekkerr. <sup>21</sup> Nga Akngayel apmwangkwarr iterreyel. Alakenhaym-they nga Akngay-warl anwekantherr-angkwarr alhey-angenh. <sup>22</sup> Kel apmwekety angkepirra Ingkart-warl, Ingkart ayernay akwerrng arratilyetek apmwa ngkwengety iwetyek. <sup>23</sup> Ayeng akalty nga iwerr apmwangkwarr alheyel, apmwangkwarrant iterremel."

<sup>24</sup> Simon-el-anem renh-atherr ilek, "Ingkart ayernenherr-atherr, ra ayehn ipmek atwekkerr, mpwelanth ayehn ilek-angkwarr-antey."

<sup>25</sup> Ratherr ingkerrenh Akngay-kenh angkek akalty-anthek arrpemarl. Ikwer-penhan ratherr Jerusalem-warl-anem alpek, Samaria ikwer-angkwarr. Ratherr tawen akely-rnem-itwek ingwer-rnem Akngay-kenh angka akalty-anthetyek.

#### *Philip-then artwa Africa-areny-then*

<sup>26</sup> Ingwer-inger, Akngay-kenh angel-el-anem Philip renh ilek, "Antekerr alha, iwerr ilenh-warl, apmer arlpaw-angkwarrarl aynteyneyel-warl Jerusalem-they apmer Gaza-ek-atwety." <sup>27</sup> Philip ra kel alhek. Ra artwa anyent Africa-areny arek. Artwa ra Ethiopia-areny Queen-kenh warrkenh, rarl man arntarnt-arenh, arelh ilkwekenh. Ra kel Akngayek inkwerelhemel arraty apenteenk apmer Jerusalem-itwek. <sup>28</sup> Ranem alpek pakey ikwerenhel anerl-aperl-anemel, Akngay-kenh angka angkakert Isaiah-kenh pipek reytemilenhey-alpenh, Akngay-kenh angka arrwekeleny-akert. <sup>29</sup> Akngay-kenh Itnwengel Philip renh ilek, "Pakey ilenh-angkwarr antelherl-alha!" <sup>30</sup> Pakey ikweren-angkwarr arerrirremel, Philip ra awek Akngay-kenh angkakert Isaiah reytimiler-anenty. Philip-el renh ayernek, "Angka nhenh ntwa iterl-areyel?"

<sup>31</sup> Artwa Africa-arenyel ilek, "Nthakenh atha iterl-areman, ingwerentyel atyeng anayntiley-angenh-antey?" Ra Philip renh ilek, "Atyeng-angkwarr apetyal!" <sup>32</sup> Artwa ra angka nhanyem reytemilek, "Rernem artwa anyent renh akngek, yep-yep atwetyek-apeny. Alakenh-apeny renh atwetyek akngek. Ra akater anenh, angkey-angenh, rernemarl yep-yep alta aketyek-apeny. <sup>33</sup> Alerikw ikweren-hrnem arrangkw, rernemarl renh arwa atwekkety."

<sup>34</sup> Artwa ranem Philip renh ayernek, "Atyeng anayntila, rernem angwenh atwem, rernem yep-yep atwem-apeny? Angkakert arrwekeleny apek, artwa ingwerentyel apek?"

<sup>35</sup> Philip-el Isaiah-kenh pip renh-tangkwel anayntilek. Ikwer-penhan angka mwerr-angker-angkwarr-anem Jesus-akert akalty-anthek. <sup>36</sup> Rernem alhenhelarl-antey, rernem kwaty arek. Artwa ranem Philip renh ayernek, "Aray, kwaty nhenhel ntwa ayehn baptise-emeleyek."

<sup>38</sup> Pakeyek-artwey renh-anem ra ilek, "Pakey rnkerna!" Ikwer-penh ratherr atwarrek kwaty ikwer-warl, Philip-el-anem renh baptise-emeleyek. <sup>39</sup> Ratherr kwaty ikwer-they tyerrelhek. Ingkart-kenh Itnwengel Philip renh akngek. Artwa Africa-arenyel renh arey-angenh arrpemarl. Ra apmer ikweren-h-warl irrkngerney innga alpek, aleth-antey ywerrenhek. <sup>40</sup> Philip aremirrek tawen Azotus-itwek. Tawen ingwer-rnem-warl alhek, Caesarea-ek-atwety, Jesus-kenh angka akalty-antherl-apayntetyek.

## 9

### *Jesus aremirreyel Saul-ek*

<sup>1</sup> Saul ra ilkelhek, Ingkart-areny-rnem ywerrelhiletyek. Ranem Jew-rnem-kenh tyaty ilkwewarl alhek. <sup>2</sup> Ra ilkelhenh Damascus ikwer-warl alhetyek, tyaty anyentam-anyent-warl alhetyek, Jesus-arl apenteyel-rnemek nthwetyek, artwa apek, arelh apek, anterrkwemel Jerusalem-warl akngeynetyek. Ra Atyetyart ilkwa renh ilek, "Pip ingkwernay, atyetyart Damascus tyaty-areny-rnemek, tawen-areny-rnemek, anwantherr Ingkart-areny-rnem anterrkwetyek."

<sup>3</sup> Saul-rnem kel Damascus-warl arrer-anem irrek. Lyenenty ilkwel renh alker-they artewentyel alhernek. <sup>4</sup> Saul ranem ahern-warl aytnek. Ranem awek renharl itnewek, "Saul-ay, Saul-ay! Ilek ntwa ayenh atwetyek alwerneyel?"

<sup>5</sup> Ra awek-penh Saul angkek, "Ingkartay, angwenh ngan?"

Ra ikwer ilelhek, "Ayengan Jesus-arl, ntwa ayenh atwetyek alwerneyel. <sup>6</sup> Kel akemirremel tawen-warl alha, artwa anyentek-anem awelheyen."

<sup>7</sup> Artwa rernem apatemel rtneh, rernemarl awek-penh. Angkentyant rernem awek, ingwerenty ikwer-rnem-itwek aremirrey-angenh. <sup>8</sup> Saul akemirrek, ywarn-antey arek, annel arey-angenh, aparrng-anem. Artwa rernem-anem renh Damascus-warl atnwenhek. <sup>9</sup> Arla irrpetel ra anenh, amern arlkwey-angenh, kwaty antywey-angenh.

<sup>10</sup> Apmer Damascus ikwer-itwek, Jesus-kenh kwertengerl ingwer anenh, itnan ikweren Ananias. Ingkart ikwer yangkelhek, rarl altyerr arenh-angkwarr. "Ananias-ay!"

Ananias angkek, "Ilek Ingkartay?"

<sup>11</sup> Ingkartel renh ilek, "Iwerr nhenh-warl alha, itnan ikwer Iwerr Arraty. Judas-kenh apmer-warl alha, ntwa Saul Tarsus-arenyek ayerna. Saul ra Ingkartek angkeyel. <sup>12</sup> Lyert ra altyerr arek, artwa ra apetyen ikwer-warl, itnan ikweren Ananias. Ranem arek iltya ikwer-warl arrernekk anunga ikweren-angkwarr mwerrirreynek."

<sup>13</sup> Ananias arrkngert angkek, "Ingkartay, atha angka awek ingwer-rnem-they, Saul-elarl Ingkart-areny ingkerrenh alwernemel ipmek atwek apmer Jerusalem-itwek.

<sup>14</sup> Atyetyart ilkwerpemel renh thwenek pip-akert, Ingkart-areny ingkerrenh anterrkwetyek."

<sup>15</sup> Ingkartel renh ilek, "Kel alha, atha renh riwanek, atha renh thweneyen Jew-weny-rnem-warl, atyetyart ilkwerpemel-warl Israel-kenh-rnem-warl-then, ra renh-rnem angka atyenh akalty-anthetyek. <sup>16</sup> Ingwer-rnemel renh arntety antheyen. Ra irrwampenty awelhemel atyeng warrkirreyenk."

<sup>17</sup> Ananias kel alhek. Iltya ikweren Saul akapwert arrernemel, "Saul-ay, Ingkart Jesus ngkweng aremirrek, ngarl iwerrel alhenh-warl. Rarl ayenh thwenek ngkweng-warl annga mwerriletyek. Itnweng antelheyen ngkweng-warl." <sup>18</sup> Ikwer-penhan Saul tywen anngethey irrnayapeny aytnek. Ra arek arrpemarl, mwerr-anem. Ra kel akemirrek. Ikwer-penhan Ananias-el renh kwaytel baptise-emelek. <sup>19</sup> Saul-el amern arlkwek, rlterrkirrek arrpemarl. Saul kwertengerl-rnem-itwek anenh apmer Damascus-itwek.

### *Saul-el renh-rnem akalty-antheyel apmer Damascus-itwek*

<sup>20</sup> Ikwer-penhan ra Jew-rnem-kenh tyaty ilkwerpemel alhek, ingwer-rnem ilek, "Jesus Akngey-kenh alerikw inngarl aneyel." <sup>21</sup> Rernem awek-penh rernem apatek. Rernem ilerrenh, "Artwa nhenhel Jesus-arl apenteyel-rnem alwernemel atwek. Ra arrpemarl nhewarl apetyek Jesus-arl apenteyel-rnem anterrkwetyek, atyetyart ilkwerpemel-warl akngeynetyek."

<sup>22</sup> Akngey-kenh Itnwengel Saul renh rlterrkilek, Jew Damascus-areny-rnem ikwer ywarn-antey irrpelthirrek. Ra renh-rnem ilek, "Jesus Akngey-kenh alerikw inngarl."

<sup>23</sup> Ingwer-ingeran, Jew-rnem angkerrenh renh ipmek atwetyek. <sup>24</sup> Jew-rnemel-anem tawen arriw-rnem-itwek ikwer mpwelhenn. Intem-antey Saul ikwer mpwelhenn, ingwel, artel. Rernem ilkelhenh, renh anterrkwemel ipmek atwetyek. <sup>25</sup> Ingwa ingwerelan Saul-kenh-rnemel renh paketenp rwepel irrwerl-they atwarrelhilek. Aketh-warl-anem tyarlewek.

*Saul alheyel apmer Jerusalem-warl*

<sup>26</sup> Saul alhek apmer Jerusalem-warl. Saul ra ilkelhenh angkakert ikwer-rnem-warl pweytirretyek. Rernem ikwerety aterirrekarl, ikwer irrpelthirrek, rarl ikwer-rnem ilelhek, ra Jesus-kenh kwertengerl anenh. <sup>27</sup> Barnabas-el-anem angkakert-rnem-warl atnwenhek. Renh-rnem ilek, “Saul-el Ingkart arek, rarl Damascus-warl alhenhel. Ingkart ra Saul-warl angkek. Saul-el renh-rnem akalty-anthek Jesus-kenh angkel, apmer Damascus ikwer-itwек.” <sup>28</sup> Saul ra angkakert-rnem-warl anyentirrek. Ra arternp, Ingkart Jesus-kenh akalty-anthenh. <sup>29</sup> Saul-then itterrek, Jew arleng-areny Greece atnyenekarl-rnem-then. Rernem ilkelhek, rernem Saul renh ipmek atwetyek. <sup>30</sup> Jesus-arl apenteyel-rnem rernem renh Caesarea tawen-warl akngkek, ingwer-rnemel renh atwekerr. Tarsus tawen-warl-anem thwenek.

<sup>31</sup> Ikwer-penhan rernem mwarrant-arey-anem anenh, Galilee-areny-rnem-then Samaria-areny-rnem-then. Akngerr antelhek Ingkart-areny-rnem-warl. Itnweng Rlwartel renh-rnem rlterrilek, Akngeyel arrpemarl renh-rnem anyentilek, rernem Ingkart-angkwarr arrayt anetyek.

*Peter-el Aeneas mwerrileyl, Tabitha renh ipmepenh itethileyel*

<sup>32</sup> Peter ra tawen ingwer-rnem-warl alhek, Ingkart-areny ingwer-rnem akalty-anthetyek Akngey-kenh angkek. Ra arrpemarl Lydda tawen-warl alhek inwekel.

<sup>33</sup> Tawen ikwer-itwек artwa arntety ilkwa ayntek, itnan ikwerenh Aeneas. Ra aherrety 8-pelel pantyel ayntenh arlelp akngelhey-angenh. <sup>34</sup> Peter-el renh ilek, “Aeneas, Jesus Christ-el ngenh mwerrilek. Panty ngkwenh inerl-alhemel, kel alpa!” Aeneas kel akemirrekant. <sup>35</sup> Lydda tawen-areny-rnem-then apmer Sharon-areny-rnem-then rernem Ingkart tnakek.

<sup>36</sup> Joppa tawen ikwerel kwertengerl arelh anyent anek itnan ikwerenh Tabitha. Greek-kenh itnan Dorcas-arl. Arelh ra ingkerrenhek inkwerelhek. Rantey arrpemarl amern-rnem-then arnkwerneh-then anthey-angker. <sup>37</sup> Tabitha ranem arntetyirremel ilwek. Ikwerenhel-anem arrewaly renh lhewek, room irrwerleng-ampenyek arrernekk.

<sup>38</sup> Apmer Joppa Lydda-they arrer-antey anenh. Kwertengerl-rnemel awek Peter Lydda ikwer-itwек anenh. Rernem artwa atherr renh thwenek, Peter renh ikngwerl-alpetyek, “Anamerl apetyay!” Peter kel ikwer-atherr-angkwarr alhek. <sup>39</sup> Ratherr Peter renh atrwenhek room irrwerl-warl, arrewaly rarl ayntenh-warl. Inpert-rnem room ikwerel artnalhelhirrenh. Rernem Peter arnkwerneh ikwer lwevarrernek, arelh wethelarl anthek itethankel. <sup>40</sup> Peter-el arelh ingkerrenh aketh-warl thwenek. Ampwetel alernelhemel, ra Akngey-warl angkek. Ikwer-penhan ra arrewaly renh ilek, “Tabitha, kel akemirra!” Tabitha ranem annga rlkenhey-alpek. Peter aremel ra akemirrek. <sup>41</sup> Peter-el ilytethay renh anterrkwemel rnkernek. Ikwer-penhan Peter ra ingwer-rnemek-then inpert-rnemek-then yangkelhek, rernem arek Tabitha iteth-anem anerl-anenty. <sup>42</sup> Joppa-arenyel-rnem awek-penhan rernem Ingkart renh tnakek. <sup>43</sup> Peter-anem Joppa tawen-itwек anek, artwa Simon-itwек. Simon ra yemp mpwarey-angker, warrkenh weth-lkwer.

## 10

*Peter Cornelius-atherr*

<sup>1</sup> Caesarea tawen-itwек artwa anyent anenh, itnan Cornelius. Atyetyart ikwerenh irlkenty-rneman akngerrarl anenh ahechengkw 100. Rernem Italy-areny-rnem anenh.

<sup>2</sup> Cornelius ra artwa iylpareth anenh. Ra Akngeyek awelhenh, ikwerenh-rnem-then. Rernem Akngey-warl angkenh. Anew ikwerenh-then alerikw ikwerenh-rnem-then warrkenh ikwerenh-rnem-then akngerr ingwer-rnem-then, iylpareth-antey awelhenh. Rernem Akngeyek inkwerelhenn, rernem Jew-wenyarl. <sup>3</sup> Arlta ingwerel 3 o'clock-apeny Cornelius-el altyerr arek. Ra aketh innga Akngey-kenh angel arek. Akngey-kenh angel arrer irremel Cornelius ikwer yangkelhek.

<sup>4</sup> Cornelius aterirrek, angel renh ayernek, “Ilelek Atyetyart?”

Angel ranem renh ilek, “Akngelyel ngenh arek, ngarl ikwer angkenh, ntwarl manweny-rnem-then ilek-ilek anthenh. <sup>5</sup> Ntwanem lyert-antey angkakert-rnem thwena Joppa tawen-warl, Simon ikwer-anem yangkelhemel. Simon ra itna ingweran Peter.

<sup>6</sup> Simon Peter aneyel Simon yemp mpwarey-angker-itwек, apmer Joppa-itwек, kwaty impalthelarl warl artelhenh.” <sup>7</sup> Alakenh angkek-penhan angel ra kel alpek-anem. Cornelius warrkenh atherrek yangkelhek, artwa anyent ingwer-then, arnkwa ikwerenh arntar-arey-angker. <sup>8</sup> Cornelius-el angel-kenh angka ikwer-rnem ilek. Ikwer-penhan ra renh-rnem Joppa tawen-warl thwenek.

<sup>9</sup> Arlta ampepel rernem apetyehel-antey apmer Joppa-warl. Peter nganek warl irrwerl-warl Akngey-warl angketyek. <sup>10</sup> Ra angayakwirrek, amern arlkwetyek iterrek.

Ankwel renh atwek, ingwer-rnemel amern ampernenhel-antey. Ra ankwayntek, apelp-anem. <sup>11-12</sup> Ranem altyerr arek. Ra itnywenek, panty ilkwa atrnwenth ingwerek-ingwer-akert, thip ingwerek-ingwer-then, ahernel alheyel-rnem-then alker-they atwarrerl-alhenty. <sup>13</sup> Ra awek, renharl ilek, “Peter-ay, aker atwemel arlkway!”

<sup>14</sup> “Ingkartay, atha nthakenh aker apmwa yanh-rnem arlkwey-angenh!”

<sup>15</sup> Ranem awelhek arrpemarl, renharl ilek, “Akngey angkek mwerr ntwa alhewer arlkwetyek, aker ilek-ilek ntwa alhewer arlkwetyek. Nhepenh apmwel-areth angkey-angenh. Akngeyel menty anthek, ntwa arlkwetyek.” <sup>16</sup> Irrpety-inger Akngeyel alakenh ilek. Ikwer-penhan Angel ra panty renh atrnwenth ilek-ilek-akert alker-warl-anem akngynek.

<sup>17</sup> Peter ywarn-antey iterrek altyerr arek-penh. Artwa akngerr ingwer-rnem Cornelius-elarl thwenek, rernem arriw-ampenyel rtnek. Rernem nthwek Simon ikwer. <sup>18</sup> Rernem ingwer-rnem ayernenh Simon ikwer.

<sup>19</sup> Peter ywarn iterrek, ra arek-penh. Itnweng Rlwartel-anem renh ilek, “Aray, artwa irrpety ingwer-rnem ngkweng nthwerl-apeyel. <sup>20</sup> Akemirra anamerl alhant ikweren-hnem-angkwarr! Atha renh-rnem ngkweng-warl thwenek.”

<sup>21</sup> Peter-el renh-rnem ilek, “Ilekek atyeng arrantherr nthwerl-apeyel? Nhanyemap ayengen. Ilekek arrantherr apetyekan?”

<sup>22</sup> Artwa rernem renh ilek, “Cornelius artwa irlkenty-akert atyetyartel anwenhantherr thwenek. Jew-rnem ingkerrenh akalty ra artwa arraty-angkwarr mwerr innga aneyel. Rantey arrpemarl Akngey renh iterl-areyel. Apmwerrkel Akngey-kenh angel apetyek ngkweng yangkelhetyek, ngenh awetyek.” <sup>23</sup> Peter-el renh-rnem ilek, “Ingwa anyentel arrantherr aytetek.”

Ingwepenh-anem rernem anperl-alhek, Joppa-areny-rnem-then. <sup>24</sup> Arlta ingwerelan rernem Caesarea tawen-warl irrey-alhek. Cornelius ra kel mpwelhek ikweren-hnem-akert. <sup>25</sup> Peter ra Cornelius-kenh warl-warl aylpenhek. Cornelius ra kwenirremel ikwer-itwek, ikwer inkwerelhek. <sup>26</sup> Peter-el renh ilek, “Atyeng inkwerelhey-angenh rtnerl-alha! Ayengan ahern-areny arwarl.” <sup>27</sup> Ratherr angkerrenhel, ra warl kwen-warl aylpeks. Rap akngerr arek.

<sup>28</sup> Ra renh-rnem ilek, “Arrantherr kel akalty. Artwa Jew-rnem artwa Jew-weny-rnem-kety arkarirreyle. Akngey atyeng angkek, Jew-weny-rnemek irrpelthirrey-angenh anetyek. <sup>29</sup> Ayeng ikwer awelhek. Alakenh-anyem ayeng apetyek, Cornelius atyeng yangelhek-warl. Ayeh ilay, ilekek nga atyeng yangelhek?”

<sup>30</sup> Cornelius-el renh ilek, “Apmwerrkel 3 o'clock-el-antey, artwa arnkwa arlter inngakert-anem atyeng-warl aremirrek. <sup>31</sup> Ra ayeh ilek, ‘Cornelius-ay, Akngeyel ngenh awek, ntwarl ikwer-warl angkek. Akngeyel ngenh arek, ngarl ikwer angkenh, ntwarl man-weny-rnem arntarnt-arenh.’ <sup>32</sup> Ntwanem thwena Simon Joppa tawen-warl, itnan ingweran ikweran Peter. Ra lyertan yepn mpwarey-angker-itwel aneyel, Simon ingwer-kenhan warl artelhenh kwaty impalh-itwek.”

<sup>33</sup> Athanem angkakert thwenek, ngkweng yangkelhek. Anwantherr ngkweng inkwerelhem, ngarl anwekantherr-warl apetyek. Anwantherr-anem akarirrek, Akngeyel arraty inkwerelhemel awelhetyek. Ingkart-kenh angkek, rarl thwenek renh iletyek.”

<sup>34</sup> Peter-anem angkek, “Ayeng akalty Akngeyan Jew-rnemekant inkwerelhey-angenh. Ra ingkerrenhek inkwerelhem. <sup>35</sup> Rernem ikwer arraty awelhenty, ra ikwer-rnem inkwerelhem. <sup>36</sup> Arrantherr akalty, Jesus Christ-angkwarr Israel-kenh ingkerrenh anyentirremarl. Jesus ra Ingkart ingkerrenhek aneyel. <sup>37</sup> Arrantherr akalty Judea-itwek John-el renh-rnem ilek, rernem baptise inetyek Galilee-itwek, Judea-itwek. <sup>38</sup> Arrantherr akalty arrpemarl Akngeyel Itnweng Rlwart renh Jesus Nazareth-areny-warl thwenek, renh rlterrilek. <sup>39</sup> Jesus ra apmer arrpanhem-itwek mwerrilek, ra arrenty-akert-rnem mwerrilek, Akngeyarl ikwer-itwek anek, Akngey-kenh Itnweng rlterrilek. Anwantherr arek ra ingwerek-ingwer Jew-rnem mwerrilek Jerusalem-itwek. Rernem renh ipmek atwek, arwerl iylpeyl-atherr-itwek. <sup>40</sup> Ingwa atherr-penh Akngeyel renh akemelhilek ipman ayntekarl-penh. Anwantherr renh aytarek arrpemarl. <sup>41</sup> Ingwer-rnemel renh arey-angenh-antey. Ikwer-itwek arlkwek-rnem-then antywek-rnem-then anwantherr ikwer akalty, awenng-they akemirrekarl-penh. <sup>42</sup> Jesus Christ-el anwenhantherr ilanthek, angka mwerr-angker akalty-anthetyek. Anwernantherr renh iletyek, Akngeyelar renh arrernekk, ra ikweren-hnem akgaketyek ingwer-rnem-they, ahern-areny ingkerrenh, itetharl aneyel-rnem-then ipmernem-then. <sup>43</sup> Akngey-kenh angkakert arrwekeleny-rnemel ilek, rerneman Akngey renh tnakenty Akngeyel kel apmwa ikwer-rnem-kety iwem.”

<sup>44</sup> Peter ra angkenhelarl-antey Itnweng Rlwart ra ikwer-rnem-warl antelhek, Cornelius-rnem-warl. <sup>45-46</sup> Rernem angka ingwerek-ingwer-anem angkerrenh awerrey-angenhant-arey, Akngey ikwer inkwerelhek arrpemarl. Jesus-arl apenteyel irrpety Rernem apatek Akngeyelarl Itnweng Rlwart thwenek apmer arrpanenh-warl, artwa alethang-rnem-warl. <sup>47</sup> Peter angkek arrpemarl, "Itnweng Rlwart ra artwa nhernem-warl antelhek, rarl anwekantherr-warl antelhek-apeny. <sup>48</sup> Alakenhaym-they arrantherr arrayt baptise inetyek." Rernem Jesus Christ-kenh itnel kwatyal baptise-emelek. Ikwer-penhan arlta irrpety Peter ikwer-rnem-itwek anek, rernemarl renh ayernek-angkwarr.

## 11

### *Jerusalem-warl apey-alpeyel, Peter-el ingwer-rnem ileyl*

<sup>1</sup> Apmer Judea-itwek Jesus-arl apenteyel ingwer-rnem aneh. Ingkart-areny-rnem-then rernem ingkerrenh awek. Rernem awek Jew-weny-rnemelarl Akngey-kenh angka tnakekarl arrpemarl. <sup>2</sup> Peter-anem Jerusalem-warl alpek. Jew-rnem aneh Jesus-arl apenteyel-rnem. Rernem Peter rethen tnhwerant-arey ilterrenh. <sup>3</sup> Rernem Peter renh ayntarrp-ilek, "Nga alethang-rnem-kenh warl-warl aylpek, ikwer-rnem-itwek amern arlkwek."

<sup>4</sup> Peter-el-anem angka ikwer-rnem ilek, <sup>5</sup> "Ayeng Joppa tawen-el aneh. Arlta ingwerelan ayeng Akngey-warl angkek, ayeng ankwanem aynterl-arrenerk, atha atyerr-anem arek. Atha arek angel-el ampwal kalikw ilkwapeny alker-they atwarrelhilek atyeng-warl. <sup>6</sup> Kalikw-apeny kwen-itwek, atha atnwenth ingwerek-ingwer arek, ahernel alheylek-rnem-then thip-rnem-then. <sup>7</sup> Athanem awek ayenharl ilek, 'Peter-ay, akemirray! Aker atwemel arlkwa!' <sup>8</sup> Ayeng angkek, 'Ingkartay, atha aker nthakenh arlkwey-arey, ngarl weth arrwekel atnwenth arlkwekk arrknert angkek.' <sup>9</sup> Athanem awek Akngey alker-they angkek, 'Aray, Akngeyel alakenh-anyem ilenty, kel mwerr. Irrpelthirrey-angenh ikwer, ntwa aker arlkwetek arwa alhewer.' <sup>10</sup> Alakenh-anyem atyeng ilek irrpety-inger. Ikwer-penh Akngeyel kalikw-apeny alker-warl-anem aleth-antey akngeynek. <sup>11</sup> Ikwer-penh artwa irrpety warl arriw-itwel rtneyarr-alhek. Caesarea tawen-they rernem apetyek. <sup>12</sup> Itnweng Rlwartel ayenl ilek, ayeng alhewer alhetyek. Artwa Jesus-arl apenteyel 6-pel Joppa-areny-rnem atyeng-angkwarr alhek arrpemarl Caesarea tawen-warl. Aley rernem anwekantherr-itwel aneyel. Cornelius-kenh warl-warl anwantherr aylpenhek. <sup>13</sup> Cornelius ranem anwekantherr ilek angel-elarl ikwer-warl aremirrek. Angel-el renh ilantheik, 'Angkakert Joppa-warl thwena, Simon ikwer yangkelhetyek. Simon itna ingweran Peter-arl. <sup>14</sup> Simon Peter ranem ngkweng angka Akngey-kenh iletyek, ntwa angka Akngey-kenh iterl-aretyek. Akngeyel arrenhantherr ingkerrenh itethileyen.' <sup>15</sup> Ayeng Cornelius-kenh-rnemek angkek. Itnweng Rlwart ra ikwer-rnem-warl antelhek-anem, ra arrwekel anwekantherr-warl antelhek-apeny. <sup>16</sup> Ayeng iylpangkek-anem, Ingkartarl anwenhantherr arrwekel ilek, 'John-el ingkerrenh kwatyalant baptise-emelem. Akngeyel arrenhantherr Itnweng Rlwartelant baptise-emelem.' <sup>17</sup> Athanem iterl-arek, rernemarl Ingkart Jesus Christ tnakem, anwantherr renh tnakeyel-apeny. Akngeyel-anem Itnweng Rlwart renh thwenek ikwer-rnem-warl, rarl renh anwekantherr-warl arrwekel thwenek-apeny. Alakenhaym ayeng nthakenh Akngeyek irrpelthirrey-angenh."

<sup>18</sup> Rernem Peter awek-penh rernem akateyelpek-anem ilterrey-angenh. Rernem Akngey-anem tnakek. Rernem angkerrenh, "Innganem Akngey Jew-weny-rnemek yangkelhek, rernem ikwer-warl angkepirretyek, rernem-anem iteth intem-antey ane-tyek."

### *Jesus-arl apenteyel-rnem apmer Antioch-itwek*

<sup>19</sup> Stephen ipmek atwek-penh, Jew-rnemel Jesus-arl apenteyel-rnem atwetyek alw-ernek. Jesus-arl apenteyel-rnem Jerusalem-angkwarr apmer arrpanenh-warl arlper-tyirrek, Akngey-kenh angka ilerl-apayntetyek, Jew-rnemekant, apmer Phoenicia-itwek, apmer Cyprus-itwek, apmer Antioch-itwek.

<sup>20</sup> Ikwer-penhan Jesus-arl apenteyel irrpety apmer Cyprus-areny-rnem-then tawen Antioch-warl alhek, angka Jesus-kenh akalty-anthetyek artwa Greek-arl angkeyel-rnemek. <sup>21</sup> Ingkartel renh-rnem rlterrkilek. Akngerrel-anem Ingkart renh tnakek, ikwer-warl angkepirremel. <sup>22</sup> Jerusalem tyaty-areny ingwer-rnemel awek, rernemarl Ingkart-warl angkepirrek, rernem-anem Barnabas renh thwenek Antioch tawen-warl.

<sup>23</sup> Antioch-itwek Barnabas ra iterl-arek, Ingkartelarl renh-rnem arntarnt-arek, ranem inkwerelhek. Renh-rnem ilek, Ingkart-angkwarr aleth apenterl-ayntetyek. <sup>24</sup> Barnabas ra artwa mwerr aneh. Itnweng Rlwartel renh rlterrkileneh. Ra Ingkart tnakenh. Renh

awek-penh akngerr ingwer-rnem Ingkart-angkwarr apenterl-ayntetyek angkepirrek arrpemarl.

<sup>25</sup> Barnabas Tarsus tawen-warl alhek, Saul-ek nthwetyek. <sup>26</sup> Renh arey-alhemel ra ikwer-akert Antioch tawen-warl tyaty-areny-rnem-warl anyentirrek. Ratherr-anem renh-rnem akalty-anthek aherrety anyentel. Antioch-arenyle-rnem Jesus-arl apenteyel-rnem itnewek Christian-rnem.

<sup>27</sup> Ratherr Antioch tawen-itwek anenharl-antey, Akngey-kenh angkakert irrpety Jerusalem-they apetyek. <sup>28</sup> Artwa anyent Agabus Jesus-arl apenteyel-rnem ilek, aherrety amern-wenyarl aneyen apmer arrpananhlek. Renh-tangkwel Itnweng Rlwartel ilek aherrety arrer-anem amern-weny. Kel alakenh-anyem innga ayntek Claudius Atyetyart ilkwa Rome-itwel anenh-angkwarr. <sup>29</sup> Akngerr ingwer-rnemel-anem man iweynek Jesus-arl apenteyel ingwer-rnemek, Judea-itwel anenh-rnemek. Anyentel-anyentel rernem man thwenek, irrepern-rnemek. <sup>30</sup> Rernem man renh Barnabas-atherr Paul-atherr anthek, ratherr atyetyart tyaty-areny-rnemek man anthetyek, ingkart Judea-aren-y-rnem man anthetyek.

## 12

### *Akngelyel Peter tyarleweyl tyayl-they*

<sup>1</sup> King Herod-el-anem ahelengkw-rnem thwenek, rernem tyaty-areny awtetyek. Ingwer-rnem anterrkwek. <sup>2</sup> Ranem ahelengkw ikweren-h-rnem thwenek, James John-kenh ayteyikw akapwert arternetyek nayp arlpenty arreylpel. <sup>3</sup> Herod-el awek Jew-rnemarl ikwer inkwerelhek. Alakenh-anyem ra ahelengkw-rnem thwenek Peter renh anterrkwetyek. Arlta ikwerel Jew-rnem akarirrek amern ilperr-ilperr thwet-weny arlkwetyek, Akngelyek inkwerelhetyek. <sup>4</sup> Rernem Peter renh anterrkwek tyayl-warlanem akwernek. Herod-el ahelengkw akngerr thwenek, rernem renh arrayt innga arntarnt-aretyek. Ra iterrek Peter renh court-emiletyek angka akngerr ayernetyek amern tyenkern arlkwenty-penh.

<sup>5</sup> Alakenh-anyem Peter tyayl-itwek anen. Tyaty-arenyle-rnem Akngey ayernenh Peter ikwer, Akngelyel renh arntarnt-aretyek tyayl-itwel.

<sup>6</sup> Ingwa ingwerel-anem Herod ra iterrek, "Ingwepenh atha Peter renh ayerneyen, court-emiletyek." Peter ahelengkw-atherr-they ampepel ankwayntenh, tyayl kwen-itwek. Ahelengkwel renh tyeyn atherrel arernte. Ahelengkw ingwer atherri arriwelarl rtnenh. <sup>7</sup> Ingkart-kenh angel kwen-itwek aremirrek. Lyenentyel-anem renh-atherr arrtyernek tyayl kwen-itwek. Peter rita arnemel, angkek-anem, "Anamerl akemirral!" Tyeyn ratherr-anem Peter ilyteyeth lhelelhek. <sup>8</sup> Angel ranem renh ilek, "Arnkwa ngkwenh aylperl-alha, pwet sandal ngkwenh-atherrel-then." Peter arnkwel-anem aylpek. Ikwer-penhan angel-el renh ilek, "Arnkwa kwet ngkwenh aylpa, ayen-anem apentemel ingkern-they!" <sup>9</sup> Peter-el-anem angel renh apentek. Ra iterrek ra altyerr renh arerl-anenty-arrpantey. <sup>10</sup> Ratherr ahelengkw-atherr-angkwarr rwaylpenhek. Ikwer-penhan ahelengkw ingwer-atherr rwaylpenhek arrpemarl. Ikwer-penh ayen keyt arriw ikwer-warl apetyek. Keyt ament altywerirrek. Ratherr-anem aketh-warl tyerrelhenhek iwerr anyent-angkwarr. Ikwer-penhan angel-el Peter renh iwerl-alhek-anem.

<sup>11</sup> Peter-el kel iterl-anem-arek. Ra angkek, "Atha kel iterl-areyel-anem. Akngelyel angel ikweren-h thwenek, ayen Herod-kety itethiletyek. Herod-then Jew-rnem-then ilkelhek, rernem ayen ipmek awtetyek-arrpantey." <sup>12</sup> Peter Mary-kenh apmer-warl alhek. Mary John-kenh amikw anen. John itna ingweran ikweren-h Mark. Mary-kenh warl-itwek Jesus-arl apenteyel ingwer-rnem arrwekel akarirrek Akngey-warl angkayntetyek.

<sup>13</sup> Peter ra arriw renh rltar-atwek. Kwey warrkenh anyent itnan ikweren-h Rhoda ra arriw-warl alhek aretyek. <sup>14</sup> Peter ra angkek. Warrkenhel renh alhengk-awek inkwerelhemel. Peter ikwer arriw-anem altyweriley-angenh. Kel anamerl-antey ingwer-rnem ilek, "Peter yanh arriw-itwek rtneyel!" <sup>15</sup> Rernem renh ilek, "Kwey, ngan arwengkwarl!" Ra angkek arrpemarl, "Peter yanhey arriw-itwek rtneyel!" Rernem apal angkek, "Kel, itnweng arrewaly ikwerenharl yahanan." <sup>16</sup> Peter-el arriw renh rltar-atwek arrpemarl. Arriw renh altywerilemel Peter-anem rernem arek rtnerl-anenty. Rernem ywarn iterrek.

<sup>17</sup> Peter-el renh-rnem akaterilek, ranem ikwer-rnem ilelhek angel-elarl renh tyayl-they tyarlewek. Ikwer-penh ra renh-rnem ilek, "James-rnem-then ilenherr-arey, ayeng tyayl-they tyerrelhek." Renh-rnem iwerl-alhemel, Peter ra apmer ingwer-warl-anem alhek.

<sup>18</sup> Ingwepenh-anem tyayl-areny ahelengkw-rnem ywarn iterrek. Rernem Peter ikwer ywarek. <sup>19</sup> Herod-kenh-rnem ikwer ipantey nthwenn. Ranem ahelengkw-rnem ilek, "Arrantherr Peter renh mwantyel arntarnt-arey-angenh tyarlewek." Ikwer-they rernem

renh-rnem ipmek atwek-anem. Ikwer-penhan Herod apmer Judea-they Caesarea tawen-warl alhek, ikwerel aleth-antey aney-alpek.

### *Herod ilweyel*

<sup>20</sup> Herod ingwer-rnem-then ahel ilterrenh, Tyre-areny-rnem-then Sidon-areny-rnem-then. Rernem Herod-kenh apmer-itwek amern payemelenh apmelerr. Rernem amerne-they ilterrenh. Alakenh-anyem rernem angkakert thwenek Herod-warl. Angkakert rernem artwa Blastus ikwer-itwek angkerrenh. Blastus ra Herod-kenh apmer arntarnt-arey-angker aneh. Rernem Blastus renh ilek, rernem mwarrant-arey anetyek Herod-akerr tawen-areny-rnem-then ingkerrenh.

<sup>21</sup> Arla ingwerel rernem apetyek, rernem angkerretyek. Herod-anem Atyetyart ilkwekenh arnkewarl alypek. Chair ilkwa ikwerenhel-anem arrernelhek. Ranem ingkerrenh-warl angkek. <sup>22</sup> Renh awemel, ingkerrenh rernem arlek, "Akney anwekantherr angkeyel, artweweny!" Rernem altyerrekk-arrpantey inkwerelhek Herod ikwer. <sup>23</sup> Herod ingkart-arrpantey tnakelhenh. Ikwer-they, Ingkart-kenh angel-el renh atwek. Tyerr-apenyel-anem arka ikwerenhl arlkwek, ra ilwek-anem.

<sup>24</sup> Jesus-arl apenteyel-rnemel apmer arrpanenhk Akngey-kenh angka akalty-anthek. Akngerrel Jesus renh tnakek. <sup>25</sup> Barnabas-atherri Saul-el-atherri tyenkerr man Jerusalem-el-antey iwerl-alhek, ratherri Antioch tawen-el-antey aney-alpek. John Mark ikwer-atherri-angkwarr alhek arrpemarl.

## 13

### *Tyat Antioch-arenyel-rnem Barnabas-then Saul-then thweneyel Jew-weny-rnem-warl*

<sup>1</sup> Antioch tyaty-areny-rnem rernem angkakert-rnem-then akalty-anthay-angker-rnem-then aneh. Barnabas, Simeon itna ingweran itnewenh Irrpwerl, Lucius Cyrene tawen-areny. Manaen, renharl Herod ingwerel ilkwilek. Saul aneh arrpemarl.

<sup>2</sup> Ingwer-inger artwa rernem Ingkartek ikwerelhek, amern-weny anemel, Akngey-ayteng iterretyek Itnweng Rlwartel renh-rnem ilek, "Ayeng-anem ilkelheyl Barnabas Saul-atherri thweneyek, angka mwerr ilerl-apayntetyek apmer arrpanenh-itwek. Arrantherri-antey aneh." <sup>3</sup> Rernem-anem Akngey iterl-aremel amern-weny aleth aneh, Akngeyekant iterretyek. Ikwer-penhan rernem Saul Barnabas-atherri akapwert-warl iltya arrernek renh-atherri thwenemel-anem. Akngey ayernek, renh-atherri arntarnt-aretyek.

### *Barnabas Saul-atherri apmer Cyprus-warl alheyl*

<sup>4</sup> Itnweng Rlwartel-anem Saul Barnabas-atherri Cilicia-warl thwenek. Tawen ikwer-itwek rernem rtnwewarl nganerl-alhek Cyprus-warl-anem artarnpenhek. Cyprus ra akwerlp ilkwa ingga ayntenh, kwaty alay ampep-itwek. <sup>5</sup> Salamis tawen-itwek apmer Cyprus-itwek rernem Akngey-kenh angka Jew-rnem akalty-anthek tyaty ikwer-rnem-kenh-itwek. John ikwer-atherri-itwek anek arrpemarl. Ra ikwer-atherri-angkwarr ilkwatherr alhek.

<sup>6-8</sup> Cyprus-angkwarr artarnpenhemel rernem tawen ingwer-warl apetyek, itnan ikwerenhl Paphos. Bar-Jesus ra artwa Jew aneh. Elymas Bar-Jesus Greek-kenh itna. Ra arrangkwelth mpwarenh tnakelhemel, Akngey-kenh angkakert-arrpantey. Artwa ra Sergius Paulus Roman kapment-kenh artwa Atyetyart. Sergius Paulus ra artwa akalty innga aneh. Ra awek ratherri Paphos ikwer-itwek aney-alhek. Ranem ikwer-atherri yangkelhek, ratherri renh Akngey-kenh angka akalty-anthetyek. Sergius Paulus-el Jesus renh tnakek. Elymas arrkngert angkek ikwer-atherri. Elymas-el renh-atherri irrentetyek arrkernelhek, Sergius Paulus Ingkart-kety angkepiletyek.

<sup>9</sup> Itnwengel-anem Saul renh rltterkilek. Saul itna ingweran Paul. Rernem renh itnewenh Paul. <sup>10</sup> Paul ranem Elymas renh artewentylel aremel ilek, "Ngan arrenty-kenh ampan aneyel, nga mwerr-rnemek apmwani aneyel. Ntwa Akngey-kenh angka ilpertileyl. <sup>11</sup> Akngeyel ngenh atweyen, aparrngileyen. Ingwer-ingerant ntwa areyehn arrpemarl." Elymas kel aparrngirrek-anem. Ranem artwa ingwer ikngwek atnwenheyn-ayntetyek. <sup>12</sup> Sergius Paulus-el arek-penh Akngeyel Elymas aparrngilekarl, ra Akngey renh tnakek. Ra Paul renh awek, rarl ingwer-rnem Ingkart-kenh angka akalty-antheneh. Sergius Paulus-el apatemel awek, Ingkart-kenh angka inngaral ayntek.

### *Paul Barnabas ratherri akngey akalty-anthetek*

<sup>13</sup> Paul-kenh-rnem rtnwewarl nganek artarnpenhetyek, apmer Perga-warl Perga ra tawen Pamphylia-itwek aneh. John-el renh-rnem iwerlelpek, Jerusalem-warl-anem alpeteyek. <sup>14</sup> Paul Barnabas-atherri Perga tawen ikwer-they Antioch tawen ikwer-warl-anem alhek. Antioch ra apmer Pisidia-itwek ayntenh. Ikwer-penhan arla Saturday-el

ratherr alhek Jew-rnem-kenh tyaty akely-warl. Ratherr kel arrernelhek-anem.<sup>15</sup> Artwa ingwer-rnem Moses-kenh angka Akngey-kenh angkakert-rnem angka reytemilek. Tyaty-areny Atyetyartel-anem Paul-atherr ayernek, "Artwa atyenh-atherray, mpwelanth apek ilkelhenty. Akngey-kenh angka anwekantherr anayntiletyek, anwantherr arraty-angkwarr apenterl-ayntetyek."

<sup>16</sup> Paul akemirrek ikwer-rnem iltyerrek, akateriletyek. Ra renh-rnem ilek, "Artwa Israel-kenh-rnemay, arrantherry atyeng awelhennherr-arey!" <sup>17</sup> Artwa Israel-kenh-rnem-kenh Ingkart Akngey anwekantherrenh-rnem rlwanek. Ranem renh-rnem akngerram-akngerrilek Egypt-itwel anetyek. Ikwer-penh Egypt-areny-rnemel akngey anwekantherrenh atwemel. Akngeyel renh-rnem Egypt-they atwnenhek.<sup>18</sup> Ranem renh-rnem aherrety 40-ek-atwety arntarnt-arenh, rernem ikwer aleth tylel-angkenh.<sup>19-20</sup> Arrwekelely anwekantherrenh-rnem aherrety 450 mpwelhenh apmer alhelekarl anetyek. Akngeyel Canaan-areny-rnem angka 7 angkenharl-rnem atwек, anwekantherrenh-anem ikwer-rnem anthek apmer renh. Rernem apek Canaan-itwек anenh-antey Akngeyel artwa atyetyart ikwer-rnem-warl thwenek, renh-rnem itethiletyek, Samuel apey-alpetyek-atwety. Samuel ra Akngey-kenh angkakert anen.<sup>21</sup> Ikwer-penh akngerrel Akngey ayernek, atyetyart ilkwa ikwer-rnem rkernetyek. Akngeyel-anem Saul renh rlwanek atyetyart ilkwa ikwer-rnem anetyek. Saul ra Benjamin-kenh arrpemarl anen, Kish-kenh alerikw. Ra atyetyart ilkwa anen aherrety 40-ek-atwety.<sup>22</sup> Akngeyel renh irrentek intem-antey, ingwer-anem aney-alken. David-anem rnkernek, atyetyart ilkwa ikwer-rnem anetyek. David ikwer-penh alakenh Akngeyel ilek, 'David, Jesse-kenh alerikw, ayeng ikwer inkwerelhelyel, rarl atyengant awelhelyel.'

<sup>23</sup> Akngeyel Israel-kenh-rnemek alhelek artwa anyent thwenetyek, ra renh-rnem itethiletyek. Artwa ranap David-kenh arrpemarl. Jesus ran artwa itethiley-angker aneyel.<sup>24</sup> Jesus-they arrwekel-antey John apetyek. John-el Israel-kenh-rnem ilek, rernem Akngey-warl angkepirretyek, ranem renh-rnem baptise-emeletyek.<sup>25</sup> John ra warrk ikweren h ywerrelhiletyek arrer-anem irrek, ra ingkerrenh ayernek, 'Angwenharl ayengan? Nthakenh arrantherry atyeng iterreyel? Atha arrenhantherr iley, ayeng itethiley-angker inngewenyarl. Arrantherry ikwer mpwelhelyel. Aray, itethiley-angker ingwer-ingerant apetyeyen. Ayengan rlterrk-wenyarl, artwa apmwamwamarl. Ayeng arrangkw, arwarl warrenh ikweren h aneyel.'

<sup>26</sup> Artwa atyenh-rnemay, anwantherr Abraham-kenh-rnem aneyel, arrantherrap atyeng awelhennherr-arey! Artwa Ingkart-areny ingwer-rnem arrantherry awelhennherr-arey, Akngeyel inkwerelhiletyek. Akngeyel anwenhantherr ilek, rarl anwenhantherr itethilek.<sup>27</sup> Aray, Jerusalem-areny-rnem atyetyart rernem iterl-arey-angenh akwerrparl, Jesus ikwer, rarl itethiley-angker aneyel. Pip rernem reytemileh akwerrpel, Saturday arrpanen hel.<sup>28</sup> Rernem Jesus renh ywarn-antey aytarrp-ilek. Rernem Pilate renh ayernek, ra Jesus renh ipmek atwetyek.<sup>29</sup> Akngey-kenh angka arrwekelely alakenh aynteyel: 'Itethiley-angker ra ilwetyek.' Kel arraty-angkwarr aynteyel. Rernem-anem renh arwerl iylypeyl-atherr-they atwarrelhilek, awenng intey-warl akwernek.<sup>30</sup> Akngeyel Jesus renh ipmepen akemelhilek.<sup>31</sup> Rernem renh arrwekel apetenh Galilee-they Jerusalem-ek-atwety, rernem renh arek anngetherr arrpemarl, iteth-antey Ingkerrenhel alakenh ileyel, angka nhenh arraty innga aynteyel.<sup>32-33</sup> Anwantherr-anem arrekantherr angka mwerr-angker ilem. Akngeyel arrwekelely-rnem alhelekarl, ingwer-inger itethiley-angker thwenetyek. Akngeyel kel itethiley-angker anwekantherry-warl thwenek. Jesus ra itethiley-angker Jesus anem. Akngeyel renh ipmepen akemelhilekarl. Psalm 2-el Jesus-penh ileyel, 'Nga alerey atyenh aneyel. Lyert ayeng Akngey ngkwenh aneyel.'<sup>34</sup> Akngeyel Jesus renh ipmepen akemelhilek arlka ikweren h apmwirrey-angenh. Akngey-kenh angka alakenh aynteyel: 'Atha arraty innga alheleyel atharl David alhelek-apeny.'<sup>35</sup> Akngey-kenh angka arrwekelely ingwerel aynteyel: 'Akngeyel nthakenh renh iwerl-alhey-angenh arlka ikweren h apmwirrey-angenh.'

<sup>36</sup> David-arl iteth anen h ra Akngeyek awelheneh. Ra kel ilwek. Rernem renh akwernek, arrwekelely-rnem ikwer-itwек-antey. Arlka ikweren h apmwirrek-anem.<sup>37</sup> Akngeyel Jesus renh ipmepen akemelhilek, arlka ikweren h apmwirrey-angenh, arrangkw.<sup>38</sup> Atyenh-rnemay, atha arrenhantherr ileyel, Jesus-angkwarr apententy, Akngeyel apmwa arrekantherrety iwem.<sup>39</sup> Arrantherry atyeng-angkwarr arraty-angkwarr aneyel, Moses-kenh angka arrangkwarr aynteyel. Arrantherry Jesus renh tnakenty, arrantherry mwerr-angkwarr aneman. Moses-kenh angkekant awelhenty, arrantherry arraty apentey-angenh.<sup>40</sup> Arrantherry mwanty anetyek. Anwantherr mwanty arntarnt-arelhiletyek, apmwewarl irrekerr. Akngey-kenh angka arrwekelely-rnem alakenh aynteyel.<sup>41</sup> Akngeyel renh-rnem ilek, 'Arrantherry apek atyeng irrpelthirrenty,

arrantherr ilweyehan. Aray, atha ilek-ilek-angkwarr mpwareyel. Arrantherr ayen htnakey-angen hingwer-rnemel arrenhantherr ileyel-angkwarr.”

<sup>42</sup> Paul-athererr Barnabas-athererr tyaty ikwer-they tyerrelhek. Ingwer-rnem ikwer-athererr yangkelhek, ingwer-rnem-warl apetyetyek, renh-rnem Akngey-kenh angka akalty-anthetyek arla Saturday-el. <sup>43</sup> Jew ingwer-rnem-then rernem Akngey renh tnakek, ratherr ingwer-rnemek angkek. Ratherr renh-rnem ilek, rernem Akngey rlterrk innga tnaketyek, rarl renh-rnem arntarnt-arenh.

<sup>44</sup> Saturday ingwel-anem ingkerrehn anyentirrek Akngey-kenh angka awetyek.

<sup>45</sup> Jew-rnemel akngerr aremel, Paul-kety arlkarirrek. Rernem-anem ingkerrehn anngetherr Paul-ek irrpelthirrenh.

<sup>46</sup> Paul-athererr Barnabas-athererr arnkaty ikwer-rnemek angkek, “Akngay ilkelheyel aylanth arrekantherr-tangkwel Akngey-kenh angka iletyek. Arrantherr Akngey-kenh angkek irrpelthirreyel, intem iteth aney-angen ilkelhey-angen. Alakenh-anyem aylanth Jew-weny-rnem-warl alerl alheylel, Akngey-kenh angka ikwer-rnem iletyek. <sup>47</sup> Ingkartel anwenhantherr ilanthek, ‘Atha arrenhantherr rrnkernek, Jew-weny-rnem atnwenheteyek atyeng-warl, angka atyenh iletyek arrpemarl. Akngey ilkelheyel arrenhantherr itethiletyek.’”

<sup>48</sup> Angka awek-penh Jew-weny-rnem ikwerelhek. Ingkart renh tnakek arrpemarl. Ingkerrel Akngelyelar rlwanek itethiletyek, rernem Ingkart tnakek arrpemarl.

<sup>49</sup> Jesus-arl apentyeyl ingwer-rnemel ingkerrehn Akngey-kenh angka akalty-anthek arrpemarl apmer Pisidia-ampeney. <sup>50</sup> Antioch tawen-itwek, arelh ilkwerneh-then artwa ilkwerneh-then rernem Akngayek inkwerlhemel anen. Jew-rnem-anem ikwer-rnem yangkelhek, Paul Barnabas atherrek anngerntirretyek. Rernem Paul-then Barnabas-then irrentek. <sup>51</sup> Paul Barnabas ratherr ahern ingkethey tertangkwelhilek, rernem iterl-aretyek apmwangkwarrarl rernem renh-athererr irrentek. Ratherr Iconium-warl alhek. <sup>52</sup> Ingkart-areny-rnem irrngnerney aleth-anem anen. Itnweng Rlwart ikwer-rnem-itwek anen.

## 14

*Paul Barnabas-athererr tawen Iconium-warl alheylel*

<sup>1</sup> Ikwer-penh Iconium-itwek Paul Barnabas-athererr Akngey-kenh angka ikwer-rnem ilek Jew-rnem-kenh tyaty-itwek. Renh-athererr awek-penh, Jew-rnem-then Greek angkeyelarl-rnem-then Jesus renh tnakek arrpemarl. <sup>2</sup> Jew ingwer-rnemel Jesus renh tnakey-angen harrangkw. Ikwer-atherrety arlkarirrek arrpemarl. Rernem irrwernek. Alethang ingwer-rnem aherlirek-anem. <sup>3</sup> Paul Barnabas-athererr Iconium tawen-el anen-hantey, ratherr Akngey-kenh angkek arnkatyel akalty-anthek, Ratherr ilek, “Ingkartel ingkerrehn arntarnt-areyel.” Ingkartel renh-athererr rlterrkilek, ratherr ilek-ilek mpwarek, arntety-rnem mwerrilek. Alakenh-anyem Ingkartel Paul atherrek anayntilek, ratherr arraty innga akalty-anthek. <sup>4</sup> Iconium tawen-areny-rnem ywarn iterrek. Ingwer-rnem Jew-rnemek inkwerelhek. Ingwer-rnem ikwer-athererr inkwerelhek.

<sup>5</sup> Ikwer-penh Jew-weny-rnem-then Jew-rnem-then Atyetyart ilkwerneh-then angker-renh, Paul-athererr Barnabas-athererr apwertel wetyek. <sup>6</sup> Ratherrarl angka awek-penh, ratherr aterel-anem anterrek apmer Lycaonia-warl. Lystra tawen-itwek Derbe tawen-itwek-anem intem-antey-anem aney-alpek. <sup>7</sup> Ratherr ingwer-rnem-anem Jesus-kenh angka mwerr akalty-anthek.

*Paul Barnabas-athererr Lystra-el, Derbe-el*

<sup>8</sup> Lystra tawen ikwer-itwek artwa thapel anyent anen. Alakenh-antey ra ilkwerrek, ingkel alheyy-angen. <sup>9</sup> Ranem Paul awek rarl ingwer-rnem akalty-antherl-apenh. Artwa renh aremel Paul ra iterl-arek rarl Jesus renh tnakenh, renh irrpelthel mwerriletyek. <sup>10</sup> Paul-el artwa renh ilek, “Ingka atherrel, rtnerl-alha.” Kel ra alpek-anem.

<sup>11</sup> Ingwer-rnem angkerrehn, altyerr ingwer-rnem irrwerl-they apetyenty-arrpantey ikwer-rnem-warl, Zeus, Hermes-athererr. <sup>12</sup> Apalel rernem Barnabas renh itnewek Zeus, Paul-arl rernem itnewek Hermes. Rernem ingwer-rnem angkerrehn, Hermes, Zeus-kenh angkakertarl anen. <sup>13</sup> Zeus-kenh tyaty ilkwa tawen-they aketh-ampeney artelhekarl arrer-antey. Atyetyart tyaty-areny ilkelhenh Paul-ek-athererr Barnabas-ek-athererr inkwerelhetyek, tyenkerr-anem renh-athererr anthetyek. Pwelek-rnem-then alperr-rnem-then akngek ikwer-athererr-warl.

<sup>14</sup> paul-atherrel angka awek-penh, ratherr aherlirek, arnkwa arlpenty-anem ilterrek. Akngerr ampep-warl ratherr arlkemel anterrek, <sup>15-16</sup> “Artwernemay, aylerannah ahern-areny arrpemarl, arrekantherr-apeny. Aylerannah angka mwerr arrekantherr ilerl-apeyel. Irrtywerrey-angker altyerr ahern nhareny ipmay! Akngey iteth-warl

angkepirrenhey-alpenherr-arey! Akngey ikwer-warl, rarl alker-then ahern-then kwaty alay-then arrpmernekarl, thip-rnem-then irrpeng kwaty-areny-rnem-then ingkerrenh-antey. Ingkerrenh anenh apatemel awank-akerr, Akngey iterl-arey-anenh. Aleyan Akngey ilkelheyel, ingkerrenh ikwer-warl angkepirretyek, altyerr irrtywerrey-angker apmwekety ipmelhetyek, renhant anyent iterl-aretyek.<sup>17</sup> Akngey innga ikwer-rnem anayntelhilek, rarl innga aneyel, ikwer-rnem inkwerelhemel kwaty aparew renh-rnem amern ingwerek-ingwer-then anthek. Alakenhaym ra ingkerrenh wantek, irrkngnerney anthemel.” Alakenh ratherr renh-rnem ilek.

<sup>18</sup> Innganem ratherr renh-rnem arternpilemel ilek.

<sup>19</sup> Jew-rnem Antioch tawen-they Iconium tawen-warl apetyek. Rernem-anem Iconium tawen-areny-rnem ilanthe, Paul renh apwertel wemel ipmek atwetyek. Apwertel wek rernem. Rernem ikwer iterrek renh ipmek wentyek-athen. Tawen-they aketh-ampeny-warl-anem iytar-akngemel iwerl-alpek.<sup>20</sup> Kwertengerl ikwerenh-rnem ikwer-warl apetyek. Paul ra akemirrey-ayntek. Paul ikwer-rnem-angkwarr tawen-warl alpek arrpemarl. Ingwepenh-anem Barnabas-atherr Paul-atherr Derbe tawen-warl alpek.<sup>21</sup> Tawen ikwer-itwek-anem ratherr ingwer-rnem Jesus-kenh angka akalty-anthek, Jesus renh tnakemel. Derbe tawen ikwer-they Lystra tawen-warl alpek. Ikwer-penhan Iconium tawen-warl-anem Antioch tawen-warl alhek.

#### *Paul Barnabas-atherr Antioch-warl alpeyel*

<sup>22</sup> Ratherr-anem kwertengerl-rnem rlterrilek, renh-rnem ilek rernem Jesus renh tnaketyek aleth-antey. Ratherr renh-rnem ilek, “Aray, anwantherr artewentyel irrwampeyenh, Akngey-kenh ingkerrenh aneyel.”<sup>23</sup> Paul Barnabas ratherr artwernem anyentarl-anyentarl arrerneynek, rernem tyaty-areny ingkerrenh arntarnit-aretyek. Ratherr amern arlkwey-angenh, Akngey renh ayernek, ra artwa arntarnit-arey-angker renh-rnem aleth-antey atnyenetyek.

<sup>24</sup> Paul Barnabas ratherr apmer Pisidia-angkwarr alhek. Pamphylia-warl apetyek.<sup>25</sup> Perga tawen-areny-rnem Akngey-kenh angka akalty-anthek. Ikwer-penhan ratherr Attalia tawen-angkwarr-anem anper-alhek.<sup>26</sup> Attalia ikwer-itwek rtnwearl nganerl-alhemel, ratherr Antioch tawen-warl alpek. Antioch-arenyel-rnem Akngey renh ayernek, ra renh-atherr arntarnit-aretyek. Antioch-arenyel-rnem renh-atherr thwenek, angka mwerr-angker ilerl-apayntetyek ingwer-rnemek, rernemarl akwerrp anenh. Ratherr akwerrp ingwer-rnemek angka Akngey-kenh ilerl-apayntetyek. Ratherr kel warrk ikwer-atherrenh ywerrelhilek.

<sup>27</sup> Antioch-itwek ratherr Jesus-arl apenteyel-rnem anyentilek. Ratherr-anem Ingkart-areny-rnem ilek, “Aylanth Akngey-kenh angka Jew-weny-rnem akalty-anthenn, Akngeyel renh-rnem rlterrilek, rernem Jesus renh tnaketyek.”<sup>28</sup> Ratherr-anem kwertengerl-rnem-itwek aleth-antey aney-alpek.

## 15

#### *Tyat-areny atyetyart-rnem apmer Jerusalem-itwek angkerretyek*

<sup>1</sup> Antioch-areny ingwer-rnem Jesus-arl apenteyel-rnem rernem Jew-weny anenh. Arltal ingwerel Ingkart-areny Jew ingwer-rnem apmer Judea-they apetyek apmer Antioch-warl, ingwer-rnem akalty-anthetyek, atherr-angkwarr-penh. Rernem Ingkart-areny-rnem akalty-anthek, rernem Moses-kenh angka arrweleny apenterl-ayntetyek-arrpanety. “Akngelyel arrenhantherr atnyeney-angenh, Moses-kenh angka apentey-angenharl arrantherr aneyelan.”<sup>2</sup> Rernem ilenh, Paul-then Barnabas-then. Antioch-areny-rnemel Paul Barnabas-atherr artwa ingwer-rnem-then rlwanek, Jerusalem-warl alhetyek, rernem Akngey-kenh angka arratylarretyek, Akngey-kenh angkakert-rnem-then tyaty-areny-rnem-then.

<sup>3</sup> Tyaty-arenyel-rnem renh-rnem kel thwenek. Rernem alhek, Phoenicia-angkwarr, Samaria-angkwarr. Rernem tyaty-areny-rnem ilek, “Akngelyel Jew-weny-rnem kel atnyenek, itethilek.”<sup>4</sup> Paul-kenh-rnem Jerusalem-warl alhek. Rernem ikwer-rnem inkwerelhe. Paul-el renh-rnem ilek, “Aray, Akngelyel Jew-weny-rnem itethilek. Anwantherr ikwer-rnem Akngey-kenh angka renh-rnem akalty-anthetyek.”<sup>5</sup> Artwa Jesus-arl apenteyel ingwer-rnem Pharisee-rnem-arl anenh. Rernem-anem rtnerl-alhemel angkek, “Aray, Jew-weny-rnem rernemarl Jesus tnakem artwirretyek-tangkwel, Moses-kenh angkek-anem awelhey-alenty.”

<sup>6</sup> Kwertengerl-rnem-then arntarnit-arey-angker-rnem-then anyentirrenh, angkerretyek.<sup>7</sup> Rernem intem-antey ilerrenh. Peter-anem rtnerl-alhemel angkek, “Arrantherr kel akalty, Akngeyel ayeh rlwanek atha apmer arrpanenh-angkwarr angka mwerr-angker ilerl-apayntetyek Jew ingwer-rnemek, rernem-anem Jesus tnaketyek.”<sup>8</sup> Akngey

kel ingkerrenhek akalty. Akngey kel lwewarrernelhek Jew-weny-rnemek. Ikwer-rnem inkwerelhek ra anwekantherr inkwerelheyel-apeny. Akngeyel Itnweng Rlwart renh ikwer-rnem-warl thwenek, anwekantherr-warl thwenek-apeny.<sup>9</sup> Ranem Jew-weny-rnem-kety apmwan iwek rernem renh tnakenty, rarl anwekantherretty apmwa iwek-apeny. Anwantherr renh tnakem aleth-antey.<sup>10</sup> Ilek-ketaryl arrantherran awerr aneyel ikwer-rnem, rernem Akngey-kenh angka apentekerran? Iterl-aray, anwantherr Moses-kenh angkek ywarn apenteteyek arrkerneleheyel. Arrwekeleny-rnem ywarn arrkernelhenh arrpemarl.<sup>11</sup> Akngeyel ingkerrenh anwenhantherr atnyenem, anwekantherr inkwerelhemel anwantherrarl Jesus tnakenty, Jew-rnem-then, Moses-kenh angka iterl-arey-angenh-rnem-then.”

<sup>12</sup> Barnabas Paul-atherr angkenharl tyaty-arenyel-rnem renh-atherr akatemel awenh. Ratherr renh-rnem ilek Akngeyelarlr renh-atherr rlterrilek, ilek-ilek mpwaretyek, arntety-rnem mwerriletyek, Jew-weny-rnem-itwek.

<sup>13</sup> James-el-anem ilek, “Atyen-hrnem, atyeng-anem awelhennerr-arey! <sup>14</sup> Simon-el ayenh ilek, ‘Akngeyel renh-rnem arrwekel rlwanek, rernem ikwer-areny-rnem-anem anetyek.’ <sup>15</sup> Akngey-kenh angkakert arrwekeleny-rnemel ilerl-apenh, alakenh arrpemarl. Akngey-kenh angka arrwekeleny alakenh-anyem aynteyel. <sup>16</sup> Ingkart ra angkek, ‘Ingwer-ingeran ayeng apey-alpeyenh, atha David-kenh-rnem akngerriletyek, rernemarl irrpetyapant aneyel-kety.’ <sup>17</sup> Ikwer-penhan Jew-weny ingwer-rnem Ingkart-warl-anem angkepirreyenh, Ingkartel renh-rnem arrwekel rlwanek-angkwarr.’ <sup>18</sup> Ingkart ra awank-antey alakenh angkek. <sup>19</sup> Alakenh-anyem anwantherr arrknert angkey-angenh, rernem menty Akngey-warl angkepirretyek. <sup>20</sup> Anwantherr ikwer-rnem ingkwernetyek pip ikwer-rnem-warl thwenetyek, rernem angka arraty iterl-aretyek. Anwantherr mwarrant-arey anayntetyek, Moses-kenh angka arrwekeleny aynteyel-angkwarr, rernem irrtywerremel altyerr-arrpantey-rnem-itwek tyenkerr amern-then aker then arlkwey-angenh anayntetyek, rernem ingwer-kenh anew ikngwey-angenh anayntetyek, rernem aker arrkngangketyarr arlkwey-angenh anayntetyek, arrknga antywey-angenh anayntetyek. <sup>21</sup> Aray, awank-they apmer arrpanhel-itwek Moses-kenh angkangkwarr akalty-anthren. Rernem arla Saturday arrpanhel anyentel-anyentel reytirrek Jew-rnem-kenh tyaty akely-rnem-itwek.”

#### *Jerusalem-areny-rnemel pip thweneyel Antioch-areny-rnem-warl*

<sup>22</sup> Ikwer-penh angkakert-rnem-then arntarnt-arey-angker-rnem-then tyaty-areny in-kerrenh rernem artwernem-anem rlwanek, Paul Barnabas-atherr-angkwarr Antioch tawen-warl alhetyek. Judas itna ingwer Barsabbas-an. Artwa ingweran Silas. <sup>23</sup> Kel rernem pip ingkwernek thwenetyek ikwer-atherr-angkwarr. Rernem alakenh ingkwernek pip-warl, Antioch tyaty-areny-rnemek, ‘Atyen-hrnem, Jesus-arl apenteyel-rnem akngerr, angkakert-rnem-then tyaty-areny atyeyart-rnem-then! Arrantherrarl Jew-weny-rnem, arrantherr Antioch tawen-itwek aneyel apmer Syria-el apmer Cilicia-el-then.’ <sup>24</sup> Anwantherr awek ingwer-rnemarl arrekantherr irrpelthirreyel. Anwantherr awek artwa tyaty-areny irrpety arrekantherr-warl alhek, rernem-anem arrenhantherr ilpertiley-alhek. Anwernantherran renh-rnem thweney-angenharl, anwernantherr arlarl. <sup>25</sup> Anwernantherr angkerreh, Barnabas-atherr Paul-atherr ingwer-rnem-then arrekantherr-warl thwenetyek. Anwernantherr Barnabas Paul ikwer-atherr inkwerel-hemel. <sup>26</sup> Ingwer-rnem ikwer-atherr irrpelthirrenh, irrwampen anthenh, ratherrarl Jesus Christ-kenh angka ilerl-apenhk. <sup>27</sup> Anwernantherr-anem Judas-atherr Silas-atherr ikwer-atherr-angkwarr thwenem. Rernem pip ikwer-penh angka anayntilem, angka anyent renhey-antey. <sup>28</sup> Itnweng Rlwartel ra anwekantherr ilek, arrekantherr angka irrpetyapant anayntiletyek. <sup>29</sup> Arrantherr amern-then aker-then arlkwey-angenh, ingwer-rnemel altyerr-arrpantey tyenkerr anthekarl-kety. Arrantherr arrknga antyweyang anayntetyek aker arrkngangketyarr. Arrantherr apmwel-areth mpwarey-angenh, ingwer-kenh anew ikngwey-angenh. Arrantherr mwerr-angkwarr anetyek, nhekant awelhemel.”

<sup>30</sup> Tyaty-areny-rnemel artwa renh-rnem thwenek, apmer Antioch-warl. Rernem Antioch tyaty-areny-rnem akarrilek. Pip-anem rernem anthe. Artwa anyentel-anem reytemilek. <sup>31</sup> Angka renh awemel tyaty-areny-rnem inkwerelhek, angka mwerr-angkerarl reytemilekek. <sup>32</sup> Judas-atherr Silas-atherr ratherr Akngey-kenh angkakert akalty atherr anenh. Ratherr-anem Jesus-arl apenteyel-rnem akngerr akalty-anthe rlterrilek-anem.

<sup>33</sup> Ratherr arleng-alenty aney-alhek. Ikwer-penhan Jesus-arl apenteyel-rnemel Antioch-areny-rnem thweney-alpek Jerusalem-warl,<sup>34-35</sup> Paul Barnabas-athererr Antioch-el anenh. Ratherr renh-rnem Akngey-kenh angka akalty-anthek, ikwer-rnem anaytilek angka renh. Ingwer-rnemel angka akalty-anthek arrpemarl.

*Paul Barnabas-athererr*

<sup>36</sup> Ikwer-penhan Paul Barnabas-warl angkek, "Ntwa tawen nheng-rnem iterl-areyel? Aylanth renh-rnem aretyek, akngerr ingwer-rnem arrwekelarl aylanth akalty-anthek-rnem Akngey-kenh angka." <sup>37</sup> Barnabas ilkelhenh artwa John atnwenhetyek arrpemarl. John itna ingweran Mark. <sup>38</sup> Mark ikwer-atherrety arrwekel arlkarirek, aleth ikwer-athererr-angkwarr warrkirrerl-anekek. Alakenh-they renh-athererr Pamphylia-they iwerl-alhek. Paul ilkelhey-angnenh renh atnwenhetyek, rarl arlkariremel alpek-kety.

<sup>39</sup> Ratherr Mark ikwer-they ilterrek. Ywarn arratyilerremel rathererr kel ipmelhekant-anem. Barnabas-el-anem Mark renh ikngwerl-alhek. Ratherr rtnnewarl nganerl-alhek apmer Cyprus-warl alhek. <sup>40</sup> Paul-el Silas rlwanek ilkwatherr alhetyek. Tyaty-areny-rnem ikwer-athererr Ingkart-warl angkek, Ingkartel renh-athererr arntarnt-aretyek.

<sup>41</sup> Ikwer-penhan rathererr Syria-angkwarr Cilicia-angkwarr alhek. Ratherr tyaty-areny-ingwer-rnem rlterrilek-anem.

## 16

*Paul yangkelheyel Timothy ikwer; ikwer-angkwarr alhetyek*

<sup>1</sup> Paul Derbe tawen-warl alhek. Ikwer-penhan Lystra tawen-warl-anem anperl-alhek. Tawen ikwerel artwa Timothy anenh arrwekel. Ra Jesus-kenh kwertengerl anenh. Timothy-kenh amikw Jew arrpemarl anenh, ra Jesus-arl apenteyel arrpemarl. Aynikwarl ikwerenh Greece-arenyarl anenh. <sup>2</sup> Jesus-arl apenteyel Lystra-areny-rnem-then Iconium-areny-rnem-then rernem ingkerrenhel Timothy tnakek, Timothy-ek inkwerelhek. <sup>3</sup> Paul ilkelhenh Timothy ikwer-angkwarr alhetyek. Jew ingkerrenh akalty anenh aynikw ikwerenh Greece-areny anenh. Alakenhaym-they Paul-el Timothy renh artwa mpwarek artwa Jew-rnem ahelirrekerr.

<sup>4</sup> Rernem tawen arpanhen-angkwarr alhek. Rernem Jesus-arl apenteyel-rnem Akngey-kenh angka ilerl-apenh Jerusalem-areny angkakert-rnem-then tyaty-areny atyetyart-rnem-then arrwekelarl anthek, rernem arraty-angkwarr apenterl-ayntetyek <sup>5</sup> Jesus-arl apenteyel-rnem akalty innganem irrek, ingwer-rnem Akngey-warl angkepir-rek. Alakenh-anyem ingwer-rnem tyaty-areny-rnem-warl antelhek-anem Akngeyel ingwer-rnem anyentilek tyaty-areny-rnem-warl.

*Paul-el altyerr areyel, artwa apmer Macedonia-arenyarl ikwer yangkelheyel*

<sup>6</sup> Itnweng Rlwart arrkngert angkek Paul ikwer-rnem, apmer Asia-itwek Akngey-kenh angka akalty-anthekerr. Alakenh-anyem rernem Phrygia-itwek ingwer-rnem akalty-anthek-alkpek apmer Galatia-itwek-then. <sup>7</sup> Apmer Mysia-arl arey-alhek-penh, rernem ilkelhek apmer Bithynia-warl alhetyek. Jesus-kenh Itnweng arrkngert angkek ikwer-rnem. <sup>8</sup> Rernem Mysia-angkwarr anper-alhek Troas tawen-warl.

<sup>9</sup> Apmer ikwer-itwek Paul-el altyerr arek ingwel. Ra artwa Macedonia-areny arek, ikwer yangkelhekarl, "Macedonia-warl apetyay anwekantherr-warl, anwenhantherr akalty-anthetyek." <sup>10</sup> Ingwepenh-antey anwantherr rtnwek nthwey-ayntek apmer Macedonia-ikwer-warl artarnpenhetyek kwaty-angkwarr. "Anwantherr iterl-arek Akngey anwekantherr yangkelhek, Macedonia-areny-rnem akalty-anthetyek."

*Lydia-el Jesus renh tnakeyel*

<sup>11</sup> Troas-itwek anwernantherr rtnnewarl nganek. Anwernantherr Samothrace ikwer-warl artarnpenhek. Ikwer-penhan arlta ingwerelan Neapolis ikwer-warl-anem. <sup>12</sup> Tawen ikwer-they anwernantherr ingkel-anem alhek apmer Philippi-warl. Philippi ra tawen ilkwa anenh apmer Macedonia-itwek. Tawen ikwer-itwek Rome-areny akngerr anenh. Tawen ikwer-itwek anwernantherr arlta irrpety-inger anenh.

<sup>13</sup> Arlta Saturday ikwerel anwernantherr tawen ikwer-they anperl-alhek, lher kwaty-akert-warl. Anwernantherr iterl-arek kwaty-angkwarr lher ikwer-itwek Jew-rnemarl akarrirenh Akngey-warl angkayntetyek. Apmer-itwek anwernantherr aney-alhek. Anwernantherr-anem arelh akngerr-itwek angkerrenh. <sup>14</sup> Arelh anyent rarl Paul awenh, itnan Lydia. Thyatira tawen-arenyarlap ran. Ra arnkwa mwerr-angker rnter-rnter payemelenh ingwer-rnem-warl tharlemilenh. Lydia ra Akngey-angkwarr apentenh. Ingkartel iylpa ikwer altywerilek, ra Paul arraty awetyek, Akngey-anem tnakemel. <sup>15</sup> Paul-el-anem renh baptise-emelek, ikwerenh-rnem-then. Ikwer-penhan Lydia-el anwernantherr ikngwerl-alhek, "Arrantherr iterl-areyel, athan Ingkart

innga tnakeyelarl. Kel apetyenherr-arey, apmer atyenhel anetyek.” Anwernantherr kel ikwer inkwerelhek, apmer ikwerenhel-anem anehn.

*Paul Silas-atherr Philippi tyayl-itwek*

<sup>16</sup> Arlta ingwerel anwernantherr apmer irrkaty ikwer-warl-antey alhek, Jew-rnemar tyatyeck akarirrenh-warl, Akngey-warl angkayntetyek. Kwey aleyak warrkenhel anwernenhantherr arek. Ra arrency-akert anehn. Arrency-kenh riterrk-akertel ra arrwekel-antey ilenh nthakenharl irreyenh, ngangker-apeny. Kwey warrkenhel renh-rnem ilenh. Ingwerel-rnem renh man anthek, angkan ra tyakarl arrwekel-antey ilenh, nthakenh irreyenh. Alakenh-anyem atyetyart ikwerenh-rnemel man akngerr mpwarenh ikwer-they. <sup>17</sup> Kwey ranem anwernenhantherr apentek arlkemel, “Artwa akngerr nhenh-rneman Akngey inngekenh angkakert-rnemarl. Rernem arrenhantherr kel arraty innga ilem, arrantherrarl Jesus renh tnakenty, Akngeyel arrenhantherr itethilemarl.”

<sup>18</sup> Kwey ra anwernenhantherr aleth-antey apenten. Angka anyent ikwerel arlkeler-apen. Ra Paul renh arwengkilek. Paul ranem rtnek arelh renh aremel, Paul-el arrency renh ilek. “Jesus-kenh riterrk-akertel atha ngenh ilem, kwey aleyak ikwer-they tyerrelha!” Arrency ranem kwey ikwer-they kel tyerrelhek. <sup>19</sup> Atyetyart-rnem ahelirrek ikwer-atherrety, man kwey ra mpwarey-angenh-anem anenh-kety. Rernem Paul Silas-atherr anterrkwek tawen-warl angkek, court-el angketyek. <sup>20</sup> Ikwer-penh rernem renh-atherr atyetyart-rnem-itwek aytarrp-ilek, “Artwa nhenh-atherr Jew-atherr aneyel. Ratherr-antey arrpemarl. Tawen nhareny-rnem ingkerrenh arwengkileyel. <sup>21</sup> Ratherr anwenhantherr ilem anwantherr Jew-kenh-angkwarr apentetyek. Rome-areny-rnem anwantherr alakenh apentey-angenharl.”

<sup>22</sup> Artwa akngerr akarirrek Paul renh-atherr aytarrp-iletyek. Atyetyart court-areny rernem ahelengkw-rnem ilanthek Paul-atherr Silas-atherr arnkwa lhelelyek, whip-el atwetyek. <sup>23</sup> Rernem renh-atherr artewentyel atwekar-penh, rernem renh-atherr tyayl-warl-anem akwernekk. Rernem tyayl-areny artwamp ilanthek, renh-atherr mwantyel arerl-aytetyek. <sup>24</sup> Alakenh-anyem tyayl-areny artwampel-rnem renh-atherr tyayl kwen inngewarl akwernekk, arlaw atherr-anem tyeynel arertnek.

<sup>25</sup> Ingwa ampepel Paul-atherr Silas-atherr Akngey-warl angkek Akngey tnakemel aylehemel. Tyayl-areny ingwerel-anem renh-atherr awek arrpemarl. <sup>26</sup> Ahern ranem artewenty innga akngelhekarlel, tyayl renh akngenhelhilek arrpemarl. Tyayl arriw ingkerrenh altywerirrek, tyeyn lhelhek ingkerrenh-they.

<sup>27</sup> Tyayl-areny atyetyart artwamp ranem atyekirrek, ranem arek tyayl arriw altywerirrek. Ra iterrek tyayl-areny-rnem ingkerrenh anterrenty-arrpanter. Alakenh-anyem ra napyp arlpenty inek, ipmek atwelhetyek antwerrel. <sup>28</sup> Paul-anem ikwer arlkemel, “Ipmek atwelhety-angenh, anwantherr ingkerrenh nhel aneyel-antey, tyerrelhey-angenh!”

<sup>29</sup> Tyayl-areny atyetyart ranem lyenentyek yangkelhek arlkemel, ra anaynt aretyek. Ranem tyayl ikwer-warl aylpek. Ra aterirrek innga, Paul-atherr-kety, Silas-atherr-kety. Ampwethel arrernelhek kwенирремел. <sup>30</sup> Akemirremel ra renh-atherr aketh-warl atnwenhek. Ra renh-atherr ayernek, “Artwamp atherray! Nthakenh athan ilem, ayenh Akngeyel itethiletyekan?”

<sup>31</sup> Ratherr-anem ilek, “Ingkart Jesus tnakay! Ikwer-penh Akngeyel ngenh itethileyenh ngkwenh-rnem-then warrenh ngkwenh-rnem-then ingkerrenh-antey.”

<sup>32</sup> Tyayl-areny artwamp ra Paul Silas-atherr atnwenhek warl ikwerenh-warl. Ikwer-penh Paul Silas ratherr renh Akngey-kenh angka akalty-anthek warl-areny ingwer-rnem-then ingkerrenh-antey. <sup>33</sup> Tyayl-areny artwamp ra tywen renh-atherr anterel apernek, mwerriletyek. Ikwer-penh Paul-atherrel renh baptise-emelek, ikweren-hrnem-then warrenh-rnem-then ingkerrenh-antey. <sup>34</sup> Ikwer-penh tyayl-areny artwamp ra renh-atherr apmer ikwerenh-warl atnwenheynek, renh-atherr amern anthyetyek. Tyayl-areny artwamp inkwerelhek ikwerenh-rnem-then ingkerrenh-antey Akngey tnakemel.

<sup>35</sup> Kel ingwepenh-antey Atyetyart court-areny rernem ilyemwerney-rnem thwenek angkakert angka tyayl-areny atyetyart ikwer-warl. “Artwa renh-atherr kel tyarleweteyek!”

<sup>36</sup> Tyayl-areny atyetyart ranem Paul renh ilek, “Atyetyart court-arenyel angka thwenek, mpwelenhanth tyarlewetyek. Mpwelanth-anem arternp alpenherr-atherr aterirrey-angenh.”

<sup>37</sup> Paul-el angkakert-rnem thwenek, “Rernem aylenhanth arrwekel court-emiley-angenh-antey. Aylanth arlarl, Rome-areny arrpemarl. Rernem aylenhanth whip-el atwek akngerr-itwek, tyayl-warl akwernemel. Lyert-anem rernem arrkernelheyel

aylernanthenh anyelkel tyarlewetyek. Arrangkw-kety alha! Rernemarrp apetyey tyayl-they aylernanthenh tyarlewetyek."

<sup>38</sup> Iltyemwerney angkakert-rnem alpek angka court-areny-rnem iley-alpek. Atyetyart court-arenyel awek Paul Silas-atherre Rome-areny arrpemarl anen, rernem aterirrek.

<sup>39</sup> Tyayl-warl alhemel rernem renh-atherre arternpilek, renh-atherre tyayl-they tyerrek. Ikwer-penhan rernem renh-atherre ilek, apmer ingwer-warl-anem alhetyek. <sup>40</sup> Tyayl-they tyerrelehemel Paul Silas-atherre Lydia-kenh apmer-warl alhek. Jesus-arl apenten akngerr apmer ikwerel anen arrpemarl. Ratherr ikwer-rnem Akngey-kenh angka ilek warl ikwer-itwek, renh-rnem rlterrkilemel. Ikwer-penhan ratherr kel alpeant-anem.

## 17

### *Paul Silas-atherre Thessalonica tawen-warl alheyel*

<sup>1</sup> Rernem Amphipolis tawen-they Apollonia tawen-angkwarz arntarnpenhek Thessalonica tawen-warl apetyek. Tawen ikwerel Jew-rnem-kenh tyaty arrwekel artelhenh.

<sup>2</sup> Arta Saturday-el Paul tyaty ikwer-warl alhek. Saturday arrpanenhel wlik 3-ek-atwety, ra tyaty ikwer-warl alhenh Akngey-kenh angka arrwekeleny anayntitleyek, Jew-rnemek.

<sup>3</sup> Ra renh-rnem akalty-anthek Akngeyelarl arrwekel alhelek Jesus renh ahern nhewarl thwenetyek. Jesus rey-antey Akngey-kenh impen, Christ-an. Jesus ra irrwampemel ilwetyek, Ra itethirremel akemirreyen arrpemarl. Jesus Christ rarl arrwekel ilwek rarl angkep arrpemarl itethirremel akemirrek. Jesus innantey ipmepenit ethirremel akemirrek Akngey-kenh pip arrwekeleny aynteyel-angkwarz-antey. Akngey-kenh angka alakenh aynteyel, arrwekelenyel Akngey-kenh angka ingkwernek-angkwarz. <sup>4</sup> Jew ingwer-rnemel Akngey-kenh angka tnakek, Paul-atherre Silas-atherre-angkwarz antelhek, artwa Greece-areny iylpareth-rnem Paul-atherre-angkwarz antelhek, arelh atyetyart-rnem-then.

<sup>5</sup> Jew-rnem arkarirrek Paul ikwer-atherrety. Rernem-anem artwa apmwernem akarilek apmer-areny-rnem arwengkilek. Rernem-anem irrwernek, Jason-kenh apmer-warl alhek Paul Silas-atherre anterrkwetyek. <sup>6</sup> Ratherr Jason-kenh apmer-itwek aney-angenh. Alakenh-anyem rernem Jason renh anterrkwek, Jesus-arl apenteyel irrpety ingwer-rnem-then. Rernem-anem Paul-atherre atrwenhek, artwa ampwernem-warl ayntarrpillemel-anem ilek. "Paul-then Silas-then ratherr, apmer arrpanen-h-warl apetyek, apmwangkwarz ilpertileyek. Ikwer-penhan ratherr nhenh-warl-anem apetyek." <sup>7</sup> Jason-el renh-atherre arntarnt-arek. Rernem anwenhantherr ilek, 'Jesus Atyetyart ilkwaaneyel.' Alakenh rernem Atyetyart anwekantherrenh Caesar-ek irrpelthirreyel."

<sup>8</sup> Angka awek-penh, ingkerrehn anyentirrek, rernem ahelirrek-anem. <sup>9</sup> Artwa ampwernemel-anem Jason ilek, man ra anthenhey-alpetyek. Ikwer-penhan renh-rnem ileyek-anem tyarlewek.

### *Paul Silas-atherre Berea tawen-warl alheyel*

<sup>10</sup> Ingwa ikwerel-antey Jesus-arl apenteyel-rnemel Paul Silas-atherre Berea tawen-warl-anem thwenek. Berea ikwer-itwek ratherr Jew-rnem-kenh tyaty-warl alhek. <sup>11</sup> Jew Thessalonica tawen-areny-rnem arkarirrenh. Berea-areny-rnem iylpareth-rnem anen. Rernem inkwerelhek innga Paul-kenh angkek. Arta arrpanenhel Akngey-kenh pip arrwekeleny reytemilek, rernem aretyek Paul-el apek renh-rnem arraty-angkwarz akalty-anthetyek. <sup>12</sup> Jew akngerrel Jesus renh tnakek, arelh atyetyart Greece-areny Jesus renh tnakek arrpemarl Greece-areny artwernemel-then.

<sup>13</sup> Jew Thessalonica-areny akngerrel awek-penh Paul-el tawen Berea-itwek Akngey-kenh angka innga akalty-anthek, rernem Berea-warl-anem alhek. Rernem irrwernek. <sup>14</sup> Alakenh-anyem Jesus-arl apenteyel akngerrel Paul renh anamerl-antey thwenek ament kwaty alay-angkwarz arntarnpenhemel alpetyek ingwer-rnem-kety Silas Timothy-atherre apmer Berea-el-antey anen. <sup>15</sup> Artwa akngerr ingwer-rnem rernem Paul-atherre-angkwarz ilkwatherr alhek rernem renh Athens tawen-warl artengewek. Rernem alpey-angenh-antey, Paul-el renh-rnem ilek Silas-atherre anamerl ikwer-warl apey-alpetyek.

### *Paul alheyel Athens tawen-warl*

<sup>16</sup> Paul Silas ratherr Athens-itwek mpwelhenn ingkart-arrpanetey mpwarekarl akngerr, ranem ahelirremel arey-alhek. <sup>17</sup> Alakenh-anyem ra tyaty-itwek Jew akngerr-itwek angkerrehn Greece-areny-rnem-itwek, rernemal Akngey innga arraty iterl-arenh. Arta arrpanenhel apmer-areny-rnem-itwek angkerrehn, tawen ampep-itwek. <sup>18</sup> Artwa irrpety ingwer-rneman Epicurus ikwer kwertengerl anen, artwa irrpety ingwer-rneman Zeno-kenh kwertengerl anen. Paul-then artwa ingwer-rnem-then rernem

angkerrenh, "Artwa arwengk ilenhelan irrywerremel anwenhantherr ileyel. Ilekek ra anwenhantherr ilem?"

Irrepety ingwer-rneman alakenh angkek, "Ra ingwer-rnem-kenh Akngeyek angkeyel." Rernem alakenh angkek. Paul-el renh-rnem Jesus-kenh angka akalty-anthek, "Jesus ipmepenh akemirrekarl."

<sup>19</sup> Artwa rernem Paul renh akngerek Areopagus Council-warl. Rernem renh ayernek, "Ntwa apek anwenhantherr ilem angka renh ntwarl akngerr akalty-anthek?"

<sup>20</sup> Rernem ilkwerl-alhek, "Angka aleyantarl anwenhantherr awek." Rernem Paul renh ilek, "Lyertant anwantherr awek angka renh anwekantherr anayntila!"

<sup>21</sup> Athens-areny-rnem akngerr arlta arrpanhenhel angkek awelherlenty-akngengh, angka ingweram-ingwer ikwer-penh angkerretyek.

<sup>22</sup> Paul akemirrek Areopagus Council ilkwer-rnem-warl, rap angkek, "Artwa Athens-areny-rnemay, atha areyel arrantherr altyerr akngerr-akert aneyel." <sup>23</sup> Ayeng tawen-angkwarr alhenhel, athan arek altyerr-arrpantey ingwerek-ingwer arrekantherrenh. Anyent ingwerekant arrantherr ikwer akwerrp-antey aneyel. Akngey inngarrpantey arrantherr apentenpah apalel, arrantherr iterremel altyerr renh-arrpantey, iltylearl mpwarek gold-penh. Akngey innga ikwer-penh atha arrekantherr ileyek. <sup>24</sup> Akngey anyent innga ra alker-then ahern-then arrpmernek, arwerl-rnem-then atnwenth-rnem-then artwernem-then ingkerrenh-antey. Ranem ingkerrenhek Ingkart aneyel. Akngey warl iltylel mpwarekarl-itwel nthakenh aney-angen. <sup>25</sup> Akngey anyent innga ingwerel renh nthakenh iley-angen. Rant ingkerrenh itethilem renh-rnem amern-then anthem, ingkerrenh-antey. <sup>26</sup> Artwa anyent-they ingwerek-ingwer arrpmernek, ranem renh-rnem alperrytylek. Ra anyentel-anyentel apmer renh-rnem antheynek. Ra ikwer-rnem akalty apmer nthennh-ampenyel rernem aneyel, ilengerarl rernem ywerreyen. <sup>27</sup> Akngey ingkerrenhek anaytelhilek, rernem ikwer nthwetyek, renh iterl-aretyek. Akngey ra anwekantherr-itwek arrer aneyel. <sup>28</sup> 'Ra anwenhantherr iteth atnyenem, rlterriklem, arntarnt-aren.' Artwa anyentel ilek, 'Anwantherr alerikw ikwerenh akemirrek aneyel!'

<sup>29</sup> Anwantherr Akngey-kenh alerikw-rnem aneyel. Nthakenh iterrey-angen Akngey anwekantherrenh gold-penh thilp-penh mpwarey-angen, apwert-penh mpwarey-angen. <sup>30</sup> Awank-akerran alhenh ament-warl-tangkwel, Akngey iterl-arey-angen. Akngeyel renh-rnem menty atwey-angen arntarnt-aren. Aley-anem ra ilkelheyel ingkerrenh ikwer-warl-anem angkepirretyek. <sup>31</sup> Ra kel akalty arlta ikwerel-antey ra ingkerrenh-antey arraty innga akngakeyenh. Ra artwa anyent rlwanek, ingkerrenh-they akngakeyenh. Anwantherr akalty ra arraty innga anem, rarl artwa renh ipmepenh akemelhilekarl."

<sup>32</sup> Rernem awek-penh Akngeyel artwa anyent ipmepenh akemelhilek, ingwer-rnem atherrek, ikwer irrpelthirremel. Ingwer-rnemel Paul renh ilek, "Ingwer-ingeran anwantherr ngkweng awelhetyek arrpemarl." <sup>33</sup> Paul Areopagus Council-they alpekant-anem. <sup>34</sup> Artwa irrepetyl angka ikwerenh renh tnakek, kel renh ingkern-they apentek, alhek ikwer-angkwarr. Artwa anyent itnan Dionysius Areopagus Council-areny anen. Arelh anyentel itnan Damaris ingwerel-rnem-then Ingkart renh tnakek-anem.

## 18

*Paul alheylel tawen Corinth-warl*

<sup>1</sup> Paul tawen Athens-they anperl-alhek, tawen Corinth-warl alhek. <sup>2</sup> Corinth ikweritwek ra Jew anyent arek itnan ikwerenh. Aquila apmer Pontus-areny. Anew ikwerenh Priscilla. Ratherr apmer Italy-el anen, Rome tawen-itwek. Caesar Claudius-el. Jew-rnem ingkerrenh Rome-they irrentek. Ratherr Corinth-warl apetyek. Paul-anem ikweratherr-warl alhek. <sup>3</sup> Paul-el awek Aquila ra kalikw arnwarney-angker arrpemarl, ikwer-apeny. Paul anewart ikwer-atherr-itwek anen. Arlta arrpanhenhel Paul-atherr Aquila-atherr ratherr kalikw arnwarnenh.

<sup>4</sup> Arlta Saturday ikwerel ra tyaty-warl alhek Jew-rnem-then Greece-areny-rnem-then angkerretyek, rernem arraty-angkwarr apenterl-ayntetyek. <sup>5</sup> Silas Timothy-atherr ratherr apmer Macedonia-they apetyek. Ikwer-penhan Paul ran ipmelhek-anem, kalikw arnwarney-angenh-anem anen. Arlta arrpanhenhel Jew-rnem akalty-anthek. Ra renh-rnem ilek, "Jesus renhey-antey Akngeyel awank-akerr alhelek ahern nhenh-warl thwenetyek, ingkerrenh itethiletyek." <sup>6</sup> Jew-rnem Paul ikwer ahehirremel irrpelthirrenh. Paul-el ahern tertangkwelhilek arnkwa ikwerenh-they, renh-rnem ilek, "Akngayel arrenhantherr irrenteyen. Arrantherr atyeng awelhey-angenh-kety, atha arrenhantherr iwerl-alhemarl. Akngeyel arrenhantherr atweyen, arrantherr ayen

ayntarrp-iley-angenh anetyek? Lyert ayeng Jew-weny-rnem-warl alhetyek, atha ikwer-rnemekant-anem angka mwerr-angker ileyek.”

<sup>7</sup> Paul-anem alhek apmer ingwer-warl, Titius Justus-kenh-warl. Titius Justus-kenh apmer Jew-kenh tyaty akely-ampeny-itwek artelhekarl. Titius Justus Akngey ikwer inkwelrehen. <sup>8</sup> Artwa Crispus ra Jew-rnem-kenh tyaty-areny Atyetyart aneh, ikwerenh-rnem-then warrkenh ikwerenh-rnem-then, rernem Ingkart renh tnakenh. Corinth-areny-rnem akngerr rernem Paul renh awek-penh rernem renh tnakek-anem. Ikwer-penhan rernem baptise inek, ingkerrehel.

<sup>9</sup> Ingwa ingwerelan Paul-el altyerr arek, ranem awek Ingkartelarl renh ilek. “Paul-ay, aterirrey-angenh! Artewentyl renh-rnem akalty-antha! Akater nyerrirremel aney-angenh. Ayeng ngkweng-itwel aneyel. <sup>10</sup> Ingwer-rnemel ngenh nthakenh atwey-angenh aneyel. Akngerr ingwer-rneman atyenh-rnem nhel aneyel-antey, ngenh arntarnt-aretyek apmwernem-kety.” <sup>11</sup> Paul alkent 18-ek-atwety aneh, Corinth ikwer-itwek. Ra akngerr ingwer-rneman akalty-anthrenh.

<sup>12</sup> Gallio atyetyart Achaia-areny aneh. Jew-rnemel Paul renh anterrkwek, court-warlanem akngemel. Rernem renh ayntarrp-ilenty-arrpantey ilek, <sup>13</sup> “Ra angka Akngey-kenh-arrpantey anwenhantherr akalty-antheyel. Ra apmwel-areth akalty-antheyel anwantherr ikwerenh-angkwarr apenteteyek.”

<sup>14</sup> Paul angketyek irrek, Gallio retangkwel Jew-rnem ilek, “Jew-rnemay! Artwa nhel apek apmwel-areth akalty-antheyel. <sup>15</sup> Ayeng nthakenh atyetyart aney-angenh angka arrekantherrenh-angkwarran. Ayengan arlarl. Nthakenh ayeng arrkngert angkey-angenh. Arrantherrant arratyilerretyek.” <sup>16</sup> Kel ranem Jew-rnem court-they tyarlewek. <sup>17</sup> Court-they tyerrelhemel, rernem-anem artwa Sosthenes aketh-ampenyek atwek. Sosthenes ra atyetyart Jew-rnem-kenh tyaty akely-itwek aneh. Gallio ra menty renh arek.

### *Paul Antioch tawen-warl alpeyel*

<sup>18</sup> Paul ra aleth-antey Jesus-arl apenteyel-rnem-itwek aneh, apmer Corinth-itwek. Ranem alpek. Priscilla Aquilla alpek arrpemarl apmer Syria-warl. Cenchreae tawen-itwek Paul ra alta akelhek akapwert ikwer-they, Akngey ikwer inkwelhetyek, rarl renh mwerr arntarnt-arenh. <sup>19</sup> Ikwer-penhan rernem Ephesus tawen-warl apetyek. Paul-el Aquila-then Priscilla-then iwerl-alhek, ra anyent-anem alhek Jew-kenh tyaty akely-warl, rernem angkerrenh-warl. <sup>20</sup> Jew-rnemel renh ayernek, ra ikwer-rnem-itwek arleng-alenty anetyek. Ra ilkelhey-angenh ikwer-rnem-itwel anekerr. Ra arrkngert angkek. <sup>21</sup> Alhey-alentyel ra renh-rnem alhelek, “Ayeng arrekantherr-warl ngwelement apey-alpeyeh, Akngeyarl ilkelhem-angkwarr.” Ra rtnnewarl-anem nganerl-alhek.

<sup>22</sup> Caesarea tawen-warl irremel ra rtnwethey atwarremel Jerusalem-warl-anem anperirrek, tyaty-areny-rnem-itwek anetyek. Ikwer-penhan ra Antioch tawen-warlanem anperirrek. <sup>23</sup> Antioch-itwek aleth anenh-penh ra Galatia-warl Phrygia-warl-anem alhek kwertengerl-rnem rlterrilek.

### *Apollos-el apmer Ephesus-areny-rnem-then apmer Achaia-areny-rnem-then akalty-antheyel*

<sup>24</sup> Artwa Jew itnan Apollos ra Alexandria tawen-areny aneh. Apollos Ephesus tawen-warl apetyek. <sup>25</sup> Ra Akngey-kenh angka arrwekelenyek akalty aneh. Jesus-kenh angka iterl-arenh, angath-antey. Ranem aleny mwerr aneh, akalty-antheyangker, ingwer-rnem akalty-anthek. Rant iterl-arenh angath-antey John Baptise-emeley-angker-penhan, angka lyerteny iterl-arey-angenh-antey akertek-atwety. <sup>26</sup> Artwa ranem tyaty akely-itwek arnkatyel ingwer-rnem akalty-anthek. Priscilla Aquilla-atherr ratherr awek-penh ratherr renh apmer-warl-anem atnwenhek. Ratherr-anem renh artewentyl akalty-anthek, ratherr-anem ikwer Akngey-kenh angka anayntilek, akertek-atwety.

<sup>27-28</sup> Apollos ra iterrek anper-antey alhetyek. Jesus-arl apenteyel-rnem pip ikwer ingkwernek. Pip ikwerel rernem Achaia-areny-rnem Apollos-ek ra inkwelhemel anetyek. Apollos-then Jew-rnem-then iterrek Akngey-rnem-kenh angkethey. Rantey arrpemarl Akngey-kenh angka arrwekelenyek anayntilek, Jesus ra Christ inngarl aneyel. Ingkart-areny Akngey-kenh angkek inkwelhelik, arnkaty-anem. Akngeyel kelarl renh-rnem rlterrilek, rernem renh tnaketyek, arraty-angkwarr apenterl-aynteteyek.

<sup>1</sup> Apollos Corinth tawen-itwek anenharl-antey, Paul Ephesus tawen-warl apetyek, Jesus-arl apenteyel ingwer-rnem anen-h-warl. <sup>2</sup> Ranem renh-rnem ayernek, "Itnweng Rlwart arrekantherr-warl apetyek, arrantherr Jesus renh tnakenharl-warl?"

"Arrangkwawl!" rernem ikwer illehek. "Itnweng Rlwartan angwenharl?"

<sup>3</sup> Paul-el renh-rnem ayernek arrpemarl, "Angwenhel arrenhantherr baptise-emelek?"

Rernem ikwer illehek, "John-kenh kwertengerl-rnemel. Anwernantherr akaltyirrek John-angkwarrant."

<sup>4</sup> Paul-el renh-rnem ilek, "John-el anwenhantherr akalty-anthenh, Akngey-warl angkepirreyek. Rantey arrpemarl renh-rnem ilek, 'Artwa ran ingkern-they apetyem, arrantherr renh tnaketyek.'" <sup>5-7</sup> Paul-el renh-rnem ilekarl-penh, Paul-el 12 renh-rnem itna Jesus-angkwarr baptise-emelek. Ikwer-penhan iltya ikwer-rnem-kenh arrernek Itnweng Rlwart ikwer-rnem-warl antelhek. Rernem angka ingwerek-ingwer angkerrenh. Ikwer-penhan rernem Akngey-kenh angka anayntilek ingwer-rnemek.

<sup>8</sup> Paul alkent irrpetyek-atwety Jew-rnem-then angkerrenh, tawen Ephesus-itwek. Ra arnkatyel renh-rnem ilek, "Jesus Ingkart ingkerrenhek aneyel." <sup>9</sup> Jew ingwer-rneman ilkelhey-angnenhan Jesus-kenh angkek awelheyek. Irrpelthirrenh ingwer-rnem-itwek. Alakenh Paul Jew-rnem-kety amentirrek. Jesus-kenh kwertengerl-rnem alhek Tyrannus-kenh warl ilkwewarl. Arlta arrpanenhel ra akngerr ingwer-rnem akaltyiletyek. <sup>10</sup> Ra alakenh aherrety atherrel akalty-anthenh. Kel Asia-areny ingkerrenhel-anem Akngey-kenh angka awek, Jew-el-rnem-then apmer Greece-arenyel-rnem-then.

#### *Artwa Sceva-kenh alerikw-rneman*

<sup>11</sup> Akngeyel-anem Paul renh rlterrilek, ilek-ilek mpwaretyek. <sup>12</sup> Arntetyl Paul-kenh arnkwa arnep-arnenty, ra kel mwerrirremarl. Artwa ra apek arrenty-akertarl aneyel, itnweng ikwer-they ywerremarl.

<sup>13</sup> Jew irrpety apmer ingwer-rnem-warl alhenh, arrenty-akert-rnem mwerrilayntetyek. Jew-rnem arrkernelhek arrenty-akert-rnem mwerriletyek Jesus-kenh itna itnewemel. Rernem itnweng apmwernem alakenh ilek, Jesus ikwerenit nweng. Paul-el ingwer-rnem akalty-anthek angka Jesus-akert. "Itna ikwerenhel-antey atha arrenhantherr ilem tyerrelhetyek."

<sup>14</sup> Jew-rnem-kenh atyetyar tyaty-areny anyent anen, itnan ikwerenit Sceva. Artwa 7 alerikw ikwerenit-rnem. Artwa 7-pel renh-rnem irrkaty-angkwarr arrkernelhek, Jesus-kenh itnel itnweng apmwernem irrentetyek rlterr ikwerenit-akertel. <sup>15</sup> Arrenty-akert angkenh, "Athan Jesus-then Paul-then iterl-areyelarl. Angwenharl arrantherr?"

<sup>16</sup> Ikwer-penhan arrenty-akert-rnemel artwa 7-pel renh-rnem atwek. Artwa 7-pel warl-they tyerrelhemel aterel anterrek, arrkngwentemel anterrek, arnkeweny.

<sup>17</sup> Ephesus-areny-rnemel awek-penh Jew-rnem-then Greece-areny-rnem-then rernem-anem aterirrek ikwer-rnem-kety. Rernem Ingkart Jesus renh tnakek. <sup>18</sup> Ikwer-penhan Jesus-arl apenteyel ingwer-rnem illehek rernemarl apmwangkwarr apetenh. <sup>19</sup> Jesus-arl apenteyel ingwer-rnem illehek, "Anwernantherr arwengkeltharl mpwarenh." Rernem pip arwengkelth-akert akngetyek, rernem-anem ingkerrenhel-anem rwel arrtyek. Akngerr ingwer-rnemel arek. Pip arrwekel rernem man akngerrelarl payemelek. <sup>20</sup> Jesus-arl apenteyel ingwerel-rnem-anem akngerr ingwer-rnem akalty-anthek, Akngey-kenh rlterr-akertel angka arlpimp-anem ilek, angka ingwerek-ingwer-warl.

#### *Artwa Demetrius thilp mpwarey-angker*

<sup>21</sup> Ikwer-penh Paul iterrek Jerusalem-warl alhetyek apmer Macedonia-angkwarr Achaia-angkwarr. Ranem angkek, "Jerusalem-they atha apmer aretyek, Rome tawen."

<sup>22</sup> Paul-el Timothy-then Erastus-then Macedonia-warl arrwekel thwenek, ra apmer Asia-itwek anen-h-kety.

<sup>23</sup> Ephesus tawen-itwek rernem iterrek, atwerretyek irrek, Jesus-kenh angkethay.

<sup>24</sup> Artwa thilp mpwarey-angker tawen ikwer-itwek anen, itnan ikwerenit Demetrius. Ra tyaty akely thilp-penh mpwarenh. Artemis-kenh tyaty-apeny altyerr-arrpantey-kenh, rernem iylpangk-ayntetyek, ikwer inkwerelhemel, kwenirremel, alkenh-arrpantey Ra tharlemilek man akngerrek, artwa ingwerel-rnem-then. <sup>25</sup> Demetrius ranem artwernem anyentilemel ilek, "Artwernemay, arrantherr akalty anwantherr man ilkwa ineyel warl renh-rnem tharlemilenty. <sup>26</sup> Arantherr apek awek Paul-elarl ingwer-rnem ilpertilek apmer Asia-itwek, nhel Ephesus tawen-itwek-then. Ra renh-rnem ilek, 'Artwa ra altyerr mpwaretyek arrangkw. Altyerr-arrpantey iltyelarl mpwarekarl arrangkwarl, inngewenyarl, arrangkwarl.' <sup>27</sup> Paul-elarl akalty-anthayel-rnem rernem anwekantherr irrpeltherreyen h apmwangkwarr. Aray, lyert-anem apmer Asia-areny-rnem apmer arrpanen-itwek rernem Artemis ikwer inkwerelhelye."

Paul-el renh-rnem ilek, "Artemis Akngey-wenyarl inngewenyarl, arrangkwarl."

<sup>28</sup> Awekarl-penhan artwa ingwer-rnem ahelirrek. Rernem arlek, "Artemis Ephesus-areny-rnem-kenh Akngey innga aneyenh." <sup>29</sup> Ingkerrenh-anem tawen ikwerel-anem ilterrek. Gaius Aristarchus-atherr anterrkwek aketh-itwek anyentilek. Gaius-atherr Macedonia-areny-atherr Paul-angkwarr ilkawatherr alhek apmer-they.

<sup>30</sup> Paul-anem ilkelhek ikwer-rnem-warl alhetyek ikwer-rnem-warl angketyek. Kwertengerl-rnem ikwer arrkngert angkek, <sup>31</sup> Apmer-areny artwamp irrpety Paul-kenh-anem anenh. Rernem ikwer-warl angka thwenek ikwer arrkngert angketyek, akngerr-keny, atwekerr.

<sup>32</sup> Ephesus-areny-rnem akarrikrek, angkerretyek. Rernem-anem apatemel arlek.

<sup>33</sup> Jew-rnemel Alexander arrwekel-warl rnernekk, arrwekel-ampeny-itwek rtneyek akngerr-itwek. Ingwer-rnem aleth-antey arlkenh, "Artemis Ephesus-areny-kenh altyerr inngan." Alexander ikwer-rnem angkek akaterirretyek, ra ikwer-rnem-warl angketyek.

<sup>34</sup> Ingwer-rnemel renh alhengk-arek ra Jew anenarl. Rernem aleth-antey ikwer arlkenh, "Artemis Ephesus-areny-kenh altyerr!"

<sup>35</sup> Ikwer-penhan tawen-areny atyetyartel-anem akngerr akatelhilek, "Artwa Ephesus-areny-rnemay! Anantherr ingkerrenh akalty Artemis-kenh tyat arraty arntarn-areyel. Anantherr apwert aknganenty ikweren alker-theyarl aytnek arraty arntarn-aretyek. Paul arlkarirrek, rernem altyerr anyent ikweren apentetyek, rernemarl arnwarnek. <sup>36</sup> Nhenh innga aneyel, arrantherr arternp awelhetyek, arrkngert angkey-angen. <sup>37</sup> Arrantherr artwa yanh-rnem apalel anterrkwelel atwenehey-alhek nhenh-warl. Rernem arrangkwarl, Rernem arlarl ampwal ilenhek, Artemis ikwer irrpelthirrey-angenarl. Rernem man anyelkel iney-angen tyat ilenhenh-rnem-they.

<sup>38</sup> Demetrius thilp mpwarey-angler artwa rernem renh-rnem ayntarrp-iletyek. Artwa court-areny kel aneyel, rernem ikwer ilehetyek. Rernem renh-rnem court-warl atwenehey-alhemer, court-itwek ayntarrp-ilemel iletyek. <sup>39</sup> Angka ingwer arrantherr iterl-areyel kel arrantherr arratyilerretyek. <sup>40</sup> Roman kapmentel ikwer-penhl awayen anwantherr angkewarl irreyen anwantherr apalel arlek-penhl."

<sup>41</sup> Alakenh angkek-penhl ra renh-rnem ilek, "Kel arrantherr arlperryirremel alpenherr-arey!"

## 20

*Paul apmer Macedonia-warl alheyel, apmer Greece-warl alheyel*

<sup>1</sup> Ephesus-areny-rnem arternp anenh. Paul-el kwertengerl ikweren-hrnem yangkel-hek. Ranem ikwer-rnem mwerr ilek, renh-rnem rlterrkiletyek. Ikwer-penhan ra anperl-alhek Macedonia-warl. <sup>2</sup> Ranem Macedonia-warl artarnpenhek, Jesus-arl apenteyel-rnem rlterrkiletyek. Ikwer-penhl ra apmer Greece-warl alhek. <sup>3</sup> Ranem alkent irrpetyel ikwer-itwek anenh. Paul ra apmer Syria-warl alhetyek-anem irrek, rap awek Jew-rnemarl ikwer angkerreyn renh ipmek atwetyek. Alakenhaym-they ra angkep-antey Macedonia-warl alpek. <sup>4</sup> Artwa ingwer-rnem Paul-angkwarr alhek, Sopater, Pyrrhus-kenh alerikw, Berea tawen-areny anenh. Aristarchus, Secundus Thessalonica-areny Gaius, Derbe tawen-areny Timothy. Apmer Asia-areny-atherr Tychicus, Trophimus. <sup>5</sup> Artwa nhenh-rnem arrwekel alhek Troas tawen-warl. Troas ikwerel rernem anwekantherr mpwelhenn. <sup>6</sup> Paul-akerr anwantherr Philippi tawen-warl alhek. Anantherr tyenkerr amern ilperr-ilperr thwet-weny renh arlkwek, Akngey-kenh-angkwarr. Arlta 5-penhl, kel anwantherr apmer Troas ikwerel aney-alhek-anem, arlta 7-ek-atwety.

*Eutychus ipmepenhl akemirreyel apmer Troas-itwek*

<sup>7</sup> Saturday ingwel anwantherr anyentirrek amern tyenkerr arlkwetyek. Paul-el-anem renh-rnem akalty-anthek, ingwa ampepek-atwety akalty-anthek, ingwepenh ra alhey-akenh. <sup>8</sup> Warl irrwerl-ampenyel anwantherr anyentirrek lyenenty impen-rnem-itwek. <sup>9</sup> Eutychus ra iwerr tyetel anenh, room irrwerl-ampenyel. Ankwel-anem renh atwek. Paul-el aleth-antey angka ilenh ra ankwayntenh. Ra irrwerl-they aytnerl-arrernek, ilwemel-anem. Arek-anem ingwerl-rnem ipmanem.

<sup>10</sup> Paul ranem artwa renh atnarnpemel anterrkwek. Ra renh-rnem ilek, "Aterirrey-angen anenherr-arey, ran iteth aneyell" <sup>11</sup> Paul ranem warl ikwerel aylpekk. Amern-anem arlkwemel-anem. Paul-el renh-rnem akalty-anthek ingwepenhak-atwety. Ikwer-penhan ra alhek-anem. <sup>12</sup> Jesus-arl apenteyel-rnem artwa anthety renh apmer ikweren-warl renh akngeynek. Rernem ingkerrenh inkwerelhek.

*Paul Miletus tawen-warl alheyel*

<sup>13</sup> Rtnnewarl nganerl-alhemel anwantherr-tangkwel Paul renh iwerl-alhek, Assos tawen-warl artarnpenhek, Paul ra ilkelhek Assos tawen-warl ament alhetyek ingketyel. <sup>14</sup> Ingwer-ingeran, anwantherr renh rlwatek Assos tawen-itwek kel anwantherr renh rtnnewarl-anem tywenerl-alhek. Ingkerrenh-antey-anem renh Mitylene-warl-anem artarnpenhek. <sup>15</sup> Arla ingwerelan anwantherr kel apmer Chios-itwek arey-alhek. Ikwer-penhan arla ingwerelan apmer Samos-el-anem. Ikwer-penhan arla ingwerelanem Miletus tawen-el aney-alhek. <sup>16</sup> Paul ra arralty-anek Jerusalem-warl anhetyek Pentecost tyenkerr rernem arlkwetyek. Alakenh-aneyem ra ilkelhek ahern Asia-angkwarr anper-antey alhetyek, apmer Ephesus-itwek aney-angenh.

*Paul ilelheyel ingkart Ephesus-areny-rnemek*

<sup>17</sup> Paul-el-anem Miletus-they angka thwenek, Ephesus tyaty-areny-rnem-warl arntarnt-arey-angker-rnem-warl-then, rernem ikwer-warl apetyetyek. <sup>18</sup> Rernem kel ikwer-warl apetyek, ra renh-rnem ilek, "Arrantherr kel akalty, ayengarl anenhel ahern Asia ikwerel, atha arraty-angkwarr innga apenten. <sup>19</sup> Ayeng tnakelhey-angenh atha arrenhantherr Ingkart-kenh angka akalty-anthek. Jew-rnemel ayenh aytarrp-ilek-kety, ayeng amperrngirrek-anem, artnemel-anem. Ayeng ipmelhey-angenh intem-antey warkirrenh. <sup>20</sup> Atha Akngey-kenh angka anyelkel atnyeney-angenh arrekantherretty. Atha arrenhantherr akalty-anthek akertek-atwety, arraty innga akethek, aknggerel aretyek, apmer arrekantherrenh-itwek. <sup>21</sup> Atha Jew-rnemek Greek-rnemek angka arraty innga ilek, ingkerrenh Akngey-warl angkepiretyek, Ingkart anwekantherrenh Jesus tnaketyek.

<sup>22</sup> Akngey-kenh Itnwengel ayenh thwenek Jerusalem-warl alhetyek. Ayeng alhenty nthakenh irretiyek ayeng apmer ikwrel? <sup>23</sup> Akngey-kenh Itnwengel ayenh ilek, ayengarl tawen arrpanenhel alhek, ingwer-rnem atyeng irrpelthirreyel-rnemel ayenh tyayl-warl akwerneyen rernem, ayenh atweyen. <sup>24</sup> Ayeng ikwer-rnem-kety aterirrey-angenh, ayeng ikwer-rnem-warl alhem. Warrk atyenh atha arraty ywerrelhiletyek. Jesus-el ayenh thwenek Akngey-kenh angka arraty akalty-anthetyek, anayntileyek, Akngeyelar anwenhantherr mwerr arntarnt-areyel.

<sup>25</sup> Atha arrenhantherr akalty-anthek, Jesus Ingkart anyent rarl anwekantherrenh aneyel. Ayengarl intem-antey-anem alpem, ingwer-ingeran arrantherr ayenh arnarey-angenh-anem. <sup>26-27</sup> Ayeng arrekantherr ilelhem, arrantherr apmwangkwarr apentyent, ngkwenh-angkwarrarl, ayengan arlarl. Atha arrenhantherr Akngey-kenh angka ingkerrenh-antey arratty akalty-anthekarl. <sup>28</sup> Arrantherr-anem mwantyel arntarnt-arelyek, Itnweng Rlwartel arrernekk-angkwarr-antey, renh-rnem arntarnt-aretyek, Akngey-kenh tyaty-areny-rnem aleth-antey arntarnt-aray! Akngeyel alerikw ikweren hthwenek katy ilwetyek ingkerrenhek, renh-rnem anyentelhiletyek. <sup>29</sup> Ayeng akalty ayengarl alpemarl-kety artwa apmwernem arrekantherr-warl apetyeyen rernem tyaty-areny-rnem ilpertelhileyen, arengk artnwerl yep-yep-rnem tnhwemel ilpertelhilem-apeny. <sup>30</sup> Arntarnt-arey-angker irrpetyek ingwer-rnem apmwangkwarr akalty-anthey-angker rernem arrenhantherr apal-apal akalty-antheyen. Rernem ilkelheyel arrantherr ikwer-rnemant awelhetyek. <sup>31</sup> Aray, atha arrenhantherr akalty-anthek aherretty irrpetyek-atwety, artewentyel amperrngirrek artnemel Arrantherr mwantyel arntarnt-arelyek!

<sup>32</sup> Lyert ayeng Akngey-warl angkem, arrenhantherr arntarnt-aretyek, ra arrekantherr inkwerelhetyek, ranem arrenhantherr rlterrkietyek angka ikweren-hangkwarr. Ikwer-penhan arrantherr-anem Akngey-kenh apmer-warl alpeyehn, mwerr ingwer-rnem-then. <sup>33</sup> Ayeng manek arnkwek iterrey-angenh. <sup>34</sup> Mwerr arrantherr akalty innganem ayengan ampwal ingkerrenhek warrkirrey-angker, amern-rnem-then arnkwernem-then mpwarey-angker. Akngerr ingwer-rnem atha alakenhey wantek. <sup>35</sup> Arrantherr ayenh apentyetyek. Alakenh atha arrenhantherr akalty-anthek, Ingkart-areny ingwer-rnem-anemarl arntarnt-aretyek irrkaty-angkwarrarl. Ingkart Jesus-el akalty-anthek, 'Ampwal ayerrpiley-angenh ingwer-rnem alhewer anthetyek, arrantherrap irrkngerneyarl intem-antey aneman.' Alakenh ikweren-hangkwarran."

<sup>36</sup> Ikwer-penhan, Paul Ingkart-areny ingwer-rnem-rnem ampwethel alernalhemel, Akngey-warl angkek. <sup>37</sup> Rernem ingkerrenh amperrngirrek ikwer, rernem renh atnyenek, arrwantyemel. <sup>38</sup> Rernem amperrngirrek, rarl intem-antey ikwer-rnem-kety alpeyehnhek. Ikwer-penhan rernem ikwer-angkwarr anperl-alhek rtnnewarl-anem.

<sup>1</sup> Renh-rnem iwerl-alhek, anwantherr rtnwewarl nganerl-alhek apmer Cos-warl artarnpenhemel. Ikwer-theyan arla ingwerel apmer Rhodes-warl anper-alhek. Ikwer-theyan anwantherr Patara tawen-warl alhek. <sup>2</sup> Patara tawen ikwer-itwek rtnwa ingwer arey-alhek Phoenicia-warl alhetyek irrenharl. Anantherr rtnwa ikwer-warl nganek, apmer ikwer-warl-anem alhek.

<sup>3</sup> Apmer Cyprus renh arey-alhek anwantherr alhek apmer Syria-warl. Anantherr tawen Tyre-itwek aney-alhek. Tawen ikwer-warl rtnwa apetyek, ampwal akngerr-akert. <sup>4</sup> Kwertengerl tawen-areny anwantherr arey-alhek. Akngey-kenh Itnwengel renh-rnem ilek, Paul renh ileyetek, Jerusalem-warl alhey-angenh anetyek. Alakenh-anyem rernem Paul renh iley-ayntek. Anwantherr ikwer-rnem-itwek aney-alhek, arla 7-ek-atwety. <sup>5</sup> Ikwer-penh anwantherr anperl-alhek arrpemarl. Kwertengerl rernem-anem anwekantherr-angkwarr rtnwewarl apetyek anew ikwer-rnem-kenh-then ampernem-them. Anwantherr ingkerreh-antey ampwethel alernelhemel Akngey ayernek kwaty impalh ikwer-itwek. <sup>6</sup> Ikwer-penhan anwantherr renh-rnem iwerl-alhek rtnwel nganerl-alhem. Kel rernem angkep alpek apmer-warl.

<sup>7</sup> Tyre tawen-they anwantherr kel anperl-alhek apmer Ptolemaiis ikwer-warl. Anwantherr arla anyentel ikwer-rnem-itwek aney-alhek. <sup>8</sup> Arla ingwerel anwantherr Caesarea tawen ikwer-warl-anem anperl-alhek. Artwa Philip artwa angka mwerr-angker akalty-anthey-angker tawen Caesarea-itwek anenh-warl. Tyaty-areny-rnemel renh rlwanek arrwekel artwa 6 ingwer-then, rernem amernel renh-rnem wantetyek. Anwantherr ikwer-itwek anenh. <sup>9</sup> Philip ikwerenah aleyak-rnem 4-pel anenh. Alerikw rernem Akngey-kenh angka akaltyil enhen.

<sup>10</sup> Anantherr kel Caesarea ikwer-itwek anek, arla irrpety-inger. Akngey-kenh angkakert-rnem apmer Judea-they apetyek. Angkakert ikwerenah itnan Agabus. <sup>11</sup> Agabus ra Paul-kenh pilt lhelhek, ra akwarleny atherr arerntelhek, arlaw atherr arerntelhek. Ranem anwenhantherr ilek, "Akngey-kenh Itnwengel ilek, artwa Jerusalem-arenyel-rnem piltek-artwey renh arerntemel artwa ingwer-rnem anthetyek." <sup>12</sup> Renh awekarl, anwantherr Paul-ek arrkngert angkek Jerusalem-warl alhey-angenh anetyek. Apmer-areny-rnem-them ikwer arrkngert angkek.

<sup>13</sup> Paul-el anwenhantherr ilek, "Arrantherr artney-angenh anenherr-arey." Ayeng ilwetyekan atyeng arrer arrpemarl.

<sup>14</sup> Anwernantherr ywarn-antey Paul ikwer arrkernelhek, renh anterkwetyek Jerusalem-warl alhekerr. Kel anwantherr renh tyarlewek, "Kel alha, Ingkartel ngenh ilek-angkwarr."

<sup>15</sup> Ikwer-penhan anwantherr arnkwerpem anwekantherrenh ataperrelek Jerusalem-warl-anem alhey-alenty. <sup>16</sup> Kwertengerl irrpety anwekantherr-angkwarr alhek arrpemarl Jerusalem-warl, rernem Mnason-kenh warl-warl atnwenhek anwantherr ikwer-itwek anetyek. Mnason ra Cyprus-itwek arrwekel-antey Jesus renh tnakek.

### *Paul alheyel, ra James renh aretyek*

<sup>17</sup> Anwenhantherr arnarem, ingkart Jerusalem-areny-rnem anwekantherr inkwerel-hek. <sup>18</sup> Arla ingwerel Paul-akerr anwantherr James-anem aretyek alhek. Tyaty-areny-rnem arntarnt-arey-angker ingwer-rnem-them James-itwek anenharl. <sup>19</sup> Paul-el ilek ikwer-rnem Akngey-kenh angka mwerr-angker akalty-anthenh Akngeyel-anem Jew-weny-rnem Jesus-warl atnwenhetek ikwerenah-angkwarr. <sup>20</sup> Angka awemel, James-kenh-rnemel Akngey tnakek. Rernem-anem Paul ilek, "Jerusalem-itwek Jew-rnemel Jesus renh tnakeyel-anem. Rernem Moses-kenh angkek awelheyel-antey. <sup>21</sup> Rernem awek ingwerel apmer arrpanenhel ilek, Jew-rnemelar Moses-kenh angka ipmek. Rernem awey ikwer-rnem-kenh artwa mpwarey-angenh-antey. <sup>22</sup> Rernem awenty, nthakenh apmer nhenh-itwek irreyehan? Nga apetyentel ntwarl Moses-kenh angka ilperteilek-penh. Nthakenh-anem nga irreman? Rernem apek ngenh atweyehn. <sup>23</sup> Nga anwekantherr awelheyek. Artwa 4-pel nherneman anwekantherr-itwek aneyel, rernem Akngey alhelek, ngkwarl antywey-angenh anetyek, altethen akelhemel. <sup>24</sup> Nga artwa nhernem-angkwarr tyaty ilkewarl alha, Ikwer-penhan arrantherr atyetyart tyaty-areny-warl ilelhey-alhemel, Akngey-anem tyenkerr anthenherr-arey. Artwa alta akelhetyel nga Moses-kenh angka apentyel-antey ipmey-angenh-antey.

<sup>25</sup> Jew-weny-rnem ngenharl akalty-anthek-rnemel rernem Jesus renh tnakeyel. Anantherr kel pip ikwer-rnem-warl thwenek, rernem Akngey-kenh angka arraty-angkwarr apenterl-ayntetyek. Nthakenh rernem amern-then aker-then arlkwey-angenh akalty-anthenh-anthenh irrtywerrey-angker-rnem-kenh. Rernem arrknnga antywey-angenh aker arrngakert antywey-angenh anetyek, rernem ingwer-kenh anew ikngwey-angenh anetyek."

<sup>26</sup> Arlta ingwerelan artwa 4-pel ikwer-rnem-angkwarz Akngey-kenh warl ilkwewarl alhek lhewelhetyek, Moses-kenh-angkwarz. Rantey arrpemarl alhek atyetyart tyaty-areny inetyek, rernem Akngey tyenkerr anthetyek. Rernem alhek atyetyart tyaty-areny, ileyek ilengerek-atwety rernem tyenkerr Akngey anthetyek.

#### *Rernem Paul renh anterrkweyel*

<sup>27</sup> Arlta 6-penh, Jew Asia-areny irrpety rernem Paul tyaty ilkwitwek arek. Rernem Paul renh anterrkwek. Akngerr ingwer-rnem Paul-they ahelirrek. <sup>28</sup> "Artwa Israel-kenh-rnemay! Artwa nhenhey ra, apmer arpanen-hwarl Moses-kenh angka apmwangkwarz ilerl-apeyel, apmwangkwarz ileyl warl nhenhek Paul-el Jew-weny-rnem atnwenhek Jew-kenh tyaty ilkwewarl, nthakenh alhey-angenh-warl." <sup>29</sup> Rernem Trophimus arek, Paul-angkwarz anerl-alhenh, Paul-el tyaty ilkwa amek-amek-warl atnwenhenty-arrpantey rernem ayntarr-ilek. Trophimus ra Ephesus tawen-areny anen.

<sup>30</sup> Tawen-areny akngerr ahelirrek. Rernemap Jew-rnem-kenh tyaty ilkwewarl anterrekan. Rernem apatemu arlkahelirrenh. Paul-anem rernem anterrkwek, tyaty ilkwethey aketh-warl-anem iytarr-akngek. Kel keyt-anem martek. <sup>31</sup> Akngerr rernem renh ipmek atwetyek-arrpantey iytarr-akngek. Ingwerl Rome-areny ahelengkw atyetyart renh ilek, "Jerusalem-areny-rnem ahel atwerreyel!" <sup>32</sup> Ahelelgkw-rnemek yangkelhek, ra renh-rnem artweriletyek irlkent-akert. Ahelelgkw-rnem rernem arnarek apetyenharl, rernem Paul renh atwety-angenh-anem, menty arek.

<sup>33</sup> Atyetyartel ahelelgkw-rnem irrpety thweneh, rernem Paul renh anterrkwek, rernem renh tyeyn atherrel arerntetyek. Ranem renh-rnem ayernek, "Artwa angwen-harlap ran nhenhey? Apmwel-areth apek mpwarek? Nthakenharl ran irrek wenh? Ilek-they arrantherr atwetyek renh?" <sup>34</sup> Artwamp ranem renh-rnem ywarn-antey awelhek, akngerr rernem ingkerrenh artewentyel arlkahelirrekarl. Alakenh-anyem ra ahelelgkw ikweren-hnem ilanthek, rernem Paul ahelelgkw-rnem-kenh tyayl-warl renh akngeynetyk. <sup>35</sup> Rernem renh irrwerlap-aylpwer-akngek tyayl-warl, ingwerl-rnem renh atwekkerr. <sup>36</sup> Akngerr ingwer-rneman arlkerl-apenh, "Renh ipmek atwenherr-arey!"

#### *Paul ilelheyel ikwer-rnem*

<sup>37</sup> Rernem Paul renh ahelelgkw-kenh apmer-warl akngeynek, Paul-el ahelelgkw atyetyart renh ayernek, "Mwerr ayeng ngkweng-warl angkem?" Atyetyart renh ywemek. Rap tyernek, "Angka Greek ngan angkeyel. <sup>38</sup> Atha ngenh iterl-areyel, ngan Egypt-areny, ntwarl apmwerrikel ingkerrenh irrwernek, aha pweytilek. Nga yerlirrek irlkent-akert artwa 4,000 ahern arlpaw-warl, ahel atwerretyek."

<sup>39</sup> Paul ilelhek, "Arrangkw, ayeng artwa Jew-arl aneyel, tawen Tarsus-areny, tawen ilkwa apmer Cilicia-itwel. Ntwa apek ayen tyarlewem, ayeng ilelhetyek artwa nhenh-rnem-warl?"

<sup>40</sup> Artwamp ra angkek, "Kel, angka!"

Paul-anem ikwer-rnem angkek, "Arrantherr akatemel awelhenherr-arey atyeng!" Rernem kel akatek, Paul ranem Hebrew angkel ilelhek ikwer-rnem-warl.

## 22

<sup>1</sup> "Artwamp atyenh-rnemay! Atyeng-tangkwel awelhenherr-arey, ayeng ilelhetyek!"

<sup>2</sup> Akngerr rernem akater ikwer awelhek. Paul-anem ikwer-rnem ilelhek Hebrew-kenh angkel, <sup>3</sup> "Ayengan artwa Jew-arl. Ayeng ampa akely ilkwerrek. Tarsus tawen-itwek, apmer Cilicia-itwek. Ikwer-penhan ayeng Jerusalem-itwek ilkwerrek. Aler-lantey ayeng Gamaliel-angkwarz akaltyirrek. Ra ayen ikweren-angkwarz ingkerrenh arraty innga akalty-anthek, ayeng Akngey-kenh-angkwarz arraty awelhek, arrantherr Akngayek awelheyel-apeny. <sup>4</sup> Athanem ingwer-rnem ipmek atwek, rernemarl Jesus apenteh, ingwer-rnem atha tyayl-warlarl akwernek. <sup>5</sup> Atyetyart ra akalty aneh, Sanhedrin Council-rnem-then, rernemarl pip anthek, Jew-rnemek, Damascus-el. Ayeng-anem Damascus-warl alhek, Ingkart-areny-rnem tyeynel arerntetyek, Jerusalem-warl akngeynetyk, ahelelgkw-rnemel renh-rnem atwetyek.

<sup>6</sup> Ayeng Damascus-warl arrer-anem irrek, lyenenty ilkwel ayen arrtyernek alker-they.

<sup>7</sup> Ayeng-anem ahern-warl aynek. Athanem awek atyengarl yangkelhek. 'Saul-ay, Saul-ay, Ilek ntwa ayen alwerneyel atwetyek ngay?'

<sup>8</sup> Athanem renh ayernek, 'Ingkart, angwenharl ngan?' Ra ayen ilek, 'Ayengarl Jesus Nazareth-arenyarl aneyel. Ntwa atyenh-rnem ipmek atwetyek alwerneyel.' <sup>9</sup> Artwa rernem atyeng-angkwarz alhek-rnem rernem kel lyenenty renh arek, rernem Jesus renh awey-angenharl rarl anwekantherr angkek. <sup>10</sup> Athanem Jesus renh ayernek, 'Ingkartay,

ilek nga ilkelheyelan?" Ranem ayenh ilek, 'Kel, akemirray! Artwa anyent arey-alpa, Damascus tawen-itwek, ranem ngkweng ileyenh, nthakenharl nga irreyenhan.'<sup>11</sup> Lyenenty ilkwel ayenh aparrngilek. Alakenh-anyem artwa atyeng-angkwarr apetyek-rnemel ayenh atnwenheynek Damascus-warl.

<sup>12</sup> Damascus-itwek artwa Ananias anenh, ra Moses-kenh angkek awelhek. Jew apmer ilenh-areny-rnemel renh iterl-arenh, ra artwa mwerrarl.<sup>13</sup> Ananias ranem anwekantherr-warl apetyek. Ra anwekantherr-itwek rtnek, ayenh ilek arrpemarl, 'Saul-ay atyenyay! Ntwa areyenh arrpemarl!' Athanem renh innga arek.<sup>14</sup> Ananias-el-anem ayenh ilek, 'Arrwekele nyanywakantherrenh-rnem-tangkwel Akngey apenten, rey-antey ngenh-anem rlwanek, ikwer warrkirretyek. Rantey arrpemarl ngenh arrwekel rlwanek, artwa arraty impen renh ntwa aretyek awetyek-then.'<sup>15</sup> Ntwa ingkerrenhek iletyek ntwa arekarl, awekarl.<sup>16</sup> Aleth-antey annangelhey-angen. Kel, akemirra! Kwenirremel ilelha, apmwa ngkwengetye iwetyek. Atha ngenh baptise-emelem. Akngeyel apmwan ngkwengetye iwem.'

#### *Ingkartel Paul renh thweneyel arleng-areny Jew-weny-rnem-warl*

<sup>17</sup> "Ikwer-penhan ayeng Jerusalem-warl alpek. Arta ingwerel ayeng tyat tyat ilkwewarl alhek, Akngey-warl angketyek. Athanem altyerr arek.<sup>18</sup> Athanem Ingkart arek, rantej arrpemarl ayenh ilek, 'Kel, nga anamerl alpetyek apmer Jerusalem-they, angka atyenthalr ntwa ileyelek, artwa tawen Jerusalem-areny-rnem ngkwengetye arkarirreyl.'

<sup>19</sup> Ayeng ikwer-warl ilelhek, 'Ingkartay, rernem akaltyarl ayeng tyat anyentam-anten-warl alhenh. Rernem akalty, atha Ingkart-areny tyaylek akwernen, renh-rnem-then atwenh.<sup>20</sup> Rernem akalty arrpemarl atha arternpel arenh, rernemarl Stephen renh ipmek atwek. Stephen irrkaty renh rarl akngerrek arraty Akngey-kenh angka ilerl-apenh. Ayeng inkwerelhek rernemarl renh ipmek atwek. Athan aytarek arrpemarl. Atha arnkwer nem ahelengkw-rnem-kenh arntarnt-arek.'<sup>21</sup> Ingkartel ayenh ilek, 'Kelanem alha, atha ngenh thwenem apmer arpanen-h-warl nga alhetyek, arleng-areny-rnem-warl, Jew-weny-rnem-warl.'

*Rome-areny atyetyart ilkelheyel, Paul renh whip-el atwetyek. Paul ikwer ilelheyel ra Rome-areny inngan*

<sup>22</sup> Akngerrel-anem awek angka ikwerenhey. Ikwer-penhan rernem arlek-anem, "Kel, renh ipmek atwa! Ran artwa apmwarl!"<sup>23</sup> Rernem aleth-antey arlkenh. Arnkwa aylernenh, ahern-anem iwemel alker-warl-atek.<sup>24</sup> Atyetyartel ahelengkw-rnem ilanthek, warl riterrk ikweren-h-warl akngetyetyek. Ikwer-penhan ahelengkw-rnem ilanthek, Paul renh whip-el atwetyek. Ra renh-rnem ilanthek, Paul renh ayernetek, "Ilek-kety ngkweng Jew-rnem arkarirreyl?"<sup>25</sup> Rernem renh arwerl temp-warl arertnek whip-el atwetye-ality. Paul-el Atyetyart renh ayernek, "Arraty-weny ntwa Rome-areny atwetyek. Ayenh court-warl-tangkwel akngemer! Arraty-wenyarl alakenhey wenh!"

<sup>26</sup> Angka awek-penh atyetyart ra artwamp-warl alhemel, renh ilek, "Atha ywarn-antey renh whip-el atwem! Ran ilelheyel ra Rome-areny aneyel."

<sup>27</sup> Atyetyart ra alhek Paul-warl. Ra ayernek, "Ngan Rome-arenyarl?"

Paul-el renh tyernek, "Ya, ayeng apmer ikwer-arenyarl."

<sup>28</sup> Atyetyartel renh ilek, "Atha kapment man akngerr payemelek, Rome-areny anetyek."

Paul ikwer ilelhek, "Ayengan Rome-areny-kenh arrwekel ilkwerrekarl."

<sup>29</sup> Atyetyart-rnemel Paul renh atwetyek irrek, rernem-anem anamerl-antey angkepir-reynek. Atyetyart ra aterirrek innga, ra Rome-areny tyeynel arertnekerr.

#### *Paul Sanhedrin Council-rnemek ilelheyel*

<sup>30</sup> Arta ingwerelan Atyetyart ra Sanhedrin Council-ek-artwey-rnem yangkelhek, rernem angkerretyek. Ra ilkelhek arraty innga awetyek, "Ilek-kety arranther Paul-kety arkarirreyl?" Ra ahelengkw-rnem ilanthek tyeyn Paul-they lheleyteky. Ikwer-penhan Sanhedrin Council-rnem anyentilek. Atyetyartel Paul-anem arrernek, ikwer-rnem-itwek angetherr rtneyek.

## 23

<sup>1</sup> Paul-el-anem Sanhedrin Council-areny-rnem arek, artewentyel arlkemel, "Atyen-hrnem, ayeng Akngeyek arraty innga awelhen."

<sup>2</sup> Artwa irrpety Paul-itwek rtnek. Atyetyart Ananias-el renh-rnem ilanthek, Paul renh arrakert atwetyek. <sup>3</sup> Paul-el-anem Atyetyart ilkwa ilek, "Akngeyel ngenh atweyehn, ngan artwa irrywerrey-angker, Moses-kenh-angkwarr apentyey-angenhan, ntwarl artwernem ilanthek ayenh atwetyek."

<sup>4</sup> Rernem-anem Paul renh ilek, "Ntwa nyerrirremel iley-angenh! Nga Akngey-kenh tyaty atyetyart ilkwek apmwel-areth angkeyel!"

<sup>5</sup> Paul ilelhek, "Atyenh-rnemay, atha renh ywemek, alhengk-arey-angenh! Atyetyart ikwer Akngey-kenh angka aynteyel, atyetyartek apmwel-areth angkey-angenh."

<sup>6</sup> Paul-el artwa renh-rnem iterl-arek, rernem Sadducee-rnem-then artwa Pharisee-rnem-then. Paul ilelhek, "Ayeng artwa Pharisee. Akngey atyenh artwa Pharisee arrpemarl. Ingwer-rnem ayejh awtweyek ilkelheyel, atharl Akngey renh tnakeyel-kety, ra ipmepenl akwentalhiley-angker."

<sup>7</sup> Sadducee-rnem-then Pharisee-rnem-then rernem awek-penh, rernem ilterrek-anem.

<sup>8</sup> Artwa Sadducee-rnemel akalty-anthenh ingwer-rnem ipmepenl nthakenh akemirrey-angenh, angel-rnem aney-angenh arrangkw, itnweng-rnem aney-angenh arrangkw. Artwa Pharisee-rnemel akalty-anthenh, ipmepenl ingkerrenh akemirreyen, angel-rnem inngarl aneyel itnweng-rnem inngarl aneyel arrpemarl. Sadducee-rnem-then Pharisee-rnem-then artewentyel-anem ilterrek. <sup>9</sup> Ikwer-penhan artwa court-areny Pharisee-rnem, alakenh arlek ikwer, "Artwa nhan arlarl, mwerrarl! Angel-el renh ilek apek, itnwengel apek renh ilek."

<sup>10</sup> Rernem inngan aleth-antey atwerrenharl-kety, atyetyart ra aterirrek. Alakenh-haym ra ahelengkw-rnem ilanthek, Paul renh inerl-alhemel warl rlterrk-warl ilarrakwernetyek.

<sup>11</sup> Ingwa ingwerelan Ingkart-anem Paul ikwer-itwel rtney-alhek, renh ilek, "Aterirrey-angenh ana! Nga kel Jerusalem-areny-rnem angka atyenh ilek. Ngkweng-anem aynteyel Rome tawen-areny-rnem angka atyenh akalty-anthetyek."

#### *Jew-rnem angkerreyel Paul renh ipmek awtweyek*

<sup>12</sup> Kel Ingwepenh-anem Jew-rnem anyentirrek, angkerretyek. Rernem ilerrek, "Arwkwey-angenh-antey antywey-angenh-antey aherl anwantherr Paul renh-tangkwel ipmek awtweyek. Attwenty-penhalant arlkwetyek, antywetyek." <sup>13</sup> Artwa 40 alakenh angkerrenh. <sup>14</sup> Ikwer-penhan rernem tyaty-areny atyetyart-rnem artwa ampwer nem-warl-then alhemel, "Aray anwantherr arwkwey-angenh antywey-angenh, Paul attwenty-penhan!" <sup>15</sup> Arrantherr Sanhedrin Council-warl-then ahelengkw atyetyart ingwer-warl angka thwenetyek, Paul arrekantherr-warl atnwenhey-alhetyek, atyetyartel-anem Paul renh arraty-angkwarr ayernetyek. Rernem renh nhewarl-anyem atnwenhey-alenty, anwantherr renh ipmek-anem irryert-atwem."

<sup>16</sup> Paul-kenh ampelikw awek rernemal ikwerarl tyel-angkerrenh, renh ipmek awtweyek. Ranem Atyetyart-rnem warl-warl aylpemel, Paul ikwer ilek. <sup>17</sup> Paul ranem atyetyart anyentek yangkelhek, renh ilek, "Anthety nhenh atnwenha, atyetyart irlkentyek-awtwey Cladius ilkwewarl ra ileyetek." <sup>18</sup> Atyetyart ra anthety renh atnwenhek, ratherr angkerretyek. Ra atyetyart irlkentyek-awtwey renh ilek, "Paul-el artwa anthety nhenh thwenek, atyeng-angkwarr, renharl Paul-el thwenek."

<sup>19</sup> Ranem anthety renh anyelkel ayernek, "Ilek ntwa atyeng ileyetek nga apetyek?"

<sup>20</sup> Anthety ra atyetyart ilkwa renh ilek, "Jew-rnem angkerrenh, Paul renh ipmek awtweyek. Rernem-anem ingwepenh angka ngkweng-warl thweneyehn. Ntwa Paul renh Sanhedrin Council-warl atnwenhetyek, rernem renh arraty-angkwarr ayernetyek.

<sup>21</sup> Nga ikwer-rnem awelhey-angenh anetyek. Aray, artwa 40 irlkenty ikwer mpwelheyel, renh ipmek irryert awtweyek. Artwa rernem angkerrenh arwkwey-angenh antywey-angenh anetyek, Paul rernem attwenty-penhalant arlkwetyek, antywetyek. Rernem lyert mpwelheyel angka ngkwewnh awtweyek."

<sup>22</sup> Atyetyart irlkentyek-awtwey ranem anthety renh ilek, "Angka nhenh ntwa atyeng ilek, nthakenh ingwer-rnem iley-angenh." Ranem anthety renh thwenek.

#### *Atyetyartel Paul renh Felix-warl thweneyel*

<sup>23</sup> Atyetyart ranem atyetyart atherrek yangkelhek. Ra renh-atherrek ilek, "Mpwelanth arrpemarl atnengkilem, ahelengkw atyetyart 70 nanth-akert-rnem 200 ingwer-rnem irryart-awarr-rnem-then, ahelengkw 200 ingwer-rnem-then, nayp arrelyp-awarr-rnem-then. Mpwelanth Atyetyart-rnem Caesarea tawen-warl alhetyek." <sup>24</sup> Ikwer-penhan Paul nanth-warl tywenemel renh atyetyart nhernem-angkwarr Felix-warl alhetyek, atyetyart ilkwewarl."

<sup>25</sup> Atyetyart ranem pip renh ingkwernek, ratherr Felix renh anthetyek. <sup>26</sup> "Felix-ay, atha ngenh tnakem. Ayengan Cladius, atha pip ngkweng ingkwerneyel. <sup>27</sup> Jew-rnemel artwa nhenh renh anterrkwek. Rernem renh ipmek awtweyek irrek. Atha awek ra Rome-areny aneyel. Alakenh-anyem ayeng atyetyart-rnemek arrngert angkek, renh itethilemel. <sup>28</sup> Athanem renh Sanhedrin Council-warl atnwenhek, renh-rnem ayernetyek, 'Ilek-they arrantherr artwa nhenh ipmek awtweyek ilkelheyel?' <sup>29</sup> Ayeng

akalty, atharl renh-rnem awekarl, rernemarl ikwer angkerrenh ipmek atwetyek, tyawl-warl akwernetyek. Artwa ran arlarl.<sup>30</sup> Atha awek arrpemarl rernem ipmek atwetyekarl angkerrenh. Alakenh-anyem atha renh ngkweng-warl thwenek. Athantey arrpemarl Jew-rnem Atyetyart-rnem-then rernem ngkweng-warl alhetyek, rernem ngkweng-itwekanem anngetherr ayntarrp-ilemel iletyek.”

<sup>31</sup> Ahelengkw-rnem awelhek. Ingwel Paul rernem Antipatris tawen-warl akngek. <sup>32</sup> Ingwepenh ingkel apetyek-rnem rernem Jerusalem-warl-anem alpek. Ahelengkw-nanth-akert-rnemel Paul renh anper-antey akngek Caesarea tawen-warl<sup>33</sup> Rernem pip Felix renh anthek. Rernem Paul renh anthek ikwer-rnem.

<sup>34</sup> Pip renh reytemilek-penh, Felix-el Paul renh ayernek, “Apmer nthennh-areny ngan?” Paul ilelhek ikwer-warl, “Ayeng ahern Cilicia-areny.”

<sup>35</sup> Felix-el-anem renh ilek, “Alerl-antey awetyek artwa ingwer-rnem apetyentyelant, ayntarrp-ley-angker-rnem.” Ranem ahelengkw ikwerenh-rnem ilanthek, rernem Paul Herod-kenh warl-itwek atnyenetyek alerl-antey.

## 24

### *Jew-rnemel Paul Felix-itwek anngetherr ayntarrp-ilevel*

<sup>1</sup> Arla 5-penhan, Ananias Caesarea tawen-warl apetyek Felix-warl. Ananias ra atyettart ilkwa anenh. Ikwer-angkwarr atyetyart Jew irrpety apetyek arrpemarl. Tertullus ra court-areny. Rernem Tertullus-itwek angkerrenh ra Paul Felix-itwek anngetherr iletyek. <sup>2</sup> Felix-el-anem ahelengkw-rnem ilanthek, Paul renh court-warl akngetyetyek. Tertullus ranem Paul renh ayntarrp-ilek. Tertullus-el Felix renh tnakek, “Felix-ay, ngarl atyetyart arrwekel anwernekantherr anenh-angkwarr, ntwa anwenhantherr mwerr-angkwarr arntarnt-arek. Anwantherr mwarrant-arey anenh. <sup>3</sup> Anwantherr ngkweng awelheyel, arrwekel ntwa anwenhantherr arraty-angkwarr arntarnt-arenh. <sup>4</sup> Ayeng-anem arleng-alenty angkey-angenh. Angka akely arwa ayeng angkerl-ayney. Atha renh ayntarrp-ilem. <sup>5</sup> Paul ra artwa Jew-rnem apmer arrpanenh-itwek ilpertiler-apenh. Ikwer-penhan rernem ahel ilterrenh. Rantey arrpemarl Nazarene-ek atyetyart aneyel. <sup>6</sup> Apmwerrkel ra tyaty ilkwewarl aylpenty-arrpantey akwerrp-rnem-akert. Anwantherr renh anterrkwek-anem. <sup>8</sup> Arranther renh amentel ayvernenherr-arey. Ikwer-penhan arranther renh iterl-arem-anem, ra apmwel-areth akalty-antherl-anenty.” <sup>9</sup> Jew-rnem Tertullus-angkwarrarl apetyek-rnem rernem irrkaty-angkwarr-antey angkek.

### *Paul Felix-itwek anngetherr ilelheyel*

<sup>10</sup> Felix Paul-ek ilityerreken, ranem angketyek. Paul ra ilelhek, “Nga aherrety arpanenhel mwerr-angkwarr arntarnt-arek, mwerr atha ngenh tyernem. <sup>11</sup> Ingwer-rnemel ngenh ileman, ayeng apmwerrkel arwa Jerusalem-warl apey-alpek, Akngayek inkwerelheyek. <sup>12</sup> Nhenh-rnem akaltyaryl tyaty ilkwa kwen-itwek ilterrey-angenh. Atha apmwel-areth akalty-anthey-angenh aketh-itwek, Jerusalem ikwer-itwek. <sup>13</sup> Rernem akalty, rernem ayenh apalel arwa ayntarrp-ilevel. <sup>14</sup> Ayeng ngkweng arraty ilelheyel, ayeng Akngayek inkwerelheyel, renh tnakeyel. Jew-rnemel ayenh ayntarrp-ilevel, ayeng Akngayek inkwerelhey-angenh-arrpantey. Athan angka Moses-kenh-angkwarr apentem, Akngay-kenh angkakert arrwekeleeny-rnem-then. <sup>15</sup> Athan Akngay-kenh-angkwarr apenteyel arrpemarl, rernemarl apenteh-apeny. Akngayel mwerr-rnem-then artwa apmwernem-then akemelhileyen. <sup>16</sup> Alakenhaym ayeng arrkernalheyel Akngay-angkwarr arraty ayeng anetyek ahern-areny ingkerrenhek arraty-angkwarr ayeng anetyek arrpemarl. <sup>17</sup> Aherrety arpanenhel ayeng apmer arpanenh-itwek anek. Ikwer-penhan ayeng Jerusalem-warl apey-alpek. Atha man ikwer-rnem akngay-alhek, tyenkerr anthetyek tyaty ilkwitwek. <sup>18</sup> Artwa Jew irrpetyel ayenh tyaty ilkwitwek arek, atharl tyenkerr Akngay anthenh. Ayeng ament-areny atha akngerr irlkentiley-angenh atwerretyek. <sup>19</sup> Artwa Jew Asia-areny irrpetye tyaty ilkwitwek anenh arrpemarl. Rernem nhenh-warl apetyey-angenharl, ngkweng-angkwarr anngetherr ilelheteyek. <sup>20</sup> Tertullus-rnemel ayenh ayntarrp-ilevel atharl apmwangkwarr akalty-anthenty-arrpantey. Aray, rernem ayenh Sanhedrin Council-itwek anngetherr ayntarrp-ilek, ywarn-antey. <sup>21</sup> Rernem ayenh ayernek, atha ikwer-rnem ilek, ‘Arranther lyert ayenh ayntarrp-ilevel, atharl Akngay tnakeyel, ipmepenih ingkerrenh itethiley-angker.’”

<sup>22</sup> Felix ra arrwekel-antey Ingkart Jesus-kenh angka awek. Ranem renh-rnem ilek, “Atyetyart Lysis alerl-antey apetyey-angenh-antey mpwelheyel. Ra aremirrenty, athanem Paul renh iley-ayntetyek-anem, nthakenharl ra irreyenh.” <sup>23</sup> Felix-el-anem atyetyart ahelengkw anyent ilanthek, Paul renh arntarnt-aretyek. “Ntwa renh arntarnt-ara! Renh teynel arertney-angenh anetyek. Ntwa ikwerenh-rnem-then menty aretyek, rernemarl ilkwatherr ikwer-warl apetyem, amernel renh wantetyek.”

*Felix-then Drusilla-then ratherr Paul renh aweyel*

<sup>24</sup> Arlta irrpety-penh, Felix anew ikweren Drusilla-akert warl court-ek-arelh ikwer-warl alhek, Paul renh awetyek. Drusilla arelh Jew aneh. Ikwer-penhan Paul-el ikwer-atherr Jesus-kenh angka akalty-anthek, Jesus renh apentetyek. <sup>25</sup> “Akngay-angkwarr arraty-angkwarr apentenherr-ather!” Apmwekety mwarrantly irreyek, apmwekety ipmelhetyek. Arlta ingkernel Akngay ra ingkerrenh akngakeyenh.”

Paul renh awek-penh Felix ra aterirrek. Ranem Paul renh ilek, “Kel, ipmey, ingwer-ingerant ayeng ngkweng yangkelhetyek.” <sup>26</sup> Ra yangkelhenh, aweth-antey ratherr angkerretyek, arratyilerretyek Felix mpwelhenh, Paul-el renh man anthetyek, Paul ra man anthemel tyayl-they tyerrelhetyek.

<sup>27</sup> Aherrety atherr-penh, Rome-areny-rnemel Atyetyart artwa ingwer-anem rnkernek, itnan Porcius Festus. Jew-rnem ilkelhenh ra tyayl kwen anerl-ayntetyek, Felix-el Paul renh tyayl-they tyarlewey-angenh-antey.

## 25

*Paul Festus-ek ilelheyel, “Ayeng ilkelheyel Caesar-warl alhetyek”*

<sup>1</sup> Rernem Festus-anem rnkernek, atyetyart ilkwa anetyek. Ikwer-penhan arlta atherren-penh, Festus Caesarea tawen-they Jerusalem-warl alhek. <sup>2</sup> Atyetyart tyaty-areny-rnem-then Jew-kenh atyetyart ingwer-rnem-then Paul-ek angkerrenh. <sup>3</sup> Rernem Festus renh ayernek, ra Paul Jerusalem-warl akngetyetyek. Rernem ilkelhek Paul renh iwerr ampepitwek-antey ipmek atwetyek. <sup>4</sup> Festus-el renh-rnem ilek, “Paul Caesarea-itwek aleth anetyek. Ayeng Caesarea-warl alerl alpeyeh ingwer-inger.” <sup>5</sup> Arrantherr angkeyel, ra artwa apmwarl aneyel. Atyetyart irrpety arrekantherrenh atyeng-angkwarr apetyetyek, ngenh anngetherr ayntarrp-iletyek.”

<sup>6</sup> Festus-anem Jerusalem-itwek aneh wik anyentek-atwety. Ikwer-penhan ra Caesarea-warl alpek. Arlta ingwerelan court-warl-anem alhek, Paul ikwer-anem yangkelhek. <sup>7</sup> Paul ra court-itwek aney-alhek-anem, Jerusalem-arenyel-rnem renh aleth ayntarrp-ilek. Rernem irrtiywerremel renh aleth-antey ayntarrp-ilenh. <sup>8</sup> Paul-anem ilelhek “Atha Jew-rnem-kenh-angkwarr apmwel-areth mpwarey-angenh, Rome-areny-rnemek-then. Atha tyat ilkwa Jew-rnem-kenh apmwel-areth mpwarey-angenh. Ayeng Caesar Rome-areny Atyetyart ilkwek irrpelthirrey-angenh.”

<sup>9</sup> Festus ra ilkelhek, Jew-rnem kwartewetyek. Alakenh-anyem ra Paul renh ayernek, “Nga apek Jerusalem-warl alhem, nga court-el angketyek ikwer-itwek apek, Jerusalem-itwek.”

<sup>10</sup> Paul-el renh tyernek, “Ayengarl Rome-areny. Ntwa atyeng court mpwaretyek Rome-itwek-antey. Kel nga akalty atha Jew-rnem-angkwarr apmwel-areth mpwarey-angenganh. <sup>11</sup> Atha apmwel-areth mpwarentyen, atyengarl alakenh aynteyelarl, rernem ayen ipmek atwetyekarl alhewerarl. Rernem irrtiywerremel ileyel. Ingwer-rnemel nthakenh ayen ayahiyewy-angenh Jerusalem-areny-rnem-warl. Atyetyart Rome-areny rant ayen court-itwek ayernetyek.”

<sup>12</sup> Paul renh awek-penh, Festus artwa ingwer-rnem-then angkerrenh. Artwa rernem Rome-areny-rnem-angkwarr renh iterl-arenhan. Ikwer-penhan ra Paul renh ilek, “Ngarl ilkelheyel-angkwarr-antey, Atyetyart Caesar rant court-itwek ayernetyek.”

*Paul Agrippa-warl Bernice-warl angkeyel*

<sup>13</sup> Ingwer-ingeran, King Agrippa Caesarea-warl apetyek anew ikweren-then-antey Bernice-then. Ratherr ilkwhatherr apetyek Festus-warl, renh aretyek. <sup>14</sup> Ratherr kel arlta irrpety ikwer-itwek anek-penh, Festus-el King renh Paul-ek ilek. Ra renh ilek, “Felix-el artwa anyent tyayl-itwek iwerl-alhek. <sup>15</sup> Ayeng Jerusalem-itwek aneh-antey, tyaty-areny atyetyart-rnem-then Jew-rnem atyetyart-rnem-then rernem atyeng-warl apetyek. Rernem ayen ayernek, atha anyent renh ipmek atwetyek. <sup>16</sup> Atha renh-rnem ilek, ‘Anwekantherrenh-angkwarr angka ingweran aynteyel arrpemarl. Anwantherr nthakenh ingwer ipmek atwety-angenh. Arrantherr renh anngetherr court-itwek ayernetyek. Ikwer-penhan ra ilelhenty, renh ipmek-anem atwetyek.’ <sup>17</sup> Jew-rnem-anem nhenn-warl apetyek atyeng-warl. Arlta ingwerelan ayeng Paul-ek yangkelhek, atha renh ayernetyek, rernem renh anngetherr ayntarrp-iletyek. <sup>18</sup> Rernem-anem ayntarrp-ilek, athanem iterl-arek rernem apalel renh ayntarrp-ilek, atha renh nthakenh ipmek atwety-angenh. <sup>19</sup> Rernem iterrek, Akngay ikwer-rnem-kenh-they. Rernem iterrek Jesus-they, rarl arrewaly ayntek. Paul ra ilek, ‘Jesus ra iteth aneyel.’ <sup>20</sup> Ayeng-anem ywarn iterrek athanem Paul renh ayernek, ‘Nga Jerusalem-warl alhetyek? Atha ngenh court-emileyek.’ <sup>21</sup> Paul ilelhek, ‘Ayeng ilkelheyel, Caesar-itwek ayen court-emileyek.’ Alakenh-anyem atha renh tyayl-itwek atnyeneyel, Rome-warlant renh thwenetyek.”

<sup>22</sup> Ikwer-penhan Agrippa-el-anem Festus renh ilek, "Ayeng ilkelheyel atha artwa renh awetyek." Festus-el renh ilek, "Ntwa kel ingwepenhan renh awetyek."

<sup>23</sup> Kel arlta ingwerel Agrippa Bernice-atherr Festus-kenh warl-warl apetyek, arnkwa mwerr-angkerel aylpemel. Ahelengkw Atyetyart ingwer-rnem-then, artwa ingwer-rnem-then warl ikwer-itwek anyentirrek. Ikwer-they Festus Paul-ek yangkelhek. <sup>24</sup> Festus-anem angkek, "King Agrippa-ay, atyetyart-rnemay, arrantherr artwa nenh arenh-arey! Jew nhnenh-arenyel-rnem-then Jerusalem-areny-rnem-then rernem artwa renh ayntarrp-ilek. Rernem-antey ilanhek, atha renh ipmek atwetyek. <sup>25</sup> Ran artwa mwerrarl, arlarl. Atha renh-rnem arternpel awek, nthakenh atha renh ipmek atwey-angenh, menty-anem. Ikwer-penhan Paul rantey angkek, Caesar-el renh court-emiletyek. Alakenh-anyem atha renh Caesar-warl thwenetyek. <sup>26</sup> Nthakenh atha renh arwa thweney-angenh, renh court-emiletyek. Alakenh-anyem ayeng ikwer yangkelhek, arrantherr King Agrippa-el akngerr ayernetyek. Anantherr-anem pip thwenetyek atyetyart Caesar-warl. <sup>27</sup> Arrantherr mwarrant-arey angkerrenty, atha renh thwenemarl."

## 26

### *Paul Agrippa-itwek anngetherr ilelheyel*

<sup>1</sup> Ikwer-penhan King Agrippa-el Paul renh ilek, "Nganem ikwer-rnem-warl ilelha."

Paul iltyerremel renh-rnem akaterilek, rap ikwer-rnem ilelhek, <sup>2</sup> "King Agrippa, Jew-rnemel ayenh ayntarrp-ileyel. Ayeng-anem inkwerelheyel, ngkweng-warl anngetherr ilelhetyek. <sup>3</sup> Nga akalty Jew-rnem-kenh-angkwarr ayeng ngkweng-warl angkeyel. Atyeng awelha!"

<sup>4</sup> Jew-rnem atyeng akalty, ayeng arraty-angkwarr anenharl ampa akely-they. Ayeng alakenh lwewarrernelhek apmer Jerusalem-itwek. <sup>5</sup> Rernem ayenh arrwekel-antey iterl-arenh, ayeng Pharisee-arl anenh. Alakenh-anyem athan arraty-angkwarr apenten. <sup>6-8</sup> Awank-akerr Akngeyel arrewaly anwekantherrenh-rnem alhelek. Ayeng kel akalty nenh arraty innga. Arrantherr irrpeltherreyel, Akngey larl arrewaly ingkerrenh ipmekpenh akwentalhileyen. Israel-kenh ingkerrenh akalty-wenyarl rernem mpwelheyel Akngey-kenh angka arrwekelely renh arratyirretyek. Rernem Akngey renh aleth-antey ayerneyel. Lyert Jew-rnem ilkelheyel ayenh ipmek atwetyek. Atyetyart, renh-rnem atha ileyel, Akngey-kenh angka arrwekelely arraty aynteyel.

<sup>9</sup> Awank-akerr ayeng iterrenh Jesus Nazareth-arenyekarl irrpelthirretyek. <sup>10</sup> Alakenh atha mpwarek apmer Jerusalem-itwek. Jew-kenh tyaty-arey Atyetyart rernem ayenh thwenek, atha Ingkartarl apenteyel-rnem tyayl-warl akwernetyek, ingwer-rnem ipmek atwetyek, Ingkart-angkwarrarl apenteyel-rnem. <sup>11</sup> Ayeng Ingkart-areny-rnemek tyaty akely-rnem-itwek nthwenh, atha renh-rnem atwetyek. Atha renh-rnem apentey-angenh anetyek ilek. Ayeng apmer arleng ingwer-ampeny-warl alhek, atha renh-rnem alwernemel atwetyek.

<sup>12</sup> Ingwer-ingeran, ayeng Damascus-warl-anem alhek, tyaty-arey atyetyart ilkwernemel ayenh thwenek, Jesus-arl apenteyel-rnem Damascus-itwek anterrkwetyek. <sup>13</sup> King-ay, lycenty ilkwel ayenh arrtyernek alker-they. Ayenh artwa ingwer-rnem-then. <sup>14</sup> Anantherr ingkerrenh-antey ahern-warl aytnek. Ra ayenh Hebrew-kenh angkel ayernek, 'Saul-ay, ilek ntwa atyenh-rnem alwerneyel atwetyek ngay? Atyeng irrpelthirremel nga ament apmwelheleyel' <sup>15</sup> Athanem renh ayernek, 'Ingkartay, angwenh ngan?' Ingkartel ayenh ilek, 'Ayengan Jesus-arl. Ayenh ntwa alwerneyel atwetyek.'

<sup>16</sup> Kel, akemirra! Ayeng ngkweng-warl aremirrek. Atha ngenh rlwanek, atyeng warkirretyek, ntwa renh-rnem iletyek. Ntwa renh-rnem angka ingwer iletyek, angka renh atha ngkweng iley-angenh-antey. <sup>17</sup> Atha ngenh Jew-rnem-warl Jew-weny-rnem-warl-then thwenem, atha ngenh kel ikwer-rnem-kety arntarnt-areyel. <sup>18</sup> Ntwanem renh-rnem angka atyenh akalty-anthetyek. Ntwa renh-rnem iletyek, apmek inkwerelhey-angenh anayntetyek, arrentyek awelhey-angenh anayntetyek, kel Akngeyekant awelh-ayntetyek, rernem Akngey-warl angkepirretyek. Rernem ayenh-anem tnaketyek, Akngeyel apmwa ikwer-rnem-kety iwem. Ikwer-penhan atha renh-rnem anyentelhilemarl.'

<sup>19</sup> King Agrippa, ayeng kel Ingkartel awelhek. Ra atyeng aremirrek. <sup>20</sup> Atha Jew-rnem-then Jew-weny-rnem-then akalty-anthek Damascus-itwek-anem Jerusalem-itwek-anem, apmer Judea-itwek-anem. Ikwer-penhan apmer arrpanenhek. Atha renh-rnem ilek, rernem Akngey-warl angkepirretyek, rernem-anem arraty-angkwarr anetyek. Ingwer-rnemel iterl-areyenh rernemarl angkepirrek Akngey-warl-athek. <sup>21</sup> Jew-rnemel ayenh tyaty ilkwitwek anterrkwek, rernem ayenh ipmek atwetyek ilkelhek. <sup>22</sup> Akngeyel

ayen arntarnt-arek. Athanem ingkerrenh ileyel angka Jesus-kenh. Angka nhenh arraty inngarl aynteyel. Akngey apenteyelarl-rnem awankarl anenh-rnemel Moses-akerr arrwekel ilek arrpemarl.<sup>23</sup> Rernem ilek Christ ra irrwampenty awelhenty-penh ilwetyek. Ikwer-penhan retangkwel arrewaly-penh akemirreyen. Ikwer-penhan angka ikweren arlpipmerreyen angka ilpertel-warl, Jew-rnemel-then Jew-weny-rnemel-then renh arraty iterl-aretyek, rernem-anem iteh tem-antey anayntetyek."

<sup>24</sup> Paul angkenh-antey Festus ikwer angkek, "Paul arwengk ngan! Ingkerrenh-angkwarr nga akaltyirrek, ilpertelhilemel!"

<sup>25</sup> Paul-el renh ilek, "Festus, atyetyart ilkwa, ayengan arwengk-wenyarl. Atharl ikwer-rnem ileyel arraty inngarl.<sup>26</sup> King Agrippa-el angka nhenh iterl-areyel. Alakenhaym ayeng ikwer arternp innga angkek. Christ ra akngerr-itwek anngetherr-itwek ilwek, rap akemirrek."

<sup>27</sup> Paul-el Agrippa renh ayernek, "Ntwa angkakert arrwekeleny Akngey-kenh tnakem? Ayeng akalty ntwa renh-rnem tnakem!"

<sup>28</sup> Agrippa-el Paul renh ilek, "Nga atyeng arrkernelheyel ayeng Ingkart-angkwarr anetyek!"

<sup>29</sup> Paul-el renh ilek, "Lyert apek, ingwer-inger apek. Atha Akngey renh ayernem ngkweng ingwer-rnemek, arrantherr atyeng lyert awelhetyek. Arrantherr ingkerrenh Jesus-arl apenteyel-rnem atyeng-apeny anetyek tyeyn-weny."

<sup>30</sup> King-then Festus-then Bernice-then rernem akwentemel rtnerl-alhek ingwer-rnem-then.<sup>31</sup> Ikwer-penhan room-they rernem aketh-warl-anem alhek. Rernem angkerrenh, "Artwa nhenh apmwewenyarl! Nthakenh anwantherr renh ipmek atwey-angenh! Nthakenh tyayl-itwek atnyeney-angenh."

<sup>32</sup> Agrippa-el-anem Festus renh ilek, "Anantherr renh tyayl-they menty tyarlewey-angenh, Caesar-elant renh court-emiletyek rarl ilkelheyel-angkwarr."

## 27

### *Paul rtnwewarl nganeyel, Rome-warl alhetyek*

<sup>1</sup> Festus ra iterrek Paul renh apmer Italy-warl thwenetyek. Alakenh-anyem Paul artwa tyayl-areny ingwer-rnem-then. Julius-warl thwenek, Rome-areny Atyetyart anyent ra renh-rnem Rome tawen-warl akngetyek. Julius ra atyetyart ahelengkw 100 ikwer-rnem, irlkentyek-akert. <sup>2</sup> Anwantherr-anem rtnwa anyent-warl nganek. Aristarchus artwa Macedonia-areny ra Thessalonica tawen-itwek anenh. Ra nganerl-alhek arrpemarl. Dramyttium-warl kel alhetyek irrek apmer Asia-warl.

<sup>3</sup> Arla ingwerelan Sidon tawen-itwek Julius ranem Paul renh mwerr-angkwarr tyarlewek, ikwerenh-rnem arerl-alpetyek. Rernem renh amern-rnem antek ra aleth alhetyek. <sup>4</sup> Kwatylel-antey alhenh, awer ilkwa innga pwey-alhek. Awerel anwenhantherr akngelhew-akngelhilek. Alakenh-anyem anwantherr apmer Cyprus-they arrer-antey alhenh. <sup>5</sup> Ikwer-penhan anwantherr ahern Cilicia-angkwarr ahern Pamphylia-they aleth alhek, Myra ikwer-itwek-anem aney-alhek. Myra ra tawen anenh ahern Lycia-itwek. <sup>6</sup> Myra tawen ikwer-itwek atyetyart ra rtnwa ingwer arek, Alexandria tawen-they apetyek. Rtnwa ra Italy-warl alhetyek-anek. Alakenh-anyem Atyetyart ra anwenhantherr thwenek rtnwa ikwer-warl-anem nganerl-alhetyek.

<sup>7</sup> Anwantherr arla irrpety-inger alhek Cnidus tawen-warl. Anwantherr kel ywarn-antey alhek, awerel anwenhantherr akngelhew-akngelhilek. Alakenh-anyem anwantherr alhek apmer Crete-warl. Salmone tawen-angkwarr anwantherr aleth alhek. <sup>8</sup> Anwantherr apmer-they arrer-ampenyel alhek. Ikwer-penhan anwantherr Fair Havens tawen-warl apetyek. Fair Havens tawen Lasea tawen-they arrer anenh.

<sup>9</sup> Awer rlterrkkel akngelhew-akngelhilek-kety, anwantherr Fair Havens tawen ikwerel-antey anek. Awer ra rlterrkam-rlterrirrek alyangkwel. Alakenh-anyem anwantherr arrangkw ayntek, anwantherr aleth alhey-angen. Paul-el artwa renh-rnem ilek, <sup>10</sup> "Artwernemay, anwantherr nthakenh anper-alhey-angenh anwantherr apmwewarl irrekerr apek rtnwa akelhekerr ingkerrenh atwekerr kwatyl aylpekerr. Rtnwa akelhentyel kwatyl-itwek, ampwal ingkerrenh ywerrekerr."<sup>11</sup> Rome-areny atyetyart ra Paul-ek awelhey-angenh. Ra rtnwek-artweyekant, rtnwek atyetyartekant awelhenh.

<sup>12</sup> Fair Havens ra rtnwek rtakw mwerr aney-angenh, alherrp aleth-antey pwenh. Alakenh-anyem rtnwek-artwey-rnem ilkelhek Phoenix tawen-warl anper-alhetyek. Phoenix ikwer-itwekan rtnwek-arelh rtakw mwerrarl ayntek. Rtnwel anerl-aperh-rnem ilkelhek apmer nhenh-itwek anetyek, alherrp-kety.

*Awer rlterrkkel kwatyl aypmerrel-then Paul renh akngelhew-akngelhileyel*

<sup>13</sup> Ingwer-ingeran awer akely-anem pwey-alhek. Rernem-anem iterrek, "Anwantherr kel arrkernelhey, Phoenix-warl-anem anper-alhetyek." Rernem ayen kanty-akert renh lhelek, Phoenix-warl-athek kwatyeal-antey anperl-alhek. <sup>14</sup> Ikwer-penhan awer rlterrk-anem ayerrer-they akngerrakw-they pwey-alhek apmer Crete-they. <sup>15</sup> Awer ilkwanem pwey-alhek, alhetyek arrkernelhek. Rernem ywarn-anem altwerl-athek alhetyek arrkernelhek. Awer ra rtnwa renh akngartewek-anem antekerr-athek.

<sup>16</sup> Awerel-anem anwernantherr akngartewek, apmer akwerlp akely-warl, itnan ikweren Cauda. Anantherr akwerlp akely ikwer arrer irremel, anwantherr rtnwa akely inemel rtnwa ilkwewarl arertnek, ayteng-akngaynetyek. <sup>17</sup> Rtnwa ikwer-itwek rwepel arertnek, ngkweltyirrekerr. Awerel aleth akngartewekerr rernem aterirrek, rtnwa ra ahernel mwernelhekerr, apmer Libya-itwek. Rernem kalikw akely-anem artelh-aynek, rtnwa ra mwerr-angkwarr alhetyek.

<sup>18</sup> Arla ingwerel, awer ra rlterrk aleth pwenh. Alakenh-anyem arla ingwerel rernem rtnwethey ampwal-rnem kwatyeal iwek arwerlp alhetyek. <sup>19</sup> Ikwer-penhan arla ingwerel, rernem kalikw-rnem-then rwep-rnem-then kwaty-warl iwek. <sup>20</sup> Arla akngerr ingkeny-then antyarr-rnem-then anwantherr arey-angenh. Awer ra aleth pwenh. Anwantherr-anem iterrek, anwantherr ingkerrenh ilweyen, kwaty ampanTEL.

<sup>21</sup> Anwantherr angayakw kel amern arlkwey-angenh anenh. Paul-el-anem artwa renh-rnem ilek, "Arrantherr atyeng awelhey-angenh. Arrantherr apmer Crete-el aney-angenh, rtnwa mwerr ayntey-alhek ampwal-rnem ingkerrenh. <sup>22</sup> Arrantherr aterirrey-angenh anetyek, nthakenh anwantherr ilwey-angenh.

<sup>23-24</sup> Aray, Akngey atyenhel angel thwenek atyeng-warl. Angel ra ayenh ilek, "Paul-ay, aterirrey-angenh! Akngey ilkelheyel nga Caesar-angkwarr anngetherr illehetyek. Ra artwa ingkerrenh itethileyen." <sup>25</sup> Alakenh-anyem artwernem arrantherr aterirrey-angenh anetyek. Atha Akngey tnakem, angka ikwereniningga aynteyel, ran anwenhantherr kwaty-kety itethiley-angenker! <sup>26</sup> Rtnwa akwerlp-itwek mwernelhek-

<sup>27</sup> Anwantherr kel ingwa 14-ek-atwety kwaty alay Mediterranean ikwer-itwek anenh. Awer ra rtnwa renh aleth-antey akngelhew-akngenghelhilek. Kel iterl-arek rernem ahern ikwer-warl irrenty-arrpantey. <sup>28</sup> Rernem-anem ayen kanty-akert renh kwaty-warl iwek, rernem aretyek kwaty ra apek kwen ayntentyek. Rernem rwep renh kwaty-they tyerrek, rernem arek kwaty ra 37 metres ipert ayntek. Ikwer-penhan rernem arek kwaty 27 metres ipert ayntekan. <sup>29</sup> Rtnwek warrkenh-rnem aterirrek, apwert atwekkerr-arrpantey ahern-then. Rernem-anem 4-pel anchor-rnem kwaty-warl iwek. Rtnwa ingkern-ampenyek rtnwa renh arternpiletyek. Ikwer-penhan rernem ingwepenhek-anem mpwelheyel.

<sup>30</sup> Ikwer-penhan rtnwek warrkenh-rnem aterirrek, rtnwa ikwer-they anterreyteyek. Rernem-anem rtnwa akely kwaty-warl arrerneke. Ingwer-rnem irritywerremel ilek, "Anwantherr kanty ayen-akert ingwer-rnem rtnwethey atwarrelhiley." <sup>31</sup> Paul-el renh-rnem arek, Rome-arenay Atyetyart-rnem ilek, "Rernem rtnwa renh iwerl-alhenty, Akngeyel arranhantherr kwaty-kety itethiley-angenh." <sup>32</sup> Atyetyart-rnemel rwep renh akek, rwep rarl rtnwa akely renh anterrkwenh. Rtnwa akely ranem kwaty-warl aytnek.

<sup>33</sup> Ingkeny tyerrelhetyek-anem irrek, Paul-el-anem artwa ingkerrenh ilek amern arlkwetyek. Ra renh-rnem ilek, "Arenherr-arey, kel ingwepen-anem. Kel arrantherr arla 14-ek-atwety aterirremel warrkirrek, arrantherr amern arlkwey-angenh. <sup>34</sup> Kel-anem amern arlkwenherr-arey! Arrantherr amern-weny angayakw irrekerr, arrantherr mwerr anetyek ilwey-angenh."

<sup>35</sup> Alakenh angkek-penh Paul-el amern inek. Ranem ikwer-rnem-itwek anngetherr Akngey ayernek, amern renh rlweth-akemel, ra kel arlkwek. <sup>36</sup> Paul-ek awelhemel, rernem amern renh arlkwek arpemarl. <sup>37</sup> Artwa 276 rtnwa ikwer-itwek anenh. <sup>38</sup> Rernem ingkerrenh amern arlkwek-penh. Ikwer-penhan rernem weyt ntang-rnem alay-warl iwek, rtnwa ra, arwerlp-awaty alhetyek.

### *Rtnwa ra ahern atwepy-alpeyel*

<sup>39</sup> Kel ingwepen irrenhey-alhek-anem rtnwek warrkenh-rnemel ahern impalh-anem arek, apmer renh iterl-arey-angenh. Aketh mwerr ahern impalh renh arek rernem ilkelhek rtnwa renh ahern ikwer-warl nganerl-alhetyek. <sup>40</sup> Alakenh-anyem rernem ayen kanty-akert 4-pel rwep-they akek. Ayen kanty-akert rernem ipertek aylperl-alhetyek. Rernem rtnwa renh kwaty impalh-warl akngartewek. Ikwer-penhan kalikw sail mpwarek, awerel rtnwa renh kwaty impalh-warl akngaynetyek. <sup>41</sup> Rtnwa ra ahern-itwek mwernelhek. Akwerlp ranem ahern-itwek mwernelhek. Ikwer-penhan kwatyeal rtnwa ingkern-ampeny ngkweltyilek.

<sup>42</sup> Ahelegkw-rnem ingkerrenh iterrek, artwa tyayl-areny-rnem ingkerrenh ipmek atwetyek, rernem anterreker. <sup>43</sup> Julius atyetyart Rome-areny ilkelhek, Paul ra iteth anetyek. Alakenhaym ra ahelegkw-rnem arrkngert angkek. Ranem renh-rnem ilek kwaty-warl alyeyamparl alhetyek artempel-warl. <sup>44</sup> Artwa akwerrp-rnem ra ilek, rernem ngkwelty rtnwepen anterrkwemel alyeyamp pwerlpirrenh. Kel artwa ingkerrenh-anem mwerr-antey kwaty impalh-warl artarnpenhek.

## 28

### *Akwerlp itnan Malta*

<sup>1</sup> Anantherr ingkerrenh kwaty impalhel ahern-itwek-anem rtney-alhek. Apmer-areny-rnem anwekantherr ilek, akwerlp renh itnan Malta. <sup>2</sup> Apmer Malta-areny-rnem rernem anwekantherr inkwerelhek. Kwaty rntwenh. Rernem anwekantherr rwa arrtyek, anwantherr arlterrgirretyek, irrentel anwenhantherr atwekerr.

<sup>3</sup> Paul-el-anem ngkwelty akwetyemel rwewarl iwek. Rtnwem-anem ikwer-they tyerrelhey-ayntek, iltyanem renh tnhwek. <sup>4</sup> Apmer-areny-rnemel arek, rernem alakenh angkerrenh, "Artwa nhenhan artwa ahelegkwarl. Ra nthakenh iteth aney-angenh, lyert ilwem."

<sup>5</sup> Paul-el-anem rtnwem renh rwewarl iwemel arrtyek, Paul ra arntetyirrey-angenh.

<sup>6</sup> Apmer-areny-rnemel renh artewentyel arenh. Rernem arenh, ra wangketyek-arrpantey, rtnwemel tnhwem-penh, ra ilwetyek-arrpantey. Rernem renh aleth-antey arenh. Ra mwerr aleth anenh. Rernem alakenh-anyem angkerrenh, "Artwa nhenh altyerr!"

<sup>7</sup> Artwa Publius akwerlp ikwer atyetyart anenh. Ra anwekantherr inkwerelhek, warl ikweren-h-warl akngeynek. Anwantherr arlta irrpetyel ikwer-itwek anenh. Anwantherr awek Publius-kenh aynikw arntety ayntenh rwenpirrek, atnert-then akalthek. <sup>8</sup> Ikwer-warl alhemel, Paul ranem Akngey-warl angkek. Ranem iltya ikwerenh ikwer-warl arrernepek. Publius-kenh aynikw-anem mwerrirrek.

<sup>9</sup> Rernem awek-penhan, arntety-rnem Paul-warl apetyen, Akngeyel-anem renh-rnem mwerriletyek. <sup>10</sup> Rernem anwenhantherr tnakek, amern-akerr anthek, alethel alpetyek.

### *Paul Rome-warl alheyel*

<sup>11</sup> Malta ikwer-itwek rtnwa ingwer anek. Alherrp-kety arrwekel-antey apetyek. Rtnwa Alexandria tawen-they apetyek, rtnwa itnan ikweren Akngey Atyewenheng. Anantherr Malta ikwerel alkent irrpetyek-atwety anenh-penh anwantherr rtnwa ikwer-warl-anem nganek, kwatyel aleth alhek. <sup>12</sup> Anantherr Syracuse tawen-warl artarnpenhek. Syracuse tawen ikwer-itwek arlta irrpety-inger anenh. <sup>13</sup> Ikwer-penhan anwantherr Rhegium tawen-warl-anem anper-alhek. Arlta ingwerelan awerel-anem kel antekerr-they-anem pwek, anwantherr arlta ather-penh Puteoli tawen-warl-anem alhek. <sup>14</sup> Tawen ikwer-itwek anwantherr Jesus-arl apentyel irrpety arek, rernem anwekantherr yangkelhek, anwantherr wilk anyent anetyek.

<sup>15</sup> Jesus-arl apentyel Rome-arenyel awek, anwantherrarl apetyek, rernem anwekantherr-warl-athet apetyek, ampep-warl, rlwatetyek. Appius tawen Three Taverns tawen-warl. Renh-rnem aremel, Paul Akngeyek inkwerelhek, ranter arppemarl arnkatyirrek. Ikwer-penhan anwantherr Rome-warl-anem anperl-alhek.

### *Paul Rome-el aneyel*

<sup>16</sup> Rome-itwek-anem kapmentel Paul renh tyarlewek rarl warl-itwek anetyek. Rernem ahelegkw anyent thwenek renh atnyenetyek.

<sup>17</sup> Arlta irrpety-penh Paul atyetyart Jew-rnemek yangkelhek. Rernem kel anyentir-rek. Ra renh-rnem ilek, "Atyehn-rnemay, atha anwekantherrenh-angkwarr akengenty mpwarey-angenh, ayeng arrwekeleeny-rnem apmwangkwarr alhey-angenh. Jew-rnemek ayenh anterrkwemel thwenek, Rome-areny kapment-warl. <sup>18</sup> Rernem ayenh ayernek. Rernem ayenh iterl-arek ayengarl artwa arla. Rernem-anem ilkelhek rernem ayenh ipmek atwey-angenh tyarlewetyek. <sup>19</sup> Jew-rnem atyetyart-rnemel ayenh ayntarrp-ilek. Alakenh-anyem ayeng angkek, 'Ayeng ilkelheyel Atyetyart ilkwa Caesar-elant ayenh court-itwek ayernetyek.' Atha nthakenh anwekantherrenh-rnem ayntarrp-iley-angenh. <sup>20</sup> Arrenhantherr ileytek, ayeng arrekantherr yangkelhetyek. Ayeng lyert tyeyn-akert aneyel. Ilek-they? Atha Akngey-kenh Itethiley-angker tnakeyel. Itethiley-angker renh Akngeyelarl alhelek, Israel-kenh-rnem-warl thwenetyek."

<sup>21</sup> Jew-rnem atyetyart-rnemel Paul renh ilek, "Aray, apmer Judea-areny-rnemel pip anwekantherr-warl thweney-angenh-antey ngkweng-they. Artwa rernem apetyey-angenh-antey, ngenh ayntarrp-ileytek. <sup>22</sup> Anantherr ilkelheyel, ngenh awetyek, ngarl

ilelhem. Anwernantherr awek apmer arrpanenh-they ingkerrenharl Jesus apenteyelrnem-kety arkarirreyl.”

<sup>23</sup> Rernem-anem angkerrenh arlta ingwerel rernem anyentirremel angkerretyek Paul renh awetyek. Arlta ikwerel rernem Paul-warl apetyek. Paul ranem ikwer-rnem angkek ingwepen-they atwerpekkatwety. Ra renh-rnem ilek, “Jesus ra Ingkart ingkerrenhek aneyel.” Ranney arrpemarl renh-rnem ilek, “Moses-kenh angka arrwekeleny Akngey-kenh angkakert-rnem arrwekel Jesus-ek angkerrenh.”

<sup>24</sup> Ingwer-rnemel-anem ikwer-penhan angka tnakek. Ingwer-rnem-anem arrangkw, tnakey-angenh. <sup>25-29</sup> Paul-el renh-rnem ilek, “Itnweng rant arraty innga angkek, Akngey-kenh angkakert arrwekeleny Isaiah-angkwarr, ra arrwekeleny-rnem ilekarl, ‘Akngerr renh-rnem ilay, arrantherr arternp innga awelhey-angenh. Arrantherr nthakenh iterl-arey-angenh. Arrantherr intem-antey arerl-aneyeh. Arrantherr nthakenh iterl-arey-angenh. Akngerr iylpa akentelhek, atyeng mwerrantly awelhey-angenh. Annga ikwer-rnem aparrngirrek. Atha renh-rnem alakenh ilek, rernem anngeletyek, rernem iylpel awetyek, rernem-anem atyeng arraty-angkwarr awelheteyek. Ikwer-penhan atyeng-warl angkepirretyek, athanem renh-rnem mwerrilityek.’ Alakenh-anyem Akngeyel Israel-kenh-rnem ilek.”

Paul-el renh-rnem ilek, “Angka nenh Akngeyel ingkerrenh Jew-weny-rnem itethiletyek, angka nenh atha renh-rnem ilek, rernem angka nhenhek awelheyek.” [Rernem iterrek. Ikwer-penhan rernem alpek.]

<sup>30</sup> Paul-anem aherrety atherrel-anem anenh, warl anyent rent-emilemel. Rernem ikwer-warl ilkwatherr apetyek. <sup>31</sup> Ranem renh-rnem arnkatyel akalty-anthek, Akngey ra Ingkart ingkerrenhek aneyel. Ra Ingkart Jesus Christ-kenh angka akalty-anthek, Akngeyelarl renh thwenek. Ingkerrenh ikwer awelhek, ingwerel renh tyerney-angenh.

## Romans Angka Romans alakenh aynteyel

Paul apmer Corinth-itwek anenhel-antey ra pip ingkernekk. Jew-weny Greece-areny-nemel man anthenh. Paul arrkernekk, Jerusalem-warl alhetyek-arrpanter manakert, irrepern-rnem anthayntetyek. Ra ilkelhenh Spain-warl alhetyek, angka mwerr-angker ilerl-apayntetyek.

Paul-el pip thwenek Rome-warl, rernem iterl-aretyek, angka impen. Jew ingwer-nemel ikalty-anthenh ikwer-rnem-kenh-angkwarr apent-aynteyek-tangkwel. Jew ingwer-rneman iterrenh Jesus anyent-angkwarrant. Romans 3:23 aynteyel: "Ingkerrenh nthakenh Akngey-kenh-angkwarr arraty aney-angenh ament-tangkwel, Akngey irrwerl-areny iterl-arey-angenh-tangkwel. Apatemel awank-akerr anenh. Ingkerrenh Ingkart-kety amentirrek."

Romans 3:21-they 26-ek-atwety alakenh iterreyel anwantherr arratyirretyek, angka Jesus ikweren-angkwarr apenterl-anenty. Anwantherr arratyirrem Ingkart ikwer-angkwarr apenterl-anenty, anyent-angkwarrant. Romans 3:24 aynteyel: "Akngeyel iwer anwekantherr mpwarek Jesus Christ-angkwarr. Ra ingkerrenhek katy ilwek, ra renh-rnem anyentelhilek Akngey-warl, rernem Akngey-kenh-angkwarr arraty anayntetyek, alyelk."

Jesus renh tnakenty anyent-angkwarr, rarl anwekantherr katy ilwek ikwerant anyentirrem.

Romans 3:27-28: Anwekantherren-angkwarr apentey-angenh, anwantherr tnakelhey-angenh. Anwantherr impenek-antey apenterl-ayntetyek. Romans 3:31: Angka arrwekeleny ipmelhey-angenh. Romans 5: Christ-angkwarr anwantherr anyentirrem Akngey-warl. Romans 6: Inngantey anwantherr arraty anem. Romans 7: Arrwekeleny-kenh-angkwarr ament arrkernekk ipantey. Romans 8: Itnwengelant anwenhantherr rlterrilem. Romans 9-11: Angka alakenh aynteyel Jew-rnemek-then, Jew-weny-rnemek-then, alehang-rnemek-then, ingkerrenhek. Romans 12: Anwantherr mwerrant-arey anayntetyek, mwerr-angkwarr apmwewarl irrekerr. Romans 13-15: Ingkart-areny ingwer-rnemek iterreyek, awelhetyek, renh-rnem ayntarrp-iley-angenh. Romans 16: Paul inkwerelhik Rome-areny-rnemek.

Galatians Romans angka anyent-anteyarl aynteyel anayntiley-angker.

<sup>1</sup> Ayeng Paul, Jesus Christ-kenh warrkenh. Atha pip nhenh arrekantherr-warl thwenek, Akngeyel-anem ayenh rlwanek, angkakert ikweren-aneytekk. Rantey arrpemarl ayenh thwenek, angka mwerr-angker ikweren-akalty-antheteyek.

<sup>2</sup> Awank-akerr Akngeyel arrwekeleny-rnem ilek, angka ikweren-angkwarr, artwa angkakert rernem angka renh ingkernekk pip-warl. Akngey-kenh angka impen aynteyel. <sup>3</sup> Angka mwerr-angker nhenh Akngey-kenh alerikw. Ra arrwekeleny David-kenh arrpemarl ahern-areny. <sup>4</sup> Ra Akngey-kenh rlterr-akert aneyel, irrwerl-areny-kenh. Alakenh ra akemirrek ipmepenh Itnweng Rlwartel anwekantherr arrernek. Jesus Christ ranem atyetyart ilkwa anwekantherrenh aneyel.

<sup>5</sup> Jesus-el ayenh angkakert Akngey-kenh mwerr arntarnt-arek. Ra anwenhantherr rlwanek, angka ikweren-akalty-antheteyek. Ra anwenhantherr arrernek, anwantherr ingkerrenh Jew-weny-rnem akalty-antheteyek apmer arrpanenhek, rernem Jesus-kenh-angkwarr arraty apenterl-ayntetyek, renh tnaketyek. <sup>6</sup> Ranem arrenhantherr rlwanek, arranther ikweren-rnem anayntetyek, Jesus-kenh-rnem ingkerr. <sup>7</sup> Atha pip nhenh thwenek, arrekantherr-warl Rome-areny-rnem-warl. Akngey anwekantherrenh Akngey arrekantherr inkwerelheyel. Ranem arrenhantherr rlwanek, arranther ikweren-rnem anayntetyek. Ingkart Akngey, Ingkart Jesus Christ arrekantherr inkwerelheyel.

### *Paul ilelheyel*

<sup>8</sup> Arrwekel-antey ayeng Akngeyek inkwerelheyel, Jesus Christ-angkwarr, arrekantherr ingkerrenhek. Apmer arrpanenhek rernem angkerreyel, arrantherarl Jesus renh tnakek. <sup>9-10</sup> Ayeng intem-antey Akngeyek warrkirreyel, angka Akngey-kenh alerikw akalty-antheteyel. Akngeyan akalty, ayeng arraty angkeyel. Ayeng arrekantherr iylpangkeyel iylpelirrey-anghen, Akngey renh ayerinemel. Ayeng arrekantherr-warl alhetyek-anek. Ayeng apetyem, Akngey ilkelhentyarlant. <sup>11-12</sup> Ayeng ilkelheyel, arrekantherr-warl alhetyek, atha arrenhantherr rlterriletyek, arranther arraty-angkwarr apenterl-ayntetyek. Alakenh-anyem anwantherr rlterriletyek, ikweren-angkwarr arraty apenterl-ayntetyek.

<sup>13</sup> Atyenh-rnemay, ayeng arrekantherr-warl alhetyek-arrpantey, ywarn-antey. Akngey atyeng arrkngert angkek. Ayeng ilkelheyel, atha Rome-areny-rnem Jesus-warl atnwen-hetyek, atha Jew-weny ingwer-rnem Jesus-warl atnwenhek-apeny, apmer arrpanenhek. <sup>14</sup> Iterl-aray, atha ingkerrenhek angka mwerr-angker ingkerrenhek ileyek, tyak-rnemek-then, akwerrp-rnem-then akalty-anthetyek, apmwamwam-rnem-then ingkerrenhek akalty-anthetyek, atyenh-angkwarr-antey. <sup>15</sup> Alakenh ayeng iterrenh angka mwerr renh ileyek, Rome-areny-rnem.

*Akngey-kenh-angkwarr arraty anem, angka mwerr-angker renh tnakemel*

<sup>16</sup> Ayeng Akngey-kenh angkekety nyerrirrey-angenh. Angka Akngey-kenh-angkwarr anwantherr itethirreman, iteth-kenh apmer-warl alpem, anwantherr renh tnakenty. Jew rernem-tangkwl arrwekel anenh, akalty-anthenh, ingwerel-rnem-anem, apmer arrpanenhek-anem. <sup>17</sup> Angka mwerr-angker alakenh aynteyel, ingwerel Jesus renh tnakenty, ra Akngey-kenh-angkwarrant anem. Akngey-kenh angka alakenh aynteyel: "Ingwer Akngeyek awelhenty, ra Akngey-angkwarr arraty aneman, ra iteth intem-antey anayntetyek, Akngey-kenh-angkwarr."

*Akngey ahelirreyel ikwer-rnem, rernemarl apmwangkwarr apenteyel*

<sup>18</sup> Akngey-kety amentirrenty apmwangkwarr irrem. Intwemelirrenty Akngey-kety ikwer-rnem aynteyel arrpemarl, atwetyek. Alakenh ingwer-rnem Akngey-kety arrkngert angkenty, Akngey renh iterl-aretyek, Akngey ikwer-rnem-kety ahelirrem. Rernem renh-rnem atwem. <sup>19</sup> Ra ikwer-rnem ahelirrem, rernem arraty-angkwarr apentey-angenh-they, rernem ikwer avelhey-angenh-they. Kel rernem iterl-areyel rarl iwerr arratyilek ikwer-rnem. <sup>20</sup> Ran rlterrk ilkawakert aneyel, ahern-then alker-then arrpmernemel. Alakenh-they ingkerrenhel areyel-anem. Rernem ikwer iterreyel.

<sup>21</sup> Rernem Akngeyek akalty anem, rernem renh tnakey-angenh, ikwer inkwerelhey-angenh. Rernem ilpertilelhenh, apmwangkwarr. Rernem apatemel anew-aneyel. <sup>22</sup> Rernem tnakelheyel akalty-arrpantey. Rernem akwerrp iterl-arey-angenh. <sup>23</sup> Rernem Akngey rlterrk inngekety intwemelirrek, rernem apwert-penh ingkerr artwapeny mpwarek, thip-apeny mpwarek, atnwenth-apeny mpwarek, rtnwem-apeny-then mpwarek, ikwerant-anem inkwerelhenh. Rernem arrangkwarl, ahern-areny-kenhant inkwerelhek.

<sup>24</sup> Alakenh-anyem Akngeyel renh-rnem menty-anem tyarlewek, rernem ingwer-rnem ikngwetyek angwenhirreyel, ament-warl apmwangkwarr alhetyek. <sup>25</sup> Rernem Akngey-kenh-angkwarr arraty iterl-arey-angenh. Rernem irrtwyerreyelarl ahern-arenyek inkwerelheyel, ampwal apwert-penh arwel-penh arnwarnekarl. Anwantherr Akngey renhant tnaketyek. Amen.

<sup>26</sup> Alakenh-anyem Akngeyel menty-anem tyarlewek, rernem apmwangkwarr apenterlyntetyek. Arelh ingwer arelhant-atherr, artwekety arlkarirreyel, iteng-apeny anayntetyek. <sup>27</sup> Artwa ingwer-rnem arelh-kety arlkarirreyel. Artwant-atherr, iteng-atherr-apeny. Rernem apmwangkwarr mpwarenty, Akngeyel renh-rnem atwemarl.

<sup>28</sup> Rernem Akngey-kenh-angkwarr-kety arlkarirrenh. Akngeyel renh-rnem menty-anem tyarlewem, rernem apmwangkwarr ikwer-rnem-kenh-angkwarrant apenterlyntetyek. <sup>29</sup> Rernem apmwangkwarrant apenteyel, rernem arnkaty. Rernem ingwer-rnem-kety arlkarirreyel. Rernem ingwer-rnem ipmek atwem. Rernem ingwer-rnemek irrtwyerl-amperneyel, irrtwyerremel ileyel. Rernem ingwer-rnemek irrwernelheyel. Rernem ingwer-rnem ilteyel. Rernem ingwer-rnemek angka akngerrileyel irrtwyerremel. <sup>30</sup> Rernem ingwer-rnem ayntarrp-ileyel ikwer-rnem tyel-angkerreyel. Rernem ament-warl alheyl, tnakelhemel. Rernem Akngey-kety arlkarirreyel. Rernem ikwer irrpelthirreyel. Rernem aynikwek-then amikwek-then awelhey-angenh, inkwerelhey-angenh. <sup>31</sup> Rernem arwengkirreyel, rernem irrtwyerreyel apek, rernem ingwer-rnemek amperrngirrey-angenh apek, rernem nthahenk ingwerenty amek-arey-angenh. <sup>32</sup> Rernem kel akalty, Akngey angkek-angkwarr-antey, ra apmwangkwarr alheyl-rnemekty ipmelhem. Rernem apmwangkwarr arternp anerl-anem. Rernem ingwer-rnem rwewileyel apmwangkwarr ingkerr rernem anayntetyek.

## 2

*Akngeyel ingkerrenh akngakeyenh arraty*

<sup>1</sup> Ntwa ingwer-rnem ayntarrp-ilenty, nga apmwelhilemarl. Akngeyel areyel, ntwarl ilek-ilek mpwareyel apmwangkwarr apenteyel. Nga ayntarrp ilehem ament. Akngey-kenh-angkwarr arratyirretyek-arrpantey. <sup>2</sup> Akngeyel apmelerr-angkwarr atwem, ingwerentyel apmwangkwarr mpwarenty. Arraty-angkwarr alakenh. <sup>3</sup> Ntwa iterl-areyel

Akngeyel apmwer nemant atwenty-arrpan tey. Akngeyel ngenh atwem arrpemarl, ntwa apmwa mpwarenty. <sup>4</sup> Nga apek iterreyel, Akngeyel ngenh arntarnt-arenty-arrpan tey. Akngey ngkweng mwerr lwewarrernelhem, nga ikwer-warl angkepirretyek.

<sup>5</sup> Nga apek apmwekety angkepirrey-angenh, Akngeyek mwantyel awelhey-angenh, Akngeyel ngenh atwemarl arlta ikweren hel. Ingkerren hel renh iterl-areyen h, angka ikweren h arrayt inngarl aynteyel. <sup>6-7</sup> Arlta ingkern ikweren hel, ra ingkerren ilek-ilek mwerr-angker antheyen h, rernemar lkweren-h-angkwarr apenten h. Mwerr-angkwarr apenten h, ran iterreyel intem-antey anayntetyek. Akngeyel renh itethileyen arrpemarl arlta ingkernel. <sup>8</sup> Ingkart-kety intwemelirreyel, ament-angkwarr alheyel-rnem, ranem renh-rnem ingkerren h atwem, Jew-rnem-tangkwel, Jew-weny-rnem-then. Akngeyel renh-rnem arntety antheyen h. <sup>10</sup> Mwerr-angkwarr apenteyel-rnem, Akngeyel mwerr anayntem ikwer-rnem-itwel, ikwer-rnem inkwerelheyen h, Jew mwerr-rnem arrwekel-antey, Jew-weny-rnem-then. <sup>11</sup> Akngeyel-anem ingkerren h-antey akngakey en h arrayt-angkwarr, Jew-rnem-then Jew-weny-rnem-then.

<sup>12-13</sup> Jew-weny-rnem Akngey-kenh angka arrwekele nyek akwerrp-rnem, ament-warl alheyel-rnem, Akngeyel renh-rnem ywerrelhileyen h. Jew ingwer-rnem arwarl awelhenh-rnem, rernem Akngey-kenh-angkwarr apentey-angenh, Akngeyel renh-rnem atwem angka arrwekele nyarl aynteyel-angkwarr ikwer-rnem. Ingwer-rnem Akngey-kenh-angkwarr arrayt yarl anen h-rnemant, Akngeyel renh-rnem arrayt antwem.

<sup>14-15</sup> Jew-weny-rnemel Akngey-kenh angka apentey-angenh-antey, angka Moses- elarl arrernek-angkwarr. Rernem angka arrwekele ny ikwer-rnem-kenhant apenteyel. Akngey-kenh angka arrwekele ny iterl-aren h, akwerrngelant atnyen en h. Akngeyel renh-rnem iylpangkelhilen h, rernem iterreyel, nthenh-angkwarr apenterl-ayntetyek, apmwangkwarr apek, mwerr-angkwarr apek. <sup>16</sup> Arlta ingkernel, Akngeyel ingwelem Jesus Christ arrerneyen h, rarl ingkerren h akngaketyek, nthakenharl rernem iterreyel-angkwarr. Rernem irrytewelheyen h-angenh, Akngeyel areyelarl-kety. Alakenh-anyem angka mwerr-angker athan ileyel.

### *Jew-rnemel angka Akngey-kenh arrwekele ny-angkwarr ywarn apenteyel*

<sup>17-18</sup> Alakenh aynteyel Jew-rnemek, arrantherr Akngey-kenh-rnem akwel, Akngey-kenh angkek akalty-arrpan tey, arrayt-angkwarr apenteyel-arrpan tey. <sup>19</sup> Arrantherr Jew-rnem tnakelheyel arrantherr ingkerren h mwerr-angkwarr akalty-antheyel, atnwenheyel renh-rnem, ingwemerntel aneyel-apeny-rnem, rernem angkepirretyek. <sup>20</sup> Arrantherr Jew-rnem tnakelheyel arrantherr akwerrp-rnem akalty-anthteny-arrpan tey, angka arrwekele ny-angkwarr atnyen etyek. Arrantherr tnakelheyel, arrantherr Angka Akngey-kenh-angkwarr apenterl-anen y-arrpan tey.

<sup>21</sup> Arrantherr ingwer-rnem akaltyilem, arrantherr ament akaltyirrey-angenh arrpemarl. Arrantherr ingwer-rnem ilem, anyelkel iney-angenh anetyek. Arrantherr anyelkelar l ineyel. <sup>22</sup> Arrantherr ingwer-rnem akaltyilem, ingwer-kenh mpweny ikngwey-angenh anetyek. Arrantherr ingwer-kenh mpweny ikngwem arrpemarl. Mpwarekarl-penh ingkart-arrpan tey-rnem-kety apmwernem arrantherr ipmelhetyek-arrpan tey arrkernalheyel ywarn. Arrantherr anyelkel ineyel-antey. <sup>23-24</sup> Arrantherr tnakelheyel arrantherr Akngey-kenh arrwekele ny-angkwarr apenterl-anen y-arrpan tey. Arrantherr Akngey-kenh arrwekele ny-angkwarr apmwangkwarr apenteyelarl-kety, alakenh-anyem apmer ingwer-areny-rnem Akngeyek irrpelthirreyel."

<sup>25</sup> Artwa mpwarenty, mwerrarl atweken h-angkwarr. Angka impen nhanyem angka arrwekele ny-angkwarr apenterl-ayntetyek. Angka arrwekele ny renh apentey-areny, ikwer inkwerelhemel. Arrantherr Akngey-kenh-angkwarr apmwelhility, arrantherr arrangkwarl, ikwerety intwemelirrem. <sup>26-27</sup> Artwa Jew-weny ikwer-rnem-kenh-angkwarr artwirrey-angenh arrangkw, rap Akngey-kenh-angkwarr apenten h, rap arrayt-angkwarr aneman, Jew arrayt-angkwarr aneyel-rnem-apeny. Akngeyel renh-rnem mwerr antweyel, Jew artwernemel Akngey-kenh angka arrayt apenteyel-apeny. Jew-weny-rnemel arrenhantherr ayntarrp-ilem, arrantherr Akngey-kenh angka innga apentey-angenh-thy.

<sup>28</sup> Rernem Akngey-kenh-angkwarr arrayt apenten h, rernem Jew-kenh-angkwarr arrayt apentem-apeny. Jew ingwer-rnem angath-antey apenteyel, arrangkw, arrayt innga apentey-angenh. <sup>29</sup> Ingwerel-rnem apenteyel Jew-rnem innga apenteyel-apeny. Itnweng Rlwartel renh-rnem akalty-anthek, Moses-kenh-angkwarr-weny. Akngey ranem ikwer-rnem inkwerelhem arrpemarl, ahern-areny-kenh-angkwarr-weny.

**3**

<sup>1</sup> Akngey-kenh-angkwarr apenteyelel, mwerr apek aynteyel artwa mpwaretyek Jew-kenh-angkwarr? Akngey-kenh-angkwarr Jew-rnem mwerr-ayteng aneyel? <sup>2</sup> Ikwer-nem-tangkwel Akngeyel angka ikwerenх arrernek, rernem apenterl-ayntetyek.

<sup>3</sup> Jew ingwer-rnemel arraty-angkwarr apentey-angenh. Akngey-kenh-angkwarr anwantherr menty-anem ipmelhey-angenh, rernem ipmelhek-apeny. Akngeyel angka arrwekel arrernek, nthakenh iparey-angenh. <sup>4</sup> Arrangkw! Ingwerenty irrywerrenty, Akngey-kenh angkekety intwemelirrey-angenh. Akngey-kenh angka arrwekeleny alakenh aynteyel: "Akngey-kenh angka arraty innga, nthakenh ingwerentyel court-warl arrerney-angenh." <sup>5-6</sup> Jew-rnemel apmwangkwarr apententy, arraty Akngeyel renh-rnem atweyenх. Ingwerl-rnem renh-rnem areyenh, rernemarl Akngey-kenh-angkwarr apmwelhilek. Rernem iterl-arem-anem, Akngey arraty inngarl. Arraty ahern-areny-rnem atweyenх? Mwerr Akngeyel apek renh-rnem tyarlewetyek apmwangkwarr? Arrangkw innga. Arraty-angkwarr ra Jew-rnem anwenhantherr akngakeyenh, anwantherr ingkerrenh apmwelhilek-kety.

<sup>7</sup> Jew ingwer-rnem angkek, ayeng Akngey-kenh-angkwarr apmwelhility, rernem Akngey renh iterl-arem-anem arraty inngarl. Akngeyel apek ayenh menty atwey-angenh. Mwerr alakenh? <sup>8</sup> Ingwer-rnemel ayenh ayntarrp-ilek, ayeng alakenh rwewilerrenty-arrpantey. Ayeng nthakenh Akngey-angkwarr arratyirrey-angenh-arrpantey. Akngeyel renh-rnem atweyenх.

*Ahern-areny-rnemel arraty-angkwarr apentey-angenh*

<sup>9</sup> Jew-rnem anwantherr apek mwerr-ayteng ingwer-rnem-angkwarr, anwantherr angka Akngey-kenh-akerting? Arrangkw. Anwantherr apmwakert ingkerrenh aneyel, Jew-rnem-then Jew-weny-rnem-then. <sup>10</sup> Akngey-kenh angka arrwekeleny alakenh aynteyel: "Nthakenh anyent apek Akngey-angkwarr amentel arratyirrey-angenh. Rernem arratyirretyek-arrpantey arrkernelhenh ywarn. <sup>11</sup> Rernem Akngey renh iterl-arey-angenh. Arraty-angkwarr apentetyek arrkernelhey-angenh. <sup>12</sup> Rernem intwemelirrek Akngey-kety, ingkerrenh-antey. Rernem apmwangkwarr apenteyel, ingkerrenhel. <sup>13</sup> Rernem arrakertel apmwel-areth ileyel. Rernem irrywerremel ileyel. <sup>14</sup> Rernem apmwilem, ilterl-anemel. <sup>15</sup> Rernem ingwer-rnem atwetyek arrkernelheyel. <sup>16</sup> Rernem irrwernelheyel, rwewilirreyel. <sup>17</sup> Rernem tnwherant-arey irrentirreyel ingwer-rnem-itwek. <sup>18</sup> Rernem Akngeyek iterrey-angenh arrangkw, amentewarl." Akngey-kenh angka arrwekeleny aynteyel. <sup>19</sup> Alakenh Akngeyel angka arrwekeleny arrernek, Jew-rnemek, rernem iterretyek ikwer. Arraty-arrpantey tnakelhemarl-kety, anwantherr ahern-areny-rnem iterl-aretyek, rernemarl apmwangkwarr ingkerrenh alhenh. <sup>20</sup> Anyent apek nthakenh Akngey-angkwarr arratyirrey-angenh, angka arrwekeleny-angkwarrant apententy. Akngey-kenh angka arrwekeleny-angkwarr, rernem iterl-arelhem rernem apmwakert-antey aneyel.

*Akngeyel ileyel ingkerrenh ikwerenх-angkwarr arratyirretyek, rernem Jesus renh tnakenty*

<sup>21</sup> Aley alakenh anwantherr arratyirretyek Akngey-kenh-angkwarr. Alakenh angka arrwekeleny aynteyel. Alakenh Akngeyel arrernek ikwerenх-angkwarrant, Moses-kenh-weny-angkwarrant. <sup>22</sup> Rernem Jesus Christ tnakenty, rernem Akngey-angkwarr arraty anem, Jew-rnem-then Jew-weny-rnem-then ingkerrenh-antey. <sup>23-24</sup> Ingkerrenh nthakenh Akngey-kenh-angkwarr arraty aney-angenh ament, Akngey irrwerl-areny iterl-arey-angenh, rarl rlterrk innga aneyel. Akngeyel iwerr anwekantherr mpwarek Jesus Christ-angkwarr. Ra ingkerrenhek katy ilwek, ra renh-rnem anyentelhilek Akngey-warl, rernem Akngey-kenh-angkwarr arraty anayntetyek, alyelk. <sup>25-26</sup> Awank-akerr arrwekeleny-rnem atnwenth-tangkwel atwennh, aker tyenkerr arrernetyek, rernem Akngey-angkwarr arratyirretyek. Alakenh Akngeyel Christ renh antek, rernem ipmek atwetyek, ingkerrenhek katy ilwetyek, tyenkerr-apeny, ingkerrenhel. Akngey ra ingkerrenhek lwevarrernelhek, ra arraty innga aneyel. Rernem renh tnakenty, Akngeyel renh-rnem ayntarrp-iley-angenh, alyelk-apeny rernem anayntetyek. Apmwangkwarr alhenh-rnem ra ahern-areny menty tyarlewek, ywerrelhilem atwey-angenh. Christ ra ingkerrenhek katy ilwek, rernem arraty ingkerrenh anayntetyek. Ranem ikwerenх-angkwarr arratyilek, rernem mwerr-angkwarr apenterl-ayntetyek. Rernem arraty-angkwarr anem, rernem Jesus renh apententy.

<sup>27-28</sup> Alakenh-they ingkerrenhel nthakenh arraty-arrpantey tnakelhey-angenh, Jesus-ant tnakem. Angka arrwekeleny-angkwarr apententy nthakenh arratyirrey-angenh Akngey-kenh-angkwarr. Anwantherr akalty, anwantherr Jesus renh tnakenty anwantherr Akngey-kenh-angkwarr arraty aneyel. Angka arrwekeleny arrangkw.

<sup>29</sup> Akngey ranem ingkerrenhek aneyel, Jew-rnemek-then, artwa Jew-weny-rnemek-then. <sup>30</sup> Rernem Jesus renh tnakenty, Akngeyel renh-rnem arraty antwem, Jew-rnem-then, Jew-weny-rnem-then. <sup>31</sup> Anwantherr Jesus renh tnaketyl, anwantherrap angka arrwekeleny-kety ipmelhey-angenh. Arrangkw, aleth-antey iterl-areyel Akngey-kenh-angkwarz apenterl-ayntetyek.

## 4

*Akngelyel Abraham artwa arraty innga arek, rarl Akngelyek awelhenh*

<sup>1</sup> Atha angka Abraham-akert ileyel, rarl arrwekeleny anwekantherrenh ahern-areny-kenh, ra arratyirrek Akngey-kenh-angkwarz. <sup>2</sup> Abraham ament arratyirrey-angenh, tnakelhey-angenh, ahern-areny-kenh-angkwarz. Akngey-kenh ament arrpemarl aynteyel. <sup>3</sup> Akngey-kenh pipel aynteyel: "Akngelyel Abraham artwa arraty innga arek, rarl Akngelyek awelhenh."

<sup>4</sup> Ingwerenty warrkirrentyan atyetyartek, rap renh man anthem warrk-penphant, rarl ikwer warrkirrek. Mareny weth-lkwer, man anthetyek. <sup>5</sup> Akngey-kenh-angkwarz aynteyel ingwer-antey, ament arrpemarl. Ahern-areny-kenh-angkwarz aynteyel warrk-angkwarz. Akngeyel anwenhantherr atnyenem arwa alhewerarl. Ahern-areny-rnem Akngey renh tnakenty, Akngeyel renh-rnem arraty areyel. Anwantherr ywarn-antey arratyirretyek arrkernelheyel ahern-areny-angkwarz. Akngeyel ahern-areny apmwamwam irrpelthel arratyileyl, renh tnakentyleyl. <sup>6</sup> Akngey-kenh pipel aynteyel arrpemarl, David angkek arrpemarl. Apmwakert-antey areyel-rnem, amentewarl alheyel-rnem, aleyan Akngeyel apmwa ikwer-rnem-kety iwem, renh-rnem apmwa antwey-angenh. Rernem ywarn arrkernelheyel arratyirretyek ikwer-rnem-kenh-angkarrant, rernem Akngey tnaketyek. Akngeyel renh-rnem arratyant areyel, ikweren-angkarrant. <sup>7</sup> "Rernem irrkngerney-anem areyel. <sup>8</sup> Ingkartel nthwekern renh apmwa antwey-angenh. Ra irrkngerney-anem areyel."

<sup>9</sup> Nthakenh? Jew-kenh-angkwarz apenteylel-rnemek ilkelheyel? Arrangkw. Ra ingkerrenhek ilkelheyel artwekenh-angkwarz apenteylel-rnemek, artweweny-rnemek-then, ingkerrenhek ra ilkelheyel. Akngeyel Abraham renh arraty arek, rarl ikwer awelhenh. <sup>10-11</sup> Ilenger Akngeyel Abraham renh alakenh ilek? Arrwekel-antey Abraham ra Akngey tnakenh. Ikwer-penh ingkern-anem ra arwa artwirrek. Akngeyel angka arrernek ikwer, iylpangkelhiletyek, angkan ikwerenhl arlpimpil-ayntetyek apmer arrpanenh-warl, ingwer-rnem-warl, rernem Akngey-kenh-angkwarz arratyirretyek arrpemarl. <sup>12</sup> Abraham arrwekel anenh, ingkerrenhek, rernemar Akngeyek awelheyel, Abraham Akngeyek arrwekel awelhenh-apeny, Abraham ra arrwekel anenh-apeny arrpemarl artwirrey-angenh-antey. Ra Akngey tnakenh, ingkern-areny-rnem rernem tnakayntetyek apenterl-ayntetyek ikweren-angkwarz-antey.

<sup>13</sup> Abraham Akngeyek awelhenh, arratyirreynak Akngey-kenh-angkwarz. Alakenh-anyem Akngeyel renh alhelek ikweren-hrnem akngerram-akngerriletyek, apmer arrpanenh-warl arlperryirretyek. Jew-rnem-kenh-angkwarz arrangkwarl, ament arrpemarl aynten, ahern-areny-kenh-angkwarz-apenyarl. <sup>14</sup> Anantherr Jew-kenh-angkwarz apententy, anwantherr Akngey-kenh angkekety amentirrem, anwantherr arrangkwarl, menty ipmem.

<sup>15</sup> Akngeyel arntety anthem apmwangkwarz apententyan. Akwerrp-rnem, angka arrwekeleny iterl-arey-angenh rernem nthakenh Akngey-kenh-angkwarz apmwelhiley-angenh. <sup>16</sup> Ingkerrenh akarrirrem Akngey-warl, rernem Jesus renh tnakenty, Moses-kenh-rnem-then ingkerrenh ingwer-rnem-then. Rernem Akngeyek awelheyel, Abraham rarl Akngeyek awelhenh-apeny. Akngeyel iwerr mpwarek ikwer-rnem arrpemarl, ingkerrenhl anyent-angkwarz apenteylel-ayntetyek, Abraham-kenh-rnem arrpemarl, Abraham-kenh-angkwarz apenteylel arrpemarl. <sup>17</sup> Akngey-kenh angka alakenh aynteyel: "Akngelyel Abraham renh alhelek, ikweren-hrnem akngerram-akngerriletyek, rernem apmer arrpanenh-warl arlpimpirr-ayntetyek." Akngeyel Abraham renh alhelek, rarl ikwer awelhek. Akngey rey-antey ingkerrenharl ra arrpmernekk, ilek-ilek, ipmepenh itethiley-angker.

<sup>18-20</sup> Arleng-alenty Abraham ampek mpwelhenh ywarn-antey, ipantey, renh-atherr anthetyek. Ra artwamp innangan irrek, aherrety 100-anem, apekap-anem irrek, Sarah-then-antey. Abraham Akngeyek irrpelthirrey-angenh, mwerr Akngeyek awelhenh, rarl renh arrwekel ilek. Ra Akngey tnakek innga. <sup>21</sup> Ra Akngey renh tnakenh innga, Akngey rarl rlterrkarl anenh. <sup>22</sup> Alakenh-anyem Abraham renh Akngeyel ilek, "Nga atyeng-angkwarz arraty areyel." <sup>23</sup> Akngeyel angka artwa anyentekant arrerney-angenh, angka arrernek ingkerrenhek. <sup>24</sup> Angka anwekantherr ingkerrenhek aynteyel. Akngeyel

Jesus ipmepen akemelhilek. Anwantherr renh tnakenty Akngeyel anwenhantherr ilém arrpemarl, "Nga atyeng-angkwarr arraty aneyel." <sup>25</sup> Akngeyel Jesus renh thwenek, rernem renh menty ipmek atwetyek. Ra katy anthelhek, ra apmwaa anwekantherretty iwetyek. Akngeyel renh itethilek, anwantherr Akngey-angkwarr arraty anayntetyek.

## 5

### *Akngelyel renh-rnem ileyel, "Arrantherr atyeng-angkwarr arraty aneyel"*

<sup>1-2</sup> Anwantherr Jesus renh tnakenty, anwantherr Akngey-angkwarr arraty aneman. Akngeyel anwenhantherr atnyenem Jesus Christ-angkwarr. Ingkart anwekantherrenh. Anwantherr mwarrant-arey ingkerrenh aneyew. Anwantherr inkwerelhemel mpwelheyl Akngey ikwer, rarl anwekantherr iwerr mpwarek. Ra apey-alpeyenr rlterrk ilkwakert apmer mwerr-angker-warl akngelyneteyek. <sup>3-4</sup> Ingwer-rnemel anwenhantherr ilperteleyek arrkernelheyel. Rernem irrwerneyel. Anwantherr mpwelheyel inkwerelhemel Akngey ikwerant, anwantherr rlterrk anayntem. Akngeyel anwenhantherr rlterrilek. <sup>5</sup> Anwantherr ywarn mpwelhey-angnen arrangkw. Akngeyel Itnweng Rlwart impen anwekantherr-warl thwenek. Ikwer-penh iterl-areyel-anem, Akngey anwekantherr ilkelheyel.

<sup>6</sup> Anwantherr apmwangkwarr alhenharl, anwantherr apatemel aneh, Akngey iterl-arey-angnen. Jesus katy ilwek apmwernehm ingkerrenh, anwenhantherr itethiletyek, arlaa arraty anyent ikwerel-antey. <sup>7</sup> Ahern-areny kel nthakenh ingwerek katy ilwey-angnen, artwa mwerrek apek. <sup>8</sup> Akngey-kenh-angkwarr ingwer-antey ament arrpemarl. Akngey ingkerrenh ilkelheyel, awank-antey, anwantherr apatemel anew-aneh, apmwangkwarr alhenh-angkwarr Christ ingkerrenh katy ilwek anwekantherr ingkerrenh apmwangkwarr aneh-rnemek.

<sup>9</sup> Jesus-kenh arrkngel anwenhantherr irrarlkemel arratyilek, anwantherr arraty Akngey-kenh-angkwarr aneman. Akngeyel anwenhantherr nthakenh atwey-angnen. <sup>10</sup> Arrwekel anwantherr amentewarl alhenh, Akngey iterl-arey-angnen, Akngey-kety arlkirrenh, artwa apmwernem. Aley-anem anwantherr Akngey-kenh-rnem-anem. Alerikw ikwerenh anwekantherr katy ilwek. Rap itethirrek-anem, ra anwenhantherr itethiletyek arrpemarl. <sup>11</sup> Anwantherr Akngeyek inkwerelhetyek, rarl Ingkart Jesus Christ thwenek, ingkerrenh Akngey-angkwarr pweytilek, anwantherr ikwerenh-rnem anetyek.

### *Adam-then Christ-then*

<sup>12</sup> Artwa arrwekeleny Adam alakenh apmwelhilek. Ranem ilwek. Ingkern-penh-nem alakenh apmwelhilem arrpemarl. Rernem ilwem arrpemarl. <sup>13</sup> Akngeyel angka 10 Moses renh anthey-angnen-antey. Artwa arrwekeleny-rnem apmwelhilek, rernem iterl-arey-angnen aneh akwerrp. Alakenh-kety Akngeyel renh-rnem apmwa antwey-angnen. <sup>14</sup> Arrwekeleny rernem kel-antey ilwek ingkerrenh. Adam-kenh aneh-rnem rernem ingkerrenh ilwek apmwakert, Moses-ek-atwety. Apalarl aneh-rnem rernem ingkerrenh ilwek. Adam-tangkwel arrwekeleny aneh, Jesus apetyetyek-alenty. Artwa arrwekeleny Adam ra iwerr apmwa mpwarek. Artwa ingwer ingkern-theylar apetyek, ra iwerr mwerr anwekantherr mpwarek.

<sup>15-16</sup> Artwa ratherr amentant atherr. Adam Akngey-kenh-angkwarr apmwelhilek. Ingkerrenh ilwek. Ra arrwekel iwerr mpwarek anwekantherr, aleyarl aynteyel-antey. Jesus Christ ranem apetyek mwerr-angker mpwaretyek. Artwa anyent-angkwarr ra apmwa ingkerrenh-they iwey-angker. Anwantherr arratyirretyek ikweren-h-angkwarr, rarl iwerr mwerr-angker mpwarek anwekantherr, anwantherr arraty anetyek Akngey-kenh-angkwarr. <sup>17</sup> Artwa anyent apmwelhilek-they, ingkern-penh ingkerrenh ilwek. Artwa anyent ingwer-anem apetyek, Jesus Christ-anem. Ra iwerr anwekantherr mpwarek. Akngeyel anwenhantherr ilek, "Arrantherr atyeng-angkwarr arraty aneyel." Anwantherr intem-antey iteth aneyel.

<sup>18</sup> Artwa anyent apmwelhilek. Ahern-arenyel Adam-kenh-angkwarr apmwangkwarr apentenh. Alakenh arraty Akngeyel ahern-areny ingkerrenh ipmek atwetyek. Artwa anyent ingwer arraty-angkwarr apentenh, iwerr mpwaretyek, rernem arratyirreneyteyk, ra apmwa ingkerrenh-kety ilwek, rernem iteth intem-antey anayntetyek. <sup>19</sup> Artwa arrwekeleny anyent Akngeyek awelhey-angnen. Alakenh-angkwarr rernem apmwangkwarr alhenh. Artwa ingwer Akngeyek awelhenh. Ra iwerr mpwarek ingkerrenh. Alakenh-angkwarr, ingwer-rnem arratyirreynem mwerr-warl-athek.

<sup>20</sup> Akngeyel angka arrwekeleny arrernek, rernem iterl-areyek, rernemarl apmwangkwarr apentenh. Akngeyel iwerr mpwarek ikwer-rnem, renh-rnem artwa alhewer

itethileyek.<sup>21</sup> Apmwangkwarr apenten h rernem ilwek-anem. Jesus-arl apenteyel-rnem rernem arratyirrek, rernem intem-antey iteth anayntetyek. Alakenh-anyem Akngeyel arrernek ikwer-rnem, Jesus Christ Ingkart anwekantherrenh alakenh arrernek ingkerrenhek.

6

Anwantherr itethirretyek Christ-angkwarz; apmwangkwarz alhey-angenh

<sup>1</sup> Ingwer-rnem iterreyel apmwangkwarz apentetyek, apmwekety rernem angkepir-renty mwerrarl Akngey ikwer-rnem inkwerelhetyek-arrpantey, rernem angkepirren-tyekan. Alakenh rernem apmwangkwarz apenteyel aleth, "Alerl ayeng angkepirretyek wenh!" <sup>2</sup> Alakenh anwantherr iterrey-angenh arrangkw! Kel anwantherr apmwekety ipmelhek, nthakenh anwantherr apmwangkwarz alhey-angenh. <sup>3</sup> Anwantherr baptise inemel, anwantherr ingkerreh Jesus-warl-anem anyentirrek. Anwantherr baptise irrenty anwantherr Jesus-angkwarz aylpeman, rarl anwekantherr ilwek. Ra ahern nenh iwerl-alhek, anwantherr apmwa ahern-areny iwerl-alhek arrpemarl, renharl apenteh-rnemel. <sup>4-5</sup> Jesus awenngel ayntek, arka lyerten-angenh itethirrek. Baptise-angkwarz Jesus-el anwenhantherr anyentelhilem ikwerenh-warl. Anwantherr lyerten-angenh irreyeh arrpemarl. Akngeyel Jesus renh irrpelthel itethilek anwantherr itethirretyek ikwerenh-angkwarz arrpemarl. Alakenh-they Akngeyel anwenhantherr-anem ak-wentileheyen, arka lyerten-akert Jesus akemirrek-apeny. <sup>6</sup> Jesus anwekantherr katy ilwek, apmwa anwekantherrety iwetyek. Akngeyel apmwa ywerrelhilek. Anwantherr apmwekety ipmelhey-areny, ikwerenh-angkwarz apentemel. Anwantherr ahern-areny apmwamwam apentey-angenh arrangkw. <sup>7</sup> Jesus rarl ilwek-apeny, anwantherr apmwekety ipmelhek arrpemarl, apmwangkwarz apentekerr.

<sup>8</sup> Jesus rarl ywerrek-apeny, anwantherri ywerrem arrpemarl. Anwantherri itethaneyel ikwer-angkwarz. Jesus rarl itethirrek-apeny, anwantherri itethirrem arrpemarl.  
<sup>9</sup> Akngeyel Christ renh ipmepenih itethilek, rarl anwenhantherri ipmepenih itethileyen arrpemarl. <sup>10</sup> Ra ilwek anyent-inger-antey. Ra intem iteth anem, Ingkart Akngey ikwertwek. <sup>11</sup> Jesus-el apenteyel-rnem, arrantherri iteth intem-antey anyenehy arrpemarl. Arrantherri anyentirrek Akngey-warl. Jesus-el Christ iwerr mpwarek.

<sup>12</sup> Arrantherr iterreytek mwantyel. Arrekantherrenh-angkwarz amentewarl alhey-angenh, apmwangkwarz alhey-angenh. <sup>13</sup> Arlka apmwangkwarz anthelhey-angenh, Rant arrenhantherr itethilek, arrewaly aytenten-penhan. Akngey-kenh-angkwarzarrant anthelhetyek menty, mwerr-angkwarz-ayteng, itethilenh-ilenh impen-angkwarz-antey, arraty-angkwarz apenterl-ayntetyek. <sup>14</sup> Akngeyel iwerr mpwarek. Angka Akngey-kenh-angkwarzarrant apenterl-ayntetyek, impen-angkwarz nthakenh apmwelhiley-angenh. Jew-kenh arrwekeleny-angkwarz angath-anteyarl arrangkwarl, nthakenh Akngey-angkwarz arratyirrey-angenh ikwer-angkwarz.

<sup>15</sup> Akngeyel iwerr lyerteny anwekantherr mpwarek, Jesus-angkwarr apenterl-ayntetyek. Ingwer-rnem iterreyel angka arrwekeleny Moses-kenh ikwerety amentirretyek, alakenh rernem amentewarl alhem. Arrangkw innga, anwantherr alakenh iterrey-angenh. Nthakenh anwantherr apmwel-areth mpwarey-angenh, mwerr-angkwarr anayntetyek. <sup>16</sup> Arrantherr arlka apmwek anthelhenty, arrantherr apmwakert-antey ilweman, apmwa atyetyart arrekantherren anem. Arrantherr Ingkartek arlka anthelhenty, arrantherr Ingkart-kenh-angkwarr arrayt anem. <sup>17</sup> Ayeng Akngeyek inkwerel-heyel, arrantherrarl ikwer-warl angkepirrek. Awank-akerr arrantherr apmwangkwarrant apenten, apmwek anthelhemel. Aley arrantherr Akngey-kenh angka apenteyel, angka innga renh arrenhantherr akalty-andhek, renhant apenterl-ayntetyek. <sup>18</sup> Alakerh-they arrantherr Akngey-kenh ingkerrenh-anem ikwerenhant-anem apenterl-ayntetyek warrkenh ikwerhen-rnem anevel, apmwangkwarr apentev-angenh.

<sup>19</sup> Arrantherrarl ywarn iterreyelar-kety atha arrenthalerr mwantyel-antey ileyl. Awank-akker arrantherr arlka apmwek anthelhek. Aley arranthalerr Akney-kenh-angkwarz-anem apentevel, mwerr-angkwarz-ayteng.

<sup>20</sup> Awank-akerr arrantherrl apmwangkarrant apenten Akngeyek awelhey-  
angen. <sup>21</sup> Lyert arrantherr nyer-anem irreyel. Apmwangkarrant apenteny,  
Akngeyel ngenh atwem, ngap ilwem-anem. <sup>22</sup> Lyert anwantherr apmwangkwarz  
aney-angenh-anem. Akngeyel-anem arrenhantherr rlterrkietyek, Akngey rant-anem  
atyeyart arrekantherrenh aneyel. Arrantherr warkenh ikwerenh. Ra arrenhan-  
therr ayerpileyehn, iteth intem-antey aneyeh. Ramem arrenhantherr itethileyen.  
<sup>23</sup> Apmwangkwarz apenteny, rap kel ilwem apmwakant-antey. Akngeyel arrernek,  
ingkerrenh iteth atnyenetyek. Alakenh-anyem anwekantherr iwerr mpwarek. Ingkart

anwekantherrenh Jesus Christ renh apententy, anwantherr iteth aneman, ikwerenh-angkwarr anyentirrem.

## 7

### *Angka arrwekeleny apentetyek ilwetyek-atwety*

<sup>1</sup> Atyenhr-nemay, arrantherr ingkerr kel akalty, ahern-arenyel angka arrwekeleny apentetyek ilwetyek-atwety, itetharl aneyel-rnemek. Ipmernemek arrangkwarl. <sup>2</sup> Artwa ra iteth aneyel-antey, anew ikwerenh kel aneyel ikwer-itwek. Artwa ilwenty, arelh ra kel menty-anem ament-anem anem. <sup>3</sup> Arelh ra anew ingwer ikngwenty, artwa ra iteth-antey aneyel-angkwarr, ra apmwelhilem. Artwa ikwerenh ilwek-kety, ra kel ingwer-itwek itengirreyek. Nthakenh ingwerentyel renh ayntarrp-iley-angenh. Arelh ipmelhem-anem. Alakenh-anyem ahern-arenyel angka arrwekeleny apentetyek ilwetyek-atwety, itetharl aneyel-rnemek. Ipmernemek arrangkwarl. Ahern-areny itetharl aneyel-rnemek angka arrwekeleny aynteyel.

<sup>4</sup> Lyerten-angkwarr apentetyek Christ-kenh-angkwarr anwantherr itethirretyek. Atyenhr-rnem, arrantherr itethirrey-angenh angka arrwekeleny-angkwarrant, alakenh-anyem anyentirrek Jesus Christ-warl, angka ingwer renhant-anem apentetyek, Christ-kenh. Akngeyel renh ipmepenah akemelhilek, anwantherr renh apentetyek, arraty Akngey-kenh-angkwarr apentetyek. <sup>5</sup> Anwantherr ahern-areny-kenh-angkwarrant apentenh, alakenh anwantherr Akngey-kenh angka arrwekeleny-angkwarrant apmwelhilek. Akngeyel anwenhantherr tyatymilek. <sup>6</sup> Aley Akngeyel anwenhantherr tyatymiley-angenh. Anwantherr Akngey-angkwarrant-anem apenteyel. Akngeyel anwenhantherr ayntarrp-iley-angenh. Itnweng Akngey-kenhel anwenhantherr lyerten-ilem. Angka arrwekeleny-angkwarr arrangkwarl, ikwerenh-angkwarrant anwantherr apenterl-ayntetyek, Itnweng-angkwarrant.

*Anwantherr iterl-arelheyel angka arrwekeleny-angkwarr, anwantherr apmwakert aneyel.*

<sup>7</sup> Angka arrwekeleny apmwa apek? Arrangkw innga! Ayeng akwerrp ananekerr, ayeng Akngey-kenh angka arrwekeleny-angkwarrant akaltyirrek, impenekey-antey. Angka alakenh aynteyel: "Nga iterrey-angenh ingwerenty-kenh ampwal anyelkel inetyek." Kel angka iterl-arek atha. <sup>8-9</sup> Ayeng artwa apmwantey aneyel. Alakenh ayeng ywarn arrkernelhenh, Akngey-kenh angka arrwekeleny-angkwarr apentetyek. Angka arrwekeleny-wenyankel ayeng mwerr-arrpantey anen. Ayeng angka arrwekelenyek akwerrp, mwerrarl ayeng anen. Ikwer-penh angka atha awek-penh, ywarn ayeng arratyirretyek arrkernelhenh, ayeng iterl-arelhek-anem ayeng apmwangkwarr-tangkewl anen. <sup>10</sup> Ayeng itethirrey-angenh angka arrwekeleny-angkwarr. Angka arrwekeleny-angkwarr ayeng ywarnarl arrkernelhenh. <sup>11</sup> Angka arrwekeleny awek-penh, ayeng apmwangkwarr anen, Akngeyek irrpelthirrenh, iteth-warl-athet apentey-angenh. <sup>12</sup> Angka arrwekeleny impen-antey. Angka arrwekeleny ingkerr impen, mwerr-ayteng. Akngeyel anwekantherr arrernek, arraty-ayteng anwantherr apentetyek.

<sup>13</sup> Angka arrwekeleny mwerrrel ayen apmwiley-angenh. Arrangkw innga! Angka ingkerrenh-angkwarr atha iterl-arelhek-anem, "Ayeng apmwanteyarl aneyel, angka Akngey-kenh-angkwarr apentey, ilwey-angenh-ayteng." Apmwangkwarr ingkerrenh aneyelek arwa angka nhenh anayntileyl.

<sup>14</sup> Angka arrwekeleny irrwerl-areny-kenh. Ayeng artwa ahern-areny apmwamwam. Ayeng apmwakert-antey aneyel, apmwangkwarrant apenteyel. <sup>15-16</sup> Ayeng ilkelhey-angenh apmwangkwarr apenterl-ayntetyek. Ayeng ywarn arrkernelheyel, arraty-angkwarr apenterl-ayntetyek-arrpantey. Ayeng ywarn iterreyel. Angka arrwekeleny mwerr atha iterl-areyl. <sup>17-18</sup> Ayeng ywarn arrkernelheyel mwerr-angkwarr anetyek-arrpantey. Ayeng akalty, arlka ayeng rlterrk-weny, ayeng ywarn-antey mwerr anetyek arrkernelheyel. Ayeng apmwelhileyl-antey. <sup>19</sup> Arratyirretyek-arrpantey ayeng arrkernelheyel ywarn-antey, athap apmwangkwarrant apenteyel. <sup>20-21</sup> Apmwa kwenel aneyel, atyengel-arleng. Apmwangkwarr alheyel apmeler. Aray, ayeng arrkernelheyel mwerr-angkwarr anetyek, ywarn-antey. Ayeng mwerr-angkwarr anetyek ilkelhenty, ayeng apmwekety angkepirretyek-anek-anem, ywarn-antey. <sup>22</sup> Ayeng Akngey-kenh angkek innga inkwerelhetyek arrkernelheyel. <sup>23</sup> Mwerr-angkwarr anetyek arrkernelheyel ayeng, arlka atyehn arrkernelheyel mwerr-angkwarr irretyek-arrpantey anyent-angkwarr, apmwangkwarr apek trhwerlewerreyel. Atherr-angkwarr apenteyel apmwangkwarr-then-antey. <sup>24</sup> Ayeng nthakenh irreyenh, Akngeyel ayen ipmek atweyenh ayeng apmwangkwarrant apenterl-anenty. Angwenhel ayen itethileyenh? <sup>25</sup> Ayeng Akngeyek inkwerelhem, rarl ayen itethilek, Jesus Christ, Ingkart anwekantherrenh-angkwarr.

Ahern-areny-angkwarr atha mwerr-angkwarr apentetyek-arrpantey iterreyel ayeng apmwelhilem-antey Akngey-kenh-angkwarr.

## 8

### *Itnwengel renh-rnem rlterrkileyel*

<sup>1</sup> Arranther Christ Jesus-angkwarr apententy, Akngeyel arrenhantherr atwey-angenh, awerr-wenyarl arrekantherr mpwelheyen, arlta ingkernel. <sup>2</sup> Arranther Jesus renh tnakenty, Itnweng Rlwartel arrenhantherr itethilem apmwekety, arranther iteth intem-antey aneyenh, ipma ayntey-angenh. Nthakenh ayntarrp-iley-angenh angka arrwekeleny-angkwarr. <sup>3</sup> Ahern-areny-rnem amentewarl alhenh, arratyirretyek-arrpantey ywarn-antey angka arrwekeleny-angkwarr amentel. Akngeyel Jesus renh thweneh ahern nhnenh-warl, ahern-areny anayntetyek, arlka menty anthelhetyek anwekantherr. Ra apmw aintegilek, anwekantherr ingerrenhek arwerl iylpeyl-atherrel ilwemel. <sup>4</sup> Itnweng Rlwart-akertan rernem arternpirretyek, Akngey-kenh-angkwarr rernem ingkerrenhel arraty apentetyek, ament-warl alhey-angenh.

<sup>5</sup> Ingwer-rnem ahern-arenyek iterreyel, ingwer-rneman Itnweng Rlwart-akertan irrwerl-arenyek iterreyel, apenterl-ayntetyek. <sup>6</sup> Anwantherrap ahern-areny-kenh-angkwarr apenterl-anenty, anwantherrap ilwemarl. Itnwengel akwerrng arratyileyel. Anwanther Itnweng Rlwart-akert anwantherrap iteth aneman, mwarrant-arey anem. <sup>7</sup> Apmwangkwarr apenterl-anenty, anwantherrap Akngey-kety amentirremarl. Rernem Akngey-kenh-angkwarr artewentyel iterrey-angenh. <sup>8</sup> Anwanther apmwangkwarr apententy, Akngey-angkwarr arraty aney-angenh. Akngey ranap anwekantherr inkwrelhey-angenhari.

<sup>9</sup> Ahern-areny-angkwarr ament-warl alhey-angenh. Arranther Akngey-kenh Itnweng-akertan mwerr arraty iterretyek. Itnweng Christ aney-angenh, ngap amentewarl iterreler-anem, apmwangkwarran. Itnweng Christ-kenh-kety amentirreman. <sup>10</sup> Christ-akert nga iteth aneyenh. Akngeyel ngenh inek, arratyilemel, ikweren-angkwarr apenterl-ayntetyek. Arlka kel ilweman, itnweng itetharl aneyel, ntwarl Akngey-kenh-angkwarr apenteyelan. <sup>11</sup> Akngeyel Jesus renh itethilek. Akngey-kenh Itnweng ngkweg-ittwel aneyel. Ra itnwengel arlka ahern-areny ngenh akemelhleyen.

<sup>12</sup> Atyeh-rnem, apmwangkwarr apentey-angenh, amentewarl alhey-angenh. <sup>13</sup> Ahern-areny-kenh-angkwarrant apenterl-anenty, ngap ilwem intem-anteyarl. Awerr anwanther anetyek, apmwangkwarr apentey-angenhari. Itnwengel anwenhantherr rlterrkilem, anwanther iteth anayntetyek. <sup>14</sup> Itnweng Rlwart-akert-rneman alerikw Akngey-kenh-rnem ingkerr. <sup>15</sup> Akngeyel itnweng apmwia arrekantherr-warl thweneh-angenh. Itnweng ikwerenhel anwenhantherr ater anthey-angenh. Itnweng Rlwart-akertelant anwanther irrwerl-areny renh Akngey akem. Arrangkwarl, arrangkwarl. <sup>16</sup> Itnwengel anwenhantherr akalty-anthem, anwantherrarl alerikw Akngey-kenh aneyel.

### *Mwerr-angker anwekantherr mpwelheyel, alker-areny-kenh*

<sup>17-18</sup> Ahern nhel apmwangketyarr aynteyneyle. Ahern nhel anwekantherr rlterrk aynteyel, ingwer-inger anwekantherr mwerr-awaty aynteyen. Alakenh-anyem anwanther artewentyel iterl-arayntetyek. Mwerr-angker anwekantherr mpwelheyel, alker-areny-kenh-angkwarran. Ingkerrenhel areyen Akngey renh, rlterrk ilwkakert. Anwanther Jesus Christ-itwek aney-alpeyeh, apmer mwerr-angker-ittwel intem-antey. <sup>19</sup> Ahern-areny ingkerrenh, Akngeyelarl arrpmernek, rernem mpwelheyel Akngey ikwerenhek-rnem, rernem aremirreyen ingkerrenhek, ingerrenhel renh-rnem iterl-areyen. <sup>20</sup> Aray, ahern-areny-rnem apmwelhilekar, Akngeyel ahern nhnenh apmwile awank-akerr. Ahern-areny-rnem apatemp mpwelheyel ikwer, ra ahern nhnenh mwerrileyneyek angkep arrpemarl. <sup>21</sup> Ahern renh-anem Akngeyel mwerrileyen, ingkerrenhel aketh-antey aretyek, alerikw ikweren-hrnem mwerr aneyel-apeny.

<sup>22-23</sup> Anwanther akalty, aley-anyem ingkerrenh ahern-areny apmwakert, ahern-areny arntytey irreyel. Anwanther alerikw ikweren-hrnem Itnweng ikweren-hakert, anwanther aketh-antey renh areyen, ra anwenhantherr arlka alker-areny-apeny antheyen. <sup>24</sup> Akngeyel anwenhantherr kel itethilek. Anwanther anngetherr arey-angenh-penh, anwanther mpwelheyel alerl-antey. <sup>25</sup> Anwanther anngelel anngetherr arey-angenh, anwanther arternp ikwer mpwelheyel, ra anwenhantherr mwerrileyneyek.

<sup>26-27</sup> Anwanther rlterrk-wenyarl, anwanther apateyel, Akngey renh ayernetyek. Itnwengel anwenhantherr rlterrkileyel. Itnweng ra Akngey-warl angkem. Itnwengel anwekantherr katy ayerneyel arraty-angkwarr. Akngeyel anwenhantherr iterl-areyel,

anwantherr iterreyel-angkwar. Akngeyel anwenhantherr aketh-antey areyel Itnweng-akertan.

<sup>28</sup> Akngey ra iwerr mwerr-angker mpwareyel ingkerrenhek, rernemarl renh apenteyelek-rnem. Ra arrernek ikwer-rnem arrwekel. Ingwer-rnemel renh-rnem ilpertiley-angenh. <sup>29</sup> Akngeyel arrwekel-antey rlwanek, alerikw ikweren-h-rnem anetyek, rernem alerikw ikweren h anyent arrwekeleny-apeny anetyek. <sup>30</sup> Akngeyel ikwer-rnem arrernek arrwekel, renh-rnem rlwatyetek, rernem ikweren h anayntetyek. Ranem iwerr mpwarek ikwer-rnem, rernem ikweren-h-angkwar aylpteyek. Ranem renh-rnem arraty innga arek ikweren-h-angkwar, ranem renh-rnem rlterrilek.

<sup>31</sup> Akngeyel anwenhantherr arntarnt-areyel. Anwantherr kel alakenh ilem. Alakenh-anyem anwantherr iterretyek, Akngey ra anwekantherr-itwel aneyel, ingwerel anwenhantherr ywarn ilpertilem. <sup>32</sup> Akngeyel alerikw ikweren ayerrpiley-angenh arrangkw. Ra menty anthek, anwekantherr ilwetyek. Alakenh-anyem Akngeyel anwenhantherr intem-antey arntarnt-areyenh irrpelthel. <sup>33</sup> Akngeyel kel anwenhantherr ayerrpilekarl, ikngwerel anwenhantherr ywarn irrtywerremel aytarrp-iley-angenh. Akngeyel anwenhantherr arratyant areyel. <sup>34</sup> Alakenh-they ingwerel anwenhantherr ywarn irrtywerremel aytarrp-iley-angenh, Jesus Christ ra anwekantherr kel ilwekarl. Ra arrewaly aytenth. Akngeyel renh angkep itethilek. Aley ratherr ilkwant-atherr irrwerlitwek arrwekel mpwelheyel. Ranem intem-antey Akngey ayerneyel, ra anwenhantherr arntarnt-aretyek.

<sup>35</sup> Christ ra anwekantherr inkwerelheyel, ingwerel anwenhantherr nthakenh ikwer-they akngakey-angenh. Rernem anwenhantherr ilpertileyek arrkernalheyel, anwekantherrety rernem arlkarireyel apek, arntety anthetyek Akngey-kenh-angkwar alheyel-kety. Christ-el anwenhantherr intem-antey atnyenem arrpemarl. Rernem anwenhantherr amern-weny ileyel apek, rernem arnkwa anwekantherren rakem apek, anwenhantherr ipmek atwem apek, rernem anwenhantherr Christ-they akngakey-angenh arrangkw, ra anwekantherr-itwel intem-antey aneyel. <sup>36</sup> Alakenh Akngey-kenh angka aytteyel: “Ngkweng-angkwar apenteyel-rnemek ingwer-rnem anwekantherr arrkernalheyel, anwenhantherr ilpertileyek. Rernem anwenhantherr atwetyek arrkernalheyel, artwel yep-yeparl akerek atwek-apeny.” <sup>37</sup> Ingwer-rnem anwekantherr arrkernalheyelarl ra anwenhantherr rlterrilek, anwantherr ingkerrenh rlterrilek anetyek. Christ ra anwekantherr inkwerelheyel. <sup>38-39</sup> Ayeng akalty innga anem, ingwerel anwenhantherr ywarn Akngey-they akngaketyek arrkernalheyel, rarl anwenhantherr inkwerelhemel areyel. Anwantherr iteth aneyel apek, anwantherr arrewaly aytent apek, Akngeyel anwenhantherr intem-antey areyenh. Angel-rnemel-then, arrenty ingkerrehel alker irrwerl-areny ingkerrehel anwenhantherr ywarn Akngey-they akngakeyen. Rernem irrwerlel aneyel, rernem ahern nhel aneyel apek, rernem anwekantherr lyert irrpelthirreyel apek, rernem anwenhantherr Akngey-they akngakey-angenh. Ingkart anwekantherrenh Jesus Christ ra anwekantherr ilwekarl, Akngey ra anwekantherr ilkelheyel.

## 9

### *Akngeyel Israel-areny-rnem-tangkwl rlwanek, ikweren-h-rnem anetyek*

<sup>1</sup> Ayeng Jesus Christ-angkwar arraty angkeyel, irrtywerremel angkey-angenh, arraty ayeng angkeyel. Itnweng Rlwart ra akalty ayengarl angkek-penh. <sup>2</sup> Ayeng aleth amperrngirreyel. <sup>3</sup> Ayeng artewentyel iterreyel atyeh-rnem Christ-warl anyentirretyek, <sup>4</sup> Akngeyel Israel-areny-rnem rlwanek, rernem alerikw ikweren-h-rnem anetyek, Ra renh-rnem ilkwilek. Ran ikwer-rnem lwewarrernelhek ra atyetyart rlterrilek ilkwakert aneyel. Akngeyel ikwer-rnem angka arrwekelely arrernek. Ra renh-rnem ilek ikwer-rnem-itwel anayntetyek. Akngeyel renh-rnem akalty-anthek, rernem arraty-angkwar apenterl-ayntetyek tyatyl ilkwitwel. Ra iwerr mpwarek ikwer-rnem akngerr-inger. <sup>5</sup> Arrwekeleny rernem atyetyart ilkwernem anen, Abraham, Isaac, Jacob. Ikwer-rnem-they-anem Jesus Christ aremirrek ingkern-penh. Anwantherr Akngey tnaketyek atyetyart ilkwa ingkerreh-kenh.

<sup>6</sup> Akngey-kenh angka aytteyel-antey, ipmelhey-angenh. Ingkern-penh ingwer-rnem Israel-kenh-rnem-arrpantey ilelheyel. Arrangkw, rernem Israel-kenh-angkwar apentey-angenh arrangkw, ikweren h aney-angenh arrangkwarl. Iwerr rarl mpwarek Jew ikwer-rnem, Jew ingwer-rnemel renh arraty apentey-angenh. <sup>7-8</sup> Ingwer-rnem aytarrp-ilelheyel Abraham-kenh-rnem-arrpantey. Rernem Abraham-kenh-rnem aney-angenh. Akngeyel renh ilek, “Isaac-angkwar atha ngkwenh-rnem akngerram-akngerrileyen.” Arrangkw ahern-areny-kenh-angkwar. Ikweren-h-rnemant, Akngeyel

arrwekel alhelenhey-alpenhan. Rernem Akngey-kenh-rnem innga. <sup>9</sup> Akngeyel Abraham renh ilek, "Aherrety anyent-penh ayeng apey-alpeyeh. Sarah-el ampa akely atnyeneyeh." Isaac renhey-antey Akngeyelar alhelek-antey.

<sup>10</sup> Angka nhenh iterl-aray! Rebekah-kenh atyewenheng-atherr, aynikw anyent-kenh-antey, artwamp Isaac-kenh, awey atherr, awayikw ikweren ayteyikwek awelhetyek. Alakenh-anyem Akngeyel arrernek ikwer. <sup>11-12</sup> Jacob Esau awey mwarrant-atherr. Akngeyelant ayteyikw rlwanek arrwekel-antey, ratherr born-irrey-alenty. Ra Rebekah renh ilek, "Awey ilkwa arrwekeleny ayteyikw ikwerenhek awelhetyek." Ikweren angkwarrant ra renh rlwanek. Ahern-areny-kenh-angkwarr renh arrerney-angenh arrangkwarl. Ra rlwanek, angkan ikweren arlpimpil-ayntetyek ikwer-angkwarrant. Alakenh ra arrernek ikwer arrwekel. <sup>13</sup> Akngey-kenh angka arrwekeleny aynteyel: "Ayeng Jacob-ek inkwerelhek, Esau-ek arrangkwarl."

<sup>14</sup> Nthaken? Akngeyel arraty ikwer arrernek, ngay? <sup>15</sup> Ra Moses renh ilek alakenhey arrpemarl, "Ayengan ilkelhenty, atha ingwer-rnem rlwanem, kelarl arntartn-arem renh-rnem. Ingwer-rneman arrangkwarl." <sup>16</sup> Ran ilkelheyel-angkwarr, Akngeyel ingkerrenh arntartn-arey-angker. Alakenh-anyemarl aynteyel, ahern-areny-kenh-angkwarr-weny, ikweren-angkwarrant. Angka ikweren alakenh aynteyel, anyent. <sup>17</sup> Akngey-kenh angka arrwekeleny alakenh aynteyel. Akngeyel Pharaoh renh ilek, "Atha ngenh atyetyart arrernek, ingkerrenhel ayenh iterl-aretyek, ayengarl rlterrk ilkawert. Angka atyenh arlpimpireyeh apmer arrpanenh-warl." <sup>18</sup> Alakenh-anyem Akngeyel ingwer-rnem ingkerrenh arntartn-arem arwa alhewer, ra ilkelhentyan. Ra ilkelhenty, ra ingwer-rneman awerrarl mpwarem, ikwer awelheyangarl.

<sup>19</sup> Ingwerentyel ayenh ayernem, "Alakenh anwekantherr arrernek kel arrwekel-antey. Ilekek-anem Akngeyel anwenhantherr akngakem?" <sup>20-21</sup> Artwa ingwerentyel ahern atnthepehn mpwarem tyampit apek, kap apek. Anwantherr ahern-penh arnwanekearl arrpemarl, ahern-arenyarl. Alakenh-anyem ahern-arenyel Akngey renh nthaken tyerneh-angenh. Ikweren-angkwarr arraty innga aynteyel, ament arrpemarl. Apmwamwam mpwarem, mwerr-angkeran mpwarem. Alakenh atnthepehn arrpemarl, ingwer apmwamwam ingweran mwerr-angkerarl arnwarnetyek, rarl ilkelheyel-angkwarr.

<sup>22-23</sup> Alakenh-apeny Akngeyan. Ra ingwer-rnem mpwarek, ikwer-rnem ahelirrek, renh-rnem ywerrelhiletyek-anek. Ranem renh-rnem menty amek-arek. Ranem ilkelheyel rernem ikweren-angkwarrant apenterl-ayntetyek. Ingwer-rnem ra arrwekel-antey rlwanek, ra renh-rnem arntartn-aretyek. Alakenh ingkerrenhel renh iterl-aretyek rarl rlterrk innga aneyel. <sup>24</sup> Akngeyel akngerr anwenhantherr arrwekel-antey rlwanek, Jew-rnem-then, Jew-weny-rnem-then.

<sup>25</sup> Hosea-kenh pip alakenh aynteyel: Akngeyel renh-rnem ilek, "Akngerr ingwer-rnem atyenh-rnem-weny, rernem atyenh-rnem alerl aneyeh. Awank-akerr ayeng inkwerelhey-angenh ikwer-rnem aneh. Ayeng ikwer-rnem inkwerelheyen-anem. <sup>26</sup> Arrwekel atha renh-rnem ilek, 'Arrantherr atyenh-rnem aney-angenh.' Apmer ingwer-areny-rnem atha antweyel, 'Alerey atyenh-rnem.' Ayeng innga itetharl aneyel. <sup>27</sup> Isaiah-kenh pip aynteyel arrpemarl, irrkaty-angkwarr, pip ingwer-itwek aynteyel arrpemarl, 'Israel-kenh-rnem akngerr innga aneyel, atha irrpetyap itethileyen.' <sup>28</sup> Atha Ingkartel anamerl arratyiletyek ayeaneyeh arlita ingkerel, arraty ilelhetyek. <sup>29</sup> Isaiah-kenh arrwekel ingkernekk pip-warl, 'Ingkartel rlterrk Sodom-areny-rnem-then Gomorrah-areny-rnem-then althenek. Ra menty atwey-angenh Jew arrwekeleny-rnem altheney-angenh, ywerrelhiletyek-anek. Ra Jew ingkerrenh altheney-angenh, ingkern-penh anwantherr aneyel-antey.'

### *Israel-kenh-rnemel Akngey renh arraty tnakey-angenh*

<sup>30</sup> Jew-weny-rnem arrkernelhey-angenh-antey angka arrwekeleny-angkwarr arraty anetyek. Akngeyel renh-rnem arraty arek, rernemarl renh tnakek. <sup>31</sup> Israel-kenh ingwer-rnem arrkernelhenh arraty anetyek-arrpanety, angka arrwekeleny-angkwarr apentemel. Ywarn-antey ipanteyp rernem arrkernelhenh. <sup>32-33</sup> Alakenh-anyem Akngey-kenh angka pipel aynteyel. Akngey angkek, "Atha apmer Zion-el apwert arrknert arrernek. Ingwer-rnem aytnem-apeny atyenh-angkwarr-kety, rernem aytnem, angath-antey. Renh-rnem ankertewel angath-antey. Angath-antey aytnek. Rernem atyenh-angkwarr apenten angath-antey. Alakenh-anyem rernem apmwewarl angkepirrek. Alakenh-anyem ra apwert aynteyel. Ingwerentyel Akngey renh tnakenty, ra nthakenh apatey-angenh apmwewarl irrey-angenh."

## 10

<sup>1</sup> Atyen-h-nem, ayeng arlkwenteyel, Akngeyel Israel-kenh ingkerrenh itethiletyek. Alakenh-anyem atha Akngey renh ayerneyel ikwer-h-nem. <sup>2</sup> Atha iterl-areyel rernem Akngeyek artewentyel innga arrkernelheyel. <sup>3</sup> Rernem apal innga arrkernelheyel. Rernem iylpelirrek, Akngey-kenh-angkwarr apentey-angenh. Rernem arratyirretyek-arrpantey arrkernelheyel ikweren-h-angkwarr. Rernem amentel arratyirretyek-arrpantey, angath-antey.

<sup>4</sup> Christ rarl arraty-angkwarr apenteh angka arrwekeleny-angkwarr, apmwelhiley-angenh arrangkw. Artwa anyentel angka arrwekeleny apenteh akertek-atwety. Angka akertant-anem Christ arrkngert, ngwampenyant-anem mpwarek. Angka arrwekeleny ipmelhek, ywerrek nhek-atwety. Rernem renh tnakenty, rernem Akngey-kenh-angkwarr arraty aneman.

<sup>5</sup> Moses-el angka alakenh arrernek: “Angka arrwekeleny-angkwarr arratyant apenteh innga, ngap iteth intem aneman.” <sup>6</sup> Akngey-kenh angka alakenh aynteyel: “Akngey-kenh-angkwarr arraty apentehy alakenh iterrey-angenh, ‘Angwenh alker-warl nganem, Christ renh atwarrelhiletyek irrwerl-they?’” <sup>7</sup> Alakenh iterrey-angenh, “Angwenh ahern kwen-warl aylpetye, renh irrwerliletyek kwen-they?” Arrangkwant-ather. Nthakenh Ingwerenty, ikwerant-arelh. Ament anwanther nthakenh nthweyang ikwer anwekantherrenh-angkwarr. <sup>8</sup> Akngey-kenh angka Christ-akert arrer-antey anwekanther anyeyel. Anwanther angka renh tnaketyek, angka ilerl-apayntetyek. <sup>9</sup> Ntwa Jesus Atyetyart antwenty, ntwa renh tnakemel, Akngeyelarl renh ipmepenit itethilek, ranemarl ngenh itethilek arrpemarl. <sup>10</sup> Ntwa renh tnakenty, nga ikweren-h-angkwarr arraty anemarl. Ntwa Jesus renh Atyetyart antwenty, Akngeyel ngenh itethilem. <sup>11</sup> Akngey-kenh angka arrwekeleny aynteyel Christ-akert, “Ingwerel renh tnakenty, ra nthakenh apatey-angenh apmwewarl irrey-angenh. Akngeyel renh arntarnt-areyel.” <sup>12</sup> Kel angka nhennh ingkerrenhek aynteyel, Jew-rnemek, ingwer-rnemek, ingkerrenhek-antey. Ingkart anyent impen ingkerrenhek anyeyel. Ran ingkerrenh arntarnt-arey-angker rernem renh ayernenty. <sup>13</sup> Akngey-kenh angka ingwer alakenh aynteyel arrpemarl, “Ingwerel-rnem Ingkart renh ayernenty, Akngeyel renh-rnem itethileyenh.”

<sup>14</sup> Rernem Akngey-kenh angka ywarn awem, renh tnakey-angenh, renh ayerney-angenh. Ingwerel-rnem renh-rnem angath-antey akalty-anthenh. Akngey-kenh angka arleng-alenty akalty-anthem. <sup>15</sup> Ingkart-kenh angka awey-angenh akwerrp, angkakert thweny-angenh-antey. Angka Akngey-kenh alakenh aynteyel; angkakert impen apmer arrpanenh-warl alhem, angka mwerr-angker ilerl-apayntetyek. Mwerr-angkwarr rernem angka ilerl-apeyel ingketyel.

<sup>16</sup> Israel-kenhel-rnem angka nhennh-angkwarr apentey-angenh. Angkakert Isaiah-el arrwekel-antey ingkwernek, “Ingkartay, angwenhel angka anwekantherrenh-angkwarr apenteyel?” <sup>17</sup> Angka mwerr-angker awem-penh, Akngey renh tnakem, angka mwerr-angker Jesus Christ-kenh.

<sup>18</sup> Kel rernem angka mwerr-angker awek. Angka Akngey-kenh alakenh aynteyel: “Angka apmer arrpanenh-warl arlpimpirek angka ilpertel-warl.” <sup>19</sup> Moses-el ingkwernek arrwekel, Akngeyel ileyel, “Atha apmer ingwer-areny-rnem arntarnt-arem, arranther iterretyek, ingwer-rnem arlkariirretyek, arranther angkepirretyek atyeng-warl. Israel-kenhel-rnem angka iterl-arey-angenh, rernemap apatenh.”

<sup>20</sup> Isaiah-el ingkwernek arrpemarl, “Akngeyel ilek, ‘Ayeng aremirreyenh arleng-areny-rnemek, akwerrp-rnemek, atyeng iterrey-angenh-rnemek, apatemel anew-aneyel-rnemek.’”

<sup>21</sup> Israel-areny-rnem-ek Isaiah-el ingkwernek, “Ayeng ywarn arrkernelhenh renh-rnem arratyiletyek-arrpantey, iylpelant rernem aweyel, awelhey-angenh. Ayeng ingkerrenh-itwek mwarrant-arey anetyek.”

## 11

### *Akngeyel Israel-areny irrpetyapant atyeneyley*

<sup>1</sup> Atha ayernem arrpemarl, Akngeyel ikweren-h-nem menty ipmek? Arrangkw. Ayeng Israel-kenh anyeyel arrpemarl, Abraham-kenh arrpemarl, Benjamin-kenh. <sup>2</sup> Aray, Akngeyel ikweren-h-nem menty ipmey-angenh, arrwekel ikwer-h-nem arrernek. Angka arrwekeleny alakenh aynteyel, Elijah-iperrek. Elijah-el Israel-kenh-rnem ayntarrp-ilek. <sup>3</sup> “Ingkartay, angkakert ngkwenh-rnem ipmek-antey atwek. Rernem apwert ilperr-ilperr ngkwenh-rnem akek. Ayeng anyent ngkweng inkwerelheyel. Rernem atyeng nthweyel, ayenh atwetyek arrpemarl.” <sup>4</sup> Akngeyel Elijah renh alakenh ilek, “Atha artwa

7,000 atyenh atnyeneyel-antey, rernemarl atyengety iparelhey-angenh-antey, ingkart arrpantey Baal-ek inkwerelhey-angenh.<sup>5</sup> Aley alakenh-apenyarl aynteyel, irrpetyapant aneyel-antey, Akngey-kenh, iwerr ilenh arrernek arrwekel. Akngey rantey renh-rnem rlwanek, renh-rnem arntarnt-aretyek. <sup>6</sup> Aray, Akngeyel arrwekel-antey renh-rnem rlwanek, rernem ikwer awelhey-angenh anenhel. Rernem amentewarl alhenh. Akngey-kenh alakenh aynteyel. Ra ikwer-rnem ilkelheyel-antey, rernem angkepirretyek.

<sup>7</sup> Israel-kenh-rnem Akngey-kenh angka arrwekeleny-angkwarr arraty anetyek-arrpantey arrkernalnenh. Irrpetyapant Akngey-kenh-angkwarr arraty anen, renh-rnem rlwanek-rnemant, ingwer-rnem arrangkw-antey. Ingwer-rnem awerrarl anen hamentewarl anen. Akngeyel renh-rnem awerr mpwarek. <sup>8</sup> Akngey-kenh angka arrwekeleny alakenh aynteyel: “Akngeyel renh-rnem ilpertilek, anngernem apmwilek, rernem arraty arekerr. Ra iylpa renh-rnem apmwilek, rernem arraty awekerr.” Akngey renh iterl-arey-angenh, aparrng-apeny anen, iylpa arwengk-apeny, arraty avey-angenh. Aley aynteyel-antey. <sup>9</sup> David-el Akngey renh ilek, “Akngeyay, rernem tyenkerr aternpel arlkweyl amernekant artewentyl iterremel, renh-rnem ilpertilay, renh-rnem atwa. <sup>10</sup> Akngeyay, annga renh-rnem aparrngilay, warrk ilkwa anthay.”

### *Ingwer-inger Akngeyel ingwer-rnem itethileyen*

<sup>11</sup> Atha ayernem arrpemarl. Israel-kenh-rnem amentirrek Akngey-kety, Akngeyel renh-rnem aleth-antey ipmey-angenh Arrangkw. Rernem amentirrek Akngey-kety, Akngeyel-anem apmer ingwer-areny-rnemant-anem itethilem. Israel-areny-rnem-anem iterretyek, angkepirretyek apek. <sup>12</sup> Israel-kenh-rnem Jesus-kenh angka ikwerety kel ipmelhek. Akngeyel-anem ingwer-rnemant itethilek. Israel-kenh-rnem angkepirrenty, ingkerrenh-anem inkwerelhem.

<sup>13-14</sup> Ayeng arrekantherr-warl angkem, arrantherr Jew-weny arleng-areny-rnem. Akngeyel ayenh arrekantherr-warl thwenek, athan arrenhantherr akalty-anthetyek. Warrk impen innga atha arrenhantherr akalty-anthetyek. Jew-rnem rernem arenty, rernem alharlkwem. Rernem iterrem-anem angkepirretyek Akngey-warl. Ikw-penh Akngeyel-anem renh-rnem itethileyen. <sup>15</sup> Jew rernem Jesus-kenh angkekety ipmelhek. Akngey ingwer-rnemek inkwerelhek. Israel-kenh-rnem angkepirrenty, Akngeyel renh-rnem itethileyen. <sup>16-17</sup> Artekkerran mwerr-akert, arwerl mwerr arrpemarl, alperr-rnem arlenyirrey-angenh. Israel-kenh-rnem rernem arwerl mwerr-apeny anen. Arlperr arlenyirrekarl, Akngeyel iwek, ingwer-anem rnker nem. Arlperr apely-rneman Jew-weny arrantherr-apenyarl. Akngeyel arrenhantherr pweytilek Jew arrwekel anen-hrnem-warl, ingkerrenh-anem arrenhantherr arntarnt-aretyek, arwerl mwerr-warl pweytilem-apeny.

<sup>18</sup> Arrantherr tnakelhey-angenh anetyek. Arrantherr iylpangketyek, Akngeyel arrenhantherr pweytilek ingkernan, Jew-rnem-tangkwel arrernek arwerl impen-apeny. Arrwekel ikwer-rnem-angkwarr-tangkwel. Jew-rnem-angkwarr ayntenhey-alpek Jesus-warl-athek. <sup>19</sup> Alakenh arrantherr angkeyel, “Arwerl arleny-rnem iwek-apeny, ra Jew-rnem iwek, anwenhantherr pweytilem ikwer-warl, arwerl mwerr-warl pweytilem-apeny.” <sup>20</sup> Arrantherr kel arraty angkeyel. Akngeyel renh-rnem iwek arlperr arlenyarl iwem-apeny, rernemarl Jesus ikwer irrpelthirrenh. Rernem renh tnakenty mwerrarl, ikwer iterretyek, renh tnaketyek arrekantherrenh-angkwarr rlterrk-weny arrangkwarl. Rant iwerr arrekantherr mpwarek ingkerrenhek. Alakenh tnakelhey-angenh arrangkw, mwantz iterretyek. <sup>21</sup> Akngeyel Jew-rnem arrwekeleny-rnem amek-arey-angenh-apeny, ra nthakenh arrenhantherr amek-arey-angenh arrpemarl.

<sup>22</sup> Iterl-aray! Akngey ra ingkerrenhek inkwerelhem, ra nthakenh amek-arey-angenh. Israel-kenh-rnem Jesus ikwerety amentirrek, ra renh-rnem kel amek-arey-angenh iwek. Arrekantherr ra inkwerelhek. Amentirrenty, ranem iweyehn arwerl arleny iweyehn-apeny. Arrantherr ikwerenh-angkwarr apententy, ra mwerr arntarnt-arem. <sup>23</sup> Israel-arenyel-rnem Jesus renh tnakenty, ra renh-rnem itethilem, rnker nem angkep, anyentelhilem ikwerenh-rnem-warl. <sup>24</sup> Iterl-aray, arwerl anyent-apeny, Jew-rnem-tangkwel anen, angka anyent-angkwarr apentehn. Angkep anyentelhilem ikwerenh-rnem-warl. Angkep rnker neynem ikwerenh-rnem-warl, angkep aylpeyneylek ikwerenh-rnem-warl. Amentew-ament alherl-alhenty-apeny.

<sup>25</sup> Atyenh-rnem, atha arrenhantherr angka anyelkel-antey ilem, arrantherr iterretyek, tyak iterl-arelhetyek. Akngeyel Israel-kenh-rnem ilpertilek, Jew-weny-rnem apmer arrpanenh-they Akngey-warl anyentirretyek.

<sup>26</sup> Ikw-penh Israel-kenh-rnem itethileyen, Akngey-kenh angka arrwekeleny aynteyel arrpemarl, “Apmer Zion-they itethiley-angker ra apetyeyen, Israel-kenh-rnem

apmwekety mwerrileyen. <sup>27</sup> Atha apmwa ikwer-rnem-kety iweyenh. Alakenh atha iwerr mpwarem ikwer-rnem."

<sup>28</sup> Jew-rnem menty angka mwerr-angkerek ipmelhekarl-kety rernemarl arlkarirrenharl-kety, ranem angka arrernek Jew-weny-rnemek, rernem-anem apentetyek ikwerenh-angkwarr, Jesus renh tnaketyek. Jew arrwekeleny-tangkwel ra arntarnt-arek, Jew-rnemek iylpelirrey-angenh-antey. Angka arrernek ikwer-rnem arrwekel innigantey, ipmelhey-angenh arrangkw. <sup>29</sup> Arrwekel ra renh-rnem alhelek anthetyek. Akngeyel renh-rnem rlwanek, ilek-ilek renh-rnem anthek. Ra angka ikwer-rnem arrernek. Ra nthakenh ikwer-rnem-kety iylpelirrey-angenh, aleth-antey arntarnt-areyel.

<sup>30</sup> Alethang-rnem, arrwekel arranther Akgneyek awelhey-angenh. Aley-anyem ra mwerr-angkwarr arrekantherr lwewarrernelhek, Israel-kenh-rnem ikwer awelhey-angenh-kety, Jesus renh tnakey-angenh-kety. <sup>31</sup> Lyert Israel-aren-y-rnem Akgneyek awelhey-angenh. Akgneyel renh-rnem mwantyel arntarnt-arenh, rarl arrenhantherr mwantyel arntarnt-areyenh-apeny. <sup>32</sup> Aray, Akgneyel ingkerrenh ilem, rernem arraty awelhey-angenh anem. Ranem ahern-areny ingkerrenh mwantyel arntarnt-aretyek.

### *Paul Akgney ikwer inkwerelheyel*

<sup>33</sup> Akgney ranem tyak innga, akalty innga aneyel ingkerrenh-angkwarran, ahern-areny-rnem-angkwarr. <sup>34</sup> "Ahern-arenyel nthakenh Akgney akalty-anthetey-angenh." Angka ingwer aynteyel, <sup>35</sup> "Ahern-arenyel nthakenh Akgney renh antheyney-angenh." <sup>36</sup> Rantey ahern-then alker-then arrpmernek. Lyert ra anterrkweyel. Ra arrpemarl ingkerrenh lyertenylem. Ran rlterrk innga aneyel. Ahern-arenyel renh tnaketyek intem-antey. Amen.

## 12

### *Akgneyek warrkirk-ayntetyek*

<sup>1</sup> Atyenh-rnem, Akgney arrekantherr mwerr-angkwarr lwewarrernelhek. Alakenh atha arrenhantherr ileyel. Arlka arrekantherrenh Akgney-kenh-angkwarr anhelhetyek, ra impen arrekantherr inkwerelhetyek. Apmwek anhelhey-angenh. Alakenh-angkwarr arraty apenterl-ayntetyek ikwerenh-angkwarrant. <sup>2</sup> Ingwer-rnem apmwangkwarr ilper-tilekerr ahern-areny-kenh-angkwarr, Akgney-kenh-angkwarr arraty apenterl-ayntetyek. Akgney rant akwerrng arratyiletyek, arranther ikwer iterr-ayntetyek. Arrantherrap iterl-arayntetyek Akgney rarl ilkelheyel-angkwarr-antey.

### *Tnakelhey-angenh, arratyant iterl-arelhetyek*

<sup>3</sup> Akgneyel ayenh rlwanek, ayeng angkakert apetyem arrekantherr-warl, arrenhantherr iletyek. Ingkart-areny ingwer-rnem-angkwarr mwerr-angkwarr tnakelhey-angenh Ingkart-kenh-angkwarr. Anwekantherrenh-angkwarr-weny, rant iwerr anwekantherr arrernek, alakenh anwantherr apentetyek ikwerenh-angkwarr. <sup>4-6</sup> Anwantherr anyent-tirretetyek ikwerenh-angkwarr anyent-apeny ilterrey-angenh, anyent-angkwarr, arlka anyent-apeny. Akgneyel anwenhantherr arrernek, amentew-ament ikwer warrkirk-ayntetyek. Arlkan iltiyakert, anngakert ingkety-akert amentew-ament mpwareyel. Arlka amentew-ament arlperryt mpwareyel-apeny, tyaty-areny ingkerrenh rernem amentew-ament mpwareyel arrpemarl, angka anyent-angkwarr-antey, Christ anyent ikwer-antey. Angka anyelk anayntiley-angker, ra ingkerrenhek anayntilem. Akgneyel ingwerel arrernek, rernem angka iletyek angkakert arwa alhewer Akgney renh tnakemel. <sup>7</sup> Akgney-kenh warrk alakenh. Ingwer-rnem arntarnt-aretyek apek, kel mwerr. Ntwa apek Akgney-kenh angka anayntileyek, kel mwerr. <sup>8</sup> Ingwer-rnem rlterrkil-ayntetyek, irrkngerneyarl arntarnt-areyntetyek, man anthetyek irrepern-rnemek, arnkatvel akalty-anthayntetyek nyerrirrey-angenh, kel mwerr. Ingwer-rnemek ampperrngirretyek, anthetyek mwerrarl.

### *Ingkart-kenh-angkwarr arraty apentetyek*

<sup>9</sup> Arranther Ingwert-rnemek innga inkwerelh-ayntetyek, arntarnt-areyntetyek mwerr-angkwarr. Arraty-angkwarr innga apenterl-ayntetyek apmwangkwarr apentey-angenh. <sup>10</sup> Ingwer-rnem arntarnt-areyntetyek, ngkwenh-rnem-apeny, ngkwenh-rnem arntarnt-areyel-apeny, ament-angkwarr-weny, mwerrant-arey anayntetyek, mwerrant-arey arntarnt-arerr-ayntetyek. <sup>11</sup> Ingkart-angkwarr intem-antey apenterl-ayntetyek, Itnweng rlterrk-akertel, irrkngerney anayntetyek, ipmelhey-angenh. <sup>12</sup> Intem-antey irrkngerney anaynta, Ingkartek mpwelhemel. Ipmelhey-angenh ingwer-rnem-kety.

Akngey intem-antey irrkngerneyel ayern-ayntetyek, ipmelhey-angenh. <sup>13</sup> Ingkart-areny-rnem arntarnt-arayntetyek, irrepern-rnem anthayntetyek. Alethang ingwer-rnem arntarnt-arayntetyek.

### *Ahelengkw-rnem arntarnt-araynta*

<sup>14</sup> Ingwerenty ngkweng irrpelthirrenty, ntwa Akngey ayernetyek, renh atwey-angenh, ra renh arntarnt-aretyek mwerr-angkwarz, apmwangkwarz tyarlewey-angenh.

<sup>15</sup> Ingwer-rnem apek irrkngerneye aneyel, ikwer-rnem-angkwarz irrkngerneye arrpemarl aneyel. Ingwer-rnem apek amperrngirreyel, ikwer-rnem-itwek amperrngirremel ana. <sup>16</sup> Artwa ingwer-rnem-itwek mwarrant-arey anayntetyek, atyetyart ilkwarrpantey tnakelhey-angenh, artwa apmwamwam-kety irrentelhey-angenh anetyek.

<sup>17</sup> Ingwerentyel ngenh apmwangkwarz mpwarenty, angkep apmwangkwarz mpwarey-angenh ikwer. Arratyelirretyek weth-lkwer, ingkerrenhel ngenh arraty iterl-aretyek. <sup>18</sup> Arrantherr ingkerrenh mwarrant-arey anayntetyek arrkernalhem.

<sup>19</sup> Angkay atwey-angenh, Akngey-kenhant. Akngeyelant renh menty apmwangkwarz tyarlewetyek, ra ament atwelhetyek. Angka Akngey-kenh alakenh aynteyel: "Ayengarl angkep atwey-angkeran." Ingkart illehk. <sup>20</sup> Angka Akngey-kenh alakenh aynteyel: "Ingwerenty ngkweng ahelirrenty, ntwa amern anthem arlkwetyek, ntwa kwaty anthetyek antywetyek, ra nyerrirremel iterl-arem-anem." <sup>21</sup> Mwerr-angkwarz apententy, ngenh atweyelarl-kety, ngenh ilteyelarl-kety, anwantherr arrenty renh antengiletyek.

## 13

### *Atyetyart-rnemek awelh-ayntetyek*

<sup>1</sup> Atyetyart ilkwernemek awelhetyek. Akngeyel renh-rnem arrernek, rernem ingkerrenhek atyetyart anetyek. <sup>2</sup> Ingwer-rnem atyetyart-rnemek irrpelthirrenty, rernem Akngeyek irrpelthirrem arrpemarl. Rernem Akngey-kenh-angkwarz apmwelhilem. Akngeyel renh-rnem ayerneyen. <sup>3</sup> Aray, Akngeyel renh-rnem rnkernek, rernem apmwernemant ater-anthetyek, mwerr-rnem ater-anthey-angenh anetyek. Nga arternp anetyek, atyetyart-rnem-kenh-angkwarz. Ikwer-penh arrantherr arternp anem, ikwer-rnem-kety aterirrey-angenh anetyek. <sup>4</sup> Atyetyart rernem Akngey-kenh warrkenh aneyel, ngenh mwerr arntarnt-aretyek. Nga apmwangkwarz anenty, nga kel aterirrem atyetyart ikwerety. Ra Akngey-kenh warrkenh aneyel, ranem apmwernem atwey-angker. <sup>5</sup> Alakenh-anyem nga atyetyart ngkwenhakl awelhetyek, ngan irrkngerneye awelhelyel-angkwarz, ra ngenh atwekerr. Alakenh-anyem iterl-arelhetyek ntwarl mwarrant-angkwarz arraty apenteh.

<sup>6</sup> Alakenh-anyem arrantherr tax-areny atyetyart man anthayntetyek. Rernem Akngey-kenh warrkenh-rnem aneyel, rarl renh-rnem arrernek ingkerrenh. <sup>7</sup> Tax maney anthetyek mwerr-angkwarz. Ntwa man alhelenty, pwekap ngkwenh areyilenty, ntwa renh angkep anthem, atyetyart-rnemek awelhemel arraty-angkwarz.

### *Ingwer-rnemek ilkelh-ayntetyek*

<sup>8</sup> Angkep anthem, man-rnem-then, ampwal-rnem-then. Alakenh renh arntarnt-arem. Ingwer arntarnt-arenty, Akngey-kenh angka arrwekeleny-angkwarz arraty aneman. <sup>9</sup> Angka arrwekeleny Akngey-kenh alakenh aynteyel: "Ingwer-kenh anewikw ikngwey-angenh anetyek. Ntwa ingwer ipmek atwey-angenh. Ntwa ampwal ingwer-kenh irrytertel iney-angenh. Ntwa apmwal ingwer-kenh inetyek iterrey-angenh." Angka akngerr aynteyel Akngey-kenh-angkwarz. Angka impen nhanyem, "Ingwer-rnem arntarnt-arem, ngkwenh-rnem arntarnt-arem-apeny." <sup>10</sup> Ingwer-rnem arraty-angkwarz arntarnt-arenty, renh-rnem apmwiley-angenh. Alakenh-angkwarz apententy, kel Akngey-kenh arrwekeleny-angkwarz arraty apenteman.

### *Ikwerant iterretyek, arlaa ikweren arrerirreyelarl-kety*

<sup>11</sup> Ingkart-kenh arlaa arrerirreyelarl-kety, anwantherr arraty-angkwarz apenterly-ayntetyek iterretyek, anwantherr ikwer mpwelhetyek. Arlaa ikweren arrer-anem, ra ikweren-rnem inerl-alpeyek apmer iteth-kenh-warl akngeyneyek. <sup>12-13</sup> Ingwerel-rnem apmwangkwarz mpwareyel ingwemerntel. Arltan ikweren arrer-anemarl rarl apey-alpeyehan, ingkerrenhel renh-rnem areyeh, ingwemerntel-apeny aney-angenh. Terangk irrey-angenh, apmwangkwarz alhey-angenh, ingwer-kenh anewikw ikngwey-angenh. Atwerrey-angenh, ingwer-rnemek irrpelthirrey-angenh. <sup>14</sup> Arrantherr Ingkart Jesus Christ-ek iterretyek, ikwer awelhetyek, amentewarl alhey-angenh apmwangkwarz.

**14***Ingwer-rnemek tyel-angkey-angenh*

<sup>1</sup> Ingkart-areny ingwer-rnemel apek alyep apenteyel Akngey renh artewentyel tnakey-angenh. Nthakenh mwerr-arrpantey tnakelhey-angenh, renh-rnem iltey-angenh mwarrant-arey anayntetyek Akngey-kenh-angkwarr. <sup>2</sup> Artwa ingwer aker arlkwey-angker, artwa ingwer amernant arlkwey-angker, amernant arlkwetyek, aker-kety arlkarirreyel. Ra iterreyel aker arlkwetyek, apmwangkwarr irekerr-arrpantey Ingkart-kenh-angkwarr. <sup>3</sup> Aker arwa alhewer arlkwey-angker, ra ingwer apmwa antwey-angenh anetyek. Anyent ingwer ra aker ikwerety arlkarirreyel, ra ingwer apmwa antwey-angenh anetyek arrpemarl. Akngeyel renh atnyeneyel. <sup>4</sup> Ingwer-kenh warrkenh anwantherr apmwan antwey-angenh. Atyetyart ikwerenhelant renh ileman. Ingkartelant renh rlterrilek, ra arraty alhetyek. Nthakenh ra amentewarl alhey-angenh.

<sup>5-6</sup> Artwa ingweran iterreyel, arlta anyent impen innagarl. Artwa ingwer angkeyel arlta arrpannel Akngeyek inkwerelh-ayntetyek, impenehy-antey. Kel mwerr ngkweng, ngarl iterreyel-angkwarr. Arlta anyent impen inkwerelhetyek, alakenh Ingkart-kenh-angkwarr-antey. Ra apek aker arlkwetyek, amern-then, kel alakenh Akngey-kenh-angkwarr aynteyel. Ra amernant arlkwenty, ra Akngey-kenh-angkwarr arlkweyel, mwerr-antey arrpem, nthakenh apmwelhiley-angenh. Alakenh mwerrarl, rernem Akngeyek inkwerelhetyek ingkerrenh. <sup>7</sup> Anwantherr anthelhetyek Ingkart ikwerant. Nthakenh ingwerenly amentewarl aney-angenh, Ingkart-kenh-angkwarrant apentetyek ilwetyek-atwetyek. <sup>8</sup> Anwantherr iteth anetyek Ingkart-kenh-angkwarr ikweren-angkwarr apentemel. Anwantherr iteth apek, ipma ayntem apek, anwantherr Ingkart-kenh-antey. <sup>9</sup> Jesus anwekantherr katy ilwek rap anwekantherr akemirrek, Ingkart ingkerrenhek anetyek, iteth aneyel-rnemek apek, ipmernemek.

<sup>10</sup> Nthakenh-angkwarr anwantherr Ingkart-areny ingwer-rnem ayntarrp-iley-angenh. Anwantherr renh-rnem apmwarrpantey akngakey-angenh. Arlta anyent ikwerel Akngeyel anwenhantherr ayerneyeh-anem. <sup>11</sup> Akngey-kenh angka arrwekeleny alakenh aynteyel: "Ingkerrenhel ayenh tnaketyek kwenirremel, atyeng illehetyek. Angka innga nhanyem."

<sup>12</sup> Ingkerrenh ikwer illehetyek, arlta ikwerenhel.

<sup>13</sup> Alakenh-they anwantherr ilerrey-angenh anetyek. Anwantherr arntarnt-arrerrerly-ayntetyek, anwantherr Ingkart-areny ingwer-rnem ilpertilekerr. <sup>14</sup> Ayeng akaltyarl, Akngey arrkngert angkey-angenh amernek, akerek. Ingkart Jesus-el ayenh ilek. Ingwer iterreyel-angkwarr mentyarl, aker arlkwey-angenharl.

<sup>15</sup> Ntwa aker arlkwem, ingwerent ilpertilekerr, ra amentewarl irrekerr, ran ipmel-hekerr Christ kel ikwer katy ilwek arrpemarl. <sup>16</sup> Ngkweng-angkwarr kel mwerr aker arlkwetyek. Nthakenh apmwelhiley-angenh ingwer-rnem aker arlkwemelant. Ingwer-rnem iterrekerr, apmwarrpantey ayntarrp-ilekerr kel aker menty ayntey, arlkwey-angenh. <sup>17</sup> Akngey-kenh-angkwarr alakenh ayntey-angenh, akerek-then amernek-then arlkwetyek, antywetyek. Alakenh-anyem ra iwerr mpwarek. Akngey-kenh-angkwarr alakenh aynteyel: "Itnweng Rlwart ra arrekantherr-itwel aneyel. Ra arrenhantherr rlterrilek, alakenh arrantherr atyeng-angkwarr arraty anetyek. Ayeng arrekantherr mwerr aneyel irrkngerney anayntetyek." <sup>18</sup> Alakenh-anyem Christ-ek awelhenty iylparethel, Akngeyel renh artwa arraty arem, ra ahern-areny-kenh-angkwarr arraty anem arrpemarl.

<sup>19</sup> Alakenh-they anwantherr aleth-antey arrkernelhetyek, anwantherr mwarrant-arey anetyek, rlterrilekeryetek. <sup>20</sup> Ntwa ingwer-rnem ilpertiley-angenh, Ntwa aker-then amern-then arlkwetyek arwa alhewer, Ingkart-areny ingwer-rnem arlkarirrenty, kel menty ipmem, ilpertilekerr. <sup>21</sup> Ingkart-areny arlkarirrenty, aker-kety, wayn-kety, ra apmwek-arrpantey iterrekerr kel mwerr ntwa ipmetyekant, rernem Christ-kety amentirrekerr. <sup>22</sup> Ngarl iterreyel-angkwarr kel aker arlkwetyek, wayn antywetyek, arltek iterreyek, Akngeyek-then ngkweng-then. Ingkart-areny ra aker arlkwem, Akngey renh tnakemel, mwerr-antey. Irrkngerney ana ywarn iterrey-angenh. Alakenh-anyem Akngey ngkweng inkwerelhelye. <sup>23</sup> Ingwerentyl aker arlkwek apek, Akngey renh tnakey-angenhel, ra Akngey-kenh-angkwarr apmwelhilek. Rernem Akngey tnakenty, aker arlkwemel, rernem mwerr aneyel Ingkart-kenh-angkwarr. Ngarl iterreyel-angkwarr mwerrarl. Arrangkwelan, ywarn iterremel nga amentewarl alhem, ngap Akngey-kenh-angkwarr apmwelhilem.

## 15

<sup>1</sup> Anwantherr Akngey rlterrk tnaketyek. Ingwer-rnemel rlterrk tnakey-angenh. Anwekantherrenh-angkwarrant iterrey-angenh anetyek. Anwantherr arternpel renh-rnem arntarnt-aretyek, aker ikwer-rnem-itwek anngetherr arlkwey-angenh. <sup>2</sup> Anwantherr ikwer-rnem iterretyek arrpemarl. Anwantherr renh-rnem arntarnt-aretyek, rernem Akngey renh tnaketyek. <sup>3</sup> Christ ra apentey-angenh, rarl ament iterrenh-angkwarr, Akngeyekant awelhenh, rarl ikwer arrernekk arrwelk-antey. Alakenh ingwer-rnem ikwer arlkariренh. Angka Akngey-kenh alakenh aynteyel: “Ingwer-rnem ngkwengety arlkarireyel, rernem atyengety arlkarireyel arrpemarl.” <sup>4</sup> Aray, angka Akngey-kenh arrwekelenyel ingkwernek, anwenhantherr ingkern-iperr-rnem akalty-anthetyek. Anwantherr arternp Jesus Christ ikwer mpwelhetyek, aleham-aleth ikwer arrkernelhetyek, ipmelhey-angenh.

<sup>5</sup> Atha Akngey renh ayernem, rwewarrant-arey anyent-angkwarr apenterl-ayntetyek Jesus Christ-kenh-angkwarr, arranther mwerrant-arey rapeny anayntetyek, <sup>6</sup> Ikwer-penhan arranther Akngey, Ingkart anwekantherrenh Jesus Christ-kenh akngey renh mwerr antwetyek ikwer inkwerelhemel anyent-angkwarr. <sup>7</sup> Arranther mwerrant-arey anayntetyek, ikwer-rnem inkwerelhetyek, Christ-el arrekanther inkwerelhek-apeny, ingwer-rnemel Alakenh Akngey renh tnaketyek. <sup>8</sup> Aray, Christ apey-alhek, Jew ingkerrenh itethiletyek, Akngeyel arrwekelenyel-rnem ilek-apeny. Alakenh-anyem rernem Akngey iterl-aretyek, ran inngarl aneyel, irrtywerrey-angenh. <sup>9</sup> Christ apey-alhek, arleng-areny-rnemel Akngey renh tnaketyek, renh-rnem arntarnt-aretyek. Angka Akngey-kenh arrwekelenyel alakenh aynteyel, David-elarl ingkwernek, “Arleng-areny-rnem-itwek ayeng ngkweng inkwerelheyen aylelhemel.” <sup>10</sup> Angka Akngey-kenh arrwekelenyel alakenh aynteyel: “Arleng-areny-rnemay, Akngey-kenh-rnem-warl inkwerelhemel anyentirrenherr-arey!”

<sup>11</sup> Alakenh angka Akngey-kenh aynteyel: “Jew-weny arleng-areny-rnem Akngeyek inkwerelheyay! Kel ingkerrenh Akngey ikwer inkwerelhetyek!” <sup>12</sup> Isaiah-el ilek, “Ingkern-penh artwamp Jesse-kenh, ra atyetyart irreyen ingkerrenhek, Jew-weny-rnemek. Arleng-areny-rnem mpwelheyen ikwer, renh-rnem itethiletyek.” <sup>13</sup> Atha Akngey renh ayernem, ra arrenhantherr irrkngerney anthetyek, ra arrekanther mwerr aneyel, Itnweng Rlwart arrenhantherr arnkatyiletyek, arranther Jesus Christ-ek mpwelhetyek, ikwer iterretyek innga.

*Paul-el angka Akngey-kenh iterl-apeyel*

<sup>14</sup> Atyen-rnemay, ayeng akalty, arranther ingkerrenh iylpareth aneyel. Arranther Akngey-kenh angkek akalty, arranther innganem Akngey-kenh angkek irrpelthel akalty-antherrey-areny. <sup>15</sup> Pip nhenh-angkwarr atha arrenhantherr arraytant ilek, arranther Angka Akngey-kenh arrayt akalty-anthetyek. Akngey mwerr atyeng anem. <sup>16</sup> Ayeng warrkenh Jesus Christ-kenh anetyek. Ra innganem ayen angkakert thwenek, apmer arrpanenh-warl, rernem Akngey-kenh angka mwerr-angker iletyek, Itnweng Rlwart ikwer-rnem-itwek anetyek. Itnweng Rlwartel renh-rnem rlterriletyek, ikweren-angkwarr arrayt apentyek. <sup>17</sup> Atha Christ Jesus renh tnakem, rarl ayenhl rltterkilek, Akngeyek warrkrr-ayntetyek. <sup>18</sup> Ayeng tnakelhey-angenh. Alakenh-they ayeng angketyek angka ikwerenhel Christ ra ayen arrernekk. Ra warrkirretye atyeng-angkwarr arleng-areny rernem Akngeyek awelhetyek. <sup>19</sup> Itnweng Rlwartel ayenhl rltterkilek, atha ilek-ilek-angkwarr mpwaretyek, arntety-rnem mwerril-ayntetyek atyeng-angkwarr Jerusalem-they atha angka mwerr-angker Christ-akert iterl-apeh apmer arrpanenh apmer Illyricum-ek-atwety. <sup>20</sup> Ayeng iterrenh, arrangkw anew-aneyel-rnem-warl alhetyek, rernem Jesus-kenh angka awey-angenh-antey, artwa angkakert ingwerenty ikwer-rnem-warl alhey-angenh-antey. <sup>21</sup> Akngey-kenh angka alakenh aynteyel: “Angka awey-angenh-rnem, rernem angka ikweren awetyek, rernem renh iterl-aretyek.” <sup>22</sup> Alakenh ayeng arrekantherr-warl alhey-angenh-antey, atha ingwer-rnem akalty-anthenharl-kety. <sup>23</sup> Kel atha warrk atyeng ywerrelhilek apmer nhenh-ampenyel. Ayeng iterreyel arrekantherr-warl inwekel alhetyek, ankwa arrpanenhel. <sup>24</sup> Ayeng-anem alyep arwa iterretyek, apmer ikwer-itwek anenheyek, apmer Spain-warl-athek alhey-alenty. Amern-akert, maney-akert arranther anamerl ikwer-warl thwenetyek.

<sup>25</sup> Lyert ayeng Jerusalem-warl alhem, man-angketyarr, Ingkart-areny-rnemek. <sup>26</sup> Macedonia-areny-rnem-then Achaia-areny-rnem-then iterrenh, man inetyek, ingkart ingkerrenh man ikwerel arntarnt-arayntetyek, irrepern-rnem Jerusalem-areny-rnemek. <sup>27</sup> Rernem-antey ilkelhek, man inetyek. Alakenh Jew-rnemel arleng-areny-rnem angka mwerr-angker akalty-anthek-penh rernem ngkwelty angkep anthem, maren-angkwarr.

<sup>28</sup> Man ampwerrk-antey atha man iwenhem Jerusalem-warl, arrekantherr-warl, apmer Spain-warl alhey-alenty. <sup>29</sup> Ayeng kel akalty, ayeng arrekantherr-warl apetyem, Christ-el arrenhantherr-then ayenh-then rlterrileyenh.

<sup>30</sup> Atyenh-rnem, Akngey-warl angka atyeng, Ingkart anwekantherrenh Jesus Christ-angkwarr. Itnwengel arrenhantherr rlterrilem, arrantherr mwarrant-arey anetyek. Arantherr innga angkenherr-arey arrpemarl Itnweng-angkwarr. <sup>31</sup> Akngey-warl angkay, ra ayenh arntarnt-aretyek Jerusalem-areny-rnem-kety, Ingkart-kety arlkarireyel-rnem, Jesus tnakey-angenh yanh-rnem-kety. Akngey ayerney Jerusalem-areny-rnem manek inkwerelhetyek, man atharl akngem ikwer-rnem-warl. <sup>32</sup> Ikwer-they Akngey iterreyel-angkwarr apek, ayeng-anem arrekantherr-warl inkwerelhemel irrkngerney alhetyek, arrekantherr-itwel ilkwatherr anetyek. <sup>33</sup> Akngey ra mwarrant-arey ingkerrenhek aneyel, anwekantherr-itwel anetyek intem-antey. Amen.

## 16

### *Paul-kenh angka anyent ingwerant-anem*

<sup>1-2</sup> Arelh anyent, itnan Phoebe, ra Ingkart-areny aneyel. Rantey arrpemarl Ingkart-areny-rnem arntarnt-areyel Cenchreae tawen-itwek. Ra Rome-warl alhenty, Mwerr-angkwarr angketyek ikwer, renh alpemileyek. Mwerr awelh-ayntetyek ikwer, rarl ayenh arntarnt-arek, ingwer-rnem-then ingkerr.

<sup>3</sup> Priscilla Aquila atherr, ntwa arem, rernem Christ-Jesus-angkwarr apenteyel arrpemarl. <sup>4</sup> Ingwer-inger ratherr ilwetyek-anek ayenh alpemileyek, ayeng ikwer-atherr intem-antey iylpangkeyel, ayengant-weny, ingwer-rnem-then, Jesus Christ tnakeyel-rnemel.

<sup>5</sup> Ntwa ingwer-rnem arem, warl-itwek anew-aneyel-rnem, Ingkartek inkwerelhetyek. <sup>6</sup> Ntwa Mary apek arem, rarl warrkirrenh arrekantherr-itwel, arntarnt-arenh. <sup>7</sup> Andronicus, Junia ntwa arem arrpemarl. Anewart-atherr, Jew atherr atyenh. Ratherr atyeng-itwel anenh tyawl kwenel. Ratherr-tangkwel renh tnakenh arrwekel, ayeng Ingkart-kenh-wenyankel. Ratherr Ingkart-kenh angkakert atherr innga. <sup>8-10</sup> Artwa Amplius ntwa arem arrpemarl. Atyenh arrpemarl ayeng ikwer ilkelheyel Ingkart-angkwarr. Ingkart-kenh-angkwarr. Urbanus arrpemarl, Ingkart-angkwarr apenteyel arrpemarl, atyeng-itwel warrkirreyel arrpemarl. Apelles Ingkart-angkwarr-apenteyel arrpemarl. Aristobulus-then ikwerenh-rnem-then. Stachys arrpemarl, atyenh arrpemarl, Ingkart-kenh-angkwarr. <sup>11</sup> Herodion atyenh arrpemarl, Narcissus-kenh-rnem-then, Ingkart-kenh-angkwarr apenteyel-rnem. <sup>12</sup> Ntwa areyenh Tryphaena, Tryphosa atherr, Ingkartek warrkirreyel innga. Arelh Persis arrpemarl. Ra Ingkartek warrkirreyel innga. Ayeng ikwer inkwerelheyel. <sup>13</sup> Rufus, Ingkart-kenh warrkenh, Ingkartelarl renh rlwanek ikwer warrkirreyek iylparethel. Amikw ikwerenh-then, rarl ayenh arntarnt-arenh, amey atyenh inngel arntarnt-areyel-apeny. <sup>14</sup> Artwa Asynkritus, Phlegon, Hermes, Patrobas, Hermas-then. Ingkart-areny ingwer-rnem-then. <sup>15</sup> Philologus, Julia, Nereus ikwerenh ayteyikw arrpemarl. Olympasthen, Ingkart-areny ingwer-rnem-then. <sup>16</sup> Ingkart-areny-rnem ingkerrenh arrekantherr inkwerelheyel arrpemarl.

<sup>17</sup> Atha arrenhantherr ileyel, arrantherr arntarnt-arelyek, apmwernelem ilpertiletyek arrkernalheyel-kety. Rernem ingkerrenh ilpertilem, apal akalty-anthemel. Ikwer-rnem-kety ament-warl anayntem. <sup>18</sup> Rernem alakenh-anyem akalty-anthem, rernem Ingkart anwekantherrenh Jesus Christ-angkwarr apentey-angenh. Rernem ikwer-rnem-kenh-angkwarrant iterreyel, rernem angka mwerr-arrpantey ilemel. Rernem akwerrp ikngwer-rnem apmwangkwarr ilpertilehem. <sup>19</sup> Ingkerrenh akalty arrantherr Ingkartek avelheyel. Alakenh-thay ayeng irrkngerney aneyel. Ayeng arrekantherr ilkelheyel, arrantherr akalty anetyek, mwerr-angkwarr apentetyek. Apmwangkwarr apentey-angenh arla anetyek. <sup>20</sup> Akngey mwerr arrekantherr aneyel. Ra Satan renh antengileyek. Ingkart Jesus ra arrekantherr mwerr anayntem. <sup>21</sup> Timothy, warrkenh arrpemarl, ra arrekantherr inkwerelheyel arrpemarl. Artwa Lucius, Jason, Sosipater rernem arrekantherr inkwerelheyel arrpemarl, ayeng inkwerelheyel-apeny. Rernem Jew ingkerrenh aneyel. <sup>22</sup> Tertius, atha pip nhenh ingkwernek angka Paul-kenh. Ayeng-anem arrekantherr inkwerelheyel arrpemarl. Atha Ingkart tnakem arrpemarl. <sup>23</sup> Gaius arrekantherr inkwerelheyel arrpemarl. Ayeng warl ikwerenh-warl alhek, ingwer-rnem-then. Anantherr anyentirrek pipek warl ikwerenh-warl. Artwa Erastus ra man arntarnt-areyel, ra arrekantherr inkwerelheyel arrpemarl, Quartus atyenh arrpemarl, Ingkart-kenh-angkwarr apenteyel arrpemarl. <sup>25</sup> Akngey tnakay, ra arrenhantherr rlterrilem angka ikwerenhel. Atha arrenhantherr angka mwerr-angker akalty-anthek, Jesus

Christ-akert. Angka mwerr-angker Akngeyel irryertewenh arrwekel-antey. <sup>26</sup> Aley-anyem ingkerrenhel angka mwerr-angker renh ileyel-anem, Akngey-kenh angkakert-rnemel awank-akerr ingkwernenh-angkwarr-antey. Kel anaynt-anem, ingkerrenhel iterl-aretyek. Akngey aknganek iteth aleth aneyel. Akngeyel arrernek ingkerrenhek, angka renh thwenek apmer arrpanenh-warl, rernem renh tnaketyek, ikwer awelhetyek. <sup>27</sup> Akngey rant tyak innga aneyel rlterrk ilkawakert. Anantherr renh tnaketyek, Jesus Christ-angkwarr. Amen.

## Galatians

### Angka Galatians alakenh aynteyel

Paul-el pip thwenek apmer Galatia-warl, rernem renh angka impen iterl-aretyek, tyaty-areny ingkerrenhek apmer Galatia ikwer-ampenyel, apmer Pisidian Antioch, apmer Iconium, Lystra, Derbe. Jew-weny-rnem-tangkwell anen arrwekel apmer ikwer-ampenyel. Jew-rnem arlpimpirek apmer ikwer-itwek ingkern-anem.

Paul-el angka mwerr-angker ilerl-apenh-penh, Ingkart-areny-rnem akngerram-akngerrirrek. Jew ingwer-rnem apetyek. Rernem renh-rnem Jew-kenh-angkwarr apenterl-ayntetyek. Ingkart-kenh-angkwarr ament arrpemarl. Alakenh rernem angka ilpertiletyek arrkernelhenh.

Paul-el pip thwenek Galatia-areny-rnem-warl, rernem angka impen iterl-aretyek, Jesus renh tnaketyek. Ingkerrenh arratyirretyek Jesus-angkwarrant, rarl katy ilwek anwekantherr arwerl iylpeyl-atherrel. Jesus-angkwarrant apententy, anwantherrap itethirreman, anwantherr Ingkart-angkwarr arraty aneman. Jew-kenh-angkwarr arrangkwarl, nthakenh arratyirrey-angkenh Ingkart-angkwarr. Paul-el pip thwenek ikwer-rnem-warl, rernem iterretyek, angkepirretyek. Alakenh angka nhanyem aynteyel. Angka mwerr-angker ingkerrenhek aynteyel.

Galatians Romans angka anyent-anteyarl aynteyel anayntiley-angker.

#### *Paul-el pip thweneyel Galatia-areny-rnem-warl*

<sup>1</sup> Ayeng Paul, Christ-kenh angkakert. Ingkart Akngeyelant-then ayenh thwenek, Jesus Christ-elant-then ayenh thwenek, angka ikwerenhe ilerl-apayntetyek. Ahern-arenyel ayenh thweney-angenh. Ingkart Akngey rant Jesus renh ipmepenitethilek. <sup>2</sup> Atyenh-rnemel-then anwantherr ingkerrenhel pip nihen thwenem, arrantherr Galatia-areny Ingkart-areny ingkerrenhel reytemilemel aretyek. <sup>3</sup> Ingkart Akngeyel-then Jesus Christ-el-then, arrantherr mwerr arntart-aretyek, arrantherr mwarrant-arey anetyek. <sup>4-5</sup> Ingkerrenhel Akngey renh iterl-areyenh, rarl rlterrk ilkawakert aneyel. Jesus Christ Ingkart Akngeyek awelhemel, anwekantherr katy ilwek, apmwa anwekantherrety iwetyek, apmwekety anwenhantherr itethiletyek, anwantherr Akngey-angkwarr arraty apenterl-ayntetyek intem-antey. Arraty inngarlap ran, ra arlka menty anthelhek.

#### *Angka Akngey-kenh anyent impen*

<sup>6</sup> Ayeng-anem apatek, arrantherrarl Akngey-kety angkepirrek, rarl arrenhantherr rlwanek, ikweren-rnem anetyek-arrpantey. Arrantherr Jesus-kenh angka ikweren-angkwarr apentety-angenh, arrantherr ingwer-angkwarrarl apenteyel. <sup>7</sup> Akngey-kenh angka mwerr-angker Jesus-akert inngan aynteyel, anyent impen. Ingwer-rnem arrker-nelheyel, Akngey-kenh angkekety arrenhantherr ilpertiletyek, arrantherr iylpelirretyek. <sup>8</sup> Ingwerl angka mwerr-angker Jesus-akert ikwerety ingwer-angkwarr akalty-anthenty, artwa ahern-areny anyent ingwerentyel apek, irrwerl-arenyel apek, Akngeyel renh arntety anthem. Anantherr Akngey-kenh angka Jesus-akert arraty-angkwarr akalty-anthetyek, angka arraty ikweren-angkwarr-antey. <sup>9</sup> Arrwekel ayeng wetharl angkek-angkwarr, ayeng angkem arrpemarl, Akngeyel ingwerenty arntety anthem, ra ingwer-angkwarr akalty-antherl-anenty. <sup>10</sup> Ayeng nthakenh tnakelhey-angenh, ingwer-rnem ayenh tnakekerr. Arrantherr apek atyeng iterreyel, ayengarrp ament ingkart atyetyart arrernelhenty-arrpantey, Jew-kenh-angkwarr-kety amentirrenty-arrpantey. Ayengen Christ-kenh warrkenh. Atha ahern-areny-angkwarr apentey-angenh. Ayeng Akngey irrwerl-arenyekant awelheyel, ahern-arenyek awelhey-angenh.

#### *Jesus Christ-el Paul renh rlwaneyel, angka ilerl-apayntetyek*

<sup>11</sup> Atyenh-rnemay, angka Jesus-akert inngal atha ileyelan, atyenh-wenyarl wenh! <sup>12</sup> Ahern-arenyel ayenh akalty-anthetey-angenh. Jesus Christ-angkwarrant ayeng akaltyir-rek, rarl anaynt-anem atyeng aremirrek. <sup>13</sup> Kel arrantherr ayenh iterl-areyel, ayengarl Jew anen. Ayengarl apmwangkwarr-tangkwell anen Ingkart-areny-rnem ywerrelhiletyek ayeng arrkernelhenh. <sup>14</sup> Ayeng Moses-kenh angkakertarl anen, atha angka ikweren-angkwarr apentehn ywerreyek-atwety, ingwer-rnem-they intwarr. <sup>15-17</sup> Akngey atyeng inkwerelhek, ra arrwekel-antey ayenh rlwanek, ayeng ahern nhenh-itwek aney-angenharl-antey. Ra alerikw ikwerenhe atyeng anayntelhilek, atha angka ikwerenhe ingwer-rnem-warl ilerl-apayntetyek ingkerrenhek. Artwa ahern-areny-rnem atha awey-angen-antey. "Nthakenh-angkwarr atha Jew-weny-rnem akalty-anthem?" Ayeng Jerusalem-warl alhey-angen-antey angkakert atyetyart ingwer-rnem awetyek.

Atha angka arratyiley-angenh ikwer-rnem-itwek, apmer arpanenh-warl alhey-alentyel. Ayeng alhek aher ahpaw Arabia-warl. Ikwer-penhan ayeng angkep-anem alpek Damascus-warl-anem.

<sup>18</sup> Aherrety irrpety-penh ayeng alhek Peter renh ilerl-alpetyek apmer Jerusalem-itwek. Ayeng ikwer-itwek aney-alhek arla 15-ek-atwety. <sup>19</sup> James, Ingkart-kenh aytetiyikw, rethenant ayeng-then angkerrek. Atha Akngey-kenh angkakert ingwer-rnem avey-angenh, Peter James, angkakert ingwer-rnem-then, angka arratyiley-angenh ikwer-rnem-itwek. <sup>20</sup> Akngeyelant angka Jesus-akert atyeng anayntilek. Akngeyel arem, ayeng irrywerrey-angenh, arraty innga atha ileyel. <sup>21</sup> Ikwer-penhan ayeng apmer Syria-warl Cilicia-warl alhek. <sup>22</sup> Ingkart-areny Judea-areny-rnem atyeng akwerrp-antey anen, ayenh iterl-arey-angenh-antey. <sup>23</sup> Rernem angka atyeng-penh awekant, "Artwa weth Ingkart-areny-rnem-tangkwel atwennh, ywerrelhileyek, aleyan ra angka mwerr-angker-anem Jesus-akert ilerl-apeyel!" <sup>24</sup> Rernem-anem Akngeyek inkwerelhek ingkerrenh-antey, ayenharl Akngeyel ahelengkw-penh angkepilek, ayeng Akngey-angkwarr anayntetyek.

## 2

<sup>1-2</sup> Akngeyel ayenh thwenek, ayeng alhetyek Jerusalem-warl. Aherrety 14-penh ayeng Jerusalem-warl alhek arrpemarl. Atha Barnabas-then, Titus-then atnwenhek, atha tyaty Jerusalem-areny atyetyart-rnem awetyek, nthakenharl rernem atyeng angkem, mwerr apek, arrangkw apek. Ayeng ikwer-rnem ilelhek, "Ayeng ingwer-rnem-warl alhetyek, angka mwerr-angker Jesus-akert atha ilerl-apayntetyek."

<sup>3</sup> Titus-el Greek-kenh-angkwarr apentenh, Jew-kenh-angkwarr aylpey-angenh, akwerrp-antey. Atyetyartel-rnem renh menty tyarlewek, artweweny-antey. <sup>4</sup> Ingwer-rnem apetyek, ingkart-arppantey, angka irrywerremel anwekantherr ilerl-apayntetyek, anwernenhantherr angkepiletyek-arppantey irrywerremel, ikwer-rnemant-anem anwantherr awelhetyek. Angka amperl ilpertiley-angker rernemey! Arraty-arppantey rernem ilelhek. Rernem angkek, "Jew artwernem-kenh-angkwarr-tangkwel aylpetyek, arrantherr akwerterrp-antey alhewer ingkartirrey-angenh. Alakenh-angkwarr arrantherr aylpem, Jesus Christ arraty apenterl-ayntetyek." <sup>5</sup> Anwantherr ikwer-rnem awelhey-anghenarl, Jesus-kenh-angkwarrant apentetyek, arrekantherr angka mwerr-angker arraty ileyek. <sup>6</sup> Ingwerel-rnem atyetyart ilkwarppantey renh-rnem antwennh. Akngeyel renh-rnem areyel, arrangkwarl. Rernem ayenh menty tyarlewek, atha ingwer-rnem Jew-weny-rnem akalty-anthantyek. <sup>7</sup> Ikwer-penh, rernem ayenh kel iterl-arek-anem, Akngeyelarl ayenh thwenek, atha Jesus-kenh angka ingwer-rnemek ilerl-apayntetyek, arraty-angkwarr, Peter-el Jew-rnemek angka arraty-angkwarr arrwekel ilerl-apenh-apeny. <sup>8</sup> Ingkartel Peter renh angkakert thwenek Jew-rnem-warl. Alakenh-apeny ra ayenh angkakert thwenek ingwer-rnem-warl-anemarl, Jew-weny-rnem-warl. <sup>9</sup> James-then Peter-then John-then rernem akwel atyetyart anenh tyaty-areny-rnemek. Rernem Jew-rnem-warlant angkakert alhek. Aylernanth ingwer-rnem-warl angkakert alhetyek. Alakenh-anyem rernem aylernekanth kel inkwerelhek Barnabas-then, Akngeyelarl aylernanthenth thwenek ingwer-rnem-warl alhetyek. <sup>10</sup> Atyetyart rernem angka anyent-angkwarrant aylernekanth ilek, Jerusalem-areny man-weny-rnemant arntarnt-arayntetyek. Kel ayeng alakenh-anyem ayeng iterrek arrpemarl.

### Peter ra apmwelhilek

<sup>11-14</sup> Peter-el amern arlkwenh Jew-weny-rnem-itwek, apmer Antioch-itwek. Ikwer-penhan James-el Jew tyaty-areny irrpety thwenek apmer Antioch-warl. Ra renh-rnem aremel Peter ra aterirrek, ikwer-rnem-kety, ipmelhek-anem. Peter arlkarirrek, ingwer-rnem-kety amentirrek-anem, Jew-rnemel renh iltekerr. Ra ingwer-rnem-itwek amern arlkwey-angenh anenh. Ra Jew ingwer-rnem ilek, ingwer-rnem-itwek amern arlkwey-angenh aney-alhetyek. Atha renh arraty ilek ingkerrenh-itwek, rarl apmwangkwarr ingkerrenh akalty-anthenth, "Peter, ntwan Jew-kenh-angkwarr apenteyel angath-anteyarl. Ntwa ingwer-rnem iley-angenh, rernem Jew-rnem-apeny anetyek. Amern alhewer arlkwayntetyek ingwer-rnem-itwek arlkarirrey-angenh. Alakenh-anyem Ingkart-kenh-angkwarr aynteyel. <sup>15</sup> Anwantherr ingkerrenhel Jew-rnem-angkwarr apentenh akelyankel. <sup>16</sup> Anwantherr Akngey-angkwarr arraty anem, Jesus Christ renhant apententy, Jew-kenh-angkwarr-weny. Anwantherr Jesus renhant tnakenty, Akngey anwekantherr inkwerelhemarl. Jew-kenh angkwarr ywarnarl anwantherr

arrkernelheyel-kety, anwantherr arraty-angkwarr apentetyek. <sup>17</sup> Anwantherr Jew-rnem arrkernelhenh, Akngey-kenh-angkwarr apentetyek. Anwantherrap apmwakert-antey ingkerrenharl aneyel! Anwantherr apmwangkwarr alhey-angenh Christ-kenh-angkwarran. Arrangkw! Anantherr Jew-kenh-angkwarr apententy, anwantherrap arrangkwarl. Christ-kenh-angkwarr apententy, anwantherrap arraty Akngey-angkwarr aneman. <sup>18</sup> Ntwa Jew-kenh angkarl angkep apententy, nga Akngey-angkwarr-kety apmwelhileml. Ingwer-rnem-itwek amern arlkwetyek alhewerarl, Jesus apenterly-ayntetyek, alakenh mwerrarl. <sup>19</sup> Atha renh-rnem kel apentey-angenh. Christ-kenh anyent-angkwarr atha apentem alhewer. Ayeng ipmelhem Jew-rnem-kenh angka apentekerr. <sup>20</sup> Kel ayeng Jesus Christ-warl anyentirrek. Alakenh-anyem ayeng iteth aneyeh intem-antey. Atha Akngey-kenh alerikw tnakeyel, rarl atyeng ilkelheyel, atyeng katy ilwek, apmwa atyengety iwetyek. <sup>21</sup> Ayeng nthakenh ikwerety intwemelirrey-angenh, rarl atyeng katy ilwek, ayenh itethileyek. Jew-kenh-angkwarr anwantherr Akngeyek arratyirretyek-arrpantey arrkernelhenty, Jesus anwekantherr arrkent-apeny ilwek, arrangkwarl. Atha Jesus ikweren-angkwarr apentetyek intem-antey."

### 3

#### *Jesus renh tnakenty, Akngey-angkwarr anem*

<sup>1</sup> Galatia-areny, arrantherr arwengk ingkerrenh! Kel atha arrenhantherr aketh innga Jesus Christ-penh alkaly-anthek, rarl arwerl iylpeyl-atherrel ilwek-penh. Ingwerentyel arrenhantherr ilpertilekan, Akngey-kety angkepirretyek? <sup>2</sup> Rernem Jesus renh tnakenh, Akngeyel Itnweng thwenekarl, angka arrwekeleny Jew-kenh-angkwarr-weny. <sup>3</sup> Arrantherr angkepirrek Akngey-kenh Itnweng-kety. Nthakenh arrantherr aheren-areny-kenh-angkwarr apenteyel? <sup>4</sup> Arrkent arwarl arrantherr angkepirrek Akngey-kenh angkek mwarranty awelhekerr. <sup>5</sup> Arrantherr Christ-ekant awelhenh, Akngeyel kel Itnweng renh thwenek, arrenhantherr riterrkiletyek. Moses-kenh-angkwarr arrangkwarl!

<sup>6</sup> Akngey-kenh angka alakenh aynteyel: Abraham-ant Akngeyek inkwerelhemel awelhek, Akngeyel renh artwa arraty innga arek, rarl Akngeyek awelhenh. <sup>7</sup> Alakenh-anyem iterrenherr-arey, arrantherr Akngeyek awelhenty, arrantherr Akngey-angkwarr arraty anem Abraham Akngey-angkwarr arraty anenh-apeny. <sup>8</sup> Akngey-kenh pip alakenh aynteyel: awank-akerr Akngeyel Abraham renh arrwekel ilek, ra alethang-rnem itethileyek, rernem ikwer awelhenty. Alakenh Akngeyel Abraham arrwekel alhelek, "Ngkwenh-rnem-angkwarr angka atyenh arlpimpirreyen apmer arrpanenhel, ingkerrenhel ayenh iterl-arayntetyek." <sup>9</sup> Abraham rarl Akngey renh arrwekel tnakek-apeny, ingkern-penh-rnemel renh tnaketyek arrpemarl. Akngeyel ingkern-penh-rneman ingkerrenh arntarnt-arem arrpemarl, Abraham renh arntarnt-arenh-apeny arrpemarl.

#### *Jew-kenh-angkwarr apentey-angenh*

<sup>10</sup> Jew-kenh-angkwarr anwantherr ywarn arrkernelheyel, Akngey-angkwarr arratyirretyek-arrpantey. Moses-kenh angka arrwekeleny aynteyel: "Jew-kenh-angkwarr ntwa arraty apentetyek-arrpantey arrkernelhem, Akngeyelarlap ngenh arntety anthem. Alakenh-anyem aynteman ra." <sup>11</sup> Jew-kenh-angkwarr anwantherr ywarn arrkernelheyel, Akngey-angkwarr arraty anetyek. Angka Akngey-kenh alakenh aynteyel: "Akngeyekant rernem awelhenty, rernem Akngey-angkwarr arraty anem. Akngeyel renh-rnem ingkerrenh ipmepenh itethilem." <sup>12</sup> Jew-kenh-angkwarr ingwer-rnem iteth anetyek arrkernelheyel, Akngey-kenh arrwekeleny angkek awelhey-angenh. Jew-kenh-angkwarr anwantherr Akngey-kenh angkek ywarnarl awelheyel-kety. Jew-kenh angkel anwantherr iteth aney-angenh, Akngey-kenh-angkwarrantarl anwantherr itethan anem. <sup>13</sup> Jesus-el anwenhantherr itethilek, ra arwerl-itwel ilwek. Akngeyel renh menty anthek, ra anwekantherr katy ilwetyek, anwenhantherr itethileyek. Akngey-kenh angka arrwekeleny arrwekel ayntekarl, "Ingwerenty apek arwerl-warl atanhtenty, Akngeyel renh arntety anthem." Akngeyel anwenhantherr arntety anthey-angenh, Jesus-el anwekantherr katy ilwek arrkngert, apmwakert ingkerrenhek, apmwa anwekantherrety iwetyek, anwenhantherr mwerrileyek, itethileyek. <sup>14</sup> Jesus Christ ra arwerl iylpeyl-atherrel ilwek ingkerrenhek. Ra iwerr mpwarek ingkerrenhek, apmer arrpanenhek. Akngey-kenh angka arlpimpirrek apmer arrpanen-h-warl, Akngey rarl Abraham arrwekel alhelek-angkwarr-antey. Anwantherr Jesus renh tnakenty, Akngeyel-anem Itnweng impen ikweren-angkwarr warrer nem.

#### *Angka arrwekeleny Akngey-kenh*

<sup>15</sup> Atyenhr-nemay, atha arrenhantherr ahern-areny-kenh-angkwarr arrekantherr anayntiley. Nthakenh iparey-angenh. Alakenh-anyem akngey-kenh arrengey-kenh angka aynteyel arrwekelely-kenh. Ywerrey-angenh, arrangkw, aleylar aynteyel. <sup>16</sup> Alakenh-anyem Ingkartel Abraham renh alhelek, anyent impen ikweren thwenetyek, rernem ikwer-angkwarr Christ-angkwarr anyentirretyek. Alakenh angka arrwekelely aynteyel. Akngey-kenh angka alakenh aynteyel, iparey-angenh arrangkw, ywerrey-angenh. <sup>17-18</sup> Angka renhey-antey Akngeyel Abraham arrwekel alhelek. Aherret 430-penh Akngeyel angka ingwer arrernek, Moses-warl, ingkern-theylar. Akngeyel Abraham renh alhelek, ikweren-rnem arntarnt-aretyek, rernem renh tnakenty. Angka arrwekelely nthakenh iparey-angenh, akngartewey-angenh. Arratyam-arraty Akngey-kenh angka nhenh aynteyel, ywerretyek arrangkw, intem-antey aynteyel, aleyan aynteyel-antey. <sup>19</sup> Akngeyel angka ikweren Moses-anem anthek, rernem apmwewarl irrekerr, rernem arraty-angkwarr anetyek, mwerr-angkwarr iterl-arelhetyek, rernem apmwakert aneyel, anyent impen ranem aremirreyek-atwety. Anyent renhey-antey, Abraham-arl alhelek. Irrwerl-areny-rnemel angka Moses renh anthek. Moses-el angka arrernek ingkerrenhek, rernem apenterl-ayntetyek. <sup>20</sup> Angkakert renh ikwer-rnem-warl thwenem, Akngey ranney Abraham renh alhelek, ra renh angkakert-angkwarr alheley-angenh. <sup>21</sup> Angka impen anwantherr apentetyek, Akngeyel Abraham renh arrwekel alhelek. Anwantherr Jew-kenh angka ingkerrenhek ywarn awelheyel. <sup>22</sup> Akngey-kenh angka arrwekelely aynteyel, ingkerren apmwakert aneyel. Rernem apek Jesus renh tnakenty, ikwer-angkwarr arraty anetyek, Akngeyel Abraham alhelek-apeny. Akngeyel Abraham renh artwa arraty arek, rarl Akngeyek awelhenh.

#### *Alakenh ilwey-angenh, Jesus renh tnakenty*

<sup>23</sup> Jesus ra apetyey-angenh-antey, anwantherr Moses-kenh angka arrwekelely-akert anen. Angka arrwekelely atyetyart-apeny anwekantherr anen. <sup>24</sup> Angka arrwekelely anwantherr apenteh, Christ ra apetyetyek-atwety. Ikwer-penh Christ ra apetyek, anwantherr anem Akngey-angkwarr arraty anetyek, anwantherr Christ renh tnakentyel. <sup>25</sup> Lyert anwantherr Christ tnakem-anem. Aleyan angka arrwekelely anwekantherr atyetyart aney-angenh-anem. <sup>26</sup> Aley anwantherr Akngey-kenh alerikw-anemarl, arran-therrarl Jesus renh-anem apententy. <sup>27</sup> Baptise inentyel arranther Christ-angkwarr anyentirrem, arranther Christ-kenh-rnem ingkerrenh. <sup>28</sup> Arranther anyentirrekarl ingkerrenh-anem anem. Alakenh-anyem arranther ingkerrenh-antey anyent-anem, Jew-rnem-then Greek-rnem-then warrkenh-rnem-then atyetyart-rnem-then artwernem-then arelh-rnem-then. <sup>29</sup> Arranther apek Jesus Christ-kenh, aleyan arranther Abraham-kenh-rnem arrpemarl, anyent-angkwarr apenteyel. Akngeyel arrenhantherr alhelek, arrenhantherr arntarnt-aretyek arrpemarl, rarl artwamp Abraham renh-tangkwel alhelek-apeny, renh arntarnt-aretyek.

## 4

#### *Anwantherr Akngey-kenh alerikwant-anem aneyel*

<sup>1</sup> Apmerek-artwey rernem apmer atnyeneyel. Ampa akely-rnem alerl-antey ilkwerrentyant-anem rernem apmer atnyeneyen, apmerek-artwey. <sup>2</sup> Rernem alerl-antey mpwelheyen. Artwa ampwel-rnem renh-rnem-tangkwel akalty-anthem, amangkem-anem. Akely-penh ilkwerrentyelant-anem rernem apmerek-artwey irrem. <sup>3</sup> Ampapenyarl anwantherr awankarl anen akwerrp, ingkart-arrpanterg ingwer-rnemant apenteh. <sup>4</sup> Arltal ikwerenhel, Akngeyel alerikw ikweren ahern nhenh-warl thwenek, rarl arrwekel awank-akerr alhelek, renh thwenetyek. Akngey-kenh alerikw irrkngarl-anem aytek, ra Jew-kenh-angkwarr arraty apenteh. <sup>5</sup> Anwantherrarl Jew-rnem-kenh-angkwarrant apenteh, ra alerikw ikweren thwenek, anwenhantherr itethiletyek, Akngey-angkwarrant arraty apenterl-ayntetyek. Akngey-kenh alerikw-rnem arrpemarl anwantherr aneyen. <sup>6</sup> Anwantherr kel Akngey-kenh alerikw aneyel. Ra Itnweng anwekantherr-warl thwenek, anwekantherr-itwek kwen anayntetyek. Anwanther renh Akngey akem, rarl Itnwengel anwenhantherr akalty-antheyel-angkwarr. <sup>7</sup> Arrantherr kel alerikw ikweren-rnem aneyel, Jew-kenh-angkwarr arrangkwarl. Arrantherr Akngey-kenh alerikw-rnem, arrantherr apmer ikwerenhel aney-alpeyeh.

#### *Paul Galatia-areny-rnemek amperrngirreyel*

<sup>8</sup> Arrwekel arrantherr apatemel anen, ingkart-arrpanterg-rnemant apenteh. <sup>9</sup> Arrantherr ingkerrenhel Akngey iterl-areyel, rarl arrenhantherr atnyeneyel. Nthakenh arrantherr angkepirretyek iterreyel, ingkart-arrpanterg irrtywerreyelarl ilenh-rnem-warl? <sup>10</sup> Arrantherr ilkelheyel Moses-kenh-warl anyentirretyek, arltal arrpanenhel,

alkent arrpanenhel, aherrety arrpanenhel. <sup>11</sup> Atha arrenhantherr ywarn-antey akalty-anthek, arrantherr atyeng awelhetyek-arrpantey. <sup>12</sup> Atyehn-rnem, Jew-kenh-angkwarr apentey-angenh. Arrantherr ayenh apmwewariley-angenh, arrantherr atyeng iylpareth awelhenh. <sup>13</sup> Arrantherr kel akalty. Awank-akerrarl ayeng arntety anenharl, atharl arrekantherr angka mwerr-angker renh akalty-anthek. <sup>14-15</sup> Arrantherr atyeng iterrenh, Akngey-kenh warrkenh-weny-arrpantey, ayengarl aleth arntetylrenhek. Arrantherr ayenh arek-penh, arrantherr atyeng irrpelthirrey-angenh. Arrwekelan arrantherr atyeng inkwerelhelk-tangkwell! Arrantherr atyeng inkwerelhelk angel-ek inkwerelheyel-apeny, Jesus Christ-ek inkwerelheyel-apeny. Aleyan arrantherr atyengety arlkarireyel-anem. <sup>16</sup> Angka atha arrekantherr ileyl array. Arrantherr atyeng awelhey-angenh. Arrantherr atyengety arlkarireyel. <sup>17</sup> Atyengety Jew-kenh-angkwarr apenteyel-rnem rernem arrenhantherr ilpertiletyek arrkernelheyel, ikwer-rnem-angkwarr apentetyek. <sup>18</sup> Arrantherr Jesus-kenh angkek inkwerelhelk arrwekel, arrantherr-anem ingwer-angkwarr apenteyel, ament-anem. <sup>19</sup> Ayeng arrekantherr artewentyel iterreyel, Jesus Christ arrantherr arrayt tnaketyek, ikwer inkwerelhetyek. <sup>20</sup> Ayeng ilkelheyel ayeng arrekantherr-warl alhetyek, ayeng arrekantherr-itwek angketyek. Ayeng arrekantherr artewentyel iterreyel, amperrngirremel.

### *Hagar Sarah atherr*

<sup>21</sup> Ingwer-rnem ilkelheyel, Moses-kenh angka apenterl-ayntetyek. <sup>22</sup> Akngey-kenh angka alakenh aynteyel. Abraham-kenh alerikw awey atherr anenh. Arelh warrkenh-kenh awey anyent anenh. Avey ingweran apmerek-artwey-kenharl anenh. <sup>23</sup> Avey anyentan warrkenh-kenh, apmwamwamarl Hagar-kenharl. Ingweran Sarah-kenh, Akngeyelan anthek, ra arrwekel alhelekarl. <sup>24-25</sup> Arelh ingwerant-atherrarl anayntileyl. Arelh warrkenh anyent, Sinai-areny Hagar arlarl anenh, apmerek arrangkw. Jew-kenh-angkwarr apenteyel-rnem rernem ahern-areny-angkwarr apenteyel, Jew-kenh-angkwarrant. <sup>26</sup> Arelh ingweran, Sarah mwerr-angkwarr apenteh, Ingkart arrayt-angkwarr apenteyel-rnem-apenyarl, alker irrwerl-areny-rnemelarl apenteyel-apenyarl. <sup>27</sup> Alakenh angka anayntileyl. "Arelh anyent ampek arrangkw. Ra inkwerelheyel, Akngeyelarl renh alhelek ikwer-they ampa akngerram-akngerrirreyen, arelh ingwer-rnem-angkwarr." <sup>28</sup> Isaac anenh, Akngeyelarl Abraham renh-tangkwell arrwekel alhelek-angkwarr. Atyehn-rnem, alakenh-apeny arrantherr Akngey-kenh alerikw arppemarl aneyel, Akngeyelarl arrwekel alhelek arrantherr ikweren-hrnem anetyek arppemarl. <sup>29</sup> Abraham-kenh alerikw ingweran Ishmael, awey arlarl ilenhel irrwernek Isaac, awey alhelenty renh, Akngey-kenh Itnwengelarl renh anthek, Akngey-angkwarr ra anetyek. Aley-anyem Akngey-angkwarr aneyel-rneman alwernemel irrwerneyel arppemarl. <sup>30</sup> Akngey-kenh angka arrwekeleny arrwekel aynteyel, amenheng-atherr Hagar atherr arlarl, ratherr apmerek-artwey-weny arrangkw. Renh-atherr irrenta! Amenheng ingwer-atherran Sarah-them Isaac atherr ratherrantarl apmer atnyenetyek. <sup>31</sup> Anwantherr arelh anyent Sarah mwerr-angkwarr apentetyek, arelh warrkenh Hagar apentey-angenh, mentyarl. Alakenh anayntileyl. Akngeyelarl arrwekel alhelek, anwantherr ikweren-hrnem anayntetyek. Anwantherr ilenh-angkwarr apentetyek.

## 5

### *Christ-el ingkerrenh anyentelhileyl, rernem arrayt anetyek*

<sup>1</sup> Christ-el anwenhantherr anyentelhilek, arrantherr ikweren-hangkwarr, alhewer anayntetyek. Jew-rnem-angkwarr apentey-angenh. <sup>2</sup> Jew artwer nem-kenh-angkwarr aylpenty, Christ-kenh-angkwarr-kety anwantherr amentirrem. Christ-kenh-angkwarrant arrangkwarl. <sup>3</sup> Arrantherr Jew-kenh-angkwarr angka apenteyt, arrantherrap angka ingkerren-anem apentetyek, ywerreyek-atwety. <sup>4</sup> Jew-kenh-angkwarrarl aylpenty, arrantherr arrayt Akngey-angkwarr aney-angenh. Christ-angkwarr-kety arrantherr amentirrekerr impen-kety, Akngeyel arrenhantherr arntarnt-arey-angenh anekerr. <sup>5</sup> Anwantherr Jesus renh tnakenty, Itnweng Rlwartel anwenhantherr akalty-anthemarl, anwantherr arrayt Akngey-angkwarr anayntetyek. <sup>6</sup> Jew artwekenh-angkwarr aylpetyek arrangkwarl. Alakenh-anyem angka impen ra aynteyel, anwantherr Jesus-angkwarrant apentetyek, ingkerrenh arntarnt-arayntetyek.

<sup>7</sup> Aray, arrantherr mwerr-angkwarr apenteh. Angwenhel arrenhantherr ilperilekan. <sup>8</sup> Akngeyel arrenhantherr rlwanekarl, arrantherr ikweren-hrnem anetyek. Ra anyent ikweren-hrnem thwenehy-angenh arrangkwarl, apmwangkwarr arenhantherr akalty-anthetyek. <sup>9</sup> Amern arlwariley-angker anyentel amern akngerr mpwarey-angker-apeny, artwa ahelengkw anyentel apek akngerr ilpertilem, ikweren-hangkwarr apentetyek, Akngey-angkwarr apentekerr. Iylarnem ingkerrenh-anem atwerretyek, ilterretyek.

<sup>10</sup> Arrantherr Ingkart-kenh-rnemarl. Arrantherr atyengant awelhetyek, ingwerek awelhey-angenh. Ingwerenty arrkernelhenty, arrenhantherr ilpertiletyek, Akngey-angkwarz apentekerr, Akngeyel renh arntety antheyen. <sup>11</sup> Atyenh-rnem, ingwer-neman atyeng iterreyel, atha Jew-kenh-angkwarz akaltyilerl-anenty-arrpanter, rernem aylpetyek Jew artwernem-kenh-angkwarz. Jew-rnemel ayenh atwetyek alwerneyel, atharl ingwer-rnem akalty-anthek, Jesus rarl ilwek anwekantherr ingkerrenhek. Anwantherr Jesus-kenh-angkwarz apenteteyek, Jew-angkwarz-weny. <sup>12</sup> Rernem arrenhantherr ipmey-areny, Jew-rnem-kenh apmwangkwarran aleth apentekerr. <sup>13</sup> Ingwer-rnem iterreyel Ingkart-kenh-angkwarz-arrpanter, ingwer-rnem arntartn-arey-angenh anayntetyek, arwa alhewer amentewarl alhayntetyek. Alakenh apmwangkwarr alhey-angenh, ingwer-rnem arntartn-arayntetyek. <sup>14</sup> Akngeyel anwekantherr angka arraty ileyel, impen. Akngey-kenh angka alakenh aynteyel, arrantherr ingkerrenh mwarrant-arey anayntetyek, Akngey-kenh-angkwarz. <sup>15</sup> Arrantherr ilterrel-anenty, atwerrerl-anenty, arrantherr Akngey-kety intem-antey amentirremarl.

#### *Anwantherr ament-warl alhey-angenh, Itnweng Akngey-kenh apenteteyek*

<sup>16</sup> Alakenh-anyem atha arrenhantherr ileyel, arrantherr Akngey-kenh Itnwengek awelhetyek, ament-warl alhey-angenh. <sup>17</sup> Apmwangkwarr-then Akngey-kenh Itnweng-angkwarz-then amentant-atherr aynteyel. <sup>18</sup> Itnwengek awelhenty, ahern-areny-kenh angkék awelhey-angenh. Akngey-kenh Itnweng atyetyek arrekantherr aneyel, arrenhantherr arraty-angkwarz akalty-anthetyek. <sup>19</sup> Ingwer-rnemel apmwangkwarr apententy, anew ingwer-kenh ingwerl-anem ilpertilem, apmwangkwarr iterreyel, mwerr-angkwarz-kety ylpelirrem, <sup>20-21</sup> Ingwer-rnem ingkart-arrpanter-rnem apentem, ingwer-rnem arkarirrem ingwer-rnem-kety, ingkerrenh-they amentirrem. Ingwer-rnem alharlkwerrem, ingwer-rnem ahelirrem ingwer-rnemek, ingwer-rnem ampwal-rnem rakerrem, ingwer-rnem terangk irrem. Rernemap Ingkart apentey-angenh, rernem nthakenh Akngey-kenh apmer-warl aylpey-angenh. <sup>22</sup> Akngey-kenh Itnweng-akert-rnem ingkerrenh irrkngey aneyel, mwerr aneyel, ingwer-rnemek awelheyel. Rernem iylpareth aneyel, ingwer-rnemek ampperrngirremel. <sup>23</sup> Rernem arternp aneyel mwerr-angkwarz, tnakelhey-angenh. Ingwer-rnem arrekantherr nthakenh arrngert angkey-angenh, arrantherr mwarrant-arey anayntetyek. <sup>24</sup> Jesus ilwek apmwa arrekantherrey irralketyek, ywerrelhileyek. Arrantherr Christ Jesus-warl anyentirrek. Ra apmwa arrekantherreye ywerrelhilek. <sup>25</sup> Akngey-kenh Itnweng anwekantherr-warl antelhek, anwantherr ikwerenh-angkwarz apenteteyek intem-antey. <sup>26</sup> Anwantherr tnakelhey-angenh anetyek, ingwer-rnem-kety arkarirrey-angenh anetyek, ingwer-rnem alharlkwey-angenh anetyek.

## 6

#### *Ingkerrenh arntartn-araynta*

<sup>1</sup> Atyenh-rnem, ingwerenty apek apmwangkwarr alhenty, arrantherr renh mwan-tyel Akngey-warl-athek angkemel, angkepiletyek. Arrantherr arntartn-arelhetyek arrpemarl, arrentyel arrenhantherr arrkernekk. <sup>2</sup> Anwantherr Ingkart-kenh-angkwarz ingwer-rnem arntartn-arayntetyek, alakenh Christ-elarl ilek-angkwarz-antey. <sup>3</sup> Nga mwerr-arrpanter tnakelhenty ingwer-rnem-warl, ngap irrywerremel ilelheyel. <sup>4</sup> Akngey-kenh-angkwarz ntwa mwerr arntartn-arayntetyek, ingwer-rnemek tnakelhey-angenh anayntetyek. <sup>5</sup> Akngeyel anwenhantherrenh ayerneyen anyentarl-anyentarl. <sup>6</sup> Arrantherr Akngey-kenh angkakert arntartn-arayntetyek, ilek-ilek anthayntetyek, man anthayntetyek Akngey-kenh-angkwarz. <sup>7-8</sup> Apmwel-areth iterrey-angenh, Akngeyel aketh-antey areyel-kety. Ngarl apmwangkwarr alhenty, apmwel-arethalap ngkweng aneman. Nga apmwangkwarr alhenty, Akngey ngkwengety menty ipmelheyen. Nga Akngey-kenh Itnwengek awelhenty, ngap iteth intem-antey aneyen. <sup>9</sup> Arrantherr ipmelhey-angel, ingwer-rnem arntartn-arayntetyek intem-antey. Akngeyel arrenhantherrenh arntartn-areyenh arrpemarl ipmelhey-angenh. Arta ingkernel Akngeyel arrenhantherrenh atnyeneyen. <sup>10</sup> Alakenh-anyem, anwantherr ingwer-rnem arntartn-arayntetyek. Ingkart-areny-rnem impen arntartn-arayntetyek.

#### *Paul-el renh-rnem artwerileyel anyent-inger-antey*

<sup>11</sup> Arrantherr alhengk-areyel pip nhenh reytemilemel, atharl anyentelant pip nhenh-warl ingkwernek, itna ilkwer nem iltya atyehel ingkwernek. <sup>12-13</sup> Jesus Christ arwerl iylpeyl-atherrel ilwek. Rernem angka Jesus-akert akalty-anthey-angenh, ingwer-rnem ahelirekerr. Rernem Jew-rnem-kenh-angkwarz apenteteyek, Jew-angkwarz-weny. Rernem Jew-kenh angka angath-antey apenteyel, Jew artwernem-kenh-angkwarz. Rernem ilkelheyel,

arrantherr Jew artwernem-kenh-angkwarr apentetyek, rernem atyetyart ilkwarrpanterey anetyek. <sup>14</sup> Ayeng tnakelhey-angenh, atharl Jesus Christ anyentant tnakeyel, rarl arwerl iylpeyl-atherrel anwekantherr ilwek. Ra anyentant aketh anayntelhilek. Ayeng ahern-arenyek awelhey-angenh, arrangkw. <sup>15</sup> Ingwer-rnemel apenteyel Jew artwernem-kenh-angkwarr. Ahern-areny-kenh angka arwarl, arrangkwarl. Christ-kenh-angkwarr anwantherr apentetyek arraty. Angka impeney-antey nhanyem, Akngayelant anwenhantherr kel lyertenylemarl. <sup>16</sup> Arrantherr angka nhenhek awelhenty, arrantherr Akngay-kenh-rnem ingkerrenh anem. Akngay ranem arrekingkerr mwerr-angkwarr anayntelhileyen, Ingkart-areny ingwer-rnemek-then. <sup>17</sup> Arlka ayeng arlety-angketyarr, ayenharl atwek ingwer-rnemel, atharl Jesus Christ-kenh angka ilerl-apenh. Alakenh-anyem rernem ayen iterl-aremer, rernem atyeng irrpelthirrey-angenh anetyek, ayeng ingga Jesus-kenh angkakert. Arrantherr atyeng awelh-ayntetyek. <sup>18</sup> Athanem Jesus Christ ayernem, ra arrenhantherr arntarnt-aretyek. Amen.

**Colossians**  
**Colossae-areny-rnem-warl**  
**Paul-el pip nhenh thwenew Colossae**  
**tawen-areny-rnem-warl.**

Ingwerentyel arrwekel-antey tyaty arrernew, Paul-el Colossae-areny tyaty arrerney-angenh. Paul ingkern-they apetyew. Paul ranem atyetyart irrew ikwer-rnemew. Angkakert-rnem ra thwenew ilerl-apaynteyew, Ephesus-areny-rnem ra thwenew. Ephesus ra anenh apmer ilkwa Asia-ampenyel, Rome-areny-rnem atyetyart anenh. Paul-el awenh ingwer-angkwarz, rernem akalty-anthenh, ilpertelenh.

Akalty-anthey-angker apmwamwam mwanty iterl-arey-angenh anenh. Rernem ament-warl ikwer-rnem-wenh akalty-anthenh. Ikwer-rnem-wenh-angkwarz apententy, ngap itetherreyew-arrpantey arrkernelhem. Arrangkwarlarp ran. Aker arlkwey-angenh, alakenh rernem iterrehn. Jesus-wenh-angkwarz apentewerr, arraty inngewety.

Paul-el pip ikwer-rnem-warl thwenew, renh-rnem akalty-anthaynteyew angka arraty-angkwarz. Jesus Christ-wenh-angkwarrant rernemap itetherreman. Ament-angkwarr akalty-antheyel arrangkwarl, nthakenh itetherrey-angenharl, "Jesus renh nakenty, ngap itetherreman." Jesus Christ-elant ingkerrenh itethelem. Ingkartel ahern arrpmernew. Alakenh-they Paul-el angka ikwer-rnem-warl thwenew.

<sup>1</sup> Atha Paul thwenew, Ingkartel ayenh arrernew angkakert Christ Jesus-wenh. Timothy-el-then, Ingkart-wenh-angkwarz apenteyel arrpemarl.

<sup>2</sup> Timothy aylanth pip nhenh thwenem arrewantherren-warl, Colossae tawenel aneyel-rnem-warl, iylpareth awelheyel-rnem-warl. Akngey anewantherrenh Ingkartel arrenhantherrenh mwantyel arntarnt-arem, arrantherr mwarrant-arey anaynteyew. <sup>3</sup> Anantherr arrewantherr aleth-antey ayerneyel Ingkart Jesus Christ. Ingkartew anantherr inkwerelheyel, aynikw ikwerenew. <sup>4</sup> Anantherr kel awew arrantherral Jesus Christ nakeyel, arrantherr Ingkart-areny ingkerrenh arntarnt-areyel. Alakenh-anyem anantherr Ingkartew angkem inkwerelhemel. <sup>5</sup> Arrantherr Ingkart nakeyel, rarl arrwekel ilew, arrantherr iteth intem-antey anaynteyew. Arrantherr angka mwerr-angker Ingkart-wenh awenh. <sup>6</sup> Angka mwerr-angker Ingkart-wenh arlpimperrreyel apmer arrpaneh-warl. Rernem apmer arrpanenew akalty-antheyel. Rernem nakew inkwerelhemel. Alakenh-anyem arrantherr angka akwerrpel awenh arrpemarl, "Ingkart ingkerrenhew ilkelheyel" wenh. <sup>7</sup> Artwa Epaprahas-el arrenhantherrenh akalty-anthenh alakenh, "Ingkart ingkerrenhew ilkelheyel" wenh. Ra Ingkart Jesus-angkwarr warrkerrenh, anantherr warrkerreyel-apeny. <sup>8</sup> Ranem arrenhantherrenh akalty-anthenh, Ingkart-wenh Inwengel arrenhantherrenh akalty-anthenh arrpemarl, ingwer-rnem-itew mwarrant-arey anaynteyew. Alakenh-they anantherr angka awek-anem, arrewantherr-penh.

<sup>9-10</sup> Alakenh-anyem anantherr Ingkart renh-anem ayernew. Anantherr aleth-antey ikwer angkeyel, arrantherr Ingkart-wenh-angkwarz arraty apenteyew, rarl iterreyel-angkwarz, Inweng Mwerr-angkerel arrenhantherrenh akalty-antheyew, arrantherr arraty iterreyew. Inweng-angkwarr akaltyerreyn-aynteyew aleth-antey, ingwer-rnem arntarnt-araynteyew mwerr-angkwarz. Arrantherr artwentyel innga akaltyerreyn-aynteyew angka ikwerenew. <sup>11</sup> Ingkartel arrenhantherrenh rlterrkam-rlterrkeleyen. Ingwerentyel arrenhantherrenh apmwewarlelewerr, arrantherr inkwerelhemel aleth apent-aynteyew ikweren-hangkwarrant mwerr-angkwarz-ayteng. <sup>12</sup> Anantherr-anem Akngeyew inkwerelheyew, rarl angka arrwekel arrernew, arrantherr apmer alker-itew aney-alpeyew. <sup>13</sup> Ran anenhantherrenh apmwewety rakew, ranterr arrpemarl alerikw ikweren arrernew, Atyetyart anewantherrenh aneyew, anantherr ikweren-rnem anaynteyew. <sup>14</sup> Ingkart-wenh alerikw ranem anewantherr katy ilwew, apmwia anewantherr-wetye, anantherr iteth intem-antey anaynteyew.

*Alerikw ahern-areny ingkerrenhew aneyew*

<sup>15</sup> Anantherr nthakenh Akngey irrwerl-areny arey-angenh. Alerikw ikweren-tyetyart apmer arrpanenew. Alerikw retangkwel arrwekel anenh ahern-wenyanekel. Alerikw ikweren ingkerrenhew anaynterrew-anem, Ingkart anyent rey-antey. <sup>16</sup> Rlterrk ikwerenhel ra irrwerl-areny-rnem-then ahern-areny-rnem-then arrpmernew. Aleyarl anantherr areyel-anem. Ikwer-angkwarr inweng-rnem-then

ingkerrenh arrpmernew, nthakenh arey-angenh-rnem. Alerikw rlterrk ikwerenhangkwarr ra ingkerrenh arrpmernew, atyetyart ingkerrenhew anaynteyew.<sup>17</sup> Alerikw ra kel anenh, ahern nhenh-wenyankel. Ingkartel ahern-areny-rnem-then arrpmerney-angenh-antey, rant anenhan. Alerikwel ingkerrenh-antey atnyeneyel, ahern-areny-rnem ingkerrenh atnyeneyew.<sup>18</sup> Christ-then Tyaty-areny-rnem anyent-antey, Jesus Christ akapwert-apeny atyetyart aneyel ingkerrenhew. Anyent arka ikwerenhang-peny anem, inweng anyent-akert rey-antey ikwer-rnem warrkerreyel. Ingkartel renhtangkwl ipmepenp akemhelew, alerikw ra ingkerrenhew atyetyart aneyew.<sup>19</sup> Aray, Ingkartelant alerikw ikwerenhang-rnem, ikwer-apeny anaynteyew Ingkart irrkaty-antey ikwer-apeny, anyent rey-antey.<sup>20</sup> Alerikw ikwer-angkwarr alker-areny ahern-areny ingkerrenh ikwerenhang-rnem ayerrpelew. Alerikw ikwerenhang arwerl iylpeyl-atherrel ilwemel, ra mwerr-angkwarr mpwarew ingkerrenhew ananther apenterl-aynteyew, mwarrant-arey anaynteyew, artermel.

<sup>21</sup> Arrantherr Ingkart-wety ament-warl alhenh. Arrantherr apmwangkwarr alhenh ament iterremel, Ingkart-wety arkarrerrenh.<sup>22</sup> Alerikw-anem arwerl iylpeyl-atherrel ilwew, arrantherr Ingkart-wenh-angkwarr arraty aneyew. Ra ikwer-warl anyentel-helew, alyekl mwerr anaynteyew, Ingkartel arrenhantherrenh tyatyemeley-angenh.<sup>23</sup> Arrantherr Ingkart-wenh-angkwarr aneyew, angka mwerr renh rlterrk nakemel. Arrantherr-anem angkew iylpelerrey-angenh, Ingkartel arrewantherr arrernew, arrantherr iteth intem-antey anaynteyew. Ingkartel ayenh rlwanew, angka mwerr-angker Ingkart-wenh ilerl-apayteyw ahern-areny ingkerrenhew.

<sup>24</sup> Ayenh apek menty atwem mwerrarl. Christ Jesus arka menty anthelhew. Ayeng arka menty anthelhew arrpemarl tyaty-areny ingkerrenhew.<sup>25</sup> Akngeyel ayenh arrernew, tyaty-areny-rnemew, warrkerreyew, angka ikwerenhang kerrenhew akalty-antheteyew, ingkerrenhew warrkerreyew.<sup>26</sup> Arrwekel angka anyelk-tangkwl aynten, Aley angka anaynt-anem Ingkart-areny ingkerrenhew, rernem aketh-antey aweyneyel.<sup>27</sup> Ingkart ilkelheyel arrantherr Jew-weny-rnem akalty aneyew, angka ikwerenhang, arrantherr apmer mwerr-angker-itwew aney-alpeyew, Christ-wenh-angkwarr.

<sup>28</sup> Rernem-anem Jesus Christ-warl anyenterremel, Jesus Christ nakeyenh. Ananther renh-rnem akalty-anthem, rernem arraty-angkwarr apenterl-aynteyew, ingwer-rnemel renh-rnem ilpertelewerr.<sup>29</sup> Christ-el ayenh rlterrkkeyel. Alakenh-anyem ayeng warkerreyel, alhengkerr irrey-angenh. Atha ingwer-rnem akalty-anthaynteyew ipmelhey-angenh.

## 2

<sup>1</sup> Arrantherr iterl-areyew ayeng arrewantherr warrkerreyel, ingkerrenhew-antey, ingwer-rnem Laodicea tyaty-areny-rnem-then, ayenh iterl-arey-angenh-rnem-then.<sup>2-3</sup> Arrantherr arnkaty aneyew, mwarrant-arey ingkerrenhew anaynteyew. Angka anyelk awank-akerr aynten rernem iterl-areyew. Alakenh-anem ingkerrenhew akwerrngel Ingkart-wenh-angkwarr arraty iterl-araynteyew. Arrantherr Christ-ew akalty aneyew. Christ ra Ingkart-wenh angka ingkerrenhew akalty, arratyant anaynteyew.<sup>4</sup> Atha arrenhantherrenh arratyant ileyel, ingwerentyel arrenhantherrenh irrtywerremel ilewerr, akaltyel-arrpantey angka ingwer-angkwarr.<sup>5</sup> Ayeng arrewantherr-itwew aney-angenh arrangkw, ayeng aleth-antey iterreyel arrewantherr. Ayeng inkwerelheyel, atha awewarl, arrantherr arraty apenteyle, Christ rlterrk nakemel aleth.

### *Jesus anyent impen*

<sup>6</sup> Arrantherr Christ Jesus nakeyel, Ingkart arrewantherr. Kel ikwerenhangkwarrant apenteylew arrantherr.<sup>7</sup> Ikwerenhangkwarrant akaltyerreyew, aleth-antey ikwer angkaynteyew. Renh rlterrk nakayew, ananther arrenhantherrenh akalty-anthew-apeny. Rlterrk nakaynteyew, iylpelerrey-angenh.

<sup>8</sup> Akalty-arrpantey ingwer-rnem-wety, arrantherr ikwer-rnem-wety arntarnt-arelheyew, rernem arrenhantherrenh ilpertelewerr apmwewarlelewerr ahern-areny-wenh-angkwarr Christ-wenh-angkwarr-wety akngewerr.

<sup>9</sup> Christ Ingkart anyent rey-antey, inweng anyent-akert.<sup>10</sup> Christ ra inngarl anyelk, arrewantherr-itwew, arrantherr ikwerenhangkwarr anyenterrew arrpemarl. Christ rey-antey arrpemarl, atyetyart ingkerrenhew anyelk atyetyart ahern-areny-rnemew, irrwerl-areny-rnemew-then.<sup>11</sup> Arrantherr Jesus Christ-warl anyenterrew, arrantherr apmwangkwarr ahern-areny-wenh-angkwarr apenteyle-angenh anaynteyew. Apmwamwam ahern-areny-wenh ament arrpemarl. Ra apmwa arrewantherr-wety itwew rlterrk ikwerenhel, arrenhantherrenh itethelew arrpemarl.<sup>12</sup> Rernem arrenhantherrenh baptise-emelew, arrantherr Jesus Christ-angkwarr aylpem-apeny. Arrantherr

ilwem-apeny, arrantherr itetherrem-apeny. Arrantherr itetherrew, Ingkart renh rlterrk nakemel. Arrantherr Ingkart renh nakew, rarl Christ renh ipmepenh itethelew<sup>13</sup> Awank-akerr arrantherr apmwangkwarz-tangkwel apenten, akwerrp-antey anen. Arrantherran ipmapeny anen. Ingkartel arrenhantherrenh itethelew, Christ-angkwarz, apmwa arrewantherr-wety iweg.

<sup>14</sup> Ingkartel anenhantherrenh menty arew, tyatyemeley-angen. Apmwa irrarkew Jesus Christ-el, arwerl ylpeyl-atherrel ilwewel. <sup>15</sup> Ran arrenty-rnem antengelew arwerl ylpeyl-atherrel ilwemel. Ra arrenty-rnem ywerrelhelew.

<sup>16</sup> Ingwer-rnem apatamel iterreyel Alakenh-anyem rernem angka ingwerek-ingwer ilpertel arrerneyew-arrpantey ahern-areny-wenh-angkwarz, "Nthakenh ananther arlkweyew, nthakenh antyweyew." Arla ltyerrey-angker anyenterr-aynteyew-arrpantey ayntarrp-ileyl. <sup>17</sup> Ingkart-wenh angka arrwekeleny ananther arrwekelant apenten, alyep, arrkay-apeny. Jesus Christ ranem aremerrew. Aleyan ikweren-angkwarzant apenteyel aketh innganem. <sup>18</sup> Ingwer-rnem arraty-arrpantey nakelheyel, rernem ilelhem "altyerr areyel" wenh, "antyerl-rnem areyel" wenh. Ikwer-rnem-wety arntart-arelha, rernem apal-angkwarz apenteyelarl-wety. <sup>19</sup> Aray, rernem Jesus Christ renh ipmew. Christ ra tyat-areny-wenh atyetyart aneyel, akapwert. Alwerrngel arlka anterrkwem. Arlwerrng-akert arlka rlterrk. Arlwerrng-weny arlka thapelelrem, apekap, nthakenh akngelhey-angen. Arlwerrng-apeny Christ-el ikweren-rnem ingkerr anterrkweyel, rlterkeleyel arrpemar.

<sup>20</sup> Arrantherr Christ-angkwarz anyenterrew-apeny-arrpantey, arrantherr ahern-areny-wenh apenteyel-antey apmwantey. Arrantherr awelheyel, ahern-arenyew, rernem arrenhantherrenh ilerl-anenty, "Alakenh mpwareyel" wenh. <sup>21</sup> Rernem ilem, "Ampwal yanh arney-angen" wenh, "amern yanh arlkwey-angen" wenh. <sup>22</sup> Amern ahern-areny-wenh arwa aynteyel, apmwerrey-angker. Amern arlkwenty, anamerl ywerrem-anem. <sup>23</sup> Ingwer-rnem iterreyel ikwer-rnem-wenh-angkwarz mwerr-arrpantey. Rernem irrytwerremel ileyl, arraty-angkwarz aneyew-arrpantey. Alakenh-anyem rernem ywarn arratyerreyew-arrpantey arrkernelheyel. Rernem ywarn-antey ilelhem, rernem mwerr-angkwarz anerl-anenty-arrpantey.

### 3

#### *Ingkartel anenhantherrenh itethelew Christ-angkwarz*

<sup>1</sup> Ingkartel arrenhantherrenh itethelew, Jesus Christ-angkwarz. Arrantherr-anem Ingkart-wenh-angkwarz anterr iterreyew, Ingkart-wenh apmerew iterreyew. Christ ra Akgey-itwel aneyel. <sup>2</sup> Arrantherr-anem anterr iterreyew irrwerl-areny-wenh-angkwarz, ahern-areny-wenh-angkwarz-weny. <sup>3</sup> Arrantherr ahern-areny-wety ywerrew-apeny, Christ-wenh-angkwarz anyenterremel. Arrantherr innganem Christ-angkwarz intem-antey iteth aney-alpeyenh. Ahern-arenyel arey-angen, Ingkartelant areyel. <sup>4</sup> Ingwer-inger Jesus Christ ra apey-alpeyenh rlterrk innga. Ikwer-penh ingwerel-rnem arrenhantherrenh areyenh rlterrk innganem.

<sup>5</sup> Alakenh-anyem arrantherr ahern-arenyew inkwerelhey-angen. Arrantherr apmwangkwarz alheyel-rnemew inkwerelhey-angen. Arwa alhewer ingwer alwernerrey-angen anterneyew, apmwangkwarz iterrey-angen. Ampwal ingwer-wennew iterrey-angen ngkweng ineyew. Alakenh-anyem Ingkart-wenh-angkwarz irrytwerreyelarl. <sup>6</sup> Apmwangkwarz alheyel-rnemew Ingkart ahelerreyel. <sup>7</sup> Awank-akerr arrantherr apmwangkwarzant apenten. <sup>8</sup> Aleyan arrantherr apmwangkwarz apentey-angen. Ingwer-rnemew ahelerrey-angen, iltey-angen, irrentey-angen, aneyew. <sup>9</sup> Arrantherr apmwewety ipmelhew. Arrantherr ingwerew irrytwerrey-angen. <sup>10</sup> Arrantherr kel rlengkeny-anem, Jesus-wenh-angkwarz. Ingkartel arrenhantherrenh intem-antey akalty-antheyel, rapeny-anem irreyew, akalty innga irreyew. <sup>11</sup> Ingkart-wenh-angkwarzarr arrantherr ingkerr mwerrarl aneyel, apmer ingkerrenh-areny, Jew-rnem-then ingkerrenh, Jew-weny-rnem-then, apmwangkwarz alheyel-rnem-then, warrkenh-rnem-then atyetyart-rnem-then. Mwerrarl anem, ananther ikwer-warl anyenterrewarl. Christ ra anewantherrr-itwel aneyel.

<sup>12</sup> Ingkart arrewantherr ilkelheyel ingkerrenhew. Alakenh ra iwerr mpwarew ingkerrenhew arrwekel-antey, ingkerrenhel renh arraty-angkwarz apenteyew, rernem ingwer-rnemew amperrngerreyew atwey-angen, rernem nakelhey-angen ingkerrenh mwerrant-arey aneyew. <sup>13</sup> Arrantherr iparrp anamerl ahelerrey-angen. Ingkart-areny ingwerel arrenhantherrenh iltenty, arrantherr renh ilteyney-angen. Kel menty renh atwey-angen, Christ-el arrenhantherrenh menty atwey-angen-apeny. <sup>14</sup> Kel mwerrant-arey ingkerrenhew aneyew. Ikwer-penh arrantherr anyent-apeny anem.

<sup>15</sup> Arrantherr ingkerrenh arlka anyent-apeny aneyel, Jesus Christ-wenh. Christ-el arrenhantherrenh ayerrpelew mwarrant-arey ingkerr inkwerelheyew. Mwarrant-arey atwerrey-angenh anaynteyew Ingkart ikwer inkwerelhemel. <sup>16</sup> Christ-wenh angkew iterreyew, arraty akalytel ingwer-rnem akalty-anthaynteyew, mwerr illelhemel. Arrantherr aylelhey-angker, psalm-then aylelh-aynteyew, Ingkartew inkwerelheyew. <sup>17</sup> Arrantherr angkerreyew Ingkart-wenh-angkwarr, arrantherr intem-antey Ingkart Jesus-ew iterreyew. Ingkart Akgneyew inkwerelhemel, Jesus-wenh-angkwarr.

<sup>18</sup> Arelh-rnem, arttew awelh-aynteyew. Alakenh Ingkart-wenh-angkwarr arraty aneyel.

<sup>19</sup> Artwernem, arrantherr anew-rnem mwerr arntarnt-araynteyew. Arrantherr renrnem atwey-angenh.

<sup>20</sup> Ampernem aleth amewikw aynewikw awelh-aynteyew, Ingkartarl ilkelheyel-angkwarr. Ingkart-wenh-angkwarr alakenh aynteyel.

<sup>21</sup> Aynikw-rnem, arrantherr ampernem irrentey-angenh, rernem antwerr alhewerr.

<sup>22</sup> Warrkenh-rnem, arrantherr atyetyart-rnemew awelh-aynteyew intem-antey, rernem arrenhantherrenh areyel-angkwarr, rernem arrenhantherrenh arey-angenh apal aneyel-angkwarr. Ingkartel areyel. Ingkartew mwerr warrkerr-aynteyew.

<sup>23</sup> Arrantherr iylpareth iytekerr-antey atnwenterrey-angenh warrkerreyew Ingkartew, ahern-arenyew warrkerrey-angenh. <sup>24</sup> Arrantherr kel akalty, Ingkart rarrp arrenhantherrenh ilek-ilek antheyen apmer ikweren-itwew. Arrantherr Ingkart Christ ikwer warrkerrey-alpeyenh. <sup>25</sup> Ingkart anyentewant ilkelhey-angenh, ingkerrenhew ilkelher-aynteyew. Ingkartel ingkerrenh arraty tyatyeleyleyl.

## 4

<sup>1</sup> Atyetyart-rnem, arrantherr warrkenh-rnem mwantyel arntarnt-areyew, ilek-ilek arraty anthaynteyew. Arrantherr atyetyart arrewantherrenh iterl-areyel, irrwerl-they areyelarl-wety.

### Akngay ayerneyew ipmelhey-angen

<sup>2</sup> Intem-antey Ingkart-warl angker-aynteyew, ikwer arraty iterr-aynteyew, ikwer inkwerelheyew. <sup>3</sup> Arrantherr Ingkart-warl angkeyew, ra ingkerrenh iylda altyw-ereleyew, ingkerrenhel angka Christ-wenh arraty aweyew. Angka anyelk-tangkwel aynten. Angka atha iterl-apenih arwa alhewer. Ingwer-rnem arkarrerrenh, alakenh ayen rernem tyayel-warl akwernew. <sup>4</sup> Arrantherr Ingkart renh ayernenherr-arey, ra ayen ritterkeleyew, atha angka anyelk-penh arraty anaynteleyew ingkerrenhew.

<sup>5</sup> Arrantherr akwerrp-rnem angka ikwer akalty-antheyew, rernem iterl-araynteyew arrpemarl. <sup>6</sup> Arrantherr arternp ilaynteyew ikwer-rnem. Rernem ngenh ayernenty, ntwa renh-rnem arraty ileyew.

<sup>7-8</sup> Artwa Tychicus-el ra atyeh aneyel arrpemarl, Ingkartew iylpareth. Ra Ingkartew warrkerreyel arrpemarl. Athanem renh arrewantherr-warl thwenem, ra atyeng-iperr ingkerrenhew ileyew, arrenhantherrenh arternpaleyew, atyeng iterrerl-anewerr. <sup>9</sup> Onesimus atha thwenem arrpemarl arrewantherr-warl. Ratherr atherrel-antey angka arrewantherr-iperr ileyew.

<sup>10</sup> Aristarchus ra atyeng-itwew aneyel arrpemarl, tyayl-itwew. Ra angka thwenem arrpemarl. Ingwer-rnemel angka thwenem arrpemarl Mark ikwer-penh, Barnabas-wenh ankelikw. Ra apetyenty, arrantherr ikwer inkwerelhem arrpemarl.

<sup>11</sup> Jesus itnan ingweran Justus. Artwa Jew irrpety rerneman Jesus Christ renh nakeyel arraty. Rernem arrewantherr-itwew warrkerreyel. Rernem arrenhantherrenh arternpaleyew.

<sup>12</sup> Epaphras arrewantherrenh arrpemarl apmer nhak-arey, Jesus Christ-wenh warrkenh arrpemarl 'hello' angkeyel arrpemarl. Ra ritterk aleth Ingkart ayerneyel, ipmelhey-angen, arrenhantherrenh ritterkeleyew, arrantherr arraty-angkwarr apenterl-aynteyew. <sup>13</sup> Ayeng akalty, ra arrewantherr iterreyel aleth, tyaty-areny-rnem ingkerrenhew, Laodicea-areny-rnemew, Hierapolis-areny-rnemew.

<sup>14</sup> Arntety mwerreley-angker wethey, Luke-el angka thwenem arrpemarl, Demas-el angka thwenem arrpemarl.

<sup>15</sup> Laodicea tyaty-areny-rnem ileyew arrpemarl, "Ayeng iterreyel arrewantherr" wenh, arelh Nympha arrpemarl, ingwer-rnem-then meeting-ew akarrerreyel ikwer-warl.

<sup>16</sup> Arrantherr pip nhenh reytemeleyew arrpemarl. Arrantherr pip nhenh thwenem Laodicea-areny-rnem-warl, rernem reytemeleyew arrpemarl. Arrantherr pip reytemeleyew arrpemarl. Pip atha arrwekel thwenew Laodicea-warl, arrantherr reytemelemel areyew, iterl-areyew.

<sup>17</sup> Artwa Archippus ileyew, “Ingkartew warrkerreyew angka ikwerenh ywerrel-heleyew, akalty-anthemel, rarl ngkweng arrernew-angkwarz-antey.”

<sup>18</sup> Ayeng inkernelheyel angka atyenh, Paul. Atyeng iylpangkenh-arey, ayengarl tyaylel anyelew. Ingkartel arrenhantherrenh mwantyel arntarnt-arem.

Kel-antey.

## Pip Thessalonica-areny-rnem-warl, Namp 1 Angka nhenhan alakenh aynteyel

*Paul-el Silas-el Timothy-el-akerr rernem pip nhenh thwenew akngerr Akngey-wenh-rnemew apmer Thessalonica-warl. Pip-angkwarz rernem akngerr item arraty, rlterrk anaynteyew Akngeyew.*

*Thessalonica tawen aynteh apmer Macedonia-itwew. Paul Silas Timothy-akerr alhew apmer ikwer-warl, angka mwerr-angker Jesus-akert ilaynteyew. Apmer ikwer-areny-rnem ampwal ahern-areny-rnemew-tangkwell kwenerrenh. Akngeyan rernem iterl-arey-angenh. Rernemarl angka mwerr-angker Jesus-akert awew, ingwerenty Christian-anem irrew.*

*Jew ingwer-rneman arlkarerrenh, angka Jesus-akert awewerr. Rernemap arlkarerrenh Paul-rnem-wety, apmer ikwer-they renh-rnem irrentenh. Rernemap anterrew tawen Berea-warl, ikwer-they tawen Corinth-warl-anem. Angka nhenhan aynteyel Acts-itwew (Acts 17:1-16).*

*Timothy ra angkep alpew Thessalonica-warl, Christian rlengkeny-rnem rlterrkelynteyew. Rarl apey-alpew angkakert Corinth-warl Paul-rnem-warl, rernemap pip nhanyem-anem ingkwernernew, thwenew-anem Thessalonica-areny-rnem-warl.*

*Thessalonica-areny-rnem Akngeyew arraty anenh mwarrant-arey. Paul-rnem inkw-erlhev ikwer-rnem artewenty. Ingwerentyintem iterrenh arla ikwer, Jesus-arl apetyeyenhew angkep. Ingwer-rnem warrk-wety ipmelhew, apmwel-ayeth iterrew, "Jesus angkep rlengk-antey apetyeyenh." Ingwer-rneman artewenty iterrenh ahaperrewarl-rnemew. Rernem iterrenh apmwel-ayeth, "Jesus-arl angkep apetyeyenhel, ikwerenh-rnem ineyew, ra renh-rnem iwerl-allhewerr."*

*Paul-rnemel alakenh pip nhenhan ingkwernernew, renh-rnem akalty-antheyew arraty. Aley-anem angka aynteyel "Thessalonica-areny-rnem-warl Namp 1" (1 Thessalonians).*

<sup>1</sup> Atharl Paul-el pip nhenhan angkakert ingkwernernew. Atha Silas-el Timothy-el-akerr anantherrarl thweneyel angka nhenhan arrewantherr, Akngey-wenh-rnemew Thessalonica-areny-rnemew. Arrantherran Jesus Christ apenteyel-rnem. Anantherrap Akngeyarl ayern-ayntem, arrewantherr athamerr-aynteyew, inweng-then arternpel-aynteyew.

### Akneyeyel Thessalonica-areny-rnem rlterrkelyeyel

<sup>2</sup> Anantherran Akngey nakem, arrantherrarl renh mwerr-angkwarz apenteyel. Anantherrarl angkem Akngey-warl-athet, renhap ayern-ayntem arrewantherr. <sup>3</sup> Ananther iterl-areyel, arrantherrarl warrk mwerr-angker mpwarem intem, rlterrk iterremel ikwer. Arrantherran inngarl ilkelheyel ingwer-rnemew, mwerr-angker-then intem mpwareyel ikwer-rnemew. Arrantherrap rlterrk anem, ingwer-rnemelarl arrenhantherrenh irrwernem-angkwarzan. Arrantherr arternp arntarnt-arelheyel, Jesus rarl apetyeyenhew angkep.

<sup>4</sup> Anewantherrenh-rnemay Christian-rnem! Akngey ilkelheyel arrewantherr, arntarnt-areyel mwantz arrenhantherrenh. Anantherran iterl-areyel, rarl arrenhantherrenh ayerrpelew. <sup>5</sup> Arrantherrap awew, arrakertelarl anantherr ilenh. Inweng Mwerr-angker-akertel anantherr akalty-anthenh, ilek-ilek mwerr-angker mpwaremel. Arrantherran iterl-areyel, anantherrarl arrewantherr-itwew mwerr-angkwarz anenh.

<sup>6</sup> Arrantherrap arew-anem, anenhantherrenhap iwarernew-anem. Arrantherrap Ingkart-thenarl iwarernew alakenh. Ikwereng-arey ingwer-rnemel arrenhantherrenh irrwernenh-angkwarzan, Inweng Mwerr-angkerel arrenhantherrenh rlterrkelenh, inkwerhemel awelh-aynteyew angka ikwerew. <sup>7</sup> Awethem arrantherr yanh-angkwarz irrew, ingwer-rnemel areyew. Apmer atherr-areny-rnemelap arrenhantherrenh arew; Macedonia-areny-rnemel-then Achaia-areny-rnemel-then. <sup>8</sup> Akngerrel angka Jesus-akert awew apmer ikwer-atherr-itwew, apmer ingwer-rnem-they-then. Rernem ingkerrenhel awew, arrantherrarl Akngeyew iterrew arraty-angkwarz. Nthakenh anantherr iley-angenh arrewantherr-akert, rernemarl kel amentel-antey awew. <sup>9-10</sup> Apmer ingwer-areny-rnemelarl angka arrewantherr-akert awew, rernemap ingkerrenh ilew. Ingkerrel-anem iterl-areyel, arrantherran Thessalonica-areny-rnem anewantherr inkw-erlhev, anantherrarl angka Akngey-wenh mwantz anayntelemel ilew. Rernem ilenh, arrantherr kwenerrenh ampwal apmwa ahern-areny-rnemew-tangkwell itethew-arrpantey. Aleyan arrantherrap ipmelhew-anemarl alakenh-wety. Apmwangkwarz-tangkwell arrantherr iterrenh, aleyan Akngeyewant-anem iterreyel. Rarl anyent itetharl aneyel intem, rap Alerikw ikwerenh itethelew ipmethey. Arrantherr arntarnt-arelhemel

mpwelheyel, Jesus-arl angkep apetyeyenhen irrwerl-they. Ikwerenh-rnemarl ra inerl-alpeyeh. Akngey ra nthakenh ikwer-rnem awakelhey-angen, rarl ingkerreh court-emelemel ayerneyenhenh-areyan.

## 2

*Paul-el angka mwerr-angker ilew Thessalonica-itwew*

<sup>1</sup> Anewantherrenh-rnemay Christian-rnem! Arrantherr iterl-areyelarl, anantherran arwa arrkent akalty-anthey-angen. Arrantherrap iylparethel awew. <sup>2</sup> Arrantherr iterl-areyel arrpemarl, anantherrarl apmer Philippi-warl-tangkwell alhew. Akngerr apmer ikwer-areny-rnemel iltew, pwarrk anthew anenhantherrenh. Anantherrap alhew apmer arrewantherrenh-warl-anem. Akngeyelanap anenhantherrenh rlterrkelew-antey, ingwer-rnemelarl artewentyel irrwernenheng-arey. Alakenh-angkwarranap anantherr angka mwerr-angker arrewantherr alhewer-anemarl ilenh. <sup>3</sup> Mwerr-angkwarr anantherr arrenhantherrenh ilenh. Arrenhantherrenh apmwel-ayeth akalty-anthey-angenharl, arrantherr apmwangkwarr alheyew, arrangkw. Anantherran arrkernelhey-angenharl, ilkwa aneyew, arrangkw, arrantherraw areyew nakemel. Anantherr terikemeley-angen arrenhantherrenh, arrangkw. Alakenhan anewantherrenh-angkwarr-weny. <sup>4-5</sup> Nthakenh anantherr ingwer-rnem ikwer-rnem-wenh-angkwarr iley-angen, rernemaw nheng awelheyew-awaty, rernemap apwert antheyew-awaty anewantherr ikwer-penh. Arrangkw. Nthakenh anantherr irrtiyertel ingwer-rnem nakey-angen, renh-rnem irrngerney-antheyew. Arrangkw. Akngey renhant anantherr irrngerney-anthaynteyew. Ra iterl-areyelarl, anantherr ikwerenh-angkwarr iterreyel. Anantherr arraty-angkwarr angkem intem-antey apmelerrel-ayeth. Akngeyel awem, rap angkem, "Rernem arraty-angkwarr angkeyel. Rernemap angka atyenhan intem-antey ileyn-aynteyew." Ranap aweyelarl, anantherrarl alakenh angkeyel arrewanther. <sup>6</sup> Anantherrap warrkerreyel ikwerenh-angkwarr. Alakenhap anantherr ilkelhey-angen, ingwer-rnemel anenhantherrenh nakaynteyew, ilkwa antwemel.

<sup>7</sup> Anantherr alhew arrewantherr-warl, Christ rarl thwenew anenhantherrenh. Artwa ilkwernem-apenyap anantherran. Kel pwerep-anthey-angen arrenhantherrenh, arrangkw. Alyepel-antey angkenh arrewantherr athamerremel, amikwarl ampa ikwerenh-rnemew athamerrem-apeny-angkwarr. <sup>8</sup> Anantherrap ilkelhew arrewantherr artewenty inngarl, anyent-anem irremel arrewantherr-itwel. Inkwerelhemelap arrenhantherrenh ilew angka mwerr-angker, Akngeyel rarl anthew. <sup>9</sup> Arrantherr iterl-areyelarl, anantherrarl ilytel warrkerrenh, arrenhantherrenharl akalty-anthenheng-arey. Arlta arpanahelap warrkerrenh anantherr, apwert amernew ineyewan, arrewantherrew aparelhey-angenhel.

<sup>10</sup> Anantherr anew-anenh arraty-angkwarr arrewantherr-itwel, arrantherr arenh. Akngeyelan arew arrpemarl irrwerl-theyan. <sup>11</sup> Arrantherr iterl-areyelarl, anantherrarl arrenhantherrenh arntartn-arenh, aynelikwarl alerikw ikwerenh-rnem arntartn-arem-apeny. Alakenh. Akalty-antherl-apenh rlterrkeleml arrenhantherrenh. <sup>12</sup> Illemel arrenhantherrenh, arraty anaynteyew, Akngeyaw inkwerelheyew-ayteng. Rlwaneynew ra arrenhantherrenh, alpeyew aney-alpeyew ikwer-itwel irrwerl, rarl atyetyart ilkwa aneyel-itwel.

<sup>13</sup> Anantherrarl anenh arrewantherr-itwel, angka Akngey-wenh ilenh, arrantherrap inkwerelhemel iylpareth awelhew. Aleyan Akngeyan nakemel iterl-arem anantherr, arrantherrarl arraty iterrenh alakenh: "Angka nhenhanap artwewen-h-weny, arrangkw. Innga angka Akngey-wenarl nhenhan." Akngeyan arrewantherr angkew, alakenh rlterr-k-ayteng iterr-aynteyew ikwer. Aleyan ra angkeyel-antey.

<sup>14</sup> Anewantherrenh-rnemay! Arrewantherrenh-rnemel arrenhantherrenh irrwampenh-anthenh. Apmer ingwer-itwew Judea-itwew-tangkwell alakenh aytew arrpemarl. Jew ahelengkw-rnemel Christian-rnem atwewh apmer ikwer-itwew. <sup>15</sup> Awank-akerr Jew ahelengkw-rnemel atwewh ipmew angkakert Akngey-wenh-rnem-tangkwell. Alakenh arrpemarl Jew ahelengkw ingwer-rnemelan Jesus renh ipmew atwew. Aleyan anewantherrenh-anemarl irrentew apmer ingwer-rnem-they. Rerneman akngerr-wety ilkelhey-angenharl. Kel Akngeyan ikwer-rnem inkwerelhey-angen, arrpemarl. <sup>16</sup> Nthakenh anantherr alethang-rnem angka mwerr-angker iley-angen, ahelengkw-rnemel-anem anenhantherrenh artwerelenharl. Alakenhan ingwer-rnem apatelhelenh, angka abewerr, angkeperrenhey-alpewerr Akngey-warl-athek. Rernem intemarl apmwelhelenh alakenh, apmwa innganemap mpwarew artewenty. Kel Akngeyanap artewenty inngarl ahelerreyel ikwer-rnem, rap renh-rnem irrwampenh-antheyen-h-anem artewenty.

*Paul-rnem ilkelheyel, Thessalonica-areny-rnem areyew*

<sup>17</sup> Jew ahelengkw-rnemel anenhantherrenh artwereklenh, anantherrap alpew-tangkwell Thessalonica-they. Anantherrap alharntew arrewanther, ampa akely iwerl-alhenty-apeny. Anantherr artewentyl iterrenh arrewanther intem-antey, ywarn iterremel, arrenhantherrenh arerl-alpeyew. <sup>18-20</sup> Ayeng Paul arrkernehl Hew akngerr-inger, arrenty ilkwelanap arrngertewew. <sup>19-20</sup> Anantherr inkwerelheyel innga arrewanther. Jesus-arl apey-alpeyehel, ingkerreh ayerneyew, anantherrap inkwerelhemel ileyenh angka arrewanther-akert. Ya, innga anantherran inkwerelheyel arrewanther.

### 3

<sup>1</sup> Kel arleng-alenty anantherr anen tawen Athens nhenh-itwew, alharntemel anen arrewanther. Silas aylanth angkerrew, "Mwerrangay aylanth arteny anem? Timothy-ant apek alhemer Thessalonica-warl." <sup>2</sup> Renhantap aylanth thwenew arrewanther-warl. Anantherr ingkerr warrkerreyel, angka mwerr-angker Akngey-wenh ilerlapaynteyew apmer arpanen-h-itwew. Renhap aylanth thwenew, rlterkeleml akalty-anthaynteyew arrenhantherrenh. <sup>3</sup> Akngeyel ilew arrwekel-antey, ingwer-rnemelar irrwernerl-aneyen. Rernemap apmelerr-angkwarr irrwernem Christian-rnem anenhantherrenh. Anantherran iterrew arrewanther, angkeperrewerr apek Akngey-wety, ingwerentyl arrenhantherrenh irrwernentyl. <sup>4</sup> Anantherrarl anen arrewanther-itwel, anantherr ilenh alakenh, "Ingwer-rnemelan Christian-rnem anenhantherrenh irrwerneyen, apmwangkwarr mpwaremel." Ingarlap anewanther alakenh-anyem ayteyel. <sup>5</sup> Alakenh-wety anantherr artewentyl iterrenh arrewanther, angkeperrewerr arranther. Anantherr iterreh alakenh, "Alep Akngeyant rernem apenteylel-antey? Arrangkw apek. Ywarn apek akalty-anthenh renh-rnem. Arrenty ilkwell apek renrnem arrkernew, rernem Akngey-wety ipmelhenheyew." Alakenh-wety aylanth Timothy thwenew. Anantherr iterl-areyew, arranther arrayt anentyew Akngeyew.

*Timothy inkwerelhemel apey-alpew angkakert*

<sup>6</sup> Aylanthap mpwelhenh arrpemarl Timothy-ew, rarl apey-alpenhew. Rarl apey-alpewel, iley-alpew-anem aylewanth, "Weth-rnem arrayt-antey aneyel Akngey-angkwarr, Jesus apentemel. Mwarrant-arey aneyel arntartn-arerremel. Rernem inkwerelhemel arrpemarl iterreyel arrewanther. Rerneman ilkelheyel, mpwelenhanthenh areyew arrpemarl." <sup>7</sup> Ya, aylanthalr angka awew, aylanthap inkwerelhew artewenty. Angkap arrewanther-akert awew, aylernanthenhap rrngerney-anthew. Ingwer-rnemel irrwerneyel-antey anenhantherrenh, arkanap alpwelyeleyel. Anantherranap inkwerelhemel-antey iterreyel arrewanther. <sup>8</sup> Aleyan arlka mwerr-anem anantherr awelhem iterl-aremel, arrantherrarl Akngeyew aneyel-antey intem rlterr. <sup>9</sup> Ya, anantherr iterl-areyel alakenh, Akngeyelarl arrenhantherrenh arntartn-areyel. Alakenh-anyem ra anenhantherrenh rrngerney-anthem. Anantherr intem-antey inkwerelhemel renh nakem, arrantherrarl ikwer awelheyneyel. <sup>10</sup> Anantherr rlterrkil mwanty Akngey ayernem, thweneyew angkep arrewanther-warl. Arrantheran akaltyerreyel-antey Akngey-wenh-angkwarr. Anantherran intem-antey akalty-anthaynteyew arrenhanther-renh.

<sup>11</sup> Alakenhewarl Akngeyan anantherr ayerneyel Jesus-then, "Thwenen-atherr, anantherr alheyew Thessalonica-warl, renh-rnem areyew." <sup>12</sup> Anantherrap Jesus ayernem, arrantherraw mwarrant-arey anaynteyew, arntartn-arerr-aynteyew athamerremel ingwer-rnemew-then. Anantherrarl arrewanther athamerrem-apeny, alakenh. <sup>13</sup> Jesus anantherr ayernem, arrenhantherrenh rlterkeleyew, arranther arrayt anaynteyew intem-antey. Akngeyelap arem, arrantherrarl arrayt aneyel apmwewety. Rap inkwerelheyen arrewanther, Jesus-arl apey-alpeyehel irrwerl-they antyerl ikwerenh-rnem-akert.

### 4

*Intem-antey anaynteyew alakenh, Akngey inkwerelh-aynteyew*

<sup>1-2</sup> Anewantherrenh-rnemay! Anantherr akalty-anthenh, Akngeyew arrayt anaynteyew, raw inkwerelheyew. Arrantherrap awelhew. Akngeyan inkwerelhem artewentyl arrewanther. Aleyan Jesus ilkelhem, anantherr ileyn-aynteyew arrpemarl: arrayt-angkwarr anaynteyew, anantherrarl akalty-anthenh-angkwarr arrwekel-antey. Nthakenh anantherr angka anewantherrenh iley-angen, arrangkw. Angka Jesus-wenhant anantherr ilenh.

<sup>3</sup> Akngeyanap ilkelhem alakenhew: arrantheran ingwer-rnem-apeny-weny anem, apmwel-ayeth aney-angen. Artwethen arelh-then ingwer-wenh angwarey-angen,

arrangkw. <sup>4-5</sup> Akngeyan ilkelhem, arelh Christian anaynteyew artwa anyentelant. Artwan irrkaty-angkwarr arrpemarl anaynteyew arelh anyent-akert. Nthakenh iwerrey-angenh! Arntarnt-arerr-aynteyew! Ingwer-rnem-apeny irrey-angenh, Akngey iterl-arey-angenh-rnem-apeny. Artwethen arelh-then rernem rakerrem. <sup>6</sup> Akngeyan angkeyel, "Nthakenh ingwerentyak-wenh irrytvert-ingwey-angenh." Artwa apekarl ywerrem arleng, arelh nthakenh ingwey-angenh anteng. Akngeyanap ahelerremarl ikwer artewenty, rap pwarrk anthem irrytvert-awarr renh. Arrantherr iterl-areyel-anem, anantherrarl angka nhenh ilenh arrwekel-antey arrpemarl arrewantherr. <sup>7</sup> Akngeyelan anenhantherrenh ayerpelew, ikwerenh-anem anaynteyew. Alakenh-anyem anantherr intem-antey mwerr anerl-anemer rapeny, angkepelarreng apmwelheley-angenh. <sup>8</sup> Ingwer-rnemelanap angka ikwerenh iyelpelant aweyel. Angka nhenhan artwewenh-wenylar, arrangkw. Angka Akngey-wenhan rernem iyelpelant aweyel. Akngeyel rantap Inweng Mwerr-angker anthew arrewantherr. Inweng Mwerr-angker renhanap nthakenh iyelpelant awey-angenh, arrangkw.

<sup>9</sup> Akngey ra arrenhantherrenh akalty-anthew, mwarrant-arey arntarnt-arerr-aynteyew. Arrantherrap ikwer awelhewarl. Nthakenh anantherran akalty-anthey-angenh arrpemarl pip nhenh-they. <sup>10</sup> Anantherr iterl-areyel, arrantherrarl arntarnt-areyel Christian ingwer-rnem apmer arrpanenh-areny apmer Macedonia-itwew. Anantherr pip nhenh-angkwarr ileyneyel, arrantherr intem-antey alakenh mpwaraynteyew. <sup>11</sup> Mwerr-angkwarr aynteyel, arraty-anem anaynteyew akeleyt. Ingwer-rnem irrwerney-angenh, ingwer-rnemew-then tyel-angkey-angenh. Mwerr-angkwarr arrpemarl alakenh aynteyel. Arrantherr warkerremer, apwert inaynteyew, arnkwethen amern-then payemeleyew. Anantherr ilanthew alakenh arrwekel-antey. <sup>12</sup> Akngey iterl-arey-angenh-rnemel areyel, arrantherrarl arraty aneyel mwerr, rernemap arrenhantherrenh nakemarl. Arrantherr arraty anenty intem-antey, arrantherrap inkwerelhemel anhem, ingwer-rnemew aparelhey-angenh-anem.

### *Alakenh-anyem aynteyen, Jesus-arl apetyeyenhel*

<sup>13</sup> Anewantherrenh-rnemay! Arrantherran iterl-areyel, Christian ingwer-rneman ahaperrewarl. Rernemarl iteth anenhel, rernemap Akngey apenteh. Nthakenh arrantherr intem-antey amperrngerrey-angenh ikwer-rnemew, arrangkw. Akngey iterl-arey-angenh-rnemant intem-antey artnemel anem apal. <sup>14</sup> Anantherr ingkerrel Akngey iterl-areyel, Alerikw ikwerenharl Jesus itethelew ipmethey. Anantherrap iterl-areyel, Christian ikwerenh-rnem ra itethelem arrpemarl ipmethey irrkaty-angkwarr. Rernem itetherreyenhel, Akngeyelap renh-rnem akarreleyen Jesus-warl irrwerl. Rernemap aney-alpeyenh intem-antey Akngey-itwel, Christian ingkerr.

<sup>15-16</sup> Christian ingwer-rnem-alew, aleyarl ahern nhenh-itwew iteth aneyel-rnem? Nthakenharl rernem irrem, Jesus-arl apey-alpeyehel? Jesus-el ilenh alakenh. Rarl apey-alpeyehel, alakenh-tangkwelap irreyenhan. Antyerl ilkwan arkeyeh. Antyerl ingwerelan angkelh-angkelheleyen terampet atayel innga. Jesus ranem at-warreyen irrwerl-they, atayel ilanthemel, Christian ipmepenh-rnem itetherrenhey-alpeyew. Rernem-tangkwelap itetherreyenhan ipmethey. Christian iteth-rnem nthak-enh arrwekel irrey-angenh, Akngey-itwel aney-alpeyew.

<sup>17</sup> Ikwer-theyan Akngeyel Christian iteth-rnem anenhantherrenh ineyen, rap akarreleyen ingkerrenh-anem anenhantherrenh kwenpay-angkwarr. Jesus-anem rl-wateyeh irrwerl alker-itwew, rarl apetyeyen ingweyew anenhantherrenh. Anantherr aney-alpeyew ikwer-itwel intem-antey. <sup>18</sup> Arrantherr Thessalonica-areny-rneman intem-antey ilerrerl-anemer angka nhenh impen arla ikwerew-atety, irrngerney-antherremel.

## 5

<sup>1-2</sup> Anewantherrenh-rnemay! Arrantherr iterl-areyelarl angka weth, Jesus-arl apetyeyen-akert. Nthakenh anantherr akalty-anthey-angenh intem pip nhenh-they. Anantherr ingkerrel iterl-arey-angenharl, rarl apetyeyenhan. Ikwereng-arey akngerran anerl-aneyeh apal, angka Akngey-wenhew awelhey-angenh. Wetharl irrytvert-awarr alhem-apeny apmer ingwer-warl ingwel, ran aynteyen. Apmer ikwer-areny-rnemap apelparl ayntem, ikwer arntarnt-arely-angenh. Irrkaty-angkwarr arrpemarl Jesus ran apetyeyen anamerl-antey, akngerr ikwer arntarnt-arely-angenh anerl-aneyeh. <sup>3</sup> Ikwerel-antey akngerr angkerrel-aneyeh apal alakenh, "Anantherr mwerarl aneyel. Nthakenh ingwer-rnemel anenhantherrenh atwey-angenh!" Akngeyelanap renh-rnem pwarrk antheyen arwapenyarl. Nthakenh irrytvert anterrey-angenh, irrytvert aylpeyew, arrangkw. Mwarrant-arey rernem apal anew-anerl-aneyeh arlengew-alenty. Ikwer-penhan renh-rnem Akngeyel pwarrk antheyen arwapeny artewenty innga.

<sup>4-8</sup> Arrantherran ingwer-rnem-apeny-wenyarl, Akngey iterl-arey-angenharl. Atemwengkel-apeny rernem aneyel. Atemwengkel nthakenh arey-angenharl wethey. Christian-rnemew anewantherr alakenh-wenyarl. Lyenentyel-apeny anantherran aneyel. Lyenenty-angkwarren anayntarl arem. Anantherrap intem arntarnt-arelhemer Jesus ikwer, rarl apey-alpeyenhew. Ingwer-rneman ankwel atwenty-apeny aneyel. Wetharl ingwerenty atyek-atyek arntarnt-arelhem-apeny, alakenh arrpemarl aynteyel anewantherr Akngey-angkwarren alakenh-anyem. Anantherrap mwarrant-arey arntarnt-arremer, iterl-arerl-anemel, anantherrarl aney-alpeyeh ikwer-itwel intem-antey. <sup>9</sup> Ra anenhantherrenh ayerrpelew ikwerenh-anem, nthakenh anewantherr awakelhey-angenh. Ra anewantherr ilkelhew, anantherr Jesus apenteyew. Jesus rap anenhantherrenh akngneyeyeh, Akngey-itwel aney-alpeyew intem-antey. <sup>10</sup> Rarl katy ilwew anewantherr, anantherrap alpeyeh, aney-alpeyew ikwer-itwel intem-antey. Christian anyent iylpelrerlewem anantherr, kel mwerrarlalp alakenhan. Christian ipmepenh iteth-rnem-then ingkerrenh alpeyeh, aney-alpeyew ikwer-itwel. <sup>11</sup> Arrantherr angka nhenh aley ilerreyel-antey, arrantherrap rlterrkerremarl alakenhan. Intem-antey ilerrerl-ayntenh-arey, arrantherr aneyew inkwerelhemel, intem apentemel.

*Alakenh-anyem intem aneyew Akngeyew*

<sup>12</sup> Anewantherrenh-rnemay! Mwanty-antey awelh-ayntenh-arey angka nhanyemew. Akngyelel irrpetyap arrernew, atyetyart aneyew Christian-rnemew arrewantherr. Rernem arrewantherr artewenty warrkerrem, mwantyel arntarnt-arynteyew arrenhantherrenh. <sup>13</sup> Arrantherran ikwer-rnem awelhemer, rernemarl arrenhantherrenh akalty-antheyel, arraty-angkwarren Akngeyew anaynteyew. Intemarlak ikwer-rnem ilkelh-ayntenh-arey, rernemarl Akngeyew warrkerreyelewan. Akeleyt mwarrant-arey anayntenh-arey, akwetymel angkey-angenh.

<sup>14</sup> Angka ingwerew nhenhew arrantherr awelhemer arrpemarl. Arrantherr ingwer-rnem warrk-wety ipmelhew. Renh-rnem ilemer, rernem warrkerr-aynteyew intem-antey. Ingwer-rnem atererremel anom. Alyep ikwer-rnem angkemer, rernem inkwerelheyew. Ingwer-rneman arlka rlterr-k-weny, angkeperrem apek Jesus-wety. Alyep arrpemarl ikwer-rnem angkemer, rlterrkeleml renh-rnem. Anamerl-antey ingwer-rnemew ahelerrey-angenh, arwa apmemelemt renh-rnem. <sup>15</sup> Ingwerentyel apek apmwel-ayeth mpwarem ingwerew. Ra apek ikwer awakelhewerr, arrantherrap renh artwerelemlar. Mwerr arrpemarl anayntenh-arey Christian-rnem arrantherran. Mwarrant-arey anayntenh-arey Jesus iterl-arey-angenh-rnemewan.

<sup>16</sup> Inkwerelhemel anayntenh-arey intem-antey. <sup>17</sup> Akngeyew intem-antey angkayntenh-arey, ipmelhey-angenh. <sup>18</sup> Rlterrk apek anem arrewantherr aleyan. Kel mwerrarl alakenhan. Intem-antey renh nakayntenh-arey. Akngeyan ilkelheyel, intem-antey anaynteyew alakenh, Jesus-wenh-anemarl arrantherran.

<sup>19</sup> Inweng Mwerr-angker apek angketyl, iylpelant avey-angenh. <sup>20</sup> Ingwerenty apek angkem, "Inweng Mwerr-angker atyeng angkew." Mwantyap awelhennh-arey angka ikwer. <sup>21-22</sup> Akngyeypay ayernenh-arey alakenh, "Arratyang ra angkeyel?" Arraty apekarl ra angkeyel, awelhennh-arey angka ikwer. Arrangkwel apekan, angka ikwer awelhey-angenharl. Ra apek angka arraty avey-angenh. Angka arratyewant awelh-ayntenh-arey. Angka apmwlan mentyarl awyanttenh-arey.

<sup>23</sup> Anantherr Akngey ayerneyel, arrenhantherrenh arntarnt-arynteyew mwanty, arrantherr inkwerelhemel mwarrant-arey anaynteyew. Anantherr ayerneyel renh, arntarnt-arynteyew arrenhantherrenh inweng-then arlkethen ingkerr-antey, arrantherrap anayntem apmwewenyarl. Jesus-arl apetyeyenhel angkew, rap arrenhantherrenh mwerr antweyenh. Nthakenh ingwerentyakel ayntarrp-iley-angenh. <sup>24</sup> Inngarlap Akngyeylan mpwarem alakenh arrewantherr, rarl ayerrpelew arrenhantherrenh. Rap nthakenh iwerl-alhey-angenh arrenhantherrenh, arrangkw-anemarl.

<sup>25</sup> Anewantherrenh-rnemay! Anewantherran Akngey ayern-ayntenh-arey arrpemarl. <sup>26</sup> Arrantherrarl akarreman ingerrenh, inkwerelhemelap atnyenerrenh-areyan.

<sup>27</sup> Angka ingwerant-anem anyent atha Paul-el ileyew arrewantherr, Jesus-arl aveyel-wety: "Pip nhenhan inenh-arey, reytemeleml Akngey-wenh-rnem ingkerrew, rernemarl akarrerremew ingkerr."

<sup>28</sup> Anantherrap Akngyearyl ayern-ayntem, arrewantherr athamerr-aynteyew, inweng-then arternpel-aynteyew.

Kel-antey.

## Pip Thessalonica-areny-rnem-warl, Namp 2 Angka nhenhan alakenh aynteyel

*Paul-el Silas-el Timothy-el-akerr rernem pip nhenh thwenew akngerr Akngey-wenh-rnemew apmer Thessalonica-warl. Pip nhenh-angkwarr rernem akngerr ilem, rlterrk anaynteyew Akngeyew, rernemarl pip ingwer-itwew ingwernew-apeny. Pip renh itnewem "Pip Thessalonica-areny-rnem-warl Namp 1."*

Nhenhan ingwer-anemarl pip, Paul-el Silas-el Timothy-el-akerr ingkwernewarl. Rernemap thwenew-anem Akngey-wenh-rnem-warl apmer Thessalonica-warl. Thessalonica-areny-rnem intem arraty mwarrant-arey anen Akngeyew, ingwer-rneman arlkarerenharl ikwer-rnem-wety.

Ingwerentyan intem iterrenh arla ikwer, Jesus-arl apetyeyenew angkep. Ingwer-rneman warrk-wety ipmelherrenh, apmwel-ayeth iterrenh, "Jesus-an angkep rlengk-antey apetyeyen." Ingwer-rneman apmwel-ayeth iterrenh, "Jesus-an akwel kel-antey apey-alpew." Thessalonica-areny-rneman ilpertelelherrenh apal, atererremel anen.

Pip nhenh-angkwarr Paul-rnemel alakenh ilew, "Jesus-an apey-alpey-angen-h-antey, arrangkw-antey. Akngerr Akngey-wety-tangkwel angkeperrel-aneyen. Artwa apmwa ranem aremerreyen, irrtywerremel ilaynteyew ingkerrew, rernemap apmwangkwarr-anem anerl-aneyen. Jesus rarl angkep apetyeyenhel, artwa renhap ipmew atweyen."

Paul-rnemelap ilew arrpemarl, "Arrantherr warrkerr-aynteyew intem, apwert inaynteyew, amern payemeleyew."

Rernem pip nhenhan ingkwernew, renh-rnem akalty-antheyew arraty-angkwarr. Aleyan angka aynteyel, "Thessalonica-areny-rnemew Namp 2" (2 Thessalonians).

<sup>1</sup> Atha Paul-el pip nhenh angkakert thweneyel. Atha Silas-el Timothy-el-anem anan-therrarl angka nhenh ingkwerneyel arrewantherr Akngey-wenh-rnemew Thessalonica-areny-rnemew. Arrantherran Akngey-wenh-rnemarl, Jesus Christ-arl apentyeyel-rnemarl. <sup>2</sup> Anantherr ayernem Akngey Alerikw Jesus-then, athamerr-aynteyew arrewantherr, inweng-then arternel-aynteyew.

### *Akngelyelan court-emeleyen ingkerrenh arraty irrkaty-angkwarr*

<sup>3</sup> Anewantherrenh-rnemay Christian-rnem! Anantherran Akngey nakem intem arrewantherr. Mwerr anantherr inkwerelhemel angkem ikwer-warl, arrantherrarl intem apentyeyel-antey arraty. Iterreyel rlterrk ikwer-warl irrpeltherrey-angen. Arrantherrap intemarl ingwer-rnem arntarnt-areyel arraty-angkwarr. Arraty alyep-tangkwel arrantherr apenten, aleyanap arraty inngangkwarr-anem apentyeyel. <sup>4</sup> Alakenhap anantherr arrenhantherrenh nakayntem, anantherrarl alheyelel, Akngey-wenh-rnem arerl-apaynteyew apmer arpanenew. Anantherr renh-rnem ilem, arrantherrarl rlterrk iterremel aneyel Akngeyew, ipmelhey-angen. Ingwer-rnemel arrenhantherrenh irrwerneyel. Arrantherranap renh apentyeyel intem-anteyarl.

<sup>5-6</sup> Anantherr iterrem intem arrewantherr. Rlterrkarl ayntenheng-arey, arrantherr rlterrk-anteyarl anen. Akngelyelan ikwerenh-rnem arntarnt-arem intem-antey, rlterrkarl anemewan ikwer. Ingwer-ingweran ra ingkerrenh rnkkern-ayneyen, ayern-aynteyew renh-rnem. Court-emeleyen ra ingwer-rnem, ikwerenh-rnemarl irrw-ernenhew. Akngey ran ingkerrenhew arraty aneyel intem. <sup>7</sup> Rap mwerr mpwareyeh anewanther, rernemarl anenhantherrenh ingkerrenh irrwernenh-wety. Rap alakenh mpwareyeh, Jesus-arl armerreyen irrwerl-they antyerl ikwerenh-rnem-akert, rwethen-akert. Rernem ingkerr apetyeyen arawerrng ilkwakert, rwakert-then. <sup>8</sup> Akngelyelan pwarrk ilkwa antheyen renh iterl-arey-angen-rnemewan. Rernem anen, angka ikwerenhew Jesus-akertew awelhey-angen. <sup>9-10</sup> Nthakenh rernem aney-alpey-angen-h Jesus-itwel irrwerl, rarl atyetyart ilkwa aneyel-itwelan. Arla ikwerel ra renh-rnem irrenteyen, rarl apetyeyen arawerrng ilkwakert. Rernemap aney-alpeyeh ament arrpemarl arleng ingwer-rnem-wety intem-antey. Arla ikwerel ikwerenh-rneman aney-alpeyeh anyentel ikwer-itwel. Ya, Christian-rnem ingkerr aney-alpeyeh, atayel-anem renh nakey-alpeyeh irrwerl-itwew alakenh, "Jesus ran inngarl mwerr-angker!" Arrantherran angka ikwerenhew awelhenh, anantherrarl iler-apanhew, arrantherrap ikwer-itwel aney-alpeyeh nakemel arrpemarl.

<sup>11</sup> Alakenh-wety Akngayan ayernem intem, arrenhantherrenh arntarnt-araynteyew, arrantherraw ikwer-angkwarr anaynteyew. Anantherrap ayernem, arrenhantherrenh

rlterrk-aynteyew, arrantherraw ikwer warrkerr-aynteyew. Arranther ikwer warrkerreyew, rlterrk ikwerant iterremel.<sup>12</sup> Arranther ikwer alakenh warrkerrem, ingwer-nrnelap arayntemar. Rernem inkwerelhem arrewanther, Jesus nakemel. Arrenhanterrenhap rernem nakem arrepemarl. Akngeyel rethen arrenhanterrenh nakem. Alakenh ayntem, Akngey-then Jesus-then ratherrh mwerrarl mpwarem arrewanther.

2

*Artwa Akngey-wetyarl arlkarerreyel apmwa inngakert*

<sup>1</sup> Anewantherrenh-rnemay! Angka nhenh anantherr ilew arrewantherr, Jesus-arl apetyeyen-hakert angkep. Anantherr ilew, rarl anenhantherrenh akarreleyen-hikwer-warl ingkerrenh. Angka nhenhanap arrantherr iterl-areyelar.

Angka ingwer nhenhew-anem awelhenh-arey.<sup>2</sup> Ingwerentyan apal alakenharl angkem, "Paul-rnemarl anenheng-areyan anewantherr-itwel, Inweng Mwerr-angker ikwer-rnem-angkwarr alakenh angkew, 'Jesus-an kel weth-antey apetyew ahern nhewarl.' " Ingweran alakenh apal angkem, "Atha awew, Paul alakenh angkenty, 'Jesus-an kel weth-antey apetyew ahern nhewarl.' " Ingwer-anemarl alakenh apal angkem, "Paul-rneman akwel pip-angkwarr angkew, 'Jesus-an kel weth-antey apetyew ahern nhewarl.' " Arrantherr awem, alakenh ingwerentyan angkenty, ilpertelelherrey-angenh. Artewtney iterrey-angenh.<sup>3</sup> Menty awelhey-angenh ikwer irrtywerreyelharlew. Anantherran alakenh angkey-angenh, arrangkw.

Ran alakenh aynteyen, Jesus apetyeyew-alentyan angkep. Akngerr ingwer-rneman angkeperreyenh-tangkwel Akngey-wety. Anyentan aremerreyenh itnan "Artwa Akngey-wetyarl arkarerreyel apmwa innga".<sup>4-12</sup> Arrantherr iterl-aremer, anantherrarl angka ikwer-akert ilenh arrwekel-antey, arrewantherr-itwelarl anenreheng-arey. Aleyan akngerran apmwel-ayeth aneyel, Akngewyew awelhey-angenh. Apmwa ingwerentylan renh-rnem apmweleyil, apmwel-ayeth aneyew. Renhap iterl-arey-angenh anantherr. Irrtyertel aneyel. Ingwerentyan arrngert aneyel ikwer aleyan, ra akngerr apmwelewerr innganem. Ingwer-ingweran artwa apmwa ra irryert-aney-angenh-anemarl, rap arwapeny aremerreyelpeyenh. Aleyan arrngert-antey ikwer aynteyel, nthakenh ra aremerreyelpey-angenh-antey, arrangkw-antey. Arrantherran iterl-areyel anyent, rarl arrngert aneyel ikwer. Akngelyelantap arltan rlwaneyenh artwa apmwa ikwer, rarl aremerreyenhewan. Arltal ikwerel Akngelyel tyarleweyenh-anem, artwa rap aremerreyenh-anem. Rarl aremerreyenhel, ilek-ilek lwewarrerneyehen arrenty Satan-wenh arawerrng apmwakertel. Rap aylpeyenh Akngey-wenh tyaty ilkewarl, rap anerl-aneyenhl alakenh angkerl-aneyen, "Akngerr ingwer-rneman kwenerrem ampwal ahern nhnenh-areny-rnemew. Arrangkwlarap yanh-rneman. Akngey irrwerl-arenyanap arrangkw arrpemarl. Ayengant ilkwa innga ingkerr-angkwarz. Atyengant-anem ingkerr kwenerremer, atyengant awelhemel." Rap irrytwerremelarl ilerl-aneyenhl akngerrew, apalelap renh apenteyenh ilkwarppantey. Rerneman awelhemer angka mwerr-angker Akngey-wenhew, ikwerant iterremel. Alakenh iterrentyan ikwer-itwelap intem-antey aney-almep. Arrangkwlarap rerneman! Ikwer iterrey-angenh rernem, Akngelyel rap ilperleyenharl renh-rnem. Artwa apmwa ikwerant-anem rernem awelherl-aneyenhl, rarl irrytwerremel ilerl-aneyenhew. Rernemap apmwel-ayethant-anem inkwerelhemel apenteyenh, iylpelant-anem awerl-aneyenhl angka Akngey-wenh inngan.

Ikwer-penhap ingwer-ingwer Jesus angkep apetyeyenh, amparrkemel arawerrng ilkakwakert. Rap artwa apmwa renh pewelemel atwewayeh ipmew-antey. Akngeyelap renh iwewayeh-anem rwa ilkewewarl, intemarl ampeyel-warl. Rap ayerneyneyenh-anem ingkerrenh court-emeleml. Artwa apmwarl apentenh-rneman rap renh-rnem apmwa antwewayeh, irrentemel intem-antey.

*Akngrey rlterrkel-antey apent-aynteyew, ipmelhey-angenhel*

<sup>13</sup> Arrantherran Akngey-wetyarl angkeperrem-rnem-apeny-wenylar, arrangkwarl. Akngeyan arrewantherr ilkelheyel artewenty, intem-anteyap anantherr nakaynteyewan renh. Rarl ayerrpelew arrwekel-antey arrenhantherrenh, ikwerenh-rnem anaynteyew, rarl ahern-then alker-then arnwarnenheng-arey. Inweng ikwerenh arrewantherr anthemel ra ayerrpelew arrenhantherrenh, apmwa irrarkkeyew. Ra alakenh mpwarew, arrantherrarl angka ikwerenhew awelhew, arraty-angkwarr apentemel. <sup>14</sup> Ya, ra anenhantherrenh ilanthew, angka mwerr-angker arrewantherr ileyew. Rap ilkelheyel, Jesus-apeny arrantherr anaynteyew intem, aney-alpeyew-anem ikwer-itwel intem-antey.

<sup>15</sup> Angka ikwerenhew mwanty-antey ifterr-aynteyew, anantherrarl ilenhew weth. Pip angkakert wethew mwanty arrpemarl iterr-aynteyew. Angka ikwer awelheyn-aynteyew intem-antey.

16-17 Jesus Aynikw ikwerenhel-then ratherr arntarnt-arem anenhantherrenh ingkeren. Akngeyel rlterrkemel irrngerney-anthemel. Alakenh-anyemap anantherr inkwerelhemel arntarnt-arelh-aynteyewan Jesus ikwer. Ran arrwekel-antey ilew, rarl apey-alpeyeh akngeyneyew, ikwer-itwel aney-alpeyew intem-antey. Alakenh-anyemarl iterreyeelan anantherr, ingwer-rnem anantherr arntarnt-araynteyew, mwarrant-arey angkerrerl-anemel.

### 3

#### *Akngay renhan rernem intemarl ayernerl-anemer Paul-ew-rneman*

<sup>1</sup> Anewantherrenh-rnemay, angka nhenh-then arewantherr ileyew. Akngeyan intemarl ayern-aynteh-arey anewantherr, anantherrarl alheyelewan, angka ikweren ilerl-apaynteyew. Anantherr ilkelheyel, apmer arrpanenh-they aweyew angka renh. Rernem inkwerelhemel awelheyew, arrantherrarl awelhew-apeny, anantherrarl ilew-angkwarr. <sup>2</sup> Apmwernemanap angka Jesus-akertew awelhey-angenharl, arrangkw. Rernemap irrwerneyenharl, anenhantherrenhap atweyenharl. Akngeyantap ayern-aynteh-arey, anenhantherrenhaw arntarnt-aremel rlterrk-aynteyew ahelengkw-rnem-wety. <sup>3</sup> Jesus arrer-anteyarl anayntem ikweren-hrnem-itwewan, nthakenh iwerl-alhey-angenh. Ra arntarnt-arem arrenhantherrenh, rlterrkemel arrenty ilkwewety. <sup>4</sup> Arrantherranap arraty-anteyarl aneyel, anantherrarl ilew-angkwarr-antey. Jesus-elap akalty-anthemarl, intem-antey alakenh anaynteyew. <sup>5</sup> Anantherr Jesus renh ayern-ayntem arewantherr, rlterrk-aynteyew apmwa ayntynt-angkwarran, rarl rlterrk aneyel-apeny. Alakenhanap arrantherr iterl-aremarl, Akngeyarl arewantherr ilkelheyel artewentyl.

#### *Warrkerr-aynteyew; nthakenh arwa aney-angen*

<sup>6</sup> Anewantherrenh-rnemay! Arrwekel-antey anantherr angka nhenh ilew: "Ingkerr warrkerr-aynteyew, apwert inaynteyewan, amern payemeleyew." Ingwerentyakel iyelpant aweyel, arwa anerl-anemel, ingwer-rnemewt aparelherl-anemel. Jesus rantert angkeyel alakenh: "Warrk-wetyarl arkarerreyel-rnem-itwel aney-angen." <sup>7</sup> Anantherran arwa aney-angen alakenh-anyem, arewantherr-itwelarl anenheng-areyan. Warrkant irreh anantherran, arrantherrap iterlarl-areyel. Anantherr-apenyap arrantherr anemeran. <sup>8</sup> Ingwerentyelar amern anthenh-penh, apwertarlap ikwer angkep antheynenan. Itwernew-then ingwel-then anantherr warrkerrenh artewentyelarl, apwert inaynteyewan. Ingwer-rnemew anantherr aparelhey-angenh, arrangkw. <sup>9</sup> Kel warrken Akngey-wenh-rnem anantherr mwerr ingwer-rnem ayernem amernew, Akngey-wenhewarl angkew anantherr akalty-antheyel. Anantherranap iterrew, "Nthakenh ayerney-angen alakenh. Mwerr-angkwarrant akalty-anthaynteyew." Warrkerrenh anantherr, arrantherraw areyew-awayt alakenh iterremel, "Ya, anantherr warrkerremer arrpemarl Paul-rnem-apeny." <sup>10</sup> Arewantherr-itwelarl anenheng-arey, anantherr alakenh arratyelenh: "Ingwerentyarl warrk-they ipmelhem, rap amern-wenyl aneman."

<sup>11</sup> Ingwerentyel anenhantherrenh ilew, ingwer-rneman arrantherr arwarl aneyel-rnemarl, warrkerrey-angen. Arwarl ampererremel alherl-apeyel, ingwer-rnemew tyel-angkerl-apeyel, ingwer-rnem-thenap warrk-itwew apatelhelerl-apeyel. <sup>12</sup> Anantherrap renh-rnem ileyl pip nhenh-angkwarr, "Jesus-arl angkeyel-angkwarr, 'Arratyerreyew! Warrkerr-aynteyew intem, amern inaynteyew!'" <sup>13</sup> Arrenhantherrenh anantherr ingkerrenh-antey ileyel, "Warrk-wety ipmelherrey-angen-antey! Intem-antey arraty anayntenherr-arey!"

<sup>14</sup> Ingwer-ingwer arrantherr akararerreyen tyaty-warl. Ingwerentyel pip nhenh retyemeleyen, arrantherrap aweyen-arey. Anyent apekan awelhey-angenharl angka nhenhew. Apmwel-ayetharlap ra iterreman. Kel tyaty-areny-rnem ilenh-arey, ament arrpemarl ikwer-wety aneyew. Ra apek nyerrerreyew mwantz iterremel. <sup>15</sup> Kel arrantherr ikwer mwantz iterrehn-arey, ran Akngey-wenh arrpemarl. Akeleytan ikwer angkenh-arey ahelerrey-angen, raw arraty-angkwarr-anem aneyew.

#### *Kel angka nhenh ywerrelhelem-anem*

<sup>16</sup> Jesus-elant anenhantherrenh akeleytelem. Anantherrap renh ayern-ayntem, arrer anaynteyew arewantherr-itwel, inweng-then arternpel-aynteyew.

<sup>17</sup> Athanem Paul-el nhenhan ingkwerneyel. Ingwerentyakel katy ingkwernew angka nhenh pip-warl. Athanem nhenhan itep atyenhel-anemarl ingkwerneyel pip akert-warl. Alakenh-anyem atha ingkwernerl-aneman. Arrantherrarl alakenh-anyem arem,

arrantherrap iterl-arem, atharl thwenewarl pip nhenhan. Ingwerentyakel thweney-  
angenharlap renhan, arrangkw.

<sup>18</sup> Anantherran Jesus Christ ayern-ayntem, arrenhantherrenh arntarnt-araynteyew  
intem-antey mwanty.

Kel-antey.

## 1 Timothy

### Paul-el pip nhenhan ingkwernew, rap thwenew Timothy-warl-anem.

#### Angka nhenhan alakenh aynteyel

Paul-el angka nhenh pip-warl ingkwernew, rap thwenew artwa akely-warl Timothy-warl. Paul-wenh alerikw-apenylarlap ran anen. Ratherrap alhenh, angka mwerr Akngey-wenh ilerl-apen. Timothy rap artenyarl anew apmer ingwelerarl Ephesus-itwewarl. Paul rap alhew Macedonia-warlarl. Apmer nhenh-they rap thweney-alhew pip nhenhan.

Pip nhenh-angkwarr ra Timothy ilew alakenh: "Ntwa Ephesus-areny-rnem akalty-antheyew arraty-angkwarr. Ingwer-rnemelan akalty-antheyel apmwangkwarr, akngerr ilpertelelh-aynteyew. Ntwa renh-rnem akalty-anthaynta mwerr-angkwarr."

Paul-el ilew Timothy arrpemarl: "Ingwer-rneman rlwaneyew, atyetyart aneyew tyatyeuw."

#### *Paul-el pip ingkwernew, rap thwenew Timothy-warl*

<sup>1</sup> Ya Timothy, ayeng nhanyemarl Paul. Athan thweneyel pip nhenhan ngkweng-warl. Awank-akerr Akngeyel ilew, "Ingwerentyarl inweng anthelhem Jesus Christ-warl, athan renh arntarnt-arayntem. Rap atyeng-itwel aney-alpem intem-antey, ilwey-angen." Alakenh anantherr arternp-antey Jesus-ew mpwelhayntem, rarl ingweringweran angkep apetyeyenhew. Ratherr ayenhl rlwanew alhaynteyew, angka mwerr-angker Jesus-akert ilerl-apaynteyew apmer arrpanenew.

<sup>2</sup> Timothy, ayeng ngkweng artewenty ilkelhel. Ngan alerey atyenh-apenylar aneyel, ntwap Jesus-ew iterreyel ayeng-apeny. Athan intem Akngey ayern-ayntem Lord Jesus-then alakenh: "Akngeyay, nga athamerr-aynteyew Timothy-ew. Renh arntarnt-araynteyew mwanty-antey, raw mwerr anaynteyew."

#### *Ingwer-rnemelan akalty-antheyel apmwangkwarr*

<sup>3</sup> Aylanth anen Ephesus-itwew-tangkwel. Ayengan Macedonia-el-anem aney-alpew. Apmer Ephesus-itwew artwa ilkternem anen tyat-ityew, rernem angka apmwew akalty-anthenh. Atha ngenh ilew, arteny anaynteyew, ntnwa renh-rnem arratyel-aynteyew. Athap ngenh ilew, renh-rnem akeleyteleyew. Nthakenh rernem alakenh akalty-anthey-angen! Atha ngenh ileyel pip nhenh-angkwarr: artwa yanh-rnem ilaw, apmwel-ayeth akalty-anthey-angen! <sup>4</sup> Rerneman aleth akalty-antheyel angka apmwernem, angkernem-then itnernem arrwekelely-rnem-akert. Christian-rnem apateyel-anem itna yanh-rnemew. Artwa ilkwa yanh-rnem warrkerrey-angen-anem Akngeyew, arrangkw. Akngey-wenh-rneman ikwerant iterreyew, itna yanh-rnemew iterrey-angen-anem.

<sup>5</sup> Timothy, ngan angkeyew Christian-rnemewarl, rerneman inweng anthelheyew Akngeyew-anem. Akngey ra aleth iterreyel ilek-ilek mwerr-angkerew. Renh-rnem ila, iterreyew irrkaty-angkwarr-antey. Renh-rnem ila, aneyew arraty-angkwarr-antey. Renh-rnem ila, awelheyew Jesus-wenh angkew, renhant apenteyew. Rerneman alakenh-anyem mwerr-angkwarr anem, rernemap ingwer-rnemew-then ilkelhem arrpemarl. Alakenh-anyem rernem aleth anemer. <sup>6</sup> Artwa yanh-rnemanap apmwangkwarrarl alheyl, intwemelerreyel Akngey-wety. Rerneman arlkarerreyel Akngey-wety, ingwer-rnem-wety-then arlkarerrem arrpemarl. Rerneman aleth angkeyel apmwel-ayeth arwa arrangkwew. <sup>7</sup> Rerneman ilkelhel, angka Moses-wenh akalty-antheyew. Arrangkwarr-lap ran. Rernemanap akwerrparl, Moses-wenh angka iterl-arey-angen. Rernemanap aleth-antey akalty-antheyel, iterl-arey-angenarl, arrangkwarl!

<sup>8</sup> Kel anantherr iterl-areyel, angka Moses-wenh mwerr anewantherr aynteyel. Angka yanh-penh anantherr arraty-angkwarr aneyew. <sup>9</sup> Anantherr iterl-areyel arrpemarl, akngerran Moses-wenh angkew awelheyel. Akngeyelan angka yanh-anthey-angen Moses-ew, renh-rnem arratyel eyew, arrangkw. Ran anthew, ingwer-rnemew arratyel eyew, apmwangkwarrarl aneyelew, Akngeyew awelhey-angen-hrnem. Rerneman aleth amentewarl aneyel, aleth arrkent aneyel. Rerneman Akngeyew iterrey-angenh ingwer-rnemew-then. Ilek-ilek apmwangkwarr rerneman mpwareyel. Ingwer-rnemelan atwem aynikw-then amikw-then ipmew-antey. Ingwer-rnemelan arwa atwem ipmew ingwer-rnem arrkent, arwa arrangkwew. <sup>10</sup> Ingwer-rneman mpweny alherleweyel artwa ingwer-wenh arelh-itwew. Ingwer-rneman mpweny

alherleweyel arelh ingwer-wenh artwitwewarl. Artwa atherran itengerrem apmwangkwarr, ratherr anewart-arrpanterey aneyew. Arrangkwarlap ran! Ingwer-rnemelan ingwer-rnem antwerrkem, warrkemeleyew ikwer-rnem. Ingwer-rneman irrtywaltharl. Rernemap apmwangkwarr ayntarrp-ilem, irrtywerremel ilemel court-areny ilkternem-warl. Rerneman alakenhaymarl ileyel, angka Akngey-wenh apmwangkwarr akalty-antheyel. Akngeyel angka rlterrk yanhan Moses-ew anthew, apmwangkwarrall aneyel-rnem arratyeleyew.<sup>11</sup> Akyang mwerr-angker nhenhan Akngeyel anthew atyeng-then, atha ilaynteyew ingwer-rnemew-then, apmer arrpanenhel aneyelew. Akngeyan aneyel mwerr-angker inngrey. Angka ikwerenhan mwerr-angker inngarl.

*Paul-an inkwerelheyel Akngeyew*

<sup>12</sup> Ayengan inkwerelheyel Jesus Christ-ew, rantarl ayenh rlterrkeleyel. Rap ayenh iterl-areyel awank-they. Awank-akerran ra iterrew, "Paul-el ra ayenh apent-aynteyew, atyeng warckerremel." Alakenh-anyem-wety ra ayenh inew, warrkerr-aynteyew ikwer.<sup>13</sup> Ayengan aneh arrwel apmwangkwarr. Ayengan aneh ahelengkwarl, Jesus iterl-arey-angenh, ament aneh. Ayengap apmwangkwarr ikwer angkenharl, ikwerenhnem-wetyap ilkelhey-angenh aneh. Aleth athant Christian renh-rnem atwennh. Ayengan Akngeyew awelhey-angenh aneh. Akngeyanap atyeng amperrngerrew, ranap mwerr-angkwarr atyeng ilkelhew, ayenh awakelhey-angenh-anem.<sup>14</sup> Ra ayenh ilew, rarl ilkelheyel atyeng artewenteyel athamerremel, ayenh arntarnt-areyel mwarrantiy. Alakenh-anyem athanem Jesus Christ apenteyel, ikwerant awelhemel. Alakenhap ayeng Christian ingwer-rnemew ilkelheyel-anem.

<sup>15</sup> Timothy, ntwan iterl-areyel, Christian-rnem anantherran alakenh-anyem angkeyel: "Anantherr ingkerrenh apmwel-ayeth, ahern nhenhelarl aneyel-rneman. Akngey ranap anenhantherrenh atwey-angenharl. Rap thwenew Alerikw ikwerenhn-antey, katy ilwneyew anewantherr ingkerrew." Inngarlap ran. Rap atyeng-then ilew arrpemarl. Ayengan Paul-an ahelengkw innga aneh ingwer-rnem-angkwarran.<sup>16</sup> Ayengan apmwangkwarr-tangkwl aneh, Akngeyanap atyeng ilkelhenh-anteyarl. Rap atyeng athamerremel arternp mpwelhenh. Akngerrelan ayenh arenharl. Alakenh rernem iterl-areyel-anem, Akngey rarl ingkerrehew athamerremel aneyel. Rernemap ikwer-warl-athek angkeperreyew, ikwerant iterremel. Rernemap alpem, ikwer-itwel aney-alpeyew intem-antey.<sup>17</sup> Alakenh-anyem anantherr Akngeyant nakaynteyew aleth-antey. Ra ingkerrenhew atyetyart aneyel, aleth-anteyap ra ilkwa aneyel. Ra nthakenh ilwney-angenharl, arrangkw! Nthakenh renh arey-angenharl anngel. Ran ilkwa ingkerrenhangkwarr aneyel! Nakemel aylelherreyew! Kel innga!

*Apenteyew angka Akngey-wenhant*

<sup>18</sup> Timothy, nganap alerey atyeny-apeny inngarl. Tyatyew-artery-rnemelan ngkweng-warl akapwert-warl itep arrernew, ngenh tyaty-areny ilkwa arrerneyew, ayernemel Akngey ngkweng. Inweng Mwerr-angkerel ikwer-rnem-angkwarr ngenh ilew, ikwer warrkerr-aynteyew, tyaty arrpanenh-angkwarr alherl-apaynteyew. Athan ngenh ileyel angka irrkaty-angkwarr-anem. Aleth iterl-aynteyew angka nhenhew, iylpelerrey-angenh. Alakenh-anyeman nga artwa army-areny-apeny, rlterrk anaynteyew Jesus-angkwarr arrenty-wety.<sup>19</sup> Ngarl alheylan, angka ntwa ilerl-areyel, iterrlap-aynteyew rlterrk-antey Akngeyew. Ntwan kel iterl-areyel, arraty-angkwarr anaynteyew. Aleth anaynteyew alakenh-anyem. Ingwer-rnemelan kel iterl-areyel arraty-angkwarr, rernemap mentyarl aneyel. Alakenh-anyem rerneman intwemelerrew Akngey-wety, iterrey-angenh ikwer, arrangkw-anem. Rernem-apeny alakenh aney-angenh.<sup>20</sup> Artwa yanh-athererr, Hymenaeus-then Alexander-then, ratherr alakenh aneyel, apmwangkwarr. Nthakenh ratherr apmwel-ayeth ikwer angkey-angenh-anem. Menty arrenty Satan yanhel renh-atherrenh irrwampenh-anthem, ikwerenhn-angkwarr. Atha renh-atherrenh menty tyarlewew, ratherr iterl-areyew-awaty, apmwel-ayetharl ratherr aneyel.

## 2

*Christian-rnem akarrerr-aynteyew ingkerr; Akngey-warl-athek angkaynteyew*

<sup>1</sup> Atha ngenh ileyew Christian-rnem-then alakenh-anyem: arrantherrarl akar-erreyley, Akngey ayern-aytenh-arey ingwer-rnemew-then, rernemaw angkeperrenhey-alpeyew ikwer-warl-athek. Arrantherrap nakemel angkem, ra mwerrarl ingkerrew.<sup>2</sup> Ilkternemewan apmer arrpanenhew ayern-aynteyew Akngey, kapment-areny-rnemew-then. Arrantherr alakenh Akngey ayernem, mwarrantiyarlap rernem arntarnt-arynteman ingkerrenh anenhantherrenh. Kel anantherr arternp-anem mwarrant-arey anaynteyew, Akngey-anem apent-ayntemel.<sup>3</sup> Alakenh-anyeman mwerrarl, anantherrarl

renh ayerneman, renh irrngerney-anthemel. Rarl anyentel anenhantherrenh arntarnt-arayntem mwerranty, <sup>4</sup> rarl artewentyan ilkelheyel anewantherr. Ran mpwelheyel ingkerrenhew, ikwer-warl inweng anthelheyew, iterl-aremel angka arraty ikwerenh. Alakenhap ra ilkelheyel. <sup>5</sup> Akngey ran anyent aneyel ingkerrenhew-antey. Rarl alerikw ikwerenh thwenew ahern nhenh-warl. Jesus ran artwarl anehn, anantherr-apeny. Rant anyentel anenhantherrenh anyenteley-angker Akngey-warl-athek. <sup>6</sup> Rarlap katy ilwewan anewantherr ingkerrew, itetheleyew anenhantherrenh ipmewety. Awank-akerr Akngeyelan anenhantherrenh iley-angenh angka Jesus-akert. Aley-anyeman ra ileyl anaynt-anem anenhantherrenh, anantherr ilaynteyew ingwer-rnemew-then. <sup>7</sup> Nhenhanap angka inngarl. Alakenhap ra ayenh ilenhan, angka ikwerenh-akert anaynteyew. Ayengap alheyl ingweram-angkwarr, angka ikwerenh ilaynteyew. Ayen-han thweney-angenharl ra Jew-rnem-warlan, arrangkw. Ra ayenh thwenew ingwer-nem-warlarl, rernemaw angka Jesus-akert iterl-arynteyew. Athan irrywerremel iley-angenh; arraty-angkwarrarl ayengan angkeyel.

*Christian-rnem rernemarl akarrerreyel, alakenharl ra ayntemer*

<sup>8</sup> Athan artwa Christian-rnem tyaty arrpanenh-angkwarr ileyl, arraty-angkwarr anaynteyew. Akngey-warl rernem angkem, nthakenh rernem apmwangkwarr ingwer-rnemew aney-angenharl, arrangkw ilterrey-angenh rernem. Akngey-warl angkeyew, itep irrwerlerremel ikwer-warl.

<sup>9</sup> Athap arelh-rnem-then ileyl, arraty-angkwarr anaynteyew. Rerneman mwerr-angker inngelheley-angenharl. Alta mwerranty mpwarelhey-angenh, ilengem mwerr-angker altewarz arrerney-angenh, ilengem pretty one-rnem gold-penh arrerney-angenh arrpemarl. Arnkwethen arlkny-arlkenyel aylpey-angenh, menty, artwer nemel arewerr tyaty-itwew. <sup>10</sup> Arelh-rnem atha ileyl arrpemarl, rernemarl Christian ielhem, rernem ingwer-rnem arntart-aryntemarl mwerr-angkwarr, ikwer-rnem mpwaraynteyew mw-err. Alakenh-anyemanap mwerr-angker inngarl mpwarelheyel. Nthakenh rernemant ament mwerr-angkwarr mpwarelhey-angenh, arrangkwarl.

<sup>11</sup> Arelh-rnemarl tyaty-itwew akarrerrem, rernemap awelheyew akater, angka Akngey-wenh aweyew akaltyerremel. Artwelarl angka akalty-anthem, arelh-rnem mwerranty awelheyew, ilterrey-angenh. <sup>12</sup> Paul ayeng angkeyel, arelh-rnemel nthakenh akalty-anthey-angenh tyaty-itwew. Nthakenh rernem artwangkwarr anpererrey-angenh. Nthakenh rernem artwer nem akalty-anthey-angenh. Alakenhap ayeng angkeyel, arelh-rnem anaynteyew akeleytarl tyaty-itwewan.

<sup>13</sup> Alakenhap ran: artwethen arelh-then anantherr aneyel ratherr-apeny, arrwekelarl anehn-apeny, Adam-then Eve-then. Akngeyel artwa yanhyan Adam-an renh-tangkwel mpwarew. Ikwer-theyan arelh yanh-anem Eve-anem mpwarew. <sup>14</sup> Arrenty Satan ran irrywerl-amperney-angenh Adam-an, arrangkw. Eve-arl ran irrywerl-ampernew. Eve-an awelhewarl ikwer, rap intwemelerrew Akngey-wety. Apmwangkwarr-anem Eve ra anenh. Alakenh-wety ayeng angkeyel arelh-rnemew, rernem nthakenh akalty-anthey-angenh, nthakenh artwer nem-angkwarr anper aney-angenh, arrangkw. <sup>15</sup> Arelh-rnemarnt artewenty ilterreyew Akngeyew, rlterrk aneyew ikwer-angkwarr arraty. Rerne-man Christian ingwer-rnemew-tangkwel ilkelherl-anemer, nakelhey-angenh ament. Alakenh-anyeman, Akngey ranap inkwerelheyel ikwer-rnem. Rernemarl ampa akely atnyenem, rap renh-rnem arntarnt-aremarl mwerrantyelarl.

### 3

*Angka tyatyew-arteyp-akert*

<sup>1</sup> Timothy, ntwa iterl-areyel, Christian-rnem anantherr angkeyel-angkwarran alakenh-anyemarl: "Ingwerenty apekarl ilterreyel, ra tyatyew-arteyp-akert aneyew, kel mwerrarl."

<sup>2</sup> Alakenhap ran artwa tyatyew-arteyan arratyarl anem intem-anteyarl, apmwangkwarr-wenyarl. Rap atnyen-ayntem arelh anyent-antey intem. Akeleyt-antey ra anem arternp ingwer-rnem-akert, mwerr-angkwarr ikwer-rnem angkemel. Ingwer-rnemelan renh mwerr antwemarl. Rernem apetyenty apmer ikweren-warl, menty tyarlewem renh-rnem mwerr aynteyew apmer-itwew. Ra iterl-areyew, mwerr-angkwarr akalty-antheyew, rernemaw arraty-angkwarr angka Akngey-wenh aweyew. <sup>3</sup> Ra mwerr aneyew terangkerrey-angenh. Nthakenh ra ahelerrey-angenh anaynteyew, ra atwey-angenh ingwer-rneman, arrangkw. Ra nthakenh aleth ilterl-aney-angenh ingwer-rnem. Ra nthakenh anketyerrey-angenh manew. <sup>4-5</sup> Rap mwanty-antey arelh ikwerenh

arntarnt-araynteyew ampernem-then. Ra renh-rnem apek mwerranty arntarnt-arey-angenh, ranap tyaty-areny-rnem-then arntarnt-arey-angenh arrpemarl. Tyatyew-artwelyelan arntarnt-areyew ikweren-hrnem-tangkwel. Ampernemanap ikwer awelh-aynteyew, ilterrrel-aney-angenh.

<sup>6</sup> Artwa anyentan iterrem apek, tyatyew-arteyp aneyew, kel mwerr. Rap Akngey-angkwarr arleng-alenty-tangkwel anem. Mentyarl Christian rlengkeny aneman, tangkemel ra nakelherl-anewerr. Nthakenh alakenhan aney-angenh, Akngeyel renh atbewerr. Irrkaty-angkwarr arrenty Satan yanh ra atbew arrpemarl. <sup>7</sup> Tyatyew-arteyp ra aneyew arraty-angkwarr arrpemarl. Akngey iterl-arey-angenh-rnem rerneman arem artwa mwerrarl ra. Rernemap apek iterreyel, ra apmwarl. Ingwer-rnemelan renh ilem Christian-arrpantey, rap nyerrerrem-anem. Satan yanhelan renh antwerrkem-anem irrwer nemel, apmwangkwarr alhaynteyew.

#### *Warrkenh ingwer-rnem-akert tyaty-areny-rnem-akert*

<sup>8</sup> Ingwerently apek tyaty-areny-rnemew warrkerreyew. Irrkaty-angkwarr arrpemarl ran arraty aneyew. Rap angkaynteyew arraty-antey, irrtwyerremel iley-angenh. Ra mwerr anem terangkerrey-angenh. Ra manew-then anketyerrey-angenh. <sup>9</sup> Iterl-areyew kanper-antey angka arraty-then Jesus-akert awelhemel. Ra nyerrerrewerr, ra aleth-antey arraty-angkwarr anaynteyew, apmwelheley-angenh. <sup>10</sup> Ntwa warrkenh tyaty-areny arrerneyew-alenty, ntwap renh arrkernem-tangkwel. Alakenhap tyaty-areny-rnemel iterl-arem, rarl arraty-angkwarr Akngeyew anem. Innga apek ra arraty-angkwarr anem, kel mwerrarl. Rap anemarl, tyaty-itwew warrkerr-aynteyew.

<sup>11</sup> Alakenh arrpemarl arelh ikweren-hra arraty-angkwarr arrpemarl aneyew, ingwer-nemel areyew, mwerr-angkwarrarl ra arraty anem. Rernemap arelh renh mwerr antwemarl. Ran mwerr-angkwarr angkaynteyew ingwer-rnemew, tyel-angkey-angenh, irrtwyerremel iley-angenh, arrangkw.

<sup>12</sup> Artwa warrkenh tyaty-arenyel ra arelh anyent-anteyarl atnyen-ayntem. Rap mwantel arntarnt-arayntem arelh ikweren-hra ampernem-akert. <sup>13</sup> Rap rlterrk Jesus iterl-areynteyew. Ra apek arraty-angkwarr tyaty-angkwarr anem, rernemap renh mwerr antwemarl. Alakenhap ra rlterrkerremarl, alhewerarl ra alheyel, angka mwerr-angker Jesus-akert iterl-apeyel.

#### *Angka mwerr-angker Jesus-akert rlterrk inngarlap ran!*

<sup>14-15</sup> Timothy, atha ngenh areyew apmer ngkwenh-itwew. Ilengemel ayenh artwerelem apek, atha iterl-arey-angenh. Alakenh-they atha angka nhaym ingkwer nem pip-warl, ngkweng thweneyew. Pip nhenh-angkwarr ntwa iterl-areyew, Christian-rnem akalty-antheteyew, rernemarl akarrerreyel ngkweng-warl. Rernemap iterl-arem, mwerr-angkwarr anaynteyew, apenteyew angka Akngey-wenh, ntwarl akalty-antheteyel-angkwarr. Akngey ran intem-antey areyel, rap ikweren-hrnem anenhantherrenh arntarnt-areyel. Ran anenhantherrenh rlterrkeleyel arraty-angkwarr, angka ikweren-hrapent-aynteyew. Rap angka ikweren-hrapent-aynteyel anenhantherrenh, ingwer-rnemelanap awelhemarl, inweng anthelheyew ikwer-warl. <sup>16</sup> Akngeyelan angka nhennan anthew anenhantherrenh. Angka mwerr-angker inngarlap ran. Anantherran akwerrp aneh, iterl-arey-angenh, rap anaynt-anem anewantherr ilew. Angka nhanyemanap alakenh aynteyel:

Jesus renh atnyenew ahern nhenh-itwew anantherr-apey.

Inweng Akngey-wenhan renh itethelew ipmepen.

Alakenhap anantherr renh iterl-areyelarl, ran Alerikw Akngey-wenh.

Antyerl-rnemelan renh arew arrpemarl.

Angka nhanyem ikwer-akert ingwer-rnemelan apmer arrpanenh-warl iterl-apey.

Apmer ahern nhenh-areny-rnem ingkerrenh angkew awelhew, rlterrk iterremel Jesus-ew.

Akngelyelan renh akngelynew irrwerl-warl, ikwer-itwel aney-alpeyew intem-antey arawerrng ilkwakert.

## 4

#### *Tyatyew-arteyp ingwer-rneman intwemelerremarl Akngey-wety*

<sup>1</sup> Akngey-wenh Inwengelan ayenh ileyl anaynt alakenh: Jesus-an apey-alpeyew-alenty, ingwer-rneman ipmelheyen, Akngey-wenh angkew awelhey-angenh. Inweng apmwernemew Satan-wenh-rnemew rernem awelheyen, angka apmwernem apenteyen. <sup>2</sup> Tyatyew-arteyp yanh-rnemel irrtwyerremel ileyel arrenty apmwakert,

ingwer-rnem akalty-anthemel apmwangkwarr. Nthakenh rernem arraty iterrey-angenhen-anem. Rernemap aleth apmwangkwarr angkem, nyerrerrey-angenharl.<sup>3</sup> Rernemap irrtiyerremel ilem ingwer-rneman, rernemaw intwemelerreyew Akngey-wety. Alakenhap rernem angkem, "Nthakenh anewarterrey-angenhen! Nthakenh amern yanh-ikwer arlkwey-angenhen!" Angka nhelkwer apmwarl.

Akngayanap alakenh angkey-angenharl, arrangkw. Ra anenhantherrenh alakenh mpwarew, anewart aneyew. Rap amern ilek-ilek mpwarew, anantherr arlkwaynteyew. Anantherrarl innga renh iterl-arem, anantherrap inngarl inkwerelhemel amern ilek-ilek alhewer arlkwem.<sup>4</sup> Akngyeleyan ilek-ilek ingkerrenh mpwarew. Ingkerrenhap mwerr-angker. Alakenhap anantherran mwerr-angkwarr anewart itengerrem. Alakenhanap anantherr inkwerelhemel angkem ikwer, amern arlkweyew-alentyan. Kel mwerr innganem.<sup>5</sup> Alakenhap ra aynteyel: Akngyeleyan enantherrenh ilew angka ikweren-angkwarr, mwerr anantherr anewart itengerrem. Rap ilew, amern ikweren mwerr-angkerarl. Kel anantherr mwerr-angkwarr angkem ikwer amern arlkweyew-alenty. Alakenh anantherr mwerr-angker ilek-ilek arlkwem alhewer.

#### *Mwerr arraty warrkerreyew Jesus-ew*

<sup>6</sup> Timothy, aleth-antey Christian-rnem akalty-anthaynta, ayengarl angkeyel-angkwarr. Alakenh-anyemap ngan mwerr-angkwarr warrkerrem Jesus Christ-ew tyaty ikweren-hew-then. Akngey-wenh-angkwarr inngarl aynteyel. Ngan aleth-antey akaltyerr-aynteyew angka ikweren, ntwap aleth apent-ayntem, rlterrkerremel.<sup>7</sup> Awelhey-angenhen ingwer yanh-rnemew, angka altyerr-penh-rnem-arrpanteyarl ngkweng ileyelew. Menty ipmay. Ngan aleth-antey awelh-aynteyew angka Akngey-wenhew.<sup>8-9</sup> Ntwa iterl-areyel, ingwer-rnem alakenh angkeyel: "Nga alakelhewey arrkent, ilengem awerr apek irrwerlel-aynteyew, ngenh arlka rlterkel-aynteyew." Alakenh-anyem anantherrap akwel rlterrkerrem. Ranap mwerr inngarl aynteyel, inwengant mwerr rlterrkeleyew, Akngeyaw anantherr aleth apent-aynteyew. Anantherrap ngwelem ikwer-itwel aney-alpem aleth-antey. Angka nhenhanap inngarl.

<sup>10</sup> Alakenh-anyem aleth anantherr warrkerr-aynteyew. Akngey ranap anenhantherrenh itethelem, anantherrarl inweng ikwer-warl anthelhew. Rap aleth aneyel, anantherr iterl-areyelar. Rap ingkerrenh-antey arntartn-aryntem. Renh apenteyel-rnemanap rernem alpem, ikwer-itwel aney-alpewyew intem-antey.<sup>11</sup> Ntwa aleth-antey Christian-rnem akalty-anthaynteyew, ayengarl angkeyel-angkwarr. Renh-rnem ilaynteyew, angka nhenh aleth apent-aynteyew arraty-angkwarr.

<sup>12</sup> Timothy, artwa akely-antey nga aneyel. Ingwer-rnem Christian-rnem ngkweng awelhey-angenhen-antey apek. Mwerr artetwenty iterrey-angenhen-antey. Ikwer-rnem aleth-antey angkaynteyew mwerranty, arraty-antey. Aleth-antey ilkelh-aynteyew ikwer-rnem. Rlterrk-antey iterr-aynteyew Akngeyew. Ilek-ilek apmwa menty ipma. Christian yanh-rnemel arem, ngarl aneyel arraty-angkwarr, rernemap ngenh iwarrernemarl.<sup>13</sup> Aleth-antey angka Akngey-wenhaw reytemel-aynteyew, rernemarl ingkerr akarrerrem tyat�warl. Aleth-antey renh-rnem akalty-anthaynteyew, rernemap arratyarl aneman. Aleth-antey alakenh mpwaraynta, ayeng alheyew-atety ngkweng-warl.

<sup>14</sup> Ntwa apek iterl-areyel, artwamp ilkwer nemelarl tyaty-areny-rnemel ngenh arrernew, tyatyew-artey aneyew? Rernem Akngey ngkweng ayernew, ngkweng-warl itep arrernew. Akngyeleyan ngkweng-warl arrernew Inweng ikweren, rap ngenh anthew arawerrng ilkwa, ikweraw warrkerr-aynteyew. Arawerrng ilkawakert nga aleth-antey warrkerr-aynteyew.

<sup>15</sup> Angka nhenh apent-aynteyew, pip nhenhel ileyl-angkwarr. Alakenh-anyem Christian ingwer-rnemel arem, ngan mwerr-angkwarr Akngeyew warrkerreyel, warrkarl ngenh anthew.<sup>16</sup> Mwanty anaynteyew ilperte telhewerr, iwerr apmwangkwarr apentewerr. Aleth-antey iterr-aynteyew angka Akngey-wenhew, ntwap akalty-anthem rlterrk arraty-angkwarr. Nga arntartn-arelhem mwerranty arraty, ntwap ingwer-rnemarl akalty-anthem, mwerr-angkwarr. Ntwap iwerr arraty-angkwarrarl apentem, nga aney-alpem Akngey-itwel intem-antey, ngkwenh-rnem-akerr.

## 5

#### *Paul-el Timothy ilew, renh-rnem arraty-angkwarr akalty-anthaynteyew*

<sup>1</sup> Tyaty-areny anyentarl apmwangkwarr alhem apek, mwerranty nga angkeyew ikwer, ntwap arratyeyew renh mwerr-angkwarr. Mwerr angka artwampew, aynengkw ngkwenhew-apeny. Renh iltey-angenhen. Artwa akelyew mwerr angka, aytayengkw ngkwenhew-apeny.<sup>2</sup> Mwerr angka arelhampew, amengkw ngkwenhew-apeny. Mwerr angka aleyakew, aytayengkw ngkwenhew-apeny.

<sup>3</sup> Arelh invert-rnem aneyel arrangkw apek, ikwer-rnem-wenh arrangkwarl. Ngan amperrngerreyew ikwer-rnemew. Tyaty-areny-rnemel arntarnt-aremer renh-rnem mwanty. <sup>4</sup> Invert ingwer-rneman mwerrarl apek aneyel ikwerenh-rnem-akert. Nthakenh ikwerenh-rnemel renh-rnem iwey-angenh, renh-rnemarl alkenhelew-penh. Angkeparlap invert-rnem arntarnt-areman, rernem renh-rnem arntarnt-arenh irrkaty-angkwarz. Alakenh-anyemarl invert-rnem aneyel, Akngeyanap ikwer-rnem inkwerel-heyel. <sup>5</sup> Invert ingweranap arrangkwarl aneyel apek, ingwerentyel arntarnt-arey-angenharl. Angkepelarang ra aleth ayerneyel Akngey, renh arntarnt-araynteyew. Renhap tyaty-areny-rnemel arntarnt-araynteyew. <sup>6</sup> Arelh invert ingweran ilehem Christian, ranap ilkelheyel apek, arrkent alhaynteyew. Ra arraty-angkwarz aney-angenh, arrkent alhaynteyew apmwangkwarz, Akngey apentey-angenh-anem. Inwengan ikwerenhp amwarl.

<sup>7</sup> Ntwa Christian-rnem ingkerrenh ila angka invert-rnemew, rernem arraty aneyew, ingwerentyel renh-rnem ayntarrp-ilewerr. <sup>8</sup> Christian-rnemel aleth ikwer-rnem-wenh arntarnt-arem, ampwety-ampwernem-then akely-rnem-then. Akngey-wenh-angkwarz alakenh-anyemarl. Rerneman anerl-aneny, ikwerenh-angkwarz apentey-angenharl, rernemap arwanteay Christian-arrpanteyarl. Akngey rernem inngarl iterl-arey-angenh.

<sup>9-10</sup> Aleyanap akngerrarl invert-rnem arrangkw aneyel apwert-weny-then, ingwerentyel arntarnt-arey-angenh. Ntwanap itnernem ingkwerneyew invert yanh-rnem ingkerrenh pip-warl. Yanh-rnem-tangkwel arternpel ara. Ampwa innganem rernem aneyel, 60 apek. Arelh invert ingwer-rnem ingkwerney-angenh-antey, alerl-antey rernem aneyel. Arelh invert ampwa anyent ra artwa anyent-akert anen, mpweny ingweren alhey-angenh arrangkw. Ran ingwer-rnem arntarnt-arenh mwerrantyel, alethang-rnem-then ra arntarnt-arenh apmer ikwerenh-itwew mwerrantyel. Ran ampa ikwerenh-rnemarl alkenhelew arraty-angkwarz mwerrantyel, rap rlterrk anen tyaty-angkwarz. Ingkety ingwer-rnem-wenh ra lhewenh Christian-rnem, Jesus-elarl kwertengerl ikwerenh-rnem ingkety lhewenh-apeny. Rlterrkayl aynten-angkwarz, ranap athamerrenh ingwer-rnemew. Invert nhelkwerant Akngey-wenh-angkwarz arratyarl anen, pip-warl ntwa ingkwerneyew.

<sup>11-12</sup> Invert akely-rnem-alew? Ingkwerney-angenh-antey, mentyarl. Rernemarl apek inperterrew, rernem angkew alakenharl: "Ayangan amentewarl anerl-aneyen, anewarterrey-angenh. Ayeng anaynteman amperrel-antey, tyaty-itwew warrkerryaynteyew." Alakenh-anyemelanap mwerrarl. Ingwer-ingweranap rernem iterrem apek, "Artwa yannew ayeng ilkelheyel innga. Ayeng anewarterreyew-anem." Alakenh rernemap iylpelerrew-anem, rernemarl angkew-penh, nyerrerrew-anem. Akngeyan ikwer-rnem awakelhem apek, rernemarl irryerremel ilew-wety renh. <sup>13</sup> Invert akely ingwer-rnem apek anewarterrey-angenh-antey, rernemap alakenh apek iterrem: "Tyaty-areny-rnemelan ayenah aley arntarnt-areyel-anem, mwerr-anem ayeng anayntem, warrkerrey-angenh-anem." Alakenh rernem arnmerreyel-anem, apmer ingwer-rnem-wenh-warl-anem alherl-apeyel, ilek-ilekew aparelh-aynteyew. Rernemap ingwer-rnemew tyel-angkemel alherleweyel.

<sup>14-15</sup> Invert akely yanh-rnem kel intwemelerrew Akngey-wety, arrenty-angkwarz anem apenteyel. Alakenh ayeng angkeyel invert akely-rnemew, "Mwerr-awayt anewarterreyew, ampernem atnyeneyew ilkwatherr, renh-rnem alkenheleyew, arraty inga anaynteyew. Nga amperrel aney-angenh, nga apmwelhel-anewerr." Ingwer-rnemelap invert akely yanh areyel, rernem arewerr, rernemarl apmwangkwarz alheyel. Rernemap ilem Christian anenhantherrenh ingkerrenh apmwarl.

<sup>16</sup> Arelh Christian-wenh angkwerikw invert apekarl aneyel. Rap arntarnt-aremer angkwerikw invert ikwerenh. Nthakenh arelh Christian ra alakenh iterrey-angenh, "Mwerr tyaty-areny-rnemel angkweraty renh arntarnt-arem. Ayeng ararl." Alakenh-wenyaw, menty. Rantey renh arntarnt-aremer. Nthakenh tyaty-areny-rnemel arntarnt-arey-angenh invert-rnem ingkerrenh. Rernemap arntarnt-aremer invert amentarl aneyel-rnemant, arrangkwarl aneyel-rnem.

#### Tyat-areny ilkwer nem-akert

<sup>17</sup> Timothy, atha ngenh ilenh arrwekel-antey artwa arrwekeleny-rnemew tyatyew-arety-rnemew. Artwa ilkwer nem irrngerney warrkerreyel ylpareth tyaty-itwew. Rernemap arrenhantherrenh akaly-antheyel, Jesus apent-aynteyew. Rernemap angka mwerr-angker ikwer-akert ileyel ingwer-rnemew. Alakenh-anyem ikwerenh-rnem awelh-aynteyew nakemel. <sup>18</sup> Akngey-wenh pwekel alakenh-anyem ileyel, "Artwa warrkenh payemelem warrk-penh!" Pwek ra alakenh ileyel arrpemarl, "Pwelek apek

warrkerreyel artwa ikwer. Pwelek rap amern weyt lthwelyel, ntang akatweway ilpeyew-alenty. Nthakenh pwelek-wenh arrakert arertney-angenh. Mentyarl pwelekelan ntang arlkwayntem." Alakenh-anyem aynteyel artwa tyatyew-artey yanh-rnemew, mwerr-angkwarzarl rernem warrkerreyel tyaty-itwew. Apwert anthaynteyew ikwer-rnem.

<sup>19</sup> Tyatyew-artey anyent apek apmwelhelem. Anyent ingwerentyarl ayntarrp-ilem renh apek. Nthakenh awelhey-angenh ikwer anyentew. Artwa atherrel apek, irrpetyel apek, angka tyatyew-artey ikwer-akert ilem, rarl apmwelhelel. Ngap awelheyewarl. <sup>20</sup> Tyatyew-artey ra apek akwetyemel apmwelhelen. Ntwa tyaty-itwew renh nyerrel-anthemel, angka ikwer-akerti ilemel, tyaty-areny-rnemel aweyew-awayt. Alakenh-anyem rernem iterl-aremarl, arraty-angkwarz-anem anaynteyew.

<sup>21</sup> Atha ngenh alakenh ileyel: Akngey, Jesus antyerl-rnemel-thenarl areyel-wety. Antyerl yanh-rneman Akngeyel rlwanew ikwer. Alakenh-anyem ntwa mpwareyew, atharl pip nhenh-angkwarz ngenh ileyel. Nga mwerr aneyew ingkerrenh-angkwarz irrkatty-angkwarz. Ngkwenh-rnemew mwerr anaynteyew alethang-rnemew-then. Mwerr aneyel-rnemew mwerr anaynteyew. Apmwangkwarzarl aneyel-rnemew-then mwerr anaynteyew arrpemarl.

<sup>22</sup> Ingwer-ingwer nga iterrem, ntwa ingwerenty arrerneyew, warrkerreyew tyaty-itwew. Alerl-antey iterreyew mwerranty-antey. Nthakenh itep arrerney-angenh akapwert-warl anamerl-antey. Renh arntarnt-arey, ra arraty anerl-anentyew. Ra tyatyew-artey apmwa anewerr, rap ngenh-then apmwangkwarz akalty-anthewerr. Ngantey mwerr-angkwarz anaynteyew arraty.

<sup>23</sup> Ingwer-ingwer ngan atnert kwarnehlhem, kwatyantarl ntwa antywely. Ntwap pweytelel kwaty-then ngkwarl wayn akely-then ilperteleshemel. Yanh-penh nga mwerr-anem awelhem.

<sup>24</sup> Anyent apmwangkwarz alhem apek, ingwer-rnemelan areyelarl. Ingkerrel areyel. Anyent ingweran apmwangkwarz alhem, ingwer-rnemel arey-angenh apekarl. Ingwer-rnemel iterl-arey-angenh, rarl apmwangkwarz alheyel. <sup>25</sup> Anyentan mwerr-angkwarz alhem, ingwer-rnemel areyelarl. Anyent ingweran mwerr-angkwarzarl alhem, ingwer-rnemel apek arey-angenharl. Ingwer-ingwer ingkerrel iterl-arem, rarl mwerr-angkwarz anenih intem.

## 6

### *Artwa ilkvernem, artwa warrkenh-rnem-then ikwer-rnem-wenh*

<sup>1</sup> Timothy, ayengan angkeyel artwa warrkenh Christian ingwer-rnem-akert-anem. Rerneman warrkerreyel arla arrpanenhel ingwa arrpanenhel, aleth-antey warrkerreyel tyatl-itwew-apeny. Rernemap artwa ilkwa ikwer awelheyew, ikwer tyel-angkey-angenh. Ingwer-rnem Akngey apentyey-angenh-rnemel rernem areyel anenhanther-renh. Rernemap iterl-arem, Akngey-wenh-rnem Christian-rnem anantherr warrkerrem arraty. Rernem iterl-aranteyew, Akngey-wenh-angkwarzan mwerrarl. Alakenh-anyeman rernemap nthwekern apmwel-ayeth angkey-angenh angka Akngey-wenhew, anantherrarl akalty-antheyelan tyaty-itwew. <sup>2</sup> Artwa ilkwa anyent Christian apekarl areyel. Warrkenh ra nthakenh iterrey-angenh alakenh: "Artwa ilkwa ra Christian-arl areyel. Mwerrarl ayengan arnmerr-antey, warrkerrey-angenh." Arrangkw, alakenh-weny. Ra ikweran warrkerrem iylparetharl, Akngey-angkwarzarl ra aneyelew. Ntwan alakenh-anyem tyaty-areny-rnem akalty-anthaynteyew, rernem arraty-angkwarz anaynteyew.

### *Christian-rnem arraty anaynteyew, anketyerrey-angenh manew*

<sup>3</sup> Jesus Christ rarl anenhantherrenh akalty-anthenh, arraty Akngey-angkwarz anaynteyew. Ingwer-rnemelanap akalty-antheyel arrenhantherrenh apmwangkwarz. <sup>4</sup> Rernem akwerrp, iterl-arey-angenh, rernemap arrangkwel akalty-antheyel. Tangkemel rernem nakelheyel mwerr-angker-arrpaney. Rernem irrwerney-angker-rnem. Angka apmwa rernem ileyel, Christian-rnemmap ilterrem-anemarl. Irrtywerremel rernem ileyel, ingwer-rnemanap arwelth-rnemarl. <sup>5</sup> Christian ingwer-rneman awelhemarl ikwer-rnem, rernemap ingkerrenh ilterrem arrpemarl apatelhelemel. Rernemap apmwerrem kwen akwerrng. Rernem alakenh iterrem, "Akngey atha apentytent, athap man akngerr inngaril inem." Arrangkw, alakenhan inngeweny.

<sup>6-7</sup> Alakenh-anyemra ra: anenhantherrenharl ahern nhenh-itwew atnyenew, anan-therrap man atnyeney-angenh, arrangkw. Ingwer-ingwer anantherr ilwem ingkerrenh. Anantherrap ahern nhennhan iwerl-alhem man-weny-antey. Nthakenh anantherr akngeyney-angenh. Christian ingwer-rnemel apek manarl atnyenem, ingwer-rnem apekan arrangkwarl. Kel mwerraw. Anantherran itengant-anem ingkerrenh aneyew

inkwerelhemel, apentemel Akngey-angkwarz, angka ikwerenhen awelhemel. Nthakenh anantherr anketyerrey-angenh ilek-ilek ahern-arenyew. <sup>8</sup> Anantherr anaynteyew inkwerelhemel amernew-then arnkew-then. Man ilkwew anantherr anketyerrey-angenh, ilek-ilekew ahern-arenyew-then.

<sup>9</sup> Ingwer-rneman apek inkwerelheyel, man akngerrarl ineyew. Alakenh-anyeman arrenty ilkwelan renh-rnem arrkernemarl. Ra renh-rnem akngapety-iwem apmwangkwarz, rernemaw ilek-ilekew angwaremel ilkelheyew. Rernemap arwengkerrem-anem, apmwerremel-anem inngarl. <sup>10</sup> Ingwerenty apekan anketyerreyel, rap irrwernelhem artewentyel inngay. Rap irrwerneyel ingwer-rnem-then. Alakenh-anyem ra ipmelhem-anem Jesus-wetyan, intwemelerrem-anem. Rap apatemel-anem apwely-anem anem. Alakenh-anyem man ra apmweley-angker.

#### *Akngeyew iylpareth intem warrkerr-aynteyew*

<sup>11</sup> Timothy, nganap alakenh aney-angenharl. Ngan warrkenh Akngey-wenharl aneyel. Artwa ilkwernem tyatyew-artey-arrpantey, rernem arrangkwarl. Rernem-apeny aney-angenh. Ilek-ilek apmwewety intwemelerreyew. Mwerr-antey anaynteyew arraty Akngey-wenh-angkwarz. Ikwerant iterremel anaynteyew. Aleth ingwer-rnem arntarnt-aynteyew athamerremel. <sup>12</sup> Rlterrk-antey Akngeyew anaynteyew, ipmelhey-angenh. Alakenh-anyem nga alpem, aney-alpeyew Akngey-itwel intem-anteyarl. Awank-akerrarl ran ngenh rlwanew, ntwa renh apent-aynteyew, ngap awelhewarl. Ntwap alakenh ilew tyaty-areny-rnem, "Ayengan inweng anthelhew Jesus-warl." Inngap rernem awewan.

<sup>13</sup> Ntwan Akngey iterl-areyel. Rant anyentel iteth atnyeneyel ingkerrenh. Ntwap Alerikw Jesus iterl-areyel. Ran awank-akerr arrwekel rtnew artwa ilkwa yanh-itwew Pontius Pilate-itwew, ikwer ilelheyew. Akngeyel Jesus-el-then atherrel-antey ayenhaneyel, pip ingkwernerl-anenty ngkweng-warl. Nga ilelha, ratherrarl areyel-wety, ngap awelh-aynteyewarl. <sup>14</sup> Aleth-antey ilek-ilek arraty mpwaraynteyew, atharl ileyel-angkwarz pip nhenh-angkwarz. Alakenh-anyem mpwaraynteyew, Jesus rarl apeyalpeyenhen-atety. <sup>15</sup> Akngey rant anewantherr ilkwa aneyel ingkerrenhew-antey, ranap ilkwa aneyel atyetyart ingkerrenhew. Ingwer-ingwer ra ingkerrenh arratyelem, rap thwenem Jesus-anem angkep ahern nhenh-warl. <sup>16</sup> Akngey anyent rant iteth anem, nthakenh ra ilwey-angenharl, arrangkw. Ran artewentyel arrtyernem lyenenty ilkwel. Nthakenh ingwerentyan ikwer-warl arrer alhey-angenh, arrangkw. Nthakenh renh annel arey-angenh. Ran aneyel arawerrng ilkwakert. Anantherrap renh nakaynteyew aleth-antey. Alakenh-anyem mwerr.

<sup>17</sup> Tyaty-areny ingwer-rneman man akngerr-akertarl ilek-ilek-then akngerr atnyeneyel. Ntwan ileyew alakenh-anyem: "Arrantherr man akngerr-akert-rnem! Nthakenh arrantherr nakelhey-angenh man akngerr-akert. Man apek arrangkw ywerrewerr. Man yanhanap ahern nhenh-arenyarl, nthakenh ngenh iteth atnyeney-angenh aleth. Arrantherran iterl-aynteyew Akngeyewant anyentew ikwerant. Rant anyentel ilek-ilek mwerr-angker anthem. <sup>18</sup> Alakenh-anyemanap ntwa renh-rnem ileyew, rernem ingwer-rnem-angkwarz mwerrarl anem, athamerremel ingwer-rnemew. Ingwerenty arrangkw aneyel, rernemap anthemarl." Alakenh-anyem ntwa ilem. <sup>19</sup> Rernem alakenh arraty mpwarelhelyel Akngey-angkwarz. Rernem ilwenty, rernemap alpeyew aney-alpeyew ikwer-itwel intem-antey ilek-ilek mwerr-angker-akert.

<sup>20</sup> Timothy, Akngeyel ngenh antew angka ikwerenhen arraty innga. Ntwan arraty-anten angka akalty-anthaynteyew, ingwer-rnemel apmwangkwarrarl akalty-antheyel-wety. Rernem iterreyel arraty-arrpantey. Rernemanap angkeyel apmwangkwarr, akwerrp-rnem, iterl-arey-angenh. Ikwer-rnem awelhey-angenh. <sup>21</sup> Irrepern ingwer-rnemanap ikwer-rnem awelhew, intwemelerrew Akngey-wety.

Athan Akngey ayerneyel arrewantherr alakenh: "Akngeyay, aleth-antey mwerrantyel-antey arntarnt-aynteyew Timothy ikwerenh-rnem-akert."

Kel-antey.

## 2 Timothy

### Paul-el pip nhenh ingwer-anem ingkwernew, rap thwenew Timothy-warl-anem Angka nhenhan alakenh aynteyel

Paul-el pip atherr thwenew Timothy-warl. Pip anyent itnan *1 Timothy*. Pip nhanyeman itnan *2 Timothy*-arl. Paul anenh tyayl-itwew apmer ilkwtiwew Rome-itwew, rap pip nhenh thwenew tyayl ikwer-they. Timothy-an apmer ingwer-itwew anenh Ephesus-itwew.

Timothy ran artwa tyatyew-artey anenh Ephesus-itwew. Paul-an ikwer ilkel-henh, ikwer artetwenty iterremel. Ingwer-rnemelan angka apmwarl akalty-anthenh, Christian-rnem ilpertelenh. Timothy-el mwerr-angkwarr akalty-antheyew Akngey-wenh-angkwarr.

Ingwer-rnemelan Christian-rnem irrwerneh. Timothy rap rlterrk-antey anaynteyew Akngey-angkwarr, angka Jesus-akert ilaynteyew.

<sup>1</sup> Ya Timothy, ayeng nhanyemarl Paul angkeyel. Atha pip nhenh ingkwerneyel, ngkweng-warl thweneyew. Akngeyel ayenh ilew, alheyew apmer arrpanenh-warl, angka mwerr-angker Jesus-akert ilerl-apaynteyew. Awank-akerr Akngeyel alakenh ilew, "Ingwerinti inweng anthelhem Jesus Christ-warl, athan renh arntarnt-aremarl, nthak-enh iwerl-alhey-angenhan. Rap aney-alpem intem-antey atyeng-itwel, nthakenh ilwey-angenhan." Alakenh-anyem Akngeyel thwenew Alerikw ikwerenr Jesus. <sup>2</sup> Timothy, ayeng ngkweng ilkelheyel. Ngan alerey atyenh-apenyarl. Athan intem Akngey ayern-ayntem Lord Jesus-then alakenh: "Akngeyay, nga athamerr-aynteyew Timothy-ew. Renh arntarnt-araynteyew mwantz-antey, raw mwerr anaynteyew."

#### *Rlterrk-antey anaynteyew Akngeyew*

<sup>3</sup> Ayeng inkwerelhemel angkeyel Akngeyew arlita arrpanenhel, athap renh ayerneyel ngkweng. Ayeng ikwer warrkerreyel mwerr alhewer, nyerrerrey-angenhan. Akngey atyenh warrkerrenh ikwer awank-akerr, arrengay atyenh-rnem-then. Itwernew-then ingwel-then atha renh ayerneyel ngkweng, ra ngenh arntarnt-araynteyew.

<sup>4</sup> Atha ngenh iterl-areyel, ngarl artnew atyeng, atharl iwerl-alheweng-arey. Yanh-penh ayeng amperrgerreyel ngkweng. Ayengen ngenh areyew artetwentyel, inkwerelhemel ngkweng. <sup>5</sup> Atha iterl-areyel, ntwarl Jesus apenteyle. Awank-akerr aperley ngkweng Christian anenh, itnan Lois. Amengkw ngkwenth itnan Eunice, ran Christian arrpemarl anenh. Aley ngan iterreyel, Jesus ntwa apent-aynteyew arrpemarl, yan-h-atherrel-apeny.

<sup>6</sup> Ntwa iterl-areyel, atharl itep ngkweng-warl akapwert-warl arrernew, perayerrew-anem ngkweng. Ikwereng-arey Inweng Akngey-wenhel ngenh arawerrng anthew. Nthakenh nga iylpelerry-angenhan Akngey-wenl arawerrng ikwer. Ngap arawerrng ikwer-akert warrkerr-ayntem rlterrk-antey Akngeyew. <sup>7</sup> Nthakenh anantherr atererrey-angenhan ingwer-rnem-wety. Akngey-wenl Inwengel anenhantherrenh rlterrkelem, ilek-ilek mwerr-angker ingwer-rnemew mpwaraynteyew. Ran anenhantherrenh arntarnt-arem. Arawerrng ikwerenh-akertel ayeng-antey artwerelelhem, apmwangkwarr alhewerr. Arrantherran irrkaty-angkwarr artwerelheyew.

<sup>8</sup> Alakenh-angkwarr nga nyerrerrey-angenhan, angka Jesus-akertan ilaynteyew. Nthakenh nyerrerrey-angenhan atyeng-wety, ayengarl tyayl-itwew aneyel-wety. Ayeng apmwangkwarr alhey-angenhan anenh! Athan angka Jesus-akert ilenh, ingwer-rnemana apmwel-ayetharl angkenh atyeng. Ingwer-rnemel angka apmwa arrpemarl ngkweng-akert ilerl-anewerr. Nthakenh nga arte twenty iterrey-angenhan. Akngeyel ngenh rlterrkel-ayntem ikwer-rnem-wety.

<sup>9</sup> Ra anenhantherrenh rlwanew, ikwerenh-rnemew anaynteyew, arraty-angkwarr ikwerant anaynteyew. Anantherr apmwangkwarrarl-tangkwel anenh, ranap anewan-therr athamerrew. Arrwekel-antey ra anewan-therr iterrenh, rarl Jesus ahern nhewarl thweney-angenhel-antey. <sup>10</sup> Rap renh itethelew ipmepenh, anantherrap iteth arrpemarl anaynteyew. Anantherrap iterl-aryntem angka nhenh Akngey-wenl. Angka ra ilem, rarl anewan-therr athermerem. Alakenh-anyem anantherr Akngey-angkwarr anem aleth-antey, ikwer-warl alpeyew, aney-alpeyew intem-antey.

<sup>11</sup> Akngeyel aneyen rlanew, ayeng intem-antey alhaynteyew apmer arrpanenh-warl, angka mwerr-angker ikwerenr ilerl-apaynteyew, ikwerenh-rnem akalty-antheyew.

<sup>12</sup> Mwerr ayeng awelheyel Akngeyew. Ingwer-rnemel ayenh irrwernew, ayenh

akwernemel tyayl-warl. Ayengan nyerrerrey-angenh, ayengap iterremel aneyel rlterrkanterey Jesus-ew. Atha renh iterl-areyel. Ra ayenh arntarnt-arayntemarl, ayeng apmwangkwarrarl alhewerr. Ra aleth ayenh arntarnt-arem arlta yanhew-atety, Jesus rarl apey-alpeyenew-atety.

<sup>13-14</sup> Akngeyel ra ngenh anthew angka ikweren. Ntwarl angka akalty-antheyel ingwer-rnem, mwanty-antey angka irrkaty-antey ilaynteyew, athari awank ngenh ilew. Nthakenh ngenh ingwerentyel iley-angenh, ntwa angka apmwangkwarz ilaynteyew. Ngan iterr-aynteyew Jesus-ew intem-antey, ingwer-rnemew-then ilkelh-aynteyew intem-antey. Inweng Mwerr-angker ngkweng-itwel aneyel, rap ngenh arntarnt-areyel, alakenh-anyem anaynteyew.

*Artwa anyent Onesiphorus ra Paul irrngerney-anthenh tyayl-itwew*

<sup>15-18</sup> Ntwa kel iterl-aremel awew, yanh-rnem Christian-rnem Asia-itwew atyeng-wety intwemelerrew. Phygelus-then Hermogenes-then ratherr intwemelerrew atyeng-wety arrpemarl. Onesiphorus ranap alakenh-wenyarl. Ra apetyew nhenh-warl Rome-warl, rap nthwenh atyeng apmer arrpanenhel, ayenh arey-alheyew-atety tyayl-itwew. Ranap apetyew alhewer arnkaty-antey. Ayengan inkwerelhey-ayntew rwaning ikwer. Artwa yanh-atherr arrangkwarl. Ratherr nyerrerrenh, nhenh-warl tyayl-warl apetyewerr. Alakenh-anyem athanap Akngeyel ayerneyel, Onesiphorus renh arntarnt-araynteyew ikweren-hrnem-then. Ntwa iterl-areyelarl, ayengarl aneh Ephesus-itwew. Ran ayenh arntarnt-arenharl. Athan Akngeyel ayerneyel, ra athamerr-aynteyew Onesiphorus ikwer arlta ikwerel, Jesus rarl apey-alpeyenel.

## 2

*Jesus-wenh warrkenh mwerr-angker anaynteyew*

<sup>1</sup> Timothy nganap alerey atyenh inngapenyarl aneyel. Alakenh-anyem atha ngenh ileyel, rlterrkanterey nga anaynteyew. Jesus Christ-el ngenh rlterrkk mpwarem, rarl ngkweng athamerreyelarl. <sup>2</sup> Ntwan ayenh awenh, angka mwerr-angker Jesus-akert atharl akalty-anthenh akngerr-warl. Ntwanem angka yahanh ingwer-rnemew ilaynteyew. Mwerr-rnem rlwana, renh-rnemarl ingwer-rnemel kel iterl-areyel. Renh-rnem akalty-antha, rernemaw ingwer yanh-rnem-anem akalty-anthaynteyew.

<sup>3</sup> Ntwan iterl-areyel, Jesus Christ-wenharl ngan aneyel. Artwa ahawarr-apeny ngan aneyel ikwer, artwa army-areny-apeny. Artwa ahawarr-rnem pwarrkerrem, rernemap ipmelhey-angenharl, arrangkw. Rernemap pwarrk aneyelpey-angenh, aleth atwerrey-angker anayntem, ipmelhey-angenh. Ngan alakenh-anyem aneyew. Ingwer-rnemel ngenh Jesus-wenh arem, rernemap ngenh atwemarl. Ngan aneyew artewenty iterrey-angenh, ayengarl aneyel-apeny. <sup>4</sup> Ntwa iterl-areyelarl, artwa ahawarr nthakenh warrk ingwer-warl aylpey-angenh, rarl army-itwew aneyeleng-areyan. Ranap artwa ilkwa ikwerenhewant warrkerreyel, renh irrngerney-anthaynteyew. Kel alakenh-anyem Jesus ra ngkwengew-arteyp aneyel. Ngan awelh-aynteyew ikwer, ntwap ilek-ilek mpwaraynteyew, rarl ileyel-angkwarr.

<sup>5</sup> Atha ngenh ileyel angka ingwer-anem anterreyelarl-akert. Artwernem anterreyel ingkerrenh-antey iwerrel-antey. Rernemap iterl-areyel, arraty-angkwarr anterreyew, rwewarr. Nthakenh akwerterrp-angkwarr anterrey-angenh. Alakenh artwa anyentan anterrem arraty, ranap ingwer-rnem antengelemlar, rap inem ilengem mwerr-angker. Alakenh-anyeman ngap intem warrkerr-ayntem Jesus Christ-ew, arraty-antey alhayntem, rap ngkweng anthenh mwerr-angker.

<sup>6</sup> Artwa katenew-arteyp anem nga iterreyew. Ranap rlterrkk inngey warrkerr-aynteyew, ntang arrern-aynteyewan, amern lyapelhel-aynteyew. Amern yanh ampergeren, remerar arlkwm amern ingwer-rnemew-wety. <sup>7</sup> Aleth angka yanh-rnemew iterr-araynteyew, atharl pip nhenh-angkwarr ileyel. Akngeyel angka renh-rnem ngkweng anayntel-aynteyew.

<sup>8</sup> Timothy, nga iterr-aynteyew Jesus-ewant. Ranap Atyetyart David-wenh-anteyarl, awank-akerrarl aneh. Rernemap Jesus-an irrwernen, renhap atwew ipmew-antey. Akngeyelanap renh itetheleynew angkeparl. Athan angka nhenh ileyel-antey ingwer-rnemew. <sup>9</sup> Ingwer-rnemelan ayenh irrwernen, tyayl-warlap ayenh akwernewan. Ayenhap arlaw atherr arertnew tyeynel irryert-awarr-apeny. Nthakenh tyeynel rernem angka Akngey-wenhan arertney-angenh, arrangkw. Aleyan apmer arrpanenhel-warl ingwer-rnemel angka yahanh ilerl-apeyel.

<sup>10</sup> Alakenh-anyemap ayeng ipmelhey-angenh anaynteyew, rlterrkarl aynteyel-angkwarr atyeng. Ayengan inkwerelhemel aneyel tyaylel, akngerrelan angka mwerr-angker Jesus-akert aweyel-anteyarl. Yanh-rneman Akngeyel renh-rnem arrwekel-antey

rlwanew, rap renh-rnem arntarnt-arayntem intem-antey. Rernemap aney-alpem ikwer-itwel intem-antey, ilwey-angenh, arrangkw. <sup>11</sup> Angka nhenh-rneman iterl-araynteyew, anantherrarl apmelerr angkerremarl. Inngarlap rerneman.

Anantherr renh apententy, apmwewety ipmelhemel, ingwer-ingweran anantherr anayntem-anem ikwer-itwel.

Anantherr ilwew-apeny, Jesus rarl ilwew-apeny arwerl iylpeyl-atherrel, nthakenh anantherr apmwangkwarr aney-angenh-anem.

<sup>12</sup> Anantherr Jesus renh apententy, ingwer-rnemelan anenantherrenh irrwern-ayntemarl.

Anantherranap artewentyel iterrey-angenharl, ingwer-ingweran anantherr aney-alpemarl ikwer-itwel, atyetyart-rnem-then ingkerreh aney-alpem.

Anantherrarl apek angkem, "Atha renh iterl-arey-angenh," ingwer-ingweran ranem angkem, "Athan ngenh iterl-arey-angenh arrpemarl!"

<sup>13</sup> Anantherr apek intwemerlerrem ikwer-wety, ranap nthakenh anewantherr-wety intwemerlerrey-angenharl.

Ran mwerr aneyel intemarl, rarl ilew-angkwarr.

Ranap alakenh-anyem intem anayntem.

#### *Akney ranap ilkelheyel warrkenh nhelkwer-anyemew*

<sup>14</sup> Angka nhenh aleth-antey ilaynteyew tyaty-areny-rnemew apmer yanh-itwew Ephesus-itwew, rernem iylpelerrewerr. Rernemap nthakenh iterrey-angenh anaynteyew, angka ilek-ilek-they iterrey-angenh, arrangkw. Ingwer-rnemel awenty, rernemap intwemerlerrem-anemarl Akngey-wety. <sup>15</sup> Alakenh-anyem nga aleth-antey warrkerr-aynteyew. Mwerr-angkwarr akalty-anthey-angkerlap nga anaynteyewan. Akngey ranap ngkweng inkwerelh-ayntemarl. Ranap warrkenh nhelkwer-anyemew ilkelheyel. Aleth-antey angka mwerr-angker ilaynteyew nyererrey-angenhel. <sup>16</sup> Yanh-rnem angka apmwernemarl angkeyel-rnem, menty angkey-angenh ikwer-rnem. Rerneman akalty-antheyel angka apmwarl. Angka yanh-lkwerelan ingwer-rnem apatelheleyel, rernemap intwemerlerrem Akngey-wety. <sup>17</sup> Angka yanh rap tywen-apenyarl, arlkewarl arlpipmerrey-angkerarl, ipmew atwey-angker. Artwa yanh-atherr, Hymenaeus-then Philetus-then, ratherr tywen-apeny alakenh-anyem. <sup>18</sup> Awank-akerr ratherr Akngey apentenh arraty-angkwarr, aleyanap ratherr apmwangkwarr-anem apentyeyel. Alakenh ratherr akalty-antheyel: "Akngeyel kelarl awank itethelew akngerr ipmepenh. Anantherranap arrangkwarl. Anantherran iteth-antey aneyel ahern nhenh. Anantherr ilwenty, nthakenh Akngeyel anenhantherrenh itetheley-angenharl, arrangkw."

Alakenh ratherr akalty-antheyel, inngewenyarlap yanhan! Apmwel-ayeth ratherr akalty-antheyel. Ingwer-rneman awelheyel ikwer-atherr, rernemap iterrey-angenh-anem Akngeyew.

<sup>19</sup> Akngeyel angka ikwerenhl inngarl anewantherr anthew. Angka yanhan rlterrkarl apwert-apeny. Nthakenh ingwerentyel apwert yanh arnangeley-angenh. Akngeyel angka rlterrk atherr apwert yanh-warl ingkwernew. Angka anyent ingwerelan alakenh-anyem ileyel: "Akngeyelan kel iterl-areyel ikwerenhl-rnem." Angka ingwerelan alakenh-anyem ileyel: "Ingwerenty ra inweng anthelhem Akngey-warl, ranap intwemerlerremel apmwewety anaynteyew."

<sup>20</sup> Atha ngenh ilem angka ingwer-anem pety-angkwarr. Warl ilkwitwew ampwal ilek-ilek aynteyel. Ampwal ingwer-rneman mwerr-angker inngernemarl, man ilkwewantew-arelh – irrkwer nem gold-penh, spoon-rnem thilp-penh apek. Ampwal yanh-lkwer-nem-itwew amern mwerr-angker arlkwem. Ampwal ingwer-rneman arwerl-penharl, ingwer-rneman atn-thepenharl. Ampwal nhelkwer-rnemanap apmwamwamew-arelh-then arternngew-arelh-then. <sup>21</sup> Akngey-wenh-rnemanap alakenh irrkaty-antey arrpemarl. Anantherr apmelhem apmwewety, anantherrap anem mwerr-angker, ampwal gold-penh-apeny. Anantherrap ikwerenhl-rnem mwerr-angker impen-rnem anem. Akngeyelanap anenhantherrenh rlwanem, ikwer warrkerreyew. Anantherranap arraty-angkwarr anaynteyew, ranap anewantherr inkwerelhem-anem.

<sup>22</sup> Artwa akely-rnem arelh aleyak-rnem-then rerneman amentalr ikwer-rnem-wenh-angkwarrarl alheyl. Rerneman mpweny ayntew-aynteyel, ilek-ilek apmwel-ayeth mpwaremel. Timothy, nthakenh ngan alakenh alhey-angenh apmwangkwarr, nga intwemerlerreyew alakenh-anyem-wety. Arraty-angkwarr-antey alakenh anaynteyew mwerr-angkwarr, Akngey-angkwarr-antey intem ikwerewant iterremel, ingwer-rnemew mwerr-angkwarr ilkelhemel anaynteyew, ahelerrey-angenh ingwerentyew. Arternp

anaynteyew alakenh intem Akngeyarl apenteyel-rnem-itwel, Akngeyewant perayerremel, mwerr-angkwarrant. <sup>23</sup> Ingwer-rnemanap arwengk aneyel, nthakenh awelhey-angenh. Rernemap akwerrp-antey, arrangkwel aleth ilterreyel. Ikwer-rnem-wety menty anaynta! <sup>24</sup> Nga warrkenh Akngey-wenh, nthakenh ntwa ingwer-rnem-then iltey-angenh. Jesus-ew rlterrk iterr-aynteyew, ingwer-rnemelarl irrwerneyel-angkwarr. Mwerr-angkwarr nga anaynteyew, Akngey-wenh angkant ilayntemel ikwer-rnem. <sup>25-26</sup> Arrency ilkwa ra ingwer-rnem irrtywerremel ileyel. Ra renh-rnem ilperteleheyel, ikwer-angkwarr apent-aynteyew. Rernem ilterreyel arrangkwel. Akngey-wenh warrkenhelan mwerrantyel renh-rnem akalty-anthaynteyew, rernemarl ahelerreyel ikwer. Kel rernemap iterrem arraty-angkwarr apek, Akngeyarl ikwer-rnem arternp-antey angkeyel. Rernem apek amperrngerremel angkeperrem ikwer-warl.

### 3

*Jesus apey-alpeyew-alenty, akngerran intwemerlerreyen ikwer-wety*

<sup>1</sup> Timothy, nga angka ingwerew-anem iterr-aynteyew. Rlterrk-anem aneyen Akngey-wenh-rnemewan, Jesus apey-alpeyew-alentyan.

<sup>2</sup> Akngerranap ingwer-rnemew ilkelhey-angenh aneyen. Ament inkwerelhemel anerl-aneyen, ikwer-rnemewant iterr-aynteyen. Rernemap ilkelh-aynteyen man akngerrew ilek-ilek-thenew, nakelhemel inkwerelhemel anerl-aneyen, ingwer-rnem-wety arkarerremel. Akngerran angkerl-aneyen angka apmwel arrarletyel-then ingwer-rnemewarl. Rernemap ikwer-rnem-wenh-thenew awelhey-angenh, antwerraynerl-aneyen ikwer-rnem. Ingwer-rnemelan inerl-aneyen ilek-ilek ingkerrenh ingwer-rnem-wety, inkwerelhey-angenh-anemarl ikwer-rnemew. Rernemap antwerraynerl-aneyen ikwer-rnem. Rernemap awelhey-angenh Akngeyew, apmwangkwarr-antey alherl-aneyen. <sup>3</sup> Ingwer-rneman mwerr aney-angenh ingwer-rnemew. Atwerrenty-penh amperrngerrey-angenh, antwerraynerl-aneyen-antey. Rernemap alherl-aneyen tyel-angkaynteyew ingwer-rnemew. Rerneman iterrerl-aneyen-antey, apmwangkwarrant anaynteyew arrkent. Ahel-antey anerl-aneyen, ingwer-rnem atwaynteyew. Ilkelhey-angenh, mwerr-angkwarr anaynteyew. <sup>4</sup> Ingwer-rnemelan ikwer-rnem apelyt ahay-iwerl-aneyen ingwer-rnemew, renh-rnem atwaynteyew ipmew. Alhewer rernem ilek-ilek mpwarerl-aneyen, mwerranty-tangkwel iterrey-angenharl. Rernemap inkwerelherl-aneyen tyak, nakelherl-anemel-antey. Rerneman anerl-aneyen Akngeyew iterrey-angenh, arwa arrkentant alherl-aneyen, iterrey-angenh ingwer-rnemew. <sup>5</sup> Christian-rnem-arrpantey rerneman iterrerl-aneyen. Arrangkwarl, Akngey iterl-arey-angenharl. Inweng Mwerr-angker aney-angenh ikwer-rnem-itwew, arawerrng ikweren atnyeney-angenharl. Menty ikwer-rnem-itwew aney-angenh.

<sup>6-7</sup> Artwa weth-lkwer-rneman alherlewem warl arpanenh-warl, angka apmwa ilaynteyew arelh-rnemew. Arelh yanh-rneman nthakenh rlterrk iterrey-angenh, rerneman nyerrerreyelarl, awankarl apmwel-ayeth anenh. Rernemap intem apmwangkwarr aneyel, intem awelhemel angka apmwew-antey. Arelh rernem angka rlengkeny-angkwarrant aweyew, angka Jesus-akert iylpelerrewerrarl.

<sup>8</sup> Timothy, ntwa angka awankeny iterl-areyel artwa ilkwa atherr-akert, awank-akkerral Egypt-itwew anenh, itnanap Jannes-then Jambres-then? Ratherr atyetyart ilkwa Pharaoh artwerelew, Moses-el angka Akngey-wenharl ilenh-wety. Alakenh arrpemarl artwa weth-rnemelan aley ingwer-rnem artwereleyel, angka mwerr-angker Akngey-wenh awewerr. Irrtywerremel rernem ileyel apmwangkwarr, ilterreyel ingwer-rnem-them. Akngeyelanap renh-rnem irrenteyen. <sup>9</sup> Ingwer-ingweranap ingkerrenhel iterl-areyenh, rernemarl arwengk-rneman angkeyel. Ingwer-rnem ikwer-rnemew anerl-aneyen awelhey-angenh-anemarl.

*Akngey-wenh angkan aleth apent-aynteyew, ingwer-rnemelarl irrwerneyel-angkwarran*

<sup>10</sup> Timothy, ngan ingwer yanh-rnem-apeny-weny aneyel, apmwangkwarrarl akalty-antheyel-rnemarl. Ntwap iterl-areyel, angka atharl akalty-antheyelan, ayenganap aneyel arraty-angkwarrarl. Ntwap ayenh arenh, Akngeyewarl ayeng warrkerreh intem, ikwerant awelhemel. Ntwan ayenh arenh, arraty intemarl ayeng anenh. Ntwan ayenh arenh, warrk yanh atha iwerl-alhey-angenh-antey, rlterrkarl atyeng anenh-angkwarr. Aleth-antey ayengan warrkerreh, angka Akngey-wenh akalty-anthemel. Ntwap ayenh arenh, ayengarl inkwerelhenh ingwer-rnemewan, aleth-antey ikwer-rnem ilkelhemel.

<sup>11</sup> Ntwan iterl-areyelarl, ilek-ilek atyeng rlterrk anenh tawen irrpety yanh-rnem-itwew, Antioch, Iconium, Lystra-itwew. Artwa apmwer nemelan atyeng rlterrk inngay arrernenh, irrwampenh-anthemel innga. Akngeyelanap ayenh arntarnt-arenh intem, ayengap anenh iteth-antey. <sup>12</sup> Alakenhap ra apmelerr aynteyel Akngey-wenh-rnemew, rernemarl ikweren-h-angkwarr aneyel arraty-angkwarr, ikwerant iterremel. <sup>13</sup> Apmwa yanh-rnem anyelk-awarr-rnem, rernemarl irrtiywerremel ileyel, aleth-anteyap renem anem apmwel-ayeth. Ingwer-rnemelan irrtiywerremel arrpemarl ikwer-rnem-warl ilayntem.

<sup>14-15</sup> Timothy nganap alakenh-wenyarl. Ngan intemarl arraty-angkwarr anaynteyew. Ntwap iterl-areyel, ingwer-rnemelarl angka mwerr-angker ngenh anthew. Angka ranap inngarl, ntwan iterl-areyelarl. Ngarl akelyank anenhel, ngap angka ikwer akaltyerrenharl. Akngeyelan artwa angkakert-rneman ilenh, rernem ingkwern-aynteyew pip-warl awank-akerr. Awelhemel anaynteyew ikwer. Angka yanhelan ileyel, Akngeyel anenhantherrenh itethelem apmwewety. Anantherran iterl-araynteyew, Jesus-arl katy ilbew anewanther. Anantherrap intwemerlerreyew apmwewety, renhap ayern-ayntemel, anenhantherrenh arratyel-aynteyew. <sup>16</sup> Akngey ra ament-antey angka ilek-ilek ilew pip ikwerenh-itwew. Awank-akerr ra artwa angkakert-rnem ilenh, angka ikwerenh ingkwern-aynteyew pip-warl. Angka ikweren-h-angkwarran ran anenhantherrenh akalty-antheyel, arraty-angkwarr anaynteyew. Angka yanh-angkwarr rap anenhantherrenh ilteyelarl, anantherrarl apmwangkwarr-anem aneyel. Angka yanh-angkwarr ra anenhantherrenh arratyeleyel, anantherrap anerl-aneyen rapeny-anem. <sup>17</sup> Alakenh-anyemap ra ikweren-h-rneman anenhantherrenh akalty-antheyel, anantherrap mwerr-angkwarr-anem warrkerreyew ikwer. Rap anenhantherrenh ilem, anantherrap awelheyew mwerr-angkwarr.

## 4

<sup>1</sup> Timothy, iyelpelerrey-angenh-antey angka nhenhew: Jesus ran inngarl apey-alpeyenh ahern nhenh-warl. Ranap aneyel atyetyart ilkwarl, rarl ingkerrenh ayernerl-aneyen ikweren-h-angkwarr. Alakenh-anyemarl ingkerrenhel iterl-areyeh, rernemarl arraty-angkwarr anenh, arrangkw apek. Iteth-rnem-then ipmepenh-rnem-then ra ayernerl-aneyen. Ntwan kel iterl-areyel. Alakenh-anyem atha ngenh rlterrk-antey ileyel, Akngeyel-then Jesus-el-then aveyel-wety: <sup>2</sup> aleth-antey angka Akngey-wenh ilaynteyew. Ingwer-rnem apek ngkweng awelhem, arrangkw apek. Arwa aleth-antey ilaynteyew. Ntwa apek ingwer-rnem arem, apmwangkwarrarl alheyel, ila renh-rnem arternp-antey alakenh: "Arrantherran apmwangkwarr-antey alheyel." Renh-rnem akaltyeleyew mwerrantyel-antey, nyerrel-anthey-angenh. <sup>3</sup> Ingwer-ingwer apek rernem awelhey-angenharl ngkweng. Ra aynteyenh alakenh-anyem: angka Akngey-wenh-wetyan akngerr arlkarerreyenharl. Rerneman artwa apmwer nemewant awelherl-aneyen, angka apmwewarl akalty-antheyel-rnemewant. Angka nhenh-lkwerew rernem ilkelheyen awelh-aynteyew. Artwa yanh-rnemelan alakenh-anyem akalty-antheyen-ayntem. <sup>4</sup> Rernemap iylpa akentelhemarl, angka arraty awewerr. Rernemanap ilkelheyen, angka apmwewant awelh-aynteyew, arraty-angkwarr-weny.

<sup>5</sup> Nganap aley ikwer-rnem-apeny-wenyarl. Aleth iterr-aynteyew arraty-angkwarr. Ingwer-rnemelarl irrwernem-angkwarr, aleth rlterrk-antey anaynteyew. Ingwer-rnemel ngenh irrwernenty, ngan artewenty iterrey-angenharl. Aleth ileyn-aynteyew angka mwerr-angker Jesus-akert. Akngeyelan ngenh anthew warrk ilkwa, kel nga warrkerreyew ywerrelheleyew-atety.

<sup>6</sup> Ayengan artwamp-anemerrew, ayengap ingwer-ingwer ilweyenh-anem. Ntwan iterlarl-areyel, artwa ingkart-rnemelarl aker rwewarl ampernemel anthenh Akngey-warl. Alakenh-anyeman ayeng-anem anthenhem ikwer-warl. <sup>7</sup> Ayengan warrker-renh artewenteyel Akngeyew. Warrk yanh rarl anthew, ayeng warrkerreyel-antey, ipmelheyew-atety. Aleyan ayeng Akngeyew iterreyel-antey. <sup>8</sup> Aleyan ayeng arternp-antey mpwelheyel ikwer, rarl apey-alpeyenhew. Arta yanhel rarl apey-alpeyehel, ra ingkerrenh ayernerl-aneyen arraty-angkwarr. Rap atyeng antheyen mwerr-angker, ayengarl ipmelhey-angenh anenhew. Ingwer-rnemarl mpwelhenh-rnemew ikwer, rap ikwer-rnem antheyen mwerr-angker arrpemarl.

*Paul angkeyel Timothy-ew, "Apetyeyew atyeng-warl."*

<sup>9-12</sup> Timothy, anamerl atyeng-warl apetya. John Mark akngetya ngkweng-angkwarr. Ran mwerrarl, ra atyeng-angkwarr warrkerreyew. Akngerr atyenh-rnem rernem alpew

apmer ingwer-rnem-warl. Demas ran ilkelheyel, arrkenterr-aynteyew ilek-ilek aknger-rel. Rap arlkarrerrew, ayeng-wety anewerr, ayenh iwerl-alhemel, apmer Thessalonica-warl-anem alpew. Crescens ra apmer Galatia-warlarl alpew, Titus-an alpew apmer Dalmatia-warlarl. Tychicus-an atha thwenew apmer Ephesus-warl ngkweng-warl pip nhenh-akert. Aleyan Luke-ant-anem atyeng-itwew aneyel Rome nhenh-itwew. INSERT MAP? <sup>13</sup> Ngarl apetyem apekan, ngap alhem apmer yanh-angkwarz Troas-angkwarz. Athan apmer yanh-itwew panty atyenh iwerl-alhew artwa Carpus-itwew. Ntwa panty akngetya atyeng-warl. Pwek atyenh-rnem-then akngetya. Nga iylpelerrey-angenh-antey pwek nanikwet yenp-penh yanh-rnemew, ntwa akngetyarl, impen-antey.

<sup>14</sup> Ntwa renh iterl-areyel artwa yanh Alexander? Ran ilek-ilek mpwarey-angkerarl ayen-penh. Ra ayenh irrwernenh. Menty renh tyarlewem, Akngeyant awakelheyew ikwer. <sup>15</sup> Mwarranty-antey ikwer-wety arntarnt-arelheyew, ra ngenh-then irrwernewerr. Ra anenhantherrenh aleth iltenh, anantherrarl angka mwerr-angker ilenh-wety. Ran arrkernalhenh, anenhantherrenh arternp artwereleyew.

<sup>16</sup> Ayengarl court-itwew rtnenheng-arey, rerneman ayenh ayntarrp-ilenh. Ingwerenty apekarl, atyeng-they angkey-angenh. Rerneman ingkerr-antey anterrew aterel. Kel mwerraw. Athan Akngeyay ayerneyel, rernem menty aneyew, ikwer-rnem awakelhey-angenh.

<sup>17</sup> Akngeyelan yanh-antey atyeng-itwew arrer-antey anenh court-itwew. Artwa court-ew-arteylelan ikwerenh-rnem ilanthey-angenharl, ayenh layen-rnem-warl antheyewan. Akngeyelan ayenh intem arntarnt-arenh, ayeng rlterkerreyew-atety. Rap ayenh alpemelenh, angka mwerr-angker Jesus-akert ilaynteyew apmer ikwer-areny-rnem-warl. Rerneman Jew-wenyarl, rernemap Akngey iterl-arey-angenh. <sup>18</sup> Akngeyelan ayenh intemarl arntarnt-arayntem, ingwer-rnem apmwangkwarz atyeng tyel-angkerl-newerr. Rernem ayenh atwem, kel mwerr. Akngeyelan ayenh akngeynem irrwerl, ikwer-itwel aney-alpeyew intem-antey. Ran aneyel ilkwa aleth-antey. Aley ingkerrenhel renhant nakemel anaynteyew. Inngarlap ran.

#### *Kel angka nhenh ywerrelhelem-anem*

<sup>19</sup> Arelh Priscilla-warl “Hallo” katy angka atyeng, artwa anewikw-warl-then Aquila-warl. Artwa Onesiphorus-warl “Hallo” katy angka atyeng, ikwerenh-rnemew-then. <sup>20</sup> Artwa Erastus apmer Corinth-el ingkernarl arteny aneyel. Artwa ingweran Trophimus atha iwerlerlpew apmer Miletus-itwewarl, arntetyerrewarlarl. <sup>21</sup> Timothy nga arrker-nelha, anamerl apetyeyew nhenh-warl, alyangkw irrewerr-anem. Ingwer-rnemel Jesus-arl apentyeyel-rnem apmer nhenh-itwew, rernem “Hallo” ngkweng angkeyel. Artwernem Eubulus, Pudens Linus-then rernem “Hallo” angkeyel, arelh Claudia-then. <sup>22</sup> Timothy, ayeng perayerreyel Jesus-warl alakenh-anyem, “Jesus, ngan anaynteyew Timothy-itwew. Ngan athamerr-aynteyew ikwer, ikwerenh-rnemew-then.”

Kel-antey.

## Titus

*Akwerlp kwaty alay ampepel, apmer itnan Crete. Artwa ingwer itnan Titus apmer Crete-areny anen. Paul-el pip thwenek Titus-warl, ingkart arrernetyek apmer ikwer-arenyrnem, rernem angka Akngey-kenh arrayt-angkwarr apentetyek.*

<sup>1</sup> Ayeng Paul Akngey-kenh warrkenh, Jesus Christ-kenh angkakert. Atha Akngey-kenh angka arrayt akalty-antheteyek, rernem Ingkart-angkwarr arrayt innga apenterl-ayntetyek, iterl-arayntetyek. <sup>2</sup> Awank-akerr Akngeyel arrwekel anwenhantherr alhelek, ingkerrenh itethiletyek, anwantherr intem-antey iteth anayntetyek. Akngeyel ileyl innga, irrtwyerremel iley-angenh. <sup>3</sup> Akngeyel angka anwekantherr arrwekel arrernekk, anwantherr renh iterl-aretyek arrayt innga. Aley anwantherr-anem Akngey-kenh angka iterl-aretyek innga. Akngeyel ayenlh anlanthek, atha arrenhantherr ingkerrenh angka mwerr-angker akalty-antheteyek. <sup>4</sup> Titus, athan pip nhenh ngkweng-warl thwemen. Ingkart-areny arrpemarl ngan, ayeng-apeny. Aylanth Akngey anyent tnakeyelar, ikwerant inkwrelheyelar. Ingkart Akngeyel ngenh arntarnt-arem, atnyenem Jesus Christ-el-then, nga mwerr-angkwarr anetyek Christ Jesus-angkwarr.

*Titus-el ingkart-rnem rkernetyek*

<sup>5</sup> Apmer Crete-itwek atha ngenh iwerl-alhek, ntwa warrk ngkwenh ywerrelhileyek, ingkart-rnem-anem rkerneynetyek, rernem tawen arrpanenhel warrkirk-ayntetyek. <sup>6</sup> Rernem mwerr-angkwarr anetyek ingkerrenh, ampernem-then ingkerrenh. Rernem anew ikwer-rnem-kenh-akert anayntetyek Ingkart-kenh-angkwarr-antey. Ampernem apmwangkwarr apentey-angenh anetyek, ingwerl-rnem nthakenh ayntarrp-ilemel iley-angenh anayntetyek.

<sup>7</sup> Artwa tyat-areny Ingkart-kenh atyetyart rernem ayntarrp-ilemel iley-angenh anayntetyek, Akngey-kenh angkant rernem ilayntetyek, ahelirrey-angenh anayntetyek, tnakelhey-angenh anayntetyek, man anyelkel iney-angenh ingwer-rnem-kenh. <sup>8</sup> Rernem mwerr-angkwarr anayntetyek, ingwer-rnem-akert, renh-rnem arntarnt-aretyek ingkerrenh, angka mwerr nhiek inkwrelhemel awelhetyek. Rernem ikwa arrayt-angkwarrant itengirretyek, apmwangkwarr apentey-angenh. <sup>9</sup> Rernem angka arraytant apentayntetyek, ingwer-rnemek awelhey-angenh, rernem ingwer-rnem angka arrayt-angthayntetyek, ingwer-rnem rernem ilpertelhilerl-anekerr Akngey-kenh angkekety.

<sup>10</sup> Ingwer-rnemel Jew-rnem-angkwarr apenteyel-rnem rernem apmwangkwarr akalty-antheteyel. <sup>11</sup> Rernem manekant iterreyel, Rernem alakenh akalty-antheteyel, ingwerel-rnem renh-rnem man anthayntetyek. Arrantherr renh-rnem artwerileyek, rernem apmwangkwarr akalty-antheteyel-kety. <sup>12</sup> Awank-akerr artwa apmer Crete-areny anyent, artwa tyak ra angkek, "Crete-areny-rnem irrtwyerremel iley-angker-rnem. Rernem ankety, warkirrey-angenh-anem, atnwenth ateralth-rnem-apeny. Rernem apmwangkwarr mpwareyel."

<sup>13</sup> Angka nhenh arrayt inngarl aynteyel. Ntwa Ingkart-areny-rnem artewentyel akalty-anthayntetyek, Akngey-kenh angkek, arrayt innga, rernem Akngey-angkwarr arrayt anetyek. <sup>14</sup> Renh-rnem ilay, Jew-rnem-kenh angkek awelhey-angenh anetyek. Angka ilenan rernemarrp mpwarek arrayt-wenyarl. Angka Jesus-akert arraytekant awelh-aynterh-arey.

<sup>15</sup> Rernem apmwangkwarr akalty-antheteyel. Amern-then aker-then alhewer arlkwetyek, mwerr-angkwarr apenterl-ayntetyek. Amern-then aker-then arlkwemel, nthakenh Akngey-angkwarr apmwelhiley-angenh. <sup>16</sup> Rerneman ilelhem, rernem Akngeyek akalty-arrpanteyarl. Anantherr areyel, rernemarl apmwangkwarr apenteyel arrayt-angkwarr-arrpantey, rernem Akngeyek akwerrp inngarl aneyel. Rernem Akngeyek awelhey-angenh. Rernem mwerr-angkwarr Akngeyek lwewarrernelhey-angenh.

## 2

*Titus-el Ingkart-areny-rnem ingkerrenh akalty-antheteyek*

<sup>1</sup> Titus-ay, arrayt-angkwarr ntwa akalty-anthayntetyek angka Jesus-akert. <sup>2</sup> Artwa ampwernem ingkerrenh ilay, wayn akngerr antywey-angenh, rernem iylpareth anayntetyek, Akngey-kenh-angkwarr, rernem arrayt-angkwarr apenterl-ayntetyek ipmelhey-angenh. <sup>3</sup> Arelh ampwernem ilay, rernem mwerr-angkwarr anayntetyek, Ingkartek intem-antey iterrel-ayntetyek, rernem angka ingwerek iley-angenh anayntetyek, rernem ngkwarl wayn akngerrek artewentyel inkwrelhey-angenh anayntetyek. <sup>4-5</sup> Rernem arelh-rnem arrayt-angkwarr akalty-anthayntetyek, rernem mwerr

itterretyek, rernem anew ikwer-rnem-kenhek inkwerelhemel awelhetyek, ampa ikwer-rnem-kenhek inkwerelhetyek, arraty-angkwarr itengirretyek, warl ikwer-rnem-kenh arntarnt-aretyek, anew ikwer-rnem-kenhek awelhetyek. Rernem alakenh arraty apententy, ingwer-rnemel kel renh-rnem arraty-angkwarr tnakem, Akngey-kenh angkek irrpelthirrey-angenh anetyek.

<sup>6</sup> Artwa anthety-rnem ilay, rernem arternpel ilayntetyek, arraty-angkwarr apenterl-ayntetyek. <sup>7</sup> Nga mwerr-angkwarr anenty, ingwer-rnem ngenh mwerr-angkwarr apenterl-ayntetyek. Ntwa ngkwenh-rnem arraty-angkwarr akalty-anthetyek, rernem arraty-angkwarr ngenh apenterl-ayntetyek arrpemarl. <sup>8</sup> Angka mwerr-angkwarr angkaynta ingwer-rnemek, angka apmwangkwarr angkey-angenh, apmwernemel ngenh ywarn ayntarrp-ilekerr, apmwangkwarr ntwa akalty-antherl-anenty-arrpantey. <sup>9</sup> Artwa warrkenh-rnem akalty-anthay, rernem atyetyart-rnemek awelh-ayntetyek, ikwer-rnem angkep angkeyney-angenh.

<sup>10</sup> Anyelkel ikwer-rnem-they iney-angenh, mwerr-angkwarr anayntetyek. Rernem mwerr-angkwarr apententy, ingwer-rnem rernemap iterl-arem-anem Akngey-kenh angka renh, "Arraty inngarl nhel-rneman apenteyel." <sup>11</sup> Akngey ingkerrenhek inkwerelheyel, rap ahern-areny ingkerrenh itethileyetek. <sup>12</sup> Ra anwenhantherr akalty-anthek, anwantherr apmwekety ipmelhetyek arraty-angkwarr, mwerr-angkwarr, ahern nhel anetyek. <sup>13</sup> Anwantherr iterl-areyel, anwantherr ingkerrenh alerl-antey ikwer mpwelheyel, rarl rlterrk ilkwakert apey-alpeyenhek, Jesus Christ, itethiley-angker ilkwa anwekantherrenh. <sup>14</sup> Ran katy ilwek anwekantherr, anwenhantherr apmwekety itethileyetek. Ra anwekantherr ilkelhek, anwantherr ikwerenhr-nem anayntetyek, ikwerenhr-angkwarr arraty apent-ayntetyek.

<sup>15</sup> Ingwer-rnem arraty-angkwarr akalty-anthetyek ywerreyek-atwety. Renh-rnem ilay, mwerr-angkwarr rernem anetyek rlterrk, rernem arntarnt-arelh-ayntetyek. Ingwer akengenty angkenty, ikwer arrkngert angketyek, artwerileyetek. Nyerirrey-angenh renh-rnem ilay, arraty-angkwarr!

### 3

#### *Mwerr-angkwarr apentetyek*

<sup>1</sup> Ntwa renh-rnem akalty-antha, rernem atyetyart ilkwernemek inkwerelhemel iylpareth awelh-ayntetyek. <sup>2</sup> Rernem mwerrant-arey ingkerrenh anayntetyek, ilterrey-angenh. <sup>3</sup> Awank anwantherr apmwangkwarr anenh. Ampwal ingwer-kenh-they anwantherr alharlkwerrenh. Anwantherr artwerrety anenh, ingwer-rnem-kety arlkarir-renh, ingwer-rnem anwekantherrety arlkarirrenh arrpemarl. <sup>4-6</sup> Ikwer-theyan Akngeyel Jesus renh thwenek anwekantherr-warl, anwenhantherr itethileyetek, anwantherr arraty Akngey-angkwarr anayntetyek anwekantherrenh-angkwarr-weny, ikwerenhr-angkwarrant anwantherr anayntetyek. Anwekantherr-angkwarr nthakenh anwantherr iteth intem-antey aney-angenh. Ran anwenhantherr arntarnt-arenh. Ingkart Akngeyel Itnweng renh thwenek, Jesus-angkwarr, anwenhantherr lyertenileyetek, anwantherr iteth intem-antey anayntetyek. <sup>7</sup> Akngeyel anwenhantherr atnyeneyel ipmelhey-angnenhel, anwantherr arraty Akngey-angkwarr anayntetyek, anwantherr iterl-aretyek anwantherr ikwer-itwek intem-antey aney-alpetyek. <sup>8</sup> Angka nenh arraty inngarl aynteyel. Ayeng ilkelheyel ntwa angka nenh rlterrk innga akalty-anthayntetyek, Jesus-arl tnakeyel-rnem rernem mwerr-angkwarr apentetyek, ingwer-rnem arntarnt-aretyek. Angka nenh rlterrk innga athan ileyel, impen-angkwarr. <sup>9</sup> Arrwekeleeny-rnem-kenh angkethay ilterrey-angenh anayntetyek, Jew-rnem-kenh-they, amentirretyek Jew ikwer-rnem-they. <sup>10-11</sup> Ahel iltey-angker-rnem rernem apmwangkwarrarl ilterreyel, ahel atwerrerl-ayntetyekantarl. Alakenh-angkwarrarl rernem apmwelhileyel. Renh-rnem artwerileyetek, "Ahel ilterrey-angenh, anwantherr anetyek mwerrant-arey." Rernem ngkweng awelhey-angenh irrpelthirremel, ntwap renh-rnem ileyek arrpemarl anyent-ingr-antey. Ikwer-theyan ament-anem ikwer-rnem-kety anayntetyek.

<sup>12</sup> Atha artwa Artemas, artwa Tychicus apek ngkweng-warl thwenem. Apetyay, ayenh rlwatetyek apmer Nicopolis-itwek. Ayeng ilenhel ngwang aneyenh alyangkwk-ky. <sup>13</sup> Zenas court-areny-then Apollos-atherr renh-atherr ntwa arntarnt-araynta, ampwal ilek-ilek renh-atherr antha, rernem Akngey-kenh angka ilerl-apayntetyek. <sup>14</sup> Ingkerrenh mwerr-angkwarr aleth akaltyirretyek, ingwer-rnem arntarnt-arayntetyek, rernem apatemet anerl-anekek. <sup>15</sup> Atyeng-angkwarr aneyel-rnem, rernem ngkweng inkwerelheyel. Apmer-areny ilenhr-nem-warl Jesus renharl tnakeyel-rnemek ntwa angka mwerr-angkwarr iley-alha.

Akngeyel arrenhantherr mwantyel arntarnt-arem.

**Pip James-wenh**  
**James-el pip nhenh ingkwernew,**  
**Akngey-wenh-rnem-warl-anem thwenew apmer**  
**arrpanenh-warl**  
**Angka nhenhan alakenh aynteyel**

Artwa anyent James ra ingkwernew angka nhenh pip-warl. Ranap Jesus-wenh ayteiykwarl apek, ingwer apek. Iterl-arey-angenh-antey. Jesus-wenh ayteiykw ra amentewarl-tangkwel anen. Jesus-arl ipmethyl itetherrew, Aynikw ikwerenh-warl alpew irrwerl-warl, James rap Christian-anem irrew. Ikwer-penhan James tyatyew-artej anen tawen Jerusalem-itwew. Jew ingwer-rneman apmer arrpanenh-arenj Christian irrew arrpemarl. Ra apek thwenew pip nhenh ikwer-rnem-warl.

James-el rap akalty-anthenh alakenh renh-rnem pip-angkwarr: “Nga Christian anem, ntwap Akngeyant-anem apentemer, ingwer-rnemel areyew. Nga apek apwert-weny, artewenty iterrey-angenh. Ingwerentyl apek rlterrk mpwarem ngkweng, ipmelhey-angenh. Anamerl-antey ahelerrey-angenh. Mwerr mpwaraynta ingwer-rnemew. Ingwer-rnemew tyel-angkey-angenh. Akngeyan ayerna, ngenh akalty-anthaynteyew, arraty iterr-aynteyew. Angkeppera arrenty ilkwewenh iwerr-wety. Nakelhey-angenh. Akngeyant ayern-aynta ingwer-rnemew.”

Alakenh-anyem James-el akalty-anthenh.

<sup>1</sup> Atha James-el pip nhenh ingkwerneyel. Ayengan Akngeyew warrkerreyel Jesus Christ-ew-then. Atha pip nhenhan thweneyel arrewantherr ingkerr-warl Akngey-wenh-rnem-warl, apmer arleng-arenj-rnem-warl-then.

*Rlterrk ayntentyng-arey, inkwerelhemelant intem anenheyew*

<sup>2-3</sup> Atyen-hrnem Christian-rnem, angka nhew iterr-ayntenh-arey. Arrantherran inkwerelhemelant anemer, apmwarl ayntemeng-arey. Ingwer-rnemel arrkernemeng-arey arrenhantherrenh, Akngeyewantp anyentew iterr-ayntenh-arey. Alakenh-angkwarr arrantherr rlterkerrem, ipmelhey-angenh-anemarl. <sup>4</sup> Ya, intem renh aptenty arrantherr, arrantherrap inngarl arratyerrem, rlterkerrem Jesus-apeny.

<sup>5</sup> Christian anyent apatemu iterrem apek, “Akngey-wenh-angkwarran atha iterl-arey-angenharl. Nthakenh irrem ayeng?” Ra Akngey ayernemer, renh akalty-antheyew. Akngeyel mwerr-angker anthey-angker, nthakenh menty awey-angenh. <sup>6</sup> Anyentel renh ayerneyew arraty-angkwarr, irrpeltherrey-angenhel. Raw alakenh iterreyew, “Ya, Akngeyelan inngarl ayen alpemeley-angker.” Nthakenh ra atherr-angkwarr iterremel ayerney-angenh, “Akngey atyeng awelhey-angenh apek.” Ra iterrenty atherr-angkwarr, ranap kwatyal alperr irrwerlap-anentyapenyarl, arwarl irrwerlap-aneyelarl.

<sup>7-8</sup> Alakenhanap ra rlterrk-weny-anteyarl. Akngeyelanap nthakenh anthey-angenharl, alakenh-anyem ayernentyan. Nthakenh renh akalty-anthey-angenh, arrangkw.

*Apwert akngerr angwarey-angenh*

<sup>9</sup> Christian anyent arrangkw apek apwert-weny anem. Ra iterl-aremer, Akngeyarl ikwer artewentyel ilkelheyel. Alakenh iterl-aremel ra inkwerelhemel anem. <sup>10</sup> Christian ingwerelan apwert akngerr apek atnyenem. Nthakenh ra tangkemel apwert-akert aney-angenh. Ra iterl-aremer arrpemarl, Akngeyarl ikwer-them artewentyel ilkelheyel. Alakenh iterl-aremel ra inkwerelhemel anemer arrpemarl. Artwa apwert akngerr-akert ra pretty-apeny, ahernelarl rtneyel-apeny. <sup>11</sup> Aherretylelan ingkeny tyerrelhenhey-alhem, rwenp-anem irrem. Ingkenyel ampernem pretty renh, rap arleny-anem irrem, aytnem-anem. Alakenh-anyem artwa apwert akngerr-akert rap atnengkanerrem-anem, apal-antey apwertewant inkwerelherl-anenty. Ilek-ilek mwerr-angker ikwerenh arrangkwerryelpem pretty yanh-apeny.

*Rlterrkarl ayntemeng-arey*

<sup>12</sup> Ingwer-rnemel arrenhantherenh irrwer nem, awelhey-angenh ikwer-rnem. Rlterrkarl-antey Akngeyan apent-aynteyew, rap inkwerelhemarl arrewantherr. Rap alngeyem, ikwer-itwel aney-alpeyew intem-antey. Rap alakenh-anyemarl aynteyel ikwerarl ilkelheyel-rnemewan.

<sup>13</sup> Anyent apek iterrem apmwel-ayeth-angkwarr. Nthakenh ra alakenh angkey-angenh, “Akngeyan ilkelheyel, ayeng apmwel-ayeth iterreyew.” Arrangkw alakenhan!

Akngeyan alakenh ilkelhey-angenharl. Anyentel Akngey renh nthakenh arrkerney-angen, apmwel-ayeth mpwareyew. <sup>14</sup> Anyent iterrenty, ikwerenharrp-angkwarr alheyew, rap apmwelhelemarl. Ament-antey ra ilkelhem, apmwangkwarr alheyew. Alakenh iterremel-antey ra angkeperrem Akngey-wety, rap irrwernelhem ament-antey. <sup>15</sup> Ra iterrem, ikwerenharrp-angkwarr alheyew, rap anamerl-antey apmwa mpwarem. Rap apmwelhelem innaganem, nthakenh ipmelhey-angen-anem. Akngeyelap renh ilteyeh arlta anyent ikwerel, ingkerrarl ra ayerneyenheng-arey. Rap renh irrenteyen intem-antey.

#### *Akngeyel anthem mwerr-angker*

<sup>16</sup> Atyenhr-nem, mwanty awelhenh-arey angka nhenhew, arrantherr apmwangkwarr-anem alhewerr. <sup>17</sup> Ilek-ilek mwerr-angker anantherr arem ahern nhenh-itwew. Akngeyel rarl anyentel mpwarew, rarl anthew anewanther. Ra mpwarew ingkeny, alkent, antyarr-akerr. Rernemap ingwer-anem irrem itwernew-then kwenyel-then. Akngey ran nthakenh ingwererrey-angen, arrangkw. Irrkaty intem ra aneyel. <sup>18</sup> Angka arraty ikweren hlew anewanther, anenhantherrenh-tangkwel ayerrpelemel, ikweren-anem aneyew. Angka nhenhel iteth atnyenem intem-antey. Anantherran impen ikwerenharl. Ilek-ilek ingwer-rneman ra mpwarew anantherr-apeny-wenyarl.

#### *Angka Akngey-wenhew awelh-aynteyew*

<sup>19</sup> Atyenhr-nem, mwanty awelhenh-arey, atharl akalty-antheyel-angkwarr. Ingwerarl angkeyelew, arternp-tangkwel awelheyew ikwer. Anamerl-antey rwenperremel angkey-angen. Alakenh-weny. <sup>20</sup> Artwa ahelegenkwan nthakenh arraty aney-angen Akngey-warl-ilwengk. <sup>21</sup> Rap ipmelhemer apmwewety-tangkwel, raw Akngeyew-anem warrkerreyew. Arrantherr apmwel-ayeth-tangkwel anem. Aleyan arrantherr ingwer-rnem-apeny-weny anemarl, Akngey apentye-angenr-nem-apeny-weny. Angkarl ra arrewanther anthew, intem-antey itetheleyew. Nthakenh arrantherr apmwel-ayeth iterrey-angen, arrangkw-anem.

<sup>22</sup> Arrantherran angka Akngey-wenhew awelh-aynteyew. Arrkentant iylpelant avey-angen. Intem-antey mpwaraynteyew, rarl akalty-antheyel-angkwarr. <sup>23-24</sup> Ingwerel apek awem angka ikweren, arwarlap ra aweman. Ranap glass-itwewarl inngerr arelheyel-apeny, rap iylpelerremel-anem anperl-alhem inngerr ikwerenhew. Alakenh arrantherr nthakenh arrkentant angka avey-angen, iylpelerrewerr angka ikwer. <sup>25</sup> Angka yanh mwerr-angker inngar! Ra akalty-antheyel, Akngeyel rarl apmwewety irralkew. Anantherr inkwerelhemel ikwer awelhem inteman iylpelerrey-angen, Akngeyelana inngar! anenhantherrenh irrngerney-anthem. <sup>26</sup> Anyentan alakenh iterrem, "Ayengan Christian inngar!, Akngeyantarl apentyeyelar!" Angka apmwel apek ra item. Apmwel-ayeth apek ra angkem ingwer-rnemew. Ranap mwerr-arrpantey nakelhem ament-antey. Akngeyarl ra apentyel-arrpantey. <sup>27</sup> Christian innagan ingwer-rnemew athamerrem. Ampa alhamp-rnem ra arntarnt-arem arelh inpert-rnem-then, rlterrkarl ayntemeng-arey. Ingwerentyel renh arrkernem, apmwangkwarr alheyew, rap mentyarl rlterrkaw awem, angkeperrey-angenhel.

## 2

#### *Akngey-angkwarran anyent-anteyarl aneyel ingkerrenh*

<sup>1</sup> Atyenhr-nem, anantherr ingkerrenh Jesus Christ apentyeyel-rnemarl. Rlterrkarpal ran ingwer-rnem-angkwarran, irrkaty-angkwarr arrpemarl ra ingkerrenhew ilkelhem. Alakenh arrantherr lipwel ingkerrenh anaynteyew, ilkelhemel mwarrant-arey. Angka nhenhew awelhenh-arey, arrantherraw iterl-areyew. <sup>2-3</sup> Arrantherrarl tyaty-warl akarrerrem, alethang atherr apek apetyem arrewanther-warl. Anyent apekan arnkwa rlengkeny-akert, ilyew-arelh-then gold-penh-akert. Ingwerentyel renh arem iterremel, "Nhayman apwert akngerrew-arteyle!" Rap alakenh ikwer angkem, "Nga apetya, atyeng-itwel aneyew!" Alethang ingweran arnkwa apmwakert apekarl, ilterrelhewel-akertarl. Ingwerentyel renh arem iterremel, "Nhayman apmwarl!" Ikwer ampermeng-weny alakenh angkem, "Nhak alhaw, arleng aneyew!" <sup>4</sup> Apmwel-ayeth inngarlap alakenhan. Arnkwa rlengkeny-akertant ra arntarnt-areman. Irrepern ingwer-wetyan ra arlkarerremarl. Arrantherr anerl-anemerey anyent-antey ingkerrenh arraty-angkwarr.

<sup>5</sup> Ya, atyenh-rnemay! Arternp awelhenh-arey, atharl akalty-antheyel-angkwarr. Akngerrel arem artwa irrepern yanh-apeny-rnem, rernemap athamerrey-angenh ikwer-rnem. Akngeyanap ikwer-rnem ilkelhem artewentyelarl. Yanh-lkwer-rneman ra ayerrpelem. Rernemant iterrem ikwer rlterrk, ipmelhey-angen. Rernemap aney-alpem ikwer-itwel. Rernemantarl artewenty ilkelheyel ikwer. Ra renh-rnem arntarnt-arem

intem-antey. <sup>6-7</sup> Arrantherranap apmwel-ayeth ikwer-rnem angkem, apmwa antwemel. Ingwer-rnemewant arrantherr mpwarem mwerran, apwert-akert-rnemewant. Ilkekwarl alakenhan? Artwa yanh-lkwerelap arrenhantherrenh irrwernemarl. Court-emeleyew arrenhantherrenh, irrywerremel ayntarrp-ilemel. Rernemap Jesus-anem arkentelhelem. Alakenh irrem apwert akngerr-akert-rneman Akngey-wenh-rnemewan.

<sup>8</sup> Alakenharl Akngeyelan ilantheyel angka ikwerenh-angkwarr: "Ilkelh-aynteyew ingwer-rnem arntarnt-areml, ngarl ament arntarnt-arelhem-apeny." Arrantherrarl angka nhenh awem, arrantherrap arrayt anem. <sup>9</sup> Arrewantherr-wenh-rnemelat arrantherr anerl-aneman inkwerelhemel, ingwer-rnem apekan amperelerl-anemarl. Alakenh irrentyan, Akngeyanap arrantherr arrayt apentey-angenharl. <sup>10</sup> Angka ingwerek-ingwer aynteyel Akngey-wenh pipel. Anyent apekan iylpelerrem angka anyentew, ranap mwanty awelhey-angenharl. Anyent-inger apek ra apmwelhelem. Kel ingwerenty apek-anem angka ingkerrew-anteyarl iylpelerrem, ranap artewenty arrpemarl awelhey-angenharl. Akngerr-inger apek ra apmwelhelem. Akngeyelanart artwa renh-atherr areyel irrkaty-angkwarr anayntarl. Rap renh-atherr court-emelem irrkaty-angkwarr. <sup>11</sup> Angka nhenhew-anem awelhenh-arey. Artwa anyentel apek akelty artwa ingwer-wenh irrytvert-inem. Rap iterrem alakenh, "Mwerrarl ayengan. Ingwerenty atha ipmew atwey-angenharl." Akngeyanap ikwer angkem, "Ya, atha iterl-areyel, ntwa ingwerenty ipmew atwey-angenh. Ntwanap artwa ingwer-wenh akelty irrytvert-inew, ngay? Nganap angka anyentew awelhey-angenh-anteyarl. Alakenhanap ntwa angka ingkerr-antey awey-angenharl."

<sup>12</sup> Arrantherr angka Akngey-wenh apententy, angka yanhelan apmwan irrarlkemarl. Ingwer-ingweran Akngeyel arrenhantherrenh ayerneyen. Rap alakenh ayerneyen amentew-ament, "Ntwanang angka atyehan apentehn arrayt?" Ingwerentyel apekan arraytayarl apentehn, ingwerentyan arrangkw apekarl. <sup>13</sup> Ingwerenty athamerrey-angenh ingwer-rnemew, renh-rnemarl Akngeyel court-emeleyen. Arlt ament ikwerel athamerrey-angenh-anemarl ra ikwer-rnem. Ingwer-rnemarl athamerremel anehn ingwer-rnemew, rap athamerreyen ikwer-rnemant, mwerr antwemel renh-rnem. Arlt ament rernem rtneyen ater-weny, rarl ingkerrenh ayerneyenheng-areyan.

#### *Christian-rneman mwerr mpwaremel anemer*

<sup>14</sup> Atyehn-rnem, awelhenh-arey. Anyent apek athamerrey-angenh ingwer-rnemew. Christian ra ilelhem. Irrywerremelarl ra angkeyel alakenh. Ingwer-rnemew ra athamerrey-angenh, ranap Akngey-wenh-angkwarr aney-angenh alakenhey, arrangkw. Akngeyel nthakenh apmwa ikwer-wety irrarlkey-angenh, rarl alakenh iterreyelan. <sup>15</sup> Irrepern anyent apek aneyel tyat arrewantherrenh-itwew; panty apek atyenyey-angenh, arnkeweweny-then amern-weny-then arrangkw. <sup>16</sup> Anyent apek ikwer angkem, "Arntarnt-arelh-aynta! Arnkwa ntywety-warl aylpaynta, amern-then arlkwaynta!" Nthekwern alakenh angkey-angenh. Arwarl arrakertelant arrantherr angkeyel alak-ehan, innga antey-angenh irrepern ikwer. Ran aneyel-antey atheperreyel angayakw. <sup>17</sup> Nthakenh Akngey akwerrngelant apentey-angenh, arrangkw. Mwerr mpwaraynteyew ingwer-rnemew alpemeleml, rarl angkeyel-angkwarr-antey. Arrantherr ingwer-rnemew amperngerrey-angenh, arrantherrap Akngeyan apenteyel irrywerremelar.

<sup>18</sup> Anyent apek alakenh angkem, "Ayengan Christian-arl, athan Akngeyarl iterl-areyelarl." Ingwer apek-anem alakenh angkem, "Ayengan Christian, atharl athamerremel mwerr mpwarem ingwer-rnemew." Ayeng James alakenh angkem, "Ayengan Christian-arl, athan Akngeyarl iterl-areyel, atharl mwerr mpwarem athamerremel ingwer-rnemew." Alakenh-anyem Akngeyan apenteyew. <sup>19</sup> Anyent apek alakenh angkem, "Ayengan Christian. Iterl-areyel Akngey. Rant anyent atyetyart ilkwa." Kel mwerr alakenh. Arnty-rnem-alew? Rerneman iterl-areyel arrpemarl, Akngey anyent atyetyart ilkwan. Rernemap atererremel arrewem ikwer-wety.

<sup>20</sup> Ingwerenty apek apmwel-ayeth-antey iterreyel? Angka arrayt nhenhew mwanty awelhemer arrpemarl, raw iterl-areyew. Ra athamerremel mpwarey-angenh ingwer-rnemew, rap nthakenh Christian ilelhey-angenharl. Irrywerremel ra angkeyel.

<sup>21</sup> Arrantherr angka iterl-areyel artwamp Abraham-akert. Akngeyelarl ilanthew, alerikw ikwerenh-antey Isaac anteyew, rap awelhew. Isaac-anem ra tywenew rwewarl irrwerleng, renhap ipmew arrtyeyew-anew. Akngeyelanap anamerl-antey renh artwerek. Ra arew, Abraham-el inngarl apentehn, rap renh arrayt innga antew. <sup>22</sup> Abraham rlterrkarl intem iterrenh ikwer, mwerr mpwaremel, Akngeyelarl ilenh-angkwarr. Ra renh inngarl iterl-arenh, rarl anehn alakenh-anyem. <sup>23</sup> Alakenh Akngey-wenh pipelan aynteyel: "Akngeyelan Abraham arrayt innga antew, rarl rlterrkarl ikwer iterrenh." Rap renh itnewew "Atyeng apely." <sup>24</sup> Anantherran Abraham-apeny

anemer, rlterrk iterremel Akngeyew, mwerr-them mpwarem ingwer-rnemew. Alakenh-anem Akngeyan apenteyew.

<sup>25</sup> Arrantherr iterl-areyel angka ingwer akely Rahab-akert. Ra anenh apmwangkwarr-tangkwel. Awank-akerr artwa Israel-wenh atherr warl ikweren-h-warl irryert-aylpey-alhew, artwernemarl nthwenh-wety, ipmew renh-atherr atweyew. Rahab-el rap renh-atherr alpemelew, mwanty-antey irryert-anterryew. Akngeyelan Rahab arrayt innga anteww arrpemarl, rarl mwerr-angkwarr mpwarem.

<sup>26</sup> Anayntang arrantherr aweyel? Ingwerentyel athamerremel mwerr mpwarey-angenh ingwer-rnemew, nthakenh ra Christian ilelhey-angenh. Ranap artwa weyangkey-angenharl irrem-apenyarl. Rwarr-weny irrem, atnengkanerrem-anem ra. Christian anyentel mwerr mpwarey-angenh ingwer-rnemew, rap rwarr-weny-apenyarl aneyel.

### 3

#### *Mwanty angkaynteyew*

<sup>1-2</sup> Nthakenh akgerr atyetyart aney-angenh tyaty-itwew, ingwer-rnem akalty-anthaynteyewan. Angka ikweren akalty-anthey-angker-rnem Akngeyel rlterrk inngangkwarr court-emeleyen. Alakenh-wety rernem arrayt aney-angker-rnem anemer. Mwanty anantherr anerl-anemer, apmwel-ayeth anantherr ingwer-rnemew angkewerr. Ingwer-ingweran Akngeyel ingkerrenh ayerneyen-h-wety, nthakenh-nthakenh ingkerrenh angkenhan. Rlterrk anewanther, mwerr-angkwarr angkaynteyewan intem. Ingwerentyan apek arrayt angkey-angker, rap arraytayrl anem aney-angker.

<sup>3</sup> Artwa nantew-arenyew iterrehn-arey. Ra ampwal akely ayen-penh arrernem nantew-warl arrakert-warl, rwepel arertenmel. Artwel rwep renh antwerrkerl-apaynteyew, nantew ilkwa arraytel-aynteyew. <sup>4</sup> Rtnwa ilkwew iterrehn-arey. Ampwal akely anteng-itwew ayntem turn-emeleyew-arelh rtnwa renh. Artwa rtneww-artey ampwal akelyel alpemelem, rtnwa ilkwa arrayt akgaynteyew kwaty alay-itwew. <sup>5</sup> Alenyew-anem iterrehn-arey. Irrkaty-angkwarr arrpemarl aynteyel. Akelyarlap ran, ilkwarl arkan. Ranap angkeyew-arelharl. Ikwerel anantherr angkem ingwerekingwer nakelhemel, anper-then aneyew arrkernelhem. Ranap lherrm akely-apenyarl. Lherrm akely-tangkwel ampem, rap ampem ilkwem ilkwem, antywer-angkwarr arlpimperrem. <sup>6</sup> Alenyen rwa lherrm-apeny arrpemarl. Arlka kwenanap ampem, ilpertelem. Aleny ranap ahelengkw-anem irrem, ingkerrenh apmweley-angker. Rwa yanh-lkweranap arrenty ilkwewenap apmer-theyarl apetyem.

<sup>7</sup> Atnwenth ateralh ilek-ilekew iterrehn-arey. Atnwenth ilek-ilek anantherr antwer-rkemel arternpelem: ahern-areny, alker-areny, kwaty-areny. Apmer-itwew-anem atnyenerl-anemel. <sup>8</sup> Alenyenap arrangkw-anteyarl! Aterelerrey inngarl, rtnwem ahelengkw-apenyarl.

<sup>9-10</sup> Alenyen anantherr mwerr-them apmwangkwarr-them angkem. Akngeyew anantherr nakemel aylelherrem, ingwer-rnemew tyel-angkemel-antey arrpemarl. Alakenharl angkeyelan apmwel-ayetharl. Akngeyelan yanh-rnem mpwarew arrpemarl. Nthakenh anantherr atherr-atherr angkey-angenh, arrangkw.

<sup>11-12</sup> Atyenh-rnem, kwaty kwerrinpew iterrehn-arey. Kwaty irlwart arrnginp-them nthakenh ayntey-angenh kwerrinpw antent-itwew. Amern tywerrk nthakenh arlketyerr-angketyarrel aney-angenh. Amern arnwekety nthakenh alatyeyt-angketyarrel aney-angenh. Irrkaty-angkwarr nthakenh anantherr angkey-angenh atherr-atherr alenyel, arrangkw.

#### *Akwerrng mwerr-angkwarran alakenharl aynteyel*

<sup>13</sup> Ingwerntyel apek iterrem, rant akalty amper. Rap arrayt anemer, ingwer-rnemel renh areyew akalty. Rap mwerr mpwarem, ament nakelhey-angenh. <sup>14</sup> Artwa akaltyel ra nthakenh alharkwey-angenh, ahelerrey-angenh-then. Nthakenh ra ilkwa aneyew arrkernelhey-angenh. Nthakenh irrywerremel-then iley-angenh, ingwer-rnemaw akwel ikwer iterreyew akaltyew-arrpantey. <sup>15</sup> Artwa nhelkweranap irrwerl-arenyel alakenh akalty-anthey-angenh, arrangkw. Ranap artwa akalty-arrpanteyarl, ahern nhnenh-areny-anteyarl. Arrenty ilkwelarl alakenh renh akalty-anthew. Inweng Akngey-wenhelanap nthakenh renh akalty-anthey-angenh alakenh, arrangkw. <sup>16</sup> Ingwerenty alharkwey-angkerl, ingwer-rnemanap ra irrwer nemarl. Ingwer-rneman ilkwa anaynteyew arrkernelhem, rernemap ilpertelem, ilek-ilek apmwa mpwaremel ingwer-rnemew.

<sup>17</sup> Akngey-wenh-angkwarranap mwerrarl. Ikweren-h-angkwarran arraytayrl: nthakenh ingwer-rnem irrwerney-angenharl, ament ingwer-angkwarr iterrey-angenharl,

ahelengkw-weny, anyelk-awarr-wenyarl. Mwarrant-arey anem, athamerremel ingwer-ninemew, mwerr mpwaremel.<sup>18</sup> Anyentel ingwer-rnem alpemelem, mwarrant-arey akeleyt anaynteyew, mwerrarlap alakenhan. Rernemap ingkerrenh inkwerelhemel Akngey apentem arraty-angkwarr.

## 4

### *Akngrey-angkwarr intem anaynteyew*

<sup>1</sup> Arrantherran intem iterreyel. Alakenh irrem, arrantherrarl ament-antey iterreyel. Arrantherrap ament iterr-aytem, inkwerelhemel anaynteyew, ingwer-rnemew iterrey-angen. Alakenh-anyemep arrantherr iterreyel.<sup>2</sup> Angwarem arrantherr ilek-ilek mwerr-angker rlengkeny, nthakenh iney-angen. Arrantherrap iterrenh atwerremel ikwer-rnem-they. Ipmew apek-anem ingwerity atwem, ampwal renh-rnemep iney-alkenh. Arraty-angkwarran Akngreyant-tangkwel ayerneyew.<sup>3</sup> Nthakenh ra arrenhantherrenh anthey-angen, arrantherrarl ament iterremel ayerneyelan. Apmwel-ayetharlap alakenhan ayerneyel, ingwer-rnemew iterrey-angenhel.

<sup>4</sup> Arrantherr Christian ilehem, Akngrey arraty apentey-angenharlap arrantherran, arrangkw. Nthakenh Akngreyew ingga ilkelhey-angen, ilek-ilek ahern nhenh-arenyawarl arralty-aneyelan. Alakenh-wenyarl ra aynteyel. Arrantherr apentem ahern nhenh-aren-yrnem, nthakenh arrantherr Akngrey apentey-angenharl.<sup>5</sup> Ran anenhantherrenh kanper iterl-areyel. Ra iterl-arem, anantherr ilek-ilek angwarey-angker. Alakenhewarlap ra anenhantherrenh mpwarewan. Angka ikwerenhelanap alakenh-anyemarl aynteyel.

<sup>6</sup> Ra anthem ilek-ilek mwerr-angker irrwerl-areny anewantherr athamerremel. Angka ikwerenhel alakenh aynteyel: "Anyent ilkwa ilehem, Akngreyan ikwer athamerrey-angenharl. Ingwer akely ilehem, Akngreyan ikwer athamerremarl."

<sup>7</sup> Alakenh-wety arrantherr Akngrey-warl anthelhemer, warrkerremel ikwer. Arrenty ilkwewety rlterrk anemel, Akngreyewant awelhemel. Arrenty rap anterremel arrewantherr-wety.<sup>8</sup> Akngrey-warl angkeperrenhey-alpenh-arey, rap arrer ingga anem arrewantherr-itwel. Ipmelhenh-arey apmwewety. Arratyerrenh-arey-anem. Intem iterrey-angen arrewantherrenharrp-angkwarr. Akngrey-wenh-angkwarrant iterr-aynteyew.<sup>9-10</sup> Inweng anthelheyew ikwer-warl, rap inkwerelhem arrewantherr nakemel. Nthakenh arrantherr nakelhey-angen. Nyerrerremel ilelhenn-arey, angkeperrenhey-alpemel apmwewety.

<sup>11</sup> Atyeh-rnem, tyel-angkey-angen ingwer-rnemew. Ingwerenty apek tyel-angkem ingwerew ayntarrp-ilemel, rap angka Akngrey-wenh arraty apentey-angenharl. Alakenh angkemel rap angka renh apmwelemlar.<sup>12</sup> Akngrey rant anyent atyetyart anewantherr aneyel. Rarlap angkan anewantherr anthew. Rant anyentelarl court-emelem anenhantherrenh. Ingwerenty ra ayerrpelemlar, ingwerentyan ra irrenteyen rwa ilkwewarl intem ampeyel-warlarl. Mwantyelhelenh-arey! Nthakenh tyel-angkey-angen ingwer-rnemew.

### *Anantherr ingkerrel iterl-arey-angen, nthakenh arlt aingwerelan irreyen*

<sup>13</sup> Ingwer-rneman arrantherr angkem alakenh: "Ingwelarreng anantherr alhey, ilek-ilek akngemel apmer ingwer-warl arleng. Anantherrap aney-alhey apmer ikwer-itwew arleng-alenty, tharlemel-aynteyew ilek-ilek inaynteyew-them. Alakenhanrap apwert akngerrarl mpwarem."<sup>14</sup> Nthakenh alakenh angkey-angen! Apal arrantherr angkeyel. Nthakenh arrantherr iterl-arey-angen, ingwepenharl irreyenhelan. Arrantherr kwert-apeny, wetharl rlwar anem-tangkwel, rap ywerrenhem-anem.<sup>15</sup> Alakenh angkenty mwerrarl: "Akngrey ilkelhentyan, ingwepenh anantherr iteth-anteyarl anem. Ra ilkelhentyan, kel anantherr alhem apmer ingwer-warl, tharlemel-aynteyew."<sup>16</sup> Nthakenh arrantherr nakelhemel ilkwarrpantey angkey-angen. Alakenh angkentyan apmwel-ayethar.

<sup>17</sup> Ingwerentyel apek iterl-areyel, alakenh aneyew arraty-angkwarr, rap alakenh anemer. Alakenh apek ra aney-angen, Akngrey-angkwarranap apmwel-ayetharl mpwarem.

## 5

### *Pwertay mwantyelhelenh-arey, ilek-ilek akngerrarl atnyeneyel-rneman*

<sup>1</sup> Ingwerentyel arrantherr akngerrarl atnyenem. Irrpetyapewant ayeng angkeyel aleyan. Ampwal akngerrel arrenhantherrenh ilperteley-angker. Arrantherrap artnemer artewentyel, ingwer-ingweran apmwanemarl aynteyen-hwetyarl.<sup>2-3</sup> Rap alakenh

aynteyel, ilek-ilek mwerr-angker arrewantherrenh kwaty-apenyarlap ran. Ilkwetangkwel, rap artwerretyerrem-anem. Amern arrewantherrenh intenty-apeny. Arnkwa mwerr-angker arrewantherrenh interrkel arlkwenty-apeny, altywer-altywerelem. Apwert arrewantherrenh apmwerrenty-apeny. Ya, ilek-ilek mwerr-angker arrewantherrenh apmwerreyen. Ilek-ilek akngerr mwerr-angker atnyenem arrantherr ankety irremel, ament atnyenem.<sup>4</sup> Arrantherrap akngerr arrernem, warrkerreyew katen-itwew, ilemel payemeleyew renh-rnem arraty-angkwarr. Innganap arrangkwarl! Arrantherrap akelyant payemele, warrk ipmelhentyelan. Rernemap artnem arrewanther. Akngeyelanal renh-rnem awemarl artnentyan.<sup>5</sup> Arrantherrap ilek-ilek mwerr-angker akarrelem, ahern nhenh-itwew inkwerelhemel anemel. Yew-yew, artewenty innga Akngeyan arrewanther ahelerrem.<sup>6</sup> Mwerr-rnem-alew, arrantherarl ayntarrp-ilemel atwem arwa? Rernem arraty anem, arrantherrap ikwer-rnem-wety arlkarerremarl. Rernem ahelerrey-angenh arrewanther, arrantherrap renh-rnem ipmew atwem.

*Akeleyt mpwelhaynteyew, Jesus-arl apey-alpeyenew*

<sup>7</sup> Atyenh-rnem, arternp akeleyt mpwelhaynteyew, Jesus-arl apey-alpeyenew. Artewenty iterrey-angenh. Artwa amern atherrk lyapelpheley-angkerew iterrenh-arey. Ra ahern-tangkwel angernem, ntang-anem riker-anthem. Rap arternp mpwelhem kwatyew rntwentyew. Rap arternp mpwelhem amern atherrk lyapentyew ahern-itwew.<sup>8</sup> Kel alakenhap arrantherran Jesus-ewan arternp mpwelhemer, rlterrk anemel, inngarl ra apey-alpeyen-wety. <sup>9</sup> Nthakenh arrantherr ilterrey-angenh, tyel-angkerrey-angenh, Akngeyel arrenhantherrenh court-emelewerr. Yew-yew, ingwer-ingweran Jesus-arl apetyeyenh-wety, ayern-aynteyew ingkerrenh.

<sup>10-11</sup> Atyenh-rnem, angkakert-rnemew iterrenh-arey. Awank-akerr rernem angka Akngey-wenh ilerl-apen. Ingwer-rnemel renh-rnem irrwernen, pwarrk anthen. Rernemap ipmelhey-angenh, arrangkw. Arternp rlterrk mpwelhenh Akngeyew intem. Rap inkwerelhenh ikwer-rnem, mwerr antwemel. Arranther renh-rnem iwarrenemer. Artwamp Job wethew iterrenh-arey. Rlterrk Karl ikwer ayntenh, Akngeyewant ra intem iterrenh. Rlterrk Karl ayntew-penh, Akngeyan ikwer athamerrenh. Aleyan rlengk Akngey athamerrem ikweren-rnemew irrkaty-angkwarr.

<sup>12</sup> Atyenh-rnem, angka rlterrk ingwer nhenhew iterrenh-arey. Arraty angkayntenh-arey intem. Nthakenh angkey-angenh irrtywerremel. Nthakenh ingwer-rnem terikemeley-angenh. Arwa arraty-angkwarrant angkayntenh-arey! Alakenh arranther tyernemer arraty-antey. Arranther apek arraty angkey-angenh, Akngeyelanal apmwa antweyenh arlta anyent ikwerel, rarl court-emeleyenh-arey akngerr.

*Intem-antey Akngey-warl-athek angkaynteyew, irrpeltherrey-angenh*

<sup>13</sup> Rlterrk anyentew apekan aynteyel, ra apek arlka apmwarl aneyel. Ra Akngey ayernemer alpemeleyew. Ingweran irrngerney apek aneyel. Ra Akngeyew inkwerelhemel aylelhemer.<sup>14</sup> Ingweran arntety apek aynteyel. Ra atyetyart tyaty-arenym rnm ilemer, apetyeyew ikwer-warl. Rerneman Akngey ikwer ayernemer, itepel renh arnep-arnemel, anter alipel renh apernemel. Alakenh-anyem Akngey ikwer ayernemer mwerreleyew, itna Jesus itnewemel.<sup>15</sup> Arrantherarl alakenh ayernem, iterremel Akngeyew, arntety rap mwerrerremarl. Ra apek arntetyerrew, apmwel-ayeth-tangkwel ra anenarl. Akngeyelap apmwa ikwer-wety irrlkem, awakelhey-angenh ikwer.

<sup>16</sup> Alakenh-wety Christian anyentan ilelhemer Christian ingwer-rnemewan, rarl apmwelhelew, sorry-anem angkemel. Rap ilemer, Akngey ikwer ayerneyew. Ra apek arntetyerrew, apmwel-ayetharl anen, Akngeyelanal renh mwerrelemarl.

Alakenharl aynteyel: ingwerenty Akngeyew arraty aneyel, rap Akngeyan alhewerarl ayernem. Rap renh awemarl, mwerr mpwaremel ikwer.<sup>17</sup> Artwamp Elijah wethew iterrenh-arey. Artwamp ra angkakert Akngey-wenh anen awank-akerr. Artwa anantherr-apenyarlap ran. Rap Akngey angka rlterrk-angkwarr ayernew alakenh, "Apmer nhenh arlenyela!" Inngarlap aherrety irrpetyew-atety ayntew artwerrety. Kwaty rntwey-angenh, arrangkw.<sup>18</sup> Ikwer-penhan ra ayernew, kwaty thweneyew-anem. Inngarlap kwatyan rntwew apmer ikwer-itwew. Amern atherrkeny-akerr-anem angkep lyapew ikwer-itwew.

<sup>19</sup> Atyenh-rnem, anyent apek angkeperrem Akngey-wety, apmwel-ayeth-anem anemel. Christian ingweran renh alpemelemer. Arternp-antey ikwer angkemer, raw Akngey-warl angkeperrenhey-alpeyew.<sup>20</sup> Alakenhan mwerrarl. Akngeyel apmwa ikwer-wety irrlkem-anem awakelhey-angenhel, iylpelerremel-anem apmwa ingkerrew.

Kel-antey.